


Eyacuiñajjija
Esohui



New Testament in Ese Ejja (BL:ese:Ese Ejja)

Eyacuiñajjija Esohui

New Testament in Ese Ejja (BL:ese:Ese Ejja)

copyright © 2012 Wycliffe Bible Translators, Inc.

Language: Ese Ejja

Translation by: Wycliffe Bible Translators, Inc.

Ese Ejja [ese], Bolivia

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Ese Ejja

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-23

PDF generated using Haiola and XeLaTeX on 11 Nov 2022 from source files dated 29 Jan 2022

88838088-e20d-51ca-8c91-69194f5ae678

Contents

MATEO	1
MACOSO	57
NOCA	93
HUANI	151
HECHO	197
SHOMANO	254
1 CONITIO	283
2 CONITIO	311
JANATA	329
EPESIO	341
PINIPESSE	351
CONOSENESE	357
1 TESANONISESE	363
2 TESANONISESE	369
1 TIMOTEO	373
2 TIMOTEO	380
TITO	385
PINEMO	389
EMEO	391
SANTIACO	414
1 PENO	422
2 PENO	429
1 HUANI	434
2 HUANI	441
3 HUANI	442
JODE	443
APOCANISI	446

MATEOHUA ESOHUI QUEA PAME NEE TEHUE CANAJE JESOSA QUITOJA MATEO

Jesosa Quitoja etiiquiana
(Noca 3.23-38)

¹ Jiquio esohui etehue'yo Jesosa Quitoja etiiquiana. Yahuajo jama poa ba'a: Dabi Jesosaja etiiquiana poa, Amajama pea'ai. ² E'e, jamaya poa: Amajamaja bacua ejja Isaaca bajjani poa. Isaacaja bacua ejja Jacobo bajjani poa. Jacoboja bacua Joda bajjani poa; echahua mese cuana enequia poa pea'ai. ³ Jodaja bacua cuana Panesi bajjani, pea Sana bajjani poa, Tamaja mejo poa. Panesija bacua Esomo bajjani poa. Esomoja bacua Anami bajjani poa. ⁴ Anamija bacua Aminanami bajjani poa. Aminanamija bacua Nasoni bajjani poa. Nasonija bacua Sanamo bajjani poa. ⁵ Sanamoja bacua Bosi bajjani poa, Shajamija mejo poa. Bosija bacua Obeda bajjani poa, Shotija mejo poa. Obedaja bacua Isai' bajjani poa. ⁶ Isaija bacua emeshi mese Dabi poa. Dabija bacua Sanomoni bajjani poa. Sanomonija enaese e'ahuemano poa, Oniaja quijjojea, Dabija huana'yo poa. ⁷ Sanomonija bacua Shobiami bajjani poa. Shobiamija bacua Abiase bajjani poa. Abiaseja bacua Asa bajjani poa. ⁸ Asaja bacua Josapati bajjani poa. Josapatija bacua Jonami bajjani poa. Jonamija bacua Osia bajjani poa. ⁹ Osiaja bacua Jotami bajjani poa. Jotamija bacua Acasi bajjani poa. Acasija bacua Esequia bajjani poa. ¹⁰ Esequiaja bacua Manase bajjani poa. Manaseja bacua Amoni bajjani poa. Amonija bacua Josia bajjani poa. ¹¹ Josiaja bacua Jeconia bajjani poa; echahua mese cuana enequia poa pea'ai. Jeconia nequinajejo, Babinonia dejja cuaa Isaeni cuana iña majje dojo ca poa oja meshi yasijje sosema' chaco meeya.

¹² Majoya Babinonia meshi yasijje dojo majje Jeconiaja bacua Sanati cuaya poa. Sanatija bacua Sonomame bajjani poa. ¹³ Sonomameja bacua Amioni bajjani poa. Amionija bacua Eniaqui bajjani poa. Eniaquija bacua Asoni bajjani poa. ¹⁴ Asonija bacua Sanoco bajjani poa. Sanocoja bacua Aquimi bajjani poa. Aquimija bacua Eniodi bajjani poa. ¹⁵ Eniodija bacua Eneasaja bajjani poa. Eneasaja bacua Matani bajjani poa. Matanija bacua Jacobo bajjani poa. ¹⁶ Jacoboja bacua Jose bajjani poa. Oya Maniaja yahue poa. Maniaja bacua Jesosa bajjani aca poa, Quito bajjani pea'ai poa, Eyacuiñajija huoojea'yo ojjaña cuana jaahuanajji.

¹⁷ Jamajjeya Amajamaja bacua ejja tii majje jea ca poa pea. Majoya tii majje ohuaya pea jea ca poa. Jamaya aca poquiapoquia poa. Quijje nei etiiquiana Dabi cuaya poa. Etiiquiana Amajamaja jeaja osecua cuana 14 poa Dabi cuaya jjimahuajo. Majoya oya jayojja Dabija bacua ejja tii majje jea ca poa pea. Tii majje ohuaya pea jea ca poa. Quijje nei Dabija osecuaja jeaja osecua cuana 14 poa majje, dejja mase cuaa etiiquiana cuana Babinonia meshi yasijje dojo ca poa. Majoya Babinonia meshi yasijje poqui majje oya jayojja aca poquiapoquia poa. Majoya quijje nei Jesosa Quito cuaya poa Joseja tii mee. Ma etiiquinaja jeaja osecua cuana 14 poa Jesosa Quito cuaya jjimahuajo. E'e, jamaya poa.

Ebacua Jesosa Quito cuaya poa
(Noca 2.1-7)

¹⁸ Jesosa Quitoja ecuaya'yo jama poa ba'a: Joseja Mania emese na poa. Mania bii ania poa; dejja cuana ba jjima poa. Jamatii o'ejji poa. Eyacuiñajija Edojjoshahua Pameya ebacua ba'e mee ca poa, Maniaja ebacua. ¹⁹ Jose quea pame nee poa. Jamajjeya Mania o'ejji poajo jhahuanaqui sa po ajja poa. Jjashahuabaquia poa jama ba'a: —E'e pojja'a Mania pea cojojji poanaje. Jamajjeya oya jamejoquinaje. Eyaya oya cajaa aje. Quehuajje cajaa aje Mania, pea cuanaja ba jjima. Jamajjeya pea cuana Maniajo maimai ajja poaje.

²⁰ Jamaya jjashahuabaquianijo Joseya cahuiba ca poa. Oe Eyacuiñajija esohuidojojji miminaje onijje. Jama poanaje ba'a: —Jose, ja'a Mania cajaa ajji! ¡Oya huanacue! Oja bacua Eyacuiñajija Edojjoshahua Pameja ba'e mee. ²¹ Ojaya ebacua cuayaje. Jamajjeya jiquio ebacua tii majje ojaya epeejji cuanaja mimishi cuijea'yojji poaje. Jamajjeya ojaya ebajjani poaje Jesosa.

²² E'e, Eyacuiñajija esohui huohuijija esohui yahuajo nei nei jayojjaya jjeya nei jamaya poani. Jamaya yahuajo poa ba'a:

²³ “Epona sho'i bii ani jamatii o'ejji poanaje. Cuayajo oja bacua bajjani acaje Emanuel. Ese Ejjaja esohuijo ca jama ba'a: Eyacuiñajija ecuana nijje nequi”. Jamaya Joseya cahuiba ca poa.

²⁴ Majoya shequi'yo majje Eyacuiñajija esohuidojojija esohuijo Mania huana canaje, Joseya. ²⁵ Jamatii ebacua cuaya jjimajo, Joseja Mania napa jjima poa. Ebacua cuayajo Jesosa bajjani acanaje.

2

Dejja cuana majametajo jjashahuaba neineiquiani poeyanaje Jesosa baa

¹ Jesosa cuayanaje Jodea meshijo, Benena cuiñajijo. Cuayanajejo dejja Enode bajjani emeshi mese poa. Jamajjeya Jesosa Quito cuayanajejo, pea dejja cuana majametajo jjashahuaba neineiquiani, eshequi poeje mijijje meshijo ba'e quea huesha nee poeyanaje Jenosanena cuiñajiji yasijje. ² Majoya oya cuanaa Enode huohui'ajja canaje jama ba'a: —Emeshi mese, ¿achejo jaa ebacua esho'i nei, ma Jodio cuanaja Emeshi Mese poaje'yo? Pea meshijo eshequi poeje mijijjejo nequi ojaya majameta ai quea jiji nee nee ecuaa banaje. Majoya ecuaa poeyanaje o bihuiuiaa —poanaje.

³ Jama huohui'ajjame acajje emeshi mese Enode quea ajjajja nee nee poanaje. Ojjaña dejja cuana Jenosanenajo ba'e pea'ai quea ajjajja poanaje. ⁴ Jamajjeya Enodeya ojjaña Eyacuiñajiji nijje emimijiji etii cuana, ojjaña Moisesija esohui etehue'yo huohuijiji cuana pea'ai iyaa canaje o que. Jama huohui'ajjame acanaje ba'a: —¿Achejo shai cuayaje ebacua Quito? Oya Eyacuiñajija huoojea'yo ese jaahuanajiji poaje'yo —acanaje Enodeya.

⁵ Oya cuanaa huohui canaje jama ba'a: —Quito Benenajo cuayaje, Jodea meshijo. Yahuajo nei nei huohui canaje Eyacuiñajija esohui huohuijiji jama ba'a:

⁶ “Cuiñajiji sisi Benena bajjani Jodea meshijo yani. Pea cuiñajiji cuana quea quemo Jodea meshijo yani pea'ai. Benena cuiñajiji quea biso. Jamatii jomajo cuayaje Isaeni dejja cuanaja Emeshi Mese quea pame nee. Ohuaya Eyacuiñajiji epeeji cuana jaahuana caje'yo”.

Jamaya aca poa esohui huohuijiji yahuajo nei nei —oya cuana poanaje.

⁷ Emeshi mese Enodeya dejja cuana eshequi poeje mijijje ba'e iyaa ca o'oyanaje o que. Quehuajje huohui'ajja canaje ebacujajo. Ma dejja cuana huohui canaje ache mecajje majameta ai quea jiji nee nee ba coo canaje, ebacua cuayajo pojja'a. ⁸ Ebacujajo huohui mee majje Enodeya oya cuana huoojea canaje Benena huasijje ebacua baa. Jama huohui canaje Enodeya: —¡Poquicue miya! ¡Ebacua sa'ajja neineiquicue! ¡Ba'yo majje poecue! ¡Eya huohuihuacue achejo ebacua jaa! Jamajjeya eya poquije pea'ai ebacua bihuiuiaa —Enode sijaje poanaje.

⁹ Emeshi mese Enodeya huoojea cajje ma dejja cuana poquinaje ejiojijje. Ejiojijjo poquinajijo majameta ai quea jiji nee eyajo ba ca o'oyanaje ehui dojojji, yahuajo jama. Majameta ai nequi cojja nei poqui'yonaje ebacua huasijje. Majameta jijinequinaje tii ebacua jaa cojja nei. ¹⁰ Majameta jijiqui ba majje quea bihui nee nee poanaje oya cuana. ¹¹ Equi yasijje dobiquinaje. Ebacua Jesosa ba canaje enaese nijje, Mania nijje. Ba majje ebacua bihuiu canaje ecui'oshajjajo nequiya. Bashosoco pichojea majje acquiana quea nahue quia canaje ebacujaja. Mei huo'o quia canaje, shiyeshiye quea nahue quia canaje, esei quea shiye nee quia canaje pea'ai. ¹² Majoya ma dejja cuana jjacahuibaquinajijo, Eyacuiñajiji onijje miminaje jama ba'a: —¡A'a poqui o'oyajji emeshe mese Enode yasijje! Jamajjeya oya cuana poqui o'oyanaje oja meshi yasijje pea ejiojijje. Enode bana'yo jjima aca poa.

Ebacua Jesosa quehua dojo canaje Ejito meshi yasijje

¹³ Majameta eba neinei'yojji dejja cuana poqui'yo majje Eyacuiñajija esohuidojojiji poeyanaje Jose que, Jose ecahuujajjo. Miminaje Jose nijje jama ba'a: —¡Shequicue oe! ¡Nequisohuacue oe! ¡Ebacua, enaese pea'ai dojocujajje jjeyahua nei Ejito meshi yasijje! ¡Jomajo nequicue! Quijje eyaya miya huohuije miqcue meshi yasijje epoe o'oyajji. Jjeya emeshi mese quea maseya Enode bajjanija ebacua sa'ajja neinei cani equacuajja'yojji.

¹⁴ Jose nequisohua majje ebacua, enaese pea'ai dojocujaji canaje ejiojijje Ejito meshi yasijje, mecashono. ¹⁵ Ejito meshijo nequi'yonaje emeshi mese Enode eshe nequijo. Enode mano'yajo Isaenija meshi yasijje poe o'oyanaje, Jose. Jamajjeya Eyacuiñajija esohui huohuijiji esohui yahuajo nei nei jayojja jama poa. Eyacuiñajija esohui tehue ca poa yahuajo nei nei jama ba'a: “Ecuea ebacua Ejito meshijo ba'e eyaya iyaa'yonaje”.

¹⁶ Emeshi mese Enodeya ba canaje dejja majameta eba neinei'yojji cuanaa oya dasia ca poa. Jamajjeya oya quea quene nee nee poa. Oja sohuinano cuana huoojea ca'ya poa: —¡Ojjaña ebacua joya tonatona ai'ai quecuajjaquicue! ¡Benenajo ba'eja ebacua dejja sho'i cuana, Benena pejjejo ba'eja pea'ai oe quecuajjaquicue!

Jamajjeya mano'yonaje ojjaña ebacua dejja sho'i daqui she becanejjijji pea'ai epo tonatona ai'ai, esho'i nei pea'ai.

E'e, majameta eba neinei'yoyji deja cuanaja ehuohui'yojo, majameta ai quea jiji nee poanaje, ojjaña ebacua quecua sa poa Enode. ¹⁷ Eyacuiñajjija esohui huohuijji Jenemiaja esohui yahuajo nei nei jayojja jama aca poa Enodeya. Ebacua cuana quecua ca'ya poa jamaya. Jenemiaa aca poa jama ba'a:

¹⁸ “Shama cuiñajjijo eyiyo ao'ao cuiñajjijo quea shajjaquijjo. Ojjaña janobajjima nei nei pa tiiiti'yani. Jodio enaese cuana pa'añani oja bacua cuana mano'yajo. Quea yeno nee nee. Papajea'yo ajja”.

Jamaya etehue'yo yahuajo nei nei poa.

Ebacua Jesosa Ejito meshijo ani poe o'oyanaje

¹⁹ Emeshi mese Enode mano'yajo Eyacuiñajjija esohuidojojji poeyanaje Jose que, Jose cahuijaajo, Ejito meshijo ba'ejo. ²⁰ Huohui canaje jama ba'a: —¡Nequisohuacue, oe! ¡Ebacua, ojaya enaese pea'ai dojoyocue Jodio meshi yasijje! Emeshi mese Enode mano'yonaje, ma ebacua Jesosa quecua'yoyji nisho poanaje.

²¹ Jamajjeya Joseya nequisohua majje ebacua Jesosa, enaese pea'ai dojoyo ca o'oyanaje oja meshi yasijje, Jodioja meshi yasijje. ²² Enodeja bacua ejja Aquenao bajjani Jodea meshi mese eyacua poanaje. Jose jama shajja'ajja majje quea mete poanaje ma meshijo eba'ejji. Eyacuiñajjija huohui canaje Jose jjacahuibaquianijo: —¡Janinea meshi yasijje poquicue, Jose!

Jamajjeya Jose poquinaje Janinea meshi yasijje ba'e'yohua. ²³ Nasanena cuiñajjijo Jose ba'enaje. Jamajjeya Eyacuiñajjija esohui huohuijji esohui yahuajo nei nei jayojja jama poa ba'a: “Quijje pishana oya Nasanenajo ba'e deja bajjani acaje”.

3

Huaniya esohui huohui canaje quima huasijje

(Macoso 1.1-8; Noca 3.1-9, 15-17; Huani 1.19-28)

¹ Jesosa Nasanenajo ba'yanijo, Huani, ona besameejji poani poeyanaje Jodea meshi yasijje. Deja cuana meshi jabojo anica huasijje sohuihuohui huicha'a huicha'a canaje Huaniya. Jama acanaje ba'a: ² —¡Miquea mimishi cuanajo quea yeno pocue; miquea mimishi cuana pajea'yocue! Jjeya nei Eyacuiñajji poeje ojjañaja Emeshi Mese nei nei — acanaje.

³ Isaiia Eyacuiñajjija esohui huohuijjiya jama huohui ca poa yahuajo nei nei Huanijo ba'a:

“Oe deja meshi jabojo nequi taaanequije. Jama poaje ba'a: —¡Iquico ecua Emeshi Cuiñajji nei nejia ejiojji shabo jea cani jama, quea pojje nee nee acani jayojja jamaya ¡miqua ejjashahuabaquijji tai quea bojea nee nee a'yocue! Emeshi Mese nei nei poeje”.

Jamaya Isaiia yahuajo nei nei tehue ca poa.

⁴ Huaniya huo ña, cameno ña oja sipi huosho canaje. Ejjayica'aquijji ejee iya canaje. Shacui ijji canaje, huini pea'ai ishi canaje Huaniya. ⁵ Quea huiso deja cuana Jodea meshijo ba'e, pea cuana Jenosanenajo ba'e pea'ai, pea cuana cuei Jodana sahuajo ba'e pea'ai Huani que poeyanaje o shajja'ajjaa. ⁶ Oya cuana quea mimishi poanijo quea yeno poani. Jamajjeya oja mimishi cuana huohui ca'yonaje. Mimishi cuana pajea sa poanijo, Huaniya oya cuana Eyacuiñajji nijje epo'yoyji besa mee canaje Jodana cueijo.

⁷ Jodioja esohui huohuijji Paniseo bajjani cuana, Sanoseo deja cuana pea'ai poeyanaje Huani que; Eyacuiñajji nijje ejjapeequi'yoyji nisho besa'yo sa poani pea'ai. Huaniya oya cuana ba majje tecuea canaje. Jama acanaje ba'a: —Miyá peyo jama, jjadasiaquiani. ¿Aya acuae mi huohui canaje? Jama ba'a: “¡Eyacuiñajjijo besa meecue! Jamajjeya ojaya miquianaya enapa'yoyji pojjeama”. ⁸ Chojja. ¡Quea pame tii oe ba'e'yocue! ¡Mimishi cuana oe pajea'yocue; a'a quea jjashahuabaqui tai po o'oyajji! Jamajjeya miya Eyacuiñajjija enapajji pojjeama. ⁹ A'a jjashahuabaquijji jama ba'a: “Amajama ecuanaja etiquiana. Oya quea pame nee poanaje. Ecuana Amajamaja bacua poanijo, Eyacuiñajjija enapajji pojjeama”. Chojja de. Miquiana Amajamaja bacua quea mimishi poanijo, Eyacuiñajjija cajaa mi acaje'yo. E'e de, ohuaya pea Amajamaja bacua jayojja epojji pana caje'yo pojja'a mei, meshi pojja'a —Huaniya acanaje.

¹⁰ —Jama ba'a: Acui tai sajja jajacajja caje'yo cuaqui cabojjiya. Ejjajja chamajo acui cajaa acaje'yo. Jajajea'yo majje dahuajja caje'yo. Deja mimishi acui tai jayojja jama acaje'yo Eyacuiñajjija; cuaqui yasijje jea caje'yo. ¹¹ Eyaya miquianaya Eyacuiñajjijo besa meeje'yo enajo, ca miqque mimishi cuana epajea'yojo. Quijje pishana poeje Quito. Ohuaya mi que Eyacuiñajjija Edojjoshahua Pame dobiqii mee caje'yo. Jamajjeya miya quea pame poaje'yo. Mimishi cuana pajea sa po'yo ajjajo ca ca jeajea caje'yo cuaqui yasijje. Jamaya pea'ai ba'a: Quito oe nei quea ca'a nee nee nequi. Eya ca iña quea ca'a pishana nequi. Jamajjeya eya ca iña onijje nequi sa po ajja miquiana que cojja. Quea bicho. ¹² Dejjaa oja

tepeya shaa dojo mee majje anoso iya ca'yani equijo; eshaa dahuajea cani. Jiquio ecua anoso shaa dojo mee cani jama eseya acaje'yo Eyacuiñajjiya. Joya quea pame nee ba'yani jaahuana caje'yo tii. Mimishi cuana ca ca quiyoea canequije'yo tii tii.

Huaniya Jesosa Eyacuiñajjiyo besa mee canaje
(Macoso 1.9-11; Noca 3.21-22)

¹³ Majoya Jesosa Janinea meshi yobijo ani macua huasijje po'oquequinaje Jodana cui yasijje Huani que. Jesosaa Huani ba majje jama acanaje ba'a: —Huani, jeya besa meecue Eyacuiñajjiyo, miyaya!

¹⁴ —Chojja, Emeshi Mese —Huani poanaje—. ¡Miyaya eya besa meecue Eyacuiñajjiyo, miya quea pame nee neejo! ¿Yajjaje miya e que poe'yonaje? Eya ca ca iña quea pame pishana, de.

¹⁵ —¡Eyaya huohuafia jama miyaya a'yocue! ¡Jamajjeya Eyacuiñajjiya ehuhui'yo ejo acue! —Jesosa poanaje.

Jamajjeya Huaniya Jesosa besa mee canaje Eyacuiñajjiyo. ¹⁶ Huaniya Jesosa besa mee majje jjequicuaya ca'yajje, ba canaje eyatahuatahua ca'apejo canaje. Eyacuiñajjiya Edojjoshahua Pame huia' jama o sapa biajje cuabesa ba'enaje. Ecapashinei ba'eoquenaje. ¹⁷ Eyacuiñajjiya oja Bacua Ejja jama acanaje ba'a: —Miya ecue Bacua Ejja quea jea nee nee. Eya mijo quea bihui nee nee poani.

4

Jesosa quea mimishi po mee sa acanaje Edosiquiaa
(Macoso 1.12-13; Noca 4.1-13)

¹ Jjeyahua nei Edojjoshahua Pameya Jesosa quima huasijje meshi jabo huasijje huoojea canaje. Majoya Edosiquiaa Jesosa quea mimishi po mee sa acanaje. ² Jesosa jomajo nequinaje peaja ejiojji cahui huisome, 40 cahuime. Mahuiso epojja, mecajje pea'ai nequinaje quimajo bobima' nei nei. Majoya quea shoe poanaje. ³ Majoya aje Edosiquiana poeyanaje Jesosa que; miminequinaje jama ba'a: —Miya Eyacuiñajjiya Bacua Ejja jjabaqui majje ¡miyaya jiquio mei cuana pahui jayojja acue, miquea e'ijijajji!

⁴ —Chojja de. ¡Bacue Eyacuiñajjiya esohui etehue'yo! Jama poani ba'a: “Dejja cuana bobijo ca'a po majje pojjeame ba'e tiitiije'yo. Ojjaña Eyacuiñajjiya esohui jayojja jama añajo ca se ca quea pame nee ba'e tiitiije'yo”.

Jamaya aca poa —jamaya Jesosa poanaje.

⁵ Majoya Edosiquiaa Jesosa dojo canaje Jenosanena huasijje. Jomajo Eyacuiñajjiya equi quea ao nee nee yasijje nequisohuaqui mee canaje; equi jamacoo biajje nequi mee canaje. Jama acanaje ba'a: ⁶ —Miya Eyacuiñajjiya Bacua Ejja jjabaqui majje ¡tohuaacue meshi yasijje! Jamajjeya Eyacuiñajjiya esohui jama etehue'yo jaa ba'a:

“Eyacuiñajjiya esohuidojojji cuana huoojea caje mi yasijje, mi jaahuanaa. Oquequiajo ojaya emeya miya iñajjequisohua caje'yo, ohuaya. Jamajjeya miya ejajiojji quecuasajaqui jjima poaje meijo”.

⁷ Jesosa onijje miminaje jama ba'a: —Chojja. Yahuajo jama Eyacuiñajjiya esohui etehue'yo pea'ai ba'a:

“A'a jama ajji ba'a: —¿A'a e'e jojo nei Eyacuiñajjiya oja sohui acaje'yo pojja'a? ¿A'a eya Eyacuiñajjiya jaahuana nei caje'yo? ¡Caba'ajjasahua! —a'a pojji”.

Jamaya yahuajo nei Moisesiya tehue ca poa —Jesosaa acanaje.

⁸ Majoya Edosiquiaa Jesosa dojosohuaqui canaje eyiyo ao huasijje. O shajja'ajjaji nisho jamaya Edosiquiaa Jesosa huohui canaje: —¡Bacue ojjaña meshi cuana, emeshi mese cuana pea'ai, cuiñajji cuana, aquiana quea nahue cuana pea'ai! Ojjaña quea pame nee nee. ⁹ Ojjaña jiquio aquiana cuana, dejja cuana pea'ai miquea poaje'yo; miya Emeshi Mese nei nei eyaya po meeje'yo jjeya nei ca miyaya eya bihuia'yajo ecui'oshajjajo nequi majje —jama siajje ameya acanaje Edosiquiaa Jesosa.

¹⁰ Jamajjeya Jesosaa jama huoojeajeame acanaje ba'a: —¡Chojja Edosiquiana! Eyaya miya bihuia ajja, de. ¡Poquicue miya! Jamaya Eyacuiñajjiya esohui etehue'yo yahuajo pea'ai ba'a:

“¡Eyacuiñajji oe nei bihuiaacue! Oya oe nei ojjañaja Emeshi Mese nei nequi. ¡Ojaya esohui jama oe acue!”

¹¹ Jamajjeya Jesosaa huoojea cajje Edosiquiana, Satanasa poqui'yonaje. Majoya Eyacuiñajjiya esohuidojojji cuana quea huiso poeyanaje Jesosa jaahuanaa, bobiaa pea'ai.

Jesosaa esohui huohui canaje Janinea meshijo
(Macoso 1.14-15; Noca 4.14-15)

¹² Quijje pea cuaa Huani, ma ona besameejji poa jeanobiajea canaje. Shajja'ajja majje Jesosa posohuaqui o'oyanaje oja meshi yasijje, Janinea meshi yasijje. ¹³ Oya nequiñajji

jjima Nasanenajo. Pea cuiñajji yasijje, Capenaoma huasijje poquinaje ba'eya. Janinea bae sahuajo, Samononi meshi, Netani meshi pea'ai pejejo ba'enaje. ¹⁴ Yahuajo nei nei Eyacuiñajjija esohui huohuijjiya Isaiiaa huohui ca poa jama ba'a:

¹⁵⁻¹⁶ “Ojjaña cuana quea mimishijo, esohui ba jjimajo quea apo ba'yani. Eyacuiñajji ba majje oya cuana quea ja'a nee ba'e mee caje'yo. Eyacuiñajji ojaya ba jjimajo quea yeno nee ba'yani. Jjeya ca ca quea jaji nee ba'e mee caje'yo. E'e, Samononi meshijo, Netani meshi pea'aijo, Janinea bae sahuajo ba'eca cuana, Cueji Pashi ma Jodana cuei bajjani sahuajo, ojje ba'eca cuana, Janinea meshijo, pea bajjani Ese Ejja sohuijo ba'a: Eyacuiñajji ba po jjimaja meshijo ba'eca cuana pea'ai quea mimishi poanaje. Jjeya ca ca quea ja'a nee ba'e mee caje'yo”.

Jamaya Isaiiaa huohui ca poa yahuajo nei nei Jesosaja epoejjijo.

¹⁷ Majoya Jesosaa esohui huohui canaje jama ba'a: —Jjeyahua nei Eyacuiñajji miquea Emeshi Mese nei poeje. Jamajjeya imiquea mimishijo quea yeno pocue! ¡Mimishi cuana pajea'yocue miquiaaya! —acanaje.

Jesosaa nahuoo cuiashajaji iyaa canaje onijje epo'yojji
(Macoso 1.16-20; Noca 5.1-11)

¹⁸ Majoya Jesosa poquinaje Janinea bae sahua huasijje. Jomajo ohuaya Anesi, Anesija o'i Peno bajjani, ma Simohui pea'ai bajjani ba canaje. Oya cuana nahuoo cuiashajaji nei nei bajo. Nahuoo cuiashaja cani. ¹⁹ Jesosaa oya cuana iyaa canaje: —¡Enijje po'yocue! Eyaya miya dejja cuana jjequi meesahua'yojji aje'yo e que.

²⁰ Jjeyahua nei nei oya cuana ojaya eshajaji cuana jeana'yo majje onijje poqui'yonaje.

²¹ Majoya Jesosaa poqui pishana majje pea cuana ba canaje. Semeneoja bacua ejja Jacobo ba canaje ojaya echahua mese nijje, Huani nijje. Bishe aijo eshajaji je'e'yo po'ani ba canaje. Jjeyahua nei Jjehosaa oya cuana iyaa canaje. ²² Jamajjeya Jesosaa iyaa cajje oja chii Semeneo bishejo ani tii jiña ca'ya poa cuaa Jesosa nijje epoqui'yojji.

Jesosaa pea esohui huohui canaje emanojaa cuana huaquia mee ca'yonaje
(Noca 6.17-19)

²³ Jesosa poquinaje ojjaña cuiñajji cuana huasijje Janinea meshijo. Jodio dejja cuanaja equi ojee ejjachichaquijji yasijje dobiquinaje esohui huohuiya. Jama poanaje ba'a: —Eya ojjañaja Emeshi Mese poaje'yo.

Ohuaya quea huiso emanojaa cuana jjaajaqui mee ca'yonaje, huaquia mee ca'yonaje pea'ai. ²⁴ Quea huiso Sinia meshijo ba'eca cuaa Jesosaa huaquia mee ca'yoqui shajja'ajja canaje pea'ai. Jamajjeya o que jjequi canaje quea huiso emanojaa cuana. E'e, ojjaña cuana quea nee poani, pea cuana niñepoqui cuana, jjequi'ihuicajaa cuana pea'ai, jiojjijajja cuana pea'ai o que jjequi canaje. Ojjaña cuana huaquia mee ca'yonaje, jjaaja meequi ca'yonaje, Jesosaa. ²⁵ Jamajjeya Jesosa poquianijo, quea huiso nee nee cuana ojee poquinaje onijje. E'e, dejja cuana quea huiso nee, ponaponaña pea'ai Janinea meshijo ba'e cuana, Jenosanenajo ba'e cuana, Jodea meshijo ba'e cuana, pea Ome miji pea'ai Cuiñajjijo ba'e cuana, Cuei Cueji Pashijo Jodana cuei ojje mijijje ba'e cuana pea'ai; quea huiso nee nee Jesosa nijje poquinaje.

5

Jesosa eyiyojo aniya esohui huohui canaje
(Noca 6.20-23)

¹ Dejja quea huiso cuana ba majje Jesosa eyiyo huasijje jaasohua pishanaquinaje. ² Jomajo anioque majje ojjaña cuana sohuihuohui canaje jama ba'a: ³ —¡Bacue! Beca cuana jjashahuabaquiani jama ba'a: “E'e, de, eya quea mimishi nee. ¡Eyacuiñajjija ecuea mimishi cacuijea ca'yahua!” Jamaya jjashahuabaquianijo Eyacuiñajjija oya ba'e tiitii mee caje'yo onijje eyajo. ¡Oya cuana quea bihui nee capo'yahua! ⁴ Oja epееjji cuana mimishijo quea yeno poanijo, Eyacuiñajjija quea bihui nee po mee caje'yo mimishi cuijea ca'yajje. ⁵ Ojaya epееjji cuana quea bei poani Eyacuiñajjija quea jea nee; onijje ba'e tiitii mee caje'yo. ¡Quea bihui nee capo'yahua oya cuana!

⁶ —Ojaya epееjji cuana Eyacuiñajjija esohui jayojja jama a sa neinei poanijo, Eyacuiñajjija oya cuana quea jaji nee nee ba'e meesahua caje'yo. ¡Quea bihui nee capo'yahua oya cuana!

⁷ —Ojaya epееjji cuana pea cuanajo jjashahuabaquiani pea jaahuanajji. Jamaya poanijo pea cuaa, Eyacuiñajjija pea'ai oya cuana jaahuana caje'yo. Tecue'ama poaje'yo ona nijje. ¡E'e jojo nei quea bihui nee capo'yahua ojaya epееjji cuana! ⁸ Ojaya epееjji cuana mimishi cuana a'ajjajo Eyacuiñajji nijje ba'e tiitije'yo. ¡Quea bihui nee capo'yahua oya cuana! ⁹ Ojaya epееjji cuaa pea cuana quea bei po meesahua canijo, ojjañaja eba oya cuana Eyacuiñajjija bacua cuana e'e jojo nei; quea pame nee. ¹⁰ Ojaya epееjji cuana quea ja'a nee

ba'yanijo, onaaya oya cuana cuia caje'yo. ¡Jamatii oya cuana quea bihui nee capo'yahua! E'e, quiije eyajo oya cuana ojjaña huoojea'yojji enijje poaje'yo —Jesosaa huohui canaje.

¹¹ Majoya Jesosa Quitohua ojaya epeeji cuana huohui canaje jama ba'a: —Miquianaya ecuea epeeji poanijo, pea cuana minijje mimijajije; miya napa caje pea'ai, siajje poaje mijo pea'ai. Jamatii Eyacuiñajijiya miquianaya quea bihui nee po mee caje'yo. Eyajo onijje ba'e tiitii mee caje'yo. ¹² E'e, Eyacuiñajijiya esohui huohuiji yahuajo nei nei ba'ya poa cuana jamaya aca poa mimishi cuaa; napa ca poa pea'ai. Jamajjeya ¡ona jayojja jama pocue, quea bei! Eyacuiñajijiya miquianaya ojee ba'e mee caje'yo tiitii eyajo quea bihui nee nee —Jesosaa huohui canaje.

*Ae jayojja Eyacuiñajijiya epeeji
(Macoso 9.50; Noca 14.34-35)*

¹³ —Ecuea esohui jayojja jama añajo, pea cuana mi jayojja jama ba'eje quea pame nee pea'ai. Jamajjeya miya sane jama, mei sese jama. Mei seseya shicui cajje bobi ihui'yo ajja poani. Jamatii mei sese sese'ama poa jojjemo ¿a'a quea sese po meeje o'oya? Chojja. Sese'amajo quea huesha jeajea'aña seya. ¡Iquio ecua sane sese'ama jeajea'aña seya jama miya ecuea esohui jama po ajjajo, cajaa achana' eyaya.

¹⁴ —Enijje ¡japeequianijo miquianaya cuaquijiji jama. Cuiñajiji emaco ao'aojo nequi ba caje cuaa quea huesha nee mecajje pea'ai. ¡Iquio ecua emacojo nequia jama ecuea epeejiya pea cuana Eyacuiñajiji ba meesahua caje'yo enijje ¡japeequianiya jjejojo. ¹⁵ Cuaquijiji sisi capaca ajja. Chojja. Cuaquijiji sisi nequia cajji acui biajje, ojjaña equijo ani cuana jeaja'ajji. ¹⁶ ¡Iquio ecua cuaquijijiya ojjaña equijo ani jeaja'a cani jayojja jama quea pame nee ba'ecue! Jamajjeya miquianaya quea pame ba majje pea cuana Eyacuiñajiji, esejaya Chii eyajo bihuia caje'yo —Jesosaa poanaje.

Moisesija esohui etehue'yo quea pame nee

¹⁷ Jesosaa pea esohui huohui canaje jama ba'a: —Eyaya Moisesija esohui yahuajo etehue'yo cajaa a'ajja. Eyacuiñajijiya esohui huohuiji cuanaja esohui yahuajo nei eyaya cajaa a'ajja pea'ai. Cho. Eya poeyanaje onajaya esohui jama a'yohua. E'e, oya cuaa yahuajo nei nei ejo huohui ca poa. ¡Jeya eyaya onajaya esohui jayojja jama aje'yo. ¹⁸ E'e jojo nei ojjaña Moisesija esohui cuana cajaa pojjeama poaje'yo. Ojaya esohui biso nei pea'ai cajaa pojjeama poaje'yo. Quea pame nee ani tiitii'yo. Jamajjeya ojjaña ojaya esohui yahuajo nei nei etehue'yo jama aje'yo. Ojjaña apoa ajeyo'yo majje ecuea echacoji ¡iquio meshijo apoa poaje'yo. ¹⁹ Jamajjeya joya Moisesija esohui etehue'yo jama ba'e sa po ajjajo, oja sohui jama pojjeama huohui cajo, enijje ba'e meeme ajja quiije eya ojjañaja Emeshi Mese nei poajo. Joya Moisesija etehue'yo jama acani, oja sohui jama huohui cani pea'ai ca ca enijje ba'eje'yo quiije eya ojjañaja Emeshi Mese oe nei poajo. ²⁰ ¡Bacue! Moisesija etehue'yo huohuiji poani, Jodioja esohui huohuiji Paniseo bajjani cuana pea'aia quea pame nee huohui ajja; quea pame ba'e ajja pea'ai. Jamajjeya miquiana ona jama ba'yajo, ona jama huohuijajo pea'ai miquianaya ba'e ajja enijje quiije eya ojjañaja Emeshi Mese nei poajo —Jesosaa poanaje.

Moisesija etehue'yo yahuajo nei quea pame pishana Jesosaja ehuhui'yo quea pame nee

(Noca 12.57-59)

²¹ —Miquea eba Moisesija etehue'yo yahuajo jama ba'a: “¡A'a pea quecuajji!” Jamajjeya pea quecuajji epo dojo caje'yo cuaa emeshi meseja deaja huoojeajji yasijje. ²² ¡Jeya ecuea esohui eyacua shajja'ajjacue oe! Ojjaña joya pea nijje quea quene nee nee poani aje oe emeshi mese yasijje poquije. Quea tecue poaje emeshi mese onijje. Joya pea nijje mimijajijajo, “miya cajaa” acajo, cadojo cahua emeshi meseja esohui huohuiji cuana huasijje ¡jabahuejjaqui meeya. Joya pea nijje panajaji neineiyajo, cajaa nei nei acajo pea'ai cuaquí yasijje huoojea ca chana' pea'ai —Jesosaa poanaje.

²³ —E'e pojjaja miya Eyacuiñajijiya equi yasijje poquiani aquiana quia'yohua Eyacuiñajiji bihuiajji. Ma aquiana quia'yo ¡jimahuajo ¡jashahuabaquicue miquea epeejiño! ¿A'a miquea epeeji quea yeno poani minijje miya quea tai añajo? ²⁴ ¡Jamajjeya miquea epeeji yasijje poquicue! ¡Onijje mimiquicue! ¡Quea bei minijje po mee o'oyacue! ¡Majoya miquea aquiana quiaquicue Eyacuiñajiji bihuiajji! —Jesosaa poanaje.

²⁵ —¡Pea cuana quea quene minijje poajo o que poquicuaquicue! ¡Quea bei po mee o'oyacue ¡jeya nei! Ohuaya miya dojo ca chana' emeshi mese yasijje, napa meeya. Emeshi meseya miya huoojea ca chana' sohuinano huasijje. Sohuinanohua miya equi ejjajeantobiacuajiji yasijje jeanobia ca chana'. ²⁶ Jomajo nequi tiitii mee caje. Ma minijje quea quene nee poanaje sosequiajeyo'yo majje miya ejeantobianequi jeacuaya caje'yo, de —Jesosaa

poanaje—. ¡Jiquio jayojjaya oe pocue! ¡Jamajjeya Eyacuiñajji nijje jjapeequicuaajicue mano'yo jjimahua, cuaqui yasijje jeajea jjimahua!

¡A'a jjashahuabaquijji pea eponajo!

²⁷—Cuanaya miquea eba Moisesija etehue'yo jama ba'a: “¡A'a pea cojjoji pojji!” ²⁸ Jjeya ecuea esohui eyacua shajja'ajjacue jama ba'a: Deja pea eponajo jjashahuabaquianijo oya pea cojjoji epoji jayojja jama poani, ojaya ejjashahuabaqui'yojji; quea mimishi poani. ²⁹ Jamajjeya ¡a'a quea mimishi pojji! Miya quea mimishi poani epona, aquiana pojja'a baqui majje ¡maya bapajea'yocue! Jea ba majje mimishi po majamajñaajo cuaqui yasijje dobiquije'yo tii. Jamajjeya ¡a'a jea bajji! ³⁰ Pea'ai miya quea mimishi poani aquiana emeya napañaajo ¡a'a aquiana napajji! Quea mimishi po chana'; cuaqui yasijje dobiqul'yo chana'. Jamajjeya ¡a'a onaja aquiana napajji! Sii chanaya —Jesosa poanaje.

Esohui ehuanase huei canijo

(Mateo 19.9; Macoso 10.11-12; Noca 16.18)

³¹—Moisesija etehue'yo jama poa pea'ai ba'a: “Dejaa ojaya ehuanase cajaa acajo, huei canijo jesohui catehue cahua ehuejji!” ³² ¡Ecuea esohui eyacua shajja'ajjacue! ¡A'a miquea ehuanase pea dejaja sii jjima hueijji! Epona quea pame ba'e huei'yo majje pea dejja nijje jjahueaquiajo, yahue ebionei eshe nequijo, quea mimishi po mee cani ebionei yahueya. Oya eshe enequijojo oja yahue eyacua quea mimishi poani pea'ai —Jesosa poanaje.

³³—Moisesija etehue'yo jama poa pea'ai ba'a:

“Miyaya huohuiaña jama ba'a: —Eyacuiñajjiya eya shajja'ajja canijo, e'e jojo nei eyaya ecuea esohui jama aje'yo. ¡Jamaya mimi majje miquea esohui jama acue; a'a pajea'yojji!” ³⁴ ¡Jjeya ecuea esohui eyacua shajja'ajjacue! Jama ba'a: ¡A'a oe siajje pojji! ¡Pea nijje mimi majje miquea esohui jayojja jama acue! Jamajjeya pea nijje mimianijo a'a huohuijji jama ba'a: “Eyacuiñajji eshe eyajo yanijo, ecuea esohui jama eyaya aje'yo. Ecuea esohui e'e nei pojjeama jojjemo eya quea nee po mee ca'yome”. Cho. Eyajo Eyacuiñajji ejjahuojeaquijji tii tii. ³⁵ Jamaya a'a mimijji pea'ai ba'a: “Meshi yanijo, oe po jjimajo ecuea esohui jama eyaya aje'yo. Ecuea esohui e'e nei pojjeama jojjemo meshi jjani yasijje eya mojea ca'yome”. Cho. Meshi cuana miquea pojjeama; Eyacuiñajji Emeshi Mese oe nei poani. Jamaya a'a mimijji pea'ai ba'a: “Jenosanena yanijo, oe po jjimajo ecuea esohui jama eyaya aje'yo. Ecuea esohui e'e nei pojjeama jojjemo Jenosanena cuiñajji esecue yasijje mo huojeacuaya ca'yome”. Cho, Jenosanena miquea pojjeama; Eyacuiñajji Jenosanena Meshi Mese poani. ³⁶ Jamajjeya a'a huohuijji miyaya: “Ecuea esohui e'e nei pojjeama jojjemo camano mee ca'yome”. Chojja. ³⁷ Jamajjeya huohucue jama ba'a: “E'e, eyaya jama aje'yo”. “Chojja eyaya jama a'ajja” acue —Jesosa poanaje.

Esohui dejja quea quenejo

(Noca 6.29-30)

³⁸—Miquea eba Moisesija etehue'yo jama pea'ai ba'a: “¡Peaa cojja cuiasejjajea cajje jjasosequiacucue; cojja cuiasejjajea pea'aicue! ¡Peaa se' cuiasajajea cajo se' cuiasajajea pea'aicue!” ³⁹ Ecuea esohui eyacua ca ca jama ba'a: Onaaya miya napa cajje ¡a'a jjashahuabaquijji onijje ejjasosequijji! ¡Mique shemo ebiane miijje cuia cajje shemo shani mijijje cuia mee o'oyacue! ⁴⁰ Peaa miquea daqui sa poanijo miya dojo cani dejja etii bajjani yasijje huohuiya; miquea daqui dojo cajo, jamatii ¡miquea daqui moo quiacue pea'ai! ⁴¹ Deja maseya miya iña cajje ojaya aquiana quea huesha pishana dojo mee cajo, ¡quea huesha nee dojocue, jamatii! ⁴² Pea Ese Ejja miquea aquiana sa neinei poanijo ¡a'a quea dejja tai pojji! ¡A'a quea nistehui pojji! ¡Oya quiacue! Pea cuana miquea aquiana dojo sa poanijo ¡oe pojji cahume dojo meecue! Minijje mimiajo: “¡Che iña jiquio dojo meecue; quijje aje jje jeahuaje'yo!” acajje; “¡E'e, dojocue!” saja'ame acue. Jamajjeya ¡ojjaña cuana nijje quea bei ba'ecue! ¡A'a o jayojjaya quea mimishi, quea tai pojji! —Jesosa poanaje.

Joya minijje quea quene nee poani quea jea acue

(Noca 6.27-28, 32-36)

⁴³—Miquea eba etehue'yo yahuaajo nei jama ba'a: “¡Miquea epeeji quea jea nee acue! Miquea epeeji pojjeama, cho. ¡Onijje quea quene pocue epeeji pojjeama jjejojo!” ⁴⁴ Ecuea esohui eyacua ca ca jama ba'a —Jesosa poanaje—: ¡Miquea epeeji pojjeama quea jea nee acue pea'ai! Miya Eyacuiñajji epeeji poanijo, miya napa cajje ¡Eyacuiñajji nijje mimicue maa mi napajji poanijo! Jamajjeya e'e pojja'a oya cuana Eyacuiñajji nijje jjapeequije'yo pea'ai. ⁴⁵ Jamaya poanijo miquianaya Eyacuiñajji eseja Chii eyajo anija bacua cuana poani. E'e, Eyacuiñajjiya eshequi quea ja'a nee jiji mee cani dejja quea pamejo, dejja quea mimishijo pea'ai. Ohuaya ena huoojea cani dejja quea pame neeja que shepajji, dejja quea mimishija que shepajji pea'ai —Jesosa poanaje.

⁴⁶ —Joya mi quea jea nee ajji poani miquea quea jea nee pea'ai; minijje quea mase ca ca miquea boti'ama. Eyacuiñajjija epeeji pojjeama cuana aje oe jamaya poani pea'ai, de. Jamajjeya miya jamaya poanijo ¿a'a Eyacuiñajjija miya bihuia caje? Cho. ⁴⁷ Miqianaya aje jja oe miquea epeeji cuana nijje quea bei nee mimiani, pea cuana nijje mimi ajja. ¿A'a jamaya poani ojjaña dejja cuana? E'e. Eyacuiñajjija epeeji pojjeama cuana aje oe jamaya poani pea'ai, de. ⁴⁸ Jamajjeya esejaya Chii eyajo quea pame nee ani. Ojjaña cuana Eyacuiñajjija quea jea nee nee. ¡Eyacuiñajji jayojjaya jama pocue quea bei nee nee! —Jesosa poanaje.

6

¡Quea ja'a nee jjapeequicue Eyacuiñajji nijje!

¹ Jesosa poanaje pea'ai: —¿Apiojji miya Eyacuiñajjijo chacochoacoani pea cuaa ba canijo? E'e pojja'a jjashahuabaquiani miya bihuia caje cuaa ba majje. Onaja ebajji chacochoacoanijo, quijje eyajo miquea echaco ojo Eyacuiñajjija miya bihuia ajja, esosequaijji pojjeama —Jesosa poanaje.

² —Aquiiana aema huasijje quia'yo majje a'a mimijji jama ba'a: “¡Bacue, eya quea pame nee poani!” Chojo. Jamaya poani Eyacuiñajjija epeeji nisho cuana Eyacuiñajjija equijo, ejiojji cuanajo pea'ai. Onaaya Eyacuiñajjijo chaco cano pea cuanaja ebajji. Jamajjeya quijje eyajo Eyacuiñajjija oya ebihuajjii pojjeama; ojaya echaco esosequaijji pojjeama pea'ai. ³ ¡Miyaya aema huasijje aquiiana cuana quehuajje quiacue! Jamajjeya imiquea epeeji neinei ja ba jjima quiacue! ⁴ Miquea Chiya eyajo aniya ca ca oe ba caje; ohuaya miya quijje sosequia caje'yo —Jesosa poanaje.

*Eyacuiñajji nijje jama mimime pocue ba'a
(Noca 11.2-4)*

⁵ Jesosaa o shajja'ajajji cuana huohui canaje pea jama ba'a: —Eyacuiñajji nijje mimianijo ja'a joya ecua Eyacuiñajji nijje jjapee nishoquiani jayojja jama mimijji! Oya cuana aje oe Jodioja ojee ejjachichaquijji equijo nequiani, ojjañaja ebajji miminequiani. Esecuejo ojjaña anica cojja nei pea'ai miminequiani. Eyaya miya e'e jojo nei huohuiaña oya cuana miminishonequiani —Jesosa poanaje —. Jamajjeya Eyacuiñajjija epeeji nei poso ojjaña oya ba cano. Jamajjeya onaaya bihuia canaje sosejje Eyacuiñajji nijje miminisho'aninajejo quijje eyajo oya cuana enijje nequiyoyji pojjeama, Eyacuiñajjija epeeji nisho jjejojo. ⁶ ¡Miqianaya ca ca miquea equi quecuayijjijo mee nei mimi'anicue Eyacuiñajji nijje, pea cuaa eba ca poani jjejojo! ¡Eseja Chii nijje jomajo mimicue! Ohuaya miya ba cano, shajja'ajja cano; mi pejejo nequiani oya. Esejaya emimi bame bame jayojja jama acaje'yo, eseja Chiya —Jesosa poanaje.

⁷ —Pea cuana Eyacuiñajji ba jjimajo eyacuiñajji nisho nijje mimiani. Oya esohui majamaja acani. Mimi majamajani eyacuiñajji nishohua eshajja'ajja caje poso. ⁸ ¡A'a o jayojja jama pojji! Eyacuiñajji nijje mimi sa po jjimahuaajo, ojaya esejaya ejjashahuabaquijji eba, de, eseja Chiya eyajo anija —Jesosa poanaje.

⁹ —Jamajjeya Eyacuiñajji nijje mimianijo mimicue jama ba'a: Eyacuiñajji, miya ecuanaja Chii quea bame nee. Miya eyajo quea ca'a nee ani.

¡Ojjaña cuaa miya cabihuia cahua, oe nei quea ja'a nee!

¹⁰ Miya ojjaña cuanaja Emeshi Mese poani tii tii.

Eyajo miquea ejjashahuabaquiyoyji jayojja jama poani ojjaña.

¡Jamaya oe pocue ojjaña meshijo pea'ai!

¹¹ ¡Jjeya eya ba'e meesahuacue!

¹² Eya quene'ama pea cuana nijje, joya enijje quea mimishi poani nijje.

Jamajjeya ¡ecuea mimishi cuanajo a'a quea quene pojji pea'ai!

¹³ ¡A'a eya quea mimishi po meeji!

¡Nahue neineicue mo, Eyacuiñajji!

¡Edosiquianaja epeejiyo eya jaahuanacue!

E'e Eyacuiñajji, miya ojjañaja Emeshi Mese poani tii tii.

Miya oe nei quea ca'a nee nequiyoyji tii tii, quea pame nee.

¡Ojjaña miya cabihuia cahua tii tii!

E'e, jamaya apoa ecuea emimi.

¡Jamaya Eyacuiñajji nijje mimicue! —Jesosa poanaje.

¹⁴ —E'e, ¡iquio ecua eya jama jjashahuabaquime oe pocue! Pea cuana nijje mimicue jama ba'a: “Miya enijje mimijajinaje quea tai. Jamati eya miquea mimishijo quene'ama” jamaya pocue. Jamaya pea nijje mimianijo Eyacuiñajji miquea mimishijo quene'ama poaje'yo pea'ai. ¹⁵ Pea nijje quea quene tii tii poanijo ca ca Eyacuiñajji eseja Chii miquea

mimishijo quea quene tii tii poaje'yo pea'ai; miquea mimishi ecuijea'yojji pojjeama — Jesosa poanaje.

Eyacuiñajji nijje eseya bobima' mimi cajji ijia'ijjia jjima ani majje

¹⁶—Eyacuiñajjija epeeji nisho ijia'ijjia jjima mimianijo quea yeno jayojja poani, ecojja topo jjima ojjaña cuanaja ebajji. Jamajjeya ojo jama poani ba'a: "E'e, oya Eyacuiñajjija epeeji nei nei; ijia'ijjia jjima mimiani Eyacuiñajji nijje, de" poani —Jesosa poanaje—. Chojja, edasia'yojji poani. Eyacuiñajjija epeeji nei poso pea cuaa acani. Jamajjeya ojjaña ebajji oya mimiani. Quijje oya cuana enijje enequi'yojji pojjeama eyajo Eyacuiñajjija epeeji nisho jjejojo —Jesosa poanaje—. ¹⁷ Miqianaya ca ca ecuea epeeji nei. Ijia'ijjia jjima Eyacuiñajji nijje mimianijo ja'a quea yeno jayojja pojji! ¡A'a jdasiasaquiiji jayojja jama pojji! Chojja —Jesosa poanaje—. Ijia'ijjia jjima Eyacuiñajji nijje mimi huicha'a huicha'anijo jmatii eme', ecojja pea'ai shacuacue; ehuojjaña shiyeshiyejo shacue! ¹⁸ Jamajjeya onaja ba jjima Eyacuiñajji nijje mimicue ijia'ijjia jjima ani! Jamajjeya eseya Chiya ohuaye nei miya ba caje, mi pejejo nequiya. Miquea emimi bame bame jayojja jama acaje, ohuaya —Jesosa poanaje.

Jesosa eseya quijje eyajo quea huiso sosequia caje'yo, ojo chacochoani sosejje

(Noca 12.32-34)

¹⁹—Jiquio meshijo ba'yanijo ¡aquiana echicha'yo quea huisojo a'a quea nahue bajji! —Jesosa poanaje—. Siipojjiya miquea aquiana sii ca chana'. Mojo ca chana'. See'yo chana' pea'ai. ²⁰ Cho. ¡Jjeya Eyacuiñajjijo chacochocho neineicue! E'e jojo nei ohuaya quijje miya sosequia caje'yo quea huiso nee nee eyajo. Esii'yojji pojjeama; miqianajaya poaje'yo tii, miquea eba'e'yojji eyajo. ²¹ E'e, jamaya jjashahuabaquijajo miqianaya quea ja'a ba'e'yo, ecuea ehuhui'yo jayojja jjashahuabaquijje eyajo eba'e'yojji; aquiana quea huiso yanijo ca ca miqianaya jjashahuabaquijje meshijo eba'e'jji —Jesosa poanaje.

¡Quea ja'a nee ba'ecue!

(Noca 11.34-36)

²²⁻²³—Miquea ecojja quea pame nee neejo miya quea ja'a nee baje'yo echacojji; quea ja'a nee ba'e'yo pea'ai. Cojja jamajama ca ca quea ja'a eba'e'jji pojjeama. Quea apo nee nee, de, cojjama' —Jesosa poanaje—. Jiquio ecua quea cojja pame nee jayojja jama miya quea jjashahuabaqui pame nee neejo quea ja'a nee ba'e'yo Eyacuiñajjija ejjashahuabaqui'yojji jayojja. Quea jjashahuabaqui tai poanijo onaja aquiana cuana quea jea ba majje ca ca quea deja tai ba'e'yo, quea nishelui. Jamajjeya Eyacuiñajjija miya tecuea caje'yo jama ba'a: "Miya ca mi ca oe quea tai nee nee ba'yani, ojo jjashahuabaqui ajja" acaje'yo Eyacuiñajjija —Jesosa poanaje.

¡A'a quea nahue, quea nishelui ba'e'ji!

(Noca 16.13)

²⁴—Cuanaya ¿a'a acuae chacochocho cajji beca dejjaa mee'ajja cajje? Chojja. Oe echameejji shajja'ajja caje, quea boti acaje pea'ai. Pea echameejji shajja'ajja jjima acaje, boti'ama acaje pea'ai. Jamaya miqianaya aquiana cuanajo jjashahuabaqui tiitiqianijo Eyacuiñajjijo echacojji pojjeama —Jesosa poanaje.

Eyacuiñajjija oja epeeji cuana jaahuana cani

(Noca 12.22-31)

²⁵ Jamajjeya Jesosa huohui canaje pea jama ba'a:

—E'e jojo nei eyaya miya huohuaña: ¡A'a quea yeno jjashahuabaqui tiitiqijji miquea eba'e'jji! "E'e pojja'a eya bobimajo manoje'yo, bobi yasijje poaje'yo; e'ishijji pojja'a chama' poaje'yo, quea naba taja; ecuea daqui huñaje pojja'a, daquima' nei nei eya poaje'yo". ¡A'a jamaya jjashahuabaquijji! Eyacuiñajjija miya eshe pana canaje, yamijji. Jamajjeya ohuaya miya bobi quia meesahua caje, daqui quia meesahua caje pea'ai. ²⁶ E'e de, ¡bacue cuicho'ji cuana! Quea jaji ba'yani. Oya cuanaa que chaco ajja, bobi chicha ajja, equi yasijje iya ajja quijje e'ijjia'yojji. Eseja Chiya oya cuana jaahuana cani. Cuicho'ji ojaya nahue'ama; miya ca ca oe ojaya quea nahue nee nee. ²⁷ ¡Jashahuabaquicue! ¿A'a miya quea ao nee epojje poso jjashahuabaqui neineiquianijo miya tii aoje'yo? Chojja. Jamatii. Jamajjeya oya jayojja aquiana chama' epojje poso ja'a quea mete pojji! —Jesosa poanaje.

²⁸—¿Apiojji miya jjashahuabaquiani quea yeno daquijo? ¡Bacue eshasa ebiojo tiiani! Shasha cuana chaco ajja, oja daqui cuana soco ajja. ²⁹ Jamatii quea bame nee nee nequiani. Jodioja emeshi mese yahuaño nei nequiya Sanomo bajjaniya daqui quea nahue nee nee huosho ca poa; jamatii oja daqui quea bame pishana. Shasha ca ca quea bame nee nee. ³⁰ E'e —Jesosa poanaje—, Eyacuiñajjija shasha cuana tii mee cani quea bame nee. Jjeya shasha cuana enequi; mecahuajje yaa'yani, joca'yani; dahua'jea cani cuaa pojja'a, chama'yo tii poani. Jiquio ecua Eyacuiñajjija shasha quea bame nee pohua mee cani

jamaya ohuaya e'e jojo nei miya ba'e meesahua caje'yo. Miya ojaya quea boti nee nee. Miqiuanaaya jashahuaba taiquiani jama ba'a: "E'e poija'a Eyacuiñajija eseya jaahuana jjima" jamaya miqiuanaaya poani —Jesosa poanaje.

³¹ —A'a jashahuaba taiquijji jama ba'a: "¿A'ya cuee che ijijaje, de? ¿A'ya cuee ishije, de, chama' ena? ¿A'ya cuee che huoshoje?" ³² Eyacuiñajija epeeji pojjeama cuana ojjaña aquianajo jashahuabaquiani tii tii. Eyacuiñajijo jashahuabaquani ajja. E'e jojo nei esejaya Chii eyajo ani miquea aquiana eba'e meejjijo jashahuabaquiani. Ohuaya miya jaahuana caje'yo —Jesosa poanaje—. ³³ Jamajjeya jashahuabaquicue tii tii jama ba'a: "Quijje Eyacuiñajiji ojjaña Emeshi Mese po majje onijjeya eyaya pea cuana hoojeaje'yo eyajo. ¡Ojaya esohui quea ja'a jayojja jama ca'a'yahua!" acue —Jesosa poanaje—. Jamaya jashahuabaquianijo ohuaya miqiuana huasijje aquiana eba'e meeji quia meesahua caje'yo pea'ai —Jesosa poanaje.

³⁴ —Jamajjeya a'a quea yeno jashahuabaquijji jama ba'a: "¿Aya shai ecuana jaahuana caje mecahuaje?" Miya Eyacuiñajiji jaahuana caje'yo. Quijje quea camaja eba'eji poaje poija'a. Jamatiya ohuaya miya ba'e meesahua caje'yo —Jesosa poanaje.

7

¡A'a pea cuana niñebajji!
(Noca 6.37-38, 41-42)

¹ —¡A'a pea niñebajji! —Jesosa poanaje pea'ai—. Jamaya Eyacuiñajiji boti'ama. ² Miya pea cuana niñebajji poanijo Eyacuiñajiji miya tecuea caje'yo pea'ai. Miqiuana pea nijje jabeiqui'yajo Eyacuiñajiji miqiuanaaya mimishi cuijea caje'yo. Ma ecua miyaya onaya aña, jamaya miya acaje'yo Eyacuiñajiji.

³ —¿Apiojji acuae jja oe miquea epeeji tecueaña so'o ca mimijajijjiya? ¿A'a miqiuanaaya mimishi paje'yonaaje pea tecuea jjimahuajo ojaya mimishijo? Chojja, miya ca mi ca oe mimijajipaje'yo jjima pea'ai. Jamaya miya poani ba'a: Miyaya baña huenihueni shabo biso nei nei miquea epeejiya ecojjajo nequi. ¿A'a cuee jja oe miyaya miquea ecojja dojjojo nequi huenihueni shabo quea quemo baña so'o? ¡Miquea ecojjajo nequi huenihueni shabo quea quemo jja oe huijjeajea meecue! ⁴⁻⁵ A'a jiquio jama mimijji ba'a: "Epeeji, huenihueni shabo biso neiya mi cojja dobi canaje. Ache ba'ajja cahuijjea'ajja'yo sahua, de shabo biso nei". Chojja. Shabo quea quemo nee miquea ecojjajo nequi, miya quea cojja shojjo poanijo ca jje ca ebajji pojjeama. Miya ca mi ca oe ma shabo miquea ecojjajo nequi jebionei huijjeajea mee'yo socue! ¡Majoya shabo biso nei nei miquea epeejiya ecojjajo nequi huijjeajea'yocue! —Jesosa poanaje.

⁶ —Miquea aquiana quea nahue nee nee ¿a'a quiaña ñahuehua huasijje, cuichi yasijje pea'ai? Aquiana nahue quishipasha caje'yo, de. Oya cuana quea mase; ijija ca chana' mi. Jamaya poani deja jshajja'ajjaqui ajja nei nei; quea mase ñahuehua jama, cuichi jama. Jamajjeya jona huasijje Eyacuiñajiji esohui quea pame nee a'a huohui tiitijji! —Jesosa acanaje.

¡Eyacuiñajiji nijje mimi neineicue! Ohuaya miya shajja'ajja caje
(Noca 11.9-13; 6.31)

⁷ Jesosa jama poanaje pea'ai ba'a: —Jama acue ba'a: ¡Mimi neineicue Eyacuiñajiji nijje! Onijje mimianijo ohuaya miya jaahuana caje'yo. Cuanaya aquiana chama' ba majje sa'ajja neineaña jama mimi neineimeya pocue Eyacuiñajiji nijje! Ohuaya miya shajja'ajja caje'yo. Cuanaya esecuejo nequiya miyaya taaña miquea epeeji nijje emimijji. Esecuejo nequi taaa tiitii nequiani jayojjaya ¡Eyacuiñajiji nijje mimi majamajacue! Ohuaya miquea esohui jayojja jama acaje'yo. ⁸ E'e jojo nei onijje mimianijo Eyacuiñajiji jaahuana caje'yo; o sa neinei poanijo ohuaya miya saja'a caje'yo. Esecuejo taaa nequi jayojja jama pocue; ohuaya miya saja'a caje'yo —Jesosa poanaje.

⁹ —Ebacua ejja oja chii nijje jama mimime poajo ba'a: "Ecue chii, ¡che mo oe pahui quiacue e'ijji'ajji!" acajo, ¿a'a oja chiiya mei quia caje? Chojja. ¹⁰ "Ecue chii, ¡che mo oe jai quiacue e'ijji'ajji!" acajo, ¿a'a oja chiiya peyo quia caje'yo? Chojja. ¹¹ Jamajjeya miqiuanaaya, jamatii quea mimishi jashahuabaquianiya miqiuanaaya bacua cuana jaahuanaña. Jamajjeya esejaya Chii eyajo aniya miya jaahuana caje'yo e'e jojo nei onijje mimianijo. Oya ca ca oe quea pame nee nee enequi tii tii —Jesosa poanaje.

¹² —Miya mimiani pea nijje jama ba'a: "¡Enijje quea pame nee po tiitii'yocue!" Jamajjeya ¡pea cuana nijje quea pame nee po tiitii'yocue! E'e, jamaya yahuaajo Moisesija esohui etehue'yo poa. Jamaya Eyacuiñajiji esohui huohuijji yahuaajo nei ba'ya poa pea'ai —Jesosa poanaje.

Beca ejiojji
(Noca 13.24)

¹³⁻¹⁴ Jesosaa huohui canaje pea jama ba'a: —¡Esecue biso neiije doobicue! ¡Ejiojji biso neiije poquicue, ma eyahuasijje epoquijji ejiojjiije! Jomajo ba'e tiitijje'yo eseya. Eyacuiñajjija esohui ejiojji pame jayojja. Eya ejiojji esecue jayojja pea'ai poani —Jesosa poanaje—. Oe pojji cuana Eyacuiñajjija ejiojjiije poquiani, de. Pea esecue ejiojji ai'aijje epoquijji. Ma ejiojji ai'aijje poqui majje cuaqui yasijje poquije'yo. Jamajje quea huiso poquiani ejiojji ai'aijje, de —Jesosa poanaje.

Esohui huohuijji nisho, sijjepojji
(Noca 6.43-44)

¹⁵ Jesosa jama poanaje pea'ai ba'a: —¡Esohui huohuijji nishoja esohui a'a shajja'ajajji! Dasia ca chana' mi. Mi que poeje japee nishoquiya. Oya cuana quea bei jayojja poe'ani. Cho, quea bei pojjeama. Aquiana quea mase jama poani oya cuana. ¹⁶ ¡Quea mimishi poanijo bahuejjacue oya cuana esohui huohuijji nisho! ¿A'a acuae acuisha jjonajo acuijjajja quea pame ba'yani? Cho. ¿A'a shaponajo acuijjajja quea pame chicha cani? Cho. ¹⁷ Jamaya esejaya eba ba'a: Acui quea pamejo acuijjajja quea bame. Acui quea taijo ejajja quea tai poaje. ¹⁸ Acui quea pamejo acuijjajja quea tai pojjeama ba'yani. Acui quea taijo ejajja quea bame pojjeama ba'yani. ¹⁹ Acui taijo ejajja quea tai poani. Jamajjea jajajeaña seya, dahuajea'yaña seya. ²⁰ Acui eseya baje ejajja ba majje. Acui quea tai ba majje esejaya eba acui quea tai. Jama jayojja esohui huohuijji quea mimishi ba majje eseyaya oya esohui huohuijji nisho bahuejjaje —Jesosa poanaje.

Jesosa shajja'ajajji e'e jojo nei
(Noca 13.25-27)

²¹ —Quea huiso dejja cuana huohui cani jama ba'a: “Jesosa Quito, miya ecuanaja Emeshi Mese e'e jojo nei”. Chojja, beca cuana sijje poani. Ecue Chii eyajo anija ejjashahuabaqui'yojji jayojja jama po ajja. Jamajjea oya cuana ecue Chii eyajo ani yasijje poqui'yo ajja. Pea cuana e'e jojo nei ecue Chiija ejjashahuabaqui'yojji jama poani. Oya cuana poquije'yo ecue Chii eyajo ani yasijje, ojaya Emeshi Mese nei yasijje. ²² Quijje e poe o'oyajo quea huiso cuana sijje poaje enijje jama ba'a: “Ecuea Emeshi Mese, Eyacuiñajjija eya huoojca canaje miquea esohui huohuiya. Ohuaya eya esahua huoojcauyajea meesahua ca'yonaje. Ohuaya eya ameesahua canaje ma dejjaa ajjima acani”. Quijje jiquio jayojja jama acaje'yo sijjepojjiya. ²³ Majoya eyaya oya cuana tecuea neinei'e'yo jama ba'a: “Chojja. Miqianaya enijje japeequi'yo jjima. ¡Miña ca oe poquicue quea huesha nee! Quea mimishi, quea mimijjequijea ca miña” aje'yo —Jesosa poanaje.

Equi iyajji jama Jesosaja epeeji cuana quea jjashahuabaqui ja'a nee
(Macoso 1.22; Noca 6.47-49)

²⁴ —Joya beca cuaa ecuea esohui shajja'ajja majje jamaya acaje'yo. Ojaya ejjashahuabaqui'yojji quea pame nee. Jamajjea jiquio ecua equi quea ca'a emacojo iyaña jayojja jama jjashahuabaquime oya poani. ²⁵ Ena quea quemo poajo, jayehuequiyajo beni quea quemohua equi jeaquena cani. Jamatii equi quea ca'a emacojo ani; jaabicha jjima acani. ²⁶ Pea cuaa ecuea esohui shajja'ajja ajja. Ecuea esohui jayojja jama a'ajja pea'ai. Oya cuana quea jjashahuabaqui quehua jayojja jama poani, equi quea quemo iya cani meshijajjo jama. ²⁷ Ena quea quemo poajo ohua caje. Beni quea quemohua po majje equi janobajjima nei jeabichajea caje'yo —Jesosa poanaje.

²⁸ Jesosaa eyiyo quibojo esohui huohui ca poa. Apoa po majje dejja quea huiso cuana shajja'ajja majje jama poanaje ba'a: —E'e de, Jesosaa esohui quea ja'a nee nee huohui cani. ²⁹ Ohuaya huohui cani emeshi mese jayojja jamaa, Moisesija esohui etehue'yo huohuijji jayojja jama pojjeama, de —poanaje ojjaña cuana.

8

Dejja batata epo'yo, ma dejjaa shicui jjima acani jjajea meequi ca'yonaje Jesosaa
(Macoso 1.40-45; Noca 5.12-16)

¹ Majoya Jesosa eyiyo biyajje ani esohui huohuipajea majje jaoque'yonaje. Quea huiso dejja cuana poquinaje onijje. ² Oe dejja quea mano nee, batata epo'yo poeyanaje Jesosa que. Ecui'oshajjajo nequinaje o bihuajji. Jama poanaje ba'a: —Jesosa, ecuea eba miya ona jjajeaqui mee'yojji nei nei poani. Jamajjea miyaya eya jjajeaqui mee'yo sa amajje imo che jjajeaqui mee'yocue!

³ Jesosaa ma dejja napa'ajja canaje emeya. Jama miminaje onijje ba'a: —E'e, eyaya miya jjajeaqui mee'yo sa aña. jajjajaqui'yocue miya!

Jajjajaquinana'yonaje jjeja nei. ⁴ Jamajjea Jesosaa oya huohui canaje: —¡Shajja'ajjacue mo! Eyaya miya jjajeaqui mee'yonaje. Jamatii ja'a jjeja pea cuana huohuijji! ¡Poquicuaquicue Jenosanena huasijje, Eyacuiñajjija equi yasijje, Eyacuiñajji nijje mimiani yasijje! Oya

huohuicue miyaya: “Eya huaquia'yonaje, jjaajaqui'yonaje mo” acue. ¡Moisesija esohui jayojja jama oe pocue pea'ai! Miya ehuaquia'yohua jjejojya ¡Eyacuiñajji nijje mimiani yasijje beca huia' quiaquicue Eyacuiñajji bihuiajji! Jamajjeya ojjaña ba caje miya e'e jojo nei ejjaajaqui'yo —oya acanaje Jesosaa.

Jesosaa sohuinano huoojeajji poanija echacojji huaquia mee ca'yonaje
(Noca 7.1-10)

⁵ Quijje Jesosa Capenaoma huasijje poqui'yonaje. Jomajo oe dejja sohuinano quea huiso nee, 100 huoojeajji poani Jesosa que poeyanaje. Oya pea, Jodio dejja pojjeama. ⁶ Ohuaya Jesosa huohui neinei canaje jama ba'a: —Jesosa, ecuea epeejji, ¡shajja'ajjacue mo che! Ecuea echacojji poani quea mano nee nee ecuea equijo jaa. Jeo'yo ajja poanaje. Quea yami nee nee jaa —poanaje.

⁷ Jesosaa oya saja'a canaje jama ba'a: —E'e, eya poquije miquea equi yasijje miquea echacojji poani huaquia mee'yohua.

⁸ —Chojja, Jesosa —sohuinano huoojeajji poanaje—. Miya Jodio dejja quea pame nee nee poanijo ¿apiojji ecuea equi yasijje dobiquije? Eya Jodio pojjeama; quea pame pojjeama. Miya jhahuaquiameequi'yojji nei nei. Jamajjeya ecuea echacojji quea huesha jaa. ¡Miyaya jiquiojo tii nequiya huohuicue! ¡Huaquia mee'yocue! ⁹ E'e, jamaya poani ba'a: Pea emeshi mese cuaa eya huoojea cani. Ojaya esohui jama eyaya aña. Pea'ai eyaya sohuinano cuana huoojeaña. Eya huoojeajje poquije. Eya iyaajje pea sohuinano poeje. Eya huohuijaje ecuea echacojji chacochacoje ejo. Jamajjeya miya huohuijaje ecuea echacojji jjaajaqui'e'yo, de.

¹⁰ Shajja'ajja majje Jesosa quea bihui nee nee poanaje. Ojjaña cuana huohui canaje: —¡Shajja'ajjacue! Jiquio dejja Jodio pojjeama. Jamatii Eyacuiñajji nijje jjaapeequiani e'e jojo nei. Miya ca mi ca oe, oe pojji jashahuabaquiani Eyacuiñajji. ¹¹ E'e de, quea huiso dejja cuana Jodio pojjeama ojjaña meshijo ba'e enijje jjaapeequije'yo. Eyajo eya Emeshi Mese oe nei poaje, oya cuana ojee ijja'ijjaaje Jodio etiiquiana cuana nijje, Amajama nijje, Isaaca nijje, Jacobo pea'ai nijje. ¹² Beca Jodio cuana ca ca jshajja'ajjaqui ajja jjejojo enijje eba'ejji pojjeama. Eyacuiñajjiya oya cuana jeacuayajea caje'yo quea misi nee yasijje. Jomajo pa neineije'yo. Quea yenhua jjejojo ese' ijjiayajea caje'yo —Jesosa poanaje.

¹³ Jamajjeya sohuinano huoojeajji acanaje: —¡Poquicue miya miquea equi yasijje! Miquea eba eya ejjaajaquimee'yojji nei nei. Jamajjeya eyaya miquea echacojji jjaajaqui meeje'yo.

Jesosa mimianijo tii sohuinanoja echacojji jjaajacuajiqui'yonaje.

Quea huiso cuana huaquia mee ca'yonaje Jesosaa
(Macoso 1.29-34; Noca 4.38-41)

¹⁴ Majoya Jesosa poquinaje Penoja equi yasijje. Penoja ano ba canaje quea quiyo nee nee jaa. ¹⁵ Emanojaa me' napa caje jjaajaqui'yonaje. Boe canana'yonaje. Jamajjeya anisohua'yo majje Jesosa, pea cuana pea'ai bobia canaje, Penoja anohua.

¹⁶ Majoya aje oe sinecua dejja cuaa quea huiso niñepoqui cuana Jesosa que ye canaje. Jesosa eshahua cuana huoojeacuayajea ca'yonaje: —¡Cuayaqi'yocue, oe! —poanaje.

Jesosa mimi jeahuajo, o niñepoqui po meeji poani cuayaquinanaje. Ojjaña emanojaa cuana jjaajaqui mee ca'yonaje, huaquia mee ca'yonaje pea'ai, Jesosaa. ¹⁷ Jamaya poanijo Jesosa Isaiaja esohui yahuajo nei jayojja jama aca'yonaje. Isaia Eyacuiñajji esohui huohuijji yahuajo nei nei Jesosa Quitojo jama poa ba'a:

“Ohuaya ecuana quea mano poanaje, quea nee pea'ai poanijo, quea jaji nee po mee ca'yonaje; huaquia mee ca'yonaje”.

Isaiaa jamaya aca poa yahuajo nei nei Jesosa Quitojo.

Beca cuana Jesosa nijje poqui sa poani
(Noca 9.57-62)

¹⁸ Pea pojjaajo quea huiso dejja cuana Jesosa que jjachichaquinaje. Poqui sa poanijo Jesosaa ojaya epeejji cuana huohui canaje: —Cua'a ¡bae ojje miyi yasijje besapoquicue!

¹⁹ Poqui jjimahuajo oe dejja Jesosa que poeyanaje, Moisesija etehue'yo huohuijji poani. Ohuaya Jesosa huohui neinei canaje: —Miya esohui huohuijji quea pame nee. Eya miquea epeejji nei poaje'yo. Minijje tii eya po'ayequi sa poani —poanaje.

²⁰ Jesosaa oya saja'a canaje jama ba'a: —E'e pojja'a, de. Eya ojjaña cuanaja Edoe Mese poani. Jamatii ecuea equi chama' ejomishocajji, de. Samao ca ca oja jjanijo cahuijaa. Cuichojo cuana pea'ai oja ejajo cahuiani. Jiquiojo ecuea equi chama'.

²¹ Majoya Jesosaja pea epeejji poeyanaje o que. Ohuaya Jesosa huohui canaje: —Ecuea esohui huohuijji, eya ecue chii cuiña poaje so'o. Oya etii nei nei. Quijje oya mano'yajo ohuajee'yo. Majoya aje mo oe minijje poquije'yo chacochacohua.

²² —Chojja —Jesosaa oya saja'a canaje—. Pea cuaa, Eyacuiñajija epeeji pojjeama cuaa mique chii cacuiña cahua; ohuaya camojea cahua mano'yaajo. ¡Jeyahua nei enijje po'yocue!

Beni pajiji

(Macoso 4.35-41; Noca 8.22-25)

²³ Majoya Jesosa bishe ai yasijje nequisohuaqui majje ojje besapoquinaje. O shajja'ajjaji cuana nijje besapoquinaje. ²⁴ O besapoquianijo beni quea quemo nee nee poeyanaje. Enashajohua bishe nanejea canaje. Jeasohuajea canaje. Bishe ai yiyedojojo Jesosa cahuijaanaje. ²⁵ O shajja'ajjaji cuaa Jesosa ishe acanaje. Jama poanaje ba'a: —Emeshi Mese Jesosa, ¡shequicue oe! ¡Coya aje se hui'i'ya! —taanaje.

²⁶ Shequi'yo majje Jesosaa oya cuana saja'a canaje: —¿Apiojji acuae nequiana quea mete nee nee poani? ¿A'a mi ejo e'e nei pojjeama poani?

Jamaya mimi majje Jesosa nequisohuanaje. Beni tecuea canaje: —¡Beni, jamaya, nequiquequicue oe!

Majoya bae ena nijje jama poanaje ba'a: —¡A'a enashajo pojji! ¡Enashajo popajea'yocue!

O jama mimime poajo, enashajo popajea'yonaje. Beni popajea'yonaje. ²⁷ Jamajjeya bishe aijo anica Jesosajo quea bihui nee nee poanaje. Ojee mimimiminaje jama ba'a: —¡Ache dejja shai ¡iquio quea sohui poja nee nee! Beniya, enashajo cuaa pea'ai oja sohui shajja'ajja cani, de.

Eshahua ojo nequijajo, dejja quea mase nee Jesosaa niñe poquipajea mee ca'yonaje

(Macoso 5.1-20; Noca 8.26-39)

²⁸ Jesosa bae ojje miji yasijje ba'eñaquinaje, Jjanana meshi yasijje. Majoya beca dejja Jesosa que poeyanaje. Oya cuana ba'enaje mei jjanajo, ma emano'yo cuana sajaajo. Eshahuaa oja eyami yasijje dobiquinajejo, quea mase nee nee, niñepoqui poanaje. O ani chipi nei ¡jyeyjejequi ca ajja pea cuana. ²⁹ Niñepoqui cuana Jesosa ba majje taanaje jama ba'a: —Miya Eyacuiñajija Bacua Ejja. ¿Apiojji miya ecuana que poeyanaje? ¿A'a ¡jyeyahua nei ecuana cuangi yasijje ¡eajeaje'yo? Eyacuiñajija eshahua cuana cuaqui yasijje huoojea caje'yo quijje, ¡jyeya nei pojjeama, de —taame poanaje niñepoqui.

³⁰ Quea chipi nee cuichi cuana quea huiso ¡jjia'ijjia nequi. ³¹ Eshahua cuaa Jesosa jama huohuime acanaje ba'a: —Miyaya ecuana dejjajo nequi cuayaqui mee'yo majje ¡cuichi cuana huasijje ecuana huoojea'yocue!

³² —E'e, ¡poquicue cuichi cuana huasijje! ¡Dobiquicue! —Jesosa poanaje.

Jamajjeya dejja cuana jeanana'yo majje eshahua cuana cuichi cuana huasijje dobiquinaje, ojjaña. Dobiqui majje cuichi cuana cuajicua ¡jaoquequinanaje. Bae quea sahua doe nee nee yasijje cuichi cuana hui'i'yonaje, ojjaña.

³³ Ba majje cuichi jaahuanajji cuana ¡jjajjasoquinaje. Cuajicua ¡jipoquinaje cuiñajji yasijje. Ojjaña cuana ma cuiñajjijo ba'e huohui capoquinaje. Eshahua cuanajo, cuichi cuanajo, dejja cuana niñepoqui ¡jjima' po mee canaje pea'ai huohui canaje. ³⁴ Jamajjeya ojjaña cuana ma cuiñajjijo ba'e quea mete poeyanaje Jesosa que. Jesosa quea sohui poja nee nee jojoya ojjaña onijje quea mete miminaje jama ba'a: —¡Poquicue miya pea meshi yasijje!

Ojjaña ojo quea mete poanijo Jesosa ojje besapoqui o'oyanaje.

9

Jesosaa pea emanojaa ¡jajaajqui mee ca'yonaje, quibojjisha

(Macoso 2.1-12; Noca 5.17-26)

¹ Jamajjeya Jesosa bisheje besapoqui o'oyanaje ojje miji yasijje, Capenaoma huasijje. ² Jomajo pea dejja cuaa quibojjisha quea mano nee jaa ye canaje Jesosa que, equipajaajjijo. Ma ba majje Jesosa ¡jashahuabaquinaje jama ba'a: —E'e, ¡iquio dejja cuana ¡jashahuabaquiani eya ejaajaqui mee'yojji nei nei.

Jamajjeya Jesosaa emanojaa huohui canaje: —E'e ecuea epeeji, ¡quea bihui nee pocue! Eyaya miquea mimishi cuana cuijea'yonaje.

³ Jesosaja esohui shajja'ajja majje Moisesija etehue'yo huohuijji poani cuana quenequenaje. ¡jashahuaba taquinaje jama ba'a: —¡De! ¡iquio oya Eyacuiñajji pojjeama. ¿Apiojji Eyacuiñajji jayojja jama nei nei mimiani, de? Jamaya quea mimishi.

⁴ Jamajjeya Jesosa ojaya ejjashahuaba taquijji ba majje jama poanaje: —¿Yajjaje acuae quiana quea quene enijje poani so'o? ⁵ ¿Ache shai quibojjishajo quea camaja eyaya anaje? ¿A'a ojaya mimishi cuijea'yojji quea camaja? ¿A'a jja oya nequisohua meeje'yo eyaya? Ba'ajja —Jesosa poanaje—. ⁶ Jamajjeya eyaya ojjañaja Edoe Meseya miquianaya ba meeaña eya ca ca iña Emeshi Cuiñacoojji quea ca'a nee nee nequi. Jamajjeya eyaya mimishi cuijeaje'yo nequianaja.

Majoya Jesosaa quibojjisha acanaje: —¡Nequisohuacue! ¡Miquea equipajaajji bebo majje miquea equi yasijje poquicue!

⁷Jjeya nei quibojjisha nequisohua majje jeo'yonaje. Jjeoepoquinaje ojaya equi yasijje. ⁸Ba majje ojjaña cuana quea bihui nee nee poanaje: —¡E'e nei, joya quibojjisha jeo'yonaje jjeya nei! ¡E'e e, Eyacuiñajji nijjeya Jesosaa emanojaa cuana huaquia mee ca'yani! ¡Mimishi cuijeya mee ca'yani pea'ai! —poanaje ojjaña.

Jesosaa deja Mateo bajjani iyaa canaje
(Macoso 2.13-17; Noca 5.27-32)

⁹Majoya Jesosa poquinaje pea cuiñajji cuana huasijje. Poquijeya Mateo ba canaje equi ejjeshejji jaahuanajjijo ani. Mateo ona sose jjeshejji poani, eba'ejji sosejje. Ojjañaja emeshi meseja esohuijjo jjeshe mee cani, deja cuana eba'ejji sosejje. Ba majje Jesosaa Mateo iyaa canaje: —Mateo, ¡enijje po'yocue!

Jamajjeya Mateo nequisohua majje Jesosa nijje poqui'yonaje.

¹⁰Majoya Mateohua ojaya epeeji cuana iyaa canaje ojaya equi yasijje e'ijjia'ijjiajji Jesosa nijje. Jamajjeya Jesosa o shajja'ajjajji cuana nijje Mateoja equi yasijje poquinaje ijjia'ijjiaa. Quea huiso deja cuana Mateo jama ona sose jjeshejji poani, deja mimishi cuana pea'ai poquinaje. Ojee ijjia'ijjia'aninaje Jesosa nijje, Jesosa shajja'ajjajji cuana nijje pea'ai. ¹¹Ba majje Jodio esohui huohuijji Paniseo cuana Jesosa shajja'ajjajji cuana nijje mimijajinaje jama ba'a: —¿Apiojji miquea esohui huohuijji ijjia'ijjiani deja mimishi nijje, ejjeshejji chichajji cuana nijje pea'ai? ¿Apiojji, de?

¹²Jesosaa oya cuana shajja'ajja canaje. Huohui canaje: —¿A'a deja cuana quea mano pojjeama eshicuijji quiajji sa poani? Quea mano poanijo ca ca eshicuijji quia cajji. Jamaya miquianaya joya mimishi'ama poso jjabaquiani ecuea esohui shajja'ajja sa po ajja. Mimishi cuaa ca ca shajja'ajja cani. Jamajjeya eya deja quea mimishi nijje jjapeequiani quea ja'a nee epo meejji. ¹³¡Bacue oe! Siajjepojji jama poani ba'a: “Eya ca ca iña quea pame nee, mimishi'ama nei nei”. Jamajjeya joya quea pame poso jjabaquiani ecuea e'iyaa'yojji pojjeama enijje ejjapeequijji. Chojja. Eya poeyanaje deja joya quea mimishi nee nee iyaaa, mimishi pajea mee'yojji. Jamajjeya esohui etehue'yojo jjabahuejjaquicue jama ba'a: Yahuaño nei nei Eyacuiñajjiya Osea tehue mee ca poa jama ba'a:

“Huo cuana cuia cani. Cuija majje na sho cani e bihuijji. Jamaya ecuea quea boti pishana. ¡Pea cuana oe ba'e meecue tii quea bei! Jamaya ecuea quea boti nee nee”.

Jamaya tehue mee ca poa yahuaño —jamaya Jesosaa Paniseo cuana acanaje.

Bobi ijjia jjima yajjijo huohui'ajja canaje cuaa
(Macoso 2.18-22; Noca 5.33-39)

¹⁴Majoya Huani, ma ona besameejji poa ejeanobiajea jaa. Ojaya eshajja'ajjajji cuana poeyanaje Jesosa que. Jama huohui'ajjame acanaje ba'a: —Ecuana, Paniseo cuana pea'ai Jodio etiiquianaja esohui jama poanijo bobi ijjia'ijjia jjima ani Eyacuiñajjijo jjashahuaba neineiquianijo, onijje mimi neineiianijo. Jesosa, ¿apiojji acuae mi mi shajja'ajjajji cuana jama po ajja? —oya cuana poanaje beshahua nei quea tecue.

¹⁵Jesosaa oya cuana saja'a canaje: —Chojja, eya ecuea epeeji cuana nijje yanijo ca'ijjia cahua. Ejjahuanajjijijo yahueja epeeji cuana onijje yanijo ca'ijjia'ijjiaquiahua. ¿A'a yahueja epeeji cuana onijje yanijo quea yeno? Chojja. Quea bihui nee. Yahue poqui'yajo ca ca oe ojaya epeeji cuana ijjia'ijjia sa po ajja poaje, quea yeno jjejojo jjashahuaba neineiquiani. Eya jiquio ecua yahue poquiani jayojjaya jama poaje: Quijje eya poqui'yo majje ecuea epeeji cuana Eyacuiñajjijo jjashahuaba neineiquianijo ijjia'ijjia ajja poaje.

¹⁶Majoya Jesosaa huohui canaje pea esohui ejjashahuabaqui meejji: —Eseyaya baacojja esee'yohua caca ajja bishe eyacuajo. Cho. Baacojja etii enajo nequi see'yani, ca'a'ama. Jjasajjaequije'yo. Bishe ihuicauicauajje. Bishe eyacuajo ca ca baacojja eyacuaa cacaña.

¹⁷—Pea'ai ena sese cuatatanijo iya ajja meshimisi etijjo. Ena sese cuatata neineiianijo, meshimisi ca'a'ama jjaajjaequi majje ena sese jjashojjaequije'yo. Cho, ena sese cuatatanijo meshimisi eyacua quea ca'ajo iya cajji.

Jamaya Jesosaa huohui canaje o jjabahuejjaquijji ba'a: Ojaya esohui eyacua quea ja'a jama ca'a cahua. Jamajjeya Eyacuiñajjiya oya cuana quea bojea nee ba caje'yo.

Epona sho'i emano'yoojaa Pea epona najji poani tii tii
(Macoso 5.21-43; Noca 8.40-56)

¹⁸Jesosaa jamaya deja cuana nijje mimianijo, pea Jodio deja o que poeyanaje, ma Jodioja ojee ejjachichajjijji equi jaahuanajji poani. Ecu'i'oshajjajo nequinaje o bihuijji. Jama poanaje ba'a: —Esohui huohuijji, ecuea ebacua piona mano'yonaje jjeya nei. ¡Poecujacue o napa'ajjaa emeya! Jamajjeya oya shequije o'oya, de.

¹⁹ Nequisohua majje Jesosa epona sho'ija chii nijje poquinaje. Jesosa shajja'ajjaji cuana onijje poquinaje pea'ai. ²⁰ Jesosa poquije oe eponaa ba canaje. Oya quea mano, najji popajea'yo ajja. Ome miji pea beca, 12 eshequiajame na cuayapajeaqui'yo ajja poa. Jesosa que quehuajje poeyanaje. Ohuaya oja daqui cuema ifña canaje, emeya. ²¹ Jjashahuabaquinaje jama ba'a: —Eya Jesosaja daqui cuema ifña majje najji popajea'yo. Ohua daqui cuema ifña cajje Jesosa jjabajeaquinaje. ²² Epona nama'yo ba canaje. Jama poanaje onijje ba'a: —She, ¡quea bihui nee pocue! Miya quea ja'a jjashahuabaquinaje ejo jama ba'a: “E'e jojo nei Jesosaa eya najji popajea mee caje'yo”. Jamajjeya eyaya miya najji popajea mee'yonaje.

Jamajjeya ma epona najji popajea'yonaje.

²³ Majoya Jesosa equi jaahuanajjija equi yasijje poquinaje. Dobiquinaje. Ba cañaquinaje quea huiso deija cuana, ponaña pea'ai equijo nequi. Epona sho'i emano'yojo ojee pa'ani. Ojjaña quea shajjaquijjo poani. Dehue mia cani emojea'yojijjo pea'ai. ²⁴ Jesosaa ojjaña cuana huojeacuayajea canaje: —¡Cuayaquicue nequiana esecue yasijje! Jiquio epona sho'i cahuijaa; epoquijeyo'yo pojjeama —poanaje.

—Chojja de. Oya mano'yonaje, de; shequi'yo ajja —poanaje cuana.

²⁵ Ojjaña cuana esecue yasijje cuayaqui'yajo, Jesosa epona sho'i jaa huasijje dobiquinaje, pea equacuayijji yasijje. Me'i ifña majje epona sho'i shequi mee ca'yonaje. ²⁶ Jamajjeya ojjaña ma meshijo ba'e yasijje huohuiqui canaje cuaa: —¡Jesosaa jjashequi meequi'yojji, de! ¡Jiquio epona sho'i ma emano'yo poanaje shequi'yonaje! —poanaje.

Jesosaa beca deija cojjama' quea cojja ja'a po mee ca'yonaje

²⁷ Quijje pishana Jesosa ma equijo ani cuayaqui'yonaje. Ejiiojijje poquianijo beca deija o quiquishijji poquinaje, cojjama' cuana. Taaanaje jama ba'a: —Jesosa, miya emeshi mese Dabija bacua. ¡Ecuanaajo jjashahuabaquicue! ¡Cojjajji mo po mee'yoque!

²⁸ Jesosa pea equi yasijje dobiquiajo cojjama' cuana o que poeyanaje. Jesosaa oya cuana huohui'ajja canaje: —Miquianaya ejo jjashahuabaquiani jama ba'a: “E'e, Jesosa ca ca quea cojja ja'a jjapo meequi'yojji, de”.

—E'e, Jesosa, miya quea cojja ja'a jjapo meequi'yojji —poanaje cojjama'.

²⁹ Jamajjeya Jesosaa ojaya ecojja napa'ajja canaje emeya. Huohui canaje jama ba'a: —E'e, miquianajaya ejjashahuabaquijji ejo quea ja'a nee nee. Jamajjeya eyaya cojjajji po mee'yo nequiana.

³⁰ Jjeya nei quea cojja ja'a nee nee po'yonaje. Jesosaa huohui neinei canaje pea'ai: —E'e, eyaya miquianaya quea cojja ja'a po mee'yonaje. Jamatii ja'a jihuohuijji so'oi! —acanae.

³¹ Jamatii poqui majje huohui poanaje ojjaña huasijje: —¡Jesosaa ecuana quea cojja ja'a nee nee po mee ca'yonaje, de! —jamaya poanaje.

Dejja mimi'ajja mimi mee ca'yonaje Jesosaa

³² Majoya ma cojjama' poanaje cuana poqui'yajo, pea cuaa dejja mimi'ajja jjequi canaje Jesosa que. Eshahuaa oja yami yasijje dobiqui majje mimi'ajja po mee canaje. ³³ Jesosaa eshahua huojeacuayajea'yo majje dejja mimi'ajja quea ja'a nee mimi o'oyanaje. Ba majje ojjaña cuana quea bihui nee nee poanaje. Miminaje jama ba'a: —¡Chama' beca dejja Jesosa jama, de! Ohuaye nei eshahua huojeacuayajea ca'yani, mimi'ajja mimi mee ca'yonaje, de —poanaje.

³⁴ Jamatii Paniseo cuanaa Jesosa quehua niñeba canaje. Jama acanaje ba'a: —Chojja de, Jesosa eyamiquecua pojja'a. Pea eshahua huojeacuayajea mee cani Edosiquiana nijjeya —sajje pome poanaje.

Jesosa Quito ojjaña cuanaajo jjashahuabaquinaje quea yeno

³⁵ Jamajojoya Jesosa poquinaje ojjaña cuiñajji quea quemo huasijje, ojjaña cuiñajji sisi cuana huasijje pea'ai. Jodioja equi ojee ejjachichaquijji cuana huasijje dobiquinaje esohui huohuiya.

—Eya quijje eyajo ojjañaja Emeshi Mese oe nei poaje'yo —Jesosaa acanae.

Ojjaña quea mano jaa jjaajaqui mee ca'yonaje, huaquia mee ca'yonaje pea'ai. ³⁶ Dejja cuana quea huiso nee nee jjachichaquinaje o que. Jesosaa oya cuana ba canaje ñajjajja jama. Ejaahuanajji quea pame chamajo ñajjajja nequi mee ajja quea pame nee. Jamaja ojjaña cuana quea yeno poani; eba'ejji quea camaja ba'yani, ejaahuanajji quea pame chama' pea'ai, de. Jamajjeya Jesosa ojjañajo quea yeno poanaje. ³⁷ O shajja'ajjaji cuana nijje miminaje dejja cuanaajo. Jama poanaje Jesosa ba'a: —Anoso quejo jahua majje echacojji cuanaa cachicha cahua. Dejja cuana anoso jahuahua jayojja jama, quea huiso nee nee. E'e de, jjeya ojjaña cuana jjashahuabaquiani e'e jojo nei epojji; shajja'ajja caje eya Emeshi Mese nei poeyanaje o jaahuanaa. Jamatii oe pojji Eyacuiñajjijo chaco sa poani. ¿Aya acuae oya cuana jjabahuejjaqui mee caje'yo Eyacuiñajjijo? ³⁸ Jamajjeya ¡Yacuiñajji

nijje mimicue! Jama acue ba'a: "Eyacuiñajji, ¡huoojeacue oe miquea echacojji cuana esohui huohuiya, pea cuana minijje ejjapeequi mee'yojji!" —Jesosa poanaje.

10

Jesosaa iyaa canaje o shajja'ajjajji cuana 12 huisome
(Macoso 3.13-19; Noca 6.12-16)

¹ Jamajjeya Jesosaa o que iyaa canaje o shajja'ajjajji cuana. Oya cuana quea ca'a po mee canaje eshahua cuana huoojeacuayajea mee'yojji, ojjaña emanojaa cuana huaquia mee'yojji, ejjaajaqui mee'yojji pea'ai.

² Jesosa shajja'ajjajji nei 12 poa, yohua bajjani ba'a: Simohui ojaya pea bajjani Peno, oja chahua Anesi; Semeneoja bacua ejja Jacobo, oja chahua Huani; ³ Penipe, Matonome, Tomasi, Mateo ma bejjo chichajji emeshi mesejo poa; Apeoja bacua ejja Satiaco; ⁴ Simoni Senote; Nemeo ojaya pea bajjani Taneo; Jodasa Isicaniote, ma Jesosa iña meesahuajji poanaje deja mimishija quecua'yojji. Mahuiso Jesosaa babaca ca'yonaje ojaya esohui huohuijji epojji.

Jesosaa o shajja'ajjajji huoojea canaje esohui huohuiya
(Macoso 6.7-13; Noca 9.1-6)

⁵ Jamajjeya Jesosaa ¡iquio 12 huoojea canaje onijje chacohua. Jamaya huohui canaje: —¡A'a poquijji Jodio deja pojjeama cuanaja meshi yasijje! ¡Deja cuana Samania meshijo ba'e cuana huasijje pea'ai a'a poquijji jjeja! ⁶ Chojja, ¡jjeja poquicue Jodio cuana huasijje! Oya cuana poquiquehuanaje; Eyacuiñajji nijje jjapeepajeaquinaje ñajajja epoquiquehua jayojja jama, de. ⁷ Ojjaña cuana huohucue jama ba'a: "Jjeja Jesosa ojjaña huoojeajji poani" acue. ⁸ ¡Emanojaa cuana jjaajaqui mee'yocue! ¡Emano'yo cuana shequi mee'o'yacue! ¡Deja batata epo'yo cuana jjajeaqui mee'yocue pea'ai! ¡Eshahua cuana deja cuana huasijje dobiqiuajo huoojeacuayajea'yocue pea'ai! Eyaya miquianaya huaquia meesahuaña pea deja cuana sosema'. Jamajjeya ¡pea cuana quea bihui nee oe huaquia mee'yocue sosema'! ⁹ Jjeja ¡ejjeshejji, mei hu'o' pea'ai, bejjo pea'ai a'a dojojji! ¹⁰ ¡Bashosoco bobi dojojji a'a dojojji! ¡A'a beca daqui dojojji! ¡Miquea ejiojji nequi ejiojji shejee dojocue! ¡Oe acui ejjaquecuaca'aujji dojocue, beca pojjeama! Miquea esohui shajja'ajja majje pea cuaa miya cabobia cahua. E'e, miyaya esohui huohuiañajo, bobi caquia cahua. ¹¹ Miquianaaya pea cuiñajji yasijje poqui majje ¡sa'ajjacue oe deja miquea epeeji epojji, joya bei bei! ¡Ojaya equijo anicue ma cuiñajji ani majje! ¹² Ojaya equi yasijje dobiqiuajo majje huohucue jama ba'a: "¡Eyacuiñajjiya miquianaya cajaanahua cahua!" ¹³ Ojjaña ma equijo ba'eya miya quea pame nee acajo, Eyacuiñajjiya miquea esohui jayojja jama oya cuana jaahuana caje. Miya quea pame nee mi ba'e mee cajo, cho; Eyacuiñajjiya oya cuana ejaahuanañajji pojjeama. ¹⁴ E'e pojja'a beca equijo, beca cuiñajji miquea esohui shajja'ajja sa po'yo ajjajo, niñeba cani pea'aijo, ¡oya cuana jeajeana'yocue! Poquije'yohua jama acue ba'a: "Eyaya miquianaya cajaa aje'yo, ¡quea mimishi mi coma. Eyacuiñajjiya miya ba cani quea mimishi nee nee. Ohuaya miya quea nee nee po mee caje'yo" acue —Jesosa poanaje—. ¹⁵ Eyaya miya e'e jojo nei huohuiaña jama ba'a: Quijje Emeshi Mese nei poeje o'oya, ojjaña quea mimishi poani quea nee nee po meeje'yo. Yahuajo nei nei deja cuana Sonomajo ba'e, Jomoshajo ba'e pea'ai quea mimishi nee ba'yanijo, Eyacuiñajjiya quea nee po mee ca'ya poa, yahuajo. Ma deja shajjama' cuana ca ca Eyacuiñajjiya quea nee nee po tiitii mee caje'yo, de. Sonomajo ba'e cuana ca ca quea nee pishana po tiitii mee caje'yo.

Quijje deja cuana quea mase nee poaje

¹⁶ Jesosaa o shajja'ajjajji cuana huohui canaje pea'ai: —Eyaya miya huoojeaña deja quea mase ibia jama huasijje. Miquianaya quea beijo ohuaya mi napa ca chana'. Jamajjeya ¡quea jashahuabaqui ja'a pocue! ¡Quea bei pocue; mimishi'ama pea'ai! ¹⁷ ¡A'a pajea'yojji deja cuana quea mase poaje'yo minijje! Miya iña majje dojo caje Jodio eti ani yasijje jeanobiaa. Janobajjima nei cuia caje Jodioja equi ojee ejjachichaquijji. ¹⁸ Miya cuana enijje jjapeequianijo dojo caje cuaa pea emeshi mese cuana huasijje, ona huoojeajji nei nei yasijje pea'ai. ¡Jamajjeya miquianaaya esohui quea pame nee ejo huohucue ona huasijje, Jodio pojjeama cuanaja ejjahuojeaquijji nei nei yasijje pea'ai! ¹⁹ Dojo majje huohui'ajja caje jama ba'a: "¿Ae poani miquianaya?" Jamaya acajje ¡a'a quea mete pojji! A'a jashahuabaquijji jama ba'a: "¿Ae shai eyaya huohuije?" ²⁰ E'e nei Eyacuiñajjiya miya mimi meesahua caje. Ohuaya huoojea caje Edojjoshahua Pame mi que. Edojjoshahua Pameya miquianaya huohui meesahua caje —Jesosa poanaje.

²¹ —E'e, quijje pishana deja cuana, ponaña pea'ai quea mase nee poaje ecuea epeeji cuana nijje. Jamajjeya e'o'i mese oja chahua iña meesahua caje'yo onajaya equcua'yojji. Ejeajji cuaa jamaya acaje'yo oja bacua. Ebacua cuana shajjama' poaje. Deja mase oja chíi, oja enaese pojja'a iña mee caje'yo equcua'yojji. ²² Miquiana enijje jjapeequianijo, quea

huiso cuana quea quene nee nee poaje'yo minijje. Jamatii enijje jjapeequi pajea'yo ajjajo nequi tiitii meeje'yo enijje eyajo, eya ojjañaja Emeshi Mese oe nei, ejjahuojeaquiiji nei nei poaje. ²³ Deija cuaa oe cuiñajijjo ba'eya miquianaya janobajjima napa cajo, ipoquicue pea cuiñajiji yasijje! Eyaya miya e'e jojo nei huohuiaña: Ojjaña Jodio deija cuanaja cuiñajiji cuana huasijje poqui jjimahuajo, ojjaña cuana huasijje ecue sohui huohui jjimahuajo pea'ai eya, ojjañaja Edoe Mese poeje o'oya —Jesosa poanaje.

²⁴ —Ojjaña cuana enijje quea mase poani. Jamajjeya minijje quea mase poaje pea'ai e shajja'ajjajji poani jojoya. ²⁵ Echacojji poani o chacomeejji nijje chacochacoanijo, pea cuaa echacomeejji napa cajo, echacojji poani pea'ai napa caje cuaa. ¿A'a e'e? Deija mimishi cuana ejo siajje poanaje jama ba'a: “Miya Edosiquiana Meesemo bajjani”. Jamaya enijje quea tai mimijajianijo quijje quea tai nee nee mimijajije minijje ecuea epeeji poani jojoya. Jamajjeya miya e jayojjaya acaje'yo; jmatii quea bihui nee pocue! —Jesosa poanaje.

¡A'a quea mete poiji deija cuanajo!

(Noca 12.2-7)

²⁶ —Jamajjeya deija mimishi cuanajo ¡a'a quea mete poiji! Ojjaña esohui quehuajje acani, pea cuanaja shajja'ajja jjima, quijje shajja'ajja caje. Ojjaña quehuajje amajje quijje ojjaña ba mee caje'yo.

²⁷ —Jjeya eyaya esohui huohuiaña miquiana huasijje, ma pea cuanaja shajja'ajja jjima. Quijje pishana miquianaaya ojjaña huasijje huohuiquije ecuea esohui. ¡Quea ja'a nee huohuicue! ²⁸ Ojjaña cuanajo, eshahua cuanajo pea'ai ¡a'a quea mete poiji! Oya cuana miya quecua caje'yo poija'a. Jamatii, miquea edojjoshahua mano meeme e aja. ¡Eyacuiñajiji oe nejo jashahuabaquicue! Shajjama' poajo ohuaya miya mano mee'yo majje cuaqui yasijje jea caje'yo miquea edojjoshahua —Jesosa poanaje.

²⁹ —E'e —Jesosa poanaje—, beca anohuii jjeshe caji beshahua nei sosema'. Nahue'ama nei cuichoiji cuana. Jamatii Eyacuiñajijya, esejaya Chiiya cuichoiji cuana ba cani, bobi ijija mee cani. ³⁰ Pea'ai ¿ache huiso ehoojjaña miquea esapajo ba'e? Eyacuiñajijja eba. Ojjaña ojaya ehoojjaña esico, de. ³¹ Jamajjeya ¡a'a quea mete poiji! Cuichoiji cuana Eyacuiñajijja nahue'ama; miya ca ca ojaya quea nahue nee nee —Jesosa poanaje.

¡A'a quea bicho poiji Jesosa nijje jjapeequiani!

(Noca 12.8-9)

³² —Beca cuaa bicho'ama huohui cani: “E'e, eya ca iña bicho'ama Jesosaja epeeji e'e jojo nei”. Jamajjeya eyaya ecue Chii eyajo ani huohuije bicho'ama jama ba'a: “E'e, oya cuana ecuea epeeji e'e jojo nei”. ³³ Pea cuana quea bicho poani: “Cho, eya Jesosa Quitoja epeeji pojjeama”. Jamajjeya eyaya ecue Chii eyajo ani huohuije jama ba'a: “Cho, oya cuana ecuea epeeji pojjeama. Cajaa” eyaya aje —Jesosa poanaje.

Ojjaña deija Jesosajo ojee ba'e meeme aja quea bei

(Noca 12.51-53; 14.26-27)

³⁴ —¡A'a jashahuabaquijji eya poeyanaje ojjaña cuana ojjaña meshijo ojee quea bei ba'e meeya! Chojja, de. Pea cuana quea mase poaje ecuea epeeji cuana nijje. ³⁵ E'e, ecuea esohui ohua shajja'ajja canijo, oja chii nijje oja bacua ejja cuana quea quene poaje. Ecuea esohui jayojja jama ohua acanijo, oja enaese nijje ojaya ebacua piona quea quene poaje pea'ai. Enijje jjapeequianijo, oja ano nijje oja bacua ejjaja huanase quea quene poaje pea'ai. ³⁶ Jamajjeya ecuea epeejiija huapa pojjeama cuana quea quene poaje onijje ecuea epeeji pojjeama jjejojo; pea cuana quea quene pishana poaje onijje —Jesosa poanaje.

³⁷ —Ojjaña joya oja chii, ojaya enaese poija'a quea jea nee nee acanijo eya quea jea pishana acani ecuea epeeji pojjeama, de. Pea'ai ojjaña joya oja bacua ejja, oja bacua piona poija'a quea jea nee nee acanijo eya quea jea pishana acani enijje jjapeequi meeme aja. Cajaa. ³⁸ Eyaya Eyacuiñajijja esohui huohuiañajo, pea cuana enijje quea quene poaje'yo. Deija mimishiya enapa ca poani jjejojo enijje mi jjapeequiani. Ojjaña joya e jayojjaya ba'e sa po aja ecuea epeeji pojjeama. E'e, jiquio ecua acui ecueata'apee quea camaja e'abojji jama jayojja enijje jjapeequiyajo quea camaja poaje. ³⁹ Deija mimishi cuaa ecuea epeeji quecua ca chana'. Jamajjeya quea mete nee neejo enijje jjapeequi sa po aja. Cuaqui yasijje dobi quije'yo titii. Joya enijje jjapeequiani ca ca deija mimishi cuaa quecua caje'yo poija'a. Jamatii. Mano'yo majje enijje ba'e tiitijje'yo quea pame nee eyajo —Jesosa poanaje.

Ojjaña joya quea pame poani sosequia caje'yo quijje Eyacuiñajijya

(Macoso 9.41)

⁴⁰ —E'e —Jesosa poanaje pea'ai—, beca cuana minijje jjapeequije'yo miya ecue sohui huohuiañajo. Jamajjeya oya ecuea epeeji poani pea'ai. Eyacuiñajiji e huooejji poani; ojjaña joya enijje jjapeequiani Eyacuiñajijja epeeji poani pea'ai. ⁴¹ Quijje Eyacuiñajijya ojaya esohui huohuiji sosequia caje'yo ojaya esohui huohui cani sosejje. Pea cuana

ojaya esohui huohuijji niije jjapee neineiquianijo, sosequia caje'yo esohui huohuijji jayojja jama. Ojjaña joya Eyacuiñajjija epeeji niije e'e jojo nei jjapeequiiani Eyacuiñajjija sosequia caje'yo quea pame nee oya quea pame nee poanijo. ⁴² E'e jojo nei ojjaña joya ecuea eshajja'ajjajji poani ba'e meesahua cani, ena e'ishijji quia cani pojja'a eya ojaya quea boti neejo, Eyacuiñajjija oya quijje sosequia caje'yo oya quea pame nee poanijo —Jesosa o shajja'ajjajji cuana huohui canaje mahuiso huoojea jjimahuajo.

11

Huaniya Jesosa que huoojea canaje o shajja'ajjajji cuana
(Noca 7.18-35)

¹ Majoya Jesosaa ojaya ome miji becanejjijji pea'ai, 12 eshajja'ajjajji cuana huasijje esohui huohui majje pea cuiñajji quea chipi nee yasijje poquinaje esohui huohuiya.

² Yahuaajo pea dejja cuaa Huani iña ca poa, ma ona besameejji poa. Dejja maseja equi ejajjeanobiaquijji yasijje jeanobiajea ca poa, eme' jeyo'yo. Ejeanobiajaaa Huaniya shajja'ajja canaje onaja ehuohui'yo Jesosajo. Jamajjeya o shajja'ajjajji cuana huoojea canaje Jesosa que. ³ Oya cuana Jesosa huohui'ajjaña meequi canaje jama ba'a: —Jesosa, yahuaajo Huaniya huohui canaje jama ba'a: “Eyacuiñajjija Emeshi Mese nei ojjaña jaahuanajji huoojea caje'yo ecuaa huasijje”. ¿A'a miya ma Emeshi Mese nei? E'e pojja'a ecuaa pea ishoaje. ¡Jamajjeya huohuicue miyaya! ¿Yajja shai ecuaa Huani aje'yo so'o? —Huaniya eshajja'ajjajji cuana poanaje.

⁴ Jesosaa oya cuana saja'a canaje: —¡Poqui o'oyacue Huani que! ¡Ecuea esohui miquianaaya shajja'ajjaña, jiquio miya eya banajeya pea'ai oe Huani huohuicue! Jama acue ba'a: ⁵ “Huani, Jesosaa cojjama' cuana quea cojja ja'a po mee ca'yani. Jiojijijajja jeo mee ca'yani. Dejja batata epo'yo cuana jjajeequi mee ca'yani. Shajjaqueba pea'ai quea shajja ja'a po mee ca'yani. Emano'yo cuana shequi mee ca'yani pea'ai. Esohui quea pame nee huohui ca'yani ojjaña dejja quea yeno huasijje”. ⁶ E'e, eya Eyacuiñajjija huoojea'yo ojjaña jaahuanajji. Quea bihui nee capo'yahua ojjaña joya ejo jjashahuabaquiani jama ba'a: “E'e jojo nei Jesosa Eyacuiñajjija huoojea'yo ojjaña jaahuanajji”. ¡A'a jjashahuaba quehuaquijji! —Jesosa poanaje.

⁷ Jamajjeya Huaniya epeeji cuana poqui o'oyanaje Huani que. Majoya poqui'yajo Jesosa miminaje pea cuana niije: —Yahuaajo Huani meshi jabojo, quimajo aninaje. Miquianaya o que poquinaje. ¿Ae shai banaje miyaya? ¿Ae jjashahuabaquinate Huani? ¿A'a jjashahuabaquinate Huani esohui huohuijji quea ja'a pojjeama? Chojja. ⁸ Miquianaya Huani que poquinaje ¿ae baa? ¿A'a dejjaja daqui quea nahue nee ehusho ba'e banaje? Chojja. Dejjaaa daqui quea nahue nee huusho cani equi quea quemajo ba'eya. ⁹ ¿Achajja Huani ba'ya poa? ¿A'a miya jjashahuabaquinate Huani Eyacuiñajjija esohui huohuijji nei nei? E'e, de. Jamatii Eyacuiñajjija esohui huohuijjiya ba cani oe pojji. Huaniya eba quea huiso nee. ¹⁰ Yahuaajo nei Eyacuiñajjija esohui etehue'yo Huanijo jama poa ba'a:

“Jiquio dejja ecuea esohui huohuijji nei poani. Jamaya eya sa poani. Eyaya oya huoojeaje ebionei, mi hui DOJOJJI. Ohuaya dejja cuana huasijje huohui caje miquea epoejjijo”.

Jamaya yahuaajo nei nei Eyacuiñajjija ojjaña ba mee ca poa Huaniya poe majje ejo jjabahuejjaqui mee caje cuana. ¹¹ Ecuea pea esohui a'a pajea'yojji jama ba'a: Ojjaña pea cuana quea pame. Huani ma ona besameejji poa quea pame nee nee. Jjeya pea chama' Huani jayojja jama. Jamatii quijje eya Emeshi Mese nei poaje, ojjaña ecuea epeeji cuana Huani jayojja jama poaje'yo, quea pame nee nee. ¹² Eya poeyanajejo Huaniya ojjaña pojjaajo ejo huohui canaje jama ba'a: “Jjeya nei Emeshi Mese nei Quito poeje”. Jamatii dejja mase cuaa Huani napa cani ojjaña pojjaajo. Eya, Emeshi Mese nei jeabichajjea sa acani cuaa pea'ai. ⁹ Oya cuana emeshi mese jayojja jama huohui sa poani —Jesosa poanaje.

¹³ —Yahuaajo nei Eyacuiñajjija esohui huohuijji cuaa huohui ca poa, Moisesija esohui etehue'yojo jama poa pea'ai ba'a: “Quijje Eyacuiñajjija huoojea'yo ojjaña jaahuanajji Emeshi Mese oe nei poeje”. Jamaya Huani miminaje. Jamaya pea cuana miminaje Huani poe jjimahuajo pea'ai. ¹⁴ E'e, yahuaajo nei Eyacuiñajjija esohui huohuijjiya tehue ca poa jama ba'a:

“Ecuea ehoojea'yo ojjaña jaahuanajji poe jjimahuajo, eyaya Enia huoojeaje ebionei, ehui DOJOJJI”.

—Huaniya Enia jayojja jama huohui canaje, ma Eyacuiñajjija esohui huohuijji yahuaajo nei nequia poa jama. ¹⁵ Jamajjeya ¡bacue; a'a shajjama' pojji, ca miquiana ba sa poanijo! ¹⁶ Ojjaña cuana jjeya nei ba'e ecuea eba. Oya cuana esho'iquiana quebanei poani jayojja jama. Quebanei poanijo jama poani: Esho'i cuaa pea esho'i taqa cani. ¹⁷ Jjamimihue'equiani jama ba'a: “Ecuaa dehue miaña epona ejjahueaquijjijo jama. Jamatii miquianaya majamaja ajja. Pea'ai e pa nishoanijo, emano'yojo pa'aní jayojjajjo,

miquianaya pa nisho ajja. Jamajjeya miquianaya quebanei po ajja ecuana nijje” poani esho'iquiana —Jesosa poanaje—. Jamaya miquianaya jjeaya poani, de. ¹⁸ E'e, yahuajo pishana Huani poeyanaje. Eyacuiñajji nijje mimi tiituanijo bobi ijjia'ijjia ajja. Ecahuishi ishi jjiima pea'ai. Jamajjeya ojjaña cuaa huohui canaje ojo jama ba'a: “Huani jja ca niñepoqui jama”. ¹⁹ Eya ojjaña cuanaja Edoe Mese poeyanaje. Eya ca jja ca ijia'ijjiani; ojjaña nijje mimimimiani. Jamajjeya miquianaya ejo siajje poani jama ba'a: “¡Bacue jiquio deja Jesosa! Oya jejje ajja tii. Deja mimishi nijje jjapeequiani, bejjo chichajji cuana nijje pea'ai, de”. Jiquio ecua esho'iquiana pea nijje jjapeequi sa po ajja jama jayojja miquianaya ecuana nijje jjapeequi sa po ajja. Miquianaya jjashahuaba quehuaquiani Huanijo, ejo pea'ai. Jamatii ecuana Eyacuiñajjija ejjashahuabaquijjijo quea ja'a nee jayojja jama añajo ecuana quea pame nee añe —Jesosa poanaje.

Beca cuiñajjijo ba'e cuana shajjama' poanaje
(Noca 10.13-15)

²⁰ Quea huiso cuiñajjijo Jesosaa ma deja cuaa ajjima acani ahuicha'a huicha'a canaje. Jamatii quea huiso cuana mimishi pajea sa po'yo ajja. Jamajjeya Jesosaa oya cuana tecuea canaje. ²¹ Jama poanaje ba'a: —Miquianaya quea mimishi nee nee. ¡Quea yeno nee nee miquianaya poaje Conasijo ba'e, Betesainajo ba'e pea'ai! Ma dejjaa ajjima acani eyaya ahuicha'a huicha'anaje miquianaya cuiñajji cuanajo miquea ebajji nisho. Yahuajo nei nei pea deja cuana Tinojo, Sinonojo pea'ai ba'aja ojaya ba jjiima eyaya ma deja cuaa ajjima añe. Eba jojjemo oya cuana mimishi cuana pajea ca'yo queaye mimishijo quea yeno po majje. ²² ¡Bacue oe! Quijje Eyacuiñajjija ojjaña cuana sosequia caje'yo ojaya eba'e'yojji sosejji. Ohuaya yahuajo nei nei Tinojo ba'e cuana, Sinonojo ba'e cuana pea'ai quea nee po mee caje'yo mimishijo. Miquianaya Conasijo ba'e, Betesainajo ba'e pea'ai ca ca quea nee nee po mee caje'yo ecuea esohui miquiaaya mi shajja'ajjajo. ²³ Miquianaya Capenaomajo ba'e quea pame poso jjabaquiani, jjashahuabaquiani jama ba'a: “Ecuana quea pame nee nee; pea meshijo ba'e cuana quea pame pishana”. Chojja, de. Siajje miya poani. Quijje Eyacuiñajjija janobajjima nei napa cajje miquianaya quea yeno poaje. Eyaya ma dejjaa ajjima acani añe miquianajaya cuiñajjijo quea huiso. Jamatii miquea mimishi cuana pajea sa po'yo ajja. Yahuajo nei nei pea cuiñajji Sodoma bajjani yania poa. Eyacuiñajjija ma dejjaa ba jjiima acani eba jojjemo oya cuana quiyo jejojeyo'yo jjiima poqueaye. Jamatii jjeaya Sodoma chama'yo tii. ²⁴ ¡Bacue oe! Quijje aje Eyacuiñajjija ojjaña cuana sosequia caje'yo ma ecua oya po nequia poa jama. Ma pojjaajo ohuaya deja cuana yahuajo nei Sodomajo ba'e quea nee po mee caje'yo quea mimishijo. Miquianaya Capenaomajo ba'e ca ca quea nee nee po mee caje'yo ecuea esohui miquiaaya mi shajja'ajjajo —Jesosa poanaje.

Jesosa Quitohua eseya jomishoca mee caje
(Noca 10.21-22)

²⁵ Jamaya deja cuana tecuea majje Jesosa eseya Chii ai nijje miminaje jama ba'a: —Ecuea Chii, miya eyajo Emeshi Mese nei poani. Ojjaña meshi cuana miquea poani pea'ai. Eyaya miya bihuiaña. E'e, beca cuana jjashahuabaquiani jama ba'a: “Ecuea eba quea huiso esohui, quea huiso aquiana pea'ai”. Jamajjeya miyaya oya cuana ba meesahua ajja. Jamajjeya oya cuanaja ba jjiima eya Emeshi Mese oe nei poani. Pea cuana esho'i cuana jama ca ca miyaya jjashahuabaqui meesahuaña quea ja'a nee eya Emeshi Mese nei poani. Jamajjeya eyaya miya bihuiaña. ²⁶ E'e ecue Chii, jamaya miyaya añe miquea ejjashahuabaquijji. Apoa —jamaya Jesosa miminaje eseya Chii ai nijje.

²⁷ Majoya Jesosa jama poanaje ba'a: —Eyacuiñajji ecue Chii e huoojajji epo. Eya ojaya esohui huohuijji poani. Ecue Chiiya eyajo anija ecuea ejjashahuabaquijji ojaya eba nei nei, ojaye nei. Ecue Chiiya ejjashahuabaquijji ecuea eba nei nei pea'ai, ecuee nei. Eyaya ecuea epejji ba meesahuaña quea ja'a nee ecue Chiiya ejjashahuabaquijji —Jesosa poanaje.

²⁸ —¡Enijje jjapeequicue quea bei! Mique mimishi cuanajo miya quea yeno. Miquea echaco quea camajajo miya quea yeno poani pea'ai. ¡Enijje jjapeequicue! Eyaya miya jomishoca meejje'yo camaja'ama eba'e'yojji. ²⁹ Eyaya quiana ca ca oe miquianaya jama pojjeamaa jjejojo quea jea añe; tecue'ama; quea bei pea'ai. Ecuea epejji po majje miquianaya quea bei poajje'yo. Ba'e tiitii meejje'yo enijje eyajo pea'ai. Jamajjeya ¡ecuea esohui jayojja jama acue! ¡jjashahuabaquicue quea ja'a nee ecuea esohuijo! ³⁰ Camaja'ama ecuea esohui jama eba'e'yojji. Ecuea esohui aquiana pejapeja e'abojji jayojja poani —Jesosa poanaje.

12

Esohui epojja ejomishocajjijo
(Macoso 2.23-28; Noca 6.1-5)

¹ Majoya epojja ejomishocajjijo Jesosa o shajja'ajjajji cuana nijje ejiojjijje poquinaje. Que yiyejje poquije quea shoe poanaje; quejo nequi anoso ai seija canananaje eshe tii e'ijji'ajji, o shajja'ajjajjiya. ² Maya Paniseo cuaa ba canaje. Jamajjeya Jesosa nijje mimijajinaje jama ba'a: —¡Bacue oe! Mi shajja'ajjajji poani cuaa chaco cani. Anoso ai seija cani epojja ejomishocajjijo. Moisesija etehue'yo jama poani ba'a: "¡A'a chacojji epojja ejomishocajjijo!"

³ Jesosaa oya cuana saja'a canaje jama ba'a: —¿A'a miquea ba jjima esohui etehue'yo emeshi mese Dabija? ⁴ Yahuaajo nei nei oya epeeji cuana quea shoe po majje ojee Eyacuiñajjija equi yasijje dobiquinananaje. Ijjia ca poa ejji ecabeje, maya Eyacuiñajji yasijje quia ca poa cuaa oya ebajji. Jiquio ca oe Eyacuiñajji nijje mimianiya ca'ijjia cahua; pea cuanaja e'ijji'ajji pojjeama. ⁵ ¿A'a miquea ba jjima Moisesija esohui etehue'yo? Jama poa ba'a: Ojjaña epojja ejomishocajjijo Eyacuiñajji nijje mimiani cuaa ca oe Eyacuiñajjija equijo cachaco cahua. Jamatii mimishi'ama, mimijaji ajja, de; oya yajjijo cachaco cahua.

⁶ —E'e, eyaya miya e'e jojo nei huohuiaña jama ba'a: Moisesija esohui Eyacuiñajjija equijo quea ja'a pishana yahuaajo nei poa. Ecuea esohui ca ca quea ja'a nee nee —Jesosaa acanaje—. ⁷ E'e, miqianajaya Eyacuiñajjija esohui etehue'yo eba neinei'yo jojjemo dejja cuana mimishi'ama jjanifebaqui ajja pome. Jamaya quea tai. Yahuaajo Eyacuiñajjija esohui etehue'yo jama poa ba'a:

"Huo cuana cuia cani. Cuia majje na sho cani e bihuiajji. Jamaya ecuea quea boti pishana. ¡Pea cuana oe ba'e meecue tii quea bei! Jamaya ecuea quea boti nee nee".

Jamaya tehue ca poa yahuaajo.

⁸ —Jamajjeya eya ojjaña Edoe Mese Emeshi Mese nei poani. Eyaya nei huohuije epojja ejomishocajjijo; ¡quea pame nee nee acue! ¡Pea cuana quea jea nee acue! —Jesosa poanaje.

Meshahuama'yo epo jjameshahuanequi mee ca'yonaje
(Macoso 3.1-6; Noca 6.6-11)

⁹ Majoya Jesosa poquinaje pea huasijje. Equi ojee ejjachichaquijji yasijje dobiquinaje. ¹⁰ Jomajo dejja meshahuama'yo epo aninaje. Jamajjeya Jesosa ba majje Paniseo cuana jama jjashahuabaquinaje ba'a: —E'e pojja'a Jesosaa chaco caje epojja ejomishocajjijo; e'e pojja'a eme'jeapisa mee caje'yo epojja ejomishocajjijo. Caba'ajja sahua —poanaje Paniseo. Jesosa nijje mimijaji sa poanaje. Jamajjeya oya huohui'ajja canaje Paniseo cuaa: —Jesosa, ¿a'a dejja quea mano jaa miyaya huaquia mee'yome epojja ejomishocajjijo?

¹¹ —Epeeji cuana, e'e pojja'a miquea ñajjajja jjanii quea doe yasijje oquequije epojja ejomishocajjijo. ¿A'a miyaya ñajjajja iña majje ma pojjaajo jjequisohuaje'yo? E'e, de. ¹² ¡Bacue oe! —Jesosa poanaje—, dejja Eyacuiñajjija quea boti nee; ñajjajja ca ca quea boti pishana. Jamajjeya e'e, pea cuana ca'a meesahua'yahua epojja ejomishocajjijo. Jamaya Moisesija esohui etehue'yojo poani pea'ai —Jesosa poanaje.

¹³ Ma mimi majje Jesosaa meshahuama'yo epo jama acanaje ba'a: —Epeeji, ¡miquea eme'jeapisa'ajja'yo socue!

Jamajjeya eme'jeapiihui majje eme'jeapisa ca'yonaje; pea mijijje jayojjaya po'yonaje. ¹⁴ Majoya Paniseo cuana esecue yasijje cuayaqui majje ojee miminaje: —¿Yajja amajje Jesosa quecua ca'yojji so'o, de? —Jamaya poanaje Paniseo cuana.

Jesosa Eyacuiñajjija echacojji ojaya yajjijo

¹⁵ E'e, Paniseo cuaa oya quecuapana canaje. Ma shajja'ajja majje Jesosa poquinaje pea meshi yasijje. Quea huiso dejja cuana onijje poquinaje. Ojjaña cuana huaquia mee ca'yonaje, jjaajaqui mee ca'yonaje, Jesosaa. ¹⁶ Jama poanaje ba'a: —E'e, eyaya miya huaquia mee'yonaje. ¡Jamatii a'a jihuhuijji so'o!

¹⁷ E'e, Jesosaa ojjaña cuana huaquia mee ca'yonaje, sohuihuohui canaje pea'ai. Jamaya Isaiaja esohui etehue'yo ojo yahuaajo nei nei jayojja jama poa. Eyacuiñajjija Isaiaja yahuaajo nei nei tehue mee ca poa Jesosajo jama ba'a:

¹⁸ "¡Bacue! Jiquio dejja ecuea echacojji ecuea yajjijo. Eyaya oya huoojeaje'yo. Oya ecuea quea jea nee nee. Ojo eya quea bihui nee nee. Ecuea Edojoshahua Pame o que eyaya huoojeaje'yo; ohuaya ojjaña Jodio pojjeama cuana huasijje huohui caje jama ba'a: —¡Ojjaña cuana ecuea esohui e'e jojo nei jojo jjabahuejjaqui'yajo Eyacuiñajjija quea boejea po mee caje'yo! ¹⁹ Oya ecuea echacojji jjamimicuaieja nobiajeaqui ajja. Quea bei nee mimije'yo. Ejiojjijje poquiani quea shajjaquijjo po'yo ajja. ²⁰ Joya quea mimishi nee nee aje jja oe ohua mimishi cuana cuijea ca'yajje quea boejea poaje'yo. Cuanaya jiquio ecua cuaquijji quijjo'yo jjimahuajo ese sho o'oyaña jama jayojja ecuea epeeji quea mimishi po o'oya chanajo ohuaya quea ja'a nee nee po mee caje o'oya, de. E'e, ohuaya ojo chaco tiiti caje'yo; quea huiso nee nee ba'e mee caje'yo quea ja'a nee nee. ²¹ Jodio pojjeama quea huiso nee nee ojjaña meshijo ba'e cuanaya e'e jojo nei onijje jjaapeequije'yo pea'ai".

Jamaya Eyacuiñajjiya Isaia tehue mee ca poa yahuaajo nei nei Jesosa Quitojo.

Jesosa niñeba canaje cuaa

(Macoso 3.20-30; Noca 11.14-23; 12.10)

²² Majoya Jesosa que jjequi canaje cuaa deja niñepoqui. Oya cojjama', mimi'ajja pea'ai. Jesosaa eshahua huoojeacuayajea ca'yonaaje. Jamajjeya oya quea cojja ja'a poanaje, emimijji pea'ai. ²³ Ba majje ojjaña cuana quea bihui nee poanaje. Jama acanaje ba'a: —E'e de, a'ya shai de, ¿a'a pojja'a Jesosa Eyacuiñajjiya huoojea'yo Quito?

²⁴ Ma shajja'ajja majje Paniseo cuaa Jesosa niñeba canaje. Jama poanaje ba'a: —Chojja, de. Jesosa aje oe eyamiquecua pojja'a. Ohuaya aje jja oe eshahua cuana huoojeacuayajea canaje Edosiquiana etii nijjeya, Satanasa bajjani, pea bajjani Meesemo nijjeya —poso acanaje Paniseo cuaa.

²⁵ Paniseo cuanaja ejjashahuabaqui'yojji quea tai Jesosaja eba poanaje. Jamajjeya oya cuana tecuea canaje jama ba'a: —¡Shajja'ajjacue oe! Joya emeshi mese shajja'ajja sa po ajjajo ojee jjaquecuacui majje jjaquecua iyaiyaquijje'yo; deja cuana ma meshijo ba'e chama'yo tii poaje'yo. Cuiñajjiyo ba'e cuana jamaya po pea'ajje, chama'yo tii poaje emeshi meseje echacojji cuana. Huapa pojjeama cuana jjacuayajja chama' epeeji cuana poaje'yo pea'ai. ²⁶ Jamaya pea'ai Edosiquiana, Satanasa pea eshahua ehoojeacuaya'yo jojjemo deja huoojea'yojji pojjeama po'yoqueaye —Jesosa poanaje. ²⁷ —¿A'a ya eya Edosiquiana nijjeya niñe, pea eshahua cuana pea'ai huoojeacuayajeaña poso añña? Jamajjeya miqewa epeeji cuanaa ¿ae niñe eshahua huoojeacuayajea cani? Eyacuiñajjiya asahua canijo. Jamajjeya ojaya eba miquanaya ejo sijaje poani. ²⁸ E'e, Eyacuiñajji nijjeya eyaya eshahua huoojeacuayajea'yaña. Jamajjeya bacue eya e'e jojo nei Eyacuiñajji, Emeshi Mese oe nei jjeja poani tii. ²⁹ Cuanaya ¡bacue! ¿A'a deja quea ca'a neeja equi yasijje dobiqiani oja aquiana siya o jeyo jjima nequijo? Chojja. O jeyo majje ojaya aquiana cuana sii caje cuaa. Jiquio ecua e'aquiana mese ebionei jeyo cani jama amajje eyaya eshahua cuana jjeacuayajeaña —Jesosa poanaje pea'ai.

³⁰ —Cuanaya ojjaña joya enijje jjapeequi ajja aje oe e quecuapanajji poani, ojjaña enijje chaco ajja ecuea epeeji pojjeama aje oe e ejeabichajeajji nisho poani —poanaje.

³¹ —Jamajjeya eyaya miya e'e jojo nei huohuiaña: Eyacuiñajjiya ojjaña mimishi cuana, sijajpeoji cuana pea'ai cuijea caje'yo. Jamatii joya Edojjoshahua Pame niñeba cani tii ca ca Eyacuiñajjiya maya emimishi cuijea'yojji pojjeama tii tii. ³² E'e —Jesosa poanaje—, eya niñeba cajo Eyacuiñajjiya ma mimishi cuijea caje'yo. Joya Edojjoshahua Pame niñeba cani tii ca ca Eyacuiñajjiya maya emimishi cuijea'yojji pojjeama tii tii. Jjeya ecuijea'yojji pojjeama; quijje ecuijea'yojji pojjeama tii tii poaje'yo, eya ecue Chii nijje eyajo ojjaña huoojea'yojji poaje —Jesosa poanaje.

Deja mimishi acui tai jjaaja ajja jayojja

(Noca 6.43-45)

³³ Jesosaa Paniseo tecuea canaje pea'ai jama ba'a: —Acui quea pame jjaajani. Acui quea tai jjaaja ajja, quea jjaaja biso. Jamajjeya miyaya baña deja mimishi acui tai jayojjaya; ohuaya quea tai acani. ¿A'a miyaya eya baña quea pame nee? Jamajjeya eya quea pame acui quea pame jayojja. ³⁴ Miquanaya aje oe peyo quea se nee nee jama, quea mase. Miquanaya quea tai poanijo quea pame mimi ajja. E'e, quea jashahuabaqui tai po tiitianiyo quea tai mimiani —Paniseo cuana acanaje Jesosaa—. ³⁵ E'e, joya quea jashahuabaqui ja'a nee poanijo quea ja'a nee ba'yani. Quea jashahuabaqui taijo ca ca quea tai ba'yani. ³⁶ Jamajjeya eyaya miya huohuije e epoe o'oyajjiyo ojjaña mimishi tecuea, ojjaña joya jjanibequiani, mimijajiani, sijaje poani pea'ai quea nee nee po tiitii meeje'yo. ³⁷ E'e, miqewa esohui quea ja'a nee poanijo, Eyacuiñajjiya miya etecueajji pojjeama. Quea sho'i taijo ca mi ca Eyacuiñajjiya quea nee nee po tiitii mee caje'yo —Jesosa poanaje.

Paniseo cuana Jesosaa acani ba o'oya sa poanaje

(Macoso 8.12; Noca 11.29-32)

³⁸ Majoya beca Paniseo cuaa, Moisesija tehue huohuijjiya pea'ai Jesosa huohui canaje jama ba'a: —Esohui huohuijji Jesosa, ¡quea pame acue! ¡Ma dejjaa ajjima acani a'o'oyacue so'o, Eyacuiñajjiya miya huoojea canaje ecuanaja ebajji! —poanaje.

³⁹ —Chojja. Miquanaya Eyacuiñajjiya esohui cajaa anaje. Jamajjeya miya peapea ba sa poani. Jamatii Eyacuiñajjiya yahuaajo nei Jjonajo aca poa jayojja jama ohuaya jjeya acaje o'oya miquanaja ebajji. ⁴⁰ Ma ecua yahuaajo Eyacuiñajjiya esohui huohuijji Jjona jai ai'ajja seejo ba'ya poa pea beca peejjima cahuime jama jayojjaya aje eya ojjañaja Edoe Mese bajjani quijje pishana mano'yo majje mei jjanijo ehuananobia jaa shequije o'oya —Jesosa poanaje.

⁴¹—Yahuajo nei nei dejja cuana Ninebejo ba'eya Jjonaja esohui shajja'ajja majje mimishi cuana pajea ca'ya poa. Jjona quea ca'a pishana poa; eya ca iña quea ca'a nee nee. Jamatii miqüianaya ecuea esohui shajja'ajja sa po ajja. Jamajjeya quijje eya poe o'oya majje mimishi cuana tecueajeaje. Ninebe dejja cuaa miya tecuea caje jama ba'a: "Miqüianaya ca ca oe quea mimishi nee nee poanaje". ⁴² Jama pea'ai poaje ba'a: Yahuajo nei nei Sama mese epona quea huesha nee poeya poa Jodioja emeshi mese Sanomoja esohui shajja'ajjaa. Sanomo quea jjashahuabaqui ja'a pishana poa; eya ca quea jjashahuabaqui ja'a nee nee. Jamatii miqüianaya ecuea esohui shajja'ajja sa po'yo ajja. Jamajjeya quijje eya poe o'oyaje mimishi cuana tecuejeaa, eeno poejijje emeshi mese ponaa, Sama meseya jama miqüianaya tecueame acaje pea'ai ba'a: "Miqüianaya ca ca oe quea mimishi nee nee poanaje" acaje nequiana —Jesosa poanaje.

Eshahua dejjaja yami yasijje poe o'oyanaje
(Noca 11.24-26)

⁴³ Jesosaa esohui ejjabahuejjaqui meejji huohui canaje pea'ai jama ba'a: —Eshahua dejjaja yamijo nequi cuayaqui'yo majje quea huesha poquinaje. Sa'ajja canaje pea huasijje enequijji. Jamatii ba'yo jjima. Oya po'ayequeiquei tii. ⁴⁴ Jamajjeya oya jjashahuabaqui jama ba'a: "Eya poquije o'oya huacuaya oya' dejja huasijjeya, ma e cuayaquinaje yasijjeya, ma ecuea equi jayojja huasijjeya". Jamajjeya oya' dejja huasijje poe o'oya majje ba cañaqui'yani chama' enahuejji Eyacuiñajijja epeejji nei pojjeama jjejojo. Ojaya eyami equi ecuiashaba jayojja jama, ehuaña bame bame jayojja, equi se ejjama' jayojja. ⁴⁵ Jamajjeya oya poquije pea eshahua cuana sa'ajjaa. Ba caje quea huiso, me mijijje beca onijje enequijji. Oya cuana quea mase nee nee; pea quea mase pishana. Majoya ojjaña dobiqüiajo ma dejja quea yeno nee nee poani. Yahuajo oe eshahua nequia huajo quea yeno pishana poanaje.

Jamaya poanaje Jesosa shajjama' cuana nijje, oya cuana onijje jjapeequi sa po ajjaa.
—Ma dejja jayojjaya miya poaje, quea mimishi nee nee tii tii poaje —Jesosa poanaje.

Jesosaja huapa pojjeama poeyanaje
(Macoso 3.31-35; Noca 8.19-21)

⁴⁶ Jesosa mimianijo ojaya enaese, oja chahua cuana pea'ai o que poeyanaje. Esecuejo nequinaje. ⁴⁷ Majoya Jesosa huohui canaje cuaa: —Miquea enaese, mique chahua cuana esecuejo nequi. Minijje mimi sa poani.

⁴⁸⁻⁴⁹ Jesosaa saja'a canaje: —¿Ache shai ecuea huapa pojjeama cuana? ¡Bacue! Jiquio ecuea shajja'ajjajji cuana ecuea huapa pojjeama cuana, ecuea quea jea nee nee ecuea ecue nae quea jea aña jayojja jama. ⁵⁰ E'e, ecue Chii eyajo ani; ojjaña jjashajja'ajjaqui jama ojaya esohuijo ecuea huapa pojjeama, ecue chahua, ecue jjo'i, ecuea enaese pea'ai —Jesosaa acanaje.

13

Eso' jeaajaji
(Macoso 4.1-9; Noca 8.4-8)

¹ Majoya Jesosa equijo ani cuayaquinaje. Bae sahua huasijje poqui majje anioquenaje. ² Majoya o que jjachichaquinaje dejja cuana quea huiso nee nee. Jamajje bishe yasijje nequisohuaqui majje anioquenaje esohui huohuiya. Dejjaja cuana meshijajjo aninaje. ³ Bishe quecuayijeja cajo, Jesosaa oya sohuihuohui canaje quea huiso nee nee. Pea esohui ona jjashahuabaquijji huohui canaje o ba meesahuajji. Jama acanaje ba'a: ⁴ —Ebanajji cuana poquinaje banaa. Eso' jeaaja canijo, oe poiji eso' oquequinaje ejojji yasijje. Poeyanaje cuichoiji cuana; ijija ca'yonaje eso'. ⁵ Pea eso' oquequinaje mei blaije. Meshi chamajo eso' pohua'ajja'yonaje. ⁶ Quijje cuayanaje eshequi. Quiyo'yonaje, esajja joca'yonaje, mano'yonaje. ⁷ Pea eso' oquequinaje acuisa huasijje. Pohua'yo majje jjonohua bebo ca'yonaje. Tatajo nequi jjajja ajja poanaje. Mano'yonaje. ⁸ Pea eso' oquequinaje meshi quea pame yasijje. Pohua'yonaje eso' cuana. Ejjajja quea pame nee nee poanaje. Oe esajo ejjajja iye huiso aninaje; pea esajo ejjajja quea huiso, pea esajo quea huiso nee nee aninaje. Sejjaja canaje quea huiso nee. ⁹ ¡Miya jjashajja'ajjaquicue! ¡A'a shajjama' pojji! —Jesosa poanaje.

Esohui eba meesahuajji Jesosaa sohuihuohui canaje ona jjashahabaqui meejji
(Macoso 4.10-12; Noca 8.9-10)

¹⁰ Quijje o shajja'ajjajji cuana poeyanaje Jesosa que. Huohui'ajja canaje: —Jesosa, ¿apijji miyaya esohui eba meesahuajji quea quehua huohuaña jiquio dejja cuana huasijje?

¹¹ Oya cuana saja'a canaje Jesosaa: —Miya ca ca oe Eyacuiñajijya ba meesahua cani eya ojjañaja Emeshi Mese nei poaje'yo. Yahuajo ba mee jjima poa. Pea cuana ca ca eba

meesahuajji pojjeama. ¹² Jamajjeya joya Eyacuiñajjija esohui ba cani quea huišo pishana quijje quea huišo ba mee caje'yo. Joya ojaya esohui ba sa po ajjaa ca ca pajea caje'yo. ¹³ Jamajjeya eyaya peapea esohui eba meesahuajji huohuinaje o ba meesahuajji. Jamatii ecuea esohui shajja'ajja majje oya cuana jjashahuabaqui ajja, de, shajja'ajja jjima jama acani, de. ¹⁴ E'e, oya cuana quea sapa ca'a nee poani. Jamajjeya Eyacuiñajjija Isaia tehue mee ca poa yahuajo nei nei jama ba'a:

“Shajja'ajja huicha'a huicha'a majje jamatii jjashajja'ajjaqui ajja poaje. Eyacuiñajjija acani ba huicha'a huicha'a majje jamatii jjashahuabaqui ajja poaje. ¹⁵ Quea sapa ca'a nee nee poani, shajja dojjoma' jama, cojjama' jama pea'ai. Ecuea esohui eba jojjemo, eshajja'ajja jojjemo jjabahuejjaqui'yome. Pea'ai enijje ejjapeequi'yo jjemo eyaya mimishi cuijea'yome”.

Jamaya yahuajo nei nei tehue ca poa etiquiana Isaiaa —Jesosaa acanaje.

¹⁶ Jamajjeya Jesosaa o shajja'ajjajji cuana jama acanaje pea'ai ba'a: —Miquianaya ca ca quea cojja ja'a, quea shajja ja'a pea'ai. jJamajjeya quea bihui nee pocue! ¹⁷ E'e jojo nei eyaya miya huohuiaña jama ba'a: Quea huišo Eyacuiñajjija esohui huohuijji yahuajo, ojaya epeejji nei yahuajo ba'e pea'ai e ba sa neinei poa. Ecue huohui shajja'ajja sa neinei poa pea'ai. Jamatii ojaya eya ba jjima poa. Ecue huohui shajja'ajja jjima pea'ai poa. E'e jojo nei eya Eyacuiñajjija huoojea'yo ojjaña jaahuanajji. Ma ba sa poa Eyacuiñajjija esohui huohuijji yahuajo nei nei.

Jesosaa esohui ebanajjijo ba mee canaje
(Macoso 4.13-20; Noca 8.11-15)

¹⁸ Majoya ojjaña cuana acanaje Jesosaa: —Jamajjeya eyaya miquianaya ba meesahuaje ecuea esohui ebanajjijo. ¹⁹ Maya: Beca cuana ejiojji yasijje oquequi esohui cuana cuichoijjiya ijijajeyo ca'yonaje. Jamaya beca cuana ecuea esohui eya ojjaña Emeshi Mese oe nei poaje shajja'ajja majje jamatii jjashahuabaqui ajja. Jamajjeya Edosiquiaa o que poe majje ecuea esohui pajea mee cani. ²⁰ Beca cuana eso' mei biajje oquequinaje jayojja jama ecuea esohui shajja'ajja majje quea bihui nee enijje jjapeecuajji'ajjaqui. Jamatii ecuea esohui jayojja jama ba'e tiitti ajja. ²¹ Eso' mei biajje pohua esajja joca'yajo mano'yani jayojja jama poani; pea cuaa oya napa cajje Eyacuiñajji nijje jjapeequipajeani. ²² Beca cuana eso' acuishaa nijje pohuani jama poani. Acuishaa bebo cajje jjajja ajja jayojja jamaya ecuea esohui shajja'ajja majje jjapee nishoqui. Jamatii oya cuana quea bejjo nahue poanijo, aquianajo quea huišo jjashahuabaquianijo, quea mete pea'ai poanijo Eyacuiñajjijo chaco ajja. ²³ Eso' meshi quea pame neejo pohua majje quea jjajja huišo poanaje jayojja jama beca cuana; ecuea esohui shajja'ajja majje jjabahuejjaqui; ecuea epeejji quea ja'a nee nee poani, pea cuana ejo jjabahuejjaqui meesahua cani iye huišo pojja'a, quea huišo pojja'a, quea huišo nee nee pojja'a —Jesosaa mahisuya oya cuana acanaje.

Esohui acuishaa cuanajo

²⁴ Majoya Jesosaa oya cuana huohui canaje pea esohui eba meesahuajji. Jama poanaje ba'a: —Eyacuiñajjija esohui ejo ebanajjiya eso' bana canaje jama. Eso' ache bame nei quecua canaje quejo, anoso. ²⁵ Majoya ojjaña echacojji cuana ecahuiaajo, dejja quea mimishi, o jeabichajajji epo poeyanaje. Sipone so' quea huišo quehuajje nei jeajajqui canaje quejo. ²⁶ Anoso pohua'yo majje jjajjanaje. Sipone pohuanaje anoso tejje, jjajjanaje pea'ai. ²⁷ Quijje pishana equé meseja echacojji cuana o que poeyanaje. Jama poanaje ba'a: “Emeshi mese, ¿a'a miquea anoso sipone tejje quecua pojjeama poanaje?” huohui'ajja canaje.

²⁸ —Echacojji meseya saja'a canaje: “E'e, quea pame poanaje. Dejja quea mimishiya quehuajje jeajajqui canaje sipone so' ecuea quejo, de” poanaje.

—Echacojji cuaa huohui'ajja canaje: “¿A'a sipone chiyojaje'yo?”

²⁹ —“Chojja” poanaje equé mese. “Anosoya miyaya chiyojaje chana'. Jamatii. ³⁰ Ojee sipone nijje catiiquahua. E'e, majoya anoso jahuajo eyaya huoojaje anoso sejjaj'yojji cuana anoso sejjaa. Sejjajeyo majje anoso chichaje. Ecuea equi yasijje iyanobiaje anoso, ecuea ejaahuanajji. Sipone ca oe caquiyojaje'yahua pasi'yo majje” poanaje equé mese.

—E'e, jiquio equé meseya sipone dahuaaje cani jama dejja mimishi Eyacuiñajjiya acaje'yo. Anoso sejjajeyo majje equijo huana cani jamaya ecuea epeejji aje'yo —Jesosaa poanaje.

Esohui acui so' che biso nei nejjo motasa bajjanijo
(Macoso 4.30-32; Noca 13.18-19)

³¹ Majoya Jesosaa pea esohui eba meesahuajji huohui canaje jama ba'a: —Eyacuiñajjija ehuhui ojaya epeejji cuanajo jama pea'ai ba'a: Pea eso' motasa che biso nei eso' bana cani equi quibojo. ³² Jiquio eso' che biso nei nei; tii majjeya quea cui quemoo nee poaje apo'e cui

quemajja. Jamajjeya cuichojsi cuana poeyani motasa acui biajje cahuiya —jamaya Jesosaa huohui canaje ojjaña ba meejji quijje Eyacuiñajjia epeejsi cuana quea huiso nee, quea ca'a nee poaje'yo.

Esohui eba meesahuajji eshejee meejji
(Noca 13.20-21)

³³ Pea esohui eba meesahuajji huohui canaje Jesosaa jama ba'a: —Eponaa pahui dahuajjiya quea huiso nee pohuipohui tejee oe pojji nei nei eshejee meejji iñahuahuo neinei cani, ojjaña eshejee meejji. Jiquio eshejee meejjiya ojjaña pohuipohui shejee mee cani jamaya poaje ecuea epeejsi cuana. Jama ba'a: Jjeya beca cuana jjashajja'ajjaquiani. Majoya aje quea huiso nee ojjaña pojja'a jjashajja'ajjaqui mee caje'yo Eyacuiñajjio —Jesosaa poanaje.

Esohui eba mee'yojsi
(Macoso 4.33-34)

³⁴ E'e, jiquio esohui ehuhui'yo cuana Jesosaa ma bishejo nequiya huohui canaje. Esohui eba meesahuajji ca ca oe huohui canaje. ³⁵ Jamaya poanijo ohuaya Eyacuiñajjia esohui huohuijjiya esohui yahuajo nei nei jama acanaje. Jamaya aje yahuajo nei nei Eyacuiñajjia ojaya esohui huohuijji huohui mee ca poa Jesosajo ba'a: “Eyaya aje jja esohui huohuije esohui eba meejji. Yahuajo jiquio meshi panajeyo majje ecuea dejja cuana ba meesahua jjima poanaje ecuea ejjashahuabaqui'yojsi. Jjeyahua ca ca ecuea ejjashahuabaqui'yojsi ba meee'yo, eyaya”.

Ehuohui'yo siponejo ba mee canaje Jesosaa

³⁶ Majoya Jesosaa —Poquia iña —acanaaje dejja cuana. Bishejo ani cuayaqui'yo majje poquinaje equi yasijje. Dobiqumajje o shajja'ajjajji cuana o que poeyanaje. Huohui'ajja canaje: —Jesosa, ¡ba meesahuacue ehuhui'yo siponejo! Maya ecuanaja quea quehua.

³⁷ Jamajjeya Jesosaa oya cuana huohui canaje: —E'e, eya ojjañaja Edoe Mese anoso banajji nei nei jama. ³⁸ Que quea pame jayojja ojjaña dejja ojjaña meshijo ba'e cuana. Eso' quea pame nee Eyacuiñajjia epeejsi nei jayojja jama. Sipone so' quea tai jayojja eshahuaja epeejsi cuana. ³⁹ Joya dejja sipone so' jeaajaji epo jayojja jama dejja mimishi, e cuiajji nisho epo, Edosiquiana, de, Satanasa. Jiquio ecua epojja anoso jahuajo sejjajeyo ca'yonaje jama meshi oe poaje. Joya anoso sejjaj'yojsi ca ca Eyacuiñajjia esohuidojojji cuana jama. ⁴⁰ Jamajjeya jiquio ecua sipone pasi'yo majje dahuajea canaje jayojja jamaya poaje dejja mimishi meshi oe poajo.

⁴¹ —E'e, eyaya ojjañaja Edoe Meseya esohuidojojji cuana huoojeaje dejja mimishi cuana iña, ona mimishi po meejji poani pea'ai iña. ⁴² Iña majje jeajea caje'yo cuaqui quea quiyoy nee nee yasijje. Jomajo pa neineije'yo; ese' ijjiyajiyea caje'yo cuaqui quea quiyoy nee nee. ⁴³ Ecuea epeejsi ca ca ecuea esohui jama acanajo ba'e tiitiije'yo eyajo eseja Chii nijje quea ja'a nee nee, eshequi ja'ajja, de —Jesosa poanaje.

Aquiana quea nahue ehuanaquehua'yo

⁴⁴ Majoya Jesosaa huohui canaje pea esohui eba meesahuajji jama ba'a: —Eyacuiñajjia esohui cuana ojaya epeejsi cuanajo jama pea'ai ba'a: Quejo aquiana pame quea nahue nee nee ba majje dejja jjataqui canaje jomajo tii. Majoya oya quea bihui nee poquinaje. Ojjaña ojaya aquiana cuana dojo canaje; quia canaje que sosejje. Jiquio ecua aquiana quea nahue nee nee jjeshe canaje jama jayojja dejja Eyacuiñajji nijje jjapeequiani —Jesosa poanaje.

Pea esohui aquiana quea nahue nee neejo

⁴⁵ —Eyacuiñajjia esohui ojaya epeejsi cuanajo jama pea'ai ba'a: Dejja aquiana nahuejjiya sa'ajja tiiti canaje mei sisi siyosiyoy copocopo quea nahue nee. ⁴⁶ Oe mei sisi siyosiyoy copocopo quea nahue nee nee ba majje ojjaña ojaya aquiana quiaa dojo canaje mei siyosiyoy quea pame nee nee jjeshejji. Eya ca ca iña mei quea nahue nee nee quea pame nee nei jama, ojjaña jaahuanajji —Jesosa poanaje.

Esohui nahuoo cuiashajjijo

⁴⁷ —E'e jojo nei pea ba'eme epojji jamaya pea'ai ba'a: Nahuoo cuiashajaji jea cani cuaa bae yasijje. Nahuoo cuiashaja cajje dobiqumiani. Peapea nahuoo cuiashaja cani. ⁴⁸ Quea huiso yanijo nahuoo cuiashajaji cuaa meshijaji sahua huasijje jjequisohua cani. Majoya pejo majje nahuoo cuana ba cani. Ojjaña nahuoo quea pame nee bio cani jjepai yasijje; peajja ijjiya ca ajja jojoya ca ca jeajea cani. ⁴⁹ Jamaya poaje e poe o'oyajo. Esohuidojojji cuana poeje; Eyacuiñajjia epeejsi cuana ojjaña quea pame ba'e chicha caje'yo. Dejja mimishi cuana ca ca jeajea caje'yo cajaanajo. ⁵⁰ Cuaqui quea quiyoy nee nee yasijje dobiquije'yo tii tii. Jomajo siasia'yoquije tii; ese' ijjiyajiyea caje'yo quea nee poanijo —Jesosa poanaje.

Esohui eyacua

⁵¹ Majoya Jesosaa oya cuana huohui'ajja canaje: —¿A'a ecuea esohui quea ja'a nee? ¿A'a jjabahuejjaquinaje?

—E'e, quea ja'a nee.

⁵² Jamajjeya Jesosaa o shajja'ajjajji cuana acanaje: —E'aquiana meseya ojaya aquiana cuana etii, aquiana eyacua pea'ai ojjaña cuana huohui'ajja cani. Jiquio ecua pea huohui'ajja pea huohui'ajja acani jayojja jama esohui huohuijji poani, jjabahuejjaqui majje, Jodio esohui huohuijjiya Eyacuiñajjija esohui yahuajo etehue'yo, ecuea esohui eyacua pea'ai pea cuana ba meesahua cani —poanaje.

Jesosa Nasanena meshi yasijje poquinaje
(Macoso 6.1-6; Noca 4.16-30)

⁵³ Majoya esohui huohuipajea majje Jesosa jomajo ani poqui o'oyanaje ojaya cuiñajji yasijje, Nasanena huasijje. ⁵⁴ Jodioja equi ojee ejjachichaquiiji yasijje dobiquinaje. Esohui huohui canaje. Ojaya esohui shajja'ajja majje Nasanenajo ba'eca cuana quea tecue poanaje. Oya Jesosa Joseja jea poso acanaje cuaa: —¿Yajjajje shai jiquio dejjaa Jesosaa esohui quea ja'a nee nee huohui cani, de? ¿Eyacuiñajji jayojjaya jjaajaqui mee cani emanojaa quea huiso nee, de? ⁵⁵ Oya aje oe acui cacajji nei nejja bacua ejja pojja'a, oja nae Mania bajjani, oja chahua cuana Jacobo, Jose, Simohui, Jonasa pea'ai bajjani. ⁵⁶ Oja jjo'i cuana pea'ai jiquiojo ba'e, de. Jamajje ¿achejo joya Jesosaa ojjaña jiquio esohui ba canaje so'o? —jamajjeya quea quene poanaje Jesosa nijje. Joseja jea poso cajaa acanaje.

⁵⁷ Jamajjeya Jesosaa oya cuana jama acanaje ba'a: —E'e de, pea cuaa Eyacuiñajjija esohui huohuijji shajja'ajja cani. Jamatii oja meshijo ba'e cuana ojaya huapa pojjeama cuana ca ca oe jjashajja'ajjaqui sa po'yo ajja.

⁵⁸ Jamajjeya oya cuana jjashajja'ajjaqui sa po ajja. Jesosa Eyacuiñajjija bacua pojjeama posojo, ohuaya emanojaa cuana oe pojji jjaajaqui mee ca'yonaje, ma dejjaa ajjima acani oe pojji nei acanaje Nasanenajo, Jesosaa.

14

Enodeya Huani sapa jajasejjajea mee canaje
(Macoso 6.14-29; Noca 9.7-9)

¹⁻² Jesosa Janinea meshijo anijo, Janinea meshi mese Enode bajjanija shajja'ajja canaje onaja ehuhui'yo Jesosajo. Ma Enode pea emeshi mese, Enode pea'ai bajjani. Oya emeshi mese Enodeja bacua ejja; oya Enode Antipa bajjani pea'ai poanaje. Shajja'ajja majje ma Enodeya Huani shequi o'oya posoya acanaje: —E'e de, jiquio dejja aje oe Huani, ma ona besameejji poa. E'e pojja'a oya mano'yo majje shequi o'oyanaje. Jamajjeya ohuaya Eyacuiñajjija jayojjaya acani —jamaya ohuaya ojo chacochacoani acanaje.

Yahuajo nei Jesosajo shajja'ajja jjimahuajo ma Enodeya Huani sapa jajasejjajea mee canaje. ³ E'e, yahuajo ma emeshi mese Enodeja edoe mese Penipeja ehuanase Enodias bajjani Huani nijje quea quene poa. Jamajjeya ma Enodeya Huani iña mee canaje; jeanobiajja mee canaje. ⁴ E'e, Huaniya yahuajo ma Enode jama tecueame aca poa ba'a: —¡Miyaya aje oe mique doeja Penipeja ehuanase Enodias a'a huana'yojji! Jamaya pojjeama Jodioja etehue'yo; quea mimishi.

⁵ Jamajjeya ohua tecuea cajje quenecenaje Huani nijje. Quecua sa aca poa. Jamatii quecua jjima; quea mete poanaje pea Jodio cuanajo. E'e, quea huiso Jodio cuana jjashahuabaquinaje Huani Eyacuiñajjija esohui huohuijji nei nei poanaje. ⁶ Jamatii ma Enodeya o cuaya poa pojajajo ojjaña ojaya epeejji cuana iyaa canaje ojee ijja'ijjiaa, majamajaqui baa pea'ai. Enodiasija bacuase pea'ai oe nei majamaja nequinaje ojjaña ebajji, quea bihui nee epo meejji. Enode Antipa quea bihui nee nee poanaje epona sho'ijo. ⁷ Jamajjeya onijje miminaje jama ba'a: —¿Ae shai sa poani miya? ¡Huohuicue mo! Eyaya miya quiaje. E'e jojo nei nei she, coya miya sañaya aje mi quiaje —acanjaje Enodeya.

⁸ Jamajjeya epona sho'i poquinaje ojaya enaese Enodias huohuiya.

—E'e —oja nae poanaje—, e'e ¡Huani sapa jajasejjajea meequicue, she!

Epona sho'i poe o'oyanaje Enode que. Huohui canaje jama ba'a: —Huani, ma ona besameejji poani ejeanobia jaa. ¡Ojaya esapa jajasejjajea'yo majje piatojo jjequicue jjeyahua nei! Maya eya sa poani.

⁹ Shajja'ajja majje emeshi mese Enode quea ajjajja nee nee poanaje. Jamatii ojaya esohui epona sho'i nijje ojjaña ojaya epeejji cuana shajja'ajja canaje. Jamajjeya ojaya esohui pajea ajja, Enodeja. Jamajjeya ohuaya sohuinano cuana huoojja canaje: —¡Epona sho'ija esohui jayojja jama acue! ¹⁰ ¡Huani ma ejeanobia jaa oe sapa jajasejjajeaquicue! —poanaje.

¹¹ Jjeya nei sohuinano cuana poquinaje Huani que. Huani sapa jajasejjajea ca'yonaje. Esapa jjequi canaje piatojo. Epona sho'i quia canaje. Majoya ohuaya Huanija esapa oja nae yasijje quia cañaqui'yonaje, epona sho'ia.

¹² Majoya Huani shajja'ajjajji cuana poe'yonaje o dojo'yohua emojea'yojji. Mojea'yo majje papoqui'yonaje Jesosa huohuiya.

Jesosa 5.000 dejja cuana bobia canaje
(Macoso 6.30-44; Noca 9.10-17; Huani 6.1-14)

¹³ Jesosa Huani emano'yo shajja'ajja majje o shajja'ajjajji cuana nijje sohuaquinaje bishe aijo quima huasijje.

Jamatii ma ba majje quea huiso dejja cuana cuiñajji cuanao ba'e ejiojjijje poquinaje Jesosa baa. Poquicuajinaje ma Jesosa besapoquije yasijje. Onaya jjae ebionei aniñaquinaje Jesosa hui que añaquia. ¹⁴ Quijje pishana Jesosa o shajja'ajjajji cuana nijje ba'eñaquinaje. Bishe aijo ani nequisohuaquinaje etaja huasijje. Quea huiso nee nee dejja cuana ba cañaquinaje. Onajo quea yeno jshashuabaquinaje, quea huiso emanojaajo, quea nee jaajo pea'ai. Jamajjeya ojjaña huaquia mee ca'yonaje, jjaajaqui mee ca'yonaje, Jesosaa.

¹⁵ Siniajo Jesosa que poe majje o shajja'ajjajji cuaa huohui canaje jama ba'a: —Jesosa, sinia coma, de. Jiquiojo chama' equi, chama' bobi pea'ai. ¡Dejja cuana huoojeacue cuiñajji sisi cuana huasijje oja bobi jjesheya!

¹⁶ —Chojja. Ca'aniahua cuana. ¡Bobiacue oe miquiaaya! —Jesosaa acanaje.

¹⁷ —¿Yajja yajji? Oya cuana quea huiso nee nee añe ebobajji. Ecuanaja bobi oe pojji yani. Me oejje pahui, beca nahuoo sisi pea'ai yani —poanaje cuana.

¹⁸ —¡Comaya jjaaja oe yacua yecue! —Jesosa poanaje—. ¹⁹ Ojjaña cuana jama acue pea'ai ba'a: “¡Ojjaña anioquecue sipone biajje!” acue.

Anioque mee canaje sipone biajje. Majoya pahui me oejje huiso, nahuoo sisi becanejjijji pea'ai jjeshe majje Jesosaa eyahuasijje jjabajeasohuaquinaje. Eyacuiñajji bihuia canaje. Eyacuiñajji nijje bobijo mimi majje pahui miji canaje, nahuoo sisi pea'ai. O shajja'ajjajji que quia canaje, Jesosaa. Majoya ohuaya bobi quia canaje dejja cuana huasijje. Quia ca poquije quea huiso nee nee jpanaqui poquipoquinaje bobi, de. ²⁰ Ojjaña jeje majje eshajja'ajjajji cuaa chicha ca'yonaje bobi ojjañaja ijjiasajja. Jjepai ai yasijje iya ca'yonaje. Quea huiso nee poanaje; ¹² jjepai huismo bobi e'ijjiasajja ecuatataje poanaje. ²¹ Quea huiso nee nee bobi ijjia mee canaje, de, 5.000 dejja. Epona cuana, esho'i cuana pea'ia quia huiso nee nee ijjia canaje.

Jesosa bae ena biajje poquinaje
(Macoso 6.45-52; Huani 6.16-21)

²² Majoya siniajo Jesosaa o shajja'ajjajji cuana huoojea canaje. Jama acanaje ba'a: —¡Bishe ai yasijje nequisohuaquicue! ¡Bae ojje miji yasijje besapoquicue! Quijje eya poquije mi que pea dejja cuana quea huiso nee nee cuana huoojea'yo majje —poanaje.

²³ Majoya dejja cuana quea huiso cuana huoojea'yo majje eyiyo huasijje jaasohuaquinaje oe nei oja Chii nijje mimiya. Mecajje Jesosa oe nei aninaje eyiyojo. ²⁴ Jesosa eyiyojo anijo o shajja'ajjajji cuaa bishe ai quea huesha nee dojo canaje. Bae yiyesamajo o epajo beni quea quemo poeyanaje. Enashajohua bishe ai janobajjima nei nane canaje, cuo canaje enaa. ²⁵ Mecashono Jesosa eyiyojo ani o que poquinaje ena biajje. ²⁶ O shajja'ajjajji cuaa Jesosa quea huesha pishana ena biajje jeojejebeje ba majje quea ajjajja nee nee poanaje. Quea metejo taananaje; jama poanaje ba'a: —¡Coya ae shai poeje ba'a! —siasianaje—. ¡Coya eshahua, de!

²⁷ Jamajjeya Jesosa onijje miminaje. Jama poanaje ba'a: —¡A'a quea mete pojji! Eya jja iña iquio, eshahua pojjeama. ¡Quea jaji nee pocue!

²⁸ Jamajjeya Penohua jama huohuime acanaje ba'a: —Ecuea Emeshi mese, miya enequeiya jjejojoya, ¡eya mi que poqui meecue ena biajje!

²⁹ —E'e Peno, ¡poecue! —oya acanaje Jesosaa.

Jamajjeya Peno bishe aijo ani nequioquequinaje. Ena biajje Jesosa que poquinaje. ³⁰ Jamatii poqui pishana majje beni tii tii, enashajo quea quemo nee nee ba majje metenaje, de. Mete majje jaadobi'ajjaquinaje Peno. Taaanaje: —Jesosa, ¡eya hui'ije'yo! ¡iñacue mo, oe! —poanaje.

³¹ Jesosaa me' iñacuaji canaje. Peno jama acanaje ba'a: —¿Apiojji acuae mi meteani so'o? ¿A'a eya quea ca'a nee nee miquea ba jjima?

³² Majoya Jesosa Peno nijje bishe ai yasijje anisohuaqui'yajo beni nequioquequinaje.

³³ Jamajjeya ojjaña cuana bishe aijo aniya Jesosa bihuia canaje. Jama poanaje ba'a: —¡E'e jojo nei miya Eyacuiñajja Bacua Eja oe nei!

Cuichi cuana hui'i ca ya poa meshi yasijje Jenesane' meshi yasijje besapoqui o'oyanaje (Macoso 6.53-56)

³⁴ Majoya bae ai ojje miji yasijje Jenesane' meshi yasijje besapoqui o'oyanaje Jesosa. Ba'eñaquinaje. ³⁵ Dejjja cuanaja jomajo ba'eja Jesosa eba poanaje yahuaajo. Jamajjeya oya ba o'oya majje ojjaña cuana iyaa meequi canaje Jesosa que. Jamajjeya ojjaña emanojaaca cuana Jesosa que ye canaje. ³⁶ Jama huohui'ajjame acanaje cuaa ba'a: —Jesosa, ojjaña emanojaaca cuana che mique daqui iña'ajja meecue ehuaquia'yojji! —acanaje.

Ojjaña oja daqui cuema iña'ajja majje jjaajacuajiqui'yonaaje, huaquia'yonaaje pea'ai, de.

15

Dejja quea jjashahuabaqui tai po majje quea tai poani (Macoso 7.1-23)

¹ Majoya Paniseo cuana Jodio esohui huohuijji cuana pea'ai Jenosanenajo ba'e Jesosa que poeyanaje. Oya huohui'ajja canaje: —Esohui huohuijji, ¿apiojji acuae mi mi shajja'ajjajji cuana etiiquianaja ehuhui'yo jama po ajja? ² E'e, ijija'ijija jjimahuaajo eme' topo neinei ajja, de.

³ Jesosaa saja'a canaje jama ba'a: —Miquianaya acuae ¿ae poani pea'ai? ¿Apiojji acuae miqiuanaaya Eyacuiñajija esohui pajea'yaña etiiquianaja ehuhui'yo yajji nisho? ⁴ E'e, Eyacuiñajija esohui jama poani ba'a: “¿Mique chii, miquea enaese etii pea'ai jaahuanacue! ¿jaya oja chii, oja nae pea'ai cajaan acajo cajajahuejjajea ca'yahua cuaa, meiya!” ⁵ Miyaya ca ca jama huohui taime yaña ba'a: “Dejja oja chii etii nijje, oja nae etii nijje pojja'a mimije jama ba'a: “Eyaya miya eba'e meesahuajji pojjeama. Chojja, eyaya ecuea aquiana Eyacuiñajji yasijje quiaña o bihuiajji”. ⁶ Jamajjeya oja chii etii, ojaya enaese etii pea'ai pajea meeaña. Pea'ai Eyacuiñajija esohui pajea mee'yo sa aña etiiquianaja ehuhui'yo yajji nisho. ⁷ ¿Miyaya ca mi ca o jjadasiaquiijji nei nei! Eyacuiñajija esohui huohuijji Isaiaja esohui mijo e'e jojo nei yahuaajo nei poa. E'e, yahuaajo nei Eyacuiñajija Isaija tehue mee ca poa jama ba'a:

⁸ “¿Iquiao dejja cuanaa eya bihuia nisho cani. Jamatii jjashajja'ajjaqui ajja.

⁹ Jamajjeya ecuea equi yasijje jjachichaquiani ejjachichajeaquiijji. Ohuaya ojaya ej-jashahuabaqui'yojji huohui cani, ecuea esohui pojjeama”.

Jamaya Isaija yahuaajo nei tehue ca poa miqiuanaajo —Jesosa poanaje.

¹⁰ Jamajjeya Jesosaa pea cuana huasijje jama huohuime acanaje ba'a: —¿Shajja'ajjacue, jjabahuejja neinei quicue oe! ¹¹ Bobi cuana, ojjaña aquiana enabajje dobiqiuaniyo pojjeama miqiuanaaya quea mimishi poani. Chojja. Quea jjashahuabaqui tai po majje esohui quea tai enabajje cuayaquianajo ca ca quea mimishi poani. Eyacuiñajija miqiuanaaya ba cani quea mimishi —Jesosaa acanaje.

¹² Quijje o shajja'ajjajji cuaa Jesosa huohui canaje jama ba'a: —Jesosa, miquea esohuijo Paniseo cuana quea quene poani minijje —poanaje.

¹³ Jesosaa oya cuana saja'a canaje jama ba'a: —Ojjaña acui ecue Chijja eyajo anija bana pojjeama ohuaya chiyoea caje'yo jiquio ecua ohuaya ojaya epeeji nisho acaje'yo jama.

¹⁴ Jamajjeya ja'a Paniseo cuanaajo quea mete pojji! Oya cuaa aje oe esohui huohui cani quea tai, quea ja'a pojjeama. Cojjama' jayojja jama poani, de. Cojjamaa pea cojjama' mepejejea cani jayojja o pea'ai oquejajje'yo jani yasijje. Cojjama' jayojja dejja mimishi pea dejja mimishiya dojo cajje cuajji yasijje poquije'yo onijje tii —jamaya Jesosaa acanaje.

¹⁵ Penohua Jesosa huohui'ajja canaje: —Jesosa, ecuanajaya ca ca esohui quea quehua miquea. ¿Ba meesahuacue mo!

¹⁶ —¿A'a ecuea esohui miqiuanaaya ba jjima pea'ai? —Jesosa poanaje—. ¿A'a miquea eba pojjeama? ¹⁷ Ojjaña bobi, pea aquiana pea'ai enabajje ijijajea see ai yasijje dobiqiuiani. Quijje jamatii seejea caje'yo. ¹⁸ Joya quea tai jjashahuabaquianiya ca ca esohui tai jeacuaya cani. Maaya oya quea tai po mee ca'yani; quea mimishi Eyacuiñajija oya ba cani. ¹⁹ E'e, jjashahuaba taiqui majje pea quecua cani, onaja eponajo ba'e sa poani, peaja yahuejo ba'e sa poani, quehuajje cojjo cani, sii cani, sijaje poani, mimijajiani pea'ai. ²⁰ E'e, joya jama acanajo Eyacuiñajija ba cani quea mimishi; bobi ijija cani eme' shacua neinei jjimajo pojjeama quea mimishi poani.

Cananea epona Jesosa que poeyanaje (Macoso 7.24-30)

²¹ Majoya Jesosa Jenesane' meshijo ani poquinaje Sinono meshi yasijje, Tino meshi yasijje pea'ai. ²² Jomajo poquiani oe Cananea epona ma meshijo ba'e o que poeyanaje. Oya Jodio pojjeama. Jamatii ejiojijje poquije taaa majamaja poquinaje: —Emeshi Mese nei, Dabija osecua, jejo jjashahuabaquicue! Ecue bacua pionaja quea sapa niñe jaa. Quea nee nee poani, quea mano.

²³ Jamatii Jesosaja oya saja'a jjima. Jamajjeya ojaya eshajja'ajjajji cuana Jesosa nijje miminaje: —Jesosaja, jepona huoojeacue! Joya ese nijje taaajebeje.

²⁴ Jamajjeya oya cuana saja'a canaje Jesosaa: —Oya Jodio pojjeama. Eyacuiñajjiya oya huoojea canaje Jodio cuana sa'ajja'yohua. Oya cuana ñajajja ecuaquisho'yo jayojja jama poquiuehuani Eyacuiñajjiyo.

²⁵ Jamatii epona Jesosa que poe majje ecui'oshajjajo nequiñanaje; jama poanaje ba'a: —Emeshi Mese nei, ¡ecuea ebacua piona jjaajaqui mee'yocue, quea mano nee nee jaa!

²⁶ Ma epona Jodio pojjeamajo huapa jayojja saja'ame acanaje Jesosaa: —¿A'a acuae ecue bacuaja bobi jeaje iñahuehua que? ¿A'a cuae jamaya quea pame? —poanaje.

²⁷ Epona quea shoe jama jjeoyo jama poanaje ba'a: —E'e, Emeshi Mese. Jamatii o huonejjiya ijia canijo, iñahuehuua ehuonejjia ijilasejja ca'ijjia cahua —poanaje.

²⁸ —Epona, miya ca mi ca oe quea ja'a nee, quea pame nee ejo jjashahuabaquiani. Jamajjeya eyaya miquea esohui jayojja jama aje'yo. Jjeya nei miquea ebacua piona jjaajaqui meeje'yo —Jesosaa acanaje.

Jamajjeya jjeya nei oja bacua piona jjaajaqui'yonaje; quea aja nee po'yonaje.

Jesosaa quea huiso emanojaaca huaquia mee ca'yonaje

²⁹ Majoya Jesosa jomajo ani ejiojjijje poqui o'oyanaje Janinea bae sahuajje. Eyiyo huasijje jaasohuaqui majje anioquenaje. ³⁰ Quea huiso nee nee poeyanaje; o que jjachichaquinaje. Jjequi canaje emanojaaca cuana: quibojjisha cuana, cojjama' cuana, jiojjijajja cuana, mimi'ajja cuana pea'ai, peapea epo'yo cuana pea'ai huanaoquea canaje cuaa Jesosa pejjejo ejjaajaqui'yojji. Ojjaña cuana jjaajaqui mee ca'yonaje, huaquia mee ca'yonaje, de, Jesosaa. ³¹ Ba majje ojjaña cuana quea bihui nee nee poanaje. Eyacuiñajji bihuia neinei canaje: —E'e, e, mimi'ajja cuana quea ja'a mimi mee ca'yonaje; jiojjijajja jeo mee ca'yonaje; quibojjisha jjaquibopiqui mee ca'yonaje; cojjama' quea cojja ja'a po mee ca'yonaje, jjabajji mee ca'yonaje pea'ai. Ma ecua ohuaya jjaaja'qui jjimahua Isaeni cuana nijje acaninaje, jamaya aje jja oe jjeya acani, Jesosaa —acanaje cuaa.

Jesosaa quea huiso cuana bobia canaje, 4.000

(Macoso 8.1-10)

³² Majoya Jesosaa o shajja'ajjajji iyaa canaje. O que poeyajo huohui canaje jama ba'a: —Jiquio dejja cuana enijje poani beca cahuime. Ojaya bobi oe poanaje. Jamajjeya ojo eya quea yeno jjashahuabaquiani bobimajo. Oja equi yasijje huoojea sa po'yo ajja. Quea shoe nee nee; ejiojjijjo bobi yasijje po chana'.

³³ O shajja'ajjajji cuaa Jesosa saja'a canaje: —Jiquiojo chama' bobi, dejjama'. ¿Yajja yajji? Oya cuana quea huiso nee nee ebobajji. ¿Achacua pahui ejjesheji ojjaña bobiajji?

³⁴ —¿Ache huiso pahui miquea yani? —Jesosaa huohui'ajja canaje.

—Me oejje beca pea'ai, 7 pahui yani. Nahuoo sisi oe pojji yani pea'ai —acanaje cuaa.

³⁵ Jamajjeya Jesosaa ojjaña ejjachichaquiani cuana jama acanaje ba'a: —¡Meshijo anioqueue! —acanaje.

³⁶ Majoya ma 7 pahui, nahuoo sisi pea'ai jjeshe majje Eyacuiñajji nijje, oja Chii nijje miminaje bobijo. Pahui, nahuoo pea'ai miji canaje, Jesosaa. O shajja'ajjajji que quia canaje. Majoya ohuiya dejja cuana huasijje quia canaje. Quia ca poquiue quea huiso nee nee jpanaqui poquiopoquinaje, bobi. ³⁷ Jamajjeya ojjaña cuaa ijia canaje, quea jejje poanaje, de. Ijia majje o shajja'ajjajji cuaa bobi e'ijjilasejja jjepai aijo chicha ca'yonaje. Quea huiso poanaje, 7 jjepaime. ³⁸ E'e, dejjaa quea huiso nee neeya bobi ijia canaje, 4.000 dejjaa. Quea huiso nee epona cuana, esho'i cuana pea'aiya ijia canaje. ³⁹ Majoya Jesosaa ojjaña cuana huoojea canaje ojaya equi yasijje. Majoya Jesosa o shajja'ajjajji cuana nijje bishe ai yasijje nequisohuaquinaje. Besapoquinaje ojje, pea meshi yasijje, Majadana meshi yasijje.

16

Jodio etiiya Jesosaa acani quea pame ba sa acanaje

(Macoso 8.11-13; Noca 12.54-56)

¹ Majoya Paniseo cuana, Sanoseo cuana pea'ai poeyanaje Jesosa que. Oya cuaa Jesosa Eyacuiñajji huoojea'yo pojjeama poso acanaje. Jamajjeya jama anisho canaje ba'a: —Esohui huohuijji Jesosa, ¿a'a miya Eyacuiñajji huoojea'yo nei ojjaña jaahuanajji pojja'a? ¡Ejjaba'ajjaqui so'o! ¡Eyacuiñajjiya jayojja jama acue ecuanaja ebajji! ¡Yajjo oe panacue! —acanaje Paniseo cuaa.

Jamatii Paniseo cuaa Jesosa Eyacuiñajji huoojea'yo pojjeama poso acanaje. Jamajjeya pea Paniseo cuana nijje jama poanaje ba'a: —Chojja, Jesosa Eyacuiñajji huoojea pojjeama. Jamajjeya Eyacuiñajjiya jama pojjeama mi pana cajo, capajea ca'yahua.

² Jesosaa oya cuana saja'a canaje: —Eshequi oquequiajo bo huo'ohuo'o poanijo miquianaaya huohuiaña: “E'e, de, mecahuajje quea jea poaje eshequi, ena epojji pojjeama”. ³ Mecajjeahua ca ca quea apo nee nee poanijo miquianaya jama poani ba'a: “E'e de, quea apo; jjeya ena poaje”. E'e —Jesosaa poanaje—, eyahuasijje bo ba majje miquianaaya huohuiaña ena chama' pojja'a, ena poaje pojja'a. Jamatii Eyacuiñajjiya esohujo miquianajaya ba jjima ache shono ojjaña jaahuanajji poeje. ¿Apiojji miqwea ba jjima? ⁴ Miqianaaya Eyacuiñajjiya esohui pajea yaña. Jamajjeya Eyacuiñajjiya pana cani ba majamaja sa poani. Jamatii Eyacuiñajjiya Jjona yahuajo nei nei aca poa jayojja jama ohuaya jjeyahua acaje miqwea ebajji.

Jamajjeya Jesosaa oya cuana jea cana'yona je jjabahuejjaqui ajjajojo.

Paniseoja esohui tai pahui shejee meejji jayojja
(Macoso 8.14-21)

⁵ Majoya bae oje miji yasijje besapoquianijo Jesosa shajja'ajjajji cuana jashahuabaquinaje. Jama poanaje ba'a: —E'e de, ecuanaa bobi pajea'yona je.

⁶ Jamajjeya Jesosaa oya cuana huohui canaje: —¡Quea ja'a nee jashahuabaquicue! Paniseo cuana, Sanoseo cuana pea'aia pahui shejee meejjijo miya quea tai poaje.

⁷ Jamajjeya o shajja'ajjajji cuana ojee mimimimina je: —E'e pojja'a oya jama poanaje ecuanaja pahui ye jñimajo.

⁸ Ojaya ejashahuabaqui'yojji Jesosaja eba poanaje. Jamajjeya oya cuana acanaje: —¿Apiojji acuae jja nequiana ojee mimimimiani pahuijo? ¿A'a jja nequianajaya eya ba jjima quea ca'a nee nee? ⁹ ¿A'a jja quiana ejo jashahuabaqui jjima tii? Eyaya me oeje pahui miji majje quea huiso dejja bobianaje, 5.000 dejja. ¿A'a jja miyaya maya pajea'yona je? Ijjiya'ljijajeyo majje acuae jjaaya ¿ache jjepai huiso chicha'yona je pahui? ¹⁰ Oya jayojjaya me oeje beca pahui, 7 pahui miji majje quea huiso dejja bobianaje, 4.000 dejja. Majoya miyaya pahui ¿ache jjepai huiso chicha'yona je so'o? ¿A'a ya pajea'yona je? ¹¹ Eyaya miquianaya huohuinaje jama ba'a: “Paniseo, Sanoseo pea'aia pahui shejee meejjijo quea tai miya poaje” —Jesosaa poanaje.

¹² Jamajjeya o shajja'ajjajji cuana jjabahuejjaquinaje Jesosaa huohui cajje: —E'e, Paniseo, Sanoseo pea'aia huohui taijo se quea tai poaje; pahui shejee meejjijo pojjeama Jesosaa huohui canaje —poanaje.

Penoja esohui quea pame Jesosajo
(Macoso 8.27-30; Noca 9.18-21)

¹³ Majoya Jesosa Pinipo meshi yasijje poquinaje. Sesanea huasijje poquijeya o shajja'ajjajji huohui'ajja canaje Jesosaa: —Dejja cuana acuae jja ¿yaja poani ejo, ojjaña Edoe Mesejo? ¿A'ya cuae eya?

¹⁴ Oya cuaa saja'a canaje: —Beca cuana jja jama poani ba'a: Miya Huani, ma ona besameejji poa shequi o'oyanaje poso ca jja mi ca acani. Pea cuana aje jja oe jama poani: Miya Enia, Eyacuiñajjiya esohui huohuijji yahuajo nei nequia poa. Pea poani jama ba'a: Miya Jenemia pojja'a pea esohui huohuijji yahuajo nei nequia poa pojja'a. Oya cuana yahuajo nei mano'ya poa shequi o'oyanaje poso ca jja mi ca acani cuaa —poanaje o shajja'ajjajji.

¹⁵ Jamajjeya Jesosaa oya cuana huohui'ajja canaje: —¿Miyaa acuae yajja poani ejo? ¿A'ya cuae eya?

¹⁶ —¡Miyaa ca ca Eyacuiñajjiya Bacua Ejja oe nei, oja huoojea'yo ojjaña jaahuanajji! — Simohuiya Jesosa saja'a canaje.

¹⁷ Jamajjeya Jesosaa oya jama acanaje ba'a: —Simohui, Jjonaja bacua, ¡quea bihui nee pocue! Ecue Chii eyajo aniya miya ba meesahua cani eya oja huoojea'yo ojjaña jaahuanajji. Dejjaa pojjeama miya ba meesahua cani, de. ¹⁸ Jamajjeya eyaya miya huohuiaña miya bajjani aje Peno, esejaya esohuijo Epei bajjani. Eyacuiñajjiya esohui e'e jojo nei ejo eyaya miya huohui meesahuaje'yo ecuea epeejji cuana quea ca'a nee epo'yojji. Equi mei jiyo nei jayojja jama quea ca'a nee nequi tii jayojja jama ecuea epeejji cuana quea ca'a nee nequi tiitijje'yo; ejeabichajeya'yojji pojjeama Edosiquianaja, esahua cuanaja pea'ai.

¹⁹ —Eya Emeshi Mese nei jiquio meshijo poaje'yo. Jamajjeya aje miya huoojeaña ecue sohui huohuiya. Ecuea esohui esecue ca'apeojji jayojja jama eyahuasijje edobiqui mee'yojji. Jamajjeya ecuea esohui ba majje miyaya huohuije ache eba'ejji quea mimishi Eyacuiñajjiya boti'ama. Miyaya huohuije pea'ai ache eba'ejji quea pame nee Eyacuiñajjiya eyajo anija quea boti nee.

²⁰ Majoya Jesosaa o shajja'ajjajji cuana huohui neinei canaje jama ba'a: —E'e, eya Eyacuiñajjiya huoojea'yo ojjaña jaahuanajji. Jamatii ja'a oe jihuhuijji so'o! —poanaje.

Ojaya emano'yojijio Jesosa miminaje
(Macoso 8.31-9.1; Noca 9.22-27)

²¹ Majoya Jesosaa o shajja'ajjajji cuana huohui coo canaje ojaya emano'yojijio: —Eya quijje Jenosanena huasijje poquijje. Jomajo Moisesija etehue'yo huohuijji cuaa, Jodio etii bajjani cuaa pea'ai, Eyacuiñajji nijje emimijji etii cuaa pea'ai eya quea huiso cuia caje'yo. Quea nee nee poaje'yo eya. Quijje ya mo manoj'e'yo ohua me cacá mee cajje. Jamatii beca cahuime po majje mo shequi mee caje o'oya ecue Chiiya —acanjaje.

²² Jamajjeya Peno quea yeno nee poanjaje Jesosajo. Oya oe nei iyaa canaje, Penohua. Jama poanjaje ba'a: —Chojja, ecuea Emeshi Mese, miya Eyacuiñajjija jaahuana caje'yo. Peaa aje oe miya enapajji pojjeama, equecua'yojji pojjeama jja mi, de.

²³ Jamajjeya aje jja oe Jesosaa oya Peno cojja ba neinei cani jama tecueame acanjaje ba'a: —Peno, ¡a'a jamaya mimijji! Miya e dasiajji nisho epo jayoija mimiani. Miya Edosiquiana Satanasa jama mimiani. Jjashahuabaquiani quea tai, dejja jama; Eyacuiñajjija ejjashahuabaqui'yojji jama pojjeama —poanjaje.

²⁴ Jamajjeya Jesosa ojjaña o shajja'ajjajji nijje jama miminaje ba'a: —¡Ojjaña joya enijje e'e jojo nei jjapeequi'yo sa poani Eyacuiñajjija esohui jayoija jama ba'ecue! E'e, e jayoijaya jja enijje capoquiahua, jamatii onaa napa cajje aje jja oe quea nee poaje'yo pojja'a. ²⁵ E'e, ojjaña joya Eyacuiñajjija esohui jayoija jama ba'e sa po ajja aje oe ba'e tiitü ajja enijje. Joya ecuea esohui jayoija jama ba'e sa poani ca ca ba'e tiitü'yo enijje eyajo. ²⁶ E'e pojja'a dejjaa quea huiso nee nee aquiana ojaya yajji chicha caje. Jamatii oya cuana cuaqui yasijje jeajea cajo, ojjaña ojaya aquiana cuana edojjji pojjeama. ¿A'a ojjaña ojaya aquiana cuana Eyacuiñajji yasijje quia cajo, oya cuana cuaquijo ani cuayaqui mee caje'yo? ¿A'a Eyacuiñajjija oya cuana onijje eyajo ba'e mee caje'yo ma aquiana quea huiso nee nee sosejje? Chojja. ²⁷ E'e jojo nei eya ojjañaja Edoe Mese poeje o'oya. Quea jeajahua nee nee, quea ca'a nee nee poeje'yo. Eya esohuidojojji quea huiso nee nijje poeje'yo. Poe majje eyaya ojjaña cuana sosequiaje'yo. Ojjaña ba'enaje jayoija eyaya sosequiaje'yo. ²⁸ E'e jojo nei eya ojjañaja Edoe Mese ojjaña huoojea'yojji quea ca'a nee nee poaje'yo. Beca cuaa jiquiojo nequiya jjaja mo jamaya ba caje mano'yo jjimahuaa —Jesosaa o shajja'ajjajji cuana acanjaje.

17

Jesosa quea cojja jiji poanjaje oja Chii nijje mimianijo
(Macoso 9.2-13; Noca 9.28-36)

¹ Quijje pishana me oejje pea emejje oe cahuime po majje Jesosa poquinaje o shajja'ajjajji nijje pea beca peejjima dejja nijje, Peno nijje, Satiaco, oja doe Huani nijje pea'ai. Mahuiso dejja nijje poquinaje eyiyo huasijje quea huesha nee. ² Jocuama nequi oya Jesosa jjahuapaqui'yonaje; quea cojja jiji nee poanjaje, eshequi jayoija poanjaje, quea jeajahua nee nee. Oja daqui quea oshe nee nee, bo oshe jayoija poanjaje. ³ Moisesi, Enia pea'ai ma yahuajo nei ba'ya poa Jesosa nijje mimimiminequi ba canaje o shajja'ajjajji cuaa. Moisesi, Enia pea'ai Jesosa nijje mimimiminequinaje Jesosa onaja mimishijo emano'yojji jjejojjo. ⁴ Jamajjeya Peno Jesosa nijje jama poanjaje ba'a: —E'e Emeshi Mese, jiquiojo ecueana canequiahua, quea pame nee. Pea beca peejjima equi sisi ecuaaya ca'iyahua miqnea, Moisesija, Eniaja pea'ai eba'ejji.

⁵ Peno mimianijo tii bo quea oshe nee nee nequioquenaje. Queya canaje huojaa. Shajja'ajja canaje Eyacuiñajji jama poani ba'a: ⁶ —¡iquio ecuea ecue Bacua Ejja quea jja nee nee. Eya ojo quea bihui nee nee. ¡Oya oe shajja'ajjacue!

O shajja'ajja majje quea mete nee nee poanjaje Peno, Satiaco, Huani pea'ai. Meshi yasijje hui oquequinaje. Ecu'oshajjajo nequinaje. ⁷ Jamajjeya o que poeyanaje Jesosa. Napa canaje emeya.

—¡Nequisohuacue! ¡A'a quea mete pojji! —Jesosa poanjaje.

⁸ Jamajjeya oya cuana nequisohuanaje. Jesosa oe nei nequi baja canaje.

⁹ Eyiyojo jaaoquequije'yo mimimimi jaaoque'yonaje. Jesosaa ma ojjañaja Edoe Meseya acanjaje jama ba'a: —¡Ma miya eyiyojo banaje a'a jihuohuijji! ¡Quijje eya emano'yojaa shequi o'oyajo mo oe pea cuana huohuicue! —Jesosaa acanjaje.

¹⁰ Jamajjeya oya cuaa huohui'ajja canaje: —Jesosa, Moisesija etehue'yo huohuijji poaniya jama acani ba'a: “Enia oe ebionei capoe'yahua Eyacuiñajjija huoojea'yo ojjaña jaahuanaajji poe jjimahuajo”. ¿Yajjajje acuae Moisesija esohui huohuijji cuaa jama acani? —poanjaje Peno, Satiaco, Huani pea'ai.

¹¹ Jesosaa saja'a canaje jama ba'a: —E'e jojo nei Enia jayoija jama oe dejja ebionei poejji, ojjaña cuana ejo e'e jojo nei ejjashahuabaqui meesahuajji. ¹² E'e, Enia jama ca ca oe yahuajo pishana poeyanaje. Jamatii Jodio cuanaja oya ba jjima poa. Pea poso acanjaje.

Jamajjeya cuia ca'ya poa. Jamaya pea'ai eya acaje'yo cuaa. Eya ojjañaja Edoe Mese quea nee nee po mee caje'yo cuaa —poanaje Jesosa.

¹³ Jamajjeya o shajja'ajjajji cuana jashahuabaqui nequinaje. Jama poanaje: —E'e de, oya Huanijo mimiani, ma ona besameejji poajo. Eniaa jama sohui huohuime acanaje Huaniya, de —poanaje Peno Satiaco nijje Huani pea'ai nijje.

Esho'i niñepoquipajea mee ca'yonaje Jesosaa
(Macoso 9.14-29; Noca 9.37-43)

¹⁴ Eyiyojo nequi jaaoque'yo majje Jesosaa, o shajja'ajjajjiya pea'ai ba cañaquinaje quea huiso cuana ejjachichaqui nequica. Oe dejja Jesosa que poeyanaje. Ecu'i'oshajjajo nequiya huohui'ajja canaje: ¹⁵ —Emeshi Mese Jesosa, jecuea ebacua ejjajo quea yeno jashahuabaquicue! Oya quea mano nee nee, niñepoqui poani. Niñepoqui majje ena huasijje jea cani, cuaqui yasijje pea'ai jea cani. ¹⁶ Eyaya oya yenaje mi shajja'ajjajji cuana huasijje. Jamatii niñepoquipajea ajja.

¹⁷ Jesosaa ojjaña cuana acanaje: —¡De! ¿Ache shono acuae jja nequiana ejo jashahuabaquije e'e jojo nei? Quea sapa ca'a mi coma. ¿Ache cahui huiso minijje nequi majje miyaya eya baje'yo Eyacuiñajjiya huoojea'yo ojjaña jaahuanajji quea ca'a nee nee? ¡Miquea ebacua ejja e que jjequicue!

¹⁸ Jjequi canaje Jesosa que. Jesosaa o niñepoquimeejji poani huoojeacuayajea ca'yonaje: —Eshahua, ¡cuayaqui'yocue, esho'i niñepoquimeejji poani! —Jesosaa poanaje.

¹⁹ Quijje ojjaña cuana poqui majje Jesosa que poeyanaje o shajja'ajjajji cuana. Huohui'ajja canaje: —¿Yajjajo acuae ecuaaya eshahua mi huoojeacuayajea mee'ajja'yonaje?

²⁰ Jesosaa saja'a canaje: —Miquianaya jja ejo jashahuabaqui ja'a jjima. Jashahuabaquiani jama ba'a: “E'e pojja'a Jesosaa ecuanaja eshahua huoojeacuayajea mee ajja”. Jamajjeya mi huoojeacuayajeaña. ¡Bacue oe! Ejo jashahuabaquicue jama ba'a: “Jesosaa e'e nei ohuaya jayojja jama ecuanaja ameesahua caje'yo”. Miya jama jashahuabaquijajo, Eyacuiñajjiya miya amee caje'yo ojjaña eyaya aña jayojja jama, ma dejjaa ajjima acani amee caje'yo pea'ai. ²¹ E'e, jamatii jiquio eshahua jayojja quea huoojeacuayajea camaja. Eyacuiñajji nijje mimi huicha'a huicha'a majje, ojo jashahuabaquianijo ijja'ijjia jjima po majje pea'ai huoojeacuayajea'yo miyaya —Jesosaa poanaje.

—Quijje eya manaje'yo —Jesosaa poanaje
(Macoso 9.30-32; Noca 9.43-45)

²²⁻²³ Majoya Janinea meshijo ojee poquijeya Jesosaa o shajja'ajjajji cuana huohui canaje: —E'e, quijje eya iña meesahuaje onaja equecua'yojji. Quecua caje'yo cuaa. Jamatii beca cahuime po majje mo shequi mee caje'yo Eyacuiñajjiya.

O shajja'ajja majje o shajja'ajjajji cuana quea yeno nee nee poanaje. Quea mete pea'ai poanaje.

Eyacuiñajjiya equi iya bame'yojji bejjo chicha canaje bejjo chichajji poaniya

²⁴ Majoya Capenaoma huasijje poeyajo, bejjo chichajji poani Peno que poeyanaje; huohui'ajja canaje jama ba'a: —¿A'a acuae mi mi sohui huohuijjiya bejjo quia cani, ma Eyacuiñajjiya equi iya bame'yojji?

²⁵ —E'e de, quia cani —Peno poanaje.

Majoya Simohui Peno equi yasijje dobiquijajo, Jesosaa oya huohui'ajja canaje: —Simohui, ¿yajjaje acuae mi jashahuabaquiani? ¿Emeshi mese neiya ajea bejjo sosequia mee cani? ¿A'a quea huesha ba'aja? ¿A'a oja meshijo ba'aja pojja'a?

—Quea huesha ba'eya poe majje sosequia caje'yo —poanaje Peno.

²⁶ —E'e —Jesosaa poanaje—. Jamajjeya emeshi mese neija echacojji cuana esosequia'yojji pojjeama. ²⁷ Jamatii oya quene'ama epojji ejjasosequiaquijji. ¡Poquicue miya bae yasijje! ¡Joya ebionei ijja caje oe jjequiquiyacue! ¡Oja nabajo ba'e oe bacue ejjeshejji quea sose huiso nee nee, ejo, mijo pea'ai esosequia'yojji! ¡Dojocue! ¡Bejjo chichajji poani yasijje quiacue! “Ma'aje esohui huohuijjiya, ecuea pea'ai” acue —Jesosaa poanaje.

18

¿A'ya ona huoojeajji jayojja nequije eyajo?
(Macoso 9.33-37; Noca 9.46-48)

¹ Majoya ojjaña o shajja'ajjajji cuaa Jesosa que poe majje huohui'ajja canaje: —Jesosaa, quijje miya ojjaña huoojeajji poaje. ¿A'ya cuae mi jayojja jama poaje minijje ona huoojeajji? ¿A'a ecuanaya pojja'a?

² Jamajjeya Jesosaa oe esho'i nei o que iyaa canaje. O cojja nei nequinaje. ³ O shajja'ajjaji cuana huohui canaje Jesosaa: —¡Bacue oe! ¡Iiquio esho'i nei jama pocue! ¡Jjashajja'ajjaquicue oe! Esho'i nei pojji mi po'yajo ca ca enijje eba'e'yojji pojjeama quijje eya ojjaña huoojea'yojji poaje. ⁴ Jamajjeya joya esho'i jama quea bei jjashajja'ajjaquiani e que poquije'yo, e jayojja ona huoojea'yojji eyajo poaje. ⁵ E'e, ecuea epeeji esho'i quea pame jama jjashajja'ajjaquiani. Ojjaña joya ecuea epeeji quea jea acani eya pea'ai quea jea acani —Jesosaa poanaje.

Quea mimishi mi po o'oya chana'
(Macoso 9.42-48; Noca 17.1-2)

⁶ —Ecuea epeeji jjeya nei jjapeequi ca'a'ama ja'a quea mimishi po meeji cuana! Joya o mimishi pomeeji poani Eyacuiñajjiya quea nee nee po mee caje'yo, de. Jamajjeya ¡quea mimishi epo mee cuahuajje oe mano'yocue! ¡jjanaayipecaqui majje mei quea quemoo nee jeyocue; bae quea doe yasijje oe tohuaacue! ⁷ Mimishi pomeeji cuanaqo quea yeno nee nee ojjaña poani. Jamatii mimishi pomeeji yani, de. Quea yeno ca ca oe mimishi pomeeji poaje, quea nee nee po mee caje'yo tii Eyacuiñajjiya —Jesosaa poanaje.

⁸ —Jamajjeya miya quea mimishi po mee cani emeya, ejiojjiya pojja'a. ¡Ejiojji, eme' pojja'a ejajasejjajja jayojja jama acue mimishi'ama epojji! Eme', ejiojji pea'ai chamajo eyahuasijje poqui'yajo Eyacuiñajji nijje eba'e' tiiti'yoyji quea pame nee nee. Miquea beca eme', ejiojji pea'ai yanijo pojja'a quea mimishi tii poani ca ca cuaqui yasijje poquije'yo. Quea tai nee nee, quea nee nee; cuaqui jijipajja'yo ajja, de. ⁹ Ecojjajo jjabaqui majje miya quea mimishi poani pojja'a. Jamajjeya ¡ecojja ecajjajja jayojja jama acue! Cojjama', mimishi'ama miya eyahuasijje poquije'yo quea pame nee nee poaje'yo. Cojjajji, quea mimishi tii poani miya cuaqui yasijje poquije'yo ca ca quea tai nee nee, quea nee nee poaje'yo tii tii. E'e, ¡quea jjashahuabaqui ja'a oe pocue! ¡Mimishi cuana oe pajea'yocue! —Jesosaa poanaje.

¹⁰ —Jamajjeya ¡ecuea epeeji eyacua a'a boti'ama ajji! E'e jojo nei eyaya miya huohuiaña eyajo esohuidojojjiya, o jaahuanajjiya ecue Chii yasijje huohuiqui cani. ¹¹ Eya ca iña ojjaña Edoe Mese poeyanaje mimishi cuana cuijea'yohua cuaqui yasijje miquianaya epojji poani jjejojo —Jesosaa o shajja'ajjaji huohui canaje.

Esohui eba meesahuajji ñajjaja epoquiquehuajo
(Noca 15.3-7)

¹² —Jamajjeya eyaya miquianaya huohuije esohui ejjashahuabaquijji —Jesosaa poanaje —. Oe dejjaja quea huiso ñajjaja yaninaje, 100 huisome. Oe nei poquiquehua'ya poa, ¿ae poanaje oya? ¿A'a sa'ajja canaje? E'e. Pea cuana, 99 huisome ñajjaja ojee ijia'ijjiacuqii jeanana canaje epoquiquehua sa'ajja'yohua. ¹³ Ba'yo majje quea bihui nee po'yonaje. Pea ñajjaja poquiquehua jjimajo quea bihui pishana poanaje: “¡Iiquioya ecuea ñajjajja bacua, de!” poanaje eñajjaja mese. ¹⁴ Ñajjaja jaahuanajji ñajjaja ba'yo majje quea bihui nee nee poa. Jamaya poaje ecue Chii: Ecuea epeeji eyacua quea mimishi jjejojo epoquiquehua'yo jayojja jama ojo jjashahuabaqui o'oyajo, Eyacuiñajji quea bihui nee poaje'yo —Jesosaa poanaje.

¡Miquea epeeji minijje quea mimishi poajo oja mimishi pajea'yocue, quea bei po o'oyacue onijje!

(Noca 17.3)

¹⁵ —Ecuea epeeji minijje quea mimishi poanijo, ¡onijje mimiquicue! ¡Ojaya mimishijo jjashahuabaqui meesahuacue! Jjashahuabaqui majje mimishi capajea ca'yahua. Jamajjeya minijje jjapeequije o'oya. ¹⁶ O mi jjashajja'ajjaquiao ¡pea iyaacue, beca pojja'a, ecuea epeeji pea'ai! ¡Ojee poquicue onijje mimiya! Jamajjeya oya cuaa miya ba caje e'e jojo nei miquea epeeji nijje jjapeequi o'oya sa poani. ¹⁷ Ohuaya oya cuana mi jjashajja'ajjaquiao ¡ojjaña Eyacuiñajjiya epeeji cuana huasijje iyaacue emimijji, ojaya mimishi epajea'yojji! Ojjaña niñeshe'ajja cajo mi jjashajja'ajjaquiao, Eyacuiñajjiya epeeji jama pojjeama oya. Jamatii jjadasiaquijji jama, de —Jesosaa poanaje.

¹⁸ —Jamajjeya ojjaña ecuea epeeji cuana miquianaaya huohui meeje ache eba'e'ji quea mimishi, ma Eyacuiñajjiya eyajo anija boti'ama pea'ai. Huohui meeje pea'ai ache eba'e'ji quea pame nee, ma Eyacuiñajjiya eyajo anija quea boti nee pea'ai —Jesosaa poanaje.

¹⁹ —E'e jojo nei miquianaya meshijo ba'e ojee mimiajo, Eyacuiñajjiya, ecue Chiya eyajo aniya miquianajaya esohui saja'a cani. ²⁰ Beca cuana enijje jjapeequiani ejjachichaquian-ijo, eya o pejejo nequiani —Jesosaa poanaje.

Esohui ejjashahuabaqui meeji oe dejja onaja mimishijo quea quene tii ti poani

²¹ Majoya Penohua Jesosa huohui'ajja canaje: —Emeshi Mese Jesosa, ecuea epeejiya quea mimishi ahuicha'a huicha'a cajo, ¿a'a eyaya oja mimishi capajea huicha'a

huicha'a'yahua? ¿Ache huiso huohui'yome amajje jjabei qui ca'yojji? ¿A'a quea huiso pojja'a, me oejje pea beca, 7 pojja'a?

²² Jesosaa saja'a canaje: —Chojja, Peno, me oejje pea beca, 7 pojjeama. Quea huiso nee nee huohui'yome amajje jjabei neinei qui ca'yojji, jama tii tii epo'yojji —Jesosaa acanaje.

²³ Jamajjeya Jesosaa pea esohui ejjashahuabaqui meejji huohui canaje jama poani ba'a: —Eyacuiñajji ojjaña huoojja'yojji poaje. Jamaya poaje ba'a: Emeshi meseya aquiana oja quia sosequia mee ca'yani echacojji cuana. ²⁴ Sosequia mee canijo o que jjequi canaje oe echacojji poani. Aquiana quea huiso nee nee oja jjeshe poanaje. Jamajjeya sosequia ajja'ajja jjima, ojaya. ²⁵ Ma echacojji sosequiaquia ajja; yajja sosequia'yome yajji jojoya mi sosequiajeyo ca'yonaje. Jamajjeya emeshi meseya quea quene huohui canaje: “¡Oya oe quiacue ejjeshejji sosejje! Sosema' cachaco cahua. ¡Ojaya ehuanase, oja bacua cuanaya quiacue pea'ai, ojaya aquiana cuana pea'ai quia'yocue e sosequia'yojji!”

²⁶ —O shajja'ajja majje echacojji o que poquinaje. Ecu'i'oshajjajo nequi oya mimi nequinaje: “Ecuea emeshi mese, ¡a'a ecuana dojojji equia'yojji bejjo sosejje! ¡Ishoa'ajjacue! Eyaya ojjaña sosequia jeyojoye'yo miya”.

²⁷ —Emeshi mese ojo jjashahuabaquinaje. Quea aquiana huiso nee nee nee sosequia jjima. Jamatii oja bajjani cuijea ca'yonaje, sosequia jjima tii. Poqui mee ca'yonaje, de.

²⁸ —Majoya echacojji poquinaje quea bihui nee nee. Jamatii poqui majje ma echacojjiya pea echacojji onijje nequi sa'ajja canaje. Ba majje iñasibjea canaje. Jama poanaje ba'a: “¡Ijjea nei mo sosequiacue mique jjeshe cuana!” oya poanaje. Ojaya oe pojji nei sosequia jjima poanaje. ²⁹ Ecu'i'oshajjajo nequi mimi nequinaje ¡iquio pea echacojji: “Epeejji, ¡ejo jjashahuabaquicue! ¡Ishoa'ajja socue! Ojjaña aje mi sosequia jeyojoye'yo de”.

³⁰ —“¡Chojja! ¡Ishoa sa po ajja iña!” poanaje. Jeanobiaa dojoj canaje; ohua sosequiajeyo ca'yajje huoojja ca'yonaje.

³¹ —Pea echacojji cuaa ba canaje. O dojoj cajo quea yeno jjashahuabaquinaje. Poquinaje emeshi mese huohui'yohua. ³² Ma shajja'ajja majje emeshi meseya huoojja canaje ojaya echacojji jjequi'yohua. Poeyajo tecuea canaje emeshi meseya: “Miya ca mi ca oe quea mimishi nee. Miquea aquiana quea huiso nee nee sosequia jjima. Jamatii enijje mimi'yajo eyaya miquea bajjani cuijea'yonaje, sosequia jjima tii. ³³ Jamajjeya ¿yajjajo miquea epeejjiyo mi jjashahuabaquinaje miya? ¡E jayojja oe miya mi poanaje!” emeshi mese poanaje. ³⁴ Quenequene neinei'yonaje emeshi mese. Ejeanobiajji huoojja ca'yonaje quea nee nee po meeya ohua sosequiajeyo ca'yajje —jamaya Jesosa poanaje.

³⁵ —Jamajjeya ¡iquio ecua emeshi meseya acani jayojjaya jamaya miqianaya acaje'yo ecue Chiiya, ca onaja mimishi miya mi pajea neinei'yajo. Miquea mimishi cuana pajea'yo ajja, cuijea'yo ajja pea'ai —Jesosaa acanaje.

19

Esohui huohui canaje ehueijjiyo, Jesosaa (Macoso 10.1-12; Noca 16.18)

¹ Majoya esohui huohui majje Jesosa Janinea meshijo ani po'oquequinaje Jodea meshi yasijje, Jodana cuei ojje miji yasijje. ² Jomajo quea huiso dejja cuana onijje poquinaje. Ohuaya ojjaña jjaajaqui mee ca'yonaje, huaquia mee ca'yonaje. ³ Paniseo cuana ca ca o que poeyanaje jjadasiaquiya nisho. Jamaya jjashahuabaquinaje ba'a: —E'e pojja'a Jesosa Moisesija etehue'yo jayojja jama pojjeama mimije. Jamajjeya ecuaaya oya tecueaje.

Jamajjeya Jesosa huohui'ajja canaje cuaa jama ba'a: —Esohui huohuijji, ¿a'a acuae ehuanase huei cajji? ¿Yajjajo acuae ehuanase huejjea cajji so'o? ¿Achajja tehuemeya acuae oe Moisesiya aca poa?

⁴ Saja'a canaje Jesosaa: —¿A'a miquea Moisesija etehue'yo ba jjima esohui? Yahuaajo nei nei tehue ca poa Moisesiya jama ba'a:

“Yahuajo Eyacuiñajjiya pana coo ca poa yahue, epona pea'ai. ⁵ Huohui ca poa ohuaya: —Jamajjeya yahueya oja chii, ojaya enaese pea'ai cajiñajjiya ca'yahua oja huanase nijje eba'ejji”.

⁶ Oya cuana beca. Jamatii oe nei jayojja Eyacuiñajjiya oya ba cani, becanejjijji pea'ai pojjeama, oe nei jayojjaya. Cuanaya Eyacuiñajjiya oe jayojja aca poa. Jamajjeya ¡a'a oe jea meejji! ¡Jama tii tii oe nei oe acue! —Jesosaa acanaje.

⁷ Huohui'ajja o'oya canaje Paniseo cuaa: —Jamajjeya ¿yajjajo acuae Moisesiya tehueme aca poa? Jama ba'a:

“Huei'yo majje yahueya ehueijeajji papeni etehue'yo caquia cahua oja huanase. Majoya cahuojja cahua”.

⁸ Saja'a canaje Jesosaa: —Miquea etiiquiana quea mimishi nei jjejojya Moisesiya huei mee'ajja canaje. Quijje nei Moisesiya jamaya tehue ca poa; jamatii Eyacuiñajjiya jamaya

pojjeama pana coo ca poa. ⁹ Jamajjeya eyaya miya huohuiaña e'e jojo nei ehuanase pea dejjaja sii jjima huei ca ajja. Joya ehuanase hueijji epo pea epona ehuanayoyji quea mimishi nee, epona siiji epo jama. Eyacuiñajjiya oya ba cani quea mimishi. Joya ma eponajo jjahuanaquiajo quea mimishi pea'ai poani; onaja ehuanase nijje poani —Jesosa poanaje.

¹⁰ —¡De! Jamajjoya eseya jjahuanacui ca ajja. Jamatii shacuima' nequi cajji ojjaña eseya cuana. —o shajja'ajjajji poanaje.

¹¹ —Cho, ojjaña pojjeama shacuima' nequi cajji —Jesosa poanaje —. Beca cuana Eyacuiñajjiya huoojea caje'yo shacuima' tii enequijji. ¹² Beca cuana jjahuanacui ajja, jamatii ejjahuanacuijji pojjeama. (Jamaya joya quibojjisha nei, biñajajjama' cuana pea'ai.) Beca cuana jjahuanacui ajja jamatii yajjajje shai jjahuanacui sa po'yo ajjajo. Beca cuana Eyacuiñajjiya esohui ehuhui aiquijji, ojo echaco neinei cajji Eyacuiñajjiya huoojea canaje jjahuanacui jjima tii tii enequijji. Jamatii Eyacuiñajjiya ojjaña huoojea'yo ajja shacuima' tii enequijji. Jamajjeya ¡oyaya ejjashahuabaqui'yoyji mijo jamaya acue, miyaya! —Jesosa poanaje.

*Esho'iquianajo Eyacuiñajji nijje miminaje Jesosa
(Macoso 10.13-16; Noca 18.15-17)*

¹³ Majoya Jesosa que esho'i nei cuana jjequi canaje cuaa. Huohui canaje: —Jesosa, ¡iquio esho'i nei sapa napa'ajja majje ¡Eyacuiñajji nijje mimicue oyaya ejaahuanajji! —poanaje.

Jesosa shajja'ajjajji cuaa oya cuana tecuea canaje: —¡A'a jja oe Jesosa que jjequi majajji esho'iquiana! ¡Esohui oe cahuhui cahua!

¹⁴ Ma ba majje Jesosa poanaje: —¡Esho'iquiana e que capoe'yahua! ¡A'a quea huesha nequi meeji! E'e, esho'iquiana jjashahuabacuajiquiani; enijje jjapeecuajiquiani. Jamaya ecuea epeeji esho'i jayojja eyaya jaahuana mee sa aña pea'ai. Jamajjeya e que poquije'yo, eya eyajo ojjaña huoojea'yoyji poaje —poanaje.

¹⁵ Jamajjeya esho'i cuana biajje eme' huana majje Jesosa poquinaje.

*Edeja etii pishana quea aquiana huiso Jesosa nijje miminaje
(Macoso 10.17-31; Noca 18.18-30)*

¹⁶ Majoya oe dejja Jesosa que poeyanaje. Huohui'ajja canaje jama ba'a: —Emeshi Mese, ¿achajja po majje acuae mo eyahuasijje poqui ca'yoyji Eyacuiñajji nijje eba'e tiitii'yoyji? ¿Achajja acuae ba'e cajji quea pame nee epojji?

¹⁷ —¿Apiojji miyaya eya huohui'ajjaña: “¿Ae quea pame nee epo'yoyji?” Eyacuiñajji ca oe nei quea pame nee. Jamajjeya onijje ba'e tiitii'yo sa po majje ca oe ¡oyaya shajja'ajjacue! ¡Oyaya esohui etehue'yo jayojja jama oe ba'ecue! —Jesosa poanaje.

¹⁸ —¿Ache esohui etehue'yo? —huohui'ajja canaje.

¹⁹ Jesosaa saja'a canaje: —Eyacuiñajjiya esohui etehue'yo jama poani ba'a:

“¡A'a pea quecuajji!

¡A'a sii pojji!

¡A'a siajje pojji!

¡A'a pea siiji!

¡Mique chii, mique nae pea'ai oe shajja'ajjacue!

¡Pea cuana mi pejjejo ba'e mique huapa pojjeama jayojja quea jea oe acue!”

²⁰ —E'e, eyaya jamaya aña, esho'yahuaa jama tii tii sohuaqui eya. ¿Pea acuae yajja po cajji eyajo eba'e tiitii'yoyji? —¡iquio dejjaa Jesosa huohui'ajja canaje.

²¹ —E'e, miya quea pame nee nee Eyacuiñajji jayojjaya po sa po majje ¡poquicue, miquea aquiana cuana quiaquicue ejjeshejji sosejje! ¡Ejjeshejji quia'yocue aema' cuana huasijje! ¡Majoya poecue, enijje epo'yoyji! Jamajjeya eyajo Eyacuiñajjiya miya aquiana quea pame nee quea huiso quia caje'yo quijje.

²² Jesosaja esohui shajja'ajja majje dejja etii pishana quea dejja tai jjejojo quea yeno poquinaje; oyaya aquiana quea huiso nee nee yani jjoya quia sa po'yo ajja.

²³ Jamajjeya Jesosaa o shajja'ajjajji cuana huohui canaje: —E'e, dejjaa quea mimishiya jjejojya aquiana quea huiso, meshi quea quemo pojja'a nahue canijo beshahua nei e que poqui ajja, eya eyajo ojjaña huoojea'yoyji poaje'yo.

²⁴ —E'e, eyaya huohuiaña pea'ai jama ba'a: Ahuoja quii huejjajje ino jeanobiaña jamaya, ¿a'a mapichi jeanobia cajji ahuoja quii huejjajje? Quea camaja coma. ¡iquio ecua mapichi ahuoja quii huejjajje jeanobia cajji pome jamaya dejja quea aquiana huiso nee nee nahue cani eyahuasijje edobiquijji pojjeama.

²⁵ O shajja'ajja majje jjashahuaba neineiquinaje o shajja'ajjajji. Ojee mimimiminaje: —Jamajjeya ¿a'ya shai eyahuasijje dobiqui mee caje'yo?

²⁶ Cojja ba neinei canaje Jesosaa. Huohui canaje: —Dejjaa jamaya amee ajja tii. Eyacuiñajjiya oe neiya ojjaña acani. (Eyahuasijje dobiqúi mee cani pea'ai joya quea aquiana huiso nee) —Jesosa poanaje.

²⁷ Jamajjeya Peno jhashahuabaquinaje ma dejja aquiana quea huiso nee nee jeana'yo sa po ajjajo. Huohui'ajja canaje: —Jesosa, ecuaaya ojjaña aquiana jeana'yona je minijje epoqui'yojji. Jamajjeya ¿ae acuae ecuaana quiaje so'o, de?

²⁸ Jesosaa saja'a canaje: —E'e jojo nei quijje Eyacuiñajjiya ojjaña eyacua pana ca'yajo eya eyajo nequije'yo ojjaña huoojea'yojji nei. Miquianaya, 12, e shajja'ajjajji poani enijje nequije'yo, enijje ona huoojea'yojji poaje'yo. E'e, miquianaaya Jodio cuana, ecuea pea epeejji cuana pea'ai huoojeaje'yo tii. ²⁹ E'e nei beca cuana ecuea esohui jama a sa poanijo aquiana cuana jeana ca'yani: Ojaya equi, oja huapa pojjeama, oja chii, oja nae pojja'a, oja bacua cuana pojja'a, oja huanase pojja'a jeana ca'yani. Jamajjeya e'e jojo nei quijje Eyacuiñajjiya oya cuana quea huiso nee nee o jayojja quia caje'yo; quea bhui nee nee ba'e tiitii mee caje'yo pea'ai eyajo onijje. ³⁰ Jamatii beca cuana jjeaya ona huoojeajji poani eyajo ona huoojea'yojji pojjeama poaje'yo. Joya jjeaya ona huoojea'yojji pojjeama ca ca eyajo ona huoojea'yojji nei nei poaje'yo e jayojja —Jesosa poanaje.

20

Esohui ese jhashahuabaqui meejji huohui canaje Jesosaa e'acuijjajja mesejo

¹ —E'e —Jesosa poanaje —, quijje eya ojjaña huoojea'yojji poaje, ojjaña sosequiaje'yo jjeaya enijje chaco canaje sosejje. Jamaya poaje ba'a: Oe dejja, e'acuijjajja mese mecaj-jeahua poquinaje. Echacojji cuana iyaa canaje. Huohui'ajja canaje: ² “¿A'ya cuae jjeaya poquije acuijjajja huojohua? Ojjaña miya eyaya sosequiaje oe esodojjo quea sose huiso nee nee sosejje”. “E'e” poanaje, “chacoje ecuaaya oe esodojjo quea nahue nee sosejje”. Majoya huoojea canaje chachohua.

³ —Quijje pishana eshequi jaasohua pishana majje ona ijji'a'ijji'a'ani yasijje poquinaje e'acuijjajja yiye mese. Beca dejja chachochaco jjima ani ba canaje. ⁴ Huohui'ajja canaje: “¿A'a miyaya acuijjajja yiyejo chacoje pea'ai? Miya eyaya sosequiaje quea sose huiso pea'ai”. “E'e, chacoje” poanaje. Poquinaje chachohua.

⁵ —Quijje eshequi biacojjajja nequijo, sinecua nei pea'ai oya poqui majamajanaje pea cuana iyaa echacojji. ⁶ Eshequi ejjajeapaaquijo pea'ai poqui o'oyanaje. Dejja cuana chachochaco jjima ani ba canaje. “¿Apiojji acuae mi chachochaco jjima ani?” acanaje e'acuijjajja meseya. ⁷ “Chama oya ecuea echacomeejji aña, de; ajea esosequia'yojji” saja'ame acanaje cuaa. “E'e. ¡Ecuea acuijjajja yiyejo chacoquicue pea'ai!” poanaje.

⁸ —Meca nei e'acuijjajja meseya ona chacomeejji huohui canaje: “¡Echacojji cuana iyaacue! ¡Sosequiaacue! ¡Joya quijjejeje nei dobiquinaje ebionei sosequiaacue! ¡Joya ebionei dobiquinaje quijje yeje nei sosequiaacue!”

⁹ —Majoya echacomeejjiya joya eshequi ejjajeapaaquijo dobiqúi cuana sosequia canaje oe esodojjo quea nahue. ¹⁰⁻¹¹ Jamajje quijje joya mecajjeahua dobiqúi cuana poeyanaje. Sosequia canaje oe esodojjo quea nahue pea'ai. Ba majje quea yeno poanaje, quea huiso nee nee esosequia caje poso. Jamatii oya sose huisoajja pea'ai sosequia canaje. E'acuijjajja mese nijje quenequenaje. ¹² Mimijajinaje jama ba'a: “Joya eshequi ejjajeapaaquijo poeyanajaya aje oe oe pojji chaco canaje. Ecuaanaaya ca chaco neineinaje eshequi quea quiyajo. Jamatii miyaya oya sose huisoajja pea'ai sosequianaje. ¿Apiojji acuae jja ecuaana jayojja pea'ai sosequianaje so'o?” poanaje. ¹³ “E'e epeejji cuana, eyaya miya sosequianaje quea pame nee” poanaje. “Mi poeyajo jama poanaje ba'a: —E'e, chacoje oe esodojjo quea nahue sosejje —poanaje. ¿A'a e'e? Jamajjeya eyaya jamaya miya quia meenaje. Jamajjeya ¿a' quea quene pojji! ¹⁴ Eyaya jiquio dejja quijjejeje nei cuana oe esodojjo quea nahue nee quia sa poani mi jayojjaya. Jamaya quea pame. ¹⁵ Mi jayojjaya quea huiso sosequianaje. ¿A'a jja oe miya quea quene pojji! Bejjo ecuea jojoya eyaya quia sa amajje eyaya quiaña” e'acuijjajja mese poanaje —Jesosa poanaje.

¹⁶ —E'e, e'acuijjajja meseya ojjaña sosequia canaje ojaya ejjashahuabaqui'yojji jayojja jama. Jamaya Eyacuiñajjiya acaje'yo. Joya quijje nei jjaepequije'yo quea bhui nee ba'e tiitii mee caje'yo eyajo onijje pea'ai. Ojjaña ojaya ejjashahuabaquijji jayojjaya jama sosequia caje'yo pea'ai. Eyacuiñajjiya quea huiso iyaa caje onijje eba'e tiitii'yojji. Jamatii oe pojji babaca caje'yo oja epeejji huoojea'yojji epoiji —Jesosa poanaje.

—*Quijje eya manaje'yo —Jesosa po o'oyanaje*
(Macoso 10.32-34; Noca 18.31-34)

¹⁷ Majoya Jenosanena huasijje poquinaje. Jesosaa o shajja'ajjajji cuana dojo canaje ejiojji sahua huasijje esohui huohuijji: ¹⁸ —¡Bacue oe! Eya jiquio ojjañaja Edoe Mese. Eseyá Jenosanena huasijje poquije. Jomajo mo ña meesahuaje eya Jodio cuanaja equecua

mee'yoyji. E'e, Moisesija etehue'yo huohuijjiya, Eyacuiñajji nijke emimijji etii cuaa pea'ai eya iña mee caje. Taaa neineije cuana: “¡Oya quecuajeacue!” poaje. ¹⁹ Jodio pojjeama cuana huasijje mo huoojea caje. Ejo soa neineije cuana; cuia caje'yo mo cuaa huaca jee ejeapashajjaa; acui ecueata'apejo me cacajea majje mo ba'e huanasohuajea caje cuaa emano'yoyji. Jamatii mo beca cahuime po majje Eyacuiñajjiya shequi mee caje'yo —Jesosa huohui canaje.

Semeneoja ehuanase Jesosa nijke miminaje oja bacua ejjajo
(Macoso 10.35-45)

²⁰ Majoya Jacobo, Huani pea'ai enaese nijke Jesosa que poeyanaje. Ecu'i'oshajjajo nequiñanaje onijje emimijji.

²¹ —She, ¿ajeo ami poeyanaje? —Jesosa poanaje.

—Jesosa, ecuea ebacua ejja cuana mi pejejo canequi'yahua quijje miya ojjaña huoojea'yoyji poaje. Oe shani mijijje, pea ebianeí mijijje canequi'yahua minijje, ona huoojea'yoyji. ¡Jamaya oe acue! —poanaje enaese.

²² —Chojja. Miquianajaya ba jjima —Jesosa oya cuana acanaje—. Eya quea nee nee po mee caje'yo cuaa. ¿A'a miquianaya e jayojja quea nee nee poajo quea ca'a poaje? Eya quecua caje'yo pea'ai cuaa. Enijje jjapeequianijo miquiana quecua caje'yo pea'ai pojja'a cuaa. ¿A'a jamatii miquianaya quea ca'a poaje?

—E'e —saja'a canaje Jacobohua, Huaniya pea'ai—. Quea ca'a poaje mi jayojja onaa quea nee nee po mee ca'yajje. ¡Jamaya capoahua, jamatii caquecua cahua cuaa mo!

²³ —E'e —poanaje Jesosa—, jamajjeya e'e jojo nei miquiana e jayojja quea nee nee po mee caje'yo cuaa; e jayojja quea ca'a nee nee poaje, onaa mano mee ca'yajje. Jamatii, e pejejo eyajo eyaya miya enequi mee'yoyji pojjeama enijje ona huoojea'yoyji. Chojja, ecue Chiyya eyajo aniya huahuajo nei pea cuana babaca ca'yonaje. Ohuaye nei nequi mee caje'yo e pejejo quijje, eya ojjaña huoojea'yoyji poajo —Jesosa poanaje.

²⁴ Jesosa pejejo nequi sa pea'ai poanijo onijje ona huoojea'yoyji epojji, Jacobo, Huani nijke pea'ai quea quene poanaje pea shajja'ajjaji cuana, ome mijijje pea'ai. ²⁵ Jamajoya aje oe Jesosa oya cuana iyaa canaje. Jama huohuime acanaje ba'a: —¡A'a onijje quea quene pojji! Miquea eba dejja cuana, Eyacuiñajjija epeeji pojjeama. Onajaya emeshi mese cuaa, ona huoojeajji cuanaa pea'aiya pea cuana huoojea neinei cani; quea quene nee nee poani, quea mase. ²⁶ Jamaya pojjeama miquianaya poaje, ecuea epeeji cuana. ¡E jayojjaya po sa poanijo pea cuana ba'e meesahuacue! ²⁷ Joya ona huoojea'yoyji po sa poani ca ca echacojji sosema' jayojja capoahua. ²⁸ E'e, ¡e jayojja jama pocue! Eya ca ca iña ojjañaja Edoe Mese poeyanaje ojjaña cuana ba'e meesahuacue; ojjañaja eya eba'e meesahuajji pojjeama. Ojjañaja mimishi sosequia'yoyji mo manojeyo, ojjaña cuaqui yasijje epoqui'yo poani jjejojya —Jesosa poanaje.

Cojjama' cuana quea cojja ja'a po mee ca'yonaje Jesosaa
(Macoso 10.46-52; Noca 18.35-43)

²⁹ Jenosanena huasijje poquijje Jesosa dobiquinananaje Jenico huasijje. Majoya dobinana majje poquinaje Jenosanena huasijje. Quea huiso nee nee cuana onijje poquinaje. ³⁰ Becanejjijji pea'ai cojjama' ejiojji sahuajo e'anioque ani. Jesosa shajja'ajja canaje poeje. Taaa neineinaje cuana: —Jesosa, miya emeshi mese Dabija osecua. ¡Ejo jjashahuabaquicue quea yeno! —taanaje.

³¹ —¡A'a oe taaa majajji! ¡Esohui oe ca'acue! —acanaje cuaa.

Jamatii taaa neineinaje cojjama' cuana: —Jesosa, Dabija osecua, ¡ejo jjashahuabaquicue!

³² Jamajjeya o shajja'ajja majje Jesosa nequiñaquinaje. Cojjama' cuana iyaa canaje: —E'e, ¡pocue! ¿A'ya so'o? —poanaje.

³³ —Emeshi Mese, imiyaya iña jjacojjapojjaqui mee'yocue! —poanaje.

³⁴ Jamajjeya Jesosa cojjama' cuanajo jjashahuabaquinaje. Cojja napa canaje. Cojja napa caje ecocjja jjabapojjaqui'yonaje. Quea bihui nee nee po'yonaje jjacojjajaja' aqui mee ca'yajje. Jamajjeya Jesosa nijke poquinaje.

21

Jenosanenajo Jesosa nequiñaquinaje

(Macoso 11.1-11; Noca 19.28-40; Huani 12.12-19)

¹ Majoya Jesosa Mepajejo nequiñaquinananaje Jenosanena pejejo, acui tii'ajja yiyejo, Onimo bajjani eyiyo pejejo pea'ai. Nequiñaquinana majje o shajja'ajjaji becanejjijji pea'ai huoojea canaje Jesosaa. ² Jama poanaje ba'a: —¡Poquicue Mepaje yasijje! ¡Dobiqui majje mapichi sisi, ebacua sho'i ai nijke ejeyo nequia nequi bañaquicue! ¡Ba majje, picho majje yecue e que! ³ Onaa: “¿Apiojji acuaeya ecua mapichi sisi pichojeaña so'o?” acajje, “Ecuea

Emeshi Mese sa poani” saja'ame acue. Jamajjeya: “Ee, ocue dojo'ajja joya mapichi” acaje dejjaa Mepajejo ba'eya —Jesosa poanaje.

⁴E'e, jamaya acanaje Jesosaa, Eyacuiñajjija esohui huohuijji yahuajo nei nei ojo tehue ca poa jama ba'a:

⁵“Ojjaña Jenosanenajo ba'e huohucue jama ba'a: —¡Bacue oe! Mi huoojea'yojji nei poeyani; oya quea bei nee. Jamajjeya mapichi sisija daasa biajje poeyani, mapichi sisija ebacuaaja daasa biajje”.

Jamaya yahuajo nei nei Jesosajo tehue ca poa Eyacuiñajjija esohui huohuijjiya.

⁶Jamajjeya Jesosaa huoojea cajje o shajja'ajjaji poquinaje. ⁷Mapichi sisi bacuaaji dojo canaje. Daqui ao cuana mapichi sisija bacuaaja daasa' biajje iya canaje. Jesosa anisohuaquinaje mapichija bacua sho'i aija daasa' biajje. ⁸Ojjaña cuana ejjachaquiqui nequi canaje, quea huiso nee nee. Ojaya daqui ao cuana ejjiojji jeapiihui canaje Jesosa ja'ajjequijji. Pea cuaa acui iña jajasejja canaje. Huana yiyoyiyo canaje ejjiojji. Jama yahuajo nei Jodio cuaa emeshi mese cuana ja'ajjequiqui caninaje cuiñajji yasijje, jama ja'ajjequimeya acaninaje ohua ba cahuaajje. ⁹Ojjaña ehui dojojji poquije, Jesosa quishishijji poquije pea'ai taaaca poquinaje quea bihui nee nee: —E'e Jesosa, emeshi mese Dabi yahuajo ba'e miquea etiiquiana. Mi poeyajo ecuana quea bihui nee nee. Quea pame nee nee miya, Jesosa. ¡Eyacuiñajji eyajo aniya miya cajaanahuana cahua! ¡Eyacuiñajji cabihuana cahua, ojjaña!

¹⁰Jamajjeya Jesosa Jenosanena huasijje dobiqianajo, ojjaña cuana jomajo ba'e cuajicua-jjebenaje jjachichaquiya, ojjaña. Huohui'ajja canaje: —¿A'ya shai poeje? —poanaje.

¹¹—Jesosa poeje, Eyacuiñajjija esohui huohuijji nei, ma Nasanenajo ba'enaje —saja'ame acanaje cuaa.

Aquiana quiajji poani Eyacuiñajjija equijo nequi cuana huoojeacuayajea canaje Jesosaa (Macoso 11.15-19; Noca 19.45-48; Huani 2.13-22)

¹²Quijje pishana Jesosa ojjaña cuana nijje Eyacuiñajjija equi yasijje poqui o'oyanaje. Dobiquinaje. Aquiana quiajji poani Eyacuiñajjija equijo nequi cuana huoojeacuayajea canaje Jesosaa, aquiana jjeshe poequi pea'ai. Aquiana cuana jjahuoojeajeaquiqui canaje; bejjo, pea bejjo sosejje quia cani cuanaja bejjo nequijji cuana jeapajjajea canaje; huia' quiajji pea'ajja huia' nequijji cuana jeabichajjajea canaje: ¹³—¡A'a jja oe Eyacuiñajjija equijo aquiana quiajji! —tecueame acanaje Jesosaa—. Eyacuiñajjija esohui jama poani ba'a: “Ecuea equi ojjaña cuana enijje emimijji”. Miquianaaya ca ca siipojji nequijji jayojja amee añe Eyacuiñajjija equi.

¹⁴Majo tii aniya cojjama' cuana, jeo'ajja cuana pea'ai Jesosa que poeyanaje. Ojjaña cuana Jesosaa quea pame nee po mee ca'yonaje. ¹⁵Jesosaja jjaajaquiqui mee'yo cuana quea pame nee ba canaje; esho'iquiana majo tii ani sohuicuayanaje shajja'ajja canaje pea'ai. Jamatii Jodio etii cuana aje oe Jesosa nijje quea quene poanaje. Jesosa Eyacuiñajjija Bacua Eija pojjeama poso tecuea canaje Moisesija etehue'yo huohuijji poaniya, Eyacuiñajji nijje emimijji etii cuaa. Jama poanaje ba'a: ¹⁶—¿Apiojji acuae jiquio esho'iquiana sohuicuaya meeaña mi bihuiajji? ¿A'a shajja'ajja jjima?

—E'e, shajja'ajjaña —Jesosa poanaje—. ¿A'a miquea ba jjima Eyacuiñajjija esohui etehue'yo ejo? Jama poani ba'a:

“Joya esho'i ai'ai, esho'i jjonajjona ai pea'ai quea pame nee esohui cuaya mee'yojji mi bihuia'yojji”.

Jamaya Eyacuiñajjija esohui yahuajo nei ejo etehue'yo poani —Jesosa poanaje.

¹⁷Mimi majje Jesosa poquinaje. Jea cana'yonaje. Jenosanenajo ani poquinaje Betania huasijje cahuiya.

Acui etona jjajja jayojja, iquena bajjani sajjai mee ca'yonaje Jesosaa (Macoso 11.12-14, 20-26)

¹⁸Mecajjeahua Jenosanena huasijje poe o'oyanaje; quea shoe poanaje Jesosa. ¹⁹Ba canaje ejjiojji sahuajo nequi acui etona jjajja jayojja. Acuijajja ba'ajjaquiqui canaje. Chama' poanaje ejjajja. Eña oo pana nequi'yo. Jamajjeya oya Jesosaa huohui canaje: —¡Jamajjeya jjajjama' tii capo'yahua acui! —Jesosaa jama acajje jjeya nei sajjainana'yonaje acui.

²⁰Quijje pishana acui esajjai'yo ba majje o shajja'ajjaji cuana jjajjasoquinaje: —¡De! ¡Jjeya nei ca ca sajjai'yonaje! —poanaje.

²¹⁻²²—E'e —Jesosa poanaje—, ¡Miya Eyacuiñajjijo quea ja'a nee jjashahuabaquicue! A'a jjashahuabaquiqui jama ba'a: “E'e pojja'a Eyacuiñajjija eya shajja'ajja'yo jjima”. Cho, jama jjashahuabaquicue ba'a: “Eyacuiñajjija e'e jojo nei nei eya saja'a caje'yo”. Jamaya miya jjashahuabaquijajo, Eyacuiñajjiya miquea esohui saja'a caje. E'e, Eyacuiñajjiya e jayojja jama ameesahua caje'yo pea'ai, ma dejjaa ajjima acani.

¿Aya acuae Jesosa huoojea canaje esohui huohuiya?
(Macoso 11.27-33; Noca 20.1-8)

²³ Majoya Jesosa Eyacuiñajjija equi yasijje dobiqúi o'oyanaje. Esohui huohui canijo, Jodio etii cuana, Eyacuiñajji nijje emimijji etii cuana pea'ai o que poeyanaje. Jesosa ojaya ba jjimajo huohui'ajja canaje: —¿Aya acuae mi huoojea canaje? ¿Apiojji acuaeya esohui huohuiaña so'o? ¿Apiojji acuaeya aquiana quiajji poani huoojeacuayajeaneja oma mecajje? —acanaje Jodio etii cuaa.

²⁴⁻²⁵ Jesosaa oya cuana saja'a canaje: —E'e, eyaya miya ebionei huohui'ajjaje. ¿Aya Huani huoojea canaje ona besa meeya? ¿A'a Eyacuiñajjija? ¿A'a dejja cuaa pojjja'a? ¡Huohuicue mo! Eyaya majoya huohuije e huoojea'yojji epo.

²⁶ Shajja'ajja majje Jodio cuana ojee mimimiminaje: —¿Yajja saja'ame shai eseya aje so'o, de? Quea mete ojjaña dejja cuana. Ojjaña ba cani Huani Eyacuiñajjija huoojea canaje esohui huohuiya. Jamajjea: “Dejjaa Huani huoojea canaje” eseya ajje se jajahuejjajea ca chana' meiya. “Eyacuiñajjija Huani huoojea canaje” eseya ajje se oje jama acaje ba'a: “Jamajje, ¿apiojji miyaya Huani shajja'ajja jjima aña?” Jesosaa acaje.

²⁷ Jamajjea jjashahuabaqui majje Jesosa huohui canaje Jodio cuaa: —Cua'a, de. Ecuana ba jjima —anisho canaje.

—Jamajjea ecuea miya ehuohuijji pojjeama e huoojea'yojji epo —Jesosaa acanaje Jodio esohui huohuijji cuana, etii cuana pea'ai.

Esohui ejjashahuabaqui meeji beca ebacua ejjajo

²⁸ Jesosaa oya Jodio cuana huohui canaje pea'ai jama ba'a: —Shajja'ajjacue oe ecue sohui ejjashahuabaqui meeji jama ba'a: Oe dejjaa becanajjiji pea'ai ebacua ejja yaninaje, shacuíma' nequi cuana. Ejeajjija oja bacua ejja etii huohui canaje: “Cha, ¡che oe jjeya que chacoquicue!” ²⁹ “Cho, cajaa. Mijo chaco sa po'yo ajja ca iña” poanaje. Jamatii, jjashahuabaqui majje “Cachacoquiahua” poanaje. Poquinaje que yasijje.

³⁰ —Ejeajjija oja pea ebacua ejja, echahua mese huohui canaje pea'ai: “Cha, ¡che oe que chacoquicue jjeya!” poanaje. “E'e ecue Chii, jaaya chacoquije aje ca eya” poanaje. Jamatii poqui jjima poanaje, de.

³¹ —Jamajjea ¿ache esho'i oja chiija ehuohui jama poanaje? ¿Achajja acuae miña jjashahuabaquiani?

—E'o'i mese —acanaje cuaa.

—E'e —Jesosa poanaje—. Eyaya miya e'e nei huohuiaña jama ba'a: Jiquio ecua e'o'i mese jjashahuabaqui majje oja chiija huohui canaje jayojja jama acanaje jama jayojja dejja mimishi cuana, epona pea cojjojji poani pea'ai. Eyacuiñajji nijje jjapeequijjiani oja ejaahunajji. Miquiana ca mi ca oje, cho. Eyacuiñajji nijje jjapeequijji. ³² E'e, Huani, ma ona besameeji poa yahuajo nei poeya poa miquiana ba meesahuaa. Huohui ca poa jama ba'a: “¡Miquea mimishijo quea yeno pocue! ¡Mimishi cuana pajea'yocue Eyacuiñajjija esohui jama eba'ejji, onijje ejjapeequijji!” Huani poa. Miquianaya aje oe Huani shajja'ajja sa po ajja poanaje. Dejja mimishi cuana, epona quea mimishi cuanaya ca ca shajja'ajja majje: “E'e, ¡Eyacuiñajji nijje ejjapeequijji, mimishi cuana ejjapeequijji!” poanaje. Ma ba majje jamatii miquianaya jjashahuabaqui jjima, Eyacuiñajjija esohui jama a sa po ajja tii poanaje —Jesosaa acanaje Jodio etii cuana.

Pea esohui ejjashahuabaqui meeji jjonojajja yiyejo
(Macoso 12.1-12; Noca 20.9-19)

³³ —¡Jiquio shajja'ajjacue pea esohui ejjashahuabaqui meeji! —Jesosa poanaje—. Oe dejjaa emeshi meseya que quea quemo nee nee jo bana canaje jjonojajja oo pana, uva. Que peeyi canaje meija peeyi. Majoya que yiyesamajo equishipashajji iya canaje, mei cueehue iñaca canaje jjonojajja na quishipashajjeajji. Majoya mei iyasohua ao'ao majje peehuana canaje que jaahunajji quea huesha nee ojaya ebajji. Pea echacojji cuana iyaa canaje. Huohui canaje emeshi meseya: “¡Ecuea que jaahunacue! Jaahuana sosejje quiaje'yo oya jjonojajja quea huiso nee” poanaje. Majoya emeshi mese quea huesha poquinaje. ³⁴ Quijje jjonojajja jahuaajo emeshi meseya pea o chacosahuajji poani beca huoojea canaje que jaahunajji que, jjonojajja jjequiya. Que jaahunajji bañajji majje huohui canaje jama ba'a: “¡Che mo jjonojajja joya ecuea emeshi meseya pa cadojo'yahua, de!” poanaje.

³⁵ —Que jaahunajji cuana quea mimishi poanaje. Jjonojajja quia sa po ajja, joya emeshi meseya iya tepe mee. Jamajjea o chacosahuajji cuana iña canaje, cuiajea canaje, pea quecua canaje, pea jajahuejjajea canaje meiya. ³⁶ Emeshi meseya pea huoojea ca o'oyanaje huacuaya o chacosahuajji poani quea huiso pishana. Jamatii yahuajo jama acanaje que jaahunajji cuaa. Cuiajea ca o'oyanaje pea'ai. ³⁷ Quijje yejje nei oja bacua ejja oe nei huoojea canaje que jaahunajji baa: “E'e, ohuaya ecuea ebacua ejja shajja'ajja caje” poanaje emeshi mese. ³⁸ Cho, oja bacua ejja poeje ba majje jama poanaje ba'a: “Joya

emeshi meseja bacua eja poeje. Jiquio meshi quijje ojaya poaje, ejeajji mano'yaajo. ¡Cua'a, ejaquecuajeaqui oya eque mesena'yojji! Jamajjeya meshi esejaya tii poaje'yo, de" poanaje que jaahuanajji quea mimishi cuana.

³⁹—Jamajjeya aje oe ebacua eja iña canaje, quecuajea canaje, jeaqui canaje quea huesha nee, que jaahuanajji cuaa. Mahuiso esohui.

⁴⁰—Jamajjeya emeshi meseja poe o'oya majje Ꞥyajja acuae acaje'yo jiquio que jaahuana-jji quea mimishi cuana? —Jesosaa huohui'ajja canaje Jodio cuana.

⁴¹—Oya quea quene nee nee poaje'yo. Ma que jaahuanajji quea mimishi cuana quecuajea caje'yo, de. Que cuiña meequi caje'yo pea cuana, joya ojjaña jjonojjajja shejo jjasosequiaquijji cuana —acanae Jodio cuaa.

⁴²—E'e —Jesosa poanaje—. ¿A'a miquea eba Eyacuiñajjija esohui etehue'yo yahuaajo nei? jama ba'a:

“Oe equi yamajjana equi iyajji cajaa aca poa cuaa. Jamatii Eyacuiñajjija ma eyamajjana equi yamajjana quea ca'a nee nequi mee ca poa. Jamajoya ojjaña ojaya epeeji cuanaa Eyacuiñajjija bihuia cani”.

Jamaya yahuaajo nei tehue ca poa ejo; eya ma eyamajjana equi iyajji jayojja jama quea ca'a nee nee nequi —Jesosaa acanae.

⁴³—E'e, jiquio esohui eba meesahuajji jayojja jama Eyacuiñajjija acaje'yo —Jesosa poanaje—. Ohuaya yahuaajo nei miquiyanaya babaca ca'ya poa ojo echaco'yojji, onijje eba'e tiitii'yojji. Jjeya ca ca Eyacuiñajjija miquiyanaya, Jodio cuana, cajaa acaje'yo shajjama' jojoya. Pea cuana babaca caje'yo ojo echacojji, onijje eba'e tiitii'yojji pea'ai, joya e'e jojo nei ojo jashahuabaquiani.

⁴⁴—Jiquio ecua eyamajjana cajaa aca poa cuaa jjeya quea ca'a nee nequi jama eya miquianaaya cajaan anaje; jjeya ca ca iña quea ca'a nee eya nequi'yo. Ojjaña joya e ba jjima e cajaa amajje quea yeno poaje, de. E cajaa tiitii amajje ca ca quea nee nee po tiitii'e'yo —Jesosa poanaje.

⁴⁵Jesosaja esohui shajja'ajja majje Moisesija etehue'yo huohuijji cuana, Eyacuiñajji nijje emimijji etii cuana pea'ai quea quene nee poanaje: —¡De! Ecuanaajo oya mimiani, equi yamajjanajo pojjeama. Esey que jaahuanajji quea mimishi jayojja pea'ai ohuaya acani —poanaje Jodio cuana.

⁴⁶Jamajjeya Jesosa iña sa acanae ejeanobiaejajji. Jamatii iña jjima; quea mete poanaje. Ojjaña dejja echicha'yo nequica'yo cuaa Jesosa Eyacuiñajjija esohui huohuijji nei nei ba cani. Onajaya quea nahue nee nee Jesosa e'iñajji.

22

Ebacua ejaja ejjahuanacuijji ojaña ijia mee'ajja ca poa ejejajija
(Noca 14.15-24)

¹ Jamajjeya Jesosaa o poe o'oyajjijo pea esohui ejjashahuabaquijji huohui canaje Jodio cuana huasijje jama ba'a: ²—Eyacuiñajjija ojaña cuana huoojea'yojji poajo jamaya poaje: Oe emeshi meseja oja bacua ejjaja ejjahuanacuijji bobi quea huiso dahua mee canaje ojaya epeeji e'ijjajji nisho. ³ Ojjaña apoa poajo, o chacosahuajji huoojea canaje epeeji cuana iyaaa, bobi ijiajji. Cho, poe sa po ajja poanaje. ⁴ Jamajjeya emeshi meseja pea chacosahuajji cuana huoojea canaje. “¡Jamaya acue!” poanaje: “Epeeji, ¡poecuajicue oe! Ojjaña apoa. Ana'ai quea sei quecua ca'yonaje. ⁷ Ma shajja'ajja majje emeshi mese quea quene poanaje. Sohuinano cuana huoojea canaje dejja shajjama' iña. Quecuajeyo ca'yonaje; equi cuana dahuaajea canaje, sohuinano cuaa. ⁸ Majoya emeshi meseja o chacosahuajji iyaa canaje pea cuana: “Ojjaña apoa e'ijjajji ejjahuanacuijji. Pea cuana epeeji nisho poanaje, jamajjeya epeeji pojjeama. Cajaa. ⁹ ¡Poquicue! Quea huesha ba'e cuana iyaaquicue: — ¡Poecue emeshi meseja bacua ejjaja ejjahuanacuijji yasijje! ¡Bobi quea huiso ijiahuacue! —acue” emeshi mese poanaje.

⁵—Jamatii jashajja'ajjaqui ajja poanaje cuana. Poe ajja. Beca cuana que yasijje poquinaje; peaa aquiana quiaa poquinaje; ⁶ pea cuaa emeshi meseja echacosahuajji iña majje cuia canaje, quecua ca'yonaje. ⁷ Ma shajja'ajja majje emeshi mese quea quene poanaje. Sohuinano cuana huoojea canaje dejja shajjama' iña. Quecuajeyo ca'yonaje; equi cuana dahuaajea canaje, sohuinano cuaa. ⁸ Majoya emeshi meseja o chacosahuajji iyaa canaje pea cuana: “Ojjaña apoa e'ijjajji ejjahuanacuijji. Pea cuana epeeji nisho poanaje, jamajjeya epeeji pojjeama. Cajaa. ⁹ ¡Poquicue! Quea huesha ba'e cuana iyaaquicue: — ¡Poecue emeshi meseja bacua ejjaja ejjahuanacuijji yasijje! ¡Bobi quea huiso ijiahuacue! —acue” emeshi mese poanaje.

¹⁰—Jamajjeya poquinaje. Ojjaña cuana iyaa canaje; dejja quea pame, dejja quea mimishi cuanaya. Quea huiso poeyanaje. Dobiquinaje. Equi cuio canaje. Chama' pea e'anijji poanaje. ¹¹ Majoya emeshi meseja ojjaña cuana baa poeyanaje, ojjaña cuana nijje mimiya. Ba canaje oe dejja daqui jehuejji. ¹² “Epeeji, Ꞥapiojji acuae miya poeyanaje daqui quea jehuejji? ¡Jamaya pojjeama ecue bacua ejjaja ejjahuanacuijji yasijje epeeji!” poanaje. Saja'a jjima ma dejjaja. ¹³ Jamajjeya emeshi mese quea tecue poanaje. Iyaa canaje o

chacosahuajji: “¡Oya jeyo majje jeaquicue quea misi nee yasijje! Jomajo pa neineije'yo, ese' iijiyajjea caje'yo quea nee neejo” poanaje. Mahuiso ecuea esohui —Jesosa poanaje.

¹⁴—E'e, ojjaña cuana iyaa'ajja caje Eyacuiñajjiya. Jamatii oe pojji dobiquije'yo onijje eba'e tiitii'yoyji —Jesosaa ojjaña cuana acanaje. (E'e, Eyacuiñajjiya Jodio cuana iyaa coo canaje onijje eba'e'yoyji quea bihui nee. Jamatii shajjama' poanaje. Ojaya huoojea'yo quecuajea canaje. Jamajjeya Eyacuiñajjiya Jodio pojjeama iyaa canaje. Quea huiso poeyanaje. Ma dejja daqui jehue jayojja jama beca cuanaja mimishi cuijea'yo jjima. Jamajoya yeanuajya caje'yo quea nee nee epo'yoyji.)

Bejjo oe pojji quia cajji ba'e sosejje emeshi meseja yayji
(Macoso 12.13-17; Noca 20.20-26)

¹⁵ Jesosa mimije shajja'ajja majje Paniseo cuana quea quene poanaje: —Oya Jesosa jjashahuabaquani eseya epeejji nisho jayojja jama, de —poanaje.

Poqui majje ojee mimimiminaje: —Cua'a, Jesosa ejjadasiaquiqui; esohui quea camaja nee ejjahuhui'ajjaquiqui, ojaya yayja saja'ame ya'yoyji. Jamajjeya Moisesija etehue'yo jayojja jama mi saja'a cajo, cacuijajea meequi'yahua.

¹⁶ Jamajjeya Paniseo cuaa o shajja'ajjajji cuana, joya Enodeja esohui quea boti nee poani pea'ai huoojea canaje Jesosa que. Huohui'ajja mee canaje jama ba'a: —Esohui huohuijji, miyaya e'e jojo nei huohuiaña Eyacuiñajjiya ejjashahuabaqui'yoyji jama. Miya etii cuanajo jjashahuabaqui ajja; emeshi mese cuanajo pea'ai mete'ama. Jamajjeya quea ja'a nee huohuiaña. ¹⁷ E'e. Jamajjeya mo oe che huohuicue: ¿A'a bejjo quia cajji Shomano meshi mese Sesa bajjanija yayji? ¿A'a equiajji pojjeama esejaya pojja'a? ¿A'a cuae jja ma Sesaja meshijo ba'e sosejje quia cajji so'o? —acanaje cuaa.

¹⁸ Ma Jodio cuanaja ejjashahuabaquijji Jesosaja eba poanaje. Jamajjeya: —¡Miquianaya ca mi ca oe e dasiajji nisho cuana, epeejji nisho quea tai nee nee! ¿Apiojji nequiaa eya dasia sa aña? ¹⁹ ¡Bejjo mo huohui'ajjacue esodojjo! —poanaje.

²⁰ Jjequi canaje cuaa. Esodojjo ba majje huohui'ajja canaje Jesosaa: —¿Ae ecajja'yo jiquio? ¿Ae bajjani tehueme'ya?

²¹ —Emeshi mese ecajja'yo, Sesa bajjani —acanaje Jodio cuaa.
—E'e —poanaje Jesosa—. Jamajjeya ¡Sesaja bejjo quiaquicue ohua sa cajo! ¡Eyacuiñajji a'a pajea'yoyji; oya bihuicue, shajja'ajjacue pea'ai!

²² Jesosa shajja'ajja majje ojjaña cuana quea mete nee poanaje: —¡Quea jjashahuabaqui ja'a nee nee oya Jesosa! ¡Jjadasia meequi ajja!

Jamajjeya poquinaje, jeana ca'yonaje Paniseo cuaa.

¿A'a e'e jojo nei mano'yo majje shequije o'oya quijje? —huohui'ajja canaje cuaa Jesosa
(Macoso 12.18-27; Noca 20.27-40)

²³ Ma pojajajo tii beca Sanoseo cuana poeyanaje Jesosa huohui'ajjaa. Sanoseo cuana ajje oe jama poani ba'a: —Mano'yo majje jama tii tii; eshequi o'oyajji pojjeama quijje.

Jesosaja ca ca jama sohuhuojuime ajjima. Jamajjeya Jesosa huohui'ajja canaje Sanoseo cuaa; edasiajji nisho jama acanaje ba'a: ²⁴ —Esohui huohuijji, Moisesiya jama tehue ca poa yahuajo nei nei ba'a: “Dejja ejjahuanacui, bacuama' mano'yajo, oja chahuaa ehuanase equijjojea ani cahuana ca'yahua, oja o'ija bacua jea jayojja jama epojji”. ¿A'a e'e? ²⁵ Jamajjeya jama poso ba'a: Quea huiso edoe mese, me oejje pea beca nequia poa. E'o'i mese ebionei jjahuanacua poa eponajo. Mano'yonaje bacuama' tii. Oja chahuaa epona equijjojea ani huana ca o'oyanaje, bacuama' tii ani. ²⁶ Oya jayojja mano'yonaje bacuama' tii. Jamajjeya peaa echahua meseya huana ca o'oyanaje. Mano'yonaje bacuama' pea'ai. Jamaya ojjaña manoyonaje. ²⁷ Quijje ehuanase pea'ai manoyonaje. ²⁸ Jamajjeya shequi o'oya majje eyajo, ¿ajea ehuanase epona poaje, ache edoe meseja? Ojjaña echahua cuana huea'ajja'yo epo —Sanoseo cuaa acanaje.

²⁹ Jesosaa saja'a canaje jama ba'a: —Chojja. Jamaya pojjeama. Miquea ba jjima Eyacuiñajjiya esohui; oya quea ca'a nee nee miquea ba jjima pea'ai. ³⁰ E'e, shequi o'oya majje ejjahuanacui'yoyji pojjeama. Esohuidojojji eyajo ani jama poaje. ³¹ Cuanaya ¿a'a miquea ba jjima dejja cuana ojjaña mano'yo majje shequije o'oya? Jamajjeya Eyacuiñajjiya yahuajo nei esohui tehue mee ca poa miquiana jjabahueijaquijji. Jamaya poa ba'a: ³² “Eya ca ca iña Amajama jaahuanajji, Isaaca, Jacobo pea'ai jaahuanajji”. ¿A'a Eyacuiñajjiya emano'yo cuana meshijo e'ohuajea jaa jaahuana cani? Cho. Ojaya epeejji cuana eshe nequi, mano'yo majje shequi'yo pea'ai jaahuana cani Eyacuiñajjiya —Jesosaa acanaje.

³³ Jesosaja esohuijo ojjaña cuana quea bihui nee poanaje: —¡Quea pame nee ohuaya Jesosaa huohui cani! —poanaje cuana.

¡Eyacuiñajji quea jea nee acue, mi pejejo nequi cuana pea'ai!
(Macoso 12.28-34)

³⁴ Majoya Paniseo cuaa shajja'ajja canaje Jesosa quea jjashahuabaqui ja'a nee; Sanoseo cuana jdasiaquijji, esohui quea camaja nee ehuohui'ajjaquijji. ³⁵ Majoya Jesosa que poe o'oyanaje Paniseo cuana. Dasia'yohua nisho Moisesija etehue'yo huohuijjiya huohui'ajja canaje jama ba'a: ³⁶ —Esohui huohuijji, yahuajo Moisesiya tehue ca poa Eyacuiñajjiya esohui. ¿Ache esohui quea pame nee e'ajji?

³⁷ Jesosaa acanaje: —E'e, jamaya quea pame nee acue ba'a: “¡Eyacuiñajji miquea Emeshi Mese nei quea jea nee nee acue! Miquea huapa pojjeama cuana miquea quea jea; ¡quea jea nee neeya oe acue Eyacuiñajji! Jamajjeya ¡ojo jjashahuaba tiitiqicue!”

³⁸⁻³⁹ Jiquio ehuohui'yo quea pame nee. Pea oya jayoija quea pame nee jama ba'a: “¡Ojjaña pea cuana quea jea nee acue, miquea huapa pojjeama jama quea jea neeya oe acue!”

⁴⁰ Jamaya miya poajo miya Moisesija etehue'yo jama ba'e; Eyacuiñajjiya esohui huohuijji yahuajo nei ba'eja esohui jama ba'e pea'ai —Jesosa poanaje.

*Eyacuiñajjiya huoojea'yo deja jaahuanajji Quito
(Macoso 12.35-37; Noca 20.41-44)*

⁴¹ Jamajjeya ojjaña Paniseo cuana jjachichaquiajo oya cuana huohui'ajja canaje Jesosaa: ⁴² —¿Yajja huohuime acuae nequiaña Eyacuiñajjiya huoojea'yo deja jaahuanajji Quitojo? ¿Ache etiiquianaja osecua oya?

—Quito emeshi mese Dabija osecua, ma yahuajo ba'ya poaja —acanaje Paniseo cuaa.

⁴³ —Jamajjeya ¿yajjaje acuae Eyacuiñajjiya Edojoshahua Pameya emeshi mese Dabi jama amee ca poa yahuajo ba'a: “Eyacuiñajjiya huoojea'yo ojjaña jaahuanajji Quito ecuea Emeshi Mese nei?” Yahuajo nei Dabiya jama huohui ca poa pea'ai ba'a:

⁴⁴ “Eyacuiñajjiya ecuea Emeshi Mese Quito jama aca poa: —¡Enijje anioquecuc ebiane mijiije ojjaña cuana huoojea'yojji! Eyaya mi quecuajji nisho epo jeabichajea jeyo-jeyo'yo”.

Jamaya huohui ca poa yahuajo Dabiya ojo. ⁴⁵ E'e, Dabiya Eyacuiñajjiya huoojea'yo Quito aca poa “Ecuea Emeshi Mese”. Jamajjeya Quito Dabija Emeshi Mese nei poani. Jamatii oya Dabiya osecua pea'ai, de —Jesosaa acanaje—. Eya, Eyacuiñajjiya huoojea'yo, dejjaja jea pojjeama; Eyacuiñajjiya Bacua Eija. Jamajjeya eya ojjañaja Emeshi Mese nei.

⁴⁶ E'ese pame pose oya jjabaquiani onaja ebilhuajji: “E'e de, oya esohui huohuijji quea pame nee” epo meeji acani. Jamajjeya esohui etehue'yo quea quemo jjasapahuahuo iyaquiani, aa huahuo pea'ai ojjañaja ebajji. Daqui quea pame nee nee, quea ao nee huosho cani ojjañaja ebajji pea'ai. ⁶ Ojee ijjiya 'ijjianijo, emeshi mese pejejeo anioqueani ebione ijji sa poanijo. Jodioja equi ojee ejjachichaquijjiyo pea'ai ebione anioque sa poani Eyacuiñajjiya esohui huohuijji pejejeo, ojjaña nijje emimimimijji. “E'e, oya cuana Eyacuiñajjiya esohui huohuijji nei quea pame nee” epo meeji acani. ⁷ Ejojijije poquiani ojjaña aquiana quia cani yasijje anicuaa, pea cuaa jama bihuia cani ba'a: “Esohui huohuijji, miya quea pame nee nee.” Jamaya aje oe ojaya quea boti nee, jiquio Jodio etii cuanaja, esohui huohuijji quea pame nee pose jjabaquiani —Jesosa poanaje.

23

*—¡A'a Jodio esohui huohuijji jama ba'ejji! —Jesosa poanaje
(Macoso 12.38-40; Noca 11.37-54, 20.45-47)*

¹ Majoya Jesosaa ojjaña cuana, o shajja'ajjajji cuana pea'ai huohui canaje jama ba'a: ² —Moisesija etehue'yo huohuijji, Paniseo cuana pea'ai miquea esohui huohuijji. ³ Jamajjeya joya cuana shajja'ajjacue! ¡Ojaya esohui jayoija jama acue ojjaña! Jamatii oya cuana aje oe esohui jama ba'e ajja; quea mimishi. Jamajjeya ja'a o jayoija ba'ejji! —poanaje—. ⁴ E'e, jamaya poani ba'a: Dejjaa aquiana quea biquie abo mee cani pea dejja. Jamatii huanasohua sahua ajja, de, quea mimishiya jjejojo. O jayoija Jodio esohui huohuijjiya pea cuana ba'e meesahua ajja Eyacuiñajjiya etehue'yo jama —Jesosaa poanaje.

⁵ —Quea pame pose oya jjabaquiani onaja ebilhuajji: “E'e de, oya esohui huohuijji quea pame nee” epo meeji acani. Jamajjeya esohui etehue'yo quea quemo jjasapahuahuo iyaquiani, aa huahuo pea'ai ojjañaja ebajji. Daqui quea pame nee nee, quea ao nee huosho cani ojjañaja ebajji pea'ai. ⁶ Ojee ijjiya 'ijjianijo, emeshi mese pejejeo anioqueani ebione ijji sa poanijo. Jodioja equi ojee ejjachichaquijjiyo pea'ai ebione anioque sa poani Eyacuiñajjiya esohui huohuijji pejejeo, ojjaña nijje emimimimijji. “E'e, oya cuana Eyacuiñajjiya esohui huohuijji nei quea pame nee” epo meeji acani. ⁷ Ejojijije poquiani ojjaña aquiana quia cani yasijje anicuaa, pea cuaa jama bihuia cani ba'a: “Esohui huohuijji, miya quea pame nee nee.” Jamaya aje oe ojaya quea boti nee, jiquio Jodio etii cuanaja, esohui huohuijji quea pame nee pose jjabaquiani —Jesosa poanaje.

⁸ Jamajjeya o shajja'ajjajji cuana Jesosaa acanaje pea'ai jama ba'a: —¡A'a miquianaya o jayoija jama poji! Pea cuana a'a jjabihuia meequijji: “¡Miya esohui huohuijji quea pame nee nee!” a'a jjapo meequijji cuana. Cho. Miquea Esohui Huohuijji quea pame nee oe nei yani, miquea Emeshi Mese nei. Miquianaya ecuea epeeji cuana ca ca Eyacuiñajjiya ba cani pea epeeji jayoijaya. ⁹ Oe nei eyajo ani esejja Chii. Jamajjeya ¡esohui huohuijji oya jayoija “Esejaya Chii” a'a ajji! ¹⁰ Cuanaya Eyacuiñajjiya huoojea'yo ojjaña jaahuanajji, Quito miquiana huoojea'yojji nei nei. Jamajjeya pea cuana “ese huoojea'yojji nei” a'a jjapo

meequijji. ¹¹ E'e, jemeshi mese jayojja jama nequi sa poani ca ca pea cuana chacosahuacue!
¹² Jamajjeya joya emeshi mese poso jjabaquiani Eyacuiñajjiya emeshi mese pojjeama
 acaje'yo. Echacosahuajji jjabaquiani ca ca Eyacuiñajjiya emeshi mese jayojja po mee
 caje'yo —Jamaya acanaje Jesosaa o shajja'ajjajji cuana.

Jesosaa Jodio etii cuana tecuea canaje

¹³ Majoya Jesosaa Paniseo cuana, Moisesija etehue'yo huohuijji poani pea'ai jama
 tecueame acanaje ba'a: —Miquianaaya aje oe Moisesija etehue'yo huohuiaña, Jodioja es-
 ohui huohuijji poaniya pea'ai. Jamatii miya ca mi ca oe esohui huohuijji nisho, sijjepojji.
 E'e, miquianaya Eyacuiñajji nijje jjapeequi ajja. Pea cuana Eyacuiñajji nijje jjapeequi sa
 poani miyaya jjapeequipajea meeyaña, de. E'e, jiquio ecua esecue ca'a cani cuaa ona
 edobiqui poani jjejojo jama jayojja miquiaaya pea cuana dobiqum mee ajja eyahuasijje
 Eyacuiñajji nijje eba'e tiitii'yojji. Jamajoya miquianaya quea nee nee po mee caje'yo quijje,
 quea nee nee tii tii, de —Jesosa poanaje.

¹⁴ —E'e, miquianaya ca o e'ahuemanoja equi cuana jjesheaña sosema'. Majoya
 Eyacuiñajji nijje mimi nishoani quea huiso nee. Jamajoya Eyacuiñajjiya miquianaya cajaa
 acaje'yo. Quea nee nee po mee caje'yo tii tii —Jesosa poanaje.

¹⁵ —Jodioja esohui huohuijji cuana, Moisesija etehue'yo huohuijji cuana pea'ai,
 miquianaya aje oe esohui huohuijji nisho, peajja. Miquianaaya chaco neineiña; quea
 huesha poquiani pea'ai pea cuana Moisesija etehue'yo shajja'ajja meeya. Jamatii mi
 shajja'ajjajji cuana mi jayojja quea mimishi nee nee. Jamajoya oya cuana e'e jojo nei quea
 nee nee po mee caje'yo, mi jayojjaya —Jesosa poanaje.

¹⁶ —E'e, miquianajaya ehuohui quea quehuajo cojjama' jama poani. Cojjama' cuana
 pea cojjama' cuaa me iña majje mepejjejea cani jayojja. Ojjaña poquiquehuaje'yo —Jesosa
 poanaje —. Miquea ehuohui jama ba'a: “Eyacuiñajjiya equi nequianijo, ecuea ehuohui
 jama eyaya e'e jojo nei aje”. Pea cuana jama poani ba'a: “Chojja, jamaya mimi majje
 miquea ehuohui jama e'ajji pojjeama”. Jamaya huohui cani cuaa pea'ai ba'a: “Ma mei
 huo'o Eyacuiñajjiya equijo anijo, ecuea ehuohui'yo jayojja jama eyaya aje”. “E'e, jjamaya
 mimi majje miquea ehuohui jayojja jama e'e jojo nei acue!” pea cuana poani. Jamaya mimi
 quehuani miquianaya —Jesosa poanaje.

¹⁷ Oya cuana tecuea canaje jama pea'ai ba'a: —Chojja, de. Miquianaya jshahuaba
 quehuaquiani. Mei huo'o Eyacuiñajjiya equijo quea pame ani; Eyacuiñajjiya equi quea pame
 nee pea'ai. ¹⁸ Miquianajaya pea ehuohui quea quehua pea'ai jama ba'a: “Mei ehuaña
 huicha'a huicha'a pea mei biajje yani Eyacuiñajjiya equijo aquiana dahuajji, Eyacuiñajji
 bihuajji. Ma mei e'iya cuana nequianijo, eyaya ecuea ehuohui jayojja jama e'e jojo nei
 aje” amajje, dejja ojaya ehuohui jama e'ajji pojjeama, miquianaya poani. Jiquio jama
 poani ba'a: Aquiana mei e'iya biajje huana cani cuaa. Majoya jama mimiani ba'a: “Ma
 aquiana mei e'iya biajje yanijo, ecuea ehuohui jayojja jama eyaya aje”. “E'e, jjamaya mimi
 majje ca ca miquea ehuohui jayojja jama e'e jojo nei acue!” ¡Miquianaya jamaya mimi
 quehua'ani cuana! ¹⁹ ¡Ma ehuohui'yo cajaa! —Jesosa poanaje —. Mei e'iya quea pame
 nee; aquiana mei e'iya biajje ani quea pame pea'ai. Pea jayojjaya. ²⁰ Jamajjeya dejja mei
 e'iyajo mimianijo oya ojjaña aquiana mei e'iya biajjejo mimiani pea'ai. Pea jayojjaya poani.
 ¡Jamaya a'a mimijji ma aquiana cuana! —Jesosa poanaje. ²¹ —Miquianaya Eyacuiñajjiya
 equi yasijje mimiani cuana jama ba'a: “Eyaya ecuea ehuohui'yo jayojja jama e'e jojo nei aje
 Eyacuiñajjiya equi yanijo”. Jamaya aje oe miya mimiani Eyacuiñajjiyo, ma equijo ba'yanijo
 pea'ai. Jamajjeya ¡Eyacuiñajjiya equi yasijje a'a jama mimijji! ²² Pea cuana mimianijo
 eyahuasijje jama poani ba'a: “Eyajo Eyacuiñajjiya eba'ejji yanijo eyaya ecuea ehuohui'yo
 jayojja jama e'e jojo nei aje. Ecuea esohui e'e nei pojjeama jojjemo eya quea nee capoahua”.
 Jamaya amajje miya Eyacuiñajjiya eba'ejjiyo mimiani; “Eyacuiñajji eyajo aniya eya ba canijo,
 eyaya ecuea ehuohui'yo jayojja jama e'e jojo nei aje”. “Ecuea ehuohui'yo jayojja jama
 ajjima jojjemo eya quea nee po mee ca'yome” beshahua nei aña; oya jayojjaya. Jamajjeya
 ja'a jamaya mimijji Eyacuiñajjiyo; quea tai! —Jesosa poanaje.

²³ Majoya Jesosaa Moisesija etehue'yo huohuijji cuana, Paniseo cuana pea'ai jama
 tecueame acanaje ba'a: —Miquea aquiana bobi quea johua e'ajji equi pejejo pohuani.
 Tiijajo quiaña iye huiso Eyacuiñajjiya epojji, ojaya ehuohui'yo jayojja jama poani:

“Miquianajaya aquiana ipiacue; ome miji pea'ai, 10 oya jayojjaya, oe Eyacuiñajjiya epojji,
 pea me oejje ebeca pee pea'ai, 9 miquea epojji”.

Eyacuiñajji yahuaño nei jamaya poa. Jamaya miya poani. Quea pame. Jamatii de, Moisesija
 etehue'yojo quea ja'a jshahuaba tiitiqui ajja. Jamaya quea tai aña ba'a: Miya e'e jojo
 nei jshahuabaqui jjima, sijje poani, jshahuabaqui ajja aema' cuana ba'e meesahuajji.
 Eyacuiñajjiya esohui jayojja jama po tiitii ajja. Jamajjeya ¡Eyacuiñajjiya etehue'yo jama

ba'ecue! ¡Majoya Eyacuiñajji yasijje iye huiso quiacue ojjaña miquea aquiana pea'ai! — Jesosa poanaje.

²⁴ —Miquianaya cojjama' jama; jashahuabaqui ajja pea'ai. ¿A'a huashapa bobijo anidobiquiajo jeajea'aña, jamatii aquiana quea quemo anidobiquiajo ijjiájaña? Jamaya miya poani; ojjaña miquea aquiana quea biso pea'ai ipia'ajja majje iye huiso quiaña Eyacuiñajji epojji. Jamatii pea cuana ba'e meesahua ajja, de. Jamajoya Eyacuiñajjiya miquianaya cajaa acaje'yo; quea nee nee po mee caje'yo —Jesosa poanaje.

²⁵ —E'e Paniseo cuana, miquianaya Moisesija etehue'yo huohuijji pea'ai. Jamatii miquianaya ca ca oe esohui huohuijji nisho de, quea tai. ¿A'a caneco cueehue topo cani cuaa ena ishi jjimahuajo, jamatii eyiyedojojje quea ihui shacua jjima? Jamaya miya. Jjabaquiani quea pame jayojja. Jamatii quea jashahuabaqui tai nee; sii poani; epona, onaja aquiana jea baña pea'ai. ²⁶ Paniseo cuana, miquianaya aje oe quea jashahuabaqui quehua. Jamajjeya Eyacuiñajjiya miquianaya cajaa acaje'yo; quea nee nee po mee caje'yo, de. ¿A'a caneco yiyedojojje ebionei topo cani cuaa? Jamajjeya e'e jojo nei quea pame nee. ¡Caneco topo cani jayojja jama acue miquiaaya; ebionei jashahuabaqui tai pajea'yoque e'e jojo nei quea pame epojji! —Jesosa poanaje.

²⁷ —Paniseo cuana, Moisesija etehue'yo huohuijji pea'ai, miquianaya esohui huohuijji nisho de, quea mimishi. Emano mojea'yojji cuia'asha cani cuaa quea pame jayojja. Jamatii eyiyedojojje quea ihui, emano'yo sajaajji. ²⁸ Emano'yo mojea'yojji jayojja jama miquianaya cuana; quea pame jayojja ojjaña ba cani; jamatii quea jashahuabaqui tai. Shajjama', quea pame po nishoani pea'ai. Jamajoya Eyacuiñajjiya miquianaya cajaa acaje'yo; quea nee nee po mee caje'yo —Jesosa poanaje.

²⁹ —Moisesija etehue'yo huohuijji, Paniseo cuana pea'ai, miquianaya aje oe esohui huohuijji nisho, quea mase. Jamajjeya Eyacuiñajjiya miquianaya quea nee nee po mee caje'yo. E'e, miquianaya emano sajaajji mo'yaña, quea pame a'yaña ma Eyacuiñajjiya esohui huohuijji yahuajo mojea jaa. Esajaajji cuia'asha'aña quea pame nei Eyacuiñajjiya epeejji nei yahuajo emano'yo bihuia'yojji —Jesosa poanaje —. ³⁰ Sijje miya poani jama ba'a: “Yahuajo ecuanaja etiquiana cuana nijje eba'e'yo jojjemo ecuanaja ca ca oe Eyacuiñajjiya esohui huohuijji cuana ecuaajea'yojji pojjeama poqueaye. Chama' ecuanaja ejjashahuabaquijji etiquiana jama; ecuanaja ca ca pea” miquianaya poani —Jesosa poanaje—. ³¹ Chojja. Jamaya miquianaya po nishoani. Jamatii miquianajaya etiquiana jama Eyacuiñajjiya esohui huohuijji quecuajji nei nei pea'ai. ³² Jamajjeya o jayojja jama poani quiana; Eyacuiñajjiya huoojea'yo cuana cuiajea jeyoje'yo, de —Jesosa poanaje —. ³³ Miquianaya peyo quea se nee nee jama de, quea mase nee nee, esohui huohuijji quecuajji, miquea etiquiana cuana jama. Jamajjeya ¿a'a acuae nequiana Eyacuiñajjiyo jjanequiquehuaquijji? Chojja. E'e jojo nei ohuaya miya huohui caje'yo: “¡Poquicue nequiana! ¡Cuaqui yasijje dobiquicue! ¡Quea mase nee nee aje oe nequiana!” —Jesosa poanaje.

³⁴ —Jamajjeya eyaya miquiana huasijje huoojeaña Eyacuiñajjiya esohui huohuijji, esohui bameesahuajji, dejja quea jashahuabaqui ja'a nee pea'ai. Jamatii beca cuana cuiajeaje'yo; pea cuana acui ecueata'apejo me cacajeaje'yo; pea cuana cuiasejjajeaje'yo miquea equi ojee ejjachichaquijji yasijje; pea cuana ocuaneaje'yo ojjaña cuiñajji yasijje equecua'yojji, miquianaaya —Jesosa poanaje —. ³⁵ E'e Jodio cuana, miquea etiquiana cuaa dejja mimishi'ama quecuajea ca'yonaje quea huiso. Eyacuiñajjiya etehue'yo ebionei tehue ca poa jama ba'a: Abeni cuiahuejjajea ca poa miquea etiquiana Cainiya. Oya jayojja quea huiso cuiajea ca poa cuaa. Quijje nei Eyacuiñajjiya etehue'yo quijje yejje nei tehue ca poa oja sohui huohuijji Sacania, Benequaja bacua ejja cuiahuejjajea ca poa cuaa Eyacuiñajjiya equijo, aquiana dahuaajeajji pejejo —Jesosa poanaje—. ³⁶ Jamajjeya eyaya miya e'e jojo nei huohuaña: Jjeya nei apoa poaje; Eyacuiñajjiya miquiana cuana quea nee nee po mee caje'yo ojjaña miquea etiquianaja mimishi cuanaajo, o jayojja jama miquianaya poani jojya.

Jamaya Jesosaa Jodio cuana tecuea canaje quea mimishi nee jojya.

*Jesosa quea yeno poanaje ojjaña Jenosanenajo ba'e cuanaajo
(Noca 13.34-35)*

³⁷ Majoya Jesosa quea yeno nee nee ojjaña cuana Jenosanenajo ba'e cuanaajo jama poanaje ba'a: —Jodio cuana Jenosanenajo ba'e, miquiana cuana ecuea quea jea nee nee. Jamajjeya eya miquianaya quea yeno poani. E'e, miquianaaya aje oe Eyacuiñajjiya esohui huohuijji quecuajea'ya poa; ojaya huoojea'yo jajahuejjajea'ya poa meiya pea'ai. ¡Bacue oe! Cachina enaeseya ebacua huojje cani ejaahuanajji jama jayojja eyaya miquiana iyaa sa neineaña e que, ejaahuanajji. Jamatii enijje jjapeequi sa po ajja. Cajaa aña jama ba'a: “Chojja, Eyacuiñajjiya miya huoojea jjima ojjaña jaahuanajji”. ³⁸ Jamajjeya ¡bacue!

—Jesosa poanaje —, Eyacuiñajjiya miqúanaya cajaa acaje'yo. Jeajea caje'yo ejaahuana majajji pojjeama. ³⁹ E'e, eya jiquiojo tii nequi tii ajja. Jamajjeya eya miqúanajaya ba o'oya jjiima poaje e poe o'oya jjimahuajo. Quijje e poe o'oyajo ca nequiana ca oe jama poaje ba'a: “Jesosa miya Eyacuiñajjiya huoojea'yo ojjaña jaahuanajji. ¡Eyacuiñajjiya miya cajaanhuana cahua quea pame!” poaje miqúanaya quijje —Jesosa poanaje Jenosanenajo ba'e cuana nijje.

24

—*Eyacuiñajjiya equi cajiñaje caje'yo cuaa mei cuana —Jesosa poanaje*
(*Macoso 13.1-2; Noca 21.5-6*)

¹ Jesosa Eyacuiñajjiya equijo ani poquinaje. Poquijjeya o shajja'ajjajji cuaa oya huohui canaje: —¡Bacue Eyacuiñajjiya equi! Quea quemó, quea pame mei cuana.

² —E'e. ¿A'a jiquio equi quea pame nee baña? E'e jojo nei quijje mei cuana cajiñaje caje'yo cuaa. Chama'yo tii acaje'yo —Jesosa poanaje.

Dejja cuana quea mase nee poaje quijje
(*Macoso 13.3-13; Noca 21.7-19*)

³ Quijje Jesosa eyiyo huasijje Onimo acui yiye yasijje jaasohuaquinaje o shajja'ajjajji cuana nijje. Anioquenaje. Pea dejja poqui jjiima. Jamajjeya o shajja'ajjajji cuaa huohui'ajja canaje: —Jesosa, ¿ache shono acuae mei cuana cajiñaje caje'yo cuaa so'o? ¿Ae acuae poaje mi epoe o'oya cuahuajje? ¿A'ya ba majje ecuanaja eba poaje miya poeje o'oya, meshi chama'yo tii epojjiyo?

⁴ Jesosaa saja'a canaje: —¡Jashahuaba neineiquicue onajaya miya edasijji pojjeama!
⁵ Quea huiso sijajjepojji poeje, ecuea ehoojea'yo pojjeama: “Eyacuiñajjiya eya huoojea canaje, eya ca ca iña ojjaña jaahuanajji” sijajje poaje. Quea huiso dasia caje'yo. ⁶ “Ojjaña jjaquecuauquiani ojjaña meshi yasijje” huohui caje peayaa pea'ai. Jamatii ja'a quea mete poji! Jamaya poaje. Jamatii apoa pojjeama, oe po ajja jjiima poaje so'o —Jesosa poanaje —. ⁷ E'e, jjaquecuauqui caje'yo cuana ojjaña meshi yasijje, ojjaña cuiñajji yasijje pea'ai. Quea huiso emanomeejjiya mano mee caje'yo; bobi yasijje po majje manojje'yo quea huiso; meshi huehuahuehuaje ojjaña meshi yasijje pea'ai —Jesosa poanaje—. ⁸ E'e, jiquio ecua epona bacua cuayaje ebionei jipashineijje nee'ani; quijje quea nee nee. Jamaya poaje e poe o'oya jjimahuajo. Quea nee pishana po majje quea nee nee poaje ojjaña cuana —Jesosa poanaje.

⁹ —Majoya pea cuaa miqúanaya iña majje jeanobiajea caje'yo ecuiasejjajeajji, eque-cua'yojji pea'ai. Enijje jjapeequianijo miqúanaya boti'ama nei poaje ojjaña meshijo ba'e cuanaja. ¹⁰ Jamajjeya quea huiso enijje jjapeepajeaqui'yo majje mimishi aje o'oya. Peaja epeejjiya boti'ama poaje'yo —Jesosa poanaje—. Jamajjeya dejja mase iña mee caje'yo eque-cua'yojji. ¹¹ Quea huiso pea cuana poeje: “Eya Eyacuiñajjiya esohui huohuijji” sijajje poaje. Cho, Eyacuiñajjiya pojjeama. Jamatii, ecuea epeejji dasia caje'yo quea huiso. Poquiquehua mee caje'yo eshahua nijje. ¹² Dejja cuana shajjama' jayojja po majje emeshi mese cuana shajja'ajja sa po ajja poaje'yo. Jamajjeya pea cuana boti'ama poaje'yo. ¹³ Jamatii e poe o'oya jjimahuajo, enijje jjapeequi pajea'yo ajja tii ca ca Eyacuiñajji nijje ba'e tiitijje'yo, enijje pea'ai —Jesosa poanaje.

¹⁴ —Eya poeje o'oya. Eyacuiñajji nijje ojjaña cuanaja Emeshi Mese nei poaje'yo. Ma huohui'yo quea pame nee ojjaña meshi cuana huasijje huohui caje, ojjaña dejja cuana huasijje pea'ai ojjaña eshajja'ajjajji. Majoya e poe o'oyajo ojjaña oe poaje —Jesosa poanaje.

Aquiana quea tai nee ojjaña quea mete nee nee epo meejji
(*Macoso 13.14-23; Noca 21.20-24, 17.22-24*)

¹⁵ —Eyacuiñajjiya esohui huohuijji Dañeniya yahuajo nei huohui ca poa jama ba'a: “Quijje Eyacuiñajjiya equijo nequije aquiana quea tai nee nee, ojjaña quea mete nee nee epo meejji”.

¹⁶ Jamajjeya ma ba majje ca ca, ma pojajjo tii ojjaña Jodio meshijo ba'e capoquicuajiahua eyiyo cuana huasijje. (Jiquio ehohui'yojo cajiñahuabaquiahua quea ja'a epojji.) ¹⁷ ¡Joya equi huisa białje chacochoacoani a'a equi yasijje dobiquinanajji aquiana cuana biohua edojojji! ¹⁸ ¡Joya quejo chacochoacoqui pea'ai a'a equi yasijje poquinanajji daqui moojo! Eyiyo huasijje poquicuajji ajja aje oe mano'yo chana'. ¹⁹ Epona cuana o'ejji, bacua sho'ijji pea'ai quea yeno poaje; quea camaja equehua poquicuajji poaje. ²⁰ Jamajjeya Eyacuiñajji nijje mimicue jama ba'a: “Eyacuiñajji, jeenojo pojjeama capoahua, epojja ejomishocajjiyo pojjeama pea'ai ecuanaja epojji eyiyo cuana huasijje!” acue —Jesosa poanaje—. ²¹ E'e, ma pojja cuanajo ojjaña quea mete nee nee, quea yeno nee nee poaje. Jamaya pojjeama

yahuajo, meshi pana majje, jjeya nei pea'ai, quijje pea'ai; quea mete pishana, quea yeno pishana. Ma poija cuanajo ca ca quea nee nee poaje dejja cuana —Jesosa poanaje.

²²—Eyacuiñajjiya oe poiji cahuime quea camaja po mee caje'yo; oe poiji cahuime epo'yo jojjemo ojjaña cuana man'o'yome. Ojaya epeeji jaahuana canijo, ojaya quea nahue nee emano jeyoje'yo'yojji, Eyacuiñajjiya oe poiji cahuijo quea camaja po mee caje'yo, quea cahui huiso pojjeama —Jesosa poanaje.

²³—Ma poija cuanajo a'a jashajja'ajjaquijji ona siajje poajo jama ba'a: “¡Bacue oe, Eyacuiñajjiya huoojea'yo Quito jiquiacua poe'yonaje!” jama poso, ¡a'a shajja'ajja'ajji! “¡Bacue oe, Quito jocuama pa poe'yonaje!” jama onaa acajje ¡a'a jashajja'ajjaquijji, a'a poquijji! ²⁴E'e, Eyacuiñajjiya huoojea'yo ojjaña jaahuanajji e jayoja nisho, Eyacuiñajjiya esohui huohuijji nisho pea'ai poeje quea huiso nee nee. Ohuaya ma pea dejjaa ajjima acani acaje'yo Eyacuiñajjiya epeeji cuana dasia'yojji nisho. Dasia caje'yo quea huiso nee; ecuea epeeji nei pea'ai beshahua nei eya pajea mee caje'yo o jayoja epojji; chojja, jjadasia meequi ajja. ²⁵E shajja'ajja'ajji cuana, eyaya miya huohuinaje quijje oya poeje ejadasiaqui'yojji. ¡A'a oya cuana shajja'ajja'ajji! —Jesosa poanaje.

²⁶—Jamajjeya a'a jashajja'ajjaquijji onaa miya siajje acajje jama ba'a: “¡Baquicue oe, Quito jocuama huenihuenei aijo nequi!” jama acajje ¡a'a baquijji! “¡Bacue oe, Quito equi equacuayijji dojjoje eja'aniquehuaqui ani!” acajje ¡a'a jashajja'ajjaquijji; a'a o que dobiqijji! ²⁷⁻²⁸Cho, shajja'ajja'ajji acue sohui: ¿A'a joya e'ihuajaa huasijje be'o cuana cuabesajebeje? E'e jojo nei miqianaaya eya baje joya ecua be'o e'ihu yasiije oqueani jama. Cuanaya pojjeje nei nei poajo jeaja'a cani eyajo; ojjaña ba caje quea huesha nee. Jamaya eya ojjaña Edoe Mese poeje o'oya, pojjeje jama. Jeaja'ajeajebeje. Eya ojjaña ba caje'yo. Quehuajje pojjeama eya poeje'yo —Jesosa poanaje.

Jesosa ojjañaja Edoe Mese poeje o'oya
(Macoso 13.24-37; Noca 21.25-28)

²⁹—E'e, quea camaja nee nee po majje majoya eshequi quea apo poaje'yo. Ba'i jiji'yo ajja poaje'yo. Majameta cuana jicajjaqui'yo majje jijijijioque'yo ojjaña pea'ai. Majameta nequijji cuana huehuahuehuaje'yo janobajjima nei pea'ai.

³⁰—Majoya miqianaaya baje aquiana eyajo. Ma ba majje huohuije jama ba'a: “¡E'e jojo nei Jesosa Quito ojjañaja Edoe Mese jjeyahua nei poeje o'oya, de!” poaje.

—Jamajjeya ojjaña cuana ojjaña meshijo ba'e quea mete nee nee poaje'yo. Ecuea epeeji pojjeama siasiaje jama ba'a: “Coya aje oe ¿ae shai poeje ba'a? ¡Bacue, ojjañaja Edoe Mese Jesosa Quito poeje o'oya bo biajje! Oya oe nei quea ca'a nee nee, quea sohui poja nee nee. Quea jeajahua nee nee pea'ai. Eshuidojojji quea ca'a nee onijje poeje quea huiso nee nee” poaje cuana —Jesosa poanaje—. ³¹Eshuidojojji quea ca'aa aquiana eshe'ana ai jayoja mia cajo, eyaya eshuidojojji cuana huoojea'yo biacua, macua huasijje pea'ai ojjaña ecuea epeeji cuana jjequiya —Jesosa poanaje.

Eshui acuijo, iquenajo, huohui canaje Jesosaa
(Macoso 13.18; Noca 21.29-33)

³²Jesosaa huohui canaje pea esohui jama ba'a: —E'e, eyaya miqianaya esohui ej-jashahuabaqui meejji huohuije iquena acuijo. Eseyaya meshijo acui iña'yani ba majje eseya jama poani ba'a: “E'e nei, nayaja po'yonaje. Jjeya eshequiaya po pajea'yonaje”. ³³—Jamaya eshequi, ba'i quea misi, majameta eyajo jijijijioque'ani ba majje pea'ai quea bihui jashahuabaquicue jama ba'a: “E'e, jjeya nei apoa poaje. ¡jjeyahua nei esejaya Emeshi Mese nei Jesosa Quito poeje o'oya!”

³⁴—E'e jojo nei ojjaña ma poija cuanajo ba'e cuana mano jeyoje'yo'yo jjimahuajo ojjaña apoa poaje'yo; eya ojjañaja Emeshi Mese oe nequije'yo. ³⁵E'e, aquiana eyajo nequi chama' poaje'yo; ojjaña meshi chama'yo tii poaje'yo pea'ai. Jamatii ecuea esohui oe epo'yojji pojjeama; shajja'ajja tiiti caje'yo cuaa —Jesosa poanaje—. ³⁶¿Ache shono shai jamaya poaje, ojjaña apoa poaje'yo? Dejja cuanaja ba jjima; eshuidojojji cuanaja ba jjima pea'ai; ecuea ehuohuijji pojjeama. Ecue Chiija eba ojaye nei. Ohuaye nei huohui caje'yo ojjaña apoa epo'yojji —Jesosa poanaje.

¡Jesosa poe o'oyajji jja'ishoa'ajjaqui anicue!
(Noca 17.26-30, 34-36)

³⁷—Yahuajo nei nei dejja Noe bajjani nequia poa. Noe enequiahuaajo ojjaña cuana quea mimishi poa. Quijje eya ojjañaja Edoe Mese poe o'oyajo, ojjaña cuana quea mimishi poaje o'oya, yahuajo nei nei jayojjaya poaje o'oya. ³⁸Yahuajo ojjaña meshi ohua jjimahuajo jamatii dejja cuana ijia'ijjia ania poa. Ishi'ishi nequia poa pea'ai. Jjahuanaqui nequia poa. Jamaya poanaje Noe bishe ai yasijje dobiqii jjimahuajo. ³⁹Ona ojjaña jashahuabaqui jjima anijo ena quea quemo poa. Jjayehuequia poa; johui oquea poa; hui'i ca'ya poa.

Jamaya poaje o'oya eya ojjañaja Edoe Mese epoe o'oya cuahuajo: jashahuabaquije cuana jama ba'a: "Jamatii ecuana quea pame nequi". Ojjañaja ba jima meshi ojjaña tii chama'yo tii poaje'yo. ⁴⁰ E'e, e poe o'oyajo beca dejja nequije quejo. Oe dojosohuaqui caje'yo; pea jea canaje'yo. ⁴¹ Beca epona quecuapasha pashaqui, oe dojosohuaqui caje'yo; pea jea canaje'yo, Eyacuiñajiji —Jesosa poanaje—. ⁴² ¡Jamajjeya jashahuabaqui tiitii anicue! Ache pojjajo Emeshi Meseja epoe o'oyajji miquea ebajji pojjeama. ⁴³ ¡Iquio jama poaje ba'a: Equi mese siipojji ache shono poeje poso jjabaquiani. Ojaya eba jojjemo ohuaya ishoa ca'anime, equi jaahuanajiji. ⁴⁴ Eya miquianajaya Edoe Mese ache pojjajo miquiana que poeje o'oya ebajo ese. Jamajjeya ¡jja'ishoa'ajjaqui anicue! —Jesosa poanaje.

Pea echacomeeji quea pame nee poanaje
(Noca 12.41-48)

⁴⁵ —Ecuea esohui shajja'ajjacue echacomeeji cuanajo jama ba'a: Equi ai meseya poqui jjimahuaa echacomeeji iyaa canaje. Huoojea canaje: "¡Ecuea equi cuiñacue, miyaya! ¡Ecuea pea echacoji cuana oe bobiacue pea'ai! Quijje eya poeje o'oya".

⁴⁶ —Equi mese poe'yo majje ojjaña quea pame nee ba caña'ya poa; quea bhui nee poña'ya poa. Jamajjeya echacomeeji quea bhui nee poanaje. ⁴⁷ Jamajjeya equi meseya echacomeeji quea pame huoojea caje'yo ojjaña ojaya aqui ana cuiñaa. ⁴⁸ Pea echacomeeji siipojji ca ca jashahuaba taquiani jama ba'a: "Equi mese poquinaje quea huesha nee. Quijje nei nei poeje'yo". ⁴⁹ Quea tecueya jjejojo ohuaya echacoji cuana cuia cani. Pea cuana nijje ishi'ishiani, huooani. Apoa pojjeama nequi. ⁵⁰ Equi mese ache pojjajo epoeje'yo poso acani. Jamajjeya equi mese quehua poeje'yo. ⁵¹ Ojaya equi cuiñajji poani ehoo jaa baña'yo majje tecuea caña'yo. Jeacuayajea caña'yo ojjaña quea mimishi poani nijje. Jomajo quea nee nee poaje'yo tii tii; ese' ¡jjiayajjea caje'yo quea neeje —Jesosa poanaje —. ¡Iquio ecua equi meseya ojaya equi cuiñajji shajjama' tecueajea majje jeacuayajea caña'yonaje jayojja jamaya eyaya aje'yo ojjaña ejo ishoa'ajja, poe o'oya majje —Jesosa poanaje.

25

Epona sho'i cuana poquinaje pea epona sho'i jahuacaequi baa

¹ —¡Pea esohui shajja'ajjacue Eyacuiñajji ojjañaja Emeshi Mese oe nei poajejo! ¡Iquio jayojja jama poaje ba'a: Epona sho'i ahuema'ani ome miji pea'ai huisome, 10 poa. Ma jahuacaequi baa cuaquijji dojo canaje. ² Me oeje epona jashahuabaquije cuana huohui'ajja canaje jama ba'a: "¡Esei mo quiacue! Esei ecuanaja oe poanaje. Cuaquijji ecuanaja jiji'yo ajja".

³ —Epona sho'i cuana quea cojja jee mano po majje cahuinaje. Shacuima' nequi mecashono poeyanaje. ⁴ Jamajjeya mecashono pea equi yasijje poe'yo majje taaanaje; "Shacuima' nequi aje poe'yonaje. ¡Cua'a, baquicue!"

⁵ —Taaaje shajja'ajja majje ojjaña epona sho'i cuana shequinaje. Ejijiji hui jeacuaya canaje. ⁶ Epona sho'i jashahuabaqui jima cuaa ma ejjashahuabaqui cuana huohui'ajja canaje jama ba'a: "¡Esei mo quiacue! Esei ecuanaja oe poanaje. Cuaquijji ecuanaja jiji'yo ajja".

⁷ —Epona sho'i ojaya ejjashahuabaqui'yo cuaa saja'a canaje: "Miquea esei chama' eshojji. Ecuea ca ca ¡iquio che oe pojji. ¡Poquicue miya ma esei quia caqui yasijje; jocuama jjequicue!"

⁸ —Jocuama o poquiahuaajo, shacuima' nequi poeyanaje. Ojjaña dobiqiu'yonaje, jaya apoa epo, o jahuacaequi equi yasijje. Dobiqiu' majje esecue ca'a canaje. ⁹ Jaja esei jjequiya poquiya cuana poe'yo majje esecue eca'a nequi ba caña'yonaje. Taaa aninaje: "¡Che esecue ca'apejocue!"

¹⁰ —Shacuima eyiye dojjojo nequiya saja'a canaje: "Chojja, ecuea miya ba jima" acanaje. Jamaya poanaje —Jesosa poanaje.

¹¹ —E'e —Jesosa poanaje oja epoeji cuana nijje—, ¡jamajjeya jja'ishoa'ajjaqui ani tiitiicue pea'ai! Ecuea epoe o'oyajji miquea ebajji pojjeama.

Esohui ejjeshejji
(Noca 19.11-27)

¹² Jesosaa pea esohui eba meesahuajji huohui canaje: —Jjeya eyaya pea esohui huohuije, eya ojjañaja Emeshi Mese poe o'oyajo —Jesosa poanaje—. Jaja poaje ba'a: Oe dejjaa, emeshi meseya quea huesha poqui jjimahuajo iyaa canaje ojaya echacoji cuana, ojjaña ojaya aqui ana jaahuana meejji. ¹³ Majoya ohuaya oe echacoji quea jashahuabaqui ja'a huasijje esodojo me oeje, 5 huisome quea nahue nee nee quia canaje aqui ana jjeshejji, quea huiso bejo chichajji. Pea echacoji quea jashahuabaqui ja'a pishana huasijje beca

esodojjo quea nahue nee nee quia canaje aquiana jjeshejji, quea huiso bejjo chichajji. Pea echacojji beshahua nei jshahuabaqui ajja huasijje oe esodojjo quea nahue nee nee quia canaje bejjo chichajji nisho. Esodojjo quia majje emeshi mese poquinaje.

¹⁶ —Echacojji quea jshahuabaqui ja'aa ojaya esodojjo me oejje huisome quea nahue quia canaje aquiana jjeshejji. Majoya chicha canaje ome pea'ai huisome. ¹⁷ Oya jay-ojjaya pea echacojjiya ojaya beca esodojjo quea nahue quia canaje aquiana jjeshejji. Majoya ohuaya chicha canaje ebeca pee pea'ai huisome esodojjo. ¹⁸ Pea echacojji aje oe jshahuabaqui ajja poanaje. Ojaya emeshi meseja esodojjo oe nei quehuaaje nei ohua canaje.

¹⁹ —Quijje nei emeshi mese poe o'oyanaje ojaya echacojji cuana huasijje. Jshahuabaquinaje jama ba'a: “¿Ae shai poani so'o echacojji cuana ecuea esodojjo?” Jamajjeya echacojji cuana iyaa majje huohui'ajja canaje: “¿Ache huiso esodojjo yani so'o jjeja?”

²⁰ —Echacojji esodojjo me oejje huisome jaahuanajji ojaya emeshi mese nijje jama poanaje ba'a: “Yahuajo nei miyaya me oejje esodojjo quia'yonaje eya. Ma'aje miquea. Pea me oejje huisomeya miquea poanaje. Ma'aje pea me oejje ecue chicha” poanaje echacojji.

²¹ —Ojaya emeshi mese onijje quea bihui nee poanaje jama ba'a: “E'e de, miya echacojji quea pame nee. Yahuajo eyaya quianaje me oejje esodojjo. Miyaya maya quea pame nee chichanaje. Jamajjeya jjeja eyaya miya ecuea aquiana quea huiso jaahuana meeje'yo. Cua'a, jenijje anicue quea bihui nee!” emeshi mese poanaje quea bei nee.

²² —Majoya pea echacojji poeyanaje, ma beca esodojjo yahuajo quia canaje. Ma echacojji jama poanaje ba'a: “Emeshi mese, yahuajo nei miquea esodojjo becanejjijji pea'ai quia'yonaje eya. Ma'aje miquea beca esodojjo. Pea esodojjo becanejjijji pea'ai ecue chicha yenaje. Ma'aje ecue chicha esodojjo pea'ai” echacojji poanaje.

²³ —Emeshi mese onijje quea bei miminaje jama ba'a: “E'e, de, miya echacojji quea pame nee. Yahuajo eyaya miya quianaje esodojjo becanejjijji pea'ai. Miyaya pea chichanaje quea pame nee. Jamajjeya jjeja eyaya miya ecuea aquiana quea huiso jaahuana meeje'yo. Cua'a, jenijje anicue quea bihui nee!” emeshi mese poanaje.

²⁴ —Majoya pea echacojji poeyanaje, ma esodojjo oe nei quia canaje. Emeshi mese huohui canaje ohuaya jama ba'a: “Emeshi mese, ecuea eba miya quenequene cuajiani. Miyaya miquea echacojji chaco meeaña sosema'. Quea dejja taija jjejojo miquea aquiana quea huiso yani” jama posoya acanaje echacojjiya. ²⁵ “Jamajjeya eya quea mete poanaje. Miquea esodojjo emoquehua aninaje onaa esii ca poani jjejojo. Ma'aje miquea bejjo, ma miyaya quianaje huisome tiiaa” echacojji poanaje.

²⁶ —Ojaya emeshi meseya oya acanaje: “Miya echacojji quea mimishi, quea huea. Miya quea jshahuabaqui tai poanaje jama ba'a: —Ecuea echaco sosema' poanaje. Ecuea emeshi mese quea dejja tai. Jamajjeya quea huiso ojaya aquiana yani —miya poanaje. Sijaje miya poani. Miquea ejshahuaba taiquijji jayojja jama eyaya miya aje. ²⁷ ¿Apiojji acuae miyaya ecuea ejjeshejji mi quianaje bejjo jaajji yasijje? Quijje pishana ohuaya eya quea huiso quia ca'yo queaye”.

²⁸ —Emeshi mese ma echacojji nijje quea tecue poanijo pea cuana huoojea canaje jama ba'a: “Echacojji quea hueaa jjejojo ecuea esodojjo mi chicha canaje. ¡Maya esodojjo oe nei jjeshe majje quia'yocue pea echacojji huea'ama huasijje, maya ecuea esodojjo me oejje ecue quia poanaje yasijje quiacue! ²⁹ E'e, joya huea'ama poani aquiana cuana quia caje cuaa. Dejja aema' quea hueaja aquiana ojjaña jjeshe'yo majje dojo caje'yo cuaa. ³⁰ Jiquio echacojji cajaa ajeaje'yo; quea huea coma. Enijje oya enequijji pojjeama. Huoojeacuayajeaje'yo. Oya quea yeno nee nee poaje'yo. Quea nee nee pea'ai poaje'yo” emeshi mese poanaje —jamaya Jesosaa acanaje.

E'e, jiquio Jesosaja ejshahuabaqui'yojji jama ba'a: Poe o'oya majje Jesosaa ojaya epeeji quea jshahuabaqui ja'a quea pame ba'e mee caje'yo onijje eyajo. Onijje ona huoojea'yojji po mee caje'yo. Pea echacojji quea huea ba majje ca ca cajaa acaje'yo. Quea nee nee poaje'yo oya cuana.

Esohui Jesosa Quitoja ojjañaja Edoe Meseja epoe o'oyajjijo

³¹ Jesosaa huohui canaje pea'ai: —Eya poe o'oya majje quea ca'a poaje'yo. Ojjaña huoojea'yojji poaje'yo. Ojjaña esohuidojojji cuana enijje poeje'yo. Majoya eya ba'esohuaqui'yo majje eyahuasijje, jucuaema eya nequije'yo, Emeshi Mese nei. ³² Ojjaña cuana e que jjachichaqui meeje'yo. Majoya eyaya ñajjajja cuiñajji jayojja jama aje jama ba'a: Ñajjajja cuiñajjiya ñajjajja cuana, chivo cuana nequiashiña cani. ³³ Ñajjajja oo pana nequiashiña cani ebianeijje. Chivo ca ca huapa nequia acani, shanijje. ³⁴ Ñajjajja cuiñajji jayojja jama eyaya, ojjañaja Emeshi Meseja ojjaña dejja cuana nequishiñaje'yo. Ecuea epeeji quea pame nee ebianeijje nequiae'yo. Oya cuana aje'yo jama ba'a: “Miquianaya ecue Chijja bacua cuana

e'e jojo nei poanaje, ojaya huapa pojjeama. Jamajjeya onijje nequi tiitiije'yo. Eyacuñajji jamaya jashahuabaqui'ya poa yahuajo nei nei, meshi pana jjimahuajo. ³⁵ Jamaya poaje'yo jjeya miqúanajo, miya quea pame nee nee poanajejo. E'e, yahuajo eya quea shoe poajo, eya bobí quianaje miyaya. Eya quea naba taja poajo, ena quianaje miyaya. Eya miqúanajaya ba jjima poanaje. Jamatíi miquea equi yasijje dobiqúi meenaje. ³⁶ Eya daquima' poajo, miqúanaya daqui huosho meenaje. E emanojaajo, ejeanobiajaajo pea'ai, miqúanaya poeyanaje enijje jjapeequiya" jamaya eyaya aje'yo —Jesosa poanaje.

³⁷ —Majoya dejja pame cuaa eya huohui'ajja caje jama ba'a: "¿Ache shono acuae ecuaaya miya bobianaje, miya quea shoe poanajejo? ¿Ache shono ena quianaje miya quea naba taja poanajejo? ³⁸ ¿A'a miya ecuanaja equi yasijje dobi meenaje? ¿A'a daqui huosho meenaje miya daquimajo? ¿Ache shono shai ecuaaya jamaya anaje? ³⁹ Mi emanojaajo, ejeanobiajaajo pea'ai, ¿a'a ecuaa mi que poeyanaje? ¿Ache shono acuae jja jama ecuaaya mi anaje so'0?" Jamaya dejja pame cuaa quijje huohui'ajja caje eya eyajo.

⁴⁰ —Jamajjeya eyaya, Emeshi Mese neiya saja'aje'yo quijje eyajo jama ba'a: "Miyaya ecuea huapa pojjeama aema' yahuajo jaahuananajejo, eya jaahuananaje. Jamajjeya ecuea eba miqúanaya ecuea epeeji e'e jojo nei poanaje. Ecuea ejjashahuabaqui'yoyji jayojja jama ca ca miyaya a'yonaje".

⁴¹ —Mayoya eyaya, Emeshi Mese neiya dejja tai cuana shanijje nequi tecueaje'yo jama ba'a: "¡Poquicue miya! Cajaa'yo ca mi ca ecua. Edosiquiana etii Satanasa, eshahua cuana pea'ai cuaqui yasijje poquije'yo. Miya cuana pea'ai anije'yo cuaquijo tii. ⁴² Yahuajo eya quea shoe, bobia jjima poanaje miquea. Eya quea naba taja, ena quia jjima poanaje. ⁴³ Eya miquea eba pojjeama, miquea equi yasijje dobi mee jjima poanaje. Eya daquima', daqui huosho mee jjima poanaje miquea. E emanojaajo, ejeanobiajaajo pea'ai miya poe jjima poanaje e jaahuanaa" jamaya eyaya aje dejja mimishi cuana —Jesosa poanaje.

⁴⁴ —Majoya dejja mimishi cuaa eya huohui'ajja caje jama ba'a: "¿Ache shono acuae miya bobia jjima apoa? ¿Ena cuana quia jjima apoa? ¿A'a ecuanaya miya ecuanaja equi yasijje dobi mee jjima apoa? ¿A'a daquimajo, ecuanaya daqui huosho mee jjima apoa? ¿A'a mi emanojaajo, ejeanobiajaajo pea'ai, a'a miya ecuanaja jaahuana jjima apoa? ¿Ache shono shai, de?" dejja mimishi cuaa huohui'ajja caje —Jesosa poanaje—. ⁴⁵ Majoya eyaya, Emeshi Mese neiya saja'aje'yo jama ba'a: "Ecuea huapa pojjeama cuanaje jaahuana jjima. Jamajjeya miqúanaya eya cajaa a'yonaje pea'ai".

⁴⁶ —Majoya eyaya, Emeshi Mese neiya dejja quea mimishi cuana quea huesha nee huoojeaje'yo cuaqui yasijje edobiqui'yoyji. Quea nee nee po tiitiije'yo. Dejja pame cuana ebianeijje nequi ca ca ba'e tiitii meje'yo Eyacuñajji nijje —jamaya huohui canaje Jesosaa.

26

Jodio etii cuana jashahuabaquinaje Jesosa quecua'yoyji

(*Macoso 14.1-2; Noca 22.1-2; Huani 11.45-53*)

¹ Majoya Jesosaa o shajja'ajjaji cuana jjabahuejjaqui mee canaje. Pea esohui huohui canaje jama ba'a: ² —Quijje pishana, becanejjijji pea'ai cahuime po majje, Jodio cuana jashahuabaquije o'oya etiiquianaja bacua cuana yahuajo Ejitojo mano'yo jjima poajo. Jamajjeya ojee ijja'ijjiaje o'oya quea bei nee. E'e, yahuajo nei nei Ejito meshijo ani Jodioja ebacua eja cuia'yo jjima aca poa esohuidojojjiya. Ma shejo ijja jjimahuajo Jodio cuaa eya iña majje dejja quea mase yasijje quia caje'yo equecua'yoyji. Acui ecueata'apeejo mee caca majje ba'ehuanasohuajea caje'yo —Jesosa poanaje.

³ Majoya Eyacuñajji nijje emimijji etii cuana, Jodio dejja jaahuanajji cuana pea'ai ojee jjachichaquinaje Eyacuñajji nijje emimijji etiija equi aijo, Caipa bajjanija equijo. ⁴ Caipa jashahuaba taiquinaje pea cuana huoojeajji Jesosa iñajji, quijje equecua'yoyji. ⁵ Jodio etii cuana ojee miminaje jama ba'a: —¡Jesosa quehua neijje iñacue ojjaña Jodio cuana jjachichaqui jjimahuajo, ojee ijja'ijjia jjimahuajo! ¡Oya iñacue jjeyahua nei, de! Quijje pishana ojjaña ojee ijja'ijjia anijo, ecuanajaya Jesosa e'iñajji pojjeama. Chojja. Ojjaña Jodio cuana quea quene nee nee ecuaa nijje po chana', Jesosa onajaya quea nahue nee equecua mee'yoyji. Quea shajjaquijjo po chana' pea'ai —jamaya acanaje Jodio etii cuaa.

Jesosa Betaniajo ani sapa sha canaje shiyeshiyeya eponaa

(*Macoso 14.3-9; Huani 12.1-8*)

⁶ Jesosa Betaniajo aninaje dejja Simoni bajjanija equijo. Yahuajo nei Simoni quea mano nee nee batata epo'yo poa, ma dejja cuaa jjajeaqui mee'yo jjima acani. Jesosaa oya yahuajo huaquia mee ca'yonaje, jjajeaqui mee ca'yonaje. Simonija equijo Jesosa e'anioque aninaje. Ijja'ijjia aninaje bobí ijja'ijji pejejo. ⁷ Jesosa ijja'ijjia anijo, oe epona poe'yonaje o que. Ohuaya tahuoo quea nahue nee shiyeshiye ye canaje Jesosa huojja shajji. Huojja sha canaje. ⁸ Ba majje Jesosa shajja'ajjaji cuaa epona tecuea canaje: —¿Apiojji acuae miyaya

shiyeshiyeya shaña so'o? ⁹ ¿Sha jima yajjijo poso ca mi ca oe shiyeshiye dojo meenaje esodojjo quea huiso sosejje? E'e, aema' cuana huasijje esodojjo equiajji poso —Jesosa shajja'ajjajji cuana poanaje.

¹⁰ Jesosaa oya cuana shajja'ajja majje huohui canaje: —¿Apiojji acuaeya epona tecueaña so'o? E'e, eya ohuaya huojja sha canaje. Jamaya quea pame nee. ¹¹ Aema' cuana minijje po tiitijje'yo. ¡Oya cuana jaahuana'yocue quijje pea'ai! Eya ca ca nequi tiitii ajja minijje. ¹² Eya huojja sha cajo epona jshashahuabaquinaje jama ba'a: “Jesosa mano'yo jjimahuajo eyaya oya huojja shaña shiyeshiyeya, onaja mojea jjimahuá shaña” poanaje epona —Jesosaa acanaje—. ¹³ Jamajjeya quijje ojaña meshijo ecuea esohui huohui caje. Jiquio eponajo huohui caje pea'ai jama ba'a: “Oe eponaa Jesosa huojja sha ca poa shiyeshiyeya, quea jeajojo”. Jiquio epona pajeya'yo ajja tii tii, e'e jojo nei —jamaya Jesosaa acanaje.

Jodasaa onaya iña meesahua canaje Jesosa
(Macoso 14.10-11; Noca 22.3-6)

¹⁴ Yaninaje quea huiso Jesosa shajja'ajjajji cuana, 12. Oe nei Jodasa Isicanote bajjani poquinaje Eyacuiñajji nijje emimijji etii cuana huasijje. ¹⁵ Miminaje jama ba'a: —Eyaya miya Jesosa iña mee sahuaje. ¿Ache sose huiso acuae mo ya oe sosequijje'yo so'o?

¹⁶ Onaaya saja'a canaje jama ba'a: —Quea huiso, 30 esodojjo quea nahue nee sosequijje'yo miya.

Jamajjeya Jodasa jshashahuaba neinei qui aninaje achajja iña meeme aje so'o cuana: —Caba'ajjaquisahua —poanaje.

Jesosaa o shajja'ajjajji cuana bobi ijia mee canaje
(Macoso 14.12-25; Noca 22.7-23; Huani 13.21-30; 1 Conitio 11.23-25)

¹⁷ Jodio cuana quea bihui ojee ijia'ijjianaje yohua shejo ba'a esohuidojojji yahuaajo nei etiikianaja bacua cuana cuia'yo jima ñajajja na' esecuejo ecuipepa ba majje shejo. Pahu quea ca'a eshejje meejji chama'ijia ca poa. Ebione epojja e'ijia'ijjianajji, Jesosa que poe majje o shajja'ajjajji cuaa huohui'ajja canaje jama ba'a: —Jesosa, ¿ache equijo acuae seya pahu ca'a ijiaje so'o? ¡Ecuana huoojeacue aquiana iyajea, miqiana ishoajji!

¹⁸ Jesosaa huohui canaje jama ba'a: —¡Poquicue miya cuiñajji yasijje! ¡Jomajo ecuea epejji baquicue! Onijje mimicue jama ba'a: “Ecuana sohui huohuijji jama poanaje ba'a: —E mano'yajo aje apoa poaje. Miquea equijo eyaya e shajja'ajjajji cuana nijjeya pahu ca'a ijiaje'yo, esohuidojojji etiikianaja bacua ejja cuana cuia'yo jima poa shejo” acue —Jesosaa huohui canaje.

¹⁹ Jamajjeya o shajja'ajjajji cuana ojaya ehoojea'yo jayojjaya jama poanaje. Bobi iyajea canaje pahu ca'a ijiajji.

²⁰ Majoya sinecua neiyo Jesosa o shajja'ajjajji cuana nijje anioquene bobi ijiajji pejjejo ijia'ijjiaa. ²¹ Ojee ijia'ijjia'anijo Jesosa jama poanaje ba'a: —E'e jojo nei jiquiojo ani oe deija poquije ona jjequije e iña'yojji. Ohuaya eya huohui caje cuana.

²² Eshajja'ajjajji cuana quea yeno nee nee poanaje. Pea mimiajo pea poanaje jama ba'a: —Ecuea Emeshi Mese, eya ca ca o jayojja pojjeama, e'e jojo nei.

Jamaya ojaña miminaje. ²³ Majoya Jesosa onijje miminaje jama ba'a: —Oe dejjaa e shajja'ajjajjiya joya enijje pahu shapeshi po'aniya eya onaya cuana iña mee caje'yo. ²⁴ E'e, yahuaajo nei Eyacuiñajji esohui tehuejji cuaa esohui tehue ca poa jama ba'a: “Quijje oe dejjaa Eyacuiñajji huoojea'yo ojaña jaahuanajji onaya cuana iña meesahua caje'yo equecua'yojji”. Jamajjeya ma deja quijje quea yeno poaje. Jshashahuabaquije jama ba'a: “¿Apiojji shai eya ecue naeya mejo ca poa? Eya ca ca nequi sa po ajja. Ecuea ejshashuaba taiquijjijo mano'yo sa poani” oya poaje. Quijje oya quea nee nee po tiitijje'yo —Jesosa poanaje.

²⁵ Majoya Jodasa Jesosa nijje miminaje jama ba'a: —Emeshi Mese, eya ca ca o jayojja pojjeama. Eyaya miya onaya e'ña meesahuajji pojjeama —poanaje.

Jesosa onijje miminaje: —E'e, Jodasa, miya jama quea tai poaje, e'e jojo nei —Jesosa poanaje.

²⁶ Majoya ojee ijia'ijjia'anijo tii Jesosaa pahu ca'a jjeshe canaje. Eyacuiñajji bihuia majje, pahu mijisisi majje quia canaje o shajja'ajjajji cuana. Jama huohuime acanaje Jesosaa ba'a: —¡Ijiaacue! Jiquio ecuea eyami —poanaje.

²⁷ Pahu ijia majje caneco jjeshe canaje, Jesosaa. Eyacuiñajji bihuia majje quia canaje ojaña o shajja'ajjajji cuana. —¡Ishicue! Jiquio ecuea ena'. ²⁸ Ecuea ena' cuayaquijajo eya mano'yo. Jamajjeya eyaya Eyacuiñajji esohui eyacua jayojjaya aje. E'e, ojaña ecuea epeejji mimishi cuana cuijeaje'yo. ²⁹ Jjeya eyaya jiquio jjonojajja na, uva na e'ishi o'oyajji pojjeama miqiana nijje; eya mano'yo. Quijje nei poe o'oya majje eyaya jiquio ishije o'oya miqiana nijje. E'e, eya poe o'oyajo ecue Chiya eya ojaña huoojea'yojji po mee caje'yo. Ojaña eya shajja'ajja caje'yo —jamaya Jesosaa acanaje.

*Jesosa miminaje Peno nije**(Macoso 14.26-31; Noca 22.31-34; Huani 13.36-38)*³⁰ Majoya ojee sohuicuaya majje poquinaje eyiyo huasijje Onimo yiye yasijje.³¹ Majoya Jesosa o shajja'ajjajji cuana nije miminaje jama ba'a: —Jiquio mecajje ojjaña miqúanaya enijje jjapeequi pajeaje'yo. E'e, yahuajo Eyacuiñajji esohui tehuejji cuaa tehue ca poa ejo: Eya ñajjajja cuiñajji jayojja jama poaje. E mano'yajo ecuea epeeji cuana ñajjajja cuana jayojja jama poaje; jjaeajaajeaquinanaje'yo. Etehue'yo yahuajo nei nei jama poa ba'a:“Quijje eyaya ñajjajja cuiñajji jaahuana neinei ajja. Jamajjeya onaaya oya cuia caje'yo. Ñajjajja cuiñajji chamajo, ñajjajja cuana jjaeajaajeaquinanaje'yo”. Jamaya aca poa yahuajo nei nei —Jesosa poanaje —. ³² Jamatii, shequi o'oya majje eya poquije Janinea meshi yasijje. Jomajo aje mi poeyajo ishoañaquije —Jesosa poanaje.³³ Penohua Jesosa jama acanaje ba'a: —E'e pojja'a pea cuana minijje jjapee titiiquiy'yo ajja. Eya ca a pea jayojja jama pojjeama. Eya jjapee titiiquije'yo minijje —Peno poanaje.³⁴ Jesosaa Peno jama acanaje ba'a: —Eyaya e'e jojo nei miya huohuiaña Peno, jiquio mecajje tii cachina yahue pea beca peejjima taaame po jjimahuajo, pea beca peejjima huohui'ajjame amajje miya ejo poaje jama ba'a: “Chojja, ¡ecuea Jesosa ba jjima nei nei!” miyaya saja'ame aje quea meteya jjejojo —Jesosaa Peno acanaje.³⁵ —Chojja, Jesosa —Peno poanaje—. E'e pojja'a eya minijje jjapeequianijo, pea cuaa eya cuiajea caje'yo. Jamatii ¡ecuea ca mi ca epajea'yoyji pojjeama!

Oya jayojja pea cuaa jama acanaje pea'ai ba'a: —E'e Jesosa, ¡ecuanajaya ca mi ca epajea'yoyji pojjeama tii!

*Jetesemani quejo Jesosa miminaje oja Chii nije**(Macoso 14.32-42; Noca 22.39-46)*³⁶ Majoya Jesosa o shajja'ajjajji cuana nije Jetesemani que yasijje poquinaje. Jesosa jama poanaje ba'a: —¡Anioquec jiquio tii! Jocuama eya poquije ecue Chii nije mimiya.³⁷ Jesosaa Peno, Huani, Satiaco pea'ai dojo canaje jocuama, ma Semeneoja bacua ejja cuana bajjani Huani, Satiaco pea'ai. Jesosa jjashahuabaquinaje quea yeno nee nee.³⁸ Jamajjeya onijje jama poanaje ba'a: —Eya quea yeno nee nee, emano ca'yoyji jayojja. ¡Anioquec enijje; a'a cahuijji! —Jesosa poanaje.³⁹ Jesosa cuama pishana ani poqui majje ecui'oshajjajo nequinaje. Oja Chii nije miminaje jama ba'a: —Ecue Chii, miquea ejjashahuabaqui'yoyji jayojja jama aje'yo eyaya. Miyaya eya huoojeanaje dejjaja mimishi cuanajo mano'yohua. Quea camaja nee nee ejo. ¿A'a miyaya che onaaya eya quecua mee'yo jjima aje so'o? ¿A'a onaaya eya iña mee'yo jjima aje'yo? Jamatii ¡miquea ejjashahuabaqui'yoyji jayojja jama acue! ¡Ecuea ejjashahuabaqui'yoyji jayojja jama a'a ajji! —Jesosa jamaya poanaje.⁴⁰ Majoya oya poqui o'oyanaje o shajja'ajjajji cuana que. Ba cañaqui'yonaje cahuijaa. Tecue'ama Peno nije miminaje jama ba'a: —¿A'a mi cahuijaa? ¿A'a che enijje cahui jima nequi jjima so'o? ⁴¹ ¡A'a cahuijji! ¡Eyacuiñajji nije mimi majamajacue! Jamajjeya pea cuaa miya quea mimishi epo mee'yoyji pojjeama. E'e, miqúanaya enijje jjapeequi sa poani e'e jojo nei. Jamatii miya ca'a'ama; quea mimishi poaje o'oya pojja'a —Jesosa poanaje.⁴² Majoya Jesosa poqui o'oyanaje jocuama pishana oja Chii nije mimi o'oyaa. Mimi o'oyanaje jama ba'a: —Ecue Chii, eya ojjaña mimishijo mano'yajo ajjajo, ¿a'a onajaya mimishi ecuijea'yoyji pojjeama poaje'yo? Jamajjeya ¡miquea ejjashahuabaqui'yoyji jayojja jama acue! —Jesosa poanaje.⁴³ Oja Chii nije mimi'yo majje Jesosa poqui o'oyanaje o shajja'ajjajji cuana que. Oya cuana quea cojja jee mano poanaje; cahui o'oyanaje. Jamatii Jesosaa onijje mimi jjima; shequi mee'yo jjima acanaje. ⁴⁴ Ona jeana o'oya majje jocuama pishana poqui o'oyanaje Jesosa, oja Chii nije mimi o'oyaa. Oya jayojja mimi o'oyame poanaje. ⁴⁵ Mimi o'oya majje poe o'oyanaje o shajja'ajjajji cuana que. Onijje mimi o'oyanaje: —¿A'a mi cahuijaa tii? ¿Jomishocajaa pojja'a ca mi ca oe? ¡Jeyahua nei dejjaa eya onaya iña meesahua caje'yo. ⁴⁶ ¡Cua'a, jjeya nei ecuea epeeji nisho poeje'yo! Joya aje poeje ba'a.*Jesosa iña canaje**(Macoso 14.43-50; Noca 22.47-53; Huani 18.2-11)*⁴⁷ Jesosa mimianijo tii, Jodasa o que poeyanaje, ma eshajja'ajjajji cuana sohuihuohui poequi yasijje. Oya aje oe Jesosaja epeeji pea'ai poanaje; pea 11 nije nequinaje tii. Quea huiso nee nee dejja nije Jodasa poeyanaje; yohuajji poeyanaje acuijji, baajji, mejeji pea'ai poeyanaje. Jodio etii cuaa, Eyacuiñajji nije emimijji etiya pea'ai ojjaña huoojea canaje Jesosa iña. ⁴⁸ Jodasaa, Jesosa e'iña meejiya yahuajo jama huohuime aca poa ba'a: —¡Bacue oe! Eyaya oe dejja ba majje cuiapashi nishoje. ¡Majoya oe miqúanaya iñaacue!

⁴⁹ Jamajjeya Jodasa Jesosa que jjanequichipiquinaje: —¡A'a mi ecuea Emeshi Mese nei jiquio! —amajje cuiapashi nisho canaje.

⁵⁰ Jesosaa acanaje: —Ecuea epeeji Jodasa, ¿ajeo ami poeyanaje? —Jesosa poanaje.

Pea dejja cuaa ba majje, Jesosa que poe majje iña canaje edojoji. ⁵¹ Jesosa iña cajo, oja epeejiya onijje nequiya baa iña canaje. Onaja sapa jajapojojeaji nisho shajja jajasejja canaje, Eyacuiñajji nijje emimijji etiija echacoji poanija eshajja.

⁵² —Chojja. ¡A'a jja oe jajajji! —Jesosaa oya huohui canaje —. ¡Baa oe ejee yasijje nequianobia'yocue! Ojjaña jjajajaquiani manojeyo yacua ca'yajje. ⁵³ ¿A'a miquea eba pojjeama eyaya ecue Chii huohui jojjemo ohuaya esohuidojoji ache huiso nei nei huoojja came jjeyahua nei, e jaahuanaa? ⁵⁴ Jamatii eya jama po ajja. E'e, yahuaajo nei Eyacuiñajjija esohui etehue'yo jama tehuee ejo aca poa ba'a: “Onaaya iña mee majje dojo caje emano mee'yojji”. Jamaya ejo yahuaajo nei tehue ca poa. Jamaya eya acaje'yo cuaa jjeja —Jesosa poanaje.

⁵⁵ Jamajjeya Jesosaa ojjaña dejja ejjachichaqui'yo nequi yasijje huohui canaje: —¿Apiojji miya poeyanaje baajji, acuijji, mejeji pea'ai e iña? ¿A'a cuae jja iña siipoji so'o? Ojjaña pojjaajo eya ojjaña nijje esohui huohuijji po nequinaje Eyacuiñajjija equijo. Jamatii eya miqüianajaya iña jjima poanaje. ¿Apiojji miqüianaya mecajje poeyanaje e iña? ⁵⁶ Jamatii jamaya nequiana poani. Miqüianaaya ca mi ca oe Eyacuiñajjija esohui huohuijji etehue'yo yahuaajo nei nei miqüianajo jayojja jama quea tai aña.

Majoya o shajja'ajajji cuana cuajicujinananaaje; Jesosa jeajea canananaje.

Jodio etiya Jesosa cuia mee canaje

(Macoso 14.53-65; Noca 22.54-55, 63-71; Huani 18.12-14, 19-24)

⁵⁷ Jamajjeya joya Jesosa iñajji cuaa oya dojo canaje Eyacuiñajji nijje emimijji etiija equi yasijje, Caipaja equi yasijje. Jocuama Jodio cuana jjachichaquinaje, Jodio etii cuana, Moisesija etehue'yo huohuijji poani pea'ai. ⁵⁸ Penohua ca ca equijje aca poquinaje Jesosa onaa dojo caje. Caipaja equi yasijje Peno nequiñaquinaje. Dobiquinaje epeeyi nequi yasijje, sohoinana cuana nijje anioquenaje ae onaa Jesosa acaje ebajji.

⁵⁹ Eyacuiñajji nijje emimijji etii, ojjaña Jodio etii cuana, Jodio esohui huohuijji poani pea'aiya ojee mimimimijje Jesosajo, ojjaña ejjachichaqui nequiya o quecua'yo sa acani. Jamajjeya sa'ajja canaje dejja cuana Jesosa huohuijji nisho, Shomano emeshi mese Pinato bajjani yasijje dojo majje Jesosa huohuijji nisho: —Jesosa ca ca jama acanaje ba'a —sijje yajji.

⁶⁰ Quea huiso dejjaa Jesosa sijje acanaje. Jamatii peaa sijje'a, peaa sijje'a acanaje Jesosajo. Chama' beca oya jayojja mimime epojji Jesosa mano mee'yojji. ⁶¹ Quijje yejje nei beca dejja poeyanaje e'e jojo nei jayojja emimijji. Jama poanaje ba'a: —Eyaya oya shajja'ajjanaje. Jama poanaje Jesosa ba'a: “Eyaya Eyacuiñajjija equi jeabichajeaje'yo. Jeabichajeaje'yo majje pea ejo iyaje'yo pea beca peejjima cahuime”.

⁶² Ma shajja'ajja majje Eyacuiñajji nijje emimijji etiya nequisohua majje Jesosa huohui'ajja canaje: —¿A'a pa miya jama poanaje? ¿Jesosa, a'a acuaeya dejja cuana miyaya saja'aje'yo so'o?

Jamatii Jesosa jjamimisaja'aqui ajja poanaje.

⁶³ Jamajjeya Eyacuiñajji nijje emimijji etiya huohui neinei canaje: —¡Eyacuiñajji eshe nequi tiya eseya ba canijo, ecuana huohuicue e'e nei! ¿A'a acuae miya Eyacuiñajjija Bacua Ejja nei, oja huoojja'yo ojjaña jaahuanajji? ¡Huohuicue mo oe!

⁶⁴ Jamajjeya Jesosaa huohui canaje: —E'e, joya ecua miya mimiani jayojjaya eya. Cuanaya eyaya miya e'e nei huohuaña: Quijje miyaya eya baje'yo ecue Chii nijje ebianeijje ani. Oya quea ca'a nee nee enequi tii tii. Eya miqüianaaya baje pea'ai poeje o'oya; bo biajje poeje'yo —Jesosa poanaje.

⁶⁵ Shajja'ajja majje Jodio etii quea quene nee nee poanaje. Quea quene nee nee po majje ojaya daqui, oja huosho ba'e daqui isajea canaje. Jodio dejjaa jamaya oja daqui isajea cani quea quene po majje. Ojjaña cuana huohui canaje jama ba'a: —De, ipea dejja a'a iyaajji Jesosa huohuijji! Jamatii. ¡Oya Jesosa mimiqui Eyacuiñajjija Bacua Ejja miame! ¿A'a acuae miqüiaaya shajja'ajjanaje oja sohui? Jamajjeya ¿yajja acuae seya aje so'o, de, Jesosa?

⁶⁶ —¡Oya oe manojee mee'yocue; quea tai ca esohui acanaje! —jamaya acanaje Jodio dejja cuaa, Jesosa Eyacuiñajjija Bacua Ejja pojjeama posojo.

⁶⁷ Majoya aje oe Jodio dejjaa Jesosa cojja cuichojea canaje. Ejjachichaqui nequiya cuia canaje pea'ai emeya. ⁶⁸ Cuia majje huohui'ajja canaje: —¡Miyaya Eyacuiñajjija huoojja nei jjabajji majje jja ca oe huohui pocue! ¿Aya acuae mi cuia canaje so'o? —acanjje cuaa.

Penohua sijje acanaje Jesosa oja ba jjima nisho acanaje

(Macoso 14.66-72; Noca 22.56-62; Huani 18.15-18, 25-27)

⁶⁹ Ojjaña cuaa napa caqui Penohua ba canaje Jesosa; esecuejo sohuinano pejejo e'anioque aniya ba ca'aninaje. Oe echacojjiya ahue'ma'aniya Peno ba majje huohui'ajja canaje: —¡Miya ca jja mi ca oe Jesosa nijje aninaje Janinea meshijo!

Eponaa huohui cajje ojjaña cuaa Peno baja canaje. Jamajje Peno metenaje. Jama saja'ame acanaje ba'a: ⁷⁰ —¡Chojja, ecuea oya ba jjima! ¿Ajeo acuae mi mimiani? —Peno siajje poanaje. ⁷¹ Majoya Peno epeeyijo nequi cuayaquinaje quea mete jjejojo. Pea epona echacojjiya Peno ba canaje esecuejo nequi. Ohuaya ojjaña dejja cuana huohui canaje: —E'e jojo nei oya Jesosa nijje aninaje, ma Nasanenajo ba'e nijje —poanaje.

⁷² —Chojja, ecuea oya ba jjima nei nei. Eyacuiñajjiya eba eya e'e jojo nei mimiani —Penohua saja'a canaje.

⁷³ Quijje pishana beca cuana Peno que ojee nequi jjanequichipiquinaje. Jama poanaje ba'a: —E'e nei miya Jesusaja epeeji pea'ai pea cuana nijje. Jamaya miquea emimi, pea Janinea meshijo ba'e jayojja jama miya mimiani, de —poanaje.

⁷⁴ Ojaya esohui shajja'ajja majje Peno quea mete nee nee poanaje; ona nijje mimijajinaje: —¡Siajje miya poani! Jiquio dejja ecuea ba jjima. Eya e'e jojo nei pojjeama poani jojjemo Eyacuiñajjiya eya mano mee ca'yome —Peno poanaje. Jamatii Peno siajje poanaje.

Peno jamaya poajo, cachina yahue taaanaje. ⁷⁵ Cachina taaajo Penohua shahuaba ca'yonaje ma Jesusaa oma mecajje o jama acanaje jama ba'a: —Peno, cachina yahue taaa jjimahuajo miyaya eya ba jjima nei nei nisho aje'yo, ebeca pee peejjima huohuime aje'yo —jamaya Jesusaa Peno acanaje.

Jamajjeya jjashahuabaqui majje Peno quea yeno nee nee poanaje; pa neinei poqui'yonaje Jesosa ba jjima nisho epo jjejojo.

27

Jesosa emeshi mese Pinato huasijje dojo canaje

(Macoso 15.1; Noca 23.1-2; Huani 18.28-32)

¹ Mecajjeahua ojjaña Jodio etii cuana, Eyacuiñajji nijje emimijji etii cuana ojee miminaje Jesusajo: —¿Achajja amajje acuae seya Jesosa quecua meeje'yo so'o? Cua'a, ¡ejjaquecua meequiqui! —poanaje.

² Jamajjeya Jesosa me jeyo majje dojo canaje Shomano emeshi mese Pinato bajjani yasijje.

Jodasa jjanaayisibijeaqui'yonaje Jesosa quecua mee'yo majje quea yeno jjejojo

(Hecho 1.18-19)

³ Jamajjeya Jodasa, ma Jesosa iña meesahuajji epo Jesosa quecua caje'yo ba majje quea yeno nee nee poanaje. Poquicuajinaje Jodio etii yasijje, Eyacuiñajji nijje emimijji etii yasijje pea'ai. ⁴ Huohui cañaquinaje: —Eya Jesosa iña mee majje quea mimishi poanaje; oya ca ca Jesosa mase'ama nei nei poanaje, mimishi'ama nei. ¡Ma'aje miquea esodojjo, 30, ma miyaya eya quianaje Jesosa iña meesahua sosejje!

—E'e pojja'a, de. E'e jamatii, Jesosa caquecua jaja caha —Jodio etiiya saja'a canaje—. Miquea mimishijo ca jja mi ca jjashahuabaquiani, de —poanaje.

⁵ Jamajjeya Jodasa esodojjo meshi yasijje huojjojeaje canaje. Pa poquinaje ebio huasijje jjanaayisibijeaqui'yohua. Mano'yonaje. Chama'yo tii Jodasa po'yonaje.

⁶ Jodio cuaa aje oe esodojjo meshijo ani chicha canaje: —¿Yajja acuae jja seya jiquio esodojjo aje so'o? Jesosa sosequia'yojji ya ca coma, de. Eyacuiñajjiya equi yasijje iya sa po ajja. Jamaya pojjeama eseyaya aña —poanaje.

⁷ Jamajjeya mimimimi majje meshimisi iñabajjijji meshi, Apaneno meshi jjeshe canaje emano ohuajejji, Jodio pojjeama ohuajejji, ma 30 esodojjo sosejje jjeshe canaje. ⁸ Jjeya ca ca yohua bajjani ba'a ma ena' cuayaquinaje meshi bajjani'yo, Jesusaja ena' cuayaquinaje.

⁹⁻¹⁰ E'e, yahuajo nei nei Eyacuiñajjiya esohui huohuijji Jenemiaa tehue ca poa jama ba'a: “Ecuea Emeshi Meseya eya huohui canaje: —¡Ma 30 esodojjo sosejje meshi jjeshequicue! —aca poa—, ma bajjanija ba'a meshimisi iñabajjijji poanija meshi. Mahuiso esodojjo quia canaje Jodio cuaa Eyacuiñajjiya huoojea'yo Quito iña meesahuajji, equecua'yojji”.

Jamaya Jenemia poa yahuajo nei nei.

Emeshi mese Pinatohua Jesosa ba canaje

(Macoso 15.2-5; Noca 23.3-5; Huani 18.33-38)

¹¹ Jamajjeya Jesosa emeshi mese Pinato huasijje dojo canaje, eme jeyo. Pinatohua ba majje huohui'ajja canaje: —¿A'ya acuae mi so'o? ¿A'a miya Jodioja Emeshi Mese poaje'yo? —E'e, joya ecua miyaya huohuiaña jamaya epo'yojji eya —Jesusaa saja'a canaje.

¹² Jodio etii cuaa, Eyacuiñajji nijje emimijji etiiya pea'ai siajje acanaje Pinato Jesosajo. Jamatii Jesosaa saja'a jjima acanaje. ¹³ Jamajjeya Pinatohua huohui'ajja canaje: —¿Yajjajje acuae mi mi jjasaja'aquiani so'o? ¿A'a jje shajja'ajja jjima?

¹⁴ Chojja, Jesosa jjasaja'aqui ajja nei nei. Ba majje Pinato jjashahuaba neineiquinaje: —¿Yajjajje shai Jesosa jjasaja'aqui ajja, de?

¹⁵⁻¹⁶ Jamajjeya Pinatohua niñeba ca'yonaje jama ba'a: —Ojjaña eshequiaja eyaya oe Jodio dejja jeacuaya'yaña Jodio quea bihui nee poanijo. E'e, ojjaña Jodio cuana jjashahuabaquiani jama ba'a: Yahuajo Ejito meshijo Jodio etiiquianaja bacua ejja cuia'yo jjima aca poa esohuidojojjiya, ena' ecuipepa jojoya —Pinato poanaje.

Jiquio shejoya Pinatohua oe Jodio dejja ejeanobia nequi huoojeacuayajea mee ca'yaninaje. Jamajjeya oya Pinato jjashahuabaquinaje: —E'e, eyaya oe Jodio huoojeacuayajea meeje'yo jjeyahua nei. Jesosa pojja'a pichojea meeje'yo. Pea yani Mashama bajjani, ojjaña eba nei. Oya ejeanobia nequi quea masejojo. ¿Ache dejja shai Jodio cuaa sa cani so'o? Caba'ajja sahua —jamaya Pinato jjashahuabaquianaje.

¹⁷ Jamajjeya Pinatohua ojjaña Jodio cuana ehuhui'ajjajji iyaa canaje. Jjachichaquiajo huohui'ajja canaje: —Jjeyahua nei eyaya jeacuayajeaje'yo oe Jodio dejja. ¿Ache acuae jja oe jeacuayajeaje'yo so'o? ¿A'a Mashama? ¿A'a Jesosa Quito pichojeaje'yo? —poanaje.

¹⁸ Pinatoja eba poanaje Jodio etiiya quea quene nee poani ojjaña cuana Jesosa nijje jjapeequianijo. Jamajjeya Jesosa iña mee canaje equecuaje'yojji, Jodio etiiquiaa.

¹⁹ Emeshi mese chacochoañoani yasijje Pinato Jesosa nijje mimimiminequianijo, oja huanaseya pea echacojji huoojea canaje Pinato huohuiya. Jama huohuime acanaje ba'a: —Huee, mecajje eyaya cahuibanaje Jesosa mimishi'ama nei nei. ¿A'a oya quecua mee'yojji! Eya quea mete ani ojo. E'e, jjacahuibaqui majje piopionaje quea mete jjejojo —Pinatoja huanaseya echacojji huohui mee canaje.

²⁰ Oja huanase quea mete poanijo, Pinatohua Jesosa pichojea'yo sa acanaje. Jamatii Jodio etii cuaa, Eyacuiñajji nijje emimijji etiiya pea'ai ojjaña ejjachichaqui nequi taaa mee canaje: —¡Mashama oe huoojeacuayajea'yocue! ¡Jesosa a'a pichojeajji! ¡Quecuajea'yocue ca oma oe!

²¹ Jamajjeya Pinatohua: —¿Ache acuae jja oe pichojeaje'yo?

Jamaya acajje, taaa neinei canaje cuana: —Mashama, ¡Mashama jeacuayajea'yocue! —poanaje cuana.

²² —Jamajje ¿yajja acuae oe eyaya Jesosa Quito aje so'o? Eyacuiñajjija huoojea'yo ojjaña jaa-huanajji ca pa coma —Pinatohua huohui'ajja canaje.

—¡Me cacajeacue oe acui ecueata'apeejo! —acanaje cuaa.

²³ —¿Yajja acuae jja so'o? ¿Yajjajo acuae jjaya quecua'yo sa ña Jesosa? —Pinatohua huohui'ajja canaje.

Jamatii taaa majamajanaje Jodio cuana: —¡Me cacajeacue oe; me cacajeacue oe Jesosa! —jama taaameya Jodio cuana poanaje.

²⁴ E'e, Jesosa pichojea mee jjima acanaje cuaa; quea quene nee neejo janobajjima nei siasianaje; taaa nequinaje Jodio. Taaa majamajajo Pinatohua huoojea canaje ena eme shacuajji jjequia. Majoya ojjaña cuanaja ebajji Pinatohua eme topo canaje: —¡Eyaya pojjeama me cacaje Jesosa emano'yojji! ¡Jamaya pojjeama ecuea esohui! ¡Miyaya ca jja ca oe jamaya ña! —Pinatohua acanaje.

²⁵ Taaajebenaje ojjaña Jodio etii cuana: —E'e, ¡ecuaaya oya mano meeje'yo Jesosa; quea tai coma! ¡Oya mimishi'ama jojoya, ecuanajaya ebacua, osecua cuana pea'ai cacuia ca'yahua, Eyacuiñajjiya! —Jesosa quea mimishi'yo acanaje cuana.

²⁶ Jamajjeya Pinatohua ohua sa canijo Mashama jeacuayajea mee ca'yonaje; Jesosa ca ca huoojea canaje cuiasejjajea majje me cacajeeaa, emano'yojji.

*Sohuinano soa neineinaje Jesosajo
(Macoso 15.16-20; Huani 19.2-3)*

²⁷ Majoya emeshi meseja sohuinano cuaa Jesosa dojo canaje emeshi mese chacochoañoani equi dojjo huasijje. Ojjaña sohuinano o que jjachichaquinaje. ²⁸ Oja daqui huijiajea mee majje daqui huo'o nei huosho mee canaje emeshi mese nisho'yajji. ²⁹ Acuisha sipi majje sapahuahuo iya canaje emeshi mese jayojja nisho epojji. Emeshi meseja acui ejehuijjajja iñanequia mee canaje ebianeí mejje. Majoya ecui'oshajjajo nequianaje ojjaña, Jesosa bihuiajji nisho. Jama bihuia nishome acanaje cuaa ba'a: —¡Miya Jodioja Emeshi Mese quea ca'a nee! ¡Ba'e tiitii'yocue! —jama sajeameya anisho canaje cuaa Jesosa.

³⁰ Majoya cuichojea canaje oja yami yasijje; acui ejehuijjajja jjequisejjajea ca'yonaje oja emejo nequi. Jjequisejjajea'yo majje sapa cuiape'ejea canaje. ³¹ Ojo soa neinei'yo majje daqui huo'o nei huijjeajeajea ca'yonaje; ojaya daqui quia ca o'oyanaje. Majoya Jesosa dojo canaje me cacajeeaa, ba'ehuanasohuajeeaa pea'ai, sohuinano cuaa.

Jesosa acui ecueata'apeejo me cacajea canaje sohuinano cuaa
(Macoso 15.21-32; Noca 23.26-43; Huani 19.17-27)

³² Jenosanenajo aniya Jesosa dojo caje, ba cajjequinaje pea dejja Simoni bajjani, Sinene meshijo ba'e poe'yo. Sohuinano cuaa Simoni acui ecueata'apee dojo mee canaje Jesosa quishishijji, Jesosa ba'ehuanasohuaejajji. ³³ Jamaya oya poquinaje Jonijota eyiyo huasijje, Ese Ejaja esohuijo Esapa Jjii anijji bajjani yasijje. ³⁴ Nequñaquiao Jesosa ishi mee'ajja canaje cuaa acuijjajja na quea sese, quea pase. Ishi mee'ajja canaje quecua ca'yajje nee'ama epojji. Sio majje ishi jjima acanaje Jesosaa. Majoya me cacajea ca'yonaje. Me caca majje nequiasohuahea canaje. Majoya oja daqui cuana chicha ca'yonaje, sohuinano cuaa. Iyachicha'yo majje, hue'e nisho majje daqui majjo ca'yonaje, ojaya pojji epo'yojji. ³⁵⁻³⁸ Etehue'yo o ba'e sapa biajje oja bajjani caca canaje, Jesosa bajjani, oya apiojji me cacajea ca'yonaje huohui epo'yojji. Etehue'yo jama poa ba'a: OYA JESOSA JODIOJA EMESHI MESE EPO'YOJJI

Jesosa ba'e pejejo beca siipojji pea acui ecueata'apee cuanajo ba'ehuanasohuahea pea'ai ca'yonaje, Jesosaja ebianeí mijijje, pea shani mijijje. Majoya e'anioque aniya ojjaña cuaa ba neinei ca aninaje oja epeejjiya eba'ehuanaoquea ca'yo poajejje.

Ejiojijje poquije Jesosa nijje mimijajinaje cuana
(Salmos 22.7; 109.25; Mateo 26.61)

³⁹ Pea dejja cuaa ejiojijje poquianiya Jesosa que poe majje esapa jeacajjajja canaje, soa huishahuisa nequinaje. Jama mimijajime poanaje ba'a: ⁴⁰ —¿A'a acuae oe miyaya Eyacuiñajjija mei equi iñajeabichajea'yo majje pea equi iyaje o'oya so'o pea beca peejjima cahuime? ¡Ba'ajja socue! Ache ba'ajja; miya Eyacuiñajjija Bacua Ejja nei jjabaku majje ca oe ¡acui ecueata'apeejo ba'e nequioque'ajja'yo socue emano'yojji pojjeama! —poanaje cuana.

⁴¹ Jamaya pea'ai Jodio etii bajjani cuaa, Moisesija etehue'yo huohuijji cuaa, Eyacuiñajji nijje emimijji etii cuaa pea'aiya Jesosa niñeba canaje: ⁴² —¿A'a Jesosa ojjaña jaahuanajji epo'yojji? Oya ona nahuejji pojjeama. Oya ca ca oma nequioque'yo jjima poani, de. ¿A'a acuae jja oe oya Jodioja Emeshi Mese poaje'yo? ¡jjabajja'ajja socue! Jodioja Emeshi Mese nei epo'yojji jjabaku majje ¡acui ecueata'apeejo ba'e jja ca oe canequioqueahua jjeyahua neiya ecuanaja ebajji! Ba majje ecuaaya: “Jesosa e'le jojo nei Eyacuiñajjija Bacua Ejja poanaje” aje'yo. ⁴³ Ohuaya: “E'le, eya ca ca iña Eyacuiñajjija Bacua Ejja; ohuaya eya jaahuana cani” acanaje yahuajo. Jamajjeya oya Jesosa Eyacuiñajjija quea boti nee neejo, ¡Eyacuiñajjija oya canahue cahua jjeyahua nei! —Jodio cuana poanaje.

⁴⁴ Siipojji cuaa ma o pejejo eba'ehuanasohuahea ba'eya pea'ai Jesosa jamaya niñebame acanaje, quea huiso nee.

Jesosa mano'yonaje
(Macoso 15.33-41; Noca 23.44-49; Huani 19.28-30)

⁴⁵ Majoya eshequi biacojajja nequijo shequima' jayojja poanaje; quea misi nee poanaje ojjaña meshi yasijje. Quijje eshequi jjaeapaqui'yo majje jiji o'oyanaje. ⁴⁶ Sinecua, quea misi poajo Jesosa quea yeno nee neejo taaa neineinaje: —¿Eli, Eli, lama sabactani? —taame poanaje—; ecue Chii, ecue Chii, ¿yajjajo acuae moya jeana'yonaje so'o? —Jesosa poanaje Jodioja esohuijo.

⁴⁷ Shajja'ajja majje joya quea chipi nee nee nequi jama poanaje ba'a: —¡Bacue oe! ¡Ohuaya etiquiana Enia iyaa cani pojja'a!

⁴⁸ Jamajjeya oe dejja poquicujajinaje acuijjajja na sese jjequiya. Jjequi majje shajashaja iyanobia canaje ena ejjequi yasijje. Majoya bequiocho sajo quecuahuosho majje Jesosaja enaba huasijje huoo canaje ojaya e'ishijji nisho.

⁴⁹ —Chojja, ¡ishoa socue! ¡Enia pojja'a poeje o nahueya! ¡Ba'ajja socue! —Jodio cuana poanaje.

⁵⁰ Jamatii taaa neinei o'oya majje Jesosa mano'yonaje. Chama'yo tii poanaje. ⁵¹ Jesosa mano'yajo tii, Eyacuiñajjija equijo daqui quea moo eba'ehuana ba'e Eyacuiñajjija eyajje jja'isajae meequi canaje; biacuajje ebionei jja'isajaequinaje. Meshi janobajjima nei huehuahuehuanaje pea'ai. Mei quea quemo cuana jjayajjequinaje pea'ai. ⁵² Mei jjani, esajajji cuana pea'ai jjayajjequinaje. ⁵³ Quijje Jesosa eshe o'oya poajo, Eyacuiñajjija epeejji yahuajo emano'yo ma jjani cuanajo jaa cuayaqui'yonaje, quea huiso Jenosanena huasijje poquinaje cuana; quea huiso dejja ba canaje ma emano'yo cuana.

⁵⁴ Ojjaña ba majje, meshi huehuahuehuani ba majje pea'ai sohuinano quea huiso nee, 100, huooejaji poaniya pea sohuinano cuana nijjeya, ma Jesosa nahuejji poani, quea mete nee nee poanaje.

—¡E'le jojo nei, de, oya Jesosa Eyacuiñajjija Bacua Ejja nei poanaje! —sohuinano poanaje.

⁵⁵ Quea huesha nequiya epona cuaa pea'ai Jesosa eba'ehuanasohuahea ba'e ba canaje. Oya cuana yahuajo Jesosa nijje Janinea meshijo ania poa. Onijje Jenosanena huasijje

poeyanaje oja bobi cuacua meesahuaa. ⁵⁶ Oya cuana ma bajjani ba'ba: Mania Madanena; Satiaco, oja chahua Jose pea'aija enaese Mania bajjani; Semeneoja ehuanase pea'ai; Jesusaja enaese pea'ai.

Jesosa mei jjani yasijje huananobia ca'yonaje

(Macoso 15.42-47; Noca 23.50-56; Huani 19.38-42)

⁵⁷ Jamajjeya sinecua nei Jesosa mano'yajo, deja quea aquiana huiso nee Jose bajjani poeyanaje, pea Jose, Amatea meshijo ba'e. Oya Jesosa nijje jjaapee tiitiiquia poa yahuajo nei. ⁵⁸ Jamajjeya poe majje oya Pinato baa poquinaje. Huohui cañaquinaje: —Emeshi mese Pinato, Jesosa mano'yonaje. Eyaya oya cadojo'yahua ecuea mei jjani yasijje ehuananobi-aqui'yojji —poanaje.

Pinatohua huoojea canaje: —E'e, ¡dojocue! Eyaya sohuinano cuana jamaya huohuime aje —poanaje.

⁵⁹ Jamajjeya Joseya Jesosa acui ecueata'apeejo emano'yo ba'e jjequioquea'yo majje dojo ca'yonaje. ⁶⁰ Daqui oshe eyacua neijo bebo majje huananobia ca'yonaje ojaya mei jjani yasijje, ma oja jjeya nei tio huasijje. Majoya mei quea quemoe jecajjajja canaje mei jjani naba capa'yojji. Jesosa mei jjani dojjojo jaa capajea canaje. Capa'yo majje poquinaje Jose pea cuana nijje. ⁶¹ Mania Madanena, pea epona Mania bajjani pea'ai mei jjani yasijje poeyanaje pea'ai Jesosa jjanijo ehuananobia jaa baa. Jomajo e'anioque aniya ba canaje, epona cuaa.

Sohuinano cuaa mei jjani nahue canaje

⁶² Jamajjeya mecahuajje epojja ejomishocajji jJayejjequiajo Paniseo cuana, Eyacuiñajji nijje emimijji etii pea'ai poqui o'oyanaje Pinato que. ⁶³ Huohui caña'yonaje: —Emeshi mese, ecuana jashahuabaquiani yahuajo Jesosa mano'yo jjimahua siajje poanaje jama ba'ba: “Beca cahuime po majje eya emano'yojaa shequie'yo” —Jodio poanaje, Jesosa siajje poanajejo poso—. ⁶⁴ Jamajjeya ijeyahua nei sohuinano huoojea jani baa, beca cahuime pohua, Jesusaja epeejiya oe equehua dojo'yo bacue! Jamaya po majje ojjaña cuana dasia ca chana' jama ba'ba: “¡Bacue oe! ¡Jesosa ca jja ca emano'yojaa shequi o'oyanaje!” huohui ca chana' oja epeejiya. Ojjaña cuana siajje nei nei acua'yo chana' —Jodio cuana jamaya poanaje, Jesosa eshequi o'oyajji pojjeamajo poso.

⁶⁵ Jamajjeya Pinatohua huoojea canaje: —¡Ma'aje sohuinano cuana! ¡Dojo'yocue mei jjani yasijje, ma Jesosa ehuananobia jaa huasijje! ¡A'a acuae jani ca'aje'yo ba'ajja socue! —poanaje Pinato.

⁶⁶ Jamajjeya poquinaje Jodio cuana sohuinano cuana nijje mei jjani yasijje. Jjani capajji ijija ca'a meequi ca'yonaje baacuiya. Majoya esecue jjanijo emeshi mese nisho iya canaje ona edobiqui poaje jjejojo. Etehue iya canaje, emeshi mese nisho. Majoya Jodio cuana poquinaje. Sohuinano ca ca enequinaje tii, esecue jaahuanajjiya.

28

Jesosa shequi'yonaje

(Macoso 16.1-10; Noca 24.1-12; Huani 20.1-10)

¹ Jamajjeya epojja ejomishocajji jJayejjequiajo mecajjeahua nei nei, ebionei jjaipoj-jaquiao, nomico pojjajo, Mania Madanena, pea Mania nijje poquinaje mei jjani yasijje.

² Epona cuana jani pejje yasijje poeyajo, meshi huehuahuehuanaje janobajjima nei. Eyacuiñajji esohuidojojji eyajo ani nequioquenaje. Mei jecajjajjae canaje. Majoya esohuidojojji mei biajje anioquenaje. ³ Oya quea jiji nee nee poanaje pojjeje jayojja; ojaya daqui quea oshe nee nee, bo oshe nee nee jayojja ani ba canaje epona cuaa. ⁴ Sohuinano cuana quea mete nee nee poanaje. Plopio neineinaje; meshi yasijje jaabichajequinaje, emano'yo jayojja jama jaanaje esohuidojojji yajjajo. ⁵ Majoya esohuidojojjiya epona cuana jama huohuime acanaje ba'ba: —¡A'a quea mete pojji! Ecuea miya eba. ¿A'a Jesosa, ma acui ecueata'apeejo mano'yonaje sa'ajja'yo poequi? ⁶ Chama' oya jjeya jiquiojo. Shequi'yonaje ca jja coma; ma ecua ohuaya huohui canaje jamaya e'e jojo nei po'yonaje; oya shequi'yonaje jjeya. E'e, ¡quia'o jiquio ba'ajjahua'yo! Jiquiojo jaanaje. ⁷ ¡Jeyahua nei poquicuajicue oja epeeji cuana huohuiya! ¡jama huohuime acue ba'ba: “Jesosa pa shequi'yonaje” acue! “Oya jjeya nei Janinea meshi yasijje poquie miquiana poqui jjimahuaajo. ¡Oya oe jocuama baquicue!” jamaya o shajja'ajjajji cuana huohuicue! ¡Ecue sohui ma eya huohuinaje oe a'a pajea'yojji; pea huasijje huohui neiquicue! —esohuidojojji jamaya poanaje.

⁸ Jamajjeya epona cuana poqui cuajicujinaje. Quea mete, quea bei nee nee poanaje. Cuajicujinanaje Jesosa shajja'ajjajji cuana esohuidojojji esohui huohuiya.

⁹ Ejojijje poquieje Jesosa jjaneequipanquinaje. Ehu dojjojji nequinaje. Huohui canaje: —Jjo'í, jejo quea bei pocue! Eya poeyanaje —Jesosa poanaje.

O que poe majje o que jianequichipiquinaje. Ecuí'oshajjajo nequinaje; jiojji napa canaje. Quea bihui nee nee yajji epona cuaa oya bihuia canaje. ¹⁰ Jamajjeya Jesosaa oya cuana huohui canaje: —¡A'a quea mete pojjí! ¡Poquicue; ecuea epeejji cuana huohuicue, miyaya! ¡Jama oe acue ba'a: “¡Jjeyahua nei oe Janinea meshi yasijje poquicue! ¡Jocuama oe Jesosa baquicue, Janinea meshi yasijje!” acue! —Jesosa poanaje.

Sohuinano cuana Jesosajo siajje poanaje

¹¹ Epona cuana poqui'yajo sohuinano cuana meshijo jaa nequisohua'yonaje. Jenosana huasijje poquinaje Jodio etii baa. Eyacuíñajji nijje emimijji etii huohui caña'yonaje ojjaña ohua jama acanaje, sohuinano cuaa. ¹² Huohui poña'yonaje. Sohuinanoja esohui shajja'ajja majje Jodio etii cuana jjachichaquinaje emimimimijji. Majoya sohuinano cuana quea huiso bejjo quia canaje o siajje poani sosejje. ¹³ Jama huohuime acanaje ba'a: —¡Miyaya ojjaña cuana jama huohuime acue ba'a: “Mecajje ecuaana ecahuijaajo Jesosa sii ca'yonaje jjanijo jaa, o shajja'ajjajjiya” acue! ¹⁴ Emeshi mese Pinato miquea ehuohui shajja'ajja cajo ecuaana onijje mimije, e'e jojo nei, miya ojaya enapa'yojji pojjeama. Pinato quea bei po meeje'yo ecuaana —Jodio cuana poanaje.

¹⁵ Jamajjeya Jodio etii cuaa sohuinano bejjo quia canaje. Bejjo jjeshe majje sohuinano cuana poquinaje ojjaña huasijje huohui pohua. Jodio etijja esohui jayojja jama acanaje. Jamajjeya quea huiso Jodio cuana sohuinanoja esohui shajja'ajja majje e'e jojo nei poani posojo jjashajja'ajjaquinaje. Jjeya jiquio pojjajo cuanaya jamaya Jodio cuaa huohui cani tii: —¡Jesosa ca jja ca ojaya epeejjiya quehuadojo ca'yonaje; shequi o'oya ajja! —sohuinano siajje poanaje jayojja jama poani tii, Jodio cuana.

Jesosa ba canaje o shajja'ajjaji cuaa

(Macoso 16.14-18; Noca 24.36-49; Huani 20.19-23; Hecho 1.6-8)

¹⁶ Jamajjeya Jesosa shajja'ajjaji cuana 11 huisome poquinaje Janinea meshi yasijje Jesosa baa. Poquinaje eyiyo huasijje ma Jesosa huohui poequi baa. ¹⁷ Poqui majje, Jesosa ba majje bihuia canaje cuaa. Jamatii beca cuana ca ca jama poanaje ba'a: —E'e pojjaja. Edojjoshahua pojjaja'oma, Jesosa pojjeama —jjashahuabaquinaje.

¹⁸ Jamajjeya Jesosa o que jianequichipichipiqui majje jama huohuime acanaje ba'a: —Eyacuíñajjiya eya Emeshi Mese nei epojji aca'yonaje eyajo, meshijo pea'ai. ¹⁹ Jamajjeya ¡poquicue ojjaña dejja cuana huasijje! ¡Ojjaña pea esohui mimiani yasijje ecuea esohui ba meequicue pea'ai! ¡Enijje jjapeequi meequicue! Enijje jjapeequiyajo, jena huasijje besa meecue, eseja Chii nijje epojji, enijje epojji, Edojjoshahua Pame nijje pea'ai epojji! ²⁰ ¡Ojjaña cuana ecue sohui ba meesahuacue oe! ¡Ojjaña oe jjashajja'ajja meequicue quea bame nee nee eba'ejji, mimishi'ama eba'ejji! ¡Bacue oe! Eya e'e jojo nei minijje nequi tiitiije'yo ojjaña pojjajo, jiquio meshi oe epojji jiquio epojja huisome tii —Jesosa poanaje.

Mahuiso ecuea esohui etehue'yo. Eyaya Mateo bajjaniya tehuejyonaje. Apoa.

MACOSOHUA ESOHUI QUEA PAME NEE TEHUE CANAJE JESOSA QUITOJA MARCOS

Huaniya, ma ona besameeji poaniya esohui huohui canaje Jesosa Quitoja

(Mateo 3.1-12; Noca 3.1-9, 15-17; Huani 1.19-28)

¹ Eyaya, Macoso bajjaniya esohui quea pame nee tehueña Jesosa Quitoja, Eyacuiñajjija Bacua Ejjaja, ojjaña ebajji. Jamaya poanaje ba'a:

² Yahuajo nei nei ecuanaja etiquiana Isaia bajjani Eyacuiñajjija esohui huohuijji poa. Eyacuiñajjija Bacua Ejja Jesosa Quitoja Isaiaa tehue ca poa Eyacuiñajjija esohui. E'e, Eyacuiñajjija oja Bacua Ejja jama aca poa ba'a:

“iShajja'ajjacue! Eyaya ecuea esohui huohuijji huoojeaje mi huoojea jjimahuajo. Ohuaya miquea ejiojji shabojea caje. ³ E'e, oya quimajo, meshi jabojo nequi taanequije. Jama poaje ba'a: —i'iquio ecua emeshi cuiñajji nei neija ejiojji shabojea cani jama, quea pojje nee nee acani jayojja jamaya miquea ejjashahuabaquijji tai quea boejea nee nee a'yocue! Emeshi Mese nei poeje. ¡Jamajjeya oe apoa pocuajicue!”

Jamaya Isaiaa yahuajo nei nei tehue ca poa Jesosajo.

⁴ Jamajjeya Isaiaja esohui jayojjaya Huaniya, ma ona besameeji poaniya, meshi quimajo aniya esohui quea bihui nee Jesosajo huohui canaje. Jama acanaje ba'a: —iMiquea mimishijo quea yeno pocue! ¡Mimishi jja oe pajea'yocue! E'e, jamaya poajo, Eyacuiñajjija miquea mimishi cuana cuijea caje'yo. Jamajjeya eyaya miya besa meeje ojjaña ebajji miya Eyacuiñajjija epeeji po'yonaje —acanaje Huaniya.

⁵ Quea huiso nee nee cuana Jenosanena cuiñajjijo ba'eca, ojjaña Jodea meshijo ba'eca pea'ai poquinaje Jodana cuei yasijje Huani baa. Huani shajja'ajja majje oya cuana quea yeno nee poanaje ojaya mimishijo. Miminaje Eyacuiñajji nijje. Ojaya mimishi huohui canaje. Majoya Huaniya oya cuana besa mee canaje Jodana enajo, Eyacuiñajjija epeeji epojji.

⁶ Huaniya huo ña, cameno ña oja sipi huosho canaje. Ejjaytica'acuijji ejee iya canaje. Shacui ijia canaje, huini pea'ai ishi canaje, Huaniya. ⁷ Ohuaya huohui canaje jama ba'a: —Quijje pishana poeje Jesosa Quito. Oya oe nei quea ca'a nee nee nequi. Eya ca iña quea ca'a pishana nequi. Jamajjeya eya ca iña onijje nequi sa po ajja miqiana que cojja. Quea bicho. ⁸ Eyaya miqianaya Eyacuiñajjijo besa meeña enajo. Poe majje ohuaya, Jesosa Quitohua miqiana que Eyacuiñajjija Edojjoshahua Pame dobiqui mee caje'yo. Jamajjeya miqianaya quea pame nee poaje'yo —acanaje Huaniya ojjaña.

Huaniya Jesosa besa mee canaje Eyacuiñajjija esohui jayojja jama epo'yojji

(Mateo 3.13-4.11; Noca 3.21-22)

⁹ Majoya Huaniya Jodana cuei sahuajo sohuihuohui canijo tii, Jesosa Janinea meshijo ba'enaje, Nasanena cuiñajjijo. Macua huasijje po'oquenaje Huani que. Huani jama acanaje ba'a: —Huani, jeya besa meecue Eyacuiñajjijo, miyaya! Jamajjeya Huaniya Jesosa besa mee canaje Eyacuiñajjijo Jodana enajo. ¹⁰ Huaniya Jesosa besa mee majje, jjequicuaya ca'yajje ba canaje eyatahuatahua ca'apejo caje. Eyacuiñajjija Edojjoshahua Pame huia' jama Jesosa sapa biajje cuabesa ba'enaje. Ecapashi nei ba'eoquenaje. ¹¹ Eyacuiñajjija eyajo aniya oja Bacua Ejja jama acanaje ba'a: —Miya ecue Bacua Ejja quea jea nee nee. Eya mijo quea bihui nee nee poani.

Jesosa mimishi po mee sa acanaje Edosiquiaa

(Mateo 4.1-11; Noca 4.1-13)

¹² Jjeyahua nei Edojjoshahua Pameya Jesosa quima huasijje, meshi jabo huasijje huoojea canaje. ¹³ Jesosa jomajo nequinaje peaja ejiojji huiso cahuime, 40 cahuime. Mahuiso epojja cuana, mecajje cuana pea'ai aninaje. Oe nei nei aninaje. Ijjiacajji quea mase cuana jomajo nequinaje pea'ai. Edosiquiana aje Jesosa que poeyanaje. Quea mimishi epo meeji nisho acanaje. Majoya Eyacuiñajjija esohuidojojji cuana quea huiso poeyanaje Jesosa bobiaa.

Jesosaa sohuihuohui canaje Janinea meshijo, Eyacuiñajji ba po jjimaja meshijo

(Mateo 4.12-17; Noca 4.14-15)

¹⁴ Majoya pea cuaa Huani, ma ona besameeji poani iña canaje; equi ejjaje nobiaquijji yasijje jeanobiajea canaje. Jamajjeya Jesosa posohuaquinaje Janinea meshi yasijje. Eyacuiñajjija esohui quea pame nee huohui canaje. ¹⁵ Jama poanaje ba'a: —Jjeyahua nei Eyacuiñajji miquea Emeshi Mese nei poaje. ¡Jamajjeya miquea mimishijo quea yeno pocue!

¡Mimishi cuana pajea'yocue miquiaaya! ¡Ecuea esohui quea pame shajja'ajjacue! E'e, enijje jjapeequiajo, eyaya miya ba'e tiitii meee'yo enijje —Jesosaa huohui tiitii canaje.

Jesosaa nahuoo cuiashajaji iyaa canaje onijje epo'yojji
(Mateo 4.18-22; Noca 5.1-11)

¹⁶ Majoya Jesosa poquinaje Janinea bae ai sahua huasijje. Jomajo ohuaya Anesi, Anesija o'i Peno bajjani, Simohui pea'ai bajjani ba canaje. Oya cuana nahuoo cuiashajaji nei nei bajjo. Nahuoo cuiashaja poequi. ¹⁷ Jesosaa oya cuana iyaa canaje: —¡Enijje po'yocue! Eyaya miya dejja cuana jjequi meesahua'yojji aje'yo e que.

¹⁸ Jjeyahua nei nei oya cuana ojaya eshajajji cuana jeana'yo majje onijje poqui'yonaje.

¹⁹ Majoya Jesosaa poqui pishana majje pea cuana ba canaje. Semeneoja bacua ejja Jacobo ba canaje oja chahua mese nijje, Huani nijje bishe aijo eshajajji je'e'yo po'ani oja chii nijje. ²⁰ Jjeyahua nei Jesosaa oya cuana iyaa canaje. Jamajjeya Jesosaa iyaa cajje oja chii Semeneo bajjani echacojji cuana nijje bishejo ani tii jiña ca'yonaje cuaa. Jesosa nijje epoqui'yojji.

Dejja niñepoqui
(Noca 4.31-37)

²¹ Majoya quijje pishana Jesosa o shajja'ajajji nijje posohuaquinaje Capenaoma cuiñajji yasijje. Epojja ejomishocajji oya cuana poquinaje Jodio cuanaja equi ojee ejjachichaquijji yasijje. Dobiqumi majje Jesosaa ojjaña jomajo ani sohuihuohui canaje. ²² O shajja'ajja majje ojjaña cuana jama poanaje ba'a: —¡De! Ohuaya Jesosaa esohui huohui cani quea ja'a nee. Huohui cani emeshi mese jayojja jamaa quea ja'a nee nee. Moisesija esohui etehue'yo huohuijji quea ja'a pishana esohui huohui cani, de. ¡Cashajja'ajja'yahua Jesosa! —poanaje ojjaña cuana.

²³ Jjeyahua nei dejja niñepoqui dobinaje ma equi yasijje. ²⁴ Jesosa ba majje eshahua o niñepoqui meejji poani siasianaje jama ba'a: —Jesosa, Nasanenajo ba'e, ¿apiojji miya poeyanaje ecuana que ecuana quea nee nee po meeya? Ecuana eba miya Eyacuiñajji Bacua Ejja quea pame nee. ¡A'a jjeyahua nei ecuana cuaqui yasijje jeajeajji! Eyacuiñajji eshahua cuana cuaqui yasijje huoojeajea caje'yo quijje, jjeja nei pojjeama, de —taame poanaje eshahua.

²⁵ Jamajjeya Jesosaa eshahua, o niñepoqui meejji poani huoojeacuayajea ca'yonaje: —Eshahua, ja'a mimijji! ¡Cuayaqui'yocue oe, ¡iquio dejjajo nequi! —Jesosaa acanaje.

²⁶ Jesosa mimi jeahuajo, eshahua o niñepoqui meejji poaniya dejja jjequi'ihui mee majje, siasia mee majje cuayaquinananaje. Dejja jea cana'yonaje. ²⁷ Ba majje ojjaña cuana quea mete nee nee poanaje. Ojee miminaje jama ba'a: —¡De! ¿Yajja shai poani? Jamaya yahuaajo ecuanaja ba jjiima, de. Jesosaa quea ja'a nee huohui cani emeshi mese jamaa, oya quea sohui poja nee nee. Ojaya esohui shajja'ajja cani eshahua. Oja sohui jayojja jama acani, de —poanaje ojjaña.

²⁸ Jjeyahua nei ojjaña Janinea meshijo ba'ecaa shajja'ajja canaje Jesosajo. Jama poanaje ba'a: —Jesosaa quea ja'a nee ojjaña acani. Oya Eyacuiñajji huoojea'yo ojjaña jaahuanajji e'e jojo nei —ojjaña poanaje.

Jesosaa Simohuija yano mese huaquia mee ca'yonaje
(Mateo 8.14-15; Noca 4.38-41)

²⁹ Jesosa Jodio cuanaja equi ojee ejjachichaquijji nequi cuayaqui'yo majje poquinaje Simohuija equi yasijje, Anesija pea'ai equi yasijje. Dobiquinaje Jacobo nijje, Huani pea'ai nijje. ³⁰ Simohuija ano quea quiyo nee jaa. Jamajjeya Jesosa huohui canaje jama ba'a: —Jesosa, ecue ano, ecue huanaseja enaese quea quiyo nee nee jaa, quea mano, de —Simohui Peno poanaje.

³¹ Jamajjeya Jesosa o que poquinaje. Emanojaa ba canaje. Napa'ajja canaje emeya. Me napa'ajja cajje, boe canana'yonaje. Jamajjeya me iña majje jjequisohua canaje Jesosaa. Majoya ohuaya, Simohuija anohua, bobi ojjaña huasijje jjequi canaje.

Jesosaa quea huiso emanojaaca cuana jjaajaqui mee ca'yonaje
(Mateo 8.16-17; Noca 4.40-41)

³² Majoya sinecua neijo, eshequi e'oquequiajo, dejja cuaa quea huiso emanojaa cuana, niñepoqui cuana pea'ai Jesosa que jjequi canaje ejjaajaqui mee'yojji. ³³ Ojjaña jiquio cuiñajji ba'ecaa Jesosa que jjachichaquinaje Simohuija equi yasijje. ³⁴ Jesosaa ojjaña emanojaa jjaajaqui mee ca'yonaje, huaquia mee ca'yonaje pea'ai. Eshahua cuana huoojeacuayajea ca'yonaje pea'ai. Eshahua cuana, o ebajo, jama acanaje Jesosaa ba'a: —Eya miqianajaya ebajo ¡a'a mimijji! Eya Eyacuiñajji huoojea'yo ojjaña jaahuanajji, oja Bacua Ejja ¡a'a pea cuana huohuijji! —poanaje Jesosa.

Jesosaa esohui huohui ca o'oyanaje Janinea meshijo
(Noca 4.42-44)

³⁵ Mecajjeahua nei, eshequi jja'a'a'ajjaqui jjimahuajo, Jesosa shequi majje cuiñajji esecue yasijje poquinaje dejama huasijje. Jocuama oya miminaje Eyacuiñajji nijje, oja chii nijje. ³⁶ Jamajjeya shequi majje pea cuaa Simohui nijjeya oya sa'ajjaqui canaje. ³⁷ O ba majje jama poanaje ba'a: —Jesosa, ojjaña miya sa'ajja caqui —poanaje.

³⁸ Jamajjeya Jesosaa oya cuana jama acanaje ba'a: —¡Cua'a, enijje poquicue pea cuiñajji cuana huasijje! Eyacuiñajjiya eya huoojea canaje pea cuiñajji yasijje ojaya esohui jocuama huohuiya pea'ai.

³⁹ Jamajjojoya Jesosa Janinea meshijo ojjea poquinaje ojjaña cuiñajji cuana huasijje. Ojjaña Jodioja equi ejjachichaquijji yasijje dobiquinaje; esohui huohui canaje. Eshahua cuana huoojeacuayajea ca'yonaje pea'ai.

Dejja batata epo'yo, ma dejjaa shicui jjima acani jja'jaja meequi ca'yonaje Jesosaa
(Mateo 8.1-4; Noca 5.12-16)

⁴⁰ Majoya oe dejja quea mano nee batata epo'yo poeyanaje Jesosa que. Ecu'i'oshajjajo nequinaje o bihuijji. Onijje miminaje jama ba'a: —Jesosa, ecuea eba miya jja'jaja meequi'yojji nei nei poani. Jamajjeya miyaya jja'jajaqui mee'yo sa amajje imo che jja'jajaqui mee'yocue! —poanaje.

⁴¹ Jesosa ma dejja quea mano ba majje quea yeno poanaje. Oya napa'ajja canaje emeya. Jama poanaje ba'a: —E'e, eyaya miya jja'jajaqui meeje'yo. ¡Jja'jajaqui'yocue, miya! —Jesosaa acanaje.

⁴² Jja'jajaquinana'yonaje jjea nei. Quea pame nee po'yonaje. ⁴³⁻⁴⁴ Jamajjeya Jesosaa oya huohui canaje jama ba'a: —¡Shajja'ajjacue mo! Eyaya miya jja'jajaqui mee'yonaje. ¡Jamatii a'a oe ijjea huohuipojji ecue jja'jajaqui mee'yo! ¡Poquicujicue Jenosanena huasijje, Eyacuiñajjiya equi yasijje, ma onajo Eyacuiñajji nijje mimiani yasijje! Oya huohuicue jama ba'a: “Eya jja'jajaqui'yonaje” acue. ¡Moisesija sohui jayojja jama oe pocue pea'ai! Miya ehuaquia'yohua jjejojya ¡Eyacuiñajji nijje mimiani yasijje beca huia' quiaquicue Eyacuiñajji bihuijji! Jamajjeya ojjaña ba caje miya e'e jojo nei ejja'jajaqui'yo —oya acanaje Jesosaa. ⁴⁵ Jamatii poqui majje huohui canaje ojjaña huasijje jama ba'a: —¡Jesosaa eya jja'jajaqui mee ca'yonaje de, huaquia mee ca'yonaje jjea nei!

Jamajjoya dejja quea huiso nee nee o ba sa poanaje, ejjaajaqui'yojji. Quea huiso nee nee jjachichaqui majje Jesosa cuiñajji cuana huasijje dobiqui mee jjima acanaje. Oya quimajo nequinaje. Quea huiso nee nee o que poeyanaje, ojjaña huapajje aequiana poeyanaje o baa.

2

Quibojjisha quea mano nee nee jaa jeo mee ca'yonaje
(Mateo 9.1-8; Noca 5.17-26)

¹ Majoya quijje pishana Jesosa Capenaoma huasijje poe o'oyanaje. Jamajjeya pea cuaa jomajo nequiya huohui canaje jama ba'a: —Jesosa poe'yonaje ojaya equi yasijje. ¡Cua'a, ejjabaquiqui! ² Jamajjeya quea huiso nee nee jjachichaquinaje ojaya equi yasijje. Dobiqui mee ajja quea dejja huisojojo. Esecuejo nequinaje; equi shajjaquibojo aequiana nequi canaje pea'ai. Jesosaa oya cuana Eyacuiñajjiya esohui huohui canaje. ³ Majoya pea dejja cuaa, ebeca pee pea'aiya, quibojjisha quea mano nee nee equipajaajji jaa sejjaiña majje Jesosa que dojo canaje. ⁴ O que poe meeme ajja, quea huiso equijo ejjachichaqui nequiyojo. Jamajjeya oya cuanaa equi biajjeje quibojjisha dojosohuaqui canaje. Equi huejja ca'yonaje. Huejjaje equipajaajji ecapashinei jaoquea ca'yonaje jjonajo. ⁵ Ma ba majje Jesosa jashahuabaquinaje jama ba'a: —E'e, ¡iquio dejja cuana jashahuabaquiani eya ejjaajaquimee'yojji nei nei poani.

Jamajjeya quibojjisha nijje jama poanaje ba'a: —Cha, ¡quea bihui nee pocue! Eyaya miquea mimishi cuana cuijea'yonaje.

⁶ Jesosaja esohui shajjaajja majje Moisesija etehue'yo huohuijji poani jomajo ani quenequenaje. Jesosa Eyacuiñajjiya Bacua pojjeama posojo jashahuaba taiquinaje jama ba'a: ⁷ —¡De! ¡iquio oya Eyacuiñajji pojjeama. ¿Apiojji Eyacuiñajji jayojja jama nei nei mimiani, de? Jamaya quea mimishi. ¿A'a acuae ohuaya mimishi cuijea mee caje'yo jjabaquiani? Chojja, Eyacuiñajji oe nei mimishi cuijea'yojji poani —poanaje Jodio etii cuana, Jesosa Eyacuiñajjiya Bacua Ejja pojjeama poso acanaje.

⁸ Jamajjeya Jesosa Jodio etiiya ejjashahuaba taiquijji ba majje jama poanaje ba'a: —¿Yajjaje acuae nequiana enijje quea quene poani so'o? ⁹ ¿Ache shai quibojjishajo quea camaja eyaya aje'yo? ¿A'a ojaya mimishi cuijea'yojji quea camaja? ¿A'a jja eyaya oya nequisohua meeje'yo? Ba'ajja —Jesosa poanaje—. ¹⁰ Jamajjeya eyaya ojjañaja Edoe Meseya

miquianaya ba meeña eya ca ca iña Emeshi Mese nei quea ca'a nee nee nequi. Jamajjeya eyaya mimishi cuijeaje'yo nequianaja.

¹¹ Majoya Jesosaa quibojjisha acanaje: —¡Nequisohuacue! ¡Miquea equipajaajji bebo majje miqnea equi yasijje poquicue!

¹² Jjeya nei quibojjisha nequisohua majje jeo'yonaje. Equipajaajji bebo canaje. Jeojeopu-qui'yonaje oja equi yasijje. Jamajjeya ba majje ojjaña cuana quea bihui nee nee poanaje. Eyacuiñajji bihuia canaje jama ba'a: —¡E'e nei, joya quibojjisha jeo'yonaje jjeya nei! ¡E'e, e, Eyacuiñajjiya Jesosa quea ca'a nee po mee cani; emanojaa cuana huaquia mee ca'yani! ¡Mimishi cuijea mee ca'yani pea'ai!

Jesosaa Mateo pea bajjani Nemi iyaa canaje onijje epo'yojji

(Mateo 9.9-13; Noca 5.27-32)

¹³ Majoya Jesosa poqui o'yanaje meshijaji yasijje, bae sahua huasijje. Quea huiso nee nee o que poeyajo, oya cuana Eyacuiñajji esohui huohui canaje. ¹⁴ Majoya Jesosaa poquijjeya Apeoja bacua eja Mateo ba canaje, ma Nemi pea'ai bajjani. Oya yaninaje equi ejjeshejji jaahuanajjijo, ojjañaja emeshi meseja esohujjo jjeshe mee cani deija cuana eba'ejji sosejje. Oya bejjo jjeshejji poani. Ba majje Jesosaa oya iyaa canaje: —Nemi, ¡enijje po'yocue!

Jamajje Nemi nequisohua majje Jesosa nijje poqui'yonaje. ¹⁵ Majoya Nemiya Jesosa iyaa canaje ojaya equi yasijje ijji'a'ijji. Jamajjeya Jesosa o shajja'ajjaji cuana nijje Nemija equi yasijje poquinaje ijji'a'ijji. Quea huiso deija cuana Nemi jama bejjo jjeshejji poani, deija mimishi cuana pea'ai poquinaje. Ojee ijji'a'ijji aninaje Jesosa nijje, Jesosa shajja'ajjaji cuana nijje pea'ai. ¹⁶ Jesosa ma deija mimishi cuana nijje ijji'a'ijji ani ba majje Jodio esohui huohuijji Paniseo cuana bajjani, Moisesija esohui etehue'yo huohuijji cuana pea'ai quea quene poanaje. Jesosa shajja'ajjaji cuana nijje mimijajinaje jama ba'a: —¿Apiojji miquea esohui huohuijji ijji'a'ijjiani bejjo jjeshejji cuana nijje, deija mimishi nijje pea'ai? ¿Apiojji, de?

¹⁷ Jesosaa oya cuana shajja'ajja canaje. Huohui canaje jama ba'a: —¿A'a deija cuana quea mano pojjeama eshicuijji quia sa poani? Quea mano poanijo ca ca eshicuijji quia cajji. Oya jayojja eya deija quea mimishi nijje jjapeequiani quea ja'a nee epo mee'yojji. ¡Bacue! Beca cuana jama poani ba'a: “Eya ca ca iña quea pame nee, mimishi'ama nei nei” poso jjabaquiani. Jamajjeya ma deija cuana ecuea e'iyajji pojjeama enijje ejjapeequi'yojji. Chojja, eya poeyanaje deija quea mimishi iyaaa, mimishi pajea mee'yojji.

Bobi ijji ajjajo huohui'ajja canaje cuaa

(Mateo 9.14-17; Noca 5.33-39)

¹⁸ Majoya Huani, ma ona besameejji poani, jeanobiajea canaje cuaa. Jamajjeya Jodio etiiquianaja esohui jama poanijo o shajja'ajjaji cuanaa bobi ijji'a'ijji aninaje Eyacuiñajjijo ejjashahuabaquijji, onijje emimijji pea'ai. Jamaya Paniseo shajja'ajjaji cuana poa pea'ai. Jamajjeya beca cuana Jesosa que poeyanaje. Jama huohui'ajjame acanaje ba'a: —Jesosa, ecua, Paniseo cuana pea'ai, Jodio etiiquianaja esohui jama poanijo bobi ijji'a'ajja Eyacuiñajjijo ejjashahuaba neineiquijji. ¿Apiojji acuae mi shajja'ajjaji poani jama po ajja? —poanaje; beshahua nei tecuea canaje.

¹⁹ Jesosaa oya cuana acanaje jama ba'a: —Chojja, ¡eya ecuea epeeji cuana nijje yanijo, ca'ijji cahua! Ma jayojja jama ba'a: Ejjahuaanaquijjijo yahueja epeeji cuana onijje yanijo ca'ijji cahua quea bihui nee. ¿A'a yahueja epeeji cuana onijje yanijo quea yeno? Chojja, quea bihui nee. ²⁰ Yahue poqui'yajo ca ca oe ojaya epeeji cuana ijji'a'ijji sa po ajja poaje. Quea yeno jjejojo jjashahuaba neineiquiani. Eya ¡iquio ecua yahue jama poani: Quijje eya poqui'yajo, ecuea epeeji cuana ijji'a'ijji ajja poaje, Eyacuiñajjijo ejjashahuaba neineiquijji, onijje emimi neineijji pea'ai.

²¹ Majoya Jesosaa huohui canaje pea ejjashahuabaquimeejji: —Eseyaya baacojja esee'yohua bishe eyacuajo caca ajja. Cho. Baacojja etii enajo nequi see'yani, ca'a'ama po'yani. Jjasajajeaquiye'yo. Bishe ihuije'yo. Bishe eyacuajo ca ca baacojja eyacuaa cacaña.

²² Pea esohui huohui canaje jama ba'a: —Ena sese cuatataniyo iya ajja meshimisi etijjo. Ena sese cuatata neineianijo, meshimisi ca'a'ama jjaajajeaqui majje ena sese jjashojeaquiye'yo. Cho, ena sese cuatataniyo meshimisi eyacua quea ca'ajo iya cani cuaa —jamaya Jesosaa huohui canaje ejjashahuaba meequijji onijje jjapeequi majje eyacua caba'yahua, yahuajo jama pojjeama, etiiquianaja esohui jama pojjeama.

Esohui epojja ejomishocajjijo

(Mateo 12.1-8; Noca 6.1-6)

²³ Majoya Jodioja epojja ejomishocajjijo Jesosa o shajja'ajjaji cuana nijje ejiojijje poquinaje. Que yiyejje poquije quea shoe poanaje. Quejo nequi anoso ai seja canana majje

oe poiji ijia canaje, o shajja'ajajjiya. ²⁴ Maya Paniseo cuaa ba canaje. Jamajjeya Jesosa nije mimijajinaje jama ba'a: —¡Bacue oe! Mi shajja'ajajji poani cuaa chaco cani. Anoso ai seija cani esejaya epojja ejomishocajjiyo. Eseyaya etiiquiana Moisesija etehue'yo jama poani ba'a: “¡A'a chacojji epojja ejomishocajjiyo!”

²⁵ Jesosaa oya cuana acanaje jama ba'a: —¿A'a miquea ba jjima esohui etehue'yo emeshi mese Dabija, ojaya epeejji cuana quea pe'a' ai? ²⁶ Yahuaajo nei nei Abiata Eyacuiñajji nije emimijji etii poanijo, Dabija epeejji cuana quea shoe nee po majje Dabi Eyacuiñajji equi yasijje dobiquia poa. Ijia ca poa pahui, maya Eyacuiñajji yasijje quia ca poa cuaa o bihuiajji. Ojaya epeejji cuana ijia mee ca poa pe'a' ai. Jiquio ca oe Eyacuiñajji nije mimianiya ca'ijia cahua; pea cuanaja e'ijiajji pojjeama.

²⁷ Majoya Jesosa ojjaña nije jama poanaje ba'a: —Dejja, epona pe'a' ai pana majje Eyacuiñajjiya oe epojja ejomishocajji aca'yonaje dejja cuana jomishocajji. A'a jjashahuabaquijji jama ba'a: “Epojja ejomishocajjiyo eya jamatii anije”. ¡Cho, quea pame nee acue ma pojaajo! —Jesosa poanaje—. ²⁸ Eya, ma ojjaña Edoe Mese Emeshi Mese nei poani. Jamajjeya eyaya eyaye nei huohuije epojja ejomishocajjiyo: ¡Quea pame nee nee acue! ¡Pea cuana quea jea nee acue! —Jesosa poanaje.

3

Meshahuama'yo epo jmeshahuanequi mee ca'yonaje (Mateo 12.9-14; Noca 6.6-11)

¹ Majoya Jesosa Jodioja equi ejjachichaquijji yasijje poqui o'oya majje dobiquinaje. Jomajo deja meshahuama'yo epo aninaje. ² Jamajjeya Jesosa ba majje Paniseo cuana jama jjashahuabaquijji ba'a: —Eseyaya etiiquiana jama poani ba'a: “¡A'a chacojji epojja ejomishocajjiyo!” poani. E'e poija'a Jesosa esejaya etiiquianaja esohui jama poaje, chaco aija poija'a jjeja. E'e poija'a oya chaco caje jjeja, epojja ejomishocajjiyo; meshahuama'yo epo poija'a jmeshahuanequi mee caje'yo. ¡Caba'ajja sahua! —poanaje.

Jesosa nije mimijaji sa poanaje. Jamajjeya oya ba neinei canaje Paniseo cuaa.

³ Jamajjeya Jesosaa meshahuama'yo epo iyaa canaje jama ba'a: —¡Poecue e que! ¡Ojjaña cojja nei nequicue, eyiyesama neijo!

⁴ Majoya oya nequisohuajo, Jesosa esohui jaahuanajji nije, Paniseo cuana nije jama poanaje ba'a: —¿Yajja poani etiiquiana Moisesija esohui etehue'yo? ¿A'a epojja ejomishocajjiyo pea cuana quea pame acajji poija'a? ¿A'a quea tai acajji poija'a? Jamajjeya ¿a'a emanojaa huaquia mee ca'yoyji epojja ejomishocajjiyo? ¿A'a mano mee cajji poija'a? —poanaje Jesosa.

Jamatii Jesosa Paniseo cuanaja saja'a jjima quea mimishi neija jjejojo.

⁵ Jamajjeya Jesosa ojjaña bajea majje quea quene nee nee poanaje. Ojjaña shajjama' poanijo oya quea yeno poanaje. Jamajjeya ohuaya meshahuama'yo epo jama acanaje ba'a: —¡Epeejji, mi quea eme jeapisa'ajja'yo socue! —acanaje Jesosaa.

Jamajjeya mejjajjaa eme' jeapisa ca'yonaje; pea mijijje jayojjaya po'yonaje. ⁶ Jjeja nei Paniseo cuana esecue yasijje cuayaquijji majje pea Jodio etii cuana nije miminaje, emeshi mese Enođeja epeejji cuana nije pe'a' ai. Jama poanaje ba'a: —¿Yajja amajje Jesosa quecua ca'yoyji so'o, de? —poanaje Paniseo cuana.

Dejja quea huiso bae sahuajo sohuihuohui canaje Jesosaa (Mateo 4.24; 12.15-16; Noca 6.17)

⁷ Majoya Jesosa o shajja'ajajji cuana nije poquinaje. Janinea bae sahua huasijje poe o'oyanaje. Quea huiso nee nee onijje poquinaje Janinea meshijo ba'eca cuana, Jodio meshijo ba'eca cuana, ⁸ Jenosanenajo ba'eca cuana, Idomea meshijo ba'eca cuana, Jodana cuei ojje mijijje ba'eca cuana, Tinojo ba'eca, Sinonojo ba'eca cuana pe'a' ai. Jesosaa jjaajaqui mee ca'yoqui shajja'ajja majje o que poeyanaje quea huiso nee nee, de. ⁹ Jamajjeya Jesosaa o shajja'ajajji cuana huoojea canaje bishe jjequiya. Jama poanaje ba'a: —¡Bishe jjequicue! Quea huiso nee nee nequicaa quishi ca chana' cuaa mo. Jamajjeya eyaya bishejo nequi majje ojjaña cuana sohuihuohuije.

¹⁰ E'e, yahuaajo pishana Jesosaa quea huiso jjaajaqui mee ca'yonaje. Jamajjeya quea huiso emano cuana Jesosa que jjachichaquinaje; mojoiya ca'yonaje oja daqui napajji. Jama poanaje ba'a: —E'e, Jesosa daqui cuema napa majje jjaajaquije'yo.

¹¹ Jesosa ba majje eshahua cuana siasianaje. Niñepoqui cuana Jesosa cojja nei ecui'oshajajo nequinaje o bihuiajji. Jama poanaje ba'a: —Jesosa Quito, miya Eyacuiñajji huojea'yo ojjaña jaahuanajji, oja Bacua Eja quea pame nee —poanaje eshahua cuana.

¹² Jamajjeya Jesosaa eshahua cuana tecueahuoojeacuayajea ca'yonaje jama ba'a: —¡Eshahua cuana, esohui oe ca'acue! ¡A'a ona huohuijji eya Eyacuiñajji huojea'yo ojjaña jaahuanajji! —Jesosaa acanaje.

Jesosaa o shajja'ajjajji cuana iyaa canaje 12 huisome

(Mateo 10.1-4; Noca 6.12-16)

¹³ Majoya Jesosa jaasohuaquinaje eyiyo huasijje. Ojjaña ohua sa cani ohuaya iyaa canaje onijje epoqui'yojji. Jiquio deja cuana o que poeyanaje. ¹⁴ Majoya ohuaya ome miji pea beca huisome, 12 huisome deja babaca ca'yonaje ojaya esohui huohuijji nei epojji. Oya cuana huohui canaje jama ba'a: —Eyaya miquianaya babacanaje enijje e'anijji. Miquianaya huoojeaje ojjaña meshi yasijje ecuea esohui huohuiya.

¹⁵ Jesosaa oya cuana quea ca'a po mee canaje eshahua cuana huoojeacuayajea mee'yojji, ojjaña emanojaa cuana huaquia mee'yojji, ejjaajaqui mee'yojji pea'ai.

¹⁶ Jesosaja huoojea'yo esohui huohuijji ma bajjani ba'a: Simohui, ma pea bajjani Peno; oja chahua Anesi; ¹⁷ Semeneoja bacua eija Jacobo, oja chahua Huani pea'ai Jesosaa pea bajjani aca'yonaje Cueji bajjani, oja sohuijo ca ca Boaneje bajjani; ¹⁸ Penipe; Matonome; Tomasi; Mateo, ma bejo jjeshejji poani; Apeoja bacua eija Satiaco; Simoni Senote; Taneo; ¹⁹ Jodasa Iscaniote, ma Jesosa iña meesahuajji poanaje oja mimishija quecua'yojji. Mahuiso Jesosaa babaca canaje ojaya esohui huohuijji epojji.

Jesosa niñeba canaje cuaa

(Mateo 12.22-32; Noca 11.14-23; 12.10)

²⁰ Majoya Jesosa eyiyojo ani equi yasijje jaaoque o'oyanaje o shajja'ajjajji nei cuana nijje. Quea huiso nee nee o que jjachichaqui o'oyanaje. Quea huiso nee neejo Jesosa, o shajja'ajjajji cuana pea'ai, ijijia'ijjia mee jjima acanaje. ²¹ Ma shajja'ajja majje ojaya enaese poeyanaje oja chahua cuana nijje Jesosa nahueya, Jesosa dojhua pea'ai. E'e, onaaya Jesosa niñeba canaje jama ba'a: —Oya Jesosa niñe poquinaje —sijje poanaje cuana.

²² Paniseo cuaa pea'ai Jesosa niñeba canaje: —E'e, Jesosa aje oe eyamiquecua pojja'a. Ohuaya aje jja oe eshahua cuana huoojeacuayajea canaje Edosiquiana etii nijjeya, Satanasa bajjani, pea bajjani Meesemo nijjeya —poso acanaje Paniseo cuaa.

²³ Paniseo cuanaja ejjashahuabaqui'yojji quea tai Jesosaja eba poanaje. Jamajjeya oya cuana tecuea canaje jama ba'a: —¡Shajja'ajjacue oe! ¿A'a acuae jja Edosiquiaa, Satanasa pea eshahua huoojeacuayajea came? ²⁴ Chojja. Joya emeshi mese shajja'ajja sa po ajjajo, jjacuaquianijo, deja cuana ma meshijo ba'e chama'yo tii poaje'yo. Cuiñajjijo ba'e cuana jamaya po pea'aije, chama'yo tii poaje'yo pea'ai. ²⁵ Huapa pojjeama cuana jjacuaquianijo chama'yo tii poaje'yo pea'ai. ²⁶ Jamaya pea'ai Edosiquiana, Satanasa pea eshahua ehoojeacuaya'yo jojjemo, chama'yo tii po'yoqueaye —Jesosa poanaje —. ²⁷ Cuanaya bacue ba'a: ¿A'a deja quea ca'a nee jeyo jjima nequijo oja aquiana sii caji? Chojja, o jeyo majje ojaya aquiana cuana sii caje cuaa. Jiquio ecua e'aquiana mese ebionei jeyo cani jama amajje eyaya eshahua cuana jeacuayajeaña —Jesosa poanaje pea'ai—. ²⁸ Jamajjeya eyaya miya e'e jojo nei huohuiaña: Eyacuiñajjija ojjaña mimishi cuana, sijjepojji cuana pea'ai cuijea caje'yo. E'e, eya ojjaña Edoe Mese niñeba cajo cuaa, Eyacuiñajjija ma mimishi cuijea caje'yo pea'ai, ojjaña mimishi cuana ohuaya cuijea caje'yo. ²⁹ Jamatii Edojjoshahua Pamejo sijje poajo ca ca, Edojjoshahua Pame niñeba cajo ca ca, Eyacuiñajjija ma mimishi ecuijea'yojji pojjeama tii tii. Jjeya ecuijea'yojji pojjeama; quijje eya ecue Chii nijje eyajo ojjaña huoojea'yojji poaje ecuijea'yojji pojjeama tii tii poaje pea'ai —Jesosa poanaje.

³⁰ Yahuajo Paniseo cuana Edojjoshahua Pamejo sijje poanaje jama ba'a: —Jesosaa Edosiquiana nijjeya aje oe eshahua cuana dejjajo ani huoojeacuayajea cani —jamaya sijje poanijo, Jesosaa oya cuana tecuea canaje.

Jesosaja enaese, echahua mese cuana pea'ai poeyanaje

(Mateo 12.46-50; Noca 8.19-21)

³¹ Majoya Jesosa mimianijo tii, ojaya enaese, oja chahua cuana pea'ai poeyanaje. Esecuejo nequinaje. Onaaya Jesosa huohui canaje jama ba'a: ³² —Mique nae poeyanaje; esecuejo nequi, minijje emimijji —o pejjejo e'antioque'aniya huohui canaje.

³³ Jesosaa ojjaña ejjachichaqui'yo baja majje jama acanaje ba'a: —¿Ache acuae ecuea huapa pojjeama cuana so'o? ³⁴ ¡Bacue! Jiquio ecuea epeeji cuana ecuea huapa pojjeama cuana jama ecuea quea jea nee nee, ecuea ecue nae quea jea añ jayojja jama. ³⁵ E'e, ecue Chii eyajo ani; ojjaña jaya ojaya ejjashahuabaqui'yojji jayojja jama ba'yani, ojaya esohuijo jjashajja'ajjaquiani pea'ai ecuea huapa pojjeama, ecue chahua, ecue jjo'i, ecuea enaese pea'ai —Jesosaa acanaje.

4

Eso'jeaajjaji

(Mateo 13.1-9; Noca 8.4-8)

¹ Majoya Jesosa equijo ani cuayaquinaje. Bae sahua huasijje poqui majje anioquenaje. Majoya o que jjachichaquinaje deja cuana quea huiso nee nee. Jamajjeya bishe yasijje

nequisohuaqui majje anioquenaje esohui huohuiya. Dejjja cuana ca ca meshijajji aninaje. ² Jesosaa oya cuana sohuihuohui canaje quea huiso nee nee. Pea esohui ebameesahuajji huohui canaje ona jshashuabaquijji. Jama acanaje ba'a: ³ —¡Bacue! Ebanajji poquinaje banaa. ⁴ Eso' jeajaja canijo, oe poiji eso' oquequinaje ejiojji yasijje. Poeyanaje cuichojji cuana; ijji canaje eso'. ⁵ Pea eso' oquequinaje mei biajje. Meshi chamajo eso' pohua cuajj'ajja'yonaje. ⁶ Quijje cuayanaje eshequi. Eshequi quea quiyoo nee poajo, eso' quiyoo-manoyonaje. Esajja joca'yajo manoyonaje. ⁷ Pea eso' oquequinaje acuissha huasijje. Pohua'yo majje jjonohua bebo ca'yonaje. Tatajo nequi jjaaja ajja poanaje; manoyonaje. ⁸ Pea eso' ca ca oquequinaje meshi quea pame yasijje. Pohua'yonaje eso' cuana. Ejjajja quea pame nee nee poanaje. Oe esajo ejjajja iye huiso aninaje; pea esajo ejjajja quea huiso aninaje, pea esajo quea huiso nee nee aninaje. Sejjja ca'yonaje quea huiso nee. ⁹ ¡Jamajjeya ecuea esohui shajja'ajjacue! ¡jshashuabaquicue! —Jesosaa acanaje.

Esohui ebameesahuajji Jesosaa sohuihuohui canaje ona jshashuabaquijji
(Mateo 13.10-17; Noca 8.9-10)

¹⁰ Quijje pea cuana o shajja'ajjajji cuana nijje poeyanaje Jesosa que. Huohui'ajja canaje jama ba'a: —Jesosa, ¿apiojji acuae miyaya esohui ebameesahuajji huohuiaña? Maya ecuanaja quea quehua pishana. ¡Ba meesahua socue! —poanaje.

¹¹ Oya cuana saja'a canaje Jesosaa: —Miquianaya ca ca oe Eyacuiñajjiya ba meesahua cani eya ojjañaja Emeshi Mese nei poaje'yo. Yahuajo ba mee jjiima poa. Pea cuana ca ca ba meesahua ajja. Jamajjeya eyaya esohui ebameesahuajji huohuinaje ona jshashuabaquijji. ¹² Jamatii ecuea esohui shajja'ajja majje oya cuana jshashuabaquijji ajja, jshajja'ajjaqui ajja, de. E'e, Eyacuiñajjiya esohui huohuijji Isaia yahuajo nei nei jama poa ba'a:

“Shajja'ajja huicha'a huicha'a majje jamatii jshajja'ajjaqui ajja poaje. Eyacuiñajjiya acani ba huicha'a huicha'a majje jamatii jshashuabaquijji ajja poaje. Ecuea esohui eba jojjemo, eshajja'ajja jojjemo jjabahuejjaqui'yome. Pea'ai enijje ejjapeequi'yo jojjemo, eyaya mimishi cuijea'yome”.

Jamaya yahuajo nei nei tehue ca poa etiiquiana Isaiaa shajjama' cuanajo —Jesosa poanaje.

Jesosaa esohui ebanajji ba mee canaje
(Mateo 13.18-23; Noca 8.11-15)

¹³ Majoya Jesosaa oya cuana jama acanaje ba'a: —¿A'a ma esohui ebameesahuajji miqianajaya quea quehua? ¿Jamajjeya achajja acuae oe miqianajaya eba poaje pea esohui ebameesahuajji? ¡Shajja'ajjacue! Eyaya miqianaya ba meesahuaaje ecuea ehuhui'yo ebanajji: ¹⁴ ¡Iquio ecua ebanajjiya eso' jeajaja cani jayojja jama Eyacuiñajjiya esohui huohuijjiya esohui huohui canaje ojjaña huasijje. Beca cuana ejiojji yasijje oquequi eso' cuana cuichojjiya ijjiyajeyo ca'yonaje. ¹⁵ Jamaya pea'ai beca cuana ecuea esohui eya ojjañaja Emeshi Mese oe nei poaje shajja'ajja majje jamatii jshashuabaquijji ajja. Jamajjeya Edosiquiaa o que poe majje ecuea esohui pajea mee cani. ¹⁶ Beca cuana eso' mei biajje oquequinaje jayojja jama ecuea esohui shajja'ajja majje quea bihui nee enijje jjapeecuajj'ajjaquiiani. ¹⁷ Jamatii ecuea esohui jayojja jama ba'e tüiti ajja. Eso' mei biajje pohua esajja joca'yajo manoyani jayojja jama poani; pea cuaa oya napa cajje, Eyacuiñajji nijje jjapeepajeaqui'yani. ¹⁸ Beca cuana eso' acuissha nijje pohuani jama poani. Acuissha bebo cajje jjaaja ajja jayojja jamaya ecuea esohui shajja'ajja majje jjapee nishoquiiani. ¹⁹ Jamatii oya cuana quea bejo nahue poanijo aquianajo quea huiso jshashuabaquianajo, quea mete pea'ai poanijo Eyacuiñajji chaco ajja. Esohui pajea cani. ²⁰ Eso' meshi quea pame neejo pohua majje quea jjaaja huiso poanaje jayojja jama ca ca beca cuana; ecue sohui shajja'ajja majje jjabahuejjaquiiani; ecuea epeejji quea ja'a nee nee poani, pea cuana ejo jjabahuejjaqui meesahua cani; iye huiso pojja'a, quea huiso pojja'a, quea huiso nee nee pojja'a —Jesosaa oya cuana acanaje. Mahuiso.

Esohui ebameesahuajji cuaquijji
(Noca 8.16-18)

²¹ Majoya Jesosaa pea esohui ebameesahuajji huohui canaje cuaquijji jama ba'a: —¡Bacue! Cuaquijji dedo majje eseyaya nequia ajja tepe quimejjeje. Ejaajji quimejjeje pea'ai nequia ajja. Chojja, de. Acui ecaca biajje nequia'aña equi jeaja'ajji. ²² ¡Iquio ecua dedo majje cuaquijjiya eyajo nequia ojjaña jeaja'a cani jama jayojja Eyacuiñajjiya ojjaña ecuea esohui onaya ba mee cajje'yo quijje. E'e, ojjaña ecuea esohui miqianajaya eba jjeja, Eyacuiñajjiya quijje pea cuana ba mee cajje'yo. Quea ja'a nee poaje'yo. ²³ ¡Jamajjeya miqianaaya quea shajja ja'aa shajja'ajjacue! ¡Ecuea esohui jshashuabaquicue!

²⁴ Majoya Jesosa ojjaña nijje jama poanaje pea'ai ba'a: —¡Ecuea esohui shajja'ajja majje ecuea esohui shahuaba neineicue; jama acue! E'e jashahuaba neineiquianijo, Eyacuiñajjiya miqianaya quea huiso nee nee ba meesahua caje. Oe pojji jshahuabaquianijo ca ca oe pojji ba meesahua caje. ²⁵ Jamajjeya joya Eyacuiñajjiya esohui ba cani quea huiso pishana, quijje quea huiso nee ba mee caje'yo. Joya ojaya esohui ba sa po ajja ca ca pajea caje'yo. Mahuiso —Jesosa poanaje.

Esohui ebameesahuajji eso' pohuanijo

²⁶ Majoya Jesosaa oya cuana huohui canaje pea esohui ebameesahuajji. Jama poanaje ba'a: —Eyacuiñajjiya esohui ejo ebanajjiya eso' bana canaje jama. Eso' ache bame nee quecua canaje quejo, anoso pojja'a. ²⁷ Majoya ojjaña echacojji cuana ecahuujaaajo, epojajajo po'ayequequijo pea'ai eso' pohuani, tiiani pea'ai. Jamatii ojaya ba jjima achajja shai eso' tiiani. ²⁸ E'e, meshi quea pame neejo bana eso' jamatii pohuani, tiiani. Tii majje jjajjani. Majoya jamatii jahuani. ²⁹ Jahuajo, eqe meseya echacojji cuana huoojea cani anoso seija'yohua. Jiquio ecua eso' tii majje quea jjajja huiso poani jayojja jama ecuea epeeji cuana jjeya oe pojji yani; jamatii quijje quea huiso nee nee poaje'yo. Majoya ojjaña jjachichaqui mee caje'yo Eyacuiñajji cojja nei enequijji —jamaya Jesosaa huohui canaje.

Esohui acui so' che biso nee neejo, motasa bajjanijo

(Mateo 13.31-32; Noca 13.18-19)

³⁰ Majoya Jesosaa pea esohui eba meesahuajji huohui canaje jama ba'a: ³¹ —Eyacuiñajjiya esohui ojaya epeeji cuanajo jama pea'ai ba'a: Motasa bajjani eso' bana cani equi quibojo. Jiquio eso' che biso nee nee. ³² Tii majjeya ca ca quea cui quemo nee poaje, apo'e cui quemajja. Jamajjeya cuichoiji cuana poeyani motasa acui biajje cahuiya —jamaya Jesosaa huohui canaje ojjaña ba meejji quijje Eyacuiñajjiya epeeji cuana quea huiso nee, quea ca'a nee nee po mee caje'yo.

³³ Quea huiso nee pea esohui ebameejji Jesosaa huohui canaje Eyacuiñajjiya esohui eba meesahuajji. Onaya quea jshahuabaqui ja'a pishanajo mi huohui tiitii canaje. ³⁴ Esohui ebameesahuajji ca ca oe ojjaña sohuihuohui canaje Jesosaa. Majoya ona poqui'yajo ohuaya o shajja'ajjaji nei ba meesahua canaje.

Beni quea quemo nee nee

(Mateo 8.23-27; Noca 8.22-25)

³⁵ Ma pojajoyaya siniajo Jesosaa o shajja'ajjaji cuana iyaa canaje; jama acanaje ba'a: —Cua'a, Janinea bae ojje miji yasijje ebesapoqui —poanaje.

³⁶ Jamajjeya ojjaña cuana bae sahuajo ani equi yasijje huoojea majje o shajja'ajjaji cuana bishe ai yasijje nequisohuaquinaje Jesosa ani yasijje, ojje besapoquinaje. Pea cuana ca ca bishe sisi cuanajo besapoquinaje Jesosa quishishi. ³⁷ O besapoquianijo beni quea quemo nee nee poeyanaje. Ena shajohua bishe nane canaje. Jeasohuajea canaje. Cuijo canaje enaa. ³⁸ Bishe ai yiyedojojjo Jesosa cahuijaanaje, ehujajajajji biajje jaa. O shajja'ajjaji cuaa quea mete po majje Jesosa ishe acanaje. Jama poanaje ba'a: —Emeshi Mese Jesosa, jshequicue oe! ¡Coya aje se hui'ya! —taanaje.

³⁹ Shequi'yo majje Jesosa nequisohuanaje. Beni tecuea canaje jama ba'a: —Beni, jamaya, ¡nequiquequicue oe! —majoya bae ena nijje jama poanaje—; ja'a enashajo pojji!

O jama mimime poajo, enashajo popajea'yonaje. Ena shajoma'yo poanaje. Beni popajea'yonaje. ⁴⁰ Majoya Jesosaa o shajja'ajjaji cuana jama acanaje ba'a: —¿Apiojji acuae nequiana quea mete nee nee poani? ¿A'a mi ejo e'e nei pojjeama poani? Jamajjeya meteani.

⁴¹ Jamajjeya oya cuana bishe aijo ani Jesosajo quea bihui nee poanaje. Ojee miminaje jama ba'a: —¡Ache dejja shai jiquio quea sohui poja nee nee! Beniya, enashajo cuaa pea'aiya oja sohui shajja'ajja cana —ojjaña poanaje.

5

Dejja quea mase nee nee Jesosaa niñe poqipajea mee ca'yonaje

(Mateo 8.28-34; Noca 8.26-39)

¹ Jesosa o shajja'ajjaji cuana nijje besapoquinaje Janinea bae ojje miji yasijje, Jjanana meshi yasijje, Jenesane dejja cuanaja meshi yasijje. Jesosa bishe aijo ani ba'enaqui majje etaja huasijje nequisohuaquinaje. ² Ma meshijo dejja niñepoqui quea mase nee nequi. Eshahua quea huisohua oja eyami nequijji aca'yajje, ma dejja jjanijo emano'yo sa' jaajo nequinaje. ³ Majo tii oya ba'e'yonaje jjanijo, ma emano'yo huananobia cajiijo tii. Oya quea mase nee nee jjejojo jeyo'ajja canaje cuaa cadenaa. Jjajeyo meequi ajja, quea ca'a nee nee poanaje. ⁴ Yahuajo onaaya ojaya eme', ejiojji pea'ai jeyo'ajja huicha'a huicha'a canaje cadenaa, jjonohua pea'ai. Jamatii ohuaya cadena cuana jjequisejjajea canaje, sejjacquipiquipijea canaje. Onaaya oya jjabahuone meequi ajja, quea mase, quea ca'a,

de. ⁵ Mecajje, epojjajo pea'ai oya eyiyo cuanajo, jiani cuanajo pea'ai siasia'ani'yonaje. Jjajehuijeaqui'aninaje meiya. ⁶ Jamajjeya oya niñepoqui Jesosa quea huesha nee ba majje o que jaaoquecuajinaje. Quea ajjajja jjejojo ecui'oshajjajo nequinaje Jesosa bihuiajji. ⁷⁻⁸ Jamajjeya Jesosaa eshahua huoojeacuayajea ca'yonaje; jama poanaje ba'a: —¡Eshahua dejjajo nequi, cuayaqui'yocue! —Jesosaa acanaje.

Eshahua taa neineinaje jama ba'a: —Jesosa, miya Eyacuiñajji quea ca'a neeja Bacua Ejja. ¡A'a jjeya oya quea nee nee po meeji! Eyacuiñajji huohuicue jama ba'a: “Jjeja eshahua ecuea enapajji pojjeama” acue —eshahua poanaje.

⁹⁻¹⁰ —¿Ae bajjani miya? —Jesosaa oya acanaje.

—Ecuaña quea huiso neejo Quea Shahua Huiso bajjani —saja'a canaje niñepoquiya—. Che mo miyaya ecuaña dejjajo nequi cuayaqui mee'yo majje ¡a'a quea huesha nee huoojeajji! —poanaje eshahua cuana.

¹¹ Quea chipi nee cuichi cuana quea huiso ijia'ijia nequi. ¹² Jamajjeya eshahua cuaa Jesosa jama huohuime acanaje ba'a: —Che ecuaña dejjajo nequi huoojeacuayajea majje ¡cuichi cuana huasijje ecuaña huoojea'yocue!

¹³ —E'e, ipoquicue cuichi cuana huasijje! —Dobiqicue! —Jesosa poanaje.

Jamajjeya dejja niñepoqui jeanana'yo majje eshahua cuana cuichi cuana huasijje do-biquinaje, ojjaña. Dobiqumi majje cuichi cuana cuajicuaji jaaoquequinananaje. Bae quea sahua doe nee nee yasijje cuichi cuana hui'i'yonaje, ojjaña, beca mil huisome. ¹⁴ Ba majje cuichi jaahuanajji cuana jjajjasoaquinaje. Cuajicuajipoquinaje cuiñajji yasijje huohui pohua. Ojjaña equi yasijje huohui capoquinaje eshahua cuanajo. Cuichi cuanajo, dejja niñepoqui'yo jjima po mee canajejo pea'ai huohui canaje. Jamajjeya ojjaña cuana ma cuiñajjijo ba'e poeyanaje Jesosa baa; dejja niñepoqui'yo jjima baa pea'ai: —¿Ae shai poanaje, de? —poanaje cuana.

¹⁵ Jesosa que poe majje ojjañaa dejja niñepoqui'yo jjima ba canaje. Jjeja oya quea bei nequi, daquijji, quea pame nee jjashahuabaquiani. Eshahua cuana chama'yo. Jamajjeya ojjaña cuana quea mete poanaje Jesosajo, ¹⁶ eshahua huoojeacuayajea mee ca'yonajejo, cuichi cuana ehui'i'yojojo pea'ai. Jamajjeya cuichi jaahuanajji cuaa pea cuana huohui majamaja canaje niñepoquijo, Jesosaa eshahua huoojeacuayajea canajejo, cuichi ehui'i'yojojo pea'ai. ¹⁷ Ojjaña quea mete nee poanaje. Huohui canaje jama ba'a: —¡Jesosa, pea meshi yasijje poqui socue oe! Quea mete ca iña mijo mi quea sohui poja nee nee jojoya —poanaje ojjaña.

¹⁸ Jamajjeya Jesosa bishe ai yasijje nequisohuaquinaje ojje ebesapoqui'yojji. Dejja ma niñepoqui poanaje onijje poqui sa poanaje, onijje e'anijji. ¹⁹ Jamatii Jesosaa oya jama acanaje ba'a: —Chojja, ¡miquea equi yasijje poquicue! ¡Miquea huapa pojjeama cuana huohuicue ejo, Emeshi Mese neijo, ma miya ecuea quea boti neejo quea pame nee anaje huohuicue! —Jesosa poanaje.

²⁰ Jamajjeya ojaya equi yasijje poqui majje ohuaya Jesosajo huohui canaje. Ome Miji pea'ai Cuiñajji yasijje huohui canaje pea'ai. Ojaya esohui shajja'ajja majje ojjaña quea bihui nee poanaje: —¡Ache dejja quea ca'a nee nee Jesosa! ¡Eshahua cuana huoojeacuayajea ca'yonaje, de. E'e e, dejja niñepoqui quea pame nee jjeja, de! —poanaje ojjaña.

Jainoja ebacua piona emano'yojaa; pea epona najji poani tii tii

(Mateo 9.18-26; Noca 8.40-56)

²¹ Majoya Jesosa o shajja'ajajji cuana nijje bae ojje miji yasijje poqui o'oyanaje bishejje. Quea huiso cuana jjachichaqui o'oyanaje o que, Janinea bae sahuajo. ²² Jesosa ojjaña cuana nijje mimianijo, pea Jodio dejja o que poeyanaje Jaino bajjani, ma Jodioja ejjachichaquijji equi jaahuanajji poani. Ecui'oshajjajo nequiya oya bihuia canaje. ²³ Jama poanaje ba'a: —Esohui huohuijji, ecuea ebacua piona quea mano nee nee jaa, beshahua nee poquijje-onaje. ¡Ecuea equi yasijje poecuajicue o napa'ajjaa emeya! Jamajjeya oya huaquiaje'yo. Quea aja nee poaje'yo.

²⁴ Nequisohua majje Jesosa o shajja'ajajji cuana nijje poquinaje Jaino nijje. Quea huiso cuana poquinaje onijje pea'ai, ojjaña Jesosa nijje nequi canaje cuana. ²⁵ Poquijje, oe eponaa Jesosa ba canaje. Oya quea mano, najji popajea'yo ajja. Ome miji pea beca, 12 shequiame na cuayapajeaqui'yo ajja poa. ²⁶ Quea huiso eshicuijji quiajji cuaa oya na cuayapajeaqui mee'yo jjima acanaje. Jamajjeya eshicuijji sosejje ojjaña ojaya ejjeshejji oe poanaje. Jamatii na' huosa jjima tii, quea nee tii. Yahuajo quea mano pishana poanaje; jjeja ca ca quea mano nee nee. ²⁷ Jesosajo shajja'ajja majje, ma Jesosaa ojjaña huaquia mee cani shajja'ajja majje oya poeyanaje o que. Quea huiso nequi dejja tejee poeyanaje epona. ²⁸ Jamaya oya jjashahuabaquinaje ba'a: —Eya Jesosa daqui napa majje na huosaje'yo —jama jjashahuabaquimeya poanaje epona.

²⁹ Jamajjeya Jesosaja daqui quehuajje napa canaje. Jjeyahua nei najji po pajea'yonaje. Ma epona quea bihui nee jshahuabaquinaje: —E'e e jjeya nei eya na cuayapajeaqui'yonaje, apoa po'yonaje.

³⁰ Jesosa epona nahuosa mee'yo jeahuajo jshahuabaquinaje jama ba'a: —E'e nei, jjeyahua nei Eyacuiñajjiya a'ya shai huaquia mee ca'yonaje e daqui napa'ajja cajo.

Jjeyahua nei Jesosa jjabajeaquinaje. Ojjaña cuana ejjachichaqui nequi huohui'ajja canaje jama ba'a: —¿Aya acuae ecuea daqui napa'ajja canaje so'o?

³¹ O shajja'ajjaji cuana onijje jama poanaje ba'a: —Jesosa, quea huiso nee nee ejjachichaqui nequi minijje. Jamajjeya ¿Yajjajje shai miyaya huohui'ajjaña jama ba'a: “¿Aya shai ecue daqui napa'ajja canaje?”

³² Jesosaa ca ca bajea neinei canaje epona ena huosa'yo ebajji. ³³ Jamajjeya ma epona ojaya emanomeeji chama'yo ba majje Jesosa que poqui'yonaje; Jesosa yajjajo piopionaje. Ecu'i'oshajjajo nequiya Jesosa huohui canaje ohua na' huosa mee ca'yajje. Ojjaña huohui canaje eponaa. ³⁴ Majoya Jesosaa oya acanaje jama ba'a: —¡She, quea bihui nee pocue! Miya quea ja'a jshahuabaquinaje jama ba'a: “E'e jojo nei Jesosaa eya huaquia mee caje'yo”. Jamajjeya eyaya miya huaquia mee'yonaje. ¡Quea quijiji jaji oe po'yocue! ¡A'a manoshishi o'oyajji! —Jesosaa acanaje.

Epona sho'i eshe po mee ca o'oyanaje
(Mateo 9.23-26; Noca 8.49-56)

³⁵ Majoya Jesosa epona nijje mimianijo tii, Jainoja epeeji poeyanaje. Jama poanaje ba'a: —Jaino, miquea ebacuae mano'yonaje. Chama'yo tii po'yonaje. ¡Jamajjeya esohui huohuiji a'a iyajji equi yasijje o baa! —poanaje.

³⁶ Jiquio esohui shajja'ajja majje Jesosaa Jaino jama acanaje ba'a: —¡A'a quea yeno pojji! Jamaya jshahuabaquinaje ba'a: “Jesosa quea ca'a nee nee. Ohuaya ecuea ebacuase shequi mee caje'yo e'e jojo nei” acue.

³⁷ Majoya Jesosaa pea cuana huoojea canaje jama ba'a: —¡A'a enijje poquijji! —poanaje.

Jamajjeya Jesosa, Peno, Satiaco, oja chahua Huani ca ca oe Jaino nijje poquinaje oja equi yasijje, oja bacua baa. ³⁸ Jainoja equi yasijje poqui majje ba cañaquinaje quea huiso dejja cuana, ponaña pea'ai equijo nequi. Epona sho'i emano'yojo ojee pa'ani. Ojjaña quea shajjaquijjo poani. Dehue mia cani emojea'yojji pea'ai. ³⁹ Equi yasijje dobiqumajje Jesosa jama poanaje ba'a: —¿Yajjajje acuae pa neinei, quea shajjaquijjo nee poani nequi? Jiquio epona sho'i epoquijje'yo pojjeama. Oya cahuijaa.

⁴⁰ —Chojja de, oya mano'yonaje, de; shequi'yo ajja —poanaje cuana.

Ojjaña cuana esecue yasijje huoojeacuayajea majje Jesosa o shajja'ajjaji cuana nijje, ejeajji nijje, enaese nijje cuanaya epona sho'i jaa huasijje dobiquinaje pea equecuayajji yasijje. ⁴¹ Me' iña majje epona sho'i oja sohuijo huohui canaje: —¡Tanitacomí!

Ese Ejjja esohuijo ca jama poanijje ba'a: —¡Epona sho'i, nequisohuacue! —Jesosaa acanaje.

⁴² Me' iña majje epona sho'i shequi mee ca'yonaje. Jjeyahua nei oya nequisohua majje jeo'yonaje. E'e, oya etii pishana, ahuema' ani, 12 shequiajame.

Jamajjeya epona sho'i shequi mee ca'yonaje ba majje ojjaña cuana jjajjasoquinaje; jama poanaje ba'a: —¡E'e jojo nei Jesosa jshaqueimeequi'yojji, de! Jiquio epona sho'i emano'yojaa jjeya nei shequi mee ca'yonaje, de —poanaje.

⁴³ Jesosaa ojjaña huohui canaje jama ba'a: —E'e, ¡jamatii a'a jjeya pea cuana huohuiji jiquio eya mique bacua shequi mee'yonajejo!

Majoya Jesosa jama poanaje enaese nijje, ejeajji pea'ai nijje ba'a: —¡Miquea ebacua piona bobiacue! —poanaje.

6

Jesosa Nasanena meshi yasijje poqui'yonaje
(Mateo 13.53-58; Noca 4.16-30)

¹ Majoya Jesosa jomajo ani poqui o'oyanaje ojaya cuiñajji yasijje, Nasanena huasijje. O shajja'ajjaji cuana nijje poquinaje. ² Epojja ejomishocajji Jodioja equi ejjachichaquijji yasijje poqui majje dobiquinaje. Esohui huohui canaje. Ojaya esohui shajja'ajja majje ojjaña cuana quea tecue nee poanaje, Nasanenajo ba'eca cuana. Oya Jesosa Joseja jea poso acanaje cuaa.

—¡De! ¿Yajjajje shai jiquio dejjaa Jesosaa esohui quea ja'a nee nee huohui cani? ¿Eyacuiñajji jayojjaya jjaajaqui mee ca'yani emanojaa quea huiso nee, de? ³ Oya aje oe acui cacajji bacua ejja pojja'a. Oja nae Mania bajjani, oja chahua cuana Jacobo, Jose, Simohui, Jonasa pea'ai bajjani. Oja jjo'i cuana pea'ai jiquiojo ba'e.

Jamajjeya quea quene poanaje Jesosa nijje; Joseja jea poso cajaa acanaje cuaa. ⁴Jamajjeya Jesosaa oya cuana jama acanaje ba'a: —E'e de, pea cuaa Eyacuiñajjija esohui huohuijji shajja'ajja cani. Jamatii ojaya cuiñajjijo ojaya huapa pojjeama cuana ca ca oe o shajja'ajja sa po'yo ajja. Oya jayojjaya miqúanaya e shajja'ajja sa po'yo ajja.

⁵Jamajjeya oya cuana shajja'ajja sa po'yo ajjajo, oya Eyacuiñajjija Bacua pojjeama posojo, Jesosaa oe pojji napa'ajja cajje jjaajaqui mee ca'yonaje. Ma dejjaa ajjima acani oe pojji nei acanaje Nasanenajo. ⁶Jamajjeya Jesosa jjashahuabaquinaje jama ba'a: —¿Yajjaje shai Nasanenajo ba'eca cuana quea sapa ca'a poani? Ejo e'e nei jjashahuabaqui ajja —poanaje. Jamajjeya Jesosa o shajja'ajjajji cuana nijje poquinaje quea huiso cuiñajji sisi cuana huasijje esohui huohuiya.

Jesosaa o shajja'ajjajji huoojea canaje esohui huohuiya
(Mateo 10.5-15; Noca 9.1-6)

⁷Majoya Jesosaa o shajja'ajjajji 12 huisome iyaa canaje o que. Oya cuana quea ca'a po mee canaje eshahua cuana huoojeacuayajea'yojji, ojjaña emanoojaa cuana huaquia mee'yojji, ejjaajaqui mee'yojji pea'ai. Oya cuana becanejjijji pea'ai huoojea canaje ojaya esohui shajja'ajjajji cuana pea cuiñajji cuana huasijje ojaya esohui huohuiya. ⁸Huohui canaje jama ba'a: —¡Jjeya a'a aqúiana dojojji! ¡Oe acui ejjaquecuaca'aujji dojocue, beca pojjeama! ¡Bashosoco bobi dojojji a'a dojojji! ¡Ejjeshejji, bobi pea'ai a'a dojojji! ⁹¡Ejiojji shejee oe huosho'yocue! ¡Daqui oe nei, ma miquea eyamijo ba'e nei oe dojocue, beca pojjeama! ¹⁰¡Pea cuiñajji yasijje poqui majje sa'ajjacue oe dejja miquea epeejji epojji, joya bei bei! ¡Ojaya equijo anicue ma cuiñajjijo nequi majje! ¹¹E'e pojja'a beca equijo, beca cuiñajjijo miquea esohui shajja'ajja sa po'yo ajjajo, niñeba canijo pea'ai, joya cuana jeajeana'yocue! Poquije'yohua jama acue ba'a: “Eyaya miqúanaya cajaa aje'yo, quea mimishi mi coma. Eyacuiñajjija miya ba cani quea mimishi nee nee. Ohuaya miya quea nee nee po mee caje'yo” acue —Jesosaa poanaje.

¹²Jamajjeya Jesosa shajja'ajjajji cuana poquinaje. Ojjaña cuiñajji cuana huasijje esohui huohui canaje. Jama poanaje ba'a: —¡Miquea mimishi cuanajo quea yeno pocue! ¡Mimishi pajea'yocue Eyacuiñajjija epeejji epo'yojji! —acanaje cuaa.

¹³Quea huiso eshahua cuana dejja cuanajo nequi huoojeacuayajea ca'yonaje. Quea huiso emanoojaa cuana acuijjajja seiyiya shicui majje jjaajaqui mee ca'yonaje, huaquia mee ca'yonaje pea'ai, Jesosa shajja'ajjajji cuaa.

Enode Antipaa Huani sapa jajasejjajea mee canaje
(Mateo 14.1-12; Noca 9.7-9)

¹⁴Jesosaa Janinea meshijo anijo, Janinea meshi meseya Enode Antipa bajjaniya shajja'ajja canaje onaja ehuohui'yo ojo. Beca cuana Jesosa Huani shequi o'oyanaje poso acanaje jama ba'a: —E'e nei jiquio dejja aje oe Huani, ma ona besameejji poa. E'e pojja'a oya mano'yo majje shequi o'oyanaje. Jamajjeya ohuaya Eyacuiñajjija jayojjaya acani, ma dejjaa ajjima acani —poanaje beca cuana.

¹⁵Pea cuana ca ca jama poanaje ba'a: —Chojja, oya etiéquiana Enia, ma yahuajo nei Eyacuiñajjija esohui huohuijji poanaje poe o'oyanaje.

Pea cuana ca ca jama poanaje ba'a: —Oya ca ca oe Eyacuiñajjija esohui huohuijji eyacua, yahuajo nei nei ba'e Eyacuiñajjija esohui huohuijji jayojja jama.

¹⁶Enode Antipa ca ca onajaya ehuohui'yo Jesosajo shajja'ajja majje quea mete nee jama poanaje ba'a: —E'e de, yahuajo ecuea esohuijjo Huani sapa jajasejja ca poa. Oya shequi o'oyanaje e'e jojo nei. Jamajjeya Eyacuiñajjija jayojjaya acani ma dejjaa ajjima acani; quea huiso huaquia mee cani —poanaje Enode.

¹⁷E'e, yahuajo emeshi mese Enode Antipaja edoe mese Penipeja ehuanase Enodiasii bajjani Huani nijje quea quene nee nee poa. Jamajjeya Enode Antipaya Huani iña mee ca poa; jeanobiajea mee ca poa. Enodiasiya aje oe oja yahue huei ca poa Enode nijje eba'ejji, ojaya esha mese nijje eba'ejji. ¹⁸Jamajjeya Huaniya yahuajo Enode Antipa jama tecueame aca poa ba'a: —¡Miyaya aje oe mique doeja, Penipeja ehuanase Enodiasii a'a huana'yojji! Jamaya quea mimishi —Huaniya aca poa.

¹⁹Jamajjeya ohua tecuea cajje quenequenea poa Enodiasii Huani nijje. Quecua sa aca poa. Jamatii quecua jjima; ²⁰oya Enode quea mete poanaje. Oya jjashahuabaquinaje Huani Eyacuiñajjija esohui huohuijji nei nei jojo, ojaya epeejji nei poanaje. Jamajjeya nahue canaje Enodiasiya equecua ca poaje jjejojo. Huaniya esohui shajja'ajja sa poa Enode Antipa, jamatii ojaya quea quehua. Huani equi ejjaeanobiaquijjijo jaa iyaa huicha'a huicha'a canaje esohui huohuiya. ²¹Jamatii quijje Enodiasiya Huani sapa jajasejja mee canaje. Jiquio jama poanaje ba'a: Enodeya o cuaya poa pojajajo ojjaña ojaya epeejji cuana iyaa canaje ojee ijji'a'ijjiaa, majamajaqui baa pea'ai. Ojaya echaco meesahuajji, dejja etii cuana, sohuinano huoojeajji poani cuana pea'ai, Janinea meshijo ba'e dejja etii cuana pea'ai

quea huiiso nee nee iyaa canaje. ²² Ojjaña ijia'ijia'anijo, Enodiasija bacuase pea'ai oe nei majamaja nequinaje ojjaña ebajji, quea bihui nee epo meejji. Enode Antipa quea bihui nee nee poa epona sho'ijo. Jamajje onijje miminaje jama ba'a: —¿Ae shai sa miya poani? ¡Huohucue mo! Eyaya joya miya sañaya quiaje e'e jojo nei, she —acanjaje Enodeya—, ²³ E'e jojo nei she coya miya saje aje mi quiaje; miya huohuiaña ca mi ca quiaje, ecue meshi seija aje mi quiaje miquea epojji —huohui neinei canaje Enodeya.

²⁴ Jamajjeya epona sho'i poquinaje ojaya enaese Enodiasija huohui'ajjaa.

—E'e —oja nae poanjaje—, e'e, ¡Huani sapa jajasejjajaje meequicue she!

²⁵ Epona sho'i poe o'oyanjaje Enode que. Huohui canaje jama ba'a: —Huani, ma ona besameejji poani ejeanobiajaa. ¡Ojaya esapa jajasejjajaje'yo majje piatojo jjequicue jjeyahua nei! Maya eya sa poani.

²⁶ Ma shajja'ajja majje emeshi mese Enode quea ajjajja nee nee poanjaje. Jamatii ojaya esohui epona sho'i nijje ojjaña ojaya epeejji cuanaa shajja'ajja canaje. Jamajjeya ojaya esohui pajea ajja, Enodeja. ²⁷ Jamajjeya ohuaya sohuinano cuana huoojea canaje: —¡Epona sho'ija esohui jayojja jama acue! ¡Huani ma ejeanobiajaa oe sapa jajasejjajajequicue! ¡Jjequicue jjeyahua nei! —poanjaje.

²⁸ Jjeyahua nei sohuinano cuana poquinaje Huani que. Huani sapajajasejjajaje ca'yonaje. Esapa jjequi canaje piatojo. Epona sho'i quia canaje. Majoya ohuaya Huanija esapa oja nae yasijje quia cañaqui'yonaje, epona sho'iyaya. ²⁹ Majoya aje oe Huani shajja'ajjajji poani huohui canaje cuaa. Jamajjeya oya cuana poeyanjaje o dojo'yohua, emojea'yojji. Mojea'yo majje papoqui'yonaje Jesosa huohuiya.

Jesosaa 5.000 dejja cuana bobia canaje

(Mateo 14.13-21; Noca 9.10-17; Huani 6.1-14)

³⁰ Majoya quijje pishana Jesosaja huoojea'yo cuana ojjaña cuiñajji yasijje esohui huohuiya poqui huacuaya poe o'oyanjaje o que. Oya cuana huohui poñaquinaje ojjaña ohua acanjaje, ojjaña ojaya esohui ma ohua huohui canaje pea'ai huohui canaje Jesosa huasijje. ³¹ Quea huiiso nee nee dejja poe majamajanijo ijia'ijia meeme ajja. Jamajjeya Jesosaa oya cuana acanjaje: —¡Cua'a, dejjama huasijje ejomishocaqui! Quea huiiso nee nee ejjachichaqui nequi cuaa se ijia'ijia mee jjima acaje —Jesosaa acanjaje.

³² Jamajjeya Jesosa o shajja'ajjajji nijje nequisohuquinaje bishe ai yasijje. Besapoquinaje quima huasijje. ³³ Jamatii Jesosa besapoquijje ba majje quea huiiso dejja cuana cuiñajji cuanajo ba'e ejiojjijje poqui canaje Jesosa baa. Poquicuajinaje ma Jesosa besapoquijje yasijje. Ebionei jja'a onaya aniñaquinaje, Jesosa hui que añaquia. ³⁴ Quijje pishana Jesosa o shajja'ajjajji cuana nijje ba'eñaquinaje. Bishe aijo ani nequisohuquinaje etaja huasijje. Quea huiiso nee nee cuana ba cañaquinaje. Onajo Jesosa quea yeno jjashahuabaquinaje. E'e, oya cuana quea yeno, quea mano nee ñajajja jaahuana jjima jayojjaya. Jamajjeya oya cuana sohuihuohui canaje quea huiiso nee nee Jesosaa. ³⁵ Siniajo Jesosa que poe majje o shajja'ajjajji cuaa huohui canaje jama ba'a: —Jesosa, sinia coma, de. Chama 'jiquiojo bobi, equi pea'ai. ³⁶ ¡Dejja cuana huoojeacue cuiñajji sisi cuana huasijje oja bobi jjesheya!

³⁷ —Chojja. Ca'aniahua cuana. ¡Bobiacue oe miquiaaya! —Jesosaa acanjaje.

—¿Yajja yajji? Ecuanaa bobi quea huiiso nee nee jjeshe ajja. Quea nahue nee nee, de, 200 epojja echacojji sosejje. E'e, quea huiiso pojjajo chaco majje sosejje, pahui jjeshe cajji, ca ojjaña bobiajji.

³⁸ Jamajjeya Jesosaa jama acanjaje ba'a: —¿Ache huiiso pahui yani esejaya? ¡Pahui baquicue!

Ba majje oya cuana jama poanjaje ba'a: —Jesosa, esejaya bobi oe pojji yani. Me oejje pahui, beca nahuoo sisi yani pea'ai —poanjaje o shajja'ajjajji cuana.

³⁹ Jesosa jama poanjaje ba'a: —Ojjaña cuana jama acue ba'a: “¡Ojjaña anioquecue sipone biajje!” acue —Jesosaa acanjaje—. ¡Oje jja'anichicha meequicue! ¡Anijji becabeca anioque meeme acue!

⁴⁰ Jamajjeya quea huiiso sipone yanijo, ojjaña cuana anioque mee canaje sipone biajje. Jomajo iye huiiso anioquenaje, 50; quea huesha pishana iye huiiso anioquenaje, 100. Jamaya anioque bamebamenaje cuana ojjaña, de.

⁴¹ Majoya Jesosaa me oejje huiiso pahui, nahuoo sisi becanejjijji pea'ai jjeshe majje eyahuasijje jjabajeadhuquinaje Eyacuiñajji nijje emimijji. Bobijo mimi majje pahui miji canaje. O shajja'ajjajji cuana quia mee canaje dejja cuana e'anioqueani yasijje. Nahuoo sisi pea'ai miji majje quia mee canaje ojjaña huasijje. Quia capoquijeya quea huiiso nee nee jpanaqui poquipoquinaje bobi, de. ⁴² Jamajjeya ojjaña ijia neinei canaje. Quea jejje poanjaje. ⁴³ Ojjaña jejje majje eshajja'ajjajji cuaa chicha ca'yonaje bobi ojjaña ijiajeseja.

Jjepai ai yasiije iya ca'yonaje. Quea huiso nee poanaje, 12 jjepai huisome quea cuata poanaje bobi e'ijjiasejja. ⁴⁴ E'e, Jesosaa quea huiso nee nee bobia canaje, de, 5.000 dejja.

Jesosa bae ena biaije poquinaje
(Mateo 14.22-27; Huani 6.16-21)

⁴⁵ Jjeyahua nei siniajo Jesosaa o shajja'ajjajji cuana huoojea canaje. Jama acanaje ba'a: —iBishe ai yasiije nequisohuaquicue! iBae ojje miji yasiije besapoquicue Betesaida cuiñajji yasiije! Quiije eya poquije mi que, pea cuana huoojea'yo majje —poanaje.

⁴⁶ Majoya dejja cuana quea huiso cuana huoojea'yo majje Jesosa eyiyo huasijje jaosohuaquinaje oe nei oja Chii nijje mimiya. ⁴⁷ Mecajje Jesosa oe nei jomajo aninaje, eyiyojo. O shajja'ajjajji cuaa ca ca bishe ai quea huesha nee yo canaje, bae yiyesama huasijje. ⁴⁸ Jomajo ani Jesosaa oya cuana ba canaje, janobajjima nei yoyo'ajja ba'e. E'e, beni quea quemo nee poeyanaje. Bishe cuiajea ca'yonaje huacuaya. Enashajohua bishe janobajjima nei nane canaje, cuio canaje enaa. Mecashono quea apo nee nee poanaje. Jamatii Jesosa eyiyojo ani o que poquinaje ena biaije. ⁴⁹ Jesosa ena biaije jeojejebeje ba majje o shajja'ajjajji cuana quea mete nee nee poanaje. Quea metejo taaanaje jama ba'a: —iCoya ae shai poeje ba'a! —siasianaje—, iCoya eshahua, de!

⁵⁰ Jamajjeya Jesosaa oya cuana huohui canaje jama ba'a: —iA'a quea mete pojji! Eya jja iña jiquio, eshahua pojjeama. iQuea jaji nee pocue!

⁵¹ Majoya Jesosa bishe ai yasiije aniajo, beni nequioquequi'yonaje. Jamajjeya ojjaña cuana bishe aijo aniya jjajjasoquinaje. Quea jaji nee po'yonaje: —E'e pojja'a, e'e jojo nei, de —poanaje.

⁵² E'e, Jesosaa ma dejjaja ba jjima acanaje; 5.000 dejja cuana bobia canaje me oejje pahuijo. Jamatii oya canajaja eba pojjeama Jesosa quea ca'a nee nee, ojjaña acani. Oya cuana ca ca quea jjashahuabaqui ja'a po jjima.

Cuichi cuana hui'tya poa meshi yasiije Jenesane' meshi yasiije besapoqui o'oyanaje
(Mateo 14.34-36)

⁵³ Quiije pishana bae ojje miji yasiije, Jenesane' meshi yasiije besapoqui o'oyanaje Jesosa. Ba'eñaquinaje o shajja'ajjajji cuana nijje. ⁵⁴ Bishejo ani nequisohuaquinaje etaja huasijje. Dejja cuaa jomajo ba'eya Jesosa ba canaje yahuajo. ⁵⁵ Jamajjeya o ba o'oya majje ojjaña iyaacqui canaje Jesosa que epoecuajjiji. Ojjaña emanojaaca cuana equipajaajjijo jaa Jesosa que ye canaje. ⁵⁶ Jamajjeya Jesosa cuiñajji quea quemo huasijje, pea cuiñajji sisi cuana huasijje pea'ai, equi cuana huasijje pea'ai dobiqúi yajo, dejja cuaa emanojaa cuana jjequi canaje o que, jjaajaqui mee'yohua. Huohui canaje cuaa jama ba'a: —Jesosa, ojjaña emanojaaca cuana mique daqui che napa'ajja meecue ehuaquia'yojji, ejaajaqui'yojji —acanaje.

Ojjaña Jesosaja daqui napa'ajja majje jjaajananaqui'yonaje, huaquia'yonaje pea'ai, de.

7

Quea jjashahuabaqui tai poanijo quea tai poani
(Mateo 15.1-9)

¹ Majoya Paniseo cuana, Jodio esohui huohuijji cuana pea'ai Jenosanenajo ba'e Jesosa que poeyanaje. ² Poe majje o shajja'ajjajji cuana ba canaje ijjia'ijjia'ani eme' shacua neinei jjimajo. Jamajjeya Jesosa tecuea canaje Jodio etii cuaa. Jama poanaje ba'a: —Esohui huohuijji, ¿apiojji acuae mi mi shajja'ajjajji cuana eme' shacua neinei jjimajo ijjia'ijjiani? —acanaje Jodio etii cuaa.

³ E'e, ojjaña Jodio cuaa aje oe ijjia jjimahuaajo eme' shacua neinei cani; quea huiso shacuame acani, 7 huisome, ojaya etiiquiana cuanaja esohui jama. ⁴ Equi aquiana jjeshejji yasiije bobi jjeshe majje eme' shacua neinei cani ijjia jjimahuaajo pea'oi Jodio cuanaja etiiquianaja esohui jayojja jama. Quea huiso etiiquianaja esohui jayojja jama acani pea'ai: piato cuana, oña cuana, caneco cuana jamaya topo neinei cani pea'ai; meshimisi ca'a quea quemo cuana, e'anioquejji cuana jamaya topo neinei cani pea'ai. ⁵ Jamajjeya Paniseo cuana, Jodio etii cuana Jesosa nijje mimijajinaje: —Jesosa, ¿apiojji acuae mi mi shajja'ajjajji poanija esejaya etiiquianaja esohui jama po ajja? ¿Apiojji acuae ijjia'ijjia jjimahuaajo eme' shacua neinei ajja, de? —poanaje.

⁶ Jesosaa oya cuana quea tecue saja'a canaje jama ba'a: —iMiquianaya ca mi ca oe jjadasiaquiiji nei nei! Eyacuiñajjija esohui huohuijji Isaiaja esohui miqúianajo e'e jojo nei poa. E'e, yahuajo nei Eyacuiñajjiya Isaia tehue mee ca poa jama ba'a:

“Jiquio dejja cuaa eya bihuia nisho cani. Jamatii jjashajja'ajjaqui ajja. 7 Jamajjeya ecuea equi yasiije jjachichaquiani ejjachichajeaquiiji. Ohuaya ojaya ejjashahuabaqui'yojji huohui cani, ecuea esohui pojjeama”.

Jamaya Isaiaa yahuajo tehue ca poa miquianajo —Jesosa poanaje—. ⁸ De, ¡yajja acuae nequiana poani so'o? ¿Apiojji acuaeya Eyacuiñajjija esohui pajea'yaña etiquianaja esohuijo? ⁹ E'e, miquianaya jama poani ba'a: ¹⁰ Yahuajo nei Eyacuiñajjija Moisesi tehue mee ca poa oja sohui jama ba'a: “¡Mique chii, miquea enaese etii pea'ai jaahuanacue! Joya oja chii, oja nae pea'ai cajaa acajo ¡cajajahuejjajaea ca'yahua cuaa, meiya!” Jamaya tehue mee ca'ya poa yahuajo nei. ¹¹ Miquianaaya ca ca huohui tai yaña jama ba'a: “Dejja oja chii etii nijje, oja nae etii nijje pojja'a camimiyahua jama ba'a: “Eyaya miya eba'e meesahuajji pojjeama. Chojja, eyaya ecuea aquiana Eyacuiñajji yasijje quiaña o bihuiajji”. Jamaya huohui taiyaña miquianaaya. ¹² Jamajjeya oja chii etii, oja nae etii pea'ai pajea meeyaña, miquianaaya. ¹³ Eyacuiñajjija pea esohui quea huiso nee pajea mee'yo sa'ña etiquianaja esohui yajji nisho —Jesosaa Jodio etii acanaje.

¹⁴ Jamajjeya Jesusaa ojjaña cuana iyaa majje huohui canaje jama ba'a: —¡Shajja'ajjacue mo, ¡jbashuejja neineiquicue oe! ¹⁵ Bobi cuanajo, ojjaña aquiana enabajje dobiquianajo pojjeama miquianaya quea mimishi poani. Chojja. Quea ¡jshahuabaqui taijo, esohui quea tai miquea enabajje cuayaquianajo ca ca quea mimishi poani. Eyacuiñajjija maya ba cani quea mimishi —Jesosaa acanaje.

¹⁶ —E'e, ¡miquianaaya quea shajja ja'aa ecuea esohui shajja'ajja majje jama acue! ¡jshahuabaquicue oe!

¹⁷ Majoya Jesusaa ojjaña cuana jeanana majje equi yasijje dobiquinaje o shajja'ajjajji cuana nijje. Dobiqni majje o shajja'ajjajji cuaa huohuiajja canaje: —Jesosa, ecuanajaya ca ca esohui quea quehua miquea. ¡Che mo oe ba meesahuacue! —poanaje.

¹⁸ —¿A'a ecuea esohui miquianajaya ba jjima pea'ai? —Jesosa poanaje—. ¿A'a miquea eba pojjeama? Eme' shacua neinei ¡jimajo pojjeama miquianaya Eyacuiñajjija quea mimishi ba cani. ¹⁹ ¡Bacue! Ojjaña bobi, pea aquiana pea'ai enabajje ¡jjijajaea majje see ai yasijje dobiquiani. Quijje jamatii seejeaje'yo. ²⁰ Joya quea tai ¡jshahuabaquianiya ca ca esohui tai ¡eacua cani. Maaya oya quea tai po mee cani: Quea mimishi Eyacuiñajjija oya ba cani. ²¹ E'e, ¡jshahuabaqui'yojji quea taijo pea eponajo ba'e sa poani, peaja yahuejo ba'e sa poani, sii cani, siajje poani, pea quecua cani pea'ai, ²² quehuajje cojjo cani, quea dejja tai poani, quea nishehui poani, ojjaña mimishi acani, ona dasiajji poani, quea mimishi pea nijje ba'yani, pea jayojja ba'e sa poani, mimijajiani pea'ai. Jama poani ba'a: “Eya oe nee quea pame nee” poani, esho'i jayojja mimi naanaani, Eyacuiñajji niñeba cani pea'ai. ²³ E'e jojo nei ojjaña joya jama acani Eyacuiñajjija ba cani quea mimishi, quea mimijjequijea; bobi ¡jjia cani eme' topo neinei ¡jimajo pojjeama quea mimishi poani —jamaya Jesusaa o shajja'ajjajji cuana saja'ame acanaje.

Cananea epona Jesosa que poeyanaje
(Mateo 15.21-28)

²⁴ Majoya Jesosa ma equijo ani poquinaje pea meshi yasijje. Tino pejeje, Sinono pea'ai pejejeo aninaje. ¡Jeya Jesosa mimi sa po ajja ojjaña cuana nijje. Jamajoya equi yasijje quehua dobiquinaje o shajja'ajjajji cuana nijje. Jamatii oya quehuajje ani meeme ajja; ¡janequiquehuaqui meeme ajja. ²⁵⁻²⁶ E'e, ¡jeyahua nei oe eponaa shajja'ajja canaje Jesosa jomajo ani. Jamajjeya o que poeyanaje. Oya pea, Jodio epona pojjeama, ¡jieno pona pea meshijo ba'e, Sinia meshijo, Penisiajo ba'e. Ojaya ebacua piona huasijje eshahua yahuajo dobiquia poa. Jamajjeya enaese Jesosa que poe majje ecui'oshajjajo nequinaje o bihuiajji, onijje emimi neinei. Jama poanaje ba'a: —Emeshi Mese nei, ¡ecuea ebacua piona ¡jaaajqui mee'yocue, quea mano nee nee jaa, quea niñe nee nee jaa! —enaese poanaje.

²⁷ Ma enaese Jodio pojjeamajo, huapa jayojja. Jesusaa oya saja'a canaje jama ba'a: —¿A'a cuae ecue bacuaja bobi ¡jeajeaje ¡ñahuehuaja e'¡jjijajji? ¿A'a cuae jamaya quea pame? —Jesosa poanaje.

²⁸ Epona quea shoe jama ¡jjejojo jama poanaje ba'a: —E'e, Emeshi Mese nei. ¡Jamatii o huonejjiya bobi ¡jjia canijo, eshaa oquequianajo ¡jjia cani ¡ñahuehuaa! —acanaje enaeseya.

²⁹ Jamajjeya Jesosa quea bihui nee poanaje: —Epona, miya ca ca oe quea ja'a nee, quea pame nee ejo ¡jshahuabaquiani. Jamajjeya eyaya miquea esohui jayojja jama ¡jeya nei aj'e'yo. Miquea ebacua piona ¡jaaajqui mee'yonaje. Eyaya eshahua ojo nequi huoejacuayajja'yonaje. ¡Quea bihui poquicue miquea equi yasijje! —Jesosa poanaje.

³⁰ Jamajjeya ¡jeya nei ma epona poquicuai'yonaje oja equi yasijje. Ba cañaqui'yonaje oja bacua piona quea pame nee, eshahuama'yo, ejaajji biajje quea bei ani'yo.

Jesosaa shajjaqueba ¡jshajjaja'aqui mee ca'yonaje mimi mee ca'yonaje pea'ai

³¹ ¡Jeyahua nei Jesosa Tino pejejeo ani poquinaje. Sinono yejenana majje Ome Miji pea'ai Cuiñajji cuana yejenana majje, Janinea bae yasijje poe o'oyanaje, ma Dejja Eyacuiñajji ba po ¡jjimaja bae bajjani yasijje. ³² Majoya pea cuaa dejja shajjaqueba, mimi'ajja pea'ai ye

canaje o que. Jama poanaje ba'a: —Jesosa, jiquio deja shajjaqueba, mimi'ajja pea'ai. ¡Oya che napa'ajjacue emeya quea ja'a nee epojji!

³³ —E'e, —Jesosa poanaje. Jamajjeya ma deja oe nei dojo canaje huesha'ama onijje mimiya, o huaquia mee'yohua. Ojaya eme sisi shajjaquebaja eshajja huejja huasijje jeanobia canaje. Majoya jamecuichoqui majje ana napa canaje emeya. ³⁴ Eyahuasijje jjabajeasohuaquinaje Eyacuiñajji nijje emimijji. Jjabeanajequinaje jama ba'a: —¡Quea ja'a pocue! —poanaje shajjaqueba nijje. Jesosaja mimijo: —¡Epata! —poanaje.

³⁵ Jesosa mimi jeahuajo, ma dejjaa quea ja'a nee nee shajja'ajja ca'yonaaje. Miminaje quea ja'a nee. ³⁶ Majoya Jesosaa ojjaña cuana huohui canaje jama ba'a: —E'e, eyaya shajjaqueba jashajjaja'aqui mee'yonaaje, mimi mee'yonaaje. ¡Jamatii pea cuana a'a jihuohuijji so'ol! —Jesosaa jamaya ojjaña cuana huohui canaje.

Jamatii oya cuaa huohui majamaja canaje ojjaña huasijje. ³⁷ Shajja'ajja majje ojjaña quea bihui nee jama poanaje ba'a: —E'e e, Jesosaa ojjaña acani quea pame nee nee. E'e e, shajjaqueba jashajjaja'aqui mee ca'yonaaje jjeya nei. Mimi'ajja pea'ai quea ja'a nee mimi mee ca'yonaaje —jamaya ojjaña Jesosa bihua canaje.

8

Jesosaa quea huiso cuana bobia canaje, 4.000 deja (Mateo 15.32-39)

¹ Majoya quijje pishana quea huiso nee nee cuana poeyanaje. Jesosa que jjachichaqui o'oyanaje. Onijje ani tiitii canaje esohui shajja'ajjaa. Bobima' poanaje. Jamajjeya Jesosaa o shajja'ajjaji cuana iyaa canaje. ² O que poeyajo, huohui canaje jama ba'a: —¡Jiquio deja cuana enijje nequi pea beca peejjima cahuime. Ojaya bobi oe poanaje. Jamajjeya eya ojo quea yeno jashahuabaquiani, bobimajo. ³ Oja equi yasijje huoojea sa po'yo ajja, quea shoe nee nee; ejiojijje poquianijo bobi yasijje po chana'.

⁴ O shajja'ajjaji cuanaa Jesosa saja'a canaje: —E'e. Jiquiojo chama' bobi, dejjama'. ¿Yajja yajji? Oya cuana quea huiso nee nee ebobiajji. ¿Achaca pahui ejjeshejji ojjaña bobiajji? —acanaaje cuaa.

⁵ —¿Ache huiso pahui miquea yani? —Jesosaa huohui'ajja canaje.

—Me eejje becanejjijji pea'ai, 7 pahui yani —poanaje.

⁶ Jamajjeya Jesosaa ojjaña ejja'anichichaqui'yo ani cuana jama acanaaje ba'a: —¡Meshijo anioquecuel! —acanaaje.

Majoya Jesosa ma 7 pahui jjeshe majje Eyacuiñajji oja Chii bihua canaje bobijo. Majoya pahui miji canaje. O shajja'ajjaji cuana quia canaje. Majoya oya cuanaa deja cuana huasijje quia canaje. Quia capoquije quea huiso nee nee jpanaquipoquinaje, bobi. ⁷ Ojaya oe pojji nahuo sisi yaninaje pea'ai. Oya jayojja Jesosaa nahuo sisi miji majje quia canaje o shajja'ajjaji cuana que ojjaña cuana huasijje equiajji. ⁸ Jamajjeya ojjaña cuaa ijija canaje; quea jeeje poanaje. ⁹ Ijija majje, mi ijijajeyo majje bio ca'yonaaje jjepai ai yasijje, o shajja'ajjaji cuaa. Mepe ca'yo majje quea huiso poanaje, 7 jjepaime. Jamatii quea huiso nee nee deja cuana bobia canaje, 4.000 deja. ¹⁰ Majoya Jesosaa ojjaña cuana huoojea canaje oja equi cuana huasijje. Jesosa ca ca bishe ai yasijje nequisohuaquinaje o shajja'ajjaji cuana nijje. Besapoquinaje ojje, pea meshi yasijje Majadana meshi yasijje, pea bajjani Namanota meshi yasijje, ma Ena Ta'a Huoi bajjani yasijje.

Jodio etiya Jesosaa pana canijo huohui'ajja canaje (Mateo 16.1-4; Noca 12.54-56)

¹¹ Majoya Paniseo cuana poeyanaje Jesosa que. Onijje mimicuaiejanobiajea sa poanijo jama anisho canaje ba'a: —Esohui huohuijji Jesosa, ¿A'a miya Eyacuiñajjija huoojea'yo nei ojjaña jaahunajji pojja'a? ¡Ejjaba'ajjaqui so'ol! ¡Eyacuiñajjija jayojja jama paname a'ajja' eyajo ecuanaja ebajji! —huohui nisho canaje.

Jamatii oya cuaa Jesosa Eyacuiñajjija huoojea'yo pojjeama poso acanaaje pea Paniseo cuana: —Chojja, Jesosa Eyacuiñajjija huoojea'yo pojjeama. Jamajjeya Eyacuiñajjija jayojja jama mi pana cajo, pajea caje'yo cuaa.

¹² Paniseoja ejjashahuaba taiquijji Jesosaja eba poanaje. Jamajjeya quea yeno poanaje jama ba'a: —Chojja. ¿Apiojji miquianaya Eyacuiñajjija pana cani ba majamaja sa poani? Miquianaaya Eyacuiñajjija esohui cajaa aña. Jamajjeya miquea ba jjima ache shono ojaya ehoojea'yo ojjaña jaahunajji poeyanaje. Jamajjeya Eyacuiñajjija eya pea epana mee'yojji pojjeama miquea ebajji eya ojaya ehoojea'yo —Jesosaa acanaaje.

¹³ Paniseo cuana shajjama' poanijo, Jesosaa oya cuana jea cana'yonaaje, jjabahuejjaqui ajjajojo. Besapoqui o'oyanaje ojje miji yasijje bishejje o shajja'ajjaji cuana nijje.

Paniseoja esohuitai pahui shejee meejji jayojja (Mateo 16.5-12)

¹⁴ Majoya bae oje miji yasiije besapoquiye Jesosa shajja'ajjajji poani cuana jashahuabaquinaje. Jama poanaje ba'a: —E'e de, ecuaana bobi pajea'yonaje.

¹⁵ Majoya Jesosaa, Paniseoja ehuohui taijo jashahuabaquinajo oya cuana huohui canaje: —¡Quea ja'a nee jashahuabaquicue! Paniseoja, Enodeja epeejjija esohui pahui shejjee meejji jayojjajo miya quea tai po chana'.

¹⁶ Oya cuana bobijo jashahuabaquinajo Jesosaja esohui ejashahuabaquimeejji onajaya quea quehua poanaje. Jamajjeya ojee mimimiminaje jama ba'a: —E'e pojja'a Jesosa jama poanaje ecuanaja bobi ye jjimajo.

¹⁷ Ojaya esohui Jesosaja eba poanaje. Jamajjeya oya cuana jama acanaje ba'a: —¿Apiojji acuae jja nequiana ojee mimimimiani bobijo? ¿A'a jja eya miquianajaya ba jjima quea ca'a nee nee? ¹⁸ ¿A'a jja nequiana ejo jashahuabaqui jjima tii? ¿A'a jja nequiaa pajea'yonaje so'o? ¹⁹ Eyaya me oejje pahui miji majje quea huiso dejja bobianaje, 5.000 dejja. ¡Ijja'ijjajeyo majje acuae jjava ¿ache jjepai huiso chicha'yonaje pahui? ¿A'a ya pajea'yonaje? —Jesosaa acanaje.

—Quea huiso nee, 12 jjepaime —poanaje.

²⁰ —E'e. Oya jayojjaya me oejje beca pahui, 7 pahui, miji majje quea huiso dejja bobianaje, 4.000 dejja. ¿Majoya ojjaña ijja'ijjajeyo majje miquianaaya ache jjepai huiso pahui chicha'yonaje so'o?

—Quea huiso nee pea'ai, 7 jjepaime quea cuio chicha'yonaje ecuaaya —saja'ame acanaje.

²¹ —E'e —Jesosa poanaje—. ¿A'a jamatii miquianajaya ba jjima eya quea ca'a nee nee mi bobiajji? ¿A'a mi jjabahuejjaqui jjima? —Jesosa poanaje.

Betesaidajo nequi Jesosaa cojjama' jjacojjapojjaqui mee ca'yonaje

²² Majoya Jesosa o shajja'ajjajji cuana nijje Betesaida huasijje ba'eñaqui o'oyanaje, Jai Jaajji cuiñajji yasiije. Jomajo pea cuanaa cojjama' ye canaje Jesosa que. Jesosa huohui neinei canaje jama ba'a: —Jesosa, jiquio dejja cojjama'. ¡Che jja oma quea cojja ja'a po mee'yocue!

²³ Jesosaa cojjama' me iña majje me pejejea canaje cuiñajji esecue yasiije. Jomajo Jesosaa eme' cuicho majje cojja iñapepa canaje cuichohua. Oya napa'ajja canaje emeya pea'ai. Jama poanaje ba'a: —¿Achajja acuaeya miyaya baña so'o, cha? —Jesosa poanaje.

²⁴ Bajea majje cojjama' jama poanaje ba'a: —Eyaya dejja cuana jeojeoqui baña, acui jayojja de, quea jama pishana, de —acanaje.

²⁵ Majoya Jesosaa ma dejja cojja napa'ajja ca o'oyanaje emeya. Jesosaa cojja napa'ajja ca o'oyajje, cojjamaa jjeyahua nei ba neinei canaje. Quea cojja ja'a nee nee po'yonaje.

²⁶ Majoya Jesosaa oya huoojea canaje oja equi yasiije. Jama poanaje ba'a: —¡Epeejji, quea jaji nee poqui'yocue miquea equi yasiije! ¡A'a jjeya cuiñajji yasiije poqui o'oyajji! ¡Eyaya miya quea cojja ja'a po mee'yonaje a'a jocuama huohuijji! —Jesosaa acanaje.

Penoja esohui quea pame Jesosajo

(Mateo 16.13-20; Noca 9.18-21)

²⁷ Majoya Jesosa o shajja'ajjajji cuana nijje Pinipo meshi yasiije poqui canaje. Sesanea huasijje poquijeya o shajja'ajjajji huohui'ajja canaje Jesosaa: —¿Dejja cuana acuae jja yajja poani ejo? —Jesosaa acanaje.

²⁸ —Miya Huani, ma ona besameejji poa, shequi o'oyanaje poso ca jja mi ca acani beca cuaa. Pea cuana aje jja poani miya Enia, Eyacuiñajjija esohui huohuijji yahuajo nei nequia poa. Pea poani ba'a miya pojja'a pea esohui huohuijji yahuajo nei nequia poa pojja'a. Oya cuana yahuajo nei mano'ya poa shequi o'oyanaje poso ca jja mi ca acani cuaa —poanaje o shajja'ajjajji.

²⁹ —¿Miya acuae yajja poani ejo? ¿A'ya cuae iña? —Jesosa poanaje.

—Miya ca ca Eyacuiñajjija huoojea'yo ojjaña jaahuanajji Quito bajjani —Simohuiya Jesosa saja'a canaje.

³⁰ Jamajjeya Jesosaa oya cuana jama acanaje ba'a: —E'e, eya Eyacuiñajjija huoojea'yo ojjaña jaahuanajji. Jamatii ja'a jja oe jjeya huohuijji cuana! —Jesosa poanaje.

O mano'yojjijo Jesosa miminaje

(Mateo 16.21-28; Noca 9.22-27)

³¹ Majoya Jesosaa o shajja'ajjajji cuana huohui coo canaje ojaya emano'yojjijo: —Eya ojjaña Edoe Mese quijje Jenosanena huasijje poquije. Jomajo Moisesija etehue'yo huohuijji cuaa, Jodio etii cuaa pea'ai, Eyacuiñajji nijje emimijji etii cuaa pea'ai eya quea huiso cuia caje'yo. Quea nee nee poaje'yo eya. Quijje ya mo manoje'yo ohua me' caca mee cajje. Jamatii pea beca peejjima cahuime po majje mo shequi mee caje o'oya ecue Chiya —acanaje.

³² Jamajjeya Jesosaa jama huohui neineime acajje Peno quea yeno nee poanaje. Oya oe nei iyaa canaje, Penohua. Jama poanaje ba'a: —Chojja, ecuea Emeshi Mese Jesosa, miya Eyacuiñajjiya jaahuana caje'yo. Peaja aje mi oe ecuiajji pojjeama, peaja equecua'yojji pojjeama jja mi, de.

³³ Jamajjeya aje jja oe Jesosaa ojjaña o shajja'ajjajji cuana cojja ba neinei majje jama Peno tecueame acanaje ba'a: —Peno, ¡a'a jamaya mimijji! Miya e dasiajji nisho epo jama mimiani. Miya Edosiquiana Satanasa jama mimiani. Jjashahuabaquiani quea tai, dejja jama; Eyacuiñajjiya ejjashahuabaqui'yojji jama pojjeama —Jesosaa poanaje.

³⁴ Jamajjeya Jesosaa ojjaña o shajja'ajjajji, ojjaña pea cuana jomajo nequi pea'ai iyaa canaje. Jama poanaje ba'a: —¡Ojjaña joya enijje e'e jojo nei jjapeequi'yo sa poani Eyacuiñajjiya ejjashahuabaquijji jayojja jama ba'ecue! E jayojjaya jja enijje capoquiahua, jamatii onaa napa cajje aje jja oe quea nee poaje'yo pojja'a. ³⁵ E'e, ojjaña joya Eyacuiñajjiya ejjashahuabaquijji jayojja jama ba'e'yo sa po ajja ba'e tiitii ajja enijje eyajo. Joya ecuea ejjashahuabaquijji jayojja jama ba'e'yo sa poani ca ca ba'e tiitii'yo enijje eyajo. ³⁶ E'e pojja'a dejja cuaa quea huiso nee nee aquiana ojaya yajji chicha caje. Jamatii oya cuana cuaqui yasijje jeajea cajo ojjaña ojaya aquiana cuana edojjji pojjeama. ¿A'a ojjaña ojaya aquiana cuana Eyacuiñajji yasijje quia cajo o cuaquijo ani cuayaqui mee caje'yo? ¿A'a Eyacuiñajjiya oya cuana onijje eyajo ba'e mee caje'yo ma aquiana quea huiso nee nee sosejje? Chojja. ³⁷ Eyacuiñajji cajaa amajje eyajo ojjañaja Edoe Mese esohuidojojji pame cuana nijje poe o'oya majje ecue Chii jayojja quea pame nee nee ojjaña huoojea'yojji poaje'yo. Jamajjeya eyaya ecue Chii eyajo ani huohuije jama ba'a: “Cho, oya cuana ecuea epeejji pojjeama. Cajaa” eyaya aje —Jesosaa poanaje—. E'e, jjeaya ejo quea bicho poanijo quijje eya quea bicho poaje'yo ojo, de.

9

¹ Majoya Jesosaa o shajja'ajjajji cuana jama acanaje ba'a: —E'e jojo nei beca cuaa jiquiojo nequiya jjaa mo ecojjaa ba caje ojjaña huoojeajji quea ca'a nee nee. Jamaya mo ba caje mano'yo jjimahuaa. Beca cuanaja jjaja mo ba jjima poaje ojjaña huoojeajji; manojje'yo —Jesosaa acanaje.

Jesosa quea cojja jiji poanaje oja Chii nijje mimianijo
(Mateo 17.1-13; Noca 9.28-36)

² Quijje pishana me oejje pea emejje oe cahuime po majje Jesosa poquinaje o shajja'ajjajji nijje, pea beca peejjima dejja nijje, Peno nijje, Satiaco, oja chahua Huani nijje pea'ai. Mahuiso dejja nijje poquinaje eyiyo huasijje quea huেশa nee. Jocuama nequi oya Jesosa jjahuapaqui'yonaje. Jjahuapaqui majje quea cojja jiji nee poanaje eshequi jayojja poanaje, quea jeajahua nee nee. ³ Oja daqui quea oshe nee nee poanaje, quea jeajahua nee bo oshe jayojja. Daqui tajjajji jiquio meshijo aniya daqui tajja oshe'yo ajja ojaya daqui jayojja. ⁴ Jamaya ojaya epeejjiya Jesosa ba canaje. Moisesi, Enia pea'ai ma yahuajo nei ba'ya poa Jesosa nijje mimimimi nequi ba canaje pea'ai. Miminequinaje Jesosa onaja mimishijo emano'yojji jjejojo. ⁵ Jamajjeya Peno jjashahuabaqui jjimajo Jesosa nijje jama poanaje: —E'e, Emeshi Mese Jesosa, jiquiojo ecuanane canequiahua, quea pame nee. Pea beca peejjima equi sisi ecuaaya ca'iyahua miquea, Moisesija, Eniaja pea'ai eba'ejji.

⁶ Peno quea ajjajja jjejojo jama poanaje, jjashahuaba bamequi jjima jjejojo. E'e, ojjaña quea ajjajja jjejojo yajja mimime epojji. ⁷ Peno mimianijo tii bo quea oshe nee nee neequioquenaje. Queya canaje huojja. Shajja'ajja canaje Eyacuiñajji jama poani ba'a: —Jiquio ecuea ecue Bacua Ejja quea jea nee nee. ¡Oya oe shajja'ajjacue!

⁸ O shajja'ajja majje quea mete nee nee poanaje Peno, Satiaco, Huani pea'ai. Majoya bajea canaje Jesosa oe nei nequi; Enia, Moisesi pea'ai chama'.

⁹ Eyiyojo nequi jaoquequije'yo mimimimi jaoque'yonaje. Jesosaa ma ojjañaja Edoe Meseya jama acanaje ba'a: —¡Ma miyaya eyiyojo banaje pea cuana a'a huohuijji jjeaya! ¡Quijje eya emano'yo jaa shequi o'oyajo oe pea cuana huohuicue!

¹⁰ Oya cuanaa Jesosa shajja'ajja canaje. Huohui jjima nei nei poanaje. Jamatii ojee mimimiminaje jama ba'a: —¿Yajjaje shai oya Jesosa jama poanaje ba'a: “Eya emano'yo jaa shequije o'oya”? Maya ecuanaja quea quehua —poanaje o shajja'ajjajji cuana.

¹¹ Jamajjeya Jesosa huohui'ajja canaje: —Jesosaa, Moisesija etehue'yo huohuijji poaniya jama acani ba'a: “Enia oe ebionei meshi yasijje capoe'yahua Eyacuiñajjiya huoojea'yo ojjaña

jaahuanajji poe jjimahuajo”. ¿Yajjajje acuae jamaya acani oya cuaa? —poanaje Huani, Satiaco, Peno pea'ai.

¹² Jesosaa jama acanaje ba'a: —E'e jojo nei Enia jayojja jama oe dejja ebionei epoejji ojjaña cuana ejo e'e jojo nei ejjashahuabaqui meesahuajji. E'e, Eyacuiñajjija esohui huohuijji yahuajo nei ba'eya jama ejo tehue ca poa pea'ai ba'a: “Ojjaña Edoe Mese quea nee nee po mee caje'yo cuaa. Jodio cuanaja oya ba jjima poaje. Pea poso acaje. Jamajjeya cuia caje'yo. Cajaa acaje'yo” jamaya yahuajo nei tehue ca poa ejo —Jesosa poanaje—, ¹³ E'e, Enia jama ca ca oe yahuajo pishana poeyanaje. Jamatii Jodio cuanaja oya ba jjima poanaje. Jamajjeya cuia ca'yonaje. Jamaya yahuajo nei Eyacuiñajjija esohui huohuijji cuaa ojo tehue ca poa. Ma jayojja jama acanaje cuaa —jamaya Jesosaa Peno, Satiaco, Huani pea'ai acanaje eyiyojo nequi jaaoqueje'yohua.

Esho'i niñepoquima'yo po mee ca'yonaje Jesosaa
(Mateo 17.14-21; Noca 9.37-43)

¹⁴ Eyiyojo nequi jaaoque'yo majje Jesosa shajja'ajjajji yasijje poe'yonaje. Ba cañaquinaje quea huiso cuana ejjachichaqui nequica. Moisesija etehue'yo huohuijji cuaa Jesosa shajja'ajjajji cuana mimicuiaje nobiajea cani. ¹⁵ Ojjaña ejjachichaquinequi Jesosa ba majje quea quijijji jaji nee poanaje. Cuajicuajinaje Jesosa bihuiaa jama ba'a: —Jesosa, miya Eyacuiñajjija huoojea'yo ojjaña jaahuanajji.

¹⁶ Majoya Jesosaa huohui'ajja canaje: —¿Ajeo acuae quiانا jjamimicuiajea nobia-jeaquiani? ¿Yajja poani so'o?

¹⁷ Oe dejja Jesosa que poeyanaje. Huohui canaje jama ba'a: —Emeshi Mese Jesosa, eyaya ecue bacua ejja yenaje mi que. Oya quea mano nee nee, quea niñe jjejojo mimi ajja pea'ai. ¹⁸ Eshahuaa ojo nequiya oya naba huapa mee cani, jjaami yayequi mee cani pea'ai. Niñepoqui jaabichajeaquiani meshi yasijje ese! ijlayai cani pea'ai. Eyaya mi shajja'ajjajji cuana huasijje yenaje mi chamajo. Jamatii niñe poquipajja ajja —ejeajji poanaje.

¹⁹ Jesosaa ojjaña cuana jama acanaje ba'a: —¡De! ¿Ache shono acuae jja nequiana ejo jjashahuabaquije e'e jojo nei? ¡Quea sapa ca'a mi coma! ¿Ache cahui huiso minijje nequi majje miyaya eya baje'yo Eyacuiñajjija huoojea'yo ojjaña jaahuanajji quea ca'a nee nee? ¡Esho'i e que jjequicue! —Jesosa poanaje.

²⁰ Jamajjeya esho'i jjequi canaje Jesosa que. Jesosa ba majje eshahuaa esho'i janobajjima nei cacacaca mee canaje. Meshi yasijje jea majje oya jeapoquipoquinaje. Naba huapanaje. ²¹ Jesosaa ejeajji huohui'ajja canaje: —¿Ache shequiaja huisome jama poanaje oya?

²² —Jesosa, oya esho'yahua jama po —poanaje ejeajji —. Eshahuaa oya dahua jea majamaja'ajja canaje cuaqi yasijje, ena huasijje hui'i mee'ajja ca'yonaje cuanaya, o mano mee'yojji nisho. Jamatii jecuanajo jjashahuabaquicue quea pame; ecuana jaahuanacue! ¿A'a miyaya ecue bacua jjaajaqui meeje'yo pojja'a?

²³ Jesosaa ejeajji saja'a canaje: —A'a huohuijji jama ba'a: “¿A'a pojja'a miyaya oya jjaajaqui meeje'yo?” E'e jojo nei jjashahuabaquicue jama ba'a: “E'e jojo nei Jesosa quea ca'a nee nee; ojjaña acani. Ohuaya ecue bacua ejja jjaajaqui meeje'yo pea'ai”. Jamaya jjashahuabaquianijo e'e jojo nei eyaya miquea ejjashahuabaqui'yojji jayojja jama aje'yo. Miquea ebacua ejja jjaajaqui meeje'yo pea'ai —Jesosa poanaje.

²⁴ Jamajjeya jjeyahua nei ejeajji jama poanaje ba'a: —Esohui huohuijji Jesosa, eya mijo e'e jojo nei jjashahuabaquiani miya ejjaajaquimee'yoyji. ¡Miyaya eya jjabahuejja neinei qui meesahuacue!

²⁵ Ojjaña cuana o que jjachicha cuajicuajiquiani ba majje Jesosaa o niñepoquimeejji poani huoojeacuayajja canaje: —¡Eshahua, o queba po meejji poani, mimi'ajja po mee'yoyji poani pea'ai, cuayaqui'yocue oja yamijo nequi! ¡A'a dobiqui o'yoyji! —Jesosa poanaje.

²⁶ Jesosaa huoojeajja cajeahua, eshahua siasa nananaje; esho'i jjequi'ihui mee majje cuayaqui'yonaje. Esho'i emano'yo jayojja jaa ba majje ojjaña jama poanaje ba'a: —Oya mano'yonaje, poquijeyonaje, de.

²⁷ Jesosaa me' iña cajje esho'i nequisohua'yonaje. Nequisohua majje quea aja nee po'yonaje.

²⁸ Quijje ojjaña cuana poqui majje Jesosa equi yasijje dobiquinaje o shajja'ajjajji cuana nijje. Oeya Jesosa huohui'ajja canaje: —Jesosa, ¿yajjajo acuae ecuayaya eshahua mi huoojeacuayajja'ajjaña?

²⁹ —E'e —Jesosa poanaje—, jiquio eshahua quea huoojeacuayajja camaja. Eyacuiñajji nijje mimi huicha'a huicha'a majje ojo jjashahuabaquiani ijja'ijjia jjima po majje pea'ai ca ca oe huoojeacuayajja meeje'yo miyaya —Jesosa poanaje.

—Quijje eya manaje'yo —Jesosa poanaje
(Mateo 17.22-23; Noca 9.43-45)

³⁰ Oya cuana ma meshijo ani ojee poquinaje ojjaña Janinea meshi yasijje. Poquijeya Jesosaa o shajja'ajjajji ca ca oe sohuihuohui capoquinaje. Pea cuana sohuihuohui pajea canaje. ³¹ Jamajjeya Jesosaa o shajja'ajjajji cuana huohui canaje jama ba'a: —E'e, quijje eya iña meesahuaje onaja equecua'yojji. Quecua caje'yo cuaa. Jamatii beca cahuime po majje mo shequi mee caje'yo Eyacuiñajjiya.

³² O shajja'ajja majje quea yeno nee nee poanaje. Jamatii oya cuana quea mete poanaje ehuohui'ajjajji: —¿Yajjajo shai Jesosa mano'yome ca oya Eyacuiñajji huojea'yo ojjaña jaahuanajji? —oya cuana poanaje.

¿A'ya ona huojeajji jayojja nequije eyajo?

(Mateo 18.1-5; Noca 9.46-48)

³³ Majoya oya cuana Capenaoma huasijje poe'yonaje. Equi yasijje dobiq'yo majje Jesosaa o shajja'ajjajji huohui'ajja canaje jama ba'a: —Esey a ejiojijje poeje'yo ¿ajeo acuae nequiana jjanimicuijaje nobiajeaquijebeñaje so'o?

³⁴ Jamatii oya cuanaja Jesosa saja'a jjima. Quea bicho. Oya cuana poeje jjanimicuijaje nobiajeaquijebeñaje jama ba'a: —Jesosa quijje ona huojea'yojji poaje, eseya o jayojjaya poaje onijje ona huojea'yojji. ¿A'ya o pejejeo nequije, joya oja quea jea nee neeya?

³⁵ Jamajjeya Jesosaa anioque majje o shajja'ajjajji 12 huisome iyaa canaje o que. Jama acanaje ba'a: —¡Bacue! Miya e jayojja ona huojea'yojji po sa poanijo jama jjashahuabaquicue ba'a: “Ojjaña ecuea quea boti nee. Cajaanahua'yahua”. Jamaya poaje Eyacuiñajjiya miya ba caje quea pame nee ona huojea'yojji epojji.

³⁶ Majoya Jesosaa oe esho'i nei iyaa majje ojjaña cojja nei nequia canaje. ³⁷ Bishami majje jama poanaje ba'a: —¡Bacue! Ojjaña joya enijje japeequianiya jiquio esho'i quea jea ajji poaniya, eya pea'ai quea jea acani. Oya jayojja ojjaña cuaa ecuea epeeji quea jea acani, ohuaya eya pea'ai quea jea acani. Jamajje ecue Chii, e huojea'yojji quea jea acani pea'ai.

¿A'ya Jesosaja epeeji poani?

(Mateo 10.42; Noca 9.49-50)

³⁸ Jamajjeya Huaniya Jesosa huohui canaje jama ba'a: —Esohui huohuijji Jesosa, ecuaaya pea dejja banaje eshahua cuana huojeacuayajea cani. Ma dejja poanaje jama ba'a: “Eyaya eshahua huojeacuayajeaña Jesosa nijjeya, ojaya epeeji poaniya”. Ma dejja ese nijje poqui ajjajo, oya tecueanaje jama ba'a: “¿Apiojji? Chojja, miya ecuaana nijje poqui ajja; ¡a'a eshahua huojeacuayajejji!” ecuaaya oya anaje —Huani poanaje.

³⁹ Jamajjeya Jesosa jama poanaje ba'a: —¡A'a oya tecueajji! Ohuaya enijjeya acani ma dejjaa ajjima acani. Jamajjeya, ohuaya eya niñeba jjima acaje. ⁴⁰ Ojjaña joya ese niñeba ajja esejaya epeeji nei poani. ⁴¹ E'e jojo nei ojjaña joya e shajja'ajjajji poani ba'e meesahua cani, ena quia cani pojja'a eya ojaya quea boti nee, Eyacuiñajjiya quijje oya sosequia caje'yo oya quea pame nee poanijo —Jesosaa o shajja'ajjajji cuana huohui canaje —.

⁴² Ecuea epeeji eyacua esho'i nei jama. Joya o mimishi po meeji poani ca ca Eyacuiñajjiya quea nee nee po mee caje'yo, de, quea nee tii tii. ¡Jamajjeya quea mimishi epo mee ca cuahuaje oe mano'yocue! E'e, onaya mei enaajo yiipeca mee majje ¡bae quea doe yasijje jjaeja'oqueajea meequi'yocue! ⁴³ ¡Jamajjeya a'a quea mimishi po meeji cuana! Jamajjeya miya emejo quea mimishi po sa po majje ¡eme' ejajasejjajea jayojja jama acue mimishi'ama epojji! Eme' chamajo eyahuasijje poquiyajo Eyacuiñajji nijje eba'e tiiti'yojji quea pame nee nee poaje'yo. Miquea beca eme' yanijo pojja'a quea mimishi tii poani ca ca cuaqui yasijje poquije'yo. ⁴⁴ Quea tai nee nee, quea nee nee poaje'yo. ¡omajo cuaqui jiji tiitiije'yo; quijjo'yo ajja tii tii, de. Jamajjeya ¡mimishi pajea'yocue! ⁴⁵ Oya jayojjaya miya ejiojjiya quea mimishi po mee canijo, ¡ejiojji ejajasejjajea jayojja jama acue! Ejojji chamajo eyahuasijje poquiyajo Eyacuiñajji nijje eba'e tiiti'yojji quea pame nee nee poaje'yo. Miquea beca ejiojji yanijo pojja'a quea mimishi tii poani ca ca cuaqui yasijje poquiyajo quea tai nee nee, quea nee nee poaje'yo. ⁴⁶ Cuaqui jiji tiitiije'yo; quijjo'yo ajja tii tii. Jama tii tii poaje'yo.

⁴⁷ Cuanaya ecojjajo jbaquai majje miya quea mimishi poani pojja'a. ¡Jamajjeya ecojja ecajajaja jayojja jama acue! Cojjama', mimishi'ama miya eyahuasijje poquiyajo Eyacuiñajji nijje eba'e tiiti'yojji quea pame nee nee poaje'yo. Cojjajji quea mimishi tii poani miya cuaqui yasijje poquije'yo ca ca quea tai nee nee, quea nee nee poaje'yo tii tii. ¡Jamajjeya mimishi pajea'yocue! ⁴⁸ Cuaqui quijjo'yo ajja tii tii, de —Jesosa poanaje.

⁴⁹ —Ojjaña ecuea epeeji poanija eba'eji quea camaja poaje onaa tecuea cajje. Jamaya ecuea epeeji quea pame, quea ca'a pocue jama ba'a: ⁵⁰ ¡iquio ecua mei seseya, sane quea pame nee'ya bobi shicuijajo ihui'yo ajja jayojja jama ecuea epeeji quea pame nee ba'e'yanijo, pea cuana o jayojja jama ba'eje quea pame nee pea'ai. Jamatii sane sese'ama poajo, ¿a'a quea sese po meeje o'oya? Chojja, sese'amajo jeajea'aña seya. ¡Jamajjeya mei sese quea pame jama pocue, sane jama! ¡Pea cuana quea pame nee ba'e meesahuacue,

ecue sohui jama! ¡Pea cuana nijje quea pame nee jjapeequicue! ¡Quea bei pocue pea'ai!
—Jamaya Jesosaa o shajja'ajjajji cuana huohui canaje.

10

Jesosaa esohui huohui canaje ehueijji

(Mateo 19.1-12; Noca 16.18)

¹ Majoya esohui huohui majje Jesosa Capenaomajo ani po'oquequinaje Jodea meshi yasijje, Jodana cuei ojje miji yasijje. Jomajo quea huiso nee nee o que jjachichaqui o'oyanaje. Jesosaa ojjaña cuana sohuihuohui canaje, ohuaya ojjaña meshi yasijje esohui huohui majamaya canaje jayojjaya. ² Paniseo cuana ca ca o que poeyanaje jjadasiaquiya nisho. Jjashahuabaquinaje jama ba'a: —E'e pojja'a Jesosa Moisesija etehue'yo jayojja jama pojjeama mimije. Jamajjeya ecuaaya oya tecueaje —poanaje.

Poe majje Jesosa huohui'ajja canaje cuaa jama ba'a: —Esohui huohuijji, ¿a'a cuae ehuanase huei cajji? ¿Yajjajo acuae ehuanase huei cajji so'o? ¿Achajja tehuemeya acuae oe Jodioja etiiquianaa aca poa?

³ Saja'a canaje Jesosaa: —¿Yajja acuae Moisesija esohui etehue'yo poani so'o?

⁴ —Moisesiya jama tehueme aca poa ba'a: “Huei'yo majje yahueya ehueijeajji papeni etehue'yo caquia cahua oja huanase que. Majoya cahuojea cahua” —poanaje Paniseo cuana.

⁵ —E'e —Jesosa poanaje—, etiiquiana quea mimishi nee neeya jjejojya Moisesiya huei mee'ajja canaje. Quijje nei Moisesiya jamaya tehue ca poa; jamatii Eyacuiñajjiya jama pojjeama pana coo ca poa. ⁶ Yahuaajo nei nei Eyacuiñajjiya pana coo ca poa yahue, epona pea'ai. ⁷ Huohui ca poa ohuaya: “Jamajjeya yahue cajjaba'eshiñaquiahua ojaya ehuanase nijje eba'ejji”. ⁸ Oya cuana beca; jamatii oe nei jayojja Eyacuiñajjiya oya ba cani; becanejjijji pea'ai pojjeama; oe nei jayojjaya. Cuanaya Eyacuiñajjiya oe jayojja aca poa. ⁹ ¡Jamajjeya a'a oe jeha meejji! ¡A'a hueijji nequial! ¡Jama tii tii oe nei oe acue! Jamaya Moisesiya yahuaajo nei tee ca poa pea'ai —Jesosaa acanaje.

¹⁰ Majoya o shajja'ajjajji cuanaa Jesosa nijje equi yasijje dobiqumajje ojaya esohuijo huohui'ajja canaje. ¹¹ Jamajjeya Jesosaa oya cuana jama acanaje ba'a: —Eyaya miya huohuiaña e'e jojo nei ehuanase pea dejjaja sii jjima huei ca ajja. Dejja ehuanase hueijji epo pea epona ehuaana'yojji quea mimishi nee, epona siijji epo jama. Eyacuiñajjiya oya ba cani quea mimishi, pea cojjojji. ¹² Oya jayojja epona ojaya yahue ¡a'a huei meejji! Yahue huei'yo majje pea dejjajo ejjahueaquijji quea mimishi nee poani, yahue siijji epo jama. Eyacuiñajjiya oya ba cani quea mimishi, pea cojjojji —Jesosaa acanaje.

Esho'iquianaajo Eyacuiñajji nijje miminaje Jesosa

(Mateo 19.13-15; Noca 18.15-17)

¹³ Majoya Jesosa que esho'i nei cuana jjequi canaje cuaa. Huohui canaje: —Jesosa, ¡jiquio esho'i nei sapa napa'ajja majje Eyacuiñajji nijje mimicue ojaya ejaahuanajji! —poanaje.

Jesosaa shajja'ajjajji cuaa ca ca oya cuana tecuea canaje: —¡A'a jja oe Jesosa que jjequi majajji esho'iquiana! ¡Esohui oe cahuhui cahua! —acanaje.

¹⁴ Ma ba majje Jesosa quea yeno nee poanaje. Etii cuana tecuea canaje jama ba'a: —¡Esho'iquiana e que capoe'yahua! ¡A'a quea huesha nequi meejji! E'e, ojjaña esho'iquiana Eyacuiñajji nijje jjapeequi sa poani. Jamaya ecuea epeeji esho'i jayojja eyaya jaahuana sa aña pea'ai. Jamajjeya e que poquije'yo; eya eyajo ojjaña huoojea'yojji poaje. ¹⁵ Jamajjeya e'e jojo nei esho'i nei jayojja mi po'yajo ca ca enijje eba'e'yojji pojjeama quijje eya ojjaña huoojea'yojji poaje —Jesosaa poanaje.

¹⁶ Majoya esho'i nei cuana bishami majje, sapa biajje eme' huana majje Jesosa Eyacuiñajji nijje miminaje jiquio esho'iquiana jaahuanajji.

Edeja sho'i pishana quea aquiana huiso

(Mateo 19.16-30; Noca 18.18-30)

¹⁷ Majoya Jesosa o shajja'ajjajji cuana nijje poqui o'oyanaje Jodea meshi yasijje. Oe dejja o que cuajicuaajjebenaje. Ecui'oshajjajo nequi oya Jesosa nijje jama poanaje ba'a: —Esohui huohuijji, miya ca ca oe quea pame nee nee. Eya huohuicue ¿achajja a mo eya poquije'yo eyahuasijje eba'e tiitii'yojji Eyacuiñajji nijje? ¿Ae quea pame amajje eyahuasijje poqui ca'yojji? —poanaje.

¹⁸ O jjabahuejaquijji Jesosaa huohui canaje: —E'e, miyaya eya anaje jama ba'a: “Miyaca ca oe quea pame nee”. Eyacuiñajji ca oe nei quea pame nee. Pea chama' o jayojja quea pame nee nee. ¡Jamajjeya eya shajja'ajja neineicue! ¹⁹ ¡Eyacuiñajji nijje ba'e tiitii'yo sa po majje ojaya etehue'yo jayojjaya jama oe ba'ecue tii tii! Ojaya esohui ma Moisesiya tehue ca poa miquea eba jama ba'a:

“¡A'a pea quecuajji!

¡A'a pea siijji!

¡A'a sii pojji!

¡A'a siajje pojji!

¡A'a onaya dasiajji!

¡Mique chii, miquea enaese pea'ai oe shajja'ajjacue!"

—Jesosa poanaje.

²⁰—E'e, eyaya jamaya aña, jama tii tii esho'yahuaa. ¿Pea acuae yajja po cajji eyajo eba'e tiitii'yojji? —jiquio dejjaa Jesosa huohui'ajja canaje.

²¹Jesosaa oya ba neinei canaje, oya quea boti nee nee poanaje. Jamajjeya jama acanaje ba'a: —E'e, epeeji, miya quea pame nee nee Eyacuiñajji jayojja po sa po majje ¡poquicue; miquea aquiana cuana quiaquicue ejjeshejji sosejje! ¡Majoya ejjeshejji quia'yocue aema' cuana huasijje! ¡Majoya poecue enijje epo'yojji! Jamajjeya eyajo Eyacuiñajjiya miya aquiana quea pame nee nee quea huiso nee quia caje'yo quijje.

²²Jesosaja esohui shajja'ajja majje ma dejja esho'i pishana quea yeno poanaje; ojaya aquiana quea huiso nee nee yani jojoya quia sa po'yo ajja. Jamajjeya poqui'yonaje quea aquiana yeno jjejojo.

²³Jamajjeya Jesosaa ojjaña bajea majje o shajja'ajjajji cuana huohui canaje jama ba'a: —E'e, quea mimishiya jjejojya aquiana quea huiso, meshi quea quemo pojja'a nahue canijo beca cuana beshahua nei e que poqui ajja quijje, eya eyajo ojjaña huoojea'yojji poaje'yo.

²⁴O shajja'ajja majje jashahuaba neineiquinaje oya cuana. Ojee miminaje.

Jamajjeya Jesosaa jama acanaje ba'a: —Ecuea epeeji cuana, eyaya e'e jojo nei huohuiaña jama pea'ai ba'a: ²⁵Ahuoja quii huejjajje ino jeanobiaña jama ¿a'a mapichi jeanobia cajji ahuoja quii huejjajje? Cho. Quea camaja coma. Jiquio ecua mapichi ahuoja quii huejjajje jeanobia cajji jojjemo dejja quea aquiana huiso nee nee dobiqúi'yome eyahuasijje.

²⁶—¡De! Jamajjeya ¿a'ya shai eyahuasijje dobiqúi mee caje'yo Eyacuiñajjiya? —oya cuana ojee mimimiminaje.

²⁷Cojja ba neinei canaje Jesosaa. Huohui ca o'oyanaje: —Dejjaa jama amee ajja tii. Eyacuiñajjiya oe nei ojjaña acani. (Eyahuasijje dobi meequí cani joya quea aquiana huiso nee pea'ai) —Jesosaa acanaje.

²⁸Jamajjeya Peno jashahuabaquinaje ma dejja quea aquiana huiso nee nee jeana'yo sa po ajjajo. Huohui'ajja canaje: —Jesosa, ecuaaya ojjaña aquiana jeana'yonaje minijje epoqui'yojji. Jamajjeya ¿a'a cuee ecuaa eyahuasijje poquije'yo? ¿Ae acuae ecuaa quiaje so'o, de? —acanaje Penohua.

²⁹—E'e jojo nei beca cuaa ecuea esohui jama asa poanijo aquiana cuana jiña cani. Ojaya equi, oja huapa pojjeama, oja chii, oja nae pojja'a, oja bacua cuana pojja'a jiña cani enijje japee neineiqui'yohua, ecuea esohui quea pame nee quea huesha huohuiya pea'ai.

³⁰Jamajjeya e'e jojo nei Eyacuiñajjiya oya cuana quea huiso nee nee o jayojja quia caje'yo equi, huapa pojjeama jayojja, echii mese jayojja cuana, enaese jayojja cuana, ebacua cuana jayojja jama pea'ai. Mimishi cuaa ca ca oya cuana napa caje pea'ai. Jamatii quijje oya cuana quea bihui nee nee ba'e tiitii mee caje'yo pea'ai eyajo onijje. ³¹Jamatii beca cuana jjeja ona huoojeajji poani eyajo ona huoojea'yojji pojjeama poaje'yo. Joya jjeja ona huoojeajji pojjeama ca ca eyajo ona huoojeajji nei nei poaje'yo e jayojja —Jesosaa Peno acanaje.

—*Quijje eya manaje'yo —Jesosa po o'oyanaje*

(Mateo 20.17-19; Noca 18.31-34)

³²Majoya Jenosanena huasijje poqui o'oyanaje. Jesosa ehui dojji poquinaje. O shajja'ajjajji cuana, pea cuana o quishishijji poquiani pea'ai quea mete jashahuabaquinaje jama ba'a: —Jenosanena huasijje poquiyajo, ¿yajja Jesosa acaje Jodio etii cuaa? ¡Quecua ca chana', de!

Jamajjeya Jesosaa o shajja'ajjajji cuana dojo canaje ejiojji sahua huasijje esohui huohuijji. Jama poanaje ba'a: ³³—¡Shajja'ajja neineicue mo! Eya jiquio ojjaña Edoe Mese. Eseyá Jenosanena huasijje poquije. Jomajo mo Jodio etii cuana iña meesahuaje equecua mee'yojji. E'e, Moisesija etehue'yo huohuijji, Eyacuiñajji nijje emimijji etii cuana pea'aiya eya iña mee caje. Taaa neineije cuana: “¡Oya quecuajeacue!” poaje. Jodio pojjeama cuana huasijje mo huoojea caje equecua mee'yojji. ³⁴Ejo soa neineije cuana; cuia caje'yo mo cuaa huaca jee ejeapashajjajja; acui ecueata'apeejo me cacajea majje mo ba'ehuanasohuajea caje'yo cuaa emano'yojji. Jamatii mo beca cahuime po majje Eyacuiñajjiya shequi mee caje'yo —Jesosaa huohui canaje.

Semeneoja bacua ejja Jesosa nijje miminaje o pejejo enequi mee'yojji eyajo

(Mateo 20.20-28)

³⁵ Majoya Semeneoja bacua eja Jacobo, Huani pea'ai Jesosa que poeyanaje. Jama poanaje ba'a: —Eshui huohuijii Jesosa, ¡che ecuanaja esohui mi nije jama acue ecuanajo! —poanaje.

³⁶ Jesosa onijje jama poanaje ba'a: —Ecuea epeeji cuana, ¿ae sa poani miqianaya?

³⁷ —Jesosa, ecua mi pejejo canequi'yahua quijje miya ojña huoojea'yoyji quea ca'a nee nee poaje. Oe shani mijijje, pea ebiane mijijje canequi'yahua minijje ona huoojea'yoyji epoyji. ¡Jamaya oe acue! —poanaje Jacobo.

³⁸ —Chojja, miqianajaya ba jima eya quea nee nee po mee caje'yo cuaa. ¿A'a miqiana e jayoyja quea nee nee po majje quea ca'a poaje'yo? Eya quecua caje'yo pea'ai cuaa. Enijje japee neineiquianijo miqianaya quecua caje'yo pea'ai pojja'a cuaa. ¿A'a jamatii miqianaya quea ca'a poaje'yo? —Jesosa poanaje.

³⁹ —E'e —saja'a canaje Jacobo, Huani pea'aiya—. Quea ca'a poaje mi jayoyja, jamatii quea nee nee po mee caje'yo, jamatii quecua caje'yo cuaa.

—E'e —Jesosa poanaje—, jamajjeya e'e jojo nei miqiana e jayoyja quea nee nee po mee caje'yo cuaa; e jayoyja quea ca'a nee nee poaje'yo onaa mano mee ca'yajje. ⁴⁰ Jamatii e ebiane mijijje, e shani mijijje pea'ai eyajo eyaya miqianaya enequi mee'yoyji pojjeama, enijje ona huoojea'yoyji poaje. Chojja, ecue Chii eyajo aniya yahua jo nei pea cuana babaca ca poa. Ohuaye nei nequia mee caje'yo e ebiane mijijje, e shani mijijje pea'ai eyajo quijje, eya ojña huoojea'yoyji poaje —Jesosa poanaje.

⁴¹ Jesosa pejejo nequi sa pea'ai poanijo onijje ona huoojea'yoyji epoyji, Jacobo, Huani nije pea'ai quea quene poanaje pea shajja'ajjaji cuana, ome mijijje pea'ai. ⁴² Jamajoya aje oe Jesosaa oya cuana iyaa canaje. Huohui canaje: —¡A'a onijje quea quene pojji! Miqianajaya eba dejja cuana, Eyacuiñajijja epeeji pojjeama. Onajaya emeshi mese cuana, ona huoojeajji cuana pea'aiya pea cuana huoojea neinei cani; quea tecue nee nee poani, quea mase. ⁴³ ¡A'a jamaya pojji miqianaya, ecuea epeeji cuana! ¡E jayoyjaya po sa poanijo pea cuana ba'e meesahuacue! ¡jaahuanacue pea'ai! ⁴⁴ Joya ona huoojea'yoyji po sa poani ca ca echacoyji sosema' jayoyja capohua. ⁴⁵ E'e, ¡e jayoyja jama pocue! Eya ojñañaja Emeshi Mese nei. Jamatii eya ca ca iña ojñañaja Edoe Mese eyajo ani poeyanaje ojñañaja ba'e meesahuua; ojñañaja eya eba'e meesahuajji pojjeama. Ojñañaja mimishi sosequia'yoyji mo manoye'yo, ojñañaja cuaqui yasijje epoqui'yo poaje jjejojya —Jesosa poanaje.

Batimeo, Timoteo ja bacua quea cojja ja'a po mee ca'yonaje
(Mateo 20.29-34; Noca 18.35-43)

⁴⁶ Jenosanena huasijje poquije Jesosa o shajja'ajjaji cuana nije dobiquinananaje Jenico huasijje. Majoya quijje pishana poqui o'oyanaje ejiojijje. Quea huiso nee nee poquinaje onijje cuana. Batimeohua, Timoteoja bacua ejjaa ejiojji sahuajje e'anioqueaniya shajja'ajja canaje Jesosa poeje. Oya cojjama'. ⁴⁷ Jamajjeya taaa neineinaje jama ba'a: —Jesosa, miya emeshi mese Dabija osecua, ¡ejo jashahuabaquicue quea yeno! —taanaje.

⁴⁸ —¡A'a oe taaa majajji! ¡Eshui oe ca'acue! —acanaje cuaa.

Jamatii taaa neineinaje cojjama': —Jesosa, miya Eyacuiñajijja esohui jayoyja jama poeyanaje, emeshi mese Dabija osecua. ¡Ejo jashahuabaquicue!

⁴⁹ Jamajjeya o shajja'ajja majje Jesosa nequiñaquinaje. Cojjama' iyaa mee canaje: —¡Oya cojjama' iyaa acue! —poanaje.

Jamajjeya cojjama' iyaa canaje cuaa: —¡Cojjama', poecuajicue oe! Jesosaa miya iyaa cani. ¡Quea bihui nee oe pocue! —poanaje.

⁵⁰ Jamajjeya Batimeo nequisohua majje daqui nei jea canananaje, Jesosa que poquicua-jinaje. ⁵¹ Poeyajo Jesosaa oya huohui'ajja canaje: —¿A'ya so'o, Batimeo? ¿Ae sa poani miya? —Eshui huohuijii, ¡miyaya iña jjacoyjabapoyjaqui mee'yocue, ecuea ecojja quea ja'a epo'yoyji! —poanaje Batimeo.

⁵² —E'e, Batimeo —Jesosa poanaje—, miyaya e'e jojo nei ejo jashahuabaquinaje eyaya miya jjacoyjaja'aqui mee'e'yo. Jamajjeya ¡quea bihui nee pocue! ¡Jeyahua nei Eyacuiñajijya miya quea cojja ja'a po mee caje'yo —Jesosa poanaje.

Jjeya nei oya jjacoyjabapoyjaqui'yonaje. Jesosajo quea bihui nee nee poanaje jjacoy-jaja'aqui mee ca'yajje. Jamajjeya Jesosa nije poqui'yonaje, Batimeo.

11

Jesosa Jenosanena huasijje poquinaje
(Mateo 21.1-11; Huani 12.12-19)

¹ Majoya Jesosa Jenosanena huasijje poquije pea cuiñajijjo nequiñaquinaje Mepajejo, ma Betania pejejo, acui yijejo, Onimo eyiyo pejejo. Nequiñacui majje o shajja'ajjaji becanejijji pea'ai huoojea canaje Jesosaa jama ba'a: ² —¡Poquicue miya Mepaje yasijje! ¡Dobiqui majje miyaya mapichi sisija bacua esho'i ai ejeyo nequia nequi bañaquicue! Dejja

o daasa biajje yahuajo e'anijji ajjima poa. ¡Ba majje pichocue; yecue e que! ³ Onaa: “¿Apiojji miyaya mapichi sisija bacua pichoaña so'o?” acajje: “Ecuanaja Emeshi Mese sa poani. Ohuaya huacuaya huoojea caje o'oya jiquiacua” saja'ame acue. Jamajje: “E'e, ocuae dojo'ajja joya mapichija bacua” acaje dejjaa Mepajejo ba'eya —Jesosa poanaje.

⁴ Jamajjeya oya cuana Jesosa shajja'ajjaji poquinaje Mepaje yasijje. Mapichi sisija bacua ejeyo nequia nequi ba cañaquinaje equi secue pejjejo. Ohuaya picho canaje. ⁵ Pea cuana jomajo nequi jama poanaje ba'a: —¿Ae poani miya? ¿Apiojji mapichija bacua pichoaña so'o?

⁶ Jamajje Jesosa shajja'ajjaji cuaa saja'a canaje: —Ecuea Emeshi Mese sa poani.

—E'e, ocuae dojo'ajja joya mapichija bacua —acanafe Mepajejo ba'e dejjaa.

⁷ Jamajjeya mapichi sisija bacua dojo canaje Jesosa que. Onajaya daqui ao cuana mapichi sisija edaasa biajje iya canaje Jesosa anisohuaquijji. Jesosa anisohuaquinaje ma mapichi esho'i aija daasa biajje. Anioquenaje. Ejiojijje poquinaje. ⁸ Ojjaña cuana ejjachichaqui nequica cuaa ojaya daqui ao cuana ejiojijjo jeapiihui canaje Jesosa jayajejequijji. Pea cuaa acui iña jajaseja canaje. Huana yiyoyiyo canaje ejiojijjo pea'ai quea huiso nee neeya. Jamaya yahuajo Jodio cuaa emeshi mese ja'ajjequi canaje, cuiñajji yasijje poeyajo. ⁹ Ojjaña ehui dojojji poquiani, Jesosa quiquishijji pea'ai taaa capoquinaje quea bihui nee nee: —¡Mi poeyajo ecuana quea bihui nee! Quea pame nee nee miya, Jesosa. ¡Eyacuiñajji eyajo aniya miya cajaanahua cahua! ¹⁰ E'e Jesosa, emeshi mese Dabi yahuajo ba'e miquea etiiquiana. Miya ojjaña Emeshi Mese nei poeyanaje. ¡Eyacuiñajji mi jaaahuanajji cabihuia cahua ojjaña! —taame poa quea bihui nee nee jjejojo.

¹¹ Majoya Jesosa Jenosanena huasijje dobiquinaje ojjaña cuana nijje. Eyacuiñajjija equi yasijje poquinaje. Dobiqum majje ohuaya bajea canaje ojjaña. Majoya siniajo oya Betania huasijje poquinaje cahuiya; ome miji pea beca, ¹² huismo o shajja'ajjaji poani nijje poquinaje.

Acui etona jjajja jayojja iquena bajjani sajjai mee ca'yonaje Jesosaa
(Mateo 21.18-19)

¹² Mecajjeahua oya cuana Betaniajo ani Jenosanena huasijje poe o'oyaje quea shoe poanaje Jesosa. ¹³ Ba canaje ejiojji sahuajo nequi acui etona jjajja jayojja. Acuiñajja ba'ajjaqui canaje. Chama' poanaje ejjajja. Eña oo pana nequi'yo, acuiñajja she pojjeama jiquio ba'ijo. ¹⁴ Jamajjeya Jesosaa huohui canaje: —¡Jamajje jamatii jjajjama' tii capo'yahua acui! Jamajjeya onajaya ejjajja e'ijjajji pojjeama tii.

Jesosa shajja'ajjaji cuaa Jesosaja emimi shajja'ajja canaje pea'ai. Jesosaa jama acanaje ojjaña jjabahuejjaqui meeji jama ba'a: Jiquio acui jjajjama' jojoya Jesosaa tecuea canaje jayojja jama Eyacuiñajjija Jodio cuana tecuea caje'yo jjashajja'ajjaqui ajja jojoya.

Aquiana quiajji poani Eyacuiñajjija equijo nequi cuana huoojeacuayajea canaje Jesosaa
(Mateo 21.12-17; Noca 19.45-48; Huani 2.13-22)

¹⁵ Majoya Jenosanena huasijje poe o'oya majje Jesosa ojaya epeeji cuana nijje Eyacuiñajjija equi yasijje poqui o'oyanaje. Dobiquinaje. Ba cañaquinaje quea huiso enequi, Eyacuiñajji nijje mimiani pojjeama. Chojja. Aquiana quia cani cuaa. Jamajjeya Jesosaa aquiana quiajji poani Eyacuiñajjija equijo nequi cuana huoojeacuayajea canaje; aquiana jjeshe poequi pea'ai huoojeacuayajea canaje. Aquiana cuana huojjeajea canaje; bejjo, pea bejjo sosejje quia cani cuanaja bejjo nequijji cuana jeapajjajea canaje; huia' quiajji pea'ajja huia' nequijji cuana jeabichajea canaje. ¹⁶ Ojjaña joya aquiana abojji huohui canaje: —¡A'a jja oe aquiana yedobijji jiquiacua! Eyacuiñajjija equi pejejo ojjaña jjachichaquiani esohui shajja'ajjaa —tecueame acanaje.

¹⁷ Jomajo Jesosaa jama acanaje pea'ai ba'a: —¡A'a Eyacuiñajjija equijo aquiana quiajji! Eyacuiñajjija esohui jama poani ba'a: “Ecuea equi ojjaña cuana ojjaña meshijo ba'e Eyacuiñajji nijje emimijji equi”. Miqianaaya ca ca siipojji nequijji jayojja amee aña Eyacuiñajjija equi.

¹⁸ Ma shajja'ajja majje Eyacuiñajji nijje emimijji etii cuana, Moisesija etehue'yo huohuijji poani pea'ai Jesosa nijje quea quene poanaje; oya Eyacuiñajjija huoojea'yo pojjeama posojo o quecua sa acanaje. Jamatii Jesosa iña jjima poa, quea meteya jjejojo. Quea huiso cuana Jesosaja esohuijo quea bihui nee nee poanaje. Jamajjeya Jesosa ojjaña quea nahue nee nee poanaje equocua'yojji.

¹⁹ Quijje siniajo Jesosa o shajja'ajjaji cuana nijje Jenosanenajo ani poqui o'oyanaje Betania huasijje cahuiya.

Acui etona jjajja jayojja esajjai'yo ba canaje
(Mateo 21.20-22)

²⁰ Mecajjeahua nei Jenosanena huasijje poe o'oyanaje. Jesosa shajja'ajjaji poani cuaa ba canaje acui esajjai'yo, ma Jesosaa tecuea canaje acui. ²¹ Ba majje Penohua niñeba ca'yonaje.

Jama poanaje ba'a: —¡Esohui huohuijji Jesosa, bacue! ¡Miya tecueajje jjeya nei sajjai'yonaje acui!

²² —E'e —Jesosa poanaje—. ¡Miya Eyacuiñajjijo quea ja'a nee jjashahuabaquicue! A'a jjashahuabaquijji jama ba'a: “E'e pojja'a Eyacuiñajjija eya shajja'ajja jjima”. ²³⁻²⁴ Chojja, jjashahuabaquicue jama ba'a: “Eyacuiñajjija e'e jojo nei nei ecuea ehuhui onijje jama acaje'yo”. Jamaya miya jjashahuabaquiao Eyacuiñajjija miya saja'a caje'yo. E'e, Eyacuiñajjija miya e jayojja jama ameesahua caje'yo pea'ai ma dejjaa ajjima acani —Jesosa poanaje—. ²⁵ Cuanaya miya Eyacuiñajjiji nijje mimianijo jiquiajja jjashahuabaquime pocue ba'a: “Onaya enijje mimijajinaje quea tai. Jamatii eya ojaya mimishijo quene'ama” jamaya pocue —Jesosa poanaje—. Jamaya jjashahuabaquianijo Eyacuiñajjiji miquea mimishijo quene'ama poaje pea'ai. ²⁶ Pea nijje quea quene tii tii poanijo ca ca Eyacuiñajjija eseja Chiija miquea mimishi ecuijea'yojji pojjeama —Jesosa poanaje.

Eyacuiñajji Jesosa huoojea'yojji poa

(Mateo 21.23-27; Noca 20.1-8)

²⁷ Majoya oya cuana Jenosanena huasijje poe o'oya majje Eyacuiñajjija equi yasijje dobiqúi o'oyanaje. Jesosaa esohui huohui canijo Jodio etii cuana, Eyacuiñajji nijje emimijji etii cuana, Moisesija etehue'yo huohuijji cuana pea'ai o que poeyanaje. ²⁸ Jesosa ojaya ba jjimajo huohui'ajja canaje: —¿Aya miya huoojea canaje jiquiacua? ¿Apiojji acuaeya esohui huohuaña so'o? ¿Apiojji acuaeya aquiana quiajji poani huoojeacuayajeanaje oma mecaje? —onijje mimijajinaje.

²⁹ Jesosaa oya cuana acanaje: —E'e, eyaya miya ebionei huohui'ajjaje. ³⁰ ¿Aya Huani huoojea canaje enaje ona besa meeya? ¿A'a Eyacuiñajjija? ¿A'a dejja cuaa pojja'a? ¡Huohuicue mo! Eyaya majoya huohuie e huoojea'yojji epo.

³¹⁻³² Shajja'ajja majje Jodio cuana ojee mimimiminaje: —¿Yajja saja'ame yajji esejaya? Quea mete ojjaña dejja cuanajo. Ojjaña ba cani Huani Eyacuiñajjija huoojea canaje esohui huohuiya. Jamajjeya: “Dejja cuaa Huani huoojea canaje” eseya aje se cuia ca chana'. “Eyacuiñajjija Huani huoojea canaje” eseya aje se oe jama acaje ba'a: “Jamajjeya ¿apiojji miyaya Huani shajja'ajja jjima aña?” Jesosaa acaje —jamaya Jodio cuana miminaje.

³³ Jamajjeya jjashahuabaqui majje Jesosa huohui canaje Jodio cuaa: —Cua'a, de. Ecuanaja ba jjima Huani huoojea'yojji epo —anisho canaje.

—Jamajjeya ecuea miya ehuhuijji pojjeama e huoojea'yojji epo —Jesosaa acanaje ma Jodio etii cuana.

12

Esohui ejjashahuabaquijji echacojji tajjo

(Mateo 21.33-46; Noca 20.9-19)

¹ Jesosaa ma Jodio etii cuana jama acanaje pea'ai ba'a: —¡iiquio shajja'ajjacue esohui ejjashahuabaquijji! Jama poanaje ba'a: Oe dejjaa emeshi meseya que quea quemo nee neejo bana canaje jjonojjajja oo pana, uva. Que peeyi canaje meija peeyi. Majoya que yiyesamajo mei cueehue iñaca canaje jjonojjajja na quishipashajji. Majoya mei iyasohua ao'ao majje peehuana canaje. Iya canaje que jaahuanajji, quea huesha nee ojaya ebajji. Pea echacojji cuana iyaa canaje. Huohui canaje equé meseya: “¡Ecuea que jaahuanacue! Jaahuana sosejje quiaje'yo oya jjonojjajja quea huiso nee” poanaje. Majoya equé mese quea huesha poquinaje. ² Quijje jjonojjajja jahuaajo, equé meseya o chacojji huoojea canaje que jaahuanajji que jjonojjajja jjequiya. Que jaahuanajji bañaqui majje huohui canaje jama ba'a: “¡Che mo jjonojjajja joya equé meseja pa cadojo'yahua, del!” poanaje.

³ —Que jaahuanajji cuaa quea mimishi jjejojo, jjonojjajja, uva quia'yo jjima acanaje, joya equé meseja iyatepe mee. Jamajjeya o chacosahuajji poani iña canaje, cuia canaje. Huoojea ca'yonaje jamatii, emejjee tii. ⁴ Equé meseya pea huoojea ca o'oyanaje o chacosahuajji. Jamatii yahuaajo jama acanaje que jaahuanajji cuaa. Sapa cuihuejjajjea'ajja canaje, quea mimishi acanaje pea'ai. ⁵ Quijje equé meseya pea huoojea, pea huoojea a'ajja canaje. Jamatii que jaahuanajjija jjonojjajja quia sa po'yo ajjaa jjejojo oya cuana iña canaje, cuijaje canaje, pea quecua canaje, pea sapa jajahuejjajjea canaje meiya. ⁶ Quijje yejje nei oja bacua ejja oe nei huoojea canaje que jaahuanajji baa: “¡E'e, oya cuana ecue bacua ejja shajja'ajja caje!” poanaje equé mese.

⁷ —Cho, oja bacua ejja poeje ba majje jama poanaje ba'a: “Joya equé meseja bacua ejja poeje. Jjonojjajja yije quijje ojaya poaje, ejeajji mano'yajo. ¡Cua'a, ejjaquecuajjeaqui oe! Jamajjeya que esejaya poaje'yo, de” poanaje que jaahuanajji cuana.

⁸ —Jamajjeya aje oe ebacua ejja iña canaje, quecuajjea'yo majje jeajjeaqui canaje quea huesha nee ma que jaahuanajji mimishi cuaa; equé mese boti'ama acanaje cuaa. Mahuiso esohui —Jesosa poanaje—. ⁹ Jamajjeya joya equé meseya poe o'oya majje ¿yajja acaje'yo

acuae jiquio que jaahuanajji quea mimishi cuana? Oya quea quene nee poaje'yo. Ma que jaahuanajji cuana quecuajea caje'yo, de. Que quia caje'yo pea cuana —Jesosaa acanaje.

¹⁰ —E'e —Jesosa poanaje pea'ai —, ¿a'a miquea eba Eyacuiñajjiya esohui etehue'yo yahuajo nei? Jama ejo poa ba'a:

“Oe equi yamajjana equi iyajji cajaa aca poa cuaa. Jamatii Eyacuiñajjiya ma eyamajjana equi yamajjana quea ca'a nee nequi mee ca poa.

¹¹ Jamajjaya ojjaña ojaya epeeji cuanaa Eyacuiñajji bihuia cani”.

Jamaya yahuajo nei aca poa ejo; eya ma eyamajjana equi iyajji jayojja jama quea ca'a nee nee nequi —Jesosaa acanaje.

¹² Jesosaja esohui shajja'ajja majje Jodio cuana quea quene nee poanaje: —¡De! Ecuanao oya mimiani, equi yamajjanajo pojjeama. Eseyá que jaahuanajji quea mimishi jama pea'ai ohuaya acani —poanaje Jodio cuana.

Jamajjeya Jesosa iña sa acanaje ejeanobiajeajji. Jamatii iña jjima; quea mete poanaje. Ojjaña dejja echicha'yo nequica'yo cuaa Jesosa Eyacuiñajjiya esohui huohuijji nei nei ba cani. Ojjaña cuanaja quea nahue nee nee Jesosa e'iñajji. Jamajjeya Jodio etii cuanaja Jesosa iña jjima, poquinaje.

Bejjo oe pojji quia caji ba'e sosejje emeshi mese yasijje

(Mateo 2.15-22; Noca 20.20-26)

¹³ E'e, Jesosa mimije shajja'ajja majje Jodio edejja tii cuana quea quene nee poanaje. Jamajjeya Paniseo cuana, pea cuana Enodeja ehuhui'yo quea boti nee poanaje pea'ai huoojea canaje Jesosa que. Jama huohuime acanaje ba'a: —¡Poquicue Jesosa dasiaa! ¡Esohui quea camaja nee huohui'ajjaquicue, ojaya yajja saja'ame ya'yoyji! Jamajje Moisesija etehue'yo jayojja jama mi saja'a cajo jeanobiajeaje'yo ecauaya —poanaje Jodio etii cuana.

¹⁴ Jamajjeya Paniseo cuana poquinaje Enodeja epeeji cuana nijje Jesosa baa. Ba majje huohui'ajja nisho canaje jama ba'a: —Esohui huohuijji, miyaya e'e jojo nei huohuiaña Eyacuiñajjiya ejjashahuabaquijji. Miya edejja tii cuanao jashahuabaqui ajja, emeshi mese cuanao pea'ai mete'ama. Jamajjeya quea ja'a nee huohuiaña. Jamajje mo che huohuicue: ¿A'a bejjo quia caji Shomano meshi mese Sesa bajjani yasijje? ¿A'a cuaeaya seya sosequiaje so'o Sesaja meshijo ba'e sosejje; equiajji pojjeama pojja'a esejaya? —acanaje cuaa.

¹⁵ Ma Jodio cuanaja ejjashahuabaquijji quea ja'a pojjeama Jesosaja eba poanaje. Jamajjeya: —¡Miquiana ca mi ca oe e dasiajji nisho cuana, epeeji nisho quea tai nee nee! ¿Apiojji eya dasia sa aña? ¡Jamatii oe bejjo esodojjo jjequicue ecuea ebajji! —Jesosaa poanaje.

¹⁶ Jjequi canaje cuaa. Esodojjo ba majje Jesosaa huohui'ajja canaje: —¿Ae ecajja'yo jiquio? ¿Ae bajjani etehue'yo?

—Emeshi mese ecajja'yo, Sesa —poanaje—. Ojaya bajjani etehue'yo yani pea'ai.

¹⁷ —E'e —poanaje Jesosa—. ¡Jamajjeya Sesaja bejjo quiaquicue ohua sa cajo! ¡Eyacuiñajji a'a pajea'yoyji; oya bihuiaque, shajja'ajjacue pea'ai!

Jesosaa shajja'ajja majje ojjaña cuana quea mete nee poanaje: —Quea jashahuabaqui ja'a nee nee oya Jesosa. Jjadasia meequi ajja —poanaje.

Jamajjeya Jodio etii cuana poquinaje, Jesosa jea cana'yonaje.

¿A'a e'e jojo nei mano'yo majje eshe o'oya quijje poaje'yo?

(Mateo 22.23-33; Noca 20.27-40)

¹⁸ Ma pojjaajo tii beca Sanoseo cuana poeyanaje Jesosa baa. Sanoseo cuana aje oe jama poani ba'a: —Mano'yo majje jama tii tii eshequi o'yoyji pojjeama quijje.

Jesosa ca ca jama po ajja. Jamajjeya Jesosa dasia sa acanajejo jama anisho canaje ba'a:

¹⁹ —Esohui huohuijji, Moisesiya jama tehue ca poa yahuajo nei nei ba'a: “Dejja ejjahua-naqui bacuama' mano'yajo, oja chahuaa ehuanase equijjojea ani cahuana ca'yahua oja o'ija bacua jea jayojja jama epojji”. ¿A'a e'e? ²⁰ Jamajjeya jama poso ba'a: Quea huiso edoe mese, me oejje pea beca, nequinaje. Edoe mese ebionei jahunaaquinaje eponajo. Mano'yonaje bacuama' tii. ²¹ Oja chahuaa ehuanase equijjojea ani huana ca'yonaje, bacuama' tii ani. Oya jayojja mano'yonaje bacuama' tii. Jamajjeya peaa echahua meseya huana ca o'oyanaje. Mano'yonaje bacuama' pea'ai. ²² Jamaya ojjaña edoe mese cuana manojeyo'yonaje bacuama' tii. Quijje ehuanase pea'ai mano'yonaje. ²³ Jamajjeya eshe o'oya po majje eyajo, ¿ajea ehuanase epona poaje, ache edoe meseja? Ojjaña echahua mese jjahuea'ajja'yo epo —Sanoseo cuaa acanaje Jesosa dasiajji nisho.

²⁴ Jesosaa jama acanaje ba'a: —Chojja. Jamaya pojjeama. Miquea ba jjima Eyacuiñajjiya esohui; oya quea ca'a nee nee miquea ba jjima pea'ai. ²⁵ E'e, shequi o'oya majje jjahua-naqui'yo ajja. Esohuidojojji eyajo ani jama poaje. ²⁶ E'e, yahuajo nei nei Eyacuiñajjiya Moisesi tehue mee ca poa miquea ebajji e'e jojo nei emano'yo cuana eshe nequije o'oya eyajo. E'e, Moisesi acui quepe jiqui pejejo nequi, Eyacuiñajjiya oya huohui ca poa jama ba'a: “Eya ca ca iña Amajama jaahuanajji, Isaaca, Jacobo pea'ai jaahuanajji”. Jamaya

yahuajo nei nei Eyacuiñajjiya aca poa. ²⁷ ¿A'A Eyacuiñajjiya emano'yo cuana meshijo emojea'yojaa jaahuana cani? Cho. Ojaya epeeji cuana eshe nequi, mano'yo majje poqui'yo cuana pea'ai jaahuana cani Eyacuiñajjiya, eshe o'oya epo'yo edojjoshahua jiquio ese mimianinaje. Jamajjeya e'e jojo nei emano'yo cuana shequije o'oya, de. Miqianaya ca mi ca oe quea quehua jjashahuabaquiani —Jesosa Sanoseo cuana acanaje.

¡Eyacuiñajji quea jea nee acue mi pejejo nequi cuana pea'ai!

(Mateo 22.34-40; Noca 10.25-28)

²⁸ Moisesija etehue'yo huohuiji jomajo nequi Jesosa shajja'ajja canaje quea jjashahuabaqui ja'a nee; Sanoseo cuana jjadasia meequi ajja. Jamajjeya Jesosa huohui'ajja canaje jama ba'a: —Esohui huohuiji, yahuajo Moisesiya tehue ca poa Eyacuiñajjiya esohui. ¿Ache esohui quea pame nee nee e'ajji?

²⁹ Jesosaa oya acanaje: —E'e, jiquio esohui quea pame nee jayojja jama acue ba'a: “¡Isaeni cuana shajja'ajjacue! Eyacuiñajji ca ca oe Emeshi Mese nei. Oya oe nei enequi tii. Pea chama' Eyacuiñajji. ³⁰ Jamajjeya ¡Eyacuiñajji miqianajaya Emeshi Mese quea jea nee nee acue! ¡E'e, miqea huapa pojjeama cuana quea jea nee acue! ¡Quea jea nee neeya oe acue Eyacuiñajji! ¡Jamajje ojo jjashahuaba tiitiqicue! ¡Oya shajja'ajja tiitiqicue! ¡Ojaya epeeji quea ja'a nee nee acue pea'ai!”

³¹ Jiquio esohui quea pame nee. Pea oya jayojja quea pame nee jama ba'a:

“¡Miquea huapa pojjeama jama quea jea neeya oe acue! ¡Ojjaña pea cuana quea jea nee nee acue pea'ai!”

Jamaya quea pame nee nee e'ajji —Jesosa poanaje—. Pea chama' esohui jiquio jayojja quea pame nee nee.

³² Jesosaja esohui shajja'ajja majjeya Moisesija etehue'yo huohuiji onijje jama poanaje ba'a: —Esohui huohuiji Jesosa, miquea esohui e'e jojo nei. E'e jojo nei Eyacuiñajji Emeshi Mese nei. Oya oe nei enequi tii, pea chama' Eyacuiñajji. ³³ Jamajjeya Eyacuiñajji Emeshi Mese nei quea jea nee nee ca'a cahua, ojo cjjashahuaba tiitiqiahua, cashajja'ajja tiiti cahua, ojaya epeeji quea ja'a nee nee capohua pea'ai ojjaña. Oya jayojja pea cuana quea jea nee nee ca'a cahua. Jamaya poanajo quea pame nee nee poani. Jodio etiiquiana cuana jayojja jama po majje ca ca quea pame pishana poani. E'e, etiiquiana cuaa ca ca huo cuana, pea aquiana pea'ai mei e'iya'yo biajje dahua caninaje Eyacuiñajji quea bei po meeji mimishijo —poanaje Moisesija etehue'yo huohuiji.

³⁴ Ojaya esohui quea ja'a nee shajja'ajja majje Jesosaa oya huohui canaje jama ba'a: —E'e, miya beshahua nei Eyacuiñajji sa neinei miquea Emeshi Mese nei epoji —acanaje.

Jesosa quea jjashahuabaqui ja'a nee neejo jjadasia meequi ajja ba majje ojjaña Jodio etii cuana quea mete poanaje. Esohui quea camaja, yajja sohui esaja'ame yajjiyo huohui'ajja pajea canaje o dasiajji nisho.

Jesosa Eyacuiñajjiya huoojea'yo ojjaña jaahuanajji Quito

(Mateo 22.41-46; Noca 20.41-44)

³⁵ Jamajjeya ojjaña cuana ejjachichaqui nequi huohui'ajja canaje Jesosaa: —¿Yajja poani miqianaya Eyacuiñajjiya huoojea'yo ojjaña jaahuanajji Quitojo? ¿Ache etiiquianaja osecua oya, ajea bacua? ¿Yajjaje acuae Moisesija etehue'yo huohuiji cuaa huohui cani? Jama ba'a: “Quito emeshi mese Dabija osecua, ma yahuajo ba'ya poaja” acani cuaa —Jesosa poanaje—. ³⁶ Yahuajo nei Edojjoshahua Pameya emeshi mese Dabi tehue mee ca poa jama ba'a: “Eyacuiñajjiya ecuea Emeshi Mese Quito jama aca poa: —[Enijje anioquecuc ebiane mijiije, ojjaña cuana huoojea'yojji! Eyaya mi quecuajji nisho epo cuana jeabichajea jeyoje'yo”.

Jamaya huohui ca poa yahuajo Dabiya ojo. ³⁷ E'e, Dabiya Eyacuiñajjiya huoojea'yo Quito aca poa: “Ecuea Emeshi Mese nei”. Jamajjeya Quito Dabiya Emeshi Mese nei poani. Jamatii oya Dabiya osecua pea'ai —Jesosaa acanaje.

Ojjaña cuaa ejjachichaqui nequiya Jesosaja esohui shajja'ajja canaje. Quea bihui nee poanaje.

—¡A'A Jodioja esohui huohuiji jama ba'ejji! —Jesosa poanaje

(Mateo 23.1-36; Noca 11.37-54, 20.45-47)

³⁸ Majoya Jesosaa ojjaña cuana huohui canaje jama ba'a: —¡Jodio esohui huohuiji cuana jayojja jama a'a ba'ejji! Oya cuana daqui quea pame nee nee, quea ao nee huosho cani onajaya ebaji. Ejiijije poquiiani ojjaña aquiana quia cani yasijje anicuaa; pea cuaa jama bihuia cani ba'a: “¡Esohui huohuiji, miya quea pame nee nee!” Jamaya aje oe ojaya quea boti nee, jiquio Jodio etii cuanaja, esohui huohuiji quea pame nee poso jjabaquiani —Jesosa poanaje—. ³⁹ Jodioja equi ejjachichaquijji ebionei anioque sa poani, Eyacuiñajjiya esohui huohuiji pejejo, ojjaña nijje emimiji. “E'e, oya cuana Eyacuiñajjiya esohui huohuiji

nei jayoija quea pame nee” epo meeji acani. Ojee ijia'ijianijo emeshi mese pejejo anioqueani, ebionei e'ijia'ijiaiji. ⁴⁰ Jamatii oya cuana aje oe siipoji; e'ahuemanoja equi cuana sii cani. Majoya Eyacuiñajji nijje mimi nishoani quea huiiso nee. Jamajoya Eyacuiñajjiya oya cuana cajaa acaje'yo. Quijje quea nee nee po mee caje'yo, quea nee tii tii poaje'yo. Pea cuana ca ca quea nee po mee caje'yo. Jamajjeya ja'a oya cuana jayoija jama ajji! —Jesosa ojjaña cuana huohui canaje.

E'ahuemanohua ejjesheji quia canaje
(Noca 21.1-4)

⁴¹ Majoya Jesosa Eyacuiñajji equijo ejjesheji iyajji pejejo anioquenaje. Ba canaje dejjaa quea huiiso poe majje ejjesheji iyanobia cani ma acui ecaca huasijje Eyacuiñajji yasijje equia'yojji. Joya quea aquiana huiiso neeya iyanobia canaje quea huiiso nee ejjesheji. ⁴² Majoya e'ahuemano aema' poeyanaje. Ojaya ca ca esodojjo beca iyanobia canaje, sosema' pishana. ⁴³ Jamatii oya ba majje Jesosa o shajja'ajajji cuana iyaa canaje. Jama poanaje ba'a: —¡Bacue! E'e jojo nei jiquio e'ahuemanohua quea huiiso nee nee jayoija quia ca'yonaje. Pea cuana oe pojji jayoija quia ca'yonaje. Jamaya Eyacuiñajjiya oya ba cani. ⁴⁴ E'e, pea cuana quea aquiana huiiso nee nee. Oe pojji ojaya aquiana quia canaje. E'ahuemano ca ca aema' nei nei. Ohuaya ojjaña ojaya ejjesheji quia canaje; bobi jjesheji yajji nisho quia canaje pea'ai —Jesosa poanaje.

13

Eyacuiñajjiya mei equi cajjajeajea caje'yo cuaa
(Mateo 24.1-2; Noca 21.5-6)

¹ Majoya Jesosa Eyacuiñajji equijo ani poquinaje. Poquianijo, o shajja'ajajji cuaa oya huohui canaje jama ba'a: —¡Bacue Eyacuiñajji equi! Quea quemmo, quea pame mei cuana —poanaje.

² —E'e, ¿a'a jiquio equi quea pame nee baña? E'e jojo nei quijje mei cuana cajjajeajea caje'yo cuaa. Chama'yo tii acaje'yo —Jesosa poanaje.

Jiquio ojjaña aquiana oe poaje'yo
(Mateo 24.3-28; Noca 21.7-19)

³ Majoya Jesosa poquinaje quea huesha pishana, enata'a ojje miji yasijje. Eyiyo Onimo acui yiye yasijje jaasohuaquinaje. Anioquenaje. Jamajje o shajja'ajajji cuaa, Penohua, Anesiya, Huaniya, Jacobohua pea'ai oya huohui'ajja canaje jama ba'a: ⁴ —Jesosa, ¿ache shono acuae mei cuana cajjajeajea caje'yo cuaa so'o? ¿A'ya ba majje acuae ecuaña jjabahuejjaquije so'o ojjaña jiquio meshi chama'yo tii epojji?

⁵ Jesosa saja'a canaje: —¡Jashahuaba neinei quicue onajaya miya edasiajji pojjeama! ⁶ Quea huiiso sijajpejji cuana poeje, ecuea ehoojea'yo pojjeama: “Eyacuiñajjiya eya huoojea canaje, eyo ca ca iña ojjaña jaahuanajji” jamaya sijaje poaje. Quea huiiso dasia caje'yo. ⁷ “Ojjaña jjaquecuauiani, ojjaña meshi yasijje pea'ai” huohui caje peayya pea'ai. ¡Jamatii a'a quea mete pojji! Jamaya poaje. Jamatii apoa pojjeama, oe po ajja jjima poaje so'o —Jesosa poanaje —. ⁸ E'e, jjaquecuauqui caje'yo cuana ojjaña meshi yasijje, ojjaña cuiñajji yasijje pea'ai. Quea huiiso emanomeejjiya mano mee caje'yo; bobi yasijje po majje manojje'yo quea huiiso; meshi huehuahuehuaje ojjaña meshi yasijje pea'ai —Jesosa poanaje—. E'e, jiquio ecua epona bacua neeani jama ebionei japashineijje neeani; quijje quea nee nee. Jamaya poaje e poe o'oya jjimahuaajo. Quea nee pishana po majje quea nee nee poaje ojjaña cuana —Jesosa poanaje.

⁹ —Majoya esohui huohuijji nisho cuaa miquianaya iña majje jeanobiajea caje'yo. Cuiasejajea caje equi ojee ejjachichaquijji pea'ai. Enijje jjapeequianijo, pea cuaa miquianaya iña majje emeshi mese cuana huasijje dojo caje, ona huoojeajji cuana huasijje pea'ai. Jamaya poajo, ¡ecuea esohui huohuicue ojaya eshajja'ajajji, emeshi mese cuanaja eshajja'ajajji! ¹⁰ E'e jojo nei e poe o'oya jjimahuaajo, ojjaña meshi cuana huasijje ecuea esohui quea pame nee cahuhuiqui cahua, ojjaña eshajja'ajajji. Majoya e poe o'oyajo, ojjaña oe poaje —Jesosa poanaje. ¹¹ Jamajjeya miquianaya iña cajo emeshi mese yasijje edojji, ja'a quea mete pojji! A'a jashahuabaquijji jama ba'a: “¿Ae shai eyaya emeshi mese huohuije?” Edojjoshahua Pameya miquianaya sohuihuohui meesahua caje. Jamajjeya Edojjoshahua Pame mijo yaniya ohuaya esohui huohui caje ecuea ejjashahuabaquijji. ¹² Majoya pea cuana boti'ama acaje'yo cuanaja. Jamajjeya e'o'i meseya oja chahua iña meesahua caje onaja equecua'yojji; ejeajjiya oja bacua iña meesahua caje onajaya equecua'yojji pea'ai. Esho'iquiana shajjama' po majje oja chii, ojaya enaese pea'ai iña meesahua caje onajaya equecua'yojji pea'ai. ¹³ Enijje jjapeequianijo miquianaya boti'ama nei acaje ojjaña meshijo ba'eca cuaa. Jamatii e poe o'oya jjimahuaajo, enijje jjapeequipaje'yo ajja tii ca ca Eyacuiñajji nijje ba'e tiitii meeje'yo, enijje pea'ai —Jesosa poanaje.

Aquiana quea tai nee ojjaña quea mete nee nee epo meeji

(Mateo 24.15-28; Noca 21.20-24, 17.22-24)

¹⁴—Eyacuiñajijja esohui huohuijiya yahuajo nei nei jama aca poa ba'a: “Quiije Eyacuiñajijja equijo nequije aquiana quea tai nee nee, ojjaña quea mete nee nee epo meeji”.

Jamajjeya ma ba majje ma pojajajo tii ojjaña Jodio meshijo ba'eca capoquicuajiahua eyiyo cuana huasijje. (jiquio esohuio jashahuabaquicue quea ja'a epojji!) ¹⁵ Joya equi huisa biajje chacochoacoani ja'a equi yasijje dobiquinanajji aquiana cuana biohua edojjji! ¹⁶ Joya quejo chacochoacoqui pea'ai ja'a equi yasijje poquinanajji daqui moajo! Eyiyo huasijje poquicuaji ajjajo mano'yo chana'. ¹⁷ Epona cuana o'ejji, bacua sho'ijji pea'ai quea yeno poaje; quea camaja equiehua poquicuajijji poaje. ¹⁸ Jamajjeya Eyacuiñajji nijje mimicue jama ba'a: “Eyacuiñajji, jeenojo pojjeama capoahua ecuanaja epoquijji eyiyo cuana huasijje!” acue —Jesosa poanaje—. ¹⁹ E'e, ma pojja cuanajo ojjaña quea mete nee nee, quea yeno nee nee poaje. Jamaya pojjeama yahuajo, meshi nana majje, jjeya nei pea'ai, quijje pea'ai; quea mete pishana, quea yeno pishana. Ma pojja quea camaja cuanajo ca ca quea yeno nee poaje ojjaña cuana —Jesosa poanaje—. ²⁰ Eyacuiñajjiya oe pojji cahuijo quea camaja po mee caje'yo; quea cahui huiso epo'yo jojjemo, ojjaña cuana mano'yome. Ojaya epejji jaahuana canijo, ojaya quea nahue nee emano jeyo'yo'yojji, Eyacuiñajjiya oe pojji cahuijo quea camaja amee caje'yo, quea cahui huiso pojjeama —Jesosa poanaje.

²¹—Ma pojja cuanajo a'a shajja'ajajji ona sijje poajo jama ba'a: “¡Bacue oe, Eyacuiñajji huoojaja'yo Quito jiquiacua poe'yonaje!” Jama poso, ja'a shajja'ajajji! “¡Bacue oe, Quito jocuama pa poeyanaje!” jama onaa acajje ja'a shajja'ajajji; a'a poquijji! ²² E'e, Eyacuiñajjiya huoojaja'yo ojjaña jaahuanajji e jayojja nisho, Eyacuiñajjiya esohui huohuiji nisho pea'ai poeje quea huiso nee nee. Oya cuanaa ma pea dejjaa ajjima acani acaje'yo Eyacuiñajjiya epejji cuana dasia'yojji nisho. Dasia caje'yo quea huiso nee; ecuea epejji nei pea'ai beshahua nei eya pajea mee caje'yo o jayojja epojji; cho, jjadasa meequi ajja. ²³ Ecuea epejji cuana, eyaya miya huohuinaje, quijje oya poeje ejjadasiaquijji. Jamajjeya ja'a oya cuana shajja'ajajji! —Jesosa poanaje.

Jesosa ojjañaja Edoe Mese poeje o'oya

(Mateo 24.29-31; Noca 21.25-28)

²⁴—E'e —Jesosa poanaje —, quijje quea camaja nee nee po majje majoya eshequi quea apo poaje'yo. Ba'i jiji'yo ajja poaje'yo. ²⁵ Majameta cuana jjacajjaqui'yo majje jijioqueje'yo ojjaña pea'ai. Majameta nequijji cuana huehuahuehuaje'yo janobajjima nei pea'ai; yahuajo jayojja pojjeama poaje. ²⁶ Majoya ojjaña aya ba caje eyajo. Ba majje huohui caje jama ba'a: “¡Bacue! E'e jojo nei Jesosa ojjañaja Edoe Mese poeje'yo bo cuana biajje. Oya oe nei quea ca'a nee nee, quea jeajahua nee nee pea'ai” acaje cuaa —Jesosa poanaje—. ²⁷ Majoya eyaya esohuidojojji cuana huoojaje'yo biacua, macua huasijje pea'ai ojjaña meshi yasijje pea'ai ecuea epejji cuana jjequiya —Jesosa poanaje.

Esohui acuijo, iquena bajjanijo, huohui canaje Jesosaa

(Mateo 24.32-35; Noca 21.29-33)

²⁸ Jesosaa huohui canaje pea jama ba'a: —E'e, eyaya miquianaya esohui ejjashahuabaquimeejji huohuije iquena acuijo. Eseja meshijo acui iña'yani ba majje eseya poani: “E'e nei, nayaja po'yonaje. Jjeja eshequiaja popajea'yonaje”.

²⁹—Ma jayojja jama eshequi, ba'i quea misi, majameta eyajo jijijioqueani ba majje jashahuabaquicue jama ba'a: “E'e, jjeja nei apoa poaje. Jjeyahua nei esejaya Emeshi Mese nei Jesosa Quito poeje o'oya”.

³⁰—E'e jojo nei ojjaña ma pojja cuanajo ba'eca cuana mano jeyo'yo'yo jjimahuajo ojjaña apoa poaje'yo; eya ojjañaja Emeshi Mese nequije'yo. ³¹ E'e, aquiana eyajo nequi chama' poaje'yo; ojjaña meshi chama'yo tii poaje'yo pea'ai. Jamatii ecuea esohui oe epo'yojji pojjeama; e'e jojo nei eyaya jamaya aje'yo tii tii —Jesosa poanaje—. ³² ¿Ache shono shai jamaya poaje, ojjaña apoa poaje'yo? Deja cuanaja ba jjima; esohuidojojji cuanaja ba jjima pea'ai; ecuea ehuhuiji pojjeama. Ecue Chiija eba ojaye nei. Ohuaye nei huohui caje'yo ojjaña apoa epo'yojji —Jesosa poanaje.

³³—Jamajjeya ijashahuabaqui tiitii anicue! Ache pojajajo eya ojjañaja Emeshi Mese nei poeje o'oya miquea eba pojjeama. ³⁴ Jiquio jama poaje ba'a: E'equi mese poqui jjimahuajo echacojji cuana iyaa canaje. Huoojaja canaje jama ba'a: “¡Ecuea equi cuiñacue, miquianaaya! ¡Ecuea ehuhui mi yasijje jama chacoquea pea'ai! Quiije eya poeje o'oya” e'equi mese poanaje —Jesosa poanaje—. ³⁵ Jamajjeya ijja'ishoa'ajjaqui ani tiitiiicue! Eya miquianajaya e'equi mese jayojja; ache nei eshequi nequijo poeje o'oya miquianajaya ebajo ese. ¡Sinecua, mecashono, mecajeahua cuana jja'ishoa'ajjaqui anicue! ³⁶ Apoa pojjeama, ecahuajaa ba majje tecueañaje poe majje —Jesosa poanaje—. ³⁷ Jamaya eyaya

ojjaña ecuea epeeji cuana huohuiaña pea'ai: ¡Apoa epo anicue quiana! —jamaya Jesosaa sohuihuohui canaje Jenosanenajo, Onimo yiyejo.

14

Jodio etii cuana jshashuaba taiquinaje Jesosa quecua'yojiji

(Mateo 26.1-5; Noca 22.1-2; Huani 11.45-53)

¹ E'e, ojjaña Jodio cuana ojee jwachichaqui o'oyanaje Jenosanena huasijje ojee ijia'i'ijjiaa, quea bihui nee epojji, yahuajo nei esohuidojojjiya Ejito meshijo Jodioja bacua cuana cuia'yo jjima aca poa niñeba'yojji. Beca cahuime ojee ijia'ijjimahuajo, noe, pahui eshejjeemeejjima' ijia'ijjimahuajo, Eyacuiñajji nijje emimijji etii cuana, Moisesija etehue'yo huohuijji cuana pea'ai jshashuabaquinaje Jesosa quecua'yojji. ² Ojee mimimiminaje jama ba'a: —¡Jesosa quehua neijje iñacue, ojjaña Jodio cuana jwachichaqui jjimahuajo! ¡Oya iñacue jjeyahua nei, de! Quijje pishana ojjaña ojee ijia'ijjianiyo, ecuanajaya Jesosa e'iñajji pojjeama. Chojja, ojjaña Jodio cuana quea quene nee nee ecuana nijje po chana' —poanaje Jodio edeja tii cuana.

Eponaa Jesosa sapa sha canaje shiyeshiyeya

(Mateo 26.6-13; Huani 12.1-8)

³ Jesosa Betaniajo ani poquinaje Simonija equi yasijje. Poquinaje ijia'i'ijjiaa. Yahuajo nei Simoni quea mano nee nee batata epo'yo quea tai poa, ma dejja cuaa jjaeja meequi'yo jjima acani. Jesosaa oya yahuajo jjaejaqui mee ca'yonaje batata epo'yo. Simonija equijo ojee ijia'ijjianiyo, oe epona Jesosa que poeyanaje. Tahuoo quea nahue nee nee shiyeshiye ye canaje. Tahuoo naba capa majje Jesosa huojja sha canaje shiyeshiyeya, nardo bajjaniya.

⁴ Ma ba majje beca cuana quea quene poanaje; epona tecuea canaje jama ba'a: —¿Apiojji acuae miyaya jiquio shiyeshiyeya Jesosa sapa quehua shaña so'o? ⁵ ¡Quea nahue nee nee eshojeajji, oe shequijja echacome jama sosejje, de! ¿Sha jjima yajjiyo poso ca mi ca oe shiyeshiye dojo meenaje esodojjo quea huiso sosejje? E'e, aema' cuana huasijje esodojjo equiajji poso —epona acanaje cuaa.

⁶ Jesosaa ca ca oya shajja'ajja majje jama acanaje ba'a: —¿Apiojji acuaeya epona tecueaña so'o? ¡A'a oya tecueajji! E'e, eya ohuaya huojja sha canaje. Jamaya quea pame nee. ⁷ E'e, aema' cuana minijje po tiitijje'yo. ¡Oya cuana jaahuana'yocue quijje pea'ai! Eya ca ca enequi tiitijji pojjeama minijje. ⁸ Epona e huojja sha jjimahuajo jshashuabaquinaje jama ba'a: “E'e e, Jesosa manojje'yo. Mano jjimahuajo, eyaya oya huojja shaña shiyeshiyeya; onaja mojea jjimahuua shaña poanaje epona” —Jesosaa acanaje.

⁹ —Jamajjeya quijje ojjaña meshijo ecuea esohui huohui majje jiquio eponajo huohui capoquipoquije pea'ai jama ba'a: “Oe eponaa Jesosa huojja sha canaje shiyeshiyeya, quea jea nee neejojjo”. Jiquio eponajo huohui tiitii caje, e'e jojo nei —jamaya Jesosaa acanaje.

Jodasaa onaya iña meesahua canaje Jesosa

(Mateo 26.14-16; Noca 22.3-6)

¹⁰ Yaninaje quea huiso Jesosa shajja'ajjajji cuana, 12. Oe nei Jodasa Isicaniote bajjani poquinaje Eyacuiñajji nijje emimijji etii cuana huasijje. Jama poanaje ba'a: —Eyaya miya Jesosa iña meesahuaje. ¿Ache sose huiso acuae mo ya oe sosequiaje so'o Jesosa iña meesahua sosejje? —poanaje Jodasa.

¹¹ Oya cuanaa Jodasa saja'a canaje quea bihui nee jama ba'a: —E'e, Jesosa iña meesahua sosejje miya sosequiaje'yo quea huiso —poanaje Jodio etii.

Jamajjeya Jodasa jshashuaba neinei equi aninaje: —¿Achajja iña meeme aje so'o? Caba'ajjaquisahua —poanaje.

Jesosaa o shajja'ajjajji cuana bobi ijia' mee canaje

(Mateo 26.17-29; Noca 22.7-23; Huani 13.21-30; 1 Conitio 11.23-26)

¹² Jodio cuana quea bihui ojee ijia'ijjianiyo yohua shejo ba'a esohuidojojjiya yahuajo nei eti quianaja bacua cuana cuia'yo jjima ñajajja na' esecuejo e'iñapepa ba majje. Jamajjeya ebionei epojjajo e'ijia'ijjijijio, pahui quea ca'a ijia' canijo, ñajajja cuia cajiyo, Jesosa que poe majje o shajja'ajjajji cuaa huohui'ajja canaje jama ba'a: —Jesosa, ¿ache equijo acuae seya pahui eshejje meejjio hua jjima ijiaje so'o? ¡Ecuana huoojeacue aquiana iyajeaa, mi ishoajji!

¹³ Jamajjeya Jesosaa beca shajja'ajjajji huoojea canaje: —¡Poquicue Jenosanena huasijje! ¡Jomajo ecuea epeeji baquicue ena abo cani! ¡Onijje poquicue! ¹⁴ Oya equi yasijje dobi quiyajo, ma equi mese nijje mimicue jama ba'a: “Ecuana sohui huohuijji jama poanaje ba'a: “Miquea equijo eyaya e shajja'ajjajji cuana nijjeya pahui ca'a ijiaje esohuidojojjiya eti quianaja bacua eja cuana cuia'yo jjima poa shejo. ¿Ache equi quecuayijjio ijiaje so'o?” jamaya acue —Jesosaa acanaje—. ¹⁵ Majoya equi meseya miya dojo caje eyahuasijje equi

quecuayijji ai yasihje. Jomajo ojjaña aquiana apoa, ehuaña bamebame'yo. Jomajo bobi iyacue esejaya ojee e'ijji! —Jesosa poanaje.

¹⁶ O shajja'ajjajji beca poquinaje Jenosanena huasijje. Jomajo Jesosaja esohui jayojja jama ojjaña ba cañaquinaje. Bobi iyajea canaje pahui ca'a ijji!

¹⁷ Majoya sinecua neijo Jesosa o shajja'ajjajji cuana nijje, 12 huisome nijje ma equi yasijje poquinaje. Dobiqui majje jaasohuaquinaje equi quecuayijji ai yasihje, equi jamacoo huasijje. Majoya ojjaña cuana anioquenaje bobi ijji! pejeje ijji'ijjiaa. ¹⁸ Ojee ijji'ijjia anijo Jesosa jama poanaje ba'a: —E'e jojo nei jiquiojo aniya oe epeeji nisho enijje ijji'ijjia ani. Ohuaya onaya cuana eya iña meesahua caje'yo equecua'yojji.

¹⁹ Ma shajja'ajja majje ojjaña cuana quea yeno nee nee poanaje. Pea mimiajo, pea poanaje jama ba'a: —Ecuea Emeshi Mese, eya ca ca o jayojja pojjeama, e'e jojo nei —jamaya ojjaña miminaje.

²⁰ Majoya Jesosa onijje jama poanaje ba'a: —E'e, miqiuana ya e shajja'ajjajjiya 12 huisome enijje yani; oe aje epeeji nisho, de. E'e, maaya pahui shapesheshiani enijje; ohuaya eya onaya cuana iña meesahua caje'yo onajaya equecua'yojji. ²¹ E'e, yahuajo nei Eyacuiñajjija esohui tehuejji cuaa esohui tehue ca poa jama ba'a:

“Quijje oe dejjaa Eyacuiñajjija huoojea'yo ojjaña jaahuanajji onaya cuana iña meesahua caje'yo equecua'yojji”.

Ma etehue'yo jama capoahua. Jamatii ma dejja, e iña meesahuajji epo quijje quea yeno nee poaje'yo. Jjashahuabaquijje jama ba'a: “¿Apiojji shai eya ecue naeya mejo ca poa? Eya ca ca nequi sa po ajja. Ecuea ejjashahuaba taiquijji jojo mano'yo sa poani” oya poaje. Quijje oya quea nee nee po tiitijje'yo —Jesosa poanaje.

²² Majoya ojee ijji'ijjia anijo tii Jesosaa pahui ca'a jjeshe canaje. Eyacuiñajji bihuia majje, pahui mijisisi majje quia canaje o shajja'ajjajji cuana. Jama poanaje ba'a: —Ijjiacue! Jiquio ecuea eyami —poanaje.

²³ Pahui ijji'ijjia majje caneco jjeshe canaje Jesosaa. Eyacuiñajji bihuia majje quia canaje ojjaña o shajja'ajjajji cuana. ²⁴ —Ishicue! Jiquio ecuea ena'. Ecuea ena' cuayaquiao, eya manojje'yo. Jamajoya eyaya ojjaña mimishi cuana cuijeaje'yo enijje jjapeequiajo, Eyacuiñajjija esohui eyacua jayojja jama aje'yo. ²⁵ Jjeya eyaya jiquio jjonojjajja na, uva na, e'ishi o'oyajji pojjeama miqiuana nijje; eya manojje'yo. Quijje nei poe o'oya majje eyaya jiquio ishije o'oya miqiuana nijje. E'e, eya poe o'oyajo, ecue Chiiya eya ojjaña huoojea'yojji pomee caje'yo, ojjaña shajja'ajja caje —jamaya Jesosaa acanaje.

*Penohua Jesosa ba jjima nisho acaje'yo pa
(Mateo 26.30-35; Noca 22.31-34; Huani 13.36-38)*

²⁶ Majoya ojee sohuicuaya majje poquinaje eyiyo huasijje, Onimo jjajja meshi yasijje.

²⁷ Ejiojijje poquije Jesosaa o shajja'ajjajji cuana acanaje jama ba'a: —Jiquio mecajje ojjaña miqiuana enijje jjapeequipajeaje'yo. E'e, yahuajo Eyacuiñajjija esohui tehuejji cuaa ejo tehue ca poa jayojja jama poaje jama ba'a:

“Quijje eyaya ñajjajja cuiñajji jaahuana neinei ajja. Jamajjeya onaaya oya cuia caje'yo.

Ñajjajja cuiñajji chamajo, ñajjajja cuana jjajeaajjaequinanaje'yo”.

Jamaya yahuajo nei nei tehue ca poa ejo —Jesosaa acanaje—. E'e, eya ñajjajja cuiñajji jayojja jama poaje. Eya mano'yo majje ecuea epeeji cuana ñajjajja cuana jayojja jama poaje; jjajeaajjaequinanaje'yo.

²⁸ —Jamatii Eyacuiñajjija eya shequi mee ca o'oyajje eya poquije Janinea meshi yasijje. Jomajo aje mi poeyajo ishohaquijje —Jesosa poanaje.

²⁹ Penohua Jesosa jama acanaje ba'a: —E'e pojja'a pea cuana minijje jjapee tiitiqui'yo ajja. Eya ca ca pea jayojja jama pojjeama. Eya jjapee tiitiquije'yo minijje —poanaje Peno.

³⁰ Jesosaa Peno jama acanaje ba'a: —Eyaya miya e'e jojo nei huohuaña, Peno, jiquio mecajje tii cachina yahue beca taame po jjimahuajo, pea beca peejjima huohui'ajjame acajje, miya ejo po huicha'a huicha'ajja jama ba'a: “Chojja de, ecuea Jesosa ba jjima nei nei” miyaya saja'ame aje quea meteya jjejojo —Jesosaa acanaje.

³¹ Jamatii Penohua Jesosa acanaje: —Chojja, Jesosa. E'e pojja'a eya minijje jjapeequian-ijjo, pea cuaa eya cuiajea caje'yo. Jamatii ecuea ca mi ca epajea'yojji pojjeama!

Oya jayojja pea cuaa acanaje pea'ai: —E'e, Jesosa, ecuanajaya ca mi ca epajea'yojji pojjeama tii, jamatii onaa cuiajea caje'yo pojja'a.

*Quea yeno nee nee Jesosa oja Chii nijje miminaje Jetesemani quejo
(Mateo 26.36-46; Noca 22.39-46)*

³² Majoya Jesosa o shajja'ajjajji cuana nijje Jetesemani que yasijje poquinaje. Jesosa onijje miminaje jama ba'a: —Anioquecue jiquiojo tii! Jocuama eya poquije ecue Chii nijje mimiya.

³³ Jamajjeya Jesosaa Peno, Huani, Satiaco pea'ai dojo canaje jocuama. Oya Jesosa jashahuabaquinaje quea yeno nee nee. ³⁴ Jamajjeya ojaya epeeji niije jama poanaje ba'a: —Quea yeno nee nee iña; manojeyo iña, de. ¡Anioquecue enijje; a'a cahuijji! —Jesosa poanaje.

³⁵ Majoya Jesosa cuama pishana poqui majje ecui'oshajjajo nequinaje. Oja Chii niije miminaje quea yeno nee jama ba'a: ³⁶ —Ecue Chii, miqעהa ejjashahuabaqui'yoyji jayoyja jama eyaya aje'yo. Miyaya eya huoojeanaje ojjaña mimishijo mano'yohua. Quea camaja nee nee ejo. ¿A'a ya iña miyaya che onaaya quecua mee'yo jjima aje'yo? ¿A'a ya iña che iña mee'yo jjima aje'yo? ¡Jamatii miqעהa ejjashahuabaqui'yoyji jayoyjaya jama acue! ¡Ecuea ejjashahuabaqui'yoyji jayoyja jama a'a ajji! —Jesosa jamaya miminaje oja Chii niije.

³⁷ Majoya oya poqui o'oyanaje o shajja'ajajji cuana huasijje. Ba cañaqui'yonaje ecahuijaa. Tecue'ama Peno niije jama poanaje ba'a: —¿A'a mi cahuijaa? ¿A'a mi enijje cahuijjima che nequi jjima?

³⁸ Majoya Jesosaa ojjaña cuana acanaje: —¡A'a cahuijji! ¡Eyacuiñajji niije mimi majama-jacue! Jamajjeya pea cuaa miya quea mimishi epo mee'yoyji pojjeama. E'e, miquianaya enijje jjapeequi sa poani e'e jojo nei. Jamatii miya ca'a'ama; quea mimishi poaje o'oya pojja'a —Jesosa poanaje.

³⁹ Majoya Jesosa poqui o'oyanaje jocuama pishana oja Chii niije mimi o'oyaa. Yahuaajo jayoyja mimi o'oyame poanaje.

⁴⁰ Oja Chii niije mimi o'oya majje Jesosa poqui o'oyanaje o shajja'ajajji cuana huasijje. Ba caña o'oyanaje quea cojja jee mano poanajejojo cahui o'oyanaje. Jesosa ba majje oya cuana quea bicho poanaje onijje emimijji. ⁴¹ Jamajjeya oya cuana jea canana o'oyanaje, Jesosaa. Cuama pishana poqui o'oyanaje. Oja Chii niije mimi o'oyanaje. Mimi o'oya majje poe o'oyanaje o shajja'ajajji cuana que. Isha'acanaje: —¿A'a miquianaya cahuijaa tii? ¿A'a mi jomishocajaa? Apoa aje, de. Jjeyahua nei eya, ojjaña Edoe Mese, mimishi cua iña meeshua caje'yo cuaa. ⁴² ¡Nequisohuacue! ¡Cua'a, jjeya nei ecuea epeeji nisho poeje! ¡Joya aje Jodasa poeje ba'a! —Jesosa poanaje.

Jesosa iña canaje cuaa

(Mateo 26.47-56; Noca 22.47-53; Huani 18.2-11)

⁴³ Jesosa mimianijo tii, Jodasa o que poeyanaje. Oya aje oe Jesosaja epeeji pea'ai poanaje; pea 11 niije nequinaje tii. Quea huiso nee nee deija niije Jodasa poeyanaje; yohuajji poeyanaje acuijji, baajji, mejeji pea'ai poeyanaje. Jodio etii cuaa, Jodioja esohui huohuijjiya, Eyacuiñajji niije emimijji etiiya pea'ai ojjaña huoojea canaje Jesosa iña.

⁴⁴ Jodasaa, Jesosa e'iña meejiya, yahuaajo jama huohuime acanaje ba'a: —¡Bacue oe! Eyaya oe deija ba majje cuiapashi nishoje. ¡Majoya oe miquianaaya iñacue; dojo'yocue! —Jodasaa yahuaajo acanaje deija cuana.

⁴⁵ Jamajjeya Jodasa Jesosa que jjanequichipiquinaje: —Jesosa, ¡a'a mi ecuea Emeshi Mese nei ¡tquio! —amajje cuiapashi nisho canaje.

⁴⁶ Ma ba majje pea deija cuaa Jesosa que poe majje iña canaje edojojji. ⁴⁷ Jesosa iña cajo oja epeejiya onijje nequiya, Penohua, baa iña canaje. Onaja sapa jajapojeajji nisho shajja jajasejjajea ca'yonaje, Eyacuiñajji niije emimijji etiiya echacojji poanija eshajja.

⁴⁸ Jesosaa ojjaña deija ejjachichaqui'yo nequi huohui canaje: —¿A'pjojji miya poeyanaje baajji, acuijji, mejeji e iña? ¿A'a cuae jja iña siipojji so'o? ⁴⁹ Ojjaña pojjaajo eya ojjaña cuana niije nequinaje esohui huohuijji Eyacuiñajjiya equijjo. Jamatii eya miquianajaya iña jjima poanaje. ¿A'pjojji mecajje poeyanaje e iña? Jamatii jamaya nequiana poani. Miquianaaya ca mi ca oe Eyacuiñajjiya esohui huohuijjiya etehue'yo yahuaajo nei nei mijo jayoyja jama quea tai aña.

⁵⁰ Majoya o shajja'ajajji cuana mete majje cuajicuajinananaaje; Jesosa jea canananaaje.

⁵¹ Eya ca ca iña Macoso bajjani. Jesosa ocuenaje o pajea sa po'yo ajjaa jjejojo. Eya daquima' poanaje; oe daqui ao ejjacueabeboquijji poanaje. Majoya deija mase cuaa eya iña'ajja canaje. ⁵² Ohua iña cajje eyaya daqui ao jeajeanananaaje, cuajicuajipoquinaje daquima' quea mete jjejojo.

Jodio etiiya Jesosa niñeba canaje

(Mateo 26.57-68; Noca 22.54-55, 63-71; Huani 18.12-14, 19-24)

⁵³ Jamajjeya joya Jesosa iñajji cuaa oya dojo canaje Eyacuiñajji niije emimijji etiiya equi yasijje, Caipaja equi yasijje. Jocuama ojjaña Jodio cuana jjachichaquinaje, Jodio etii cuana, Moisesija etehue'yo huohuijji poani pea'ai. ⁵⁴ Penohua ca a equijje aca poquinaje Jesosa. Caipaja equi yasijje nequiñaquinaje. Dobiquinaje epeeyi dojo huasijje. Jomajo Peno equi cuiñajji niije cuaqui pejejo jayoqui nequinaje yajja Jesosa acaje cuaa ebajji.

⁵⁵ Eyacuiñajji niije emimijji etii, ojjaña Jodio etii cuana, Jodio esohui huohuijji poani pea'aiya ojee mimimiminaje Jesosajo, ojjaña ejjachichaqui nequiya, o quecuajea'yo sa

acani. Jamajjeya sa'ajja canaje deja cuana Jesosa huohuijji nisho epo; Shomano meshi mese Pinato bajjani yasijje dojo majje Jesosa huohuijji nisho. Jamatii Jesosa huohuijji epo chama' poanaje. ⁵⁶ Quea huiso dejjaa siajje acanaje. Jamatii oe siajjepojji esohui pea siajjepojji esohui jama pojjeama Jesosa mano mee'yojji. Chama' beca oya jayojja mimime epojji. ⁵⁷ Quijje yejje nei beca cuana poe majje Jesosa niñeba canaje jama ba'a: ⁵⁸ —Eyaya oya shajja'ajjanaje. Jama poanaje Jesosa ba'a: “Jiquio Eyacuiñajjija equi jeabichajea cajo, eyaya pea equi iyaje'yo pea beca peejjima cahuime. Jiquio equi dejjaja iya poanaje; pea ca ca dejjaa pojjeama iya caje'yo” Jesosa poanaje —acanaje beca cuaa.

⁵⁹ Jamatii oya cuanaja esohui pea jayojja jama pojjeama poanaje.

⁶⁰ Majoya Eyacuiñajji nijje emimijji etii ojjaña cojja nei nequisohua majje Jesosa huohui'ajja canaje: —¿A'a pa miya jama poanaje ba'a? ¿Jesosa, a'a cuae miyaya saja'aje'yo so'o?

⁶¹ Jamatii Jesosa mimishi'ama jjejojo mimipanajaji jjima poanaje. Jamajjeya Eyacuiñajji nijje emimijji etiiya oya huohui neinei canaje: —Jesosa, ¿a'a cuae mi Eyacuiñajjija Bacua Ejja nei, oja huoojaja'yo ojjaña jaahuanajji? ¡Huohuicue mo!

⁶² Jamajjeya Jesosaa acanaje: —E'e, joya ecua miyaya aña jayojjaya eya, Eyacuiñajjija huoojaja'yo ojjaña jaahuanajji. Cuanaya eyaya miya e'e nei huohuiaña: Quijje miyaya eya baje ecue Chii nijje ebianeijje ani. Oya quea ca'a nee nee enequi tii. Eya miqianaaya baje bo biajje poeje o'oya —Jesosa poanaje.

⁶³ Ma shajjajja majje Jodioja Eyacuiñajji nijje emimijji etii quea quene nee nee poanaje. Quea quene nee po majje ma dejja tiya ojaya daqui, oja huosho ba'e isajea canaje. Jodio dejja jamaya oja daqui isajea cani quea quene po majje. Ojjaña cuana huohui canaje: —¡De! ¡A'a pea dejja iyaajji Jesosa huohuijji! Jamatii. ⁶⁴ Oya Jesosa miminaje jama ba'a: “Eya Eyacuiñajjija Bacua Ejja”. Chojja. Siajjepojji. ¿A'a cuae nequiaa shajja'ajjanaje oja sohui? ¿Jamajje yajja acuae seya aje so'o, Jesosa, de? —acanaje Jodio etiiya.

—¡Oya oe manojea mee'yocue; quea tai ca esohui acani! —acanaje Jodio edejja tii cuaa, Jesosa Eyacuiñajjija Bacua Ejja pojjeama posojo.

⁶⁵ Majoya aje oe Jodio etiiya Jesosa cojja cuichojea ca poa. Cojja dodo majje ej-jachichaquinequiya cuia canaje pea'ai emeya. Cuia majje huohui'ajja canaje: —¡Miyaya Eyacuiñajjija huoojaja nei jbaaqui majje jja ca oe huohui pocue! ¿Aya acue mi cuia cani so'o? ¡jashahuaba'ajjaqui! —acanaje equi cuiñajji cuaa.

Penohua siajje acanaje Jesosa oja ba jjima nisho

(Mateo 26.69-75; Noca 22.56-62; Huani 18.15-18, 25-27)

⁶⁶ Ojjaña cuaa Jesosa napa caqui Penohua ba canaje esecuejo nequiya. Oe epona echacojji ahuema' ani poeyanaje. ⁶⁷ Peno cuaqui pejjejo jayoqui nequi ba canaje. Ba neinei majje huohui canaje jama ba'a: —E'e jojo nei miya Jesosa nijje aninaje, ma Nasanenajo ba'e nijje —poanaje epona.

⁶⁸ —¡Chojja, ecuea oya ba jjima! ¿Ajeo acuae mi mimiani? —Peno siajje poanaje.

Majoya Peno epeeyijo nequi cuayaqui'yonaje, quea mete jjejojo. Jjeyahua nei cachina yahua taaanaje. ⁶⁹ Peno esecuejo enequi'yojo, epona sho'iyaya echacojjiya oya ba ca o'oyanaje. Ojjaña cuana huohui canaje: —Oya ca ca oma Jesosa nijje aninaje e'e jojo nei —acanaje.

⁷⁰ —Chojja, ecuea oya ba jjima nei nei. Eya ojaya epeejji pojjeama —nisho po o'oyanaje quea mete jjejojo.

Quijje pishana beca cuana Peno que ojee nequi jjanequichipiqui majje jama poanaje ba'a: —E'e jojo nei miya Jesosaja epeejji pea'ai; pea cuana nijje nequinaje. Jamaya miquea emimi, Janinea meshijo ba'e jayojja jama miya mimiani, de —poanaje.

⁷¹ Ojaya esohui shajja'ajja majje Peno quea mete nee poanaje; onijje mimipanajajinaje: —¡Siajje miya poani! Jiquio dejja ecuea ba jjima. Eya e'e jojo nei pojjeama poani jojjemo, Eyacuiñajjija eya mano mee ca'yome —Peno poanaje. Jamatii oya siajje poanaje.

⁷² Peno jamaya poajo chachina yahue taaa o'oyanaje. Cachina taaajo Peno jjashahuabaqui'yonaje ma Jesosaa yahuaajo huohui canaje jama ba'a: —Peno, cachina yahue beca taaame poajo miyaya eya ba jjima nisho aje; pea beca peejjima huohuime aje'yo —yahuaajo jamaya Jesosaa Peno acanaje. Ma shahuaba'yo majje Peno quea yeno nee nee poanaje. Pa neinei poqui'yonaje.

15

Emeshi mese Pinato huasijje Jesosa dojo canaje

(Mateo 27.1-2, 11-14; Noca 23.1-2; Huani 18.28-32)

¹ Majoya mecajjahua nei Eyacuiñajji nijje emimijji etii cuana, Jodioja edejja tii cuana, Moisesija etehue'yo huohuijji poani, pea Jodio etii ejjachichiqui nequi cuana pea'ai, 71

huisome jjachichaquinaje. Ojee jjachichaqui majje miminaje Jesosa quecua'yojji: —¿Achajja amajje acuae seya Jesosa quecua meeje'yo so'o? —acanjaje oya cuaa.

Jamajjeya Jesosa me jeyo majje dojo canaje Shomano meshi mese Pinato bajjani yasijje. ²Jesosa ba majje Pinatohua huohui'ajja canaje jama ba'a: —¿A'ya cuae mi so'o? ¿A'a miya Jodioja Emeshi Mese nei poaje'yo?

—E'e, joya ecua miyaya aña jamaya epo'yojji eya —Jesosaa saja'a canaje.

³Eyacuiñajji nijje emimijji etii cuaa quea huiso sijaje acanjaje Pinato Jesosajo. Jamatii Jesosaa saja'a jjima acanjaje. ⁴Jamajjeya Pinatohua oya huohui'ajja canaje: —¿Yajjajje acuae mi mi jjasaja'acquiani so'o? ¿A'a jje shajja'ajja jjima ojaya esohui mijo? Quea huiso nee miya niñeba cani Jodio etii cuaa.

⁵Jesosa mimishi'ama. Jamajjeya sijajjepojji cuana o niñebajji saja'a jjima acanjaje. Jjasaja'acui ajja nei nei ba majje Pinatohua niñeba ca'yonaje: —¿Yajjajje acuae Jesosa mi jjasaja'acquiani so'o, de? —poanjaje Pinato.

⁶Majoya Pinatohua niñeba ca'yonaje jama ba'a: —Jjeya nei Jodio cuana ojee ijijia'ijijiani esohuidojojjiya yahuajo nei ojaya etiquianaja bacua cuana cuia'yo jjima shejo. Ojjaña shequiaja jiquio shejo eyaya oe Jodio dejja ejeanobiajaa huojeacuayajeaje'yo, ma Jodio cuaa sa cani, Jodio quea bihui epojji. Jamajjeya jiquio shejo e'e pojja'a eyaya Jesosa pichojea meeje'yo, jjeyahua nei. ⁷Pea yani, Mashama' bajjani, Shomano meshi mese quecua panajji epo. Oya dejja tai, ejeanobiajaa ona quecua'yojji cuana nijje. E'e pojja'a eyaya Mashama' huojeacuayajea meeje'yo —jamaya Pinato jashahuabaquinaje.

⁸Jjeyahua nei Jodio dejja cuana Pinato que poeyanjaje. Huohui canaje jama ba'a: —Emeshi mese Pinato, jjeyahua nei huojeacuayajea'yocue oe Jodio dejja, ecuana quea bihui nee epojji! —poanjaje.

⁹Pinato jama poanjaje ba'a: —E'e, jjeyahua nei eyaya pichojeaje'yo oe Jodio dejja. ¿Ache acuae jja oe pichojeaje'yo so'o? E'e pojja'a eyaya Jodio cuanaja Emeshi Mese nei Jesosa bajjani pichojeaje'yo. ¿A'a e'e? —poanjaje Pinato.

¹⁰Pinatoja eba poanjaje Jodio etii quea quene nee poani pea cuaa Jesosa nijje jjapeequi majje Jodio etiquianaja esohui pajea cani. Jamajjeya Jesosa iña mee canaje eguecua-jea'yojji, Jodio etiquiaa. Jamajjeya Pinatohua Jesosa pichojea mee sa acanjaje. ¹¹Jamatii Eyacuiñajji nijje emimijji etiiya ojjaña Jodio ejjachichaqui nequi taa mee canaje: —¡Mashama' oe huojeacuayajea'yocue! ¡Jesosa a'a pichojea'yojji! —taaame poanjaje.

¹²—Jamajjeya ¿yajja acuae oe eyaya Jesosa Quito aje so'o, Jodio cuanaja Emeshi Mese nei ca pa coma? —Pinatohua huohui'ajja canaje.

¹³Jama taaame poanjaje ba'a: —¡Oya me cacajea meecue oe, acui ecueata'apeejo! ¡Acui cueata'apeejo ba'ehuanasohuajea meecue oe emano'yojji! —taa neineinaje cuana.

¹⁴—¿Yajjajo acuae oya quecuaje'yo so'o? Oya mimishi'ama. ¿Apiojji acuaeya jjaya quecua'yo sa aña Jesosa? —Pinatohua huohui'ajja canaje.

Jamatii taa majmanaja canaje Jodio cuana: —¡Jesosa oe me cacajea meecue oe; acui ecueata'apeejo ba'ehuanasohuajea meecue Jesosa, de! —jama taaameya poa Jodio etii cuana.

¹⁵Jamajjeya Pinatohua ohua sa cajo Mashama' huojeacuayajea mee ca'yonaje. Jesosa ca ca huojee canaje cuiasejjajea majje me cacajea emano'yojji.

Sohuinano cuana soa neineinaje Jesosajo

(Mateo 27.27-31; Huani 19.2-3)

¹⁶Jamajjeya emeshi meseja sohuinano cuaa Jesosa dojo canaje emeshi mese chacochoañani equi dojo huasijje. Ojjaña sohuinano Jesosa que jjachichaquinaje. ¹⁷Jesosaja daqui oshe huujijajea mee majje daqui huo'o nei huosho mee canaje emeshi mese nisho epojji. Acui sha sipi majje sapahuahuo iya canaje, emeshi mese jayojja nisho epojji.

¹⁸Majoya ecui'oshajjajo nequinaje ojjaña, Jesosa bihui'ajji nisho. Jama bihuia nishome acanjaje ba'a: —¡Miya Jodioja emeshi mese quea ca'a nee! ¡Ba'e tiiti'yocue! —sajea nisho canaje cuaa Jesosa. ¹⁹Majoya oya sapa cuiape'ejea canaje acuiya. Cuia huicha'a huicha'a canaje. Jesosa cuichojea huicha'a huicha'a canaje oja yami yasijje. Ecui'oshajjajo nequiya bihuia nisho canaje cuaa. ²⁰Ojo soa neinei'yo majje daqui huo'o nei huujijajeajea canaje; ojaya daqui quia ca o'oyanjaje. Majoya Jesosa quea huesha dojo canaje me cacajea, ba'ehuanasohuajea pea'ai, sohuinano cuaa.

Jesosa acui ecueata'apeejo ba'ehuanasohuajea canaje

(Mateo 27.32-38; Noca 23.26-43; Huani 19.17-27)

²¹Jenosanenajo aniya sohuinanohua Jesosa dojo caje, ba cajjequinaje pea dejja Simoni bajjani, Simoni Sinene meshijo ba'e poe'yo; oya Anejanoja ejeajji, oja chahua Shopoja ejeajji. Jamajjeya sohuinano cuaa Simoni acui ecueata'apee quea biquie dojo mee canaje Jesosa ba'ehuanasohuajejji. ²²Jamaya oya poquinaje eyiyo bajjani Jonijota eyiyo huasijje,

Ese Ejjaja esohuijo Esapa Jjii anijji bajjani yasijje. ²³ Esapa Jjii anijji eyiyo huasijje jaasohuaquinaje cuana. Bañaqui majje Jesosa ishi mee'ajja canaje cuaa acuijjajja na quea sese, pasejo 'ia jayojja. Ishi mee'ajja canaje quecua ca'yajje nee'ama epojji. Sio majje ishi jjima acanaje Jesosaa. ²⁴ Majoya me cacajea ca'yonaje; ba'ehuanasohuajea ca'yonaje daquima. Ba'ehuanasohuajeyo majje oja daqui cuana chicha ca'yonaje sohuinano cuaa. Iyachicha'yo majje, onaaya hue'e nisho majje daqui majjo ca'yonaje ojaya pojji epo'yojji.

²⁵ Eshequi poe pishanajo, onaaya Jesosa acui ecueata'apeejo ba'ehuanasohuajea canaje. ²⁶ Etehue'yo o ba'e sapa biajje oja bajjani caca canaje, Jesosa bajjani, oya apiojji me cacajea ca'yonaje huohui epo'yojji. Etehue'yo jama poa ba'a: OYA JESOSA JODIOJA EMESHI MESE EPO'YOJJI

²⁷ Jesosa ba'e pejejo beca siipojji pea acui ecueata'apee cuanajo ba'e huanasohuajea pea'ai ca'yonaje, Jesusaja ebiane'i mijijje, pea shani mijijje. ²⁸ E'e, Eyacuiñajjija esohui huohuijjija etehue'yo yahuajo nei nei jayojja jama, jamaya acanaje ba'a: "Ojjaña cuana jashahuabaquije jamaya: —Oya dejja mimishi nijje nequinaje". Yahuajo nei nei jamaya poa.

²⁹ Pea dejja cuana ejiojjijje poquianiya Jesosa ba majje esapa jeacajjacajja canaje, soa huisahuisa nequinaje. Jama mimijajime poanaje ba'a: —¿A'a cuae oe miyaya Eyacuiñajjija mei equi ñajebichajea'yo majje pea equi iyaje o'oya so'o, pea beca peejjima cahuime? ¡Ba'ajja socue! ³⁰ Ache ba'ajja; miya Eyacuiñajjija Bacua Ejja nei jjabacui majje ca oe ¡acui ecueata'apeejo ba'e nequioque'ajja'yo socue, emano'yojji pojjeama! —poanaje cuana.

³¹ Moisesija etehue'yo huohuijji, Eyacuiñajji nijje emimijji etii pea'ai ojo soa neineinaje. Ojee mimimiminaje jama ba'a: —¿A'a Jesosa ojjaña jaahuanajji epo'yojji? Chojja, ona nahuejji pojjeama. Oya ca ca oma nequioque'yo ajja, de —poanaje.

³² Jesosa niñeba canaje pea'ai: —¿A'a cuae jja oe miya Jodioja Emeshi Mese nei poaje'yo? ¡Jjaba'ajjaqui socue! Miya Eyacuiñajjija huoojja'yo ojjaña jaahuanajji jjabaqui majje ¡acui ecueata'apeejo ba'e ca oe nequioque'ajja'yo socue jjeyahua nei, ecanaja ebajji! Ba majje ecauaya: "Miya e'e jojo nei Eyacuiñajjija Bacua Ejja poanaje" aje'yo.

Siipojji cuaa ma o pejejo eba'ehuanasohuajea ba'eya pea'ai Jesosa jamaya niñebame acanaje quea huiso nee.

Jesosa mano'yonaje

(Mateo 27.45-56; Noca 23.44-49; Huani 19.28-30)

³³ Majoya eshequi biacojjajja nequijo shequima' jayojja poanaje; quea misi nee poanaje ojjaña meshi yasijje. Quijje sinecua eshequi jjaajepaaqui'yo majje jiji o'oyanaje. ³⁴ Sinecua, quea misi poajo. Jesosa quea yeno neineijo taaa neineinaje: —¿Eli, eli, lama sabactani? —taame poanaje—; ecue Chii, ecue Chii, ¿yajjajo acuae mo ya jeana'yonaje so'o? —Jesosa poanaje Jodioja esohuijo.

³⁵ Shajja'ajja majje joya quea chipi nee nee nequi jama poanaje ba'a: —¡Bacue oe! ¡Ohuaya etiiquiana Enia iyaa cani pojja'a, ma yahuajo nei ba'ya poa Enia iyaa cani chi, de! —jama posoya acanaje cuaa.

³⁶ Jamajjeya oe dejja poquicuajinaje acuijjajja na sese jjequiya. Jjequi majje shajashaja iyanobia canaje ena eijequi yasijje. Majoya bequiobo sajo quecuahuosho majje Jesusaja enaba huasijje huoo canaje, ojaya e'ishijji nisho: —¡Ishoa socue! ¡Enia pojja'a poeje o nahueya, o jjequioquea'yohua! —poanaje.

³⁷ Jamatü, taaa neinei o'oya majje Jesosa mano'yonaje. Chama'yo tii poanaje. ³⁸ Jesosa mano'yaajo tii, Eyacuiñajjija equijo daqui quea moo eba'ehuana ba'e Eyacuiñajjija eyajje jjaajajja meequi ca'yonaje; biacuajje ebionei jjaajajjaqui meecoo canaje.

³⁹ Ojjaña ba majje, Jesosa taaa neinei majje, mano'yonaje ba majje pea'ai sohuinano huoojajji poani, ma Jesosa nahuejji poani quea mete nee poanaje: —¡E'e jojo nei de, oya Jesosa Eyacuiñajjija Bacua Ejja poanaje! —sohuinano poanaje.

⁴⁰⁻⁴¹ Quea huesha nequiya epona cuaa pea'ai Jesosa eba'ehuanasohuajea ba'e ba cani. Oya cuana yahuajo Jesosa nijje Janinea meshijo ania poa. Onijje Jenosanena huasijje poeyanaje, oja bobi cuacua meesahuua. Oya cuana ma bajjani ba'a: Mania Madanena; Satiaco, oja chahua Jose pea'ajja enaese Mania bajjani; Semeneoja ehuanase Sanome bajjani pea'ai; pea epona cuana quea huiso pea'aiya ba canaje.

Jesosa mei jjani yasijje huananobia ca'yonaje

(Mateo 27.57-61; Noca 23.50-56; Huani 19.38-42)

⁴² Majoya sinenaje. Mecahuajje epojja ejomishocajji, quea bihui nee ojee e'ijjia'ijjiajji pea'ai. Jamajjeya acui ecueata'apeejo eba'ehuanasohua ba'e meeme'e ajja.

⁴³ Jamajjeya sinecua nei dejja Jose bajjani poeyanaje, pea Jose, Amatea meshijo ba'e. Oya Jodio etii ejjachichacui nequi cuana nijje nequi. Oya ojjañaja quea boti nee. Ohuaya Eyacuiñajji ojjaña huoojja'yojji poaje ishoa'ajja cani. Oya Jesusaja epeejji pea'ai yahuajo.

Jamajjeya oya mete'ama po majje Pinato huasijje poquinaje Jesosajo huohuiya. Poe'yo majje ohuaya Pinato huohui caña'yonaje: —Emeshi mese Pinato, Jesosa mano'yonaje. Eyaya oya jjequioqueaje'yo jjani yasijje ehuananobiaqui'yojji —poanaje Jose.

⁴⁴ Joseja esohui shajja'ajja majje Pinato jama poanaje ba'a: —¡De! ¿A'a oya Jesosa manocuaji'yonaje?

Jamajjeya Pinatohua sohuinano huojeajji poani, ma Jesosa me cacajeajji epo iyaa canaje. O poeyajo huohui'ajja canaje jama ba'a: —¿A'a e'e jojo nei Jesosa manocuaji'yonaje? —poanaje.

⁴⁵ —E'e, oya mano'yonaje —poanaje.

Jamajjeya Pinatohua Jose huoojea canaje jama ba'a: —E'e, ¡Jesosa dojocue! ¡Mei jjani yasijje huananobiaquicue!

⁴⁶ Jamajjeya daqui oshe quea ao nee jjeshe majje Jose poquinaje Jesosa acui ecueata'apeejo emano'yo ba'e yasijje. Jesosa emano'yo ba'e jjequioquea ca'yonaje. Daqui oshe eyacua neijo bebo canaje. Dojo canaje mei jjani yasijje, ma oja jjeya nei tio huasijje. Huananobia ca'yonaje. Majoya mei quea quemo nee jecajjajjajaea canaje mei jjani naba capa'yojji. Jesosa mei jjani dojjojo jaa capa'yo majje poquinaje Jose pea cuana nijje. ⁴⁷ Mania Madanena, Joseja enaese Mania bajjani pea'ai mei jjani yasijje poeyanaje pea'ai. Jomajo Jesosa jjani yasijje ehuananobiajaa ba canaje, epona cuaa.

16

Jesosa shequi o'oyanaje

(Mateo 28.1-10; Noca 24.1-12; Huani 20.1-10)

¹ Jodioja epojja ejomishocajji jJayejjequiajo, sinecua Mania Madanena, Jacoboja enaese Mania bajjaniya, Sanomeya pea'ai shiyeshiye iña jjeshe canaje Jesosa shicuijji nisho.

² Jamajjeya mecajjeahua nei jaja'a'ajjaqui jjimahuajo ebionei epojjajo, nomico pojajajo, oya cuana poquinaje jjani yasijje. ³ Bañaqui jjimahuajo mimimiminaje jama ba'a: —¿Aya shai mei quea quemo jecajjajjajaea caje'yo ese dobiqijji? Quea quemo nee nee mei.

⁴ Epona cuana jjani yasijje poe majje ba cañaquinaje jjani huejja ecapajea'yo nequi.

⁵ Jamajjeya jjani ai yasijje dobiqinaje. Dobiqiu majje epona cuaa esho'i ai ba canaje. Oja daqui quea oshe nee nee, quea ao nee. Jesosaja equipajajji biajje ani ba canaje esohuidojojji ebiane i mijijje ani. Jjeya ca ca Jesosa chama'. Ba majje epona cuana quea mete poanaje.

⁶ Jamaya oya epona cuana nijje poanaje ba'a: —¡A'a quea mete pojji! Miya ecuea eba. E'e, miyaya Jesosa ma Nasanenajo ba'ya poa sa'ajja'yo poequi, ma acui ecueata'apeejo mano'yonaje. Chama' oya jjeya jiquiojo. Shequi o'oyanaje ca jja coma. ¡E'e, quia'o jiquio ba'ajjahua'yo socue! Jiquiojo jaanaje. ⁷ Jamajjeya ijjeyahua nei poquicuajicue oja epeejji huohuiya! ¡Jama huohuime acue ba'a: “Jesosa pa shequi'yonaje” acue! “Oya jjeya nei Janinea meshi yasijje poquije miqiana poqui jjimahuajo” o shajja'ajjajji cuana huohuicue. ¡Peno oe huohuiñaquicue Jesosaja esohui ma ohuaya huohui canaje oe a'a pajea'yojji! ¡Oya oe jocuama baquicue! —esohuidojojjiya epona cuana acanaje.

⁸ Jamajjeya epona cuana jjani esecue yasijje cuayaqui'yo majje poquicuajicujinaje. Quea mete neejo oya cuana piopionaje. Pea nijje mimi jjiima Jesosajo. Cuajicujinaje Jesosa shajja'ajjajji cuana esohuidojojji esohui huohuiya.

⁹ E'e, ebionei epojjajo, nomico pojajajo, Jesosa shequi o'oya majje, jjanecuajia'acui'yo majje pea'ai, Mania Madanena ebionei oya ba ca'yonaje. Oya Maniaja yahuajo eshahua quea huiso dobiquiyajo, Jesosaja eshahua cuana huoojeacuayajea ca'yonaje me oejje pea beca huisome. ¹⁰ Majoya Jesosa ba majje Maniaa o shajja'ajjajji cuana huasijje poquicuajinaje huohuiya. Jesosa emano'yo tii jaa posojo, oya cuana pa nei nei aninaje quea yeno. ¹¹ Jamajjeya Maniyaa oya cuana huohui cañaquinaje Jesosa eshe o'oya: —Eyaya oya banaje e'e jojo nei —acanaje Maniaa.

Jamatii Maniaja esohui shajja'ajja majje oya cuana jama poanaje ba'a: —E'e pojja'a. Chojja, siajje miya poani, Mania —acanaje cuaa, Jesosa shequi o'oya ajja poso acanaje.

¹² Majoya Jesosaja epeejji becanejjijji pea'ai ejiojjijje poquijejo, Jesosa pea jayojjaya jjanecuajia'acuinaje onijje. Jesosa ba jjiima poanaje cuanaja. ¹³ Quijje yejje nei oya e'e jojo nei Jesosa ba majje oya cuana poquinaje pea eshajja'ajjajji cuana huohuiya. Jamatii ojjaña jama poanaje ba'a: —E'e pojja'a, de. Chojja de, oya mano'yo tii —ojjaña cuana poanaje, Jesosa shequi o'oya ajja poso acanaje.

Jesosa ba canaje o shajja'ajjajji cuaa

(Mateo 28.16-20; Noca 24.36-49; Huani 20.19-23; Hecho 1.6-8)

¹⁴ Quijje Jesosa shajja'ajjajji cuana 11 huisome oe equijo ojee ijji'a'ijji anijo Jesosa onijje jjanecuajia'acui'yonaje. Oya cuana tecuea canaje jama ba'a: —¿Apiojji acuae quiana quea

sapa ca'a poani? ¿Apiojji shajja'ajja jjima onajaya ehuohui'yo eya eshe o'oya ba majje? ¡Bacue eya e'e jojo nei eshequi'yo, jjabahuejjaquicue! —Jesosaa acanaje.

¹⁵ Majoya Jesosaa oya cuana jama acanaje ba'a: —¡Poquicue ojjaña cuana huasijje, ma ojjaña meshijo ba'e yasijje! ¡Ecuea esohui quea pame nee eba'e tiitii'yojjijo ba meequicue! ¡Enijje jjapeequi meequicue! ¡Enijje jjapeequiyajo enajo besa meecue! ¹⁶ Ojjaña joya enijje jjapeequiani Eyacuiñajjiya ba'e tiitii mee caje'yo. Enijje jjapeequiyajo, ojjañaja ebajji onaaya oya cuana besa meequicue! Ojjaña joya enijje jjapeequi'yo ajja ca ca Eyacuiñajjiya quea nee nee po mee caje'yo, quea mimishi poanajejojo. Jamajjeya Eyacuiñajjiya oya cuanaja mimishi cuanajo quea yeno po mee caje'yo.

¹⁷ —Ecuea epeejji cuana eyaya ameeje'yo ma dejjaa ajjima acani. Oya cuana eyaya quea ca'a nee po meeje'yo, esahua cuana dejjajo nequi huoojeacuayajea meeje'yo. Pea esohui ojaya cuanaja ba jjima mimi meeje pea'ai. ¹⁸ Peyo se najji ba jjima iña majje mano'yo jjima po meeje'yo eyaya. Ena pase nei nei pase'ama poso ishijea majje, mano'yo jjima po meeje eyaya. Ecuea epeejji neiya emano biajje eme huana majje jiquio quea aja poaje; eyaya jjaajaqui meeje'yo, huaquia meeje'yo pea'ai —Jesosaa o shajja'ajjajji cuana huohui canaje.

Jesosa jjequisohua ca'yonaje eyahuasijje

(Noca 24.50-53)

¹⁹ Majoya Emeshi Mese nei Jesosa pea cuana nijje mimiajo, oja Chiiya, Eyacuiñajjiya jjequisohua ca'yonaje eyahuasijje. Jomajo oya Jesosa anioquenaje oja Chii ebiane mijiije onijje ojjaña huoojea'yojji epoiji. ²⁰ Majoya o shajja'ajjajji cuana Jesosaja esohui huohuiqui canaje ojjaña cuana huasijje. Ojaya esohui jayojja jama Emeshi Mese nei Jesosaa oya cuana ameesahua canaje ma dejjaa ajjima acani ojjañaja ebajji ojaya esohui cuana e'e nei nei. Jamaya ojjaña ba mee canaje Jesosaa oya cuana huoojea canaje ojaya esohui huohuiya.

Jesosaa eya Macoso bajjani jiquio esohui tehue mee canaje. Mahuiso. Apoa.

NOCAA TEHUE CANAJE ESOHUI QUEA BAME NEE JESOSA QUITOJA LUCAS

¹ Eyaya mi que tehuenaje Teopino achajja Jesosa ebajji. Quea deja huisohua Jesosaja ehuhui'yo cuanajo tehue sa aca cua, huohui mee sa aca cua pea'ai. ² Ojaya epeeji cuaa, ojaya esohui huohuijji cuaa, Jesosa ba neinei ca cua. Ohuaya ecuanaya huohui neinei ca cua. ³ Jamajjeya eyaya catehue'yahua onaa huohui ca'yoqui Jesosajo. Jjeya eyaya mi que tehuenaje, Teopino. Jiquio esohui e'e jojo nei Jesosajo. Eyaya shajja'ajja neineinaje onaa huohui ca'yoqui Jesosajo. Majoya jashahuaba neineiquinaje jiquio etehuejji, jamajjeya e'e jojo nei jiquio esohui. ⁴ Tehuenaje eyaya miquea Jesosa eba neineijji. Mi jashahuaba neineiquijji eyaya tehuenaje, de. Jamajjeya ¡ba neineicue jiquio esohui ecue tehue'yo!

Oe esohuidojojjiya Sacania huohui ca cua bacuajji cuajo, Huani ona besameejji epojji cuaje

⁵ Yahuaajo pishana Jodioja emeshi mese nequia cua. Yohua bajjani cua ba'a: Enode. Ma eshequiajajo tiia aje ba'ya cua Eyacuiñajji nijje mimiani yohua bajjani ba'a: Sacania. Oya chacochacoania cua Eyacuiñajji nijje emimijji cuana nijje, ma dejja yohua bajjani nijje ba'a: Abiase dejja cuana nijje. Oya cuana Eyacuiñajji nijje mimiania cua. Sacaniaja ehuanase yohua bajjani cua ba'a: Isameni. Isamenija etiiquiiana cuana Eyacuiñajji nijje mimiani pea'ai cua. Anoni dejja bajjani cua. ⁶ Sacania Eyacuiñajji epeeji nei nei cua, oja huanase o jayojja nei neiya cua. Oya cuaa shajja'ajja neinei ca cua Eyacuiñajji esohui. ⁷ Jamatii bacuama' cua; ojaya ehuanase jjamejoqui ajja neinei cua. Ehuanase epona tii cua; oya dejja tii pea'ai cua.

⁸⁻⁹ Pea pojjaajo Sacania jjachichaquia cua Eyacuiñajji nijje emimijji cuana nijje. Pea cuaa oya jama aca cua ba'a: —Sacania, ¡jeya jiquio pojjaajo Eyacuiñajji nijje mimicue! ¡jeyahua nei mee nei dobiqicue Eyacuiñajji equi yasijje, equi quecuayijji sisi yasijje! ¡Dobiqi majje acui shaa dahua huichachajecue huichacha shiye epojji! ¡Ma ojjaña aca cua jayojjaya oe acue!

Dobiqui majje Sacaniaa jamaya aca cua Eyacuiñajji equijo nequia. ¹⁰ Beca cuana aje oe esecuejo nequia cua Eyacuiñajji nijje emimijji pea'aiya. ¹¹ Sacaniaa aje oe acui shaa quea shiye dahua huichachajea canequia cua acui shaa edahuajeajji biaje iya ani. Majoya aje oe Eyacuiñajji esohuidojojji jjanequija' aquia cua, edahuajeajji ebañe mijijje nequia cua. ¹² Sacania esohuidojojji ba majje piopio neinei'ya cua esohuidojojji ba po jjima jjejojya. ¹³ Majoya aje oe esohuidojojjiya jama aca cua ba'a: —Sacania, ¡a'a piopiojji! Miya Eyacuiñajji nijje mimi majamajanaje ebacua yajjijo. Jamajjeya miya Eyacuiñajjiya shajja'ajja canaje miquea esohui ebacua yajjijo. Miquea ehuanase aje oe jjamejoquije. Majoya ¡ebacua cuayajo Huani bajjani acue! ¹⁴ Miya o cuayajo quea bihui nee nee cuaje. Pea dejja cuanaya quea bihui nee nee cuaje ebacua cuayajo. ¹⁵ Oya Eyacuiñajji epeeji nei nei cuaje, jamajjeya miqianaya quea bihui nee cuaje. Oya acuijjajja na sese ishi ajja cuaje, ecahuishi ishi ajja pea'ai cuaje. Edojoshahua Bameya jaahua caje'yo oya cuayajo. ¹⁶ Ohuaya Eyacuiñajji esohui huohui bame bame caje. Jamajjeya quea huiso Jodio cuaa shajja'ajja caje Eyacuiñajji esohui. Ohuaya jjapeequi mee caje'yo quea huiso Jodio dejja cuana Eyacuiñajji nijje. ¹⁷ Huaniya ebionei esohui huohui caje, majoya aje Quitohua, Eyacuiñajji huojojea'yohua esohui huohui caje. Huani Enia yajojja cuaje. Enia ma etiiquiiana cua; Eyacuiñajji esohui huohuijji nei nei cua. Huani Eyacuiñajji esohui huohui po nequije. Shajjama' cuana ohuaya sohuihuohui caje. Majoya shajjama' cuaa ojaya esohui shajja'ajja caje; jjapeequije Eyacuiñajji nijje. Ojaya esohui shajja'ajja majje Quitoja esohui shajja'ajja sa acaje.

¹⁸ Sacaniaa huohui'ajja ca cua esohuidojojji jama ba'a: —De, zachajja acuae po cajji so'o? Oya ca iña edejja tii nojinoji aña, ecuea ehuanase epona tii pea'ai.

¹⁹ Esohuidojojjiya jama tecueame aca cua ba'a: —Eya bajjani Jamieni, eya Eyacuiñajji esohuidojojji nei nei cueyanaje. Ohuaya eya huojojea canaje minijje mimiya. Ecuea esohui quea bame miyaya shajja'ajjanaje. ²⁰ Miya jashajja'ajjaqui ajja cuanaje, jamajjeya miya mimi ajja cuaje. Huani cuayajo ca mi ca oe mimije'yo. Ma ecua miya eyaya huohuinaje jayojjaya cuaje miya —jamaya cua esohuidojojji.

Majoya aje Sacania mimi ajja po mee ca'ya cua.

²¹ Pea cuaa esecuejo nequia ishoa'ajja ca nequia cua Sacania. Jama huohui'ajjame aca cua ba'a: —¿Yajjaje shai Sacania eyiyedojo tii nequi?

²² Majoya Sacania esecue yasijje cuaya'yo majje mimi'yo ajja cua. Eme nei ca ca oe huo canequia cua Sacaniaa. Sohuimajojo jama aca cuaa cua ba'a: —Ohuaya pojja'a ba canaje esohuidojojji nei eyiyedojojo nequi, de.

²³ Sacania Eyacuiñajjiya equijo chacojeyo majje poquia cua oja equi yasijje. ²⁴ Quijje pishana Sacaniaa ehuanase bacua jea ca cua, o'ejji po majje. Isameni me oejje ba'ime cuayaqui'yo jjima; ania cua oja equijo tii. Oya jjashahuabaquia cua jama ba'a: ²⁵ —Eyacuiñajjiya eya jjamejoqui meesahua canaje quea bihui epojji. Jjeya pea cuana mimi-jaji'yo ajja e bacuajjiyo —jamaya Isameni cua.

Esohuidojojjiya Mania huohui ca cua quijje ojaya ebacua ecuayajjiyo

²⁶⁻²⁷ Janinea meshijo oe epona ahuema'ani ania cua, Mania bajjani. Oya Nasanena cuiñajjiyo ania cua. Isameni Maniaja enene mese cua. Isameni me oejje oe ba'ime o'ejji anijo Eyacuiñajjiya ma esohuidojojji huoojea ca o'oya cua Mania que. Mania jjahuiaquijji cua; dejja ba po jjima ania cua. Oya ca jjahuiaqui sa cua dejja yohua bajjanijo ba'a: Josejo. Joseja baba etiiquiana yohua bajjani cua ba'a: Dabi. Dabi Jodio dejjaja emeshi mese yahuajo nei nei cua. ²⁸ Esohuidojojji dobiquia cua Maniaja equi yasijje. Jama mimime cua onijje ba'a: —Mania, yani eya. Eya Eyacuiñajjiya huoojea canaje mi que mimiya. Miya ca ca oe ohuaya bacaca canaje ejjamejoquijji. Eyacuiñajji miquea Emeshi Mese nei, miya ohuaya jaahuana cani —jamaya cua esohuidojojji.

²⁹ Mania quea mete cuanaje esohuidojojjiya esohuijo. Majoya oya jama jjashahuabaquime cua ba'a: —¿Apiojji shai oya jama mimime cuani enijje?

³⁰ Esohuidojojjiya jama aca cua ba'a: —Mania, ¡a'a quea mete pojji! Eyacuiñajjiya miya quea jea nee acani. ³¹ Jjeyahua nei miya o'ejji anije, ebacuajje dejja cuaje. ¡Yohua bajjani acue ba'a: Jesosa! ³²⁻³³ Oya quea bame nee nee ba'eje. Pea cuaa bajjani caje Eyacuiñajjiya Bacua Eja nei oya. Eyacuiñajjiya oya po mee caje'yo ojjaña Emeshi Mese nei epojji; Dabi emeshi mese jayojja oya cuaje. Jodio dejjaja Emeshi Mese po tiitiije'yo —jamaya cua esohuidojojji. ³⁴ Maniaa esohuidojojji huohui'ajja ca cua jama ba'a: —¿Achajja jjamejoquime acuae po caji so'o, ca dejja ba po jjima?

³⁵ Esohuidojojjiya jama aca cua ba'a: —Edojjoshahua Bame nei mi que cueje. Bo jayojja mi que anioqueje. Eyacuiñajjiya miquea ebacua ba'e mee caje. Jamajjeya miquea ebacua quea bame nee nee cuayaje oya Eyacuiñajjiya Bacua jjejojo. ³⁶ Ecuea esohui e'e jojo nei, mique nene Isameni esho'yahua bacuama' tii cua. Jjeya ca ca oe jjamejoquinaje. Me oejje oe ba'ime ejjamejoqui ani. Jamajjeya ecuea esohui e'e jojo cuanaje. ³⁷ E'e, Eyacuiñajjiya camajja'ama po mee caje'yo ojjaña —jamaya esohuidojojji cua.

³⁸ Jamajjeya Mania jama ca'a ba'a: —Eya Eyacuiñajji niije jjapee neinei qui sa cuani. Miquea esohui jayojja jama ca'a cahua Eyacuiñajjiya —jamaya cuanaje Mania.

Majoya esohuidojojji poqui'yonaje.

Mania poquia cua e'a'i meseja equi yasijje anicuaa

³⁹ Quijje pishana Mania poquia cua e'a'i meseja equi yasijje, Isamenija equi yasijje. Jodea meshi bajjani yasijje poquicuajjinaje, eyiyojo ba'eca huasijje. ⁴⁰ Isamenija equi yasijje dobiqui majje Mania jama cua ba'a: —Eya mi que cueyanaje anicuaa.

⁴¹ O mimiajo Isamenija bacua teejo ba'e moquiquia cua. Isameni quea bihui cua; Edojjoshahua Bameya mimi mee ca cua. ⁴² Jamajjeya Isameni jjanobajjima nei mimia cua Mania niije jama ba'a: —Mania, miya Eyacuiñajjiya quea jea nee nee pea epona jayojja jama pojjeama. Jamajjeya miquea ebacua teejo ba'e ojaya quea jea nee nee pea'aiya. ⁴³ E'e, miya cueyanaje e que anicuaa, jamajjeya eya quea bihui nee cuani miya Eyacuiñajjiya Bacua ba'e meejojo. ⁴⁴ Mi ecue equi yasijje dobiajo ecuea ebacua moquiquinaje teejo ba'e. ⁴⁵ E'e, miyaya Eyacuiñajjiya esohui shajja'ajja neineinaje, jamajjeya jamaya acaje'yo —jama mimimeya Isameni cua.

⁴⁶ Majoya aje Mania jama mimime cua ba'a: —Jjeya eya quea bihui nee nee Eyacuiñajji niije. ⁴⁷ Eyacuiñajji ecuea Emeshi Mese nei cuani. Ohuaya ecuea mimishi cuijea ca'yonaje.

⁴⁸ Jamatii eya epona, ahuema'ani. Eya ba'e sa cuani Eyacuiñajjiya yajjiyo. ¿Yajjajo shai Eyacuiñajjiya eya bacaca canaje? Jamatii ojjaña cuana aje oe mimi tiitiije'yo ejo jama ba'a: "Mania quea bihui nee nee. Eyacuiñajjiya oya bacaca canaje". ⁴⁹ Eyacuiñajji quea ca'a nee nee. Jamajjeya eya ohuaya quea bame acanaje. Oya mimishi'ama nei nei, quea bame nee nee ba'e. ⁵⁰ Eyacuiñajjiya ojaya epeejji cuana jaahuana cani. E'e, ojjaña joya onijje jjapeequiani Eyacuiñajjiya jaahuana cani etiiquiana yahuajo nei ba'ya cua, esho'iquiana jjeya nei ba'yani pea'ai. ⁵¹⁻⁵² Beca cuana onijje jjapeequijji jima ohuaya ca'a'ama po mee ca'yani. Dejjaja mimishi cuana ca'a'ama po mee ca'yani, emeshi mese mimishi cuana ohuaya ca'a'ama po mee ca'yani. Ojaya epeejji ca ca oe ohuaya quea ca'a po mee ca'yani. ⁵³ Ojjaña cuana oja esohuijo jjashajja'ajjaqui sa cuanijo ohuaya jjashajja'ajjaqui mee caje'yo. Beca cuana ca ca oja esohuijo jjashajja'ajjaqui sa po ajjajo

ohuaya jhashajja'ajjaqui mee jjima acaje'yo; jeajea caje'yo cuaqui yasijje jhashajja'ajjaqui sa po ajjajojo. ⁵⁴Eyacuiñajjiya Jodio dejja cuana jaahuana caje. Jamajjeya ohuaya oja Bacua Ejja huoojea caje Jodio dejja jaahuanajji epojji. Ohuaya pajea'yo jjima acaje'yo. ⁵⁵Jamaya ohuaya esejaya etiquiana Amajama jaahuana ca cua. Oja bacua cuana pea'ai jaahuana ca cua. Oja osecua cuana jaahuana titii ca cua. Jjeya nei ohuaya eseya jaahuana cani pea'ai —jama bihuameya Maniaa Eyacuiñajji aca cua.

⁵⁶Majoya Mania pea beca peejjima ba'ime ania cua oja nene nijje. Majoya aje Mania poqui'ya cua oja equi yasijje.

Huani cuaya cua ona besameeji epojji

⁵⁷Quijje Isamenija bacua cuaya cua; yahue cua. ⁵⁸Ojaya huapa pojjeama cuana cueya cua oja bacua baa. Ojjaña Eyacuiñajji nijje quea bihui cua Isamenija ebacua cuayajo. ⁵⁹Me oejje pea beca peejjima cahuime po majje ojjaña cue o'oya cua ebacua bajjaniya; oja cuiishasha jehusejjajaea pea'ai. Ojjaña bajjani sa aca cua eejajji bajjani. ⁶⁰Isameniya ca jama aca cua ba'a: —Chojja, iyohua bajjani oe acue ba'a: Huani!

⁶¹Pea cuaa jama aca cua ba'a: —¿Apiojji acuaeya ma bajjani aje? Chama' aje jja che pea bajjani Huani.

⁶²Jamajjeya aje jja oe ojjaña Sacania huohui'ajja ca cua: —¿Ae bajjani acuae jja cuaje so'o?

⁶³Majoya Sacaniaa mimi ajja jjejojo jama tehueme aca cua ba'a: —¡Huani bajjani oe acue! Ojjaña jama cua ba'a: —E'e, ¿apiojji shai?

⁶⁴Majoya aje Sacania mimi mee ca o'oya cua Eyacuiñajjiya. Jamajjeya ohuaya Eyacuiñajji bihui ca o'oya cua. ⁶⁵Ojjaña cuana ca jja ca jama cua ba'a: —De, Sacania mimi'ya, de.

Majoya ojjaña cuana poquia cua huohui pohua, ojjaña eyiyojo ba'eca cuana huohuiya.

⁶⁶Ojjaña shajja'ajja majje huohui'ajja ca cua jama ba'a: —Eyacuiñajjiya jaahuana cani Sacaniaja bacua, Huani. Oya quea ca'a nee nee cuaje; Eyacuiñajjiya quea bame nee nee ba'e meesahua caje Huani.

Sacania sohuicuaya cua

⁶⁷Sacania Edojjoshahua Bameya sohuicuaya mee ca cua. Jama sohuicuayame po mee ca cua ba'a: ⁶⁸—Eseyaya oe Eyacuiñajji ejjabihuaqui, ojjaña. Oya esejaya Emeshi Mese nei, Jodio dejja Emeshi Mese nei, de. Ohuaya esejaya mimishi cuana cuijea ca'yani.

⁶⁹Ohuaya Quito huoojea caje ese que. Ma ehoojea'yo Quito quea sohui poja nee nee cuaje'yo. Quitohua eseya quea ca'a po mee caje'yo. Ojaya etiquiana Dabi emeshi mese cua yahuajo nei iye ca'a ca'a cua, Quito ca ca oe ojjaña Emeshi Mese cuaje ese jaahuanajji.

⁷⁰Jamaya yahuajo tehue ca cua Eyacuiñajjiya esohui huohuiji cuaa. Tehue majamaja ca cua Quitajo. ⁷¹Jama tehueme aca cua ba'a:

“Yani dejja cuana ecuanaya nijje mimijaji neineiani. Ecuana boti'ama cuani, cuiajea sa acani. Jamajjeya aje oe ecuanaya Eyacuiñajjiya jaahuana cani”.

Jamaya esohui etehue'yo cuana cua.

⁷²⁻⁷³—Eyacuiñajji yahuajo mimia cua ecuanaja etiquiana nijje, Amajama nijje jama ba'a: “Eyaya Quito huoojea'yo miqiuana ojjaña jaahuanajji”. Jamaya aca cua ohuaya ojaya epajea'yojji pojjeamajajo. ⁷⁴⁻⁷⁵Jamajjeya eseyaya Eyacuiñajji ejjabihuaqui; Quitohua dejja mimishi cuanajo mete'ama po mee cani. Eseyaya jaahuana caje'yo. Quea bame ba'e mee caje'yo mimishi'ama epo'yojji —jama sohuicuayameya Sacania cua.

⁷⁶Majoya Sacaniaa oja bacua jama aca cua ba'a: —Miya ecue bacua oe nei. Miya Eyacuiñajjiya esohui huohuiji cuaje'yo. Ohuaya miya huoojea caje ebionei. Huohuicue jama ba'a: “¡Oya shajja'ajjae! Oya Quito, Eyacuiñajjiya huoojea'yo ojjaña jaahuanajji cueje”. ⁷⁷Huani, miyaya ojjaña cuana huohuicue jiquio esohui jama ba'a: “Eyacuiñajjiya ojjaña cuanaja mimishi cuijea caje'yo onijje jjapeequianija”. ⁷⁸Jamaya eseya Eyacuiñajjiya quea jea nee nee acaje'yo. ⁷⁹Jamajjeya ecuanaya mete'ama cuaje onijje jjapeequi majje. Poquiye eyahuasijje onijje eba'e titii'yojji. Ohuaya eseya quea bihui po mee caje'yo —jamaya Sacania cua.

⁸⁰Majoya ebacua ti majje quea ca'a nee nee cua; Eyacuiñajjiya epeeji nei nei cua. Oya oe nei ba'ya cua quimajo. Majo tiya aje Huaniya esohui huohui ca cua Jodio dejja cuana huasijje.

2

Jesosa cuayanaje
(Mateo 1.18-25)

¹Huani cuaya cua shejo emeshi mese yohua bajjani cua ba'a: Agosto Sesa. Emeshi meseya echacojji cuana huohui ca cua jama ba'a: —¡Sicoquicue ecue meshijo ba'e cuana! ¿Ache huiso ba'ajja'yo socue? ¡Huohuicue ojjaña dejja cuana jama ba'a: “¡Poquicue mi

cuayacua meshi yasijje mique bajjani tehueya; jamaya emeshi mese cuanaje!” acue! — jamaya Sesaa aca cua.

² Emeshi meseya Sesaa jama sico coome aca cua. Ma shejo tiyya pea emeshi mese Sineño bajjani cua; ojaya meshi Sania bajjani cua. ³ Jamajjeya aje oe ojjaña poquia cua o cuaya cua meshi yasijje.

⁴⁻⁵ Jose, Maniaja ejajiba cua. Jose Nasanenajo ba'eya jajiba cua, Janinea meshijo. Oja ettiquiana Dabi cua, yahuajo Dabi ba'ya cua Benenajo, Jodea meshijo. Jamajjeya Jose poquia cua Benena huasijje emeshi meseja esohuijo oja bajjani tehue meeya. Jose, oja shiye nijje poquia cua. Quea huesha poquia cua. Mania ebacua cuayajea'yo pana nei poquia cua. ⁶ Majoya aje Benena bañiqui majje Maniaja bacua cuayañaquinaje. ⁷ Quea dejja huiso ania cua Benenajo jjabajjani tehue meequiya poqui. Jamajjeya chama' equi ejaachichajji cua. Jamajjeya aje oja bacua cuaya cua ana'ai jaajji equijo. Ojaya ebacua cojjasobo cuaya cua jomajo. Cuayajo ohuaya bebo ca cua daqui oshejo.

Ñajajja jaahuanajji cuaa esohuidojojji ba ca cua

⁸ Ma mecajje aje Benenajo chipi nei pishana ñajajja jaahuanajji cuana ñajajja cuiña po añua cua. ⁹ Majoya aje esohuidojojji jjaja' aquia cua. Majoya aje oe o chipi nei jeajahuahua ca cua esohuidojojjiya. Mete neinei'ya cua ñajajja jaahuanajji cuana. ¹⁰ Esohuidojojji jama cua ba'a: —¡A'a quea mete poji! Eyaya esohui quea bame nee huohuiaña ojjaña dejja cuana quea bihui nee po meeji. ¹¹ Jjeya nei cuayanaje oe ebacua Dabija meshijo. Ma ebacua Eyacuiñajji huoojea'yo. Ohuaya miquianajaya mimishi cuijea caje'yo; yohua bajjani cuaje ba'a: Quito. ¹² ¡Miquianaya poquicue ebacua baa Benena huasijje! Jomajo aje ana'ai jaajji equijo ebebo jaa oja nae nijjeya, oja chii Jose nijjeya pea'ai —jamaya cua esohuidojojji.

¹³ Majoya aje quea huiso esohuidojojji cuana jjaja' aquia cua. Sohuicuayanaje ojjaña esohuidojojji cuana Eyacuiñajji bihuiajji. Jama sohuicuayame cua ba'a:

¹⁴ “Eyacuiñajji quea ca'a nee nee. Eyajo ba'e, quea ao nee nee. Eyacuiñajjiya ojjaña ojaya epeeji cuana ojjaña meshijo ba'e quea bihui po mee caje”.

¹⁵ Majoya esohuidojojji ba'esohuaqu'iya cua eyahuasijje. Ñajajja jaahuanajji cuana jama mimime cua ba'a: —De, cue'ajjaa Benena huasijje. Ma esohuidojojjiya huohui canaje jayojjaya aje seya aje.

¹⁶ Majoya poqui cuajicuaia cua ebacua sa'ajjaa. Majoya ana'ai jaajji equijo jaa ba cañaquia cua ebacua, Mania, Jose pea'ai. ¹⁷ Majoya ba majje huohui'ajja cañaquia cua esohuidojojjiya esohuijo ebacuajo. Pea cuana huasijje huohui ca cua pea'ai. ¹⁸ Beca cuana shajja'ajja majje jjashahuabaquia cua ñajajja jaahuanajji cuanaja esohuijo. Quea bame cua. ¹⁹ Mania jjashahuabaquia cua pea'ai. Pajea'yo jjima aca cua ñajajja jaahuanajji cuaa huohui canaje esohui. ²⁰ Majoya ñajajja jaahuanajji cuana poqui'ya cua ñajajja jaahuana'yohua. Poquije'yohua Eyacuiñajji bihuia nei nei ca poqui'ya cua. Esohui quea huiso sohuicuaya cua: —Esohuidojojjiya esohui e'e jojo nei —cuanaje.

Ebacua Jesosa dojobia cooqui ca cua Eyacuiñajji equi yasijje

²¹ Me oeje pea beca peejjima cahuime cuajo Jesosaja naeya oja chiiya pea'ai bajjani canaje Jesosa. Ma esohuidojojjiya esohui jayojja Mania jjamejoqui jjimahuaajo bajjani ca cua. Jesosaja cuiishasha jehusejjajea ca cua pea'ai, ojjaña Jodioja ebacua jayojjaya jama aca cua.

²² Ba'i oe cuajo Maniaa Joseya pea'ai Jesosa dojo ca cua Eyacuiñajji equi yasijje Jenosana huasijje. Maniaa Eyacuiñajji equi yasijje dobiqui jjimahuaa Moisesija etehue'yo jayojja aca cua. Majoya Jesosa dojobiaqui canaje Eyacuiñajji equi yasijje huohuiya.

²³ Jamaya aca cua Moisesija etehue'yojo ba'a:

“¡Ebacua cojjasobo dejja huohuicue Eyacuiñajji yasijje! ²⁴ ¡Becanejjiji pea'ai huia' quiacue Eyacuiñajji nijje mimiani yasijje equiyo jeyojeyo'yojji cuaqui pohui poji epo'yojji! Jamaya miya ajo Eyacuiñajji mimishi cuijea caje'yo. ¡Jamaya Eyacuiñajji sosequiajji acue!”

Jamaya Moisesija etehue'yo cua.

²⁵ Oe Jodio etti Simeoni bajjani Jenosanenajo ba'ya cua. Oya Eyacuiñajji epeeji nei quea bame nee nee cua. Ohuaya Quito ishoa'ajja ca ania cua Eyacuiñajji huoojea'yo ojjaña jaahuanajji. Jamatii jjashahuabaquiani Eyacuiñajji, jamajjeya Edojjoshahua Bame ojo nequia cua. ²⁶ Jamaya Edojjoshahua Bame onijje cua ba'a: —Miya emano'yojji pojjeama Eyacuiñajji huoojea'yo cue jjimahuaajo.

²⁷ Jamajjeya Edojjoshahua Bameya Simeoni poqui mee ca cua Eyacuiñajji equi yasijje. Simeoniya Jose, Mania Jesosa bishamijji nequi ba ca cua Eyacuiñajji equijo. ²⁸ Simeoniya ebacua Jesosa añua majje ba ca cua. Eyacuiñajji bihuia ca cua Jesosa ohua ba mee cajje. Jama cua ba'a: ²⁹⁻³⁰ —E'e de, jjeya nei Eyacuiñajji huoojea canaje ma ohua huoojepana ca cua;

jamajjeya ohuaya eya ba mee canaje. Jjeya eya poquije'yo Eyacuiñajji yasiije quea jaji nee eba'e tiitii'yojji. ³¹ Ojjaña meshijo ba'e cuaa Jesosa ba caje, Eyacuiñajjija huoojea'yo ojjaña mimishi cuijea'yojji. ³² Jesosaa ojjaña dejja cuana quea jjashahuabaqui ja'a nee po mee caje'yo Eyacuiñajjija esohuijo. Jesosa Emeshi Mese nei epojjiijo, Jodio dejja cuana quea bihui cuaje'yo —jamaya Simeoni cuanaje.

³³ Majoya Jesosaja chii, enaese pea'ai jjashahuabaquia cua Simeonija esohuijo jama ba'a: —E'e de, Simeonija esohui quea bame nee nee Jesosajo.

³⁴ Majoya aje Simeoniya Mania, Jose pea'ai jama aca cua ba'a: —Miquianaya aje Eyacuiñajjija quea bame acaje'yo. Mique bacua quea ca'a po mee caje. Jaahuana caje'yo. Mania, miya Jesosaja enaese. Mique bacuaa Jodio cuana jjashahuabaqui mee caje'yo Eyacuiñajjijo quea huiso nee. Beca dejja cuana jjapeequije'yo Eyacuiñajji nijje. Beca cuaa cajaa acaje, jjapeequi sa po ajja Eyacuiñajji nijje. ³⁵ Mimijajije Jesosa nijje cuana. Oya quecua caje'yo cuaa. Majoya aje oe miquianaya quea yeno cuaje ma cuanajoya —jamaya Simeoni cuanaje.

³⁶ Jomajo oe epona tii ania cua; Ana bajjani. Eyacuiñajjija epeeji nei nei cua; Panoaneja bacua piona. Ojaya huapa pojjeama Asene bajjani cua. Yahuajo oya jjahuiaquia cua. Oja yahue nijje ba'ya cua me oeije beca, 7 shequiajame. Majoya aje ojaya yahue mano'ya cua. ³⁷ Jamajjeya quea huiso nee nee shequiajame, 84 shequiajame ania cua. Etii nojinoji nei e'ahuemano'yo ania cua. Eyacuiñajjija equijo jjeya ani, cuayaqui ajja neinei ania cua. Jamatii mimiania cua Eyacuiñajji nijje, bihuibihuaia tiitiania cua ojjaña pojajo.

³⁸ Anaa ba ca cua Jesosa. Quea bihui nee cua. Jamaje dejja cuana nijje mimia cua joya Eyacuiñajjija huoojea'yo ishoa'ajja po ani nijje jama ba'a: —E'e ee bacue jiquio ebacua, Jesosa Quito cuayanaje! Ohuaya quea bei ba'e mee caje'yo Jodio cuana. Ojjaña cuanaja Emeshi Mese nei cuaje'yo —jamaya Anaa aca cua cuana.

Jose poqui o'oya cua oja meshi yasijje Nasanena huasijje

³⁹ Ojjaña Moisesija etehue'yo acua ajeyo'yo majje Jose oja huanase nijje, Jesosa pea'ai nijje poquia cua. Ma o ebionei ba'ya cua meshi yasijje poqui o'oya cua, Nasanena huasijje. ⁴⁰ Jomajo Jesosa tiia cua; quea ca'a nee nee, quea jjashahuabaqui ja'a nee cuanaje. Eyacuiñajjija oya jaahuana ca cua; quea bei nee nee ojo cua.

Jesosa etii shacuima' nequi epo oja naeya oja chiya pea'ai dojo ca cua Eyacuiñajjija equi yasijje

⁴¹ Jesosaja chii oja nae nijje poqui nequia cua Jenosanena huasijje pea Jodio cuana nijje ojjaña shequiajajo. Pascua pohua poquia cua Eyacuiñajji bihuiaa. Yahuajo nei Jodio etiiquianaja bacua cuana esohuidojojjiya cuia'yo jjima aca cua shejo poquia cua ojjaña nijje ijja'ijjiaa. ⁴² Jesosa etii shacuima' nequi po majje, 12 shequiajame po majje poqui pea'aia cua. ⁴³ Oe semana Jenosanenajo ania ojjaña cuaa Eyacuiñajji bihuia ca ania cua. Majoya Pascua jjayejequiajo ojjaña cuana poqui ca'ya cua. Jesosa ca ca poqui'yo jjima cua. Jamatii ojaya enaeseja ba'yo jjima cua, oja chiija pea'ai. Jesosa pea cuana nijje pojebe'yani poso aca cua. ⁴⁴ Majoya aje oe cahuime cuajo Jesosaja enaeseya niñeba ca'ya cua: —¿Aecue jiquio Jesosa so'o?

⁴⁵ —Chama' ca ca Jesosa. ¿Achacua shai poquinaje? —jamaya pea cuana cua.

Majoya aje huacuaya poqui o'oya cua Jenosanena huasijje Jesosa sa'ajja'yohua. ⁴⁶ Majoya pea beca peejjima cahuime epo ba ca'ya cua Jesosa Eyacuiñajjija equijo nequi. Jesosaa Eyacuiñajjija esohui huohuijji cuequi tii cuana huohui'ajja ca ania cua; Jesosa jjashajja'ajjaqui ania cua pea'ai. ⁴⁷ Ojjaña jjashahuaba neineiquinaje Jesosaja esohuijo: —E'e de, Jesosa quea ja'a nee nee jjashahuabaquiani, de —pea cuana cua.

⁴⁸ Joseya Maniaa pea'ai Jesosa ba majje mimia ca cua jama ba'a: —¿A'a mi quioya Jesosa? ¿A'ya cuae mi po nequinaje so'o? Ecuanaajaya miya ba'yo jjima nei nei cuanaje. Jamajjeya eya mijo quea yeno nee nee cuanaje, Jesosa. Jamajjeya ecuanaya sa'ajjasa'ajja'yoquinaje.

⁴⁹ Jesosaa jama aca cua ba'a: —¿Apojji acuae iña sa'ajja'yaña so'o? ¿A'a miquea ba jjima eya ecue Chiija equijo enequijji, Eyacuiñajjija equijo?

⁵⁰ Jose Mania pea'ai oja esohuijo jjabahuejjaqui jjima cua yajja cuani poso aca cua.

⁵¹ Majoya aje Jesosa oja chii nijje oja nae nijje Nasanena huasijje poqui o'oya cua, ma o ba'e yasijje. Jamatii Jesosaa shajja'ajja ca cua Jose, Mania pea'ai. Quea bihui ba'ya cua. Mania jjashahuabaquia cua Jesosaja esohuijo; pajea'yo jjima aca cua. ⁵² Jesosa tiia cua quea ca'a nee nee; quea ja'a nee nee cua. Eyacuiñajji quea bihui nee cua Jesosajo; dejja cuana quea bihui cua pea'ai.

3

*Huaniya Eyacuiñajjija esohui huohui ca cua
(Mateo 3.1-12; Macoso 1.1-8; Huani 1.19-28)*

¹ Quijje nei mahuiso emeshi mese cuana cua ba'a: Shomano dejja cuanaja emeshi mese Timeneo bajjani. Quea huiso shequiajame, 15 shequiajame nequijo Jodea meshija emeshi mese Ponisio Pinato bajjani nequinaje. Janinea meshija emeshi mese Enode bajjani cua. Oja doe etii Penipe bajjani cua. Oya Itoneaja emeshi mese cua, Taconiteja emeshi mese pea'ai cua. Amininiaja emeshi mese Nisanía bajjani cua. ² Eyacuíñajji nijje mimiani etii Anasi bajjani cua. Pea ca Caipa bajjani cua.

Jiquio emeshi mese cuana nequijo tiya aje Huani Sacaniaja bacua ejja nequia cua meshi quimajo. Onijje mimi majje Eyacuíñajjiya Huani huoojea ca cua esohui huohuijji epojji. ³ Jamajjeya Huani po'ayequeie nequia cua Eyacuíñajjiya esohui huohuiya Jodana cueijje. Ohuaya pea cuana jama huohuime aca cua ba'a: —¡Jashahuabaquicue Eyacuíñajjiyo; miqúea mimishi pajea'yocue! ¡Miquea mimishijo quea yeno pocue! ¡A'a mimishi maja sa po'yoyji! Miya mimishi pajea'yajo, aje Eyacuíñajjiya miqúea mimishi cuijea caje'yo. Eyaya miya besa meeje enajje pea cuanaja ebajji miya Eyacuíñajjiya epeeji nei nei cuanijo.

⁴ Jamaya Isaiaa yahuajo nei Huanijo theue ca cua. Isaia Eyacuíñajjiya epeeji, esohui huohuijji cua. Oya etiiquiana nei nei cua. Jama tehuemeya aje yahuajo aca cua ba'a: “Oe dejja quimajo nequi taaani jama ba'a: ¡Acua pocue! ¡Jashajja'ajjaquicue Eyacuíñajjiya huoojea'yo ojjaña jaahuanajjiyo!

⁵ Eyacuíñajjiya dejja quea mimishi cuana jeajea caje cuaqui yasijje jshajja'ajjaqui ajjajojo. Ojjaña joya Eyacuíñajjiya esohui ojaya ehoojea'yo ojjaña jaahuanajjiyo shajja'ajja caní ca ca quea bame nee cuaje'yo. Joya ecua ejiojji quea bame aca yani jama jayojja dejja cuana quea bame acaje'yo. ⁶ Ojjaña meshijo nequica dejjaa shajja'ajja caje Eyacuíñajjiya esohui. Joya onijje japeequije Eyacuíñajjiya mimishi cuijea caje'yo”.

Jamaya cua Isaiaja etehue'yo Huanijo.

⁷ Majoya dejja quea huiso cueya cua Huani que mimishi pajea'yohua nisho, oja besa mee yohua nisho pea'aiya. Jamajjeya aje Huaniya jama tecueame aca cua ba'a: —Miquianaya quea tai cuani. Peyo jayojja cuani. Miquianaaya ca jja ca mimishi pajea nisho'yaña. Miquianaya jshahuaba taiquiani jama ba'a: “Eyacuíñajjiya eya jeajea jjima acaje cuaqui yasijje Huanija enajje ebasa meejojo”. Jamatii miquianajaya ca jja ca oe mimishi pajea'yo jjima nei nei. ¡Ebionei oe shajja'ajjacue Eyacuíñajjiya esohui; majoya miquianajaya mimishi pajea neinei'yocue! Majoya oe enajje eyaya besa meeje'yo Eyacuíñajjiya epeeji nei epojji.

⁸ Miquianaya Eyacuíñajjiya epeeji nei ba'yanijo, mimishi epo beca'yoyji pojjeama. ¡Jama jshahuabaquimeya oe pocue enajje ebasaqui cuahuajje! A'a mimijji jama ba'a: “Ecua etiiquiana Amajama cua. Oya Eyacuíñajjiya epeeji nei cua, jamajjeya aje oe ecanaya Eyacuíñajjiya epeeji pea'ai cuani”. Cho, miquianaya ca ca japeequi jjima Eyacuíñajji nijje. Miquianaya quea mimishi, de. Eyacuíñajji ojaya epeeji quea huiso sa cuani jojjemo Amajama jayojja epojji, ohuaya mei pana came. ⁹ Miquianaya joya acui jajajama' jayojja cuani. Jiquio ecua acui jjajja'yo ajja jajajea ca'yoyji jayojja jama Eyacuíñajjiya dejja mimishi acaje'yo, jeajea caje'yo cuaqui yasijje. Jamaya aje miquianaya acaje'yo mimishi pajea'yo ajjajojo, onijje japeequi sa po ajjajojo. Beca cuana ca ca joya acui quea jjajja huiso jayojja cuani. Quea bame nee nee ba'yaní, Eyacuíñajji nijje japeequiani jjejojo. Quea bei ba'yaní pea cuana nijje, oya Eyacuíñajjiya quea jea nee nee acani jjejojo.

¹⁰ Majoya aje dejja cuaa jama huohui'ajjame aca cua ba'a: —¿Yajja acuae oe po cajji so'o?

¹¹ Huani jama cua ba'a: —¡Joya miqúea beca yanijo daqui quiacue daquima' cuana huasijje! ¡Miquea bobi yanijo ca bobima' cuana huasijje quiacue!

¹² Emeshi meseja bejjo chichajji cuani cuaa jama huohui'ajjame aca cua ba'a: —Esohui huohuijji, ¿yajja acuae pajjaja po cajji so'o?

¹³ Huani jama cua ba'a: —¡A'a quea mimishi pojji! ¡A'a quea sose huiso ajji! ¡Joya emeshi meseja sosehuiso tiya jsheshecue! —jamaya cua Huani.

¹⁴ Majoya aje sohuinanohua jama huohui'ajjame aca cua ba'a: —¿Yajja acuae ecanaya cuaje'yo so'o?

Huani jama cua ba'a: —¡A'a miquiaaya dejja cuana iñajji bejjo esijji! ¡A'a pea cuana nijje sijje pojji bejjo esijji! ¡Miquianajaya bejjojo nei jjaja oe quea bihui pocue! —jamaya Huaniya sohuinano aca cua.

¹⁵ Dejja cuaa Huani Eyacuíñajjiya huoojea'yo ojjaña jaahuanajji poso aca cua oja esohui quea bame nee nee cua jojjoja. ¹⁶ Huani ca ca Eyacuíñajjiya huoojea'yo ojjaña jaahuanajji pojjeama cua. Oya jama cua ba'a: —Eyaya miquianaya enajje besa meeje'yo Eyacuíñajjiya epeeji jojjoja. Eya ca ca Eyacuíñajjiya huoojea'yo ojjaña jaahuanajji pojjeama. Oya ca ca Quito bajjani quijje pishana cueje. Ohuaya miquiana que Eyacuíñajjiya Edojjoshahua Bame dobiqúi mee caje'yo. Jamajjeya miya quea bame cuaje'yo. Mimishi cuana pajea sa po'yo ajjajo ca ca, jeajea caje'yo cuaqui yasijje. Jamaya Quito oe nei quea ca'a nequi. Eya ca ca iña quea ca'a pishana nequi. Jamajjeya eya ca iña onijje nequi sa po ajja miquiana ani cojja nei. Quea bicho eya, de. ¹⁷ Quito cueje ojaya epeeji nei chicha'yohua. Pea cuana ca ca cajaa ajja

caje'yo. E'e, jiquio ecua seya anoso shaa jea majje equi yasijje iya'yaña jama ojaya epeeji cuana acaje'yo Quitohua. Jiquio ecua seya anoso cuiahuojo majje shaa jeajeña jayojja jama Quitohua ojaya epeeji pojjeama cuana jeajea caje'yo cuaqui quiijo'yo ajja huasijje —jamaya Huaniya aca cua.

¹⁸ Huaniya pea esohui jama cua ba'a ojjaña cuanajo: —Eyacuiñajji ojjaña nijje jjapeequi sa cuani, jjeya nei.

¹⁹ Ojaya pea esohui jama cua ba'a: —Esejaya emeshi mese, Enode bajjani quea mimishi nee nee cuanaje. Oja chahuaja, Penipeja huanase sii canaje oja huanase epo'yojji. Ma epona Enodiasi bajjani cuanaje —jamaya cua Huani.

²⁰ Jamajjeya Enode ma esohui shajja'ajja majje quea nee nee cua. Iña mee ca cua Huani ejeanobiaejajji, Enodeya quea mimishi nee neeya jjejojo.

Huaniya Jesosa enajje besa mee ca cua

(Mateo 3.13-17; Macoso 1.9-11)

²¹ Huani jeanobiajea jjimahua poquia cua dejja ojjaña cuana nijje Jodana cuei yasijje enajje besa meeya. Jesosa pea'ai poquia cua o que. Huaniya Jesosa besa mee ca'ya cua. Majoya Jesosa Eyacuiñajji nijje mimianijo, eyatahuatahua capajea ca cua. Edojjoshahua Bame huia' jama o sapa biajje cuabesa ba'ya cua. Japashineijje ba'eoquea cua. ²² Majoya esohui shajja'ajja ca cua ojjaña eyahuasijje. Eyacuiñajji Jesosa nijje jama mimime cua ba'a: —Miya ecue Bacua Ejja nei, Jesosa. Eyaya miya quea jea nee aña. Eya mijo quea bihui nee nee —jamaya cua Eyacuiñajji.

Jesosaja etiiquiiana

(Mateo 1.1-17)

²³ Jesosa Jodio dejja nei cua. Jesosaa 30 shequiajame tii majje esohui huohui coo ca cua. ²⁴ Ojaya etiiquiiana cuana yohua bajjani cua ba'a: Ebionei Jose nequia cua. Oya Jesosa tii meejji cua; Jesosaja chii jayojja cua. Jose ca Enija bacua ejja cua. Eni ca Mata'aja bacua ejja cua. Mata'a ca Nemija bacua ejja cua. Nemi ca Mequija bacua ejja cua. Mequi ca Janaja bacua ejja cua. Jana ca Joseja bacua ejja cua. Jose ca Matatija bacua ejja cua. ²⁵ Matati ca Amosoja bacua ejja cua. Amoso ca Nahuomaja bacua ejja cua. Nahuoma ca Esinija bacua ejja cua. Esini ca Naquiaja bacua ejja cua. ²⁶ Naquia ca Maataja bacua ejja cua. Maata ca Matatija bacua ejja cua. Matati ca Semeja bacua ejja cua. Seme ca Josequija bacua ejja cua. Josequi ca Jonaja bacua ejja cua. Jona ca Joanaja bacua ejja cua. ²⁷ Joana ca Shesaja bacua ejja cua. Shesa ca Sonobabeja bacua ejja cua. Sonobabe ca Sanatija bacua ejja cua. Sanati ca Nenija bacua ejja cua. ²⁸ Neni ca Mequija bacua ejja cua. Mequi ca Adija bacua ejja cua. Adi ca Cosamaja bacua ejja cua. Cosama ca Emanamaja bacua ejja cua. Emanama ca Esheja bacua ejja cua. Eshe ca Jesosaja bacua ejja cua. ²⁹ Jesosa ca Enieseja bacua ejja cua. Eniese ca Jonimija bacua ejja cua. Jonimi ca Mata'aja bacua ejja cua. Mata'a ca Nemija bacua ejja cua. ³⁰ Nemi ca Simeonija bacua ejja cua. Simeoni ca Jodaja bacua ejja cua. Joda ca Joseja bacua ejja cua. Jose ca Jonamija bacua ejja cua. Jonami ca Eniaquimija bacua ejja cua. Eniaquimi ca Meneaja bacua ejja cua. ³¹ Menea ca Menaja bacua ejja cua. Mena ca Matataja bacua ejja cua. Matata ca Nataja bacua ejja cua. Nata ca Dabija bacua ejja cua. ³² Dabi ca Isaija bacua ejja cua. Isai' ca Obedaja bacua ejja cua. Obedaja ca Boosija bacua ejja cua. Boosi ca Sanaja bacua ejja cua. Sana ca Naasonija bacua ejja cua. Naasoni ca Aminidabija bacua ejja cua. ³³ Aminidabi ca Adimija bacua ejja cua. Adimi ca Ashinija bacua ejja cua. Ashini ca Eshaomija bacua ejja cua. Eshaomi ca Panesija bacua ejja cua. Panesi ca Jonaja bacua ejja cua. ³⁴ Jona ca Jacoboja bacua ejja cua. Jacobo ca Isaacaja bacua ejja cua. Isaaca ca Amajamaja bacua ejja cua. Amajama ca Taneja bacua ejja cua. Tane ca Naconija bacua ejja cua. ³⁵ Naconi ca Senocaja bacua ejja cua. Senoca Shacaoja bacua ejja cua. Shacao ca Penecaja bacua ejja cua. Peneca ca Emeneja bacua ejja cua. Emene ca Sanaja bacua ejja cua. ³⁶ Sana ca Cainanija bacua ejja cua. Cainani ca Anajjadaja bacua ejja cua. Anajjada ca Semija bacua ejja cua. Semi ca Noeja bacua ejja cua. Noe ca Nemequeja bacua ejja cua. ³⁷ Nemeque ca Matosaneja bacua ejja cua. Matosane ca Enoqueja bacua ejja cua. Enoque ca Janedija bacua ejja cua. Janedi ca Majananeenija bacua ejja cua. Majananeeni ca Cainanija bacua ejja cua. ³⁸ Cainani ca Enosija bacua ejja cua. Enosi ca Setija bacua ejja cua. Seti ca Adanaja bacua ejja cua. Adana ca Eyacuiñajji pana cua. Oya ebionei dejja cua.

4

Edosiquiana etiiya Jesosa quea mimishi po mee sa aca cua

(Mateo 4.1-11; Macoso 1.12-13)

¹ Jesosa cueyanaje Jodana cuei yasijje Huaniya besa meeya. Jomajo Edojjoshahua Bameya Jesosa dojo canaje quima huasijje. Majoya Edosiquiana etii Jesosa nijje miminaje

oja emeshi mese nei epo'yojji nisho. ² Jomajo nequia cua quea huiso nee cahuime, 40 cahuime ijija'ijija jjima cua. Majoya quea shoe nee nee jjabaquia cua. ³ Edosiquiana etiyaya Jesosa jama huohuime aca cua ba'a: —Miya Eyacuiñajjija Bacua jjabaqui majje ca oe ijiquio mei pahui pojji acue! ¡Pahui pojji amajje ijjiacue!

⁴ Jesosa jama cua ba'a: —Chojja de, eya miquea esohui shajja'ajja sa po ajja. Bacue, Eyacuiñajjija etehue'yo jama cuani ba'a: “Dejja cuana bobijo ca'a po majje pojjeama ba'e tiitiije'yo. Ojjaña Eyacuiñajjija esohui jayojja jama añajo ca se ca oe quea bame nee ba'e tiitiije'yo” —jamaya Jesosa cua.

⁵ Majoya aje Edosiquiana ettiya Jesosa dojo ca cua eyiyo ao'ao huasijje. Majoya aje ba mee ca cua ojjaña meshi cuana; Jesosa cahuijo jayojja ba mee ca cua. ⁶ Edosiquiaa huohui ca o'oya cua jama ba'a: —Eyaya miya quiaje jiquio meshi cuana, miya emeshi mese po meeje'yo. Eyaya ojjaña aquiana quiaje'yo. Ojjaña meshi cuana ecuea, jamajjeya eyaya quia sa cuanijo eyaya aje miquea yajji quiaje'yo. ⁷ ¡Miyaya eya bihuiaacue, shajja'ajjacue ecuea esohui! Majoya miya emeshi mese po meeje'yo eyaya —jama siajje ameya aca cua Edosiquiaa Jesosa.

⁸ Jesosa jama cua ba'a: —Chojja, ¡poquicue quea huesha, Edosiquiana! Eyacuiñajjija etehue'yo jama cuani ba'a: “¡Eyacuiñajji oe nei bihuiaacue; oya oe nei ojjañaja Emeshi Mese nei nequi! ¡Ojaya ehuhui'yo jama oe acue!” —Jesosaa aca cua.

⁹ Majoya aje Edosiquiaa Jesosa dojo ca cua Jenosanena huasijje. Nequia cañaquia cua Eyacuiñajjija equi biajje. Majoya Edosiquiaa Jesosa jama aca cua ba'a: —Miya Eyacuiñajjija Bacua Ejja nei jjabaqui majje ijiquio nequi tohuua'ajja'yo socue meshi yasijje! ¹⁰ Eyacuiñajjija etehue'yo jama cuani ba'a:

“Eyacuiñajjija huoojca caje esohuidojojji cuana mi jaahuanaa. ¹¹ Oquequajao ohuaya emeya miya iñajjequi caje'yo. Jamajjeya miya ejjajiojji quecuasajaquijji pojjeama meijo”.

Jamaya cuani, de —Edosiquiana cuanaje.

¹² Jesosaa jama aca cua ba'a: —Chojja, miya jjashahuaba taiquiani, de. Eyacuiñajjija pea etehue'yo jama cuani ba'a:

“A'a jamaya mimijji ba'a: ¿A'a Eyacuiñajjija oja esohui e'e jojo nei acaje'yo? ¿A'a eya jaahuana nei caje'yo? Caba'ajjasahua. ¡A'a pojji!”

Jamaya yahuajo nei Moisesiya tehue ca cua —jamaya Jesosa cua.

¹³ Edosiquiana jjashahuabaqui jjima cua; pea esohui chama' cua Jesosa quea mimishi po meeji nisho. Jamajjeya Edosiquiana poquia cua. Majoya aje quijje cue o'oya cua o quea mimishi po mee'yohua nisho.

Jesosaa huohui coo ca cua Janinea meshi yasijje

(Mateo 4.12-17; Macoso 1.14-15)

¹⁴ Majoya Jesosa posohuaqui o'oya cua oja meshi yasijje, Janinea meshi yasijje. Edojjoshahua Bameya Jesosa quea ca'a po mee ca cua. Jomajo dejja cuana mimia cua Jesosajo, ojjaña meshi yasijje mimia cua. ¹⁵ Jamatii Jesosa po'ayequie nequia cua pea cuiñajji cuana huasijje Eyacuiñajjija esohui huohuiya Jodioja equi ejjachichaquijji cuana huasijje. Ojjaña dejja quea bihui cua onijje. Jama cuana cua ba'a: —E'e, ojaya esohui quea ja'a nee, quea bame nee nee.

Jesosa poquia cua Nasanena huasijje

(Mateo 13.53-58; Macoso 6.1-6)

¹⁶ Jesosa poquia cua Nasanena huasijje, oya tii'ya cua jomajo tii. Ojjaña epojja ejomishocajjijo Jesosa dobiqwi majamajanaje Jodioja equi ejjachichaquijji yasijje esohui huohuiya. Jamajjeya dobiqwi majje oya nequisohua cua Eyacuiñajjija etehue'yo aji. ¹⁷ Oe dejjaa, etehue'yo jaahuanaajjija Jesosa quia ca cua etehue'yo. Yahuajo Isaiaja etehue'yo cua. Isaia Eyacuiñajjija epeeji nei, ettiquiana cua; Eyacuiñajjija esohui huohuijji cua. Jamajjeya ojaya etehue'yo e'e jojo nei cua. E'e de, Jesosaa she'a ca cua ma etehue'yo, jama ame aca cua jiquio esohui ba'a:

¹⁸ “Edojjoshahua Bameya eya jjashahuabaqui mee cani. Ohuaya eya huoojca canaje jama ba'a: —¡Huohuicue ecuea esohui bame dejja aema' cuana huasijje! ¡Huohuicue dejja ejeanobiajaa cuana huasijje ecuayaqui mee'yojji! ¡Huohuicue cojjama' cuana huasijje ejjacojja ja'a meequi'yojji! ¡Huohuicue pea dejja quea yeno ba'e yasijje quea bihui eba'e meeji!”

¹⁹ Huohuicue jiquio esohui: Emeshi Mese neiya ojjaña cuana quea bihui ba'e mee sa acani”. Jamaya Isaiaa tehue ca cua yahuajo nei.

²⁰ Majoya Jesosaa etehue'yo camí ca'yonaje; quia ca o'oya cua ma dejja huasijje. Jesosa anioquea cua huohui epojji. Ojjaña oya ba ca'ya cua; ishoha'ajja ca cua ojaya esohui

ehuohuijji. ²¹ Ohuaya esohui huohui ca cua jama ba'a: —E'e, ma etehue'yo huohui cani ejo. Eya cue'yonaje ma deja cuana huasijje esohui huohuiya. Eyaya miquianaya huohui'ajjaña jama ba'a: Eyacuiñajjiya quea bihui ba'e mee caje'yo miquianaya —Jesosaa aca cua.

²² Ojjaña Jesosajo quea bame mimia cua. Jjashahuabaquia cua ojjaña ojaya esohuijo. Pea cuana ca ca Jesosajo jama cua ba'a: —Jesosaja esohui quea ja'a de, oya ca ca Joseja bacua nei, Eyacuiñajjiya Bacua pojjeama —jamaya pea cuana cua Jesosa Eyacuiñajjiya Bacua pojjeamajo poso.

²³ Jesosaa oya cuana tecuea ca cua jama ba'a: —Miquianaya jamaya cuaje miquianajaya ejjashahuabaquijji ba'a: “Ejjashicuiquijji, ¿Yajajje acuae jja miyaya mi jjashicui'ajjaquiani so'o?” ¿A'a nequiana jamaya pea'ai jjashahuabaquiani? Jama cuani ba'a: “Ecuanaaya miya shajja'ajjanaje, Jesosa. Miyaya jjaajaqui mee'yonaje Capenaomajo ba'e cuana. ¿Yajajjo acuaya o e miquea meshijo ba'e cuana jjaajaqui mee'yo jjima aña so'o?” ¿A'a nequiana jamaya jjashahuabaquime cuani? —Jesosa cua —. ²⁴ E'e jojo nei ecuea esohui, jamatii miquianaya Eyacuiñajjiya esohui huohuijji mimianijo oja meshijo ojaya huapa pojjeama cuana ca ca jjashajja'ajjaqui sa po ajja.

²⁵ —Miquianajaya eba ma etiquiana Enia bajjani. Yahuajo nei ohuaya huohui ca cua Eyacuiñajjiya esohui. Beshahua nei pea beca peejjima shequaijame ena po'yo jjima cua. Bobi tii jjima cua ena chamajajo. Ojjaña quea shoe nee nee cua. ²⁶ Yahuajo quea huiso Jodio e'ahuemano ania cua. Jamatii oya cuana ca ca jjashajja'ajjaqui sa po ajja Eniaja esohuijo, Eyacuiñajjiya ehuohui'yojo. Jamajjeya Eyacuiñajjiya Enia huoojea ca cua pea meshi yasijje Sinono meshi yasijje, Saneta cuiñajji yasijje, Sinono e'ahuemano que. Jomajo e'ahuemanohua shajja'ajja ca cua Eyacuiñajjiya esohui. Jamajjeya Enia bobia ca cua.

²⁷ —Miquianajaya eba pea etiquiana Eyacuiñajjiya esohui huohuijji Eniseo bajjani ba'ya cua Enia nijje. Quea huiso Jodio deja batata ep'o'yo jomajo ba'ya cua. Jamatii Eniseoja esohui shajja'ajja sa po ajja. Jamajjeya jjaajaqui mee'yo jjima aca cua Eyacuiñajjiya. Pea meshijo ba'e Sinia meshijo oe deja Naamani bajjani batata ep'o'yo nequia cua; oya shajja'ajja sa cua Eyacuiñajjiya esohui. Jamajjeya oya poquia cua Eniseo que, Eniseoja jjaajaqui mee'yohua. Ohuaya shajja'ajja ca cua ojaya esohui. Jamajjeya jjaajaqui mee ca'ya cua Eyacuiñajjiya. Jamaya miquianaya shajjama' cuani miquianajaya etiquiana jayojja. Jjeya nei shajja'ajja sa po ajja Eyacuiñajjiya esohui, jamajjeya jjaajaqui mee'yo jjima acaje Eyacuiñajjiya —Jesosa cuanaje.

²⁸ Ojjaña cuana Jodioja equi ejjachichaquijji anica Jesosaja esohui shajja'ajja majje quenequene neinei'ya cua Jesosa nijje. ²⁹ Jesosa iña majje jaeuayajea ca cua esecue yasijje. Majoya poqui mee ca'ya cua eyiyo hui yasijje e'iñajeatohuaeja'yojji nisho. ³⁰ Jamatii Jesosa poquia cua, jjajejequinana cua ona nequi yiyesamajjeya.

*Oe dejjaja eshahua nequia cua
(Macoso 1.21-28)*

³¹ Pea pojajajo Jesosa poquia cua Capenaoma huasijje, Janinea meshi yasijje. Ejomishocajji pojajajo oya dobiquia cua Jodioja equi ejjachichaquijji yasijje esohui huohuiya. ³² Ojjaña cuaa jama aca cua ba'a: —De, Jesosaja esohui quea ja'a nee. E'e jojo nei pojja'a Eyacuiñajjiya oya huoojea canaje, de.

Jamajjeya ojaya esohui shajja'ajja sa aca cua. ³³ Oe deja eshahua nijje tii ania cua Eyacuiñajjiya equijo. Eshahuaa oya taaa sajasaja mee ca cua Jesosa que jama ba'a: ³⁴ —E'e de, ¿apiojji shai miya ecuana que cueyanaje, Jesosa? Miya cueyanaje pojja'a ecuana cuayaqui mee'yohua. Ecuanaajaya miya eba, Jesosa. Miya Nasanenajo ba'e, miya Eyacuiñajjiya Bacua, miya mimishi'ama, de —jamaya eshahua cua.

³⁵ Jesosaa eshahua tecueajea ca cua jama ba'a: —¡A'a mimijji; cuayaqui'yocue jiquio dejjajo nequi! —Jesosa cua.

Majoya eshahuaa ma deja jeabichajea mee ca cua pea cuana pejejo. Eshahua nee'ama nei nei cuayaqui'yome cua ma dejjaja eyamijo nequi. ³⁶ Ojjaña jjajjasohuaquia cua; mimia cua pea cuana nijje jama ba'a: —E'e de, Jesosa quea sohui poja nee nee; ojaya esohuijo eshahua cuayaqui'yonaje, de. ¿Yajajje shai quea sohui poja nee nee? —jamaya cua ojjaña Jesosajo. ³⁷ Jamaya pea cuaa huohui ca cua ojjaña cuiñajjiyo ba'e yasijje.

*Jesosaa boeca mee ca'ya cua Simohuija ano
(Mateo 8.14-15; Macoso 1.29-31)*

³⁸ Majoya Jesosa cuayaquia cua Jodioja equi ejjachichaquijji ano. Cuayaqui majje poquia cua Simohuija equi yasijje. Dobiqumi majje ba ca cua Simohuija ano. Simohuija ano quea mano jaa, quea quiyo nee nee jaa ba ca cua. Simohuija Jesosa jama huohui'ajjame aca cua ba'a: —Jesosa, ¿a'a miyaya boeca meeje'yo ecue ano, ecue huanaseja enaese?

³⁹ Jesosaa Simohuija ano jama aca cua ba'a: —E'e, jjayahua nei mi quiyoquiyo pajeaje'yo —Jesosaa aca cua.

Majoya aje epona tii quiyoyuio pajea'ya cua. Boecanana'ya cua. Majoya boeca'yo majje anisohua'ya cua. Anisohua'yo majje bobi cuacua meesahua ca cua epona tiya.

Jesosaa quea huiso emanojaa cuana jjaajaqui mee ca'ya cua
(Mateo 8.16-17; Macoso 1.32-34)

⁴⁰ Quijje pishana eshequi oquequiajo ojaña emanojaa dojo ca cua Jesosa que jjaajaqui mee'yohua. Jesosaa emanojaa cuana emeya napa cajje jjaajaqui'ya cua. ⁴¹ Eshahua cuana pea'ai cuayaqui mee ca'ya cua. Cuayaqui'yo majje eshahua cuana taaa cua jama ba'a: —Jesosa, miya e'e jojo nei Eyacuiñajjija Bacua Ejja.

Jesosa jama cua ba'a: —¡A'a enijje jama mimijji! Miquea eba eya, Eyacuiñajjija huojea'yo ojaña jaahuanajji. Pea cuanaja eya ba jjima, de —jamaya Jesosa cua.

Jesosa po'ayequie nequia cua Eyacuiñajjija esohui huohuiya
(Macoso 1.35-39)

⁴² Jjapojaqui jeahuajo Jesosa oe nei poquia cua dejjama huasijje. Pea cuanaa sa'ajja ca nequia cua: —¿Aecue Jesosa?

Quijje pishana ca ca ba ca'ya cuaa cua Jesosa. Mimia cua onijje jama ba'a: —Jesosa, ¡nequie ecuanaja cuiñajjijo! ¡A'a poquijji pea cuiñajji yasijje!

⁴³ Jesosaa jama huohuime aca cua ba'a: —Chojja, ¡iquio cuiñajjijo eya nequi ajja. Eyaya Eyacuiñajjija esohui cahuhuiquiahua pea cuiñajjijo ba'e cuana huasijje. Jamajoya aje oe eya ecue Chiiya huojea canaje ojaya esohui bame bame huohuijji pea cuana huasijje. Eyaya iyaaje deja cuana jama ba'a: “¡Jashajja'ajja quicue oe! Eyacuiñajjija miya quea jea nee nee acani, oya miquea Emeshi Mese nei po sa cuani; mi jaahuanajji nei nei po sa cuani. Ohuaya miya ba'e bame mee sa acani. ¡Jamajjeya onijje jjapeequicue!” —jamaya Jesosa cua. ⁴⁴ Jamaya ohuaya esohui huohui ca ayequi nequia cua Jodioja equi ejjachichajjiji cuana huasijje, ojaña meshi cuana huasijje.

5

Jesosaja epeejjija nahuoo cuiashaja ca cua quea huiso nee nee
(Mateo 4.18-22; Macoso 1.16-20)

¹ Oe pojajjo Jesosa Jenesane bae sahua meshijajji ania cua. Pea cuana huasijje Eyacuiñajjija esohui huohui po ania cua. Quea huiso dejjaa ojaya esohui shajja'ajja sa aca cua. ² Quea deja huisojojo shajja'ajja jjima aca cua pea dejja cuaa. Jamajjeya Jesosaa pea e'anijji sa'ajja ca cua ojañaaja eshajja'ajjajji. Majoya becanejjijji bishe ai ba ca cua bae sahuajo ba'e. Ma bishe mese cuana nahuoo cuiashajjiji shacua'yo po nequia cua. ³ Oe bishe mese Simohui bajjani cua. Jesosa nequisohuaquia cua oja bishe yasijje. Jesosaa Simohui huohui'ajja ca cua jama ba'a: —¡Quecuayijeacue ena bae pishana huasijje ojañaaja ecuea esohui eshajja'ajjajji!

—E'e —Simohui cua.

Majoya bishe quecuayijejea majje Jesosaa bishejo e'anioque aniya tii esohui huohui ca añaa. ⁴ Jesosaa esohui huohuijeyo majje Simohui jama aca cua ba'a: —Simohui, ¡bishe yocue ena bae yiyesama huasijje! ¡Majoya jeacue nahuoo cuiashajjiji!

⁵ Simohuiya jama aca cua ba'a: —Esohui huohuijji, ecuana mecajje poquinaje nahuoo cuiashajaa nisho. Chama' de, chama' nahuoo cuanaje. Eyaya ca ca shajja'ajja sa añaa miquea esohui, jamajjeya eyaya jeaje ena huasijje nahuoo cuiashajjiji —jamaya Simohui cua.

⁶ Majoya yo ca cua ena bae yiyesama huasijje nahuoo cuiashajjiji. Jea ca cua nahuoo cuiashajjiji; quea huiso nee nee nahuoo dobiquia cua. Quecuaisajja'ajja ca cua. ⁷ Majoya Simohuiya ojaya epeejji cuana iyaa ca cua: —¡De, yacua oe yecue bishe pea, che nahuoo jjequijeasohuahuae!

Majoya pea bishe ye ca cua; cuio ca cua beca bishe nahuohua. Beshahua nei bishe jaadobiquia cua. ⁸ Ma ba majjeya aje Simohui ecui'oshajjajo nequia cua Jesosa pejeje; jama cua ba'a: —De, ecuea Emeshi Mese, e'e jojo nei miquea esohui, eya miquea esohuijo jjashahuaba taiquinaje, de. ¡Quea huesha nequicue Jesosa, eya quea mimishi cuanaje! —jamaya Simohui cuanaje.

⁹ Simohuiya epeejji cuana jjajjasohuaquia cua nahuoo quea huiso ohua cuiashaja cajo. O jayojja jjajjasoquime pea'aiya cua, de. ¹⁰ Semeneoja bacua cuana Satiaco, Huani, Simohuiya echacosahuajji cuani pea'aiya jjajjasohuaquia cua.

Majoya Jesosaa Simohui jama aca cua ba'a: —¡A'a jjajjasoquijji! Miquianaaya banaje ecuea esohui e'e jojo nei nahuoo cuiashajjijjo. Jjeyahua nei miquianaaya dejja quea huiso jjequije ecuea esohuijo ejjashajja'ajjaquijji, ecuea epeejji epojji —jamaya Jesosa cua.

¹¹ Majoya cuaa bishe yo ca'ya cua etaja huasijje. Aquiana cuana jeana'yo majje poquia cua Jesosa nijje.

Jesosaa dejja jjaeja mee qui ca'ya cua batata epo'yo ma dejjaa shicui jjima acani
(Mateo 8.1-4; Macoso 1.40-45)

¹² Oe pojajajo Jesosa ania cua pea cuiñajijjo. Cue'ya cua oe dejja batata epo'yo. Ojjañaja oya boti'ama cua, o jayojja epo cuani jjejojo. Oya Jesosa ba majje ecui'oshajjajo nequia cua o bihuiajji. Jama huohui'ajjame aca cua ba'a: —Emeshi Mese nei, miya sa cuanijo, ¿a'a mo che miyaya jjajeaqui mee'yome so'o? —aca cua ohuaya.

¹³ Majoya Jesosaa napa'ajja ca cua emeya, quea jeajojo huohui ca cua: —E'e, eyaya miya jjajeaqui meeje'yo batata epo'yo. Quea boejea po meeje'yo.

Jjajeaqui mee'yo majje chama'yo cua ojaya batata epo'yo. Quea boejea ojaya ejee po'yonaje.

¹⁴ Majoya Jesosaa jama huohuime aca cua ba'a: —iA'a oe pea cuana huohuijji! ¡Ey-acuiñajijja equi yasijje oe poquicue! ¡jomajo huohuicue Eyacuiñajijja esohui huohuijji: “Jjajeaqui'yonaje mo” acue! ¡Moisesija etehue'yo jama oe acue! ¡Quiaquicue beca huia', beca ijjiacajji pea'ai, equiajji Eyacuiñajji bihuiajji, miya ojaya ejjajeaqui mee'yohua jjejojo! Majoya esohui huohuijji cuana jjabahuejjaquije miquea batata epo'yo chama'yo cuanajejo. Majoya ojjaña jjabahuejjaquije miya quea bojea po'yonajejo —Jesosaa aca cua.

¹⁵ Jamatii quea huiso dejjaa shajja'ajja ca cua Jesosaa jjajeaqui mee ca'yani batata epo'yo. Ohuaya jjaajaqui mee ca'yani emanojaa cuana. Jamajjeya quea dejja huiso nee cueyanaje shajja'ajjaa, jjaajaqui'yohua pea'ai. ¹⁶ Jamatii Jesosa poqui nequia cua dejjama huasijje Eyacuiñajji nijje mimiya.

Jesosaa jjaajaqui mee ca'yonaje oe dejja jeo'ajjaa

(Mateo 9.1-8; Macoso 2.1-12)

¹⁷ Oe pojajajo Jesosa poquinate onaja equi yasijje esohui huohuiya. Paniseo dejja cuana, Moisesija etehue'yo huohuijji cuana pea'ai cueyanaje Eyacuiñajijja esohui shajja'ajjaa. Quea dejja huiso pea meshijo ba'e cuana cueyanaje, Janinea meshijo ba'e cuana. Jodea meshijo ba'e cuana, Jenosanenajo ba'e cuana pea'ai cueyanaje. Jesosaa Eyacuiñajji nijjeya quea huiso emanojaa jjaajaqui mee ca'yonaje. ¹⁸ Jamajjeya pea dejjaa oe dejja jeo'ajjaa ye ca cua equi yasijje. Dojodobiaqui sa aca cua Jesosa que. ¹⁹ Dobiqum meeme ajja cuana cua quea dejja huisojojo. Jamajjeya aje dojosohua ca'ya cua equi jamacoo huasijje. Huejja ca cua eyiyesama neijje. Jesosa nequi cojja nei jea'oquea ca cua. ²⁰ Jesosaa ba ca cua dejja jeo'ajjaa ojaya epeeji pea'ai. Jjashahuabaquia cua jama ba'a: —E'e de, jiquio dejja cuanaja eba eyaya jjaajaqui meeje'yo emanojaa cuana.

Jamajjeya jeo'ajjaa huohui canaje jama ba'a: —E'e ecuea epeeji, jjeja miquea mimishi eyaya cuijeaje'yo.

²¹ Majoya Paniseo cuana, Moisesija etehue'yo huohuijji cuana pea'ai jjashahuaba taiquia cua; Jesosa Eyacuiñajijja Bacua pojjeama poso aca cua. Jama cua ba'a: —Jesosa quea tai cuani, de. Oya Eyacuiñajji jama cuani. Oe nei Eyacuiñajijya mimishi cuijea caje'yo. Jesosaja ca ecuijea'yojji pojjeama —poso aca cua.

²² Jesosaja eba ojaya jjashahuabaquijji cuana. Jamajjeya huohui ca cua jama ba'a: —Miquianaya jjashahuaba taiquiani, de. ²³ ¿Ache esohui camaja'ama so'o? Jiquio pojja'a ba'a: “¡Eyaya miquea mimishi cuijeaje'yo!” Pea esohui pojja'a: “¡Nequisohuacue, poqui'ajja socue!” ²⁴ E'e de, eyaya huohuije jiquio dejja jeo'ajjaa huasijje jama ba'a: “¡Nequisohuacue; miquea equipajaaji bebo majje poqui'yocue miquea equi yasijje!”

Pea cuana huasijje Jesosa jama cua ba'a: —iPea cuana shajja'ajjacue, ejjabahuejjaquijji! Eyaya ojjañaja Emeshi Mese nei cuani. Eyaya miqianajaya mimishi cuijea mee yaña ojjaña meshijo ba'eja —jamaya Jesosa cua.

²⁵ Majoya aje dejja ejjachichacu nequijo jeo'ajjaa nequisohua'ya cua, poqui'ya cua oja equi yasijje. Oya quea bihucua Eyacuiñajji nijje, Jesosa nijje pea'ai. ²⁶ Pea cuana Eyacuiñajji bihuia ca cua jama ba'a: —E'e, eseyaya banaje jiquio dejja jeo'ajjaa jjeja jeojeo'yoqui, mimishi cuijea ca'yonaje pea'ai, de.

Ojjaña cuana Jesosa nijje quea bihucua nee nee cuanaje jeo'ajjaa jjaajaqui mee ca'yajo.

Jesosaa Nemi iyaa ca cua ojaya epeeji epojji

(Mateo 9.9-13; Macoso 2.13-17)

²⁷ Majoya Jesosa equijo ani cuayaquia cua. Poquijeya ohuaya ba canaje Nemi ona emeshi meseja esohuijo sosejjesheji cuani eba'eji soseje. Oya equi sisi e'iyajo ani ejtojji cojja sahuajo. Oya siipojji, de, jamajjeya oya ojjañaja boti'ama. Jesosaa oya ba majje jama aca cua ba'a: —Nemi, ¡cua'ajja; ecuea epeeji po'yocue!

²⁸ Jamajjeya Nemi nequisohua cua; ojaya aquiana jeajeana majje poquia cua Jesosa nijje. ²⁹ Quijje pishana Nemiya iyaa ca cua ojaya epeeji cuana e'ijjia'ijjajji Jesosa nijje. Iyaa ca cua ona sosejjesheji cuana, pea dejja cuana pea'ai. ³⁰ Paniseo dejja cuana Moisesija etehue'yo huohuijji cuana pea'ajja boti'ama cua ona sosejjesheji cuana. Jjashahuaba

taiquia cua jama ba'a: —Quea mimishi Jesosa, o shajja'ajjajji cuana pea'ai. ¿Yajjajje acuae deja mimishi cuana nijje ijia'ijjiani? Quea mimishi epojji pojja'a.

³¹ Jesosaja eba ojaya ejashahuabaquijji. Jamajjeya huohui ca cua jama ba'a: —¿A'a miqiuanaajaya shajja'ajja jima jiquio esohui pojja'a? Jama ba'a: “Dejja quea aja eshicuijji bajji yasijje poqui sa po ajja. Emanojaa ca eshicuijji bajji yasijje poquiani”. Jamaya miqiuanaaya jaya mimishi'ama poso jjabaquiani. Jamajjeya miqiuanaaya shajja'ajja sa po ajja ecuea esohui. Pea cuana ca quea mimishi nee neeya shajja'ajja cani ecuea esohui. Jamajjeya eya ijia'ijjiani mimishi cuana nijje. ³² Eya cue'yonaje dejja mimishi iyaaa. Dejja mimishi'ama cuani poso iyaa sa po ajja iña. Dejja jaya quea mimishi nee nee iyaae mimishi pajea mee'yojji.

Bobi ijia jjima yajjijo huohui'ajja canaje cuaa
(Mateo 9.14-17; Macoso 2.18-22)

³³ Paniseo cuaa Moisesija etehue'yo huohuijji cuaa Jesosa huohui'ajja ca cua jama ba'a: —Esejaya etiquiana jamaya huohui cani ba'a: “¡A'a ijia'ijjiajji jiquio pojjaajo! ¡A'a jashahuabaquijji bobijo; jashahuabaquicue Eyacuiñajjijo nei! ¡Mimicue onijje, quea yeno pocue!” jamaya esejaya etiquiaa huohui cani. Huaní shajja'ajjajji cuaa jamaya acani pea'ai. Jesosa, mi shajja'ajjajji cuana ca ca ijia'ijjiani tii. ¿Yajjajje shai? Quea mimishi cuani pojja'a.

³⁴ Jesosaa jama aca cua ba'a: —E shajja'ajjajji cuana enijje ijia'ijjiani. Ecuea eba nei nei Eyacuiñajjija esohui e'e jojo nei. Ma esohui huohuijji cuanaja esohui ecuanajaya jjeyahua e'ajji pojjeama. Ejjahuanaquijji pojjaajo ojaña quea bihui cuani, ijia'ijjiani, quea yeno pojjeama cuani. ³⁵ O huanajji epo mano'yajo ojaña quea yeno cuaje. Ma pojjaajo ijia'ijjia sa po ajja cuaje. Jashahuabaquie'yo emano'yojo. Eya jiquio ecua yahue mano'yani jayojja cuaje. Jjeya ecuanaya quea bihui cuani ijia'ijjiani. Eya quijje pishana manojeyo. Majoya ecuea epeejji cuana quea yeno cuaje; ma pojjaajaya bobi ijia jjima acaje —jamaya Jesosa cua.

³⁶ Majoya ohuaya ojaya esohui huohui ca cua ejashahuabaquijji jama ba'a: —Daqui eyacua isajea ca ajja daqui chii jaca'yojji. Chojja. Miquea daqui eyacua isajea'yo majje daqui chii jaca'yojji'yajo, daqui eyacua ehuosho'yojji pojjeama. Daqui chii ejaca'yojji poqui ajja cuiñajji yasijje daqui chiiiji jjejojo.

³⁷ —Ecuea pea esohui jama cuani: Ijjiacajji jee eyacua monsa pojji acajji ena sese nequajji. Ma ena sesejaya ejee eyacua shejjee mee cani. Majoya oe huana cani cuaa pea ena sese ejee chiijo cuiapojojea caje'yo shejjee majje. ³⁸ Jamajjeya huana cani cuaa ena sese monsa eyacujajo cuiapojojea jjima yajji.

³⁹ —Jamaya ecue sohui eyacua cuani. ¡Miqiuanaaya ecuea epeejji nei po sa cuanijo shajja'ajjacue ojaña ecue sohui! Beca cuana shajja'ajja sa po ajja ecue sohui eyacujajo. Jashahuaba taiquiani, de. Etiquianaja esohui ejee echii jayojja. ¡Jamajjeya ecue sohui oe shajja'ajjacue! —jamaya Jesosa cua.

6

Jesosa shajja'ajjajji cuaa anoso sejja ca cua ejomishocajji pojjaajo
(Mateo 12.1-8; Macoso 2.23-28)

¹ Oe ejomishocajji pojjaajo Jesosa o shajja'ajjajji cuana nijje poquia cua anoso ai nequi yiyesamajje. O shajja'ajjajji cuaa emeya sejja ca cua anoso eshe tii e'ijjiajji quea shoeya jjejojo. ² Majoya Paniseo cuaa Jesosa o shajja'ajjajji cuana ba ca cua. Jesosa nijje mimijajinaje jama ba'a: —¿Yajjajo acuaeya epojja ejomishocajjijo anoso sejja mee yaña so'o? Moisesija etehue'yo jamaya cuani ba'a: “¡A'a chacojji ejomishocajji pojjaajo!”

³ Jesosaa jama aca cua ba'a: —Miya quea sohui tai cuanaje; Eyacuiñajjija esohui nei pojjeama aña miqiuanaaya. Miqiuanaaya jashahuaba taiquiani, de. ¿A'a miquea ba jjima pojja'a ma etiquiana, emeshi mese Dabi bajjani? Jama etehue'yo yani Dabijo ba'a: Oya Eyacuiñajjija epeejji nei. Oe pojjaajo oya oja epeejji cuana nijje poquije, ⁴ dobiquinana cua Eyacuiñajjija equi yasijje bobi sa'ajjaa quea shoe nee neejojjo. Ma equijo ani pahui ijia ca'yonaje; quia ca'yonaje ojaya epeejji cuana huasijje pea'ai. Eyacuiñajjija etehue'yo jama cuani ba'a: “Jiquio pahui Eyacuiñajji nijje mimianija e'ijjiajime”. Jamatii Dabi ca mimishi'ama cuanaje. Oya poquianinaje Eyacuiñajjijo chachochaco neineiya. Jamaya aca cua Dabiya. ⁵ Ecuana Dabi jayojja cuani. Eya Eyacuiñajjijo chachochaco neineiiani. Jamajjeya ecuaaya jiquio anoso ai sejjaña ejomishocajji pojjaajo —Jesosa cua.

Oe dejja meshahuama'yo epo Jesosaa jjameshahuanequi mee ca'ya cua
(Mateo 12.9-14; Macoso 3.1-6)

⁶ Pea ejomishocajji pojjaajo Jesosa poquia cua Jodioja equi ejjachichaquijji yasijje esohui huohuiya. Oe dejja meshahuama'yo epo ania cua jomajo. ⁷ Paniseo dejja cuana,

Moisesija etehue'yo huohuijji cuana jashahuaba taiquia cua Jesusajo jama ba'a: —Jesusa shajjama' jayojja ecuanaja esohuijo cuani. Ohuaya chaco caje ejomishicajji pojajajo pojja'a; jmeshahuanequi mee caje'yo dejja meshahuama'yo epo. Jesusa jamaya shajjama' cuajo ecuaaya oya iñaje'yo edojojji ejeadobiajeajji.

⁸ Jesusaja onajaya ejashahuaba taiquijji eba cua. Jamajjeya ohuaya ma dejja meshahuama'yo epo ani huohui ca cua jama ba'a: —Meshahuama'yo epo, inequisohuacue ojjañaja ebajji! —Jesusaa aca cua.

Jamajjeya oya nequisohua cua. ⁹ Jesusaa huohui ca cua pea cuana jama ba'a: —Eyaya miquianaya huohui'ajjaje: ¿Ache quea bame epojji ejomishocajji pojajajo? Quea bame mi ba'e mee cajji chi. Quea tai mi ba'e mee cajji chi. Ba'e mee cajji mi chi. Quecua ca'yojji mi chi.

¹⁰ Jamajjeya ohuaya pea cuana huasijje ba majje ma dejja huohui ca cua jama ba'a: —¡Eme jeapisa'ajja'yosocue!

Majoya eme jeapisa ca'ya cua. ¹¹ Beca cuana quea que nee nee cua. Jama mimimimia cua ba'a: —Jesusa shajjama' nei nei cuani ecue esohuijo. Ohuaya jmeshahuanequi mee ca'yonaje ejomishocajji pojajajo. ¿Yajja acuae seya Jesusa aje jjeyahua nei e'iñajji? —jamaya cua Jodio dejja cuana Jesusa iñajji nisho.

Jesosa chicha ca cua o shajja'ajjajji cuana 12 huisome

(Mateo 10.1-4; Macoso 3.13-19)

¹² Oe pojajajo Jesusa poquia cua eyiyo quibo huasijje mimiya Eyacuiñajji nijje. Ojjaña mecajje mimia cua onijje. ¹³ Eshequi jaasohuanijo, jchachaquia cua o shajja'ajjajji cuana nijje. ¹⁴ Oya cuana yohua bajjani cua ba'a: Simohui, quijje Jesusaa oya pea bajjani Peno aca'ya cua; Simohuija chahua yohua bajjani ba'a: Anesi; pea o shajja'ajjajji ca yohua bajjani cua ba'a: Jacobo, Huani, Penipe, Manotonome, ¹⁵ Mateo, Tomasi, Apeoja bacua bajjani Satiaco; Simoni, ojaya meshi quea boti nee nee cua, ¹⁶ Jacoboja bacua Jode bajjani. Pea dejja yohua bajjani cua ba'a: Jodasa Isicaniote, oya Jesusaja epeeji nisho cua. Mahuiso o shajja'ajjajji cuana e'e jojo nei cua.

Jesosa quea dejja huiso huasijje Eyacuiñajji esohui huohui ca cua

(Mateo 4.23-25)

¹⁷ Majoya Jesusa o shajja'ajjajji cuana nijje eyiyojo ani jaaoque o'oya cua. Jaaoque majje nequi'ya cua meshi bame bamejo esohui huohuiya. Quea huiso Jesusaja pea e shajja'ajjajji cuana jomajo ania cua. Quea dejja huiso cueya cua, Jodea meshijo ba'e cuana, Jenosanenajo ba'e cuana, Tinojo ba'e cuana, Sinonojo ba'e cuana pea'ai. Quea huesha ba'e cuana cueya cua Jesusa shajja'ajjaa. ¹⁸ Ojjaña shajja'ajja'yo sa aca cua, jjaajaqui'yo sa cua pea'ai. Pea cuanajo nequi eshahua cuayaqui mee ca'ya cua Jesusaa. ¹⁹ Ojjaña Jesusa napa sa aca cua pea jjaajaqui mee'yojijijo. Jesusaa emeya napa cajje jjaajaqui ca'yonaje cuana.

Jesosaja esohuiya dejja cuana quea bihui po mee caje beca cuana ca quea yeno po mee caje

(Mateo 5.1-12)

²⁰ Majoya Jesusaa ba majje o shajja'ajjajji cuana huohui ca cua jama ba'a: —Beca cuana jashahuabaquiani jama ba'a: “E'e de, eya quea mimishi nee. Eyacuiñajjiya ecuea mimishi cacuijea ca'yahua”. Jamaya jashahuabaquianijo Eyacuiñajjiya oya ba'e tiiti mee caje'yo onijje eyajo. ¡Oya cuana quea bihui nee capo'yahua!

²¹ —Ojaya epeeji cuana Eyacuiñajjiya esohui jayojja jama a sa neinei cuanijo Eyacuiñajjiya oya cuana quea jaji nee nee ba'e meesahua caje'yo. ¡Quea bihui nee capo'yahua oya cuana!

—Oja epeeji cuanaja mimishijo pa neineiianijo Eyacuiñajjiya quea bihui nee po mee caje'yo mimishi cuijea ca'yajje.

²² —E'e, imiquianaya ecuea epeeji cuana, quea bihui nee nee pocue! Dejja cuana miquiana nijje mimijajje, miquianaya dejja cuaa cuia caje pea'ai, siajje minijje cuaje pea'ai. Jamati, miquianaya ecuea epeeji cuanijo, dejja cuaa mimishi po mee'yo sa acani. Eyacuiñajjiya ca ca miquianaya quea bihui nee po mee caje'yo. ²³ Jamajjeya ijyehua nei quea bihui nee nee pocue! Eyacuiñajjiya miquianaya eyajo quia caje'yo miquianajaya aquiana quea bame nee nee, quea huiso nee nee. E'e, Eyacuiñajjiya esohui huohuijji yahuaqo nei nei ba'ya cua jamaya aca cua mimishi cuaa; napa ca cua pea'ai. Jamajjeya jona jayojja jama pocue, quea bei!

²⁴ —Joyaya nequiana oe quea aquiana huiso jjejojo, Eyacuiñajjiyo jashahuabaqui jjima. ¡Bacue! ¡Jjeya miquianaya quea bihui nee nee jjabacucue! Majoya aje mi oe quijje quea yeno nee nee cuaje'yo cuaqui yasijje poqui majje mano'yo majje.

²⁵ —E'e de, ¡joyaya nequiana oe bobijo jashahuabaquiani jjejojo Eyacuiñajjiyo jashahuabaqui ajja bacue! ¡Jjeya miquianaya quea jeje jjejojo quea bei jjabacucue!

Majoya aje mi oe quijje quea shoe nee nee, quea yeno nee nee cuaje'yo. Bobima' nei cuaje cuaqui yasijje poqui'yo majje.

—¡Joyaya mi oe quea bihui jjejojo soa ani jjabacuicue! Eyacuiñajijjo jashahuabaqui ajja, quijje pa neineije'yo; quea yeno nee nee cuaje'yo cuaqui yasijje poqui'yo majje.

²⁶—¡A'a oe esohui huohuijji nisho pojji, dejja quea bihui epo meejji nisho pojji! Ma ecua esohui huohuijji nisho etiuijaa quea bihui po mee ca cua jama. Jama po majjeya aje mi oe quijje cuaqui yasijje poqui'yo majje quea yeno nee nee cuaje'yo.

Quea boti nee a'yocue dejja cuana minijje quea quene cuani

(Mateo 5.38-48; 7.12)

²⁷ Jesús aca cua ba'a: —¡Jashajja'ajjaquicue oe! ¡A'a oe ona boti'ama pojji! ²⁸ ¡Quea boti a'yocue dejja minijje quea quene cuani! ¡Joya miqiana nijje mimijajianijjo mimicue Eyacuiñajji nijje ojo! ²⁹ ¡Onaa shemo cuia cajje shemo mijipeajje cuia mee o'oyacue! ¡Onaa miqianajaya daqui jjequisejjajea cajo dojo mee'yocue miqianajaya pea daqui pea'ai! ³⁰ Onaa: “¡Aquiana che mo quiacue!” acajje, ¡quiacueya oe! Onaa miqianajaya aquiana sii cajo ¡a'a huohui'ajja'yojji! ³¹ Miqianajaya mimiani pea cuana nijje jama ba'a: “¡Enijje quea bame nee po tiitii'yocue!” ¡Jamajjeya miqianajaya pea cuana nijje quea bame nee po tiitii'yocue!

³² —¡Joya miqiana quea jea ajji cuani miqiaaya quea jea nee aña pea'ai; miqiana nijje quea quene cuani ca ca miqianajaya boti'ama. Dejja mimishi cuana aje oe jamaya cuani pea'ai. ¡A'a dejja mimishi jayojjaya pojji! ¡Ojjaña quea jea nee nee acue! ³³ Miqianaaya miqianajaya epeejji quea bame aña, pea cuana caya ca oe boti'ama aña. Dejja mimishi cuaa aje oe jamaya acani pea'ai, de. ¡A'a dejja mimishi jayojja pojji; ojjaña quea bame acue! ³⁴ Miqianaaya joya jjaquiaqui'yojji yasijje quiaña. Joya jjaquiaqui'yo ajja huasijje quia jjiama aña. Dejja mimishi cuana aje oe jamaya cuani pea'ai. ¡A'a dejja mimishi jayojja pojji! ¡A'a quea dejja tai pojji! ¡A'a quea nishehui pojji! ³⁵ ¡Miqianaaya miqianajaya epeejji pojjeama cuana quea jea nee a'yocue! Jamajjeya quea bame ba'eje'yo. ¡Pea cuana miqianajaya aquiana dojo sa cuanijjo oe pojji cahuime dojo meecue! ¡Miqianajaya a'a jshahuabaquijji miqianajaya aquianajo, miqianajaya bejjojo! ¡Eyacuiñajijjo oe jshahuabaquicue! Majoya miqianajaya ojaya epeejji nei cuaje'yo. Eyacuiñajijya ojjaña cuanajaya quea jea nee nee acani. Ojjaña dejja cuana, ojaya epeejji cuana, ojaya epeejji pojjeama cuanajaya quea jea nee acani, de. ¡Jamaya oe pocue! ³⁶ E'e de, esejjaya Chii eyajo quea bame nee ani, ojjaña cuana Eyacuiñajijya quea jea nee nee acani. ¡Eyacuiñajji jayojjaya jama po tiitii'cue!

¡A'a pea cuana niñebajji!

(Mateo 7.1-5)

³⁷ Jesús aca cua ba'a: —¡A'a pea niñebajji! Jamaya Eyacuiñajijja boti'ama. Miqianajaya pea cuana niñebajji cuanijjo, Eyacuiñajijya miqianajaya tecuea caje'yo pea'ai. Miqianajaya pea nijje jjabequi'yojjo Eyacuiñajijya miqianajaya mimishi cuijea caje'yo. ³⁸ Miqianaaya pea cuana huasijje quea huiso nee quiajo, jamaya quea huiso nee nee miqianajaya Eyacuiñajijya oya huisoajjaya quia caje'yo pea'ai. Quea huiso nee nee cuaje, de. Oe pojji quiajo ca ca miqianajaya Eyacuiñajijya oya huisoajjaya quia caje'yo —jamaya Jesús cua.

³⁹ Jesús aca pea esohui ejshahuabaqui meejji jama aca cua ba'a: —E'e de, ¿a'a acuae oe cojjamaa pea cojjama' me pejejea majje dojo caje so'o? Cho, eme pejejeajji pojjeama, o pea'ai oquejeaquie mei jani yasijje, de. Cojjama' jayojja dejja mimishi pea dejja mimishiya dojo cajje cuaqui yasijje poquije'yo onijje tii. ¡A'a cojjama' jayojja pojji! ⁴⁰ Oe esohui huohuijji quea ja'a nee nee cuani. Ohua esohui huohui coo canijjo, o shajja'ajjajji cuana quea ja'a pishana cuani. Jamatii ma eshajja'ajjajji quea ja'a cuaje ojaya esohui huohuijji shajja'ajja neinei majje. Jamajjeya ¡ecuea esohui shajja'ajja neineicue quea ja'a epojji! Jamajjeya miqianaaya quea ja'a nee huohuije pea cuana huasijje.

⁴¹ —¡Jamajjeya ¡jshahuaba bamebamequicue; a'a pea niñebajji! Jamatii miqianajaya epeejji cuana quea mimishi cuajo, niñebaña. ¡A'a jamaya pojji! ¡Miyaya ebionei miquea mimishi cuana pajea'yocue! ¡Majoya miyaya pea cuana mimishi pajea meesahuaya'yocue! ⁴² Oya jayojja yani miquea epeejjija ecojjajo shabo mimishi jayojja. Jamajjeya miya jshahuabaquiani miquea epeejjija ecojjajo nequi shabojo cuaya mee'yo sa aña jama ba'a: “Epeejji, shabo biso neiya mi cojja dobi canaje. Ache ba'ajja; cahuijjia'ajja'yosahua”. ¿A'a acuae jja oe miya jjabacuiani acui cojjajji so'o? ¡Ebionei miquea cojjajo nequi acui huijjia'yo socue! ¡Majoya miquea epeejjija shabo huijjia'yocue! —jamaya Jesús cua.

¡Acui quea bame nee jayojja jama pocue!

(Mateo 7.17-20; 12.34-35)

⁴³ Jesosaa jama aca cua ba'a: —Oe acui quea bame, ojaya ejjajja quea bame pea'ai. Pea acui quea tai, jamajjeya ojaya ejjajja quea tai cuani pea'ai. ⁴⁴ Oe acui ejjajja nei cuani, pea jjaajame pojjeama cuani. ⁴⁵ ¡Miquianaya oe jashahuabaquicue, acui quea bame nee jayojja jama pocue! ¡Quea bame nee jashahuabaquicue Eyacuiñajji! Majoya miquianaya quea bame ba'eje'yo. ¡A' a jashahuaba taiquiji oe acui quea tai jayojja! Miquianaya jashahuaba taiquijajo miquianajaya esohui quea tai cuaje'yo ma acuijajja quea tai jayojjaya. ¡Jamatii jashahuabaquicue Eyacuiñajji, ojaya esohuijo! ¡Quea bame ba'e tiitucue pea dejja cuana nijje! —jamaya Jesosa cua.

Oe dejja jshajja'ajja neinei quia cua pea jshajja'ajjaqui ajja cua
(Mateo 7.24-27)

⁴⁶ Jesosaa pea esohui huohui ca cua jama ba'a: —Miquianaaya eya huohui nishoaña jama ba'a: “Emeshi Mese, eya shajja'ajja sa cuani miquea esohui”. Cho, ecuea esohuijo jshajja'ajjaqui sa po ajja miquianaya —Jesosa cua—. ⁴⁷ Eyaya miquianaya huohuije beca dejjajo jama ba'a: Oe dejjaa equi iya bamebame canaje jayojja jama miquianaya jshajja'ajja neineiquiani ecue esohuijo. Dejjaa equi iya canaje quea bame nee nee. ⁴⁸ Ohuaya tio canaje jjani emaco huasijje. Quea doe nee tio canaje. Majoya quea ca'a nee nee nequinaje equi yamajjana. Jama acanaje ojaya equi. Equi iya majje ena quea quemo cueyanaje, beni quea quemo cueyanaje pea'ai. Cui jayehuequi'yajo jaabichaqui'yo jjima equi cuanaje. Quea ca'a iyame jojoya mi jaabichaqui'yonaje —Jesosa cua—. Jamaya ecuea esohui shajja'ajja majje miquianaya quea ca'a cuaje ma equi jayojjaya.

⁴⁹ —Beca cuana jshajja'ajjaqui ajja ecuea esohuijo jiquio ecua oe dejjaa iya tai canaje ojaya equi. Cui sahuajo ba'e'yonaje. Ohuaya tio canaje jjani sisi; doe'ama. Ena quea quemo cuajo, beni quea quemo cuajo, cui jayehuequi'yajo ojaya equi jaabichaqui'yonaje; ca'a'ama equi cuanaje, de. Jamaya miquianaya ca'a'ama cuaje, ecuea esohuijo jshajja'ajjaqui ajjajo —jamaya Jesosa cua.

7

Jesosaa jjaajaqui mee ca ya'cua esohuinano meseja echacojji
(Mateo 8.5-13)

¹ Jesosa dejja cuana nijje mimijeyo majje poquia cua Capenaoma cuiñajji yasijje. Oe Shomano esohuinano mese jomajo ba'ya cua. ² Ojo chacochoacoani emanojaa cua. Beshahua nei poquijeyoa cua, de. Ma ojo chacochoacoani quea bame chacochoaco ania cua. Jamajjeya esohuinano meseya huaquia mee'yo sa aca cua. ³ Ohuaya shajja'ajja ca cua Jesosa yani, Jesosaa pea cuana jjaajaqui mee ca'yani. Jamajjeya esohuinano mese jama jshahuabaquime cua ba'a: —¿A' a Jesosaa ejo chacochoacoani jjaajaqui mee cajeyo? Caba'ajja.

Jamajjeya ohuaya huoojca ca cua Jodio etii cuana Jesosa huohui'ajjaa. Oya jama cua ba'a: —¡Poquicue; Jesosa huohui'ajjaquicue jiquiacua ecuejji! “¡Jjaajaqui meehua'yocue ejo chacochoacoani!” acue —jamaya cua esohuinano mese.

⁴ Majoya aje Jodio etii cuana poquia cua Jesosa huohui'ajjaa. Huohui'ajja cañaquia cua esohuinano meseja esohui jama ba'a: —Jesosa, esohuinano meseya ecua mi que huoojca canaje, jojo chacochoacoani jjaajaqui meequi'yocue pa! Esohuinano meseya aje oe quea bame nee nee neequi. ⁵ Jodio dejja cuana ohuaya quea bame nee ba'e meesahua cani. Ojaya ecuanaya quea boti nee nee, de. Ohuaya iya mee canaje equi ejjachichaquiji ecuanaja meshijo, de —jamaya cua Jodio etii cuana.

⁶ Majoya aje Jesosa jama cua ba'a: —E'e, cua'a.

Majoya aje poquia cua esohuinano meseja equi yasijje. Equi chipi nei cuajo esohuinano meseya huoojca ca cua ojaya epeejji cuana Jesosa huohuiya. Jama aca cua ba'a: —Jesosa, ¡a' a miya cuejji! Miquea esohui quea poja nee nee. Jamajjeya jejo chacochoacoani miya miquea esohuijo jjaajaqui mee'yocue! Eya esohuinano mese, jamajjeya miya pojja'a dobiqsi sa po ajja ecuea equi yasijje. Eya jshahuabaquiani miya pojja'a enijje mimi sa po ajja. ⁷ Jamajjeya eyaya ecuea epeejji huoojeanaje minijje mimiya. Jomajo mimicue miquea esohui nei jama ba'a: “¡Ojo chacochoacoani jjaajaqui'yocue!” Majoya jiquiojo ejo chacochoacoani jjaajaquije'yo. ⁸ Jamaya ecuea emeshi meseya huohui cajje eya poquije'yo. Ecuea esohuinano cuana eya huoojeaje poquije. Pea esohuinano eyaya iyaajje cueje. Ecuea echacojji eyaya chaco meeaje chaco cajje, de. Jamaya miya huohui'ajja ecuea echacojji jjaajaquije'yo —jamaya esohuinano mese huoojeameya aca cua Jesosa que.

Jamajjeya ma ohua huoojca ca cua poquia cua, huohui cañaquia cua Jesosa esohuinano meseja esohuijo.

⁹ Jesosaa shajja'ajja ca cua. Quea bihui cua esohuinano meseja esohuijo. Jesosaa huohui ca cua pea cuana onijje nequi, jama ba'a: —De, ma esohuinano meseja eba eyaya

jiquiojo tii ojo chacochacoani jjaajaqui meee'yo ecuea esohuijo tiiya. Jodio dejja cuana jashahuabaqui neinei jjiima oya jayoja. Oya ca ca oe jjapee neineiquinaje Eyacuiñajji nijje —jamaya Jesosa cua.

¹⁰ Majoya esohuinano meseja epeeji cuana poquia cua oja equi yasijje. Majoya aje dobiqqui majje ejaajaqui'yo ani ba cañaqui'ya cua, Jesosaja esohuijo jjaajaqui'yo ani: —¡E'e de, e'e jojo nei ojaya esohui quea poja nee nee, de! —jamaya cuana cua.

Jesosaa shequi mee ca'ya cua e'ahuemano'yoja ebacua ejja emano'yojaa

¹¹ Quijje pishana Jesosa poquia cua Naini yasijje. O shajja'ajjajji cuana, pea cuana pea'ai poquia cua onijje. Quea huiso poquia cua, de. ¹² Jesosaa Naini yasijje poquijeya ba ca cua pea dejja cuaa ebacua ejja emano'yojo caje ohuajaea. Enaese pa neinei poquia cua. Oya quea yeno nee nee cua oe nei nei oja bacuajajo, e'ahuemano'yo jjejojaya. Quea dejja huiso nee onijje cueya cua ebacua ohuajaea sahuua. ¹³ E'ahuemano'yohua Jesosa quea yeno po mee ca cua, de.

Jesosaa majoya oya jama aca cua ba'a: —¡A'a pajji!

Ohuaya shequi mee'yo sa aca cua oja bacua ejja. ¹⁴ Majoya aje Jesosa poquia cua ebacua ejja emano'yojaa huasijje. Majoya aje ma dejja cuana nequiñaquia cua Jesosa cueje ba majje. Jesosaa emano dojaji napa ca cua. Majoya Jesosaa emano'yojaa jama mimiam e aca cua ba'a: —Esho'i, ¡shequi'yocue jjeyahua nei!

¹⁵ Majoya aje ma emano'yojaa anisohua'ya cua. Mimi'ya cua, de. Jesosaa oya jama huohuime aca cua ba'a: —¡Poqui'yocue mique nae nijje!

¹⁶ Ojjaña aje majoya jama cua ba'a: —¡De, esho'i emano neinei'yojaa shequi'yonaje yaña, de! Eyacuiñajjiya oya shequi mee ca'yonaje, de. Ohuaya Jesosa huoojea canaje ecuana huasijje. E'e, oya quea sohui poja nee nee, quea bihui nee nee po mee ca'yonaje ecuanaya. E'e de, e'e jojo nei Jesosa, oya cue'yonaje ecuana ba'e meesahuua —jamaya ojjaña cuana cua.

¹⁷ Jodea meshijo ba'e cuana, quea huesha ba'e cuana, pea meshijo ba'e cuana pea'ai Jesosajo huohui cañaquia cuaa cua.

Huaniya o shajja'ajjajji cuana Jesosa que huoojea ca cua
(Mateo 11.2-19)

¹⁸ Huani Eyacuiñajjiya esohui huohuijjiyoje ejeanobiajaa cua. Jamatii Huani ejeanobiajaa o shajja'ajjajji cuaa Jesosaja esohui huohuiqui ca cua Huani que. ¹⁹ Huaniya ma esohui shajja'ajja majje beca o shajja'ajjajji cuana huoojea ca cua Jesosa huohui'ajjaa. Jama huohuime aca cua ba'a: —Huohui'ajjacue Jesosa jama ba'a: “Jesosaa, Eyacuiñajjiya ojjaña jaahuanajji huoojea caje'yo ecuana huasijje. ¿A'a miya ma ecuana jaahuanajji cuaniya? E'e poja'a, pea poja'a ecuaaya ishoa'ajjaje” jamaya acue —Huaniya aca cua.

²⁰⁻²¹ Jamajjeya Huani shajja'ajjajji cuana poquia cua Jesosa huohui'ajjaa. Jesosa ba cañaquia cua emanojaa cuana jjaajaqui mee'yo cuequi. Eshahua cuana cuaya meequi'yo cuequi. Cojjama' cuana jjacojjaja'aqui mee'yo cuequi. Majoya oya cuaa huohui'ajja ca cua Huaniji esohuijo.

²² Jesosaa jama saja'a ca cua ba'a: —E'e, ¡Huani oe huohuiquicue joya miquiaaya shajja'ajjanaje, joya miquiaaya banaje pea'ai! E'e, cojjama' cuana jjacojjaja'aqui mee'yonaje; jio'ajja cuana jeo mee'yonaje; dejja batata epo'yo cuana jjaajaqui mee'yonaje; shajjaqueba jashajja'aqui mee'yonaje; emano'yo cuana shequi mee'yonaje. Esohui quea bame nee huohuinaje ojjaña dejja quea yeno huasijje Eyacuiñajjiya epeeji epo'yojji. ²³ Jamajjeya ¡huohuiquicue Huani que! Jama huohuime acue ba'a: ¡jjaapee tiitiquicue Eyacuiñajji nijje, enijje pea'ai; quea ja'a nee ba'ecue! Jama miya ajje quea bihui po tiitiije'yo —jamaya Jesosa cua.

²⁴ Majoya aje Huani shajja'ajjajji cuana poqui o'oyanaje Huani que. Majoya o poqui'yajo, Jesosa pea cuana nijje Huanijo mimia cua: —E'e de, yahuaajo Huani quimajo aninaje. Miquianaya aje majoya o que poquinaje. ¿A'ya acuae jomajo banaje? ¿A'ya acuae miquianaya jashahuabaquinaje Huanijo? ¿A'a jashahuabaquinaje Huani esohui huohuiji quea ja'a pojjeama? Chojja. ²⁵ Miquianaaya ¿ae banaje Huani que poqui majje? ¿A'a dejjaja daqui quea nahue nee ehuosho ba'e banaje? Chojja, dejjaa daqui quea nahue nee huosho cani equi quea quemajo ba'eya. ²⁶ ¿Achajja acuae Huani ba'enaje? ¿A'a miya jashahuabaquinaje Huani Eyacuiñajjiya esohui huohuiji nei nei? E'e, de. Jamatii Eyacuiñajjiya pea esohui huohuijiya quea ja'a pishana huohui ca cua. Huaniya ca ca quea ja'a nee nee huohui canaje. ²⁷ Yahuaajo nei Eyacuiñajjiya esohui etehue'yo Huanijo jama cua ba'a:

“Jiquio dejja ecuea esohui huohuiji nei cuani. Jamaya eya sa cuani. Eyaya oya huoojeaje ebionei mi hui dojaji. Ohuaya dejja cuana huasijje huohui caje miquea ecuejjiyo”.

Jamaya yahuajo nei nei Eyacuiñajjiya ojjaña ba mee canaje Huaniya e cue jjimahuajo, ejo jjabahuejjaqui mee ca'yonaje cuana. ²⁸ Ecuea pea ehuhui a'a pajea'yoyji jama ba'a: Huani ma ona besameeji cua oe dejjaya quea bame nee nee pea cuana jayojja jama pojjeama. Jamatii quijje eya Emeshi Mese nei cuaje, ojjaña ecuea epeeji Huani jayojja jama cuaje'yo quea bame nee nee —jamaya Jesosa cua.

²⁹ Ojjaña deja Huasaja besamee Jesosaja esohui shajja'ajja majje quea bihui nee nee cua Eyacuiñajji niije. Ojjaña deja quea mimishi nee nee cuani cuaaya Eyacuiñajjiya esohui shajja'ajja majje mimishi pajea ca'ya cua. Jamajjeya oya cuana Huanija ebesamee cua. ³⁰ Paniseo deja cuaa Moisesija etehue'yo huohuijji cuaa pea'ai ca ca Huanija esohui shajja'ajja jjima aca cua. Eyacuiñajjiyo quea bihui pojjeama cua, Eyacuiñajjiya epeeji nei po sa po ajja jjejojo. Jamajjeya Huani que enaje pohua poqui jjima cua, mimishi pajea'yo sa po ajja jjejojo.

³¹ Majoya aje Jesosa jama cua ba'a: —Dejja cuana mimishi pajea'yo sa po ajja ça'ya jayojja cuani? ³² Joya ecua esho'iquiana quebanei jayojja jama cuani. Esho'i cuana quebanei po majje joya pea que taani jama cuaje pea niije jjapeequi sa po ajja jjejojo. Jama jjamimihue'equime cuani ba'a: “Eyaya dehue miaña mi quea bihui epojji nisho. Jamatii miya quea bihui po sa po ajja. Majoya eya pa nishoani, emano'yojo pa ani jayojjaya mi quea bihui epojji nisho. Jamatii miya pa nisho ajja. Jamajjeya ecuea ba jjima eyaya miya achajja quea bihui po meeme aje. Miya niñepoqui jayojja cuani, jamajjeya quebanei po ajja” jamaya esho'iquiana quebanei cuani —Jesosa cua—. E'e de, jamaya deja mimishi cuana jjeya cuani ma esho'iquiana jayojjaya. ³³ Yahuajo pishana Huani cue'yonaje. Eyacuiñajji niije mimi tiitianijo bobi ijia ajja cuanaje. Acuijajja na sese ishi jjima aca cua. Ojjaña cuaa ca ca huohui canaje Huanijo jama ba'a: “Huani ca jja ca niñepoqui nei”. ³⁴ Eya ca jja ca ijia'ijjiani deja mimishi cuana niije. Oya cuana niije mimimimiani. Jamatii beca cuana ejo stajje cuani jama ba'a: “¡Bacue jiquio deja Jesosa! Dejja mimishi cuana niije jjapeequi; bejjo chichajji cuana niije pea'ai jjapeequi, de”. Jamajjeya beca cuana ca ca jjapeequi sa po ajja enije, Huani niije pea'ai. Ecuea ba jjima achajja oya cuana eyaya quea bihui po meeme aje. Oya cuana esho'iquiana quebanei po ani jayojja cuani, de. Niñepoqui jayojja cuani. Oya cuana mimijajiani Huani niije, enije pea'ai. ³⁵ Eyacuiñajjiya esohui e'e jojo nei. Jamaya ojjaña cuana oja esohuiyo jjashajja'ajjaqui majje quea ja'a po mee caje —jamaya Jesosa cua.

Oe Paniseo dejjaja equi yasijje Jesosa anicuaa poquia cua

³⁶ Oe Paniseo deja yohua bajjani cua ba'a: Simoni. Ohuaya Jesosa e'ijjia'ijjiaji iyaa ca cua. Jamajjeya oja equi yasijje poquia cua ijia'ijjiaa. ³⁷ Jesosa ijia'ijjia anijo oe epona dobiquia cua equi yasijjeya Jesosa baa. Ma epona quea mimishi ba'ya cua. Tahuoojo shiyeshiye ye ca cua, Jesosa ba majje. ³⁸ Ojaya mimishijo quea yeno nee nee cua. Pa neinei ania cua. Ecojja naa shacua ca aña cua Jesosaja ejiojji. Ojaya esao ao'aohua cui ca aña cua. Jesosa quea jeajojo jiojji tojjo ca cua. Jesosaja ejiojji tojjo majje shiyeshiyeya jiojji sha ca cua.

³⁹ Ma Simoniya epona ba ca cua; jjashahuaba taiquia cua jama ba'a: —Jesosa Eyacuiñajjiya esohui huohuijji nei pojjeama pojja'a. Jamajjeya jiquio epona quea mimishi nee nee ohuaya mi huoojja cani. Eyacuiñajjiya esohui huohuijji nei niije mimishi cuana jjaneguichipijio ajja —jamaya e'acaje'yo poso Simoniya aca cua.

⁴⁰ Jesosaja eba Simoniya ejashahuaba taiquijji. Majoya jama huohuime Jesosaa aca cua ba'a: —Simoni, ecuea esohui mi que ehuhuijji yani.

—¡Ocue mo huohui'ajja socue! —Simoni cua.

⁴¹ Jamajjeya Jesosaa jama huohuime aca cua ba'a: —Oe deja quea bejjo huiso nee ba'enaje. Majoya aje becanejijji pea'ai deja poquinae o que bejjo sosema' jjesheya, quijje esosequia'yoyji nisho. Oe dejjaa iye huiso jjeshe canaje 500. Pea dejjaa ca jjeshe canaje ba'a oe pojji nei 50. ⁴² Ma deja cuanaja oya sosequia'yo jjima tii cuanaje. Jamajjeya ma deja quea bejjo huiso jjapeequi sa cuanaje bejjo jjesheji cuanaje cuana niije. Jamajjeya ejjesheji epo cuanaja ebajjani cuijea ca'yonaje jamatii bejjo sosequia'yo jjimajo tiiya. Majoya oya cuana quea bihui po'yonaje bajjani cuijea ca'yajje. E'e, çache deja quea bihui nee nee cuanaje oja bejjo sosema'yo tiijjojo? Ma deja quea huiso, 500 sosequia jjima pojja'a. Pea deja iye huiso, 50 sosequia jjima pojja'a —jamaya huohui'ajja ca cua Jesosaa.

⁴³ Simoni jama cua ba'a: —Ma deja quea huiso bejjo quia canaje, 500.

Jesosaa jama aca cua ba'a: —E'e de, e'e jojo nei. ⁴⁴ Jamaya jiquio epona eya mimishi cuijea'yajje quea bihui nee cuani. Eya dobiquinaje miqnea equi yasijje. Miya ca mi ca oe ecuea epeeji pojjeama cuanaje, Simoni. Jamatii beca cuana cueanijo equi meseya ojaya epeeji cuana jiojji topo cani. Jamaya miqnea ajjima. Ma eponaa ca ca ecuea ejiojji topo canaje oja ecojja naa. Oja sao ao'aohua cui ca'yonaje. ⁴⁵ E'e, miyaya ecuea epeeji pojjeama

jjejojo mi shemo tojjonaje. Jiquio eponaa ca mo ca ejiojji tojjo tiitii canaje ojaya quea jea nee neejojjo. ⁴⁶ Miyaya eya sha jjiima anaje shiyeshiyejo ejjapeequijji. Jiquio eponaa ca ca ecue ejiojji sha canaje shiyeshiyeaya ecuea epeeji nei sa cuaniya jjejojo. ⁴⁷ E'e, jamajjeya eyaya miya huohuiaña jama ba'a: Ma epona jjapeequi sa cuanaje Eyacuiñajji nijje. Jamajjeya aje oe ohuaya ecuea ejiojji topo canaje, quea shiye po mee canaje pea'ai. Ma epona quea mimishi nee nee cuanaje. Jamajjeya eyaya, Eyacuiñajjiya pea'ai oya mimishi cuijea'yonaje quea jea nee neejojjo —jamaya Jesosa cua.

⁴⁸ Majoya Jesosaa epona jama huohuime aca cua ba'a: —Miquea mimishi cuana eyaya cuijea'yonaje jjeya nei.

⁴⁹ Pea dejja cuaa equijo ijijia'ijjia aniya Jesosajo jama huohuime aca cua ba'a: De, ¿a'ya acuae jja che mimishi cuijea'yojji pome so'o?

⁵⁰ Jesosaja eba cuanaje ma dejja cuana mimi ca'ani. Jamajjeya ohuaya epona huohui ca cua jama ba'a: —Miquea mimishi cuijea'yonaje, jamajjeya quea bame ba'e'yocue mimishi'ama! —jamaya Jesosa cua.

8

Epona cuaa Jesosa yohua sahua ca cua

¹ Majoya aje Jesosa pea cuiñajji yasijje poquia cua Eyacuiñajjiya esohui huohuiya. O shajja'ajjajji nei cuana, 12 poquia cua onijje. ²⁻³ Quea huiso epona cuana poquia cua Jesosa nijje, ma ohuaya yahuajo jjaajaqui mee ca'yonaje, edosiquiana cuaya meequi ca'yonaje pea'ai. Oe epona Sosana bajjani; pea epona Mania Madanena bajjani cua. Maniaja 7 edosiquiana cuana Jesosaa cuaya meequi ca'ya cua. Pea epona Huana bajjani cua. Oya Cosaja ehuanae cua. Cosa emeshi meseja, Enode Antipaja echacoji cuana jaahuanajji cua. Quea huiso epona cuaa bobi jjeshe ca cua oja bejjojo Jesosa bobiajji, o shajja'ajjajji cuani cuana bobiajji pea'ai.

Eso' jeaajaji

(Mateo 13.1-23; Macoso 4.1-20)

⁴ Quea dejja huiso nee nee poquia cua Jesosa shajja'ajjaa. Jjachichaquia cua Jesosa pejejo. Jesosaa huohui ca cua jiquio esohui. Jama huohuime aca cua ba'a: ⁵—Oe dejja poquinaje que yasijje eso' jeaajaa. Oe pojji eso' jeaaja canaje ejiojji yasijje. Cuichoiji cuaa ma eso' ijijia ca'yonaje. ⁶ Pea eso' jeaaja canaje meshi mei biajje ani yasijje. Majoya aje jeaaja cajje pohua'ajja'yonaje. Majoya aje pohua'ajja'yo majje shocana'yonaje. ⁷ Pea eso jeaaja cajje oquequinaje acuissha yiye yasijje. Majoya aje jeaaja cajje pohua'yonaje. Majoya aje pohua'yo majje acuissha mano mee ca'yonaje. ⁸ Pea eso' ca ca meshi bame bame yasijje jeaaja canaje. Majoya aje jeaaja cajje tii'yonaje. Majoya aje tii'yo majje quea jjajja huiso nee nee cuanaje, de. E'e, mahuiso. ¡Shajja'ajjacue jiquio esohui; a'a shajjama' jayojja pojji! —jamaya Jesosa cua.

⁹ Quijje o shajja'ajjajji cuana poquia cua Jesosa huohua'ajjaa. Jama huohua'ajjame aca cua ba'a: —¿Yajjajje ma esohui quea quehua cuanaje ecuanaja? —jamaya cua.

¹⁰ Jesosaa jama huohuime aca cua ba'a: —Miquianaya Eyacuiñajjiya ba meesahua cajje ojaya esohui eyacua. Beca cuana shajjama' cuani ca ca ohuaya eba meesahuajji pojjeama. Esohui eba meesahuajji huohuiaña beca cuana shajjama' cuanijjo. ¹¹ Jamajjeya eyaya miquianaya huohuije quea ja'a epojji. Ma eso' Eyacuiñajjiya esohui jama cuani; meshi dejja jayojja cuani. ¹² Meshi ejiojji quea ca'a huasijje eso' oquequinaje, dejja shajjama' Eyacuiñajjiya esohui shajja'ajja sa po ajja jayojja. Eyacuiñajjiya esohui jjaja'aqui ajja quea sapa ca'a jjejojo. Cuichojiya eso' ijijia cani jayojja jama Edosiquiana etiya Eyacuiñajjiya esohui pajea mee ca'yani, jjaja'aqui mee jjima acani. Jamajjeya ohuaya dejja jjapeequi mee jjima acani Eyacuiñajji nijje. ¹³ Meshi mei biajje anijo eso' pohua'ajja'yani jama jayojjaya dejja cuaa Eyacuiñajjiya esohui shajja'ajja cani. Ebioneiya aje ca Eyacuiñajji nijje jjapee nishoquianiya. Majoya aje pea cuana onijje mimijajajo Eyacuiñajjiya esohui pajea ca'yani. Jjapeequi pajea'yani Eyacuiñajji nijje. ¹⁴ Pea dejja meshi acuissha yiyeeji jayojja jama. Eyacuiñajjiya esohui shajja'ajja cani. Ebioneiya aje ca oe shajja'ajja caniya Eyacuiñajji nijje jjapee nishoquiani. Majoya aje jjashahuabaqui'yani pea aquianajo quea mimishi epo'yojji. Jama jjashahuabaqui'yomeya cuani Eyacuiñajji epajea'yojji. Eyacuiñajjiya esohui ebajji nisho cuani. Ma eso' acuissha mano mee ca'yani jayojjaya ejjashahuaba taiquijjiya aca'yani Eyacuiñajji nijje epo pajea'yojji. ¹⁵ Pea dejja meshi quea bame nee nee jayojja cuani. Eyacuiñajjiya esohui shajja'ajja neinei cani. Shajja'ajja neinei majje Eyacuiñajjiya epeeji tii tii cuani. Ohuaya ojaya esohui ba neinei cani. Jjashahuaba bamebamequiani. Ma dejja cuana ecuea esohui ba neineiji epojji —jamaya Jesosa cua.

Esohui huohui'yojji cuaquijijjo

(Macoso 4.21-25)

¹⁶ Jesosaa jiquio esohui jama huohuime aca cua ba'a: —¿A'a eseya eseya cuaquijijiya jeaja'a came eshajajo capa nequiya? Chojja. ¿A'a eseya ejaajji quimejije nequiya jeaja'a came? Chojja, de. ¡Eseya quea ja'a po mee sa añajo ca eyajji nequiasohuacue ojjaña quea ja'a epojji! ¹⁷ Jama jayojjaya Eyacuiñajjiya ojjaña ecuea esohui onaaya ba mee caje'yo quijje. Quea ja'a nee cuaje'yo. ¹⁸ Miya ecuea esohui shajja'ajja sa cuanijo Eyacuiñajjiya miya quea ja'a nee nee po mee caje. Beca cuana ecuea esohui shajja'ajja sa po ajjajo ohuaya quea ja'a po mee jjima acaje —jamaya Jesosa cua.

Jesosaja nae, oja chahua pea'ai
(Mateo 12.46-50; Macoso 3.31-35)

¹⁹ Majoya Jesosaja enaese cue'ya cua equi yasijje Jesosa ba'yohua. Ba'yo jjima cua ojaya, quea deja huisojojo. ²⁰ Oe dejjaa majoya Jesosa jama huohuime aca cua ba'a: —Mique naeya mi sa'ajja ca'yoqui mique chahuaa pea'ai.

²¹ Jamaya Jesosa cua ba'a: —E'e de, ojjaña nei neiya Eyacuiñajjiya esohui shajja'ajja neineijji cuani ecue nae nei nei cuani, ecue chahua nei nei cuani, Eyacuiñajjiya epeeji nei nei cuanijojo —jamaya Jesosa cua.

Jesosaa beni nequioque meequi ca cua
(Mateo 8.23-27; Macoso 4.35-41)

²² Oe pojajajo Jesosaa o shajja'ajjajji cuana jama aca cua ba'a: —¡Cua'a; bae ojje miji yasijje besa poquicue!

²³ Jamajjeya bishe ai yasijje ojjaña ania cua. Jesosa onaa dojobesa cajje cahua cua. Majoya aje quea ichi po majje beni quea quemo nee nee cueya cua. Enashajohua bishe nanejea ca cua. ²⁴ Oe dejjaa majoya Jesosa jama ishe'ame aca cua ba'a: —Esohui huohuijji, ¡shequicue oe! Coya aje se hui'i'ya.

Majoya aje Jesosa shequijeanaa cua onaa ishe'a cajje. Majoya aje shequi majje mimia cua beni nijje, ena nijje pea'ai. Majoya aje o mimiajo beni nequioquequia cua enashajo pea'ai. Majoya aje enashajo po jjima jayojja po'ya cua. ²⁵ O shajja'ajjajji jama mimimeya cua ba'a: —De, Jesosa quea sohui poja nee nee, de. Miminaje beni nijje; beni po jjima yajojja po mee ca'yonaje, de.

Majoya aje Jesosaa jama aca cua ba'a: —¿Yajjajje acuae jja nequiana metenaje so'o, de? Jjashahuabaqui jjima pojja'a jja nequiana Eyacuiñajjiyo, de —Jesosaa cua.

Dejjaja eyamijo nequi eshahua cuana Jesosaa cuaya meequi ca'ya cua
(Mateo 8.28-34; Macoso 5.1-20)

²⁶ Majoya oya cuana ba'eñaquia cua Jjanana meshi yasijje. Ba'eñaquia cua pea ojje miji yasijje, Janinea ba'e cojja nei besa poquia cua. ²⁷ Jesosa bishejo ani etaja huasijje nequisohuajjajo, oe dejja cueya cua. Ma dejja quea shahua huiso jjejojo niñepoqui cua. Daquima' nei nei cua; quima' pea'ai. Oya emojajajaca huasijje ba'ya cua. ²⁸⁻²⁹ Jamatii oya quea tai po mee canaje eshahuaa. Jamajjeya oya dejja cuaa jeyo ca cua cadenaaa, poqui ajja epojji. Jamatii ca ca cadena jjasejajajajajeequi mee ca cua eshahuaa. Poqui mee ca'ya cua ma quima huasijje, de. Ma dejjaa Jesosa ba neinei ca cua. Majoya aje Jesosa nequi cojja nei ecui'oshajjajo nequioqueña cua. Majoya aje Jesosaa jama aca cua ba'a: —¡Eshahua cuana, cuayaqui'yocue!

Majoya ma dejja jama cua ba'a: —De, miya Jesosa, Eyacuiñajjiya Bacua Ejja e'e jojo nei. ¡A'a mo miyaya jinapajji so'o! —jamaya cua.

³⁰ Majoya Jesosa jama cua ba'a: —¿Ae bajjani acuae miya?

—Eya Quea Shahua Huiso bajjani —jamaya cua ma dejja quea shahua huiso jjejojo.

³¹ Eshahua cuaa Jesosa jama huohuime aca cua ba'a: —¡A'a ecuana huoojajji cuaqui yasijje! ³² ¡Ecuana oe cuichi cuanaja yami yasijje dobiqumee'yocue!

—¡E'e ocuae dobi'ajjaqui socue! —jamaya aca cua Jesosaa.

³³ Majoya aje cuayaqui'ya cua dejjaja eshahua cuana, dobiqumee'ya cua cuichi cuana huasijje. Majoya aje cuichi cuana emacojo nequi cuajicuaji jaaoquequinana cua bae yasijje; hui'i'ya cua ojjaña. ³⁴ Cuichi hui'i'je'yo ba majje cuichi jaahuanajji cuana poquia cua cuiñajji yasijje ojjaña huohuiya. Jama aca cua ba'a: —De, Jesosaa eshahua cuana cuaya mee canaje dejja niñepoqui meeji po nequinaje. Dobiqumee canaje ecuanaja cuichi yasijje, hui'i'yonaje ojjaña cuichi, de. Cuajicujinanana bae yasijje, hui'i'yonaje. ¡chama'yo ti, de!

³⁵ Majoya ojjaña dejja cueya cua ae Jesosa po ani baa. Onaaya cue majje ba ca cua ma dejja niñepoqui cuanaje Jesosa pejejo ani. Ma daquima' cuanaje daquijji ani'yo ba ca'ya cua dejja cuaa; quea bei ani'yo ba ca'ya cua. Jesosa quea sohui poja nee neejo ojjaña quea mete po'ya cua. ³⁶ Ma niñepoqui bajji cuanajeya Jesosajo huohui ca nequi'ya cua pea meshijo ba'e yasijje jama ba'a: —Jesosaa eshahua cuana cuaya meequi ca'yonaje.

³⁷⁻³⁹ Ojjaña cuana ma meshijo ba'e quea mete nee nee cua. Quea meteya jjejojo Jesosa huoojeaje ca'ya cua. Ma niñepoqui cuanajeya ca ca Jesosa jama huohua'ajjame aca cua ba'a: —Jesosa, eya minijje poqui sa cuani.

Jesosa jama cua ba'a: —Chojja, ¡miya poquicue miquea huapa pojjeama cuana huasijje! ¡Huohuicue ojjaña ma mi Eyacuiñajjiya jama acanaje! —jamaya Jesosa cua.

Majoya aje ma deija poquia cua o ba'e yasijje huohuiya. Huohui ca'ya cua Jesosaa eshahua cuayaqui mee ca'ya cua.

Jainoja bacua piona emano'yojaa pea epona najji poani tii tii

(Mateo 9.18-26; Macoso 5.21-43)

⁴⁰ Majoya aje Jesosa besajebe'ya cua. Ba'eña'ya cua ojaya meshi yasijje. Ojjaña cuanaja Jesosa quea boti nee cua. Ishoa'ajja ca nequia cuaa cua. ⁴¹ Oe deija Jaino bajjani Jodioja ejjachichaquijji equi jaahuanajji cua Cesanenajo. Oya cueya cua Jesosa que. O cojja nei ecui'oshajjajo nequiqueña cua. Ohuaya Jesosa huohua'ajja ca cua ojaya equi yasijje epoquijji oja bacua piona jjaajaqui mee'yojji. Ojaya ebacua piona ahuema'ani quea mano nee nee cua. ⁴² Oja bacua piona oe nei cua, de. Majoya aje Jesosa onijje poquia cua. Beshahua nei poqui jjima cua quea deija huisojojo. ⁴³ Oe pea epona quea mano deija quea huiso yiyesamajo nequi. Oya quea mano nee nee, ojaya ena' cuayaqui nequia cua 12 shequajame, de. Oya eshicuijji jjeshejji jjejojo bejjoma'yo cua. Eshicuijji quiajjija epona na' cuaya pajea meequi'yo jjima cua. ⁴⁴ Jesosa poquianijo ohuaya Jesosaja daqui cuesha iña ca cua. Ma daqui cuesha iña cajje aje najji popajea mee ca'ya cua. ⁴⁵ Majoya aje Jesosaa jama aca cua ba'a: —¿Aya acuae mo iña canaje so'o?

O shajja'ajjajjiya, Penohua jama aca cua ba'a: —Cua'a, de. Quea deija huisohua jjejojo mi, ¿aya shai mi iña canaje Jesosa? Napa jjima ca mi ca ecuanaja —jamaya Jesosa aca cua Penohua.

⁴⁶ Jesosa jama cua ba'a: —Cho, ecuea eba Eyacuiñajjiya a'ya shai huaquia mee ca'yonaje e daqui iña cajo.

⁴⁷ Ma epona Jesosaja esohui shajja'ajja majje piopio cua. Ojjaña nequijo piopiojea cua. Ecui'oshajjajo nequiqueña cua Jesosa nequi yasijje. Ohuaya Jesosa jama huohuime aca cua ba'a: —E'e ee, Jesosa, eyaya nei miquea daqui cuesha iñanaje. Jjashahuabaqui majje che mi daqui iña majje ena' huosa mee'yojji. Jamajjeya che eyaya jamaya miya anaje —jamaya ma epona cua.

⁴⁸ Majoya Jesosa jama cua ba'a: —¡A'a quea mete pojji, she! Eyaya miya na' huosa mee'yonaje, miya jjashahuaba neineiquinajejojo. ¡Poquicue, quea bihui po'yocue!

⁴⁹ Jesosa epona nijje mimianijo tii Jainoja epeeji cueya cua Jaino que. Jama cua ba'a: —Jaino, miquea ebacua piona mano'yonaje. Chama'yo tii, de. ¡A'a poqui meejji ma esohui huohuijji nei!

⁵⁰ Jesosaa ma esohui shajja'ajja majje jama huohuime aca cua ba'a: —¡A'a miya quea mete pojji! ¡Jjashahuaba neineiquicue oe Eyacuiñajji! Miquea bacua jjeya shequije'yo.

⁵¹ Majoya Jainoja equi yasijje poquiña cua. Jesosaa beca cuana dobiqúi mee jjima aca cua equi yasijje. Peno, Satiaco, Huani ca ca oe dobiqúi mee ca cua. Ma ebacuaa chii enaese pea'ai dobiqúi mee ca cua. Mahuiso dobiqúia cua emano'yojaa baa.

⁵² Dobiqúi majje oya cuaa ba ca cua ojjaña pa'ani quea yeno nee nee jjejojo, ebacua emano'yojaa. Jesosaa jama huohuime aca cua ba'a: —¡A'a pajji! Ma epona sho'i mano'yo jjima, ecahuijjaa.

⁵³ Majoya ojjaña soa'ya cua. Ojjañaa jama aca cua ba'a: —Chojja, mano neinei'yonaje jja coma, de —cuana cua.

⁵⁴ Majoya aje Jesosaa epona sho'ija eme iña majje janobajjima nei mimia cua jama ba'a: —¡Esho'i, nequisohuacue!

⁵⁵ Majoya aje shequi'ya cua, nequisohua'ya cua: —¡Quiacue oya bobi! —Jesosa cua.

⁵⁶ Ma esho'ija chii quea bihui po'ya cua oja nae pea'ai. Jesosa jama cua ba'a: —¡A'a huohuijji cuana jiquio eya mique bacua shequi mee'yonajejo! —jamaya Jesosaa aca cua.

9

Jesosaa o shajja'ajjajji cuana 12 huoojea ca cua esohui huohuiya

(Mateo 10.5-15; Macoso 6.7-13)

¹⁻² Jesosa jjachichaquia cua o shajja'ajjajji cuana nijje, 12 huisome nijje. Ohuaya jama huohuime aca cua ba'a: —Eyaya miquianaya huoojeaña pea cuana huasijje esohui huohuiya, pea cuana jjaajaqui mee'yohua, eshahua cuayaqui mee'yohua pea'ai. ¡Huohuicue jama pea cuana huasijje ba'a: “Eyacuiñajji ojjaña huoojeajji cuaje'yo” acue! ³ ¡Aema' oe poquicue! ¡A'a acui ejaquecuaca'aquijji dojojji; bashosoco pea'ai a'a dojojji! ¡A'a bobi, bejjo pea'ai dojojji! ¡Ma miquea eyamijo ba'e nei oe dojocue! ⁴ ¡Po'ayequi nequicue oe

pea cuiñajji yasiije! ¡Miquianaya oe pea cuiñajji yasiije poqui majje miquianajaya epeeji epojji sa'ajjacue; ojaya equijo anicue! ⁵ Dejjja cuaa pea cuiñajjijo ba'eya miquianajaya esohui cajaa acaje'yo pojjja'a. ¡Huohuicue jja oe ma dejjja cuana jama ba'a: "Quea mimishi mi coma" acue! "Eyacuiñajjiya jja miya ba cani. Ohuaya jja miya quea nee nee po mee caje'yo" acue. ¡Ma esohui jama huohui majjeya oe cuayaqu'i'yocue cuiñajjijo ani! ¡Majoya cuayaqu'i'yo majje miquianajaya ejiojjjijo ani meshi pohui cuiayajajean'a'yocue oya cuana jshajjja'ajjaqu'i ajja cuanajejo! ¡Jamajjeya oe pea cuiñajji yasiije poquicue! —jamaya Jesosaa aca cua.

⁶ Jamajje o shajja'ajjajji cuana po'ayequi nequia cua Jesosaja esohui huohuiya. Onaaya huohui ca cua Eyacuiñajjija esohui; jjaajaqu'i mee ca'ya cua emanojaa cuana.

Jesosa emeshi meseya Enode Antipaa Huani poso aca cua
(Mateo 14.1-12; Macoso 6.14-29)

⁷ Emeshi meseya Enode Antipaa shajja'ajja ca cua peaja esohui Jesosajo. Pea cuaa Enode siajje aca cua jama ba'a: —Huani ca jja ca Jesosaya cuanaje. Huani ca jja ca shequi'yonaje —pea cuana cua. Enode quea ajajja nee nee cua Jesosa Huani poso jojoya. ⁸ Pea cuaa Enode siajje aca cua jama ba'a: —Chojja, Jesosa ca jja ca Eniaya, ma etiiquiana shequi o'oyanajeya —posoya aca cua.

Pea cuana jama siajje pomeya cua: —Jesosa pojjja'a pea etiiquiana shequi o'oyanaje.

⁹ Enode majoya jama cua ba'a: —Eyaya nei ca jjaja ca Huani sapasejjajea meenaje, Huani mano neinei'yonaje, ecuea jjaja eba, de. ¿Ajeo shai jjaja ojjaña mimiani? Ache jja eyaya caba'ajja sahua Jesosa —jamaya Enode cua.

Jesosaa 5.000 dejjja cuana bobia ca cua

(Mateo 14.13-21; Macoso 6.30-44; Huani 6.1-14)

¹⁰ Quijje o shajja'ajjajji cuana esohui huohuiya poqui cue o'oya cua; Jesosa que huohui poña'ya cua. Majoya Jesosa shajja'ajja majje oya cuana pojjja'ua cua Betesaina huasijje. ¹¹ Jomajo o ba majje ojjaña jjachichaquia cua Jesosa que. Ojjaña quea bihui cua Jesosaa Eyacuiñajjija esohui huohui caquijo. Jesosaa jama aca cua ba'a: "Ojjaña joya mimishi pajea'yojji cuani, onijje e'e nei jjapeequiani Eyacuiñajjiya jaahuana caje'yo". Ohuaya emanojaa cuana jjaajaqu'i mee ca'ya cua pea'ai. ¹² Jjasinecuajjaajo ojjaña quea shoe nee cua; ye jjima ojaya bobi cua. O shajja'ajjajji cuaa Jesosa jama huohuime aca cua ba'a: —¡Huoojeacue ojjaña, bobi sa'ajjaa, ecahuijji sa'ajjaa pea'ai! Beshahua nei esejaya bobi jjuojojo chama' ba'a, de.

¹³ Jesosa jamaya cua: —Chojja, ¡miquianaaya oe bobi quiacue e'ijjiajji!

Jamaya oya cuana cua: —De, oe pojji bobi yani. Beca nahuoo sisi yani, me oejje pahui yani. ¿A'a ecuanaya capoquiahua cuiñajji yasiije bobi jjequiya pojjja'a, ojjaña dejjaja bobi jjequiya; quea bobi huiso epojji? ¹⁴ Yani quea dejjja huiso nee nee, 5.000 yani, de.

Jesosaa jamaya aca cua ba'a: —Chojja, ¡a'a poquijji, ojjaña cuana anioque meecue, jjanichichaqui meecue pea jjocho, 50 anioque meecue!

¹⁵ Majoya aje o shajja'ajjajji cuaa dejjja cuana jama aca cua ba'a: —¡Anioquecue oe nequiana!

¹⁶ Majoya acua po majje Jesosaa ma pahui nahuoo pea'ai jjeshe ca cua oja emeya. Jjeshe majje eyahuasijje jjabajeasohuaquia cua Eyacuiñajji nijje emimijji. Ohuaya Eyacuiñajji bihuia ca cua bobi e'ijjiajji. Majoya Jesosaa miji sisisisi ca cua pahui, nahuoo pea'ai. Majoya ohuaya bobi quia ca cua o shajja'ajjajji cuana huasijje. Pea cuana huasijje quia ca cua o shajja'ajjajjiya. ¹⁷ Ijja'ijjia majje ojjaña dejjja cuana quea jeje cua, de. Ojjaña dejjja cuana jejeajo iya ca'ya cua pea eshajajo tiia iya ca poqui'ya cua; ¹² shajame bobi e'ijjiasejjaja ecuatajaja cua.

Penohua Jesosa shahuaba ca'ya cua oya Quito

(Mateo 16.13-28; Macoso 8.27-9.1)

¹⁸ Oe pojjajo Jesosa oe nei mimia cua Eyacuiñajji nijje. O shajja'ajjajji cuana onijje nequia cua quea huesha pishana. Jesosaa oya cuana huohui'ajja ca cua: —¿Yajja mimime dejjja cuana ejo cuani?

¹⁹ Jamajjeya o shajja'ajjajji cuana jama cua ba'a: —De, pea cuana ca jja ca mijo jama mimime cuani ba'a: Miya ca pajja mi ca pea dejjja cuaa Huani poso acani. Pea dejjja ca pajja mi ca Enia poso acani, ma etiiquiana, de. Pea dejjja ca pajja mi ca pea etiiquiana shequi o'oyanaje poso acani, de.

²⁰ —De, ¿miquianaya yajja cuani so'o? —cua Jesosa.

Peno ca ca jama cua ba'a: —Miya ca ca Eyacuiñajjija Bacua Eja oe nei, oja huoojea'yo ojjaña jaahuanajji epojji. Ecuea Emeshi Mese nei nei, de. Miya Quito bajjani ecuea Emeshi Mese nei nei jjejojo.

²¹ Majoya Jesosaa Peno jama huohuime aca cua ba'a: —E'e de, e'e jojo nei. ¡A'a huohuijji pea cuana, ecuea bajjani Quito, miqnea Emeshi Mese nei! ²² Eya Eyacuiñajji hoojea'yo. Eya quea nee nee acaje'yo cuaa. Beca cuaa eya cajaa acaje'yo, Jodio etii cuaa, Eyacuiñajji nijje mimiani etii cuaa, Moisesija etehue'yo huohuijjiya pea'ai. Mano mee caje'yo eya, de. Eya mano'yo majje pea beca peejjima cahuime po majje shequije o'oya —jamaya Jesosa cua.

²³ Majoya aje o shajja'ajjajji cuana Jesosaa huohui ca cua jama ba'a: —Ojjaña ca jja ca enijje e'e jojo nei jjapeequi'yo sa cuani, oya Eyacuiñajji esohui jayojja caba'yahua. E'e, je jayojjaya pocue; enijje poqui'yocue! Jamatii onaa napa cajje aje jja mi oe quea nee nee cuaje'yo. ²⁴ E'e, ojjaña cuana ecuea esohui shajja'ajja sa po ajjajo ba'e tiiiti ajja enijje eyajo. Joya ecuea esohui shajja'ajjajji cuani ca ca ba'e tiiitiye'yo enijje eyajo. ²⁵ E'e pojja'a dejjaa quea huiso nee nee aquiana ojaya yajji chicha cani. Jamatii oya cuana cuaqui yasijje jea cajo ojjaña ojaya aquiana cuana edojjji pojjeama. ¿A'a ojjaña ojaya aquiana cuana quea bame cuaje oya cuaqui yasijje poqui majje? Chojja, de. ¿A'a aquiana sosejje cuayaqui mee caje'yo cuaqui ani? Chojja, de. ²⁶ Oe dejja pojja'a: “Cajaa” cuani ejo, ecuea esohuijo pea'ai. Jamajjeya eyaya cue o'oya majje oya cajaa aje'yo pea'ai. E'e jojo nei eya ojjañaja Edoe Mese cueje o'oya. Quea jeajahua nee nee, quea ca'a nee nee cueje'yo. Eya esohuidojojji quea huiso nee nijje cueje o'oya, de. ²⁷ E'e jojo nei miqianaaya jiquiojo nequiya mano'yo jjimahuaa Eyacuiñajji epejji nei quea huiso nee nee baje —jamaya aca cua Jesosaa.

Jesosa quea cojja jiji cua

(Mateo 17.1-8; Macoso 9.2-8)

²⁸ Quijje, jiquio esohui huohui majje oe nomico ani'yo Jesosa poquia cua eyiyo huasijje. Peno, Satiaco, Huani pea'ai poquia cua onijje. Poquia cua Eyacuiñajji nijje mimiya. ²⁹ Eyacuiñajji nijje mimi majje Jesosaja ecojja quea jiji nee nee cua eshequi jayojja. Ojaya daqui pea'ai quea oshe nee nee, quea siyo nee nee cua. ³⁰ Beca dejja emano'yo eyajje jjanequija'aqui'ya cua Jesosa nijje. Oya cuana mimia cua Jesosa nijje. Oe dejja Moisesi etiiquianaya cua. Pea ca Enia etiiquiana cua, ma yahuaajo nei nei ba'ya cua. ³¹ Quea bame nee nee quea jiji nee nee miminequia cua Jesosa, Enia, Moisesi pea'ai. Jesosa miminequia cua onaja mimishijo emano'yojji jjejojo Jenosanenajo. Jama mimimea cua Jesosa. ³² Peno, Satiaco, Huani pea'ai quea cojja mano cua. Majoya aje shequi nei'ya cua, ba ca cua Jesosa, Enia, Moisesi pea'ai; quea jiji nee nee nequi, de. ³³ Moisesi Enia mimijeyo majje poqui o'oya cua eyahuasijje. Poquiye'yo ba majje Penohua Jesosa jama aca cua ba'a: —De, Esohui huohuijji, quea bame nee nee ecanaya jiquiojo ani. Pea beca peejjima equi ejja'yaqui, oe miqnea, oe Moisesija, oe Eniaja —jamaya cua Peno jashahuaba bamequi jjima jjejojo.

³⁴ Peno mimianijo tii bo oshe nee neeya oya cuana quehua ca cua. Bo ba majje quea mete nee nee po'ya cua. ³⁵ Majoya Eyacuiñajjiya bo tejeeya esohui huohui ca cua jama ba'a: —Jiquio Jesosa ecue Bacua Ejja, ecuea quea jea nee nee, eya ojo quea bihui nee nee. ¡Oya oe oe neiya shajja'ajjacue! —jamaya aca cua bo tejee Eyacuiñajjiya.

³⁶ Ohuaya cuana ma esohui shajja'ajja majje ba ca'ya cua Jesosa oe nei nequi; pea cuana chama'. Peno, Huani, Satiaco pea'ai mimi'yo jjima nequia cua. Pea o shajja'ajjajji cuana huohui jjima aca cua. Quijje nei nei ca huohui ca cua, de.

Esho'i niñepoqui Jesosaa eshahua hoojea ca'yaajo niñepoqui pajea mee ca'ya cua

(Mateo 17.14-21; Macoso 9.14-29)

³⁷ Mecahuajje jipojjaquiayo Jesosa eyiyojo nequi jaaoque'ya cua. Quea dejja huiso nee neeya Jesosa ishoa'ajja ca nequia cua. ³⁸ Oe dejjaa janobajjima nei jama huohuime aca cua ba'a: —¡Esohui huohuijji, bahuacue ecue bacua! Ecuea ebacua oe nei, de. ³⁹ Eshahuaa napa cajje, taani jeabichajea canaje meshi yasijje; huapani pea'ai. Eshahuaa manojea mee'yo sa acani. Jamatii oya cuani, de. ⁴⁰ Eyaya huohui'ajjanaje miqnea eshajja'ajjajji cuana eshahua cuayaqui mee'yojji. Eshahua cuaya meequi'yo jjima acanaje mi shajja'ajjajji cuaa —jamaya aca cua niñepoquiya ejeajjiya.

⁴¹ Jesosaa ojjaña cuana jama aca cua ba'a: —De; ¿ache shono acuae jja nequiana ejo jjashahuabaquije e'e jojo nei? ¡Quea sapa ca'a mi coma! ¿Ache cahui huiso minijje nequi majje miyaya eya baje'yo Eyacuiñajjiya hoojea'yo ojjaña jaahuanajji quea ca'a nee nee? —jama tecueameya Jesosaa aca cua.

Majoya ma dejja Jesosaa huohui ca cua jama ba'a: —¡Miquea ebacua jjequicue!

⁴² Majoya esho'i jjequi ca cua Jesosa que. Ye cajo eshahuaa esho'i jeabichajea ca cua; niñepoquia cua. Jesosaa eshahua esho'ijo nequi cuaya meequi ca'ya cua. Esho'i niñepoqui pajea'ya cua. Majoya aje Jesosaa ejeajji nijje esho'i poqui mee ca'ya cua. ⁴³ Ojjaña ba majje jama aca cua ba'a: —De, quea sohui poja nee Jesosa cuanaje. Eyacuiñajjiya Jesosa quea sohui poja nee po mee canaje.

Jesosaa huohui ca o'oya cua o manojeyojo
(Mateo 17.22-23; Macoso 9.30-32)

Ma esho'i niñepoqui pajea mee'yo majje ojjaña bihuia ca cua Jesosa, Eyacuiñajji pea'ai. Ohua bihuia cajje Jesosaa o shajja'ajajji cuana jama aca cua ba'a: ⁴⁴—¡Shajja'ajjacue jiquio esohui! ¡A'a pajea'yojji! Quijje dejja cuaa eya iña caje emano mee'yoyji —jamaya cua Jesosa.

⁴⁵O shajja'ajajji cuanaja ca quea quehua cua Jesosaja esohui. Eyacuiñajjiya quea quehua po mee ca'ya cua. Jamatii oya cuana quea mete cua ehuohui'ajajji.

¿Ache dejja quea bame eyajo cuaje'yo?
(Mateo 18.1-5; Macoso 9.33-37)

⁴⁶Jesosa shajja'ajajji cuana jjaníñebaqui ania cua. Jama cua ba'a: —¿Ache oja eshaja'ajajji acuae eyajo quea bame nee nee nequije so'o? Eya nei emeshi mese cuaje eyajo, pojja'a, miya pojjeama.

Pea aje oe jama cua ba'a: —Chojja, eya, de.

⁴⁷Jesosaa jama tecueame aca cua ba'a: —Miquianaya jashahuaba taiquiani. ¡Shajja'ajjacue oe! ⁴⁸¡Bacue jiquio esho'i cuana, emeshi mese po sa po ajja! ¡A'a emeshi mese po sa pojji! ¡Jamaya miquianaya pocue esho'i jayojjaya! ¡Jjapeequicue jiquio ecua esho'i cuana jayojja oe pocue, dejja quea bame nee nee pojji! Miquianaya ecuea epeeji niije japeequi majje miya ecuea epeeji cuani, Eyacuiñajjiya epeeji pea'ai. Jamajjeya miquianaya esho'i quea bame jayojja cuani, majoya miquianaya quea bame nee nee nequije'yo eyajo —Jesosa cua.

Oe dejja Edosiquianaja epeeji pojjeama cuani jamajjeya oya Jesosaja epeeji nei cuani
(Macoso 9.38-40)

⁴⁹Majoya Huaniya Jesosa jama aca cua ba'a: —Esohui huohuijji, ecuaa banaje oe dejja; ohuaya pea cuanaja eshahua cuana cuaya meequi ca'yona je miyaya jayojjaya. Miquea epeeji cuani pojja'a, oya ca ca cue ajja tii ecua niije. Jamajjeya ecuaa oya jama huohuina je ba'a: “¡A'a cuayaqui mee'yoyji eshahua; miya ecua niije poqui ajja!”

⁵⁰Jesosa jama cua ba'a: —Cho, ¡a'a jama pojji! Oya ecuea epeeji nei cuani. Oya Edosiquianaja epeeji pojjeama cuani, jamajjeya oya ecuea epeeji cuani. E'e, ma dejja quea bame cuani, oya quea tai pojjeama. Jamajjeya oya ecuanajaya epeeji cuani pea'ai —jamaya cua Jesosa.

Jesosaa Satiaco Huani pea'ai tecuea ca cua

⁵¹Beshahua nei acua cua Jesosa emano'yoyji, eyahuasijje epoqui'yoyji pea'ai Eyacuiñajji esohui jayojja yajji. Jamajjeya jashahuabaqui majje oya poquia cua Jenosanena huasijje o shajja'ajajji cuana niije. ⁵²Poquijeya Jesosaa beca o shajja'ajajji cuana huojea ca cua Samania meshi yasijje ecahuijji sa'ajjaa. ⁵³Jomajo Samania dejja jama cua ba'a: —Chojja, ¡a'a miquianaya jiquiacua cuejji! Cajaa, miquianaya Jodio dejja jojya, ecuanaja ca mi ca boti'ama Jodio dejja cuana Jenosanena huasijje poqui majamajjijojjo Eyacuiñajji bihuiaa.

⁵⁴Majoya ma esohui shajja'ajja majje Satiaco, Huani pea'ai poquia cua Jesosa que huohui pohua. Oya cuana jama cua ba'a: —Jesosa, Emeshi Mese nei, ecuaaya cuaqui oque mee sa aña ma esohui quea tai mimina je yasijje. ¿A'a acuae quea bame jama epojsi so'o, Jesosa?

⁵⁵Jesosaa jama tecueame aca cua ba'a: —Chojja, ¡a'a miquianaya jama jashahuabaquime pojji!

⁵⁶Majoya aje poquia cua pea cuiñajji yasijje cahuiya.

Jesosa niije japeequi majje quea camaja cuaje
(Mateo 8.19-22)

⁵⁷Ejiojijje poquijeya, dejjaa Jesosa jama huohuime aca cua ba'a: —Jesosa, Emeshi Mese nei, eya minijje japeequi sa cuani. Jamajjeya eya minijje e'e jojo nei po'ayequi sa cuani.

⁵⁸Majoya aje Jesosa jama cua ba'a: —E'e pojja'a de, quea camaja cuaje. Eya ojjaña Edoe Mese cuani. Jamatii ecuea equi chama' ejomishocajji. Samao ca ca jjanijo cahuijaa, cuichojsi cuana eja jo cahuiani. Eya ca ca iña quima' ecahuijji. Jamatii beca cuanaja equi quea nahue cuani e boti'amajojo —jamaya Jesosa cua.

⁵⁹Pea pojja jo pea dejja Jesosaa jama huohuime aca cua ba'a: —¡Jjeyahua nei enijje ecuea ecuea epeeji epojsi!

Ma dejja jama cua ba'a: —Emeshi Mese, quijje pishana poquije minijje. Jjeya ecue chii etii nojinoji, manojeyo pojja'a. Eyaya camojea sahua mano'yajo.

⁶⁰Jesosa jama cua ba'a: —Chojja, pea cuaa Eyacuiñajjiya epeeji pojjeama cuaa oe cacuiña cahua. Ohuaya cuaa camojea cahua mano'yajo. ¡Cuecua jeyahua nei; enijje ejahuohuiquiqui Eyacuiñajjiya esohui pea cuana huasijje!

⁶¹ Pea dejjaa Jesosa jama huohuime aca cua ba'a: —Emeshi Mese, eya po'ayequi sa cuani minijje. Ebionei oe ecuea huapa pojjeama cuana cahuohuiqui'yo sahua jama ba'a: “Poquia iña Jesosa nijje”.

⁶² Jesosa jama cua ba'a: —Chojja, ijjeya nei cuecue enijje! ¡Miya enijje jjapeequi sa cuanijo cuecue jjeyahua nei enijje! Miya cue sa po ajjajje miya bame'ama cuaje Eyacuiñajjija epeeji epojji.

10

Jesosaa deja quea huiso huoojea ca cua 72 huisome

¹ Majoya Jesosaa deja quea huiso jjequi tepe ca cua, 72 huisome. Ohuaya becamejjijji pea'ai huoojea ca cua ojjaña meshi cuana huasijje joya o poqui sa cuani yasijjeya. ² Ohuaya jama huohuime aca cua ba'a: —Dejja cuana anoso quejo jahua jayojja jama, quea huiso nee nee. Ojjaña cuana ecuea esohui shajja'ajja sa cuani, oe pojji ca ca Eyacuiñajjija esohui huohuijji yani. Jamajjeya ¡mimicue Eyacuiñajji nijje quea huiso esohui huohuijji epojji, quea huiso anoso sejjaj'yojji cuana jayojja epojji! ³ ¡Poquicue miqúanaya ma deja cuana quea mimishi nee nee nequi yasijje esohui huohuiya! Ma dejja cuanaya pojja'a mimijajije minijje; ba'ajja. ⁴ ¡A'a bashosoco dojojji; bejjo, ejiojji shejee pea'ai a'a dojojji! ¡A'a pea nijje mimipoquijji; quea cuejji pashi nee oe poquicue! Quea huiso Eyacuiñajjija esohui shajja'ajja sa cuani. ⁵ Equi yasijje dobiqúi majje jja ca oe equi mese huohuicue jama ba'a: “Eyacuiñajjija miya quea bei po mee caje”. ⁶ Ma equi mese quea bei po sa cuanijo, Eyacuiñajjija oya quea bei po mee caje. Pea equi meseya miya cajaa acanijo, Eyacuiñajjija oya quea bei pojjeama acaje. ⁷ ¡Miquianaja epeeji epojji sa'ajjacue; ojaya equijo tiya anicue! ¡Ojaya bobi ijjia anicue ma cuiñajjijo ani majje! Equi meseya miya cabobia cahua Eyacuiñajjija esohui huohuaña sosejje, ojaya echacojji jayojja cuani jojya. ⁸ Pea cuiñajji yasijje poquiajo deja cuaa miqúanajaya esohui shajja'ajja sa cuanijo ohuaya miya bobia caje. ¡Jamajjeya ijja'ijjiacue onijje! ⁹ ¡Jaaajqui mee'yocue emanoojaa cuana! ¡Huohuicue oe oya Eyacuiñajjija esohui jama ba'a: “Jjeya nei Eyacuiñajjija miya oya epeeji po mee sa acani” acue! ¹⁰ Pea cuiñajji yasijje poquiajo dejja cuana ca ca miquea esohui shajja'ajja sa po ajja pojja'a cuaje. ¡Ma dejjaya jja oe jama huohuime acue ba'a: ¹¹ “Miquianaaya cajaa aña Eyacuiñajjija esohui, jamajjeya ecuanaya pea dejja cuana huasijje poquije esohui huohuiya miqúanaya shajjama' jojya. Ecuana quea yeno cuani miqúanaya Eyacuiñajjija esohui cajaa anaje jojya. E'e de, ohuaya miqúanaya huoojea caje'yo cuaqui yasijje. ¹² Yahuaajo Eyacuiñajjija Sonoma cuiñajjijo ba'e cuana aca cua jayojjaya miqúanaya acaje'yo, quea nee nee po mee caje'yo” jama huohuimeya acue! —jamaya Jesosa cua.

Beca cuiñajjijo ba'e cuana shajjama' cua (Mateo 11.20-24)

¹³ Majoya aje Jesosa tecuetecuea cua dejja shajjama' cuana nijje. Jama huohuime aca cua ba'a: —Coya nequianaya quiyoy'yo chana', Conasijo ba'e cuana, Betesainajo ba'e cuana pea'ai. Miquianaaya eya banaje, ecuea esohui shajja'ajjanaje pea'ai. Jamatii miqúanaya ca mi ca oe shajjama' nei nei cuani, de. Yahuaajo Eyacuiñajjija Tinojo ba'e cuana Sinonojo ba'e cuana pea'ai quiojea mee ca'ya cua quea mimishi nee neejojjo. Ojaya cuanaja ca ca eya shahuaba jjima nei nei cua, de. Ohuaya eya eshahuaba jojjemo ecuea esohui eshajja'ajja jojjemo quea yeno nee nee poqui'aye ojaya mimishijjo. Conasijo ba'ea ca jjaja ca iña oe eshahuaba cuanaje, jamatii jjejojya ca nequiana ca oe shajjama' nei nei cuanaje ecuea esohuijo, de. Betesainajo ba'e jayojja ca mi ca oe cuanaje. ¹⁴ Jamajjeya Eyacuiñajjija miqúanaya huoojea caje'yo cuaqui yasijje, quea nee nee nee cuaje'yo miqúanaya. ¹⁵ Capenaomajo ba'e cuana, miqúanaya shajjama' neiya cuani pea'ai. Jamajjeya aje jja miqúanaya quiojea pea'ajje'yoya. Miquianaya jama jjashahuabaquiani ba'a: “Ecuana ca ca eyahuasijje poquije'yo”. Cho, miqúanaya poquije cuaqui yasijje ecue sohuijo shajjama' cuanijojo —jamaya Jesosa cua.

¹⁶ Majoya aje Jesosaa o shajja'ajjaji cuana jama huohuime aca cua ba'a: —E'e de, miqúanaya ecuea esohui huohuijji cuani. Miquianaaya ecuea esohui nei huohuaña. Jamajjeya dejja cuaa miqúanajaya esohui shajja'ajja canijo ecuea epeeji cuaje. Pea dejja cuana ca ca oe shajja'ajja sa po ajjajo ecuea epeeji pojjeama cuaje, Eyacuiñajjija epeeji pojjeama pea'ai cuaje. E'e de, mahuiso ecuea esohui —jamaya aca cua Jesosaa.

Majoya aje ma dejja cuana iye huiso huoojea ca cua esohui huohuiya.

Ma deja cuana, 72 huisome cue o'oya cua Jesosa que

¹⁷ Majoya ma dejja cuana 72 huisome esohui huohui majje Jesosa que cue o'oya cua; quea bihui nee cua. Oya cuana jama cua ba'a: —Jesosa, ecuea Emeshi Mese nei, ecuanaya quea sohui poja nee cuanaje; mi jayojja cuanaje. Ecuaya miquea bajjanijo eshahua huoojeacuaya'yonaje.

¹⁸ Jesosa jama cua ba'a: —E'e de, ecuea eba. Eyaya Edosiquiana banaje oquequinaje eyajo nequi pojjeje jayojja, de. ¹⁹ Eyaya miqianaya quea ca'a po meenaje epoquijji. Peyohua, ajiya pea'ai ijija cajje miqianaya mano'yo jjima po meeje'yo eyaya. Edosiquiana miya queca jjima ameeje'yo eyaya. ²⁰ Miqiaaaya eshahua cuayaqui mee'yaña. ¡A'a quea bihui nee pojji miqianaya quea sohui poja nee cuani! ¡Miqianaya ca oe quea bihui pocue miqianajaya bajjani tehue canaje Eyacuiñajjija eyajo edobiqui meeji! Miqianaya poquije eyahuasijje Eyacuiñajji nijje ba'e'yohua. ¡Jamajjeya ma esohuijjoja quea bihui pocue! —jamaya Jesosa cua.

Jesosa quea bihui cua

(Mateo 11.25-27; 13.16-17)

²¹ Majoya aje Edojjoshahua Bameya Jesosa quea bihui po mee ca cua. Jesosaa Eyacuiñajji jama huohuime aca cua ba'a: —De, eya quea bihui nee cuani minijje. Eyacuiñajji, miya ecue Chii nei, miya Emeshi Mese nei cuani, ojjaña meshi cuanajo eyajo pea'ai, de. E'e, beca cuana jjashahuaba taiquiani jama ba'a: “Ecuea quea ja'a nee esohui, jamajjeya eya Eyacuiñajjija esohui shajja'ajja sa po ajja”. Miyaya, Eyacuiñajjija, oya cuana ba meesahua ajja oya cuana jjashahuaba taiquianijjo. Pea cuana ca ca miquea esohuijo esho'iquiana jayojja jjabahuejjaqui sa cuani. Jamajjeya miyaya oya cuana quea ja'a po meeje'yo. E'e ecue Chii, miyaya jamaya aña miquea ejjashahuabaquijji jama —Jesosa cua.

²² Majoya Jesosaa pea cuana jama huohuime aca cua ba'a: —Eyacuiñajji ecue Chii e huojee'yojji epo. Eya ojaya esohui huohuijji cuani. Ecue Chiija eyajo anija ecuea ejjashahuabaquijji ojaya eba nei nei, ojaye nei. Ecue Chiija ejjashahuabaquijji ecuea eba nei nei pea'ai, ecuea nei. Eyaya ecuea epeeji ba meesahuaña quea ja'a nee ecue Chiija ejjashahuabaquijji —jamaya Jesosa cua.

²³ Majoya aje o shajja'ajjajji cuana Jesosaa jama huohuime aca cua ba'a: —¡Quea bihui pocue, miqianaya Eyacuiñajjija ejjashahuabaqui'yojji bañajo! ²⁴ E'e jojo nei eyaya miqianaya huohuaña jama ba'a: Yahuaajo quea huiso Eyacuiñajjija esohui huohuijji cuana, emeshi mese cuana pea'ai Eyacuiñajjija ejjashahuabaqui'yojji ba nei nei sa cua. Ecuea esohui shajja'ajja nei nei sa cua pea'ai. Jamatii onajaya eya ba jjima cua, shajja'ajja jjima cua ecuea esohui. E'e, oya cuana shajja'ajja sa cua jiquio miqianaya jjeja shajja'ajjaña —jamaya Jesosa cua.

Esohui oe Samania dejja quea bame cuajo

²⁵ Oe Jodio dejja Moisesija etehue'yo huohuijji poquia cua Jesosa dasiaa nisho. Huohui'ajja ca cua jama ba'a: —Jesosa, miya esohui huohuijji cuani, ¿ajja acuae po cajji Eyacuiñajji nijje eba'e tiitil'yojji so'o?

²⁶ Jesosa jama cua ba'a: —¿A'ya acuae Moisesiya tehue ca cua? ¿A'a pojja'a miquea ma esohui ba jjima?

²⁷ —De, ecuea eba, eya Moisesija etehue'yo huohuijji nei nei cuani. Ojaya esohui jama cuani ba'a: “¡Miyaya Eyacuiñajji quea jea nee nee acue! ¡Ojo nei oe jjashahuabaquicue; oya oe bihuiaacue ojjaña pojjaajo!” Pea etehue'yo jamaya cua ba'a: “Eseya jjaahuaanaquiani. ¡Jama jaahuanameya oe acue mique doe cuana!” jama cua Moisesija etehue'yo yahuajo —jamaya cua ma esohui huohuijji.

²⁸ Jesosa jama cua ba'a: —E'e de, quea bame nee miquea esohui. ¡Ma esohui jayojjaya oe miyaya acue! Majoya aje miya Eyacuiñajji nijje eyajo ba'e tiitije'yo.

²⁹ Ma esohui huohuijji Eyacuiñajji nijje, pea cuana nijje pea'ai quea bihui nisho cua. Ojaya pea cuana boti'ama cua. Jamajjeya ohuaya Jesosa edasia'yojji nisho jama huohui'ajjame aca cua ba'a: —¿A'ya acuae ecue doe cuana? —ojaya ba jjima nisho cua.

³⁰ Jamajjeya Jesosaa esohui jama huohuime aca cua ba'a: —Oe Jodio dejja ba'enaje Jenosanajajo, poquinaje ejiojijje Jenico huasijje. Ejiojijje poquianajo siipojji cuana nequinaje ejiojijje sii epojji. Siipojji cuaa dejja eshema' nei cuiahuejjajame acanaje e'acquiana jjeshe'yojji. Ojaya daqui sii ca'yonaje, de. Siipojji cuaa ma dejja jea cana'yonaje, beshahua nei emano'yo. ³¹ Majoya oe Jodio dejjaa, Eyacuiñajji nijje mimiani dejjaa ma dejja ecuijajeajje yejje canananaje. Bajea canananajeya aje jja ca oe. Jjequi sohuasohua'yo ajja jjaja cua. Poquia jjaja oe cua. ³² Quijje pea Jodio dejjaa yejje canananaje bajea canajeya aje jja ca oe pea'ai. Oya Eyacuiñajjija equi jaahuanajji cua. Jjequi sohuasohua'yo ajja jjaja cuanaje. Poquia jjaja oe cua. ³³ Quijje aje jjaja oe Samania dejja cueyanaje. Samania cuanaja Jodio cuana boti'ama. Jamatii jiquio Samania dejjaa Jodio dejja ecuijajejaa ba canaje. ³⁴ Ohuaya ba majje shicui canaje. Majoya aje iyasohua ca'yonaje mona biasje, dojo canaje ejaachichajji equi yasijje. Majoya aje jaahuana canaje sosema' tii. ³⁵ Pea cahuijo Samania dejjaa bejjo quia canaje equi mese yasijje, o cahuinaje sosejje. Jama huohuime aca cua ba'a: “Eya poquije chacohua. Ma ecuijajejaa dejja ca anije, ¡miyaya oya

jaahuanacue! Ma'aje bejjo o jaahuana sosejje. Quijje eya cueje o'oya mi sosequia o'oyaa" jamaya cuanaje Samania dejja —Jesosa cua.

³⁶ Majoya Jesosaa Moisesija etehue'yo huohuijji jama huohuime aca cua ba'a: —Pea beca peejjima dejjaa ecuijajejaa dejja ba canananaje. ¿Ache dejja acuae oja doe jayojja cuanaje?

³⁷ —Ma o jjequisohua'yojji cuanaje, Samania dejja ojaya doe jayojja cuanaje —jamaya oya cua.

—E'e de, e'e jojo nei. ¡Miyaya jamaya acue, pea cuana jama jaahuana meeya acue, miquea doe jayojja acue! —jamaya Jesosa cua.

Jesosa, Manta, Mania nijje pea'ai anicuanana cua

³⁸ Jesosa o shajja'ajjajji cuana nijje Jenosanena huasijje poquije Mantaja equi yasijje dobiquinana cua ijjia'ijjiaa. ³⁹ Mantaja shehue, Mania Jesosaja esohui shajja'ajja sa cua. Jamajjeya Jesosa chipi nei ania cua oja esohui shajja'ajja neineiiji. ⁴⁰ Mantaja cuacuacuacuaquija jjejojo Jesosaja esohui shajja'ajja jjima cua. Oya quea quene cua oja shehue nijje. Mantaa Jesosa jama huohuime aca cua ba'a: —Jesosa, eya ecue shehueja cuacasahua jjima. ¡Huoojeacue oya e cuacasahua!

⁴¹ Jesosa ca oe jama cua ba'a: —Chojja, Manta, miquea ecuacuajjijo ca ca miña jjashahuabaquiani. Jamajjeya miya ecue esohuijjo jjashahuabaqui jjima cuani. ⁴² Mania ca ca oe quea bame cuani, ohuaya ecuea esohui shajja'ajja neinei cani. ¡Mique shehue jayojja jama pocue! —jamaya Jesosa cua.

11

¡Eyacuiñajji nijje jama mimime pocue!

(Mateo 6.9-15; 7.7-11)

¹ Jesosa pea pojjajo mimia cua Eyacuiñajji nijje. Majoya aje cojjacahuijeyo majje o shajja'ajjajjiya Jesosa jama huohui'ajjame aca cua ba'a: —Emeshi Mese nei, ¡huohuicue iña miyaya achajja mimime acuae po caji so'o! Yahuaño Huaniya ona besameejji cuanajeya o shajja'ajjajji cuana huohui ca cua achajja mimime epojji Eyacuiñajji nijje. ¡Jamaya huohuicue ecuanaya!

² Majoya aje Jesosaa jama aca cua ba'a: —Jama mimimeya oe pocue Eyacuiñajji nijje ba'a: Eyacuiñajji, miya ecue Chii nei nei. Miya oe nei nei ani, pea mi jayojja chama'. Ecuea eba nei nei miya mimishi'ama nei nei. Miya ojjaña cuanaja Emeshi Mese nei cuani; ojjaña jaahuanajji cuani. Jamajjeya ojjaña cajjapeequiahua minijje.

³ ¡Quiacue mo ecuea bobi eba'ejji!

⁴ ¡Ecuana jama mimishi cuana cujea'yocue!

Eya quene'ama pea cuana nijje; joya enijje quea mimishi cuani nijje.

Jamajjeya ecuea mimishi cuanaño ja'a quene pojji pea'ai!

¡A'a ecua quea mimishi po meejji! Acua. ¡Jamaya mimicue Eyacuiñajji nijje! —jamaya Jesosa cua.

⁵ Majoya Jesosaa o shajja'ajjajji cuana pea esohui ejjashahuabaqui meejji jama huohuime aca cua ba'a: —Miquianaya pojjaja mee nei poquije miquea epeejjija equi yasijje mecashono nei. Miyaya huohuiñaquije jama ba'a: “Jjeya nei ecuea epeejji cue'yonaje.

⁶ Chama' bobi ecuea equijo, oya ca ca quea shoe, de. ¡Che mo bobi quiacue ecuea epeejji nijje eboiajji!” jamaya cuaje miya pojjaja. ⁷ Majoya oya jamaya cuaje ba'a: “Chojja, de. Equiajji pojjeama mi, cahuijaa so'o ca ca iña, de. Ca'ayonaje oya aña ecuea esecuejjani ca mi quiajji”.

⁸ Miyaya huohui'ajja majamajje ca mi ca oe quia caje. Ojaya epeejjijojo pojjeama ca mi ca oe quia cani miya mi cahuime yajje —jamaya Jesosa cua —.

⁹ E'e de, eyaya huohuinaje maya esohui miquea ebajji achajja mimime Eyacuiñajji nijje epojji. ¡Miquianaaya huohui majamajjacie esecuejo nequia jayojjaa! Majoya Eyacuiñajjiya miquianaya quia caje. ¡A'a Eyacuiñajji nijje mimi pajea'yojji ohuaya miya saja'a caje'yo!

¹⁰ E'e, ojjaña cuaa Eyacuiñajji huohui'ajja canijo, Eyacuiñajjiya oya cuana quia caje'yo. Jamaya ma esohui epeejjijo, de. Oya poquinaje bobi sa'ajjaa, huohui'ajja majamaja caneqinaje. Majoya aje bobi quia canaje. Jamaya aje Eyacuiñajjiya acaje miquianaa huohui'ajja majamajje.

¹¹ Miquianaja bacuaa nahuoojo huohui'ajja cajje, ¿ae quiaje? Peyo pojjaja. Chojja, miquianajaya equiajji pojjeama peyo, de. ¹² Miquianaja bacuaa cachinajajo huohui'ajja cajje, ¿ae quiaje? Aji pojjaja. Chojja, miquianajaya equiajji pojjeama, de.

¹³ Miquianaya quea mimishi ba'yani. Jamat'i miquianaja bacua nijje quea bame cuani, Eyacuiñajji ca ca mimishi'ama nei nei cuani. Ohuaya quea bame nee nee quia cani miquiaa huohui'ajjaje. Ohuaya miquiana huasijje Edojjoshahua Bame nei huoojja caje miquiaa huohui'ajjaje —jamaya Jesosa cua.

Jesosa Edosiquiana etiya quea sohui poja po mee cani poso —aca cuaa cua

(Mateo 12.22-30; Macoso 3.20-27)

¹⁴ Oe deja mimi'ajja nequia cua eshahua oja yamijo nequi jojo. Oya poquia cua Jesosa eshahua. Jesosaa eshahua cuayaqui mee ca'ya cua. Ma deja eshahua cuayaqui'yajo mimicoo'ya cua, de. Majoya aje ojjaña cuana jama cua ba'a: —De, Jesosa quea sohui poja nee nee yaña.

¹⁵ Pea deja cuanaya jama siaje pomeya cua ba'a: —Edosiquiana etii nijjeya jjejojo, Jesosaa eshahua cuaya meequi ca'yona, Edosiquiana etii Meesemo nijjeya.

¹⁶ Pea cuana jjashahuaba taiquia cua Jesosaja epeeji nisho epoji. Jesosa jama aca cuana cua ba'a: —Ecuanaa ajjima aña Eyacuiñajjiya miya ca ca ameesahua caje pojja'a. ¡Jamajjeya amee'ajja socue oe! Majoya jama miya ajo, ecuanaa baje e'e jojo nei Eyacuiñajjiya miya huoojea canaje ecuaa huasijje. Majoya aje oe ecuanaya jjapeequije minijje —jamaya cuana cua Jesosa Eyacuiñajjiya huoojea'yo pojjeama posojo.

¹⁷ Jesosaja eba onajaya ejjashahuaba taiquiji. Jamajjeya aje Jesosaa jama tecueame oya cuana aca cua ba'a: —¡Jjashajja'ajjaquicue oe! Joya emeshi mese ojo chacochoacani cuaa shajja'ajja sa po ajjajo, oje jjaquacuqui majje jjaquecua iyaiyaquije'yo deja cuana ma meshijo ba'e; chama'yo tii cuaje'yo. Huapa pojjeama cuana nijje jjacuaquijajo chama' epeeji cuana cuaje'yo. ¹⁸ Jamaya pea'ai Edosiquiana etiiya Satanasaa pea eshahua ehoojeacuaya'yo jjojemo, deja huoojea'yoyji pojjeama po'yoquiaye. Chojja, jama pojjeama ca coma. ¹⁹ ¿A'aya eyaya Edosiquiana nijjeya niñe cuana, pea eshahua cuana pea'ai huoojeacuayajeaña poso aña? Jamajjeya miquea epeeji cuanaa ¿ae nijje eshahua huoojeacuayajea cani? Eyacuiñajjiya asahua canijo, jamajjeya ojaya eba miquianaya ojo siaje eua. ²⁰ E'e, Eyacuiñajji nijjeya eyaya eshahua huoojeacuayajea yaña. ¡Jamajjeya bacue eua e'e jojo nei Eyacuiñajji, Emeshi Mese oe nei jjeya cuani tii! ²¹ ¡Bacue! ¿A'a deja quea ca'a neeja equi yasijje dobiqijiji oja aquiana siya o jeyo jjima nequijo? Chojja, o jeyo majje ojaya aquiana cuana sii caje cuaa. ²² Jiquio ecua e'aquiana mese ebionei jeyo cani jama amajje eyaya eshahua cuana jeacuayajeaña. ²³ Miqianaya shajja'ajja sa po ajja ecuea esohui, jamajjeya ecuea epeeji nei pojjeama miqianaya cuani. Miqianaaya ecuea esohui pea cuana huasijje huohui sa po ajjajo, jamajjeya miqianaaya pea cuana quea mimishi po mee sa aña, de —jamaya Jesosa cua.

Eshahua dejjaja yami yasijje cue o'oyani
(Mateo 12.43-45)

²⁴ Jesosaa esohui ejjashahuabaqui meejji huohui ca cua jama ba'a: —Eshahua dejjaja yamijo nequi cuayajeaqui'yo majje quea huesha poquinaje. Sa'ajja ca'yona pea neequi'yoyji. Jamatii ba'yo jjima cuanaje. Eshahua po'ayequequinaje o nequiji sa'ajja'yohua. Jamajjeya oya jjashahuabaquinaje jama ba'a: “Eya poquije o'oya huacuaya ma e cuayaquinaje yasijjeya, ma ecuea equi jayojja huasijjeya”. ²⁵ Jamajjeya oya deja huasijjeya cue o'oyanaje. Ojaya yami yasijje dobiqijiyonaje Eyacuiñajjiya epeeji pojjeama jjojaya, ojaya eyami equi ecuiashaba jayojja jama, ehua bamebame jayojja equi se ejjama'. ²⁶ Jamajjeya ma eshahua poquinaje pea eshahua cuana jjequiya onijje neequi'yoyji ma dejjaja yamijo. Oya cuana quea mase nee nee cuanaje. Oe nei yahua ca ca quea mase pishana cuanaje. Majoya aje ojjaña dobiqijajo ma deja quea yeno nee nee cuanaje. Yahuaajo oe eshahua nequiahuaajo ca ca quea yeno pishana cuanaje.

¿Yajja acuae po cajji quea bihui epoji?

²⁷ Jesosa mimianijo oe epona ojjaña yiyesama neijo nequi sohuicuaya cua jama ba'a: —Jesosaa, Eyacuiñajjiya miquea enaese quea bihui capo mee ca'yahua, ohuaya miya cuayajo tii mee canajejo.

²⁸ Majoya aje Jesosa jama cua ba'a: —E'e, quea bame pishana. Eyacuiñajjiya esohui shajja'ajja nei nei majje ca ca oe quea bihui nee nee capo'yahua. Joya Eyacuiñajji nijje jjapeequi neinei majje quea bihui nee nee capo'yahua. ¡Jamaya pocue quea bihui nee nee epoji! —jamaya Jesosa cua.

Deja mimishi cuaa Jesosa huohui'ajja ca cua
(Mateo 12.38-42; Marcos 8.12)

²⁹ Quea deja huiso nee nee ejjachichaqui nequia cua Jesosa nijje. Majoya Jesosaa esohui jama huohuime aca cua ba'a: —Miquiaaya Eyacuiñajjiya esohui cajaa anaje. Jamatii miqianaya ba o'oya sa cuani eyaya yahuaajo anaje jayojja. Ecuea jamaya e'abeca'yoyji pojjeama miquea ebajji eya Eyacuiñajjiya huoojea'yo. ¡Jjashahuabaquicue yahuaajo nei Eyacuiñajjiya Jjona jaahuana ca cua jai al'ajja sei aijo ba'e! ³⁰ Jjona emano'yo jayojja cua. Majoya shequi o'oyanaje jayojja cua pea beca peejjima cahuime po majje jaiya ojajaea ca'ya cua. Majoya deja cuana Ninebe cuiñajjiyo ba'e yasijje poquia cua. Oya jjashahuabaqui'yo aña cua Jjona eshequi o'oya jayojjajo. Jjashahuaba bame nequia cua e'e jojo nei Eyacuiñajjiya Jjona huoojea ca cua oja esohui huohuiya. Eya Jjona jayojjaya

cuaje, eya mano'yo majje mei jjanijo jaa shequije o'oya pea beca peejjima cahuime po majje, miqiana jshahuabaquiji Eyacuiñajjiya eya huoojea canaje miqiana huasijje. ³¹⁻³² E'e, yahuajo Ninebejo ba'e cuaa Jjonaja esohui shajja'ajja majje mimishi pajea ca'ya cua. Jjapeequia cua Eyacuiñajji niije. Jjonaa esohui quea bame huohui ca cua. Jjeya eyaya miqianaya huohui bamebame yaña, de. Jamatii miqianaya ecuea esohui shajja'ajja sa po ajja. Jamajjeya Eyacuiñajjiya miqianaya jeajea caje'yo cuaqui yasijje shajjama' jojoya, de

—E'e, jamaya yahuajo cua ba'a: Eeno cuejjijje emeshi mese pona cua. Oya quea huesha nee nee cueya cua Sanomoja esohui shajja'ajjaa. Sanomo quea jshahuabaqui ja'a pishana cua. Eya ca iña quea jshahuabaqui ja'a nee nee cuani. Jamatii miqianaya ecuea esohui shajja'ajja sa po'yo ajja. ¿Yajjajo acuae miqianaya ma epona jayojja mi po'ajjani so'o? Jamajjeya Eyacuiñajjiya miqianaya jeajea caje'yo cuaqui yasijje shajjama' jojoya, de —jamaya Jesosa cua.

Esohui ecojja cuaquijiji jayojjajo

(Mateo 5.15; 6.22-23)

³³ Jesosa jama cua ba'a: —¿A'a miqianaya cuaquijiji dedo majje capanequiaña eshajaa? Chojja. ¿A'a miqianaya enequia quehua nequiya jeaja'a came? Chojja. E'e, eyajo nequiya jeaja'a cani. ³⁴ Miqianajaya ecojja cuaquijiji jama, de. Miqianajaya ecojja quea ja'a cuanijo miqianaya poqui bameje. Miqianajaya ecojja ja'a'ama cuanijo epoqui bamejji pojjeama. Jamaya miqianajaya ejshahuabaquijjiya quea ja'a cuanijo, ba'e bameje. Miqianajaya jshahuaba taiquianijo, miqianaya cuaquijiji enequia quehua jayojja cuaje. ³⁵⁻³⁶ Jamajjeya ma cuaquijiji eyajo nequiasohua nequi jayojja jama jshahuaba bamebamequimeya oe pocue! —jamaya Jesosa cua.

Jesosaa Paniseo dejja cuana Moisesija etehue'yo huohuijji tecuea ca cua

(Mateo 23.1-36; Macoso 12.38-40; Noca 20.45-47)

³⁷ Jesosa mimipajea'yajo oe Paniseo dejjaa Jesosa iyaa ca cua ijia'ijjiaa ojaya equi yasijje. Jesosa dobiqni majje e'anijjijo anioquea cua. Oya jjametopo neinei'ji jima cua, Jodio etiiquiaa acani jayojja ajjima aca cua. ³⁸ Jamajjeya Paniseo dejjaa Jesosa ba majje jshahuaba taiquia cua jama ba'a: —E'e de, Jesosa quea tai cuani, eme topo neinei ajja, etiiquiaa jayojja jama ajjima acani, de.

³⁹ Jesosaja eba onajaya ejshahuabaquiji; jamajjeya jama tecueame aca cua ba'a: —De, miqianaya, Paniseo dejja cuana jamatii esohui huohuijji nisho cuani, quea tai, de. Miqianaya joya caneco yiye topo jjimajo jayojja cuani. Jamaya miqianajaya dejja cuana jshahuabaqui meeaña, miqianaya Eyacuiñajjiya epeeji cuani poso acani dejja cuaa. Miqianaya ca mi ca ojaya epeeji pojjeama, ojaya miqianaya eba, de. Ojjaña miqianaya quea bame cuani poso acani. Miqianaya ca ca quea tai nee nee cuani; jshahuaba quehuaquiani, de. ⁴⁰⁻⁴¹ Miqianaya Eyacuiñajjiyo jshahuaba nishoquiani, ojaya epeeji nisho cuani. Jamajjeya beca cuaa miqianaya quea bame ba'e poso acani. Eyacuiñajjiya miqianaya quea bame nee jshahuabaqui mee sa acani. Jamajjeya jja oe jonijje japeequie e'e jojo nei epojji! Majoya aje miqianaya quea bame cuaje'yo.

⁴² —E'e de, miqianaya Paniseo dejja cuana jshahuaba taiquiani, de. ¡A'a quea dejja tai pojji! Shajja'ajjaña ajeya ca oe Eyacuiñajjiya esohui, ojjaña ojaya esohui aje jje oe shajja'ajja jima cuani, e'e nei. ¡Miqianajaya ojjaña Eyacuiñajjiya esohui shajja'ajja jeyoyecue! ¡Huapa pojjeama cuana quea jea acue, Eyacuiñajjiya ojjaña cuana quea jea acani jayojja oe acue! E'e de, ¡a'a pajea'yojji quea jea ajji! Jamajjeya miqianaya quea bame cuaje.

⁴³ —E'e de, miqianaya ca jja ca oe quea tai cuani, Paniseo dejja cuana. Jamatii miqianajaya equi ejjachichaquijji e'anijji quea bame sa'ajjaña. Pea nijjeya aje jja mi ca oe quea bame jayojjaya cuani, majoya aje jja mi oe pea cua quea bame poso acani. Miqianaya ca jja mi ca siajpepojji, de. E'e, ejjojijje pea'ai miqianaya po'ayequiequijo dejja cuanaja esohui shajja'ajja sa cuani jama ba'a: “Paniseo dejja cuana ca jja ca quea bame nee nee, de”. Ma esohui ca jja ca e'e jojo nei pojjeama acani.

⁴⁴ —E'e miqianaya quea tai po majamajani. Miqianaya dejja equehua mojea'yojaa jayojja, ma onajaya ba jjimajojo quishi cani jayojjaya cuani. Pea cuana jshahuabaquiani ma meshi joya quea bame poso acani. Jamaya miqiana ma emojea'yojaa jama cuani. Pea cuana jshahuabaquiani miqiana quea bame, onajaya miqianaya ba jjima quea tai nee nee cuani. Miqianaya jshahuabatai tiitiqiani; quea bame pojjeama cuani —jamaya Jesosa cua.

⁴⁵ Oe Moisesija etehue'yo huohuijji cuani jama cua ba'a: —Jesosa, miya pojja'a ecuana nijjeya pea'ai tecuetecueani.

⁴⁶ Jesosaa oya jama huohuime aca cua ba'a: —E'e jojo nei eyaya miqianaya tecueaña. Miqianaya Moisesija etehue'yo huohuijji nisho cuani pea'ai, de. Miqianaya pea cuana

huasijje esohui quea camaja huohui nishoaña. Jamatii miqiananaya ma esohui jayojja ba'e ajja; ona asahua ajja.

⁴⁷⁻⁴⁸ —E'e, miqiananaya quea tai nee nee cuani, miqiananaya etiiquiana jayojja, de. Miqiananaya etiiquiaa Eyacuiñajjija esohui huohuijji quecua ca'ya cua jashajja'ajjaqui ajjaa jjejojo. Jamatii miqiananaya cuia'asha poquia tiitüiaña etiiquiaa quecua ca'ya cua shahuaba poquia tiitüijji, quecua'yo sajaa quea pame epojji epajea'yo cuani jjejojo. Jamajjeya miqiananaya etiiquiana jayojja jama jashahuabaquime cuani. ⁴⁹ E'e, Eyacuiñajjija eba, jamajjeya ohuaya jama huohuime aca cua yahuajo ba'a: "Eyaya ecuea esohui huohuijji cuana, e shajja'ajjaji cuana huoojeaje pea cuana huasijje. Ecuea ehoojea'yo cuana beca cua quecua caje'yo nei nei. Beca ca mimi panajajje onijje" jamaya Eyacuiñajjiji cua. ⁵⁰⁻⁵¹ E'e, miqiananaya etiiquiana huasijje huoojea ca cua Eyacuiñajjija huoojea'yo cuana. E'e, yahuajo miqiananaya etiiquiaa quecua ca'ya cua Eyacuiñajjija huoojea'yo cuana, de. Yahuajo Eyacuiñajjija esohuijji tehue ca cua Abenijo. Miqiananaya etiiquiaa Cainiya Abeni cuiahuejjajea ca'ya cua. Majoya oya jayojjaya quea huiso cuiahuejjajea ca'ya cua Eyacuiñajjija esohui huohuijji cuana. Quijje yejje nei Eyacuiñajjija etehue'yojo tehue ca cua ojaya pea esohui huohuijji, Sacaniajo. Oya Eyacuiñajjiji nijje mimiani cuiahuejjajea ca'ya cua cua Eyacuiñajjija equijo, aquiana dahuajeajji pejeje, de. Jamajjeya eyaya miya e'e jojo nei huohuaña jama ba'a: Jjeya nei Eyacuiñajjija miqiananaya quea nee nee po mee caje'yo ojjaña etiiquianaya mimishi cuanajo, miqiananaya etiiquiana jayojja cuani jojoja. ⁵² E'e jojo nei miqiananaya, Moisesija etehue'yo huohuijji cuana quea tai nee cuani. Jamatii miqiananaya ca mi ca oe esohui huohuijji nisho, sijjepojji. E'e, miqiananaya Eyacuiñajjiji nijje jjapeequi ajja nei. Pea cuana Eyacuiñajjiji nijje jjapeequi sa cuani, miqiananaya jjapeequi pajea meeyaña, de. Jamajjeya miqiananaya quea nee nee po mee caje'yo quijje, de, quea nee tii tüi cuaje'yo —jamaya Jesosa cua.

⁵³⁻⁵⁴ Jesosa mimipajea'yajo Paniseo dejja cuana, Moisesija etehue'yo huohuijji cuana quea quene nee nee cua Jesosaja esohuijjo. Oya cuana jashahuaba taiquia cua. Ohuaya cuana Jesosa huohui'ajja neinei ca cua esohui quea tai ojaya yajji nisho, ejjajejanobiquijji yasijje edojjiji nisho.

12

Jesosa esohui huohui ca cua ona jashahuaba taiquianijo
(Mateo 10.26-27)

¹ Quea dejja huiso nee nee ejjachichaqui nequia cua Jesosa shajja'ajjaji. Jjiojji quishi canequia cuaa cua quea dejja huisohua jjejojo. Jesosa o shajja'ajjaji cuana jama huohuime aca cua ba'a: —Paniseo dejja cuana jashahuabatai majamajajjiani. Jamajjeya aje esohui huohuijji nisho cuani, Eyacuiñajjija epeejji nisho cuani, de. Coya mi o jayojja po chana'. ²⁻³ Eyacuiñajjija oya cuana ba cani ojaya epeejji nisho cuani. Ojaya ojjaña eba o jashahuabaqui'yojji cuani cuana. Eyacuiñajjija eba ojjaña, de. Jamajjeya jaya Eyacuiñajjija quea ja'a po mee caje huiso tiya, quehua'ama cuaje'yo tii ojjañaja ebajji.

¡a'a quea mete pojji dejja cuanajo!
(Mateo 10.28-31)

⁴ E'e ecuea epeejji nei, ¡a'a quea mete pojji ojjaña cuanajo, eshahua cuanajo pea'ai! Oya cuaa miqiananaya quecua caje'yo pojja'a. Jamatii miqiananaya edojjoshahua mano jjima cuaje. ⁵ ¡Miqiananaya jja oe jashahuabaquicue Eyacuiñajjijo, de! Shajjama' cuajo ohuaya miqiananaya mano mee'yo majje cuaqui yasijje jeajea caje'yo miquea edojjoshahua.

⁶ —E'e de, quea anohui huiso nee nee yani. Anohui beshahua nei sosema' quea huisojojo. Eyacuiñajjija oya cuana pajea'yo jjima acani. Ojaya eba ojjaña. ⁷ Ohuaya anohui jaahuana cani, jamajjeya ohuaya miqiananaya jaahuana neinei cani pea'aiya, de. Ojaya esico miqiananaya ehoojaña. Jamajjeya ¡a'a pajea'yojji miqiananaya ohuaya nahue cani! Anohui ohuaya nahue cani pishana —jamaya Jesosa cua.

¡a'a quea bicho pojji Jesosa nijje jjapeequi majje!
(Mateo 10.32-33; 12.32; 10.19-20)

⁸ Jesosa jama cua ba'a: —Ecuea epeejji cuaa ejo huohui cani jama ba'a: "E'e, eya ca iña bicho'ama Jesosajo. Eya ojaya epeejji nei nei, e'e jojo nei". Jamajjeya eyaya Eyacuiñajjija esohuidojojji cuana o que huohuije jama ba'a: "E'e, oya cuana ecuea epeejji nei, e'e jojo nei". ⁹ Pea cuana ca jja ca quea bicho cuani ejo. Jamajjeya oya cua huohui caje jama ba'a: "Cho, eya Jesosaja epeejji pojjeama". Jamajjeya eyaya Eyacuiñajjija esohuidojojji cuana huohuije jama ba'a: "Cho, oya cuana ecuea epeejji pojjeama, cajaa" eyaya aje —Jesosa jamaya cua—. ¹⁰ Beca cuaa eya niñeba cani; Eyacuiñajjija maya mimishi cuijea sa acani. Peaa pojja'a Edojoshahua Bame niñeba cani, Eyacuiñajjija ca ca maya emimishi cuijea'yojji pojjeama. Ma mimishi ani tiitüije'yo.

¹¹ —Pea cuaa miqúanaya dojo caje esohuinano mese ani yasijje, Jodio dejja etii ani yasijje ecuea epeejiijoyo. Miqúanaya pojja'a ba'a: “¿Achajja shai huohuime acajji? ¿Achajja shai saja'ame aje?” ¡A'a jamaya jshahuabaquijji! ¡Mete'ama nei onijje mimicue! ¹² Edojjoshahua Bameya miqúanaya mimi bame meesahua caje esohuinano mese nijje. Quea bame cuaje miqúanaya —jamaya Jesosa cua.

¡A'a bejjo jshahuaba majamajaquijji!

¹³ Oe dejjaa Jesosa jama huohuime aca cua ba'a: —Esohui huohuijji, ecuanaja chii mano'yonaje. Ecue o'ija che eya bejjo esejja quia'yo jjima ecue chiija quijjojea. Jamajjeya jama huohui'ajjame acue ecue o'i ba'a: “Che pa ¡chahua bejjo esejja quia'yocue!” acue —jamaya cuanaje oja chahua bejjo sa cuanajo.

¹⁴ Jesosaa jama huohuime aca cua ba'a: —Chojja de, ¿yajjajo acuae moya jama huohui'ajjame aña? Eya ca iña mique chiija quijjojea bejjo quia'yohua cue pojjeama. Maya ecuea echacojji pojjeama, de. ¹⁵ Ojjaña dejja manojeyo quea bejjo huiso cuana, aema' cuana pea'ai. Miquea aquianaa miquea bejjohua miya ba'e meesahua jjima acajeyo, de. Jamajjeya ¡a'a aquiana bejjo pea'ai sa majamajajji! —jamaya Jesosa cua.

¹⁶ Majoya Jesosaa jiquio esohui ebajji huohui ca cua jama ba'a: —Oe dejja quea bejjo huiso nee ba'enaje. Anoso que quea huiso nee nee cuanaje. Sejjajeyo'yo majje quea huiso nee nee cuanaje. ¹⁷ Oya jama jshahuabaquinaje ba'a: “De, eya quea bihui nee, quea bejjo huiso nee nee cuaje. ¿Achejo shai eyaya anoso quea huiso nequiae? ¹⁸ Eyaya pojja'a cajjajeaje'yo anoso nequijji, equi quea quemoe nee nee iyaje'yo anoso quea huiso nee nee nequijji, de. ¹⁹ Majoya anoso iyajeyo'yo majje eya quea bihui cuaje, ecuea bejjo quea huiso nee nee cuaje. Quea shequija huiso nee nee eya chacocho'yo jjima cuaje quea huiso jjejojo. Eyaya bobi quea huiso nee nee ijiaje quea bihui epojji” jamaya cuanaje ma dejja. ²⁰ Majoya aje Eyacuiñajjiya ma mecajje huohui canaje jama ba'a: “De, miya ca ca niñepoqui cuanaje. Miya jjeja nei manojeyo. ¿Ajea acuae cuaje'yo miquea aquiana jiquio miya jaahuana? Poquijeyo'yo miya jiquio mecajje. Chama'yo tii cuaje. Miquea aquiana, anoso, bejjo pea'ai dojo'yo jjima cuaje. Miya aema' poquije'yo cuaquij yasijje enijje japee'yo jjima jjejojo” cuanaje Eyacuiñajji. Majoya aje mano'yonaje ma dejja; chama'yo tii cuanaje —jamaya Jesosa cua—. ²¹ E'e de, ma dejja jayojjaya miqúanaya cuaje miya bejjojo jshahuaba majamajaquianajo. Oe dejja jshahuaba majamajaquiani ojaya bejjojo Eyacuiñajjiyo oya jshahuabaquijji cuani —jamaya Jesosa cua.

Eyacuiñajjiya ojaya epeeji cuana jaahuana cani
(Mateo 6.25-34)

²² Majoya Jesosaa o shajja'ajjaji cuana jama huohuime aca cua ba'a: —E'e jojo nei eyaya miqúanaya huohuiana: ¡A'a quea yeno jshahuaba titiitquijji miqúanajaya eba'ejjijo! Jama ba'a: “E'e pojja'a eya bobimajo manojeyo; bobi yasijje cuaje'yo. Ecuea daqui pojja'a huinaje'yo, daquima' nei nei eya cuaje'yo”. ¡A'a jamaya jshahuaba titiitquijji! ²³⁻²⁴ E'e de, cuicho'ji cuana ca ca quea jaji nee ba'e. Oya cuana ca ca chacochoa ajja, bobi chicha ajja equi yasijje quijje e'ijjia'yoyji. Eseja Chiiya jja oya cuana jaahuana cani, de. Miqúanaya ca ca oe ohuaya jaahuana neinei cani. ¡Jama jshahuabaquimeya jja oe pocue ca quea bame eba'ejji, daquijo, bobijo! ²⁵ ¿A'a miya quea ao cuaje'yo jshahuabaquime cuani? Chojja, jamatiya cuaje'yo. ²⁶ Jamajjeya oe ¡a'a aquianajo jshahuaba titiitquijji! —Jesosa cua—. ¿Apiojji miqúanaya jshahuaba titiitquiani miqúanajaya daquijo? ²⁷ ¡Bacue shasha tiiani! Shasha cuana chacochoa ajja; oja daqui cuana soco ajja. Jamatii quea bame nee nee nequiani. Jamaya Eyacuiñajjiya shasha pohua mee cani. Jodioja emeshi mese yahuajo nei nequia cua Sanomo bajjani. Ohuaya daqui quea nahue nee nee huosho ca cua. Jamatii oja daqui quea bame pishana cua, shasha ca ca oe quea bame nee nee cuani. ²⁸ E'e, Eyacuiñajjiya shasha cuana pohua mee cani quea bame nee. Jjeja shasha cuana enequi; mecahuaje yaa'yani, joca'yani; dahuajea cani cuaa pojja'a, chama'yo tii cuani. Jiquio ecua Eyacuiñajjiya shasha quea bame nee pohua mee cani jamaya ohuaya e'e jojo nei miqúanaya ba'e meesahua caje'yo quea bame nee nee. Miqúanaya ojaya quea boti nee nee cuani. Miqúanaya jshahuaba taiquiani jama ba'a: “E'e pojja'a eseya jaahuana jjima Eyacuiñajjiya”. Cho, ¡a'a jamaya jshahuabaquijji! —jamaya Jesosa cua.

²⁹ —E'e, a'a jama pea'ai jshahuabaquime pojji ba'a: “¿A'ya shai che ijiaje? ¿A'ya shai che ishije; chama'ya? ¿A'ya shai che ecuaa huoshoje?” ³⁰ Ojjaña cuana Eyacuiñajjiya epeeji pojjeama cuana aquianajo jshahuabaquiani tii tii. Eyacuiñajjiyo jshahuabaquijji ajja. E'e jojo nei esejjaya Chii eyajo ani miqúanajaya aquianajo, eba'ejjijo jshahuabaquiani. Ojaya eba ojjaña, de. Jamajjeya ohuaya miya jaahuana cani. ³¹ ¡A'a pea cuana jayojja pojji! ¡Jshahuabaquicue oe Eyacuiñajjiyo! ¡Onijje oe japee titiitquicue! ¡Ojaya esohuijo jshahajja'ajja

tiitiiquicue! Jamaya jashahuabaquianijo ohuaya miquiána huasijje aquiana eba'e meeji quia caje'yo —jamaya Jesosa cua.

Jesosa eseyo ojo chachaco ani quijje eyajo quea huiso sosequia caje'yo
(Mateo 6.19-21)

³² —E'e ecuea epeeji cuana, ¡a'a quea mete pojji Eyacuiñajji nijje japeequi majje! Ohuaya miquianaya quea bihui po mee caje. Ohuaya miquianaya ba'e tiitii mee caje'yo eyajo. ³³ ¡Quiacue miquiánaa aquiana aema' cuana huasijje! Miquiánaa quia jima aje miquianajaya aquiana sii ca chana'; nojjo ca'yo majje huiñaje'yo. ¡jjeja Eyacuiñajji chachaco neineicue! E'e jojo nei ohuaya quijje miquianaya sosequia caje'yo quea huiso nee nee eyajo. Miquianajaya esijji pojjeama, miquianajaya epo'yo tii tii. ³⁴ E'e jojo nei miquianajaya aquiana equijo jaahuaña, jamatii jashahuabaquiani miquianajaya equijo. Miquianajaya aquiana ca ca eyajo jaahuaña, jamatii jashahuabaquiani eyajo eba'e'yojji —jamaya Jesosa cua.

¡Acua epo oe anicue!

³⁵⁻³⁶ Jesosa jama huohuime aca cua ba'a: —Shajja'ajjacue jiquio esohui ehuohui'yojo: Oe emeshi mese poquinaje cuiñajji yasijje. Ojo chachacoani cuaa emeshi mese ishóa'ajja canaje. Echacojji ba jima ache shono shai ojava emeshi mese cueje o'oya. Jamajjeja daqui bame huosho canaje, cuaquijji jinequinaje pea'ai. Cahui jima cuanaje ishóa'ishoanequi jjejojo. Emeshi mese cue'yajo, ojo chachacoani cuaa dobiqui mee ca'yonaje ojava equi yasijje. Emeshi mese quea bihui cuanaje ohua ishóa'ajja ca'aninaje jjejojo. ³⁷ Jamajjeja ojjaña ojee anioquenaje e'ijja'ijji. Majoya aje ojee ijja'ijji majje ojava echacojji cuana quea bihui nee nee cuanaje. ³⁸ Jamaya oya cuana quea bame cuanaje ishóa'ajja neinei canequinajejo. Mecajje, mecashono, epojajo pea'ai ishóa'ajja canequinaje, de. ¡Jamaya miquianaya pocue! ¡Ejo jja'ishóa'ajjaqui anicue! ³⁹ E'e, jiquio jama cuaje ba'a: Equi meseya sipojji ache shono cueje poso acani. Ojava eba jojjemo, ohuaya ishóa'ajja ca anime equi jaahuanajjiya. ⁴⁰ Eya miquianajaya Edoe Mese, ¿ache nei eshequi nequijo eya miquiána que cueje o'oya ebajo ese? ¡Jamajjeja jja'ishóa'ajjaqui anicue! —jamaya Jesosa cua.

Ojo chachacoani quea bame nee nee cua
(Mateo 24.45-51)

⁴¹ Penohua Jesosa jama huohui'ajjame aca cua ba'a: —Esohui huohuijji, ¿a'a jiquio esohui ecuanajaye nei ebajji? Ojjaña ebajji pojja'a ca coma.

⁴² Jesosa jama cua ba'a: —Eyaya huohuinaje jiquio esohui onaa shajja'ajja caje huiso tiija ejashahuabaquijji. Shajja'ajjacue jama ba'a: Oe emeshi mese poquinaje pea cuiñajji yasijje. Poqui jimahuua ojo chachacoani huohui canaje pea ojava echacojji bobiajji. Ojo chachacoani emeshi meseja sohui shajja'ajja nei canaje. ⁴³⁻⁴⁴ Emeshi mese cue'yo majje quea bihui cuanaje ojo chachacoani quea bame nee nee chachacoanejojo. Jamajjeja emeshi meseya oya jama huohuime acanaje ba'a: “¡Miyaya jjeja ojjaña ecuea aquiana cuana jaahuacue, miyaya ecuea esohui shajja'ajja neineinajejo!” Jamajjeja ojo chachacoani quea bihui cuanaje. ⁴⁵ Pea ojo chachacoani jashahuabaqui jima cuanaje. Jama jashahuaba taiquime cuanaje ba'a: “Ecuea emeshi mese quijje nei cueje'yo, jamajjeja eya pea echacojji cuana huasijje bobi quia sa po ajja. Poquije ca iña ishi'ishiya”. Majoya oya ojava pea echacojji cuana nijje jjaucia majamaqui nequinaje, huoo majamanequi jjejojo. Oya chachaco jima cuanaje. ⁴⁶ Majoya aje oe ojava emeshi mese cue'yonaje. Emeshi meseya ba caña'yonaje ojo chachacoani ehuoajja. Majoya aje quea quene nee nee poña'yo majje queca caña'yonaje shajjama'jojo. Ohuaya jeajea canaje quea huesha. Jamaya Eyacuiñajjiya ojjaña mimishi cuana acaje'yo, huoojeajea caje'yo cuaqui yasijje —jamaya Jesosa cua.

⁴⁷ —E'e de, echacomeejji eba emeshi meseja esohui, oya ca ca shajjama' nei nei cuanaje. Jamajjeja aje oe emeshi meseya echacomeejji cuia caña'yonaje. ⁴⁸ Pea echacomeejji ca ca ba jima nei emeshi meseja esohui cuanaje. Jamajjeja emeshi meseya echacomeejji oe pojji cuia meeme acanaje oja ba jimajojo. Jamaya Eyacuiñajjiya esohui eba nei nei epo cajjashajja'ajjaquiahua ojava epeeji nei nei epojji. Shajjama' jojoya ca Eyacuiñajjiya cuaqui yasijje jeajea caje'yo —jamaya aca cua Jesosa.

Beca cuana Jesosaja epeeji nei cuaje beca cuaa ca ca cajaa acaje
(Mateo 10.34-36)

⁴⁹ Jamaya Jesosa cua ba'a: —Eya cueyanaje ojjaña nijje japeequiya, beca cuana japeequije enijje, beca cuana ca ca enijje ejapeequijji pojjeama. Jama huoojeameya eya acanaje Eyacuiñajjiya. ⁵⁰ Eya quea nee nee cuaje'yo, mano mee caje'yo cuaa. Eya manocuai'yo sa cuani ojjaña mimishi cuana cuijea'yojji soseje. Quea camaja eya cuaje'yo, de. Mano'yo

majje ca eya camaja'ama cuaje'yo. ⁵¹ ¡A'! jashahuabaquijji eya cueyanaje ojjaña cuana ojjaña meshijo ojee quea bei ba'e mee'yohua! Chojja, de. Pea cuana quea mase cuaje ecuea epeeji cuana nijje. ⁵² E'e, jamaya cuaje. Oe equijo ba'e beca cuana ecuea epeeji nei, beca cuana ca ca ecuea epeeji pojjeama, Eyacuiñajjija epeeji nijje ba'e sa po ajja oya. ⁵³ Ebacua ejja esohui ba epo eejaji nijje ba'e sa po ajja ohua quea mimishi e'aca cuani jjejojo. Enaeseya oja bacua pion tecuea cani, ecuea epeejihojo. Jamajjeya oja bacua pion onijje ba'e sa po ajja. Yano mese osecuajana nijje mimijajiani o esohui ba epo jojoya. Jamajjeya osecuajana onijje ba'e sa po ajja. E'e, jamaya miquianajaya equijo cuaje —jamaya Jesosaa aca cua.

Ojjaña eba ena cuaje jamatii Jesosa ba jjima cua
(Mateo 16.1-4)

⁵⁴ Majoya Jesosa jama cua ba'a: —Mecajjeahua quea ichi nee nequijo, miquianaya jama cuani ba'a: “E'e de, quea ichi nequi, ena cuaje, de”. E'e jojo nei ena cuani. ⁵⁵ E'e de, jamaya pea'ai miquianaya cuani ba'a: “E'e de, eeno jjayejequijajo quiyo dobi'yani”. E'e jojo nei quiyo dobi'yani. ⁵⁶ Miqianajaya eba ena cuanijo, quiyo dobi yanijo pea'ai. Jamatii beshahua nei miquianaya ca jja ca oe jshahuabaqui jjima e cueyanajejo. ¡Miquianaya jja oe jshahuabaquicue Eyacuiñajjija esohuijo! Jamajjeya eya miquianaaya baje —jamaya Jesosa cua.

Pea esohui ejjashahuabaqui ja'ajjijo
(Mateo 5.25-26)

⁵⁷ —¿A'a miquianajaya eba quea bame eba'ejji? E'e pojja'a, jamajjeya jshahuabaquicue jiquio esohuijo jama ba'a: ⁵⁸ Miqiana nijje oe dejja quea quene nee nee cuajo miquianajaya aquiana sosequia jjimajojo, ohuaya miquianaya dojo caje sohuinano huasijje. Jamajjeya ¡dojo jjimahuaa aquiana miquianaaya sosequia'yocue! Miqiaa mi sosequia'yajje ohuaya miquianaya dojo caje sohuinano huasijje ejeadobia meejji. Majoya miquianaya sohuinanohua jeadobia caje. ⁵⁹ E'e jojo nei ejeadobia tii jaaje. Ejeacuaya'yojji pojjeama miqiaa mi sosequiajje. Miqianaya sosequiajeyo'yajje ca mi ca oe jeacuaya caje'yo. ¡jiquio jayojjaya oe pocue! Jamajjeya ¡jeya Eyacuiñajji nijje jjapeequicue miquianaya mano'yo jjimahua, cuaqui yasijje jea jjimahua pea'ai! Jamajjeya miya cuaqui yasijje ejeadobiajji pojjeama —jamaya Jesosa cua.

13

¡jjapeequicue Eyacuiñajji nijje!

¹ Majoya pea cuana poquia cua Jesosa baa. Beca cuaa jama huohui'ajjame aca cua ba'a: —De, ¡jeya nei Pinatohua, emeshi meseya Jodio dejja cuana quecua mee ca'yonaje. Ma dejja cuana Janinea meshijo ba'e poquinaje Jenosanena huasijje Eyacuiñajji bihuiaa. Eyacuiñajjija equi yasijje dobiqúi majje ijjiacajji ehuone' cuana quecua canaje edahuajji. Eyacuiñajjija equijo nequi sohuinano cuaa dobiqúi majje quecuaje ca'yonaje. Hua canaje equecua'yo cuanaja ena' ijjiacajjija enajo, de. Quea mimishi nee nee cuanaje emeshi mese Pinato, de. ¿A'a ma Jodio dejja cuana quecua ca'yonaje quea mimishijojo? —jamaya poso aca cua.

² Jesosa jama cua ba'a: —Chojja, de. Miqianaya jshahuaba taiquiani. Jodio dejja cuana quea mimishi cuani quecua'yo jjima. ¿Yajja ajjaja oe pea cuana Jenosanenajo ba'e mi mano'yonaje oya jayojjaya pea'ai ca jja coma? ³ Jamajjeya miquianaya mano'yo majje pea'ai Eyacuiñajji nijje jjapeequi jjima jjejojo cuaqui yasijje poquije'yo. ⁴ E'e, Sinoe cuiñajjijo pea dejja cuana mano'yonaje. Equi quea ao nee nee iya canaje meshi edahua ca'a. Meshi ca'a jjaajajeaqui'yo majje dejja cuiamo'ijea ca'yonaje meshiya. Quea huiso nee nee, 18 dejja cuana mano'yonaje, de. ¿A'a oya cuana quea mimishi nee neejo mano'yonaje poso aña? Chojja, de. ¿Yajja ajjaja oe pea cuana Jenosanenajo ba'e mi mano'yonaje oya jayojjaya pea'ai ca jja coma? Quea mimishi nee nee cuani; oya cuana eshe, de, mano'yo jjima. ⁵ Eyaya huohuije o'oya, miquianaya Eyacuiñajji nijje jjapeequi jjima po majje cuaqui yasijje poquije'yo, de —jamaya Jesosa cua.

Esohui acui ¡jajjama' cuaje

⁶ Jesosaa jiquio huohui'yo jama huohuime aca cua ba'a: —Oe dejja acuijjajja banajji epo poquinaje que yasijje. Acui tii majje ¡jajjama' cuanaje, de. ⁷ Ma dejjaa ojaya echacojji jama huohuime acanaje ba'a: “De, pea beca peejjima shequajjame ca cuanaje ma acui. ¡jajja ajja cuanaje. ¡jajajea'yocue; pea acui bana'yocue!” ⁸ Ojaya echacojjiya jama huohuime acanaje ba'a: “Emeshi mese, ¡shoa'ajjacue oe eshequajjame! Eyaya jaahuana neineije so'o. Meshi tio majje ana'aiaa see meshi tejee huanaje so'o. ⁹ Acui eya jaahuana neineiajje quea ¡jajja huiso nee nee cuaje pojja'a. ¡jajjama' po o'oyajo oe cajajajea'yahua” jamaya ojaya

echacojji cuanaje —jamaya Jesosa cua—. E'e, ma acui jjaajama' jayoija oe dejja jjapeequi jjiima Eyacuiñajji nijje. Ma echacojjiya jjaajja meesahua cani jama jayoija eyaya aña, dejja cuana jjapeequi meesahuaña Eyacuiñajji nijje —jamaya Jesosa cua.

Jesosaa oe epona mo'aa jjaipiqui meequi ca'ya cua

¹⁰ Ejomishocajji pojajajo Jesosa poquia cua Jodioja ejjachichaquijji equi yasijje esohui huohuuya. ¹¹ Oe epona mo'aa ania cua jomajo. Edosiquianaja jjamo'aaqui mee'yo cua yahuaajo. Quea huiso nee nee, 18 eshequiajame epona ejjamo'aaqui'yo ania cua. ¹² Jesosaa oya ba majje jama huohui'ajjame aca cua ba'a: —¡Epona, cuecue! Eyaya miya jjadaasapiqui meeje'yo.

¹³ Majoya Jesosa que cueajo Jesosaa emeya napa cajje epi nei nequi'ya cua. Ma eponaa Eyacuiñajji bihuia ca cua. ¹⁴ Jesosaa ma epona jjadaasapi meequi ca'ya cua ejomishocajji pojajajo. Majoya aje Jodioja ejjachichaquijji equi jaahuanajji Jesosa nijje quenequenea cua. Dejja cuana jama huohuime aca cua ba'a: —Me oejje oe cahuime echacojji yani. ¡Ma pojja cuanajo cuecue ejjaajaqui'yojji! ¡A'a ejomishocajji pojajajo Jesosaja jjaajaqui mee'yohua cuejji!

¹⁵ Jesosaa ma esohui shajja'ajja majje jama tecueame aca cua ba'a: —Chojja, ¡a'a jamaya mimijji! Miqúanaya jama cuanaje ba'a: “¡A'a chacojji ejomishocajji pojajajo!” Miqúanaya ca ca jiquio pojajajo chacochoqui. Miquea ana'ai ejomishocajji pojajajo ijia'ijia mee aña. Miyaya miquea ana'ai ejeyo nequi pichojeaña ena ishi meequijji. ¹⁶ E'e, jiquio epona mi jayoija, oe Jodio epona. Quea huiso nee nee, 18 eshequiajame Edosiquianaa jjamo'aaqui mee ca'ya cua, de. ¿Yajajajo acuaeya mi cuayajea mee'ajjaqui'yaña so'o ejomishocajji pojajajo? ¿A'a mi o jjaipiqui mee'yo ajja jjejojo jama cuani? ¿A'a miya jjashahuaba taiquiani jjejojo jama cuani? —jamaya cua Jesosa.

¹⁷ Jesosaja esohui shajja'ajja majje o ñiñebajji cuana quea bicho po'ya cua. Beca cuana ca quea bihui cua Jesosa nijje, ma epona jjaipiqui mee ca'yajo. E'e de, Eyacuiñajjiya Jesosa quea sohui poja po mee ca'ya cua.

Esohui acui so' che biso neijo motasa sojo

(Mateo 13.31-32; Macoso 4.30-32)

¹⁸ Majoya Jesosaa jama huohuime aca cua ba'a: —Ebionei Eyacuiñajji oe pojji dejjaja Emeshi Mese nei cuaje, quijje ca ca Eyacuiñajji ojjañaja Emeshi Mese nei cuaje, oya quea epeejji huiso cuaje. ¹⁹ E'e, oe motasa so' biso nei tii majje acui quea quemo jayoija cuani, huapeje cui quemajja. Cuichoijji motasa acuijo jaani. Ma eso' biso nei jayoijaya Eyacuiñajjiya epeejji cuani oe pojji jayoijaya cuani ebionei. Majoya quea huiso nee nee ojaya epeejji cuaje motasa acui jayoijaya —jamaya Jesosa cua.

Esohui huohui'yojji pahui shejee meejji

(Mateo 13.33)

²⁰⁻²¹ Pea esohui huohui'yo Jesosaa jama huohuime aca cua ba'a: —Eyacuiñajji ojjañaja Emeshi Mese nei cuaje pahui shejee yani jayoijaya. Jamaya oe epona pahui dahuaaje cuanaje. Oe pojji nei eshejee meejji iya canaje. Majoya aje ohuaya jeahuahuo canaje quea huiso pohuipohui pahui yajji. Majoya aje ojjaña shejee'yonaje pohuipohui. Majoya aje quea huiso pahui cuanaje. Jamaya Eyacuiñajjiya epeejji pahui shejee meejji jayoijaya cuani. Ebionei oe pojji epeejji cuana cuani, majoya aje pea cuana jjashahuabaqui mee cani Eyacuiñajjiya epeejji epoji. Quea huiso nee nee po mee cani —jamaya Jesosa cua.

Esohui huohui'yojji esecuejjani biso neijo

(Mateo 7.13-14, 21-23)

²² Majoya aje Jenosanena huasijje poquije, Jesosa pea cuiñajji cuana huasijje dobiqiu poquia cua sohui huohuuya. ²³ Jesosa aniñaqui jjimahuaajo pea cuiñajjiyo ba'eya oya jama huohui'ajjame aca cua ba'a: —¿A'a oe pojji Eyacuiñajjiya epeejji cuana poquije'yo eyahuasijje onijje ba'e'yohua?

Jesosa aje majoya jama cua ba'a: ²⁴ —E'e de, yani oe esecuejjani biso nei edobiquijji eyahuasijje. Joya jjapeequi sa cuani enijje ma esecuejjani biso neijje dobiqiu majje poquije eyahuasijje. Beca cuana ca ca poqui ajja eyahuasijje, enijje jjapeequi ajja jjejojo. ²⁵ E'e, eya oe equi mese jayoija. Equi meseya esecuejjani ca'a ca'yonaje, beca cuana edobiqui cuajeje. Majoya esecuejo tii nequijeaje. Oya cuana jama po'ajja nequinaje ba'a: “Equi mese, ¡ca'apejocue ecuana edobiquijji!” Equi mese jama cuanaje ba'a: “Chojja, ecuea miqúanaya ba jjima, de”. ²⁶ Majoya oya cuana jama po'ajja nequinaje ba'a: “De, ecuanajaya miya eba, minijje ijia'ijianaje. Miyaya esohui huohuinaje ecuanaja meshijo”. ²⁷ Majoya aje oya jama cuanaje ba'a: “Chojja, ecuea miqúanaya ba jjima. ¡Poquicue quea huesha, quea mimishi nee nee mi ca cuanaje! Miqúanaya ecuea epeejji cuana pojjeamajajo, dobiqiu mee jjima aña”.

²⁸ E'e de, miqúanaya ma dejja cuana esecuejo nequi tii tii jayojja cuani. Miqúanaya dobiqúi sajo pa neineije'yo; miqúanaya quea yeno nee nee cuaje'yo. Jamaya aje nequiana esecuejo nequi cuaje ba'a: "Ecuea etiiquiana ca dobiquia cua, e'e jojo nei oya cuana Eyacuiñajija epeeji cua. Oya bajjani cua ba'a: Amajama, Isaaca, Jacobo, Eyacuiñajija esohui huohuiji nei cuana pea'ai. Jjeya Eyacuiñajiji nijje nequi. Ecuana capoqui'yahua eyahuasijje". Cho, miqúanaya poqui ajja; quea yeno nee nee cuaje'yo. Shajja'ajja sa po ajja cuanaje ecuea esohui, Eyacuiñajija esohui pea'ai. ²⁹ Ojjaña dejja joya enijje jjapeequi jjima dobiqúi ajja tii eyahuasijje. Ojjaña meshijo ba'e Eyacuiñajiji nijje jjapeequiani eyahuasijje poquije'yo. Jomajo onijje ijija'ijija je quea bihui epojji. ³⁰ E'e, jjashahuabaquicue jiquio esohuijio jama ba'a: Beca cuana jjeya ona huoojea'yojji cuani eyajo ona huoojea'yojji pojjeama cuaje'yo. Joya jjeya ona huoojea'yojji pojjeama ca ca eyajo ona huoojea'yojji nei nei cuaje'yo e jayojja —jamaya Jesosa cua.

Jesosa quea yeno cua Jenosanenajo ba'eca cuanajo
(Mateo 23.37-39)

³¹ Majoya aje Paniseo dejja cuana Jesosa que cueya cua onijje mimiya. Majoya aje oya cuana jama cua ba'a: —iPoquicuajicue oe, miya emeshi meseya, Enodeya, quecua sa acani!

³² Majoya aje Jesosaa jama aca cua ba'a: —Cho, i miqúanaya jja ca oe poquicuajicue emeshi mese yasijje, Enode yasijje; oya dejja quea mase nee nee! Jjeya jiquio pojjaqo, mecahuajje pea'ai eyaya esahua quea mase cuayaqui mee'yaña, emano cuana jaa jjaajaqui mee'yaña. Ma mecahuajje acua cuaje'yo ecuea echacojji; ¡jamaya Enode aquicue! ³³ E'e jjeya ca iña poquije'yo Jenosanena huasijje. Jomajo eya manojje'yo ma ecua Eyacuiñajija esohui huohuiji cuana mano ca'ya cua huasijjeya.

³⁴ Majoya Jesosa quea yeno nee nee cua Jenosanenajo ba'e cuanajo. Oya jama cua ba'a: —Jodio cuana Jenosanenajo ba'e, miqúanaya ecuea quea jea nee nee. Jamajjeya eya miqúanajo quea yeno cuani. E'e, miqúanaya aje oe Eyacuiñajija esohui huohuiji quecua'ya cua; ojaya ehoojea'yo cuana jajahuuejjajea'ya cua meiya pea'ai. ¡Bacue! Oe cachina enaeseya ebacua ejaahuanajji huojje cani. Jama jayojjaya eyaya miqúanaya iyaa sa neineiaña e que ejaahuanajji. Jamatii miqúanaya enijje jjapeequi sa po ajja.

³⁵ Jamajjeya eya quea yeno nee nee miqúanajo cuani. Miqúanaya Eyacuiñajiji eya pea'ai cajaa anaje. Jamajjeya ohuaya jaahuana ajja miqúanajaya cuiñajiji Jenosanena. Jamatii miqúanaya nei jaahuanaje; ba'ajja, quea camaja cuaje. Miqúanaya eya cajaa anaje, jamajjeya eba beca'yojji pojjeama mo nequianajaya. Miqúanaya eya cue o'oyajo jama aje ba'a: "Miya Eyacuiñajija huoojea'yo ojjaña jaahuanajji. Eyacuiñajiji miya cajaa huana cahua quea bame" jamaya miqúanaya cuaje quijje —jamaya Jesosa cua Jenosanenajo ba'e cuana nijje.

14

Jesosaa oe dejja eshejee tii tii nequi shacuashacua mee ca'ya cua

¹ Oe ejomishocajji pojjaqo Paniseo dejja etiiya Jesosa iyaa ca cua ijija'ijijaa. Jamajjeya Jesosa poquia cua oja equi yasijje. Pea Paniseo dejja cuana Moisesaya etehue'yo huohuiji cuana pea'ai poquia cua oja equi yasijje ijija'ijijaa. Oya cuana Jesosajo jama jjashahuaba taiquime cua ba'a: —Jesosaa pojja'a oe jjaajaqui mee caje'yo ejomishocajji pojjaqo; ba'ajja.

² Jesosa pejejo oe dejja quea mano nee, eshejee tii tii nequia cua. ³ Jesosaa oya cuana jama huohui'ajjame aca cua ba'a: —¿A'a ya che jjaajaqui mee'yome jiquio ejomishocajji pojjaqo? E'e pojja'a, chojja pojja'a. ¿A'a acuae miqúanaya jjashahuabaquiani so'o?

⁴ Oya cuana mimi jjima nequia cua Jesosa bahuejjajji nisho. Majoya aje Jesosaa ma dejja eshejee tii nequi napa ca cua emeya. Ma dejja shacuashacua mee ca'ya cua. Jesosaa oya jama huohuime aca cua ba'a: —iPoquicue miquea equi yasijje!

⁵ Majoya Jesosaa Paniseo dejja cuana jama huohuime aca cua ba'a: —Miqúanaya chacochoacoani ejomishocajji pojjaqo. Bacue miquea ebacua, ana'ai pojja'a ejomishocajji pojjaqo jjani quea doe yasijje oquequajjo, miqúanaya jjequisohuajje'yo. Jamaya miya chacochoacoani ¿a'a e'e? E'e jojo nei. Jama jayojjaya shacuashacua mee'yomeya eyaya anaje —jamaya Jesosa cua.

⁶ Paniseo dejja cuana jjashahuabaquiequi jjejojo, mimi jjima nequia cua.

E'ijja'ijijajji equi yasijje iyaa ca cua

⁷ Majoya Jesosaa Paniseo dejja cuana nijje ijija'ijijaa cueaniya ba ca cua Paniseo dejja cuana e'anijji bame bame sa'ajja cuequi. Ba majje jama huohuime aca cua ba'a: ⁸ —Oe equi meseya miqúanaya pojja'a iyaa caje ijija'ijijaa. ¡A'a e'anijji quea bame sa'ajjajji!

⁹ Equi meseja epeeji nei cueje, ca'ani'yahua ma e'anijji bame bamejo o pejejo. Jamaya miqúanaya nijje mimiye ba'a: "¡Nequisohuacue miya; poquicue pea e'anijji yasijje! Ecuea epeeji ca jiquiojo ca'ani'yahua". Quijjejjenei nequi e'anijjio anioque'yo majje quea

bicho miya cuaje ojjaña ba caje'yo jjejojo. ¹⁰ E'e de, jamajjeya miqianaya iyaa caje ijia'ijjiaa, janioqueue pea cuana nijje quijjeyejenei nequi e'anijji! Majoya ma equi mese cueje mi que pojja'a, jama huohuime acaje ba'a: "¡Miya cuecue e'anijji bame yasijje e pejejo!" Majoya pea cuaa ba caje miya anijji bamejo ani. Jamajjeya miqianaya quea bihui nee cuaje. ¹¹ Jamaya cuaje miqianaya. Eyacuiñajji eba ojjaña jama cuani. Miqianaya jama jjashahuaba taiquime cuani ba'a: "Eya che oe ese ejja quea bame nee nee cuani". Cho, Eyacuiñajji eba miya. Miqianaya jja oe jjashahuaba bamebamequicue jama ba'a: "Eya ca iña pea cuana ba'e meesahua sa cuani oya cuana quea bame epojji". Majoya aje Eyacuiñajji miqianaya quea bame ba'e meesahua caje. Majoya miqianaya dejja quea bame nee nee cuaje —jamaya Jesosa cua.

¹² Majoya Jesosaa Paniseo dejja etii jama huohuime aca cua ba'a: —Jamatii miquea bobi quea huiso anijo, miquea huapa pojjeama, miquea epeeji nei pea'ai miyaya iyaaña ijia'ijjiaa. ¹³ Jamajjeya miya ohuaya iyaa caje esosejjeya. ¡A'a jama amajamajaji! ¡Iyaacue aema' cuana, jeo'ajja cuana, poquideja cuana, cojjama' cuana iyaacue bobi ijiaa pea'ai! ¹⁴ Ohuaya nequi ana ca sa sosequia jjima miya acaje. Majoya miyaya ma jayojja ajo Eyacuiñajji miya quea bihui nee po mee caje. Quijje miya eyajo ba'eje'yo Eyacuiñajji nijje. Majoya aje Eyacuiñajji miya eyajo sosequia caje'yo quea huiso nee —jamaya aca cua Jesosaa.

Esohui huohui'yo ojee e'ijjia'ijjijajo

(Mateo 22.1-10)

¹⁵ Oe dejjaa Jesosaja esohui shajja'ajja majje Jesosa jama huohuime aca cua ba'a: —Ojjaña quea bihui cuaje eyajo ojee ijia'ijjiani Eyacuiñajji nijje oja epeeji cuana nijje pea'ai.

¹⁶ Jesosaa jama huohuime aca cua ba'a: —E'e jojo nei, ca joya eyahuasijje poquije'yo quea bihui nee cuaje. Jiquio esohui huohui'yojo ca jama jjashahuabaquime pocue ba'a: Oe emeshi meseja bobi quea huiso aninaje. Iyaa canaje dejja cuana quea huiso nee nee. ¹⁷ Bobi acua cuajo, huoojea canaje ojaya echacojji ona iyaaa. Iyaa canaje ojaya epeeji cuana. ¹⁸ Oe epeeji jama cuanaje ba'a: "De, eya poqui sa po ajja, jjeja jshenaje meshi, eya poquije ca iña meshi baa". ¹⁹ Pea epeeji jama cuanaje ba'a: "De, eya poqui sa po ajja pea'ai, eyaya jshenaje me oejje huismo ana'ai acuijo she'anayijaca. Poquije ca iña ana'ai jaahuanaa". ²⁰ Pea epeeji jama cuanaje ba'a: "De, poqui sa po ajja ca iña; oya ca iña jjeja nei jjaahuanaña". ²¹ Echacojjiya oja meshi mese yasijje cue'yo majje huohui canaje ojjaña esohui ma cue ajja cuanaje canaja. Majoya emeshi mese huohui caje quea quene nee cuanaje. Huoojea ca o'oyanaje ojaya echacojji pea iyaaa. Jama cuanaje ba'a: "¡Jjequicue jjeyahua nei pea cuana! ¡Iyaacue aema' cuana, jeo'ajja cuana, poquideja cuana, cojjama' cuana pea'ai ecuea equi yasijje bobi ijiaa". ²² Majoya echacojji poquinaje pea jjequiya. Jjequi majje echacojjiya emeshi mese jama huohuime acanaje ba'a: "Emeshi mese, eyaya pea cuana jjequinaje, e'anijji cuiñajjejo jjima cuanaje. Quea dejja huiso cue jjima, de". ²³ Jamajjeya emeshi mese jama cuanaje o'oya ba'a: "¡Poqui o'oyacue quea huesha nee nee; pea cuana ba'e yasijje iyaaquicue! ¡Cue meecue pea cuana: "Ecuea e'anijji cuiñajjejo jjima" acue! Ecuea equi cuio mee sa iña dejjaa. ²⁴ Ecue epeeji cuana ca ca eyaya ebionei iyaa'ajjanaje, jamatii enijje ijia'ijjia jjima cuani" jamaya cuanaje emeshi mese —jamaya aca cua Jesosaa. Jamaya Eyacuiñajjiya dejja cuana quea huiso nee nee iyaa'ajja cani, jamatii oe pojji poquiani onijje ijia'ijjiaa.

Quea camaja Jesosaja epeeji epojji

(Mateo 10.37-38)

²⁵ Ojjaña Jesosa equijje aca poquia cua. Majoya Jesosa jjabajaequi'ya cua. Ohuaya jama huohuime aca cua ba'a: ²⁶ —¡Miqianaya enijje jjapee neineiqui sa cuani, eya oe quea jea nee nee acue! ¡Miquea huapa pojjeama oe pojji quea jea acue! Miquea enaese, mique chii cuana, mique huanase cuana, mique bacua cuana, mique doe, mique jjo'i jama, ¡quea jea nee ameya mo oe acue! ²⁷ Miqianaya enijje jjapeequijajo pea cuana miqiana nijje mimijajje. E'e, jiquio ecua acui ecueata'apee quea camaja e'abojji jama jayojja enijje jjapeequijajo quea camaja cuaje. E'e de, pea cuaa miqianaya cuia sa acaje, quecua sa acaje pojja'a enijje jjapeepajaequi'yo ajjaajo. Miqianaya ecuea epeeji nei po tiitianijo jamajjeya e'e jojo nei miqianaya ecuea epeeji nei nei cuani. ²⁸ ¡Ejo jjashahuaba neineiquicue enijje jjapeequi jjimahua, quea camaja epo cuahuaje! Miya quea nee, quea yeno pojja'a cuaje enijje jjapeequi majje. E'e jojo nei oe dejja equi iya jjimahuajo jjashahuabaquiani ma equi e'iyajji nishojo. ²⁹ Majoya ohuaya cajaa acanaje mi iya majje. Beca cuaa niñeba canaje jama ba'a: ³⁰ "E'e de, ma dejjaa iya'ajja canaje, jjashahuaba neineiqui jjima jjejojo mi iyajjejo canaje". E'e, jamaya enijje jjapeequi jjimahuajo jjashahuaba neineiquicue ejjapee tiitiquijji enijje!

³¹ —E'e de, oe emeshi meseya pea emeshi mese nije jjaquecuaqui mee sa acanaje. Ebionei ohuaya sico canaje ojaya sohuinano cuana. Ojaya yani 10 mil sohuinano cuana, quea huiso pishana. Pea emeshi meseja ca ca sohuinano 20 mil cuanaje, quea huiso nee nee, de. Jamajjeya ma emeshi mese oe pojji pishana sohuinanojo jjaquecuaqui mee jjimahua ijashahuaba neineiquinaje. ³² Oya jama cuanaje ba'a: “De, quea camaja, ecuea oe pojji sohuinano yani”. Jamajjeya emeshi meseya pea emeshi mese yasijje oe sohuinano huohui pohua huoojea canaje jjaquecuaqui mee sa po ajjaa jjejojo. Onijje jjapeequi sa cuanaje.

³³ E'e, jamaya miquianaya jjapeequi sa cuani enijje pojja'a. ijashahuaba neineiquicue ejo jjapeequi jjimahua! Quea camaja cuaje enijje jjapeequi majje —jamaya Jesosa cua.

Ehuohui'yo sanejo

(Mateo 5.13; Macoso 9.50)

³⁴ Jesosaa pea esohui jama huohuime aca cua ba'a: —Sane quea bame nee nee. Jamatii sane sese'ama cua jjemo jeajea cajji. ³⁵ ¿Achacua jeajea cajji? Quea huesha nee nee. E'e, quea huesha jea jjima ca ca meshi quea tai sane tejjee cuaje, saneya acui tii mee jjima acaje. Jamaya miquianaya enijje jjapeequiiani, majoya jjapeepeaqueije'yo pojja'a. Miquianaya eya pajea'yo majje eyaya miquianaya jeajeaje'yo quea huesha nee nee sane jayojjaya. Jamajjeya ijashahuaba neineiquicue enijje jjapeequi jjimahua! —jamaya Jesosaa aca cua.

15

Ehuohui'yo ñajjaja epoquiquehua ba'yojjijo

(Mateo 18.10-14)

¹ Deja cuana emeshi meseja bejjo jjeshejji cuani poquia cua Jesosa que oja esohui shajja'ajjaa. Oya cuana jamatii quea mimishi nee nee cua. Pea deja cuana quea mimishi nee nee poqui pea'aya cua Jesosaja esohui shajja'ajjaa. ² Paniseo deja cuana, Moisesija etehue'yo huohuijji cuana jjaninebaqui aña cua pea cuana nije jama Jesosajo po aña cua ba'a: —De, Jesosa jjapeequiiani deja quea mimishi nee nee cuana nije, ijja'ijja ani ona nije, de.

³ Ma esohui shajja'ajja majje Jesosaa esohui ejjashabaqui meeji jama aca cua ba'a: ⁴ —Oe deja yaninaje, ojaya ñajjaja cuana quea huiso nee, 100 huisome. Oe ñajjaja poquiquehuanaje. Deja poquinaje ñajjaja sa'ajja'yohua. Pea ñajjaja 99 huisome ojee ijja'ijjaqui jea canananaje. Sa'ajja neinei ca'yoquinaje, de. ⁵ Majoya aje ba'yo majje abo ca'yonaje. Abo majje dojo ca'yonaje o nequijji yasijje, quea jaji nee nee po'yonaje. ⁶ Ñajjaja meseya ojaya epeeji jama huohuime acanaje ba'a: “Ba'yonaje eyaya ecuea oe ñajjaja, de. Jjeya nei enequi'yo, e'e de, jjeya eseya quea bihui epo'yo”.

⁷ —E'e, ñajjaja epoquiquehua oe deja quea mimishi nee nee jama jayojja cuani. Eyacuiñajji ma ñajjaja mese jayojja cuani. Jamatii Eyacuiñajjija deja mimishi cuana sa cani ojaya epeeji epojji. Ohuaya dojo sa cuani ma deja eyahuasijje. Eyacuiñajji quea bihui cuaje oe deja mimishiya ojaya mimishi pajea ca'yajo, Eyacuiñajji nije jjapeequiajo. Ojjaña eyajo ba'eca cuana quea bihui cuaje'yo ma deja mimishi Eyacuiñajji nije jjapeequiajo —jamaya Jesosa cua.

Esohui ehuohui'yo eponaa bejjo ba ca'ya cuajo

⁸ Jesosaa pea esohui jama huohuime aca cua ba'a: —Oe eponaja bejjo ome miji pea'ai aninaje. Oe bejjo oquequehuaajequinaje meshi yasijje equi yiyedojojo tiya. Jamatii sa'ajja neinei ca'yoquinaje eponaa. Cuaquijjiya bejjo jeaja'a'ajja ca'yonequinaje. Majoya aje cuiashaba'ajja ca'yonaje. Majoya aje cuiashaba'yo majje ba ca'yonaje bejjo. ⁹ Majoya aje quea bihui po'yonaje bejjo ba majje ojaya epeeji cuana huohui ca'yonaje jama ba'a: “E'e ee, eseya jjeya quea bihui epo'yo. Eyaya ba'yonaje bejjo ma oquequehuaajequi cuanaje” epona cuanaje. ¹⁰ E'e, ma bejjo oe deja jayojja cuani. Oya quea mimishi nee nee jjapeequi sa cuani Eyacuiñajji nije; ojaya mimishi pajea'yo sa cuani. Jiqui ecua epona bejjo ba majje quea bihui nee nee cuani jayojja Eyacuiñajji quea bihui cuani deja mimishi onijje jjapeequiajo. Eyacuiñajjija esohuidojoji cuana eyajo ba'e quea bihui nee nee cuaje oe deja Eyacuiñajji nije jjapeequiajo —jamaya Jesosa cua.

Esohui ehuohui'yo oja chiya oja bacua nije jjabei'qui'ya cuajo

¹¹ Pea esohui Jesosaa jama huohuime aca cua ba'a: —Oe emeshi meseja becanejjijji pea'ai ebacua eja nequinaje. ¹² Ebacua eja shacuma' nequi epohua oja chii jama huohui'ajjame acanaje ba'a: “Ecue chii, jbejjo mo quia'yocue ecuea yajji; miya mano'yo jjimahua oe mo quia'yocue!” Jamajjeya oja chii jama cuanaje ba'a: “E'e ma'aje”. Ma echahua mesejame oja iya poquia quia ca'yonaje echahua mese que. ¹³ Majoya aje quijje pishana echahua meseya ojaya aquiana, meshi pea'ai quia canaje bejjo sosejje. Ma bejjo

sosejeya poquinaje pea meshi yasijje quea huesha nee nee. Jomajo quea mimishi nee nee ba'enaje, de. Ohuaya bejjo quia jeyojeyo ca'yona je huo mamajajjiya jjejo. ¹⁴ Chama'yo tii ojaya bejjo po'yona je, quea shoe nee nee po'yona je pea'ai. Ma meshi jo bobi chama'yo tii cuanaje ejjeshejji, de. ¹⁵ Ohuaya oe dejjaja echacojji sa'ajja canaje. Oe dejjaa oya huoojea canaje cuichi nequi yasijje cuichi cuiñajji epojji. Majoya ohuaya cuichi cuiñajji canaje. Chama'yo tii ojaya bobi po'yona je, de. ¹⁶ Jamajjeya aje cuichija bobi ijjia sa cuanaje quea shoe nee nee jjejo, bobi peaja quia jjima nei nei cuanaje jjejo.

¹⁷ —Majoya aje jama jjashahuaba neinei'quiyome cuanaje ba'a: “E'e de, ecue chii ja echacojji jomajo yani, bobi quea huiso yani jomajo, de. ¿Yajajje shai eya jiquiojo quea shoe nee nee po'yo ani, de? ¹⁸ Eya capoqui'yahua ecue chii ja equi yasijje. Eyaya oya jama huohuiñajji'yome aje ba'a: —Ecue chii, eya quea mimishi cuanaje minijje, Eyacuiñajji nijje pea'ai —eyaya añajji'yo ecue chii. ¹⁹ Ecue chii enijje quea quene cuaje eya quea mimishi cuanajejo. Ohuaya eya oja bacua pojjeama jayojja acaje. Jamajjeya mo eya ojaya echacojji capo'yahua. Eya quea shoe nee nee, aema' pea'ai. Quea yeno nee nee eya cuani ecue mimishijo. E'e de, jjeja nei eya poqui'e'yo ecue chii ja equi yasijje” jamaya jjashahuabaquinaje ma ebacua eja.

²⁰ —Majoya aje poqui o'oyanaje oja chii ja equi yasijje. Majoya oja chii ja oja bacua eja ejjojijje quea huesha cueje'yo ba canaje. Jama cuanaje ba'a: “Ecue bacua eja pojja'a joma cueje'yo”. Oya majoya quea jaji nee nee po'yona je oja bacua ejjojijje cueje'yo ba majje. Majoya aje oja bacua que poquinaje; emeya cuiapashi cajjequi'yona je; shemo tojjo cajjequi'yona je quea jeajo.

²¹ —Majoya aje ebacua ejjaa oja chii jama huohuime acanaje ba'a: “Miya ecue chii nei nei, eya quea mimishi nee nee cuanaje minijje, Eyacuiñajji nijje pea'ai, de. Miyaya pojja'a eya niñebaña, jamajjeya pojja'a eya miqea echacojji capo'yahua miqea ebacua pojjeama jayojja”.

²² —Oja chii jama cuanaje ba'a: “Chojja, miya ecue ebacua eja nei, echacojji pojjeama”. Oja chii ja echacojji cuana jama huohuime acanaje ba'a: “¡Yecue ecue bacua ejjaa daqui eyacua nei nei, oe emehua pea'ai, ejjojji shejee pea'aya oe yecue! ²³ ¡Quecuacue oe ana'ai eseí esejaya ojee e'ijjiajji! Jjeja eseya ojee ijjia'ijjia je ecue bacua eja cue'yona jejo. ²⁴ Eya jjeja quea bihui ecue bacua ejjajo; oya emano'yo jayojja cuanaje, chama'yo tii, jjeja ca cue'yona je ecue bacua eja, eshe de. Oya ca ca ecuaquisho'yo cuanaje, jiquio pojja'o ca eyaya ba'yona je ecue bacua eja”. Majoya aje bobi acua amajje ojjaña ijjia'ijjiana je.

²⁵ —Edoe mese chacochocho aninaje quejo; oja ba jjima echahua mese cue'yona je. Quijje oya cue'yona je oja equi yasijje. Shajja'ajja caña'yona je quea shajjaquijjo cuani ojjaña ijjia'ijjiani ojee. ²⁶ Ohuaya oe esho'i huohui'ajja canaje: “¿A'ya acua po ca ani so'o?” ²⁷ Jama esho'ia acanaje ba'a: “Mique chahua cue'yona je quea aja nee nee, de. Mique chii quea bihui po'yona je, de. Jamajjeya ojjaña ijjia'ijjia mee cani ojee quea bihui'yohua jjejo”.

²⁸ —Majoya aje oja doe quea quene nee nee cuanaje, pea cuana nijje ijjia'ijjia sa po ajja cuanaje. Majoya oja chii cuayaquinaje edoe mese jjequidobiaa nisho. Dobiqii ajja cuanaje oja bacua eja equenequene neinei'yo jjejo. ²⁹ Majoya edoe mese oja chii nijje miminaje: “Eya chacochocho nei'yona je ee nei, de. Quea shequaja huiso nee nee. Eya mimishi'ama nei cuanaje minijje; jamatii eyaya miqea esohui shajja'ajjanaje, de. Miyaya che ecue chivo sho'i cuia jjima anaje ecue epeejji nijje ojee e'ijjiajji. Miquea quea nahue cuanaje ejo, de. ³⁰ Mique bacua eja sho'i shajjama' cue'yajo ca jja ya ca oe che ana'ai quecuayona je. Oya quea mimishi nee nee cuanaje; pea epona cuana nijje jjacojjojeaqui nequi'yona je miqea bejjo soseje, de” jama cuanaje edoe mese.

³¹ —Majoya oja chii jama cuanaje ba'a: “Miya ecue bacua eja quea bame nee, miya eyaya jaahuana neineaña. Ojjaña aquiana ecue, miqea epo'yojji. ³² Mique chahua cue'yajo ecuanaya quea bihui po'yona je. Oya ca ca emano'yo jayojja cuanaje. Oya cue'yona je jjeja, eshe de. Oya ecuaquisho'yo jayojja cuanaje; jjeja nei ca ca eyaya oya ba'yona je” jamaya oja chii ja oja bacua eja etii acanaje. E'e de, mahuiso —jamaya Jesosa cua. Jamaya Eyacuiñajjiya quea jea ameya acaje dejja mimishi cuaa oja mimishi pajea ca'yajo, onijje jjapeequaja pea'ai.

16

Esohui huohui'yo echacomeejji jjadasiaquia cuaje

¹ Jesosa o shajja'ajjaji cuana jama huohuime aca cua ba'a: —Oe emeshi mese quea bejjo huiso nee aninaje. Ohuaya shajja'ajja canaje ojaya echacomeejjiya sii cani ojaya aquiana. ² Jamajjeya huohui'ajja canaje ojaya echacomeejji jama ba'a: “Pea cuaa eya huohui canaje

miya siipojji cuani. ¿A'a cuae jja miya siipojji nei so'o? ¡Huohui po'ajja socue! Jamajjeya miya ecuea echacomeeji nei pojjeama. ¡Yecue ma papenijo etehue'yo jaa ebajjani cuana!

³—Majoya aje echacomeeji jashahuabaquinaje jama ba'a: “De, chama'yo tii ca ecua echacoji cuaje'yo, ecuea emeshi meseya eya cajaa aca'yonaje, de. Eya jjeja quea aa mano echacochacoji, de. Eya ca iña eme huo sa po ajja quea bicho jjejo. ⁴E'e de, jjeja nei ca iña jashahuabaquinaje pea deja cuanaja sosequia'yo jjimajo. Eyaya oe pojji sosejsheshe'yo. Majoya eya ecuea emeshi meseya huoojea cajo pea cuaa ba'e meesahua caje, enijje quea bihui cuaje. E'e de, eyaya tehueje o'oya ojjaña echacoji cuanaja emeshi mese sosequia jjima; oe pojji aje'yo” jamaya echacomeeji jashahuabaquinaje. ⁵Jamajjeya ohuaya pea deja cuana iyaa canaje emimijji, ache huiso onajaya sosequia'yo jjima ebajji. Ohuaya jama huohui'ajjame acanaje ba'a: ¿Ache sose huiso acuae miquea sosequia'yo jjima so'o? ⁶Oe dejjaa jama saja'ame acanaje ba'a: “Ecuea sosequia'yo jjima mahuiso ba'a: ecuea ese 100 natame, quea huiso nee nee eyaya jshenaje, de”. Majoya echacomeeji jama cuanaje ba'a: “E'e de, e'e jojo nei miquea papeni yani ecue tehue. Jjeja ca ca miquea sosequia'yo jjima nequi 50 natame, jamaya eyaya tehueje o'oya pea papenijo oe pojji esosequia'yoji”. ⁷Majoya ohuaya pea deja acanaje jama ba'a: “¿Ache huiso acuae miquea sosequia'yo jjima so'o?” Oya jama cuanaje ba'a: “Quea huiso nee nee, 100 natame anoso ai, de”. Echacomeeji jama cuanaje ba'a: “E'e de, jjeja ca ca papenijo tehueje o'oya 80 natame esosequia'yoji” jamaya cuanaje echacomeeji deja cuana nijje, onijje quea bei epojji.

⁸—E'e de, quijje pishana emeshi meseya ojaya echacomeeji ae po ani shai ba canaje. Ba majje jama cuanaje ba'a: “E'e de, ohuaya eya dasia canaje. Jamatii oya jashahuaba neineiqui'yonaje. Oya quea epeeji huiso nee nee po sa cuanaje o ba'e meesahua jjeji”. Mahuisoya jiquio esohui —Jesosa cua—. ⁹¡Miquianaya ca ca jashahuaba neineiquicue quea bame epojji pea cuana nijje! Jamajjeya miya Eyacuiñajjiya ba'e meesahua caje. Majoya miquianaya mano'yajo, ohuaya dobiqúi mee caje'yo eyahuasijje eba'e tiitii'yoji.

¹⁰—Miquianaaya jjeja oe pojji aquiana jaahuana neineña, miquianaaya quea bame po majje quijje eyajo miquianaaya quea huiso jaahuana neineñe'yo. Miquianaaya oe pojji jadasiaquiani quijje miquianaaya jadasiaquijji nei nei cuaje. ¹¹Miquianaaya oe pojji aquiana jiquiojo jaahuana jjima ña, Eyacuiñajjiya miquianaaya aquiana quia jjima acaje'yo eyajo. ¹²E'e de, miquianaaya pea cuanaja aquiana jaahuana jjima ñajo Eyacuiñajjiya miquianaaya aquiana quia jjima acaje'yo eyajo —jamaya Jesosa cua.

¹³—E'e de, ¡miquianaaya jja ca oe Eyacuiñajji jashahuaba majamajajji! ¡Oe nei neijo oe jashahuabaquicue, aquianajo pojjeama! Jamaya oe Eyacuiñajji nijje japeequi sa cuanajo, ¡a'a aquianajo jashahuabaquicue, majamajajji! —jamaya cua Jesosa.

¹⁴Paniseo deja cuana ma esohui shajja'ajja majje mimijajja cua Jesosa nijje bejjo quea huiso sa cuanajo. ¹⁵Jamajjeya aje Jesosaa jama tecueame aca cua ba'a: —Miquianaaya jashahuaba taiquiani miquianaaya oe dejjaya quea bame ba'yani poso cuani. Dejjja cuaa ca ca oe miquianaaya quea bame poso acani. Miquianaaya deja cuana dasiaña. Miquianaaya ca ca oe Eyacuiñajji dasia jjima ña, ojaya miquianaaya eba nei nei, de. Miquianaaya jama cuani boti'ama. E'e, joya miquianaaya quea bame poso ña Eyacuiñajji boti'ama —jamaya Jesosa cua.

Eyacuiñajji esohui ma ani tiitii'yome cuaje

¹⁶—Yahuajo nei nei Eyacuiñajji esohui huohuiji cuaa huohui ca cua Moisesija etehue'yojo. Jama cua ba'a: “Quijje Eyacuiñajji huoojea'yo ojjaña jaahuanaajji Emeshi Mese oe nei cueje”. Jjeja nei ca ca Huaniya enajo ona besameeji cuanaje huohui canaje Eyacuiñajji pea esohui jama ba'a: “Quito ojjaña Emeshi Mese cueje jjeja nei”. Jamajjeya quea huiso nee nee deja cuana japeequi sa cuani Eyacuiñajji nijje. ¹⁷Jamatii Eyacuiñajji esohui e'e jojo nei cuani, quea bame cuani. Quijje ojjaña meshi cuana majameta cuana chama'yo tii cuaje, de. Eyacuiñajji esohui ca ca ma ani tiitii'yome cuaje —jamaya Jesosa cua.

Esohui ejjahueiquijji

(Mateo 19.1-12; Macoso 10.1-12)

¹⁸Jesosaa esohui jama huohuime aca cua ba'a: —Oe dejjaya ehuanase huei cuani pea ehua'yoji jamaya pea cojjoji cuani. Oe deja oe epona ehuei huana'yo majje pea cojjoji cuani pea'ai. Epona yahue hueijji cuani pea cojjoji pea'ai cuani. Jamajjeya deja cuaa ¡a'a ehuanase hueijji, eponaa pea'ai a'a miquea yahue hueijji! —jamaya Jesosa cua.

Huohui'yo oe deja quea aquiana huiso nee neejo Nasanojo pea'ai

¹⁹Jesosaa pea esohui jama huohuime aca cua ba'a: —Oe deja quea bejjo huiso nee nee cuanaje. Ojaya daqui quea bame nee; quea nahue nee nee oja jjeshe huosho caninaje. Bobi quea huiso aninaje ojaya equijo; ijja'ijjia majamajanaje. ²⁰Pea deja ca aema' cuanaje

Nasano bajjani. Oya chiji nei nei po'yonaje; oya quea mano cuanaje. Jamatii Nasano dejja quea bejjo huisoja esecuejjani pejejo aniñaquinequinaje. ²¹ Jamatii ojaya chiji inahuehuua sio canaje. Oya jama po'ajja aninaje ba'a: "¡Chemo bobi quiacue joya miquea ijia shaa ani!" jamaya Nasano po'ajja aninaje. ²² Nasano Eyacuiñajjija epeeji cuanaje, jamajjeya mano'yo majje Eyacuiñajji ani yasijje poqui'yonaje. Nasano ani'yonaje Amajama pejejo, Jodioja etiiquiana pejejo. Majoya aje ma dejja quea aquiana huiso mano'yonaje pea'ai. Ohuajea canaje cuaa. ²³ Oya Eyacuiñajjija epeeji pojjeama, jamajjeya emano'yo ojjaña eshahuaja epeeji cuana poqui caquijje poquinaje cuaqui yasijje. Jomajo oya quea nee nee po'yoqui. Jomajo ohuaya Nasano, Amajama pea'ai ba canaje eyajo quea huesha nee nee. ²⁴ Oya jama taaame cuanaje ba'a: "Amajama ecuea etiiquiana, ¡che oe ejo jashahuabaquicue! Eya quea quiyo nee nee po'yoqui jiquiojo, de. ¡Che jjo yana chopeshihuacue! ¡Huojeacue Nasano ecue yana chopeshiya eya quea naba taja nee nee acue!" jamaya ma dejja quea aquiana huiso cuaquijo nequi cuanaje Amajama nijje. Nasano ca oe poqui jjima cuanaje.

²⁵ —Amajamaa eyajo jama huohuime acanaje ba'a: "De, miyaya pajea'yonaje pojja'a. Miya esheahua quea aquiana huiso ba'enaje meshijo. Jamatii Eyacuiñajji nijje jjapeequi jjima cuanaje. Nasano ca ca aema' quea mano po'yonaje pea'ai. Oya ca ca Eyacuiñajjija epeeji cuanaje. Jamajjeya Eyacuiñajjija oya quea jaji nee nequi mee ca'yani. Miya ca mi ca oe quea yeno nequi'yo, quea quiyo nequi'yo. ²⁶ Eyacuiñajjija miya cue mee jjima acani ecua nequi yasijje ojaya epeeji pojjeama cuanajejo. Ecua mi que poqui mee jjima acani pea'ai" jamaya cuanaje Amajama.

²⁷ —Ma dejjaya cuaqui dojjojo nequi jama taaame po nequinaje ba'a: "¡Che jjo oe ecue huapa pojjeama meshijo ba'e jashahuabaqui meecue Eyacuiñajjijo! ¡Huojeacue Nasano ecue chijja equi yasijje huohuiya! ²⁸ ¡Ecue chahua me oeje huiso tiiya jashahuabaqui meecue Eyacuiñajjijo acue! Eyacuiñajji nijje cajjapeequiahua cuaqui yasijje mi cueje'yo acue".

²⁹ —Majoya aje Amajama jama huohuime aca o'oyanaje ba'a: "Yani aje jja ca Eyacuiñajjija esohui etehue'yo, Moisesiya tehue ca cua yahuajo nei nei. Pea cuaa tehue ca cua pea'ai yahuajo nei nei, de. Ma esohui oya cuaa cashajja'ajja cahua. Esohui shajja'ajja majje poqui'yo ajja cuaqui yasijje, mi jayojja epo'yojji pojjeama" jamaya cuanaje Amajama.

³⁰ —Majoya aje ma dejja cuaquijo nequi jama cua ba'a: "Chojja de, oya cuana jjashajja'ajjaqui ajja. Ma esohui etehue'yojo jjashahuabaqui ajja. ¡Huojeacue oe emano'yojaa shequi o'oya esohui huohuiya! Majoya quea bame cuaje, de. Onaaya emano'yojaa shequi o'oyajo ba majje jjashahuaba neinei quije Eyacuiñajjija esohuijo. Jjapeequije'yo Eyacuiñajji nijje, de" cuanaje ma dejja cuaquijo nequi.

³¹ —Majoya aje Amajama jama cuanaje ba'a: "Chojja de, jjashajja'ajjaqui ajja Moisesija etehue'yojo, Eyacuiñajjija esohuijo, jamaya ohuaya shajja'ajja jjima acaje emano'yojaa shequi o'oya ca Eyacuiñajjija epeeji epojji. Chojja, eyaya oya emano'yojaa huoojea'yojji pojjeama esohui huohuiya" jamaya cuanaje Amajama eyajo nequi. E'e de, mahuiso — jamaya Jesosa cua.

17

Quea mimishi mi po o'oya chana'
(Mateo 18.6-7, 21-22; Macoso 9.42)

¹ Jesosaa o shajja'ajjaji cuana jama huohuime aca cua ba'a: —Jamatii pea cuaa ecuea epeeji eyacua quea mimishi po mee o'oya sa acani. Jamaya o cuajo Eyacuiñajji quea quene nee nee cuaje onijje. Ohuaya oya ¡eajea caje'yo cuaqui yasijje, de. ² Jamajjeya ¡ecuea epeeji quea mimishi epo mee cuahuajje oe mano'yocue! E'e, ¡onaaya mei enaajo yiipeca mee majje bae quea doe yasijje jjaeaoquejea meequi'yocue! Jamajjeya ¡a'a quea mimishi po mee'yojji cuana!

³ —E'e de, coya mi quea mimishi po o'oya chana'. Miquea epeeji quea mimishi po o'oyajo, ca oe jama huohuime acue ba'a: "Miya quea mimishi cuanaje. ¡A'a quea mimishi po o'oyajji!" Majoya oya pojja'a jama cuaje ba'a: "E'e de, eya quea mimishi cuanaje, ¡jeya ca ca eya quea mimishi epo'yojji pojjeama minijje". Jamajjeya ¡miquianaaya ma mimishijo a'a jjashahuaba majamajquijji! ¡jjapeequi o'oyacue onijje! ⁴ E'e pojja'a ca ca oya mimijaji majamajaje minijje, majoya oya quea yeno nee nee cuaje ojaya mimishijo. Jamajjeya ¡jamatii miquianaya oja mimishijo a'a jjashahuaba majamajquijji! ¡jjabeiqui o'oyacue onijje! —jamaya Jesosa cua.

Jesosaa o shajja'ajjaji cuana jjabahuejjaqui mee ca cua

⁵ O shajja'ajjaji cuaa Jesosa jama huohuime aca cua ba'a: —¡Ecuanaaya jjabahuejjaqui mee neineicue mijo e'e jojo nei ejashahuabaquijji, mi jayojja eba'ejji!

⁶ Jesosa jama cua ba'a: —De, miqúanajaya eya eba, eya miquea epeeji nei cuani. Eyaya miqúanaya jjabahuejjaqui meenaje yahuaajo. Miqúanaya pojja'a ca mi ca oe jashajja'ajjaqui pishananaje. Miqúanaya ejo e'e jojo nei jshahuabaqui pishana majje Eyacuiñajjiya miqúanaya amee caje'yo ojjaña eyaya aña jayojja jama, ma dejja ajiima acani amee caje'yo pea'ai. E'e, miqúanaya acui jama yajjemo ba'a: ¡Acui, nequisohuacue; ena huasijje poquicue! Majoya acui nequisohua majje ena huasijje poqui'yome. Jamajjeya ¡miqúanaya ejo e'e jojo nei jshahuabaquicue! —jamaya Jesosa cua.

Oe echacoji emeshi meshija esohuijo cjjashajja'ajjaquiahua

⁷⁻⁸ Jesosaa pea esohui jama huohuime aca cua ba'a: —Oe echacoji chacojeyo majje cue'yonaje oja emeshi meseja equi yasijje. Jamatii hueahueanaje, oya ijja'ijjia sa cuanaje, jomishoca'yo sa cuanaje. Oya jomishoca'yo jjima cuanaje; ijja'ijjia jjima pea'ai cuanaje. Ma emeshi meseya oya jama huohuime acanaje ba'a: “¡Besaquicue, pea daqui huoshocue, ecuea bobi cuacuacue! ¡Majoya ecuea bobi yecue! ¡Eya ijja'ijjia jayojja majoya miquea ya'yojjiya cuacua'yocue!” ⁹ ¿A'a ma emeshi meseja oja echacoji huohui caje oya quea bame cuanaje? Chojja, ma echacojiya jamatii shajja'ajja cani emeshi meseja esohui. ¹⁰ Jamaya miqúanaya Eyacuiñajjiya esohui shajja'ajja majje ¡a'a miqúanaya quea bame cuani poso jjabaquijji! ¡A'a jamaya jshahuabaquijji nequiana! ¡Jamatii miqúanaya jshajja'ajjaquicue oja esohuijo, ma echacojiya jamatii shajja'ajja canequinaje, emeshi meseja esohui jayojja jama acanaje! —jamaya Jesosa cua.

Jesosaa jjajaequi mee ca'ya cua ome miji pea'ai dejja batata epo'yo

¹¹ Majoya Jesosaa Jenosanena huasijje poquijeya Janinea meshi yejje ca cua. Samania meshi sahuajje jjajejequia cua. ¹² Majoya aje oe cuiñajji yasijje Jesosa dobiqúi jjimahuajo, dejja batata epo'yo ome miji pea'ai mimi sa cua Jesosa nijje. Jamatii nequinaje quea cuiñajji huesha pishana onaja jeajea batata epo'yojojo. Jamajjeya oya cuana nequia cua quea huesha. ¹³ Onaaya Jesosa jama taamea aca cua ba'a: —Jesosa, miya ecuanaja Emeshi Mese, jecuanaya che batata epo'yo jjajaequi mee'yocue!

¹⁴ Jesosaa oya cuana bajea majje jama huohuime aca cua ba'a: —Eyaya miqúanaya jjajaequi mee'yo, ¡poquicue Eyacuiñajjiya equi yasijje! Jama huohuime acue esohui huohuiji ba'a: “De, bacue, yahuaajo pishana ecuanaja batata epo'yo cua, jjeya ca ecuanaja quea yami bame nee nee'yo”.

Majoya aje Jesosaa oya cuana jjajaequi mee ca'ya cua. Majoya aje oya cuana poquijeya jjayamibamequi'ya cua, quea bihui nee nee cua. ¹⁵ Oe dejja ca ca jshahuabaquia cua Jesosa bihuijji ojaya eyami ejjajaequi mee'yojojo. Majoya aje quea bihui po'yo majje jjanojjaquia cua; Jesosa que cue o'oya cua. Jjanobajjima nei Eyacuiñajji bihuia ca cua. ¹⁶ Ecu'oshajjajo nequia cua Jesosa cojja nei; oya jama cua ba'a: —E'de, Jesosa, miyaya eya jjajaequi mee'yonaje, eya quea yami bame po mee'yonaje. Miya quea sohui poja nee nee —jamaya ma batata epo'yo cua. Oya Samania dejja cua, Samania meshijo ba'e, Jodio dejja pojjeama.

¹⁷ Majoya aje Jesosaa ona nijje nequi jama huohuime aca cua ba'a: —¿A'a cuae ome miji pea'ai jjajaequi mee'yonaje? ¿Aecue beca cuana so'o? Oe nei ca ca oe cue'yonaje e bihuiaa, Eyacuiñajji bihuiaa pea'ai. ¹⁸ Ma dejja Jodio dejja pojjeama, Samania meshijo ba'e; beshahua nei Eyacuiñajji ojaya ba jjima. Jodio dejja cuana Eyacuiñajji epeeji nisho. Oya cuana quea yami bame nee po'yo sa cuanaje Eyacuiñajji bihuijji pojjeama.

¹⁹ Majoya Jesosaa ma dejja jama aca cua ba'a: —¡Nequisohuacue; poquicue! Miyaya eya quea yami bame epo'yojji huohui'ajjanaje. Miya ejo e'e jojo nei jshahuabaquinaje ecuea ejjajaequi mee'yojji. Jamajjeya eyaya miya jjajaequi mee'yonaje. E'e jojo nei miya jjapeequinaje Eyacuiñajji nijje.

Achajja Jesosa Emeshi Mese nei epojji cueje

(Mateo 24.23-28, 36-41)

²⁰ Paniseo dejja cuaa Jesosa jama huohui'ajjame aca cua ba'a: —¿Ache shono Eyacuiñajji huoojea'yo ecuea Emeshi Mese nei epojji cueje? ¿A'a ohuaya ojjaña emeshi mese cuana jeajea caje'yo?

Jesosaa jama cua ba'a: —Chojja, ma jayojja pojjeama, de. Ojaya emeshi mese cuana ejeabichajjaji pojjeama. ²¹ Pea cuana pojja'a jama mimime cuaje ba'a: “Eyacuiñajji huoojea'yo cueyanaje pea meshi yasijje”. Sijaje ca cuani, Eyacuiñajji huoojea'yo yani jjeyahua nei, jaahuana cani ojaya epeeji cuana ojjaña Eyacuiñajji nijje jjapeequiajo. Oya Emeshi Mese cuani, de.

²²⁻²⁵ Majoya Jesosa o shajja'ajjaji cuana nijje jama mimime cua ba'a: —Ecuea epeeji nei, jjeya Jodio dejja cuaa eya quecua sa acani. Majoya aje eyahuasijje eya poquijeya'yo. Jiquio tii eya miqúanaya nijje nequi ajja. Miqúanaya ca ca eya nequi mee sa aje'yo minijje. Cho,

nequi ajja. Beca cuaa miquianaya jama acaje ba'a: "Cue'yonaje aje Jesosa jiquiacua". Pea ca jama cuaje ba'a: "Jesosa yani jomajo". ¡A'a eya sa'ajjaji onaa siaje acaje! Eya jocuama poqui jjima. E cue o'oyajo pojjeje jayojja cuaje, jeaja'ajeaje ojjaña meshi cuana. Majoya aje ojjaña meshijo ba'e cuaa eya ba neinei caje'yo. Eya meshi yasijje cueje o'oya ojjaña Doe Mese epoiji. ²⁶⁻²⁷ Yahuajo Noe ba'ya cua. Oya dobiqui jjimahuajo bishe ai yasijje, pea deja cue mimishi nee nee cua, jjashajja'ajjaqui sa po ajja Eyacuiñajjiya esohuijo. Jamatii oya cuana ijjiia'ijjiia ania cua; ishi'ishi nequia cua; jjahuanaqui nequia cua. Majoya aje Noe dobiquia cua bishe ai yasijje. Ma deja cuana ca ca jamatii jjashahuabaqui sa po ajja Eyacuiñajjiyo. Oya cuana jama jjashahuabaquime pojea'ajja aña cua ba'a: "Eyacuiñajjiya eseya hui'i mee'yo jjima acaje". Cho, majoya aje Eyacuiñajjiya ena quea quemu huoojea ca'ya cua; hui'i mee ca'ya cua ojjaña deja cuana, de. Ma jayojjaya e cueyajo, deja cuana jama cuaje. Quea mimishi tii tii po nequije.

²⁸ —E'e de, jamaya yahuajo Noti ba'ya cua tii. Deja cuana quea mimishi nee nee cua. Jamatii ijjiia'ijjiia ania cua, ishi'ishi nequia cua, jjeshejjeshe nequia cuanaya cua, quiaquia nequia cuanaya cua, banabana nequia cuanaya cua, equi iya cuanaya po nequia cua. E'e de, Eyacuiñajjiyo jjashahuabaqui sa po ajja nei nei cua. ²⁹ Ma pojjaajo Noti Sonoma cuiñajjiyo ba'e cuayaquajajo Eyacuiñajjiya ena cuani jayojja cuaqui oque mee ca cua Sonomajo. Ojjaña quiyoyejojeyo'ya cua; chama'yo tii cuanaje.

³⁰ —Jamaya ojjaña cuana Eyacuiñajjiyo jjashahuabaqui jjima anijo, eya cueje o'oya. ³¹ Jamajjeya miquianaya pojjaja' quejo chacochoqui e cue o'oyanijo, ¡a'a miquianajaya equi yasijje poquiji aquiana jjequi'yohua! ¡A'a jjashahuabaquiji miquianajaya aquiana cuanajo! ³² ¡A'a pajea'yoyji Notija ehuana oja aquianajo jjashahuabaquia cua! Jamajjeya oya sane pojji po mee ca'ya cua Eyacuiñajjiya ojaya aquianajo jjashahuabaquiqui jojoya. Chama'yo tii oya po'ya cua. ³³ Jamaya miquianajaya aquianajo jjashahuabaqui majamaja anijo miquianaya Eyacuiñajjiyo jjashahuabaqui jjima cuaje, de. Jamajjeya miquianaya chama'yo tii cuaje'yo. E'e de, miquianaya ca ca jjashahuabaqui majamaja ani Eyacuiñajjiyo ojaya epeejji cuaje; ba'e tiitiije'yo onijje.

³⁴ —E cue o'oyajo becanejjijji pea'ai cahuijaa, oe dojosohuaqui caje'yo, pea ca jeajea canaje'yo. ³⁵ Beca epona quecuapasha cuequi oe dojosohuaqui caje'yo, pea jeajea canaje'yo. ³⁶ Beca deja quejo chacocho nequi oe dojosohuaqui caje'yo, pea ca jeajea canaje'yo Eyacuiñajjiya esohuidojojjiya —jamaya Jesosa cua.

³⁷ Jesosa o shajja'ajjajjiya jama huohui'ajjame aca cua ba'a: —¿Achacua acuae maya cuaje so'o, Jesosa?

Jesosa jama cua ba'a: —Miquianaya eya baje joya ecua be'o e'ihui yasijje oqueani jama —jamaya Jesosa cua.

18

Jesosaja esohui ehuohui'yo oe epona e'ahuemanojo

¹ Jesosaa o shajja'ajjajji cuana huohui ca cua emimi majamajajji Eyacuiñajji nijje. Ohuaya jama huohuime aca cua ba'a: ² —Oe cuiñajjiyo oe sohuinano aninaje. Oya jjapeequi sa po ajja pea deja nijje, Eyacuiñajji nijje pea'ai. ³ Oya cuiñajjiyo tiia o'e'ahuemano aninaje. Ma e'ahuemanoja aquiana peaa sii ca'yonaje. Jamajjeya oya poqui majamajanaje sohuinano huasijje. Jamajjeya ohuaya jama huohui'ajjame acanaje ba'a: "¡Che iña yohua sahuacue ma aquiana onaa sii ca'yonajejo!" Poqui majamajanaje sohuinano huasijje huohui'ajjaa. ⁴ Jamatii sohuinanoja saja'a jjima acanaje, de. E'ahuemano pajeapajea'yo ajja nei nei cuanaje huohui epo tiitiinequiji jjejojo. Sohuinano jama jjashahuabaquime cuanaje ba'a: "E'e de, ma e'ahuemano pajeapajea'yo ajja nei nei, cue majamajani ca coma. Ojaya esohui shajja'ajja sa po ajja nei nei ca iña. ⁵ Eyaya aje ca oya yohua sahuajeya ma ca oe oya cue'yo jjima tii epoiji". ⁶ Jamajojya aje oe yohua sahua canaje —jamaya Jesosa cua.

—Sohuinano yohua sahua sa po ajja cuanaje. Jamatii ohua huohui'ajja majamaja cajje, ohuaya epona yohua sahua canaje. ⁷ E'e de, Eyacuiñajjiya sohuinano jayojja pojjeama. Jamatii oya shajja'ajja sa cuani miquianajaya emimi. Majoya ohuaya miquianaya yohua sahua bamebame caje. Miquianaya ojjaña pojjaajo mimi tiitiianijo, ohuaya miya shajja'ajja caje'yo. ⁸ Ohuaya miya yohua sahua caje'yo. E'e jojo nei ecuea esohui. Jamatii e cue o'oyajo, ¿ae cuaje deja cuana? ¿A'a oya cuana mimi majamaja nequije Eyacuiñajji nijje? E'e pojja'a. ¿A'a jjapeequi tiitiinequije Eyacuiñajji nijje? E'e pojja'a, ba'ajja —jamaya Jesosa cua.

Ehuohui'yo beca dejjaajo oe quea bame pea bame'ama cuani

⁹ Jesosaa pea deja cuana huohui ca cua ejjabahuajjaqui meejjiyo. Ma deja cuana jjashahuaba taiquia cua jama ba'a: —Ecuana ca quea bame nee cuani, beca cuana ca ca bame'ama ba'yani.

Jamajjeya ma dejja cuana Jesosaa jama huohuime aca cua ba'a: ¹⁰—Yaninaje beca dejja. Oe dejja Moisesija etehue'yo huohuiji nisho cua, oya Paniseo dejja cuanaje. Pea dejja emeshi meseja bejjo chichajji cuanaje. Oya cuana poquinaje Eyacuiñajji equi yasijje bihuiāa, mimiya Eyacuiñajji nijje. ¹¹ Paniseo dejja dobiqni majje nequiñaquinaje ojjañaja ebajji. Oya jjabajeasohuaqui majje Eyacuiñajji nijje mimi nishonaje ojjañaja eshajja'ajajaji jama ba'a: "E'e de, yani pea jiquiyo, eya quea bame nee nee cuani. Eya mimishi'ama nei, siipojji pojjeama, eya pea cojjojji pojjeama, beca cuana ca quea mimishi nee cuani. ¹² E'e de, eya miquea esohui shajja'ajja majje quea bame cuani; miquea esohui jayojja ba'vani. Ecuea 10 bejjo yanijo, eyaya mi yasijje oe quiaña. Jamatii eyaya aña; quea bejjo huiso nee nee eyaya quiaña mi yasijje, Eyacuiñajji. Eya ma dejja bejjo chichajji jomajo nequi jayojja pojjeama, eya ca mimishi'ama nei, oya ca ca quea mimishi nee nee, de. E'e de, mahuiso Eyacuiñajji ecuea esohui" jama mimi nisho nequinaje onaja ebajji Paniseo dejja.

¹³—Majoya ca ma dejja bejjo chichajji cuani jashahuabaqui majje miminaje Eyacuiñajji nijje. Oya quea yeno cuanaje ojaya mimishijo. Ohuaya Eyacuiñajji mimishi cuana cuijea mee'yo sa acanaje. Jamajjeya jama mimime cuanaje ba'a: "E'e de Eyacuiñajji, eya yani, eya quea mimishi nee nee cuanaje. Jjeya eya quea mimishi po maja sa po'yo ajja. ijapeequi sa cuani minijje, jamajjeya cuijea'yocue ecuea mimishi cuana! E'e de, mahuiso ecuea esohui, Eyacuiñajji, acua" jamaya cuanaje ma dejja.

—Eyacuiñajji nijje mimijeyo majje Paniseo dejja, bejjo chichajji cuani pea'ai poquinaje. ¹⁴ Paniseo dejjaja mimishi cuana cuijea'yo jjima cuanaje quea bame nisho ba'ejajajo. Eyacuiñajjiya bejjo chichajji cuanija mimishi cuijea ca'yonaje, o quea mimishi po maja sa po ajajajo. E'e de, miqianaya Paniseo dejja jayojja po chana. ¡Miqianaya ca oe pea dejja jayojjaya pocue! Majoya aje mi jjapee tiitiquije'yo Eyacuiñajji nijje —jamaya Jesosa cua.

Esohui Jesosaa esho'iquiana ohua quea jea nee nee aca cuajo
(Mateo 19.13-15; Macoso 10.13-16)

¹⁵ Dejja cuaa esho'i cuana dojo ca cua Jesosa que. Jama huohuime aca cua ba'a: —Jesosa, ¡miyaya ecuanajaya ebacua cuana napacue emeya! ¡Miyaya Eyacuiñajji huohucue ecuanaja bacua jaahuanajji! —jamaya cua ejejaji cuana, enaese cuana pea'ai.

Jesosa shajja'ajajaji cuana quea quene cuanaje ma dejja cuana nijje. Jama cua ba'a: —¡A'a ye majamajaji miqianaja bacua Jesosa que! —jamaya cua o shajja'ajajaji cuana.

¹⁶ Jesosaa ca ejejaji cuana enaese cuana pea'ai jama huohuime aca cua ba'a: —¡Yacua oe miqianajaya bacua cuana yecue! Eyacuiñajji quea jea nee nee ebacua cuana, ecuea pea'ai. Oya cuana quea bame cuani, ojaya epeeji nei cuani. Jamajjeya jebacua cuana a'a poqui meeji! ¡Ebacua cuana e que cacue'yahua, de! ¹⁷ ¡Miqianaya Eyacuiñajji jashahuaba cuajiquie jiquio ecua esho'iquiana cuani jama! Jamajje e que poquije'yo eya eyajo ojjaña huoojea'yojji cuaje —jamaya Jesosa cua.

Oe dejja quea aquiana huiso Jesosa nijje mimia cua
(Mateo 19.16-30; Macoso 10.17-31)

¹⁸ Pea pojajajo oe dejja quea aquiana huiso poquia cua Jesosa huohui'ajjaa. Oya jama cua ba'a: —Jesosa, miya quea bame cuani, ¿achajja acuae po cajji Eyacuiñajji nijje eba'e tiitii'yojji so'o?

¹⁹ Jesosa jama cua ba'a: —¿Yajjajo acuae moya quea bame aña so'o? Oe neiya ca jja ca oe Eyacuiñajji quea bame nee cuani. ²⁰ Miquea eba ojaya esohui. Jamajjeya miya ba'e tii tii sa cuani onijje, jama shajja'ajjame ojaya esohui acue ba'a:

¡A'a pea cojjojji pojji!

¡A'a dejja quecuajji!

¡A'a sii pojji; a'a sijaje pojji!

¡Miquea chii, miquea enaese pea'ai shajja'ajjacue!

—jamaya Jesosa cua.

²¹ Ma dejja quea aquiana huiso jama cua ba'a: —E'e de, jamaya eyaya anaje esho'yahuaa, jama tii tii sohuaqui ca ca iña. Eya oe dejja quea bame nee, de.

²² Jesosaa ojaya esohui shajja'ajja majje jama huohuime aca cua ba'a: —A'yo sahua oe pea yohua'ajja jjima so'o. ¡ojjaña miquea aquiana cuana quia jeyojeyo'yocue! ¡Aquiana quiajeyo'yo majje miquea aquiana sosejje jshenaje bejjo quiacue joya aema' cuana huasijje! Majoya miya Eyacuiñajji nijje jshahuaba neineiquije, ohuaya miya ba'e tiitii mee cajeyo'yo eyajo. Miyaya bejjo aema' cuana huasijje quiajeyo'yo majje majoya miquea aquiana cuanajo jshahuabaqui'yo ajja cuaje, Eyacuiñajjiyo ca ca jshahuabaquije. Majoya eyahuasijje poqui'yo majje aquiana quea bame nee nee cuaje miquea epojji. E'e, ¡jamaya acue majoya cue o'oyacue enijje jjapeequiya! —jamaya Jesosa cua.

²³ Ma esohui shajja'ajja majje dejja quea aquiana huiso quea yeno po'ya cua. Oya quia sa po'yo ajja cua quea bejjo huiso jjejojo, quea aquiana huiso nee nee jjejojo. Poqui'ya

cua; aquiana quia'yo jjima aca cua. Jjapeequi jjima Eyacuiñajji nijje, de. ²⁴ Jesosa quea yeno cua ma dejja quea aquiana huiso poquije ba majje; jama cua ba'a: —Oe dejja quea bejjo huiso anijo, quea camaja ejjapeequijji Eyacuiñajji nijje. Jamatii jjashahuabaquiani ojaya aquianajo; Eyacuiñajji ca ca jjashahuabaqui ajja. ²⁵ Oya cameno, mona ai'ai jama, jjajejjequi jjima cuaje ahuoja quii huejjaje jayojja. Jamaya dejja quea aquiana huiso beshahua nei poqui jjima eyahuasijje cuaje —jamaya Jesosa cua.

²⁶ Pea cuaa ojaya esohui shajja'ajja majje Jesosa jama huohui'ajjame aca cua ba'a: —Ojjaña cuana quea bejjo huiso sa cuani, de. ¿Ae shai che poquije'yo eyahuasijje Eyacuiñajji nijje ba'e'yohua?

²⁷ —E'e de, oe dejja oya eyahuasijje epoqui meeji pojjeama. Eyacuiñajji ca mi ca oe poqui mee caje'yo eyahuasijje onijje eba'e títii'yojji —jamaya Jesosa cua.

²⁸ Majoya aje Peno jama cua ba'a: —De, ecuaa poqui sa cuani eyahuasijje, jea-jeana'yonaje ecuea aquiana iquiuo meshijo minijje epoqui'yojji.

²⁹⁻³⁰ Jesosa jama cua ba'a: —E'e, ecuea eba. Miquianaaya ojjaña aquiana cuana jea-jeana'yonaje epoquijji enijje. Jamajjeya miquianaya mano'yajo, Eyacuiñajjiya miquianaya poqui mee caje'yo eyahuasijje onijje eba'e títii'yojji. E'e de, miquianaaya equi jea-jeana'yonaje, jamajjeya Eyacuiñajjiya miquianaya sosequia caje quea huiso nee nee. Quijje miquianaya mano'yajo Eyacuiñajjiya quea huiso nee nee eyajo quia caje'yo. Miquianaaya jeananaje miquianajaya huanase, ebacua, miquianajaya o'i, miquianajaya chii pea'ai. Eyacuiñajjiya miquianaya huapa pojjeama jayojja quiame acaje mi jaahuanajji. Eyajo pea'ai miquianaya jama quiameya acaje quea huiso nee nee. Jamaya acaje ohuaya joya ojaya aquiana jeana'yojji cuani enijje chacochacohua —jamaya Jesosa cua.

Jesosaa huohui ca o'oya cua o mano'yojji

(Mateo 20.17-19; Macoso 10.32-34)

³¹ Jesosaa oja 12 shajja'ajjajji nei cuana jjachichacui mee ca'ya cua. Ohuaya jama huohuime aca cua ba'a: —E'e de, jjeya eseya poquije Jenosanena huasijje. Miquianajaya eba Eyacuiñajjiya esohui yahuajo nei nei pea cuaa ejo tehue ca cua. Joya ecua onaja tehue jaa jamaya eya acaje'yo cuaa. Eya mano mee caje'yo ojjaña Edoe Mese cuanijojo. Jamajjeya eya Jenosanena huasijje poqui majje manoje'yo. ³² Eya pea cuaa iña majje dojo caje Jodio pojjeama huasijje. Oya cuanaja ba jjima Eyacuiñajji, de. Oya cuana mimijajji enijje; ejo soaje; cojja cuchojea caje cuaa mo. ³³ Cua caje mo emeya cuaa, de. Majoya aje mo mano mee caje'yo pea'ai cuaa. Eya mano neineije'yo. Majoya pea beca peejjima cahuime po majje, eya ca iña shequije o'oya, de —jamaya Jesosa cua.

³⁴ O shajja'ajjajji cuana ca ca jjashahuabaqui jjima cua Jesosaja esohuijo. Oya cuana ba jjima, yajjajo ohua o mano'yojji huohui cani poso jjabaquia cua.

Jesosaa cojjama' quea cojja ja'a po mee ca'ya cua

(Mateo 20.29-34; Macoso 10.46-52)

³⁵ Jesosa Jenico cuiñajji chipi nei poquia cua. Oe dejja cojjama' chemo po aña cua ejiojji cojja sahuajo. ³⁶ Cojjamaa shajja'ajja ca cua dejja quea huiso cueje, jamajjeya huohui'ajja ca cua: —¿A'ya mi so'o?

³⁷ Pea cuana jama cua ba'a: —Jesosa iquiuo cueje, de.

³⁸ Majoya aje jama taame cua ba'a: —Jesosa, miya Eyacuiñajjiya huoojea'yo cuani. Miya ma etiiquiana emeshi mese, Dabi jayojja cuani. Eya ca iña oe che cojjama', de. ¡Che iña jjacojjaja'aqui mee'yocue!

³⁹ Ehui dojojji pea cuana poquije jama cua ba'a: —De, ¡quea shajjaquijjo pajjaja coma a'a taaajji!

Oya ca ca taa o'oya cua; jama cua ba'a: —Jesosa, ¡che iña yohua sahuacue, miya Eyacuiñajjiya huoojea'yo!

⁴⁰ Jesosa poquije tii nequiñaquia cua. Majoya aje oya jama cua ba'a: —¡Cojjama' e que jjequicue!

Yechipi cajo Jesosaa cojjama' jama huohui'ajjame aca cua ba'a: ⁴¹ —¿Apiojji eya miyaya taaña, cojjama'?

—Jesosa, miya ecuea Emeshi Mese nei, mi que e jjacojjaja'aqui mee'yojji mi taaanaje —jamaya cua cojjama'.

⁴² —E'e de, ijjea miya quea cojja ja'a po'yocue! Eyaya miya jjabapojjaqui mee'yonaje ejo e'e jojo nei jjashahuaba bamebamequinajejojo —jamaya Jesosa cua.

⁴³ Majoya aje quea cojja ja'a nee nee po'ya cua. Oya Jesosa nijje poquia cua. Oya jama cua ba'a: —E'e de, Eyacuiñajji quea bame nee nee, de. Jesosaa ecuea ecojja quea ja'a po mee ca'yonaje, de.

Pea cuaa ma ba majjeya Eyacuiñajji bihuia ca cua.

19

Jesosaa Saqueo ba ca cua

¹ Jesosaa Jenico yejje canana cua; quea dejja huiso jjachichaquia cua Jesosa bajji. ² Oe dejja Saqueo bajjani cua. Ojjañaja eba Saqueo quea bejjo huiso nee nee cua. Oya bejjo chichajji cua emeshi meseja yayji. Oya ca jjadasiaquijji cua. ³ Ohuaya ca ca Jesosa ba sa aca cua. Jamajjeya Saqueo poquia cua Jesosa baa pea cuana ejjachichaqui nequi yasijje. Quea chi'aa jjejojya ca ca oe ojja beshahua nei Jesosa ba jjima cua. ⁴ Jamajjeya Saqueo cuajicuaji poquia cua, ejjojji cuja sahuajo nequi acui yasijje sohuaquiñaquia cua. ⁵ Jesosa jjayejje'ajjaquia cua acui aa biajje Saqueo anijje. Majoya aje ohuaya bajeasohua majje jama aca cua ba'a: —Saqueo, ¡oque'youcúe! Jjeyahua nei iña poquije miquea equi yasijje aniyal

⁶ Majoya aje oya nequioque'ya cua. Majoya aje nequioque'yo majje poquia cua ojaya equi yasijje Jesosa nijje. Oya quea bihui cua. ⁷ Pea cuaa ca ca niñeba ca cua Jesosa poquije ba majje; jama mimijajime cua ba'a: —De, Jesosa Saqueo nijje poquinaje anicuaa, Saqueo quea mimishi nee nee, de.

⁸ Majoya aje dobiquia cua Jesosa Saqueoja equi yasijje. Quijje pishana ijija'ijjiajeyo majje Saqueo nequisohua'ya cua. Ohuaya Jesosa jama huohuime aca cua ba'a: —E'e de, jjeyahua eyaya aema' cuana huasijje bejjo quiaje esejja. Eya siipojji nei cuanaje, de. Jjeya ca iña siipo sa po'yo ajja. Jamaya eyaya aje ba'a: Eyaya oe bejjo siinaje, eyaya quiaje'yo ebeca pee pea'ai bejjo. Eya mimishi po sa po'yo ajja. E'e jojo nei ecuea esohui jjeya. Siajje pojjeama cuani —jamaya Saqueo cua.

⁹ Jesosaa oya jama huohuime aca cua ba'a: —E'e de, miya Jodio dejja nei, jamatti miya Eyacuiñajji nijje jjapeequi jjima cuanaje. Jjeya ca ca miya e'e jojo nei jjapeequi sa cuani Eyacuiñajji nijje. ¹⁰ E'e, eya cueyanaje ojjaña jjapeequi meeya Eyacuiñajji nijje. Eyaya mi jayojja pea cuana ba sa ña —jamaya Jesosa cua.

Esohui ehuhui'yo bejjojo
(Mateo 25.14-30)

¹¹ Jesosaja esohui shajja'ajja majje pea cuaa jama aca cua ba'a: —Jesosa, Jenosanena huasijje poqui majje miya ojjañaja Emeshi Mese cuaje, jjeya nei pojja'a. Ecuana jamajjeya mijo quea bihui nee nee cuaje'yo —jamaya poso aca cua dejja cuaa.

¹² Jamajjeya Jesosaa oe esohui ejjashahuaba quimeejjijo jama huohuime aca cua ba'a: —Oe dejja emeshi mese epo'yoyji pea meshi yasijje poquinaje. Majoya oya emeshi mese epojji bajjani ca'yajje huacuaya cue'yonaje o nequinaje meshi yasijje. ¹³ Poqui jjimahuaa ohuaya iyaa canaje ojaya ome miji pea'ai echacojji cuana bejjo equiajji. Ojjaña oe ebashosocojo bejjo quea huiso quia canaje. Jama huohuime acanaje ba'a: “E'e de, jiquio bejjo eyaya miqúanaya quiaña, aquiana jjeshejji. ¡Esose quea huisojo bejjo jhahuisoqui meecue! Eya cue'yo majje quea huiso bejjo bañaje'yo. Eya majoya quea bihui cuaje” jamaya cua ma emeshi mese poqui jjimahua.

¹⁴ —Majoya aje emeshi mese poquinaje pea meshi yasijje emeshi mese epojji ohua bajjani ca'yajje. Oja meshijo nequi dejja cuanaja boti'ama cua. Jamajjeya dejja cuaa oe dejja huohui pohua ma meshi yasijje huoojca ca cua. Jama huohuime aca cua ba'a: “Ecuana jama ma dejja emeshi mese cuajo boti'ama cuaje”.

¹⁵ —Oya ca ca bajjani ca'yajje emeshi mese cuanaje. Jamajjeya ma dejja huacuaya cue o'oya cua oja meshi yasijje. Cue o'oya majje iyaa mee ca cua ojaya echacojji cuana ehuhui'ajjajji, ache huiso bejjo chicha canaje ebajji. ¹⁶ Ebionei oe echacojji poquinaje o que. Jama cua ba'a: “Emeshi mese, miquea bejjo quea huiso nee nee chichanaje. Miyaya eya oe bashosoco bejjo quianaje, jjeya ca ca yani ome miji pea'ai bashosocome bejjo. Eyaya chaco neineinaje, de”. ¹⁷ Emeshi meseya jama acanaje ba'a: “E'e de, miya oe echacojji quea bame nee cuanaje. Jjeyahua nei miya emeshi mese jayojja aje, ¡ome miji pea'ai cuiñajji jaahuanacue, miyaya quea bame cuanajeya jjejojjo!”

¹⁸ —Pea echacojji poquinaje emeshi mese que. Jama huohuime acanaje ba'a: “Emeshi mese, miyaya bejjo oe bashosoco quianaje. Jjeya ca ca eyaya iyehuiso chichanaje me oejje bashosocome bejjo. E'e de, eyaya chaco neineinaje pea'ai”. ¹⁹ Jamajjeya emeshi mese jama cuanaje ba'a: “E'e de, miya quea bame cuanaje. Miya emeshi mese jayojja aje, ¡me oejje cuiñajji jaahuanacue!”

²⁰ —Pea echacojji poquinaje o que. Oya jama cuanaje ba'a: “Emeshi mese, ma'aje miquea oe bashosoco bejjo. Quia jjimajje bejjo cuanaje. Eja sisijo bebo majje jaahuana neineinaje. ²¹ E'e de, miya etecueaje poso ca ca mi quianaje. Ecuea miya eba dejja quenequene cuajijji nei nei. Quea dejja taija jjejojjo miquea aquiana quea huiso yani. Jamajjeya eya quea mete cuanaje miquea bejjo quiajji. Jamajjeya jaahuananaje miquea bejjo nei”. ²² Majoya aje emeshi meseya oya tecuea canaje. Oya jama cuanaje ba'a: “Siajje miya, de. Miquea

ejjashahuaba taiquijji jayojja jama eyaya miya aje. Miya shajjama' cuanaje; jjahuisoqui mee jjimaya ecua bejjo anaje. ²³ ¡Bacue, ecue bejjo oya huiso tii miyaya jaahuananaje! ¿Apiojji miyaya bejjo ejjeshejji jaajji equi yasijje mi iyaquinaje, ejjahuisoquijji? Miyaya chachochaco jjima cuanaje, de”.

²⁴ —Emeshi mese oya cuana jomajo nequi jama huohuime acanaje ba'a: “E'e de, ijjeq-uisejajae'yocue ecue quia bejjo ma echacojji shajjama' cuanaje! ¡Quia'yocue ma ebionei echacojji cuanaje yasijje, ma quea huiso bejjo chichajji cuanaje yasijje!” jamaya emeshi meseya acanaje.

²⁵ —Oya cuana jama cuanaje ba'a: “Emeshi mese, miquea ebionei echacojji ca ca quea bejjo huiso cuani. Yani ojaya ome miji pea'ai huisome, de”. ²⁶ Majoya aje emeshi meseya jama acanaje ba'a: “¡Shajja'ajjacue ecuea esohui e'e jojo nei! Oe dejja chachochaco ani quea bame, shajja'ajja cani ecuea esohui, eyaya quiaje quea huiso nee nee. Oe dejja ca ca chachochaco ajja, shajjama' cuani, eyaya quia jjima aje. Iñañe'yo ojjaña ojaya aquiana o shajjama' jojoya. ²⁷ E'e de, pea dejja cuanaja eya boti'ama. Oya cuana eya emeshi mese epojji sa po ajja ca ca oya. ¡Ma dejja cuana yecue equ! E cojja nei nequi majje ¡quecuaeacue ojjaña ebajji!” cuanaje ma emeshi mese, de —jamaya aca cua Jesusaa.

Oya huohui ca cua ma esohui ojjaña ebajji eseya cachachochaco'yahua Jesusaja yajjijo quea bame nee, eseya cajjashajja'ajjaqui'yahua ojaya esohuijo pea'ai. Eseyaya quea huiso onijje cajjapeequi mee'yahua. Majoya Jesusa cue o'oya majje ojaya epeejji quea huiso cuaje. Majoya oya jama cuaje ba'a: “Miquianaya quea bame cuanaje; jjapeequi meenaje quea huiso nee ecuea epeejji epojji. ¡Jamajjeya poquicue enijje eyahuasijje! Beca cuana ca ca jeajeaje cuaqui yasijje shajjamajojo, de”.

Jesosa nequiñaquia cua Jenosanenajo

(Mateo 21.1-11; Marcos 11.1-11; Huani 12.12-19)

²⁸ Majoya Jesusa mimijeyo majje poquia cua Jenosanena huasijje. ²⁹ Poquijjeya ba cañaquia cua beca cuiñajji Mepaje, Betania pea'ai. Ma cuiñajji cuana chipi neijo eyiyo nequi yohua bajjani ba'a: Onimo. Majoya Jesusaa becamejijji pea'ai o shajja'ajjajji cuana huojea ca cua. Jesusaa oya cuana jama huohuime aca cua ba'a: ³⁰ —¡Poquicue jocuama ma cuiñajjijo chipi nei! ¡Bañaqui majje bacue mapichi esho' ai ejejonequia nequi! ¡Ba majjeya oe pichocue! ¡Picho majje yecue! ¡Joya onaja e'anisohuaquijji ajjima nei nei oe yecue! ³¹ Onaa: “¿Apiojji acuae ecuea mapichi pichojeaña so'o?” acajje, oe jama huohuime acue ba'a: “¡Mapichi jjequicue!” Jesosa cuanaje. Oya pa mapichi sa cuani, de, acue.

³² Majoya aje oya cuana poquia cua; bacañaquia cua mapichi. Majoya aje bañaqui majje pichojea ca cua ma ecua Jesusaa huohui ca cua jama pichojeameya aca cua. ³³ Majoya aje emapichi mese cuaa ba ca cua, mapichi picho cuequi. Majoya aje ba majje emapichi meseya Jesusaja eshajja'ajjajji cuana jama huohui'ajjame aca cua ba'a: —¿Apiojji acuae ya ecua mapichi pichojeaña so'o?

³⁴ Oya cuana jama cua ba'a: —Jesusaa sa canijojo ca ca ecuaaya pichojeaña.

³⁵ Majoya aje dojo ca cua Jesosa que. Daqui iya ca cua mapichija edaasa biajje. Majoya Jesusa anisohuaquia cua mapichija edaasa biajje; poquia cua Jenosanena huasijje.

³⁶ Jesosa poquianijo jjachichaquia cua ojjaña dejja cuana ejiojji sahuaju. Onaaya daqui ao jjequi jeapihui ca cua ejiojji Jesosa ja'ajjequijji. Emeshi mese jama ja'ajjequimeya acaninaje cuaa ohua ba cahuajje. ³⁷ Eyiyo Onimojo ani jaaocue majje ojjaña Jesusaja epeejji cuana quea bihui nee nee cua. Sohuicuayaña cua jama ba'a: ³⁸ —Eyacuiñajji, miya quea bame nee nee. Miyaya Jesusa huoojeanaje ecuea Emeshi Mese epojji jjeya nei. Ecuana quea bihui nee nee. Ojjaña meshijo ba'e cuana, eyajo ba'e cuana pea'ai quea bei cuani —jama sohuicuayameya cua cuana.

³⁹ Majoya Paniseo dejja cuaa quea dejja huiso pejejo nequiya sohuicuayaqui shajja'ajja majje quea que nee nee cua. Jamajjeya oya cuaa Jesosa jama huohui'ajjame aca cua ba'a: —Jesusa, ¡miquea epeejji cuana huohuicue: “¡A'a sohuicuayajji!” acue! —jamaya cua Paniseo dejja cuana.

⁴⁰ Majoya aje Jesusaa jama saja'ame aca cua ba'a: —Chojja de, eyaya ecuea epeejji cuana: “¡A'a sohuicuayajji!” ajo, mei sohuicuayaje, de. Ojjaña jja ca oe jjeya cabihuia cahua Eyacuiñajji —jamaya Jesosa cua.

⁴¹ Quijje pishana Jenosanena bañaqui majje Jesosa pa neineiya cua Jenosanenajo ba'e cuana ojaya esohuijo shajjamajojo. ⁴² Oya jama mimimeya cua ba'a: —Eya quea yeno nee nee jiquio cuiñajjijo ba'eca cuanajo, oya cuana quea mimishi nee nee jojoya. Oya cuana mimishi cuana pajea'yo sa po ajja nei nei, de. Jamajjeya aje jja oe quea nee nee cuaje'yo, ecuea epeejji po sa po ajja cuanajejojo. ⁴³ Sohuinano cuana cueje o quecua'yohua. Sohuinano cuana jjanequitoquije'yo jiquio cuiñajjijo. Majoya oya cuana cuayaqui ajja nei nei cuaje. ⁴⁴ Majoya aje oya cuana quecua jejojeyo caj'e'yo, chama'yo tii acaje'yo.

Equi cuana dahuajea jeyojeyo caje'yo chama'yo epo'yojji. Jamaya cuaje oya cuana ecuea esohuijo shajjama' cuanajejojo, eya Eyacuiñajjija huoojea'yo ojjaña jaahuanajji cajaa acanajejojo —jamaya cua Jesosa Jenosanenajo ba'e cuana nijje.

Eyacuiñajjija equi aquiana quiajji pojjeama coma ca equi Eyacuiñajji nijje emimijji
(Mateo 21.12-17; Macoso 11.15-19; Huani 2.13-22)

⁴⁵ Majoya Jesosa dobiquia cua Eyacuiñajjija equi yasijje. Dobiqiu majje Jesosaa beca cuana aquiana quia cuequi ba ca cua. Ma ba majjeya quea quene nee nee cua. Majoya aje Jesosaa ma aquiana quia cuequi jeacuayajea ca cua. ⁴⁶ Ohuaya jama tecueame aca cua ba'a: —Eyacuiñajjija etehue'yo jama cuani ba'a: “Eyacuiñajjija equi onijje emimijji”. Aquiana quiajji pojjeama, ona siajje ajji pojjeama pea'ai —jama tecuetecuemeya Jesosa cua.

⁴⁷ Ojjaña pojajajo Jesosaa esohui huohui ca nequia cua Eyacuiñajjija equijo. Jamatii Eyacuiñajji nijje mimiani etii cuaa, Moisesija etehue'yo huohuijji cuaa, emeshi meseya pea'aiya Jesosa sa'ajja ca cua equecua'yojji. ⁴⁸ Jamajjeya esohui huohuijji cuana jama jjashahuabaquimeya cua ba'a: —Quea camaja ca e'iñajji Jesosa equecua'yojji, oya quea epeejji huiso nee nee aña. Shajja'ajja neinei cani ojaya esohui cuaa, de.

20

¿Aya acuae Jesosa huoojea ca cua esohui huohuiya?
(Mateo 21.23-27; Macoso 11.27-33)

¹ Oe pojajajo Jesosaa esohui huohui ca cua Eyacuiñajjija equijo. Jesosa que cueya cua Eyacuiñajji nijje mimiani etii cuana, Moisesija etehue'yo huohuijji etii cuana Jodio etiiquiana pea'ai. ² Oya cuaa Jesosa jama huohui'ajjame aca cua ba'a: —¿Aya acuae mi huoojea canaje esohui huohuiya so'o? —jamaya aca cuaa cua.

³ Jesosa jama cua ba'a: —Eyaya pea'ai miquianaya huohui'ajjaje. ⁴ ¿Aya acuae Huani ma ona besameejji cuanaje huoojea canaje so'o? ¿A'a Eyacuiñajjija pojja'a? ¿A'a dejja cuaa pojja'a? ¿Huohui'ajja socue mo! Majoya eyaya miquianaya huohuije ajea huoojea acuae eya.

⁵ Oya cuana mimipanajajia cua. Majoya aje jama aca cua ba'a: —¿Yajja saja'ame seya aje so'o? Esey quea mete ojjaña dejja cuanajo, de. Esey saja'ajje jama cuaje ba'a: “Eyacuiñajjija Huani huoojea canaje”. Majoya pojja'a Jesosaa jama saja'ame acaje ba'a: “¿Yajjajo mi quiaa cajaa Huanija esohui anaje so'o?” ⁶ Esey jama ajje ba'a: “Dejja cuaa Huani huoojea canaje”. Ojjaña dejja cuaa se jaja ca'yo chana' meiya, ojjaña dejja jjashahuabaquiani Eyacuiñajjija Huani huoojea canajejojo.

⁷ Jamajjeya jjashahuabaqui majje Jodio cuaa Jesosa jama saja'ame aca cua ba'a: —Cua'a de. Ecuana jaya ba jjima nei. ¿Aya shai Huani huoojea canaje? —anisho ca cua quea meteya jjejojo.

⁸ Majoya Jesosa jama cua ba'a: —E'e de, jamajjeya ecuea miquianaya ehuohuijji pojjeama e huoojeajji epo —jamaya Jesosaa Jodio dejja cuana aca cua.

Pea esohui ehuohui'yo ejjashahuabaquijji jjonojajja quejo
(Mateo 21.33-44; Macoso 12.1-11)

⁹ Jesosaa dejja cuana jama huohuime aca cua ba'a: —¿Iquio ejjashahuabaqui'yojji shajja'ajjacue! Oe equé meseya jjonojajja bana canaje. Ojaya que quea quemé nee nee cuanaje; oopana jjonno bana canaje. Ma jjonno yohua bajjani cuanaje ba'a: uva. Ma jjonno cuana bana majje ohuaya echacojji cuana cuiña mee canaje. Ohuaya ejjajja cuiñajji cuana jama huohuime aca cua ba'a: “Jjonojajja jahua jeyajo miquianajaya yajji eseja acue. Pea eseja ca ca ecuea cuaje”. Majoya ojaya que cuiña mee majje quea huesha poquinaje quijje nei nei cue'yohua. ¹⁰ Quijje jjonojajja jahua jeyajo ohuaya ma pea meshijo ba'e ojaya pea echacojji huoojea canaje jjonojajja cuiñajji cuana huasijje. Ma echacojji jjonojajja cuiñajji cuana huasijje poqui majje jama huohui'ajjame acañaquinaje ba'a: “Eya equé meseya miquiana que huoojea canaje jjonojajja eseja jjuhua'yohua. ¿Ache acuae pa equé meseya iya tepe mee?” Majoya ejjajja cuiñajji cuana quea dejja ta jjejojo quea quene cuanaje equé meseja huoojeajji nijje. Jama cuanaje ba'a: “Cho, quia sa po ajja iña. Chama' ca jjaja ca oja, ecuea ca jjaja ca oe”. Majoya ejjajja cuiñajji cuaa echacojji cuiñajje canaje. Cuiñajje majje huoojeajea ca'yonaje equé mese yasijje; jamatii poqui'yonaje. ¹¹ Majoya equé meseya pea echacojji huoojea ca o'yanaje huacuayaya. Huohui'ajja cañaquí o'yanaje jama ba'a: “¿Ache acuae equé meseja jjonojajja so'o?” Majoya quia sa po ajjaa jjejojo cuiñajje ca o'yanaje. Poqui o'yanaje jamatiya, de. ¹² Equé meseya pea echacojji huoojea ca o'yanaje huacuayaya. E'e de, ma pea poqui majje jama huohui'ajjame acañaquí o'yanaje ba'a: “¿Ache acuae pajjaja equé meseja jjonojajja so'o? Eyaya cadojo'yahua o que”. Majoya

jjonojjajja cuiñajji cuana quenequene neineinaje onijje. Quecuajea'ajja canaje jjonojjajja cuiñajji cuaa. Poqui'yonaje echacojji jamatii equé mese yasijje.

¹³—Majoya equé mese jashahuabaqui'yonaje oja quejo. Oya jama cuanaje ba'a: “¿Yajja acuae eyaya aje'yo so'o? Ecue bacua ejja pojja'a cahuojeahua. E'e, oya poqui majje ma jjonojjajja cuiñajji cuaa oya ba caje. O ba majje pojja'a jshahajja'ajjaquije. Ba'ajja”. Majoya aje oja bacua ejja huojee canaje jjonojjajja cuiñajji cuana huasijje. Jjonojjajja jjequi'yohua nisho huojee'ajja canaje. ¹⁴ Majoya aje onaaya ebacua ba canaje. Jama cuanaje ba'a: “Bacue, equé meseja ebacua ejja cueyanaje, de. Cua'a ejjaquecuajeaqui oe equé mesena'yojji” jama jshahuaba taiquimeya cuanaje cuana. ¹⁵ Jamajjeya jjonojjajja cuiñajji cuaa equé bacua ejja quecua ca'yonaje. Majoya aje quea huesha nee nee jeajea canaje —jamaya Jesosa cua—. ¿Yajja acuae equé meseja acaje'yo jjonojjajja cuiñajji cuana? ¹⁶ Equé mese poquije jjonojjajja cuiñajji cuana quecuajea oja bacua ejja quecua'yo epo jojoya. Majoya aje pea dejja que cuiña meequi caje'yo —jamaya Jesosa cua.

Dejja cuana jama cua ba'a: —De, jjonojjajja cuiñajji cuana quea mimishi nee nee, de. Chama' ca jjaja ca dejja cuajjama mimishi.

¹⁷ Jesosaa cojja ba oneone ca cua ma dejja cuana. Majoya aje oya jama cua ba'a: —E'e de, yani jjaja, de. ¿A'a jjaja miquianajaya ba jjima Eyacuiñajji etehue'yo pojja'a? Ba jjima pojja'a jjajaje, jamajjeya aje mi eyaya jama huohuime aje ba'a: Jamatii dejja cuaa oe equi iyajji, equi yamajjana quea ca'a nee nee sa'ajja cani. Beca cuaa jeajea cani ca'a quea bame pojjeama posojoyo. Pea dejjaja eba nei nei acui yamajjana equi iyajji. Jama cuaje ma acui ca'ajo ba'a: “Jiquio aje jja oe acui quea ca'a nee nee ba'a, de. Jamajjeya aje jja oe eyaya doje'yo quea bame nee nee jojoya”. Jamaya Eyacuiñajji eya babaca canaje Emeshi Mese nei quea bame nee nee epojji acui quea bame jayojja. ¹⁸ E'e de, miquianaaya ca ca eya cajaa aje, ma acui cajaa onaa acanaje jayojja. Ojjaña joya eya Emeshi Mese epojji cajaa acajo Eyacuiñajji jeajea caje'yo cuaqui yasijje —jamaya Jesosa cua.

¹⁹ Jesosaja esohui shajja'ajja majje Eyacuiñajji nijje mimiani etii cuana, Moisesija etehue'yo huohuijji cuana pea'ai quea quene nee nee cua. Oya cuana jjaja'acui majje jama mimimimime ojee cua ba'a: —¡De! A'a jja ca eseya jama acani, de. Oya mimiani eseya jjonojjajja cuiñajji cuana jayojja, de. Pea cuaa Jesosa cajaa acanaje jayojja eseyaya cajaa aje pea'ai pa —jamaya ma Jodio dejja cuana cua.

Jamajjeya Jodio dejja cuaa Jesosa iña sa acua ejeanobiajji nisho. Ojaya epeeji cuana quea huisojoyo, Jesosa mi iña ca cuaa cua. Jama cua ba'a: —De, eseya o iñajo dejja cuana quea quene nee nee cuaje ese nijje —jamaya cua Jodio dejja cuana; Jesosa iña jjima cua.

Esohui huohui'yo emeshi mese yasijje bejjo quiajji

(Mateo 22.15-22; Macoso 12.13-17)

²⁰ Majoya Eyacuiñajji esohui huohuijji cuaa pea dejja cuana Jesosa iñajji nisho bejjo quia ca cua. Ma dejja cuana poquia cua Jesosa baa; dejja quea bame nisho cua. Huohui'ajja ca cua Jesosa ojaya yajja saja'ame ya'yoyji nisho. Jamajjeya Moisesija etehue'yo jayojja jama mi saja'a cajo dojo ca quiaje sohuinano huasijje jeanobiaa. ²¹ Ma dejja quea bame nisho cuaa Jesosa jama huohui'ajjame aca cua ba'a: —Jesosa, ecuanaja eba miyaya e'e jojo nei huohuiana Eyacuiñajji esohui nei. Miyaya baña dejja cuana oya jayojjaya cuani. ²² Jamajjeya mo oe che huohucue! ¿A'a jamajjeya Eyacuiñajji epeeji cuaa bejjo quia caji emeshi meseja yajji? Quia ca ajja pojja'a.

²³ Jesosaja eba cuanaje Jodio cuanaja ejshahuabaquijji. Jamajjeya ohuaya jama huohui'ajjame aca cua ba'a: —¿Apiojji acuae nequiaa iña dasia sa aña so'o? Miquianaya ca ca ecuea epeeji nisho cuani, de. ²⁴ Jjequicue bejjo esodojjo ebajji, emeshi meseja epana'yoyji!

Majoya oya cuaa oe bejjo jjequi ca cua. Jjequi cajo, Jesosaa jama huohui'ajjame aca cua ba'a: —¿Bejjo ae ecajja'yo ani? ¿Ae bajjani tehueme'ya bejjo? —jamaya Jesosa cua.

—Emeshi mese oja cajja'yo, Sesa bajjani.

²⁵ Majoya aje Jesosa jama cua ba'a: —Jamajjeya ¡Sesaja bejjo quiaquicue ohua sa cajol ¡Eyacuiñajji a'a pajea'yoyji; oya bihuicue; shajja'ajjacue pea'ai!

²⁶ Ma epeeji nisho cuana quea mete nee nee cua Jesosaja ojaya ejshahuabaquijji ebajojo. Jamajjeya jama cuana cua ba'a: —Quea jshahuabaqui ja'a nee oya, Jesosa. Jjadasia meequi ajja, de —jamaya cua ma epeeji nisho cuana. Jamajjeya mimi o'oya sa po ajja Jesosa nijje. Jamajjeya Jesosa iña jjima cuanaja cua.

Mano'yo majje eshequi o'oyajji

(Mateo 22.23-33; Macoso 12.18-27)

²⁷ Ma pojjajo tii Sanoseo dejja cuana poquia cua Jesosa huohui'ajjaa. Sanoseo dejja cuana jamatii jshahuabaquia cua pea cuana mano'yo majje eshequi o'oyajji pojjeama.

Jesosaja ca ca jama sohui huohuime ajjima cua. Jamajjeya Sanoseo deja cuaa oya edasijaji nisho aca cua. Majoya aje jama huohui'ajjame aca cuaa cua ba'a: ²⁸—Esohui huohuijji, Moisesiya jama tehueme aca cua yahuajo nei nei ba'a:

“Oe deja jhuanacuinaje. Majoya aje mano'ya cua bacuamahua. Ojaya ehuanase quijjojea ca cua. Ahuema' ani'ya cua jjamejoqui jjimahua quijjojea. Majoya aje ahuemano'yajo oja chahuaa cahuaa ca'yahua, oja doeja bacua jea jayojja nei epojji”.

²⁹ Jamajjeya jama cuaje pojja'ba ba'a: Oe deja quea doe huiso cua, me oeje pe a becane-jjijji pea'ai nequia cua. Ma dejjaa epona huana ca cua. Majoya mano'ya cua; bacuamahua quijjojea ca cua. ³⁰ Ma dejaja quijjojea ani echahua meseya huana ca o'oyanaje. Bacua jea jjimahua quijjojea ca o'oyanaje. ³¹ Majoya pea echahua meseya huana ca o'oyanaje. Majoya pea echahua meseya huana'ajja ca poquiapoquia cua. ³² Majoya aje oya epona mano'yonaje yahueja quijjojea ani tiya. Jjamejoqui ajja cuanaje, bacuama' nei nei tii pona cuanaje, de. ³³ Jamajjeya miquea esohui jama cuani eyajo shequi o'oya majje ¿ajea ehuanase jiquio cuaje eyajo; ache oja doeja? O huanacojji epoja pojja'a, pea echahua meseja pojja'a; oja chahua cuana ahua'ajja'yo epo —jamaya cua Sanoseo deja cuana.

³⁴ Jesosaa jama aca cua ba'a: —De, miqianajaya ba jjima. Jiquio meshijo deja cuana jhuanacuiani; epona cuana jhahuaquiani. ³⁵ Jamajjeya jiquio meshijo Eyacuiñajjija epeejji mano'yo majje eyahuasijje poquije'yo. Ejjahuanaqui'yojji pojjeama cuaje'yo eyajo; epona cuana pea'ai ejjahuaqui'yojji pojjeama cuaje'yo eyajo. Jjamejoqui ajja pea'ai cuaje'yo eyajo. ³⁶ Mano'yo ajja cuaje jomajo; esohuidojojji jayojja jama cuaje'yo. Eyajo ojjaña Eyacuiñajjija ebacua cuaje'yo, eshequi'yo jjejojo. ³⁷ ¿A'a miquea ba jjima deja cuana ojjaña mano'yo majje shequije o'oya? Jamajjeya Eyacuiñajjija yahuajo nei esohui tehue mee ca cua miqiana jbahuejaquijji. Moisesiya tehue ca cua yahuajo nei nei ma acui jjiqqui ba majje. Eyacuiñajji mimia cua onijje jama ba'a:

“Eyaya miquea etiqiana cuana jaahuanaña, Amajama, Isaaca, Jacobo pea'ai ecuea epeejjiyojo. Oya cuana enijje enequi tii tii”.

³⁸ Eyacuiñajji emano'yo cuana meshijo e'ohuajajaa jaahuanajji pojjeama cuani. Eshe nequi cuana, emano'yo shequi'yo cuana pea'ai eyajo ohuaya jaahuana cani ojaya epeejjiyojo —jamaya aca cua Jesosaa.

³⁹ Pea Moisesija etehue'yo huohuijji cuaa jama huohuime aca cua ba'a: —E'e de, quea ja'a nee nee miquea esohui, Jesosa. Quea bame nee nee, de.

⁴⁰ Majoya huohui'ajja beca'yo jjima tii aca cuaa cua quea meteya jjejojo, jjadasia meequi ajjajojo.

¿Aya Jesosa huoojea ca cua deja jaahuanajji pojji?
(Mateo 22.41-46; Macoso 12.35-37)

⁴¹ Jesosaa oya cuana jama aca cua ba'a: —Miqianaya jama jjashahuaba taiquime cuani ba'a: “Jesosa Dabija osecua poso nequiaa ña. Jamajjeya oya Eyacuiñajjija Bacua pojjeama poso nequiaa ña” jamaya jjashahuaba taiquimeya nequiana cuani. Dabi emeshi mese yahuajo nei nei ba'ya cua. Eya ojaya eba nei nei, de. Ojaya eya eba dejaja bacua ejja pojjeama, Eyacuiñajjija Bacua Ejja. ⁴² Jamajjeya ohuaya esohuicuayajji tehue ca cua Salmojo; jama cua ba'a:

“Eyacuiñajjija ecuea Emeshi Mese Quito jama huohuime acanaje ba'a: —¡Enijje anioquecua ebañei mijijje ojjañaja Emeshi Mese epojji!

⁴³ Eyaya mi quecua'yojji epo jeabichajea jejojeyoje'yo. Majoya aje miyaya oya cuana jeajeaje'yo cuaqui yasijje cajaajojo —jamaya aca cua Eyacuiñajjija”.

Jamaya Dabiya ejo tehue ca cua yahuajo nei nei. ⁴⁴ Jamajjeya Dabiya Quito oja Emeshi Mesejojo bajjani ca cua. Jamajjeya Quito Dabija osecua cua, ojaya Emeshi Mese nei. Eya jja iña iquio Quito, de, dejaja bacua pojjeama; Eyacuiñajjija Bacua Ejja, jamajjeya eya ojjañaja Emeshi Mese nei —jamaya Jesosa cua.

Jesosaa Moisesija etehue'yo huohuijji cuana tecueajea ca cua
(Mateo 23.1-36; Macoso 12.38-40; Noca 11.37-54)

⁴⁵⁻⁴⁶ Ojjaña Jesosaja esohui shajja'ajja canijo, Jesosaa o shajja'ajjaji cuana jama aca cua ba'a: —Coya mi oe Moisesija etehue'yo huohuijji jayojja po chana'. Oya cuana po'ayequiequi daqui aoji ojjañaja quea bame ebaji nishoya. Oya cuana quea bihui cuani shajja'ajja majje ojjañaja esohui jama cuani ba'a: “Ma esohui huohuijji quea bame cuani, oja daqui quea bame, oja esohui quea ja'a nee” jamaya shajja'ajja saya cuani ma esohui huohuijji cuana. ¡E'e jojo nei pojjeama! Jodioja equi ejjachichajji yasijje dobiqqui majje ebionei anioque sa cuani Eyacuiñajjija esohui huohuijji pejejo. E'ijjia'ijjiajjiyo pea'ai anioque sa cuani equi mese pejejo. Beca cuaa quea bame poso acani. ⁴⁷ E'ahuemanoja aquiana sii cani o chaco sahuajji nisho po majje. Majoya oya cuana mimi nisho ani

Eyacuiñajji nijje. Oya quea mimishi nee nee. Eyacuiñajjiya oya cuana jeajea caje'yo cuaqui yasijje, onijje mimi nishojjijojo —jamaya cuana Jesosaa aca cua.

21

*E'ahuemano aemaa bejjo quia ca cua Eyacuiñajjiya equijo
(Macoso 12.41-44)*

¹ Eyacuiñajjiya equijo, Jesosaa dejja cuana quea aquiána huiso nequi ba ca cua. Ma dejja cuaa bejjo iya ca cua ejjeshejji iyajji yasijje. ² Majoya e'ahuemano aema' nei neiya bejjo iya ca cua. Becanejjijji pea'ai bejjo ojaya cua, oe pojji nei nei cua, de. Chama'yo cua ojaya bejjo ohua iya cajje bejjo iyajji yasijje. ³ Majoya Jesosa jama cua ba'a: —E'e, jiquio e'ahuemano quea bame cuanaje. Ohuaya ojjaña tii bejjo iya ca'yonaje. Jamajjeya Eyacuiñajji quea bihui cuanaje onijje. ⁴ Quea aquiána huiso nee nee cuaa ca ca oja quiabishi iya canaje. Quea bame pojjeama ca ca oya cuana. Ma e'ahuemanohua iya canaje ojaya bejjo bobi jjeshejji nisho, de. Chama'yo ojaya bejjo po'yonaje. Jamajjeya quea aquiána huiso nee nee cuana quea bame pojjeama cuanaje —jamaya Jesosa cua.

*Pea cuaa Eyacuiñajjiya equi cajjajeajea mee caje'yo
(Mateo 24.1-2; Macoso 13.1-2)*

⁵ Beca cuana mimia cua Eyacuiñajjiya equijo jama ba'a: —¡De, bacue mei quea bame, aquiána quea bame ani Eyacuiñajjiya equijo! Aquiána quea bame sosema' quia Eyacuiñajjiya equi quea bame epojji.

Majoya eja Jesosaa jama aca cua ba'a: ⁶ —E'e de, quijje pishana jiquio equi, aquiána pea'ai chama'yo tii acaje'yo, de. Ma mei bame cuana pea biaje e'ia sohua'yojji pojjeama. Pea cuaa ma equi cajjajeajea caje'yo —jamaya cua Jesosa Eyacuiñajjiya equijo.

*Dejja cuana quea mase nee cuaje quijje
(Mateo 24.3-28; Macoso 13.3-23)*

⁷ Majoya o shajja'ajjajji cuaa jama huohui'ajjame aca cua ba'a: —Jesosa ecuea esohui huohuijji, ¿ache shono acuae shai pea cuaa Eyacuiñajjiya equi mei cuana cajjajeajea mee caje'yo? ¿Yajja acuae acaje so'o?

⁸ Jesosa jama cua ba'a: —Ma Eyacuiñajjiya equi quea bame cajjajeajea'yo jjimahuaajo, jamaya cuaje ba'a: Quea huiso nee nee cueje e bajjani nisho po majje. Jama mimi nishome cuaje ba'a: “Eya Jesosa Quito bajjani, de”. Pea jama cuaje ba'a: “Eya jjeyahua nei cue o'oyanaje, eya Quito, Eyacuiñajjiya huoojea'yo”. ¡A'a ojaya esohui shajja'ajjajji! Sijje ca cuaje. ⁹ Miquiaaya shajja'ajjaje pea meshijo ba'e cuana jjaquecuaquiequi pea meshijo ba'e cuana nijje. ¡A'a miquianaya quea mete pojji! Jamatii acua pojjeama oe po ajja jjima cuaje so'o —Jesosa cua—. ¹⁰ Dejja cuana jjaquecuaquije'yo ojjaña meshijo ba'e cuana, cuiñajjijo ba'e cuana pea'ai. ¹¹ Quea huiso emano meejjiya mano mee caje'yo. Ojjaña quea mete nee nee cuaje, de. Bobima' cuaje, manojje'yo quea dejja huiso cuana bobimajo. Meshi huehuahuehuaje ojjaña meshi yasijje pea'ai, de. Ojjaña quea mete nee nee cuaje'yo eyatahuatahua huehuahuehuajo meshi huehuahuehuajo pea'ai, de —jamaya Jesosa cua.

¹² —Jiquio jama po jjimahuaajo beca cuaa miquianaya quea nee po mee caje'yo ecuea epeejji cuanijojo. Oya cuanaja boti'ama nee nee cuaje, de. Miquianaya iña majje dojo caje jeanobiajeaa Jodioja equi ejjachichaquijji cuana huasijje. Dojo caje miquianaya emeshi mese nequi cojja nei yasijje. Majoya ohuaya jama huohui'ajjame acaje ba'a: “¿A'a miquianaya Jesosajja epeejji nei?” E'e jojo nejjojo, miquianaya jeanobiajea caje. ¹³ Jama po majjeya ¡a'a quea mete pojji! Miquianaya ejo huohuije ma emeshi mese yasijje. Jamajjeya quea huiso emeshi mese cuaa shajja'ajja caje ecuea esohui Eyacuiñajjiya esohui pea'ai —jamaya Jesosa cua—. ¹⁴ E'e, ¡a'a quea mete pojji ache esohui miquianaaya huohuije'yo! ¹⁵ Eyaaya nei miquianaya quea ja'a nee po meeje. Eyaaya esohui huohui sahuaje ehuhuijji ejo. Ma pojjaajo pea cuanaja miya esaja'ajji pojjeama miquianajaya esohui quea ja'ajojo. Miquianajaya esohui e'e jojo nei cuaje, de. ¹⁶ Miquianajaya huapa pojjeama cuaa, miquianajaya epeejji cuaa pea'aiya dojo caje ejjajeanoobiajeaquijji equi yasijje miquianaya ecuea epeejjiyojo. Ohuaya miquianaya quecua mee caje'yo, de. ¹⁷ Ojjaña miquianaya cajaa acaje'yo ecuea epeejji cuanijojo. ¹⁸ Onaa cajaa acaje a'a jjashahuaba taiquijji jama ba'a: “Eyacuiñajjiya ecuaa pajea ca'yonaje, de”. Cho, Eyacuiñajjiya miquianaya pajea'yo jjima acaje'yo. Ohuaya ca ca miquianaya jaahuana caje'yo ojaya epeejji cuanijojo. ¹⁹ Ojjaña jiquio jayojja cuajo, ¡a'a miquianaaya eya pajea'yojji! Miquianaya jjapeequipajea'yo ajjajo Eyacuiñajjiya miquianaya ba'e tiitii mee caje'yo eyajo.

²⁰ —Miquianaaya sohuinano cuana Jenosanenajo ejjanequitoqui'yo nequi ba majje miquianajaya eba ma cuiñajjijo ani cajjajeajea cuajicuaij caje'yo. ²¹ Ojjaña Jodea meshijo ba'e cuana capoqui'yahua eyiyo huasijje. Ojjaña Jenosanenajo ba'e cuana

cacuayaqui'yahua. Quea huesha ba'e cuana, ja'a cue'yoquiiji Jenosanena huasijje! Capo-qui'yahua quea huesha nee, ma sohuinano cuaa equecua ca cuaje jjejojo. ²² E'e de, jamaya quea nee nee cuaje, Eyacuiñajija esohui yahuaajo tehue ca cua jama jayojjaya cuaje. ²³ Epona cuana o'ejji, bacua sho'ijji pea'ai quea yeno nee nee cuaje; quea camaja epoquicua'ijji cuaje, de. Eyacuiñajija quea nee nee nee po mee caje Jenosanenajo ba'e cuana. ²⁴ Sohuinanohua beca Jodio dejja cuana yacua caje'yo. Beca cuana ca ca iña majje jeyo caje. Jeyo majje dojo caje pea meshi quea huesha nee yasijje. Quea yeno nee nee cuaje, de. Sohuinano cuaa, Jodio dejja pojjeama cuaa Jenosanenajo equi ani cajiñaje'yo majje pea equi iya caje'yo eba'e'yojji. Majotiiya oya cuana ba'e'je'yo jiquio ecua Eyacuiñajija ba'e mee caje'yo. Ma shonoya aje oya cuana poquije'yo —jamaya Jesosa cua.

¿Achajja acuae cuaje Jesosa cue o'oyajo?
(Mateo 24.29-35, 42-44; Macoso 13.24-37)

²⁵ Majoya aje Jesosaa jama aca cua cuana ba'a: —E cue o'oya jjimahuajo ojjaña quea mete cuaje eshequi, ba'i pea'ai quea apo cuajo. Jiji'yo ajja cuaje, de. Majameta cuana jjacajjaqui'yo majje jijijijioqueje. Ba majje dejja cuana quea mete nee nee cuaje; piopio caje'yo, de. Ena cuana quea shajjaquiijo cuaje enashajo quea quemo nee neejojo. ²⁶ Mete caje'yo majameta huehuahuehuajo. Dejja cuana shacamano caje'yo mete'yo majje. Oya cuaa jama huohui'ajjame acaje ba'a: “¿Yajja shai cuani so'o'?” ²⁷ Ojjaña cuaa eya ba caje. Eya ojjañaja Edoe Mese cuani cueje'yo bo biajje. Quea ca'a nee nee; quea sohui poja nee nee cuaje, de. E'e, quea bame cuaje ma pojajoya. ²⁸ ¡Miquianaaya jiquio ba majje nequisohuacue! ¡jjabajaeasohuacuicue! Eya cueje o'oya miqiana dojhua eyahuasijje eba'e'yojji tii tii. Jamajjeya ¡quea bihui pocue! —jamaya Jesosa cua.

²⁹ Jesosaa pea esohui jama huohuime aca cua cuana ba'a: —E'e de, ¡bacue ma acui, iquena bajjani! ¡Ojjaña acui cuana bacue! ³⁰ Eseyaya meshijo acui iña yani ba majje eseya jama cuani ba'a: “E'e jojo nei nayaya po'yonaje”. ³¹ ¡jiquio ecua acui iña yani ba majje acuijjajja jashahuabaquiani jayojja jama eyatahuatahua huehuahuehuani ba majje bacue eya cueje o'oya!

³² E'e jojo nei ojjaña ma pojja cuanajo ba'e cuana mano jeyojeyo'yo jjimahuajo ojjaña acua cuaje'yo eya ojjañaja Emeshi Mese oe nequije'yo. ³³ Eyatahuatahua, meshi pea'ai chama'yo cuaje'yo. Ecuea esohui ca ca ma ani titiime cuaje'yo.

³⁴ —¡Ishoa'ajja anicue iña oe nequia! ¡A'a jashahuaba majamajajquianijji miqianajaya eba'e'jji! ¡Miquianaya oe che jashahuabaquicue e ecue o'oyajji! ³⁵ Ibia ijjiameejji eshe'a'ani jjacamicuajiqui'yani jayojjaya jama cuacuajimeya eya cuaje. E'e, ojjañaja eya ba jjima cuacuajije. ³⁶ Jamajjeya oe ¡shajja'ajjacue ecuea esohui! ¡A'a pajea'yojji, quea camaja cuaje, de! Ojjaña cuana quea mete nee nee, quea nee nee pea'ai cuaje, de. Jamajjeya ¡jja'ishoa'ajja aniqui titiicue! ¡Miquianaya ecuea epeeji po titiicue! ¡Eyacuiñajji nijje mimiani titiicue quea ca'a epojji! Eya cue o'oyajo miqianaya ecoja nei nequijaquije. Eya miqianajaya Edoe Mese cuaje, jamajje miqianaya quea bihui cuaje, mete'ama cuaje —jamaya Jesosa cua.

³⁷ Ojjaña pojja Jesosaa esohui huohui canequia cua Eyacuiñajija equijo. Mecajje poqui nequia cua eyiyo Onimo huasijje cahuiya. ³⁸ Mecajjeahua Jesosa cue o'oya nequia cua Eyacuiñajija equi yasijje. Ojjaña dejja cue nequia cua oja esohui shajja'ajjaa.

22

Jodio dejja etii cuana jashahuabaquia cua Jesosa quecua'yojji
(Mateo 26.1-5, 14-16; Macoso 14.1-2, 10-11; Huani 11.45-53)

¹ Majoya aje quijje pishana ojjaña Jodio dejja cuana jjachichaquia cua Jenosanena huasijje ejjashahuabaquiji yahuaajo nei esohuidojojjiya cuia jjima oja bacua cuana aca cuajo. Ijija'ijja ca cua ojee pahui hua jjimajo, Jodio etiiquiana jayojjaya. ² Ma epojja cue jjimahuajo, Eyacuiñajji nijje mimiani etii cuana, Moisesija etehue'yo huohuijji etii cuana pea'ai jashahuaba taiqui nequia cua jama ba'a: —¿Achajja iñame shai seya Jesosa aje? Eseyajjeya Jesosa iñajo ojjaña ejjachichaquí nequi cuana quea quene cuaje ese nijje —jamaya cua quea mete jjejojo Jesosaja epeeji cuanajo. Jamatii ca ca iña mee sa aca cua Jesosa equecua'yojji.

³ Jodasa Jesosa shajja'ajjaji nisho cua. Ojaya pea bajjani cua ba'a: Isicaniote. Beca cuanaja Jesosa iña jjimajojo, Edosiquiaa Jodasa jashahuaba taiqui mee ca cua Jesosa iña meesahuajji. ⁴ Jamajjeya Jodasa poquia cua Eyacuiñajji nijje mimiani etii cuana que, Eyacuiñajija equi jaahuanajji cuana pea'ai ani yasijje huohui pohua. Jama huohuiñaquime aca cua ba'a: —Ecuea eba Jesosa ma o oe nei poquiani yasijje. Eyaya miqianaya huohuije'yo.

⁵ Majoya oya cuana quea bihui cua Jodasaja esohui shajja'ajja majje. Jamajjeya jama cua ba'a: —E'e de, ecuana miyaya ba meecue ma Jesosa oe nei poquiani yasijje. Majoya aje ecuanaaya miya sosequiaje, de.

⁶ —E'e de, eyaya aje mi iñasahua meeje'yo —Jodasa cua. Majoya ohuaya sa'ajja ca cua e'iña mee'yojji Jesosa dejjama huasijje poqui.

Jesosaa o shajja'ajjaji cuana nijje bobi ijia ca cua

(Mateo 26.17-29; Macoso 14.12-25; Huani 13.21-30; 1 Conitio 11.23-26)

⁷ Majoya ma epojajajo Jodio cuana ijia'ijjianiyo Eyacuiñajji nijje mimianiya oe ñajajaja yahue sho'i quea bame nee nee quecua ca'ya cua Eyacuiñajji bihuiajji. Jodio dejja cuaa pahui hua jima ijia ca ania cua. ⁸ Jamajjeya aje Jesosaa Peno, Huani pea'ai huoojca ca cua oe equi yasijje bobi jjequiya.

⁹ O shajja'ajjaji cuaa jama huohui'ajjame aca cua ba'a: —Jesosa, ¿ache equijo acuae seya pahui hua jima ijiaje so'o?

¹⁰ Jesosa jama cua ba'a: —Jenosanena huasijje oe poquicue! Majoya aje miquiaaya baje oe dejja meshimisijo ena dojo caje. ¡O ba majje o cuaje jja nei nei poquicue o dobiquije'yo huasijjeya! ¹¹ Majoya ma equi mese jama huohui'ajjame acue ba'a: “Ecuea esohui huohuijji jama cuanaje ba'a: —¿Ache equecuayijji acuae ecuana ijia'ijjiaje e shajja'ajjaji cuana nijje so'o? Ecuana ijia sa cuani pahui hua jima, Eyacuiñajji bihuiajji”. ¹² Majoya aje mi huohui caje equi meseya equecuayijji quea quemo. ¡Majoya aquiana iyajeacue; bobi cuacuacue! —jamaya Jesosa cua.

¹³ Majoya aje oya cuana poquia cua; ba ca cua Jesosaja esohui jayojjaya. Majoya iya ca cua.

¹⁴ Majoya siñajo Jesosa o shajja'ajjaji cuana cueya cua ma equi yasijje. Dobiqumajje anioquea cua e'ijjia'ijjiajji.

¹⁵ Majoya Jesosa jama cua ba'a: —Eya miqiana nijje oe yejje nei ijia'ijjiaje'yo, onaa e quecua ca'yo cuahuaje. ¹⁶ E'e de, eya e'ijjia'ijjia beca'yojji pojjeama miqiana nijje manoj'e'yo majje. Jamajjeya quijje eyaya cue o'oya majje jiquio pahui ijiaje o'oya ojjaña cuanaja Emeshi Mese neiya jjejojo —jamaya Jesosa cua.

¹⁷ Majoya ohuaya caneco jjeshe ca cua. Emejo iñanequia majje mimia cua Eyacuiñajji nijje. Majoya aje ohuaya o shajja'ajjaji cuana aca cua jama ba'a: —Ma'aje, ¡jiquio jjonojjajja na ishicie; ishijoyecue oe! ¹⁸ E'e de, eyaya ishi beca'yo jima jjonojjajja na aje, Ecue Chüiya eya ojjaña huoojca'yojji po mee caje'yo; ojjaña eya shajja'ajja caje'yo —jamaya Jesosa cua.

¹⁹ Majoya aje pahui jjeshe ca cua. Pahui jjeshe majje oya mimia cua Eyacuiñajji nijje. Mimi majje pahui miji ca cua. Majoya aje miji majje quia ca cuana cua. Jama huohuime aca cua ba'a: —Jiquio pahui ecuea eyami. Jjeya nei pishana eya manoj'e'yo, Eyacuiñajjia esohui jayojja cuaje miqianaja mimishi cuijea'yojji. ¡Jamajjeya miqianaaya jiquio pahui ijiajca; jamatii apoquiapoquiacue! ¡Jiquiajja ijia majje ¡miqianaya jashahuabaquicue e man'o'ya cuajo!

²⁰ Majoya ijia'ijjiajeyo majje Jesosaa caneco jjeshe ca o'oya cua. Jjeshe majje jama huohuime aca cua ba'a: —Jiquio jjonojjajja na ecuea ena', de. Ecuea ena' cuayaqui'yajo eya manoj'e'yo. Jamajjeya Eyacuiñajjiya cuijea caje'yo tii ojjaña mimishi cuana. Eyacuiñajjiya esohui eyacua quia caje'yo ba'a: “Ojaya epeejji cuanaja mimishi cuana cuijea mee caje'yo tii ecuea ena' cuayaquijeya”.

²¹ Majoya aje Jesosa jama cua ba'a: —Yani oe ese nijje e shajja'ajjaji nisho cuani; ijia'ijjiani ese nijje, de. Maaya eya sohuinano cuana iña mee caje'yo. ²² Eya manoj'e'yo, Eyacuiñajjia esohui jama cuanaje jjojya. E'e de, ma e shajja'ajjaji nisho Eyacuiñajjiya quea nee nee po mee caje'yo. Ohuaya ma e shajja'ajjaji jeajea caje'yo cuaquí yasijje e ohua sohuinano cuana iña mee caje'yojjo —jamaya aca cua Jesosaa.

²³ Majoya aje o shajja'ajjaji cuana mimia cua jama ba'a: —De, ¿aya shai jama acaje? —jama mimime o shajja'ajjaji cuana cua.

¿Ache o shajja'ajjaji quea bame nee nee cuaje eyajo?

²⁴ O shajja'ajjaji cuana mimipanajaji nequia cua. Oya cuana jama cua ba'a: —¿Ache o shajja'ajjaji quea bame nee nee cuaje eyajo?

²⁵ Jesosaa jama huohuime aca cua ba'a: —Miqianaya mimiani ecuea epeejji pojjeama jayojja, de. ¡A'a jama jashahuabaquijji! Jamatii miqianajaya eba emeshi mese cuana quea mase cuani ojaya echacojji cuana nijje. Jamatii ma echacojji cuaa shajja'ajja cani ojaya emeshi meseja esohui jayojja oya quea mase cuanijjo. Ojaya echacojji cuana quea bihui nisho cuani. ²⁶⁻²⁷ ¡Miqianaya ma emeshi mese jayojja jama a'a pojji! ¡Eyajo emeshi mese jayojja quea bame nee nequi sa cuanijo pea cuana jjeya nei ba'e meesahuacue! ¿Ache shai quea bame nee nee so'o? Emeshi mese, ojaya echacojji pojja'a. Emeshi mese, de. Jamaya Eyacuiñajjiya epeejji pojjeama jashahuabaquiani. Ecuea epeejji cuana ca e jayojja

caba'yahua. Eyaya miqúanaya ba'e bame meesahuaña. Eya mase'ama cuani miqúanaya nijje; miqúanaya chacosahuajji cuani eya, de. ¡Jamaya pocue e jayojjaya! Majoya quea bame cuaje —jamaya Jesosa cua.

²⁸ Majoya Jesosaa o shajja'ajjajji cuana jama huohuime aca cua ba'a: —Miqúanaya jamatii po'ayequeiqueinaje enijje. Jjapeequi tiitiinequinaje enijje, jamatii beca cuaa eseya cajaa acanaje. ²⁹⁻³⁰ Jamajojoya aje oe miqúanaya Eyacuiñajjiya quea bame quia cani, e ohua acanaje jayojjaya. E'e, ohuaya eya ojjaña deja cuanaja Emeshi Mese nei po mee ca'yonaje; jamaya eyaya miqúanaya Jodio deja cuanaja emeshi mese jayojja po meeje'yo eyajo. Jomajo eseya ba'e tiitiije'yo; quea bihui cuaje —jamaya aca cua Jesosaa o shajja'ajjajji cuana.

Jesosa Peno nijje mimia cua

(Mateo 26.31-35; Macoso 14.27-31; Huani 13.36-38)

³¹ Majoya Jesosa mimia cua Peno nijje. Penoja pea bajjani cua ba'a: Simohui. Jama Jesosa cua ba'a: —Simohui, shajja'ajjacue jiquio esohui ba'a: Edosiquiaa miqúanaya eya pajea mee'yo sa acani. Ohuaya miqúanaya mimishi po mee'yo sa acani. ³² Simohui, eya miminaje mijo Eyacuiñajji nijje. Miyaya eya cajaa jayojja aje. Majoya miya enijje jjapeequi neineije o'oya. Jamajjeya enijje jjapeequi o'oya majje ¡pea e shajja'ajjajji cuana jjapee tiitiiquei meesahuacue enijje!

³³ Simohui jama cua ba'a: —Ecuea Emeshi Mese nei, Jesosa, eya aje minijje tiiya poquije mi jeanobia caje yasijje mi jayojja pea'ai mano'yome po'yohua. Ecuea aje mi epajea'yojji pojjeama.

³⁴ Jesosaa Peno jama aca cua ba'a: —Peno, mecahuajje cachina yahue taaa jjimahuaajo, miya jama sijje pome cuaje ba'a: “Chojja, ecuea Jesosa ba jjima”. Pea beca peejjima sijje ameya aje miyaya —jamaya Jesosa cua.

Beshahua nei acua Jesosa e'iñajji

³⁵ Majoya aje Jesosaa o shajja'ajjajji cuana jama huohui'ajjame aca cua ba'a: —Yahuajo pishana eyaya miqúanaya huoojeanaje esohui huohuiya. Eyaya miqúanaya huoojeanaje aema' jamatii bejjoma', bashosocoma', miquea ejiojjijo nei nequi dojonaje. Eyaya miqúanaya jaahuananaje. ¿A'a miqúanaya quea shoe cuanaje? Chojja.

Oya cuana jama cua ba'a: —E'e jojo nei, jaahuana neinajeya aje jja ca miyaya ecuana, de.

³⁶ Majoya aje Jesosa jama cua ba'a: —E'e de, jjeya ca ca beca cuaa eya quecua caje'yo. Eya miqúanaya nijje nequi tii ajja jiquio meshijo, eya mano'yo majje. ¡Jamajjeya ca oe miquea bejjo dojocue; miquea bashosocojo biyocuatajaecue quea huesha epoquijji! ¡Jjequicue miquea equecuajji! Chamajo jjeshhecue miquea daqui moo sosejje. ³⁷ E'e de, yahuajo Eyacuiñajjiya etehue'yo ejo jama cua ba'a: “Dejja mase cuanaja boti'ama Eyacuiñajjiya huoojea'yo cuaje. Dejja mimishi jayojja acaje'yo. Jamajjeya quecua caje'yo cuaa” jamaya acaje jjeyahua nei, de —jamaya Jesosa cua.

³⁸ O shajja'ajjajji cuana jama cua ba'a: —Bacue, yani ecuanaja beca equecuajji. Ecuanaa sohuinano cuana quecuaje'yo, de.

Jesosa jama cua ba'a: —Miqúanajaya ba jjima ecuea esohui, de. Mahuiso ecuea esohui —jamaya Jesosa cua.

Jetesemani quejo Jesosa mimia cua Eyacuiñajji nijje

(Mateo 26.36-46; Macoso 14.32-42)

³⁹ Majoya Jesosa poquia cua Onimo eyiyo huasijje mimiya oja Chii nijje. Cuamaya oya poqui majamaja nequia cua mimiya Eyacuiñajji nijje. Onijje o shajja'ajjajji cuana poquia cua pea'ai. ⁴⁰ Majoya aje Jesosaa jama aca cua ba'a: —¡Mimi majamajacue oe Eyacuiñajji nijje mimishi'ama epojji!

⁴¹ Majoya Jesosa poquia cua quea huesha pishana mimiya Eyacuiñajji nijje oe nei. Majoya oya ecui'oshajjajo nequi majje mimia cua jama ba'a: ⁴² —E'e de, Eyacuiñajji, eya beshahua nei poqui sa po ajja acui ecueata'apee yasijje. Eya quea mete nee nee ojjañaja mimishi cuanajo, de. Ecue Chii, ecuea eba miyaya eya acui ecueata'apee yasijje poqui mee sa aña emano'yojji ojjañaja mimishijo. Jamajjeya ¡quea ca'a po meecue eya miquea ejjashahuabaqui'yojji jayojja jama e'ajji! —jama mimimeya Jesosa cua.

⁴³⁻⁴⁴ Jesosa quea mano jjabaquia cua emano'yojji jjejojo. Majoya mimi o'oya cua oja Chii nijje jjanobajjima nei. O janobajjima nei mimianijjo, shishi majje ena' jayojja oquequia cua meshi yasijje, de. Majoya aje esohuidojojji eyajje nequioquea cua Jesosa mete'ama po meeya. Ohuaya majoya Jesosa quea nee ca'a po mee ca cua; jama cua ba'a: —¡Mique Chiija esohui jayojja jama acue! —jamaya aca cua.

⁴⁵ Majoya Jesosa oja Chii nijje mimipajaea'yo majje oya poquia cua o shajja'ajjajji cuana huasijje. Ba ca cua oya cuana ecahuijaa quea yeno nee nee jjejojo, de. ⁴⁶ Ohuaya oya cuana jama aca cua ba'a: —¿Apiojji acuae miquianaya ecahuijaa so'o? ¡Anisohuacue jja oe; mimi majamajacue miquianaya Eyacuiñajji nijje! Jamajoya pea cuaa quea mimishi epo mee'yojji pojjeama —jamaya Jesosa cua.

Jesosa iña ca cuaa cua

(Mateo 26.47-56; Macoso 14.43-50; Huani 18.2-11)

⁴⁷ Jesosa mimianijo tii Jodio etii cuana, sohuinano cuana, Eyacuiñajji nijje mimiani etii cuana pea'ai cueya cua. Jodasa, Jesosa shajja'ajjajji nisho cueya cua o que. Oya ehui dojojji nei cueya cua. O e'iñajji jjanequichipiquia cua Jesosa nequi yasijje. Jjanequichipiqui majje shemo tojjo nisho ca cua. ⁴⁸ Majoya aje Jesosaa jama aca cua ba'a: —Jodasa, miyaya eya shemo tojjo nisho majje sohuinano cuana iña mee'yonaje. ¿Yajjajo Jodasa? —jamaya Jesosa cua.

⁴⁹ Majoya o shajja'ajjajji cuaa ba majje Jesosa jama huohui'ajjame aca cua ba'a: —Jesosa, ¿a'a ecuaaya sohuinano cuana jajajeaje?

⁵⁰ Majoya aje oe oja eshajja'ajjajjiya dejja esapa jajapojoejajji nisho eshajja jajasejjajea ca cua ebañei shajjaje. Eyacuiñajji nijje mimiani etiija echacojji cuanija eshajja, de.

⁵¹ —Chojja, ¡a'a jja oe jajajji! —Jesosa cua.

Majoya Jesosaa ma dejjaja eshajja ejajasejjajea emeya nequia ca'ya cua. Shajja jaja jjima jayojja shajja pana'yome aca cua. ⁵² Majoya Jesosaa dejja cuana jama huohui'ajjame aca cua ba'a: —¿Apiojji miquianaya cueyanaje baajji, acuijji e'iñaa? ¿A'a cuae jja iña siipojji so'o? ⁵³ E'e de, ojjaña pojajajo eya esohui huohui po nequinaje Eyacuiñajjija equijo. Miquianajaya eya iña jjima cuanaje ma equijo quea meteya jjejojo dejja cuanajo. Jjeya ca ca Edosiquiaa miquianaya iña mee canaje jiquio quejo dejjamajo.

Peno Jesosaja epeejji nisho jayojja cua

(Mateo 26.57-58, 69-75; Macoso 14.53-54, 66-72; Huani 18.12-18, 25-27)

⁵⁴ Majoya sohuinano cuaa Jesosa iña'yo majje dojo ca cua Eyacuiñajji nijje mimiani etiija equi yasijje. Penohua ca ca quea huesha pishana quiquishi ca poquia cua. ⁵⁵ Majoya pea sohuinano cuaa cuaqui dahuahuojje ca cua equi epeeyi dojojjo. Majoya anioquea cua cuaqui pejjejo ejjayoquiiji. Peno pea'ai anioquea cua ona nijje yajja Jesosa onaa acaje ebajji. ⁵⁶ Echacojji ahuema'aniya Peno jjayoquiiani ba majje cojja ba neinei ca cua. Ba majje pea cuana jama huohuime aca cua ba'a: —E'e, joya Jesosaja epeejji ani ba'a —jamaya cua ahuema'ani.

⁵⁷ Peno jama cua ba'a: —Ecuea Jesosa ba jjima nei nei.

⁵⁸ Quijje pishana pea dejjaa Peno ba ca o'oya cua. Jama cua ba'a: —Miya jja Jesosaja epeejji, o shajja'ajjajji cuani.

—Chojja, ecuea Jesosa ba jjima nei nei —jamaya aca cua Penohua.

⁵⁹ Majoya quijje pishana peaa oya ba ca o'oya cua: —E'e, oya jja Jesosaja epeejji nei nei. Oya jja Janinea meshijo ba'e Jesosa jayojjaya.

⁶⁰ Majoya aje Peno jama cua ba'a: —Chojja de, ¿ajeo ajja mi ca mimiani so'o?

Peno miminequijo tii, oe cachina yahue taaa cua. ⁶¹ Ma cachina taaajo Jesosa jjanequijea pajjaquia cua Peno bajji. Majoya aje Peno jjashahuabaquia cua Jesosaja ehuhuijo jama ba'a: “Cachina yahue taaa jjimahuajo, pea beca peejjima siajje ameya aje miyaya, eya ba jjima nisho aje”. ⁶² Majoya Peno cuayaquia cua. Pa neinei'ya cua Jesosa ba jjima nisho epo jjejojo; quea yeno nee nee'ya cua.

Jesosa Jodio dejja cuaa niñeba ca cua

(Mateo 26.67-68; Macoso 14.65)

⁶³ Sohuinano cuaa Jesosa jaahuana ca nequia cua, cuaya meequi'yo jjima yajji. Majoya Jesosa niñeba ca cuaa cua, majoya Jesosa cuia ca cua. ⁶⁴ Majoya cuia majje cojja japa ca cua. Cojja japa majje shemo cuiasejjajea ca cua. Shemo cuiasejjajea majje ohuaya cuaa Jesosa jama huohui'ajjame aca cua ba'a: —¿Aya acuae mi cuia canaje so'o? ¡jjashahuaba'ajjaqui!

⁶⁵ Majoya sohuinano cuaa Jesosa niñebajea neinei ca'ya cua, mimijaji neinei'ya cua onijje.

Pea cuaa Jesosa dojo ca cua Jodio etii cuana huasijje huohui'ajjaa

(Mateo 26.59-66; Macoso 14.55-64; Huani 18.19-24)

⁶⁶ Jjapojjajuaajo Jodio etii cuana jjachichaquia cua. Ojjaña Jodio etii, Eyacuiñajji nijje mimiani etii, Moisesija etehue'yo huohuijji etii cuana, ojjaña ojee mimia cua Jesosajo. Majoya sohuinano cuaa Jesosa dojo ca cua Jodio etii cuana huasijje. Majoya aje etii cuaa Jesosa jama huohui'ajjame aca cua ba'a: ⁶⁷ —¡Huohuicue ecuanaya miquea ebajjani! ¿A'a miquea ebajjani Quito, Eyacuiñajjija huoojja'yo, pojja'a?

Jesosaa jama saja'ame aca cua ba'a: —Eya “e'e” cuajo miquianaya jashajja'ajjaqui ajja, de. ⁶⁸ Miquianaya eyaya huohui'ajjaaje saja'a jjima aje'yo eya. Jamaya eya saja'aje miquianajaya eya epichojea'yojji pojjeama. ⁶⁹ E'e, eya poquije'yo jjeya nei pishana eyahuasijje Eyacuiñajji nijje ebañeije ani'yohua. Jomajo ecue Chii quea sohui poja nee nee enequi tii tii —jamaya Jesosa cua.

⁷⁰ Majoya aje Jesosa ojjaña jama huohui'ajjame aca cua ba'a: —¿A'a miya Eyacuiñajjija Bacua Ejja nei so'o?

Jesosaa jama saja'ame aca cua ba'a: —E'e jojo nei miquiaaya esohui ejo aña.

⁷¹ Majoya aje oya cuana jama mimijajime cua ba'a: —¡De, pea deja a'a iyaaaji Jesosa huohuijji! Ecuana jjeya nei shajja'ajjanaje ojaya esohui. Ohuaya Eyacuiñajji niñeba canaje Eyacuiñajjija Bacua Ejjaa miame —jama mimijajimeya cua Jesosa nijje.

23

Jesosa emeshi mese Pinato huasijje dojo ca cua

(Mateo 27.1-2, 11-14; Macoso 15.1-5; Huani 18.28-38)

¹ Majoya ojjaña nequisohua majje poquia cua emeshi mese Pinato huasijje Jesosa dojuhua. Pinato esohuinano mese cua, ojjaña emeshi mese cuanaja emeshi mese pea'ai cua. ² Jesosa dojo majje Pinato cojja nei nequia ca cua Jodio etii cuaa. Onaaya Jesosa jama niñebame aca cua ba'a: —Ecuaa jiquio deja banaje. Mimitecuetecuequi ecuanaja meshijo. Oya jama cuanaje ba'a: “¡A'a bejjo quiajji emeshi mese sosequiajji!” Oya pa Eyacuiñajjija huoojea'yo cuani; oya pa Jodioja emeshi mese posa cuani, de —jamaya oya cuana siajje cua Jesosajo.

³ Majoya Pinatohua Jesosa jama huohui'ajjame aca cua ba'a: —¿A'a miya Jodioja emeshi mese cuani?

Jesosaa jama saja'ame aca cua ba'a: —Miyaya huohuiaña jayojjaya cuani eya.

⁴ Majoya Pinatohua etii cuana jama huohuime aca cua ba'a: —De, jiquio deja jashahuaba taiqui ajja, capichojea'yahua jja, de.

⁵ Oya cuana quea quene nee ca. Mimia cua janobajjima nei nei. Jama tecuetecueme cua ba'a: —Oya ca ca jashahuaba taiquinaje, de. Ohuaya esohui huohui ca ayequiequinaje ojjaña cuiñajji yasijje. Ebionei Janinea meshijo hohui canaje, jjeya Jodea meshijo huohui canaje jiquio cuiñajji cuana huasijje, jjeya nei pea'asi, de. Ojjaña quea quene nee nee, quea shajjaquijjo nee nee ohuaya po mee canaje cuana —jama siajje ameya aca cua Jodio etii cuaa.

Jesosa dojo ca cua pea emeshi mese que, Enode que

⁶ Pinatohua ona shajja'ajja majje jama huohui'ajjame aca cua ba'a: —¿A'a jiquio deja Janineajo ba'e?

⁷ —E'e —oya cuana cua.

Pinatohua ma shajja'ajja majje Jesosa huojea ca cua Enode que, Janinea ameshi mese que. Enode Jenosanenajo ania cua anicuaa poqui. Jamajjeya Pinatohua Jesosa, Jodio etii cuana pea'ai huoojea ca cua Enode que.

⁸ Enode Jesosa ba majje jama cua ba'a: —E'e de, jjeya nei eyaya baña jiquio deja Jesosa. Eyaya oya ba sa anaje ojaya esohui eshajja'ajjajji; emano'yo cuana eshequi mee caje'yo ba sa anaje pea'ai —jamaya cua Enode. Oya ca ca Jesosaja epeeji po sa po ajja nei.

⁹ Majoya Enodeya huohui'ajja majamaja ca nequia cua. Jesosaja oya Enode sohui saja'a jjima cua. ¹⁰ Jodio etii cuaa Jesosa niñeba neinei ca aña cua. ¹¹ Majoya Enodeya, oja sohuinano cuaa Jesosa hue'e ca cua esoadojojji. Daqui quea sose huiso emeshi meseja jayojja Jesosa huosho mee ca cua emeshi mese nisho yajji. Majoya aje daqui huosho mee majje bihuia nisho ca cua. Majoya aje Jesosa huoojea ca o'oya cua cuaa Pinato que. ¹² Ma pojajajo Jesosa nijje mimijaji majje Enode Pinato nijje japeequinaje. Yahuaajo Pinato Enodeja epeeji pojjeama cua.

Jesosa Pinatohua mano mee ca'ya cua

(Mateo 27.15-26; Macoso 15.6-15; Huani 18.39–19.16)

¹³ Majoya aje Pinato jjachichaquia cua Jodio etii cuana nijje, Jenosanena emeshi mese cuana nijje, pea deja cuana nijje pea'ai. ¹⁴ Jama huohuime aca cua ba'a: —Miquianaya ¿apojji Jesosa yenaje so'o? Miquianaya jama cuanaje ba'a: “Ohuaya ojjaña deja cuana quea quene, quea shajjaquijjo po mee cani” poso anaje. Cho oya ca ca quea mimishi pojjeama cuani. E que miquiaaya yajo aje jja, eyaya Jesosa huohui'ajjanaje. Jjeya nei ecuea eba Jesosa, oya jashahuaba taiqui ajja. Oya quea mimishi pojjeama. Joya ecua miquiaaya huohui yaña jama pojjeama. ¹⁵ Enode jama cuanaje ba'a: “Oya ca jja ca quea mimishi pojjeama, de”. Jamajjeya ohuaya Jesosa huoojea ca o'oyanaje e que. ¡Bacue! Eyaya Jesosa

mano mee'yo jjiima aje, capichojea'yahua jja Jesosa, de. ¹⁶Jamajjeya eyaya oya cuia meeje. Majoya aje cuia mee majje pichojea meeje'yo —jamaya cua Pinato.

¹⁷Ojjaña eshequiaja Pascuajo Pinatohua oe ejeanobia nequi huoojeacuaya ca'yaninaje, Jodio cuana quea bei epoji. Jamajjeya Pinato jama cua ba'a: —Jesosa eyaya huoojeacuaya meeje'yo jiquio shejo.

¹⁸Ma esohui shajja'ajja majje ojjaña Jodio cuana quenequene neinei'ya cua; taa cua jama ba'a: —Chojja, ¡Mashama ca oe huoojeacuaya'yocue! ¡Quecua mee'yocue Jesosa!

¹⁹Mashama jeanobia ca cua yahuaajo pishana, oya quea mase nee nee cua. Oya Shomano emeshi mese quecuapanajji epo; ona quecua'yojji epo pea'ai. Oya quea mimishi nee nee cua.

²⁰Pinatohua ca ca Jesosa huoojeacuaya'yo sa aca cua, jamajjeya jama mimome po o'oya cua ba'a: —Cho, Jesosa ca ca oe huoojeacuaya mee'yo sa aña.

²¹Ojaya esohui shajja'ajja majje ojjaña cuana janobajjima nei nei jama taaame cua ba'a: —Chojja de, ¡Jesosa ca oe quecua mee'yocue jjeja nei! ¡Acui ecueata'apeejo oe ba'ehuanasohuajecue!

²²Pinatohua jama huohuime aca o'oya cua ba'a: —¿Apiojji shai miquianaaya oya mano mee'yo sa aña so'o? Oya ca jja ca quea mimishi pojjeama cuani. Eyaya oya cuia neinei mee'yo majje huoojeacuaya meeje'yo. ²³Majoya aje ojjaña cuana taa o'oya cua jama ba'a: —¡Ba'ehuanasohuajecue oe acui ecueata'apeejo Jesosa!

Ojjaña cuana taa majamaja cua. Quenequene neinei'ya cua Pinato nijje. ²⁴Jamajjeya pinato jama jashahuabaquime cua ba'a: —E'e de, eyaya Jesosa caquecua meejea'yahua, dejja cuana enijje quea quene cuequijojo. Eyaya ca oe Mashama cahuojeacuaya mee'yahua.

²⁵Majoya aje pinatohua ma ecua ojjaña taaanaje jama jayojjaya aca cua. Jamajjeya ohuaya Mashama huoojeacuaya mee ca'ya cua; Jesosa ca ca oe huoojea ca cua acui ecueata'apeejo eme' cacajejji emano'yojji.

*Jesosa ba'ehuanasohuajea ca cua acui ecueata'apeejo
(Mateo 27.32-44; Macoso 15.21-32; Huani 19.17-27)*

²⁶Majoya sohuinano cuaa Jesosa acui ecueata'apeejji dojo mee ca cua o ba'ehuanasohuajejji. Jesosa saja ca cua acui quea biquieya jjejojo. Jamajjeya sohuinano cuaa oe dejja ma acui dojo mee ca cua. Oya Simoni bajjani cua; Sinene meshijo ba'e cue cua. Jamajjeya Simoniya Jesosa quiquishijji dojo ca cua acui ecueata'apee abojji. ²⁷Ojjaña dejja cuana epona cuana pea'ai pa poquia cua Jesosajo quea yeno jjejojo. ²⁸Jesosaa epona cuana ba majje jama aca cua ba'a: —Jenosanenajo ba'e epona cuana, ¡a'a oe ejo pajji! ¡Miquianaja pa sa cuanijo pacue miquianajo miquianaja bacuajo pea'ai! ²⁹Quijje pishana quea camaja cuaje miquianajo. Miquianaaya jama huohuije ba'a: “Oe epona bacuama' camaja'ama ba'yani”. Sohuinano cuana cueje jiquio cuiñajji yasijje miquiana quecuua, chama'yo tii cuaje miquianajaya bobi. Jamajjeya miquianajaya ebacua yanijo quea yeno nee nee cuaje. Ebacua cuana pa neinei'yo bobimajo. ³⁰Dejja cuana quea yeno nee nee cuaje pea'ai. Joya ecua atii mano'yo sa cuani jama miquianaya cuaje. Majoya miquianaya jashahuabaquije jama ba'a: “Eyiyo, ¡ecuana biajje oe jaabicha cuajicue ecua cuia cuaji'yojji” jamaya miquianaya cuaje. E'e epona cuana, miquianaya ani sa po ajja cuaje quea camaja ba'e jjejojo. Jamajjeya ma pojjaajo quea nee nee cuaje. ³¹Jjeja nei sohuinano cuaa eya quecua caje'yo. Maya ca ca oe quea tai pishana. Quijje ojjaña sohuinano cuaa miquianaya quecua jejojeyo caje'yo, maya quea tai nee nee cuaje'yo. Jamajjeya ¡a'a pajji ejo; miquianajoya jja oe pa neineicue! —jamaya Jesosaa aca cua.

³²Majoya sohuinano cuaa beca siipojji dojo ca cua Jesosa nijje eba'ehuanasohuajejji.

³³Majoya oya cuana poquia cua eyiyo Sapa Jjii bajjani yasijje. Bañaqui majje Jesosaja eme' caca ca cua acui ecueata'apeejo; ejiojjije pea'ai caca ca cua. Cacajeyo majje nequiasohuajea ca cua. Ma becanejjiji pea'ai siipojji pea acui ecueata'apee cuanajo nequiasohuajea ca cua Jesosa pejejo oe ebañei mijijje, pea shani mijijje. ³⁴Acui ecueata'apeejo ba'ehuanasohuajea cajje Jesosa mimia cua Eyacuiñajji nijje ojjaña nequijo jama ba'a: —Ecue Chii, ecue Chii jiquio dejja cuanaja ba jjiima e'e jojo nei eya miquea Ebacua Ejja cuani. Jamajjeya jiquio mimishi cuijea'yocue!

Majoya aje sohuinano cuaa Jesosaja daqui huijiajjea'yo majje hue'e ca cua oja daqui ya'yojjiya. ³⁵Ojjaña dejjaa Jesosa ba ca nequia cua, Jodio etii cuaa pea'ai. Niñeba ca cua Jesosa jama ba'a: —Dee, ¿a'a Jesosa ojjaña jaahuanajji pojjeama cuanaje? Oya ona nahuejji pojjeama. Jamajjeya mi nequique'yani acui ecueata'apeejo ba'e. Oya Eyacuiñajji Bacua Ejja jjabacui majje jja ca oe jjeyahua neiya canequioque'yahua —jama niñebameya Jodio etii cuaa aca cua.

³⁶ Sohuinano cuana mimijajia cua pea'ai. Jesosa majoya quia'ajja ca cua jjonojajja na sese e'ishijji nisho. ³⁷ Jama mimijajime cua ba'a: —Miya Jodioja emeshi mese nei jjabaku majje mee nei nequioque'yocue acui ecueata'apeejo ba'e jjeyahua nei!

³⁸ Jesosa ba'e sapa biajje oja bajjani etehue'yo caca ca cua jama ba'a:

Oya Jesosa, Jodioja emeshi mese epo'yojji

³⁹ Oe siipojji pea acui ecueata'apeejo ba'e mimijajia cua Jesosa nijje jama ba'a: —i'A' a cuae miya Eyacuiñajjija Bacua Eja nei jjabajjaqu socue! ¡Ache oe nequioque'ajjaqu'yo socue; eucanaya pea'ai pajjaja oe che nequioque meequ'yoque!

⁴⁰ Pea siipojjiya pea acui ecueata'apeejo ba'eya ca ca ma esohui shajja'ajja majje tanacua ca cua jama ba'a: —i'A' a jjashahuaba taiquijji, de! ¿A' a miya Eyacuiñajjijo jjashahuabaqu ajja nei nei? Jjeya se manoj'yo. ⁴¹ Eseyá mano mee ca'yani sohuinano cuaa quea mimishi nee neejo. Jesosa ca ca mimishi'ama, de.

⁴² Majoya aje ohuaya Jesosa jama aca cua ba'a: —Jesosa, ¡miya eyahuasijje poqui'yo majje ejo che jjashahuaba bamequicue!

⁴³ Majoya Jesosaa jama aca cua ba'a: —E'e, ¡iquio pojajjo miya enijje eyahuasijje ba'esohuaquije'yo manoj'yo majje.

Jesosa manoj'yo cua

(Mateo 27.45-46; Macoso 15.33-41; Huani 19.28-30)

⁴⁴ Majoya esheque biacojajja nequijo, shequima'po mee ca'ya cua. Quea apo nee nee po mee ca'ya cua ojjaña meshi yasijje. Quijje nei jhapojjaqu mee ca'ya cua eshequi ejanequijeapaaquijo. ⁴⁵ Eshequi quea apo nee nee po'yajo, Eyacuiñajjija equijo ba'ehuana ba'e daqui moo nei jja'isajeaquia cua eyiyesama neijje. ⁴⁶ Majoya aje Jesosa jjanobajjima nei taaa cua jama ba'a: —Ecue Chii, ecue Chii eyaya mi que ecue dojjoshahua huoojeaje'yo. Jjeyahua mo poquijeoyo.

Jama po majjeya poquijeya cua.

⁴⁷ Sohuinano huoojeajji cuani meseya Jesosa manoj'yajo, ba ca cua. Majoya jama cua ba'a: —E'e de, e'e jojo nei Jesosa mimishi'ama nei nei cuanaje; oya Eyacuiñajjija Bacua Eja cuanaje, de.

⁴⁸ Ojjaña dejja o ba cuequi poqui'ya cua. Ese'o cuiaqueyajea ca poqui'ya cua quea yeno nee neeya jjejojo sapa cuana cuiapashijea ca poquia cua. ⁴⁹ Ojjaña Jesosaja epeeji cuana ca ca quea huesha nequia cua. Epona cuaa pea'ai quea huesha aniya ba ca cua Jesosa onaa cuia ca'yoqui acui ecueata'apeejo ba'e. Ma epona cuana yahuajo nei jjapeequia cua Jesosa nijje, Janinea meshijo ba'e.

Jesosa mei jjani yasijje huananobia ca cua

(Mateo 27.57-61; Macoso 15.42-47; Huani 19.38-42)

⁵⁰⁻⁵¹ Oe dejja Jose bajjani quea aquiana huiso cua. Oya pea Jose, Amatea cuiñajjijo ba'e. Oya jjapee tiiitiquia cua Jesosa nijje. Oya Jodio etii cua. Jesosa manoj'yo jjimahuajo, oya Jodio etii cuana nijje jjachichaquia cua. Ohuaya beca etii cuana jama huohuime aca cua ba'a: —Chojja de, eya ca iña Jesosa mano mee sa po'yo ajja.

⁵² Jamajjeya Jesosa manoj'yajo Jose poquia cua Pinato que Jesosa epoquijeoyo ba'e huohui'ajjaa; jama aca cua ba'a: —E'e de, ¡Jesosa mo quia'yoque! Oya ca ca mano neinei'yonaje. Eyaya oya dojoje'yo ecuea mei jjani yasijje ehuananobiaqu'yojji.

⁵³ Majoya aje ohuaya Jesosa manoj'yo ba'e jjequioquea ca'ya cua acui ecueata'apeejo ba'e. Jjequioquea'yo majje bebo ca'ya cua daqui oshe quea bojea nee neeya. Bebo majje mei jjani ai yasijje huananobiaa dojo ca cua manoj'yo tii cuanaja ejaaji ajjima huasijje. ⁵⁴ Sinecua nei, ejomishocajji epojja po jjimahuajo Jesosa huananobiaa dojo ca cua Joseya.

⁵⁵ Janinea meshijo ba'e epona cuana Jose quishishi poquia cua mei jjani yasijje Jesosa emano'yo baa. Jesosa mei jjanijo huana ca cua Joseya. Epona cuaa Jesosa emano nei'yojaa baqui ca cua shiyeshiyejo eshaquijji nisho. Majoya Joseya mei quea quemó jeacajajja ca cua mei jjani naba capa'yojji. ⁵⁶ Majoya epona cuaa Jesosa jjanijo ehuananobia jaa ba majje shiyeshiyejo shaqui jjima aca cua. Jamajjeya poqui'ya cua ocuayaya equi yasijjeya. Majoya acui shiye pohuipohui shiyeshiye acua aca cua Jesosaja eyami shaquijji nisho. Shaqui jjima aca cua ejomishocajji pojja jojoya. Jamatü Jodio dejja cuana ma pojajajoya chacochocho ajja cua.

24

Jesosa shequi'ya cua

(Mateo 28.1-10; Macoso 16.1-8; Huani 20.1-10)

¹ Mecajjeahua nei nei nomico pojajjo, epona cuana poqui o'oya cua Jesosa ba o'oyaa. Shiyeshiye acua'ya dojo ca cua jjani jaa huasijje, Jesosaja eyami shaa nisho ihui jjima

epojji. ² Epona cuaa ba cañaquia cua mei jjani eca'apejo'yo cua. ³ Oya cuana dobiquia cua ma mei jjani dojjo huasijje Jesosa baa nisho. Dobiqumi majje Jesosa chama' ba ca'ya cua. ⁴ Majoya quea mete nee nee po'ya cua Jesosa chama' ba majje. Ma mete'yoquiya aje eponaa beca esohuidojojji deja jayojja ba ca cua o pejejo nequi. Ojaya daqui quea oshe nee nee, quea siyo nee nee cua. ⁵ Epona cuana quea mete nee nee cua; ecojja cahui cua quea cojja sajaja jjejojo. Majoya aje esohuidojojjiya jama huohuime aca cua ba'a: —¿Yajjajo acuaeya miqúanaya sa'ajjaña Jesosa jiquiojo so'o? ¿A'a emano'yo poso? Chojja, oya shequi'yona. ¡Chama'yo ca jja ca jiquiojo! ¡Oya ca jja ca eshe nequi'yo! ⁶ ¿A'a jja miqúanaya Jesosaja esohui pajea'yona ma ohua yahuaño huohui ca cua Janinea meshijo nequiahuaa? ⁷ Jesosa yahuaño pishana, mano'yo jjimahua, jama cua ba'a: “Mimishi cuaa eya mano mee caje'yo acui ecueata'apeejo. Pea beca peejjima cahuime po majje shequije'yo” jamaya cua Jesosa mano'yo jjimahua. Jamajjeya ja'a quea mete pojji! —jamaya aca cua esohuidojojjiya.

⁸ Ma esohui shajja'ajja majje epona cuaa Jesosaja esohui shahuaba ca'ya cua. ⁹ Majoya aje poqui cuajicuajji'ya cua pea cuana huohui'yohua. Huohui cañaquia cua o shajja'ajjaji cuana, ojjaña cuana pea'ai Jesosa shequi'yona. ¹⁰ Mania Madanena, pea Mania Jacoboja nae, Huana, pea epona cuana pea'ai poquia cua huohui po'yohua. ¹¹ O shajja'ajjaji cuaa epona cuana ohua huohui cajje, jama aca cua ba'a: —Epona cuana, siajje mi ca cuani Jesosa eshequi'yojo miame. Miqúanajaya esohui shajja'ajja sa po ajja ca iña —jamaya cuaa aca cua.

¹² Peno ca ca quea cuejipashi nei poquia cua mei jjani yasijje ba'ajja'yohua. Bañaqui majje mei jjani ye'e'ajja cañaquia cua ma Jesosa jaa cuajo. Ba ca cua o bebojji oe ani, oja jaejana'yo jja oe ania cua.

—De, chama'yo Jesosa yaña, de —jamaya Peno cua. Jamaya po majje poqui o'oya cua equi yasijje. Poquianajo oya jjashahuabaquia cua Jesosajo. Ojaya ba jjima; jamajjeya jama cua ba'a: ¿Yajja shai po'yona Jesosa? —jamaya cua Peno.

Becanejjiji pea'ai o shajja'ajjajiya Jesosa ba ca cua Emao jiojijje poquijeya (Macoso 16.12-13)

¹³ Oya pojjaño tii, becanejjiji pea'ai o shajja'ajjaji cuana poquia cua Emao cuiñajji yasijje. Quea huesha pishana cua Jenosanena ebañaquiiji. ¹⁴ Jesosa emano'yo niñeba ca poquia cua. ¹⁵ O mimi poquijejo Jesosa jjanequichipiquia cua onijje. Jjanequichipiqui majje onijje poquia cua. ¹⁶ Jesosa ba majje ba tai ca'yona, pea deja posoya aca cuaa cua. ¹⁷ Majoya aje Jesosaa jama huohui'ajjame aca cua ba'a: —¿A'ya cae nequiaa ca niñeba poquijaje so'o?

¹⁸ Majoya Quiopasiya jama saja'ame aca cua ba'a: —¿A'a miquea eba ma onaa acanaje Jenosanenajo?

¹⁹ Majoya aje jjaja Jesosa jama cua ba'a: —¡Huohui'ajja socue mo yajja acuae mi cuanaje!

Oya jama aca cuaa cua ba'a: —Jesosa Nasanenajo ba'e. Oya quea sohui poja nee nee cuanaje. Ohuaya Eyacuiñajjiya esohui huohui canaje, de. Ojjaña deja jjashahuabaquinaje ojaya esohuijo. ²⁰ Majoya Jodio etii cuaa, emeshi mese cuaa, Jesosa iña mee ca'yona, acui ecueata'apeejo quecua mee ca'yona. ²¹ Ecuana jjashahuabaquinaje Jesosa Jodio deja cuanaja emeshi mese epojjiyo Eyacuiñajjiya huoojea'yo pea'ajo. Oya ca ca chama'yo tii po'yona, de. Pea beca peejjima cahuime oya emano'yojaa. ²² Jiquio pojjaño mecajjeahua nei nei epona cuana poquinaje mei jjani yasijje Jesosa shaa nisho. Jjajjasoquinaje Jesosa chama'yojojo. ²³ Jesosa emano'yojaa ba'yo jjima cuanaje, jamajjeya cue o'oyanaje huohui po'yohua. Majoya aje pa ponaa ohuaya esohuidojojji ani ba canaje jjani dojjojo ani. Jama huohuimeya aje pa pona majoya acanaje ba'a: “Jesosa ca ba emano'yo tii pojjeama jaa, shequi'yona ca coma” jamaya pa pona acanaje. ²⁴ Majoya epona cuaa huohui cajje poquinaje beca cuana mei jjani yasijje. Mei jjani bañaqui majje chama' Jesosa ba canaje. Ma ecua epona cuaa esohui acanaje jayojjaya cuanaje. Onajaya Jesosa eshequi'yo ba'yo jjima tii cuanaje, de —jamaya mimia cua o shajja'ajjaji cuana.

²⁵ Majoya aje Jesosaa jama huohuime aca cua ba'a: —Miqúanaya jjashahuabaqui ajja Eyacuiñajjiya esohuijo. ²⁶ ¿A'a miqúanajaya ba jjima Eyacuiñajjiya huoojea'yo ebionei camanoqui'yahua? Majoya shequi'yo majje, eyahuasijje poqui majje Eyacuiñajji ebañeije anioqeje'yo tii tii ojjaña Emeishi Mese epo'yojji tii tii. Jamaya yahuaño tehue ca cua Eyacuiñajjiya esohuijo. ¿A'a miqúanaya pajea'yona pojja'a? —jamaya Jesosaa aca cuana cua.

²⁷ Majoya poquijeya Jesosaa oya cuana huohui ca poquia cua ojjaña Eyacuiñajjiya esohui ojo. Ohuaya huohui coo ca cua Moisesija ojo oja tehue majoya pea esohui huohuijji cuanaja ojo oja tehue huohui ca cua.

²⁸ Majoya Emao ba cañaquia cua. Majoya aje bañaqui majje Jesosa ca jjayeje'ajjaquinana cua. ²⁹ Majoya aje o shajja'ajjaji cuaa Jesosa jama aca cua ba'a: —Siña coma, jjaapoquia coma. ¡Ecuana nijje oe cahui chichacue! —jamaya cuaa aca cua.

Majoya Jesosa onijje dobiquia cua oe equi yasijje. ³⁰ Majoya aje anioquea cu e'ijjia'ijjiajji. Majoya aje anioque majje Jesosaa pahui jjeshe ca cua. Pahui jjeshe majje Eyacuiñajji nijje mimia cua. Eyacuiñajji nijje mimi majje pahui miji ca cua. Majoya aje miji majje quia ca cuana cua. ³¹ Pahui quia cajje Jesosa bahuejja ca'ya cuaa cua. Jama cua ba'a: —E'e de, a'a jja mi Jesosa, de. E'e jojo nei miya shequi'yonaaje, de —jamaya o shajja'ajjajji cuaa aca cua.

Majoya aje Jesosa jjachamaqui'ya cua, de. ³² Majoya aje cuana jama mimime po ania cua ba'a: —E'e de, e'e jojo nei mi eyaya anaje yaña, de. Ecuea equijijji peyaanaje o shajja'ajja majje. Quea bihui nee eseya cuanaje Eyacuiñajjija esohui shajja'ajja majje.

³³ Majoya aje o shajja'ajjajji cuana ocuayaya cue'ya cua Jenosanena huasijjeya mecajje tiya. Bañaqui majje ba ca cua pea Jesosaja shajja'ajjajji cuana, 11 ejjachichaqui ani pea epeeji cuana nijje. ³⁴ Pea cuaa majoya jama aca jjequia cua ba'a: —E'e jojo nei, de. Jesosa shequi'yonaaje. Simohuija eba nei nei oya cuanaje.

³⁵ Majoya aje Emao huasijje poqui cuaa jama huohuime aca cua ba'a: —Ecuana poquianajo Emao huasijje, oe dejja poquinaje ecuana nijje. Oya miminaje ecuana nijje, de. Majoya ecuana ijjia'ijjianaje ojee. Ohua pahui miji cajo ecuaaya oya bahuejjanaje Jesosa cuanaje, de. Oya ca ca shequi'yonaaje, e'e jojo nei, de.

Jesosa ba ca cua o shajja'ajjajji cuaa

(Mateo 28.16-20; Macoso 16.14-18; Huani 20.19-23)

³⁶ Jesosa jjapanaquia cua ona mimiani yiyesamajo. Jesosa jama cua ba'a: —¡Yani eya, de! ¡Quea bei oe pocue nequiana!

³⁷ Jesosa ba majje quea mete nee nee cua o shajja'ajjajji cuana eshahuajo poso. ³⁸ Jesosa majoya jama cua ba'a: —¿Yajjaje acuae nequiana quea mete cuani so'o? ¿Apiojji miquianaya jjashahuaba quehuaquiani? ³⁹ ¡Bacue mo oe! Ecuea eme jjoto huejja namoja quecua huejja yani, ejiojijje pea'ai, de. Eyami nei jja iña iquio, eshahua pojjeama. Eshahua ca jja ca yamima', sama' pea'ai, de. ¡Napa'ajja socue mo, ecuea eyami; ba neinei'ajja socue mo!

⁴⁰ Majoya Jesosaa ojaya eme ja'a ca cua, ejiojji pea'ai. ⁴¹ Onaaya ca Jesosa pojjeama poso aca cua quea bihui jjejojo. Jjashahuabajeaqui jjima cua. Jamajjeya Jesosaa oya cuana huohui'ajja ca cua ejjashahuaba meequijji jama ba'a: —¡Bacue eya, eyami nei; che mo bobi quiacue nequiaa! Eya ca ca eshahua pojjeama, eshahua cuana ca ca ijja'ijjia ajja.

⁴² Majoya aje onaaya Jesosa nahuoo cuaquijo dahua quia ca cua. ⁴³ Jesosaa nahuoo ijja ca cua, ona cojja nei aniya. ⁴⁴ Majoya ohuaya jama aca cua ba'a: —Eyaya mano'yo jjimahuaa miquianaya huohuinaje pea cuaa eya quecua mee caje'yo. Majoya eya shequije o'oya. Jamaya Moisesija etehue'yojo, cua, Salmo etehue'yojo pea'ai huohui ca cua ejo. Ojjaña Eyacuiñajjija esohui huohuijji cuaa ejo tehue ca cua pea'ai —jamaya Jesosa cua.

⁴⁵ Majoya Jesosaa huohui ca cua Eyacuiñajjija etehue'yo ona jjabahuejjaquijji. ⁴⁶ Ohuaya jama aca cua ba'a: —Jama tehume'ya cua ba'a: “Eyacuiñajjija huoojea'yo ojjaña jaahua-najji mano'yo. Mano'yo majje shequije'yo pea beca pееjima cahuime po majje.

⁴⁷ Ojjaña cuaa ojjaña meshi yasijje cahuohui ca'yahua Eyacuiñajjija esohui, ojaya epeeji epojji. Ebionei Jenosanenajo cahuohui coo ca'yahua. Eyacuiñajji nijje cajjapeequi'yahua, mimishi cuana capajea ca'yahua. Majoya pea cuiñajji cuana huasijje capoquiahua ojaya esohui huohuiya”. ⁴⁸ Jjeya nei miquianaaya eya banaje, shajja'ajjanaje jiquio esohui. Jamajjeya ja'a pajea'yojji; huohui titiicue! ⁴⁹ ¡Bacue oe, eyaya Edojjoshahua Bame huoo-jeaje miquiana huasijje, miquiana quea bame ba'e meejji! Ecue Chiya yahuajo huohui canajeya jjejojo Edojjoshahua Bame huoojeaje'yo eyaya. Jamajjeya jiquiojjo tii anicue! ¡Jenosanenajo tii ishoo'ajjacue Edojjoshahua Bame nei cueje eyajo ani! Ohuaya miquianaya quea jjashahuabaqui ja'a po mee caje'yo —jamaya Jesosa cua.

Jesosa poqui'ya cua eyahuasijje

(Macoso 16.19-20)

⁵⁰ Majoya aje Jesosaa o shajja'ajjajji cuana dojo ca cua Betania huasijje. Bañaqui majje Jesosaa eme jeasohua ca cua, jama mimime cua ba'a: —¡Enijje jjapee neineiquicue! ¡Jjashahuabaquicue Eyacuiñajjijo miquianaya quea ca'a epojji!

⁵¹ Majoya aje Jesosa eyahuasijje poqui'ya cua. ⁵² Oya cuana Jesosajo quea bihui nee nee po'ya cua. Majoya aje huacuayaya cue'ya cua Jenosanena huasijje quea bihui nee nee.

⁵³ Majoya aje poqui majamaja nequia cua Eyacuiñajjija equi yasijje Eyacuiñajji bihuiaa.

E'e de, acua. Eyaya, Nocaa tehuejeyonaaje. Mahuisoya.

HUANIYA ESOHUI QUEA PAME NEE TEHUE CANAJE JESOSA QUITOJA JUAN

Eseya Eyacuiñajji ba meeya Jesosa Quito meshi yasijje poeyanaje ese jayojja yamijji

¹ Yahuaajo nei nei meshi, aquiana cuana, dejja pea'ai pana jjimahuajo, Jesosa Quito yaña tiya poa Eyacuiñajji nijje. E'e, oya Eyacuiñajji nei neiya e'e jojo nei poa. ² E'e, oya Eyacuiñajji nijje yaña poa yahuajo nei nei meshi cuana, ojjaña aquiana cuana pana jjimahuajo. ³ Eyacuiñajjiya oya pana mee ca'ya poa aquiana, meshi cuanaya, dejja, epona pea'ai, ojjaña pana ca'ya poa Jesosa Quitohua. Ojjaña aquiana pana jjima jjemo, chama' pome. ⁴ E'e, oya, Jesosa Quito, yaña tiitia poa. Ohuaya eseja Eyacuiñajji ba mee cani. Jamajjeya ohuaya ba'e tiiti mee cani eseja cuana. Eyacuiñajji quea ja'a jjashahuabaqui mee cani pea'ai. ⁵ Jamatii mecajje quea apo nee neejo cuaquijjiya jeaja'a cani. Jiquio ecua cuaquijji mecajje jijinequiani jama jayojja Jesosaa dejja mimishi cuana quea ja'a nee jjashahuabaqui mee cani. Eshahuua Jesosa Quito eseja jaahuana pajea mee sa acani. Chojja. Ohuaya ojaya epeeji cuana jaahuana tiiti cani. E'e, oya cuaquijji quijjo'yo ajja jama.

Huani, Sacaniaja bacua ejja

⁶ Oe dejja Jodea meshijo ba'e Huani bajani Eyacuiñajjiya huoojea canaje Jesosa Quito huohuiya. ⁷ Eyacuiñajjiya Huani jama acanaje ba'a: —¡Poquicue miya! Ojjaña huohuiquicue jama ba'a: “Eyacuiñajjiya huoojea'yo ma cuaquijji quijjo'yo ajja jayojja poeyani ojjaña cuana quea ja'a jjashahuabaqui meeya. Jamajjeya ¡onijje jjapeequicue!”

Jamajjeya Eyacuiñajjiya Huani huoojea canaje.

⁸ Oya Huani ma cuaquijji jayojja jama pojjeama; oya ca ca oma oe poquinaje Jesosa Quito huohuiya, ma cuaquijji jayojja huohuiya.

⁹ Eyacuiñajjiya Jesosa huoojea canaje meshi yasijje. Ohuaya ojjaña cuana quea ja'a jjashahuabaqui mee caje Eyacuiñajji. ¹⁰ E'e, oya ma cuaquijji jayojja poeyanaje dejja cuana nijje ba'eya. Yahuaajo ohuaya meshi cuana, dejja cuana pea'ai pana ca'ya poa. Jamatii oya dejja cuanaja ba jjima ojjaña cuana pana'yojji epo. ¹¹ E'e, oya poeyanaje Jodea meshi yasijje, ojaya huapa pojjeama cuana huasijje. Jamatii oya cajaa acanaje beca cuaa: —¡Chojja, oya Eyacuiñajji bameeji pojjeama! —poso beca cuaa acanaje.

¹² Beca cuaa ca ca Jesosa Quitoja esohui shajja'ajja canaje. Ojo jama acanaje ba'a: —E'e jojo nei oya Eyacuiñajji ese bameeji poani —acanaje beca cuaa.

Jamaya jjashahuabaquianijo, Jesosaa oya cuana Eyacuiñajjiya bacua cuana po mee canaje jama ba'a: ¹³ Yahuaajo eseja ejaajjiya eseja jea ca poa; eseja eneseja eseja mejo ca poa. Jamajjeya eseja cuayani ese ejjaja bacua, Eyacuiñajjiya bacua pojjeama. Eyacuiñajjiya ca ca eseja oja bacua a sa acanijo ohuaya ohuaye nei eseja oja bacua po mee cani.

Esohui quea bihui nee Jesosa Quitojo

¹⁴ Jamajjeya oya Eyacuiñajji ese ba meeya poeyanaje yamijji, ese cuana nijje ba'eya. Ecuanaa oya banaje quea ca'a nee nee. Oja Chiya oya, oja Bacua Ejja oe nei quea ca'a nee huoojea canaje meshi yasijje ese cuana jaahuana tiitijji. Ohuaya ojjaña Eyacuiñajji esohui e'e nei huohui canaje ojjaña huasijje pea'ai.

¹⁵ Huaniya ojo huohui canaje. Majoya oya ba majje taanaje jama ba'a: —¡Bacue! Jjeya nei pea dejja quea pame nee poeje. Yahuaajo nei nei e cuaya jjimahuajo oya yaña tiitia poa Eyacuiñajji nijje. Jamajjeya oya quea ca'a nee nee; eya quea ca'a pishana —poanaje Huani.

¹⁶ E'e, eseja shajjama' poani. Jamatii ohuaya ojjaña cuana quea jea nee nee atitii cani quea pame nee nee. ¹⁷ Yahuaajo nei nei esohui huohuiji Moisesiya esohui Eyacuiñajjiya ehuohui'yo cuana tehue majje ba mee ca'ya poa. Jesosa Quitohua, ma Eyacuiñajjiya huoojea'yo ojjaña jaahuanajjiya ca ca ojjaña cuana ba mee canaje Eyacuiñajjiya eseja cuana quea jea nee nee acani, ojaya esohui e'e nei ba mee cani pea'ai. ¹⁸ Eyacuiñajji Echii Ai jjacojja ba meeqojja ajja tii. Jamatii oja Bacua Ejja oe nei Eyacuiñajji nei pea'ai, Eyacuiñajji nijje nequi, oja Chii nijje tii. Ohuaya eseja Eyacuiñajji ba mee cani, oja Chii.

*Huaniya, ma ona besameeji poaniya huohui canaje Jesosa Quitojo
(Mateo 3.11-12; Macoso 1.7-8; Noca 3.15-17)*

Huaniya, ma ona besameeji poaniya Betania cuiñajji, Jodana cuei ojje mijije nequi, ojjaña cuana Eyacuiñajji besa mee canaje. ¹⁹ Jamajjeya Jenosanena cuiñajji ba'eya Jodio dejja etii cuaa Huani que huoojea canaje Eyacuiñajji nijje emimijji cuana, Eyacuiñajjiya equi

jaahuanajji cuana pea'ai. Huani ba majje huohui'ajja canaje: —¿A'ya cuae mi so'o? ¿A'a miya Eyacuiñajjija huoojea'yo ojjaña jaahuanajji?

²⁰ —Chojja —saja'ame acanaje Huaniya —, chojja, eya Eyacuiñajjija huoojea'yo ojjaña jaahuanajji pojjeama. Eya ca ca iña Quito pojjeama —poanaje.

²¹ —Jamajjeya ¿a'ya cuae mi oe so'o? —huohui'ajja canaje—. ¿A'a miya Enia, Eyacuiñajjija esohui huohuijji yahuajo ba'ya poa?

—Chojja —saja'ame acanaje Huaniya—. Eya Enia pojjeama.

Jamajjeya huohui'ajja ca o'oyanaje cuaa jama ba'a: —E'e. Yahuajo Moisesiya huohui ca poa Eyacuiñajjija pea esohui huohuijji nei poeje. ¿A'a miya ma esohui huohuijji neiya?

—Chojja —Huaniya acanaje.

²² Jamajjeya Jodio cuaa Huani huohui'ajja ca o'oyanaje: —¿A'ya cuae mi oe? ¿A'ya cuae mi poani so'o, de? ¡Huohuicue mo oe! Jodio etii cuaa ecuaa huoojea canaje mi baa. ¿Yajja huohuiñaqui'yome acuae oe aje o que poqui o'oya majje so'o?

²³ Jamajjeya Huaniya saja'a canaje jama ba'a: —Yahuajo nei nei Eyacuiñajjija esohui huohuijjiya Isaiaa ejo huohui ca poa jama ba'a:

“Quijje esohui huohuijji poeje esohui huohuiya. Meshi quimajo huohui huicha'a huicha'a caje jama ba'a: “Emeshi mese nei poeje. ¡Jamajjeya oe apoa pocuajicue! ¡Jamajje o poeyajo, ojaya esohui quea ja'a nee shajja'ajja neinei'yocue!”

Jamaya aca'ya poa Isaiaa yahuajo —Huani poanaje.

²⁴⁻²⁵ Jamajjeya ma Jodio dejja cuanaa Huani huohui'ajja ca o'oyanaje: —¿A'a e'e jojo nei miya Eyacuiñajjija huoojea'yo ojjaña jaahuanajji pojjeama? ¿A'a cuae mi Enia pojjeama, ma Eyacuiñajjija esohui huohuijji yahuajo ba'ya poa pojjeama so'o? ¿A'a cuae mi Eyacuiñajjija pea esohui huohuijji nei, ma ecuanaja etiquiaa ishoa'ajja caninaje pojjeama so'o? ¿Acha-jjajo acuaeya oe miyaya ecuaa, Jodio cuana, besa meeña Eyacuiñajjijo so'o? —poanaje cuana.

²⁶ Huaniya jama acanaje ba'a: —Eyaya miquianaya Eyacuiñajjijo besa meeña cuei enajo. Pea dejja jiquio tiijo nequi. Jjeya oya miquianajaya ba jjima. ²⁷ Oya quijje pishana miquianajaya eba poaje Eyacuiñajjija huoojea'yo ojjaña jaahuanajji. Oya ca ca oe nei quea ca'a nee nee nequi. Eya ca iña quea ca'a nee pishana. Jamajjeya aje oe eya Jesosa Quito cojja neijo nequi sa po ajja. Eya quea bicho, de.

²⁸ Jamaya poanaje Huani Betaniajo, Jodana cuei ojje mijijje nequi, ojjaña cuana Eyacuiñajjijo besa mee canijo.

Jesosa Quito Eyacuiñajjija huoojea'yo ojjaña cuanaja mimishijo mano'yohua

²⁹ Majoya mecahuajje Huaniya ojjaña huasijje esohui huohui ca o'oyanijo, Jesosa o que poeyanaje. Huaniya Jesosa ba majje ojjaña cuana huohui neinei canaje jama ba'a: —¡Bacue oe, oya poeyani Jesosa, Eyacuiñajjija huoojea'yo! Oya manojje'yo ojjaña cuanaja mimishi cuijea'yojji. E'e, Eyacuiñajji nijje emimijji cuaa ñajajja cuia majje Eyacuiñajji yasijje dahua cani oya mimishi cuanajo quene'ama epo meeji. Ñajajja jayojja jama poaje'yo Jesosa; manojje'yo ojjaña cuanaja mimishi cuijea neinei'yojji —Huani poanaje—. ³⁰ E'e, yahuajo pishana eyaya miquianaya huohuinaje ojo jama ba'a: Jjeya nei pea dejja quea pame nee nee poeje. Yahuajo nei nei e cuaya jjimahuajo oya yaña tiuya poa Eyacuiñajji nijje. Jamajjeya oya quea ca'a nee nee; eya quea ca'a pishana —Huani poanaje.

³¹⁻³³ —E'e, yahuajo oya ecuea ba jjima poa. Jamatii Eyacuiñajjiya e huoojea jjimahuajo huohui canaje jama ba'a: “¡Dejja cuana besa meecue enajje ejo! Besa meeñaajo, miyaya baje oe dejja. Ecuea Edojjoshahua Pame huia' jama ma dejja sapa biasje cuabesa ba'eje; jipashineijje ba'eoqueje'yo. Maya ecuea ecue Bacua Ejja, ecue huoojea'yo. Ohuaya ojjaña miquiana que Edojjoshahua Pame dobiqui mee caje'yo, miquiana quea ja'a nee nee ejjashuabaqui meeji” eya acanaje Eyacuiñajjiya —Huani poanaje.

—E'e, eyaya e'e jojo nei banaje jama ba'a: Eya Jesosa besa meeñaajo, eyatahuatahua jjaca'apejoquinaje. Eyacuiñajjija Edojjoshahua Pame huia' jama o sapa biasje cuabesa ba'enaje. Jipashineijje ba'eoquenaje. Jamajjeya jjeya oya ecuea eba nei nei, Jesosa. Yahuajo miquianajaya oya ba jjima. Jamajjeya eya poeyanaje ojjaña Eyacuiñajjijo besa meeya. Miquianaya oya Eyacuiñajjija huoojea'yo ojjaña jaahuanajji ba meeya eya poeyanaje pea'ai. ³⁴ Jamajjeya eyaya miquianaya huohui neineiaña: E'e jojo nei nei eyaya oya banaje. Jesosa ca ca oe e'e jojo nei Eyacuiñajjija Bacua Ejja oe nei —poanaje Huani Jodio cuana nijje.

Jesosaa iyaa canaje beca dejja onijje e'ani titiijji, o shajja'ajajji

³⁵ Majoya mecahuajje Huaniya, ma ona besameeji poaniya jomajo, Jodana cuei sahuajo nequiya esohui huohui canaje oja epeeji nijje, becanejijji pea'ai nijje. ³⁶ Jesosa jiyajeje-quiani ba majje Huaniya oja epeeji cuana huohui canaje jama ba'a: —¡Bacue Jesosa! Oya Eyacuiñajjija huoojea'yo. Oya manojje'yo ojjaña cuanaja mimishi cuijea'yojji.

³⁷ Huanija esohui Jesosajo shajja'ajja majje oja epeeji becanejijiji pea'ai Jesosa nijje poquinaje. ³⁸ Jesosaa ejiojijije poquijeya Huanija beca epeeji o quiquishijji poquije baja cañaje. Ba majje huohui'ajja canaje: —Epeeji cuana, ¿ajeo miya enijje poeyani?

—Esohui huohuijji —saja'a canaje—, ecuana poeyanaje mi baa; mi shajja'ajja sa poani. ¿Achejo ba'e miya? —poanaje.

³⁹ —E'e —Jesosa poanaje—, ¡ocue poe'ajja! ¡Cua'a, enijje po'yocue!

Jamajjeya Jesosa nijje poquinaje equi yasijje, o ba'e yasijje. Onijje aninaje ma pojajajo, eshequi oquequiajo; o shajja'ajjajji po'yonaje oya cuana, ma bajjani ba'a: Anesi oja epeeji nijje pea'ai. ⁴⁰ E'e, Anesi pea dejja nijje Huanija ehuhui shajja'ajja majje Jesosa nijje poquinaje. Anesi ca ca Simohuija echahua mese, ma quijje bajjani canaje Penoja echahua mese. ⁴¹ Jamajjeya mecajjeahua nei Anesiya oja o'i sa'ajja canaje. Ba majje huohui canaje: —O'i, eyaya Eyacuiñajjija huoojea'yo ese jaahuanajji banaje, Jesosa Quito.

⁴² Majoya Anesiya oja o'i Simohui bajjani Jesosa que dojo canaje. Simohui ba majje Jesosaa huohui'ajja canaje jama ba'a: —Epeeji, miya ecuea eba. Miya Huanija bacua eja, Simohui bajjani. Eyaya miya bajjanije'yo ecuea esohuijo Sepa bajjani —poanaje. Jienoja esohuijo Peno bajjani canaje, Ese Ejjaja esohuijo Mei bajjani.

Jesosaa iya canaje pea cuana onijje e'ani tititijji, o shajja'ajjajji

⁴³ Majoya mecahuajje, mecajjeahua nei Jesosa poquinaje Janinea meshi yasijje, Jodana cuei ojje miji yasijje. Poqui jeahuua Penipe ba canaje. Ba majje iyaa canaje: —Penipe, ¡ocue poe'ajja, enijje po'yocue; ecuea epeeji po'yocue! —Jesosaa acanaje; o que poquiajo ojaya epeeji pojji aca'yonaje.

⁴⁴ Penipe, Peno, Anesi pea'ai ca ca oe Betesaida cuiñajjijo ba'e. ⁴⁵ Jamajjeya Penipeya oja epeeji Natanaeni sa'ajjaqui canaje. Ba majje huohui canaje: —Ecuea epeeji, ecuaana Eyacuiñajjija huoojea'yo ese jaahuanajji banaje. Ojo Eyacuiñajjija esohui huohuijjiya yahuajo nei nei ba'ya poaa, Moisesiya pea'aiya tehue ca poa, ma ojjaña Jodio cuaa ishoa'ajja caniya. Oya Jesosa bajjani, Joseja bacua eja, ma Nasanena cuiñajjijo ba'enaje. Eyaya maya banaje, de —poanaje Penipe.

⁴⁶ —¿A'a oya Nasanenajo ba'enaje? Jomajo pa jjaja chama' dejja quea pame —poanaje Natanaeni.

—Chojja —poanaje Penipe—, ¡poecue, oya bahuacue!

⁴⁷ Jamajjeya oya cuana poquinaje Jesosa baa. Majoya Natanaeni poeje ba majje Jesosa onijje miminaje jama ba'a: —E'e Natanaeni, miya Jodio e'e jojo nei. Eyacuiñajji shajja'ajjajji poani. Miya ca ca oe sijaje po ajja nei nei pea'ai.

⁴⁸ Ma shajja'ajja majje Natanaeni jama poanaje ba'a: —¿A'a eya miqnea eba? ¿Ache shono acuaeya miyaya eya banaje so'o? —poanaje.

—Natanaeni, miya ecuea eba yahuajo. Penipeja iyaa jjimahuajo, iquena acui yajjanajo ani eyaya miqnea ejjashahuabaquijji banaje —Jesosaa poanaje.

⁴⁹ Jamajjeya Natanaeniya acanaje: —Esohui huohuijji, e'e jojo nei miya Eyacuiñajjija Bacua Eja oe nei poani tii. E'e, ¡miya Jodio cuanaja Emeshi Mese nei!

⁵⁰⁻⁵¹ Jesosaa oya huohui canaje: —Eyaya miya huohuinaje jama ba'a: “Eyaya miya banaje iquena acui yajjanajo ani”. Jamajjeya ecuea esohui shajja'ajja majje miya jjashahuabaquinaje jama ba'a: “E'e jojo nei miya Eyacuiñajjija Bacua Eja”. Jamajjeya miyaya baje Eyacuiñajjija eya ma dejjaja ba jjima amee caje'yo. Cuanaya Eyacuiñajjija esohuidojojji cuana nequioqueje e jaahuanaa, ojjañaja Edoe Mese jaahuanaa. Jamaya miyaya baje'yo, Natanaeni, enijje jjapeequianijo —Jesosa poanaje.

2

Oe dejja jjahuanaquinaje Cana cuiñajjijo

¹ Majoya beca cahuime po majje oe dejja jjahuanaquinaje Canajo, Janinea meshijo. Ejjahuanaquijjijo quea huiso cuana iyaa canaje ojee ijja'ijjiaa. Jesosaja enaese Mania iyaa canaje pea'ai. ² Jesosa o shajja'ajjajji cuana nijje poeyanaje pea'ai jjahuanaquije baa, ojee ijja'ijjiaa pea'ai. ³ Ojee ijja'ijjiaa anijo, acuijjajja na ishijeyo canaje cuaa. Jamajjeya Jesosaja enaese onijje miminaje jama ba'a: —Jesosa, bacue, acuijjajja na ishijeyo canaje cuaa. Oe poanaje. ¿Ae e'ishi'yojji?

⁴ —Ecue nae, ¿yajjajo acuae moya huohui'ajjaña acuijjajja najo? ¡ishoa socue oe! Quijje pishana eyaya oya cuana asahuaje —Jesosa poanaje.

⁵ Jamajjeya ojaya enaeseya echacojji cuana huohui canaje jama ba'a: —¡Jesosaja esohui jayojjaya nequiaa oe acue! —poanaje Mania.

⁶ Jomajo me oeje oe, 6 meshimisi ena nequijji quea quemoo nee nee, quea ao nee nee yani, 60 litros shojji. Ma meshimisiyo ena nequia cani eme shacua huicha'a huicha'ajji. Jamaya

oya cuaa acanaje ijjiia'ijjia jjimahuaajo. ⁷ Jamajjeya Jesosaa echacojji cuana jama acanaje ba'a: —¡Ena shocue meshimisi ai cuana huasijje! —poanaje.

Echacojji cuana: —E'e —poanaje.

Meshimisi ai cuana huasijje ena sho canaje. Cuatajea mee canaje. ⁸ Jamajjeya cuatajea cajo, Jesosaa echacojji cuana jama acanaje ba'a: —E'e. ¡Jjeya oe pojji dojcuc equi mese yasijje!

Jamajjeya oe pojji dojo canaje e'ishi mee'ajjajji. ⁹ Ma ena ishi'ajja canaje equi meseya. Jamatii ojaya ba jjima jiquio eteohuejjajo nequi ena Jesosaa acuijjajja na pojji acanaje. Echacojji cuanaja eba ojaye nei Jesosaa eteohuejjajo nequi ena acuijjajja na pojji aca'ya poa; pea cuanaja ba jjima. ¹⁰ Jamajjeya equi meseya ishi majje joya ejjahuanacuijji iyaa canaje. Huohui canaje jama ba'a: —Epeejji, jiquio acuijjajja na quea pame nee nee. Pea cuaa acuijjajja na quea pame, quea biquia nee ishi mee cani ebionei. Majoya ojjaña jejje majje acuijjajja na quea biquia pishana quia cani. Miyaya ca ca oe acuijjajja na quea biquia nee, quea pame nee nee quijje nei ishi meeña —poanaje e'equi mese.

¹¹ Jamaya acanaje Jesosaa Janinea meshijo, Canajo. Jamaya ohuaya ma dejjaa ajjima acani acoo canaje. Ba majje ojjaña cuana jama poanaje ba'a: —E'e jojo nei Jesosa quea ca'a nee nee. Ohuaya ojjaña acani, ma dejjaa ajjima acani pea'ai.

O shajja'ajjajji cuana pea'ai jama poanaje ba'a: —E'e jojo nei Jesosa Eyacuiñajjija huoojea'yo ojjaña jaahuanajji, Quito.

¹² Majoya Jesosa Capenaoma huasijje poquinaje. Oja nae, oja chahua cuana, ojaya epeejji cuana pea'ai onijje poquinaje. Jomajo aninaje cuana oe pojji cahuime.

Eyacuiñajjija equi yasijje poqui majje Jesosaa aquiana quiajji cuana huoojeacuayajea canaje

(Mateo 21.12-13; Macoso 11.15-18; Noca 19.45-46)

¹³ Quijje pishana ojjaña Jodio cuana Jenosanena huasijje poquinaje quea bihui nee ojee ijjiia'ijjiiaa ma shejo ba'a esohuidojojji cuaa yahuajo Ejito meshijo Jodioja ebacua cuana cuia'yo jjima shejo. Ma epajea'yojji pojjeamajo jjachichaquinaje. Jamajjeya Jesosa pea'ai poquinaje Jenosanena huasijje. Poe majje Eyacuiñajjija equi yasijje poquinaje. ¹⁴ Dobiqumi majje Jesosaa ba canaje quea huiso dejja cuaa aquiana quia cani; ana'ai yahue cuana, ñajjajja cuana, huia' cuana pea'ai quia cani. Bejjo pea bejjo sosejje quia caqui ba canaje pea'ai. ¹⁵ Ba majje Jesosaa jono ecuiasejjajjajji iña canaje. Dejja aquiana quiajji cuana, ñajjajja cuana, ana'ai cuana pea'ai cuiahuoojeacuayajea canaje esecue yasijje, ojjaña. ¹⁶ Bejjo pea bejjo sosejje quiajji cuanaja bejjo nequijji cuana jeapajjajea canaje; bejjo jjahuojjojeajeaqui canaje. Huia' quiajji cuana Jesosaa huohui canaje jama ba'a: —¡Jiquio equi ca ca ecue Chii nijje emimijji. Aquiana quiajji pojjeama equi. ¡Miquea aquiana cuana dojo'yocue esecue yasijje! ¡A'a jja oe Eyacuiñajjija equi aquiana quiajji equi jayojja jama ajji! —Jesosa poanaje.

¹⁷ Ma ba majje ecuaña, Jesosaja epeejji cuana, ojee jjashahuabaquinaje jama ba'a: —E'e, Eyacuiñajjija esohui huohuijjiya yahuajo nei nei tehue ca poa jama ba'a:

“Ecue chii, eya jjashahuaba neineiquiani miquea equi jaahuanajji. Jamajjeya mimishi cuaa eya niñeba cani”.

Jama tehuemeya aca poa yahuajo nei. Oya cuaa Jesosajo tehue ca poa, de —poanaje Jesosaja epeejji cuana.

¹⁸ Jamajjeya Jodio cuana Jesosa nijje quea quene poanaje, oya Eyacuiñajjija huoojea'yo pojjeama posojo onijje mimijajinaje jama ba'a: —¿Aya acuae mi huoojea canaje ecuaña Eyacuiñajjija equijo anijo huoojeacuayajea? ¿A'a cuae miya Eyacuiñajjija huoojea'yo nei? ¡Caba'ajja sahua! ¡Ma dejjaa ajjima acani a'ajja socue ecuanaja ebajji, Eyacuiñajjija e'e jojo nei miya a'a huoojea canaje ebajji!

¹⁹ Jesosaa oya cuana saja'a canaje: —¡Bacue! Miquiana jiquio equi jeabichajea'yajo eyaya jiquio equi iyaje o'oya pea beca peejjima cahuime.

²⁰ —Chojja, de —Jodio cuana poanaje—. Quea huiso nee nee, 46 shequiajame jiquio equi iya canaje cuaa. ¿Achajja acuae equi jeabichajea majje miyaya iyaje o'oya pea beca peejjima cahuime? ¡Chojja, de! —poanaje.

²¹ Jamatii Jesosa Eyacuiñajjija equijo pojjeama miminaje; ojaya eyamijo jjashahuabaquiani. ²² E'e, quijje Jodio cuaa Jesosa quecua'yo majje, Eyacuiñajjija oya shequi mee caje o'oya pea beca peejjima cahuimejo. Jamajje quijje Jesosa shequi o'oyajo, ecuaña o shajja'ajjajji cuana jiquio esohuijo jjashahuabaquije. Jama poaje ba'a: —E'e de, Eyacuiñajjija esohui e'e nei; Jesosaja ehuhui pea'ai e'e nei —poaje quijje.

²³ Jamajjeya Jenosanena huasijje Jodio cuana ojee jjachichaquinaje. Quea bihui nee ijjiia'ijjianaje esohuidojojjiya yahuajo nei Jodioja ebacua cuana cuia'yo jjima shejo, ma pajea'yo jjima yajji. Jesosa pea'ai Jenosanenajo aninaje. Jomajo Jesosaa quea huiso ma

dejaa ajjima acani acanaje. Ba majje quea huiso cuana poanaje: —¡E'e jojo nei Jesosa Eyacuiñajjija huoojea'yo ojjaña jaahuanajji! —poanaje cuana.

²⁴⁻²⁵ Jamatii Jesosaja eba nei nei ojjaña dejja cuanaja ejjashahuabaquijji. Quea tai, epeeji e'e jojo nei pojjeama beca cuana. Jamajjeya ohuaya ojjaña quea ja'a nee huohui jjima jama ba'a: —E'e jojo nei eya ca iña jiquio Eyacuiñajjija Bacua Eja —jamaya huohui jjima so'o Jesosaja.

3

Jesosa miminaje Nicodemo nijje

¹ Majoya oe dejja Jesosa que poeyanaje, oya Nicodemo bajjani. Oya Jodio etii cuana nijje pea Jodio cuana huoojeajji poani, Paniseo dejja cuana jama jjashahuabaquime poani.

² Oya, Nicodemo Jesosa que poeyanaje mecajje quehuajje. Jama acanaje ba'a: —Esohui huohuijji, Eyacuiñajjija miya ameesahua cani ma dejja ajjima acani. Jamajjeya ecuanaja eba Eyacuiñajjija miya huoojea canaje ecuaa sohuihuohuiya.

³ Jesosaa oya huohui canaje Eyacuiñajji nijje eba'e tiitii'yojji; jama poanaje ba'a: —Nicodemo, eyaya miya e'e jojo nei huohuiaña: ¡Bacue! Jiquio ecua epona jjamejoqui majje bacua cuayani jayojja jama Eyacuiñajjija miya cacuaya mee ca o'oyahua jiquio ecua esho'i cuayani jama. Jamajjeya Eyacuiñajjija miya ebacua sho'i jayojja jama acaje'yo, miya ba'e tiitii mee caje'yo onijje, ojjañaja Emeshi Mese nei nijje —Jesosa poanaje.

⁴ —Chojja de, ¿a'a cuae se dejja etii cuaya o'oyame so'o? —Nicodemohua acanaje—. ¿A'a cuae eseja enaeseja yone yasijje ba'edobiqui o'oya majje ebacua jama cuaya o'oyame so'o? Chojja, de —acanaje Nicodemohua.

⁵ Jamajjeya Jesosaa oya huohui ca o'oyanaje: —Nicodemo, e'e jojo nei ecuea huohui jama ba'a: Jiquio ecua ebacua esho'i cuayani jama Eyacuiñajjija miya cacuaya mee ca o'oyahua. Joya Eyacuiñajji shajja'ajjaji poani enajo besa mee majje, Eyacuiñajjija Edojjoshahua Pameya oya quea pame jjashahuaba tiitiqui mee majje pea'ai miya pea jjashahuabaquime poaje'yo. Oya Eyacuiñajji nijje ba'e tiitii'e'yo. Jamaya po ajjajo ca ca Eyacuiñajji nijje eba'e tiitii'yojji pojjeama eyajo. ⁶ E'e Nicodemo, ojjaña cuana enaeseja mejo bacua cuayani yahueja jea, oja chii jayojja yamijji. Joya Eyacuiñajjija Edojjoshahua Pameya pea jjashahuabaquime po mee ca'yani ca ca Eyacuiñajjija Edojjoshahua Pame onijje nequi —Jesosa poanaje—. ⁷ Eyaya miya huohuinaje e'e jojo nei ebacua esho'i cuayani jama Eyacuiñajjija miya cacuaya mee ca o'oyahua. Jamatii a'a jama jjashahuabaquijji ba'a: “Chojja de, ¿yajja epojji?” ⁸ Miyaya beni shajja'ajjaña; beni baña pea'ai acui iña dojo cani. Jamatii ache huesha beni poani miquea ba jjima; achacua poquije miquea ba jjima pea'ai. Jiquio ecua beni achacua poquije ba jjima jayojja jama miquea ba jjima pea'ai ache shono, achejo pojja'a Eyacuiñajjija Edojjoshahua Pameya dejja pea jjashahuabaquime po mee ca'yani. Jamaya miquea eba pojjeama. E'e, Eyacuiñajjija miya cacuaya mee ca o'oyahua ebacua esho'i cuayani jayojja jama —Jesosa poanaje.

⁹ —E'e pojja'a. ¿Achajja acuae ebacua esho'i cuayani jayojja jama epojji so'o? —huohui'ajja canaje Nicodemohua.

¹⁰ —Nicodemo, miya Jodio esohui huohuijji; Eyacuiñajjija esohui yahuaajo nei etehue'yo huohuijji. Jamajjeya ¿yajajo miquea ba jjima ebacua esho'i cuayani jayojja jama epojji eba'e'jji pea ba'eme epo'yojji? —Jesosa poanaje.

¹¹ —Eyaya, Huaniya ma ona besameejji poaniya pea'ai miya e'e jojo nei huohuiaña jama ba'a: Ma ecuanaja eba poa huohuiaña pea ba'eme epo'yojji; ma ecuaa yahuaajo banaje pea'ai huohuiaña. Jamatii miya, pea Jodio esohui huohuijji cuana pea'ai ecuanaja esohuijjo jama poani ba'a: “Chojja, siajje oya cuana poani”. E'e, miquianaaya ecuaa siajje'yo poso aña —Jesosa poanaje—. ¹² E'e, eyaya miya huohuiaña ebacua esho'i cuayani jayojja jama Eyacuiñajjija Edojjoshahua Pameya miya pea jjashahuabaquime po mee caje'yo, Eyacuiñajji nijje eba'e tiitii'yojji. Jamatii ecuea esohui quea quehua miquea. Jamajjeya eyaya miya Eyacuiñajjija ejjashahuabaqui'yoyji eyajo huohuiajo, ¿a'a ecuea esohui quea ja'a poaje miquea? Chojja, quea quehua poaje pea'ai. ¹³ ¡Shajja'ajjacue ecuea esohui, Nicodemo! Dejja cuana eyahuasijje dobiq'yo majje meshi yasijje epoe o'oyajji pojjeama ojjaña eyajo ba'e huohuiya, Eyacuiñajjija ejjashahuabaqui'yojji pea'ai epoe o'oyajji pojjeama huohuiya. Eya ma ojjañaja Edoe Mese eyajo ba'e'yonaje. Eya eyajo ba'e poeyanaje meshi yasijje. Jamajjeya eyaye nei baña ojjaña eyajo, Eyacuiñajjija ejjashahuabaquijji ecuea eba pea'ai —Jesosa poanaje—. ¹⁴ Cuanaya eya, Eyacuiñajjija huoojea'yo ojjaña jaahuanajji ba'ehuanasohua caje'yo cuaa. E'e, yahuaajo nei nei meshi jabojo Moisesiya baa peyo jayojja acui ajo ba'ehuanasohua ca poa ojjañaja ebajji; ojjaña joya peyoja ijia baa peyo jayojja ba cajo, Eyacuiñajjija huaquia mee ca'ya poa. Jiquio ecua Moisesiya baa peyo jayojja ba'ehuanasohua ca poa jayojja jamaya quijje eya ba'ehuanasohua caje'yo cuaa acui

ecueata'apeejo ojjañaja mimishijo mano'yohua, mimishi cuijea'yojji soseje. ¹⁵ Jamajjeya Eyacuiñajjiya ojjaña ba'e tiitii mee caje'yo onijje, ca ejo jama jashahuabaquiao ba'a: "E'e jojo nei ohuaya ecuea mimishi cuijea neinei caje'yo". E'e, enijje jjapeequiao, Eyacuiñajjiya quea nee nee epo mee'yojji pojjeama cuaquijo —Jesosa poanaje.

¹⁶ —E'e Nicodemo —Jesosa poanaje pea'ai—, Eyacuiñajjiya ojjaña cuana ojjaña meshijo ba'e quea jea nee nee acani. Jamajjeya eya, oja Bacua Ejja oe nei huoojea canaje ojjañaja mimishijo mano'yohua. Jamajjeya ojjaña joya e'e jojo nei enijje jjapeequiani Eyacuiñajjiya ba'e tiitii mee caje'yo onijje eyajo; quea nee nee epo tiitii mee'yojji pojjeama. ¹⁷ Ecue Chiija eya huoojea jima ojjaña tecueaa. Ecuea ejjashahuabaqui'yojji jama pojjeama ba'a: "Ojjaña cuana quea mimishi nee poanijo, quea nee nee po meeje'yo; quea nee tii tii". Chojja, Eyacuiñajjiya eya, oja Bacua Ejja oe nei onijje eyajo ba'ya poa meshi yasijje huoojea ca poa. Ojjañaja mimishi cuijea'yo majje enijje ba'e tiitii meeje'yo —Jesosa poanaje—. ¹⁸ Jamajjeya ojjaña joya e'e jojo nei enijje jjapeequiani Eyacuiñajjiya huohui caje jama ba'a: "Miquianaya ecue Bacua Ejja epeeji e'e jojo nei poanijo, mimishi cuijea'yo. Quea nee nee epo mee'yojji pojjeama cuaquijo" Eyacuiñajjiya acaje —Jesosa poanaje—. Pea cuana enijje jjapeequi ajjajo ca ca Eyacuiñajjiya yahuajo jama acaje ba'a: "Miquianaya ecue Bacua Ejja oe nei nijje jjapeequi ajjajo cajaa aje'yo, mimishi cuana cuijea'yo jima aje'yo. Jamajjeya quea nee tii tii poaje'yo" Eyacuiñajjiya acaje —Jesosa poanaje—. ¹⁹ E'e, Eyacuiñajjiya eya, oja Bacua Ejja huoojea canaje esohui e'e nei huohuiya, ojjaña cuana quea jashahuabaqui ja'a nee po meeya. E'e, eya cuaquijiji jayojja jama poanijo ojjaña quea jashahuabaqui ja'a po meeje'yo. Jamatii quea huiso cuana ecuea esohui shajja'ajja sa po ajja, mimishi cuana ojaya quea boti neejojo. Quea mimishi nee ba'e, de. Jamajjeya Eyacuiñajjiya oya cuana cajaa acaje'yo. Quea nee tii tii poaje'yo cuaquijo. ²⁰ Quea mimishi ba'eja boti'ama Eyacuiñajjiya esohui e'e nei; cajaa acani quea mimishi ba'yaniya jjejojo. Jamajjeya enijje jjapeequi ajja. Quea mete jashahuabaquiani jama ba'a: "¡Jesosaa mo tecuea caje ecue mimishijo!" ²¹ Ojjaña joya quea pame nee ba'eya ca ca Eyacuiñajjiya esohui quea boti nee acani. Enijje jjapeequianijo, eyaya oya cuana quea ecua jashahuabaqui ja'a po meeaña. Jamajjeya oya cuana jama poani ba'a: "E'e, Eyacuiñajjiya eya quea pame ba'e meesahua cani ojaya esohui jayojja" poani —Jesosaa Nicodemo huohui canaje. Majoya Jesosa Nicodemo nijje mimipajeanae.

Huanिया ma ona besameeji poaniya Jesosajo huohui ca o'oyanaje

²² Majoya Jesosa Jenosanenajo ani poquinaje o shajja'ajjajji cuana nijje Jodea meshi yasijje, pea cuiñajji cuana huasijje. Jomajo nequi cuana Jesosaa sohuihuohui canananaje. O shajja'ajjajjiya dejja cuana besa mee canananaje Eyacuiñajjiyo. ²³ Huanिया jomajo dejja besa mee canaje pea'ai Enoni cuiñajjiyo, Sanima cuiñajji pejejo pea'ai ena quea doejo. Ojjaña pojjaajo quea huiso dejja cuana, ponaña pea'ai Huani que poquinaje. Eyacuiñajjiyo enajo besa mee canaje. ²⁴ E'e, ma pojjaajo emeshi mese Enodeja Huani jeanobia jima poanaje. ²⁵ Jamajjeya oe Jodio dejjaa Huanिया epeeji cuana mimiciuajeanobia canaje. Jama poanaje ba'a: —¿Ache dejjaa acuae mi Eyacuiñajjiyo enajo besa mee majje eseya e'e jojo nei quea boejea po mee caje'yo so'o? ¿A'a Huanिया pojja'a? ¿A'a cuae peaa besa mee cajji, Jesosa shajja'ajjajjiya pojja'a besa mee cajji? —Jodio poanaje.

²⁶ Jamajjeya Huani que poquinaje ojaya epeeji cuana, huohui'ajjaa jama ba'a: —Esohui huohuijji, ma dejja joya yahuajo minijje nequinaje cuei oje minijje, ma ojo miyaya jama huohuinaje ba'a: "Oya Eyacuiñajjiya huoojea'yo ojjaña jaahuanajji", maaya jjeya o shajja'ajjajji nijje onaya besa mee cani; ojjaña cuana aje oe jjeya o que poquiani. Jesosaa quea huiso nee nee Eyacuiñajjiyo besa mee cani. ¿Apiojji shai? —poanaje Huanिया epeeji cuana.

²⁷ Huanिया oja epeeji cuana saja'a canaje: —¡A'a quea yeno pojji! Jamaya Eyacuiñajjiya oya pea cuana besa mee cani. Yahuajo quea huiso dejja e que poeyanaje; Eyacuiñajjiya oya cuana huoojea canaje. Jjeya ca ca ojjaña cuana Jesosa que poquiani; Eyacuiñajjiya oya cuana huoojea cani. ²⁸ Miquiaaya ecue sohui yahuajo shajja'ajjanaje. Jama poanaje ba'a: "Eya Eyacuiñajjiya huoojea'yo ojjaña jaahuanajji pojjeama. Eyacuiñajjiya eya huoojea canaje ebionei Jesosajo huohuiya". ²⁹ E'e —Huani poanaje—, Jesosajo jama jashahuabaquicue ba'a: Ejjahuanaquijjiyo, epona yahueja ehuanase poaje'yo. Jamatii yahueja epeejiya poe majje jahuanaquequi ba cani. Yahue ojaya ehuanase nijje mimiani shajja'ajja majje quea bihui nee poani ojaya epeeji. Jiquio ecua yahueja epeeji o ba majje quea bihui nee poani jayojja jama eya Eyacuiñajjiya huoojea'yo ojjaña jaahuanajji Jesosa bajjani ba coo majje quea bihui nee nee poani; eya Jesosaja epeeji. ³⁰ ¡Ojjaña cuaa oya cashajja'ajja tiitii cahua! Quijje ca ca ojjaña cuana e que poepajeaje'yo. Jamatii capohua —poanaje Huani, ma ona besameeji poani.

³¹ ¡Bacue! Eyacuiñajjija huoojea'yo ojjaña jaahuanajji eyajo tii ania poa, meshi yasijje poeyanaje. Jamajjeya oya ojjaña huoojea'yojji poani tii; ohuaya e'e jojo nei Eyacuiñajjija ejjashahuabaquijji ba mee cani. Huani ca ca jiquiojo anija mejo, dejjaja jea. Jamajjeya aje oe dejja, oja chii jayojjaya. Dejja jama mimiani. Jamajjeya Eyacuiñajjija esohui oe pojji ba mee cani, Huaniya. ³² Eyacuiñajjija huoojea'yo ojjaña jaahuanajji ca ca Eyacuiñajji nijje eyajo ania poa. Jamajjeya ohuaya jama huohui cani ba'a: "Eyacuiñajjija ejjashahuabaquijji ecuea eba nei nei. Maya eyaya miya huohuiaña". Jamatii ojaya esohui shajja'ajja sa po ajja beca cuana. ³³ Ojjaña joya e'e jojo nei oya shajja'ajja sa poani ca ca jama poani ba'a: "Eyacuiñajjija esohui e'e nei; ¡Cashajja'ajja'yahua!" ³⁴ E'e, Eyacuiñajjija huoojea'yo ojjaña jaahuanajjiya, Jesosaa Eyacuiñajjija esohui huohui cani e'e jojo nei. Eyacuiñajjija Edojjoshahua Pameya oya huohui meesahua cani; quea ja'a nee ameesahua cani tii tii. ³⁵ Eyacuiñajjiya oja Bacua Ejja quea jea nee nee acani tii. Jamajjeya oya jama poani Jesosa nijje: —Miya ecuea ecue Bacua Ejja quea jea nee nee. ¡Jamajjeya ojjaña huoojea'yojji pocue tii, meshijo, eyajo pea'ai! —poani Eyacuiñajji.

³⁶ Jamajjeya ojjaña joya e'e jojo nei Jesosa nijje jjapeequiani, Eyacuiñajjija Bacua Ejja shajja'ajja cani pea'ai onijje ba'e tiiti mee caje'yo eyajo. Ojjaña joya o shajja'ajja sa po ajja ca ca onijje eba'e mee'yojji pojjeama. Eyacuiñajjiya oya cuana cajaa acaje'yo; quea nee nee poaje'yo tii cuaquijo.

4

Epona Samania meshijo ba'e jjapeequinaje Jesosa nijje

¹ Jamajje Jesosa Jodea meshijo ani quea huiso dejja cuana o shajja'ajjaa poeyanaje, Eyacuiñajjijo besa meeya pea'ai. Jesosa nijje jjapeequinaje quea huiso nee nee. Majoya aje oe onaaya Jodio esohui huohuijji cuana, Paniseo cuana pea'ai huohui canaje jama ba'a: —Jesosaja epeeji cuana quea huiso nee nee; Huanija epeeji ca ca oe pojji —jamaya poanaje pea cuana.

Ma shajja'ajja majje Paniseo cuana quea quene poanaje Jesosa nijje. Jjashahuabaquinaje jama ba'a: —Ecuana quea huiso epeeji sa poani Jesosaja epeeji huisoajja —poanaje. ² (Jamatii Jesosa shajja'ajjajji cuana Eyacuiñajjijo enajo besa mee canaje cuana, Jesosa que poeyajo. Jesosaja ca ca pea cuana Eyacuiñajjijo besa mee jjima.) ³ Jamajjeya Paniseo cuana onijje quea quene ba majje Jesosa Jodea meshijo ani poqui o'oyanaje Janinea meshi yasijje, ecuaana nijje poquinaje.

⁴ Janinea meshi yasijje ejiojijje poquije Samania meshijo aniñaquinaje. ⁵ Samania meshijo ani poqui majje Sica cuiñajji pejejo Jesosa jomishoca aninaje ena eteohuejja quea doe pejejo. Jomajo yahuajo nei nei Jodio etiiquianaa Jacobohua ma meshijo que quia ca poa oja bacua ejja Jose. ⁶ Ma quejo yahuajo nei nei Jacobohua teo mee ca poa ena eteohuejja quea doe nee nee. Jamajjeya Jesosa ma ena eteohuejja huasijje poeyanaje eshequi biacojjajja nequijo. Jesosa hueahuea majje anioquenaje ma ena eteohuejja pejejo ejomishocajji. ⁷⁻⁸ Anioque majje Jesosaa ecuaana acanaje jama ba'a: —¡Poquicue miquianaya Sica huasijje bobi jjesheya!

Ecuana poquijajo oe Samania epona poeyanaje ena eteohuejja huasijje ena jjequisohuaa jjonajo. Jesosaa oya huohui canaje jama ba'a: —Epona, ¡che mo ena quiacue e'ishijji! —poanaje.

⁹ Jodio cuanaja Samania cuana boti'ama nei. Samania cuana nijje mimi ajja, ojee ijijja'ijjija ajja pea'ai Jodio pojjeama jjejojo. Jamajjeya ohuaya Jesosa saja'a canaje: —Miya Jodio dejja; eya ca ca Samania pona. Jamajjeya ¿apiojji miya enijje mimiani enajo, ena quiajji? —poanaje Samania pona.

¹⁰ —E'e —Jesosa poanaje —, eya miquea ba jjima. Eyacuiñajjija ejjashahuabaqui'yojji quea pame nee miquea ba jjima pea'ai. Maya miquea eba jjojtemo miya enijje jama mimime pome ba'a: "¡Che mo oe ena quiacue e'ishijji!" Miya jama enijje emimi jojjemo eyaya miya quia me ena naba taja'ama epo'yojji tii tii —Jesosa poanaje.

¹¹ —E'e pojja'a —epona poanaje —, ena eteohuejja quea doe nee nee nequi. Miquea chama' ena ejjequisohuajji. Jamajje ¿achejo acuae ena nequi, ma ena ishi majje eya quea naba taja po maja ajja epojji? ¹² Eseyaya etiiquianaa Jacobohua jiquio ena teohuejja mee ca poa yahuajo nei. Ohuaya oja bacua cuana, oja ñajjaja cuana, pea huo cuana pea'aiya ishi mee majamaja ca poa jiquio ena. Majoya ojjaña ecuaaya jiquio ena ishi majamajaña. ¿A'a cuae miquea pea ena eba? ¿Achejo nequi pea ena quea pame nee nee? Jacoboja ba jjima poa. Miya pojja'a quea jjashahuabaqui ja'a nee nee. ¿A'a Jacobo quea jjashahuabaqui ja'a pishana? —huohui'ajja canaje eponaa.

¹³ —Epona —Jesosaa huohui canaje—, ojjaña miquianaya jiquiacua poeyani ena ishiya. Jamatii ishi majje quea naba taja po o'oyani. ¹⁴ Eyaya pea ena quiaje ojjañaja e'ishijji. Ma

ena ishi majje quea naba taja po o'oya ajja. E'e, jjanijo ena oshe quea pame nee cuayani, huosa'yo ajja. Jiquio jayojjaya eyaya quiaje'yo. Jamajjeya eyaya miya ba'e tiiti meeje'yo —Jesosa poanaje.

¹⁵ —¡Che iña maya pea ena quiacue e'ishijji! —Samania ponaa Jesosa acanaje —. Jamajjeya eya quea naba taja po ajja o'oya poaje. Jamajjeya eya jiquio ena eteohuejja huasijje epoe o'oyajji pojjeama ena jjehuuaa —poanaje.

¹⁶ —E'e, ¡poquicue! ¡Miqueahue jjequicue! —Jesosa poanaje ma epona nijje.

¹⁷ —Chama' ecueahue —saja'ame acanaje eponaa.

—E'e jojo nei jjeya miquea yahue chama' —Jesosa poanaje—. ¹⁸ Ecuea eba jama ba'a: Yahua jo miquea yahue cuana me oeje huisome poa, ojjaña jja miquea yahue ehuei poanaje. Jjeya miya pea dejjajo ba'e, miquea yahue pojjeamajo. Jamajjeya miya e'e jojo nei poani: “Chama ecueahue” —Jesosaa acanaje Samania pona.

¹⁹ —E'e jojo nei ojjaña miquea eba. Jamajjeya ecuea eba miya Eyacuiñajji esohui huohuijji e'e jojo nei. ²⁰ Ecuana jja etiquianaa Eyacuiñajji bihuia ca poa jiquio Samania meshijo, eyiyo biajje. Miquianaya, Jodio cuana ca ca jama poani ba'a: “Jenosanenajo ca ca oeya Eyacuiñajji bihuiajji, pea eyiyojo pojjeama” miquianaya poani —poanaje Samania pona.

²¹ —¡Shajja'ajjacue mo, epona! —Jesosaa oya acanaje—. Quijje pishana miquianaaya Eyacuiñajji, esejaya Chii bihuiaje, ojjaña. Jiquio eyiyo huasijje poe jjimaa, Jenosanena huasijje poqui jjimaa pea'ai oya bihuiaje. ²² Jjeya ojaya esohui jayojja jama pojjeama aje oe miquianaaya, Samania cuaa Eyacuiñajji bihuiaña. Oya miquianajaya ba jjima. Ecuana ca ca Eyacuiñajji bihuiaña ojaya esohui jayojja. Eya oja huoojea'yo ojjaña mimishi cuijea'yojji Jodio dejja. Jamajjeya Eyacuiñajji ecuanaja eba, Jodio cuanaja. ²³ Jamajjeya jjeya nei ojjaña esejaya Chii, Eyacuiñajji bihuiaje e'e jojo nei, ojo quea ja'a nee jjashahuabaquije. E'e, Eyacuiñajji jama poani ba'a: “Jamaya eya cabihua cahua ojjaña. Jamaya ecuea quea boti nee” poani. ²⁴ Eyacuiñajji yani tii tii eshe. Jamatii oya jaba meequi ajja ecójja. Jamajjeya o bihuiajji epohua Eyacuiñajji cabihua cahua e'e jojo nei, ojaya esohui jayojja jama quea ja'a nee ojo jjashahuabaquiani —Jesosaa acanaje.

²⁵ —E'e —poanaje epona—, ecuea eba quijje Eyacuiñajji huoojea'yo ojjaña jaahuanajji poeje. Oya Quito bajjani poaje. Poe majje ohuaya ecua quea ja'a nee ba mee caje Eyacuiñajji esohui.

²⁶ —Eya ca ca iña jiquio Eyacuiñajji huoojea'yoya Quito bajjani. Jjeya nei miya Quito nijje mimiani —Jesosaa acanaje.

²⁷ Majoya Jesosa shajja'ajjajji cuana bobi jjeshe majje poe o'oyanaje Jesosa que. Jesosa ba caña'yonaje Samania pona nijje mimiani. Ba majje jjashahuabaquinaje jama ba'a: —¿Apiojji shai Jesosa epona nijje mimiani? —Jamatii huohui'ajja jjima: —Epona, ¿ajeo miya poeyanaje? —ajjima: —¿Jesosa, ajeo miya Samania epona nijje mimiani? —jamaya ecua mimi jjima Jesosa nijje poanaje.

²⁸ Majoya ena jjequijji ohua acani jea canananaje eponaa, poquicujinaje Sica huasijje huohui pohua. ²⁹ Ojjaña cuana huohui cañaquinaje jama ba'a: —¡Poecuajicue oe! Oe dejja ena eteohuejja pejejo ani; ohuaya ojjaña ecuea eba'ejji huohui ca'yonaje. ¿A'a oya pojja'a Eyacuiñajji huoojea'yo ojjaña jaahuanajji? ¡Poe'ajja! ¡Ejjaba'ajjaquiqui! —poanaje epona.

³⁰ Eponaa huohui cajje ojjaña Sica jo ba'e poqui canaje Jesosa ba'a.

³¹ Ojjaña cuana poe jjimahuajo, ecua, o shajja'ajjajjiya Jesosa nijje jama poanaje ba'a: —Esohui huohuijji, ¡bobi oe ijji socue!

³² Jamatii Jesosaa jama acanaje ba'a: —Ecuea pea bobi yani ecuea e'ijjajji, ma miquea ba jjima.

³³ Jamajjeya ecua ojee miminaje: —¿A'a pojjeama oya pea cuaa bobia canaje? —poanaje.

³⁴ Jesosa ecuanaja esohui shajja'ajja majje jama poanaje ba'a: —Bobi ijji majje miquianaya quea bei poani. Ecue Chiiya eya huoojea canaje ojjaña jaahuanajji; ojjaña ojaya esohui ajeyo'yo majje eya quea bei poaje, bobi ijji majje jayojjaya —Jesosa poanaje —. ³⁵ Miquianaya jama poani ba'a: “Quijje anoso sejjaje'yo, ebeca pee pea'ai ba'ime po majje. Eya ca ca miquianaya huohuaña jama ba'a: ¡Bacue! Jomajo quea huiso dejja cuana poeani. Anoso ejahua jayojjaya jama oya cuana poeani. E'e, oya cuana Eyacuiñajji jjashahuabaquiani. Onijje jjapeequi'yo sa poani. ¡Jamajjeya enijje jjapeequi meesahuacue!

³⁶ E'e, echacojji anoso quecuajji, anoso sejjajji pea'ai equé meseya sosequia cajji. Jamajje ojjaña quea bihui nee poaje'yo —Jesosa poanaje—. Oya jayojjaya Eyacuiñajjiya acaje ojaya echacojji cuana. Joya esohui huohuicoojji cuana sosequia caje; joya pea cuana enijje jjapeequi meesahuajji poani pea'ai sosequia caje. Enijje jjapeequajo ba'e tiiti meeje'yo enijje eyajo. Jamajjeya ojjaña cuana quea bihui nee nee poaje'yo. ³⁷ E'e, yahua jo jama poanaje cuana ba'a: “Oe echacojjiya eso' quecu majje quijje poe echacojjiya chicha

caje'yo". Jjeya jamaya e'e jojo nei poani. ³⁸ Jjeya eyaya miya huoojeaña anoso chichajji jama, ojjaña cuana enijje jjapeequi meesahuaa. Yahuajo Eyacuiñajjija esohui huohuijjiya oya cuana esohui ba mee canaje. Jamatii ojjaña cuana jjabahuejjaqui jjima. Jjeya miquianaaya esohui huohui o'oyajo, oya cuana ecuea epeeji e'e jojo nei poaje'yo —Jesosa poanaje ecuana nijje, o shajja'ajjaji cuana nijje.

³⁹ Majoya quea huiso nee nee Samania cuana poeyanaje Jesosa que. Oya cuana Samania eponaja esohui jashahuabaquiani. Ohuaya jama acanaje ba'a: —Jiquio dejjaa ojjaña ecuea eba'eji huohui ca'yonaje. E'e jojo nei jiquio dejja Eyacuiñajjija huoojea'yo ojjaña jaahuanajji, Quito bajjani —epona poanaje.

⁴⁰ Jamajjeya Jesosa que poe majje Samania dejja cuana jama poanaje ba'a: —Esohui huohuijji, jecuaa nijje che anicue!

—E'e, anije ecuaa —Jesosa poanaje.

Jamajje aninaje. Beca cahuime sohuihuohui canaje. ⁴¹ Jamajjeya Jesosaja esohui shajja'ajja majje ojjaña cuaa jama acanaje ba'a: —¡E'e jojo nei oya Quito! —poanaje.

⁴² Epona nijje jama poanaje: —Yahuajo miquea esohuijji ecuaa beshahua nei jashahuabaquinaje oya e'e jojo nei Quito. Jjeya ca ca oja sohui shajja'ajja majje ecuanaja eba nei nei Jesosa e'e jojo nei Eyacuiñajjija huoojea'yo ojjaña jaahuanajji; mimishi cuijea ca'yajje aje se ba'e tiiti mee caje'yo eyajo —poanaje Samania dejja cuana.

Jesosaa jjaajaqui mee ca'yonaje onaja bacua ejja beshahua nei poqui jeyoani

⁴³ Jamajjeya Samania meshijo beca cahuime ani majje Jesosa poqui o'oyanaje Janinea meshi yasijje, Cana huasijje. ⁴⁴ Yahuajo Jesosaa ecuaa, o shajja'ajjaji cuana jama acanaje ba'a: —E'e jojo nei pea cuaa Eyacuiñajjija esohui huohuijji shajja'ajja cani. Jamatii ojaya cuiñajjijo ojaya huapa pojjeama cuana ca ca oe jashajja'ajjaqui sa po'yo ajja.

Jamajjeya Jesosa jjeya Nasanena huasijje, ma o esho'yahua ba'ya poa huasijje dobiqui jjima. ⁴⁵ Jamatii Janinea meshijo ejiojijje poquianajo, Janinea dejja cuana oya ba majje jama poanaje ba'a: —Esohui huohuijji, mi poe'yajo ecuaa quea bihui nee nee. Yahuajo ecuaa miya banaje Jenosanena huasijje poqui. E'e, esohuidojojji cuaa yahuajo Jodioja ebacua cuana cuia'yo jjima shejo, Jenosanena huasijje ojee ijja'ijjiaa poqui ecuaa miya banaje. Miyaya quea huiso cuana jjaajaqui mee'yonaje, ma dejjaa ajjima acani anaje quea huiso pea'ai. E'e, miya Eyacuiñajjija esohui huohuijji nei nei —poanaje cuana.

⁴⁶ Jamajjeya Jesosa poqui o'oyanaje Cana huasijje, ma ohua yahuajo ejjahuanajjijjo ena acuijajja na pojji ac'a'ya poa huasijje. Canajo Jesosa aninaje ecuaa nijje, o shajja'ajjaji cuana nijje. Jamajjeya oe emeshi mese neija dejja huoojeasahuajjija Jesosajo shajja'ajja canaje: —Jesosa Jodea meshijo yahuajo ani Janinea meshi yasijje poe'yonaje. Canajo jjeya nequi.

⁴⁷ Oja bacua ejja quea mano nee nee jaa quea huesha pishana, Capenaomajo jaa. Jamajjeya maya shajja'ajja majje Jesosa que poquicuaajicuaajinaje. Jama acanaje ba'a: —Jesosa, ¡poecuaajicue Capenaoma huasijje! ¡Ecue bacua ejja jjaajaqui mee'yocue! Quea mano nee nee jaa, beshahua nei poquijeyo jaa —poanaje.

⁴⁸ Jesosa ojjaña cuana nijje jama poanaje ba'a: —Miquiana cuana Janinea meshijo ba'e beshahua nei jashajja'ajjaqui ajja. Eyaya ma dejjaa ajjima acani mi amajamajajo, miquianaya jashahuabaqui ajja jama ba'a: “E'e jojo nei Jesosa Eyacuiñajjija huoojea'yo ojjaña jaahuanajji” —Jesosa poanaje.

⁴⁹ —Esohui huohuijji Jesosa, jamatii —ejeajji poanaje—. ¡Poecuaajicue oe, ecue bacua ejja epoquijeyo cuahuajo!

⁵⁰ —Epeeji, ¡quea bihui poquicue miquea equi yasijje! Eyaya mique bacua ejja jjaajaqui mee'yonaje; apoa poanaje —Jesosaa emanoajaaja ejeajji acanaje.

Jesosaja esohui shajja'ajja majje ebacuaaja ejeajji quea bihui nee nee poquinaje jashahuabaquiani jama ba'a: —E'e jojo nei Jesosa quea sohui poja nee nee; ecue bacua ejja jjaajaqui mee ca'yonaje.

⁵¹ Ojaya equi yasijje poquianajo, oja chacojji cuana poeyanaje. O ba majje taanaje: —¡Miquea ebacua ejja boeca'yonaje! Quea pame nee jjeya ani'yo. Huaquia'yonaje —poanaje.

⁵² —E'e —ejeajji poanaje—, jamaya quea pame nee. ¿Ache nei eshequi nequijo acuae apoa poanaje so'o?

—Yahuajo apoa poanaje, omamecajje tii, eshequi ejjajeapaaquijo oya boeca'yonaje —poanaje echacojji cuana.

⁵³ —E'e nei —ejeajji jashahuabaquinaje —, omamecajje tii eshequi ejjajeapaaquijo Jesosaa eya huohui canaje jama ba'a: “Miquea ebacua ejja jjaajaqui'yonaje; apoa poanaje” —ejeajji poanaje.

Jamajje equi yasijje dobiqwi majje ojaya huapa pojjeama cuana nijje jama poanaje ba'a: —E'e, Jesosaa ecue bacua ejja jjaajaqui mee ca'yonaje, boeca mee ca'yonaje. ¡Oya ca ca oe Eyacuiñajjija huoojea'yo ojjaña jaahuanajji! —poanaje ebacuaaja ejeajji.

Jamajjeya ojjaña jama poanaje ba'a: —E'e jojo nei oya Jesosa.

⁵⁴ Jamaya Janinea meshi yasijje poe o'oya majje Jesosaa Cana cuiñajjijo pea dejjaja ba jjima aca o'oyanaje.

5

Jesosaa dejja jeo'ajja Metena ena sahuajo jaa jeo mee ca'yonaje

¹ Majoya quijje ojjaña Jodio dejja cuana poqui o'oyanaje Jenosanena huasijje ojee ijija'ijjiaa Eyacuiñajji bihuiaa. Jamajjeya ecuanaya Jesosa nijje, o shajja'ajjajji cuana nijje pea'ai Jenosanena huasijje poqui o'oyanaje. ² Jenosanena cuiñajji mei jiyoyo Najjajja Dobiqwiijji esecue yani. Ma esecue pejejejo yani ena, bae sisi jama, ebesajji, Emeo esohuijo Metena ena bajjani. Ena sahuajo yani me oejje equi sisi. ³ Jomajo quea huiso emano cuana jaanaje: cojjama' cuana, jeo'ajja cuana, jiojjijajja cuana pea'ai. Ohuaya esohuidojojji ishoo'ajja cani; jama jashahuabaquime poani ba'a: —E'e, Eyacuiñajjija esohuidojojjiya ena cajeaquejo cahua. Jamajjeya eya ena huasijje nequidobiquiajo, jjaajaqui mee caje'yo.

⁴ E'e, Jodio cuaa jama acanaje ba'a: —Esohuidojojjiya quijje nei poe huicha'anijo ena jeaquejo mee cani. Ena jeaquejo cajo, ojjaña emano cuana ena huasijje canequidobi cuajiquiahua. Joya ebionei besacue'yo ca ca jjaajaqui mee caje'yo, huaquia mee caje'yo pea'ai Eyacuiñajjiya —poanaje Jodio cuana.

⁵ Jamajjeya oe dejja jomajo jeo'ajja jaanaje. Quea shequiaja huiso nee nee jaa poa, 38 shequiajame. ⁶ Jesosaa poe majje ba canaje dejja emanojaa jeo'ajja. Jesosaja eba ma deaja quea shequiaja huiso nee nee jaa poa. Jamajje oya huohui'ajja canaje: —¿A'a miya jjaajaqui'yo sa poani? ¿A'a miya jeo sa poani? —Jesosa poanaje.

⁷ —E'e —emanojaa saja'a canaje —, jamatii chama' pea dejja e dojojji ena jeaquejo poani yasijje e besa mee'yojji. Jamajjeya eya ebionei ebesa'yojji pojjeama. Eya jipashineijje poquinajo, pea ebionei besacue'yo —poanaje emanojaa, jeo'ajja.

⁸ Jesosaa oya jama acanaje ba'a: —Epeejji, inequisohua'yocue oe! ¡Jeocue! ¡Miquea equi yasijje equipajaajji bebo majje dojo'yocue!

⁹ Jjeya nei jeo'ajja jeocuai'yonaje. Jamajje nequisohua'yonaje; oja equi yasijje equipajaajji bebo majje dojo ca'yonaje; jeopoqui'yonaje. Jesosaa oya jeo mee ca'yonaje Jodioja epojja ejomishocajjijo. ¹⁰ Jamajjeya ma dejjaa equipajaajji dojo cani ba majje Jodio cuana quea tecue onijje poanaje: —¡De! ¿Apiojji acuae miyaya equipajaajji dojoaña so'o? ¡Jjeya epojja ejomishocajji, de! ¡Aquiana jjeya dojoca ajja! Jamaya esaja esohui huohuijji cuaa huohui cani —poanaje.

¹¹ Ma dejja ejeo'yohua saja'a canaje jama ba'a: —Jamatii. Oe dejjaa eya jeo mee'yo majje jama acanaje ba'a: “¡Poquicue miya; miquea equipajaajji bebo majje dojcue!” poanaje.

¹² —E'e pojja'a —Jodio cuana poanaje—. “¡Miquea equipajaajji dojcue!” poanaje. ¿Ae bajjaniya acuae maya miya huohui canaje so'o? —huohui'ajja canaje.

¹³ —Cua'a, de —saja'ame acanaje—. Ache dejjaa shai eya jeo mee ca'yonaje. E jeo mee'yo majje oya pea dejja quea huiso nijje poquinaje —poanaje. (E'e, dejja quea huiso nee nee jomajo ani.)

¹⁴ Quijje pishana Jesosaa ma dejja oja jeo mee'yo ba ca'yonaje Eyacuiñajjija equijo. Jama huohuime acanaje ba'a: —E'e epeejji, jjeya miya quea pame nee nequi'yo, quea aja nee nequi. Jamajjeya ¡a'a quea mimishi po o'oyajji! Quea mimishi po o'oya majje mi quea mano nee nee po o'oya chana', quea tai nee nee; yahuajo jeo ajja, quea nee pishana poanaje —Jesosaa acanaje.

¹⁵ Jesosa shajja'ajja majje poqui'yonaje Jodio cuana huasijje. Huohuiqui canaje jama ba'a: —E'e, Jesosa bajjaniya eya jeo mee ca'yonaje —poanaje.

¹⁶ Jamajjeya jeo'ajja poanajjeya huohui cajje Jodio cuaa Jesosa niñeba canaje; quecua'yo sa acanaje pea'ai, Jesosaa jeo'ajja cuana jeo mee ca'yonaje epojja ejomishocajjijo.

¹⁷ —Ecue Chiiya quea pame nee acani tii tii epojja ejomishocajjijo pea'ai —Jesosaa oya cuana saja'a canaje—. Jamajjeya eyaya pea'ai ecue Chiiya jayojjaya jama quea pame ña ojjaña pojajjo.

¹⁸ Jamajjeya Jodio etii cuaa Jesosa quecua sa neinei acanaje. Jama huohui canaje ba'a: —Esejaya etiquiaa yahuajo esohui tehue ca poa jama ba'a: “¡Epojja ejomishocajjijo a'a chacojji!” aca poa.

Jodio cuaa Jesosa niñeba canaje jama pea'ai ba'a: —Oya, Jesosa etiquianaja etehue'yo jama po ajja —poanaje.

Yahuajo Jesosa Jodio nijje jama poanaje pea'ai ba'a: —Eyacuiñajji ecue Chii, de.

—Chojja, de, Jesosa siajje poani —niñebame acanaje Jodio cuaa Jesosa.

Jodio cuaa jama acanaje pea'ai ba'a: —Jesosa siajje poani jama ba'a: “Eya Eyacuiñajji jayojjaya poani” siajje, de —jamaya Jodio cuaa acanaje.

¡Eyacuiñajji Bacua Ejja Jesosa quea ca'a nee eba'e tiitii mee'yojji!

¹⁹ Jamajjeya Jesosaa ma Jodio etii cuana huohui canaje jama ba'a: —Eyaya miquianaya e'e jojo nei huohuiaña jama ba'a: Eyacuiñajjiya eya, oja Bacua Ejja oe nei huoojea canaje; eyaya ojaya esohui jayojja jama aña. Eyaya huohuiaña ecue Chiija ejjashahuabaquijji, ecuea ejjashahuabaquijji pojjeama. Ojjaña ecue Chiija acani ecuea eba. Jamaya ca ca eyaya aña pea'ai. E'e, ojjaña ecue Chiija acani eyaya aña pea'ai, eya oja Bacua Ejjaa jjejojya. ²⁰ Eya ecue Chiija quea jea nee nee. Jamajjeya eya ba mee cani ojjaña joya ohua amee sa acani huiso tii. Eyaya ma dejjaa ajjima acani aña ba majje miquianaya jama poaje ba'a: “E'e nei, yahuajo jamaya ajjima cuanaja poa. Chama' pea Jesosa jayojja” poaje miquianaya. ²¹ Jamaya ecue Chiija eya amee caje'yo ba'a: Ecue Chiija emano'yojaa shequi mee ca o'oyani jayojja jama eyaya ba'e meeje o'oya, ojjaña ecue babaca'yo cuana pea'ai —Jesosa poanaje—. ²² Ecue Chiija huohuijji pojjeama joya ojaya epeeji pojjeama, joya quea nee nee poaje'yo tii cuaquijo. Joya ojaya epeeji poani ba'e tiitii mee caje'yo onijje huohuijji pojjeama pea'ai. Chojja, ohuaya jama huohuime acanaje ba'a: “Ecue Bacua Ejjaa cahuohui cahua ecuea ejjashahuabaqui'yojji”. ²³ Jamajjeya ojjaña joya ecue Chii shajja'ajjaji poaniya eya oja Bacua Ejja shajja'ajja caje'yo pea'ai. Ojjaña joya eya Eyacuiñajji Bacua Ejja shajja'ajja sa po'yo ajja Eyacuiñajji, e huoojea'yojji shajja'ajja sa po'yo ajja pea'ai —Jesosa poanaje.

²⁴ —E'e jojo nei nei ecuea huohui minijje jama ba'a —Jesosa poanaje—: Ojjaña joya ecue sohui shajja'ajja cani, e huoojea'yojji sohui e'e jojo nei shajja'ajjaji poani pea'ai ba'e tiitii meeje'yo enijje eyajo; cuaqui yasijje epoqui'yojji pojjeama. Chojja, eya cuana yahuajo eshahuaja epeeji poanajejo cuaqui yasijje poqui'yo quiaey. Jjeya ca ca ba'e tiitii meeje'yo enijje, ecuea epeeji jojya. ²⁵ ¡Shajja'ajjacue mo! —Jesosa poanaje—. E'e jojo nei ojjaña shajjama' poani Eyacuiñajjiya ba cani emano'yo jayojja, epoquijeyo'yo jayojja. Jamatii huohui'yo ejo, Eyacuiñajji Ebacua Ejja oja shajja'ajja caje'yo. Ecuea esohui jayojja jama e'e jojo nei atitii cajo, eyaya ba'e tiitii meeje'yo enijje eyajo. ²⁶ E'e, Eyacuiñajji ecue Chii yani tii tii, eshe. Jamajjeya ohuaya eya, oja Bacua Ejja huoojea canaje ojjaña joya onijje jjapeequiani ba'e tiitii mee'yohua. ²⁷ Cuanaya eya ojjaña Edoe Mese poanijo Eyacuiñajjiya eya huoojea canaje jama ba'a: “¡Miyaya huohuicue joya minijje jjapeequiani ba'e tiitii meeje'yo minijje! ¡Huohuicue pea'ai joya miquea epeeji pojjeamajo quea nee tii pojje'yo cuaquijo!” jamaya Eyacuiñajjiya eya acanaje —Jesosa poanaje—. ²⁸ E'e, e'e jojo nei quijje ojjaña yahuajo emano'yo cuana iyaa majje eyaya oya cuana shequi meeje o'oya —Jesosa poanaje—. Ecuea esohuijo ja'a jashahuabaquijji jama ba'a: “¿Yajja yajji? ¿Achajja shai ohuaya emano'yo cuana shequi mee caje o'oya?” a'a jamaya pojji! ²⁹ E'e jojo nei oya cuana eshe o'oya po mee majje ojjaña ecuea epeeji eyaya ba'e tiitii meeje'yo enijje. Ojjaña shajjama' cuana ca ca shequi o'oya majje quea nee nee poaje'yo tii tii cuaquijo. ³⁰ E'e, Eyacuiñajjiya eya huoojea canaje ojjaña huasijje huohuiya jama ba'a: “Joya ecuea epeeji cuana poani eyaya ba'e tiitii meeje'yo enijje. Beca cuana ca ca ecuea epeeji pojjeamajo quea nee nee poaje'yo tii tii”. Eyacuiñajjiya e huoojea majje jama acanaje ba'a: “¡Ojjaña ecuea ejjashahuabaquijji ojjaña cuana huohuicue!” acanaje. Eyaya ojaya esohui jayojja jama aña, ecuea ejjashahuabaqui'yojji pojjeama. Jamajjeya eyaya Eyacuiñajji ejjashahuabaqui'yojji jayojja jama añajo ecuea esohui ojjaña e'e jojo nei —Jesosa poanaje.

Jesosa Eyacuiñajji huoojea'yo ojjaña jaahuanajji, oja Bacua Ejja

³¹ Majoya Jesosaa Jodio cuana huohui canaje jama ba'a: —Miquianaya ejo jashahuaba quehuaquiani jama ba'a: “¡Iquio dejjaa jama huohui cani ba'a: —Eya ca iña iquio Eyacuiñajji huoojea'yo ojjaña jaahuanajji —acani, de. Jamatii ohuaye neiya jama huohui canijo oya ecuanaja eshajja'ajjaji pojjeama” jashahuaba quehuaquiani miquianaya —Jesosa poanaje—. Jamatii ecuea esohui e'e jojo nei. ³² Eya ee nei pojjeama; eya ecue Chii nijje. Ohuaya ojjaña ba mee cani eya oja huoojea'yo. Ecuea eba ojaya esohui ejo e'e jojo nei. ³³ Yahuajo miquianaaya pea cuana huoojeanaje Huani que e huohui'ajjaa. Huaniya miquianaya e'e nei huohui canaje jama ba'a: “Jesosa e'e jojo nei Eyacuiñajji huoojea'yo ojjaña jaahuanajji, oja Bacua Ejja oe nei” acanaje Huaniya, ma ona besameeji poaniya —Jesosa poanaje.

³⁴ —Eyacuiñajjiya Huani huoojea canaje ejo huohuiya. Eyaya miquianaya huohui o'oyaña ma Huaniya ejo huohui canaje. Jamatii miquianajaya ejjashahuabaqui'yojji ejo quea ja'a pojjeamajo eyaya miquianaya huohui o'oyaña. Miquianaaya Huaniya esohui ejo eshajja'ajja jojjemo eyaya miquianajaya mimishi cuijea'yome —Jesosa poanaje.

³⁵ —Cuaquijiji mecajje jijianiya quea ja'a ojjaña ba mee cani jayojja jama Huani poa. Ohuaya miquianaya quea ja'a nee ba mee canaje Eyacuiñajiji esohui ejo, ma yahuajo miquea ba jjima poa. Ebionei miquianajaya oja sohui ejo quea boti nee poanaje; jamatii quijje shajja'ajja sa po'yo ajja poanaje. ³⁶ E'e —Jesosa poanaje —, Huaniya ejo huohui canaje. Jamatii oya dejja. Pea yani, ecue Chii. Ecue Chiya miquianaya ba mee cani eya oja huoojea'yo. E'e, ecue Chiya eya amesahua cani ma dejjaa ajjima acani. Ma ajeyo'yo majje miquianaya ba meeje e'e jojo nei eya Eyacuiñajiji huoojea'yo ojjaña jaahuanajji. ³⁷ Ecue Chiya miquianaya ba mee cani jama ba'a: Ohuaya e'e jojo nei eya huoojea canaje. Jamatii miquianajaya oya ba jjima ecojjaja. Miquianajaya aje oe oja mimi shajja'ajja jjima pea'ai. ³⁸ Ojaya esohui miquianajaya shajja'ajja jjima. Eya oja huoojea'yo. Jamajjeya miquianaya ecue sohui shajja'ajja sa po'yo ajja pea'ai —Jesosa poanaje —. ³⁹ Eyacuiñajiji esohui yahuajo etehue'yo miquianaaya ba huicha'a huicha'aña, ba majamaja majje miquianaya eba'e tiitiije poso jjabaquiani. Ma esohui etehue'yo yahuajo ejo tehue ca poa. ⁴⁰ Eyaya ca ca oe eyaye nei miya ba'e tiitii meeje'yo; jamatii miquianaya enijje jjapeequi sa po ajja —Jesosaa Jodio cuana acanaje.

⁴¹ —Eya dejja mimishi jama jjashahuabaqui ajja jama ba'a: “Ojjaña dejja cuaa jamatii eya shajja'ajja caje'yo” po ajja eya —Jesosa poanaje—. ⁴² Chojja, ecuea eba miquianajaya Eyacuiñajiji quea jea nee pojjeama. ⁴³ Eyacuiñajijiya, ecue Chiya eya huoojea canaje. Jamatii miquianaya e shajja'ajja sa po ajja. Pea dejjaa Eyacuiñajiji huoojea'yo nishohua huohui cani jama ba'a: “Eya quea pame nee”. Ojaya esohui ca ca miquianaaya shajja'ajjaje; sijajpeoji nijje miquianaya jjapeequije. ⁴⁴ Eyacuiñajiji oe nei enequi tii tii. Jamatii miquianaaya oja esohui jayojja jama a sa po'yo ajja, jama jjashahuabaqui po ajja ba'a: “Eyacuiñajijiya ejo jama cahuhui cahua ba'a: —E'e, miya ecuea epejji quea pame nee —cahuhui cahua”. Chojja. Jamaya miquianaya jjashahuabaqui ajja —Jesosa poanaje—. Miquianaya jjashahuabaqui tiitiiquiani jama ba'a: “Pea dejja cuana ejo jama camimiquiahua ba'a: —E'e, miya ca ca oe quea pame nee nee —capoahua onaya”. Jamajjeya miquianaya enijje jama po ajja ba'a: “Jesosa, miya Quito, Eyacuiñajiji huoojea ojjaña jaahuanajji” enijje po ajja. Jamaya huohui sa po ajja miquianaya —Jesosa poanaje.

⁴⁵ —¡A'a eya ecue Chii ehuhuije poso pojji jama ba'a: “Oya cuana e shajja'ajja sa po'yo ajja; quea mimishi nee nee” a'a eya ehuhuije poso pojji nequiana! —Jesosa poanaje —. Chojja, ecuea miquianaya ehuhuijji pojjeama. Miquianaya Moisesija etehue'yojo jjashahuabaquiani; jamatii ojaya esohui etehue'yo ajjimajo, Eyacuiñajijiya miquianaya jama acaje ba'a: “¿Apiojji acuae quiana Moisesija etehue'yojo shajjama' poani? Miquianaya quea mimishi nee nee” quijje Eyacuiñajijiya nequiana acaje'yo —Jesosa poanaje.

⁴⁶ —E'e, Moisesiya ejo tehue ca poa. Jamajjeya miquianaaya oja tehue e'e jojo nei eshajja'ajja jojjemo enijje jjapeequi'yome. ⁴⁷ Jamatii miquianaaya Moisesija esohui eshajja'ajja jojjemo, ojaya ehuhui etehue'yo eba pea'ai jojjemo ecuea esohui shajja'ajja'yome pea'ai —Jesosa poanaje.

6

Jesosaa bobia canaje quea huiso nee nee dejja, 5.000 dejja
(Mateo 14.13-21; Macoso 6.30-44; Noca 9.10-17)

¹ Majoya Jodio dejja cuana nijje mimi majje, quijje Jesosa o shajja'ajjaji nijje, ecuaa nijje Jenosanenajo ani poquinaje Janinea bae yasijje, pea bajjani Timenia bae yasijje. Bishe aijo ojje miji yasijje besapoqui o'oyanaje. ²⁻³ Ba'eñaqui majje eyiyo huasijje jaasohuaquinaje. Anioquenaje. Yahuajo Jesosaa quea huiso acanaje ma dejjaa ajjima acani; quea huiso emano cuana jjaajaqui mee ca'yonaje, jjajeaqui mee ca'yonaje pea'ai. Jamajjeya o ba majje quea huiso nee nee poqui canaje jocuama, Jesosa baa. ⁴ Jamaya poanaje Jodio cuana Jenosana huasijje poqui o'oyani ojee ijji'ijji'yohua esohui dojojjiya Jodioja ebacua yahuajo cuia'yo jjima shejo. Ma epajee'yojji pojjeama jjachichaquinaje. ⁵⁻⁶ Jamajjeya Jesosaa bajea canaje quea huiso nee nee poeje. Ba majje ohuaya Penipe huohui'ajja canaje: —Penipe, ¿achacua acuae seya che bobi jjesheje so'o dejja cuana quea huiso bobiajji? —Jesosaa acanaje, Penipeya yajja huohui'ajjame acaje ejjabaquijji. Jamatii Jesosaja eba poa Eyacuiñajijiya, oja Chiya bobi pana caje'yo dejja cuana bobiajji.

⁷ Penipeya saja'a canaje jama ba'a: —¿Yajja yajji? ¿Ajeo ebobiajji? Oya cuana quea huiso nee nee añã, de. 200 esodojjo quea nahue ecuanaaja yani jojjemo maya oe pojji bobi jjesheme ojjaña cuanaaja ijiajji —poanaje Penipe.

⁸ Majoya aje oe o shajja'ajjaji Anesi, Simohui Penoja chahua jama poanaje ba'a: ⁹ —Oe esho'ya ye canaje me oeje pahui, beca nahuoo sisi pea'ai. Jamatii maya oe pojji nei nei, de; dejja cuana quea huiso nee nee ani jeje jjima poaje —poanaje Anesi.

¹⁰ Majoya Jesosaa jama acanaje ba'a: —¡Ojjaña cuana jama acue ba'a: “¡Ojjaña anioquecue sipone biajje!” acue! —Jesosaa acanaje.

Jamajje quea huiso sipone yanijo, ojjaña cuana anioque mee canaje sipone biajje. Quea huiso nee nee poanaje, 5.000 deja; epona, esho'i cuana pea'ai sico jjima. ¹¹ Majoya Jesosaa pahui me oeje huiso jjeshe majje Eyacuiñajji bihuia canaje. Eyacuiñajji nijje bobijo mimi majje pahui tepe canaje; ecuaa, o shajja'ajjajji cuana quia mee canaje deja cuana e'anioquiani yasijje. Jamaya acanaje nahuoo sisi pea'ai. Quia ca poquije quea huiso nee nee jjapanaque poquipoquinaje bobi, de. Jamajjeya ojjaña cuaa ijjiia neinei canaje. ¹² Ojjaña jejjeajo, Jesosaa ecuaa huohui canaje: —¡Chichacue bobi ojjañaja ijjiasejja! ¡A'a jeana'yojji!

¹³ Jamajjeya ecuaa chicha'yonaje pahui ojjañaja ijjiasejja. Jjepai ai yasijje iya'yonaje. Quea huiso poanaje, 12 jjepaime. Jamatii yahuajo me oeje, 5 pahui poanaje. E'e, Eyacuiñajjiya jjapanaque mee capoquipoquinaje quea huiso bobi, de. ¹⁴ E'e, Jesosaa ma dejjaja ba jjima acanaje; 5.000 deja cuana bobia canaje. Ma ba majje deja quea huiso cuana ojee miminaje jama ba'a: —E'e jojo nei Jesosa Eyacuiñajji huojea'yo ojjaña jaahuanajji. Yahuajo Eyacuiñajjiya ojo huohui mee ca poa jama ba'a: “Quijje eyaya miqiana huasijje huojeaje Quito, ojjaña jaahuanajji”. ¡Cua'a, oya esejaya emeshi mese epojji ejjanequi meequi! —deja cuana poanaje.

¹⁵ Onajaya ejjashahuabaquijji ba majje Jesosaa ojjaña deja cuana huojea canaje equi cuana huasijje. Majoya oya quehua poquinaje. Eyiyo huasijje oe nei jaasohuaqui o'oyanaje oja Chii nijje mimiya.

Jesosa bae ena biajje poquinaje
(Mateo 14.22-27; Macoso 6.45-52)

¹⁶ E'e, sinecua, eyiyo huasijje poqui jjimahuajo Jesosaa ecuaa, o shajja'ajjajji cuana huojea canaje: —¡Bae oje miji yasijje bishe aijo besapoquicue! Quijje eya poquije miqiana que —Jesosa poanaje.

¹⁷ Jamajjeya bishe ai yasijje ani majje ecuaa yonaje. Besapoqui'ajjanaje oje miji yasijje epoquijji, Capenaoma huasijje. Mecajje quea apo nee poanaje. Jamatii Jesosa ecuaa huasijje poe jjima poanaje. ¹⁸ Beni quea quemo nee nee poeyanaje. Enashajo quea quemo anicuayanaje. ¹⁹ Quea huesha nee yo'ajjanaje enabae yiyesama neiyo. Jomajo ecuaaya banaje Jesosa. Eyiyoje ena biajje jeojejebeje banaje. Jesosa ba majje ecuaa quea ajjaja nee nee poanaje, oya eshahua poso anaje. ²⁰ Jamajjeya Jesosa ecuaa nijje jama poanaje ba'a: —¡A'a quea mete pojji! Eya ca ca iña iquío, eshahua pojjeama —poanaje.

²¹ Jesosa shajja'ajja majje quea jaji nee po'yonaje ecuaa. Bishe ai yasijje ani mee'yonaje. Jesosa ani'yajo, bishe ai bae oje miji yasijje ba'eñaquinaje, Capenaoma huasijje. Jomajo cahuinaje ecuaa.

Ojjaña cuaa Jesosa sa'ajja canaje

²² Mecahuaje ojjaña cuana, ma Jesosaa bobia canaje cuana jjachichacui o'oyanaje bae sahua huasijje. Jama ojee miminaje ba'a: —¿Achejo shai Jesosa? Oe bishe ejaanaje, de. Jamatii Jesosa o shajja'ajjajji cuana nijje besapoqui jjima, de, yaninaje eyiyojo tii —deja cuaa acanaje. Ojjañaja ba jjima poanaje Jesosa ena biajje jeojejoquinaje.

²³ Majoya pea bishe cuana Timenia cuiñajjiyo ani poeyanaje. Ba'eñaquinaje bae sahuajo, jomajo yahuajo Jesosaa Eyacuiñajji bihuia majje quea huiso cuana bobia canaje. ²⁴ Jamajjeya ojjaña cuana Jesosa, o shajja'ajjajji cuana pea'ai chama' ba majje bishe cuana huasijje anisohuaquinaje. Capenaoma huasijje besapoquinaje Jesosa sa'ajja'yohua.

Jesosaa esohui huohui canaje pea cahuijo, eba'e tiitii mee'yojji

²⁵ Oje miji yasijje ba'eñaqui majje oya cuaa Jesosa ba canaje. Ba majje huohui'ajja canaje: —Esohui huohuijji, ¿ache shono acuae mi jiquiacua poeyanaje so'o ba'a? —poanaje.

²⁶ Jesosaa oya cuana saja'a canaje quea yeno jama ba'a: —Miquianaya ojo jjashahuabaqui ajja jama ba'a: “E'e, Jesosa ma dejjaja ba jjima acanaje; jamajjeya oya e'e jojo nei Eyacuiñajji huojea'yo ojjaña jaahuanajji”. Chojja, miqianaya jama ejjashahuaba meequijji pojjeama. Bobijo ca ca miqianaaya eya sa'ajjaña, bobi quea huiso ijjiia majje quea jeje poanajeya jjejojo. ²⁷ ¡A'a jjashahuaba tiitiiquijji bobijo, eba'ejjijio! Maya jjeya nei oe poani. Sho caje o'oya. ¡Ecua esohuijo ca ca jjashahuabaquicue oe! —Jesosa poanaje—. Maya e'e jojo nei shajja'ajjajo, eyaya miya ba'e tiitii mee'yo enije eyajo. Ecua esohui pea bobi jayojja, eba'e tiitii mee'yojji. E'e, eyaya ojjañaja Edoe Meseya ma pea bobi eba'e tiitii mee'yojji quiaje miqianaya, eya Eyacuiñajji huojea'yohua jjejojo. Eyacuiñajjiya ecue Chiya eya ma dejjaja ba jjima amee cani; pahui jjapana meequi canaje miqiana bobiajji. Jamajjeya miquea eba eya oja huojea'yo ojjaña jaahuanajji —Jesosa poanaje.

²⁸ Majoya aje dejja cuaa Jesosa huohui'ajja canaje jama ba'a: —¿Achajja acuae ecuaa Eyacuiñajjija esohui jayojjaya aje'yo so'o? ¿Jamajjeya oya ecuana nijje quea bihui nee poaje'yo?

²⁹ Jesosaa oya cuana saja'a canaje jama ba'a: —E'e jojo nei jama acue ejo ba'a: “E'e Jesosa, miya Eyacuiñajjija huoojea'yo ojjaña jaahuanajji” jamaya acue. Jamajjeya Eyacuiñajji quea bihui nee poaje'yo miquianajo —Jesosa poanaje.

³⁰ —E'e pojja'a —Jodio cuaa huohui canaje—. Jamajjeya ¡miyaya Eyacuiñajjija jayojja jama acue dejjaa ajjima acani! Jamajjeya ecuanaja eba poaje miya e'e jojo nei Eyacuiñajjija huoojea'yo ojjaña jaahuanajji. ¿Ae poaje miya? ¡Eyacuiñajji jayojja jama acue, Moisesiya aca poa jama oe acue! ³¹ E'e, yahuajo nei meshi jabojo Eyacuiñajjija esohui huohuijija Moisesiya esejaya etiiquiana bobi pahui jayojja quia ca poa ojjaña pojjaajo. Yahuajo nei Eyacuiñajjija Moisesi tehue mee ca poa jama ba'a: “Eyacuiñajjija Moisesija bobi pahui sisi jayojja eyajo oque mee ca poa meshi yasijje etiiquianaja e'ijjajji” jamaya tehue ca poa —Jodio cuana poanaje.

³² —Eyaya miya e'e nei huohuiaña —Jesosaa acanaje—, Moisesiya pojjeama etiiquiana quia canaje bobi. Ma eyajo aniya tii bobi oque mee canaje ecue Chiyya. Ohuaya jjeya miquianaya quia cani pea bobi ma eyajo ani meshi yasijje poeyanaje. ³³ E'e, jjeya nei Eyacuiñajjija bobi eyajo aninaje ohuaya huoojea cani ojjaña ba'e tiitii mee'yojji —Jesosa poanaje.

³⁴ —E'e, emeshi mese, ¡che ecuana jiquio bobi quiacue ojjaña pojjaajo! —poanaje oya cuana.

³⁵ —Eya ca ca iña jiquio bobi jayojja tiiya Eyacuiñajjija huoojea'yo —Jesosa poanaje—, Eyacuiñajjija huoojea'yo ojjaña jaahuanajji, ojjaña ba'e tiitii mee'yojji pea'ai. Jamaya eya poani. Bobi ijija majje miya quea yeno poaje o'oya, quea shoe po o'oya majje. Quea naba taja pea'ai poaje o'oya. Enijje ejjapeequi jjemmo, e eshajja'ajja jojjemmo pea'ai miquiana quea bihui tii po'yome, quea jette tii jayojja nequi mee'yome —Jesosa poanaje—. ³⁶ Eyaya miquianaya huohuiaña jama ba'a: Miquiaaya ecuea ma dejjaa ajjima acani quea huiso cuana banaje, pahui ecue pana ijjanajejo pea'ai. Jamatii jashahuabaquiani jama ba'a: “Chojja, Jesosa Eyacuiñajjija huoojea'yo ojjaña jaahuanajji pojjeama, ojjaña ba'e tiitii mee'yojji pojjeama pea'ai” jamaya jashahuabaquiani miquianaya, eya Quito pojjeama poso aña —Jesosa poanaje—. ³⁷ Ojjaña joya ecue Chiyya ejo e'e nei jashahuabaqui meesahua cani e que poeje'yo, enijje jjapeequije'yo tii. E que poeyajo, ecuea miquianaya cajaa yajji pojjeama. ³⁸ E'e, eya eyajo ani ecue Chiyya meshi yasijje huoojea canaje. Jamajjeya eyaya ojaya ejjashahuabaqui'yojji jayojja jama aña, ecuea ejjashahuabaqui'yojji jama pojjeama —Jesosa poanaje—. ³⁹ Ecue Chiyya eya niñeshe'a ca poa jama ba'a: “Ojjaña joya eyaya minijje jjapeequi meesahuaña equiyo'yojji pojjeama. ¡Ojjaña oe ba'e tiitii mee'yocue minijje! Quijje miya poe o'oya majje joya emano'yo cuana oe shequi mee o'oyacue, eba'e tiitii'yojji” jama eya niñeshe'ameya ecue Chiyya aca poa —Jesosa poanaje—. ⁴⁰ E'e, ecue Chii jama sa poani ba'a: Ojjaña joya eya Eyacuiñajjija Bacua ba majje, enijje jjapeequiyo, eyaya oya ba'e tiitii meeje'yo enijje eyajo; joya emano'yo cuana jaa pea'ai shequi meeje o'oya quijje poe o'oya majje —Jesosa poanaje.

⁴¹ Majoya Jodio cuaa Jesosajo niñeba canaje. E'e, Jesosaa yahuajo jama acanaje ba'a: —Eya Eyacuiñajjija huoojea'yo ojjaña jaahuanajji eyajo yahuajo ania poa. Ohuaya eya huoojea canaje meshi yasijje —acanaje yahuajo. ⁴² Jamajjeya Jodio cuaa Jesosa Joseja bacua eja poso acanaje: —¡De! Oya Joseja bacua eja pojja'a jja coma. Oja chii, ojaya enaese pea'ai ecuanaja eba. ¿Yajjajje oya jama poani ba'a: “Eya yahuajo eyajo ania poa; eyajo ani meshi yasijje huoojea canaje ecue Chiyya”? ¿Yajjajje shai jama poanaje oya?

Jodio cuana quea sapa ca'a jjejojo, Jesosa Joseja jeajo poso ojaya esohui shajja'ajja sa po'yo ajja.

⁴³ —¡A'a eya niñebajji! —Jesosa poanaje—. ⁴⁴ Beca cuana jamatii enijje ejjapeequi'yojji pojjeama. Ecue Chiyya eya huoojea canaje. Joya ohuaya beca cuana ejo e'e jojo nei jashahuabaqui meesahua cani enijje ejjapeequijji; oya cuana ca ca oe eyaya ba'e tiitii meeje'yo enijje poe o'oya majje. ⁴⁵ E'e, Eyacuiñajjija esohui huohuijija cuana yahuajo nei ba'eya jama tehueme aca poa ba'a: “Eyacuiñajjija ojjaña dejja cuana, epona cuana pea'ai oja sohui ba meesahua caje'yo”. Jamaya tehueme aca poa. Jamajjeya ojjaña joya ecue Chii shajja'ajjajji poaniya, oja sohui jama acaje'yo. Jamaya amajje enijje jjapeequije'yo pea'ai —Jesosa poanaje.

⁴⁶ —Jamatii ojjaña cuanaja Eyacuiñajji ba jjima ecojjaja. Eya Eyacuiñajji nijje, ecue Chii nijje ania poa. Jamajjeya eyaya, eyaye nei, oya baña ecojjaja —Jesosa poanaje—. ⁴⁷ E'e jojo nei ojjaña joya ecue Chiyya enijje jjapeequi meeshahua cani eyaya ba'e tiitii meeje'yo enijje. ⁴⁸ Miquiaaya bobi ijjaña eba'ejji. Jamajjeya eya bobi jayojjaya. Eyaya ecuea epeeji cuana ba'e tiitii meeje'yo. ⁴⁹ ¡Bacue! Yahuajo nei meshi jabojo Moisesiya miquianajaya etiiquiana

bobi pahui sisi jayojja quia ca poa ojjaña pojajajo; jamatii mano'ya poa ojjaña etiiquiana. ⁵⁰Eya miqiuana nijje mimiani pea bobijo, ma Eyacuiñajji eyajo aniya huoojea canaje meshi yasijje. Maya ijia majje ca ca mano'yo ajja tii tii poaje'yo. ⁵¹Eya ca ca iña pahui jayojjaya, Eyacuiñajjija huoojea'yo. E'e, eya yahuajo eyajo ani meshi yasijje poeyanaje dejja cuana ba'e tiitii mee'yohua. Jamajjeya jiquio ecua bobi ijia majje miqiuianaya ba'yani jayojja jama eyaya dejja cuana ba'e tiitii meeje'yo. Ojjaña jaya enijje e'e jojo nei jjapeequiani ba'e tiitii'ye'yo enijje eyajo. Eyaya ojjaña cuana enijje ba'e tiitii mee'yo sa aña. Jamajjeya eya manoj'e'yo ojjaña mimishi cuijea mee'yoyji. Jamajjeya ecuea eyami ma pea pahui jayojja jama poani —Jesosa poanaje.

⁵²—¡Chojja, de! —Jodio cuana ojee jjamimicuijaje nobiajeaquinaje—. ¿Yajja yajji ohuaya aje oe oja yami quia caje'yo bobi jayojja ecuanaja e'ijji'ajji, de? —poanaje.

⁵³—Eyaya miya e'e jojo nei huohuiaña —Jesosa poanaje—. ¡Shajja'ajjacue! Miquiaaya ecue sohui mi shajja'ajjajo, enijje mi jjapeequiao pea'ai, enijje eba'e tiitii mee'yoyji pojjeama. Ecue sohui shajja'ajjaña, ecue yami ijiaña jama jayojja poani; enijje jjapeequianijo, ecuea ena' ishiaña jama jayojja poani pea'ai. Jamaya pocue, ecuea epeeji poanijo! ⁵⁴Jamajjeya ecue sohui shajja'ajjaji cuana, ecuea epeeji nei nei cuana eyaya ba'e tiitii meeña; poe o'oya majje jaya emano'yo cuana jaa pea'ai shequi meeje o'oya. ⁵⁵—¡Bacue! —Jesosa poanaje—. Miquiaaya bobi ijiaña quea bihui nee eba'e'iji. Jamaya eya manoj'e'yo miqiuana quea bihui nee eba'e'iji mee'yoyji. Miquiaaya ena oshe ishiaña naba taja'ama epojji. Jamaya ecuea ena' cuayaquije'yo miqiuana quea boejea po meeji, cuaqui yasijje epojji. Jamajjeya enijje jjapee neineiquianijo —Jesosa poanaje.

⁵⁶—E'e —Jesosa poanaje—, jiquio ecua miqiuianaya quea jette po majje quea bei nee poani jama jayojja eya miqiuana cuanajo mano'yajo, miqiuianaya quea bei nee poaje'yo. Ecuea ecue ena' cuayaquije'yo miqiuianaya mimishi cuijea'yoyji, miqiuana quea bei nee po mee'yoyji. Jiquio ecua ena' ishi majje quea bei poani jayojja jama quea bei nee poaje enijje jjapeequi majje. Jamajjeya jaya e shajja'ajja neineiji poani enijje jjapeequiani; eya onijje jjapeequiani pea'ai. ⁵⁷E'e, Eyacuiñajji enequi tii eshe, ecue Chii e huoojeaji epo. Eya ecue Chii ejjashahuabaqui'yoyji jayojja jama poanijo, ohuaya eya ba'e tiitii mee cani. Jamajjeya ojjaña jaya enijje e'e jojo nei jjapeequiani eyaya ba'e tiitii meeje'yo enijje —Jesosa poanaje—. ⁵⁸⁻⁵⁹Etiiquiana yahuajo nei nei bobi Moisesija quia ijia majje jamatii mano'ya poa. Eya ca ca iña jiquio pea pahui jayojja; eya eyajo ania poa, ecue Chiiya meshi yasijje huoojea canaje. Jamajjeya ojjaña jaya enijje e'e jojo nei jjapeequiani eyaya ba'e tiitii meeje'yo enijje eyajo —jamaya Jesosaa Jodio cuana sohuihuohui canaje Capenaomajo, Jodioja equi ojee ejjachichaquijji.

Jesosaa huohui ca o'oyanaje esohui eba'e tiitii'yoyji

⁶⁰Jesosaja esohui Capenaomajo shajja'ajja majje quea huiso dejja cuana ojee jjanibeaquinaje jama ba'a: —¡De! Jesosaja esohui quea tai nee nee, de; shajja'ajja maja sa po'yo ajja iña, ohua oja eyami e'ijji mee ca —poanaje Jodio cuana.

⁶¹Onajaya ejjashahuabaquiji Jesosaja eba poanaje. Jamajjeya quea huiso cuana oja esohui jjanibeaquianijo, Jesosaa huohui canaje jama ba'a: —Ecuea esohuijo ¿a'a miqiuana quea tai jashahuabaquiani? ¿A'a mi enijje jjapeequi pajeaje'yo? ⁶²Quijje eya ojjaña Edoe Mese, ma yahuajo eyajo ania poa, jjequisohua caje o'oya iña eyahuasijje; jiquio meshijo enequi tii'iji pojjeama iña. Jamajjeya aje mi oe ¿yajja jashahuabaqui'yome acuae mi poaje'yo e jjequisohua ca'yajo? —Jesosa poanaje—. ⁶³Eyacuiñajjija Edojoshahua Pameya pea ejjashahuabaquiji ba mee cani yahuajo jama pojjeama. Miquianaya ca ca jashahuabaquiani bobijo, jiquio meshijo eba'e'ijji. Jamajjeya miya ba'e tiitii mee ajja enijje. Eyaya ca ca huohuiaña Eyacuiñajjija ejjashahuabaquiji. Maaya miqiuianaya ba'e tiitii mee caje'yo, Eyacuiñajjija esohuijo jashajja'ajjaquianijo. ⁶⁴Jamatii miqiuianaya quea huiso ejo jama poani ba'a: “Mi shajja'ajja sa po'yo ajja iña; minijje jjapeequi sa po'yo ajja iña” miqiuianaya poani —Jesosa poanaje.

E'e, yahuajo nei Jesosaja eba poa jama ba'a: “Quijje ecuea epeeji nishohua pea cuana eya iña meesahua caje'yo onaja equicua'yoyji. Quijje quea huiso cuana enijje jjapeequi ajja poaje”. Jamaya Jesosaja eba. ⁶⁵Jamajjeya Jesosa jama poanaje pea'ai ba'a: —Jamajjeya eyaya miqiuianaya yahuajo huohuinaje jama ba'a: “Beca cuana jamatii enijje ejjapeequi'yoyji pojjeama. Beca cuana jaya ecue Chiiya ejo e'e jojo nei jashahuabaqui mee cani ca ca oe enijje jjapeequije'yo” eyaya yahuajo miqiuianaya anaje —Jesosa poanaje.

⁶⁶Majoya ma esohui shajja'ajja majje quea huiso dejja cuana Jesosa nijje poqui paje'yonaje, o shajja'ajjaji nisho cuana. ⁶⁷Jamajjeya Jesosaa ecua, o shajja'ajjaji nei, 12 cuana huohui'ajja canaje: —¿Ae poaje miqiuianaya? ¿A'a miya pea'ai enijje jjapeequi sa po'yo ajja poaje? —Jesosa poanaje.

⁶⁸ —Ecuea Emeshi Mese —Simohui Penohua Jesosa saja'a canaje —, chama' pea mi jayojja. Miyaya ca ca oe esohui e'e jojo nei huohuiaña. Mi shajja'ajjajji caya ca oe ba'e tiitii meeje'yo minijje tii. ⁶⁹ Ecuana minijje e'e jojo nei jjapeequinaje. Ecuana eba miya e'e jojo nei oya Eyacuiñajjija huoosaja'yo ojjaña jaahuanajji quea pame nee nee —poanaje Penó.

⁷⁰ —E'e —Jesosa poanaje—. Eyaya miquianaya, 12 cuana babaca'yo majje iyaanaje; jamatii oe deija minijje nequi ecuea epeeji nisho; oya eshahuaja epeeji poani —Jesosa poanaje.

⁷¹ Jesosa jjashahuabaquiani Jodasajo, ma Simohui Isicanioteja bacua ejjajo. E'e, Jodasa Jesosa shajja'ajjajji 12 cuana nijje nequinaje. Jamatii quijje Jodasaa Jodio etii cuana Jesosa iña meeshahua canaje bejjo sosejje, onaja quecua'yojji.

7

Jesosaja echahua mese cuana o shajja'ajjajji pojjeama poanaje

¹ Majoya Jesosaa esohui huohui canananaje Janinea meshijo, Jodea meshijo pojjeama. Jodea meshijo Jodio etii cuaa ecuecua ca poaje jjejojya mi poqui o'oyanaje.

² Quijje pishana ojjaña Jodio deija cuana Jenosanena huasijje poqui o'oyanaje equi sisi iyaa, ojee quea bihui nee ijjia'ijjiaa bobi cuana chichajji shejo. ³ Jamajjeya Jesosaja echahua mese cuana onijje jama poanaje ba'a: —¡A'a jja oe jiquiojo Janinea meshijo tii ani tiitiiijji! ¡Ecuana nijje Jodea meshi yasijje poqui o'oyacue! ¡Jocuma aje oe miyaya ma dejjaa ajjima acani aquicue, ojjaña mi shajja'ajjajji cuanaja ebajji! ⁴ ¡A'a quehuajje ajji cuiñajji sisijo! Jamaya po ajja cuana. ¡Jenosanenajo aquicue oe, ojjaña ebajji! E'e, ijjea jomajo ojjaña deija cuana jjachichaquiani —poanaje.

⁵ Jamaya huohui canaje oja chahua cuaa, Jesosa ba'yo jjimahuajo, oya Eyacuiñajjija huoosaja'yo ojjaña jaahuanajji pojjeama poso acanaje. ⁶ Jamajjeya Jesosaa oja chahua cuana huohui canaje jama ba'a: —Chojja, eya Jenosanena huasijje poqui o'oya jjima so'o. Eya ijjea miquiana nijje epoqui jojjemo ojjaña cuaa eya shajja'ajja jjima acame. Jamatii, ¡miquianaya poqui'yo sa po majje poqui'yoque! Jomajo deija cuana mijo jjashahuabaquijja. ⁷ Miquianaya ojjaña deija jayojja jama jjashahuabaquianijo, mi quecua sa po ajja cuana. Eyaya ca ca onaya jama anaje ba'a: “Miquianaya ojjaña quea mimishi poanijo, Eyacuiñajjija esohui jama po ajja” poanaje. Jamajjeya ojjaña ejo quea quene poani; quecua sa acani. ⁸ ¡Jamajjeya miquianaya ijjea Jenosanena huasijje poquicue quea cahui huiso ojee ijjia'ijjiaa! Eya ca ca iña ijjea epoqui'yojji pojjeama. E'e, ijjea nei miquiana nijje poqui'yajo eya shajja'ajja jjima acame cuaa —Jesosa poanaje.

⁹ Jamaya huohui majje Jesosa Janinea meshijo aninaje so'o.

Jesosa Jenosanena huasijje poquinaje bobi chichajji shejo

¹⁰ Jamatii oja chahua cuana Jenosanena huasijje poqui'yajo, quijje pishana Jesosa pea'ai poquinaje. Ojjaña pea Jodio deija cuana nijje pojjeama poquinaje; quehuajje Jenosanena huasijje poquinaje oe nei. ¹¹ Ojee ijjia'ijjiaa jjachichaqui majje Jodio etii cuana Jesosaja epo'e'yojji ishoo canaje quea quene. Huohui'ajja huicha'a huicha'a canaje jama ba'a: —¿Aecue Jesosa? ¿A'a cuae oya poeyanaje so'o? —acanaje.

¹² Ojjaña cuana echicha'yo pea echicha'yo cuana nijje jjapashineijje maimai aninaje Jesosajo jama ba'a: —Oya quea pame nee nee Jesosa. Siajjepojji pojjeama —beca cuana poanaje.

—Chojja —pea poanaje—, ojjaña cuana se ca dasia cani Jesosaa. E'e, oya Jesosa siajje poani jama ba'a: “Eya ca ca iña Eyacuiñajjija huoosaja'yo ojjaña jaahuanajji” poani —pea Jodio cuaa acanaje, Jesosaja esohui shajja'ajja sa po ajja jjejojo. ¹³ Jamatii Jodio etii cuanajo quea mete jjejojo jaya Jesosa shajja'ajjajji epo mi mimi neineinaje; jjapashineijje ojo maimainaje. ¹⁴ Jenosanenajo Jodio cuana ojee ijjia'ijjiani quea bihui nee quea huiso cahuime, 7 cahuime. Ojee ijjia'ijjiani quijje pishana beca cahuime po majje Jesosa Eyacuiñajjija equi yasijje poquinaje. Equi shashajo ojjaña cuana sohuihuohui canaje. ¹⁵ Jesosaja esohui shajja'ajja majje Jodio etii cuana jama poanaje ba'a: —¡De! Ojaya eba quea huiso. ¿Achajja shai? Chama' ojaya esohui huohuijji poanaje. Esho'yahua oya dobiqúi jjima de, esohui baa.

¹⁶ Jesosaa oya cuana saja'a canaje jama ba'a: —Eyaya huohuiaña miquianaya ecuea esohui pojjeama. Eyacuiñajjija eya huoosaja canaje. Ohuaya eya huohui meeshahua cani ojaya ejjashahuabaquijji. ¹⁷ Ojjaña jaya Eyacuiñajjija ejjashahuabaquijji jayojja jama ba'e'yo sa poaniya ba caje e'e jojo nei eyaya huohuiaña Eyacuiñajjija ejjashahuabaquijji, ecuea ejjashahuabaquijji pojjeama. ¹⁸ Joya beca cuaa ojaya ejjashahuabaquijji huohui cani aje oe pea cuana quea bihui po meeji jama ba'a: “Oya esohui huohuijji nei; jaya shajja'ajjacue!” Jamaya amee sa acani, pea esohui huohuijji cuaa. Pea jayojja jama pojjeama eya. Eyaya ca ca pea cuana bihuia mee sa aña ca ca, ecue Chii, e huoosaja'yojji

epo oja sohui e'e nei huohuañajo. Jamajjeya eya edasiajji pojjeama. ¹⁹ ¡Bacue! Yahuajo nei Moisesiya miquianajaya etiquiana cuana huasijje quia ca'ya poa Eyacuiñajjija esohui etehue'yo, miquianajaya ebajji. Jamatii ma esohui etehue'yo jama ba'e ajja miquianaya. Moisesija etehue'yo jayojja jama eba'e'yo jojjemo e quecua'yo sa po ajja pome —Jesosa poanaje.

²⁰ Ojjaña Jodio cuaa echicha'yo nequiya huohui canaje jama ba'a: —¿Aya acuae mi quecua'yo sa acani so'o? ¡Chojja, de, miya niñepoquiani pojja'a jja mi coma! Mi quecua sa po'yo ajja ecuanaya —sijje poanaje cuana.

²¹ Jesosaa oya cuana saja'a canaje jama ba'a: —Yahuajo eyaya ma dejjaa ajjima acani anaje miquea epojja ejomishocajjijo; oe dejja jeo'ajja poa. Eyaya oya jeo mee'yonaje. Jamajjeya miquianaya ejo jama poanaje ba'a: “Ohuaya aje oe epojja ejomishocajjijo acani; equipajaajji doo mee cani pea'ai. Jamaya quea tai. Jamaya pojjeama etiquianaja ehuohui'yo” miquianaya poanaje. ²² ¡Bacue! Yahuajo nei nei ba'e etiquiana aca poa jayojja jama Moisesiya huohui ca poa jama ba'a: “¡Mique bacua hu'o nei, eshoi nei cuiishasha biso nei jehuissejajaeacue!” aca poa. Jamajjeya miquiaaya ebacua 8 cahuime poajo cuiishasha biso nei jehuissejajaeña, jamatii epojja ejomishocajjijoya. ²³ Jamajjeya Moisesija etehue'yo jama poanijjo miquianajaya ebacua cuiishasha biso nei jehuissejajaeña epojja ejomishocajjijo. E'e, miquianaaya pea'ai epojja ejomishocajjijo chacoaña. Jamajjeya ¿apiojji acuae quiana enijje quea quene nee nee poani so'o dejja jeo'ajja jeo mee'yonaje epojja ejomishocajjijo? ²⁴ ¡A'a nequiaca eya niñepoqui poso ajji! Quea ja'a nee nee jjashahuabaqui majje miquea ehuohui ejo e'e jojo nei poaje, quea pame —Jesosa poanaje Eyacuiñajjija equi pejjejo nequiya sohuihuohui canijo.

Jesosa e'e jojo nei Eyacuiñajjija huoojja'yo ojjaña jaahuanajji

²⁵ Majoya quea huiso dejja cuana Jenosanenajo ba'eca ojee miminaje jama ba'a: —Jodio etii cuaa jiquio dejja quecua sa acani. ¿A'a e'e? ²⁶ ¡Bacue oe! Jjeya ohuaya ojjaña cuana sohuihuohui caqui. Jamatii oya iña jjima, mimi pajea mee jjima pea'ai, de. ¿E'e pojja'a etii cuana jjashahuabaquiani che jama ba'a: “E'e pojja'a oya Jesosa e'e jojo nei Eyacuiñajjija huoojja'yo ojjaña jaahuanajji”. E'e pojja'a, de. ²⁷ ¡De! Ecuanaja eba jiquio dejjaja ba'ejji; Quito poeyajo ca ca ojaya eba'ejji ba jjima poaje cuanaja —poanaje cuana, Jesosa Nasanenajo cuaya poso aca poa.

²⁸ Majoya Jesosaa Eyacuiñajjija equi pejjejo sohuihuohui huicha'a huicha'a canijo, oya cuana janobajjima nei saja'a canaje: —E'e, eya miquiaaya eba poso aña. Ecuea eba'ejji miquiaaya eba pea'ai poso aña. Eya miquiana que jamatii poe jjima. Chojja, ecue Chiiya eya huoojja canaje. Ojaya esohui e'e nei. Oya miquianajaya ba jjima, de. ²⁹ Eya onijje ania poa; ohuaya eya huoojja canaje. Jamajjeya oya ecue eba nei —Jesosa poanaje.

³⁰ Ma shajja'ajja majje Jodio etii cuana oya Jesosa Eyacuiñajjija Bacua Ejja pojjeama poso acanijjo quea quene nee nee poanaje, iña sa acanaje. Jamatii iña jjima, jjeya iña mee jjima acanaje. ³¹ Quea huiso dejja ejjachichaqui nequi'yo cuana jjashahuabaquiani jama ba'a: —Jesosa e'e jojo nei Eyacuiñajjija huoojja'yo ojjaña jaahuanajji.

Jama poanaje pea'ai ba'a: —E'e nei Jesosa Eyacuiñajjija huoojja'yo ojjaña jaahuanajji. Chama' pea dejja Jesosa jayojja epoe o'oyajji; ma dejjaa ajjima acani quea huiso acanaje ohuaye nei —poanaje cuana.

Paniseo cuaa sohuinano huoojja canaje Jesosa iña nisho

³² Paniseohua shajja'ajja canaje quea huiso dejja cuana jama poani ba'a: “Jesosa Eyacuiñajjija huoojja'yo ojjaña jaahuanajji”. Ma shajja'ajja majje Paniseo etii cuaa, Eyacuiñajji nijje emimijji etii cuaa pea'ai Jodio sohuinano cuana huoojja canaje jama ba'a: —Jesosa iñaquicue ejeanobajji! —acanaje. Ma Jodio sohuinano Eyacuiñajjija equi cuiñajji poani.

³³ Majoya Jesosaa jama sohuihuoime acanaje ba'a: —Eya minijje nequi tiitii ajja. Ecue Chiiya eya huoojja ca poa. Quijje pishana eya poquije o'oya o que. ³⁴ Majoya eya sa'ajjaje'yo; jamatii eya miquianajaya eba'yojji pojjeama. Poqui meeme ajja enijje e ba'e yasijje —Jesosa poanaje.

³⁵ —¿Achacua shai oya poquije'yo, jocuama ecuaa epoqui'yojji pojjeama pojja'a? ¿A'a oya pojja'a poquije Jieno dejja cuana huasijje, Jodio cuana Jieno nijje ba'e cuana jjabaechejequiani yasijje poquije pojja'a, ojaya esohui huohuiya? —Jodio cuana ojee mimimiminaje Jesosajo.

³⁶ —¿Ajeo shai Jesosa jama jjashahuabaquiani? —poanaje Jodio cuana—. “Miquiaaya eya sa'ajjaje'yo; jamatii miquianajaya eya eba'yojji pojjeama. Poqui meeme ajja ma e ba'e yasijje enijje” Jesosa poanaje, de —Jodio cuana poanaje.

³⁷ Jenosanenajo Jodio cuana ojee ijja'ijjianaje quea huiso cahuime, 7 cahuime bobi chichajji shejo. Ma pojja cuanajo quea bihui nee poanaje, yahuajo ijja'ijjia jjimahujajo

quea bihuy pishana poa. Beshahua nei ijjiapajea ca'yanijo, quea bihui nee nee poa. Jamajjeya beshahua nei ojee ijjiia'ijjia pajea'yanijo Eyacuiñajjija equi pejeje Jesosa que jjachichaqui o'oyanaje. Jesosa taaanaje ojjaña huasijje jama ba'a: —¡Ojjaña miquianaya quea naba taja jayojja poanijo, poecue e que, ecuea e'ishijji ishiya! Enijje jjapeequi sa neinei poanijo quea naba taja jayojja jama poani; jamajjeya eyaya miquianaya ba'e tiitii meeje'yo ecuea esohui e'e jojo nei shajja'ajjaña. ³⁸ Jiquio ecua ena eteohuejja cuayani tii tii jayojjaya, ojjaña ishi majje naba taja'ama poani jayojja jama ojjaña joya enijje jjapeequi eyaya ba'e tiitii meeje'yo. Majoya oya cuaa pea cuana enijje jjapeequi meesahua caje'yo pea'ai —Jesosa poanaje.

³⁹ Jesosa jashahuabaqui ani jama ba'a: —Edojjoshahua Pame poeje'yo. Dobiquije'yo ecuea epeeji cuana huasijje. Enijje jjapeequi meesahua caje'yo quea pame nee; jiquio ecua enaa caneco cuatajea cani jama jayojja quea cuata poaje Edojjoshahua Pame dobiquija.

Jesosa jamaya poanaje Edojjoshahua Pame ojaya epeeji cuana huasijje dobiqui jjimahuajo. Quijje Jesosa emano'yojaa shequi o'oya majje eyahuasijje jjequisohua ca'yajo, ohuaya Edojjoshahua Pame huoojea caje ojaya epeeji cuana huasijje.

⁴⁰ Jesusaja esohui shajja'ajja majje quea huiso cuana jama poanaje ba'a: —E'e jojo nei Jesosa Eyacuiñajjija esohui huohuiji nei. Yahuajo nei Moisesiya tehue ca poa jama ba'a: “Oya poeje Eyacuiñajjija huoojea'yo ojjaña jaahuanajji poe jjimahuajo” tehue ca poa —poanaje cuana; Jesosa esohui huohuiji poso acanaje, Eyacuiñajjija huoojea'yo ojjaña jaahuanajji pojjeama poso acanaje beca cuaa.

⁴¹ Pea cuana ca ca jama poanaje ba'a: —Chojja. ¡Oya ca ca oe Eyacuiñajjija huoojea'yo ojjaña jaahuanajji e'e jojo nei, de!

Jamatii pea cuana poanaje: —Chojja, Jesosa Janinea meshijo ba'e. Eyacuiñajjija huoojea'yo ojjaña jaahuanajji ca ca Janinea meshijo pojjeama cuayaje —acanaje cuaa, Jesosa Janinea meshijo Nasanenajo cuaya poa.

⁴² —Eyacuiñajjija esohui etehue'yo yahuajo jama poani ba'a: “Dabi emeshi mese yahuajo ba'ya poa Eyacuiñajjija huoojea'yo ojjaña jaahuanajji emeshi mese ojaya osecua poaje. Jamajjeya Dabija meshijo cuayaje, Benenajo, Jodea meshijo” —poanaje beca cuana.

⁴³ Jamaya ojjaña Jodio deja cuaa mimicuijjeanobia canaje Jesosajo. ⁴⁴ Beca cuaa Jesosa iña mee sa acanaje; jamatii jja'iña meequi jjima poanaje.

⁴⁵ Jamajjeya sohuinano cuana, Eyacuiñajjija equi cuiñajji, ma Paniseohua yahuajo huoojea canaje Jesosa iña nisho Jesosa esohui huohui poequi baqui majje huacuaya poqui'yonaje Eyacuiñajji nijje emimijji etii yasijje, Paniseo cuana pea'ai yasijje. Poeyajo, Sohuinano cuana tecuea canaje Jodio cuaa: —¿Apiojji acuae quianaja Jesosa iña jjima so'o? Ye jjima, de —poanaje.

⁴⁶ —Chama' pea deja Jesosa jayojja jama mimime. Pea deja o jayojja mimi jjima; ojaya esohui quea pame nee nee, de —sohuinanohua saja'ame acanaje.

⁴⁷ —¡De! Ohuaya aje mi oe dasia canaje pea'ai —sohuinano tecueame acanaje Paniseo cuaa—. ⁴⁸ ¿A'a Jodio etii cuana, ecuaa pea'ai onijje jjapeequi? ¿A'a oya shajja'ajjaña pea'ai ecuaa? Chojja, de —Paniseo cuaa acanaje—. ⁴⁹ Ojjaña jiquio deja echicha'yo nequi ca ca Moisesija etehue'yo ba jjimajo, oya cuana Eyacuiñajjija quea nee nee po mee caje'yo cuaquijo —acanaje Paniseo cuaa, jashahuaba taiquiianiya jjejojo.

⁵⁰ Nicodemo, ma yahuajo Jesosa nijje miminaje mecaje Paniseo cuana nijje pea'ai nequinaje. Jamajjeya ohuaya pea Paniseo cuana jama huohui'ajjame acanaje ba'a: ⁵¹ —¡Bacue! Moisesija esohui etehue'yo yahuajo jiquio jama poanaje ba'a: “¡Oe deja niñeba jjimahuajo, oya iyaacue! Ohuaya huohui caje, majoya miquianaaya baje'yo oya quea mimishi pojja'a, oya mimishi'ama pojja'a”. ¿A'a e'e? —poanaje Nicodemo.

⁵² Paniseo cuaa jja oya saja'a canaje. Quea mimi tecue poanaje jama ba'a: —¿A'a miya pea'ai Janinea deja, Janinea meshijo ba'e pea'ai? ¡Eyacuiñajjija esohui ba neine-icue! Chama' poaje Eyacuiñajjija esohui huohuiji Janinea meshijo ba'ecaja, pa —poanaje Paniseo cuana.

⁵³ Majoya, siniajo ijjiia'ijjia pajea majje ojjaña cuana poquinaje equi cuana huasijje cahuiya.

8

¹ Jesosa ca ca eyiyo bajjani Onimo eyiyo huasijje poquinaje. Jomajo aninaje jiquio mecaje.

Jodio cuaa epona quea mimishi Jesosa que ye canaje

² Mecajjeahua Jesosa poe o'oyanaje Eyacuiñajjija equi yasijje. Quea huiso nee nee cuana o que jjachichaqui o'oyanaje. Eyacuiñajjija equi pejeje anioque majje Jesosaa sohuihuohui ca o'oyanaje ojjaña cuana huasijje. ³ Majoya Paniseo cuaa, Moisesija etehue'yo huohuiji

cuaa pea'ai epona quea mimishi ye canaje. Pea cuaa oya ba canaje pea dejja oja yahue pojjeama nijje jaa, pa. Jamajjeya Paniseo cuaa huohui canaje epona jama ba'a: —¡Jesosa nequi cojja nei nequicue!

⁴ Majoya Paniseo cuaa Jesosa huohui canaje jama ba'a: —Esohui huohuijji, jiquio epona quea mimishi nee poanaje. Pea dejja oja yahue pojjeama nijje jaanaje —acanaje cuaa—. ⁵ Moisesiya yahuaño nei jama tehueme aca poa ba'a: “¡Epona pea dejja oja yahue pojjeama nijje jaajo, jajahuejjajeacue meiya!” tehueme aca poa yahuaño nei. Jamajjeya, Jesosa, *¿yajja acuae miyaya epona aje so'o?* —poanaje Paniseo cuana Moisesija etehue'yo jayojja ohua mi saja'a cajje Jesosa e'iña'yojji nisho jjashahuabaquinaje. ⁶ E'e, jjashahuabaquinaje jama ba'a: —E'e pojja'a Jesosa Moisesija etehue'yo jayojja jama pojjeama mimije. Jamajjeya ecuana jama poaje: “Oya Jesosa ca ca oma sijjepojji; Moisesija esohui jayojja jama po ajja”.

Jamatii Jesosaa oya cuana saja'a jjima acanaje. Meshi pohuijo tehue canaje eme sisiya. ⁷ Paniseo cuaa eponajo huohui majamaja'ajja canaje. Jamajjeya Jesosaa Paniseo cuana cojja ba jeyojje neinei majje saja'a canaje jama ba'a: —¡Miquianaaya joya mimishi'ama nei neiya ebionei mei jea cocue, jajahuejjajeacue pona! —poanaje.

⁸ Mimi majje Jesosaa meshi pohuijo tehue ca o'oyanaje. ⁹ Jesosaja esohui shajja'ajja majje Jodio dejja cuana oe cuayaqui, oe cuayaqui'yonaje esecue yasijje. Ebionei edejja tii ehui dojojji cuayaqui'ya poa; o quishishijji joya etii pishana cuayaquinaje pea'ai. Quea bicho ojjaña poanaje quea mimishi jjejojo. Epona jeana ca'yonaje Jesosa cojja neijo nequi. ¹⁰ Jamajjeya Jesosaa nequisohua majje bajea canaje epona nequi; chama' Jodio etii cuana. Epona nijje jama poanaje ba'a: —Epona, *¿ae acuae ma mi tecueajji epo?* *¿A'a mi mique mimishijo jajahuejjajeajja ca'yonaje cuaa?* —ba majje acanaje Jesosaa.

¹¹ —Esohui huohuijji, jaja'yo jjima mo Jodio etii cuanaja. Poquinaje oya cuana ojjaña —poanaje epona.

—E'e epona, ecuea miya ejajahuejjajeajji pojjeama pea'ai. ¡Poquicue miya; mimishi pajea'yocue! —Jesosa poanaje epona nijje.

Majoya epona poquinaje quea bihui nee.

Jesosaa ojjaña cuana Eyacuiñajji ba mee caje

¹² Majoya epona nijje mimi majje Jesosaa sohuihuohui ca o'oyanaje ojjaña ejjachichaqui anica huasijje. Jama poanaje ba'a: —Jamatii quea apo nee neeya, cuaquijjiya jeaja'a cani mecajje. Oya jayojjaya eya poani. Eyaya dejja cuana jamatii quea mimishi nee nee poa quea ja'a nee jjashahuabaqui meeaña Eyacuiñajji. Ojjaña joya ejo e'e jojo nei jjashahuabaquiani aje oe quea mimishi, quea apo pea'ai ba'e maja ajja. Eyaya oya cuana ba'e tiitii meeje'yo enijje —Jesosa poanaje.

¹³ Jamajjeya pea Paniseo cuana Jesosa nijje mimijajinaje jama ba'a: —¡De! Miyaya neiya huohuiaña jama ba'a: “Eyaya dejja cuana ba'e tiitii meeje'yo” poani. Miyaye nei jama huohuiañaajo, ecuanaja miya eshajja'ajjajji pojjeama. Chojja, de. Moisesiya yahuaño nei jama huohui ca poa ba'a: “¡A'a oe dejjaya ehuhui shajja'ajjajji! ¡Becanejjijji pea'aiya huohui canijo oe shajja'ajjacue!” poa —poanaje Paniseo cuana.

¹⁴ Jesosaa oya cuana acanaje jama ba'a: —E'e, eya neiya poanaje eyaya ecuea epeeji cuana ba'e tiitii meeaña. Jamaya e'e jojo nei eyaya aña. Ecuea eba ecue Chii e huooejajji epo. *¿Achacua eya poquije o'oya?* Ecuea eba, de. Jamatii miquianajaya maya ba jjima. Jamajjeya ¡ecuea ehuhui ejo shajja'ajjacue! ¡Jamatii eyaye nei huohuiañaajo shajja'ajjacue! ¹⁵ Dejja mimishi cuanaja ejashahuabaquijji jama miquianaya ejo jjashahuabaquiani, quea quehua. Eya ca ca mi jayojja jama pojjeama. ¹⁶ Jamatii eyaya dejja cuanaja eba'ejji huohuiañaajo, ecuea ehuhui'yo e'e nei poani. E'e, ecue Chiiya eya huoojja canaje. Ojaya ehuhui jayojja jama eyaya aña, ecuea ejashahuabaquijji pojjeama. Eya ecue Chii nijje beca. Jamajjeya ecuanaja ehuhui'yo dejja cuanajo e'e nei nei poani. ¹⁷ Miquianajaya etiiquianaja Moisesija etehue'yo jama yahuaño poa ba'a: “Becanejjijji pea'aiya oya jayojjaya huohui cajo ¡shajja'ajjacue, miquianaaya!” jamaya tehue ca poa. ¹⁸ Eyaya miya huohuiaña jama ba'a: Eyaya Eyacuiñajji huoojja'yo ojjaña jaahunajjiya ecuea epeeji cuana ba'e tiitii meeje'yo. Ecue Chiiya pea'ai jama miya ba meesahua cani ba'a: “Jesosa ecue huoojja'yo” ecue Chii poani —Jesosa poanaje.

¹⁹ Jamajjeya Paniseo cuaa Jesosa huohui'ajja canaje jama ba'a: —*¿Achejo acuae mique Chii ani so'o?*

Jesosaa saja'a canaje jama ba'a: —Miquianajaya eya ba'yo jjima; ecue Chii miquianajaya ba'yo jjima pea'ai. E'e, eya miquianajaya eba jojjemo ecue Chii pea'ai bame.

²⁰ Jamaya Jesosaa sohuihuohui canaje Eyacuiñajji equi pejejo nequiya, Jodio etii cuana ojje chacochoani pejejo. Jamatii Jodio etii cuana Jesosaja esohui shajja'ajja majje iña jjima poanaje jja'iña meequi ajjajojo.

Jesosaa Jodio shajjama' cuana tecuea canaje

²¹ Majoya Jesosaa ojjaña cuana huohui canaje jama ba'a: —Eya minijje nequi tii ajja; quijje pishana eya poquije o'oya. Quijje miquianaaya eya sa'ajja neineije'yo miquea mimishi cuijea'yojji, mi jaahuanajji pea'ai. Jamatii miquianaya quea mimishi tii manoje'yojo, quea nee nee poaje'yo cuaquijo. Ma e poqui yani yasijje miquianaya epoquijji pojjeama —Jesosa poanaje.

²² Jamajjeya Jodio etii cuana ojee huohui'ajja canaje jama ba'a: —¿Yajjaje oya poquije? ¿A'a oya jayacuaqui'yo majje mano'yo sa poani pojja'a? ¿A'a jamajoya ohuaya jama acanaje ba'a: “Ma e poqui yani yasijje miquianaya epoquijji pojjeama?” —acanaje Jodio etii cuana.

²³ Jesosa jama poanaje ba'a: —Miquianaya meshijo ba'e. Jamajjeya Edosiquiana jayojja jjashahuabaquime poani, quea tai. Eya ca ca iña eyajo ba'e, Eyacuiñajji jayojja jama eya jjashahuabaquiani. ²⁴ Jamajoya eyaya miya huohuinaje jama ba'a: “Miquianaya quea mimishi tii manoje'yojo, quea nee nee tii poaje'yo cuaquijo”. Eyaya miquianaya huohuinaje eya Eyacuiñajjija huoojea'yo ojjaña jaahuanajji. Jamatii miquianaya jjashajja'ajjaqui ajja. Jamajjeya miquianaya e'e jojo nei manoje'yo mimishi cuijea'yo jjima tii. Quea nee nee poaje'yo tii tii cuaquijo —Jesosa poanaje.

²⁵ —E'e pojja'a —Jodio etii cuana poanaje. ¿Aya acuae mi huoojea canaje so'o ecuana que? ¿Ajeo miya poeyanaje jiquiacua? —Jodio cuana poanaje.

—¡De! Aje jja mi huohui huicha'a huicha'a'ajjanaje yahuajo ehuohui coojji —Jesosa poanaje—. ²⁶ Miquianaya ecuea eba quea jjashahuabaqui tai, quea mimishi poani —Jesosaa Jodio cuana acanaje—. Jamajjeya eyaya miquianaya tecueña. Miquianaaya niñebaña ecuea ehuohui'yojo. Jamatii ecue Chiiya eya huoojea canaje; ojaya eba ojjaña; ojaya esohui e'e nei. Maya eyaya ojjaña cuana huasijje huohuiaña —Jesosa poanaje.

²⁷ Jesosaja esohui oja Chiijo Jodio etii cuana ba sa po ajja. Oya cuana jjashahuabaquiani quea tai jama ba'a: —Chojja, Jesosa Eyacuiñajjija huoojea'yo pojjeama —poso acanaje Jodio etii cuana.

²⁸ Jamajjeya Jesosaa huohui canaje jama ba'a: —¡Bacue! Quijje eya, ojjañaja Edoe Mese miquianaaya ba'ehuanasohuaejae'yo acui ecueata'apeejo. Majoya miquianajaya eba poaje jama ba'a: “Jesosa e'e jojo nei Eyacuiñajjija huoojea'yo ojjaña jaahuanajji”. E'e, ojaya esohui eyaya huohuiaña, ecue Chiija. Ecuea ejjashahuabaqui'yojji ca ca eyaya huohui jjima aña. ²⁹ Ecue Chiiya eya huoojea canaje. Eyaya oya quea bihui po mee sa aña tii. Jamajjeya oya enijje yani tii tii, ohuaya eya jeanana'yo ajja —Jesosa poanaje.

³⁰ Quea huiso Jodio cuana Jesosa shajja'ajja majje jama poanaje ba'a: —E'e jojo nei nei Jesosa Eyacuiñajjija huoojea'yo ojjaña jaahuanajji. Oja sohui e'e jojo nei —poanaje.

Eyacuiñajjija bacua cuana eshahuaa napa ajja

³¹ Jamajjeya quea huiso Jodio cuana Jesosa nijje jjapeequinaje. Oya cuana Jesosaa jama acanaje ba'a: —E'e, ecuea esohui jama ba'yani tiijo miquianaya e shajja'ajjajji e'e jojo nei poani. ³² Jama poanijo ecuea esohui miquianajaya quea ja'a nee poaje'yo. Ecuea esohui e'e jojo nei poani, siajje pojjeama. Jamajjeya ecuea esohui ba neineiyajo, miquianajaya mimishi cuana pajea meeje'yo, Edosiquianaja yajjijo chaco meepajea'yo pea'ai —Jesosa poanaje.

³³ Majoya pea Jodio cuana Jesosa nijje jjapeequi ajjajo quea tecue jama poanaje ba'a: —Chojja. Amajama ecuanaja etiiquiana, de. Jamajjeya pea cuanaja ecuana ehoojea'yojji pojjeama peaja yajjijo chacochohua sosema' —siajje poanaje oya cuana—. ¿Yajjaje miya jama poanaje ba'a: “Eyaya miquianaya chacochocho pajea meeje'yo peaja yajjijo?” —poanaje Jodio cuana.

³⁴ Jesosaa oya saja'a canaje: —E'e jojo nei ojjaña joya quea mimishi poani ca ca o huoojea'yojji Edosiquiana bajjani jayojja jama poani tii, quea mimishi. Ojaya yajjijo chacopajea meemea ajja jama jayojjaya aña miquianaya, miquianajaya mimishi pajea'yo ajjajo. ³⁵ ¡Bacue! Echacojji ba'e tiitii ajja echacojji meseja equijo. Oja bacua ca ca oe onijje ba'e tiitijje'yo. Miquiana huoojea'yojji Edosiquiana bajjani quea mimishi; ojaya yajjijo miquianaya sosema' chacochochoani. Jamajoya miquianaya ba'e tiitii mee ajja Eyacuiñajji nijje. E shajja'ajjajji poani ca ca Eyacuiñajji nijje ba'e tiitijje'yo oja bacua jjejojya.

³⁶ Jamajjeya eyaya, Eyacuiñajjija Bacua Ejja miquianaya mimishi pajea meesahuaje'yo. Jamajjeya miquianaya e'e jojo nei Edosiquianaja huoojea'yo pojjeama poaje'yo. ³⁷ E'e, ecuea eba Amajama miquianajaya etiiquiana poa. Jamatii miquianaya ecuea esohui shajja'ajja sa po'yo ajja nei nei. Jamajjeya miquianaya eya quecua sa aña. ³⁸ Miquianaaya mi huoojeajji jayojja jama atitiiña quea tai. Oya Edosiquiana huoojeajji poani, Satanasa bajjaniya. Eyaya ca ca huohuiaña ojjaña ecue Chiija ejjashahuabaquijji quea pame —Jesosa poanaje.

³⁹—Chojja —Jodio cuana po nishonaje—, Amajama ecuanaja etiiquiana. Ohuaya jayojsa jama aña ecuanaa quea pame —poanaje.

—Chojja —Jesosaa Jodio etii cuana saja'ame acanaje—. Amajama quea pame, miquiana-jaya etiiquiana mese poa; jamatii miquianaya o jayojsa quea pame po'yo ajja. ¿Yajjajo acuae miquianaya o jayojsa mi po'yani? ⁴⁰Eyaya Eyacuiñajjija esohui e'e nei huohuinajejo, miquianaya shajja'ajja sa po ajja. Jamajjeya eya miquianaaya quecua sa aña. Amajama ca ca jama po'yo ajja; quea pame nee oya. ⁴¹Miquianaaya aje oe mi huoojeajjija ehuohui quea tai jayojsa jama atitiñaña, Edosiquianaja ehuohui jama —Jesosa poanaje.

Jamatii Jodio etii cuana quenequenaje. Jama poanaje ba'a: —Chojja, Eyacuiñajji e'e jojo nei ecuanaja Chii. Ecuana ojaya ebacua cuana quea pame poani, de —poanaje Jodio etii cuana.

⁴²Jesosaa oya cuana huohui canaje jama ba'a: —Eya Eyacuiñajji nijje ani poeyanaje jiquiacua, jiquio meshi yasijje. Eyacuiñajji miquianaja Chii pojjeamao eya miquianaaya boti'ama aña. E'e, Eyacuiñajjija eya huoojea canaje; eya jamatii poe'yo jjima. Chojja, ohuaya eya huoojea canaje. ⁴³¿Apiojji acuae miquianaya ejo jjabahuejaqui jjima? Miya ca mi ca oe e shajja'ajja sa po'yo ajja tii nequi. ⁴⁴E'e, Edosiquiana huoojeajji poani mi huoojeajji poani; ojaya ejjashahuabaquijji jama atitiñ'yo sa poani miquianaya. Yahuajo nei nei oya ona quecua coo'yojji poa. Eyacuiñajjija esohui e'e nei jayojsa jama ojaya ajjima pea'ai poa; esohui ojaya boti'ama nei nei poa. Oya siajje poani tii tii, siajjepojji nei nei. Oya ca ca oma siajje po coonaje; siajjepojji cuana huoojeajji poani. Ojjaña siajjepojji cuana ojaya epeeji cuana, Edosiquianaja epeeji. ⁴⁵Eyaya miquianaya Eyacuiñajjija esohui e'e nei huohuiaña. Jamatii miquianaaya eya shajja'ajja jjima aña. Edosiquiana jayojsa miquianaya jjashahuabaquiani. ⁴⁶Miquianaya ejo jama po ajja ba'a: “Jesosa quea mimishi”. Chojja de. Jamajjeya eya esohui e'e nei huohuiaña, ¿apiojji acuae ecue huohui shajja'ajja jjima tii aña so'o? —Jesosa poanaje—. ⁴⁷¡Bacue! Ojjaña Eyacuiñajjija epeejiya oja sohui shajja'ajja cani tii. Miquianaya ca ca Eyacuiñajjija epeeji pojjeama jjejojo ojaya esohui shajja'ajja sa po'yo ajja tii —Jesosa poanaje.

⁴⁸Majoya Jodio etii cuaa quenequene majje jama acanaje ba'a: —¡Miya ca mi ca oe Samania dejja tai, niñepoqui!

⁴⁹—Chojja —Jesosaa acanaje—, eya niñepoqui pojjeama. Ecue huohui ecue Chiijo e'e nei. Eyaya oya bihuiaña quea ja'a nee. Miquianaaya ca ca eya niñebaña —Jesosaa Jodio etii cuana acanaje—. ⁵⁰Eya onaya ejo mimi mee sa po'yo ajja jama ba'a: “Jesosa quea pame nee, ¡oya bihuiañe!” Chojja, eyaya dejja jamaya epo mee'yojji pojjeama ejo. Ecue Chii ca ca ejo jjashahuabaquiani quea pame nee; e'e jojo nei ejo huohui cani ohuaya —Jesosa poanaje—. ⁵¹Eyaya miquianaya e'e jojo nei huohuiaña jama ba'a: Ojjaña joya e shajja'ajja neineiiji poani ba'e tii tii meeje'yo, oya cuana ca ca emano'yojji jojo mete'ama poaje'yo pea'ai —Jesosa poanaje.

⁵²Maya shajja'ajja majje Jodio cuaa Jesosa jama acanaje ba'a: —Miquea ehuohui emano'yojji ecuanaja eba miya e'e jojo nei niñepoqui poani eshahuaa napa canijo. ¡Bacue! Yahuajo ecuanaja etiiquiana Amajama mano'ya poa. Eyacuiñajjija esohui huohuijji cuana yahuajo ba'e mano'ya poa pea'ai. Jamatii jjeja miyaya huohuiaña jama ba'a: “Ecuea esohui jayojsa jama ba'yanijo emano'yojji pojjeama miquianaya cuana poaje”. ¡Dee! ⁵³Ecuanaja etiiquiana Amajama quea pame nee, quea ca'a nee poa; jamatii oya mano'ya poa. ¿A'a miyaya ma Amajamaja ajjima aje'yo? Jesosa, ¿a'a miyaya emano'yo cuana shequi meeje'yo? Eyacuiñajjija esohui huohuijji cuana yahuajo nei ba'e poquijeyo'ya poa pea'ai, de. ¿A'a miya pea dejja jayojsa jama pojjeama? ¿A'a miyaya ojjaña baña quea ja'a nee? Chojja, siajje miya poani —Jodio cuana mimijaji majamajanaje Jesosa nijje.

⁵⁴Jamajjeyaya Jesosaa ojjaña cuana huohui canaje jama ba'a: —Eya onaya ejo mimi mee sa po'yo ajja jama ba'a: “Jesosa quea pame nee, ¡oya bihuiañe!” Chojja de, Eyacuiñajjija, ecue Chiija ca ca oe eya quea jea acani. Jamaya eyaya saña. E'e, ecue Chiija ejo jama huohui cani ba'a: “Jiquio ecuea Ebacua Ejja quea pame nee nee, quea ca'a nee nee; ¡oya shajja'ajjañe!” poani ecue Chii. Ecue Chiijo miquianaya jama siajje poani ba'a: “Ecuana Eyacuiñajjija epeeji, oya ecuanaja eba”. ⁵⁵Chojja de. Oya miquianajaya ba jjima, de. Miquianaya siajje poani. Eya ca ca siajje po ajja. Oya ecuea eba nei nei; eya siajjepojji pojjeama. Eyaya oya baña; ojaya esohui shajja'ajjaña; ojaya esohui jayojsa jama poani tii tii.

⁵⁶Yahuajo nei miquianajaya etiiquiana Amajama quea bihui nee nee jjashahuabaquinaje ecuea epoe'yojji quijje nei. E'e, Eyacuiñajjija yahuajo Amajama ba mee ca poa jama ba'a: Eya, Eyacuiñajjija huoojea'yo ojjaña jaahuanajji quijje meshi yasijje poeje'yo. Ma ba majje quea bihui nee nee Amajama poa —Jesosa poanaje.

⁵⁷Majoya Jodio cuaa Jesosa jama acanaje ba'a: —Chojja de, miya siajje poani, de. Miya esho'i, 50 cui'ao sheme po jjima miya de. Amajama ca ca yahuajo nei nei ba'ya poa. Oya miquea ba jjima, de —poanaje Jodio cuana.

⁵⁸ —¡Shajja'ajjace! —Jesosaa saja'a canaje —. Eyaya miya e'e jojo nei huohuiaña: Amajama cuaya jjimahuajo ti eya yaña tiia poa. Eya ca iña Eyacuiñajji nei —Jesosa poanaje.

⁵⁹ Ma shajja'ajja majje Jesosa siajje poani poso Jodio cuaa mei iña canaje o jajahuiejajajji nisho. Jamatii Jesosa chama' poanaje. Jesosa quea huiso dejja tejjee nequijje quehua cuayaquinaje Eyacuiñajji equi esecue jjani yasijje. Poquinaje.

9

Cojjama' cuaya jjabapojjaqui mee canaje Jesosaa

¹ Quijje pea pojjajo, ejomishocajji pojjajo Jesosa ecuana nijje, o shajja'ajjajji cuana nijje ejiojijje poquijeya ohuaya ba canaje oe dejja cojjama' cuaya. ² Ba majje ecuanaa Jesosa huohui'ajjanaje jama ba'a: —Esohui huohuijji, ¿Yajjaje acuae jiquio cojjama' cuayanaje so'o? ¿A'a ojaya mimishijo pojjaja? ¿A'a oja chiija, oja naeja mimishijo pojjaja? —poanaje.

³ —Chojja —Jesosaa ecuana saja'a canaje —, oya cojjama' cuaya poa ojaya mimishijo pojjeama, oja chi, oja nae cuanaja mimishijo pojjeama pea'ai. Oya jamatii cojjama' cuaya mee ca poa. Jamajjeya eyaya oya jjabapojjaqui meeje'yo. Ba majje ojjaña cuaa bihuia caje: “E'e, Eyacuiñajjiya Jesosa jjabapojjaqui mee canaje cojjama'; quea ca'a nee oya, quea pame nee nee” acaje —Jesosa poanaje—. ⁴ Eyacuiñajjiya eya huoojea canaje o chacojji. Jamajjeya jjeaya eya miqiana nijje nequianijo Eyacuiñajjiyo chacoaña. Quijje eya miqiana nijje nequi ajja jiquiojo. Eyacuiñajjiyo chaco majamaja majje eya manaje'yo. ⁵ Meshijo nequiya eyaya ojjaña cuana Eyacuiñajjiya esohui ba meeña. Eya cuaquijji jayojja jama poani. Jiquio ecua cuaquijjiya jeaja'a canijo dejja cuana poquiquehua ajja mecaje quea apojo jama jayojja eyaya ojjaña cuana Eyacuiñajjiyo quea ja'a jjashahuabaqui meeña.

⁶ Jamaya mimi majje Jesosaa cuchojea canaje meshi pohui yasijje. Cojjamaja ecojja iñapepa canaje meshi choeya. ⁷ Majoya cojjama' huohui canaje: —¡Poquicue miya; ecojja shacuaquicue ena eteohuejja huasijje, Sinoe' bajjani yasijje! —poanaje. (Ma ena eteohuejja Ese Ejjaja esohuijo: Eyacuiñajjiya huoojea'yo ena bajjani.)

Jamajjeya cojjama' poquinaje ena eteohuejja huasijje ecojja shacuaa. Ecojja shacua majje jjabapojjaquinaje. Equi yasijje poe o'oyanaje cojjajji. ⁸ Jamajjeya dejja cuaa o pejjejo ba'ecaa, pea cuaa yahuajo oya meme ani ba canajeya pea'ai oya cojjajji ba ca'yonaje. Ba'yo majje ojee mimimiminaje jama ba'a: —Jiquio dejja yahuajo cojjama' e'anioque ani meme ani eseyaya banaje. ¿A'a e'e? —poanaje.

—E'e, oyaya jja coma —beca cuana poanaje.

—Chojja, pea coma; cojjama' jayojja coma —pea cuana poanaje.

⁹ Oya yahuajo cojjama' jama poanaje ba'a: —E'e, eya iquio ma yahuajo cojjama' cuaya poaya. Jjeya eya cojjajji —cojjama' poanaje.

¹⁰ —E'e nei. ¿Yajjaje acuae mi cojjajji'yo? ¿Yajja acuae mi po'yonaje? Jjeya miya cojjajji'yo —jama huohui'ajja neineimeya acanaje cuaa.

¹¹ Ohuaya saja'a canaje: —Jesosa bajjaniya mo cuchojea canaje meshi pohui tejjee. Ecuea ecojja iñapepa canaje meshi choeya. Majoya eya huoojea canaje Sinoe' ena eteohuejja huasijje ecojja shacuaa. Jamajjeya eya poquinaje. Ecojja shacuaqui majje eya jjabapojjaquinaje —acanaje.

¹² —¿A'a e'e? —ojjaña cuana poanaje—. ¿Achacua acuae ani oya Jesosa jjeya so'o? —poanaje.

—Cua'a de, ecuea oya ba jjima ecojjaja —poanaje.

Paniseo cuaa dejja yahuajo cojjama' cuaya ba canaje

¹³ Jamajjeya pea mecahuajje o pejjejo ba'e cuaa ma dejja yahuajo cojjama' cuaya poa jjequi canaje Paniseo cuanaa ebajji. ¹⁴ Jesosaa meshi pohui ecuchojea ecojja huasijje iñapepa caje jjabapojjaqui mee canaje epojja ejomishocajjiyo. ¹⁵ Jamajjeya Paniseo cuaa ma ba majje huohui'ajja ca o'oyanaje jama ba'a: —¿Yajjaje acuae mi cojjajji'yo? ¿Yajja acuae mi poanaje so'o? —poanaje Paniseo cuana.

—Jesosaa ecuea ecojja iñapepa canaje meshi choeya. Majoya ecojja shacuaqui majje eya jjabapojjaquinaje —poanaje ma dejja.

¹⁶ Jamatii beca Paniseo cuaa huohui canaje jama ba'a: —Ma dejja Jesosa bajjaniya ca ca oe epojja ejomishocajjiyo chaco cani, de —poanaje Paniseo cuana. Jamajjeya Jesosa Eyacuiñajjiya huoojea'yo pojjeama poso jjashahuabaquime poanaje.

Pea Paniseohua jama acanaje ba'a: —Chojja de, ohuaya cojjama' cuaya jjabapojjaqui mee canaje, pa. Jamaya pea cuana poanaje. Jamajjeya oya mimishi'ama. Dejja mimishiya jamaya po meeme'yo ajja —poanaje.

Jamajjeya Jesosajo ojee jjamimicuijaje nobiajequinaje Paniseo cuana. ¹⁷ Jamajjeya oya cuaa ma dejja yahuajo cojjama' cuaya huohui'ajja ca o'oyanaje: —¿Yajja acuae miyo

poanaje Jesosa so'o? Jesosaa miya jjabapojaqui mee canaje, pa cuana poani. Jamajjeya ¿ayaja acuae miya poani Jesosajo so'o? ¿A'ya cuae oya? —poanaje Paniseo cuana.

—Jesosa Eyacuiñajija esohui huohuijji e'e jojo nei —saja'ame acanaje cojjama' cuayaa.

¹⁸ Jamatii Jodio etii cuana jashahuabaqui sa po'yo ajja jama ba'a: —Oya cojjama' cuaya poa, jjabapojaqui mee canaje Jesosaa.

¹⁹ Jamajjeya oja chii, ojaya enaese pea'ai iyaa canaje. Poeyajo, huohui'ajja canaje: —¿A'a jiquio miqaea ebacua ejja cojjama' cuaya poa? ¿Yajjaje acuae oya jjeja cojjaji? ¡Huohuicue ecuana! —poanaje.

²⁰ Echii mese jama poanaje ba'a: —E'e, jiquio ecuanaja ebacua ejja. Yahuaajo oya cuaya poa cojjama' nei. ²¹ ¿Yajjaje shai oya cojjaji'yo jjeja? Ecuana jama ba' jjiima. ¿Aya acuae oya jjabapojaqui mee canaje so'o? Ecuana jama ba' jjiima. ¿Apiojji acuae iñaya nequiaa huohui'ajjaña? Oya oe huohui'ajja socue; oya etii, esho'i pojjeama. ¡Ohuaya oe huohui cacue! —poanaje echii mese, enaese pea'ai.

²² Jamaya poanaje oya cuana, Jodio etii cuana joquea mete jjejojaya. E'e, Jodio etii yahuaajo jama poanaje ba'a: “Jesosa Eyacuiñajija huoojea'yo ojaña jaahuanajji, ¡a'a jama huohuime ajji! Jama mimime poajo jja oe ecuayaa miquianaya Jodioja equi ojee ej-jachichaquiijji esecue yasijje huoojeacuayajeaje'yo” poanaje Jodio etii cuana. ²³ Quea mete poanaje oja chii, ojaya enaese cuana pea'ai. Jamajjeya oja chiiya, ojaya enaeseya Jodio etii cuana huohui canaje jama ba'a: —¡Oya oe huohui'ajjacue! Oya esho'i pojjeama, etii nojinoji.

²⁴ Jamajjeya Jodio etii cuana ma dejja cojjama' cuaya poa iyaa ca o'oyanaje ehuohuijji jama ba'a: —¡Bacue! Ecuana eba jiquio dejja Jesosa quea mimishi. Jamajjeya Eyacuiñajji oe nei bihuicue jama ba'a: “Eyacuiñajji quea pame nee nee; jamajjeya eya ohuaya jjabapojaqui mee canaje ohuaye nei” —Jodio etii cuana acanaje.

²⁵ Cojjama' cuayaa saja'a canaje jama ba'a: —Miquianaya: “Jesosa quea mimishi” poani. Oya quea mimishi poani pojjeajo eya jjabapojaqui ajja tii pome. Ecuea eba nei nei eya cojjama' cuaya poa; eya jjeja cojjaji'yo, oja jjabapojaqui mee'yo —poanaje cojjama'.

²⁶ Majoya oya huohui'ajja ca o'oyanaje Jodio etii cuana jama ba'a: —¿Yajja acuae mijo poanaje Jesosa? ¿Yajja acuae mi cojja aca'yona je so'o? —poanaje cuana.

²⁷ —E'e, eyaya miquianaya yahuaajo huohuinaje Jesosa. Jamatii miquianaya jashajja'ajjaqui ajja —oya poanaje—. ¿Apiojji acuae shajja'ajja o'oya sa aña so'o? ¿E'e pojja'a miquianaya o shajja'ajjaji poaje'yo? —poanaje cojjama' cuaya etii cuana nijje.

²⁸ Majoya Jodio etii cuana onijje mimijajinaje jama ba'a: —Miya ca mi ca oe Jesosaja epeeji. Ecuana ca ca oe Moisesija esohui shajja'ajjaji poani. ²⁹ Ecuana eba e'e jojo nei Eyacuiñajji yahuaajo nei Moisesi nijje mimia poa. ¿Jesosa shai ajea huoojea jiquiacua? Cua'a de. Ba jjiima ecuanaja —mimitecuetecueame poanaje Jodio etii.

³⁰ —E'e pojja'a, de, —cojjama' cuayaa oya cuana acanaje—; ¿apiojji shai oya miquianajaya eba pojjeama so'o de? ¿A'a miquianajaya ba jjiima Jesosa huoojeajji epo? ¡Bacue oe! Eya ohuaya jjabapojaqui mee canaje. ³¹ Eyacuiñajjiya ca ca dejja quea mimishija esohui eshajja'ajjaji pojjeama onijje mimianijo. Ohuaya dejja quea pameja esohui shajja'ajja cani, oja sohui jayojja jama poanijo. ³² Yahuaajo nei, jjeja nei pea'ai chama' pea dejja Jesosa jayojja. E'e, eya yahuaajo cojjama' cuaya poa. Jjeja eya ohuaya cojjaji po mee canaje. Yahuaajo nei nei meshi pana cajeahuajo chama' dejja poa Jesosa jayojja. Jjeja nei pea'ai chama' pea dejja Jesosa jama. Pea cuana ohuaya jayojja jama a'ajja. ³³ Jesosa Eyacuiñajji huoojea jjiima poa pojjeajo ohuaya ma dejja ajiima acani ajiima aca quiaye, eya jamatii anijea quiaye —poanaje cojjama' Jodio etii cuana nijje.

³⁴ Oja sohui quea pame shajja'ajja sa po ajjajo Jodio etii cuana quea quene nee nee poanaje. Tecuea canaje jama ba'a: —¡De! Miya quea mimishi nee nee jjejojajo cojjama' cuaya poa; miya Eyacuiñajji cajaan. ¿A'a ecuayaa miya shajja'ajjaje? Chojja. ¡Poquicue miya! ¡A'a jiquicua poe o'oyajji! ¡Ecuana ojee ejjachichaquiijji equi yasijje a'a poe o'oya tiitijji! —jamaya Jodio etii cuana oya huoojeacuayajea canaje.

Joya Eyacuiñajji ba po jjiima cuana cojjama' jayojja

³⁵ Majoya pea cuana Jesosa huohuiqui canaje jama ba'a: —Jodio etii cuana cojjama' cajaan acanaje; Jodioja equi ojee ejjachichaquiijji esecue yasijje huoojeacuayajea canaje, pa —poanaje.

Jamajjeya Jesosaa oya sa'ajja canaje. Ba'yo majje huohui'ajja canaje jama ba'a: —¿A'a miqaea eba Eyacuiñajji Bacua Ejja, Eyacuiñajji huoojea'yo ojaña jaahuanajji? —acanaje.

³⁶ —Esohui huohuijji, oya ecuea ba jjiima. ¡Oya mo ba meecue! Onijje iña japeequi'yo sa poani —poanaje.

³⁷ —Eya jja iña iquio, de —Jesosa poanaje—, ma Eyacuiñajjija huoojea'yo ojjaña jaahuanajji poani. Miya jjeyahua nei Eyacuiñajjija Bacua Ejja nijje mimiani. Eya jja iña iquio, de —Jesosaa acanaje.

³⁸ Majoya ohuaya Jesosa bihuia canaje ecui'oshajjajo nequi majje. Jama poanaje ba'a: —Ecuea Emeshi Mese, ¡eya miquea epeeji nei nei! —poanaje dejja cojjama' oja jjabapojjacqu mee'yo.

³⁹ —E'e nei —Jesosa poanaje—, ecue Chiya eya meshi yasijje huoojea canaje; huohui canaje jama ba'a: “¡Bacucie! ¿Achajja shai ojjaña cuana jjashahuabaquiani mijo? ¡Ba'ajjaqui socue!” Eyacuiñajjiya aca poa eya. ¡Iquio ecua cojjama' jjabapojjacqu mee'yaña jayojjaya eyaya ojjaña joya yahuaio Eyacuiñajjija esohui ba po jjima ba meesahuaje'yo. Ojjaña joya Eyacuiñajjija esohui ba nisho epo ecuea Eyacuiñajjija esohui eba meejji pojjeama. Jamajjeya oya cuana cojjama' jayojja tii poaje —Jesosa poanaje.

⁴⁰ Paniseo cuana jomajo nequi Jesosaja esohui shajja'ajja majje jama onijje poanaje ba'a: —¿A'a miya jjashahuabaquiani ecuanajo; Eyacuiñajjija esohui eba pojjeama ecuanajaya, jamajjeya cojjama' jayojja poani? —poanaje Jodio etii cuana.

⁴¹ —E'e —Jesosaa saja'a canaje—, miqúanajaya Eyacuiñajjija esohui ba jjima nei nei jojjemo eyaya miqúanaya ba mee'yome. Cojjama' jjabapojjacqu meenaje jama eyaya miqúanaya amee'yome. E'e, eyaya miqúanaya Eyacuiñajjija esohui ba mee'yome quea ja'a nee. Jamatii miqúanaya Eyacuiñajjija esohui ba neinei nishoafajjo, Eyacuiñajjija miqúanaya tecuea caje'yo; quea nee nee po mee caje'yo cuaquijo —Jesosa poanaje.

10

Ñajajja cuiñajji jayojja jama Jesosa ojaya epeeji jaahuanajji

¹ Majoya Jesosa ojjaña nijje jama poanaje pea'ai ba'a: —Ecuea esohui ejjashahuabaqui meejji ñajajja cuiñajji jama ba'a: Ñajajja jaahuanajjiya ñajajja cuana jiyoyo cahui mee cani, ijjiacajji mase cuaa e'ijjia ca poajeje. Ejaahuanajji jiyoyo esecue jjanijo jaani, esecue jjanijo queya cani. Siipojji cuana ca ca ñajajja jiyoyje nequisohua majje quehua dobiquiani. Oya cuana siipojji jjeoyo esecueje dobiqúi ajja. ² Ñajajja jaahuanajji ca ca esecueje dobiquiani, de. ³ Jiyo esecue cuiñajjiya esecue ca'apejo cani ñajajja cuiñajji dobiquijji. Dobiqúi majje ejaahuanajjiya ojaya ñajajja iyaa cani. Iyaa cajje o que poeyani. Ñajajja jaahuanajji ehui dojojji poquiani esecue yasijje. ⁴ Cuaquaji majje ñajajja cuana o quiquishijji poquiani. E'e, ejaahuanajjiya esohui ojaya ñajajja eba, eshajja'ajjajji. Jamajjeya o quiquishijji poquiani. ⁵ Peaa iyaa cajje ñajajjaa shajja'ajja jjima acani; poe ajja. Jamajjeya oya ñajajja poqui ajja pea nijje; ba jjimajo cuajicuajiquehuajeenanani —Jesosa poanaje.

⁶ Jesosaja sohui ejjashahuabaqui meejji ohuaya huohui canaje Jodio cuana huasijje. Jamatii ojaya, Jodio cuanaja quea quehua; jama acanaje ba'a: —¿Ajeo acuae ca oya mimiani ecuaa nijje? —poanaje.

⁷ Jamajjeya Jesosaa oya cuana huohui ca o'oyanaje: —¡Bacue, oe! Eya, Jesosa esecue jjanijo jayojja jama poani. Ecuea epeeji dobiqúi meesahuaña. ⁸ Ojjaña ejaahuanajji nisho cuana ca ca sii sa poani. ¡Iquio ecua ñajajjaa peaja esohui ba jjimajo pea nijje poquiquehua ajja jama jayojja ecuea epeeji nei nei esohui huohuijji nishojo jjashajja'ajjaqui ajja —Jesosa poanaje—. ⁹ E'e, eya esecue jjanijo jayojja poani; ojjaña eya shajja'ajja canijo, enijje jjapeequianijo pea'ai, eyaya oya cuana ba'e tiitii meeje'yo enijje. ¡Iquio ecua ñajajja jaahuanajjiya ojaya ñajajja esecueje dojocuayaqui cani bobi ijjiia, jiyoyo huasijje jaahuana cani pea'ai jayojja jama eyaya ecuea epeeji ba'e meesahuaña quea pame nee, Eyacuiñajjija esohui jama —Jesosa poanaje—. ¹⁰ Siipojji poeyani ñajajja siiya, cuaquisho meeya pea'ai, quecuaa pea'ai. Jamaya esohui huohuijji nisho cuana slajje poani, sii cani, ecuea epeeji cuana poquiquehua mee cani esahua nijje, de. Eya ca ca poeyanaje quea ja'a nee nee ba'e meeya, pea ejjashahuabaquijji ba'e meeya.

¹¹ —E'e, eya ñajajja cuiñajji quea pame nee jayojja jama poani. Ñajajja cuiñajjiya ojaya ñajajja nahue neinei cani ijjiacajji maseya e'ijjia ca poaje jjeoyo. Oya jayojja eya manoje'yo ecuea epeeji cuana ba'e tiitii mee'yojji. ¹² Echacojji ca ca eñajajja mese pojjeama jjeoyo ijjiacajji mase ba majje cuajicuajinanani; ñajajja jeajeje cananani. Jamajje ijjiacajji maseya ñajajja cuana ijjiia cani; poquiquehuajeenanana mee cani pea'ai. ¹³ Ñajajja cuana ojaya nahue'ama. Echacojji cuajicuajijeenanani, ojaya pojjeamajjo mi nahue cani —Jesosa poanaje.

¹⁴ —Eya ca ca ñajajja cuiñajji quea pame nee jayojja jama poani. Ecue Chiya eya quea jea nee acani; oya ecuea quea jea nee pea'ai. Oya jayojjaya eyaya ecuea epeeji cuana quea jea nee nee aña; eya ecuea epeeji quea jea nee pea'ai. ¹⁵ Jamajjeya eyaya oya cuana nahue neineiaña, ecuea epeeji cuana. Jamajjeya ojaya mimishi cujea'yojji eya manoje'yo ona ba'e tiitii mee'yojji —Jesosa poanaje—. ¹⁶ Pea cuana yani pea'ai, Jodio cuana pojjeama.

Ohuaya pea'ai ecuea esohui shajja'ajja caje'yo. Ecuea epeeji poaje'yo pea'ai. Eyaya oya cuana jjapeequi meesahuaje'yo pea'ai. Jamajjeya ojjaña cuana ojee cajjapeequiahua; eya ca ca oe o jaahuanajji poaje'yo —Jesosa poanaje.

¹⁷ —Ecue Chiiya eya huoojea canaje ojjaña jaahuanaa. Jamajjeya ecuea epeeji ba'e tiitii mee'yojji eya manoje'yo, ona nahuejo. E'e, e quecua'yojji yani. Jamatii eya quecua ca'yajje shequije o'oya mo. Jamajjeya eya ecue Chiiya quea jea nee nee. ¹⁸ Eya quea ca'a nee nee poani. Jamajjeya ecuea epeejiño man'o'yo sa po'yo ajja jojjemo pea cuaa eya equecua'yojji pojjeama pome. Jamatii eya manoje'yo jama poani ba'a: “E'e, ecuea epeejiña mimishi cuijea'yojji mano'yo sa poanijo eya manoje'yo”. Mano'yo majje eya shequije o'oya. Ecue Chiiya eya jamaya huoojeame aca poa —Jesosa poanaje Jodio cuana nijje.

¹⁹ Jesosaja esohui shajja'ajja majje Jodio cuana ojee jjamimicuijaje nobiajeaquinaje jama ba'a: ²⁰ —¡Oya Jesosa niñepoqui, de! ¡Oya quea jjashahuabaqui tai mimime poani! ¡A'a oya shajja'ajjajji! —poanaje beca cuana.

²¹ —Chojja, de oya niñepoqui pojjeama. Esohui quea pame nee nee huohui cani. Ohuaya ca ca oe cojjama' cuaya jjabapojjaqui mee ca'yonaje. Jamaya po ajja niñepoqui cuana —poanaje pea cuana.

Jodio cuana ojee jjachichaqui'yajo, Jesosaa huohui ca o'oyanaje jama ba'a: —Eya Eyacuiñajji Bacua Eja e'e jojo nei

²² Quijje eneo shejo ojjaña Jodio cuana Jenosanena huasijje ojee jjachichaqui o'oyanaje. Quea bihui nee poanaje ma shejo. E'e, ma shejo yahuajo nei Eyacuiñajji equi pea iya ca o'oya poa quea bame nee. Jamajjeya ma shejo ya ma shahuaba tiitii capoquiani Eyacuiñajji bihuiu capoqui tiitiani. Cuaquijji sisi dedo cani quea cahui huiso. ²³ Ma shejo Jesosa Eyacuiñajji equi yasijje poqui o'oyanaje. ²⁴ Equi quibojo jeojeonequinaje. Jodio dejja cuana o que jjachichaquinaje. Jama huohui'ajjame acanaje ba'a: —Jesosa, ¿apiojji miyaya ecuana huohui jima? ¿A'a miya Eyacuiñajji huoojea'yo ojjaña jaahuanajji? ¡Ecuana e'e nei huohuicue quea ja'a nee! —poanaje Jodio cuana.

²⁵ Jesosaa oya cuana jama acanaje ba'a: —E'e, eyaya miquianaya huohui huicha'a huicha'anaje yahuajo. Jamatii jjashajja'ajjaqui ajja. Ecue Chiiya eya ma dejjaa ajjima acani ameesahua cani miquianajaya ebajji nisho eya oja huoojea'yo ojjaña jaahuanajji. ²⁶ Jamatii miquianaya jjashajja'ajjaqui sa po ajja ecuea epeeji pojjeama jjejojya. Jamaya eyaya miquianaya huohuinaje ba'a: “Ejaahuanajji emimi ojaya ñajajaja eba; jamajjeya onijje poquiani”. ²⁷ Jama jayojjaya ecuea epeeji cuaa ecue sohui shajja'ajja cani, enijje poquiani tii pea'aiya. E'e, ecuea epeeji cuana ecuea eba. ²⁸ Eyaya oya cuana ba'e tiitii meeaña. Jamajjeya oya cuana quea nee nee epo mee'yojji pojjeama cuaquijo, Eyacuiñajjiya. Eyaya ecuea epeeji cuana jaahuanajja pea cuaa oya ecuauisho meeji pojjeama esahua nijje. ²⁹ Ecue Chiiya, Eyacuiñajjiya ecuea epeeji cuana enijje jjapee meequi cani. Oya oe nei quea ca'a nee nee; pea cuana ca'a'ama. Ohuaya oya cuana jaahuana canijo cuaquisho meeme ajja esahua nijje. ³⁰ E'e jojo nei eya ecue Chii jayojjaya poani tii —Jesosa poanaje.

³¹ Ma shajja'ajja majje Jodio etii cuaa mei iña ca o'oyanaje Jesosa jajahuejjajeajji nisho. ³² Jamajjeya Jesosaa oya cuana acanaje: —Ecue Chiiya eya quea pame nee ma dejjaa ajjima acani amee cani. Jamajjeya ¿apiojji acuae iña jajahuejjajea sa aña so'o meiya? —huohui'ajjame acanaje Jesosaa.

³³ —Chojja, mi jajahuejjajea sa po ajja ca ca ecuana miyaya ma dejjaa ajjima acani quea pame aña. Miya sijaaje poanijo ca mi ca oe jajahuejjajeame. Miya aje mi dejja; jamajjeya ¿apiojji acuae oe miyaya jama huohuime aña ba'a: “Eya Eyacuiñajji jayojja tiya” poani? —Jodio etii cuaa Jesosa Eyacuiñajji Bacua pojjeama poso tii acanaje.

³⁴ Majoya Jesosaa oya cuana jama acanaje ba'a: —Miquianajaya eba Eyacuiñajjiya yahuajo nei nei tehue mee ca poa Jodio jaahuanajji cuanajo jama ba'a: “Miquianajaya Eyacuiñajji jayojja poani”. Jama tehuemeya aca poa yahuajo. ³⁵ Jamajjeya ¡Eyacuiñajjiya etehue'yo e'e nei shajja'ajja tiitucue! Ma etehue'yoju ohuaya huohui ca poa Jodio esohui huohujji Eyacuiñajji jayojjaya poa. ³⁶ Jamajjeya eya ca ca oe ecue Chiiya babaca ca poa ojjaña jaahuanajji; eya eyajo ani huoojea ca poa meshi yasijje. Jamatii: “Eya Eyacuiñajjiya Bacua Eja” anajejo, miquianaaya eya tecueaña. Jama poani ba'a: “Miyaya sijaaje poani Eyacuiñajji jayojja miame” poani miquianajaya. ¿Apiojji jamaya poani? —Jesosa poanaje —. ³⁷ ¡Bacue! Eyaya ecue Chiiya acani jayojja a'ajja jojjemo ja'a eya shajja'ajjame so'o! ³⁸ Miquianajaya ecue esohui shajja'ajja sa po ajja; jamatii ecue Chiiya acani jayojja quea pame nee eya aña, jjashahuabaquicue jama ba'a: “Jesosa Eyacuiñajjiya huoojea'yo poani”. ¡Jamajjaya jjabahuejjajquicue e'e jojo nei eya ecue Chii jayojjaya, de; oya e jayojjaya pea'ai poani! —Jesosa poanaje.

³⁹ Jamatii Jodio cuaa Jesosa siajje poani poso acanaje. Jamajjeya ojee jama poanaje ba'a: —¡Cua'a, oya ejja'iñaquiqui ejeanobiajji! —taaame poanaje.

Jamatii Jesosa quea huiso nee nee dejja nequi tejjee quehuaajje poquinaje, jja'iña meequi jjima.

⁴⁰ Majoya Jesosa poqui o'oyanaje cuei Jodana ojje miji yasijje, ma yahuajo Huaniya ona besa mee ca poa huasijje.

⁴¹ Jomajo o anijo quea huiso dejja cuana o baa poeyanaje. Jjachichaqui majje jama ojee miminaje ba'a: —E'e, yahuajo Huaniya ajjima aca poa ma dejjaa ajjima acani; jamatii ojjaña ojaya ehuhui'yo Jesosajo e'e nei poanaje —acanaje cuaa.

⁴² Jamajjeya ojjaña jomajo Jesosajo jama poanaje ba'a: —E'e jojo nei Jesosa Eyacuiñajjija huoojea'yo ojjaña jaahuanajji.

11

Nasano mano'yonaje

¹⁻² Pea cuiñajjijo Betania bajjanijo

Jesosaja epeeji cuana ba'enaje: Nasano, oja jjo'i cuana Manta, Mania pea'ai. Maniaa Jesosa ojaya quea jea neejoj quijje oya jiojji sha canaje shiyeshiyeya. Sha majje ejiojji cui ca'yonaje ojaya esaohua, Maniaa. Jesosa Jodana cuei ojje mijijje anijo, Maniaja eno mese Nasano quea mano nee nee poanaje. ³ Jamajjeya ejjo'i mese cuaa pea huoojea canaje Jesosa que: —Nasano quea mano jaa. Jesosa ba majje jama huohuime acue ba'a: “Emeshi Mese Jesosa, miquea epeeji Nasano quea mano nee nee jaa, poquijeyoje pojja'a” acue.

⁴ Jamajjeya ma dejja poquinaje Jesosa que. Huohui cañaquinaje. Nasanojo shajja'ajja majje Jesosa jama poanaje ba'a: —E'e, oya mano'yo majje jamatii emano'yo tii tii pojjeama poaje. E'e, quijje ojo ojjaña cuaa Eyacuiñajji bihuia caje'yo; ejo pea'ai jama huohuime acaje cuaa ba'a: “E'e, miya Eyacuiñajjija Bacua Ejja quea pame nee nee, quea ca'a nee pea'ai; ojjaña miyaya ña” acaje cuaa —Jesosa poanaje.

⁵ Jesosaja quea jea nee nee Manta, Mania pea'ai, oja jjo'i jayojja, oja o'i jayojja Nasano poani pea'ai. ⁶ Jamatii Nasano quea mano nee nee jaa ba majje Jesosa jomajo tii aninaje becanejjijji pea'ai cahuime, poqui jjima poanaje.

⁷ Majoya ecuana huohui canaje Jesosaa: —Cua'a, ¡Jodea meshi yasijje epoqui o'oya! — poanaje.

⁸ —Chojja, Jesosa —saja'ame anaje ecuaaya—, yahuajo pishana Jodio cuaa jomajo ba'eya miya jajahuejjajja sa acanaje meiya. ¿A'a jamatii miya poqui o'oya sa poani jocuama? — anaje.

⁹ —E'e —Jesosa poanaje—, eya poquijje. ¡Bacue! ¿A'a eshequi jaasohua jjimahuaajo ejiojjijje poquijje? Quea apo. Eshequiya jeaja'a canijo ejjaquecuasajaquijji pojjeama ejiojjijjo. E'e, eshequiya jeaja'a canijo, ejiojji baje quea ja'a nee. ¹⁰ Mecajje quea misi poanijo ca ca dejja oque chana' ejiojjijje poquianijo. Oya jayojja eyaya ecue Chii nijje chacoañajo, ohuaya eya jaahuana cani, onaya eya quecua'yo jjima amee cani. Ojaya eba nei epojja e mano'yojjijjo.

¹¹ Jamaya ecuana huohui majje Jesosaa jama acanaje ba'a: —Eseja epeeji Nasano cahui'yonaje. Jamatii eya poquijje o ishe'a'yohua.

¹² Jesosa jamaya poanijo, Nasano mano'yo jjima poso ecuaa jama anaje ba'a: —Jesosa, Nasano cacahuiquiahua. Cahui majje oya jjaajaquijje'yo.

¹³ Jesosaja eba Nasano emano'yo, epoquijeyo'yo jaa. Ecuana ca ca jashahuabaquiani jama ba'a: “Nasano jamatii cahuijaa” poso anaje ecuaaya. E'e, Jesosaja esohui ecuanaja quea quehua poanaje.

¹⁴ Jamajjeya Jesosaa huohui ca o'oyanaje jama ba'a: —Epeeji cuana, Nasano epoquijeyo. Chama'yo tii jaa. ¹⁵ Eya Nasano nijje ani jjima poanajejojo oya mano'yonaje. Jamatii jamaya miquianajo quea pame nee poaje'yo. E'e, eyaya Nasano shequi meeje o'oya ba majje miquianaya jjabahuejjajjaquijje'yo eya e'e jojo nei Eyacuiñajjija huoojea'yo ojjaña jaahuanajji. ¡Cua'a, Nasano ejjaba'ajjaquiqui! —Jesosa poanaje.

¹⁶ Jesosa shajja'ajjajji Tomasi, ma Becajaa bajjani miminaje pea shajja'ajjajji cuana nijje, ecuana nijje jama ba'a: —¡Cua'a, Jesosa nijje epoqui! Jodio etii cuaa o cuia ca'yajo ecuana ojee Jesosa nijje tii mano'yo pea'ai.

Jesosaa Manta, Mania pea'ai yeno'ama po mee sa acani

¹⁷ Quijje Jesosa poeyanaje Nasanoja equi yasijje. Ba caña'yonaje Nasano epoquijeyo'yo poanaje. E'e, ebeca pee pea'ai cahuime yahuajo oya ehuananobia jaanaje mei jjani yasijje, enaba capa jaanaje.

¹⁸ Betania cuiñajji Jenosanena chipi nei ani. ¹⁹ Jamajjeya quea huiso Jodio cuana poeyanaje Manta, oja shehue Mania pa sahuaa, oja noo Nasano emano'yojo.

²⁰ Jamajjeya Jesosa ejiojjijje poeyani shajja'ajja majje Manta cuayaquinaje Jesosa baa. Mania ca ca equijo aninaje, poqui jjima ca oma poanaje. ²¹ Jamajjeya Mantaa Jesosa ba majje huohui cañaquinaje jama ba'a: —Jesosa, ecue noo mano'yo jjimahuajo, miya jiquiacua epoe jojjemo oya mano'yo jjima poquiaye. ²² Jamatii ecuea eba jjeya nei pea'ai miya Eyacuiñajji nijje mimianijo, ohuaya miqnea esohui jama acaje'yo —poanaje Manta.

²³ —Manta, miqne noo shequije o'oya, she —poanaje Jesosa.

²⁴ —E'e —Manta poanaje—, jamaya ecuea eba oya shequije o'oya quijje nei, Eyacuiñajjiya ojjaña emano'yo cuana shequi mee ca o'oyajo, meshi oe poajo.

²⁵ Jesosa poanaje: —Manta, eya ca ca iña ojjaña shequimee'yojji nei. Eyaya oya shequi meeje o'oya Eyacuiñajji nijje eba'e tiitii'yojji. Jamajjeya ojjaña joya e'e jojo nei enijje jjapeequiani ba'e tiitii'yo eyajo. Eyaya oya cuana ba'e tiitii meeje'yo jamatii yahuajo emano'yo cuana. ²⁶ Ojjaña ecuea epeeji jjeya nei eshe nequi pea'ai eyaya ba'e tiitii meeje'yo, mete'ama poaje'yo emano'yojji. ¿A'a jamaya miyaya baña? —Jesosa poanaje.

²⁷ —E'e Jesosa, ecuea eba miya Eyacuiñajjiya huoojea'yo ojjaña jaahuanajji, Eyacuiñajjiya Bacua Ejja. Miqnea epoe'yojjiyo yahuajo nei Eyacuiñajjiya esohui huohuijjiya tehue ca poa —Manta poanaje.

²⁸ Majoya Manta poqui o'oyanaje Mania que. Ba majje oya quehuajje huohui canaje jama ba'a: —Mania, Jesosa poeyanaje. Ohuaya miya iyaa cani —poanaje.

²⁹ Mantaja esohui shajja'ajja majje Mania nequisohuanaje. Poquicuajinaje Jesosa baa. ³⁰ Jesosa Betania huasijje dobiqiu jjima; ohuaya Mania ishoa ca aninaje jomajo, ma o Manta nijje mimimimi aninajejo tiya. ³¹ Jodio cuaa Mania nijje equijo pa aniya oya ba canaje poquicuajije. Jamajje onijje poquinaje; jama poanaje ba'a: —Mania papoquinaje oja noo ehuananobijaa huasijje quea yeno nee jjejojo.

³² Maniaa poe majje Jesosa ba cañanaje. Ecu'i'oshajjajo nequiya huohui canaje: —Jesosa, miya jiquiacua epoe jojjemo ecue noo mano'yo jjima poquiaye —Mania poanaje.

³³ Jesosaa Mania pa'ani ba majje, Jodio cuana Mania nijje pani ba majje pea'ai quea yeno poanaje. Quea yeno jjashahuabaquinaje Jesosa onajo. Jamajjeya huohui'ajja canaje jama ba'a: ³⁴ —¿Achacua acuae nequiaa Nasano huananobianaje so'o, she? —Jesosaa acanaje.

—Esohui huohuijji, ¡poecue; bahuacue! —poanaje cuana.

³⁵ Jesosa cojjana cuayaquinaje onajo quea yeno po majje. Poquinaje onijje.

³⁶ Jamajjeya Jodio cuana jama poanaje ba'a: —¡Bacue! Jesosa pea'ai pani. Nasano ojaya quea yeno nee nee ojaya epeejiyojo, de —poanaje Jodio cuana.

³⁷ —E'e pojja'a —beca cuana poanaje—. Yahuajo Jesosa deja cojjama' cuaya jjabapoj-jaqui mee ca poa. ¿Apiojji shai oya yahuajo poecuaji jjima Nasano jjaajaqui mee'yohua? Jamajjeya oya mano'yo jjima poquiaye.

³⁸ Onajaya esohuijo Jesosa quea yeno nee nee poquinaje jjani ai yasijje. Mei copo enequi jjani secue capajji. ³⁹ Jamajjeya Jesosaa jama acanaje ba'a: —¡Esecue jjani capajji'ya mei jeacajjajjae'yocue! —poanaje.

—Chojja, ecuea Emeshi Mese —Nasanoja jjo'i Manta poanaje—. Oya yahuajo huananobia canaje, ebeca pee pea'ai cahuime. Jjeya quea ihui nee nee —Manta poanaje.

⁴⁰ —Manta, eyaya miya huohuinaje: Eya Eyacuiñajjiya huoojea'yo ojjaña jaahuanajji ba majje miya jjabahuejjaquijje'yo Eyacuiñajji quea ca'a nee nee, quea pame nee nee; ohuaya eya ojjaña amee cani ma dejjaa ajjima nei nei acani pea'ai —Jesosa poanaje.

⁴¹ Majoya secue jjani capajji'ya mei jeacajjajjae canaje cuaa. Jesosa eyahuasijje jjabajeasohuaquinaje Eyacuiñajji nijje emimijji. Nasanojo jama miminaje ba'a: —Ecue Chii, eyaya miya bihuiña. Ecuea esohui miyaya shajja'ajjaña Nasano shequi mee'yojji.

⁴² Ecuea eba miyaya eya shajja'ajja neineiaña minijje mimianijo. Jamaya eya poani, ojjaña jiquiojo nequi jjabahuejjaquijji miyaya e'e jojo nei eya huoojeanaje. E'e ecue Chii, apoa —Jesosa poanaje.

⁴³ Eyacuiñajji nijje mimi majje Jesosa taananaje jama ba'a: —Nasano, ¡shequi'yocue, oe; cuaya'yocue! —poanaje.

⁴⁴ Jamajjeya Nasano shequi'yo majje cuaya'yonaje. Oya daqui osheja bebo tii, oja ejiojji, oja eme cuana pea'ai. Oja sapa ebebo pea'ai poanaje pea daqui osheja.

Jamajjeya Jesosaa huohui canaje jama ba'a: —E'e, ¡oya ebebojji'ya pichojeaje'yocue! ¡Daqui oshe huijjajjae'yocue! Oya capoqui'yahua equi yasijje —poanaje.

Jamajjeya Nasano poqui'yonaje.

⁴⁵ Jamajjeya quea huiso Jodio cuaa Mania baa poeya ba canaje Jesosaa Nasano emano'yojaa shequi mee ca'yonaje. Ba majje Jesosajo jama poanaje ba'a: —E'e jojo nei oya Eyacuiñajjiya huoojea'yo ojjaña jaahuanajji; ¡onijje ejjapeequi'yojji!

⁴⁶ Beca cuana ca ca Jenosanena huasijje poqui o'oyanaje Paniseo cuana huohuiya: —Jesosaa Nasano emano'yojaa shequi mee ca'yonaje, de —poanaje cuana.

⁴⁷⁻⁴⁸ Jamajjeya Eyacuiñajji nijke emimijji etii cuaa, Paniseo cuaa pea'aiya ojjaña Jodio etii ojee iyaa canaje Jesosajo emimimimijji.

—¿Yajja acuae seya Jesosa aje so'o, de? Ohuaya ma dejjaa ba jjima acani quea huiso. ¡Cua'a ejja'iñaquiqui oya! ¡Oya esohui ejjahuohui pajea meequi! Ojjaña aje oe onijke jjapeequiye'yo, de. Majoya Shomano meshi mese cuana ojo quea mete poaje, ejjajjequiye'yo. Jamajjeya ese nijke jjacuaiaqui majje jeabichajea caje'yo. Jiquio Eyacuiñajjija equi jajacajjajea caje'yo pea'ai, Shomano cuaa —poanaje Jodio etii cuana.

⁴⁹ Ma shequiajajo deja Caipa bajjani Eyacuiñajji nijke emimijji etii poanaje Jodioja. Ohuaya pea cuana huohui canaje jama ba'a: —Ae po caji Jesosajo ecuea ohuejaya eba. ¿A'a miqea ba jjima? ⁵⁰ ¡Eya shajja'ajjacue! E'e, Shomano cuaa Jesosajo quea mete po majje eseya quecua jejoye'yo ca'yo chana'. Jamajjeya oe deja, Jesosa camanoqui'yahua ojjaña cuanajo. Jamaya esejaya quea pame poaje'yo. Jamajjeya ojjaña cuana mano jejoye'yo'yo ajja poaje —poanaje Caipa.

Jamatii ohuaya ojaya ejjashahuabaquijjijo pojjeama huohui canaje. ⁵¹ Oya, Caipa Eyacuiñajji nijke emimijji etii ma shequiajajo. Jamajjeya Eyacuiñajjija oya huohui meesahua canaje Jesosajo jama ba'a: —Jesosa quijje pishana ojjaña Jodio cuanajo manojeyo.

⁵² E'e, ojjaña quea huesha ba'e cuanajo pea'ai, joya Eyacuiñajjija epejji quijje poaje ojjaña meshijo ba'e cuanajo pea'ai manojeyo Jesosa. Jamajjeya ojjaña meshijo ba'eca cuana ojee jjapeequi mee caje'yo, Eyacuiñajji bihuiajji cuana.

⁵³ Jamajjeya Caipaja esohui shajja'ajja majje Jodio etii cuana ojee jjashahuabaquinaje Jesosa quecuajji: —¡Jesosa ejjaquecuacu'yo! —poanaje.

⁵⁴ Jamajjeya majoya Jesosa po'ayequi jjima poanaje Jodioja meshijo Jodio cuana nijke. Oya quehuajje poquinaje Epaini cuiñajji sisi yasijje, quima' meshi pejeje. Jomajo ba'enaje o shajja'ajjajji cuana nijke.

⁵⁵ Quijje pishana ojjaña Jodio deja cuana ojjaña meshijo ba'e poqui o'oyanaje Jenosana huasijje. Jamajjeya ma shejo ba'a: Esohuidojojji cuaa yahuajo nei nei Ejito meshijo Jodioja bacua cuana cuia'yo jjima shejo Jenosanena huasijje jjachichaqui canaje. Majoya Jodio etiiquianaja ehuhui'yo jayojja jama quea huiso besa majamaja canaje cuana ojee quea bihui nee ijjia'ijjia jjimahuajo. ⁵⁶ Jenosanena huasijje poe majje ojjaña Jodio cuaa Jesosa sa'ajja canaje. Eyacuiñajjija equijo jjachichaqui majje ojee mimimiminaje Jesosajo: —¿Ae jjashahuabaquinani miquianaya? ¿A'a Jesosa poeje jiquiacua Jenosanena huasijje ojee ijjia'ijjiaa? ¿A'a poe ajja pojja'a? —poanaje.

⁵⁷ Jamaya miminaje Jodio etijja esohuijo. Paniseo cuaa, Eyacuiñajji nijke emimijji etii cuaa pea'aiya jama huoojea canaje ba'a: —Jesosa ba majje jecuaa huohuicuaajhuacue e'iña meejji! —acanaje etii cuaa—. Miquiaa mi huohuijje quea quene nee nee poaje ecuan a.

12

Maniaa Jesosaja ejiojji shacua canaje shiyeshiyeya
(Mateo 26.6-13; Macoso 14.3-9; Noca 7.36-50)

¹ Majoya Jesosa Epainijo nequi Betania huasijje poeyanaje me oejje oe cahuime Jodio cuana ojee ijjia'ijjia jjimahuajo. Jomajo ba'enaje Nasano, ma ohua emano'yojaa shequi mee ca'yonaje. ² Jomajo Mantaa Jesosajo quea bihui poanijo bobi quea huiso cuacua mee canaje. Quea huiso iyaa canaje Jesosa nijke e'ijjia'ijjiajji. Nasano pea'ai onijke ijjia'ijjianaje. ³ Majoya Jesosa ojaya quea jea neejo Maniaa shiyeshiyeya quea nahue nee neeya Jesosaja ejiojji sha canaje. Quea huiso sha canaje, oe tahuoo shiyeshiye oe acanaje. Sha majje Jesosaja ejiojji cui ca'yonaje oja esao aohua, Maniaa. Equi quea shiye nee nee poanaje shiyeshiyeya sha cajje.

⁴ Jamajjeya Jesosa shajja'ajjajji Jodasa Isicanioteya, ma quijje Jesosa iña meesahua'yojji epojjiya Mania ba canaje. Ba majje Jodasa quea tecue jama poanaje ba'a: ⁵ —¡Dee! ¿Apiojji acuaeya shiyeshiyeya shanaje so'o? Ma shiyeshiye quea nahue nee nee baña cuaa, shequiaja oe chaco majje sose huisoajja jiquio shiyeshiye, de. Quea huiso bejjo sosejje oya equia jojjemo bejjo quea huiso iña caquiaye, majoya bejjo sosejje cuana jja oe aema' cuana bobia quiaeyaya —poanaje Jodasa.

⁶ Jamatii oya Jodasa aemajo pojjeama jjashahuabaquinaje. Chojja, oya ca ca oma siipojji. Ojjaña Jesosa shajja'ajjajji cuanaja ejjeshejji cuiña nisho cani bashosoco sisijo. Ma sii poquiame beca cuana bejjo, Jodasaa acanaje.

⁷ Jesosaa Jodasa tecuea canaje jama ba'a: —Jodasa, ja'a jiquio epona tecueajji! Ojaya eba eya quijje pishana manojeyo. Jamajjeya eya sha canaje shiyeshiyeya, e mano'yojji jiojya. ⁸ E'e, eya miquiana nijke e'ani tiitijji pojjeama. Aema' cuana ca ca miquiana nijke yani tii tii, de.

⁹Quea huiso Jodio cuaa shajja'ajja canaje Jesosa Betania huasijje poe'yonaje. Quea huiso cuana poeyanaje Jesosa baa, Nasano pea'ai baa. Onajaya eba Jesosaa Nasano shequi mee ca'yonaje. Jamajjeya Nasano ba sa poanaje pea'ai. ¹⁰⁻¹¹Nasano shequi mee ca'yonajejo quea huiso nee nee huohui canaje jama ba'a: —¡E'e jojo nei Jesosa Eyacuiñajjiya huoojea'yo ojjaña jaahuanajji!

E'e, Nasano shequi mee ca'yonajejo Jodio etii cuanaja esohui shajja'ajja pajea canaje cuaa.

Jamajjeya Eyacuiñajji nijje emimijji etii cuana jjashahuabaquinaje jama ba'a: —¡De, Nasano pea'ai caquecuajea'yahua Jesosa nijje tii!

Jesosa Jenosanena huasijje dobiquinaje mapichi sisija edaasa biajje

(Mateo 21.1-11; Marcos 11.1-11; Noca 19.28-40)

¹²Jamajjeya mecajjeahua ojjaña Jodio cuaa ma ojee ijia'ijjiaa poe'ya shajja'ajja canaje jama ba'a: —Jesosa ejiojijije poeyani Jenosanena huasijje.

¹³Jamajjeya ojjaña cuana jememe iña jaja majje poquinaje Jesosa baa. Poquijeya jememe iña cuana jeasohua canaje. Jamaya Jodio cuaa acanaje pea bihuiajji, emeshi mese ja'ajjequijji cuiñajji yasijje. Jesosa bihuia canaje pea'ai. Taaanaje jama ba'a: —Jesosa, imiya ojjaña jaahuanajji poeyanaje! ¡Eyacuiñajjiya miya huoojea canaje! ¡Ohuaya miya cajaanahua cahua! E'e de, miya ecuanajaya, Isaeni cuanajaya Emeshi Mese oe nei —taaame poanaje ojjaña cuana.

¹⁴Jesosa mapichi sisi ba majje o daasa biajje anisohuaquinaje. E'e, Jesosajo Eyacuiñajjiya esohui yahuaajo nei etehue'yo jayojja jama poanaje jama ba'a:

¹⁵“Ojjaña Jenosanenajo ba'e cuana huohuicue jama ba'a: —¡Quea bei pocue! ¡Bacue oe! Miquiana huoojea'yojji nei poeyani. Oya quea bei nee. Jamajjeya mapichi sisija edaasa biajje poeyani —huohuicue cuana”.

aya yahuaajo tehue ca poa Jesosajo.

¹⁶Ma etehue'yojo jjashahuabaqui jjimahuaa ecuaaya jama anaje ba'a: —¿Yajjajje shai quea huiso nee nee jjachichaquiani Jesosa que, o bihuiaa so'o?

Quijje ca ca Eyacuiñajjiya Jesosa emano'yojaa shequi mee caje o'oya; majjaya ecuaana niñebaje'yo jama ba'a: —E'e de, esohui huohuijji cuana yahuaajo ba'aja etehue'yo jama acanaje Jesosajo —quijje jamaya niñebaje'yo ecuaana Jesosa shequi o'oyajo.

¹⁷Yahuaajo Jesosaa Nasano shequi mee ca'yajo, quea huiso dejja cuaa ba ca poa Jesosa. Ma dejja cuaa ojjaña huasijje huohui huicha'a huicha'a ca poquia poa jama ba'a: —Nasano mano'yo majje jjanijo ehuananobia jaanaje. Jesosaa iyaa cajje oya shequi o'oyanaje, de —acanaje cuaa Jesosajo.

¹⁸Jamajjeya Jesosaa acani ma dejja ajjima acanijo quea huiso cuana poquinaje o baa, ejiojijije poeje baa. ¹⁹Jamajjeya Jesosa poeyanaje Jenosanena huasijje. Majjaya Paniseo cuana quea quene ojee mimimiminaje jama ba'a: —¡Bacue! Ecuaanaaya pea dejja cuana Jesosa nijje jjapeequi pajea mee ajja. Chojja, de. ¡Bacue oe! Ojjaña tii Jesosa nijje jjapeequiani. Ecuanaja esohui shajja'ajja sa po'yo ajja. Jesosa iña meesahua ajja pea'ai, de —poanaje Paniseo cuana.

Jesosa huohui canaje ojaya epoqui'yojji eyahuasijje e'ani'yojji

²⁰Beca Jodio cuana quea huesha Jienu meshijo ba'e pea'ai ma shejo poeyanaje Jenosanena huasijje ojjaña nijje ijia'ijjiaa, Eyacuiñajji bihuiaa. ²¹Oya cuana poeyanaje Penipe que, ma Betesaidajo ba'e que. Onijje jama poanaje ba'a: —Penipe, ecuanaya Jesosa ba sa neinei poani —poanaje.

²²Jamajjeya Penipe ojaya epeeji Anesi que poqui majje pea cuanaja esohui huohui canaje. Majjaya ojee poquinaje Jesosa huohuiya.

²³Shajja'ajja majje Jesosaa oya cuana jama acanaje ojjañaja eshajja'ajjajji ba'a: —E'e, eyaya Eyacuiñajjiya esohui oe a'yonaje. Apoa a'yonaje. Jjeya nei eya, ojjañaja Edoe Mese manojeyo. Eyacuiñajjiya eya mano'yajo dojosohuaqui caje'yo eyahuasijje. Onijje quea ca'a nee nee ani mee caje'yo. ²⁴Eyaya e'e jojo nei huohuiaña jama ba'a: Eso' quecua majje pohuani. Jamajjeya jjajja majje quea huiso eso' poaje'yo. Eso' quecua jjima ani jjapapaqui ajja. Jiquio ecua eso' quecua cajje quijje jjajjani jayojja jama poeje ojo. Onaa quecua cajje eya manojeyo ojjañaja mimishi cuijea'yojji sosejje. Jamajjeya eyaya quea huiso ba'e tiitii meeje'yo enijje eyajo. ²⁵Jamaya pea'ai joya enijje jjapeequiani dejja mimishi cuaa quecua caje'yo pojja'a. Jamatii enijje jjapeequianijo, mano'yo majje eyajo ba'aje'yo tii tii quea pame nee. Quea mete nee nee jjejojo enijje jjapeequi'yo ajjajo ca ca mano'yo majje cuaqui yasijje dobiquijje'yo tii tii, quea nee nee poaje'yo. ²⁶Ojjaña joya enijje chaco sa poaniya jeya cashajja'ajja cahua! Ecuea echacojji cuana quijje enijje ba'e tiitijje'yo. Ecue Chiiya oya cuana jama huohuime acaje ba'a: “E'e, jamaya. Miya Jesosaja echacojji quea pame nee” acaje Eyacuiñajjiya —Jesosa poanaje—. ²⁷Jjeya eya quea yeno. ¿Ajeo mimi cajji ecue Chii

nijse so'o? ¿A'a jama mimi cajji pojja'a ba'a: “Ecue Chii, ja'a dejja cuana eya napa meeji! ja'a eya quea nee nee po meeji!”? Chojja. Jamaya eya mimi ajja ecue Chii nijse. Ohuaya eya huoojea canaje ojjaña cuanaja mimishijo mano'yohua. ²⁸ Jamajjeya eya jama poaje ba'a: “Ecue Chii, ojjaña cuana mijo quea bihui po meecue!” —Jesosaa acanaje.

Majoya Eyacuiñajji eyajo ani miminaje jama ba'a: —Eyaya miya amee'yonaje ma dejjaa ajjima acani. Jamajjeya quea huisohua eya bihuia ca'yonaje. Jjeya ojjaña eya jjabihuia meequije o'oya —poanaje Eyacuiñajji eyajo ani.

²⁹ Ojjaña Jesosa que ejjachichaqui'yo nequi cuaa shajja'ajja canaje Eyacuiñajji eyajo janobajjima nei mimiani. Jamajjeya oya cuana miminaje jama ba'a: —¡De! Cueji pojja'a poanaje.

Beca cuaa jama acanaje ba'a: —¡Chojja! Eshuidojojji eyajo Jesosa nijse miminaje —poanaje cuana.

³⁰ Jesosa ojjaña nijse miminaje jama ba'a: —Ecue Chii eyajo miminaje miqiana jjabahuejja meequijji jama ba'a: Ohuaya eya shajja'ajja canaje onijse mimianijo —Jesosa poanaje —. ³¹ Jjeya Eyacuiñajji ojaña joya enijse jjapeequi ajja quea nee nee po mee caje'yo. Eyaya ojjaña jeabichajeaje'yo; Edosiquiana nei Satanasa bajjani, ma ojjaña dejja mimishi huoojeajji poani jeabichajeaje'yo. Quijje oya cuaqui yasijse dobiquije'yo tii tii. ³² Cuanaya eya ojjaña Edoe Mese acui ecueata'apeejo ba'ehuanasohua jajo, quea huiso nee nee ojjaña meshijo ba'e enijse jjapeequi meeje'yo —Jesosaa acanaje.

³³ Jamaya Jesosaa ojjaña ba mee canaje oya acui ecueata'apeejo manoj'e'yo. ³⁴ Jodio cuana jomajo ejjachichaqui nequiya huohui canaje jama ba'a: —Ecuana esohui huohuijji cuana jama poani ba'a: “Eyacuiñajji huoojea'yo ojjaña jaahuanajji Quito bajjani ba'e tiitiije'yo. Mano'yo ajja poaje”. Jamajjeya ¿apijji miyaya huohuinaje ojjaña Edoe Mese manoj'e'yo acui ecueata'apeejo ba'ehuanasohua jaje? ¿A'a miya Eyacuiñajji huoojea'yo? ¿A'a miya ojjaña Edoe Mese ma Quito bajjaniya? —onaaya huohui'ajja canaje.

³⁵ Jesosaa oya cuana saja'a canaje jama ba'a: —Eyaya miqiana huasijse esohui huohuije oe pojji cahuime. Ecuea esohui cuaquijji sisi jayojja. Jjeya nei ecuea esohui jayojja jama acue! Jamajjeya miya poquiquehua ajja. Pea cuana ecuea esohui shajja'ajja sa po ajjajo poquiquehua tiitiije'yo. Jiquio ecua mecajje quea misijo cuaquisho chana' epoquijji jayojja jama ojjaña joya ecue sohui jayojja jama a'ajja, quea mimishi ba'yani. ³⁶ E'e, ecue sohui cuaquijji quea ja'a jayojja jama. Jamajjeya eya minijse nequijo, ¡ecuea esohui jayojja jama acue! Jamaya miqianaya ecuea epeejji quea ja'a nee poaje'yo. Poquiquehua ajja dejja mimishi jayojja jama epojji pojjeama —poanaje Jesosa.

Majoya esohui huohui majje Jesosa poquinaje. Jja'aniquehuaquinaje.

Jodio cuana Jesosa nijse jjapeequi ajja tii

³⁷ E'e, Jesosaa quea huiso ma dejjaa ajjima acani acanaje. Ojjaña ba canaje. Jamatii Jodio cuaa huohui canaje jama ba'a: —Chojja, Jesosa Eyacuiñajji huoojea'yo ojjaña jaahuanajji pojjeama —poanaje jashajja'ajjaqui ajja jjejojo.

³⁸ Yahuajo nei Eyacuiñajji esohui huohuijji Isaia bajjaniya tehue ca poa Jodio cuanajo jama ba'a:

“Eyacuiñajji, Jodio cuana ecuanaja esohui shajja'ajja sa po'yo ajja. Miyaya ma dejjaja ba jjima aña. Ba huicha'a huicha'a majje jamatii oya cuana jashahuabaqui sa po ajja”.

³⁹ Jamajoya Isaiaa yahuajo nei nei oya cuanajo tehue ca poa jama pea'ai ba'a:

⁴⁰ “Jodio cuana cojjama' jayojja jama poanijo, miyaya ma dejjaja ba jjima aña ba majje jjabahuejjaqui mee jjima mijo. Quea sapa ca'a jjejojo miquea ejjashahuabaquijji jjabahuejjaqui mee jjima. Jamajjeya minijse jjapeequi ajjajo Jodio cuanaja mimishi cuana ecuijea'yojjii pojjeama”.

Jamaya Isaiaa yahuajo tehue ca poa Jodio cuanajo. ⁴¹ E'e, Eyacuiñajji yahuajo nei nei Isaia Jesosa ba mee majje ojo tehue mee ca poa jama ba'a: “Oya quea ca'a nee nee poani. Oya Eyacuiñajji huoojea'yo ojjaña jaahuanajji”.

⁴² Jamatii quea huiso Jodio etii cuaa quehuajje Jesosajo jama acanaje ba'a: —E'e jojo nei oya Jesosa Eyacuiñajji huoojea'yo ojjaña jaahuanajji —quehuajje poanaje Jodio etii cuana, Paniseo cuana yajjajo.

E'e, Paniseo cuana yahuajo jama poanaje ba'a: —Jesosa nijse jjapeequi aje oe ecuanaja equi ojee ejjachichaquijji yasijse edobiqui meeji pojjeama; ¡huoojeacuayajeaje'yo mi! —poanaje Paniseo cuana.

Jamajjeya beca Jodio etii cuana quea ajjaja poanaje ehoojeacuayajea ca poanijje. ⁴³ E'e, Jodio cuana jashahuabaqui ajja Eyacuiñajji quea bei epo mee'yojji. Chojja, oya cuana aje oe jshahuabaquinaje pea Jodio cuana quea bei epo mee'yojji onijje.

Jesosaa quijje ojjaña huohui caje'yo joya ojaya epeejji nei

⁴⁴ Jamajjeya Jesosaa ojjaña ejjachichaqui nequi janobajjima nei, quea ja'a nēe huohui canaje jama pea'ai ba'a: —Ecue Chiiya, Eyacuiñajjiya eya huoojea canaje. Jamajjeya ojjaña jōya enijje e'e jojo nei jjapeequiāni ecue Chii nijje pea'ai jjapeequiāni. ⁴⁵ Beca cuana mimiani jama ba'a: “E'e, Jesosa Eyacuiñajjiya huoojea'yo ojjaña jaahuanajji”. Jōya e bajji poaniya Eyacuiñajji ba cani pea'ai, eya ecue Chii jayojjaya poani tii. ⁴⁶ ¡Bacue! Cuaquiñajjiya jeaja'a canijo, deija cuana poquiquehua ajja mecajje quea año. Eyaya cuaquiñajji jayojja jamaa ojjaña quea ja'a jashahuabaqui meesahuāña. Jamajjeya ojjaña jōya enijje jjapeequiāni mimishi cuana pajea meeje'yo. Jamajjeya Eyacuiñajjiya eya huoojea canaje ojjaña cuana mimishi pajea mee'yohua. ⁴⁷ Ecuea esohui shajja'ajja majje beca cuana jamaya ba'e sa po'yo ajja. Jamatii eyaya oya cuana tecuea jjima año. Eya ca iña poeyanaje ojjaña meshijo ba'eca cuanaja mimishi cuijea'yohua, enijje ba'e tiitii mee'yohua; quea mimishi nēe poanijo, quea nēe nēe po mee sa po'yo ajja. Ecuea ejjashahuabaqui'yojji jama pojjeama ba'a: “Ojjaña quea mimishi nēe poani quea nēe nēe po meeje'yo”. Chojja, eya ca iña poeyanaje ojjaña meshijo ba'eca cuanaja mimishi cuijea'yohua, enijje eba'e tiitii'yojji. ⁴⁸ Ojjaña jōya e cajaa ajji epo quijje quea nēe nēe poaje'yo cuaquiño ecue huohui jayojja jama ajimajōjo. Jjeya nei eyaya esohui huohuaña. Quijje eya poe o'oya majje ojjaña shajjama' cuana nijje mimije jama ba'a: “Ecuea esohui shajja'ajja jjimajo miqūianaya cajaa ajje'yo”. ⁴⁹ E'e, ecue Chiiya, e huoojea'yojji poaniya eya huohui meesahua cani ojaya ejjashahuabaqui'yojji. ⁵⁰ Ecuea eba ojjaña jōya ojaya esohui jama poani Eyacuiñajjiya pea jashahuabaquime po mee caje'yo. Ba'e tiitii mee caje'yo onijje pea'ai. Jamajjeya, e'e nei ojjaña Eyacuiñajjiya huohui canajeya eyaya huohuaña —Jesosaa poanaj e.

13

Jesosaja epeeji cuanaa ojaya pea epeeji cuana cajaanahuana cahua, caba'e meesahua cahua

¹ E'e, Jodio cuana ojee jjachichaqui o'oyanaje Jenosanena huasijje ojee ijjiia'ijjiāa quea bihui nēe epojji, eniñeba'yojji esohuidojojjiya yahuajo nei Ejito meshijo Jodioja bacua cuana cuia'yo jjima epajea'yojji pojjeama. Jamajjeya oe cahuime ojee ijjiia'ijjiāa jjimahuaajo, Jesosa jashahuabaquinaje jama ba'a: —E'e, jiquio shejo eya poquije o'oya eyahuasijje ecue Chii que. Eya ca iña nequi ajja jiquio meshijo.

Jesosaa ojaya epeeji cuana jiquio meshijo ba'e quea jea nēe nēe acanaje. ¡Quea jea nēe nēe Jesosaja ojaya epeeji cuana! Poqui jjimahuaa ohuaya oya cuana jjabahuējaqui mee canaje.

²⁻⁴ Edosiquiana neiya Jodasa Isicanote, Simonija bacua ejja quea tai jashahuabaqui mee canaje. Jamajjeya Jodasa jashahuabaquinaje Jesosa iña meesahuajji, onajaya equecua'yojji. Jamatii Jesosaja eba poanaje jama ba'a: Eyacuiñajjiya, oja Chiiya oya eyajo ani huoojea ca poa meshi yasijje. Jamajjeya oya oja Chii que poquije o'oya. Oja Chiiya oya ojjaña huoojea'yojji po mee ca poa pea'ai. Jamajjeya sinecua ecuana nijje, o shajja'ajjajji cuana nijje ojee ijjiia'ijjiānijo Jesosa nequisohuanaje. Oja daqui ao huuijiajea majje pea daqui ejjacomayijji quijji ai jayojjajo jjaeyoca'aquinaje. Ma daqui jjaeyoca'aqui majje ohuaya ena sho canaje tepe ai jayojja huasijje. ⁵ Majoya ecuana jiojji topo canaje. Topo majje jiojji cui ca'yonaje ma daquiya, ejjacomayijji quijji ai jayojjaa, Jesosaa. Jamaya poanaje ecuana jjabahuēja mee quijji jama ba'a: Pea cuana quea jea nēe año, ¡ba'e meesahuacue! Jama jashahuabaquime epo meeji jiojji topo canaje. ⁶ Jamajjeya quijje Jesosaa Peno jiojji topo'ajja ca poa.

—Jesosaa, miya ecuea Emeshi Mese nei. ¿A'a jjaya iña jiojji topoje pea'ai? —Peno poanaje.

⁷ Jamajjeya Jesosaa oya saja'a canaje jama ba'a: —E'e, Peno, jjeya miya jashahuabaquiāni: “¿Yajjajo shai Jesosaa ecuana jiojji topo cani so'o?” miquea ba jjima; yajjajo eya jama año poso jjabaquiani. Jamatii quijje pishana miquea eba poaje —Jesosaa poanaje.

⁸ —Chojja, Jesosaa, miquea eya ejiojji topojji pojjeama, de, miya ecuea Emeshi Mese nei poanijo —Peno poanaje.

Jamajjeya Jesosaa oya acanaje: —Peno, miya ecuea epeeji nei pojjeama poaje, ca eyaya miquea ejiojji mi topoajo —Jesosaa oya acanaje.

⁹ —¿A'a e'e? Jamajjeya ¡ecuea ejiojji topocue, ecuea eme' cuana, ecuea ecojja pea'ai, ojjaña topocue! —poanaje Peno, Jesosa nijje jjapee neinei qui sa poanijo.

¹⁰ —Peno, miqūianaya besanaje. Jamajjeya miya quea boejea. Jamatii jjeya ejiojji nei catopoahua. Jamajjeya miqūianajaya mimishi cuijea'yo majje quea boejea a'yonaje. Oe nei nei yani quea boejea pojjeama —Jesosaa poanaje.

¹¹ Oya jashahuabaquiāni Jodasajo. Ojaya eba Jodasa o iña meeji epojji. Jamajjeya: “Oe nei yani quea boejea pojjeama” Jesosaa poanaje.

¹² Majoya ecuana jiojji topo majje Jesosaa oja daqui ao huosho ca o'oyanaje. Anioque o'oyanaje ecuana niije. Jama poanaje ba'a: —¿A'a miquea eba yajjajo miqianaya eyaya jiojji toponaje? ¿A'a jjabahuejjaqui jjima pojja'a? ¹³ ¡Bacue! Miquianaaya eya jama añña ba'a: “Miya ecuea esohui huohuijji”, “Ecuea Emeshi Mese” añña. E'e, jamaya miquianaaya quea pame añña. Eya ca ca iña jiquio, miquianajaya esohui huohuijji, miquianajaya Emeshi Mese pea'ai. ¹⁴ E'e, ¡bacue! Eyaya miquea esohui huohuijjiya, miquea Emeshi Meseya miquianaya jiojji toponaje. Jamajjeya je jayojja jama pocue! ¡Pea cuana jiojji topojji jayojja jama pocue! ¹⁵ E'e, eyaya miquianaya jjabahuejjaqui meeaña: ¡Eyaya miquianaya anaje jayojjaya pea cuana acue! ¹⁶ Eyaya e'e jojo nei miquianaya ba meeaña jama ba'a: ¿A'a echacojjiya ojaya echacomeejji huoojea cani? Chojja. Emeshi meseya ca ca oe echacojji huoojea cani. Eya quea ca'a nee nee; miya ecuea echacojji quea ca'a pishana. Jamajjeya ¡ecue sohui jayojja jama acue! E'e, ¡pea cuana ba'e meesahuacue oe! ¹⁷ Jjeya ecuea esohuijjo jjabahuejjaquinaje. Jamajjeya miya quea bhui nee poaje'yo ca ecue sohui jayojja jama ba'yajo —Jesosaa poanaje.

Jesosaa huohui canaje Jodasa o iña meejji epojji

¹⁸ Majoya Jesosaa jama acanaje ba'a: —Jamatii eya ojjaña miquianajo pojjeama mimiani. Miquianaya ecuea ehabaca; ecuea eba ojjaña. Oe dejja ese niije nequi ecuea epeeji nisho; Eyacuiñajija esohui etehue'yo ojo yahuajo nei jama poa ba'a:

“Oya enijje ijija'ijija anije. Jamatii aje oe ecuea epeeji nisho oya poaje, e quecua mee'yojji epojji”.

Ecuea eba jiquio etehue'yo jamaya poaje e'e jojo nei. ¹⁹ E'e, eyaya miquianaya jjeyahua nei huohuaña jama po jjimahuajo. Jamajjeya quijje pea cuaa eya quecua cajo miquianaya jama ejo jashahuabaquije ba'a: “E'e jojo nei oya Jesosa Eyacuiñajija huoojea'yo ojjaña jaahuanajji. Jamajjeya ohuaya eseya huohui canaje yahuajo” jamaya poaje miquianaya quijje. ²⁰ E'e jojo nei —Jesosaa poanaje pea'ai—, ojjaña joya ecuea echacojji niije jjapeequiani ecuea esohui huohuijji poanijo, enijje jjapeequiani pea'ai. Eyacuiñajji e huoojea'yojji poanijo, ojjaña joya enijje jjapeequiani Eyacuiñajija epeeji poani pea'ai oya cuana.

Jesosaa miminaje Jodasajo

(Mateo 26.20-25; Macosco 14.17-21; Noca 22.21-23)

²¹ Majoya Jesosa quea yeno nee nee poanaje Jodasaja ejjashahuabaquijji quea tai ba majje. O shajja'ajajji cuana jama huohuime acanaje ba'a: —Eyaya miquianaya e'e jojo nei huohuaña. Oe dejja jiquiojo enijje ijija'ijija ani e iña meesahuajji epojji onajaya quecua'yojji —Jesosaa poanaje.

²² Jamajjeya o shajja'ajajji cuana quea metejo pea niije ecapashe nei jama poanaje ba'a: —De, ¿ache shai o iña meesahuajji poaje so'o? —jjashahuabaquime poanaje.

²³ Eya jiquio esohui tehuejji, Huani bajjani Jesosa pejejejo aninaje, eya ojaya quea jea nee nee. ²⁴ Jamajjeya Penohua eya Jesosa huohui'ajja mee canaje: —¿Ache shai o iña meesahuajji poaje?

²⁵ Majoya eyaya ecapashe nei Jesosa huohui'ajjanaje jama ba'a: —Jesosaa, ¿aya acuae mi quecua mee'yo sa acani so'o?

²⁶ Jesosaa acanaje: —Pahui noe najo peshepeshe mee majje eyaya maya quiaje, ma e iña meejji epojji.

Majoya Jesosaa pahui noe najo peshepeshe mee majje quia canaje Jodasa, Simonija bacua ejja: —Ma'aje, Jodasa —poanaje.

—Ocuae, Jesosa —acanaje Jodasaa.

²⁷ Pahui ijija anijo Edosiquiana neiya Jodasa quea tai jashahuabaqui mee canaje jama ba'a: “¡Onaya eyaya Jesosa iña meesahuaje!”

Majoya aje Jesosaa jama acanaje ba'a: —¡Poquicue, Jodasa! ¡Miquea ejjashahuabaqui'yojji jayojja jama acujicue jjeyahua nei! —Jesosaa poanaje.

²⁸ Pea shajja'ajajji cuana jama poanaje ba'a: —¿Yajja poanaje Jesosa? ¿Ajeo Jesosaa Jodasa huoojea canaje so'o? ²⁹ Jodasaa bashosoco sisi esejaya ejjeshejji biojji dojo canaje. E'e pojja'a huoojea canaje bobi jjequiya, quijje ojee e'ijjiajji pojja'a —poanaje.

Beca eshajja'ajajji cuana jama poanaje ba'a: —E'e pojja'a Jesosaa Jodasa huoojea canaje bejjo quiaa aema' cuana huasijje —poso acanaje cuaa.

³⁰ E'e, Jesosaa huoojea caje Jodasa pahui ijija majje poquinaje esecue yasijje. Jjasinecuajajo poquinaje.

Jesosaja esohui eyacua

³¹ Majoya Jodasa poqui'yajo, Jesosa ecuana niije jama poanaje ba'a: —Eya ojjañaja Edoe Mese. Eyacuiñajija jjeyahua nei ojjaña ba mee caje eya quea ca'a nee nee poani. Ma ba cajo, eyaya ojjaña jjabahuejjaqui meejje Eyacuiñajji quea ca'a nee nee, quea pame nee nee. ³² E'e,

Eyacuiñajjiya eya ma dejjaa ajjima acani amee canajejo ojjaña jjabahuejjaqui meenaje oya quea ca'a nee nee. Jamajjeya Eyacuiñajjiya jjeyahua nei ojjaña jjabahuejjaqui mee caje eya quea pame nee nee poani. E'e, Eyacuiñajjiya eya shequi mee'yo majje jjequisohua caje'yo eyahuasijje —Jesosa poanaje.

³³ Majoya Jesosaa ecuaña huohui canaje jama ba'a: —¡Miquianaya ecue bacua cuana jay-ojja, shajja'ajjacue mo! Eya minijje nequije oe pojji cahuime. E poqui'yajo, miquianaaya eya sa'ajjaje'yo. Jamatii jjeya nei poqui meeme ajja e poquiani yasijje. Jamaya yahuaajo eyaya pea Jodio cuana huohuinaje pea'ai. ³⁴ Jamajjeya esohui eyacua eyaya huohuiaña jama ba'a: ¡Pea cuana quea jea nee nee atitiicue! ¡Eyaya miquianaya quea jea nee nee añña jayojja jamaya pea cuana quea jea nee nee acue! ³⁵ Pea cuana quea jea nee nee añña, onaya miquianajo jama poaje ba'a: “E'e jojo nei miquianaya Jesosaja epeeji poani” —Jesosa poanaje.

³⁶ Peno Simohuiya Jesosa huohui'ajja canaje jama ba'a: —Emeshi Mese Jesosa, ¿achacua acuae shai mi poquije'yo? —acanjaje.

—Peno, jjeyahua nei miya epoquijji pojjeama e nequi yasijje. Quijje poe meeje e ani yasijje —Jesosa poanaje.

³⁷ Penohua huohui'ajja canaje: —¿Yajjajo acuae jjeya eya minijje mi poqui meeaña? Miya ecuea quea jea nee nee jojo eyaya jaahuanaje'yo. Manojje'yo mi jaahuanajji.

³⁸ Jesosaa quea yenuhua Peno jama acanjaje ba'a: —¿A'a miya manojje'yo e jaahuanajji? Chojja Peno, e'e jojo nei jiquio mecalle cachina yahue taa jjimahuajo, miya ejo jama po huicha'a huicha'aje ba'a: “¡Chojja, Jesosa ecuea ba jjima nei nei!” miya quea mete po majje pea beca peejjima huohuimeya aje —Jesosa po anaj e.

14

Jesosaa ojaya epeeji quea bihui nee po mee canaje

¹ Jesosaja esohui shajja'ajja majje ecuaña quea yeno, quea mete poanaje. Jamajje Jesosa ecuaña nijje miminaje jama ba'a: —¡A'a quea mete pojji! ¡Jiquio jama jashahuabaquicue ba'a: “Eyacuiñajjiya eya jaahuana caje'yo tii” pocue! ¡Ejo jama jashahuabaquicue pea'ai ba'a: “Jesosaa eya jaahuana cani tii” pocue! ² Ecue Chii Eyacuiñajji eyajo ani. Jocuama ojaya eba'e'jji quea huiso nee yani. Ecuea esohui e'e jojo nei, sijje pojjeama. Eya poquije ecue Chii que miquianajaya eba'e'jji iyaa, apoa yajji. ³ E'e, eyaya miquianajaya eba'e'jji iyaje. Jamajjeya e'e jojo nei eya poeje o'oya. Poe o'oya majje eyaya miquianaya dojoje enijje eba'e' tii'tii'yojji. ⁴ Miquianajaya eya eba ecue Chii que poquije. Miquianajaya eba pea'ai ecue Chii que epoquijji —Jesosa poanaje.

⁵ Majoya Tomasi Jesosa nijje jama poanjaje ba'a: —Jesosa, ¿achacua miya poquije'yo? Joya mi poquije yasijje ecuanajaya ejiojji ba jjima, de. Jamajjeya ecuanaja eba pojjeama ejiojji ma mi poquiani yasijje epoquijji —acanjaje Tomasiya.

⁶ —Tomasi, ojjaña ecue sohui e'e jojo nei. Eya ejiojji eyahuasijje epoquijji jayojja. E'e, ecuea esohui jayojja jama poanajo, miya ecue Chii ba'yani yasijje poqui meeje'yo. Ojjaña enijje japeequiani eyaya ba'e tii'tii meeje'yo ecue Chii nijje tii. Ojjaña jaya enijje japeequi ajja ca ca ecue Chii nijje eba'e' tii'tii'yojji pojjeama. ⁷ Eya miquianajaya eba jojjemo miquianaaya ecue Chii bame pea'ai poaje. Jjeya nei oya miquianajaya eba poaje. Jamajjeya eya ecue Chii yasijje poqui'yajo, oya quea ca'a nee nee ani miquianaaya bajje —Jesosa poanaje.

⁸ Majoya Penipe jama poanjaje ba'a: —Jesosa, ¿eseja Chii ai ecuanaya ba meecue! Jamajjeya ecuaña quea bihui nee nee poaje'yo —poanjaje Penipe.

⁹ Jesosaa Penipe acanjaje: —Penipe, ¿a'a miquianaya jjabahuejjaqui jjima? Eya miquiana nijje ba'enaje quea shequiaja huiso. ¿A'a jjeya miquianajaya eya ba jjima? ¡Bacue oe! E ba majje esejaya Chii eyajo miquianajaya eba pea'ai. Jamajjeya ¿apiojji acuae miya jama poani so'o ba'a: “¡Esejaya Chii ai ecuanaya ba mee socue!” poani miya? —Jesosa poanjaje —. ¹⁰ E'e jojo nei eya ecue Chii jayojjaya, de. Oya e jayojjaya pea'ai. ¿A'a miquianaya jamaya jashahuabaqui jjima? Ecue Chii nijjeya eyaya ohuaya jayojja añña, ma dejjaa ajjima acani añña. Ecue Chiija ejjashahuabqui'yojji eyaya huohuiaña pea'ai, ecuea ejjashahuabaqui'yojji pojjeama. ¹¹ E'e jojo nei eya ecue Chii jayojjaya, de. Oya e jayojjaya pea'ai. ¡Jamaya jashahuabaquicue, oe! Ecuea esohuijo miquianaya jjabahuejjaqui jjima, ¡Jamajjeya jashahuabaquicue eyaya ma dejjaa ajjima añña! ¡Jama acue ba'a: “E'e, Jesosa Eyacuiñajji jayojjaya” acue miyaya! —Jesosa poanjaje —. ¹² Eyaya huohuiaña e'e jojo nei jama ba'a: Ojjaña enijje e'e jojo nei japeequianiya eyaya añña jayojja jama acaje'yo. Eyaya quea huiso pishana japeequi mee'yonaje Eyacuiñajji nijje. Eya ecue Chii que poqui'yajo, ecuea epeeji cuaa quea huiso nee nee pea cuana japeequi meesahua caje'yo onijje, Eyacuiñajji nijje. ¹³ Jiquio ecua miquianaya enijje mimijea jamaya eyaya aje'yo, ca ejo

jama jashahuabaquianijo ba'a: "E'e jojo nei Jesosaa ma ecua eya onijje mimiani jamaya acaje'yo". Jamajoya ba majje ojjaña ecue Chii bihuia caje jama ba'a: "Eyacuiñajji, ecuanaja Chii ai, miya quea ca'a nee nee eyajo ani". ¹⁴ Enijje mimicue jama ba'a: "¡Jesosaa, ¡iquio ecua eya mimiani minijje jamaya miyaya acue!" Jamajjeya miya enijje poanijo eyaya joya ecua miya enijje mimiani jamaya aje'yo —Jesosaa ecua huohui canaje.

Jesosaa huohui canaje Edojjoshahua Pameja epoejjijo

¹⁵ Majoya Jesosaa ecua, o shajja'ajjaji cuana huohui canaje jama ba'a: —Eya miqianajaya quea jea nee poanijo, ¡ecuea esohui jayojja jama acue! ¹⁶ Jamajjeya eya eseja Chii nijje mimije jama ba'a: "Ecue Chii, ¡Edojjoshahua Pame huoojeacue ecuea epoejji cuana jjabahuejjaqui mee'yohua! Oya ecuea epoejji cuana nijje ani tiitiije'yo". ¹⁷ E'e, Edojjoshahua Pameya miqianajaya esohui e'e neijo jashahuabaqui mee caje'yo. Ecuea epoejji pojjeama ca ca Edojjoshahua Pame nijje ejjapeequi meejji pojjeama. Oya miqianajaya eba. Pea cuanajo oya ba jima. Oya miqiana nijje neequi tii tii. Miqiana que dobiquije'yo, Edojjoshahua Pame —Jesosaa poanaje.

¹⁸ —Ecuea epoejji, eya poquije'yo, miqianajaya jeanaje'yo ¡iquiojo tii. Jamatii ecuea miqianajaya jaahuana jima jayojja jeana'yome ajjima. Chojja. Eya miqiana huasijje huoojeaje'yo Edojjoshahua Pame miqiana nijje japeequi tiitiya, miqiana jaahuana tiiti'yojji. ¹⁹ Quijje pishana ecuea epoejji pojjeama cuua eya ba maja ajja. Miqianaaya ca ca eya baje o'oya. Eya ba'e tiitiije'yo, miqianajaya pea'ai ba'e tiitiije'yo —Jesosaa poanaje —. ²⁰ Edojjoshahua Pame poeyajo, miqianajaya jjabahuejjaqui jama ba'a: Eya ecue Chii jayojjaya tii poani. Eya miqiana nijje nequi, miqianajaya enijje nequi pea'ai —Jesosaa poanaje—. ²¹ Ojjaña joya quea e jea nee nee poani ecuea esohui shajja'ajja majje jamaya poani. Eya ojaya quea jea nee nee poanijo, oya ecue Chii jea nee nee pea'ai, ecuea quea jea nee nee pea'ai. Eyaya oya ba meejje jama ba'a: Eya e'e jojo nei onijje ani tii tii —Jesosaa poanaje.

²² Majoya pea Jodasa, ma Jodasa Isicaniote pojjeama, Jesosaa nijje jama poanaje ba'a: —¿Yajjajo acuae miquea epoejji pojjeama mi jaba meemajaquije so'o? Ecuanaa ca ca miya baje o'oya —huohui'ajja canaje pea Jodasaa.

²³ Jesosaa oya jama acanaje ba'a: —Ojjaña joya quea e jea nee poaniya ecuea esohui jayojja jama acaje'yo tii. Jamajjeya ecue Chiiya oya cuana quea jea nee acaje'yo. Eya, ecue Chii pea'ai onijje japeequije'yo. ²⁴ Pea cuana ca ca ecuea esohui shajja'ajja sa po ajja, e boti'ama jjejojo. Miqianajaya shajja'ajjaña. Ecue Chiiya eya huoojea canaje. Ojaya ejjashahuabaquijji eyaya miqianajaya huohuiaña, ecuea ejjashahuabaquijji pojjeama. ²⁵ Jamaya eyaya huohuiaña, miqiana nijje nequiya. ²⁶ Ecue Chiija eba miqianajaya ecuea epoejji poani. Jamajjeya ohuaya Edojjoshahua Pame huoojea caje miqiana huasijje, miqiana jaahuana, miqiana enijje ejjapeequijji pea'ai. Poe majje ohuaya miqianajaya ba meesahua caje'yo Eyacuiñajjija ejjashahuabaquijji cuana. Ojjaña ecuea esohuijo ohuaya miqianajaya jashahuabaqui mee caje'yo tii tii pea'ai —Jesosaa poanaje.

²⁷ —Eya quea bei nee nee. Eyaya miqianajaya quea bei po meaña —Jesosaa poanaje—. ¡Jamajoya quea bei pocue, e jayojja! ¡Met'e'ama, yeno'ama pea'ai pocue! Ecuea epoejji pojjeama cuanaja aje oe miqianajaya quea bei nee epo mee'yojji pojjeama, de. ²⁸ Eyaya huohuinaje jama ba'a: Eya ecue Chii que poquije'yo. Poqui majje quijje eya poeje o'oya miqiana que. E'e, eyaya miqianajaya huohuinaje jama ba'a: Eya poquije'yo ecue Chii que. Ecue Chiiya eyajo aniya ma dejjaja ba jima quea huiso nee nee acani. Eyaya ¡iquiojo ma dejjaa ajjima acani oe pojji aña —Jesosaa poanaje—. Jamajjeya miqianajaya quea e jea nee poanijo, ¡quea bihui nee pocue ojo, eya ecue Chii que poquianijo pea'ai! ²⁹ E'e, eyaya miqianajaya jeyahua nei huohuiaña, eya ecue Chii que poqui jimahuaajo. Jamajjeya e poqui'yajo miqianajaya jama poaje ba'a: "E'e jojo nei Jesosaa poqui jimahuaa eseya huohui canaje. Oya Eyacuiñajjija Bacua Ejja poeje o'oya" aje quiana oe poaje —Jesosaa poanaje—. ³⁰ Eya miqiana nijje jjeja nei mimi majamaja ajja. Edosiquiana nei poeyani e napaa. E'e, Edosiquiana nei, ma ojjaña meshijo dejja mimishi huoojea'yojji poani e napaa poeje. Ojaya eya ejeabichajjiji pojjeama. ³¹ Jamatii eya quea nee nee poaje. Quea nee nee poaniya ojjaña ba meejje jama ba'a: "Jesosaja oja Chii quea jea nee nee. Oja Chiija ehuhui jayojja jama poani pea'ai" acaje cuua. Mahuiso —Jesosaa poanaje—. E'e. ¡jjeja nequisohuacue! ¡Cua'a, esecue yasijje cuayaquicue! —Jesosaa poanaje.

Jamajjeya equi quecuayijji eyajo ani ijja'ijjia ani cuayaquinaje esecue yasijje acui yiye yasijje epoquijji.

15

Esohui eba meesahuajji uwajo bashococo ai jayojjajaya

¹ Majoya ejiojjijje poquijeya Jesosaa ecuana huohui canaje: —Eyaya esohui mi ba meesahuajji huohuije uvajo, bashococo ai jayojjajo. Eya bashococo ai emaijje quea pame jayojja jama poani. Ecue Chii bashococo ai cuiñajji jayojja jama. ² Bashococo ai cuiñajjiya yaa sisi nojinoj'iyajo tetojea ca'yani jjaaja ajjajojo. Eña ba chii tetojea ca'yani pea'ai, jono quea jjaaja huiso epojji. Jiquio ecua jono bashococo ai cuiñajjiya yaa enojinojii tetojea ca'yani jayojja jama ecue Chiiya ecuea epeeji nisho cuana cajaa acani. Jiquio ecua eña ba chii tetojea ca'yani jayojja jama epeeji e'e jojo nei cuana mimishi pajea mee cani, quea pame nee nee epojji. ³ Ecuea esohui shajja'ajjanajejo miqiuianaya quea ja'a poanaje. Jamajjeya miqiuianaya bashococo ai jono quea pame jayojja jama poanaje. ⁴ ¡Enijje jjapee tiitiqicue! Jamajjeya eya miqiuiana nijje jjapee tiitiqiuje'yo. Jamajjeya miqiuianaya ma dejjaa ajjima acani ameeje'yo. ¿A'a jono emaijje jjaajjajqui majje jjaajjaje so'o? Chojja. Jamaya miqiuianaya enijje jjapee pajeaqui'yo majje quea pame po ajja. Emaijje jjaajjajqui'yo jjima jono jjaajjani —Jesosa poanaje.

⁵⁻⁶ Eya jono emaijje quea pame nee jayojja. Miqiuianaya jono emaijo pohuani jayojja. Jono emaijje jjaajjajqui'yo majje nojinojije. Joca'yajo chicha'yo majje dahuaajea ca'yani cuaa. Oya jayojjaya ojjaña enijje jjapee pajeaqui'yani cajaa acani. Joya enijje jjapee tiitiqiuiani ca ca eya jjapee tiitiqiuje'yo onijje pea'ai. Jamajjeya oya cuana ma dejjaa ajjima acani quea huiso ameeje'yo. ⁷ E'e, miqiuianaya enijje jjapee tiitiqiuianijo, ecue sohui jayojja jama atititñaño pea'ai, Eyacuiñajjiya joya ecua miqiuianaaya huohuinaje jamaya acaje onijje mimiyajo. ⁸ Miqiuianaya ma dejjaa ajjima amee cani ba majje pea cuaa huohui caje jama ba'a: “E'e, Eyacuiñajji quea ca'a nee. Jiquio deja cuana e'e jojo nei Jesosa shajja'ajjajji cuana” acaje cuaa.

⁹ —Ecue Chiiya eya quea jea nee nee acani jayojja jama miya ecuea quea jea nee nee. Jamajjeya jeya miqiuianaaya quea jea nee nee pea'ai acue! ¹⁰ E'e, eya ecue Chiiya quea jea nee nee poani, eyaya ojaya esohui jayojja jama atititñaño. Jamaya ecuea esohui jayojja jama poanijo, miqiuianaya ecuea quea jea nee nee poani pea'ai —Jesosa poanaje.

¹¹ —Eyaya jiquio esohui huohuina miqiuiana quea bihui po meejji. E'e, eyaya miqiuianaya quea bihui nee nee po mee sa aña. ¹² Eyaya miqiuianaya huohuina'yaña jama ba'a: ¡Pea cuana quea jea nee nee acue! ¡Jiquio ecua eyaya miqiuianaya quea jea nee nee aña jamaya acue cuana! ¹³ Ojaya epeeji quea jea nee nee acani oe deja manaje'yo ojaya epeeji nahuejo. Jamajjeya jayaya oja epeeji quea jea nee nee poanijo nahue cani! ¹⁴ Miqiuianaya ecuea quea jea nee nee; ecuea esohui jayojja jama poanijo ecuea epeeji e'e jojo nei poani. Jamajjeya eya miqiuiana nahuejo manaje'yo. ¹⁵ Echacojjija ba jjima ojaya echacomeejji ejjashahuabaqui'yojji. Ojaya epeeji ca ca ba mee cani. Jamajjeya jjeya eya jama po ajja ba'a: “Miqiuianaya ecuea echacojjii poani”. Chojja. Jjeya eya jama poani ba'a: “Miqiuianaya ecuea epeeji poani”. E'e, ojjaña joya ecue Chiiya huohui canaje eyaya miqiuianaya ba meenaje ecuea epeeji poanijojo —Jesosa poanaje—. ¹⁶ ¡Bacue, oe! Eya miqiuianajaya ehabaca pojjeama. Eyaya ca ca miqiuianaya babaca'yonaje ecuea epeeji epojji. Eyaya miqiuianaya huoojeaña ecue Chii nijje quea pame nee chacohua. Jamajjeya ¡pea cuana enijje jjaapeequi meesahuacue! Jamajjeya enijje jjaapeequianijo miqiuianaya cojjacahuanijo. Eyacuiñajji nijje emimijji ohuaya miqiuianaya saja'a acaje —Jesosa poanaje—. ¹⁷ Jamajjeya eyaya miqiuianaya huohuina'yaña jama ba'a: ¡Pea cuana quea jea nee nee acue! —Jesosa poanaje.

Eshahuaja epeeji cuanaja boti'ama nei nei poaje miqiuianaya

¹⁸ —¡A'a quea yeno pojji deja mimishi cuana miqiuiana nijje quea quene poanijo! Deja mimishi cuana miqiuiana nijje quea quene nee nee po jjimahuajo enijje quea quene nee nee poanaje. ¹⁹ Miqiuianaya deja mimishi jayojja ba'e jojjemo ojaya quea jea pome miya ojaya pea epeeji quea jea jayojja. Jjeyahua nei miqiuianaya ona jayojja pojjeama, eyaya miqiuianaya babaca'yonajejo. Jamajjeya miqiuiana nijje quea quene nee nee poani deja mimishi cuana. ²⁰ ¿A'a ecuea ehuhui'yo baña? Jama ba'a: Echacomeejji quea sohui ca'a; echacojjii ca ca ca'a'ama. Jamajjeya eya napa caje cuaa jayojja jama miqiuiana napa caje pea'ai. Ecuea esohui shajja'ajja canajejo, miqiuianajaya esohui shajja'ajja caje'yo pea'ai, onaaya. ²¹ E'e, e acaje'yo jayojja jama miqiuianaya acaje'yo cuaa enijje jjaapeequianijo. E'e, oya cuaa jamaya acaje'yo, Eyacuiñajji, e huoojea'yojji epo ba jjimajojo. ²² E meshi yasijje, deja mimishi cuana huasijje poe jjima jojjemo, esohui huohui jjima jojjemo pea'ai Eyacuiñajjiya shajjama' cuana quea nee nee po mee'yo ajja acame. Jamatii jjeya eyaya ojjaña huasijje esohui e'e nei huohuinajejo, jama po mee ajja ba'a: “Ecuea mimishi chama”. Ecuea shajja'ajja jjima”. Chojja. Oya cuana quea mimishi tii —Jesosa poanaje—. ²³ Joya e boti'ama ajji poaniya ecue Chii boti'ama pea'ai acani. ²⁴ Eyaya deja mimishi nijje nequiya ma dejjaa ajjima acani a'yonaje. Ma dejjaa ajjima acani ecuea ajjima jojjemo Eyacuiñajjiya oya cuana tecuea jjima acame. E'e, onaaya ba canaje eyaya ma dejjaa ajjima acani aña.

Jamatii eya ecue Chii pea'ai boti'ama nei nei onajaya. ²⁵Yahuajo nei nei Eyacuiñajijia esohui huohuijijia esohui tehue ca poa ejo jama ba'a: "Eya quea pame nee poani. Jamatii dejja mimishi cuanaja eya boti'ama nei nei" —Jesosa poanaje—. Jjeya jamaya dejja mimishi cuana poanaje enijje, esohui huohuijijia etehue'yo jama —Jesosa poanaje.

²⁶⁻²⁷—Miquianaya enijje aninaje ma eya dejja cuana huasijje esohui huohui coonajejo. Jamajjeya miquianaaya esohui e'e jojo nei ejo huohuicue ojjaña cuana huasijje! —Jesosa poanaje—. E poqui'yoajo Edojjoshahua Pame poeje miquiana quea bihui nee po mee'yohua. Jjeya oya ecue Chii nijje yani. Eyaya oya huoojeaje miquiana que miquiana jaahuanaa. Ohuaya Eyacuiñajijia esohui e'e jojo nei ejo miquianaya ba meesahua caje'yo. Jamajjeya miquianaya jjashahuabaquije ejo —Jesosa poanaje.

16

¹—Eyaya miquianaya jamaya huohuiaña jjeya. Jamajjeya ecuea esohuijo quijje miquianaya enijje ejjapee pajeaqui'yojji pojjeama onaa napa cajje. ²Jodio cuana miquiana nijje quea quene poaje. Jamajjeya quijje, Jodioja equi ojee ejjachichaquijji yasijje dobiquiyajo miquianaya huoojeacuaya caje'yo esecue yasijje Jodio cuana. E'e, quijje miquianaya quecuayo majje oya cuana jjashahuaba quehuaquije jama ba'a: "Ecuaya oya cuana quecuayonaje. Jamaya Eyacuiñajijia quea boti" jama posoya acaje cuana.

³—Jamaya acaje cuana Eyacuiñajji ba jjimajojo, eya pea'ai ba jjimajojo. ⁴Jjeya eyaya miquianaya huohuiaña. Jamajjeya quijje onaa napa cajje miquianaya jama poaje ba'a: "Jesosaja esohui yahuajo jayojja jama jjeyahua nei acani cuana. Ecuana napa cani, onaaya" jamaya poaje —Jesosa poanaje—. Yahuajo miquiana nijje mimi coo majje eyaya miquianaya huohui jjima. Miquiana nijje enequiya jjejojo mi huohuinaje —Jesosa poanaje.

Edojjoshahua Pame poeje

⁵—Yahuajo eya eyajo ani ecue Chiia huoojea ca poa jiquiacua. Jjeyahua nei eya o que poquije o'oya. Jamatii eya miquianajaya huohui'ajja jjima jama ba'a: "¿Achacua miya poquije'yo?" ajjima. ⁶Eyaya miquianaya huohuinaje jama ba'a: "Eya poquije'yo". Jamajjeya miquianaya quea yeno nee poani. ⁷Jamatii eyaya miquianaya e'e jojo nei huohuiaña: Poqui'yo majje eyaya miquianaya quea bihui nee po meeje'yo. E'e, ecue Chii que poqui'yo majje eyaya Edojjoshahua Pame huoojeaje miquiana que. E poqui'yo ajja jojjemo ca ca oya poe jjima pome. ⁸Ecuea epeeji pojjeamaja ejjashahuabaquijji quea quehua. Jamajjeya poe majje Edojjoshahua Pameya oya cuana jjabahuejjaqui mee caje. Oya cuana quea mimishi poani, quea mimijjequijjea poani. Edojjoshahua Pameya oya cuana quea ja'a nee ba mee caje'yo pea'ai. Eyacuiñajijia ojjaña joya quea mimishi poani tii quea nee nee po mee caje'yo tii tii pea'ai. Jamaya ojjaña ba mee caje'yo, Edojjoshahua Pameya. ⁹E'e, Edojjoshahua Pameya ojjaña jjabahuejjaqui mee caje jama ba'a: Enijje jjapeequi sa po'yo ajja jojoya aje oe ojjaña quea mimishi poani. ¹⁰Ecue Chiia eya shequi o'oya mee majje o que jjequisohua ca'yajo, Edojjoshahua Pameya ojjaña ba mee caje eya quea pame nee nee. Jamajjeya eyaya ojjaña quea ja'a nee ba'e meeje'yo. Jjeyahua nei ojjaña ecuea epeeji pojjeamaja eba majajji pojjeama tii. ¹¹Dejja mimishi huoojeajjijo, Edosiquianajo Eyacuiñajji miminaje jama ba'a: "Eyaya Edosiquiana nei quea nee nee po meeje'yo tii tii. Jamajjeya ojjaña quea mimishi poani quea nee nee po meeje'yo pea'ai". Jamaya Edojjoshahua Pameya ojjaña jjashahuabaqui mee caje, poe majje —Jesosa poanaje.

¹²—Ecuea pea ejjashahuabaquijji yani quea huiso, miquianaya huohui jjima ecuea. Jamatii jjeya miquianajo quea quehua poaje; jamajjeya jjeyahua eba meejji pojjeama. ¹³Jamajjeya Edojjoshahua Pameya poe majje miquianaya ojjaña esohui e'e nei ba meesahua caje'yo ejo. Ojaya ejjashahuabaquijji pojjeama ohuaya miquianaya ba meesahua caje'yo. Chojja, ecue Chiia esohui ba meesahua caje'yo. Edojjoshahua Pameya miquianaya ba meesahua caje'yo ojjaña ma Eyacuiñajijia quijje acaje. ¹⁴Jamajjeya ecuea esohui ba meesahua cajo, miquianaaya eya bihuiaje'yo jama ba'a: "E'e de, Jesosa quea pame nee nee, quea ca'a nee nee poani" miquianaya poaje. ¹⁵Ecuea ejjashahuabaquijji ecue Chiia ejjashahuabaquijji jayojjaya tii tii poani. Jamajjeya eyaya huohuiaña jama ba'a: Ecuea esohui ba meesahua caje'yo Edojjoshahua Pameya —Jesosa poanaje.

Jesosa mano'yo majje shequi'e o'oya

¹⁶—E'e, jjeya nei eya miquianajaya ba jjima poaje. Majoya quijje pishana baje o'oya. Majoya ecue Chiia eya jjequisohua caje'yo o que —Jesosa poanaje.

¹⁷Jamajjeya ecuaana, Jesosa shajja'ajjaji cuana ojee mimimiminaje jama ba'a: —¿Yajajje shai Jesosa jama poani ba'a: "Jjeya nei miquianajaya eya ba jjima poaje. Majoya quijje pishana baje o'oya. Majoya ecue Chiia eya jjequisohua caje'yo o que" poani? —poanaje

ecwana. ¹⁸ Ojee mimi majamajanaje jama ba'a: —¿Ajeo oya mimiani jama ba'a: “Jjeya nei?” Ecuanaja quea quehua ojaya esohui —poanaje ecwana.

¹⁹ Ecuanaja ejjashahuabaquiji Jesosaja eba poanaje. Jamajjeya ohuaya ecwana huohui'ajja canaje: —Eya jama poanaje ba'a: “Jjeya nei miquianajaya eya ba jjima poaje. Majoya quijje pishana baje o'oya” poanaje. Jamajjeya: “¿Ajeo shai oya Jesosa mimiani so'o?” miquianaaya huohui'ajjaña. ¿A'a e'e? ²⁰ E'e jojo nei jjeya nei miquianaya quea yeno nee nee poaje. Ecuea epeeji pojjeama ca ca quea bihui nee nee poaje. E'e, miquianaya pa neineije. Jamatii quijje pishana quea bihui nee nee poaje o'oya, miquianaya. ²¹ E'e, epona bacua nee majje quea yeno poani, quea bacua nee nee jjejojo. Jamatii bacua cuaya majje quea bihui nee poani. Ebacua ba majje enaese jjashahuabaquiji maja ajja ebacua neejo. ²² Jiquio ecua bacua nee majje epona quea yeno nee poani jayojja jama miya jjeya quea yeno nee nee poaje'yo. Jamatii eya ba o'oya majje quea bihui nee nee poaje'yo. Quea bihui nee nee epo pajea mee'yojji pojjeama cuanaja mi —Jesosa poanaje.

²³ —Jamajjeya eya ecue Chii que poqui'yajo, miquianajaya e huohui'ajja majajji pojjeama; enijje mimi ajja aquiana sa poanijo pea'ai. E'e jojo nei, ecue Chii nijje mimianijo, jaquiana sa poanijo oya huohucue! Ohuaya miya shajja'ajja caje. Miquianaya enijje jjapeequianijo quia caje joya miquiaa saña —Jesosa poanaje.

²⁴ —Yahuajo miquianajaya jamaya ajjima. Ma miquiaa saña ecue Chii huohui'ajja enijje jjapeequianijo. Jamajjeya ¡Eyacuiñajji nijje mimicue! Joya ecua miquianaaya oya huohuiaña jamaya ohuaya acaje, ecuea epeeji poanijo. Ohuaya joya miquiaa huohui'ajja jeya quia caje. Jamajjeya miquianaya quea bihui nee po titiije'yo, e'e jojo nei —Jesosa poanaje.

²⁵ —Jjeya eyaya miquianaya ecuea ejjashahuabaquijjijo sohuihuojuanaje, esohui ebamee sahuajjijo ca ca oe huohuinaje. Quijje ca ca eyaya miquianaya ecue Chiijo huohui neineije esohui quea ja'a neejo, esohui eba meesahuajjijo pojjeama —Jesosa poanaje—. ²⁶ E'e, quijje pishana eya ecue Chii que poqui o'oyajo, miquianaya ecue Chii nijje mimije, enijje pojjeama. ¡Aquiana sa poanijo ca oe oya huohucue! Ecuea epeeji poanijajo ohuaya miquianaya shajja'ajja caje —Jesosa poanaje—. ²⁷ E'e, miquianaya ecue Chiija quea jea nee nee, eya miquianaja quea jea nee poanijajo, miquiana ejo quea ja'a jjashahuabaquianijo pea'ai. E'e, miquianajaya ejjashahuabaquijji ejo jama ba'a: “Eyacuiñajjija Jesosa huoojea canaje e'e jojo nei”. ²⁸ E'e jojo nei eya eyajo ani ecue Chiiya huoojea canaje meshi yasijje. Jjeyahua nei eya meshijo nequi jjima poaje. O que poquije o'oya —Jesosa poanaje.

²⁹ Jamajjeya ecwana jama poanaje ba'a: —E'e Jesosa, jjeya miyaya quea ja'a nee huohuiaña, esohui eba meesahuajjijo pojjeama. Maya ecuanaja quea quehua poanaje. ³⁰ Ecuanaja eba miyaya ojjaña baña e'e jojo nei. Minijje mimi jjimahuajo, ecuanaja ejjashahuabaquiyojji miquea eba. Jamajjeya jjeya ecwana jama poani ba'a: E'e jojo nei oya Jesosa Eyacuiñajjija huoojea'yo —poanaje ecwana.

³¹ Majoya Jesosaa ecwana jama acanaje ba'a: —E'e, Eyacuiñajjija, ecue Chiiya eya huoojea canaje. ¿A'a jjeya jamaya miquianajaya eba e'e jojo nei? —Jesosa poanaje—. ³² ¡Bacue! Jjeya nei miquianaaya eya quea mete po majje jeananaje'yo. Poquicuajije miquianajaya equi yasijje. Jamatii eya ee nei enequijji pojjeama. Chojo, ecue Chii enijje enequi tii —Jesosa poanaje—. ³³ Eyaya jamaya huohuiaña. Jamajjeya miquianaya ecuea epeeji nei poanijo quea bei poaje'yo, mete'ama. Jiquiacua ba'yanijo, onaa napa cajje quea nee poaje. ¡Jamatii yeno'ama pocue! E'e, Edosisquiana nei, ojjaña joya ecuea epeeji pojjeama pea'ai eyaya jeabichajea'yonaje. Oya cuana quea nee nee po meeje'yo tii —Jesosa poanaje.

17

Jesosa miminaje oja Chii nijje ojaya epeeji cuanajo

¹ Majoya ecwana nijje, o shajja'ajjajji nijje mimi majje Jesosa oja Chii nijje miminaje. Eyahuasijje jjabajeasohuaquiji majje jama poanaje ba'a: —Ecue Chii, jjeya nei eya manaje'yo. ¡Miquea ejjashahuabaquiyojji ejo yahuajo, e huoojeanaje jama acue jjeya, miyaya! ¡Ojjaña ba meecue eya miquea Ebacua Eja quea ca'a nee nee! Jamajjeya ba majje ojjaña miya bihuia caje. ² E'e, miyaya eya ojjañaja Emeshi Mese nei po mee'yonaje, ojjaña huoojeajji. Jamajjeya ojjaña joya miya enijje jjapeequi meesahuaña ba'e titii meeje'yo, eyaya. ³ Ecue Chii, miya ca ca oe Eyacuiñajji nei e'e jojo nei. Pea chama'. Eya mique huoojea'yo ojjaña jaahuanajji, Jesosa Quito bajjani. Ojjaña minijje jjapeequianijo, enijje jjapeequianijo pea'ai, ba'e titiije'yo eyajo. ⁴ Eyaya ojjaña cuana ba meenaje miya quea ca'a nee nee poani. E'e ecue Chii, miyaya eya huoojeanaje miquea echacojji. Ojjaña miquea huohui eyaya ajeyojeyo'yonaje. Apoa anaje. ⁵ Ecue Chii, yahuajo nei nei meshi pana jjimahuajo, eya minijje quea ca'a nee neequia poa. Jamajjeya jjeya eya mi que

poquije'yo; ¡quea ca'a nee nee nequi mee'yocue mo, minijje ojjaña huoojeajji! —jamaya Jesosa miminaje oja Chii nijje.

⁶ —Ecue Chii, eya minijje mimiani e shajja'ajjaji cuanajo. Oya cuana yahuajo miquea epeeji pojjeama poa. Miyaya oya cuana enijje japeequi meesahuanaje. Jamajjeya eyaya oya cuana mijo jjabahuejjaqui meenaje. Miquea esohui jayojja jama acanaje. Jjashajja'ajjaquinaje. ⁷ Jamajjeya jjeya ojjaña eba ojjaña joya miya e ameesahuanaje eyaya aña. ⁸ Ecue Chii, miyaya eya huoojeanaje miquea esohui huohuiya esejaya epeeji cuana huasijje. Miquea esohuijo oya cuana jjashahuabaquinaje. Shajja'ajja majje jama acani ba'a: “E'e, Jesosa yahuajo Eyacuiñajji nijje nequi tittia poa. Eyacuiñajjiya oya huoojea canaje” poani —Jesosa poanaje.

⁹ —Ecue Chii, eya minijje mimiani esejaya epeeji jaahuanajji. Ecuea epeeji pojjeama, eshahuaja epeejiyo eya mimi ajja. Miyaya esejaya epeeji cuana enijje japeequi meesahuanaje. Jamajjeya eya minijje mimiani esejaya epeeji cuanajo, ecuea epeeji miquea epeeji pea'ai poani jojoya. ¹⁰ E'e, ojjaña joya enijje japeequiani miquea epeeji poani pea'ai. Ojjaña joya minijje japeequiani ecuea epeeji poani pea'ai. Ojjaña eya bihuia cani jama ba'a: “E'e, Jesosa Eyacuiñajji huoojea'yo”. ¹¹ Ecue Chii, miya quea pame nee nee, quea ca'a nee nee. Jjeya eya mi que poquije'yo, meshijo enequi majajji pojjeama. Eseyaya epeeji cuana ca ca jiquiojo nequije. ¡Oya cuana mimishi'ama po meesahuacue! ¡Miquea esohui jayojja jama atitii meecue! Jamajjeya ojjaña ojee jjashahuabaqui meecue quea ja'a nee! ¡Eya mi jayojjaya jama ojee jjashahuabaquiani! ¡Jamaya oya cuana ojee jjashahuabaqui meecue! ¹² Onijje nequiya eyaya ojjaña joya miya enijje japeequi meesahuanaje jaahuananaje mijo. Jamajjeya Edosiquiana nei oya cuana dasia mee jjima anaje, mi quea ca'a nee nee poanijo. Ojjaña eshahua nijje poquiquehua mee jjima anaje pea'ai. Oe nei enijje japee pajeaqui'yonaje, poquiquehuanaje. E'e, yahuajo nei esohui huohuijjiya ojo tehue ca poa jama ba'a: “Oya epeeji nisho po majje quea nee nee poaje'yo cuaquijo” ojo tehue ca poa yahuajo nei nei —jamaya Jesosa miminaje Jodasajo.

¹³ —Ecue Chii, jjeya eya mi que poquije o'oya. Jiquiojo aniya eyaya ecuea epeeji cuana huohuiaña jama ba'a: “Ecue Chii que eya poquije o'oya”. Ma esohuijo oya cuana quea bihui nee nee poaje. E'e, jeya quea bihui nee nee poani jayojja jama capoahua oya cuana! ¹⁴ Eyaya ecuea epeeji miquea esohui huohuiañajo, onaaya shajja'ajja canaje. Ecuea epeeji pojjeama cuanaja ecuea epeeji cuana boti'ama. Eya oya cuanaja boti'ama pea'ai, o jayojja po ajjajojo. ¹⁵ Ecue Chii, ecuea emimi minijje ecuea epeeji cuanajo jama ba'a: ¡A'a jjeya nei oya cuana dojosohuaquijji mi que! Chojja, oya cuana ca ca jiquiojo ba'yanijo jaahuanacue quea pame nee! ¡A'a Edosiquiana neiya oya cuana dasia meejji! ¹⁶ Eyaya miquea epeeji pojjeama cuanaja ejjashahuabaquijji jayojja jama jjashahuabaqui ajja. Ecuea epeeji cuana e jayojja jama poani, pea cuanaja ejjashahuabaquijji jayojja jama pojjeama pea'ai. ¹⁷ Jamajjeya miquea esohui e'e nei. ¡Esohui jayojja jama poanijo, esejaya epeeji cuana quea ja'a nee nee ba'e meesahuacue, miquea ejjashahuabaquijji jayojjaya! ¹⁸ Ecue Chii, miyaya eya huoojeanaje ojjaña cuana huasijje miquea esohui huohuiya. Jamaya eyaya ecuea epeeji huoojeaña pea'ai esohui e'e nei huohuiya ojjaña huasijje. ¹⁹ Miquea ejjashahuabaquijji ejo jayojja jama aña eyaya, oya cuana ecuea quea jea nee nee poanijo. E'e, jamaya eyaya aña oya cuana miquea ejjashahuabaquijji jayojja jama epo meesahuajji. Jamaya onaaya acaje'yo miquea esohui bajji poaniya jjejojo —Jesosa poanaje.

Jesosa ojjaña joya ojaya epeeji quijje poajejo miminaje oja Chii nijje

²⁰ —Ecue Chii, eya minijje mimiani jiquio epeeji cuanajo —Jesosa poanaje —. Oya cuana miquea esohui huohui caje pea cuana huasijje. Shajja'ajja majje pea cuana esejaya epeeji poaje'yo pea'ai. Ojjañajo eya minijje mimiani, ojjaña jaahuanajji. ²¹ ¡Ojjaña ecuea epeeji cuana jjashahuabaqui meecue miquea ejjashahuabaquijji jayojja, ecuea epeeji pojjeamaja ejjashahuabaquijji jama pojjeama! Ecue Chii, eya mi jayojjaya poani. Miya e jayojjaya poani. ¡Eseyaya epeeji cuana ese jayojjaya amecue pea'ai! Jamajjeya ojjaña ba caje miya e huoojeajji epo. ²² E'e, miyaya eya huoojeanaje miyaya jayojja yajji. Jamaya eyaya oya cuana huoojeaña ese jayojja epojji pea'ai. Jamajjeya oya cuana ese jayojjaya jama ameeaña, ojjaña. ²³ E'e ecue Chii, eya ona nijje japeequiani. Miya enijje japeequiani pea'ai. Jamajjeya oya cuana cajjashahuabaquiahua ese jayojja, ojjaña. Jamajjeya esejaya epeeji pojjeama cajjabahuejjaquiahua esejo jama ba'a: Miyaya eya huoojea'yonaje. Miyaya eya quea jea nee nee aña jayojjaya esejaya epeeji cuana quea jea nee nee aña pea'ai —Jesosa poanaje.

²⁴ —Ecue Chii, yahuajo nei nei, meshi pana jjimahuajo tii, eya miquea quea jea nee nee poa; minijje ojjaña huoojea'yojji poa. Jamajjeya ojjaña ecuea epeeji, ma miyaya enijje

jjapeequi mee'yonaje jeniije ba'e tiitii mee'yocue eyajo! Jomajo oya cuaa ba caje'yo tii tii miyaya eya ojjaña huoojeajji po mee tiitiaña —Jesosa poanaje.

²⁵ —Ecue Chii, miya quea pame nee nee, quea ja'a nee nee nequi. Eseyaya epeeji pojjeama cuanaja aje oe miya ba jjima. Eyaya ca ca miya baña. Eseyaya epeeji cuanaja eba eya mique huoojea'yo. ²⁶ Eyaya oya cuana miya ba meesahua'yonaje. Jamaya po tiitiiije'yo. Jamajjeya miyaya eya quea jea nee nee añ jayojjaja jama pea cuana onaaya quea jea nee nee acaje. Eyaya oya cuana esejaya esohui jayojja jama atiitii meesahuaje'yo pea'ai —Jesosa poanaje oja Chii niije. Mahuiso ojaya emimi oja C hii ni jje.

18

Pea cuaa Jesosa iña ca'yonaje

(Mateo 26.47-56; Macoso 14.43-50; Noca 22.47-53)

¹ Majoya oja Chii niije mimi majje Jesosa ecuana niije poquinaje. Eta'a nama' Senono bajjani ojje miiji yasijje poqui majje onimo acui yiye yasijje poquinaje. ² Yahuajo Jesosa ma acui yiye yasijje poqui majmajanaje ecuana niije. Jamajjeya jiquio acui yiye Jodasaja eba neinei poanaje, ma Jesosa iña meesahuajji epojjija eba neinei poanaje. ³ Jamajjeya mecajje onimo yiye yasijje Jodasa poeyanaje Jesosa que, sohuinano cuana niije. Jodio etii cuaa, Paniseo cuaa pea'ai sohuinano cuana, Eyacuiñajjija equi cuiñajji cuana pea'ai huoojea canaje Jodasa niije, Jesosa iña. Ojjaña poeyanaje baajji, cuaquijijiji pea'ai.

⁴ Jesosaja ojjaña ejjashahuabaquijji cuana ojaya eba poanaje. Jamatii oya cuana que poqui majje huohui'ajja canaje jama ba'a: —¿Ajeo a nequiana ca poeyanaje? ¿Ae sa'ajja'yohua?

⁵ —Jesosa ma Nasanenajo ba'enaje sa'ajjaña ecuaaya —poanaje cuana.

—E'e, eya jiquio Jesosa bajjani —Jesosa poanaje.

Jodasa aje oe sohuinano cuana niije nequinaje, Jesosa iña meeya poe. ⁶ Jesosaja esohui shajja'ajja majje sohuinano cuana, Eyacuiñajjija equi cuiñajji cuana pea'ai edasajje tii jaabichaquinaje, oquequinaje meshi yasijje mete majje. ⁷ Jamajjeya Jesosaa oya cuana huohui'ajja ca o'oyanaje: —¿Ae sa'ajjaña?

—Ecuaaya Jesosa sa'ajjaña, ma Nasanenajo ba'enaje —poanaje.

⁸ —E'e, eya jiquio Jesosa bajjani —Jesosa poanaje—. Miquianaaya eya oe nei sa'ajjañaajo, jecuea epeeji enijje nequi capoquiahua! —Jesosa jamaya poanaje ojaya epeeji cuana nahuejji.

⁹ E'e, yahuajo Jesosa oja Chii niije jama poanaje ba'a: “Ojjaña joya miya enijje jjapeequi meesahuanaje eyaya jaahuanaje” jamaya poanaje Jesosa oja Chii niije yahuajo.

¹⁰ Eyacuiñajji niije emimijji etijja echacojji Manico bajjani sohuinano niije nequinaje. Majoya Simohui Penohua baa iña majje Manico shajja jajasejjajea ca'yonaje; esapa jajapo-jojeajji nisho acanaje. Eshajja ebianeí mijijje jajasejjajea ca'yonaje, Manicoja.

¹¹ —Peno, ¡miquea baa jja oe ejee yasijje nequia'yocue! ¡Ecue Chiiija ejjashahuabaquijji ojo jayojja jama capohua eya, jamatii quea nee nee poaje! —Jesosa poanaje.

Jesosa iña majje dojo canaje Anasi que

(Mateo 26.57-58; Macoso 14.53-54; Noca 22.54)

¹² Majoya esohuinano huoojeajjija ojaya sohuinano cuana nijjeya, Jodio etii cuanaja huoojea'yo sohuinano cuana nijjeya pea'aiya Jesosa iña ca'yonaje. Me jeyo majje dojo canaje. ¹³ Anasija equi yasijje ebionei dojo canaje, ma Caipaja babaja equi yasijje. ¹⁴ Caipa aje oe ma shequiajajo Eyacuiñajji niije emimijji etii poanaje. Ohuaya yahuajo pishana Jodio etii cuana huohui canaje jama ba'a: —¿Oe deija camanoqui'yahua ojjaña cuanajo! Jamaya quea pame nee poaje'yo esejo —poanaje.

Peno siajje poanaje Jesosajo

(Mateo 26.69-70; Macoso 14.66-68; Noca 22.55-57)

¹⁵ Jesosa dojo canaje cuaa, Peno enijje quea huesha pishana ocuenaje achajja Jesosa onaa acaje baa. Eya jiquio esohui tehuejji Huani bajjani. Eya Anasija eba. Jamajjeya eya dobiqui mee canaje ojaya equi yasijje, ma ojjaña Eyacuiñajji niije emimijji cuana ojee mimiani yasijje. ¹⁶ Peno ca ca esecuejo nequinaje, dobiqui mee jjima jjejojo. Jamajjeya eya Anasija eba neineiyo cuayaqui o'oyanaje. Esecue jaahuanajji niije epona niije e mimiajo, ohuaya Peno dobiqui mee canaje. ¹⁷ Ma eponaa esecue jaahuanajjija Peno huohui'ajja canaje: —¿A'a miya pea'ai Jesosa niije poani, o shajja'ajjajji?

—Chojja. Jesosa shajja'ajjajji pojjeama ca ca iña —siajje poanaje Peno quea mete jjejojo.

¹⁸ Quea huoejo echacojji cuana, esohuinano mese cuana pea'ai cuaqui peje nei yasijje poeyanaje. Cuaqui pejejo jjayoqui nequinaje. Jamajjeya Peno jjanequichipiqui majje cuaquijo ejayoquijji nequinaje ona niije.

Anasiya Jesosa huohui'ajja canaje ojaya esohuijo
(Mateo 26.59-66; Macoso 14.55-64; Noca 22.66-71)

¹⁹ Majoya Anasiya Jesosa huohui'ajja canaje ojaya esohuijo, o shajja'ajjajji cuana pea'ajjo.

²⁰ Jesosaa saja'a canaje: —Eyaya esohui huohuinaje ojjaña cuana huasijje. Esohui huohuinaje Eyacuiñajji equijo, equi ojee ejjachichaquijji pea'ai ojjaña Jodio cuanaja eshajja'ajjajji. Quehuajje esohui huohui jjiima. ²¹ Jamajjeya ¿apiojji acuae jja oe miyaya eya huohui'ajjaña ecuea ehuhui cuanajo so'o? Ojjaña eya shajja'ajja canaje. ¡Jamajjeya oya cuana huohui'ajja socue! —Jesosa poanaje.

²² Jesosa shajja'ajja majje sohuinohua oya shemo cuiasejjajja canaje emeya. Huohui canaje: —¡A'a jamaya mimijji Eyacuiñajji nijje emimijji etii nijje! —tecuea canaje.

²³ —¿A'a jjaya eya esohui quea tai aña? ¡Eyaya esohui quea tai añajoya jja ca iña oe huohuicue! Ecuea sijaje ajjima cuana. Jamajjeya ¿apiojji acuae iña emeya cuiaña? —Jesosa poanaje.

²⁴ Majoya Anasiya Jesosa huoojja canaje Caipaja equi yasijje. Eme jeyo tii, pichojea jjima. Ma Caipa ca ca oe Eyacuiñajji nijje emimijji etii ma shequiajajo poa.

Peno sijaje po o'oyanaje

(Mateo 26.71-75; Macoso 14.69-72; Noca 22.58-62)

²⁵ Peno aje oe cuaqui pejejo tii nequinaje ejjajoquijji. Jamajjeya pea cuaa oya huohui canaje: —E'e, miya e'e jojo nei Jesosa shajja'ajjajji poani pea'ai —poanaje.

—Chojja. Eya ojaya epejji pojjeama —Peno sijaje poanaje.

²⁶ Jamajjeya Peno nijje nequinaje Eyacuiñajji nijje emimijji echacojji Manicoja huapa pojjeama, ma Penohua shajja jajasejjajja canajeya huapa pojjeama. Ohuaya Peno jama acanaje ba'a: —Eyaya miya banaje Jesosa nijje Onimo yiyejo, de —poanaje.

²⁷ —Chojja, de, Jesosa ecuea ba jjima —nisho po o'oyanaje quea mete jjejojo. Peno mimianijo tii cachina yahue taaanaje. E'e, ma ecua Jesosaa oya huohui canaje jamaya Penohua acanaje.

Shomano emeshi mese Pinato bajjani yasijje Jesosa dojo canaje cuaa

(Mateo 27.1-2, 11-14; Macoso 15.1-5; Noca 23.1-5)

²⁸ Majoya mecajjeahua nei onayya Caipaja equijo nequi Jesosa huoojja canaje Shomano emeshi mese Pinato bajjani yasijje. Jomajo Pinatohua ojjaña huoojja cani equi yasijje Jesosa dojobiaqui canaje sohuinano cuaa. Pinato ca ca Jodio pojjeama, Shomano dejja. Jamajjeya Jodio etii cuana ojaya equi yasijje dobiqii sa po ajja. E'e, Jodioja etiiquianaja etehue'yo jama poani ba'a: “Jodio pojjeamaja equi yasijje dobiqiajo, esohuidojojjiya Jodioja bacua cuana cuia ajja shejo ojee ijja meeme e ajja pea Jodio cuana nijje Eyacuiñajji bihuiajji”. ²⁹ Jamajjeya Pinato Jesosa ba majje esecue yasijje cuayaquinaje Jodio etii nijje mimiya. Cuayaqui majje huohui'ajja canaje Pinatohua: —¿Ajeo shai miqianaaya jiquio dejja tecueaña so'o? ¿Yajja acuae oya poanaje? ¡Huohuicue mo!

³⁰ —Oya aje oe quea tai pojjeama jojjemo ye jjima pome mi que —Jodio etii cuana Jesosajo sijaje poanaje.

³¹ —¡Miqianaaya jja oe oya dojo'yocue! ¡Miquea etiiquianaja etehue'yo jayojja jama oya acue! —Pinato poanaje.

—Chojja Pinato, Shomano emeshi mese neiya Sesaa ecua de jja mimishi caca mee'yo jjima acani acui ecueata'apeejo. ¡Miquea esohuijo oe mano mee'yocue! —poanaje Jodio etii cuana.

³² E'e, jamaya Jodio etii cuaa acanaje ma ecua Jesosaa huohui canaje jayojjaya yajji. E'e, yahuaajo Jesosa jama poanaje ba'a: “Quijje eya ba'ehuanasohuajja caje'yo cuaa acui ecueata'apeejo” poanaje.

³³ Majoya Pinato equi yasijje dobiqii o'oyanaje Jesosa nijje mimiya. Sohuinano huohui canaje: —¡Jesosa e que jjequicue!

Sohuinano cuaa Jesosa jjequii cajo, Pinatohua huohui'ajja canaje: —Jesosa, ¿a'a miya e'e jojo nei Jodioja Emeshi Mese? ¡Huohuicue mo oe! —poanaje.

³⁴ —Pinato, ¿a'a miya jamatii jjashahuabaquiani eya Emeshi Mese poani? ¿A'a pea cuaa miya ejo jamaya huohui canaje pojja'a? —Jesosa poanaje.

³⁵ —Eya ca ca iña Jodio pojjeama. Jamajjeya miya ecuea eba pojjeama, de. Miya Jodio. Jodio etii cuaa, Jodio Eyacuiñajji nijje emimijji etii cuaya miya iña majje jjequi canaje e que. Jamajjeya ¡huohuicue mo! ¿Ae poanaje miya? ¿Yajjaje acuae minijje quea quene nee nee poani cuana? —Pinatohua huohui'ajja canaje.

³⁶ Jesosaa oya saja'a canaje jama ba'a: —E'e, eya Emeshi Mese. Jamatii pea emeshi mese jama pojjeama eya. Jiquio meshi cuanajo dejja cuana huoojja'yojji pojjeama. Eya jiquiojo

emeshi mese poani jojjemo ecuea echacojjiya Jodio etii nijje jjaquecuacquime, Jodio etii cuaa e iña mee cajo —Jesosa poanaje.

³⁷ —Jamajjeya miya emeshi mese poani, Jesosa. ¿A'a e'e? —Pinato poanaje.

—E'e, eya Emeshi Mese poani, miyaya eya e'e jojo nei aña —Jesosa poanaje—. Eya eyajo ani meshi yasijje poeyanaje. Cuayanaje ojjaña cuana Eyacuiñajjiya esohui e'e nei ba meeya. Ojjaña joya esohui e'e nei jayojja jama a sa poaniya ecuea esohui shajja'ajja cani —Jesosa poanaje.

³⁸ —¡Dee! Esohui e'e nei chama' pojja'a —Pinato poanaje. Majoya oya esecue yasijje cuayaqui o'oyanaje Jodio etii cuana nijje mimi o'oyaa. Jama poanaje ba'a: —Eyaya Jesosaja esohui shajja'ajjanaje. Oya ca ca quea tai pojjeama, mimishi'ama, de —Pinato poanaje—. ³⁹ Jamajjeya jjeja miqúanaya ojee ijjia'ijjiaje esohuidojojjiya yahuajo nei etiquianaja ebacua cuana cuia'yo jjima aca'ya poa shejo. Ojjaña shequiaja jiquio shejo eyaya oe Jodio deja ejeanobijaa huoojeacuayajea'yaña miqúanaya quea bihui nee epojji. Jamajjeya ¿e'e pojja'a eyaya Jodio cuanaja Emeshi Mese Jesosa bajjani pichojea'yajo, Jodio cuana quea bihui nee nee poaje? —Pinato poanaje.

⁴⁰ Jodio etii cuaa Pinato saja'a canaje quea tecueya: —¡Chojja! ¡A'a jja oe Jesosa pichojea'yojji! ¡Mashama' jja oe pichojea'ycue! —janobajjima nei taaanaje Jodio etii cuana. Mashama' aje oe siipojji quea mas e poan aje.

19

Jesosa mano'yo sa poanaje acui ecueata'apeejo

(Mateo 27.15-31; Macoso 15.6-20; Noca 23.13-25)

¹ Jamajoya Pinatohua sohuinano cuana huoojea canaje Jesosa cuiasejjajeeaa, jjonohua. ² Majoya Jesosa cuiasejjajee majje sohuinano cuaa sapahuahuo nisho acuiha sipi majje oja sapajo iñape'ejea canaje. E'e, Jesosa emeshi mese nisho poso acanijo ojo soa neineinaje. Oja daqui huijiajea mee majje daqui huo'o quea ao, emeshi meseja daqui jayojja huosho mee canaje. ³ Majoya aje oe oya bihuia nisho canaje: —Miya Jodio cuanaja emeshi mese quea pame nee —nisho amajje oya shemo cuiasejjajee canaje emeya. Jamaya ahuiha'a huicha'a canaje sohuinano cuaa.

⁴ Majoya Pinatohua Jesosa pichojea sa acanaje; esecue yasijje cuayaqui o'oyanaje Jodio etii cuana nijje mimiya. Jama poanaje ba'a: —¡Bacue! Jesosa nijje mimi majje eyaya baña oya mimishi'ama nei nei. Eyaya oya ejeanobia meejji pojjeama. Jamajjeya jjeja eyaya miqúanaya ba meeaña oya Jesosa mimishi'ama nei nei —Pinato poanaje.

Jamajjeya Jesosa esecue yasijje cuayanaje. ⁵ Ojjaña oya ba canaje sapahuahuo nisho acuiha e'iñape'ejea, daqui huo'o quea ao ehusho ba'e pea'ai.

—¡Iquio aje ca Jesosa ba'a. ¿Apiojji onijje quea quene nee nee poani? —Pinato poanaje.

⁶ Jamatii Jesosa ba majje Jodio sohuinano cuana, joya Eyacuiñajji nijje mimiani cuana pea'ai taaanaje jama ba'a: —¡Oya acui ecueata'apeejo ba'ehuanasohuajecue! E'e, ¡acui ecueata'apeejo ba'ehuanasohuajecue ca coma! —ojjaña janobajjima nei taaanaje.

—¡Miquiaaya jja oe oya dojo'yo majje acui ecueata'apeejo ba'ehuanasohuajecue! Eyaya ca ca oya baña mimishi'ama nei nei —Pinato poanaje.

⁷ Jodio etii cuaa Pinato saja'a canaje jama ba'a: —Jesosa jama poanaje ba'a: “Eya Eyacuiñajjiya Bacua Ejja”. ¡Jamajjeya oya cacuiajea'yahua! Jamaya ecuanaja etiquianaja etehue'yo poani —jamaya poanaje jiquio Jodio etii cuaa; Jesosa Eyacuiñajjiya Bacua Ejja pojjeama poso acanaje.

⁸ Jamajjeya “Jesosa Eyacuiñajjiya Bacua Ejja” Jodio etii cuaa acajo, shajja'ajja majje Pinato quea mete nee nee poanaje. ⁹ Equi yasijje dobiqúi o'oya majje Jesosa huohui'ajja ca o'oyanaje Pinatohua jama ba'a: —Jesosa, ¿achejo ani acuae miya poeyanaje so'o? —poanaje.

Jamatii oya Jesusaa saja'a jjima acanaje. Mimi jjima. ¹⁰ Jesusaja oya saja'a jjimajojo Shomano emeshi mese Pinatohua oya huohui canaje: —¡Dee! Miya enijje mimi ajja. ¡Bacue! Ecuea esohuijo pea cuaa miya pichojea caje pojja'a; ecuea esohuijo pea cuaa miya acui ecueata'apeejo me cacajea caje pojja'a. ¿A'a miquea ba jjima eya Jodio huoojea'yojji poani jiquiojo? —Pinato poanaje.

¹¹ Majoya Jesosa onijje miminaje jama ba'a: —Eyacuiñajjiya miya ejo huohui mee cani. Miyaya miyaye nei jamatii ejo huohui mee ajja. Jamajjeya joya e iña meejji epo cuana quea mimishi nee nee poani. Miya o jayojja quea mimishi nee nee pojjeama —Jesosa poanaje.

¹² Jamajjeya Pinatohua Jesosa pichojea sa neinei acanaje. Jamatii jiquio Jodio etii cuana taaa majamajanaje. Janobajjima nei poanaje: —¡A'a oya pichojea'yojji! Oya miya pichojea'yojo aje oe miya Shomano huoojea'yojji nei Sesa bajjanija epeeji pojjeama poaje, de. Ojjaña joya emeshi mese nei po sa poani ca ca Sesa jeacuayajejji epo, de —poanaje.

¹³ Majoya Jodio cuanaja esohui shajja'ajja majje Jesosa Pinatohua dojo capoquinaje ma ohua ona huoojea cani yasijje. Jomajo anioquenaje yohua bajjanijo ba'a: Mei E'iya nequijo, Jodioja esohuijo ca ca Jabata bajjanijo. ¹⁴ Jomajo ojjaña Jodio cuana cojja nei anioque majje Jodio etii cuaa huohui canaje: —¡Bacue oe Jesosa, miqúanajaya Emeshi Mese! —Pinato poanaje.

Ojjaña jiquio Jodio etii cuana taa neineinaje. ¹⁵ Jama poanaje ba'a: —Chojja, de. ¡Oya quecua'yocue! ¡Acui ecueata'apeejo ba'ehuanasohuajecue!

—¿A'a eya miqúanajaya Emeshi Mese nei me caca meeaña acui ecueata'apeejo emano'yoyji? —Pinatohua acanaje.

—Ecuánaja emeshi mese yani, oya Shomano emeshi mese Sesa bajjani. Pea chama' —taame acanaje Eyacuiñajji nijje emimijji etii cuaa.

¹⁶ Jamajjeya aje oe Jodio cuaa a sa acani jayojja jama Pinatohua amee canaje. Jesosa dojo mee canaje me caca meeya acui ecueata'apeejo eba'ehuanasohuajejji. Jamaya poanaje epojja ejomishocajjijo eshequi biacojjajja nequijo, Jodio cuaa bobi chicha cani pojajjo, yahuajo nei esohuidojojjiya Jodio etiiquianaja bacua cuana cuia'yo jjima aca poa shejo. E'e, Jodio cuaa Jesosa manocuaij mee'yo sa acanaje emojea'yoyji ojje ijji'a'ijji jjimahuaajo.

Jesosa acui ecueata'apeejo ba'ehuanasohuajea canaje cuaa

(Mateo 27.32-44; Macoso 15.21-32; Noca 23.26-43)

¹⁷ Jamajjeya Pinatohua Jesosa Jodio etii cuana huasijje quia ca'yonaje. Sohuinanohua Jesosa iña majje acui ecueata'apee quea biquie nee bao mee majje dojo mee canaje. Dojo mee canaje eyiyo sisi yasijje, Sapa Jjii anijji bajjani meshi yasijje, Jodioja esohuijo ca ca Jonijota eyiyo huasijje. ¹⁸ Sapa Jjii bajjani eyiyo huasijje jaasohuaquij majje majo tii acui ecueata'apeejo Jesosa me cacajea canaje sohuianano cuaa. Me caca majje ba'ehuanasohuajea canaje. Beca dejja mimishi pea acui ecueata'apee cuanajo me jeyo canaje pea'ai. Ba'ehuanasohuajea canaje Jesosa pejejo, oe shanijje, pea ebianeijje. Jesosa ca ca eyiesamaneijje ba'ehuanasohuajea canaje.

¹⁹ Pinatohua acuijo esohui tehue mee canaje Jesosajo. Etehue'yo acui ecueata'apeejo Jesosa ba'e sapa biacua caca mee canaje. Etehue'yo jama ba'a: OYA JESOSA NASANENAJO BA'E JODIOJA EMESHI MESE NEI

²⁰ Jonijota ma Sapa Jjii eyiyo bajjani Jenosanena pejejo nequi. Huesha'ama. Jamajjeya Jodio cuaa quea huiohuhua Pinatoja etehue'yo ba canaje. Ma etehue'yo Jodioja esohuijo tehue mee canaje, Shomano dejjaja esohuijo pea'ai, Jienoja esohuijo pea'ai tehue mee canaje, Pinatohua. ²¹ Jamajjeya Jodioja Eyacuiñajji nijje emimijji etii cuana Pinatoja etehue'yo Jesosajo ba majje Pinato que poqui o'oyanaje. Huohui cañaquinaje jama ba'a: —¿Apiojji acuae miyaya tehue meenaje Jesosajo maya? Chojja, a'a jama tehuejji ba'a: “Jesosa Jodio cuanaja Emeshi Mese nei”. Jama tehueme acue ba'a: “Oya aje ca jja oe jama pojea'ajja nequinaje ba'a: —Eya Jodio cuanaja Emeshi Mese —poso poanaje”. Oya Jesosa ecuanaja Emeshi Mese nei pojjeama, de —Jodio etii cuana poanaje.

²² —Chojja. Jamatii. Apoa ecuea etehue mee'yo —Pinatohua oya cuana acanaje.

²³ Majoya Jesosa ba'ehuanasohuajeyo'yo majje ebeca pee pea'ai sohuinano cuaa oja daqui cuana chicha ca'yonaje. Iyachicha'yo majje peaa jjeshe'yo, peaa jjeshe'yo acanaje cuaa. ²⁴ Majoya oja daqui nei esipi bame iña canaje. Esipi ajojo, esoco pojjeamajo jama poanaje ba'a: —¡A'a isajejji! —poanaje.

Jamajjeya sohuinano cuaa quebanei po majje daqui nei majjo ca'yonaje ojaya pojji epo'yoyji. E'e, joya ecua Eyacuiñajjiya esohui huohuijjiya yahuajo nei nei tehue ca poa jayojja jama acanaje sohuinano cuaa. Ma etehue'yo jama poa ba'a:

“Ecuea daqui iña caje. Ojjaña jjeshe caje pea jayojjaa. Ecuea daqui ao iña majje, quebanei po majje daqui majjo caje'yo ojaya epo'yoyji”.

Yahuajo nei nei tehue ca poa. Jamaya Jesosaja daqui acanaje, sohuinano cuaa.

²⁵ Jesosa acui ecueata'apeejo ba'e pejejo nequinaje ojaya enaese Mania oja shehue nijje, Queopaja ehuanase Mania bajjani nijje, pea Mania Madanena cuiñajjiyo ba'e nijje pea'ai.

²⁶ Jamajjeya Jesosaa enaese ba canaje enijje nequi. Eya aje oe Huani bajjani, Jesosaja quea jea nee nee. Jamajjeya Jesosa ojaya enaese nijje jama poanaje ba'a: —Ecue nae, Huani miquea ebacua ejja jayojja poaje'yo, mi jaahuanajji.

²⁷ Majoya eya acanaje: —Huani, ecue nae miquea enaese poaje. ¡Oya jaahuanacue! —Jesosaa acanaje.

Jamajjeya eyaya Jesosaja enaese Mania ecuea equi yasijje dojo'yonaje enijje eba'e'yoyji.

Jesosa mano'yonaje

(Mateo 27.45-56; Macoso 15.33-42; Noca 23.44-49)

²⁸ Jesosaja eba poanaje ojaya ojjaña oja Chiija esohui jayojja ajeyo canaje. Apoa poanaje. Jamajjeya Eyacuiñajijia esohui yahuajo nei nei jayojja jama poanijo Jesosa taaanaje jama ba'a: —Eya quea naba taja nee nee.

²⁹ Jomajo oe meshimisijo nequinaje acuijjajja na sese. Jamajjeya shajashaja iyanobia canaje ena ejejquei yasijje. Majoya bequiobo sajo quecuahuosho majje Jesosaja enaba huasijje huo canaje ojaya e'ishijji. ³⁰ Jjequibibi majje ishi canaje, Jesosaa. Ishi majje jama poanaje ba'a: —Apoa. Ojjaña Eyacuiñajijia ehuohui'yo jayojja jama eyaya ajeyo'yonaje — poanaje. Jama mimime po majje Jesosa mano'yonaje, poquijeyo'yonaje.

Jesosa mape quecua canaje sohuinano cuaa

³¹ Majoya Jodio etii cuana Pinato que poqui o'oyanaje. Ba majje jama poanaje ba'a: —Emeshi mese Pinato, ¡dejjja cuana eba'ehuanasohua ba'eja equise sa' cuiasajajea meecue! Jamajjeya mano cuajije. Mano'yajo ¡jjequioquea meecue meshi yasijje emojeajji! —Jodio etii cuana poanaje.

Jamaya jashahuabaquime poanaje ba'a: —Mecahuaje epojja ejomishocajji, ojee e'ijjia'ijjiajji quea bihui nee pea'ai. Jamajjeya jaya cuana jjeya nei camano mee cahua, ¡a'a mecahuaje ba'e meejji acui ecueata'apeejo! —jjashahuabaquinaje Jodio etii cuana.

³² Jamajjeya Pinatohua sohuinano cuana huoojea canaje. Poe majje sohuinano cuaa dejja mimishi cuana quise sa' cuiasajajea canaje, ma Jesosa pejeje acui ecueata'apee cuanao ba'e. ³³ Majoya Jesosa ba canaje emano'yo. Jamajjeya oya quise sa' cuiasajajea jjima acanaje. ³⁴ Jamatii oe sohuinanohua Jesosa emapejje quecua canaje emeje aohua. Quecua cajje ena huo'o, ena oshe tejee pea'ai cuayaquinaje. ³⁵ Eyaya, Huani bajjaniya, banaje ecuea ecojjaa. Jamaya poanaje ba'a: Sohuinano cuaa Jesosa ba'ehuanasohuajea majje oya emano'yo ba'e quecua canaje pea'ai. Oya quise sa' cuiasaja jjima acanaje. Jjeya eyaya jamaya tehueña. Jamajjeya ojjaña cuana ba meje ecuea ehuohui Jesosajo e'e jojo nei. Eya sijjepojji pojjeama. ³⁶ E'e, Eyacuiñajijia esohui etehue'yo yahuajo nei Jesosajo jama poanaje ba'a: “Ojaya esa' cuana pea cuanaja ecuiasaja'yojji pojjeama”. Ma ecua Eyacuiñajijia esohui tehue mee ca'ya poa jamaya Jesosa acanaje cuaa.

³⁷ Pea Jodio etiiquanaja etehue'yo yahuajo nei jama poa ba'a: “Oya quecua cajo, ojjaña cuaa oya ba caje'yo ecojjaa”. Jamaya tehue ca'ya poa yahuajo nei nei Jesosajo.

Jesosa mei jjani ai yasijje huananobia canaje

(Mateo 27.57-61; Macoso 15.42-47; Noca 23.50-56)

³⁸ Majoya Jesosa mano'yo majje ojaya epeejji Jose bajjani poeyanaje, pea Jose, Amatea meshijo ba'e. Oya Jodio cuanajo quea meteje quehuaje jjapeejji'yonaje Jesosa nijje yahuajo. Poe majje Jose Pinato huasijje poquinaje. Pinato ba majje huohui'ajja canaje Joseya: —Emeshi mese Pinato, Jesosa mano'yonaje. ¡Eyaya oya jjani yasijje cadojo'yahua ehuananobia'yojji! —poanaje.

—E'e, ¡dojocue! Eyaya sohuinano cuana jamaya huohuime aje —huoojea canaje Pinato-hua.

Jamajjeya Jesosaja epeejji cuaa oya emano'yo acui ecueata'apeejo ba'e jjequioquea'yo majje dojo canaje jjani yasijje huananobia. ³⁹ Nicodemo, ma yahuajo Jesosa nijje miminaje mecajje, Jose nijje poquinaje Jesosa dojhua. Nicodemohua shiyeshiye pohuipohui, acui shiye sajjja pohui quea shiye quea nahue pea'ai dojo canaje Jesosa shicuijji. Quea huiso nee nee dojo canaje 50 quinome. ⁴⁰ Jamajjeya Jesosa dojo majje shiyeshiye pohuipohuiya shicui canaje. Majoya daqui oshe eyacua neijo bebo canaje. E'e, jamaya Jodio cuaa acani emano'yo cuana ehuananobiajji mei jjani yasijje. ⁴¹ Jamajjeya Jesosa eyiyo Sapa Jjii bajjanijo acui ecueata'apeejo eba'ehuanasohua ba'e jjequioquea'yo majje shiyeshiyea shicui canaje. Shicui majje dojo canaje que quea chipi nee yasijje, mei jjani jjeya nei teo huasijje. ⁴² Ma mei jjani quea chipi nee poanijo, ojaya epeejji cuaa Jesosa jomajo huananobia ca'yonaje sinecua nei. Jodio cuanaja epojja ejomishocajji poanijo Jesosa huananobia cuaji canaje. Mei copo quea quemohua esecue jjani jaja ca'ajean'a'yo majje p'oqui'yonaje.

20

Jesosa shequi o'oyanaje

(Mateo 28.1-10; Macoso 16.1-8; Noca 24.1-12)

¹ Majoya mecajjeahua nei nei jjaja'a'ajjaqui jjimahuajo ebionei jjapojjaquajajo, nomico pojajajo Mania, pea Mania Madanenajo ba'e poquinaje mei jjani yasijje. Ba cañaquinaje mei copo quea quemo jjani capajji'ya ejeacajjajajea. ² Ba majje Mania cuajicujajpoquinaje Simohui Peno huohuiya, e huohuiya pea'ai. E'e, eya Jesosaja epeejji, ojaya quea jea nee nee. Jamajjeya poe majje Maniaa huohui cañaquinaje jama ba'a: —Jesosa dojo canaje cuaa.

Jesosa aje oe mei jjanijo chama' nei nei. ¿Achacua shai dojo canaje cuaa? Ecuea ba jjima —poanaje Mania, jashahuabaqui jjima.

³ Jamajjeya Peno enijje poquicuajinaje mei jjeni yasijje. ⁴ Ecuana ojee cuajicuajinaje. Eyaya cuajicuaji neinei majje ebionei mei jjeni bañaquinaje. Peno ca ca quijje pishana poeyanaje. ⁵ Poe majje, eya jjacueanohuequi majje ye'e'ajjanaje. Daqui oshe banaje e'iyacoca'yo ani. ⁶ Majoya Simohui Peno e quiquishijji poeyanaje. Oya mei jjeni ai yasijje dobiquinaje. Daqui oshe ba canaje meijo e'iyacoca'yo ani. ⁷ Pea daqui oshe Jesosa sapa bebojiji'ya o sapa jaanajejo tii e'iyacoca'yo ani ba canaje pea'ai. ⁸ E'e, eya ebionei mei jjeni yasijje poeyanaje. Jamatii Peno dobiquiyajo, eya dobiquinaje pea'ai. Banaje e'e jojo nei Jesosa chama'. Daqui e'iyacoca'yo ani ba majje eya jshahuabaquinaje jama ba'a: —¡E'e de! E'e jojo nei Jesosa emano'yo tii jaa shequi'yonaaje. Ma ecua yahuajo ohuaya huohui canaje jamaya oya po'yonaaje.

⁹ Eyacuiñajijja esohui etehue'yo Jesosajo jama poa ba'a: “Quito mano'yo majje shequije'yo”. Jamatii yahuajo ma etehue'yo ecuanaja quea quehua poanaje.

¹⁰ Majoya jjeni aijo Jesosa chama' ba majje eya Peno nijje equi yasijje poqui o'oyanaje.

Mania Madanena Jesosa ba ca o'oyanaje

(Mateo 28.9-10; Macoso 16.9-11)

¹¹ E'e, eya, Huani, Peno nijje equi yasijje poqui o'oyanaje. Jamatii Mania equi yasijje poqui'yo jjima. Mei jjeni pejejo pa aninaje. Oya pea'ai jjacueanohuequinaje eye'e'ajjaji.

¹² Ba canaje beca esohuidojojji. Ojaya daqui quea oshe nee nee, bo oshe nee nee jayojja poanaje. Shequi o'oya jjimahuajo Jesosa mei jjeni dojjojo jaanaje pea mei biajje. Jjeya ca ca beca esohuidojojji cuana anioquenaje Jesosa jaanaje mei biajje. Jesosa sapa jaanajejo oe esohuidojojji aninaje. O jiojji jaanajejo pea aninaje. ¹³ Eshuidojojji cuaa Mania jama acanaje ba'a: —Epona, ¿yajijje acuae mi pani so'o?

—Ecuea Emeshi Mese Jesosa dojocuaquai canaje cuaa. ¿Achacua shai dojo canaje? Ecuea ba jjima —Mania poanaje.

¹⁴ Jamaya mimi majje Maniaa Jesosa baja canaje. Jamatii oya Jesosa equi mese pose acanaje, Jesosa pojjeama pose acanaje.

¹⁵ Jamajjeya Jesosaa oya jama acanaje ba'a: —Epona, ¿apiojji acuae mi pani? ¿A'ya cuae miyaya sa'ajjaña so'o? —Jesosa poanaje.

—¿A'a miya equi mese? ¿A'a miyaya oya dojonaje pojja'a? ¿Che mo oe huohuicue achacua oya dojonaje! Eyaya oya dojjoje'yo shiyeshiye shicuiya —Mania poanaje.

¹⁶ —¡Mania! —Jesosa poanaje.

Jesosa mimije shajja'ajja majje Maniaa oya ba canaje Jesosa. Jamajjeya Maniaa oya jama acanaje ba'a: —¡Ecuea esohui huohuijji miya! —poanaje Mania, Jodioja esohuijo—. ¡Raboni! —poanaje.

¹⁷ —Mania, ¡a'a eya iña neineiiji! ¡Eya capoquiahua ecue Chii ani yasijje! ¡Jjeya poquicue; ecuea epeeji cuana huohuicue miyaya! Jama oe acue ba'a: “Jesosa jama poanaje ba'a: —Jjeya eya poquije'yo ecue Chii eyajo ani yasijje, mique Chii eyajo ani yasijje pea'ai. E'e, eya poquije'yo Eyacuiñajji ani yasijje. Oya Eyacuiñajji miquianajaya Chii pea'ai” jamaya aquicue ecuea epeeji cuana —Jesosa poanaje.

¹⁸ Majoya Mania Madanena poquinaje Jesosaja epeeji cuana ani yasijje. Ecuana nijje jama poanaje ba'a: —¡Shajja'ajjacue oe! Eyaya Jesosa ba'yonaaje; e'e jojo nei eshe ca coma.

Jamaya huohui majje Mania Madanena ma Jesosaa huohui canaje ecua huohui canaje.

Jesosa ojaya epeeji cuana huasijje poe'yonaaje

(Mateo 28.16-20; Macoso 16.14-18; Noca 24.36-49)

¹⁹ Quijje nomico pojjajo sinecuajo ecua Jesosaja epeeji ojee aninaje equijo. Jodio yajjajo esecue eca'a nequinaje. Jamatii Jesosa equijo ecua nijje jaja'aqui'yonaaje. Ecuana nijje miminaje jama ba'a: —¡Quea bei nee pocue miquianaya! —poanaje.

²⁰ Majoya Jesosaa ecua ba mee canaje onaja quecuahuejjajea oja eme jjoto, ojaya emape onaja quecua pea'ai ba mee canaje. Jesosa ba majje ecua quea bihui nee nee poanaje. ²¹ Jesosaa ecua huohui ca o'oyanaje jama ba'a: —¡Quea bei nee pocue! Yahuajo ecue Chiiya eya huoojea canaje ojaya echacojji. Jamaya jjeya eyaya miquianaya huoojeaña ecuea esohui huohuiya —Jesosa poanaje.

²² Majoya Jesosaa ecua huasijje sipojea majje huohui canaje jama ba'a: —¡Edojjoshahua Pame miquiana huasijje cadobiquiahua! ²³ E'e, ¡miquianaya ecuea esohui huohuijji pocue! Jamajjeya ojjaña joya oja mimishi pajea sa poani miquianaaya huohuicue ejo jama ba'a: “E'e, Eyacuiñajjiya miquea mimishi cuijea ca'yonaaje”. Mimishi pajea sa po ajjajo ca ca huohuicue jama ba'a: “Eyacuiñajjiya miquea mimishi ecuijea'yojji pojjeama” —Jesosa poanaje.

Jesosa Tomasi nijje miminaje

²⁴ Jesosa ecuana nijje, o shajja'ajjajji cuana nijje jjaja'aqui'yonajejo, Tomasi, Beca Jaa bajjani chama' poanaje. ²⁵ Jamajjeya ecuaaya Tomasi huohui majamajanaje jama ba'a: —E'e jojo nei ecuaaya Jesosa ba'yonaje. ¡Eshe ca coma! —ecuaana anaje.

Jamatii Tomasiya saja'a canaje jama ba'a: —E'e pojja'a. Chojja, de. Equecuahuejja ojaya eme jjoto huejja cuana ba majje, napa'ajja majje, ojaya emapejje esi' napa'ajja majje pea'ai ecuea eba poaje Jesosa e'e jojo nei eshe —poanaje Tomasi; Jesosa shequi'yo ajja poso acanaje.

²⁶ Quijje me oejje pea beca cahuime, 7 po majje ecuana ma equijo ojee ani o'oyanaje Tomasi nijje pea'ai. Esecue eca'a nequinaje pea'ai. Jamatii Jesosa ecuana nijje jjaja'aqui o'oyanaje. Ecuana nijje mimi o'oyanaje jama ba'a: —¡Quea bei nee nee pocue! —poanaje.

²⁷ Majoya ohuaya Tomasi huohui canaje: —Tomasi, ¡ecuea eme bacue! ¡Eme jjoto equecuahuejja napa'ajjacue eme sisiya! ¡Emapejje esi' pea'ai napa'ajjacue! ¡Bacue eya eshequi'yo e'e jojo nei! ¡A'a eya edojjoshahua poso ajji! —Jesosa poanaje.

²⁸ —Jesosa, miya ecuea Emeshi Mese nei, Eyacuiñajji —Tomasiya oya bihuia canaje.

²⁹ —Tomasi, miya e ba majje jjabahuejjaquinaje eya e'e jojo nei eshequi'yo. Pea cuanaja ba jjima ecuea eme jjoto huejja, emape si' pea'ai. Jamatii oya cuana jjabahuejjaquije ejo, eya eshequi'yo. Jamajjeya joya cuana e'e jojo nei quea bihui nee capohua! —Jesosa poanaje.

¡Huanija etehue'yojo jjabahuejjaquicue!

³⁰ Jesosaa quea huiso pea ma dejjaa ajjima acani acanaje. Maya ecuaana, o shajja'ajjajji cuaa banaje. Jamatii eyaya, Huani bajjaniya maya tehue jjima ¡iquio etehue'yojo. ³¹ ¡iquio ecuea etehue'yo eyaya tehuena miqiana jjabahuejjaquiji. Jamajjeya ¡iquio etehue'yo ba majje miqianaya jjabahuejjaquije Jesosa e'e jojo nei Eyacuiñajjija huoojea'yo ojjaña jaahuanajji. Oya Eyacuiñajjija Bacua Ejja nei. E'e, miqianaya majoya e'e jojo nei jjabahuejjaquiao, Jesosaa miqianaya ba'e tiiti mee caje'yo onijj e eyajo.

21*Jesosa ba ca o'oyanaje ojaya epeeji cuaa me oejje beca huisomeya*

¹ Quijje ecuana Janinea bae yasijje poqui o'oyanaje. Jomajo Jesosa ecuana nijje, ojaya epeeji cuana nijje jjaja'aqui o'oyanaje. Jama poanaje ba'a: ² Simohui Peno, Tomasi Beca Jaa bajjani nijje, Natanaeni ma Canajo, Janinea meshijo ba'e nijje, ecuanaya Semeneoja bacua ejja eya, ecue o'i Jacobo nijje, pea beca dejja nijje pea'ai bae sahuajo aninaje. Mahuisoya ecuana ojee aninaje. ³ Peno ecuana nijje jama poanaje ba'a: —Eya ca iña poquije'yo nahuoo cuiashajaa.

—E'e, ecuana minijje poquije'yo —saja'ame anaje ecuaa.

Jamajjeya ecuana poqui'yonaje bae sahuajje. Bishe ai yasijje aninaje. Mecajje ecuaana nahuoo cuiashaja'ajja nequinaje tii tii. Jamatii mecajjeahua jjaja'aqui jjimahuaajo nahuoo cuiashaja jjima; chama' poanaje. ⁴ Mecajjeahua nei Jesosa bae sahuajo nequinaje. Jamatii ecuanaja bishejo nequija oya ba jjima poanaje Jesosa. ⁵ Jesosa ecuana huasijje taaanaje jama ba'a: —Epeeji cuana, ¿a'a nahuoo cuiashajanaje miqianaaya? —huohui'ajja acanaje.

—¡Chojja, chama! —saja'ame ecuaa anaje.

⁶ —¡Eshajajji jeacue ena huasijje pea mijjje, bishe ebianeij mijjje! Jomajo ani nahuoo cuana —Jesosa poanaje.

Jamajjeya ecuaaya eshajajji ebianeij mijjje jea majje quea huiso nahuoo cuiashajanaje. Quea biquie nee neejo nahuoo cuana jjequisohua jjima anaje bishe yasijje. ⁷ Jamajjeya eya Peno nijje jama poanaje ba'a: —Peno, maya Jesosa nequi, e'e nei —eya poanaje.

E shajja'ajja majje Simohui Penohua oja daqui huosho ca'yonaje. (E'e, chachacoanijo oja daqui ao huijjaajea canaje.) Daqui ao huosho'yo majje tohuanaanaje ena huasijje Jesosa que besapoquiya. ⁸ Eyaya ca ca pea cuana nijje bishe yonaje meshijaji sahua huasijje. Nahuoo dojobesanaaje eshajajjijo, enajo ba'e. Meshijaji huesha'ama, iye huesha nei, beshahua nei quea huesha 100 metros huesha nei. ⁹ Ba'eñajji majje ecuaana banache Jesosaja nahuoo jiñajji cuajjijo. Pahui yani equemijji pea'ai. ¹⁰ Majoya Jesosa ecuana nijje jama poanaje ba'a: —¡Nahuoo cuana miqianaja cuiashaja'yo jja oe jjequicue edahuajji!

¹¹ Jamajjeya Simohui Peno bishe yasijje ani o'oya majje nahuoo cuiashajajji meshijaji yasijje jjequisohua sahua canaje. Majoya pejo majje nahuoo banaje quea huiso nee nee, 153 huisome. Ojjaña quea quemo nee, de. Quea biquie nee. Jamatii eshajajji quecuasejjajjae jjima poanaje.

¹² Majoya Jesosaa ecuana jama acanaje ba'a: —E'e, ¡pocue! ¡Nahuoo ijjiahuacue! —poanaje.

—¡Ocuae! ¡Ca'ijjiahua! —ecuanaja poanaje. Ecuanaja eba oya Jesosa. Jamajjeya oya huohui'ajja jjima jama ba'a: —¿Ae bajjani acuae mi so'o? —ajjima ecuanajaya.

¹³ Majoya Jesosaa pahui cuaqui pejejeo ani jjeshe majje ecuanaja quia ca'yona je e'ijjiajji, nahuoo pea'ai.

¹⁴ E'e, Jesosa mano'yo majje shequi o'oyanaje. Oya ecuanaja huasijje poe'yona je. Jjeya pea beca peejjima jjaja'aqui'yome po'yona je.

Jesosa miminaje Peno nijje

¹⁵ Majoya ecuanaja ijia'ijjia majje Jesosa miminaje Peno nijje. Jama poanaje ba'a: —Peno, Huanija bacua ejja, ¿a'a miyaya eya quea jea nee nee añá? ¿A'a jiquio pea cuanaja eya quea jea pishana, miquea eya quea jea nee nee? —Jesosaa oya huohui'ajja canaje.

—E'e Emeshi Mese, eyaya miya quea jea nee nee añá. Jamaya miquea eba —Peno poanaje.

—Jamajjeya ¡ecuea epeeji enijje jjeya nei jjapeequiani huasijje ecuea esohui huohuicue! Oya cuana ñajajjaja ebacua cuana jayojja jama; jamatii ani poquiquehua chana'.

¹⁶ Majoya Jesosaa oya huohui'ajja ca o'oyanaje jama ba'a: —Simohui, Huanija bacua ejja, ¿a'a miyaya eya quea jea nee nee añá? —poanaje.

—E'e, Emeshi Mese, eyaya miya quea jea nee nee añá. Jamaya miquea eba —Peno po o'oyanaje.

—Jamajjeya ¡ecuea epeeji enijje jjeya nei jjapeequiani jaahuanacue! Oya cuana ñajajjaja ebacua jayojja jama; ca'a'ama —Jesosa poanaje.

¹⁷ Jesosaa pea beca peejjima huohui'ajjame acanaje Peno jama ba'a: —Simohui, Huanija bacua ejja, ¿a'a miyaya eya quea jea nee nee añá? —po majamajanaje.

Peno quea yeno poanaje Jesosaja pea beca peejjima huohui'ajjame acanje. Jamajjeya Penohua Jesosa saja'a canaje jama ba'a: —Emeshi Mese, miquea eba ojjaña. Jamajjeya miquea eba eyaya miya quea jea nee nee añá —Peno poanaje.

—¡Ecuea epeeji jjeya nei enijje jjapeequiani jaahuanacue! —Jesosaa oya aca o'oyanaje —. ¹⁸ Penó, e'e jojo nei eyaya miya huohuiaña jama poaje ba'a: Miya esho'yahuajo miquea daqui huosho majje cua mi poqui sa poani yasijje miya poquinaje. Quijje ca ca miya tii'yajo, me jeyo majje dojo caje cuaa. Ojaya ejjashahuabaqui'yojji jayojja jama miya acaje'yo cuaa —jamaya Jesosa poanaje.

¹⁹ Ojaya ehuhuijo Peno ba mee canaje quijje nei oya manoje'yo eme jeyo. Cuanaya quijje nei Peno mano'yajo, ojjaña ba mee caje'yo Eyacuiñajji quea pame nee nee quea ca'a nee nee poani tii tii. Majoya Jesosaa Peno huohui canaje jama ba'a: —Peno, ¡enijje jjapee neineiquicue! —Jesosa poanaje.

²⁰ Majoya Penohua bajea canaje. Eya, Huani ba canaje o quiquishi poeyani. Yahuaajo eya Jesosa pejejeo ijia'ijjianaje, eya ojaya quea jea nee nee. Ijia'ijjianajo eyaya Jesosa huohui'ajjanaje jama ba'a: “Jesosa, ¿a'ya cuae mi iña meesahuajji epojji?” eyaya anaje. ²¹ Penohua e ba majje Jesosa huohui'ajja canaje: —¿Jesosa, yajja acuae Huani acaje cuaa so'o? —poanaje Penó.

²² Jesosaa Penó saja'a canaje jama ba'a: —Peno, ¿apiojji shai miyaya Huanijo huohui'ajjaña so'o? E'e pojja'a eyaya Huani ecuea epoe o'oyajjijo ba'e mee sa añá. Jamatii. ¡Miya jja oe enijje jjapee neineiquicue! —Jesosa poanaje.

²³ Jesosaja esohui shajja'ajja majje ojjaña Jesosaja epeeji cuana huasijje huohuicui canaje cuaa jama ba'a: —Huani ca pa jjaja ca oe mano'yo ajja poaje, de —poso acanaje cuaa.

Jamatii Jesosaja huohui jjima jama ba'a: “Huani emano'yojji pojjeama”. Chojja. Ohuaya jama huohui canaje ejo ba'a: “Peno, ¿apiojji acuae miyaya Huanijo huohui'ajjaña so'o? E'e pojja'a eyaya Huani ba'e mee sa añá ecuea epoe o'oyajjijo, jamatii. ¡A'a peajo jashahuaba majaquijji! ¡Enijje oe jjapee neineiquicue, miya!” poanaje Jesosa Penó nijje.

²⁴ Eya aje oe Huani bajjani Jesosa shajja'ajjaji poani. Ojjaña ecuea etehue'yo Jesosajo e'e jojo nei. Eyaya aje jja oe banaje ojjaña Jesosaa acaninaje cuana. Jamajjeya miquianajaya eba ecuea esohui Jesosajo e'e jojo nei. ²⁵ Jesosaa pea ma dejjaa ajjima acani quea huiso nee nee acaninaje cuana. Ojjaña ohuaya acaninaje cuana etehue poquia jojjemo quea huiso nee nee pome. Chama' pome papeni etehue'yo huanajji ojjaña meshijo, ca ojjaña Jesosaja esohui etehue poquia jojjemo.

Mahuiso ecuea esohui etehue'yo. Eyaya Huani bajjanija esohui tehuejeyonaje. Apoa.

EDOJJOSHAHUA PAMEYA JESOSAJA EPEEJJI PEA JJASHAHUABAQUIME PO MEE CANI LOS HECHOS

¡Ishoacue Edojjoshahua Pameja epoejji! —Jesosa poanaje

¹ Ecuea epeejji Teopino, eyaya, Noca bajjaniya jiquio esohui tehueaña miquea ebajji. Yahuaajo eyaya miya huohuinaje Jesosajo ma ohua acanaje oja Chiija jjequisohua'yo jjimahuaa. Ojaya ehuhui cuanajo pea'ai eyaya tehuenaje. Maya eyaya mi que tehuenaje ecuea ebionei esohui etehue'yojo. ² E'e, eyahuasijje sohuaqui'yo jjimahuaa Jesosaa Edojjoshahua Pame nijjeja o shajja'ajjajji cuana sohuihuohui canaje. Ma dejja cuana oja babaca'yo, oja huoojea'yo cuana ojaya esohui huohuijji epojji. ³ E'e, Jesosa yahuajo quea nee nee poanaje. Mano'yonaje. Mano'yo majje shequi o'oyanaje. Shequi o'oya majje oya poe o'oyanaje o shajja'ajjajji cuana huasijje. Quea huiso ma dejja ajjima acani acanaje Jesosaa quea ja'a nee nee, ojjaña e bajji oya e'e jojo nei eshe o'oya. Jesosaa oya cuana ba mee canaje Eyacuiñajji eyajo ojjaña huoojeajji poani. Shequi o'oya majje Jesosa oya cuana nijje nequi o'oyanaje quea huiso cahuime, 40 cahuime. ⁴ Ijja'ijjia aniya ohuaya oya cuana huohui canaje jama ba'a: —¡Jenosanena cuiñajji esecue yasijje a'a cuayaquijji! Eyacuiñajjiya ojaya esohui jayojja jama acaje'yo; ojaya Edojjoshahua Pame huoojea caje miqiuana que dobiqiuia. ¡Ishoacue Edojjoshahua Pame! Yahuaajo eyaya miqiuanaaya jamaya huohuinaje —Jesosa poanaje—. ⁵ E'e, Huaniya yahuajo pishana quea huiso cuana enajo besa mee canaje Eyacuiñajji. Quijje pishana ca ca Edojjoshahua Pame miqiuana que dobiqije'yo —Jesosa poanaje.

Jesosa Eyacuiñajjiya eyahuasijje jjequisohua ca'yonaje

⁶ E'e, o shajja'ajjajji cuana onijje nequi o'oya majje Jesosa huohui'ajja canaje jama ba'a: —Emeshi Mese Jesosa, ¿a'a jjeyahua nei miya Isaeni cuanaja Emeshi Mese poaje'yo jiquio meshijo? —acanaje cuaa.

⁷ Jesosaa oya cuana saja'a canaje: —Cua'a, Eyacuiñajjiya eba ojaye nei, esejaya Chii eyajo anija ojaya eba. Ache shono, ache ba'ijo shai miqiuanaaya ba jjima. ⁸ Jamatii, Edojjoshahua Pame miqiuana que dobiqiu majje ohuaya miqiuanaaya sohuihuohui meesahua caje quea ja'a nee. Miqiuanaaya ecuea esohui huohuijji poaje'yo. ¡Jenosanena, Jodio meshijo, Samania meshijo, ojjaña meshi quea huesha nee yasijje pea'ai ecuea esohui huohuiquicue! —Jesosa poanaje.

⁹ Jamaya huohui canijo tii, onaaya ba neinei caqui tii, Eyacuiñajjiya Jesosa jjequisohua ca'yonaje eyahuasijje. Bo dojjo huasijje dobiqiu'yajo, oja epeejji cuaa oya ba pajea ca'yonaje. ¹⁰ Jesosa ba'esohuaquianajo, ojaya epeejjiya eyahuasijje ba neinei caquijo tii, Eyacuiñajjiya esohuidojojji cuana becanejjijji pea'ai jjanepuipanaquinaje ona nijje. Ojaya daqui quea oshe nee nee poanaje. ¹¹ Oya jama poanaje ba'a: —Miquianaaya, Janinea meshijo ba'e cuaa, ¡shajja'ajjacue mo! Miqiuanaaya Jesosa banaje ba'esohuaquije'yo eyahuasijje. Qui'ajjaya oya poeje o'oya quijje, e'e jojo nei —esohuidojojji poanaje.

Matia babaca canaje cuaa Jesosaja huoojea'yo esohui huohuijji epojji Jodasa jjoco cuiña'yojji epojji

¹² Jjeyahua nei Jesosaja epeejji cuana acuijjajja yiyejo, Onimo jjaaja yiyejo nequi Jenosanena huasijje poqui o'oyanaje; huesha'ama poanaje, beshahua nei beca mil metros. ¹³ Oya cuanaja ojaya equi yahuajo aninaje yasijje dobiqiu o'oyanaje. Ejamacoo equecuayijji ai yasijje dobiqiu o'oyanaje mahuiso ba'a: Peno, Jacobo, Huani, Anesi, Penipe, Tomasi, Batanomee, Mateo, Simoni Senote, Apeoja bacua eja Satiaco, oja chahua Jode bajjani pea'ai; mahuisoya. ¹⁴ Oya cuana epona cuana nijje, Jesosaja enaese Mania pea'ai, Jesosaja echahua mese cuana pea'ai Eyacuiñajji nijje mimi majamajanaje, ojjaña.

¹⁵ Quijje pishana ojjaña jjachichaquinaje quea huiso nee; beshahua nei 120 huisome yaninaje. Majoya Peno nequisohuanaje emimijji. ¹⁶ Jama poanaje ba'a: —Ecuea epeejji cuana, Eyacuiñajjiya esohui yahuajo nei etehue'yo jayojja jama jjeyahua nei apoa poanaje. Edojjoshahua Pameya yahuajo Dabi huohui meesahua canaje Jodasajo, ma Jesosa iñameejji poanaje onajaya equecuayojji. ¹⁷ Yahuaajo Jodasa ecuana nijje nequinaje. Jesosaa oya babaca canaje. Jamatii oya esohui huohuijji nisho poanaje. ¹⁸ Jodio etii cuaa aje oe Jodasa ejjeshejji quia canaje Jesosa iña meesahua sosejje. Ma Jesosa sosejje quia bejjo meshi jjeshejji acanaje cuaa. Quijje Jodasa acui aajo jjaanaanequiaqui majje tohuaanaje mishi yasijje; oquequinaje janobajjima nei. Jjajjono sejaqui majje jjasapa cuiapojjeaquiaquinaje. Jjamajji cuiapojjeaquiaquinaje. See ai cuayaquinananaje

pea'ai. ¹⁹ Ojjaña Jenosanenajo ba'eya Jodasa eba poanaje jomajo mano'yonaje. Jamajjeya oya cuaa ma meshi bajjani canaje Asedama meshi ojaya esohuijo. Ese Ejja esohuijo Ena' Cuayaquinaje Meshi bajjani acanaje cuaa. ²⁰ E'e, yahuajo nei Dabiya esohuicuaayajjijo Salmojo jama tehueme aca poa ba'a: "Ojaya equi cajiña ca'yahua tii. ¡A'a equi cuiña mee'yojji!" Jama yahuajo nei tehue ca poa ojo pea'ai ba'a: "Eyaya oya cajaa anaje. Jamajjeya peaa ecuea esohui cahuohui cahua" jamaya yahuajo nei tehue ca poa Jodasa.

²¹ —Jamajjeya Jodasa chamajo pea dejja ejjababacaqui ecuaana nijje esohui huohuijji. Ejjababacaqui joya Jesosaja esohui shajja'ajjajji epo nei, ma Jesosaa dejjaa ajjima acani ba epo nei, joya ese nijje Jesosaja epeeji poanaje. ²² E'e, joya yahuajo Jesosa Huaniya enajo besa mee caqui ba epo ejjababacaqui; joya Jesosa nijje tii jjaeequinequinaje, eyahuasijje sohuaquije'yo ba epo. Jamajjeya ma dejjaa ecuaana nijjeya Jesosa shequi'yonaje cahuohui cahua —Peno poanaje.

²³ Jamajjeya ojjaña cuaa becanejjijji pea'ai dejja babaca ca'yonaje. Matia, pea Jose Basaba, ojaya pea bajjani Josoto. ²⁴⁻²⁵ Babaca majje oya cuana Emeshi Mese nei nijje eyajo ani nijje miminaje jama ba'a: —Emeshi Mese nei, miquea eba ojjañaja ejjashahuabaquijji cuana. ¡Cuana ba meesahuacue ache edejja miquea ehabaca miquea ehoojea'yo epojji! E'e, Jodasa miquea esohui pajea'yo majje mano'yonaje; cuaqui yasijje poqui'yonaje. Jamajjeya Jodasa chamajo peaa miquea esohui cahuohui cahua —jamaya Eyacuiñajji nijje miminaje cuana.

²⁶ Majoya oya cuana quebanei jayojja poanaje ache dejja esohui huohuijji nequije ebajji. Babaca canaje Matia esohui huohuijji poaje. Jamajjeya Matia pea 11 huisome nijje nequi'yonaje Jesosaja huoojea'yo esohui huohuijji epojji.

2

Edojjoshahua Pame Jesosaja epeeji cuana huasijje poeyanaje

¹ Bobi chichajji shejo, Petecote pojajajo bobi chichajeyo majje Jodio cuana quea bihui nee ojee ijia'ijjia aninaje. Ma pojajajo Jesosa shajja'ajjajji cuana, oja huoojea'yo esohui huohuijji cuana pea'ai, pea epeeji cuana nijje ojee jjachichaquinaje oe equijo. ² Jjeyahua nei Edojjoshahua Pame beni quea quemo jjaqueyaquiani jayojja eyajo shajja'ajja canaje ojjaña. Edojjoshahua Pame equi yasijje dobiquinaje. ³ Majoya cuaqui jiji sisi jayojja ojjañaja esapa biajje nequinaje. Oe cuaqui jiji sisi oe epeeji esapa biajje ijinequinaje. Jamaya ojjaña poanaje. ⁴ Edojjoshahua Pame ojjaña cuana huasijje dobiqui'yonaje. Majoya jjeja nei oya cuana pea mimi'yome poanaje. E'e, Edojjoshahua Pameya oya cuana pea mimime po meesahua ca'yonaje.

⁵ Quea huiso Jodio cuaa ojjaña meshijo ba'yani cuaa Jenosanenajo ba'ecaa Eyacuiñajjija esohui yahuajo nei jayojja bihuiameya acani. ⁶ Jamajjeya beni quea quemo eyajo poeyani jayojja shajja'ajja majje ojjaña cuajicuaajjibenaje Jesosaja epeeji cuana huasijje. Jesosaja epeeji cuana pea mimi'yome mimiani shajja'ajja majje Jesosaja epeeji pojjeama quea mete nee jama poanaje ba'a: —¿Yajjajje shai Jesosaja epeeji cuana pea mimi'yome poani so'o, de? ¿Yajjajje shai joya esejaya esohuijo mimiani, de?

⁷ Jamajjeya quea mete poanaje. Huohui'ajja canaje jama ba'a: —E'e, ojjaña jiquio dejja cuana Janinea meshijo ba'e. ⁸ ¿Yajjajjo shai jiquio pea esohuijo mimi cani so'o? ¿Ma ecua eseyaya esho'yahuaa shajja'ajjanaje jayojjaya seya jjeja shajja'ajjaña cuana? ⁹ E'e, jiquiojo yani dejja cuana quea huiso meshijo ba'e: Dejja cuana Patia meshijo ba'e, Madia meshijo ba'e, Enami meshijo ba'e, Mesopotamia meshijo ba'e, Jodea meshijo ba'e, Capanosia meshijo ba'e, Ponito meshijo ba'e, Asia meshijo ba'e pea'ai yani. ¹⁰ Pea cuana Pichia meshijo ba'e, Panipinia meshijo ba'e, Ejito meshijo ba'e, Apica meshijo ba'e, Sinene meshi ojje nijijje ba'e pea'ai yani. E'e, Jodio dejja cuana, Jodioja epeeji cuana Shoma meshijo ba'e cuana yani. Maaya Jodio pojjeama cuaa Jodioja ehohui'yo Eyacuiñajjijo shajja'ajja cani. ¹¹ Beca cuana Queta meshijo ba'e, Anamia meshijo ba'e yani pea'ai. Jamatii ojjaña eseyaya esejaya esohuijo Eyacuiñajjija ma dejjaja ba jjima acanaje cuana quea pame nee shajja'ajjaña, ma Jesosaja epeeji cuaa huohui canijo —poanaje ojjaña.

¹² Jamajjeya quea mete po majje pea cuana nijje mimimiminaje jama ba'a: —¿Yajja shai poani?

¹³ Pea cuana ca ca Jesosaja epeeji cuanajo soa neineinaje. Jama poanaje ba'a: —Chojja, de. Oya cuana jja ca quea huiso ishi'ishinaje. Huooqui —poso acanaje cuaa.

Penohua esohui huohui canaje

¹⁴ Majoya Penohua pea Jesosaja huoojea'yo esohui huohuijji cuana nijje, 11 huisome nijje ojee nequisohua majje janobajjima nei sohuihuohui canaje jama ba'a: —Dejja cuana Jodio meshijo ba'eya, ojjaña Jenosanenajo ba'eya pea'ai, ijeyahua nei mo nequiaa shajja'ajjacue! Eya Jodio pea'ai. Jamajjeya eyaya miya jjabahuejjaqui meeje'yo. ¹⁵ ¿A'aya

ecuaña ehucuo poso añá? Jjeya mecájjeahua nei ishi'ishi ajja cuana. ¹⁶ Chojja. Jamájjeya ¡shajja'ajjacue! Yahuaño nei nei Eyacuíñajjija esohui huohuijji Joeni bajjani jama poa ba'a:

¹⁷ “Eyacuíñajji jama poani ba'a: Quijje jiquio meshi beshahua nei apoa poajo, eyaya Edojjoshahua Pame huoojeaje'yo ojjaña huasijje. Edojjoshahua Pameya esho'i, epona sho'i cuana pea'ai huohui meesahua caje ma eyaya quijje nei aje. Ohuaya dejja etii pishana cuana jjacahuibaqui mee caje. Edejjja tii cuaa चाहिबा majje huohui caje pea'ai. ¹⁸ E'e, eyaya Edojjoshahua Pame huoojeaje'yo ecuea echacojji cuana que, epona, dejja cuana que pea'ai. Edojjoshahua Pameya ecuea esohui huohui meesahua caje pea cuana huasijje. ¹⁹ Quijje eyaya ma dejjaa ajjima acani añá eyajo ba majje dejja cuana quea mete poaje. Jiquio meshijo ma dejjaa ajjima acani eyaya aje pea'ai ojjañaja ebajji eya quea ca'a nee nee. E'e, quea huo'o nee ena' jayojja poaje eyajo, meshijo pea'ai. Cuaqui quea quemoo poaje. Huichacha quea quemoo nee, quea moo nee nee poaje. ²⁰ Eshequi quea apo nee poaje. Ba'i quea huo'o nee ena' jayojja poaje. Majoya Emeshi Mese nei poeje o'oya. Ma pojajjo ojjaña ba caje Emeshi Mese nei quea ca'a nee nee, quea pame nee nee poani.

²¹ Jamájjeya ojjaña Emeshi Mese nei nijje camimiahua jama ba'a: —Emeshi Mese nei, ¡eya jaahuanacue! ¡Ecuea mimishi cuijea'yocue! —jamaya onijje mimi'yajo, ohuaya oya cuana jaahuana caje'yo; ba'e tiitii mee caje'yo eyajo, cuaqui yasijje huoojea'yo jjima acaje pea'ai”.

Jamaya yahuaño nei nei Joeniya tehue ca poa Eyacuíñajjija esohui —Peno poanaje.

²² Majoya Peno jama poanaje ba'a: —Dejja cuana Isaeni meshijo ba'e, ¡shajja'ajja neineicue mo! Jesosa ma Nasanenajjo ba'ya poa miqiana nijje nequinaje. Eyacuíñajjija Jesosaa ma dejjaa ajjima acani ameesahua canaje quea huiso nee nee. Jamaya miqianajaya eba —Penohua acanaje —. ²³ Jamatii Jesosa iña majje miqianaaya oya ona huasijje quianaje. E'e, miqianaaya Jesosa quia'yonaje dejja mase yasijje, acui ecueata'apeejo emano mee'yoyji. Jamatii yahuaño nei jamaya Eyacuíñajjija ejjashahuabaqui'yoyji poa. ²⁴ Jamájjeya Eyacuíñajjija Jesosa shequi mee ca o'yanaje. E'e, Jesosa jjanijo ehuananobia jaa tiitii ajja poa; emano'yo tii po mee'yo jjima acanaje. ²⁵ Yahuaño emeshi mese Dabiya Jesosajo huohui ca poa jama ba'a:

“Ecuea Emeshi Mese nei enijje ani tiitii'ya poa. Ohuaya eya jaahuana tiitii canijo, eya mete'ama poaje'yo. ²⁶ Jamájjeya eyaya quea jaji neeya Eyacuíñajji bihuiaña. Eya jjanijo ehuananobia jaa shequije o'oya, yamiña. Ihui'yo ajja poaje. Jamaya ecuea eba. ²⁷ Miyaya eya jeana'yo ajja pea emano'yo cuana nijje. Jamájjeya eya mete'ama. Eya miquea quea boti nee. Jamájjeya eya meshijo ihui'yo ajja poaje'yo. ²⁸ Miyaya eya ba'e meeje o'oya quea pame nee. Minijje nequi tiitii meeje'yo. Quea bihui nee eya poani”.

Jamaya yahuaño nei Dabiya huohui ca poa Jesosaja esohui —Peno poanaje.

²⁹ Penohua huohui canaje jama pea'ai ba'a: —Epeejji cuana, e'e jojo nei esejaya etiiquiana Dabi yahuaño nei mano'ya poa. Jjeya oya ehuananobia jaa jjanijo. Jamaya esejaya eba. ³⁰ Dabi ca ca Eyacuíñajjija esohui huohuijji poa. Eyacuíñajjija oya huohui ca poa jama ba'a: “E'e jojo nei miquea osecua quijje nei cuayaje eyaya Emeshi Mese nei po meeje'yo”.

³¹ E'e, yahuaño nei Dabiya eba poa quijje nei Jesosa, Eyacuíñajjija huoojea'yo ojjaña jaahuanajji shequije o'oya. Jamájjeya Dabiya huohui ca poa jama ba'a: “Miyaya oya jeana'yo ajja pea emano'yo cuana nijje. Oya meshijo ihui'yo ajja poaje'yo” jamaya Dabi yahuaño nei poa.

³² Penohua ojjaña cuana huohui ca o'yanaje: —E'e jojo nei Eyacuíñajjija Jesosa shequi mee ca'yonaje; ecuañaaya Jesosa ba o'yanaje, eshe, de. ³³ Eyacuíñajjija Jesosa nequi tiitii mee ca'yonaje eyajo onijje, o ebianeí mijijje ojjaña huoojea'yoyji. Eyacuíñajjija esohui yahuaño jayojja jama Edojjoshahua Pame Jesosa que dobiqiyonaje. Jesosaa ma Edojjoshahua Pame jjeyahua nei huoojea canaje ecuaña que dobiqiyaya. Jiquia aje jja oya nequiaa banaje. Ojaya epoe'yo miyaya shajja'ajjanaje pea'ai. ³⁴ ¡Bacue, Dabi ca ca oma sohuaqui jjima eyahuasijje yamiña! Ohuaya huohui ca poa jama ba'a:

“Eyacuíñajjija ecuea Emeshi Mese nei huohui canaje jama ba'a: ¡E pejejo anioquecue, ebianeí mijijje, enijje ojjaña huoojea'yoyji!

³⁵ ¡Jjeyahua nei ojjaña joya minijje jjapeequi ajja eyaya miya huoojea meeje'yo!”

Jamaya Dabiya tehue ca poa Jesosajo yahuaño.

³⁶ Penohua jama acanaje pea'ai ba'a: —Isaeni dejja cuana, ¡shajja'ajja neineicue! Miqianaaya ca ca oe Jesosa acui ecueata'apeejo ba'ehuanasohuajeanaje; mano mee'yonaje. Eyacuíñajjija ca ca Jesosa ojjañaja Emeshi Mese nei po mee ca'yonaje. Ohuaya Jesosa Quito ojjaña jaahuanaa huoojea ca'yonaje pea'ai —acanjje Penohua.

³⁷ Ma shajja'ajja majje ojjaña jomajo nequica quea yeno nee nee poanaje. Jamajjeya Peno nijje, ojjaña Jesosaja huoojea'yo esohui huohuijji cuana nijje jama poanaje ba'a: —Epeeji cuana, ¿yajja acue poaje? Eseja iña mee'yo, eseja quecua mee'yo ca jja ca oe, de.

³⁸ Penohua saja'a canaje jama ba'a: —¡Miquianajaya mimishi cuana pajea'yocue! ¡Jesosa nijje japeequecua! Majoya Eyacuiñajija esohui huohuijjiya miquianaya besa mee caje Jesosa Quitojo. Jamajjeya ojjaña ba caje miquianaya Jesosaja epeeji poani. E'e, Jesosa Quitohua miquianajaya mimishi cuana cuijea caje'yo. Ohuaya miquiana que Edojjoshahua Pame huoojea caje'yo pea'ai. ³⁹ E'e, Eyacuiñajiji Edojjoshahua Pame huoojea sa poani miquiana que, miquea ebacua cuana que pea'ai, ojaya epeeji cuana ojjaña meshijo ba'eca huasijje pea'ai, ojjaña Eyacuiñajija ehabaca huasijje pea'ai —Penohua acanaje.

⁴⁰ Penohua quea huiso pea esohui huohui canaje. Jama acanaje ba'a: —¡Dejja quea mimishi jama a'a poiji! ¡Oya cuana nijje a'a japeequejiji! Eyacuiñajijiya mimishi cuana quea nee nee po mee caje'yo, quea nee tii tii.

⁴¹ Quea huiso cuana Penoja esohui shajja'ajja majje Jesosa nijje japeequinaje. Jamajjeya Penohua oya cuana besa mee canaje Eyacuiñajijjo enajo. E'e, ma pojjajo tii quea huiso nee nee Jesosaja epeeji po'yonaje, 3.000 huisome. ⁴² Jamajjeya oya cuaa Jesosaja huoojea'yo esohui huohuijji cuanaja esohui shajja'ajja canaje; jamaya acanaje pea'ai. Ojee japeequinaje pea'ai. Ojee Jesosaja bobi ijija canaje pea'ai. Eyacuiñajiji nijje mimi majamajanaje, ojjaña.

Jesosaja epeeji cuana jamaya ba'e cooa poa

⁴³ Edojjoshahua Pameya Jesosaja huoojea'yo esohui huohuijji cuana ma dejjaa ajjima acani ameesahua canaje quea huiso. Jamajjeya ojjaña cuana jama poanaje ba'a: —E'e de, ¡iquio esohui huohuijji cuaa ma dejjaa ajjima acani quea huiso nee nee acanaje —poanaje cuana.

⁴⁴ Jesosaja epeeji cuana ca ca huapa pojjeama cuana jayojja jama poanaje. Ojjaña dejja tai'ama, nishelui'ama pea'ai poanaje. ⁴⁵ E'e, ojaya cuanaja aquiana cuana chicha majje quia canaje Jesosaja epeeji jaahuanajji cuana huasijje. Majoya oya cuaa quia canaje ojjaña Jesosaja epeeji cuana huasijje. Joya aema' poani quea huiso quia canaje; joya aquianajji ca ca oe poiji quia canaje. Jamaya ojjaña huasijje quia ca poquinaje. Jamajjeya ojjaña aquiana peaja huisoajjaya poanaje. ⁴⁶ Ojjaña pojjajo ojjaña Jesosaja epeeji cuaa Eyacuiñajija equi epeeyi yasijje jachichaqui majje esohui huohui canaje. Jesosaja bobi ijija canaje peaja equi cuana huasijje. Pea equi cuanajo anica ojee ijija'ijija ca ani ojjaña quea bihui nee nee japeequinaje. ⁴⁷ Ojee Eyacuiñajiji bihuia majamaja canaje ojjaña pojjajo. Pea cuana Jesosaja epeeji cuana nijje quea bei poanaje. Eyacuiñajijiya ojjaña pojjajo pea cuana Jesosa nijje japeequei meesahua ca'yonaje. Jamajjeya Jesosaja epeeji cuana quea huiso nee nee poanaje.

3

Jiojjijajja jajiojji jeapihuiqui'yonaje

¹ Majoya eshequi jajeapaaquiajo Peno, Huani nijje poquinaje Eyacuiñajija equi yasijje Eyacuiñajiji nijje mimiya. Jamaya ojjaña pojjajo Jodio dejja cuana Eyacuiñajiji nijje mimi aninaje eshequi jajeapaaquiajo. ² Oe dejja ejiojji cojjasahuajo aninaje meme aninaje, jiojjijajja. Oya jamatii cuaya jiojjijajja tii. Jamajjeya ojjaña pojjajo pea cuaa oya dojo canaje Eyacuiñajija equi yasijje, Esecue jiani Bame bajjani yasijje. Jomajo ohuaya eme' huo ca aninaje bobijo, ejjeshejijjo pea'ai. Oya jshahuabaquinaje jama ba'a: —E'e pojjaja' dejja cuaa Esecue Bame yasijje poe majje eya aquiana quia caje sosema'.

³ Jamajjeya Peno, Huani nijje Eyacuiñajiji equi yasijje dobiquiajo, jiojjijajjaa o que eme' huo canaje. ⁴ Jamajjeya Penohua Huaniya pea'ai jiojjijajja ba canaje. Jama acanaje ba'a: —¡Ecuana bacue!

⁵ Aquiana sosema' sa poanaje. Jamajjeya Peno bajeasohua canaje, jiojjijajjaa. ⁶ Jamatii Peno jama poa ba'a: —Ecuea epeeji, ecuea aquiana chama'. Ecuea ejjeshejji pea'ai chama'. Eya Jesosaja epeeji; joya ecue ani aje mi quiaje jama ba'a: Jesosa Quitohua ma Nasanenajo ba'ya poaa miya jeo meesahua caje'yo. Jamajjeya ¡nequisohuacue! ¡Jecue oe! —acanaje Penohua.

⁷ Penohua jiojjijajja ebianeí mejje iña majje nequisohua mee canaje. Jjeyahua nei ojaya ejiojji quea pame poanaje, quibojjisha quea pame poanaje pea'ai. ⁸⁻⁹ Jamajjeya oya jjeyahua nei nequisohua majje jeonaje. Peno nijje, Huani nijje pea'ai Eyacuiñajiji equi yasijje dobiquinaje, equacuayijji yasijje ma Sanomoja equi bajjani yasijje. Oya quea jaji nee jeonaje. Tohuaatohuaa poanaje. Eyacuiñajiji bihuia canaje pea'ai. Ojjaña equijo nequiya oya ba canaje tohuaani, Eyacuiñajiji bihuia poequi pea'ai. ¹⁰ Jiojjijajja yahuajo

oljaña eba. Eyacuiñajjija equi pejjejo ani tiitiinaje, Esecue Bamejo. Aquianajo meme ania poa. Oljaña quea bihui poanaje jiojijijajja jeoje'yo ba majje: —E'e de, oya jiojijijajja jeonaje jjeya nei —poanaje.

Penohua esohui huohui canaje Eyacuiñajjija equijo

¹¹ Majoya ma jiojijijajja poanaje Peno nijje, Huani pea'ai nijje po'yonaje, bihuibihua'yo nequinaje. Eyacuiñajjija equijo equecuayijji bajjani Sanomoja equijo quea huiso cuana jjachichaqui canaje o baa. Oljaña quea bihui poanaje Penojo, Huanijo pea'ai. Jama poanaje ba'a: —¡Dee! Penohua, Huaniya pea'ai oya jiojijijajja jeo mee canaje. Quea ca'a nee nee oya, de, Eyacuiñajjija ma dejjaa ajjima acani —poanaje oljaña.

¹² Oljaña jjachichaquije ba majje, oljaña esohui shajja'ajja majje pea'ai Penohua huohui canaje jama ba'a: —Dejja cuana Isaeni meshijo ba'e, ¡shajja'ajjacue mo! ¿Apiojji acuae ecuanaja esohuijo miqianaya quea ajjajja poani so'o? ¿Apiojji acuae ¡jashahuabaquiani jama ba'a: “Peno, Huani pea'ai Eyacuiñajjija epeeji quea ca'a nee nee poani. Jamajjeya jiojijijajja cuaya ohuaya jeo mee canaje” poani nequiana so'o, de? —poanaje Peno —.

¹³ Chojja, ecuaaya pojjeamaa jiojijijajja jeo meenaje. ¡Bacue! Eyacuiñajjija Amajama, Isaaca, Jacobo, eseya pea etiQUIANA cuana pea'ai jaahuana ca poa. Jjeyahua nei ma Eyacuiñajjija ojaya Bacua Ejja Jesosa o pejjejo anioque mee ca'yonaje oljaña huoojea'yojji. Miqianaaya ca mi ca Jesosa quianaje emeshi mese Pinatoja, equecua mee'yojji. Pinatohua Jesosa pichojea sa acajo, miqianaya quea quene taaanaje jama ba'a: “Jesosa me' cacacue! ¡Acui ecueata'apeejo ba'ehuanasohuaeacue!” anaje nequiaa. ¹⁴ Eyacuiñajjija Jesosa quea boti nee nee. E'e, Jesosa quea pame nee nee, mimishi'ama nei. Jamatii miqianaaya oya cajaa anaje jama ba'a: “¡A'A Jesosa pichojeajji!” taaajebenaje quianaaya: “¡Mashama' oe pichojea'yocue!” anaje quianaaya. Mashama' aje oe ona quecua'yojji epo, de. ¹⁵ Miqianaaya ca ca oe Jesosa mano mee'yonaje, ma oljaña ba'e tiitii mee'yojji epo. Eyacuiñajjija ca ca Jesosa shequi mee ca o'oyanaje. Jamaya ecuanajaya eba. E'e, Jesosa shequi o'oyanaje ecuaaya banaje. ¹⁶ E'e, Jesosa quea ca'a nee nee nequi. Ohuaya ca ca oe jiojijijajja jeo mee canaje. Ecuana Jesosaja epeeji. Ojo ¡jashahuabaquiani jama ba'a: “E'e jojo nei Jesosa jiojijijajja jeo mee caje” jamaya Jesosajo e'e jojo nei ¡jashahuabaquianijo, ohuaya quea ja'a nee po mee canaje jiquio dejja. Maya miqianaaya jjeya nei baña —Peno poanaje.

¹⁷ —Epeeji cuana, ecuea eba miqianaaya, Jodio etii cuana nijjeya oya ba jjimajojo Jesosa quianaje onaja equecua'yojji. ¹⁸ Yahuaajo nei nei Eyacuiñajjija ojaya esohui huohuijji cuana tehue mee ca poa Jesosa Quitojo jama ba'a: “Quiije nei ecue huoojea'yo oljaña jaahuanajji quea nee nee po mee caje'yo cuaa”.

Ma etehue'yo yahuaajo nei jayoija jama jjeya miqianaaya anaje —Penohua acanaje —. ¹⁹⁻²⁰ ¡Jamajjeya Eyacuiñajjija esohui jayoija jama acue! ¡miqianajaya mimishi pajea'yocue! ¡Jesosa nijje ¡japeequicue! E'e, Eyacuiñajjija ojaya esohui yahuaajo nei jayoija jama huoojea ca'yonaje oljaña jaahuanajji Jesosa Quito ese jaahuanaa. Jamajjeya ohuaya esejaya mimishi cuana cuijea caje'yo; ese nijje quea bei poaje'yo. ²¹ Jjeya Jesosa eyajo nequi oja Chii nijje. Jomajo oya ani'yo; oljaña Eyacuiñajjija esohui jayoija jama apoa poajo oya Jesosa poeje o'oya. E'e, Eyacuiñajjija yahuaajo nei nei ojaya esohui huohuijji cuana huohui mee ca poa jama ba'a: “Quiije oljaña Eyacuiñajjija esohui ma ohua yahuaajo nei huohui ca poa apoa poajo, Eyacuiñajjija huoojea'yo oljaña jaahuanajji poeje o'oya oljaña aquiana jiquio meshijo eyacua po mee'yohua”.

²² E'e —Penohua acanaje —, Eyacuiñajjija esohui huohuijji Moisesi yahuaajo jama poa ba'a:

“¡Bacue! Eyacuiñajjija eya huoojea canaje ojaya esohui huohuiya. Quiije ohuaya pea esohui huohuijji e jayoija miqiana que huoojea caje, miqiana nijje meshijo ba'e. ¡Oljaña ojaya esohui jayoija jama acue! ²³ Oljaña joya ojaya esohui jayoija jama po ajja aje oe Eyacuiñajjija cajaa acaje'yo; quea nee nee po mee caje'yo”.

Jamaya yahuaajo nei Moisesiya tehue ca poa Eyacuiñajjija esohui —Penohua acanaje.

²⁴ —E'e, yahuaajo nei nei Eyacuiñajjija esohui huohuijjiya Samoeni bajjaniya esohui quea pame nee huohui ca poa Jesosajo, Eyacuiñajjija huoojea'yo oljaña jaahuanajjijo. Majoya oljaña Eyacuiñajjija esohui huohuijji cuana Samoeniya esohui jayoija jama huohui ca poquiapoquia poa quea huiso neeya. ²⁵ Eseyaya Eyacuiñajjija esohui huohuijji yahuaajo nei ba'e cuanaja osecua cuana, etiQUIANAJA osecua cuana poanijojo Eyacuiñajjija esohui yahuaajo esejaya etiQUIANA cuana nijje jayoija jama ohuaya eseya acaje jjeya nei pea'ai. E'e, yahuaajo nei Eyacuiñajjija Amajama huohui ca poa esejaya etiQUIANA jama ba'a: “Quiije nei miquea osecuajo oljaña cuana oljaña meshijo ba'e quea bihui nee nee poaje” ²⁶ Peno poanaje: —E'e Eyacuiñajjija oja Bacua Ejja oe nei Jesosa ese yasijje, Jodio cuana huasijje huoojea canaje ebionei, esejaya mimishi cuana pajea meesahuaa. Jamajjeya eseya quea ja'a nee po mee caje'yo —Penohua acanaje Huani nijjeya.

4

Peno, Huani pea'ai iña canaje Jodio etii cuaa

¹ Majoya Penohua, Huani nijjeya ojjaña cuana huasijje Jesosaja esohui huohui canijo, Eyacuiñajji nijje emimijji cuana, Eyacuiñajjija equi cuiñajji etii pea'ai, Sanoseo cuana nijje poeyanaje. ² Penoja esohui shajja'ajja majje jiquio Jodio etii cuana quea quene nee nee poanaje Penohua Jesosa shequi o'oyanaje huohuime acajje. ³ Jamajjeya Peno, Huani pea'ai iña majje dojo canaje etecueajji. Siniajo mi tecuea canaje. Jeanobiajea canaje mecahuajje emimijji. ⁴ Jamatii quea huiso deaja cuana, ponaña pea'ai Penoja esohui Jesosajo shajja'ajja majje Jesosa nijje jjapeequinaje, me oejje mil huisome, 5.000 huisome.

⁵ Mecajjeahua emeshi mese cuana, Jodio deaja etii cuana Moisesija tehue'yo huohuijji nijje ojee poanaje Jenosanenajo. ⁶ Eyacuiñajji nijje emimijji etii Anasi bajjani, oja huapa pojjeama cuana Caipa, Huani, Anejano pea'ai ojee poanaje. ⁷ Jodio deaja etiiya Peno, Huani, jiojjijajja pea'ai iyaa canaje etecueajji. Poeyajo, Peno tecuea canaje jama ba'a: —¿Anijje acuae nequiaa jiojjijajja jjajiojji jeapiihuiqui meenaje so'o?

⁸ Edojjoshahua Pameya oya huohuisahua canijo, Penohua jama acanaje ba'a: —Emeshi mese cuana, deaja etii cuana pea'ai, e'e ecuaaya jiojjijajja jeo meesahuanaje. ⁹ Jamajjeya miquianaaya ecuaana huohui'ajjaña jama ba'a: “¿Anijje acuae jiojjijajja jeo mee'yonaje?” ¹⁰ Jamajjeya joiñaña deaja cuana Isaeni meshijo ba'eya, ishajja'ajjacue mo! Miquiaaya ca ca oe Jesosa Quito, ma Nasanenajo ba'ya poa acui ecueata'apeejo ba'ehuanasohuajeanaje; mano mee'yonaje. Jamatii Eyacuiñajjija Jesosa Quito shequi mee ca o'oyanaje. Ohuaya, Jesosa Quitohua jiojjijajja jeo mee canaje. ¡Bacue quea pame nee oya nequi! —Penohua acanaje—. ¹¹ E'e, yahuaajo nei Eyacuiñajjija esohui huohuijji cuaa Jesosajo tehue ca poa jama ba'a:

“Oe equi yamajjana equi iyajji cajaa aca poa cuaa. Jamatii Eyacuiñajjija ma eyamajjana equi yamajjana quea ca'a nee aca poa. Jamajoya ojjaña ojaya epeejji cuaa Eyacuiñajji bihuia cani”.

Jesosa Quito ma eyamajjana equi iyajji jayojja. Miquianaya Jesosa sa po'yo ajja poanaje. Jamatii jjeyahua nei oya Jesosa quea pame nee nee, quea ca'a nee nee nequi. ¹² Jesosa Quitohua ohuaye nei mimishi cuana cuijea'yo majje ba'e tiitii mee caje'yo se. E'e, Eyacuiñajjija oya huoojea ca'yonaje ese nahuejji, ese cuaqui yasijje epoqui'yo poaje jjejojo. Pea chama' ese jaahuanajji —acanaje Penohua.

¹³ Ma Jodio etii cuaa Penoja esohui, Huanija esohui pea'ai shajja'ajja majje jama acanaje ba'a: —¡De! Oya cuana bicho'ama mimiani ecuaana nijje. ¿Yajjaje shai? Yahuaajo ebiojo ba'eya poa oya cuana. Esohui etehue'yo quea huiso ojaya ba jjima yahuaajo poa. Jamatii quea ja'a nee esohui huohui cani. E'e de, Jesosa nijje nequi tiitinaje. Ohuaya pojja'a quea huiso ba mee canaje —acanaje etii cuaa Penoja, Huanijo pea'ai.

¹⁴ Jamajjeya Jodio etii cuaa Peno Jesosajo mimipajja mee'yo sa acani. Jamatii joya jiojjijajja Peno nijje, Huani pea'ai nijje nequi quea pame nee. Jamajjoya mi tecuea canaje. ¹⁵ Jamajjeya Peno, Huani, jiojjijajja pea'ai esecue yasijje, equi quibo huasijje huoojeacuayajja canaje. O huoojeacuayajja majje mimimiminaje. ¹⁶ Jama poanaje ba'a: —¿Ae acuae acajji so'o? Jesosaja esohui pajea'yo ajja. Ojjaña Jenosanenajo ba'eya ba canaje Penohua ma dejjaa ajjima acani acanaje; jiojjijajja jeo mee canaje. Jamajjeya ecuaaya yajja siajje ame yajji Peno jama ba'a: “Chojja Penoja, Huanija pea'ai jiojjijajja jeo mee'yo jjima” jama siajje pomeya jjapo meequi ajja, de. ¹⁷ Jamajjeya Peno, Huani pea'ai ejatecuae equi jama ba'a: “¡A'a huohui'yojji Jesosajo!” jamaya ejahuohuiqui: “¡A'a ojjaña cuana Jesosa shequi'yonaje mimime pojji! ¡A'a Jesosaa jiojjijajja jeo mee canaje mimime pojji pea'ai!” —poanaje Jodio etii cuana.

¹⁸ Majoya oya cuaa Peno, Huani iyaa ca o'oyanaje. Poe majje huohui canaje jama ba'a: —¡Bacue! ¡A'a jja oe Jesosajo mimi o'oyajji! Chojja. ¡A'a Jesosaa eshe o'oyaa jiojjijajja jeo mee canaje a'a huohui majajji! —huohuime acanaje Jodio etii cuaa.

¹⁹ Jamatii Penohua, Huanija pea'ai mete'ama saja'a canaje jama ba'a: —¡jjashahuabaquicue so'o! ¿A'a ecuaaya miquianajaya esohui jayojja jama aje? Cho. Eyacuiñajjija esohui jayojja jama pojjeama. Miquianaaya ecuaana Jesosaja esohui huohui mee jjima aña. Eyacuiñajjija ca ca ecuaana huoojea canaje Jesosajo huohuiya. ²⁰ ¡Bacue! Ecuaaya Jesosa banaje eshe o'oya. Eyacuiñajjija esohui ecuaaya shajja'ajjanaje onijje. ¡Maya ecuaaya cahuohuahua!

²¹ Jamatii Jodio etii cuaa Peno, Huani pea'ai cuia sa acanaje. Jamatii cuia jjima poanaje quea meteya jjejojo. Ojjaña cuaa Eyacuiñajji bihuia canaje jiojjijajja jeo mee canajejo; Peno, Huani pea'ai ojjaña quea nahue ecuaa mee'yojji poanaje. Jamajjeya mi cuia canaje. Tecuea canaje ca ca oe; majoya tecuea majje huoojea canaje Huani, Peno pea'ai.

²² E'e, Jiojjijajja jeonaje etii nei, peaja ojiojji miji pea'ai huiso shequiajame, 40 shequiajame poanaje. Eyacuiñajjiya Peno, Huani pea'ai oya jeo meesahua ca'yonaje.

Ojjaña Eyacuiñajji nijje miminaje esohui mete'ama ehuhui meesahuajji

²³ Jamajjeya Jodio dejja etiiya oya huoojea cajje Peno, Huani nijje poqui'yonaje ojaya epeeji cuana que. Ma Jodio etii cuaa tecuea canaje, Eyacuiñajji nijje emimijji mese cuanao pea'ai huohui cañaquinaje. ²⁴ Ma shajja'ajja majje ojjaña cuaa ojee Eyacuiñajji bihucia canaje. Onijje miminaje jama ba'a: —Eyacuiñajji, ecuanaa Chii ai, miya quea pame nee nee. Miyaya ojjaña eyajo pana'ya poa, meshi cuana pana'ya poa, bae cuana pana'ya poa pea'ai. Ojjaña aquiana cuana eyajo, meshijo, enajo pea'ai ojjaña miquea pana'yo. ²⁵ Yahuajo nei nei miyaya ecuanaa etiiquiana que, miquea epeeji emeshi mese Dabi que huoojea'ya poa Edojjoshahua Pame. Edojjoshahua Pameya Dabi huohui meesahua ca poa jama ba'a:

“Joya, ojjaña cuana quea shajjaquijjo, Eyacuiñajji nijje mimipanajajiani. Oya cuana quea tai jashahuabaquiani Eyacuiñajji jeabichajeajji nisho. ²⁶ Emeshi mese cuana dejja huoojeajji poani nijje jjachichaquiani; ojee nequianiya Eyacuiñajji huoojea'yo ojjaña jaahuanajji jeabichajea'yojji nisho”.

²⁷ —E'e Eyacuiñajji, miyaya miquea Ebacua Ejja quea pame nee Jesosa huoojeanaje ojjaña jaahuanajji epojji. Jiquio cuiñajji ba'eca cuana quea huiso quea mase Jesosa quecua sa poanaje. Jodioja emeshi mese quea mase Enode, Shomano emeshi mese Ponosio Pinato nijje jjachichaquinaje Jodio pojjeama cuana nijje, Isaeni dejja cuana nijje pea'ai. Ojee jashahuabaquinaje Jesosa quecua'yojji. ²⁸ E'e Eyacuiñajji, miya yahuajo nei nei Jesosajo jashahuabaquia poa jama ba'a: “Eyaya Jesosa huoojeaje dejja cuana huasijje. Jamatii onaaya oya iña caje quecua'yojji”. Miquea ejjashahuabaqui'yojji yahuajo jayojja jama jjeyahua nei dejja quea mase cuaa acanaje. ²⁹ Eyacuiñajji, miya ecuanaa Emeshi Mese nei eyajo ba'e. Miquea eba jjeyahua nei emeshi mese cuana quea mase ecuana nijje mimijajiani Jesusaja esohui ecuaaya ehuhui poaje jjejojo. Jamajjeya ecuana miquea epeeji poanijo, esohui Jesusajo huohui meesahuacue mete'ama! ³⁰ ¡Mique Bacua Ejja Jesosa nijje jjaepequinajja pea cuana huaquia meesahuacue! ¡Ma dejjaa ajjima acani ameesahuacue, Eyacuiñajji! —jamaya miminaje Eyacuiñajji nijje ojjaña.

³¹ Eyacuiñajji nijje mimipajea'yaajo, Eyacuiñajjiya ma equi jeahuehuahuehua mee canaje. Edojjoshahua Pameya ojjaña huasijje dobiqumajje Eyacuiñajji esohui huohui mee canaje mete'ama.

Jesosaja epeeji cuana huapa pojjeama jayojja ba'ya poa.

³² Jomajo ojjaña Jesusaja epeeji cuana ojee jjaepequinaje quea bei. Oya cuana aquiana nahue'ama poanaje. Bobi nahue'ama poanaje. Nishehuhui'ama, dejja tai'ama ojjaña poanaje. Ojjaña Jesusaja epeeji cuana ba'e meesahua canaje. Ojjaña aquiana cuana ojjañaja poanaje. ³³ Jamajjeya Eyacuiñajji huoojea'yo esohui huohuijji cuaa janobajjima nei esohui huohui canequinaje mete'ama. Jama huohuime acanaje ba'a: —Esejaya Emeshi Mese nei Jesosa Quito shequi o'oyanaje e'e jojo nei —acanaje.

Jamajjeya Eyacuiñajjiya oya cuana jaahuana neinei canaje; quea bei nee po mee canaje.

³⁴⁻³⁵ E'e, jamajjeya Jesusaja epeeji cuaa meshi, equi cuana, aquiana pojja'a quia majje, ejjeshejji jjeshe majje quia canaje Jesusaja epeeji jaahuanajji yasijje. Majoya ohuaya ma ejjeshejji quia canaje Jesusaja epeeji aema' cuana huasijje, aema' pishana huasijje pea'ai. Jamajjeya oya huisoajjaya aquiana ojjañaja poanaje.

³⁶ Majoya oe Nemita Jose bajjani ma yahuajo Chipe meshijo ba'e poenequinaje, Jesusaja epeeji. Oya Benabe bajjani aca'yonaje, Ese Ejjaja esohuijjo Ona Quea Bei pomeejji bajjani aca'yonaje Jesusaja huoojea'yo esohui huohuijjiya. ³⁷ Ma Benabeya que jjinipea quia canaje ejjeshejji sosejje. Majoya ohuaya ejjeshejji ye ca'yonaje Jesusaja huoojea'yo esohui huohuijji Jesusaja epeeji aema' cuana huasijje equiajji. Jamajjeya ojjaña quea bihui nee Benabe nijje poanaje.

5

Anania oja huanase Sapina pea'ai siajjejojji poanaje

¹ Majoya Ananiaa ojaya ehuanase Sapina nijjeya que jjinipea quia ca'yonaje ejjeshejji sosejje. Bejjo iñatepe majje equijo iyaquehua canaje. Quea bejjo jea poanaje. ² Jamajjeya Ananiaa oe pojji bejjo quia ca'yonaje Jesusaja huoojea'yo esohui huohuijji yasijje. Oja huanasejja eba poanaje. Jamatii siajje poanaje jama ba'a: —Ma'aje bejjo, Peno, ojjaña tii que sosejje ecue jjeshe —anisho canaje Ananiaa; ona quea bihui pojji nisho siajje poanaje.

³ Edojjoshahua Pameya Peno huohui meesahua canaje jama ba'a: —Anania, ¿apiojji acuae mi Edosiquiana jama siajje poani? ¿Apiojji acuae Edojjoshahua Pame siajje aña so'o? Miquea ojjaña ejjeshejji que jjinipea sosejje quia'yo jjima; miquea equijo huanaquehua-naje. ⁴ ¡Bacue, Anania! Que jjinipea quia jjinahuajo miquea tii poanaje. Quia'yo majje

ejeshejji miquea tii poanaje. Jamajjeya ζapiojji acuae mi siajje poani ojjaña bejjo miquea que sosejje quia'yaña nisho poani? Miyaya ecuanaya pojjeama dasiaña; miyaya Eyacuiñajji dasia sa aña, de —poanaje Penó.

⁵ Penoja esohui shajja'ajja majje Anania bichaquinananaje; poquijeyonananaje. Chama'yo tii poanaje. Anania mano'yonaje ba majje ojjaña quea mete nee nee poanaje. ⁶ Majoya dejja etii pishana cuaa Anania daqui oshejo bebo majje dojo canaje mojeaa.

⁷ Quijje pishana eshequi jaasohua pishanajo, Ananiaya ehuanase Sapina poeyanaje Penó que. Oja ba jjima ojahue mano'ya poa. ⁸ Penohua oya huohui'ajja canaje jama ba'a: —Sapina, ζache sose huiso que jjiinipea quinaje miqúiaaya?

Oya epona siajje poanaje pea'ai: —E'e Penó, ma sose huiso tii quianaje ecuaaya —poanaje epona.

⁹ Majoya Penohua epona tecuea canaje: —ζApiojji miya miqueahue jayojja jama siajje poani? ζApiojji miyaya Edojoshahua Pame dasia sa aña pea'ai? ¡Bacue! Miqueahue mojeajji epo poe'yonaje. Ohuaya miya mojea pea'ai caje'yo —acaname Penohua.

¹⁰ Siajjejojji jjejojo jjeyahua nei epona mano bichajeaquinananaje Penó pejejo tii. Jamajjeya dejja etii pishanaa ma Anania mojea'yojji epohua Penó que poe o'oya majje epona emano'yojaa ba cañaquinaje. Epona dojo canaje mojeaa, ojahue pejejo.

¹¹ Ma ba majje ojjaña Jesusaja epeejji cuana quea mete nee poanaje Eyacuiñajji dasiajji nisho. Ojjaña pea cuana ma shajja'ajja majje quea mete nee nee poanaje pea'ai.

Jesosaja huoojea'yo cuaa acanaje quea huiso ma dejjaa ajjima acani

¹² Majoya Eyacuiñajjiya Jesusaja huoojea'yo esohui huohuijji cuana ma dejjaa ajjima acani ameesahua canaje quea huiso nee ojjaña cuanajo. Ojjaña Jesusaja epeejji cuana jjachichaqui nequinaje Eyacuiñajji equi yasijje, equi equecuayijji Sanomoja equi bajjani yasijje Eyacuiñajji bihuiaa. ¹³ Pea cuana Jesusaja epeejji cuana nijje quea bei nee poanaje jama ba'a: —Jesusaja epeejji cuana quea pame nee —poanaje. Onijje mimijaji ajja nei poanaje, quea mete.

Jesosaja epeejji cuana nijje jjachichaqui jjima poanaje Jesusaja epeejji pojjeama. ¹⁴ Ojjaña pojjaajo quea huiso nee Jesusa nijje jjapeequinaje dejja cuana, epona pea'ai.

¹⁵ Jesusaja huoojea'yo esohui huohuijji cuaa ma dejjaa ajjima acani acanaje: emanojaaca cuana huaquia meesahua ca'yonaje, jjajeaqui meesahua ca'yonaje. Jamajjeya ojjaña emanojaa cuana ejiojji cojja sahuajje dojo canaje cuaa, equipajaajji jaa. Ejiojji sahuajo huana yiyoyio canaje. Jama poanaje ba'a: —Penó ejiojji poquijeya oja yajjanaa emanojaa cuana diajje yejje cananaje pojja'a, jjaajaquije'yo pojja'a —poanaje cuana.

¹⁶ Quea huiso dejja cuana cuiñajji sisi cuanajo ba'e, Jenosanena chipi neejo ba'e poeyanaje Jenosanena huasijje. Emanojaa cuana ye canaje quea huiso nee nee; niñepoqui cuana eshuajajo niñepoquiani cuana ye canaje pea'ai. Ojjaña cuana huaquia'yonaje, jjaajaquiyonaje, niñepoqui pajea'yonaje pea'ai. Jesusaja epeejji cuaa jjaaja meesahuaqui ca'yonaje.

Jesosaja epeejji jeanobia canaje cuaa Jesusaja esohui huohuijjiyo

¹⁷ Majoya Eyacuiñajji nijje emimijji etii, Jodio dejja etii cuana, Sanoseo cuana pea'ai quea quene poanaje Jesusaja huoojea'yo esohui huohuijji cuana nijje. Mimimiminaje jama ba'a: —¡Dee! “¡A'a Jesusajo huohui majajji!” aje oma a'ajjanaje yahuajo. Jamatii esohui huohui pajea ajja. Ecuaa shajja'ajja jjima acani. Ojjaña cuana Jesusa nijje jjapeequi mee cani, ecuanaja esohui pajea mee cani —poanaje Jodio etii cuana.

¹⁸ Jamajjeya Jodio etii cuaa Jesusaja huoojea'yo esohui huohuijji cuana iña canaje. Dojo canaje ejjajeañoiaquijji equi yasijje, dejja mimishi cuana nijje pea'aiya. ¹⁹ Jamatii mecashono Eyacuiñajji esohuidojojji poeyanaje ejjajeañoiaquijji equi yasijje. Esecue jjani ca'apejo cañanaje. Jesusaja huoojea'yo esohui huohuijji cuana dojcuayaqui ca'yonaje esecue yasijje. Huohui canaje jama ba'a: ²⁰ —¡Poqui o'oyacue Eyacuiñajji equi yasijje! ¡Ojjaña cuana huohuicucue Jesusaja esohui onijje eba'e quea pame neejo, ma Jesusaa huohui canaje shequi o'oya majje! —poanaje esohuidojojji.

²¹ Jamajjeya mecajeahua oya cuana poqui o'oyanaje Eyacuiñajji equi yasijje. Jesusaja esohui huohui ca o'oyanaje ojjañaja eshajja'ajjajji.

Ohua esohui huohui canijo tii, Eyacuiñajji nijje emimijji etii cuana, ojjaña Jodio etii cuana pea'ai jjachichaquinaje pea equijo. Jjachichaqui majje sohuinano cuana huoojea canaje equi ejjajeañoiaquijji yasijje Jesusaja huoojea'yo esohui huohuijji jjequiya nisho.

²² Jamatii sohuinano cuana equi ejjajeañoiaquijji yasijje poqui majje ba cañaquinaje Jesusaja huoojea'yo esohui huohuijji chama'. Ba'ajja cañaquinaje; sa'ajja cañaquinaje. Chama' equi ejjajeañoiaquijji. Jamajjeya esohuinano mese cuana poqui o'oyanaje Jodio etii cuana huohui'yohua. ²³ Jama poanaje ba'a: —Esecue jaahuanajji poani nequinaje

esecue jiani pejeje. Esecue jiani eca'a tii nequinaje. Jamatii esecue jiani ca'apejo'yo majje chama' ba canaje Jesosaja epeeji cuana.

²⁴ Eyacuiñajjija equi jaahunajji, Eyacuiñajji nijje emimijji mese cuana pea'ai ma esohui shajja'ajja majje quea mete poanaje: —¿Yajja po majje shai cuayaqui'yonaje, de? ¿Achacua shai poqui'yonaje ma dejja cuana? —poanaje.

²⁵ Majoya pea dejja poeyanaje. Jama huohuime acanaje ba'a: —Dejja cuana ma miquianaja jeanobia'ajja poanaje jjeja nei Eyacuiñajjija equijo nequi o'oya, Jesosaja esohui huohui o'oya ca ca poequi ojjaña cuanaja eshajja'ajjajji.

²⁶ Jamajjeya sohuinano huoojeajji poani echacosahuajji nijje poquinaje Jesosaja esohui huohuijji cuana jjequi o'oyaa. Jamajjeya quea huiso cuanaja Jesosaja esohui huohuijji cuana quea jea nee poanaje, quea nahue nee poanaje etecueajji. Tecuea jjima nei jjequime acanaje. E'e, dejja mase quea mete jama poanaje ba'a: —E sapa jahahuejjajea ca meiya —poanaje.

²⁷ Jamajjeya jjequi majje nequi mee canaje Jodio etii cuana ani cojja nei. Majoya Jodio etii cuaa jama tecueame acanaje ba'a: ²⁸—Peno, “ja'a Jesosajo huohui majajji!” aje mi yahuaajo a'ajjanaje. Jamajjeya ¿apiojji acuae Jesosajo huohuipajea'yo jjima aña ojjaña dejja cuana huasijje, ojjaña Jenosanenajo ba'e yasijje so'o? Miquianaaya ca ca oe ecuanaya niñebaña jama ba'a: “Jodio etii cuana ca ca oe Jesosa quecua'yojji epo, quea mimishi jjejojo”. ¿Apiojji acuaeja jama sohuihuohuime aña tii so'o? —poanaje Jodio etii cuana.

²⁹ Jesosaja huoojea'yo esohui huohuijji cuaa, Penohua pea'ai jama saja'ame acanaje ba'a: —Ecuaaaya Eyacuiñajjija esohui jayojja nei nei aje'yo, miquianaja sohui jama pojjeama. ³⁰E'e, yahuaajo esejaya etiiquiana cuana Eyacuiñajji nijje jjapeequi'yonaje. Miquianaaya ca ca oe Jesosa acui ecueata'apejo ba'ehuanasohuajea meenaje emano'yojji. Jamatii Eyacuiñajjiya oya shequi mee ca o'oyanaje. ³¹E'e, Eyacuiñajjiya Jesosa ojjaña jaahunajji, mimishi cuijea'yojji pea'ai po mee ca'yonaje. Ojaya ebiane mijijje nequi mee ca'yonaje eyajo ojjaña huoojea'yojji epojji. Jamajjeya Jesosaa Jodio cuanaja mimishi cuana cuijea ca'yani. Mimishi cuana pajea meesahua ca'yani pea'ai onijje jjapeequianijo. ³²Jamaya ecuanajaya eba. Edojjoshahua Pameja eba pea'ai. Eyacuiñajjiya Edojjoshahua Pame huoojea cani ojaya epeeji cuana que dobiquiya, ojaya ehuhui'yo jayojja jama acanijo —Penohua acanaje.

³³ Penoja esohui shajja'ajja majje Jodio etii cuana quea quene nee nee poanaje. Ojjaña Jesosaja huoojea'yo esohui huohuijji quecua sa acanaje. ³⁴Jamatii oe dejja ona nijje nequi Jjamani bajjani nequisohuanaje emimijji. Oya Paniseo dejja pea'ai, Moisesija etehue'yo huohuijji, dejja etii quea pame. Jamajjeya ojjaña oya shajja'ajja canaje. Jamajjeya Jjamani jama poanaje ba'a: —¡Iiquio dejja, Jesosaja esohui huohuijji dojocuayaquicue esecue yasijje! —poanaje. Ojaya esohui shajja'ajja mee sa po ajja.

³⁵ Majoya cuayaquinaje. Jjamaniya sohuihuohui canaje jama ba'a: —Isaeni de-
jja etii cuana, ma dejja cuana quecua jjimahuaa, ¡ecue sohui shajja'ajja neineicue!
³⁶¡Niñeba'yocue! Yahuaajo pishana oe dejja Teodasi bajjani emeshi mese jayojja quea ca'a
po'ajjanaje. Huohui canaje jama ba'a: “Eya quea pame nee, quea ca'a nee nee. Quea huiso
nee nee ecuea eba. ¡Eya shajja'ajjacue!”

Jamajjeya quea huiso nee nee, beshahua nei 400 huisome dejja cuana onijje jjapee-
qui'yonaje. Jamatii peaa Todasi quecua ca'yonaje. Todasi quecua ca'yajo, ojaya epeeji
cuana ojaya esohui pajea ca'yonaje. ³⁷Quijje pishana pea shequiajajo, emeshi meseya
ojjaña cuana bajjani cuana tehue mee canaje esicojji. Ma shequiajajo pea dejja Jodasa
bajjani emeshi mese jayojja po'ajjanaje. Jodasaja esohui shajja'ajja canaje quea huiso
dejja cuaa. Jodasa nijjeya emeshi mese jeabichajea'yo sa acanaje. Jamatii Jodasa quecua
ca'yajo, ojaya epeeji cuaa oja sohui pajea ca'yonaje. Poqui'yonaje. ³⁸Jamajjeya ja'a
Jesosaja epeeji cuana napajji! ¡A'a iña majajji! Eyacuiñajjiya oya cuana huohui meesahua
ajjajo, quijje ojjaña Jesosaja esohui pajea caje'yo pea'ai. ³⁹Eyacuiñajjiya ca ca oya cuana
huohui meesahua cani pojja'a. Jamajjeya ohuaya esohui mi huohuipajea cani. E'e, eseyaya
Eyacuiñajji niñeba chana' pojja'a. Jama a sa po'yo ajja eseya —acanaje Jjamaniya.

⁴⁰ Ojjaña Jodio etii cuaa oja sohui shajja'ajja canaje. Jamaya acanaje. Jamajjeya Jesosaja
huoojea'yo esohui huohuijji cuana iyaa canaje. Cuiasejjajea canaje acui sisiya. Tecuea
ca o'oyanaje jama ba'a: —¡A'a jja oe Jesosajo huohui majajji! —jamaya amajje oya cuana
huoojeacuayajea ca'yonaje.

⁴¹ Jamajjeya Jodio etii cuana jeana'yo majje Jesosaja huoojea'yo esohui huohuijji cuana
poquinaje. Eyacuiñajji bihuia canaje jama ba'a: —E'e Eyacuiñajji, ecuaña Jesosa nijje
jjapeequianijo, Jodio etii cuaa Jesosa aca poa jayojja ecuaña acani pea'ai. Jamaya capoahua
—miminaje ojjaña.

⁴² Jamajjeya ojjaña pojjajo Eyacuiñajjija equijo, pea equi cuanao pea'ai oya cuana huohuihuohui pajea'yo ajja poanaje esohui quea pame nee Jesusajo. Jama poanaje ba'a: —Ojjaña pojjajo bobi quiañaño miquianaaya quiaña quea huiso aquiana miqnea e'ahuemano cuana. Ecuanaaja e'ahuemano huasijje ca ca oe pojji quiaña, de —poanaje Jodio cuana ma Jieno meshijo ba'yahua.

6

Me oejje beca, 7 dejja babaca ca poa Jesusaja epeeji aema' jaahuanajji

¹ Jamajjeya Jesusaja epeeji cuana quea huiso nee nee poanaje. Majoya pea cuana nijje quea bei pojjeama poanaje. Jomajo ani Jodio cuana Jieno meshijo ba'yahua mimijajinaje pea Jodio cuana nijje, Emeoja esohui mimiani cuana nijje. Jama poanaje ba'a: —Ojjaña pojjajo bobi quiañaño miquianaaya quiaña quea huiso aquiana miqnea e'ahuemano cuana. Ecuanaaja e'ahuemano huasijje ca ca oe pojji quiaña, de —poanaje Jodio cuana ma Jieno meshijo ba'yahua.

² Jamajjeya ma shajja'ajja majje Jesusaja huoojea'yo esohui huohuijji cuaa ma ome miji beca, 12 huisomeya ojjaña Jesusaja epeeji cuana iyaa canaje. Quea huiso ojee poeyajo, huohui canaje jama ba'a: —Epeeji cuana, ¡bacue! Ecuaya Eyacuiñajjija esohui cahuohuiyahua. Ojjaña pojjajo bobi equiajji pojjeama ona huasijje. ³ Jamajjeya imiquianaaya me oejje beca, 7 dejja quea pame cuana babacacue bobi quiajji! E'e, ijyaya Edojjoshahua Pame shajja'ajja cani, quea jjashahuabaqui ja'a nee nee poani babacacue! Majoya ecuaaaya ma dejja cuana huoojeaje bobi quiajji, pea aquiana cuana pea'ai quiajji ojjaña huasijje, e'ahuemano cuana huasijje pea'ai. ⁴ Jamajjeya ecuanaya Eyacuiñajji nijje mimi majamajaje, ojaya esohui huohui tiitiije pea'ai.

⁵ Jiquio ehuohui'yo jayojja jama a sa poanaje ojjaña Jesusaja epeeji cuana. Jamajjeya Estema babaca canaje Jesusaja epeeji e'ahuemano jaahuanajji. Ohuaya, Estema Edojjoshahua Pame shajja'ajja neinei canaje. Eyacuiñajjija esohui jayojja jama atiiti canaje pea'ai. Majoya pea dejja cuana babaca canaje pea'ai: Penipe, Pocono, Nicaino, Timono, Pamenase, Niconasi pea'ai. Oya Niconasi Jodio pojjeama; oya yahuajo Atioquia cuiñajjijo ba'ya poa. Jodio cuana ehuohui'yo jayojja Eyacuiñajji bihuia ca poa, jjeya ca ca Jesosa nijje jjapeequiani. ⁶ Majoya jiquio 7 epeeji cuana babaca majje Jesusaja huoojea'yo esohui huohuijji cuana huasijje jjequi canaje cuaa. Poeyajo ma dejja cuana sapa biaje Jesusaja huoojea'yo esohui huohuijji cuaa eme' huana canaje. Eyacuiñajji nijje miminaje onajo, o chaco meesahuajji. Jamajjeya ojjañaja eba poanaje ma dejja cuana e'ahuemano cuana huasijje aquiana quiajji epojji.

⁷ Majoya Jenosenajo quea huiso nee neeya Eyacuiñajjija esohui shajja'ajja canaje. Quea huiso nee nee Jesosa nijje jjepeequinaje. E'e, Jodio etii cuana, Eyacuiñajji nijje emimijji cuana pea'ai Jesusaja epeeji poanaje, ojaya esohui jayojja jama acanaje.

Estema iña majje tecuea canaje Jodio etii cuaa

⁸ Estema Eyacuiñajjija quea jea nee nee oya quea ca'a nee po mee canaje; quea huiso ma dejja ajjima acani ameesahua canaje ojjaña cuanao. Jamaya ojjaña ba mee canaje oya Jesusaja epeeji nei. ⁹ Jamatii pea Jodio cuana Sinene cuiñajjijo ba'e, Ejaniana cuiñajjijo ba'e, Sinisia meshijo ba'e, pea cuana Asia meshijo ba'e pea'aiya Estema emimicuijjeanobiajeajji nisho acanaje. E'e, Jodio cuaa equi bajjani Echacojji epichojea'yoja equi ojee e'anijjijo jjachichaquiani cuaa Estema emimicuijjeanobiajeajji nisho acanaje. ¹⁰ Edojjoshahua Pameya ca ca Estema quea jjashahuabaqui ja'a nee po mee canaje; oya mimi meesahua canaje pea'ai. Jamajjeya ma Jodio cuana Estema nijje jjamimicuijjeanobiajeaje pajeaquinaje, yajja saja'ame yajji. ¹¹ Oya cuana Estema nijje quea quene nee poanaje. Jamajjeya quecua'yo sa acanaje. Sijjjepojji cuana bejjo quia canaje Estema sijje ajji. Jama sijje ame aje acanaje ba'a: —Ecuaya Estema shajja'ajjanaje. Ohuaya ca jja ca oe Eyacuiñajji niñeba cani quea tai. Eseyaya etiiquiana Moisesi niñeba cani pea'ai —poanaje ma sijjjepojji cuana, bejjo sosejje.

¹² Jamajjeya ma shajja'ajja majje ojjaña Jodio cuana Estema nijje quea quene nee nee poanaje. E'e, Jodio etii cuana, Moisesija etehue'yo huohuijji cuana pea'ai quea quene nee poanaje Estema nijje. Jamajjeya Estema que cuajicuaajjebenaje; iña canaje. Dojo canaje Jodio etii cuana ojee ani yasijje. O cojja nei nequi mee canaje. ¹³ Majoya pea sijjjepojji cuana jjequi canaje Estemajo sijje ajji. Jama sijje pome poanaje ba'a: —Estemaya ca ca Moisesija etehue'yoja quea tai mimiani, Eyacuiñajjija equijo pea'ai. ¹⁴ E'e, ecuaaya oya shajja'ajjanaje; jama poanaje Estema ba'a: “Jesusaa ma Nasanenajo ba'yahuuaa jiquio equi, Eyacuiñajjija equi jeabichajea caje'yo. Jesosaa eseya Moisesija etehue'yo pajea mee caje'yo ojaya ehuohui'yo jayojja jama eba'ejji” —jama sijje pomeya poanaje Estemajo.

¹⁵ Majoya ojjaña Jodio etii cuaa jomajo aniya Estema ba neinei canaje. Ba canaje ojaya ecojja esohuidojojji jayojja cojjame, quea cojja bei nee nee, quea cojja ja'a nee nee.

7

Estemaa sohuihuohui canaje Jodio etii cuanaja eshajja'ajjaji nisho

¹ Majoya Eyacuiñajji nijje emimijji etiiya Estema huohui'ajja canaje jama ba'a: —¿A'a jiquio esohui e'e nei? ¿A'a cuae miyaya jamaya aña?

² Estemaa saja'a canaje jama ba'a: —Ecuea epeeji cuana, dejja etii cuana pea'ai, ¡shajja'ajjacue mo! Yahuaño nei nei Eyacuiñajji quea pame nee esejaya etiiquiana Amajama que jjanequipanaquia poa. Jamaya poa Amajama Mesopotamia meshijo ba'yahua, Janani meshi yasijje poe jjimahuajo. ³ Eyacuiñajjiya Amajama huohui ca poa jama ba'a: “¡Mesopotamia meshijo a'a ba'e majajji! ¡jiña'yocue oe! ¡Pea meshi yasijje poquicue! ¡Miquea huapa pojjeama cuana jiña'yocue! Eyaya miya pea meshi ba meeje. Jomajo miya ba'e meeje'yo” aca poa Eyacuiñajjiya.

⁴ —Jamajjeya Amajamaa Canea meshijo ba'e poquia poa Janani meshi yasijje. Jomajo nequia poa. Oja chii mano'ya poa. Oja chii mano'yajo, Eyacuiñajjiya Amajama huoojja ca'ya poa jiquio meshi yasijje, ma ese jjeyahua nei ba'vani yasijje. ⁵ Jamatii Eyacuiñajjiya oya jiquio meshi quia jjiima poa ojaya epojji. Que biso nei ojaya nahue mee jjiima poa. Eyacuiñajjiya oya huohui ca poa jama ba'a: “Amajama, jiquio meshi miquea poaje'yo quijje; mique osecua cuanaja quijje nei poaje'yo pea'ai” oya aca poa Eyacuiñajjiya, jamatii Amajama edejja tii nojinoji poa, bacuama' tii poa.

⁶ —E'e, Eyacuiñajjiya Amajama huohui ca poa jama ba'a: “E'e jojo nei miquea osecua cuana jiquio meshijo ba'eje'yo quijje nei. Jamatii jjeya jiquio meshi onajaya. Jamajjeya miquea osecua cuana jiquio meshijo nequi poqui caje quea huesha nee pea meshi yasijje. Joma meshijo ba'e dejja cuaa miquea osecua cuana quea huiso napa caje. Chaco tiitii mee caje'yo sosema' quea huiso nee nee shequiajame, 400 shequiajame. ⁷ Quea mase poaje miquea osecua cuana nijje. Majoya eyaya ma dejja quea mase cuana tecueaje'yo, quea nee nee po meeje'yo pea'ai. Jamajjeya miquea osecua cuana ma meshijo ba'e poqui mee caje'yo jiquio meshi yasijje epoe o'oyajji. Jiquio meshijo tii eya bihuia caje o'oya cuaa. Ecue sohui jayojja jama ba'e caje cuana pea'ai”. Jamaya yahuajo nei nei Eyacuiñajjiya Amajama aca poa.

⁸ —Majoya Eyacuiñajjiya pea esohui huohui ca poa ojjaña ba meeji oya e'e jojo nei Amajama nijje miminaje. Jama poa ba'a: “Amajama, jehusejjajaeacue cuiishasha biso nei miquea, mique bacua cuanaja, ojjañaja. Jamajjeya ojjaña cuaa ba caje eya e'e jojo nei minijje miminaje, miya, mique osecua quea huiso nee nee cuana jiquio meshi quiaña miquea epo'yojji tii tii” aca poa.

—Jamajjeya Amajamaa Eyacuiñajji shajja'ajja ca poa. Quijje oja bacua Isaaca cuaya poa. Ebacua jjeya cuaya me oejje pea beca peejjima cahuime poajo, Amajamaa oya cuiishasha biso nei jehusejjajaea ca poa. Majoya tii majje Isaacaja bacua Jacobo cuaya poa. Isaacaa oya cuiishasha biso nei jehusejjajaea ca poa. Quijje tii majje Jacoboja bacua cuana cuaya poa quea huiso nee; 12 huisome dejja poa, epona oe nei poa. Jacobohua oya jayojjaya aca poa, ejejajjiya aca poa jayojjaya. Jacoboja bacua eja cuana tiinaje ojjaña Isaani cuanaja etiiquiana, esejaya, de. ⁹ Ma edoe mese cuana aje echahua mesejo quea quene nee poa, Josejo. Quia ca'ya poa dejja cuana Ejito meshijo ba'e yasijje ejjeshejji sosejje. Echacojji sosema' Jose poa. Jamatii Eyacuiñajjiya Jose pajea'yo jjiima poa; jaahuana ca poa. ¹⁰ E'e, jamatii pea cuaa oya quea mimishi acanaje, Eyacuiñajjiya Jose jaahuana ca poa. Ejito emeshi mese Panaohua Jose quea jea nee aca poa. Jamajjeya Panaohua Jose ojjaña huoojja'yojji po mee ca poa Ejito meshijo. Panaoja equi jaahuanajji po mee ca poa Jose. ¹¹ Majoya bobi chama' poa Ejito meshijo, Canaani meshijo, ojjaña meshijo pea'ai. Bobimajo quea huiso bobi yasijje po'ya poa. Eseyaya etiiquiana cuana pea'ai bobima' poa. ¹² Majoya Jacobohua jiquio meshijo ba'eya shajja'ajja canaje bobi quea huiso Ejito meshijo yani. Ejito emeshi meseja. Jamajjeya ohuaya esejaya etiiquiana, oja bacua cuana huoojja ca poa Ejito meshi yasijje bobi jjequiya. ¹³ Quijje poqui o'oyanaje Ejito meshi yasijje bobi jjequi o'oyaa. Poqui o'oyajo Joseya oja doe cuana huohui ca poa: “Eya ca ca iña mique chahua Jose” aca poa.

—Joseya oja o'i cuana dojo ca poa emeshi mese Panao que, ojaya ebajji. ¹⁴ Majoya Joseya oja o'i cuana huoojja ca poa oja chii jjequiya, Jacobo jjequiya. Ojjaña oja huapa pojjeama cuana quea huiso nee nee jjequi ca poa Ejito meshi yasijje, 75 huisome. ¹⁵ Jamajjeya Jacobo ojjaña oja bacua cuana nijje, oja osecua cuana nijje pea'ai poquia poa Ejito meshi yasijje. Jomajo, Ejito meshijo oya mano'ya poa. Jomajo esejaya etiiquiana cuana quea huiso nee mano'ya poa. ¹⁶ Jacobo, oja bacua beca cuana pea'ai mano'yajo esa' cuana ye ca'ya poa cuaa jiquio meshi yasijje, Siqueme cuiñajji yasijje ohuajea'yohua. Mei jjani yasijje huananobiajja ca'ya poa, ma yahuajo Amajamaa jjeshe ca poa Jamonoja meshi, mei jjani huananobiajja'yojji, bejjo sosejje —Estemaa acanaje.

¹⁷ —E'e, ma Eyacuiñajjiya yahuajo nei Amajama huohui ca poa jayojja jama ohuaya aca poa. Isaeni dejja cuana Ejito meshijo ba'e jipapaqui'ya poa; quea huiso nee nee po'ya poa. ¹⁸ Majoya Ejito meshi mese mano poqui'yani poa. Majoya pea cuaya majje oya jayojja poa. Quijje pea dejja Ejito emeshi mese poa, pea Panao. Jose ojaya ba jjima poa yahuajo nei mano'yojojo. ¹⁹ Ma emeshi mese eyacua quea mase poa esejaya etiiquiiana nijje. Oya cuana quea mimishi aca poa. Quea yeno nee nee po mee ca poa. E'e, ebacua cuana jeajea mee ca poa emanojeajji —Estemaa acanaje.

²⁰ —Majoya etiiquiianaja bacua Moisesi bajjani cuaya poa. Oya quea bacua bame nee nee poa, pea ebacua cuana quea bame pishana poa. Oja enaeseya oya quehuajje nei jaahuana ca poa oja equijo. Quehuajje tii mee ca poa pea beca peejjima ba'ime. ²¹ Majoya emano'yojji nisho enaeseya Moisesi esecue yasijje dojocuaya'ajjaqui ca poa. Jamatii Emeshi mese Panaoja bacuaseya Moisesi ba ca poa. Jjeshe ca poa. Dojo ca poa tii meeya. Ojaya ebacua poa Moisesi, Panaoja bacuaseja. ²² Jamajjeya Moisesi ojjaña Ejito cuanaja esohui ba mee ca poa Ejito esohui huohuijji cuana. Jamajjeya Moisesiya Ejito etii cuaa jayojja jama aca poa; quea ja'a nee esohui huohui ca poa pea'ai —Estemaa acanaje.

²³ —Majoya Moisesi peaja ejiojji miji pea'ai shequiajame tii majje, 40 shequiajame po majje jama poa ba'a: “Ecuea huapa pojjeama cuana cabaquiahua, Isaeni cuana”. ²⁴ Moisesiya ba cañaquia poa oe Ejito dejjaa Isaeni dejja cuiasejjajea caqui. Ba majje, quenequene majje Moisesiya ma Ejito dejja cuiajea ca poa. Mano'ya poa. ²⁵ E'e, Moisesi jjashahuabaquia poa jama ba'a: “Ecuea huapa pojjeama cuanaja eba Eyacuiñajjiya eya huoojja canaje ona jaahuanaa, esejja meshi yasijje dojohua, echacojji sosema' pojjeama epojji” poanaje Moisesi.

—Jamatii ojaya huapa pojjeama cuanaja Moisesi ba jjima Eyacuiñajjiya huoojja'yo. ²⁶ E'e, mecajjeahua Moisesi poe o'oyanaje ojaya huapa pojjeama cuana baa. Beca cuana jjacuaquiiani ba majje Moisesiya oya cuana quea bei po mee sa aca poa. Jamajjeya huohui ca poa jama ba'a: “Epeejji cuana, miquiianaya huapa pojjeama cuana. ¿Apiojji acuae huapa pojjeama nijje jjacuaquiiani so'o? Jamaya quea tai”.

²⁷ —Jamatii oe Jodiohua ma ojaya huapa pojjeama cuiajji nishohua Moisesi iñajjeanaje ca poa; shajja'ajja sa po'yo ajja poa. Jama aca poa ba'a: “¿Aya shai miya ecuana huoojja'jji po mee ca'yonaje so'o? ²⁸ ¿A'a eya cuiaje'yo pea'ai? Ecuea eba miyaya oma mecajje Ejito dejja cuiayonaje.

²⁹ —Ma shajja'ajja majje Moisesi quea mete poa: “Ojjañaja eba eyaya Ejito dejja cuiayonaje. Ejito emeshi meseya eya cuia ca chana”. Jamajjeya quehua poquia poa pea meshi yasijje, Madiani meshi yasijje. Jomajo oya ba'ya poa oja huapa pojjeama cuana nijje. Jomajo ba'e eponajo jjahuanaquia poa. Jomajo oja bacua ejja cuaya poa beca. ³⁰ Jomajo oya ba'ya poa peaja ejiojji miji pea'ai shequiaja huisome, 40 shequiaja. Majoya oya meshi jabojo, Sinai eyiyo pejeje poquiiani, ñajjajja jaahuana poequijo Eyacuiñajji o que poquia poa. Acui tii'ajja jiji mee ca poa. Jamatii ma acui quiyoy'yo ajja poa. Eyacuiñajji ma acui jijiqui yiyesamajo jjanequipanaquia poa. ³¹ Jamajjeya Moisesi acui jijiqui ba majje quea mete poa. Jjanequichipiquia poa acui jijiqui baa. Eyacuiñajji acui jijiqui yiyesamajo nequi onijje mimia poa. ³² Jama aca poa ba'a: “Moisesi, eya Eyacuiñajji. Miquea etiiquiiana nijje jjapeequia poa, Amajama, Isaaca, Jacobo pea'ai”.

—Jamajje Moisesi piopionaje quea mete jjejojo. Acui jijiqui ba maja sa po'yo ajja poa. ³³ Majoya Eyacuiñajjiya oya jama aca poa ba'a: “Moisesi, ¡jiquio meshijo tii eya enequijo, miquea ejiojji shejee huijjiajeacue enijje emimijji! ³⁴ Eyaya ecuea epeejji cuana baña Ejito meshijo ba'e. Jomajo Ejito dejja cuaa ecuea epeejji cuana janobajjima nei napa cani eyaya baña pea'ai. Oya cuana quea yeno nee nee pa neineiiani eyaya shajja'ajjaña. Jamajjeya eyaya oya cuana nahueje'yo, oya cuana dojole'yo sosema' echaco majajji pojjeama. ¡Po- quicue, Moisesi! Eyaya miya huoojjae o'oya Ejito meshi yasijje” aca poa Eyacuiñajjiya — Estemaa poanaje.

³⁵ —¡Bacue! Yahuajo nei nei Moisesija huapa pojjeama cuaa oya cajaa aca poa. Shajja'ajja sa po'yo ajja poa: “¿Aya shai miya ecuana huoojja'yojji po mee canaje so'o?” aca poa cuaa.

—Jamatii Ejito dejja cuanajo sosema' echaco majajji pojjeama jojoya, Eyacuiñajjiya Moisesi huoojja ca poa ojaya epeejji cuana jaahuana'ajji epojji. Eyacuiñajjiya Moisesi oya cuana dojo meesahua ca poa Ejito dejja cuanajo sosema' echaco majajji pojjeama. E'e, Eyacuiñajji jjanequipanaquia poa acui jijiquijo Moisesija ebajji. ³⁶ Jamajjeya Moisesiya Jodio cuana, Eyacuiñajjiya epeejji cuana Ejito meshijo ba'e dojocuayaqui ca'ya poa pea meshi yasijje epoqui'yojji. Eyacuiñajjiya Moisesi Ejito meshijo quea huiso ma dejjaa ajjima acani ameesahua ca poa. Ojaya epeejji cuana Ejito meshijo ba'e dojocuaya meesahuaqui ca poa pea meshi yasijje epoqui'yojji, jiquio meshi yasijje. Bae ena huo'o oje miji yasijje poqui meesahua ca poa. Bae ena nequiashiña mee ca poa. Majoya ojjaña poquia poa oje miji yasijje. Meshi quea jabojo, quimajo ba'e meesahua ca poa quea shequiaja huiso nee,

peaja ejiojji miji pea'ai shequiajame, 40 shequiajame. ³⁷ Ohuaya, Moisesiya Isaeni dejja cuana jama aca poa ba'a:

“¡Bacue! Eyacuiñajjiya eya huojea canaje ojaya esohui huohuiya. Quijje ohuaya pea esohui huohuijji e jayojja miqiana que huojea caje, miqiana nijje meshijo ba'e tii. Ojjaña joya ojaya esohui jayojja jama po ajja aje oe Eyacuiñajjiya cajaa acaje'yo; quea nee nee po mee caje'yo tii”.

Jamaya Moisesiya aca poa yahuajo nei nei.

³⁸—E'e, Moisesi Isaeni cuana nijje poquianijo meshi quea jabo neejo, meshi quimajo oya cuana nijje poquia poa Sinai eyiyo huasijje. Jomajo Sinai eyiyo biajje Eyacuiñajji mimia poa Moisesi nijje. Ma esohui shajja'ajja majje Moisesiya Isaeni cuana huasijje huohui ca poa, esejaya etiiquiana huasijje, esohui eba'e tiitii mee'yojji. Ma esohui Moisesiya tehue ca poa esejaya ebajji pea'ai.

³⁹—Jamatii esejaya etiiquiana Moisesija esohui shajja'ajja sa po'yo ajja poa. Oya cuaa ca ca Moisesi niñeba ca poa. Ejito meshi yasijje poqui o'oya sa poa quea mimishi jjejojo. ⁴⁰ Moisesi eyiyo biajje Eyacuiñajji nijje mimianijo, etiiquiana aje oe Anoni jama aca poa ba'a: “Anoni, Eyacuiñajji nisho acue ecuanaja ebihuijji, ecuaña hui dojojji epojji, ejiojji jaahuanajji. Moisesiya eseya Ejito meshijo ba'e jjequi canaje jiquio meshi tai yasijje; quea jabojo manaje'yo. Jjeya Moisesi chama'. ¿Achacua shai oya poquinaje? Ecuanaja ba jjiima” poa esejaya etiiquiana cuana—Estemaa aca poa.

⁴¹—Jamajjeya etiiquiana cuaa eyacuiñajji nisho pana ca poa ana'ajja bacua nisho, mei huo'o. Aquiana cuana dahua ca poa ma eyacuiñajji nisho bihuijji. Ojee ijjiia'ijji poa. Quea bihui nee jayojja poa oja panaa shajja'ajja cani poso. ⁴² Etiiquiana cuaa Eyacuiñajji pojjeama bihuia ca poa, oja pana, majameta cuana bihuia sa aca poa. Jamajjeya shajjama' jjejojya Eyacuiñajji esejaya etiiquiana nijje jjapeepajequia poa. E'e, jama poanaje ba'a: “Oya cuana quea jashahuabaqui tai poani jojoya eyaya oya cuana jaahuana maja ajja poaje'yo, ecuea esohui eba nisho jjejojo”. E'e, ma etiiquiana quea mimishijo yahuajo nei nei Eyacuiñajjiya esohui huohuijji cuaa tehue ca poa jama ba'a:

“Isaeni dejja cuana, e bihuijji pojjeama miqianaaya huo quea huiso quecuanaje quea huiso shequiajame, 40 shequiajame meshi jabojo, dejjama' meshijo. Aquiana cuana dahuanaje pea'ai e bihuijji pojjeama. ⁴³ Chojja. Miqianaaya ca ca oe daqui equi sisi yajji dojo tiitii nequinaje eyacuiñajji nisho Monoca bihuijji. Ma daqui equijo nequinaje eyacuiñajji nisho Monoca bajjani. Majameta Sepani bajjani aje oe bihuia tiitiinaje pea'ai. E'e, majameta miqianajaya eyacuiñajji nisho poanaje. Miqianaaya aje oe epana'yo cuana bihuia aninaje pea'ai. Eya bihuia jjiima miqianajaya. Jamaya quea tai. Jamajjeya eyaya pea dejja cuaa miqianaya iña meesahuaje quea huesha nee nee edojo'yojji pea meshi yasijje, Babinonia meshi yasijje dojo meeje. Jomajo quea yeno po meeje ejbahuejjaquijji, enijje e'e jojo nei ejjapeequijji”.

Jamaya yahuajo nei nei tehue ca poa esejaya etiiquiana huasijje—Estemaa acanaje—.

⁴⁴ E'e, esejaya etiiquiana Eyacuiñajjiya daqui equijo Eyacuiñajji nijje mimianinaje. Ma daqui equi huacuaya huacuaya quea huesha nee dojo canequinaje meshi jabojo. E'e, Moisesi Eyacuiñajjiya huohui ca poa: “¡Daqui equi iyacue enijje emimijji! Jama iyame acue ba'a” aca poa. E'e, Moisesi daqui equi cahui ba mee ca poa. Eyacuiñajjiya esohui jayojja neiya daqui equi iya ca poa, Moisesiya. ⁴⁵ Majoya Moisesi mano'yajo, esejaya etiiquiana yahuajo nei nei ba'eya Josoe nijjeya ma daqui equi meshi jabojo dojo majameta canequia poa jiquio meshijo eba'e'yojji. Jodio pojjeama cuaa ca ca jiquio Jodioja meshi eba'e'yojji aca poa. Jamajjeya Eyacuiñajjiya Josoe huojea meesahua ca poa Jodio pojjeama cuana; mete mee ca poa. Enejaya etiiquiana cuana jiquio meshi yasijje ba'e mee ca poa. E'e, ma daqui equi nequia poa jiquio meshijo, Jodioja meshijo. Jamaya nequi tiitia poa esejaya etiiquiana Dabi ba'e jjiimahuaajo.

⁴⁶—Emeshi mese Dabi quea pame nee nee, Eyacuiñajjiya quea boti nee nee poa. Jaahuana ca'ya poa pea'ai. Jamajjeya Dabiya Eyacuiñajjiya equi iya sa aca poa daqui equi pojjeama, mei equi quea bame iya sa aca poa Eyacuiñajji bihuijji. Ojjaña Jacoboja osecua cuana Eyacuiñajji bihuia mee sa aca poa mei equi eyacuajo. Jamatii Dabi mei equi iya mee jjiima poa Eyacuiñajjiya. ⁴⁷ Dabiya bacua ejjaa Sanomo bajjaninya ca ca mei equi quea bame nee iya ca poa Eyacuiñajji bihuijji.

⁴⁸—Eyacuiñajji quea pame, quea ca'a nee nee ca ca equi cuanajo ba'e ajja, dejjaya equijo. E'e, yahuajo nei Eyacuiñajjiya esohui huohuijji cuaa oja sohui tehue ca'ya poa jama ba'a:

⁴⁹ “Eya Eyacuiñajji, eyajo ojjaña huojea'yojji poani. Ojjaña meshi cuanajo pea'ai eya Emeshi Mese nei poani. Ojjaña ecuea aquiana. Jamajjeya ¿yajja acuaya equi iyaje so'o e ba'ejji? ¿A'a cuae eya equijo jomishocaje? Eya hueahuea ajja. ⁵⁰ E'e, yahuajo eyaya ojjaña aquiana cuana pana poa”.

Jamaya yahuajo nei tehue ca poa Eyacuiñajjija esohui —Estemaa acanaje.

⁵¹ —Miquianaya ca ca oe quea sapa ca'a, jashahuabaqui ajja. Edojjoshahua Pameja ehuohui'yo a'ajja tii. Miquianajaya etiiquiana cuana quea mimishi nee jayojja jama poani. ⁵² E'e, etiiquiaa aje oe yahuajo ojjaña Eyacuiñajjija esohui huohuijji cuana quea mimishi aca'ya poa. E'e, yahuajo nei Eyacuiñajjija esohui huohuijji cuaa huohui ca poa Jesosajo jama ba'a: "Quijje Eyacuiñajjija huoojea'yo ojjaña jaahuanajji poje. Oya quea pame nee nee, mimishi'ama nei nei poaje" aca poa cuaa. Jamatii miquianajaya etiiquiaa ma esohui huohuijji cuana quecua ca'ya poa. Oya jayojja jjeja miquianaaya Jesosa iña meesahanaje onaja quecua'yojji. ⁵³ Yahuajo Eyacuiñajjija esohuidojojjiya quea huiso nee neeya ba canaje Eyacuiñajjija sohuihuohui caqui miquianajaya etiiquiana huasijje. Majoya etiiquiaa ma esohui miquiana huasijje huohui ca poa. Jamatii ma esohui jayojja jama ba'e sa po'yo ajja miquianaya —Estemaa acanaje.

Estema sapa jajahuejjajea ca'yonaje cuaa

⁵⁴ Estemaja esohui shajja'ajja majje quea quene nee poanaje Jodio dejja cuana. Ese' ijjiyayi canaje quea maseya jjejojo. ⁵⁵ Jamatii Edojjoshahua Pameya Estemajo nequiya oya eyahuasijje ba meesahua canaje jjeyahua nei. Eyajo ba mee canaje Eyacuiñajji quea jeajahua nee nee, quea ca'a nee nee. Jesosa ba mee canaje pea'ai, Eyacuiñajji pejejo. ⁵⁶ Jamajjeya Estema jama poanaje ba'a: —¡Bacue! Eyaya esecue eca'apejo nequi baña eyajo. Ojjañaja Edoe Mese Jesosa baña Eyacuiñajji ebianeí mijijje nequi ojjaña huoojea'yojji — Estema poanaje.

⁵⁷ Jodio dejja cuana ma shajja'ajja majje quea quene nee nee poanaje. Estemaja esohui Jesosajo eshajja'ajja poaje jjejojo eme sisiya eshajja huejja noco canaje. Taaa majje ojjaña cuajicuaajjebenaje Estema que. ⁵⁸ Estema iña canaje, cuiñajji esecue yasijje dojcuaayaqui canaje. Mei jjeshe majje Estema sapa jajahuejjajea canaje meiya. Dejja cuaa ma Estema jajahuejjajejji epo cuaa ojaya daqui nei cuana huijjiajjea canaje; Sanoni quia canaje ejaahuanajji.

⁵⁹ Onaaya Estema sapa jajahuejja canijo tii, Estema Jesosa nijje miminaje jama ba'a: — Jesosa, ecuea Emeshi Mese nei, jecuea edojjoshahua jjequisohuacue eyahuasijje!

⁶⁰ Ecuí'oshajjajo nequi majje Jesosa nijje mimi neineinaje jama ba'a: —Emeshi Mese nei, ijiquio dejja cuana quea mimishi poanija mimishi cuijea'yocue! —jamaya mimi majje Estema mano'yonaje. Chama'yo tii poanaje.

8

Pabohua Jesosaja epeeji cuana napa canaje

¹ Pea cuaa Estema sapa jajahuejjajea cani ba majje Sanoni jashahuabaquinaje jama ba'a: —E'e jamaya, casapa jajahuejjajea cahua, de —poanaje, Estema Jesosajo siajje poani posojo jamaya poanaje Sanoni.

Majoya ma pojajjo tii Jesosaja epeeji pojjeama cuaa Jesosaja epeeji cuana janobajjima nei napa canaje Jenosanenajo ba'eca cuaa. Jamajjeya beshahua nei ojjaña Jesosaja epeeji cuana poquinaje pea cuiñajji cuana Jodio meshi yasijje; Samania meshi yasijje pea'ai poquinaje. Jesosaja huoojea'yo esohui huohuijji cuana ca ca oe poqui jjima poanaje; Jenosanenajo nequinaje tii.

² Jamajjeya dejja quea pame nee cuaa, Jesosaja epeeji cuaa Estema dojo canaje mojea'yohua. Pa neinei'yonaje ojo pea'ai.

³ Sanoniya ca ca quea tai aca'yonaje Jesosaja epeeji cuana. Napa huicha'a huicha'a ca'yonaje ojjaña equijo ba'e. Dejja cuana, ponaña pea'ai iña majje dojo canaje equi ejjajaanobiaquijji yasijje jeanobiaa. Dejja mimishi cuana nijje ejeanobia jaanaje.

Penipeya esohui huohuiqui canaje Samania meshijo

⁴ Jesosaja epeeji cuana ojjaña meshi cuana huasijje poquinaje. Esohui huohui capoquinaje Jesosaja. ⁵ Penipe ca ca poquinaje Samania meshi yasijje. Jomajo Jesosa Quitojo huohui canaje ojjaña cuana huasijje: —Jesosa Eyacuiñajjija huoojea'yo ojjaña jaahuanajji, de —Penipeya acanaje.

⁶ Ojjaña cuaa Penipeja esohui shajja'ajja canaje. Penipeya ma dejjaa ajjima acani ba majje ojjaña oja esohui shajja'ajja neinei canaje. ⁷ E'e, eshahua cuana dejjajo nequi taaa neinei majje cuayaqui'yonaje ma Penipeya huoojeacuaaya canaje. Jeo'ajja cuana ohuaya jeo mee canaje. Jiojjijajja jjaiojji jeapiihui meequi ca'yonaje pea'ai Eyacuiñajji nijjeya. ⁸ Jamajjeya ojjaña cuana Samania meshijo ba'eca quea bihui nee nee poanaje.

⁹ Samania meshijo ba'enaje eyamiquecua Simoni bajjani. Edosiquiaa oya ma dejjaa ajjima acani ameesahua canaje quea huiso shequiajame. Jamajjeya quea huiso cuana Samania meshijo ba'eca quea mete nee poanaje Simonijo. Simoniya huohui canaje jama ba'a: —Eya ca iña quea ca'a nee nee. Ojjaña ecuea eba, de.

¹⁰ Jamajjeya ojjaña cuaa ojaya esohui shajja'ajja neinei canaje, emeshi mese cuaa, echacojji cuaa, dejja tii cuaa, esho'iquiana cuaa pea'ai. Ojo jama huohuime acanaje cuaa ba'a: —Jiquio dejja, Simoni Eyacuiñajjiya ameesahua cani —poso acanaje cuaa—, ma dejjaa ajjima acani quea huiso nee.

¹¹ E'e de, quea huiso shequaijame ohuaya ma dejjaa ajjima acani acajo, quea huiso ojo quea mete poanaje. Oja sohui shajja'ajja canaje ojjaña.

¹² Jamatii Penipeya esohui quea pame nee Jesosa Eycuotojo huohui canaje jama ba'a: —Jesosa Quito Eyacuiñajji nijje eyajo nequi, ojjaña huoojea'yojji poani. Onijje jjapeequi'yajo ohuaya miya ba'e tiitii mee caje'yo onijje eyajo —acanaje Penipeya.

Quea huiso nee nee dejja, ponaña pea'ai Penipeya esohui Jesosajo shajja'ajja majje Jesosa nijje jjapeequinaje. Jamajjeya Penipeya oya cuana Eyacuiñajji besa mee canaje enajo.

¹³ Majoya Simoniya pea'ai Penipeya esohui shajja'ajja canaje. Jesosa nijje jjapeequinaje. Penipeya oya Eyacuiñajji besa mee canaje pea'ai. Majoya oya Simoni Penipe nijje po'ayequi nequinaje. Penipeya esohui shajja'ajja huicha'a huicha'a canaje. Eyacuiñajjiya Penipe ma dejjaa ajjima acani ameesahua canaje. Jamajjeya ma ba majje Simoni jjab'a'one neineiquinaje.

¹⁴ Majoya Jesosaja huoojea'yo esohui huohuijji cuaa Jenosanenajo nequiya onaja esohui shajja'ajja canaje. Jama acanaje cuaa ba'a: —Quea huiso nee Samania meshijo ba'eya Eyacuiñajji esohui shajja'ajja canaje. Jesosa nijje jjapeequinaje quea huiso nee nee, de —acanaje cuaa.

Jamajjeya ma shajja'ajja majje Jesosaja epeeji etii cuaa Peno, Huani pea'ai Samania meshi yasijje huoojea canaje Jesosaja epeeji eyacua cuana baa. ¹⁵ Samania huasijje poqui majje Peno, Huani pea'aiya Jesosaja epeeji cuana huasijje Eyacuiñajji nijje miminaje jama ba'a: —Eyacuiñajji, ¡Edojjoshahua Pame huoojeacue jiquio miquea epeeji cuana huasijje dobiquiya!

¹⁶ E'e, yahuajo Edojjoshahua Pameja Samania meshijo ba'e cuana huasijje dobiqui jjima. Oya cuana ca ca oe Emeshi Mese nei Jesosa nijje jjapeequi'yajo pea cuaa oya cuana Eyacuiñajji besa mee canaje enajo. ¹⁷ Jamajjeya Penohua, Huaniya pea'ai poe majje ma epeeji cuana sapa biajje eme' huana canaje. Peno Eyacuiñajji nijje mimiajo Edojjoshahua Pame ona que dobiqui'yonaje.

¹⁸ Simoniya ba canequinaje Jesosaja huoojea'yo esohui huohuijjiya Jesosaja epeeji cuanaja sapa biajje eme' huana cajo, Edojjoshahua Pame ona huasijje dobiquinaje. Ba majje Simoni jashahuaba taiquinaje jama ba'a: —Eyaya Edojjoshahua jjesheje bejjo sosejje.

¹⁹ Jamajjeya ohuaya Peno, Huani pea'ai jama acanaje ba'a: —Mi jayojja jama a sa aña eyaya. Jamajjeya eyaya dejja cuanaja sapa biajje eme' huana majje Edojjoshahua Pame dobiqui meee'yo pea'ai. ¡Che mo eya jamaya a'yocue miyaya bejjo sosejje! —acanaje Simoniya.

²⁰ Ma shajja'ajja majje Penohua oya tecuea canaje jama ba'a: —Simoni, miya jashahuaba taiquianiyo Eyacuiñajjiya miya mano mee ca chana'. Miquea ejjeshejji pea'ai chama'yo tii po mee ca chana'. Miya jashahuaba taiquiani; Eyacuiñajjiya Edojjoshahua Pame huoojea caje'yo ejjeshejji sosejje poso miyaya aña. ²¹ Chojja, Simoni. Miyaya Edojjoshahua Pame bejjo sosejje ejjeshejji pojjeama. Eyacuiñajjiya eba miya quea tai jashahuabaquiani, quea mimishi. Jamajjeya ecuaa nijje echacojji pojjeama Eyacuiñajjiyo. ²² Jamajjeya ¡miquea ejjashahuabaquiji pajea'yocue! ¡Eyacuiñajji nijje e'e jojo nei mimicue! “¡Eyacuiñajji, enijje a'a quea quene pojji!” acue. “¡Ecuea mimishi, ecuea ejjashahuaba taiquiji pajea meesahua'yocue!” acue. ²³ E'e Simoni, ecuea eba miquea ejjashahuabaquiji quea tai. Ecuaaya Edosiquiana nijjeya ma dejjaa ajjima acani anaje poso aña miyaya. Jama a sa aña pea'ai, de. Miquea mimishi cuana pajea meeme'e'yo ajja pea'ai. Quea nee nee poaje miya, Simoni —Peno poanaje.

²⁴ Peno shajja'ajja majje Simoni quea mete nee nee poanaje. Jamajjeya jama acanaje ba'a: —Peno, Huani pea'ai, ¡Eyacuiñajji nijje mimicue ojo! Jamajjeya Eyacuiñajjiya ecuea mimishi cuana cuijea caje'yo. Miquea esohui jayojja jama pojjeama ohuaya eya acaje'yo —poanaje.

²⁵ Majoya Penohua, Huaniya pea'ai Emeshi Mese nei Jesosaja esohui huohui majamaja canaje quea huiso cuana huasijje. Majoya oya cuana poqui o'oyanaje Jenosanena huasijje. Poquije ojjaña cuiñajji cuana huasijje dobiquipoquinaje. Ojjaña Samania meshijo ba'eca cuana huasijje Jesosaja esohui quea pame nee huohui capoquinaje. Majoya esohui huohui majje Jenosanena huasijje poqui o'oyanaje.

Penipeya Etiopia dejja huasijje Jesosaja esohui huohuiqui canaje

²⁶ Majoya oe esohuidojojjiya miminaje Penipe nije. Jama poanaje ba'a: —Penipe, ipoquicue miya eno poeiji mihi jaa ejiojjiije, ma Yasa cuiñajji yasiije quea huesha nee nee epoquijji, ma ejiojjiije Jenosanenajo ba'e cuana poquiani Yasa cuiñajji yasiije, meshi jabo yejje majje!

²⁷ Majoya Penipe poquinaje. Poquijyeya dejja Etiopia meshijo ba'e ebiñajja cajja'yo ba canananaje. Oya Etiopia dejja etii, emeshi mese epona Canase bajjanijo chachacoani, aquiana quea nahue, bejjo cuana jaahuanajji. Oya yahuajo poquinaje Jenosanena huasijje Eyacuiñajji bihuijaa. ²⁸ Jjeya ca ca oja meshi yasiije poqui o'oyani, ejiojjiije. Mapichiya oya dojo cani aquiana dojojji biajje ani. Poquijyeya esohui ba capoquinaje, ma yahuajo nei Eyacuiñajji esohui huohuijji Isaiiaa tehue ca poa ba capoquinaje. ²⁹ Jamajjeya Edojjoshahua Pame Penipe nije miminaje jama ba'a: —¡Aquiana dojojji yasiije poquicue miya, Etiopia dejja etii yasiije!

³⁰ Jamajjeya Penipe poquicuajinaje ma dejja que. Shajja'ajja cañaquinaje ohuaya esohui acani. Shajja'ajja majje huohui'ajja canaje jama ba'a: —¿A'a ma esohui miquea eba? ¿A'a miquea quea ja'a nee? —Penipeya acanaje.

³¹ Etiopia dejjaa Penipe saja'a canaje jama ba'a: —Chojja. Ecuea ba jjima. Ecuea quea quehua. ¿Yajjajo ebajji ca huohui jjima, de? ¡E'e pojja'a miyaya eya ba meesahuacue jiquio esohui!

Jamajjeya ohuaya Penipe iyaa canaje. Anioque mee canaje o pejejo, aquiana dojojji biajje. ³² Majoya Eyacuiñajji esohui ba canaje ma Isaiiaa yahuajo tehue ca poa Jesosajo, Eyacuiñajji huoojea'yo ojjaña jaahuanajji jama ba'a:

“Ñajjaja dojo cani quecua'yohua jayojja jama onaaya oya iña caje equecua'yoyji. Ñajjaja ña dede canijo, quea nee po majje ñajjaja siasia ajja jama jayojja oya mimipanaje ajja poaje onaa oya napa canijo.

³³ Oya mimishi'ama. Jamatii oya quea mimishi acaje cuaa. Oya siajje acaje cuaa jama ba'a: —Oya quea mimishi —acaje. Ojo siajje poaje. Quea mimishi nee nee de, oya acaje onijje nequi cuaa; oya quecua caje'yo pea'ai. Chama'yo tii acaje'yo”.

Jamaya yahuajo Isaiiaa tehue ca poa Jesosajo.

³⁴ Ba majje Etiopia dejjaa Penipe huohui'ajja canaje jama ba'a: —¿Ache dejjajo acuae huohui canaje Isaiiaa? ¡Huohucue mo oe! E'e pojja'a ohuaya pea dejjajo huohui ca poa. E'e pojja'a huohui ca poa ojaya emano'yoyji —acanaje Etiopia dejjaa.

³⁵ —E'e —Penipeya acanaje. Majoya ohuaya Eyacuiñajji esohui etehue'yo huohui capoquinaje quea huiso. Esohui quea pame nee Jesosajo huohui canaje.

³⁶ Majoya oya cuana poquianajo, ena huasijje poeyanaje. Jamajjeya ma Etiopia dejja jama poanaje ba'a: —¡Bacue, ena ani ba'a! Eya pea'ai Jesosa nije jjapeequije. Jamajjeya ¡besa meecue mo Eyacuiñajji jjeja nei!

³⁷ Penipeya saja'a canaje jama ba'a: —E'e, miya Jesosaja epeeji e'e jojo nei poanijo, eyaya miya besa meejje Eyacuiñajji —acanaje.

—E'e jojo nei Jesosa Quito Eyacuiñajji Bacua Ejja, Eyacuiñajji huoojea'yo ojjaña jaahuanajji. E'e de, jamaya eyaya baña —Etiopia dejjaa acanaje.

³⁸ Jamajjeya ohuaya echacojji acanaje jama ba'a: —¡Mapichi cuana nequiñacui meecue! Mapichi nequiñacui majje Penipe Etiopia dejja nije ena huasijje poquinaje. Etiopia dejja besa mee canaje Eyacuiñajji. ³⁹ Majoya Penipeya Etiopia dejja besa mee'yo majje, jjequicuaya'yo majje Edojjoshahua Pameya Penipe dojo canaje pea meshi yasiije. Etiopia dejjaja Penipe ba o'oya jjima poanaje. Jamatii oja meshi yasiije poqui'yonaje quea bihui nee nee; Jesosa nije jjapeequi'yonaje.

⁴⁰ Jjeyahua nei Edojjoshahua Pameya Penipe dojo canaje quea huesha nee esohui quea pame Jesosajo huohuiya. Asota cuiñajji yasiije anioqueñaquinaje. Majoya Asoto cuiñajji ani poqui majje quea huiso cuiñajji yasiije poquijyeya Eyacuiñajji esohui huohui canananaje. Quea huesha esohui huohuicui canaje Sesanea cuiñajji yasiije, Penipeya.

9

Sanoni Jesosa Quito nije jjapeequi'yonaje

¹ Penipeya quea huesha sohuihuohui canijo, Sanoniya Emeshi Mese nei Jesosaja epeeji cuana niñeba majamaja canaje. Quecua sa acanaje. Jamajjeya oya poquinaje joya Eyacuiñajji nije mimiani etii yasiije. ² Poe majje Sanoni onijje jama poanaje ba'a: —¡Esohui tehuecue ojjaña Jodio cuana Damasico cuiñajji ba'e yasiije, ojjaña Jodio cuanaja ebajji, equi ojee ejjachichacuijji anija ebajji! ¡Jama acue ba'a: “¡Sanoni ojjaña Jesosaja epeeji poani cuana iña meecue! ¡jeyo majje dojo meecue Jenosanena huasijje jeanobiaa, dejja, ponaponaña pea'ai!” acue! —poanaje Sanoni Jodio etii nije.

—E'e —poanaje Jodio dejja—, jamaya ejja'aqui.

³ Majoya Sanoni poquinaje Damasico huasijje Jesosaja epeeji cuana iñaa nisho. Ejiojijije poquije Damasico chipi nee yasijje nequiñaquinaje. Eyajo ejijijiyia quea ja'a neeya jeaja'a canaje Sanoni. Quea jeajahua nee nee poanaje. ⁴ Jamajjeya Sanoni meshi yasijje oquenaje. Shajja'ajja canaje pea eyajo onijje mimiani jama ba'a: —Sanoni, Sanoni! ¿Apiojji acuae ya miyaya eya napaña so'o?

⁵ —¿Ae bajjani miya? —Sanoni poanaje.

—Eya Jেসosa. Miyaya aje oe eya napaña —acanjaje Jেসosaa eyajo—, ⁶ ¡Nequisohuacue miya! ¡Poquicue Damasico huasijje! Jomajo peaa miya huohui caje miquea echacojji ma miyaya ejo quijje aje —Jেসosa poanaje.

⁷ Pea cuana Sanoni nijje poquiani nequiñaquinaje. Pea eyajo mimiani shajja'ajja canaje. Esohui ca ca oe shajja'ajja jñima. Oya cuanaja ba jñima eyajo mimiani. Jamajjeya quea mete nee poanaje. Mimimimi ajja poanaje.

⁸ Majoya Sanoni nequisohuanaje. Jjabapojja'ajjaqui'yonaje. Cojjama', de. Pea cuaa oya mepejejea canaje Damasico huasijje. ⁹ Jomajo oya nequinaje pea beca peejjima cahuime cojjama'. Eyacuiñajji nijje mimi tiitianiño ijñia'ijñia jñima poanaje Sanoni.

¹⁰ Jেসosaja epeeji Anania bajjani Damasicojo ba'enaje. Ma mecajje Eyacuiñajjiya Anania jjacahuiba meequi canaje Emeshi Mese nei Jেসosaa oya jama iyaame acanjaje ba'a: —¡Anania, shajja'ajjacue mo!

—¿Yajja? Jেসosa, miya ecuea Emeshi Mese nei. Eyaya miya shajja'ajjaña —Anania poanaje.

¹¹ Emeshi Mese neiya oya huohui canaje jama ba'a: —Anania, ¡poquicue ejiojji yasijje bajjani Ejiojji Epii Nei! ¡Jonasaja equi yasijje poquicue! Dobiñqui majje Jonasa huohui'ajjacue jama ba'a: “¿Achejo jaa Sanoni, ma yahuaño Tanaso cuiñajjiño ba'ya poa? Eya onijje mimije” acue, Anania. ¹² E'e, jjeyahua nei Sanoni enijje mimiani. Eyaya Sanoni jjacahuibaqui meenaje pea'ai jama ba'a: Miya o que poenaje. Oja sapa biajje eme' huananaje. Jamajjeya oya quea cojja ja'a po'yonaje —Jেসosaa acanjaje. Jamaya Anania jjacahuibaqui mee canaje.

¹³ Majoya Anania Jেসosa nijje jama poanaje ba'a: —Emeshi Mese nei Jেসosa, ecuea eba Sanoniya miquea epeeji cuana Jenosanenajo ba'e napa canaje quea huiso nee. Jamaya ojjaña eya huohui canaje. ¹⁴ Oya jiquiacua poeyanaje ojjaña miquea epeeji cuana iñaa Jenosanena huasijje ejeanobiajeaquijji. Jodio etiiya oya huoojea canaje, Jodio Eyacuiñajji nijje emimijji etiiya. Eya quea mete Sanonijo, de —Anania poanaje.

¹⁵ Majoya Jেসosaa Anania huoojea canaje jama ba'a: —¡Poquicue miya, Sanoni que! Oya eyaya babacanaje ecuea esohui huohuijji epo'yoyji. Ecuea esohui ohuaya huohui caje Jodio pojjeama cuana huasijje, emeshi mese cuana huasijje, ojjaña pea Jodio dejja cuana ojjaña meshjo ba'e yasijje pea'ai. ¹⁶ Ecuea esohui huohuijjiño onaaya oya quea huiso napa caje'yo. Quea nee nee poaje oya. Jamaya eyaya oya ba meeje —acanjaje Jেসosaa. Jamaya Anania jjacahuibaquinaje.

¹⁷ Majoya ecahuijaa shequi'yo majje Anania poquinaje Jonasaja equi yasijje, Sanoni jaa huasijje poquinaje. Sanonija sapa biajje eme' huana canaje Ananiaa. Jama acanjaje ba'a: —Epeeji Sanoni, esejaya Emeshi Mese nei Jেসosaa eya huoojea canaje mi que. E'e, miyaya ejiojijije poejeya Jেসosa banaje eyajo. Maaya eya huoojea canaje mi quea cojja ja'a po mee'yohua. Jেসosaa Edojjoshahua Pame mi yasijje dobiñqui mee caje'yo pea'ai —acanjaje Ananiaa.

¹⁸ Anania onijje mimianijo tii, oja sapa biajje eme huana cajo, aquiana esope jayojja Sanonija ecojjajo ani, ma o quea cojja misi po meeji poani oquequinaje. Jamajjeya quea cojja ja'a nee po o'yanaje Sanoni. Jamajjeya nequisohua'yajo, Ananiaa Sanoni Eyacuiñajjiño besa mee canaje Eyacuiñajji nijje epo'yoyji. ¹⁹ Majoya ijñia'ijñia majje Sanoni quea ca'a po'yonaje.

Sanoniya Jেসosaja esohui huohui canaje Damasicojo

Oe pojji cahuime Sanoni Jেসosaja epeeji cuana nijje nequinaje Damasicojo. ²⁰ Jodio cuanaja equi ojee ejjachichaquijji yasijje poquinaje Jেসosaja esohui huohuiya. Jama huohuime acanjaje ba'a: —Jেসosa Eyacuiñajjiña Bacua Ejja e'e jojo nei —Sanoniya acanjaje.

²¹ Jodio dejja cuana ma equijo ani oja esohui shajja'ajja majje quea mete nee nee poanaje. Jama huohuime acanjaje ba'a: —¿Apiojji acuae jiquio Sanoni mimiani Jেসosajo? Jenosanenajo ohuaya quea huiso cuana cuia canaje Jেসosa nijje mimianijojo. Oya jiquiacua poeyanaje Jেসosaja epeeji cuana iñaa. Eyacuiñajji nijje emimijji etii cuana huasijje dojo sa acanjaje, Jenosanena huasijje. Jjeya ca ca Sanoni Jেসosajo mimi majamajani. ¿Yajjajo shai ohuaya Jেসosaja esohui huohui cani?

²² Jamatii Sanoniya Jodio cuana Damasicojo ba'e sohuihuohui neinei canaje. Jama atitii canaje ba'a: —Jেসosa e'e jojo nei Eyacuiñajjiña huoojea'yo ojjaña jaahuanajji, Quito —Sanoniya acanjaje.

Sanoniya quea ja'a nee nee huohui canaje Jesosajo. Jamatii Jodio cuana onijje jjamim-icuijjeanobiqui nequinaje quea huiso. Quea quene nee poanaje: —¿Yajja acuae seya aje so'o? Jesosaja esohui huohui pajea'yo ajja. ¡Ejjacuijjeaquei'yo Sanoni! —poanaje cuana.

²³ Jamajjeya quijje pishana Jodio etii quea quene nee nee po majje jjachichaquinaje. Ojee mimimiminaje Sanoni cuia'yoyji. ²⁴ Pea cuaa ca ca Sanoni huohui canaje jama ba'a: —Jodio dejja cuaa miya quecua sa acani. Ojjaña pojajajo, mecajje pea'ai ohuaya cuiñajji esecue jiani pejjejo miya ishóa'ajja ca ani ecui'a'yoyji —acanaaje.

²⁵ Jamajjeya oe mecajje oja epeeji cuaa Sanoni quehua poqui mee ca'yonaje. E'e, cuiñajji mei jiyo ao'ao biajje oya cuana jaasohuaquinaje. Jomajo Sanoni jjepai aijo jjabioquinaje. Majoya oja epeeji cuaa oya jpapashineijje jeaoquea ca'yonaje meshi yasijje, cuiñajji secue yasijje. Majoya Sanoni Jenosanena huasijje poqui'yonaje.

²⁶ Jamajjeya Jenosanena huasijje poqui'yo majje Sanoni Jesosaja epeeji cuana nijje jjapeequi sa poanaje. Jamatii Sanoni Jesosaja epeeji pojjeama poso acanaaje cuaa. Ojo quea mete nee nee poanaje: “Eya iña ca chana” poanaje cuana. ²⁷ Majoya Jesosaja epeejiya Benabeya Sanoni dojo canaje Jesosaja huoojea'yo esohui huohuiji cuana huasijje. Oya cuana huohui canaje jama ba'a: —Epeeji cuana, ¡a'a quea mete pojji Sanonijjo! E'e, jiquio Sanoniya ejiojjijje poquijjeya Emeshi Mese nei Jesosa ba canaje. Jesosa onijje miminaje pea'ai. Majoya ohuaya Jesosaja esohui huohui neinei canaje Damasiojo nequiya —acanaaje Benabeya.

²⁸ Jamajjeya Sanoni Jesosaja huoojea'yo esohui huohuiji cuana nijje ba'enaje. Ohuaya onijjeya Jenosanenajo mete'ama huohui mee canananaje Jesosaja esohui. ²⁹ Jomajo yaninaje Jodio cuana Jienoja esohuijo mimiani. Sanoni ona nijje mimiquinaje quea huiso. Jesosaja esohui huohui canaje. Maaya mimicuijjeanobiajea sa acanaaje Sanoni. Sanoni nijje quea quene nee nee po majje oya cuijjea sa acanaaje Jesosaja esohui huohui cajo. ³⁰ Maya ba majje Sanoniya epeeji cuaa oya dojo canaje Sesanea cuiñajji yasijje. Majoya oya huoojea canaje quea huesha nee, oja cuiñajji yasijje, Tanaso huasijje bishejo.

³¹ Majoya Jodea meshijo, Janinea meshijo, Samania meshijo pea'ai pea cuana Jesosaja epeeji cuana nijje quea bei poanaje. Napa pajea canaje. Jamajjeya quea huiso nee nee Jesosa nijje jjapeequi'yonaje. Edojjoshahua Pameya oya cuana ba'e meesahua canaje. Ojjaña cuana Emeshi Mese Jesosaja esohui jayojja jama ba'enaje quea ja'a nee nee.

Peno poquinaje Nida cuiñajji yasijje, Jope cuiñajji yasijje pea'ai

³² Majoya Penó ojaña cuiñajji yasijje poquinaje Jesosaja epeeji cuana baa. Nida huasijje poquinaje Jesosaja epeeji cuana nijje jjapeequiya, esohui huohuiya pea'ai. ³³ Jomajo Penohua pea dejja ba canaje, Eneasi bajjani. Eneasi aje oe jeo'ajja. Oya ejaa jaanaje me oejeje pea beca peejjima shequaijame, 8 shequaijame. ³⁴ Jamajjeya oya ba majje Penohua huohui canaje jama ba'a: —Eneasi, Jesosaa miya jeo mee caje'yo. ¡Nequisohuacue! ¡Miquea ejaajji bebocue!

Jjeyahua nei Eneasi nequisohuanaje. Quea ja'a nee nee poanaje, de. ³⁵ Ojjaña cuaa Nidajo ba'eya, Sanohuijo ba'eya pea'ai Eneasi ba canaje jeojeo'yonaje. Jamajjeya quea huiso nee Jesosa nijje jjapeequi'yonaje.

Tabita mano'yo majje shequi o'oyanaje

³⁶ Jope cuiñajji epona tii Tabita bajjani ba'ya poa, Ese Ejja esohuijo ca ca oya Docuei bajjani. Oya Jesosaja epeeji nei. Tabitaa quea pame nee atitii canaje. Aema' cuana ba'e meesahua canaje pea'ai. ³⁷ Tabita aje quea mano poanaje. Mano'yonaje. Epeeji cuaa oya shacua ca'yonaje. Majoya jaahuana canaje eyajo jaa equecuayijji yasijje. ³⁸ Jope, Nida quea chipi nee, huesha'ama. Jamajjeya Jesosaja epeeji cuana Jopejo ba'eya shajja'ajja canaje Penó Nidajo nequi. Jamajjeya beca dejja huoojea canaje Penó que. Jama huohuime acanaaje ba'a: —Peno, ¡poecuajicue ecuana nijje Jope yasijje!

³⁹ Jamajjeya shajja'ajja majje Penohua ojaya aquiana bio canaje. Ona nijje poquinaje Jope yasijje. Jope yasijje poe'yajo ojaña cuana nijje oya sohuaquinaje eya equecuayijji yasijje Tabita baa. Ojjaña e'ahuemano cuaa pa neineianiya Penó ocuee canaje. Tabitaja soco ba mee canaje. Ojo jama huohuime acanaaje ba'a: —¡Bacue, Penó! Eshe anijo Tabitaa ecuanaja daqui eyami, daqui nei pea'ai quea huiso soco canaje. ¡Bacue ojaya esipi'yo ecuanajaya pea'ai! —acanaaje cuaa.

⁴⁰ Majoya Penohua ojjaña cuana huoojeacuayajea canaje esecue yasijje. Ecui'oshajjajo nequi majje Eyacuñajji nijje miminaje. Eyacuñajji nijje mimi majje epona emano'yojaa nijje miminaje jama ba'a: —¡Tabita, shequi'yocue! ¡Nequisohua'yocue miya!

Shequi'yo majje Tabita jjabapojjaqui'yonaje. Penó ba majje anisohuanaje. ⁴¹ Majoya Penohua Tabita me iña majje nequisohua meesahua ca'yonaje. Tabita nequisohua meesahua'yo majje Penohua Jesosaja epeeji cuana, e'ahuemano cuana pea'ai esecuejo

nequi iyaa canaje Tabita bajji. Jama acanaje ba'a: —¡Dobicue! ¡Miquea epeeji Docuei bahuacue! Shequi'yonaje, Jesosaa oya shequi mee ca'yonaje.

⁴² Ma shajja'ajja majje quea huiso nee Jopejo ba'e Jesosa nije jjapeequi'yonaje.

⁴³ Jamajjeya Peno Jopejo nequinaje quea cahui huiso. Dejjá Simono bajjani nije ba'enaje, ijjiacajji jee chacojji nije.

10

Penohua Jodio pojjeama huasijje esohui huohui canaje, Conenio huasijje

¹ E'e Teopino, eyaya, Nocaa jiquio pea esohui tehueaña miquea ebajji. Esohui e'e nei Jesosaja epeeji cuanajo tehueaña jama ba'a: Oe dejjá Conenio bajjani Sesanea cuiñajji ba'enaje. Oya Jodio pojjeama, Shomano dejjá, quea huiso nee sohuinano huoojeajji poani, ma bajjani ba'a: Itaniano sohuinano cuana. ² Jamatii Conenio quea pame nee. Ojaya huapa pojjeama cuana nije Eyacuiñajji esohui jayojja jama ba'e sa poani. E'e, ohuaya aema' cuana ba'e meesahua canaje; quea huiso aquiána quia canaje sosema'. Eyacuiñajji nije mimi majamajanaje pea'ai. ³ Oe pojajajo eshequi jjanequijeapaquajajo Eyacuiñajji Conenio jjacahuibaqui mee canaje jama ba'a: Cahuiba canaje Eyacuiñajji esohuidojojji o que poe majje onijje miminaje jama ba'a: —¡Conenio, shajja'ajjacue mo!

⁴ Esohuidojojji ba majje Conenio quea ajjajja nee jama poanaje ba'a: —¿Yajja? ¿Ae sa poani miya? ¡Huohuicue mo!

Esohuidojojji oya jama acanaje ba'a: —Eyacuiñajji miquea emimi cuana onijje shajja'ajja canaje. Miya aema' cuana huasijje aquiána quiaña sosema' ojaya eba pea'ai. Jamajjeya minijje quea bihui nee poani. ⁵ Jamajjeya ijjeja nei beca dejjá huoojeacue Jope yasijje! Jomajo oe dejjá Simohui Peno bajjani enequi. ¡Peno jjequi meecue! ⁶ Oya Peno Simonaja equijo ba'yaní, ijjiacajji jee chacojji poanija equijo. Ojaya equi bae ai sahuajo aní —acanaje Eyacuiñajji esohuidojojji. Jamaya Conenio jjacahuibaquinaje.

⁷ Majoya esohuidojojji poqui'yonaje. Conenio shequi'yonaje. Shequi'yo majje ojaya echacosahuajji beca iyaa canaje. Oe Sohuinano ojaya epeeji quea pame nee iyaa canaje, ma Eyacuiñajji nije mimiani pea'ai. ⁸ Eyacuiñajji esohuidojojji esohui onijje Conenio-hua huohui canaje. Majoya oya cuana huoojea canaje Jope yasijje.

Penohua cahuiba canaje

⁹ Jamajjeya Conenioja epeeji cuana Jope yasijje poquinaje. Pea pojajajo eshequi biacojja-ija nequijo Jope ba cañaquinaje quea chipi nee.

Peno ca ca Jopejo Simonaja equijo nequi equi jamacoo huasijje jaasohuaquinaje Eyacuiñajji nije mimiya. ¹⁰ Eshequi biacojjajja nequijo Peno quea shoe nee poanaje. Bobi ijia sa poanaje. Onaa Penoja bobi cuacua canijo, Penohua ishoa'ajja ca aninaje bobi. Majoya equi jamacoojja jaa cahuinaje. Eyacuiñajji oya jjacahuibaqui mee canaje jama ba'a: ¹¹ Esecue quea quemo jayojja ba canaje eyajo. Esecue eca'apejo nequi. Aquiána equipajaajji quea quemo jayojja ba canaje, jjapashineijje jaeoquea canaje o que, jiono eyichijjo jayojjajo. ¹² Ma equipajaajji ojaña ijjiacajji cuana, peyo cuana, ojaña cuichojji cuana pea'ai ba canaje, eshe, de. Jamaya jjacahuibaqui mee canaje pea'ai ba'a: ¹³ Eyajo Jesosa Peno nije miminaje jama ba'a: —Peno, ¡nequisohuacue! ¡Ijjiacajji cuana, peyo cuana, cuichojji cuana pea'ai quecuacue e'ijji! —poanaje.

¹⁴ Penohua ca ca jama acanaje ba'a: —Emeshi Mese Jesosa, chojja. Eya ijia sa po'yo ajja ma aquiána cuana. Peajja, de. Yahuajo ecuanaja etiuiquiana cuana esohui jayojja jama poanijo ma aquiána cuana ecuea ijia jima. Eya coma ijia sa po'yo ajja nei nei —poanaje Peno.

¹⁵ Eyajo Jesosaa Peno huohui ca o'oyanaje jama ba'a: —Eyacuiñajji ojaña bobi quea pame po mee ca'yonaje. Jamajjeya ¡a'a jama pojji ba'a: “¡Jiquio bobi peajja, coma ijia ajja ca iña” a'a pojji, Peno! —Jesosaa poanaje.

¹⁶ Jamaya Jesosaa Peno pea beca peejjima huohui'yome acanaje, oya jayojja huohui'ajja o'oyame acanaje Peno ecahuijaa. Majoya equipajaajji jjequisohua ca'yonaje eyahuasijje.

Jamaya jjacahuibaquime meeya Peno Jesosaa acanaje ejbahuejjaqui meejji jama ba'a: Jodio pojjeama cuana Jodio cuana jayojjaya Eyacuiñajji quea jee nee. Oya cuana pea'ai Jesosa nije jjapeequi meesahua caje'yo, mimishi cuijea caje'yo pea'ai.

¹⁷ Jamajjeya shequi'yo majje Peno jjashahuabaqui aninaje jama ba'a: —¿Ajeo shai iña Jesosaa jjacahuibaqui mee canaje? ¿Ae shai ohuaya eya ba mee sa acani?

Peno jamaya jjashahuabaquianijo, Conenioja echacojji cuana poeyanaje Jope yasijje. Simonaja equi sa'ajja canaje. ¹⁸ Ba majje esecue yasijje poeyanaje. Secuejo nequi taaanaje jama ba'a: —¿A'a Simohui Peno yani jiquiojo?

¹⁹⁻²⁰ Peno ma ohua cahuiba canajejo jjashahuabaquianijo, Edojjoshahua Pameya oya huoojea canaje jama ba'a: —Peno, ¡shajja'ajjacue! Pea beca peejjima dejjá poeyanaje mi

baa. ¡Jamajjeya nequisohuacue; jaaoquequicue; oya cuana baquicue esecue jjanijo nequi! ¡Onijje poquicue, Peno! ¡A'a quea mete pojji! Eyaya oya cuana huoojeanaje mi dojhua.

²¹ Jamajjeya Peno jaaoquequinaje ma dejja cuana baa. Huohui'ajja cañaquinaje jama ba'a: —E'e. ¿A'a miyaya eya sa'ajjaña? Quioya iña. ¿Apiojji acuaeya iña sa'ajjaña? ¿Ajeo acuae mi poeyanaje so'o?

²² Onaaya Peno huohui canaje jama ba'a: —Coneniohua, ma sohuinano cuana huoojeajji poaniya Sesaneajo ba'eya ecuana huoojea canaje. Ohuaya quea pame nee acani, Eyacuiñajjija esohui jayojja jama acani. Oya ojjaña Jodio cuanaja quea boti nee. Eyacuiñajjija esohuidojojji onijje miminaje jama ba'a: “¡Dejja cuana huoojeacue Jope yasijje Peno jjequiya! ¡Peno miquea equi yasijje jjequicue! ¡Penoja esohui shajja'ajja neineicue miqianaaya o poeyajo!” poanaje esohuidojojji —Conenioja epeejiya Peno acanaje.

²³ Jamajjeya Penohua oya cuana iyaa canaje esecuejo nequi: —E'e, ¡dobicue! ¡jiquiacua cahucue ecuana nijje! —poanaje. Jomajo oya cahui oe poanaje.

Peno Conenioja equi yasijje poquinaje esohui huohuiya

Mecajjehua nei shequi majje Peno poquinaje Conenioja epeeji cuana nijje Sesanea huasijje. Pea Jesosaja epeeji Jopejo ba'e poquinaje pea'ai. ²⁴ Sesaneajo ca ca Coneniohua oya cuana ishoa'ajja ca aninaje. Ojjaña ojaya huapa pojjeama cuana, ojaya epeeji cuana pea'ai iyaa canaje ojaya equi yasijje Peno ishoa'ajjaji. Jamajjeya beca cahuime po majje Penohua Sesanea ba cañaquinaje. ²⁵ Conenioja equi yasijje poeyajo, Conenio equijo ani cuayaquinaje o baa. Ecu'oshajjajo nequi majje Peno bihuia canaje, ohuaya. ²⁶ Penohua ca ca oya jama acanaje ba'a: —¡Dee! ¡Nequisohuacue oe, miya! Eya aje dejja pea'aiya, mi jayojjaya. ¡A'a jja oe eya bihuiajji! —Peno poanaje.

²⁷ Conenio nijje mimimimiqui tii Peno dobiquinaje equi yiyedojo huasijje. Eyiye dojjojo quea huiso ejjachichaguí nequi ba cañaquinaje. ²⁸ Majoya ojjaña ba majje Penohua huohui canaje jama ba'a: —¡Bacue! Yahuaajo Jodio cuaa huohui ca poa jama ba'a: “Jodio cuana, ¡a'a dobiqijji Jodio pojjeamaja equi yasijje! ¡A'a ona nijje ijja'ijjajji!” Jamaya yahuaajo nei Jodio cuana poa. Maya miqianajaya eba. Jamatii Eyacuiñajjija eya ba mee canaje jama ba'a: “¡A'a Jodio pojjeama quea tai poso ajji!” jamaya eya acanaje Eyacuiñajjija —Peno poanaje.

²⁹ —Jamajjeya miqianaaya eya iyaanajejo eya quea bihui nee poeyanaje miqiana baa. E'e. Jamajjeya ¿ae sa poani miya? ¿Apiojji acuae iña iyaanaje so'o? —Peno poanaje.

³⁰ Coneniohua Peno jama acanaje ba'a: —Peno, yahuaajo Eyacuiñajjija esohuidojojji enijje miminaje. E'e, ebeca pee pea'ai cahuime yahuaajo eshequi oya jayojja nequijo eya Eyacuiñajji nijje mimi nequinaje tii tii equijo. Eshequi jjanequijjeapaquianajo oe dejja jjanequipanaquinaje. Oja daqui quea jeajahua nee nee poanaje. ³¹ Oya enijje miminaje: “Conenio, Eyacuiñajjija miquea emimi shajja'ajja canaje. Miya aema' cuana bobiaña ba canaje pea'ai. Miya ojaya quea boti nee. ³² Jamajjeya ¡beca dejja huoojeacue Jope yasijje! ¡Dejja Simohui Peno bajjani iyaa meecue! Oya Peno pea dejja bajjani Simono nijje nequi, ¡ijjacajji jee chacojji poani nijje nequi, bae ai sahuajo ba'e nijje nequi!” jamaya eya acanaje esohuidojojjiya. ³³ Jamajjeya ma shajja'ajja majje jjeyahua nei eyaya beca dejja huoojeanaje mi jjequiya. Mi poeyajo eya quea bihui nee poanaje. Eyacuiñajjija eba ecuana quea huiso jjachichaquinaje miquea esohui shajja'ajjaa. E'e, ecuaaya Eyacuiñajjija esohui shajja'ajja sa aña. Jamajjeya ¡ojjaña Eyacuiñajjija esohui ecuana huohuicue jjeja nei, ma ohua mi huohui canaje ecuana huohuijji! —Conenio poanaje.

Penohua esohui huohui canaje Conenioja equijo

³⁴ Jamajjeya Penohua huohui canaje jama ba'a: —E'e de. Jjeja ecuea eba Eyacuiñajjija ojjaña cuana quea jea nee acani. Jodio pojjeama Jodio cuana jayojjaya jama acani e'e jojo nei, Eyacuiñajjija. ³⁵ E'e, ojjaña joya quea pame ba'yani, Eyacuiñajjija esohui jayojja jama poani pea'ai ohuaya jaahuana cana, ojjaña cuana ojjaña meshijo ba'e, ojjaña pea mimime poani pea'ai —Penohua acanaje.

³⁶ —Conenio, miquea eba Eyacuiñajjija Isaeni dejja cuana huasijje ojaya esohui quea pame nee Jesosa Quitoja huohui ca poa jama ba'a: “Emeshi Mese nei Jesosa Quito nijje jjapeequianajo, Eyacuiñajji ojjaña nijje quea bei poaje'yo, mimishi cuijea'yo majje”. Jamaya aca poa cuaa yahuaajo nei —Peno poanaje—. ³⁷ E'e Conenio, miquea eba pea'ai Huaniya, ma Eyacuiñajjijo ebesameejji poaniya huohui canaje jama ba'a: “¡Miquea mimishi pajea'yocue! ¡Eyacuiñajjijo besacue!” acanaje Huaniya. Ohuaya Jesosa besa mee canaje pea'ai. Majoya Jesosaa Janinea meshijo, ojjaña cuiñajjijo Jodioja meshijo sohuihuohui canaje; quea pame nee acanaje pea'ai. ³⁸ Jama poanaje ba'a: Eyacuiñajjija Jesosa Nasanenajo ba'e que Edojoshahua Pame huoojea canaje, dobiqui mee ca'yonaje. Jesosa quea ca'a nee nee po mee canaje. Ma dejjaa ajjima acani quea huiso nee quea pame nee nee ameesahua canaje. Jesosaa poquijeya quea huiso nee nee emanojaa cuana huaquía mee ca'yonaje.

Eshahua cuana dejjajo nequi huoojeacuayajea mee ca'yonaje Jesosaa Eyacuiñajji nijjeya —Penohua acanaje—. ³⁹ E'e Conenio, Jesosaa quea pame nee acani ecuaaya, ojaya epeeji cuaa banaje. Onijje poquinaje ojjaña Jodio meshi yasijje, Jenosanena huasijje pea'ai. Jamatii pea cuaa Jesosa quea mimishi aca'yonaje. Acui ecueata'apeejo ba'ehuanasohuajea ca'yonaje emano'yojji. ⁴⁰ Jamatii Jesosa mano'yajjo, pea beca peejjima cahuime epo jaa Eyacuiñajjiya oya shequi mee ca o'yanaje. Majoya Eyacuiñajjiya oya ecuaana huasijje huoojea ca o'yanaje. E'e, ecuaaya oya banaje eshe o'oya. ⁴¹ Ojjaña dejja cuanaja oya ba o'oya jjima. Ecuanaaya, ma Eyacuiñajjiya yahuajo babaca ca poaa oja esohui huohuijji poaniya ca ca oe ecuaanaaya Jesosa ba o'yanaje. Shequi o'oya majje oya ecuaana nijje ijjiia'ijjianaje, ena ishi canaje pea'ai. ⁴² Majoya ohuaya ecuaana huoojea canaje ojaya esohui huohuiya ojjaña cuana huasijje. Jama huohuime aña ba'a: "Quijje Eyacuiñajjiya Jesosa huoojea caje o'oya. Jesosaa poe o'oya majje ojjaña sosequia caje'yo ma eseya mano'yo pe'a' ai ohuaya sosequia caje'yo ma eseya mano'yo jjimahuaya aninaje poa sosejje. Ojjaña joya quea pame ba'ya poa quea bihui nee ba'e tiitii mee caje'yo eyajo onijje. Mimishi cuana ca ca quea nee nee po mee caje'yo tii tii. ⁴³ E'e Conenio, yahuajo nei nei Jesosa poe jjimahuajo Eyacuiñajjiya esohui huohuijji cuaa Jesosajo huohui ca poa jama ba'a:

"Oya quea pame nee nee, quea ca'a nee nee poanijo, ojjaña joya onijje jjapeequiani Eyacuiñajjiya mimishi cuijea caje'yo. Jamajjeya oya cuana cuaqui yasijje poqui'yo ajja mano'yo majje".

Jamaya yahuajo nei Jesosajo tehue ca poa cuaa —jamaya Penohua esohui huohui canaje. Ojjaña cuaa Conenioja equijo nequiya shajja'ajja canaje.

Edojjoshahua Pame Jodio pojjeama huasijje dobiqiu'yonaje

⁴⁴ Penohua sohuihuohui canijo tii, Edojjoshahua Pame Conenio que, ojaya epeeji cuana que pea'ai dobiqiu'yonaje, ma Penohua sohuihuohui cani yasijje. ⁴⁵ E'e, Eyacuiñajjiya Edojjoshahua Pame huoojea ca'yonaje Jodio pojjeama cuana huasijje. Ma ba majje Jodio cuana Peno nijje nequi jjajjasoaquinaje: —E'e de, Eyacuiñajjiya Edojjoshahua Pame huoojea ca'yonaje Jodio pojjeama huasijje pea'ai —poanaje Jodio cuana ma Peno nijje poquinaje.

⁴⁶ E'e, Jodio cuaa Conenio shajja'ajja canaje Eyacuiñajji bihuia cani, de, pea mimi'yome poanaje pea'ai. ⁴⁷ Jamajjeya Penohua jama acanaje ba'a: —Yahuajo Eyacuiñajjiya Edojjoshahua Pame ecuaana huasijje huoojea canaje jayojja jama jjeya ohuaya Edojjoshahua Pame jiquio dejja cuana huasijje huoojea canaje pea'ai. Jamajjeya ecuaanaaya oya cuana Eyacuiñajjiyo cabesa mee'yahua ena huasijje, ¿a'a e'e? —Penohua acanaje.

⁴⁸ Jamajjeya Penohua pea cuana huoojea canaje Jesosa Quitoja epeeji ma jjeya nei onijje jjapeequinaje besa meeya Eyacuiñajjiyo. Majoya Conenio, oja epeeji cuana pea'ai miminaje Peno nijje. Jama poanaje ba'a: —Peno, ¡che ecuaana nijje nequicue, esohui ba meesahuacue! —acanaje.

Jamajjeya Peno onijje nequinaje. Majoya quijje pishana Peno poqui'yonaje Jenosanena huasijje.

11

Penohua Jesosaja epeeji cuana Jenosanenajo ba'e huohui canaje Coneniojo, Jodio pojjeamajo

¹ Jamajjeya Jesosaja huoojea'yo esohui huohuijji cuaa, ojjaña Jesosaja epeeji cuaa Jodea meshijo ba'eya pea'ai shajja'ajja canaje Coneniojo. Ojjaña jama acanaje ba'a: —Jodio pojjeama cuaa pea'ai Eyacuiñajjiya esohui shajja'ajja ca'yonaje; jamaya aca'yonaje quea bihui nee, de —acanaje cuaa.

²⁻³ Jamajjeya Peno Jenosanena huasijje poqui o'oyajo, beca Jodio cuana onijje mimijajinaje jama ba'a: —Peno, ¿apiojji miya Jodio pojjeama cuanaja equi yasijje dobiquinaje so'o? E'e, miya ca ca oe Jodio pojjeama cuana nijje ijjiia'ijjianaje pea'ai. ¿Apiojji? Jamaya pojjeama esejaya etiiquianaja esohui. Oya cuanaja cuiishasha biso nei ejehuissejjajea'yo pojjeamajo oya peajja, de —poanaje Jodio cuana.

⁴ Jamajjeya Penohua oya cuana huohui canaje ojjaña joya Eyacuiñajjiya Jodio pojjeama cuanajo acanaje. ⁵ Jama acanaje ba'a: —Ecuea epeeji cuana, eya Jopejo nequi Eyacuiñajji nijje mimi aninaje. Eyacuiñajjiya eya jjacahuibaqui mee canaje jama ba'a: Ijjiacajji cuana aquiana cuana quibi jayojjajo iya majje jeaoquea canaje e que, jjonajo. ⁶ Ma quibi dojjojo eyaya banaje ojjaña ijjiacajji cuana, peyo cuana, ojjaña cuichoiji cuana pea'ai. ⁷ Eya jjacahuibaqui mee canaje jama ba'a: Eyajo Jesosa enijje miminaje jama ba'a: "Peno, ¡nequisahuacue! ¡ijjiacajji cuana, peyo cuana, cuichoiji cuana pea'ai quecuacue e'ijjiajji!" acanaje. ⁸ Jamatii eyaya saja'anaje jama ba'a: "Jesosa, chojja, eya ijjiia sa po ajja ma aquiana

cuana. Peajja, de. Yahuaajo ecuanaja etiiquiiana cuanaja esohui jayojja jama poanijo ma aquiana cuana ecuea ijija jjima” eya poanaje. ⁹ Majoya Jesosa enijje mimi o'oyanaje: “Eyacuiñajjiya ojjaña aquiana cuana quea pame nee po mee ca'yonaje. Jamajjeya ja'a miya jama pojji ba'a: —¡Iiquio aquiana cuana peajja, coma ijija ajja ca iña! —a'a pojji, Peno!” acanaje Jesosaa eya ecahuujaa. ¹⁰ Jamaya eya huohui huicha'a huicha'a canaje, pea beca peejjima huohuime acanaje. Majoya ojjaña jjequisohua ca'yonaje eyahuasijje.

¹¹ —Majoya pea beca peejjima dejja ecuea equi yasijje poeyanaje. Oya cuana Sesaneajo ba'e o chacomeejjiya huoojea canaje e dojhua. ¹² Edojjoshahua Pame enijje miminaje jama ba'a: “¡Ona nijje poquicue mete'ama!” Jamajjeya eya poquinaje Sesanea huasijje. ¡Iiquio Jesosaja epeeji me oeije oe huisome enijje nequi poquinaje pea'ai enijje. Ecuaana Conenio equi yasijje dobiquinaje. ¹³ Majoya Coneniohua ecuaana huohui canaje jama ba'a: “Eyacuiñajjiya esohuidojojji ecuea equijo jjanequipanaquinaje. Enijje miminaje. Jama poanaje ba'a: —¡Beca dejja huoojeacue Jope yasijje Simohui Peno jjequiya! ¹⁴ Ohuaya miqianaya sohuihuohui caje. ¡Ojaya esohui jama acue! Jamajoya Eyacuiñajjiya miqianajaya mimishi cuana cuijea caje'yo; onijje ba'e tiiti mee caje'yo eyajo miya, miquea huapa pojjeama cuana pea'ai —eya acanaje esohuidojojjiya” jamaya Coneniohua eya huohui canaje —Peno poanaje—. ¹⁵ Eya Conenio sohuihuohui'anijo tii Edojjoshahua Pame ojjaña cuana huasijje dobiq'yonaje. E'e, ma ecua eseya yahuaajo acanaje jayojja jama oya cuana acay'yonaje. ¹⁶ Majoya eyaya niñeba'yonaje esejaya Emeshi Mese nei Jesosaja esohui yahuaajo jama ba'a: “Ena huasijje ca ca oe Huaniya miqianaya besa mee canaje Eyacuiñajjiyo. Quijje ca ca eyaya miqianaya que Edojjoshahua Pame dobiq' mееje'yo Eyacuiñajji niije epo'yojji tii tii” poanaje Jesosa yahuaajo —Penuha acanaje—. ¹⁷ E'e, Jesosa Quito nijje japeequianijo, Eyacuiñajjiya Edojjoshahua Pame huoojea canaje ese que. Oya jayojjaya jjeja Jesosa Quito nijje japeequianijo, Eyacuiñajjiya Jodio pojjeama cuana huasijje Edojjoshahua Pame huoojea ca'yonaje pea'ai. Eyacuiñajjiya quea pame nee nei acani tii tii. Jamajjeya eya ca iña Eyacuiñajji huoojea'yojji pojjeama. Eyaya oya huohui'yo ajja jama ba'a: “¡A'a Jodio pojjeama huasijje Edojjoshahua Pame huoojea'yojji!” Chojja, jamaya eyaya Eyacuiñajji huohui ajja, de. Eya Eyacuiñajjiya echacojji, de, ojaya esohui jayojja jama aña eyaya —Peno poanaje.

¹⁸ Jamajjeya Penoja esohui shajja'ajja majje Jodio cuana Peno nijje mimijaji pajea'yonaje; Eyacuiñajji bihuia ca'yonaje jama ba'a: —E'e, jamajjeya Eyacuiñajjiya Jodio pojjeama cuana mimishi pajea meesahua cani. Jesosa nijje japeequi meesahua cani pea'ai. Jodio pojjeama cuanaja mimishi cuana cuijea'yo majje oya cuana ba'e tiiti mee caje'yo eyajo onijje pea'ai —poanaje ojjaña cuana.

Jesosaja epeeji cuana Atioquia cuiñajjiyo ba'e

¹⁹ E'e, yahuaajo Jodio etii cuaa Jesosaja epeeji Estema sapa jajahuejjajea'yo majje ojjaña Jesosaja epeeji cuana napa majamaja canaje pea'ai. Jamajjeya ojjaña Jesosaja epeeji cuana quea huiso meshi yasijje quehua poquinaje quea mete jjejojo. Beca cuana quea huesha nee poquinaje Penisia meshi yasijje, Atioquia cuiñajji yasijje pea'ai. Pea cuana Chipe nasi yasijje besapoquinaje bishejo. Poquijeya Eyacuiñajjiya esohui huohui capoquinaje Jodio cuana huasijje. Jodio pojjeama cuana huasijje ca ca Jesosaja esohui huohui jjima acapoquinaje. ²⁰ Majoya Jesosaja epeeji Chipe nasijo ba'e, Sinene meshijo ba'e pea'ai poquinaje Atioquia cuiñajji yasijje. Jomajo ohuaya Jodio pojjeama cuana huasijje pea'ai Eyacuiñajjiya esohui quea pame nee Jesosajo huohui canaje. ²¹ Emeshi Mese nei Jesosaa oya cuana esohui huohui meesahua canaje. Jamajjeya quea huiso cuana Jesosaja esohui shajja'ajja majje onijje japeequi'yonaje, quea huiso nee nei. ²² Ma shajja'ajja majje Jesosaja epeeji Jenosanenajo ba'eya Jesosaja epeeji etii Benabe bajjani huoojea canaje Atioquia huasijje Jesosaja epeeji cuana baa. ²³ Atioquia huasijje poe majje Benabeya ba cañaquinaje Eyacuiñajjiya Jodio pojjeama quea jea nee acanaje e'e jojo nei. Jamajjeya Benabe quea bihui nee poanaje. Jesosaja epeeji eyacua cuana jama huohuime acanaje ba'a: —E'e, jamaya. ¡Eyacuiñajjiya esohui jayojja jama atititice! ¡A'a oya pajea'yojji! ¡Onijje japee tiitiqicue!

²⁴ Benabe Jesosaja epeeji quea pame nee. Edojjoshahua Pameja ejjashahuabaquijji jayojja jama acanaje tii. Jesosaja esohui jayojja jama atititi canaje. Jamajjeya quea huiso cuana Emeshi Mese nei Jesosaja epeeji poanaje Benabeja esohui shajja'ajja majje.

²⁵ Majoya Benabe poqui'yonaje Tanaso cuiñajji yasijje Sanoni sa'ajja'yohua. ²⁶ Ba majje ohuaya Sanoni jjequi canaje Atioquia huasijje onijje esohui huohuijji. Jomajo Atioquiajo oya cuana nequi'yonaje Jesosaja epeeji cuana nijje oe shequiame. Quea huiso nee nei Jesosaja esohui huohui majamaja canaje jomajo. Majoya Atioquiajo pea cuaa Jesosaja epeeji cuana bajjani canaje Quitoja epeeji, Quitiano cuana bajjani acanaje.

²⁷ Majoya pea Jesosaja esohui huohuijji cuana Jenosanenajo ba'e poquinaje Atioquia huasijje. ²⁸ Majoya ojjaña Jesosaja esohui shajja'ajjaa jjachichaquinaje. Oe esohui huohuijji Ajamo bajjani nequisohuanaje. Eyacuiñajjija Edojjoshahua Pameya oya huohui meesahua canaje. Jamajjeya Ajamohua huohui canaje jama ba'a: —Quijje pishana ojjaña meshijo ojjaña cuana quea shoe nee nee poaje'yo. Bobi chama' poaje'yo —jamaya ojjaña acanaje, Ajamohua. (Quijje pishana pea shequiaja po majje e'e jojo nei jamaya poanaje. Bobi chama' poanaje. Quea huiso nee quea shoe nee nee poanaje Shomano dejja Canio bajjani emeshi mese nequijjo.)

²⁹ Jamajjeya Ajamoja esohui shajja'ajja majje Jesosaja epeeji cuaa huohui canaje jama ba'a: —E'e, ecuaaya Jesosaja epeeji cuana huasijje Jodea meshijo ba'e yasijje bejjo huoojeaje o ba'esahuajji —poanaje.

Jamajjeya aquiana cuana, bejjo pea'ai chicha canaje. Beca cuaa oe pojji quia canaje. Pea cuaa joya quea aquiana huiso neeya quea huiso bejjo quia canaje. ³⁰ Jamajjeya quijje quea huiso bejjo chicha majje huoojea canaje Benabe nijje, Sanoni pea'ai nijje. E'e, ohuaya bejjo dojo canaje Eyacuiñajjija epeeji etii yasijje equia'yojji ojjaña Jesosaja epeeji cuana huasijje.

12

Jacobo jaja ca'yonaje

¹ Ecuea epeeji Teopino, eyaya, Nocaa pea esohui tehueaña Jesosaja epeeji cuanajo jama ba'a: Pea Enode emeshi mese nequinaje. Ohuaya Jesosaja epeeji cuana napa ca'yonaje quea huiso. ² Huanija echahua mese Jacobo sapa jajasejjajea mee ca'yonaje baa aiya, de Enodeya. ³ Jodio etii cuana quea bihui nee poanaje Jacobo quecua ca'yajo. Ma ba majjeya Enodeya huohui cajo Peno iña canaje pea'ai. Dojo canaje jeanobiaa, quijje equecua'yojji. Jamaya poanaje ojjaña Jodio cuana jjachichaquinaje pahui shejee mee jjima e'ijjiajji, quea bihui epojji. ⁴ E'e, ma shejo Enodeya Peno equi ejjajeanobiaquijji yasijje jeanobia canaje. Sohuinano quea huishohua Peno jaahuana mee canaje. Enodeya Peno jaja mee sa acanaje quijje, ojjaña Jodio cuana pahui shejee jjima ijja majje. ⁵ Jamajjeya Sohuinano cuaa Peno jaahuana neinei canaje ejoyo'yo jaa. Jamatii Jesosaja epeeji cuana Eyacuiñajji nijje mimi tiitiinaje Penajo: —Eyacuiñajji, ¡Peno jaahuanacue! ¡A'a quecua mee'yojji! —amajamaja canaje epojjajo, mecajje pea'ai.

Peno ejeanobia jaa esecue yasijje dojoycuayaqui ca'yonaje esohuidojojjiya

⁶ Majoya Enodeya Peno ejejequicuayaqui'yojji nisho acanaje mecahuajje ejaajaja'yojji nisho. Peno ca ca cahuijaanaje beca sohuinano yiyesama neijo. Baa jjonajo jeyo jaanaje. Pea sohuinano cuaa ejjajeanobiaquijji esecuejo nequiya oya jaahuana neinei'ajja canaje. ⁷ Mecashono Eyacuiñajjija esohuidojojji poquinaje Peno que. Ma equecuayijji jeaja'a cañaquinaje. Ohuaya Peno cuiapashi cañaquinaje eshequijji. Jama acanaje ba'a: —¡Peno, shequicue! ¡Nequisohua cuajicue, miya!

Jamajjeya baa jono emejo ba'e jpapichoqui mee ca'yonaje, oquequi mee ca'yonaje meshi yasijje. ⁸ Majoya esohuidojojjiya Peno jama acanaje ba'a: —¡Daqui huoshocue! ¡Ejiojji shejee huoshocue pea'ai! —jamaya Peno acanaje esohuidojojjiya. Jamaya poanaje Peno. Majoya ohuaya Peno huohui ca o'oyanaje: —¡Miquea equipajaajji bebocue! ¡E quishishijji poecue! —poanaje.

⁹ Jamajjeya Peno Eyacuiñajjija esohuidojojji quishishi poquinaje. Jamatii jjacahuabaquiani poso Peno poanaje ba'a: —E'e de, eya jjacahuabaquiani. E'e pojja'a esohuidojojji chama', de —Peno poanaje.

¹⁰ Jamatii Penohua esohuidojojji quishishijji cuayaquijeya ebionei sohuinano epi nequi yeje canananaje. Jamatii ojaya Peno, esohuidojojji pea'ai ba jjima poanaje. Mama pishana nequi pea ba canana o'oyanaje sohuinano. Yeje canana o'oyanaje. Ba jjima poanaje Peno, esohuidojojji pea'ai sohuinanoja. Poquinaje baa cui esecue quea quemmo huasijje. O poe'yajo jamatii jjacapejoquinaje. Esecue jjani yasijje cuayaqui'yonaje. Cuama pishana dojo majje esohuidojojjiya Peno jea cana'yonaje, ejiojji. ¹¹ Majoya Peno jashahuabaquinaje: ¿A'a mo eshe, a'a mo jjacahuabaquiani pojjeama, de? Jjeya ecuea eba Emeshi Mese nei Jesosaa huoojea canaje ojaya esohuidojojji e dojoycuayaqui'yohua. Mecahuajje Enodeya eya jaja ca'yo queaye poanaje. Jodio dejja cuaa e quecua'yojji nisho ishoa'ajja canaje pea'ai —Peno poanaje.

¹² Majoya ma shahuaba majje Peno poqui'yonaje Maniaja equi yasijje, Huani Mascosaja enaseja equi yasijje. Joma equijo quea huiso Jesosaja epeeji cuana jjachichaqui majje mimi aninaje Eyacuiñajji nijje, Peno jaahuana meejji. ¹³ Penohua esecue jjani cuiaqueya cañaquinaje, epeeji esecue jjani. Oe epona ahueama' ani Shona bajjani poeyanaje aya esecue jjani cuiaqueya cani baa. ¹⁴ Ohuaya Penoja esohui shajja'ajja canaje. Jjashahuabaquinaje: —E'e ee, Peno cuayaqui'yonaje.

Bihui majje esecue jjani pajea canananaje. Peno esecuejo tii nequi jea canananaje epona sho'ya, de. Cuajicuajinananae equijo ani cuana huohuiya. ¹⁵ Jamatii equijo ani cuaa Shona jama saja'ame acanaje ba'a: —Chojja, Shona. ¿A'a jja mi niñepoquiiani?

—E'e jojo nei ca ca iña poani —poanaje Shona.

Jamajjeya ojjaña jama saja'ame acanaje ba'a: —E'e pojja'a esohuidojojji Peno jaahuanajji ca ca coma poeyanaje.

¹⁶ Penohua ca ca esecue cuiaqueya canequinaje, iyaa'iyaa nequinaje. Equijo nequi cuaa esecue ca'apejo'yo majje ba canaje Peno nequi. Quea bihui nee nee po'yo majje soa neinei'yonaje. ¹⁷ Jamajjeya Penohua eme' sisi ecuasajo huana canaje: —¡A'a pa jjaja oe mimijji! —poanaje.

Ojjaña mimima'yo nequi ca'yonaje. Majoya Penohua oya cuana huohui canaje: —Emeshi Mese neiya Jesosaa eya ejeanobia jaa esecue yasijje jjequiuiyaa meequi ca'yonaje esohuidojojjiya.

Majoya huohui canaje pea'ai Penohua: —¡Ojjaña Jesosaja epeeji cuana huohuiquicue! ¡Satiaco Apeoja bacua eija pea'ai huohuiquicue!

Majoya Peno quehua poquicuajinaje pea meshi yasijje. ¹⁸ Mecajjeahua sohuinano cuaa chama' Peno ba canaje ejjajeandobiacuajijji. Ejjoco oe jaa ba canaje. Chama'. Ba majje oya cuana quea mete nee nee po'yonaje. Miminaanaa nequi'yonaje. ¹⁹ Emeshi Mese Enodeya pea huoojea canaje Peno jjequiya nisho ejajajea'yojji nisho. Peno chama' ba majje Enode quea mase nee nee poanaje. Sohuinano cuana ma Peno jaahuanajji cuana 'ya canaje. Huohui'ajja canaje: —¿A'a mi oe cahuijaanaje? —cahuijaa poso Enodeya acanaje.

Majoya Enodeya huoojea canaje ma sohuinano cuana quecuajea'yohua. Chama'yo tii acanaje.

Majoya Enode Jodea meshijo nequi Sesanea huasijje poquinaje. Jomajo nequi titi'yonaje.

Enode, Jesosaja epeeji cuia'yojji epo mano'yonaje

²⁰ Majoya emeshi mese Enode quea quene nee nee poanaje Tino cuiñajji ba'e cuana nijje, Sinono cuiñajji ba'e cuana nijje pea'ai. Jamajjeya oya cuana Enode nijje jjapeequi o'oya sa poanaje. Ojee poquinaje Enode baa. Ebionei Basito ba cañaquinaje, Enodeja echacojji, oja aquiana cuana jaahuanajji. Bejjo quia cajje Basito quea bihui poanaje ona nijje. Majoya pea bejjo sosejje Basito Enode nijje miminaje: —Dejja cuana Tinojo ba'e, Sinonojo ba'e pea'ai minijje jjapeequi o'oya sa poani. ¡Che oe onijje mimicue! —acanaje Basitohua.

Tinojo, Sinono meshijo pea'ai chama' bobi. Jamajjeya Enodeja bobi sa poanaje quea huiso. Jamajoya Enode quea bihui po mee sa acanaje onijje.

²¹ Majoya Enodeya ojjaña dejja cuana iyaa canaje oja sohui shajja'ajajji. Ojjaña nijje mimi jjimahuajo Enodeya daqui quea nahue nee huosho canaje, emeshi meseja ehusho-ji. Ojaya e'anioquejji quea quemojo anioquenaje. Majoya Enodeya ojjaña cuana quea huiso huohui canaje. ²² Ojjaña jomajo nequi oja sohui shajja'ajja majje oya bihuia canaje jama ba'a: —Emeshi mese Enode, miya Eyacuiñajji. Miya dejja jayojja jama mimime pojjeama poani —jamajoya Enode bihuia canaje ojjaña.

—E'e, jamaya —Enode poanaje, de.

²³ Jamajjeya jjeyahua nei Eyacuiñajji esohuidojojjiya Enode quea mano nee nee po mee caje'yo pea cuana Eyacuiñajji bihuia mee jjima jojoya, jama ajjima jojoya Enodeja ba'a: —¡Eyacuiñajjiya oe bihuiaque! ¡A'a eya bihuiajji! —po jjima jojoya oya sosohua ijia ca'yajje quea mano nee po'yonaje. Mano'yonaje Enode, de.

²⁴ Majoya Jesosaja epeeji cuaa esohui quea pame nee Jesosaja huohui canaje quea huiso meshi yasijje. Quea huiso cuaa shajja'ajja canaje. Jesosa nijje jjapeequinaje quea bihui nee.

²⁵ Majoya Benabe, Sanoni pea'ai Jenosanena huasijje poeyanaje. Jesosaja epeeji cuana Jenosanenajo ba'e cuana bejjo quia canaje, ma Jesosaja epeeji cuana Atioquiao ba'eya huoojea canaje. Bejjo quia'yo majje Benabe Sanoni nijje huacuaya poqui o'oyanaje Atioquia huasijje. Ohuaya Huani Macoso dojo canaje onijje.

13

Benabe, Sanoni pea'ai huoojea canaje pea meshi cuana huasijje Jesosaja esohui huohuiya

¹ Jesosaja epeeji cuana quea huiso nee nee poanaje Atioquiao. Jomajo Eyacuiñajji esohui huohuijji, Eyacuiñajji esohui ba meesahuajji pea'ai yaninaje: Benabe, Sanoni, Simoni Ese Ejjaja esohuijo Dejja Tehue bajjani, Nosio ma Sinene cuiñajji ba'ya poa, emeshi mese Enodeja edoe mese Manaeni pea'ai. Mahuiso. ² Oya cuana Eyacuiñajji bihuia po'aninaje. Eyacuiñajji bihuia canijo bobi ijia ajja aninaje. Jama poanijo Edojjoshahua

Pameya oya cuana huohui canaje jama ba'a: —Eyaya Benabe, Sanoni pea'ai babacanae ecuea esohui huohuijji epojji. Jamajjeya ioya cuana huoojeacue ecue esohui huohuiya!

³ Majoya oya cuanaa ijia'ijjia ajja po majje, Eyacuiñajji nijje mimi majje pea'ai eme' huana canaje Sanoni sapa biajje, Benabe sapa biajje pea'ai. Jama acanaje ba'a: —Ecuaya miqúanaya huoojeaña pea meshi cuana huasijje Eyacuiñajjia esohui huohuiya —acanaje.

Chipe nasijo Jesosaja esohui huohui canaje

⁴ Majoya Edojjoshahua Pameya Benabe, Sanoni pea'ai huoojea canaje esohui huohuiya. Senesia huasijje poqui majje bishe ai yasijje nequisohuaquinaje Chipe nasi ai yasijje ebesapoquijji. ⁵ Majoya oya cuana Sanamina cuiñajji yasijje ba'eñaquinaje Chipe nasi yasijje. Eyacuiñajjia esohui huohui canananaje Jodio cuana huasijje, Jodioja equi ojee ejjachichaquijji cuanajo nequiya. Huani Macosohua oya cuana chacosahua canaje.

⁶ Majoya Chipe nasi ojje miji yasijje poquinaje ejiojjijje Papos cuiñajji yasijje. Jomajo Jodio dejja ba canaje Banajesosa bajjani. Oya Eyacuiñajjia esohui huohuijji nisho, eyamiquecua poanaje oya. Jamajjeya Enimase bajjani acanaje cuaa. ⁷ Oya emeshi mese Senio Paono nijje jjapeequinaje. Emeshi mese Senio Paono quea jjashahuabaqui ja'a nee nee, quea huiso nee ojaya eba. Oya Eyacuiñajjia sohui shajja'ajja sa poanaje. Jamajjeya Benabe Sanoni pea'ai iyaa canaje. ⁸ Jamatii eyamiquecua jjamimicuijje nobiajeaquinaje Sanoni nijje, Benabe nijje pea'ai. Emeshi mese Senio Paono Eyacuiñajjia esohui shajja'ajja mee jjima canaje: —¡A'a shajja'ajjaji Pabaja esohui Jesosajo! Dasia cani mi coma —eyamiquecua acanaje.

⁹ Pea esohuijo Sanonija bajjani Pabo. Edojjoshahua Pame onijje nequi tiitiinaje. Jamajjeya Pabohua mete'ama eyamiquecua cojja ba neinei canaje. ¹⁰ Jama tecueame acanaje ba'a: —Eyamiquecua, miya ca mi ca oe edosisuanaja bacua. Ojjaña quea pame nee ba'e miquea boti'ama. ¡A'a mimisho'l pojji Jesosajo miya! Ejjadasiaquijji miya de, quea mimishi. Eyacuiñajjia esohui quea quehua po mee sa aña tii miyaya —Pabohua acanaje—.

¹¹ Jamajjeya jjeyahua nei Eyacuiñajjia miya cojjama' po mee caje'yo quea huiso cahuime —Pabohua acanaje.

Jjeyahua nei eyamiquecua cojjama' poaje'yo. Quea cojja misi nee nee. Taaanaje jama ba'a: —Cojjama' mo po mee ca'yonaje Jesosaa. ¡Emejo mo che dojocue quiaa! ¡Me pejejeacue mo oe! —poanaje eyamiquecua.

¹² Ma ba majje emeshi mese Senio Paono quea mete poanaje. Jesosaja esohui shajja'ajja canaje. Jesosa nijje jjapeequi'yonaje, emeshi mese Senio Paono, de.

Pabohua Benabe nijjeya Atioquia huasijje Pisinia meshi yasijje esohui huohuiqui canaje

¹³ Majoya Pabo ojaya epeeji cuana nijje bishe ai yasijje nequisohuaqui o'oyanaje. Panipinia meshi yasijje besapoquinaje, Pene cuiñajji yasijje. Ba'eñaqui majje Huani Macosohua Pabo, Benabe pea'ai jiña ca'yonaje. Poqui'yonaje Jenosanena huasijje oe nei.

¹⁴ Majoya Pabo Benabe nijje poquinaje Atioquia huasijje, pea Atioquia Pisinia meshijo nequi. Epojja ejomishocajjijo Jodioja equi ojee ejjachichaquijji yasijje poquinaje. Dobiqum majje anioquenaje. ¹⁵ Jodioja equi ojee ejjachichaquijji mese cuaa Moisesija esohui etehue'yo huohui canaje. Eyacuiñajjia esohui huohuijji esohui yahuaajo nei nei etehue'yo huohui canaje pea'ai. Majoya oya cuaa Pabo, Benabe pea'ai huohui'ajja canaje jama ba'a: —Epeeji cuana, e'e pojja'a miquea esohui yani ojjaña quea pame nee eba'e meesahuajji. ¡Jjeyahua nei huohucue! —acanaje.

¹⁶ Jamajjeya Pabohua nequisohua majje eme' jeasohua canaje. Jama acanaje ba'a: —Jodio cuana, Jodio pojjeama cuana pea'ai miqúanaya Eyacuiñajjia esohui shajja'ajjaji poani. ¡Jamajjeya shajja'ajjacue mo! ¹⁷ Yahuaajo nei Eyacuiñajjia esejaya etiiquiana babaca ca poa ojaya epeeji epojji. Majoya Ejito meshijo ba'e oya cuana jaahuana ca poa. Quea huiso, quea ca'a pea'ai po mee ca'ya poa. Oya cuana Ejito meshijo ba'e dojocuaquai ca poa pea meshi yasijje epoqui'yojji. Quea huiso ma dejjaja ba jjima aca poa. ¹⁸ Meshi jabojo, dejjamajo Eyacuiñajjia oya cuana jaahuana ca poa quea huiso shequijame, 40 shequijame. Oya cuana quea mimishi, shajjama' poa. Jamatii ojaya oya cuana cajaa ajjima poa. ¹⁹ Majoya ohuaya pea emeshi mese cuana me oejje beca huismo, 7 huismo, pea emimi'yo cuana Canaani meshijo ba'e jeabichajee ca'ya poa. E'e, Eyacuiñajjia ojjaña ma dejja pea esohuijo mimiani cuana chama'yo tii po mee ca'ya poa quea mimishijojo. Jiquio Canaani meshi Eyacuiñajjia quia ca poa esejaya etiiquiana cuana ba'ejji. ²⁰ Canaani meshijo esejaya etiiquiana cuana ba'ya poa quea huiso nee nee shequijame, 450 shequijame. Majoya Eyacuiñajjia Jodio dejja huoojeajji pea nequi mee, pea nequi mee aca poquia poa Jodio cuana quea pame nee ba'e mee'yojji. Jamaya poanaje Eyacuiñajjia esohui huohuijji Samoeni ba'e jjimahuajo. Majoya Samoeni mano'yaajo, chama' pea Jodio dejja huoojeajji poa. ²¹ Majoya esejaya etiiquiana cuana emeshi mese sa poa. Eyacuiñajji nijje mimi ca poa jama ba'a: “¡Emeshi mese nequi meecue ecuanajaya!” aca poa.

—Jamajjeya aje Eyacuiñajjiya Sisija bacua ejja Sao nequi mee ca poa Jodioja emeshi mese. Saoja etiiquiana Bejami' bajjani poa. Sao quea huiso shequiajame nequia poa Jodio cuanaja emeshi mese, 40 shequiajame. ²² Majoya emeshi mese Sao quea mimishi po majje mano'ya poa. Majoya Eyacuiñajjiya Dabi emeshi mese po mee ca'ya poa. Dabijo mimia poa jama ba'a:

“Isaija bacua Dabi ecuea eba. Oya quea pame nee nee. Ecuea ehuhui'yo jayojja jama acani. Ecuea ejjashahuabaqui'yojji jayojja jama jashahuabaquiiani pea'ai, Dabi”.

Jamaya yahuajo nei nei Dabijo mimia poa.

²³ —Dabi Jesosaja etiiquiana poa. Yahuajo Eyacuiñajjiya Jesosajo huohui ca poa jama ba'a:

“Eyaya ojjaña jaahuanajji Quito huojeaje. Ohuaya Isaeni cuanaja mimishi cuijea'yo majje ba'e tiitii mee caje'yo eyajo onijje”.

Jamaya huohuime aca poa Eyacuiñajjiya Jesosajo.

²⁴ —Jesosa poe jimahuaajo Huaniya ma ona besameejji poaniya ojjaña cuana huohui canaje jama ba'a: “¡Miquea mimishi cuana pajea'yocue! ¡Eyacuiñajjiyo oe besacue, enajo!” jamaya Huaniya ojjaña Jodio cuana huohui canaje. ²⁵ E'e, Huanija echaco Eyacuiñajjiyo beshahua nei apoa po majje ohuaya huohui canaje jama ba'a: “¿Achajja miya jashahuabaquiiani? ¿Ae acuae jja iña? Eya ca jja ca iña Eyacuiñajjiya huoojea'yo ojjaña jaahuanajji Quito pojjeama. Oya quijje pishana poeje. Oya ca ca oe quea ca'a nee nee, quea pame nee nee. Eya ca iña quea pame pishana. Jamajjeya aje oe eya Jesosa Quito cojja nei nequi sa po ajja, quea bicho, de” acanaje Huaniya.

²⁶ —Ecuea epeeji cuana, etiiquiana Amajamaja osecua cuana, ishajja'ajjacue mo! ¡Eyacuiñajjiya epeeji cuana Jodio pojjeama cuana, shajja'ajjacue mo pea'ai! Eyacuiñajjiya jiquio esohui huohui canaje esejaya eshajja'ajjajji jama ba'a: Eyacuiñajjiya Jesosa huoojea canaje ese jaahuanaa, esaja mimishi cuijea'yohua pea'ai. ²⁷ Jamatii dejja cuana Jenosanenajo ba'ejja, Jodio etii cuanaja pea'ai ba jjima Jesosa Eyacuiñajjiya huoojea'yo ojjaña jaahuanajji. Oya cuanaa Eyacuiñajjiya esohui huohuijjiya esohui shajja'ajja canaje ojjaña ejomishocajji pojajajo; ma esohui Jodio cuanaja quea quehua. Jamatii Jesosa quecua ca'yona; ma esohui yahuajo nei nei etehue'yo jayojja jama acanaje Jodio cuaa. ²⁸ Jesosa mimishi'ama nei nei ba canaje Jodio cuaa. Jamajjeya ¿yajajajo shai quecua mee ca'yona; oya? Jamatii oya cuaa emeshi mese Pinato jama acanaje ba'a: “¡Jesosa acui ecueata'apeejo ba'ehuanasohuajecue emano'yojji!” taana neineime ponaje.

²⁹ —Ojjaña Eyacuiñajjiya esohui yahuajo nei nei etehue'yo jayojja jama aca poa Jesosa, Jodio etii cuaa. Majoya Jesosa acui ecueata'apeejo ba'e jjequiquea'yo majje ojaya epeeji cuaa oya mei jjani ai yasijje huananobiaqui canaje. ³⁰ Jamatii Eyacuiñajjiya oya shequi mee ca o'oyanaje. ³¹ Mano'yo jimahua Jesosa Janinea meshijo nequi Jenosanena huasijje poquinate oja epeeji cuana nijje. Quijje shequi o'oya majje Jesosa oja epeeji cuana nijje jjapeequi o'oyanaje quea huiso cahuime. Ojaya epeeji cuana jjeyahua nei Jesosajo mimiani. Ojjaña Jodio cuana huohui cani jama ba'a: “Jesosa shequi o'oyanaje” acani. ³² Jjeyahua nei ecuaana Eyacuiñajjiya esohui quea pame nee miqiuana huasijje huohuije jama ba'a: ³³ Eseyaya etiiquiana nijje Eyacuiñajji yahuajo nei mimia poa. Eseyaya ma etiiquianaja osecuaya. Jamajjeya Eyacuiñajjiya esohui esejaya etiiquiana huasijje jayojja jama jjeyahua nei ohuaya acani esejo. Ojaya esohui jayojja jama ohuaya Jesosa shequi mee ca o'oyanaje. Yahuajo nei nei Dabiya Eyacuiñajjiya esohui Jesosajo tehue ca poa jama ba'a: “Miya ecue Bacua Ejja. Maya eyaya ojjaña ba mee aña” jamaya yahuajo nei nei Dabiya Eyacuiñajjiya esohui Jesosajo tehue ca poa esohuicuayajjiyo, Salmojo —Pabohua acanaje.

³⁴ —Eyacuiñajjiya Jesosa shequi mee ca o'oyanaje emano beca'yojji pojjeama, e'ihui'yojji pojjeama. Eyacuiñajjiya yahuajo nei jama aca poa Jesosa ba'a:

“Ecuea esohui quea pame nee Dabi nijje jayojja jama eyaya miya aje'yo. E'e, eyaya miya quea pame nee aje'yo”.

³⁵ Pea esohui cuayajjiyo Dabiya tehue ca poa jama ba'a:

“Miyaya eya, mique Bacua Ejja oe nei quea pame nee jaahuanañajo, eya e'ihui'yojji pojjeama tii tii poaje'yo”.

Jamaya yahuajo nei Eyacuiñajjiya tehue mee ca poa Jesosajo.

³⁶ —Yahuajo Eyacuiñajjiya esejaya etiiquiana Dabi emeshi mese po mee ca poa. Jamatii dejja tii majje Dabi mano'ya poa. Oya etiiquiana nijje emano'yo jaa. Oya ihui'ya poa pea'ai.

³⁷ Jesosa Quito ca ca ihui'yo jjima poanaje. Eyacuiñajjiya oya emano'yo jaa shequi mee ca o'oyanaje. ³⁸ Ecuea epeeji cuana, eyaya miqiuana huohuiaña Jesosajo. Oya Jesosa eshe o'oya. Jamajjeya ohuaya mimishi cuana pajea meesahua caje'yo miqiuana jaya. Mimishi cuijea caje'yo pea'ai. ³⁹ Moisesija etehue'yo jayojja jama añajo pojjeama mimishi cuana cuijea ca'yani Eyacuiñajjiya. Jesosa eshe o'oya, de. Onijje jjapeequianajo ca ca oe ohuaya miqiuana mimishi cuana cuijea ca'yani. Majoya Eyacuiñajjiya miqiuana ba cani

emimishi cuijea'yo. ⁴⁰ ¡Jamajjeya Eyacuiñajjija esohui ba neineicue! miya ojaya etecuea'yojji pojjeama. E'e, yahuajo nei Eyacuiñajjija esohui tehue mee ca poa jama ba'a:

⁴¹ “¡Shajja'ajjacue mo! Eya miquianaaya niñebaña. ¡Quea mete pocue! Eyaya miya chama'yo tii po meeje'yo. Eyaya ma dejjaa ajjima acani aje'yo miquianajaya ebajji. Jamatii ba majje miquianaya jshashuabaqui ajja. Onaa huohui cajo, miquianajaya shajja'ajja jiima poaje”.

Jamaya yahuajo nei Eyacuiñajji poa —jamaya Pabohua esohui huohui canaje Atioquiajo, Jodioja equi ojee ejjachichaquijjijo.

⁴² Majoya esohui huohui majje Pabo, Benabe nijje esecue yasijje cuayaquinaje. Majoya beca cuana onijje miminaje jama ba'a: —Pabo, miqnea esohui ecuana shajja'ajja sa o'oya poani. ¡Pea ejomishocajji pojajajo poe o'oyacue miquianaya!

⁴³ Jodioja equi ojee ejjachichaquijjijo nequi esecue yasijje cuayaqui majje quea huiso Jodio cuana, Jodio pojjeama cuana ma Jodioja esohui jayojja jama Eyacuiñajji bihuia cani pea'ai Pabo nijje jjapeequinaje, Benabe nijje pea'ai. Jamajjeya Pabo, Benabe pea'ai ona nijje jama poanaje ba'a: —¡Jesosa nijje jjapee neineicucue! ¡Eyacuiñajjija esohui a'a pajea'yojji pea'ai! Ohuaya miya jaahuana tiitii cani.

⁴⁴ Majoya pea epojja ejomishocajjijo beshahua nei ojjaña cuana ma cuiñajjijo ba'eca jjachichaquinaje Eyacuiñajjija esohui shajja'ajjaa, Emeshi Mese nejia esohui. ⁴⁵ E'e, quea huiso nee nee poeyanaje Paboya esohui shajja'ajjaa. Ma ba majje Jodio etii cuana quea quene poanaje. Jamajjeya Pabohua esohui huohui canijo mimicuijeanobiajea canaje cuaa Pabo. Oya cuana Jesosajo mimisho'i poanaje pea'ai. ⁴⁶ Jamajjeya Pabohua, Benabeya pea'ai mete'ama Jodio etii cuana tecuea canaje jama ba'a: —¡Bacue! Eyacuiñajjija ecuana huoojea canaje Jodio cuana huasijje ebionei Jesosaja esohui huohui coohua, eba'e tiitii mee'yojji onijje. Miqianaya ca ca oe jjashajja'ajjaqui sa po ajja. Shajja'ajja sa po'yo ajjajo cuaqui yasijje poquije'yo, eyahuasijje eba'e tiitii'yojji pojjeama, miqianaya. Jamajjeya ecuana poquije Jodio pojjeama cuana sohuihuohuiya. ⁴⁷ E'e, Emeshi Mese nejia, Eyacuiñajjija ecuana huohui canaje jama ba'a:

“Eyaya miya huoojeaje Jodio pojjeama cuana huasijje. ¡Ecuea esohui quea ja'a nee ba meecue! ¡Ojjaña cuana ojjaña meshijo ba'eca cuana enijje jjapeequi meesahuacue! Eyaya ojjaña mimishi cuana cuijeaje'yo, enijje eyajo eba'e'yojji”.

Jamaya yahuajo Eyacuiñajji ecuana nijje poanaje —Pabohua acanaje.

⁴⁸ Paboya esohui shajja'ajja majje Jodio pojjeama cuana quea bihui nee nee poanaje. Oya cuaa Eyacuiñajji bihuia canaje ojaya esohui quea pame nee Jesosajo ba mee canajejojo. Ojjaña joya Eyacuiñajjija babaca canaje onijje eba'e tiitii'yojji Jesosa nijje jjapeequi'yonaje, coya oja babaca'yo huiso tiia.

⁴⁹ Majoya ojjaña Atioquia chipi nejio ba'eya Jesosaja esohui shajja'ajja canaje. ⁵⁰ Jamatii Jodio etii cuaa epona cuana quea quene po mee canaje Pabo nijje. Ma epona cuanaja yahuajo nei Eyacuiñajji quea jea nee poanaje. Oya cuana Jodio etii cuanaja Atioquiajo ba'e cuanaja ehuanase cuana poanaje. Jodio etii cuaa jama acanaje ba'a: —¡A'a shajja'ajjajji Jesosaja esohui!

Jodio etii cuaa ojjaña quea quene nee nee po mee ca'yonaje Pabo nijje, Benabe nijje pea'ai. Iña majje oya cuaa Pabo Benabe pea'ai huoojea ca'yonaje. ⁵¹ Majoya Pabohua Benabeya pea'ai ma shajjama' cuana tecueajea majje jiñajea ca'yonaje. Ojjaña ma cuiñajjijo ba'e ba mee canaje oya cuana shajjama' poanaje, quea mimishi. Majoya Pabo Benabe nijje poquinaje ejiojijije pea cuiñajji yasijje, Iconio huasijje.

⁵² Edojjoshahua Pame o que dobiqúi'yajo, ojjaña Jesosaja epeeji Atioquiajo ba'eca cuana quea bihui nee nee poanaje.

14

Iconio huasijje esohui huohui canaje Pabohua, Benabeya pea'ai

¹ Majoya Pabo, Benabe nijje Iconio huasijje ba'eñaquinaje. Atioquiajo acanaje jayojja jama aca o'oyanaje Iconiojo pea'ai. E'e, Jodioja equi ojee ejjachichaquijji yasijje dobiquinaje. Eyacuiñajjija esohui quea pame nee Jesosajo huohui canaje quea ja'a nee. Jamajjeya quea huiso Jodio cuana, Jodio pojjeama pea'ai Jesosa nijje jjapeequinaje. ² Jamatii beca Jodio cuana shajja'ajja sa po'yo ajja poanaje. Maaya Jodio pojjeama cuana jama acanaje ba'a: —¡A'a jjapeequijji Jesosaja epeeji cuana nijje! ¡A'a Jesosaja esohui shajja'ajjajji! —jama niñebameya acanaje Pabo cuaa.

Jamajjeya quea huiso cuana Jesosaja epeeji cuana nijje jjapeequi'yo ajja poanaje. ³ Jamatii Pabo, Benabe nijje quea cahui huiso Iconiojo nequinaje. Mete'amaa Jesosajo huohui majamaja canaje, Emeshi Mese nejio jama ba'a: —Emeshi Mese nejia Jesosaa eseya quea jea nee acani, eseya jaahuana cani pea'ai —poanaje.

Jesosaa Pabo, Benabe pea'ai ma dejjaa ajjima acani ameesahua canaje. Ma ba majjeya ojjaña ba canaje Pabojja esohui Jesosajo e'e nei, Benabeja pea'ai. ⁴Jamajjeya Iconiojo quea huiso cuana shajja'ajja sa poanaje Jesosaja huoojea'yo cuanaja esohui. Pea cuana ca ca Jodioja esohui jayojja jama a sa poanaje. Shajja'ajja sa po'yo ajja poanaje Jesosaja esohui.

⁵ Majoya beca Jodio pojjeama Jodio cuana nijje, ojaya emeshi mese cuana nijje jjachichaqui majje mimimiminaje. Jama poanaje ba'a: —¡Cua'! ¡Pabo, Benabe pea'ai ejjacuaiajeaqui, ejjasapa jahahuejjajjae qui o meiya! —poanaje.

⁶⁻⁷ Jamatii Pabohua, Benabeya pea'ai maya shajja'ajja canaje. Shajja'ajja majje quehua poquinaje Nicaonia meshi yasijje. Debe cuiñajji yasijje, Nisata cuiñajji yasijje pea'ai esohui quea pame nee Jesosajo huohui capoquinaje ba'e chejje cuana huasijje, cuiñajji sisi cuana huasijje pea'ai.

Nisatajo Pabo iña canaje cuaa

⁸ Nisata cuiñajji de jja jiojjijajja ba'e yonaje, jeo ajja. Oya jamatii cuaya, jiojjijajja tii. ⁹ Pabohua esohui huohui canijo, jiojjijajjaa shajja'ajja neinei ca'aninaje. Majoya Pabohua jiojjijajja ba neinei canaje. Jjashahuabaquinaje jama ba'a: —Jiojjijajja Jesosajo quea pame jashahuabaquiani jama ba'a: “Jesosaa eya jeo mee caje'yo”. Jamajjeya eyaya oya jiajiojji jeapiihuiqui meeje'yo —Pabo poanaje.

¹⁰ Jamajjeya Pabohua oya jama acanaje ba'a: —Jiojjijajja, ¡nequisohuacue! ¡Jeoque! —acanaje.

Jiojjijajja nequisohua cuajinaje. Jeojeonaje. E'e, jiojjijajja jiajiojji jeapiihuiquinaje. ¹¹ Ma ba majjeya quea huiso cuaa Pabo bihuia canaje. Onajaya emimijo, Nicaoniaja esohui jama poanaje ba'a: —E'e de. ¡Bacue Pabo, Benabe pea'ai! Eyacuiñajji cuana ecua que jaoque'yonaje de jja jayojja, de —acanaje. Pabo, Benabe pea'ai eyacuiñajji poso acanaje cuaa.

¹² Jamajjeya Benabe eyacuiñajji nisho bajjani acanaje Jopite bajjani. Pabo mimi huicha'a huicha'anijo, oya pea eyacuiñajji nisho bajjani acanaje Meconio bajjani. ¹³ Epana'yo huohuiji, epana'yo jaahuanajji ma epana'yo Jopite nequijji equijo nequinaje Nisata pejeje. Ohuaya ana'ai yahue cuana, eshasha quea huiso cuana pea'ai jjequi canaje cuiñajji esecue yasijje, Pabo que. Ohuaya pea cuana nijjeya ana'ai cuana, eshasha cuana pea'ai dahuajea sa acanaje Pabo bihuiajji, Benabe pea'ai bihuiajji; eyacuiñajji poso bihuia sa acanaje.

¹⁴ Benabe, Pabo pea'ai ma ba majje quea mete poanaje. Poquicuajinaje de jja cuana jjachichaquiani yasijje. ¹⁵ Jama taaame poanaje ba'a: —¿Apiojji acuaeya miqianaaya jama aña so'o? Ecuana aje de jja cuana miqiana jayojjaya. ¡A' ecua bihuiajji! Ecuana esohui quea pame Jesosajo huohuiña. Jamajjeya ¡a' eyacuiñajji nisho cuana bihuia majajji! ¡Pajea'yocue! Eyacuiñajji oe nei e'e jojo nei eshe tii nequi. ¡Oya oe nei bihuiaque! Ohuaya eyatahuatahua pana ca'ya poa. Meshi cuana, bae cuana pea'ai pana ca'ya poa. Ojjaña aquiana meshijo, eyajo, enajo pea'ai pana ca'ya poa ohuaya, Eyacuiñajjiya. ¹⁶ Yahuajo nei nei ojjaña cuaa ojjaña meshijo ba'eya quea mimishi nee aca poa. Jamatii Eyacuiñajjiya oya cuana mimishi cuana pajea mee'yo jjima poa. ¹⁷ Jamatii Eyacuiñajjiya yahuajo ojjaña cuana quea pame aca poa. Ojjaña ba mee ca poa oya eshe nequi. Jjeya ohuaya miqianaya quea pame nee acani pea'ai. Nayaja po mee ca'yani, eshequiaja po mee ca'yani, bobi tii mee ca'yani pea'ai. Jamaya ohuaya miqianaya quea bihui nee ba'e meesahua cani pea'ai —Pabohua acanaje.

¹⁸ Jamaya Pabohua, Benabeya pea'ai huohui canaje. Jamatii ma de jja cuaa beshahua nei oya bihuia canaje. Ana'ai beshahua nei dahuajea canaje o bihuiajji. Dahuajea jjima; beshahua nei, de.

¹⁹ Majoya Jodio cuana Atioquiajo ba'e, Iconiojo ba'e pea'ai poeyanaje Nisata huasijje. Oya cuaa Nisata de jja cuana siajje acanaje Pabojjo. Siajje acajje quea quene nee nee poanaje Pabo nijje. Majoya oya cuaa Pabo iña canaje; sapa jaja canaje meiya, dojocuayaqui canaje cuiñajji esecue yasijje. Pabo emano'yo poso jeajea canaje cuaa jomajo tii. ²⁰ Jamatii quijje pishana Jesosaja epeejji cuana poeyanaje Pabo baa. Ojjaña o que jjachichaquiajo, Pabo shequi'yonaje. Shequi'yo majje huacuaya Nisata huasijje poe o'oyanaje. Majoya mecajjeahua nei oya Benabe nijje poquinaje pea cuiñajji yasijje, Debe yasijje.

Pabo, Benabe nijje huacuaya poqui o'oyanaje, Atioquia huasijje

²¹ Debe yasijje poqui majje Pabohua, Benabeya pea'ai Eyacuiñajji esohui quea pame nee Jesosajo huohui cañaquinaje. Quea huiso cuaa shajja'ajja canaje. Jesosa nijje jjapee-quinaje. Majoya, Pabo Benabe nijje huacuaya poqui o'oyanaje Nisata huasijje. Iconio huasijje pea'ai poqui o'oyanaje. Majoya Pisinia meshi yasijje Atioquia huasijje poqui o'oyanaje ojjaña Jesosaja epeejji eyacua cuana baa. ²² E'e, Pabohua, Benabeya pea'ai Jesosaja epeejji cuana ma cuiñajji cuanajo ba'eca cuana esohui huohui ca o'oyanaje jama ba'a: —¡Jesosa nijje jjapee neineiquicue! ¡A'a oya pajea'yojji! Eyajo Eyacuiñajji ojjaña

huoojeajji poani. Eseyá onijje ba'e tiitii sa poanijo, onaaya, mimishi cuaa eseya napa caje quea huiso. Quea canaja esejo poaje. Quea nee poaje pea'ai —Pabohua acanaje.

²³ Majoya Pabohua, Benabeya pea'ai ma cuiñajji cuanajo Jesosaja epeeji quea pame babaca canaje Jesosaja epeeji cuana jaahuanajji epojji. Majoya ijíia'íjia jjíma nequi Eyacuiñajji nijje mimi majamajanaje Jesosaja epeeji jaahuanajji cuanajo jama ba'a: —Emeshi Mese nei Jesosa, miya quea pame nee. Jiquio dejja cuana miquea epeeji nei cuana ecuaaaya babacanaje miquea epeeji cuana jaahuanajji epojji. Jamajjeya jaya cuana miquea epeeji cuana jaahuana meesahuacue quea pame nee! —poanaje.

²⁴ Jamajjeya Pabohua, Benabeya pea'ai Pisinia meshijo esohui huohuinana o'oya majje Panipinia meshi yasijje poqui o'oyanaje. ²⁵ Majoya Eyacuiñajjija esohui quea pame nee Jesosajo huohui canana o'oyanaje Pene cuiñajji yasijje. Majoya oya cuana poquinaje Atania cuiñajji yasijje. ²⁶ Jomajo Ataniajo bishe ai yasijje nequisohuaquinaje. Besapoqui o'oyanaje Atioquia huasijje. Jomajo yahuajo pishana Jesosaja epeeji cuana Eyacuiñajji nijje mimi majje oya cuana huoojea canaje esohui huohuiya. Eyacuiñajji nijje miminaje pea'ai o jaahuanajji, esohui quea pame Jesosajo huohui canijo.

²⁷ Jamajjeya Atioquia huasijje poe'yo majje Pabohua, Benabeya pea'ai ojjaña Jesosaja epeeji cuana iyaa canaje. Jjachichaqui'yajo Pabohua, Benabeya pea'ai quio o poquinaje huohui canaje. Majoya jama acanaje ba'a: —Ojaya esohui quea pame nee Jesosajo huohuinanañajo, Eyacuiñajjija ecuaa quea pame nee acanaje. Eyacuiñajjija quea huiso Jodio pojjeama cuana oja sohui ba meesahua canaje pea'ai —jamaya acanaje Pabohua, Benabeya pea'ai.

²⁸ Oya cuana Atioquiajo nequi'yonaje Jesosaja epeeji cuana nijje quea huiso cahuime.

15

Jesosaja epeeji cuana ojee miminaje Jenosanenajo

¹ Majoya beca dejja cuana poeyanaje Atioquia huasijje. Oya cuana Jodio dejja, Jodea meshijo ba'e. Jamajjeya poe majje ohuaya Jesosa Quitoja epeeji cuana jama sohuihuo-huime acanaje ba'a: —¡Etiiquiana Moisesija esohui etehue'yo jayojja jama acue! ¡Cuiishasha biso nei jehuišejjajacue! Jamaya ajjimajo Eyacuiñajjija miya emimishi cuijea'yojji pojjeama —acanaje.

² Shajja'ajja majje Pabo, Benabe pea'ai jjamimicuijajea nobiajeaquinaje janobajjima nei, ma Jodio dejja cuana nijje quea huiso miminaje pea'ai. Majoya Jesosaja epeeji cuaa jama acanaje ba'a: —Benabe, Pabo, pea Jesosaja epeeji cuana nijje capoquiahua Jenosanena huasijje. Jomajo Jesosaja huoojea'yo cuana nijje, Jesosaja epeeji etii cuana nijje pea'ai camimiahua Moisesija etehue'yojo, Jesosaja esohuijo pea'ai —poanaje.

³ Majoya Jesosaja epeeji cuaa Atioquiajo ba'eya oya cuana huoojea canaje. Jenosanena huasijje poquiyea oya cuana Penisa meshijo, Samania meshijo pea'ai cuiñajji cuana yejje ca poquipoquinaje. Jesosaja epeeji cuana sohuihuohui capoquinaje jama ba'a: —Jodio pojjeama quea huiso cuana Jesosa nijje japeequiani —poanaje.

Ma esohui shajja'ajja majje ojjaña Jesosaja epeeji cuana quea bihui nee nee poanaje.

⁴ Majoya oya cuana Jenosanena huasijje poe'yonaje. Jomajo ojjaña Jesosaja huoojea'yo cuana, Jesosaja epeeji etii cuana pea'ai quea bihui nee miminaje Pabo nijje, Benabe nijje pea'ai. Majoya Pabohua, Benabeya pea'ai huohui canaje ojjaña Eyacuiñajjija oya cuana ameesahua canaje Jodio pojjeama cuanajo, pea meshi cuana huasijje.

⁵ Jamatii beca Paniseo cuana ma Moisesija etehue'yo jaahuanajji poani nequisohua majje jama poanaje ba'a: —Chojja. ¡Jodio pojjeama cuana Jesosa nijje japeequi majje cuiishasha biso nei cajehuišejjajeha cahua! Ojjaña Moisesija etehue'yo cuana jayojja jama ca'a cahua pea'ai —poanaje Paniseo cuana, Jesosaja epeeji cuana.

⁶ Jamajjeya Jesosaja huoojea'yo, Jesosaja epeeji etii cuana pea'ai jjachichaquinaje Paniseoja esohuijo mimiya. ⁷ Ma esohuijo quea huiso mimimiminaje. Ojjaña cuana mimi'yajo, Penohua nequisohua majje ojjaña jama acanaje ba'a: —Epeeji cuana, yahuajo Eyacuiñajjija eya huoojea canaje esohui quea pame nee Jesosajo huohuiya Jodio pojjeama cuana huasijje. Shajja'ajja cajo, Eyacuiñajjija oya cuana Jesosa nijje japeequi meesahua canaje. Edojjoshahua Pame huoojea canaje ona huasijje dobiquiya. Jamaya miqúanajaya eba. ⁸ Eyacuiñajjija eba ojjañaja ejjashahuabaquiji. Ohuaya Jodio pojjeama cuana quea pame nee acanaje. E'e, yahuajo Eyacuiñajjija eseya, Jodio cuana, quea pame aca poa jayojja jama jjeya ohuaya oya cuana acanaje pea'ai. E'e, Jodio pojjeama cuana quea pea'ai ohuaya Edojjoshahua Pame huoojea canaje ona huasijje dobiquiya. ⁹ E'e, Eyacuiñajji jashahuabaquinaje jama ba'a: “Jodio pojjeama cuana Jodio cuana jayojjaya” poanaje. Jamajjeya Jesosa nijje japeequianajo, ohuaya Jodio pojjeama cuanaja mimishi cuana cuijea ca'yonaje pea'ai. ¹⁰ ¿Yajjajo acuae mi Eyacuiñajji jayojja jashahuabaquime mi poani

so'o? Miquianaaya jama aña ba'a: "Jesosaja epeeji cuaa Moisesija etehue'yo jayoija jama ca'a cahua". Chojja, quea camaja ca coma, de. Eseyaya eti quiana cuanaja, esejaya pea'ai Moisesija esohui etehue'yo cuana jayoija jama a'yo jima poanaje. Quea camaja. ¹¹ ¡Chojja! Eseyaya ca ca Jesosaja esohui jayoija jama aña. Jamajjeya Emeshi Mese neiya Jesosaa eseya quea jea nee acani. Onijje japeequianijo, esejaya mimishi cuana cuijea'yo majje onijje ba'e tiitii mee caje'yo eyajo. Oya jayoijaya ohuaya acani Jodio pojjeama cuanajo, Jesosa nijje japeequianijo pea'ai —Penohua acanaje.

¹² Peno mimi'yajo ojjaña cuana mimi'yo ajja poanaje. Shajja'ajja canaje. Majoya Pabohua, Benabeya pea'ai huohui canaje jama ba'a: —Jodio pojjeama huasijje ojala esohui huohuiqui'yajo, Eyacuiñajjiya ecuaana ma dejjaa ajjima acani ameesahua canaje quea huiso —acanaje. Majoya Pabohua, Benabeya pea'ai huohui canaje quea huiso.

¹³ Majoya Pabo, Benabe pea'ai mimi pajea'yajo Satiaco jama poanaje ba'a: —Epeeji cuana, ¡shajja'ajjacue mo! ¹⁴ Penohua jjeayahua nei eseya huohui canaje Eyacuiñajjiya Jodio pojjeama cuana quea jea nee acanaje pea'ai. Jamajjeya oya cuana Jesosa nijje japeequi meesahua ca'yonaje. Jamaya poanaje Peno. ¹⁵ E'e, jamaya Eyacuiñajjiya esohui huohuijjiya yahuajo nei nei huohui ca poa pea'ai. Jama tehueme aca poa ba'a:

¹⁶ "Quijje eyaya Dabija osecua Emeshi Mese nei po meje'yo. Equi e bihuijji epajea'yo poa. Poe majje eyaya oya cuana bihua meesahuaje o'oya. ¹⁷ Jamajjeya pea cuana, Jodio pojjeama cuana, ojjaña meshijo ba'eca enijje japeequi sa poaje. Eya ojjaña Emeshi Mese nei quea pame nee poaje'yo. ¹⁸ Jamaya Emeshi Mese nei quea pame neeya huohui ca poa yahuajo nei. Ma esohui yahuajo ohuaya pea cuana ba meesahua ca poa".

Jamaya yahuajo nei Eyacuiñajjiya esohui poa.

¹⁹ —Jamajjeya eya jashahuabaquiani jama ba'a: Jodio pojjeama cuana Jesosa nijje japeequianijo ¡a'a Moisesija etehue'yo jayoija jama ameeji! Chojja, maya quea camaja nee nee. ²⁰ Jamajjeya Jodio pojjeama cuana huasijje esohui tehucue jama ba'a: "Jesosaja epeeji cuana, ¡noe eyacuiñajji nisho bihuijji onaja dahua a'a ijji! ¡A'a pea cojjoji poji pea'ai! ¡Noe na' cuaya meequi jima a'a ijji! ¡Ijjiacaji na' a'a ishijji! Jamaya miquiaa ajo Jodio cuana miquiana nijje quea quene nee nee poaje". Jamaya tehucue Jesosaja epeeji eyacuaja ebajji! —Satiacohua acanaje—. ²¹ E'e ojjaña cuiñajji Jodio deja cuanaja esohui huohuijji cuaa Moisesija etehue'yo huohui cani Jodioja equi ejjachaquijjiyo. Yahuajo nei huohui ca poa. Jjeya nei huohui cani pea'ai ojjaña epojja ejomishocajjiyo. Jamajjeya ¡a'a Moisesija etehue'yo jayoija jama ameeji! —acanaje Satiacohua.

Jesosaja epeeji etii cuaa esohui tehue canaje Jodio pojjeama cuanaja ebajji, Jesosaja epeeji eyacua cuanaja

²² Majoya Jesosaja huoojea'yo cuaa, esohui huohuijji cuaa, Jesosaja epeeji etii cuaa, ojjaña Jesosaja epeeji cuana jomajo nequiya pea'ai Pabo nijje, Benabe nijje huoojea sa acanaje becanejjijji pea'ai epeeji cuana Atioquia huasijje. Jamajjeya huoojea canaje Basabaja bacua eja Joda. Onijje huoojea canaje pea deja Sinasi bajjani. Oya cuana Jesosaja epeeji cuanaja huoojea'yo poanaje, quea pame nee nee. ²³ Sinasi nijje, Joda nijje pea'ai esohui etehue'yo huoojea canaje Jesosaja epeeji cuanaja ebajji. Ma esohui etehue'yo jama poanaje ba'a:

"Epeeji cuana Atioquiao ba'e, Sinia meshijo ba'e, Sinisia meshijo ba'e pea'ai, ecuaaya, Jesosaja huoojea'yo cuaa esohui huohuijjiya, Jesosaja epeeji etii cuaa pea'ai ¡jiquio esohui etehue'yo huoojea miquiana huasijje, Jesosaja epeeji cuana Jodio pojjeama cuana huasijje. E'e, ecuaaya quea bihui nee tehuenaje miquiana huasijje. ²⁴ ¿Achajja a quiana ani, ecuanaja epeeji cuana? ¡Bacue! Miquiana huasijje beca deja jiquiojo nequi tii cuaa Moisesija esohui huohui canaje. Moisesija esohui jayoija jama miquianaya ba'e meeme ajja. Quea camaja, de. Jamajjeya miquianaya quea yeno poanaje. Ecuanaja ma deja cuana huoojea jima miquiana que esohui huohuiya. ¡A'a shajja'ajjaji cuana! ²⁵ Miquianaya quea yeno poanaje. Jamajjeya ecuaaya jiquiojo tii quea huiso nee ojee jashahuabaqui majje jama poanaje ba'a: Ecuaaya miquiana que pea deja cuana huoojeaña Benabe nijje, Pabo nijje pea'ai. E'e, Pabo, Benabe pea'ai ecuanaja epeeji cuana.

²⁶ Oya cuana Emeshi Mese nei Jesosa Quitojo chacoconaje mete'ama. Onaaya oya cuana beshahua nei jajahuejjajea ca'yonaje, Jesosa nijje japeequianijo. ²⁷ Jamajjeya ecuaaya deja quea pame becanejjijji pea'ai huoojeaña miquiana que, Joda, Sinasi pea'ai. Oya cuaa ecuanaja etehue'yo huohui caje'yo miquianaja eshajja'ajjaji. ²⁸ E'e, Edojoshahua Pameya ecuaana jashahuabaqui mee cani jama ba'a: Ecuaaya miquianaya huohui ajja Moisesija esohui etehue'yo jayoija jama yajji. Chojja, jamaya miquianaaya ameeme ajja. Quea camaja. Jiquio jama acue

miquiánaaya ba'a: ²⁹ ¡Noe ma eyacuiñajji nisho bihuiajji onaja dahua a'a ijjiajji! ¡A'a pea cojjoji pojji! ¡Noe na' cuaya meequi jima a'a ijjiajji! ¡Ijjiacajji na' a'a ishijji pea'ai! Jamaya miquiaa ajo Jodio cuana miquiána nijje quea quene nee nee poaje. Mahuiso ecuanaja esohui etehue'yo miquiána que. Jamajjeya jamaya añajo miquiánaya quea pame nee ba'eje. Apoa.”

Jamaya Jesosaja huoojea'yo esohui huohuijji cuaa, Jesosaja epeeji etii cuaa pea'ai tehue canaje Jesosaja epeeji eyacua cuanaja ebajji.

³⁰ Jamajjeya Pabo, Benabe nijje, becanejjijji pea'ai dejja nijje poqui o'oyanaje Atioquia huasijje. Jomajo nequínajqui majje ojjaña Jesosaja epeeji iyaa canaje. Ojee ijachichaqui'yajo, etehue'yo ba mee canaje. ³¹ Ma esohui etehue'yo ba majje ojjaña Jesosaja epeeji eyacua cuana quea bihui nee nee poanaje.

³² Joda, Sinasi pea'ai Jesosaja esohui huohuijji poanaje. Jamajjeya oya cuaa Jesosaja epeeji cuana sohuihuohui canaje quea huiso nee. Quea huiso Jesosa nijje jjapeequi meesahua canaje quea ja'a nee. ³³ Quea cahui huiso Atioquiajo esohui huohui canaje. Majoya Jesosaja epeeji cuaa Atioquiajo ba'eya oya cuana huoojea ca'yonaje Jenosanena huasijje, Jesosaja huoojea'yo esohui huohuijji cuana huasijje. Quea bei nee poqui'yonaje. ³⁴ Sinasi ca ca nequinaje Atioquiajo tii. Poqui sa po'yo ajja poanaje. ³⁵ Pabo, Benabe pea'ai Atioquiajo nequinaje. Quea huiso pea cuana nijjeya Emeshi Mese nei Jesosaja esohui huohui tiitii canaje. Ojjaña Jesosaja epeeji eyacua cuana esohui ba neinei meesahua canaje.

Pabo Benabe nijje poqui pajea'yonaje

³⁶ Majoya Pabo Benabe nijje jama poanaje ba'a: —Cua'a, Jesosaja epeeji cuana ojjaña cuiñajji yasijje ejjabaqui'yo o'oya, ma yahuajo eseya Jesosaja esohui huohuiquinaje yasijje. E'e pojja'a esejaya esohui pajea ca'yonaje. E'e pojja'a pajea'yo jima; ba'ajja —poanaje Pabo.

³⁷ —E'e —poanaje Benabe—. Jamaya quea pame. Huani Macoso ese nijje ejjadojoqui pea'ai, ma yahuajo ese nijje poqui'ajjanaje.

³⁸ —Chojja —acanaje Pabohua—. Yahuajo Panipinia meshijo Huani Macosohua eseya jiña ca'yonaje. Chacochaco jima ese nijje. Huacuaya poqui'yonaje Jenosanena huasijje. Eya o dojo sa po'yo ajja.

³⁹ Jamajjeya Pabo, Benabe nijje jjamimicuijje nobiajequinaje. Ojee poqui pajeanae. Majoya Benabe besapoquinaje Chipe nasi ai yasijje. Huani Macoso dojo canaje onijje echa-cojji. ⁴⁰ Pabohua ca ca Sinasi babaca canaje onijje epoquijji Jesosaja esohui huohuisahuajji. Jamajjeya Jesosaja epeeji cuana ojee Eyacuiñajji nijje miminaje Pabojo, Sinasijo pea'ai jama ba'a: —Eyacuiñajji, ¡Pabo, Sinasi pea'ai poqui meesahuacue miquea esohui huohuiya! ¡Oya cuana jaahuanacue! —poanaje.

⁴¹ Majoya Pabo Sinasi nijje poqui o'oyanaje Sinia meshi yasijje, Sinisia meshi yasijje pea'ai. Jesosaja esohui huohui capoqui o'oyanaje. Ojjaña Jesosaja epeeji cuana Jesosa nijje jjapeequi meesahua canaje quea ja'a nee.

16

Timoteo poquinaje Pabo nijje, Sinasi pea'a nijje

¹ Majoya Pabo Sinasi nijje poqui o'oyanaje Debe yasijje, Nisata huasijje pea'ai. Jomajo ohuaya Jesosaja epeeji shacuima' nequi ba canaje Timoteo bajjani. Timoteoja enaese Jodio pona poanaje, Jesosaja epeeji pea'ai. Ojaya ejeajji ca ca Jieno dejja poanaje. ² Ojjaña Jesosaja epeeji cuaa Nisatajo ba'eya, Iconiojo ba'eya pea'ai Timoteojo quea bihui nee huohui canaje jama ba'a: —Timoteo quea pame nee, Jesosaja epeeji quea ca'a nee oya, de —poanaje.

³ Jamajjeya Pabohua Timoteo dojo sa acanaje onijje esohui huohuiya. Quea huiso Jodio cuana ma meshijo ba'enaje; ojjañaja eba Timoteoja ejeajji Jodio pojjeama, Jieno dejja. Jamajjeya ebacua ejja Timoteo Jieno cuana jayojja jama tii'yonaje; Moisesija etehue'yo jayojja jama cuiishasha biso nei jehuissejjajjea jima poanaje. Jamajjeya Jodio cuana tecue'ama onijje epojji Pabohua Timoteo cuiishasha biso nei jehuissejjajjea mee canaje.

⁴ Majoya oya cuana poquinaje ojjaña cuiñajji cuana huasijje. Ojjaña Jesosaja epeeji cuana huohui capoquinaje esohui etehue'yo ma Jesosaja huoojea'yo esohui huohuijji cuaa, Jesosaja epeeji etii cuaa Jenosanenajo tehue canaje. Ojjaña ma etehue'yo ba mee canaje: —E'e, ¡ma etehue'yo jayojja jama acue miquiánaaya! —acanaje Pabohua, Sinasiya pea'ai.

⁵ Jamajjeya Jesosaja epeeji cuana Jesosaja esohui jayojja jama ba'e meesahua canaje. Yahuajo oya cuana quea ja'a pishana ba'enaje. Jjeyahua nei ca ca Jesosaja epeeji quea ja'a nee ba'enaje Jesosajo. Quea huiso cuana Jesosa nijje jjapeequi poquipoquinaje pea'ai.

Pabo jicahuibaquinaje Eyacuiñajji onijje miminaje

⁶ Jamatii Edojjoshahua Pameya oya cuana Asia meshi yasijje poqui mee jjima acanaje. Jomajo esohui huohui mee jjima acanaje. Jamajjeya oya cuana Pichia meshi yasijje poquinaje, Janata meshi yasijje pea'ai poquinaje. ⁷ Majoya oya cuana poeyanaje Misia meshi yasijje. Jomajo oya cuana jjashahuabaquinaje Bitinia meshi yasijje epoquijji. Jamatii Edojjoshahua Pameya oya cuana ma meshi yasijje poqui mee jjima acanaje. ⁸ Jamajjeya oya cuana Misia meshijje jjayejjequinaje. Toasa cuiñajji yasijje poquinaje, bae ai sahua huasijje. ⁹ Jomajo Eyacuiñajjiya Pabo jjacahuibaqui mee canaje jama ba'a: Jjacahuibaquianijo Pabohua oe dejja cahuiba canaje Masenonia meshijjo ba'e. Oya Pabo nijje miminaje jama ba'a: —Pabo, ipoecue Masenonia meshi yasijje, ecuanaja meshi yasijje! ¡Ecuana Jesosaja esohui huohuihuacue! —jamaya acanaje Masenonia dejjaa.

Majoya Pabo shequi'yonaje. ¹⁰ Jamajjeya shequi'yo majje Pabo Masenonia meshi yasijje ecuanaja nijje besapoqui sa poanaje. Jama jjashahuabaquime poanaje ba'a: —Eyacuiñajjiya eseya huoojea cani Masenonia meshi yasijje esohui quea pame nee Jesosajo huohuiya, ojjaña Masenonia meshijjo ba'e sohuihuohuiya.

Jamajjeya ecuanaja aquiana cuana chicha majje besapoquinaje.

Pabo, Sinasi pea'ai Pinipo cuiñajji yasijje besapoquinaje

¹¹ E'e Teopino, eyaya, Nocaa pea esohui Jesosaja epeeji cuanaja, ma eyaya banaje eyaya tehueña miquea ebajji jama ba'a: Majoya Toasa huasijje poe majje ecuanaja bishe ai yasijje nequisohuaquinaje. Besapoquinaje Samatasa nasi yasijje. Majoya pea mecahuaje besapoquinaje Neaponi cuiñajji yasijje, bishe aijo. ¹² Majoya Neaponijo nequi ecuanaja poquinaje quea huesha nee, Pinipo cuiñajji yasijje ejiojijje Masenonia meshi ebio dojjojo. Pinipojo Shomano dejja cuana ba'yani quea quemo cuiñajji. Jamajjeya quea huiso dejja Pinipo huasijje poeyani anicuaa. Jamajjeya ecuanaja Pinipojo nequinaje quea cahui huiso. ¹³ Majoya Jodioja epojja ejomishocajji ecuanaja cuiñajji esecue yasijje poquinaje cuei sahua huasijje. Jama jjashahuabaquime poanaje ba'a: —Jomajo Jodio cuana Eyacuiñajji nijje mimiani ba'ajja.

Jomajo quea huiso epona ejjachichaqui ani banaje. Jamajjeya Pabo, ojaya epeeji cuana pea'ai antioquenaje. Esohui huohui canaje epona cuanaja eshajja'ajjajji. ¹⁴ Oe eponaa Ninia bajjaniya quea ja'a nee shajja'ajja canaje. Oya Tiatina pona, Tiatina cuiñajji ba'e, daqui huo'o quiajji pea'ai, daqui huo'o quea pame nee nee quiajji. Oya Ninia Eyacuiñajjiya epeeji yahuajo poanaje. Jamajjeya Emeshi Mese neiya oya shajja'ajja meesahua canaje Pabaja esohui quea pame nee Jesosaja. ¹⁵ Jamajjeya Ninia, oja huapa pojjeama cuana pea'ai Jesosa nijje jjapeequi'yonaje. Onaaya oya Eyacuiñajjiya besa mee canaje enajo. Majoya Niniaa Pabo jama acanaje ba'a: —Miquea eba eya Emeshi Mese nei Jesosaja epeeji nei, ojaya esohui jayojja jama aña. Jamajjeya ¡ecuea equijo ba'ecue! —poanaje Ninia.

Jamajjeya ecuanaja Niniaa ja'a cajjequinaje ojaya equijo eba'ejji.

Pabo, Sinasi pea'ai jeanobiajea canaje cuaa

¹⁶ Quijje ecuanaja poqui o'oyanaje cuei yasijje Eyacuiñajji nijje mimiya. Poquijeya ecuaaya banaje oe epona ahuema' ani. Ohuaya chaco cani sosema' niñepoqui yajjejojo. Jamajjeya eshahuaa esapajo nequiya epona huohui meesahua canaje ohuaye nei ma quijje onaa acaje. Maya huohui capoquinaje quea huiso bejjo sosejje. O chacomeejji poaniya quea huiso bejjo jjeshe canaje epona niñepoquiya huohui cani sosejje. ¹⁷ Ma epona niñepoqui Pabo quishishijji poquinaje. Taaa poquinaje jama ba'a: —Jiquio dejja cuana Eyacuiñajji quea ca'a neeja echacojji poani. Onaaya miqianaya huohui cani esohui quea pame nee Jesosajo, ma ohuaya mimishi cuana cuijea'yo majje miqianaya ba'e tiitii mee caje'yo eyajo —jama taaa nishomeya poanaje ecuanaja quishishijji poquije.

¹⁸ Jama taaa majamaja nishomeya epona popoquinaje quea huiso cahuijo. Quijje Pabo quea quene po majje, jjanojjaquicuaji majje eshahua eponajo nequi huoojeacuayajea ca'yonaje jama ba'a: —¡Eshahua eponajo nequi cuayaqui'yocue! ¡A'a dobiqiu o'oyajji! Jesosa Quito nijjeya eyaya miya huoojeacuayajea'yaña —Pabohua acanaje.

Jjeyahua nei eshahua eponaja yamijo nequi cuayaqui'yonaje.

¹⁹ Ma ba majje eponaja echacomeejji poani quea quene nee nee poanaje Pabo nijje, Sinasi nijje pea'ai. Jama poanaje ba'a: —¡De! Jjeya epona shahuama'yo. Jamajjeya ojaya ba'yo jjima poaje ojaye nei ma onaa quijje nei acaje. Onajaya ecuanaja esosequia'yojji pojjeama ma eponaa huohui cani sosejje —poanaje epona chacomeejji poani.

Jamajjeya epona chacomeejji poaniya Pabo, Sinasi pea'ai iña canaje. Dojo canaje ojjaña aquiana quiajji equi yasijje. Jomajo Pinipo emeshi mese nijje miminaje, etii cuana nijje. ²⁰ Shomano emeshi mese huohui'ajja cañaquinaje jama ba'a: —¡Bacue! Jiquio Jodio dejja cuaa, Pabohua, Sinasiya pea'ai ojjaña cuana ecuanaja cuiñajji ba'e quea quene nee nee po mee cani. ²¹ E'e, oya cuaa pea ejjashahuabaqui'yojji huohui canaje. Pea eba'ejji huohui canaje. Jamaya pojjeama ecuanaja emeshi meseja esohui. Jamaya pojjeama Shomano

dejja cuanaja esohui pea'ai. Ecuana Shomano dejja cuana, jamajjeya Pabaja esohui jayojja jama yajji, ¿yajja e'ajji?

²² Majoya ojjaña dejja cuana cuajicuaji jebejenaje Pabo que. Quea quene nee ojjaña poanaje Pabo nijje, Sinasi pea'ai nijje. Emeshi mese cuana pea'ai quea quene po majje Pabaja daqui Sinasija daqui pea'ai oja ehusho ba'e iña'isajae canaje. Huohui canaje jama ba'a: —¡Pabo, Sinasi pea'ai cuiasejja neineicue acui sisisya! ¡Majoya e jeanobiajea meequicue ejjajejanobiaquiiji equi yasijje! —acanaje Pinipo emeshi mese cuaa.

²³ Jamajjeya Pabo, Sinasi pea'ai janobajjima nei cuiasejja huicha'a huicha'a canaje cuaa. Majoya oya cuana dojo canaje ejjajejanobiaquiiji equi yasijje jeanobiajeaa. Ejjajejanobiaquiiji equi cuiñajji jama acanaje ba'a: —¡iQuio dejja cuana jaahuana neineicue! ¡a'A cuayaqui mee'yojji! Poquiquehuajo aje mi oe cuiajea caje'yo emeshi mese cuaa —acanaje.

²⁴ Jamajjeya ejjajejanobiaquiiji equi cuiñajjiya ma esohui shajja'ajja majje quea mete poanaje. Pabo, Sinasi pea'ai ejjajejanobiaquiiji equi dojjo nei yasijje jeanobiajea canaje; quibo jeyochicha canaje acui tejee.

²⁵ Jamatii mecashono Pabo, Sinasi pea'ai Eyacuiñajji nijje mimi jaanaje. Sohuicuaya jaanaje pea'ai. Ojjaña cuaa ejeanobia jaa shajja'ajja canaje sohuicuaya jaa. ²⁶ Majoya meshi huehuahuehanaje janobajjima nei. Mei jiyo cuana huehuahuehua neineinaje pea'ai. Esecue cuana jamatii nequi jjaca'apejojeaquinaje. Ojjaña dejja cuana ejeanobia jaa jipichojeaqui'yonaje baa jiono cuana, de. ²⁷ Oja ejeanobia cuiña po'ani aje oe shequi'yonaje. Shequi'yo majje ba canaje ojjaña esecue cuana ejjaca'apejoqui'yo nequi. Ojjaña dejja ejeyojaa poqui'yonajejo poso metejeanaje. Baa iña canaje ejjaacuaqui'yojji nisho. ²⁸ Jamatii Pabo jama taaame poanaje ba'a: —¡a'A e jjaacuaqui'yojji! Ecuana yani ojjaña tii; poqui'yo jjima —Pabo poanaje.

²⁹ Pabaja esohui shajja'ajja majje equi ejjanobiaquiiji cuiñajji taananaje jama ba'a: — ¡Cuaquiiji oe yecue! —poanaje.

Cuaquiiji iña majje ejjajejanobiaquiiji dojjo huasijje cuajicuajipoquinaje Pabo baa. Pabo ba majje ecui'oshajjajo nequinaje. Quea mete jjejojo piopionequinaje. Ojaya eba Pabo, Sinasi pea'ai Eyacuiñajji epejji cuana. Jamajjeya oya cuanajo quea mete nee poanaje. ³⁰ Majoya ohuaya Pabo, Sinasi pea'ai ejjajejanobiaquiiji dojjojo nequi dojocuayaqui ca'yanaje. Oja equi yasijje dojo canaje. Huohui'ajja cañaquinaje jama ba'a: —Epejji cuana, ¿aya acuae ecuea mimishi cuana cuijea caje'yo so'o? ¿Yajja po majje acuae mo poquije'yo eyahuasijje? ¿Yajja acuae po caji cuaqui yasijje poqui'yo jjima epojji? — acanaje ejjajejanobiaquiiji cuiñajji poaniya.

³¹ —E'e —Pabo poanaje—, Emeshi Mese nei quea pame Jesosa Eyacuiñajji huoojea'yo ojjaña jaahuanajji. ¡Onijje mimicue, onijje japee neineiquicue! ¡Ojaya esohui jayojja jama ba'ecue! Jamajjeya ohuaya miquea mimishi cuana cuijea caje'yo. Ojjaña miquea huapa pojjeama cuaa miquea equijo ba'eya jamaya ca'a cahua pea'ai. Jamajjeya mimishi cuijea'yo majje Jesosa miqúanaya ba'e tiitii mee caje'yo eyajo onijje —Pabohua acanaje.

³² Majoya Pabohua, Sinasi nijjeya esohui quea pame nee Jesosajo, Emeshi Mese neijo huohui canaje ojjaña ma equijo ba'eca cuanaja eshajja'ajjaji. ³³ Shajja'ajja majje ejja-jeanobiaquiiji cuiñajjiya ecua sii Pabaja edaasa, Sinasija edaasa pea'ai shacua canaje. Shacua majje shicui canaje mechashono nei. Majoya oya, ojjaña ojaya huapa pojjeama cuana nijje pea'ai Jesosa nijje jjapeequinaje. Majoya oya, ojaya huapa pojjeama cuana pea'ai Eyacuiñajji besa mee canaje enajo. ³⁴ Majoya ohuaya Pabo, Sinasi pea'ai oja equi yasijje dojodobiaqui majje oya cuana bobia canaje. Oya, ojaya huapa pojjeama cuana pea'ai quea bihui nee nee poanaje Jesosa nijje jjapeequi majje, Eyacuiñajji nijje pea'ai.

³⁵ Majoya mecajeahua nei Shomano emeshi mese cuaa sohuinano cuana huoojea canaje ejjajejanobiaquiiji equi yasijje jama huohuime yajji ba'a: —¡Pabo, Sinasi pea'ai pichojea'yocue!

³⁶ Jamajjeya ejjajejanobiaquiiji cuiñajjiya Pabo huohui canaje jama ba'a: —Pabo, Shomano emeshi mese cuaa miqúanaya pichojea mee ca'yonaje. ¡Jjeyahua nei esecue yasijje cuayaqui'yocue! ¡Quea bei nee poquicue, Pabo, Sinasi! —acanaje ejjajejanobiaquiiji cuiñajjiya.

³⁷ —Chojja —Pabo poanaje—. Ecuana mimishi'ama. Jamatii Pinipo emeshi meseya ecuana iña mee canaje. Jeanobiajea mee canaje pea'ai. Ojjaña ba caquinaje onaa janobajjima nei cuiasejja caqui. Ecuana ca ca Shomano dejja pea'ai. Jamajjeya jjeyahua nei ecuana quehuajje nei huoojea sa acani. Chojja, de. Oya cuana capoe'yahua, oya tii. Shomano emeshi meseya ecuana capichojea ca'yahua, ecuana cadojocuayaqui ca'yahua esecue yasijje ojjaña ebajji —Pabo poanaje.

³⁸ Jamajjeya sohuinano cuana poquinaje. Shomano emeshi mese cuana huohui cañaquinaje Pabaja esohui. Shajja'ajja majje Shomano emeshi mese cuana quea mete nee nee poanaje: —E'e de, Pabo, Sinasi pea'ai Shomano dejja cuana, de. Jamaya ecuana ja ba

jjima. Shomano emeshi mese etiya ecuana tecuea ca chana' —poanaje Pinipo emeshi mese cuana.

³⁹ Jamajjeya Pinipo emeshi mese cuana ma Pabo cuiasejja meejji epo poquinaje Pabo baa, Sinasi baa pea'ai. Quea bei nee nee huohui canaje jama ba'a: —Pabo, Sinasi, ecuana quea yeno nee nee miqiyana cuiasejja mee epojjiyojo. ¡A'a che ecuana nijje quea quene nee pojjil! ¡Jjeya quea bei cuayaqui'yocue! ¡A'a jiquio cuiñajjijo esohui huohui o'oyajji! —acanaje Pinipo emeshi mese cuana.

Majoya oya cuaa Pabo, Sinasi pea'ai pichojea ca'yonaje. Jama acanaje ba'a: —E'e pojjia miya pea meshi yasijje poquijje esohui huohuiya —jama amajjeya huoojea canaje quea beiya.

⁴⁰ Jamajjeya Pabo, Sinasi pea'ai ejjaeanobiaquiiji equijo nequi poqui o'oyanaje Ninijaja equi yasijje. Ojjaña Jesosaja epeeji cuana ba o'oya majje ojjaña nijje miminaje; poquinaje. —E'e, poquia ña. ¡Jesosa nijje quea pame nee jjapeequicue mete'ama! —Pabo poanaje, Sinasi pea'ai.

17

Pabo Tesanonica cuiñajji yasijje poquinaje

¹ Jamajjeya Pabo, Sinasi pea'ai Pinipojo ani poquinaje Tesanonica cuiñajji yasijje. Poquijeya Apiponi cuiñajji yejje canananaje, majoya Apononia pea'ai yejje canananaje. Tesanonica huasijje poqui majje aniñaquinaje. Jomajo Jodioja equi ojee ejjachichaquiiji yani. ²⁻³ Ma equi yasijje Pabo poquinaje Sinasi nijje. Ojjaña ejomishocajji pojjajo Jesosaja esohui huohui huicha'a huicha'a canaje. Jodio cuana nijje jjamimicuijaje nobiajeaquinaje pea'ai. Beshahua nei oe ba'ime Eyacuiñajjija esohui huohuiiji yahuajo nei ba'eja esohuijio ohuaya Tesanonica dejja cuana jjabahuejjaqui mee canaje. Jama acanaje ba'a: —Eyacuiñajjija huoojea'yo ojjaña jaahuanajji esejo quea nee poanaje. Mano'yonaje eseja mimishi cuijeya'yojji. Mano'yo majje shequi o'oyanaje. Eyacuiñajjija huoojea'yo ojjaña jaahuanajjijo, Jesosajo, eyaya huohuaña miqianajaya eshajja'ajjaji —Pabohua acanaje.

⁴ Pabojaja esohui shajja'ajja canaje quea huiso Jodio cuana. Jjapeequi'yonaje Jesosa nijje. Pabo nijje, Sinasi nijje pea'ai jjapeequinaje. Quea huiso Jieno cuana ma yahuajo nei Eyacuiñajjija epeeji epo cuana Pabo nijje jjapeequinaje, Sinasi nijje pea'ai. Etií cuanaja ehuanase cuana Jesosa nijje jjapeequi'yonaje pea'ai. ⁵ Jamajjeya quea huiso nee Pabo nijje jjapeequiani ba majje Jodio etií cuana quea quene poanaje. Quea huiso dejja mimishi cuana iyaa canaje. Quea huiso jjachichaqui mee canaje. Ojjaña quea quene, quea shajjaquiiji nee nee po mee canaje. Majoya ojjaña cuana Jasonija equi yasijje cuajicuañjebenaje Pabo, Sinasi pea'ai cuiaa nisho. ⁶ E'e, oya cuaa Pabo, Sinasi pea'ai sa'ajja canaje. Chama' ba majje equi mese Jasoni bajjani ña canaje. Jesosaja epeeji cuana ña canaje pea'ai. Dojo canaje dejja etií cuana huasijje tecueaa. Janobajjima nei taaa majamajanaje jama ba'a: —Pabohua, Sinasiya pea'ai quea huiso cuana pea esohui huohui canaje. Oya cuana jiquiacua poeyanaje pea'ai esohui huohuiya. ⁷ Jasoniya ca ca oma oya cuana oja equijo ba'e mee canaje. Oya cuana ecuanaja emeshi mese etiya, Sesa bajjanija esohui shajja'ajja sa po'yo ajja. Oya cuaa ca ca huohui canaje pea emeshi mese nei yani, Jesosa bajjani —jama siajje ameya acanaje Jodio cuaa Tesanonica'yo ba'e cuaa.

⁸ Ojjaña Tesanonica'yo ba'e, cuiñajji mese cuana pea'ai quea mete nee nee poanaje ma esohui shajja'ajja majje. ⁹ Jamajjeya Tesanonica mese cuaa Jasoni, oja epeeji cuana pea'ai tecuea canaje jama ba'a: —¡Pabo, Jesosaja epeeji cuana pea'ai a'a miquea equi yasijje dobi mee o'oyajji! ¡Huoojeacue oe!

Majoya Jasoni, ojaya epeeji cuana pea'ai bejjo sose quia mee canaje ejeacuaya'yojji. Ma sosequia majje Jasoni ojaya epeeji cuana nijje poqui'yonaje.

Pabo, Sinasi pea'ai Benea meshi yasijje poquinaje

¹⁰ Jamajjeya ma mecajje tii Tesanonica'yo ba'ecaa, Jesosaja epeeji cuaa Pabo, Sinasi pea'ai huoojea canaje Benea meshi yasijje. Benea cuiñajji yasijje poqui majje Pabo, oja epeeji cuana nijje poquinaje Jodioja equi ejjachichaquiiji yasijje. Esohui huohui ca o'oyanaje. ¹¹ Jodio cuana Beneajo ba'e quea pame nee, Jodio cuana Tesanonica'yo ba'e jayoja jama pojjeeama. Oya cuaa ca ca oe Pabojaja esohui quea bihui nee nee shajja'ajja canaje, Sinasija esohui pea'ai. Majoya Eyacuiñajjija esohui yahuajo nei tehue ba neinei canaje. Jama poanaje ba'a: —E'e, Pabojaja esohui e'e nei. Jamaya Eyacuiñajjija esohui yahuajo nei tehue poani e'e jojo nei —poanaje cuana.

¹² Jamajjeya quea huiso nei Beneajo ba'eca Jesosa nijje jjapeequi'yonaje. Quea huiso Jieno cuana jomajo ba'e pea'ai Jesosaja epeeji cuana poanaje. Jieno epona cuana quea huiso pea'ai Jesosa nijje jjapeequi'yonaje, epona quea pame nee cuana, etií cuanaja ehuanase cuana.

¹³ Jamatii Jodio dejja cuana Tesanonicajo ba'e onaaya huohui canaje jama ba'a: — Pabohua Jesosaja esohui huohui cani Beneajo pea'ai.

Ma shajja'ajja majje oya cuana poeyanaje Benea huasijje; Pabo ocuena canaje ecuiajji nisho. ¹⁴ Ma ba majje ca ca Jesosaja epeeji cuaa Beneajo ba'eya Pabo quehuadojo canaje bae ai yasijje. Sinasi ca ca Beneajo tii nequi'yonaaje Timoteo nijje. ¹⁵ Jamajjeya Jesosaja epeeji cuaa Pabo dojo canaje, Atena cuiñajji yasijje besapoquinaje. Majoya Pabohua oya cuana huohui canaje jama ba'a: —¡Ecuena epeeji Sinasi, Timoteo pea'ai huoojeacue jiquiacua jyehua nei! Oya poeyajo eyaya ishoaje jiquiojo —Pabo poanaje.

—E'e, huohuiñajje'yo aje ecuaaya. Poqui'ya iña —amajje oya cuana poqui o'oyanaje Benea huasijje.

Atenajo Pabohua esohui huohuiqui canaje

¹⁶ Jamajjeya Pabohua Atenajo aniya ojava epeeji ishoa'ajja canaje, Sinasi, Timoteo pea'ai. Atenajo aniya Pabohua ba canaje quea huiso nee nee eyacuiñajji nisho, epana'yo cuana bihuia cani. E'e, ojjaña ma cuiñajji ba'eca cuaa pea epana'yo bihuia caqui ba majje Pabo quea quene nee nee poanaje. ¹⁷ Jamajjeya Jodioja equi ejjachichaquijji yasijje Pabohua esohui huohui huicha'a huicha'a canaje. Quea huiso miminaje Jodio cuana nijje, Jodio pojjeama nijje pea'ai jaya Eyacuiñajji esohui bajji cuana nijje. Ojjaña pojjaajo aquiana quiajji equi yasijje poqui majje Pabohua esohui huohui canaje ojjaña cuana huasijje. ¹⁸ Majoya pea cuana Epiconeoja esohui shajja'ajjajji, Esitoicoja esohui huohuijji pea'ai onijje miminaje quea huiso. Jjamimicuijae nobiajeaquinaje. Pabo nijje mimi majje beca cuana jama poanaje ba'a: —¡Iquio dejjaa Pabo bajjaniya pea esohui huohui cani, de. ¿Ajeo shai oya mimiani so'o? Ecuanaajaya Paboya esohui shajja'ajja jjima. Quea quehua, de.

Pea cuaa ca ca jama acanaje ba'a: —Ohuaya pea eyacuiñajji cuanajo huohui cani pojja'a, ma eyacuiñajji ecuanaja ba jjimajo —acanaje cuaa.

Pabohua Jesosajo huohui canaje jama ba'a: —Eyacuiñajji Jesosa emano'yojaa shequi mee ca o'oyanaje. Jamajjeya ohuaya dejja cuana shequi mee caje'yo —Pabohua acanaje.

Ma esohui Atena cuanaja quea quehua, yahuajo shajja'ajja jjimajojo. ¹⁹ Jamajjeya ohuaya Pabo dojo canaje Aneopaco eyiyo huasijje esohui huohui meeya. E'e, ma eyiyo huasijje ojjaña cuana jjachichaquinaje ojjaña huohui caje esohui shajja'ajjaa. Jamajjeya Pabo poeyajo, jama acanaje cuaa ba'a: —E'e, ecuaana miquea esohui shajja'ajja sa poani. ²⁰ Ma ehuhui'yo eyacua pojja'a. ¡Ojjaña huasijje huohui neineicue! —acanaje cuaa—. E'e, qui'ajjaya ecuanaja esohui ba jjima yahuajo. ¡Ba meecue mo oe! —poanaje.

²¹ (E'e, ojjaña Atenajo ba'eca cuana, ojjaña jaya Atena huasijje poeyani anicuaa pea'aiya ehuhui'yo eyacua shajja'ajja sa acanaje ojjaña pojjaajo. Esohui eyacua huohui canequinaje quea huiso neeya. Jamatii mimimiminequinaje ojjaña cuana, chaco chaco jjima poanaje.)

²² Jamajjeya Pabohua Aneopaco eyiyo nequiya ojjaña huohui canaje jama ba'a: —Dejja cuana Atenajo ba'e cuaa, ¡shajja'ajjacue jiquio eya huohuije, miquianaaya! Miquianaaya quea huiso nee jjashahuabaquiani eyacuiñajji cuanajo. Jamaya ecuea eba. ²³ E'e, eya po'ayequequinaje. Eyaya banaje quea huiso epana'yo cuana, ma miquianaa bihuiaña. Majoya eyaya banaje pea'ai mei e'iyasohua ao ani pea'ai eyacuiñajji bihuiajji; ma miquianaaya “Bajjani ba jjima” tehuenaje. Miquianaaya maya Eyacuiñajji bihuiaña, jamatii miquianaajaya oya ba jjima. Ma Eyacuiñajji neiyo eyaya esohui huohuaña miquianaajaya ebajji. ²⁴ E'e, yahuajo nei nei Eyacuiñajjiya jiquio meshi pana ca poa. Ojjaña aquiana cuana oja pana pea'ai, de, ojjaña tii. Oya ca ca oe Emeshi Mese nei, ojjaña huoojea'yojji, ojjaña eyajo ani, ojjaña meshi cuanajo nequi huoojea'yojji pea'ai. Jamajjeya Eyacuiñajji equijo ba'e ajja, eseja iya equijo ba'e ajja oya. ²⁵ Eseyaya oya jaahuana ajja, de; oya esejaya eba'esahuajji pojjeama pea'ai. Chojja, ohuaya ca ca oe eseya ojjaña cuana eshe po mee ca'yani; ba'e meesahua cani. Ojjaña aquiana cuana, bobi pea'ai ohuaya quia cani eseya.

²⁶ Yahuajo nei nei Eyacuiñajjiya oe dejja pana ca poa. Ma dejja ojjaña eajji poa; ojjaña cuana ojjaña meshi cuanajo ba'eca cuanaja baba. Tehuetehue cuanaja baba, pea dejja cuanaja baba, ojjaña ese eja cuanaja baba pea'ai poanaje Adana. Eyacuiñajjiya ojjaña cuana jjabae'chejequijji mee ca poa ojjaña meshi cuana huasijje. E'e, yahuajo nei Eyacuiñajjiya huohui ca poa jama ba'a: “Ma dejja cuana ba'e caje ma meshijo, pea jomajo. Ma shequiaya huisome tii pea meshi cuanajo ba'e caje cuana” aca poa Eyacuiñajjiya. ²⁷ Jamaya Eyacuiñajjiya amee canaje ojjaña cuana ojo ejjashahuabaquijji, onijje ejjapeequijji. Jamaya Eyacuiñajjiya eseya sa cani ojava epeeji pojji. Jamatii oya huesha'ama, quea chipi nee ani tii tii, ojjaña ese chipi nei ani. ²⁸ E'e, yahuajo miquianaajaya esohui tehuiejjiya tehue ca poa jama ba'a:

“Eyacuiñajji yanijo eseya eshe nequi. Ohuaya eseya ba'e meesahua cani, chaco meesahua cani pea'ai. Oja pana jjima jjemo eseya chama' pome. Ojjaña eseya Eyacuiñajjiya bacua cuana, oja pana pea'ai”.

Jamaya yahuajo nei tehue ca poa —Pabo poanaje.

²⁹ —Jamajjeya eseya oja bacua cuana poaniya, oja pana poaniya ¿apiojji acuae oya miqiuanaaya ba jjima aña so'o? ¿Apiojji acuaeya Eyacuiñajji mei huo'o epana'yo, mei oshe epana'yo, mei ca'la epana'yo jayojja jama poso aña so'o miqiuanaaya? Chojja, Eyacuiñajji miqiuanaaya epana'yo jayojja jama pojjeama. ¡Meshi epana'yo nequi jayojja jama poso a'a ajji, de! ³⁰ Yahuajo nei dejja cuanaja Eyacuiñajji ba jjima poa. Jamatii Eyacuiñajjija oya cuana napa jeyojeyo jjima poa oja mimishi cuanajo. Jjeya ca ca ohuaya ojjaña cuana huohui canaje jama ba'a: “¡Miquea mimishi cuana pajea'locue! ¡Enijje jjapeequicue! ³¹ E'e, quijje eyaya ecue huoojea'yo ojjaña jaahuanajji Jesosa huoojeaje. Ojjaña ojaya eba quea ja'a nee. Jamajjeya ohuaya ojjaña sosequia caje ma oya cuaa acanaje sosejje. Joya quea pame nee ba'enaje ohuaya quea bihui nee ba'e tiitii mee caje'yo. Mimishi cuana ca ca oe quea nee nee tii tii poaje'yo” aca poa Eyacuiñajjija —Pabo poanaje.

—Jamajjeya Jesosa mano'yajo Eyacuiñajjija oya shequi mee ca o'oyanaje. Jamaya ohuaya ojjaña cuana ba mee canaje jiqui esohui Jesosajo e'e nei —Pabo poanaje.

³² Eyacuiñajjija dejja cuana shequi mee ca o'oyanaje Pabo poajo shajja'ajja majje quea huiso dejja cuana soa neineinaje shajja'ajja sa po ajja jjejojo. Pea cuaa ca ca Pabo huohui canaje jama ba'a: —Quijje ecuaaya miquea esohui shajja'ajjae o'oya —acanaje cuaa.

³³ Majoya Pabo esohui huohuina'yo majje poqui'yonaje. ³⁴ Beca cuana Pabo nijje poquinaje. Ojaya esohui shajja'ajja majje Jesosa nijje jjapeequi'yonaje. E'e, Aneopaco meshi cuiñajji Dionisio bajjani, oe epona Damanisi bajjani, pea cuana pea'ai Jesosa nijje jjapeequi'yonaje.

18

Pabo Conitio huasijje poquinaje

¹ Majoya Pabo Atenajo nequi poquinaje Conitio cuiñajji yasijje ejiojjijje. ² Conitiojo ohuaya Jodio dejja Aquina bajjani ba canaje. Aquina aje Jodio dejja, Ponito meshijo cuaya. Yahuajo Ponito meshijo ba'e oya poquinaje Itania meshi yasijje. Shoma cuiñajjijo ba'enaje. Majoya Itania meshi meseya Canio bajjaniya ojjaña Jodio cuana Shomajo ba'e huoojea canaje pea cuiñajji cuana huasijje: —Jodio cuana, Shomajo ja'a ba'ejji! ¡Poquicue miqiuanaaya ojjaña! —acanaje Shoma meshi mese Caniohua.

Jamajjeya Aquina oja huanase Pisina nijje poeyanaje Conitio huasijje ba'eya. Jamajjeya Pabo Conitio huasijje poe majje poquinaje Aquina baa. ³ Pabo daqui moo equi socojji poanaje; Aquina pea'ai daqui moo equi socojji. Jamajjeya Pabohua Aquina nijjeya daqui equi cuana soco canaje ojaya equijo, Aquinaja equijo. ⁴ Ojjaña epojja ejomishocajjijo Pabo Jodioja equi ejjachichaquijji yasijje poquinaje esohui huohuiya. Eyacuiñajjija esohui Jesosajo huohui canaje Jodio cuana huasijje, Jodio pojjeama cuana huasijje pea'ai. Jama acanaje ba'a: —Jesosa Eyacuiñajjija huoojea'yo ojjaña jaahuanajji e'e jojo nei —Pabohua acanaje.

⁵ Majoya Paboya epeeji Sinasi, Timoteo nijje Masenonia meshijo nequi Benea cuiñajjijo esohui huohui ponequinaje, poeyanaje Conitio huasijje Pabo baa. Timoteo, Sinasi pea'ai poeyajo, Pabohua Eyacuiñajjija esohui Jesosajo huohui majamaja canaje Jodio oo pana huasijje: —Jodio cuana, ¡bacue! Jesosa e'e jojo nei Eyacuiñajjija huoojea'yo ojjaña jaahuanajji —Pabohua huohui tiitii canaje.

⁶ Jamatii Jodio dejja cuana Pabo nijje jjamimicuijae nobiajeaquinaje ma esohuijo. Pabo nijje mimijajinaje pea'ai. Jamajjeya quea tecue po majje Pabohua oja daqui ao jjequi'yajja canaje. Jamaya ohuaya ojjaña ba mee canaje ma Jodio dejja cuana quea mimishi nee nee, shajjama' nei nei. Majoya Pabohua jama acanaje ba'a: —Shajjama' nei nei ca mi coma. ¡Shajjama' poanijo Eyacuiñajjija miqiuanaaya canapa cahua! Eyaya miqiuanaaya ojjaña Eyacuiñajjija esohui e'e nei Jesosajo huohuinaje. Jamajjeya mi jshajja'ajjaquijjo eyaya miqiuanaaya jeajejanaje'yo. Jjeyahua nei eya poquije'yo Jodio pojjeama cuana sohuihuohuiya —Pabohua acanaje.

⁷ Jamajjeya Jodioja equijo nequi cuayaqui'yo majje Pabo poquinaje Tito Jositoja equi yasijje. Tito Eyacuiñajjija epeeji Jodio pojjeama. Ojaya equi Jodioja equi ojee ejjachichaquijji pejejo nequi che chipi nei. ⁸ Jodioja equi ejjachichaquijji cuiñajji Quisipo ca ca Emeshi Mese nei Jesosa nijje jjapeequi'yonaje. Oja huapa pojjeama cuana oja equijo ba'e cuana pea'ai Jesosa nijje jjapeequi'yonaje. Quea huiso cuana Conitiojo ba'e pea'ai Paboya esohui shajja'ajja majje Jesosa nijje jjapeequi'yonaje. Jamajjeya pea cuaa oya cuana besa mee canaje Eyacuiñajjijo enajo.

⁹ Majoya oe mecajje Pabo cahuijaajo, Emeshi Mese neiya Jesosaa oya jjacahuibaqui mee canaje jama ba'a: —Pabo, ja'a quea mete pojji! ¡Ecuae esohui a'a huohui pajea'yojji! ¡Huohui tiitii'cuae! ¹⁰ Eya minijje nequianijo, pea cuaa miya enapajji pojjeama. Esapa jahahuejjajajjiji

pojjeama. E'e, jiquio cuiñajjijo ecuea epeeji quea huiso yani —jamaya Jesosaa Pabo jjacahuibaqui mee canaje.

¹¹ Jamajjeya Pabo Conitiojo nequinaje; beshahua nei becanejjijji pea'ai daqui sheme epo nequinaje. Eyacuiñajjija esohui Jesosajo huohui canaje quea huiso cuana jomajo ba'ēja eshajja'ajjaji.

¹² Majoya deja Canio bajjani Acaya meshi mese poanaje, Shomano emeshi meseja echacojji. Ma pojajajo Jodio cuana quea huiso mimijaji sa poanaje Pabo nijje. Jjachichaqui majje Pabo iña canaje; dojo canaje emeshi mese Canioja equi yasijje Canioja enapa meeji nisho. Esohui huohuijijjojo Pabo niñeba canaje cuaa jama ba'a: ¹³ —Jiquio dejjaja Pabo bajjanija esohui eyacua. Ecuanaja etiQUIIANA Moisesija esohui jayojja jama pojjeama ohuaya ojjaña cuana Eyacuiñajji bihuia mee sa acani. Moisesija esohui pajea mee sa acani pea'ai —acanaje Jodio etii cuaa.

¹⁴ Pabohua beshahua nei saja'a canijo emeshi mese Caniohua Jodio cuana tecuea canaje jama ba'a: —Jodio cuana, ¡shajja'ajjacue mo! Jiquio deja Pabo quea mimishi poani jjojemo eyaya miQUIANAYA shajja'ajja'yome. ¹⁵ Jamatii oya mimishi ajjima'; eya onijje quea quene pojjeama. MiQUIANAYA ca ca oe quea quene poani oja esohuijo. Miquea etiQUIANAJA esohui cuanao ca ca oe miQUIANAYA mimipanajajiani onijje. Jamajjeya ¡poquicue! Eyaya ehuhuijji pojjeama Pabojjo. Miquea esohui o tecueajji shajja'ajja sa po'yo ajja. ¡MiQUIANAJA ejjashahuabaqui'yojji jayojja jama acue Pabojjo! —acanaje emeshi mese Caniohua.

¹⁶ Caniohua quea tecue nee po majje Jodio cuana huoojeacuayajea ca'yonaje esecue yasijje. ¹⁷ Esecue yasijje cuayaqui'yajo Jodio pojjeama Jodioja equi ejjachichaquiiji cuiñajji Sosekene iña canaje. Cuiasejja neinei canaje Canio cojja nei. Jamatii emeshi mese Canio mimijajiqui baja sa po ajja poanaje: —Jamatii —poanaje oya.

Pabo Antioquia huasijje poqui o'oyanaje

¹⁸ Jamajjeya Pabo oja epeeji cuana nijje Conitiojo esohui huohui ponequinaje quea cahui huiso nee. Majoya ohuaya Aquina nijjeya, Pisina pea'ai nijjeya ojjaña Jesosaja epeeji cuana Conitiojo ba'e jña ca'yonaje: —Poquia iña —amajje oya cuana poQUINAJE bae sahua huasijje. Ebishe mese sosequia canaje Sinia meshi yasijje ebesapoqui'yojji, quea huesha nee. Bishe ai yasijje ani jjimahuua Pabohua ehujja dedejea mee canaje. E'e, ohuaya yahuajo huohui canaje jama ba'a: —Eyaya esapa dedepojijeaje ojjaña ebajji eyaya ma ecua eya yahuajo Eyacuiñajji nijje miminaje jayojja jama ajeyo'yonaje —Pabohua acanaje. Jamaya yahuajo nei Jodio cuaa acaninaje.

¹⁹ Majoya Pabo, Aquina nijje, Pisina pea'ai nijje Epeso cuiñajji yasijje besapoquinaje bishejje. Pabojja epeeji cuana Aquina, Pisina pea'ai nequinaje Epesojo. Pabo Jodioja equi ejjachichaquiiji yasijje poqui majje dobiQUINAJE Jodio deja cuana esohui quea pame nee Jesosajo huohuiya. ²⁰ Shajja'ajja majje Jodio cuana onijje jama poanaje ba'a: —Pabo, ¡jiquiojo ecuaa nijje nequicue! ¡Ecuana sohuihuohuicue quea cahui huiso nee! —poanaje ma Jodio cuana.

Jamatii Pabo nequi jjima poanaje. ²¹ Poqui jjimahuua oya cuana huohui canaje jama ba'a: —Eyacuiñajjiya huoojea cajje eya poeje o'oya miQUIANA baa. Quijje poeje o'oya —acanaje Pabohua.

Majoya bishe ai yasijje ani o'oya majje Pabo Epesojo esohui huohui poequi besapoquinaje Jodea meshi yasijje.

²² Sesanea huasijje ba'eñaqui majje Pabo etaja huasijje nequisohuaquinaje. Majoya poQUINAJE Jenosanena huasijje. Jenosanena bañaqui majje Jesosaja epeeji cuana ba canaje. Pabohua oya cuana huohui canaje quea bei neeya: —E'e, ¿achajja a nequiana ani so'o? —poanaje Pabo.

Majoya ma ba majje oya Jenosanenajje jjayejequinananaje. Poqui'yonaje Atioquia huasijje ejtojijje. ²³ Quea cahui huiso nequinaje AtioQUIAJO. Majoya oya poqui o'oyanaje Janata meshi yasijje, Pichia meshi yasijje pea'ai. Ma meshi cuanao Jesosaja epeeji cuana esohui huohui o'oya majje ojjaña quea ja'a nee jjapeequi meesahua canaje Jesosa nijje.

Aponohua esohui huohui canaje Epesojo

²⁴ Pea Jodio deja Apono bajjani poeyanaje Epeso cuiñajji yasijje. Yahuajo Apono Ane-jania cuiñajjijo ba'e. Oya esohui huohuijji quea pame nee; Eyacuiñajjija esohui etehue'yo ojaya eba nei nei. ²⁵ Yahuajo onaaya oya huohui canaje esohui quea pame nee Emeshi Mese nejjo, Jesosajo. Majoya ohuaya bicho'ama esohui huohui canaje e'e jojo nei Jesosajo. Jamatii Huanija, ma ona besameejji poanija esohui ca ca oe ojaya eba, Aponoja. ²⁶ Ohuaya esohui huohui canaje Jodioja equi ejjachichaquiijjo quea huiso nee. Oja esohui shajja'ajja majje Pabojja epeeji Aquinaa, oja huanaesaya pea'ai Apono dojo canaje equi yasijje. Majoya ohuaya Apono ojjaña Eyacuiñajjija esohui Jesosaja epoe'yojjijo huohui canaje. Yahuajo

Aponoja ba jjima poanaje ojjaña Jesosaja esohui. ²⁷ Quijje pishana Apono Acaya meshi yasijje poqui sa poanaje. Jesosaja epeeji cuaa Atioquiajo ba'eya oya poqui meesahua canaje. Esohui quea pame nee ojo tehue canaje Jesosaja epeeji cuana Acaya meshijo ba'eya ebajji. Majoya Acaya meshi yasijje poqui majje Aponohua Jesosaja epeeji cuana Jesosaja esohuijjo jshahuabaqui mee canaje. Ojjaña jaya Eyacuiñajjiya Jesosa niije jjapeequi meesahua canajeya, ojaya quea jea nee neeya shajja'ajja canaje. ²⁸ Jamajjeya pea cuaa ba canijo, Aponohua quea ja'a nee Jodio dejja cuana huohui canaje Jesosajo. Apono quea mimi ja'a nee poanaje. Jamajjeya ohuaya Jodio cuana mimiciuiajeanobiajea ca'yonaje. Aponohua Eyacuiñajjiya etehue'yo huohui neinei majje ojjaña ba mee canaje Jesosa e'e jajo nei Eyacuiñajjiya huoojea'yo ojjaña jaahuanajji poani.

19

Pabo Epeso huasijje poqui o'oyanaje

¹ Apono Conitiojo nequijjo Pabo eyiyo huasijje poquinaje, pea cuiñajji cuana huasijje. Esohui huohui capoquinaje. Majoya oya Epeso huasijje poqui o'oyanaje. Epesojo Pabohua Jesosaja epeeji cuana ma jjeja nei onijje jjapeequinaje ba cañaquinaje. ² Ba majje Pabohua oya cuana huohui'ajja canaje jama ba'a: —Epeeji cuana, ¿a'a Edojjoshahua Pame miqiana que dobiqui'yonaje Jesosa niije jjapeequinajjo?

—Chojja —saja'ame acanaje cuaa—, onajaya ecua huohui jjiima Edojjoshahua Pamejo.

³ Jamajjeya Pabohua huohui'ajja ca o'oyanaje: —E'e. ¿Ajea ehuhui jayojja jama po majje onaaya miqianaya Eyacuiñajjiyo besa mee canaje enajo?

Onaaya jama acanaje ba'a: —Huanija esohuijo onaaya ecua Eyacuiñajjiyo besa mee canaje— acanaje cuaa.

⁴ Majoya Pabohua jama acanaje ba'a: —Yahuajo mimishi cuana pajea ca'yajo, Huaniya pea cuana Eyacuiñajjiyo besa mee canaje enajo. Jamaya ohuaya acanaje ojjaña ebajji enajo ebasa cuaa mimishi pajea ca'yonaje. Huaniya ojjaña cuana huohui canaje jama ba'a: “Quijje eya esohui huohuijeyo'yajo, pea dejja poeje. Oya Eyacuiñajjiya huoojea'yo ojjaña jaahuanajji, Jesosa. ¡Onijje jjapeequicue!” jamaya Huaniya huohui canaje Jesosajo —Pabohua acanaje.

⁵ Pabojja esohui shajja'ajja canaje dejja cuaa. Shajja'ajja majje peaa oya cuana Eyacuiñajjiyo besa mee canaje enajo Jesosa niije jjapeequinajjo. ⁶ Majoya Pabohua onaja esapa biajje eme huana majje Eyacuiñajji niije miminaje Edojjoshahua Pame ojjaña que edobiquijji. Dobiqumajje Edojjoshahua Pameya oya cuana pea esohui mimi mee canaje. Eyacuiñajjiya esohui huohui mee canaje pea'ai. ⁷ Ma dejja cuana, Jesosaja epeeji cuana, ma jjeja nei onijje jjapeequinaje ome miji becanejjijji pea'ai huismo poanaje, 12 huismo.

⁸ Majoya Pabo poquinaje Jodio cuanaja equi ejjachicahuijji yasijje. Dobiqumajje ohuaya Eyacuiñajjiya esohui quea pame nee Jesosajo huohui canaje quea ja'a nee, mete'ama. Pea beca peejjima ba'ime ohuaya huohui huicha'a huicha'a canaje jama ba'a: —Eyacuiñajjiya huoojea'yo ojjaña jaahuanajji poeyanaje. Oya, Jesosa ojjaña huoojea'yojji quijje poaje Eyacuiñajji niije.

⁹ Quea huiso Jodio cuana quea sapa ca'a poanaje; shajja'ajja sa po'yo ajja. Oya cuana quea mimishi poanaje. Jesosa niñeba canaje ojjaña dejja cuana ma equijjo nequijja eshajja'ajjajji. Jamajjeya Pabohua ma dejja cuana jeajeana'yo majje Jesosaja epeeji cuana dojo canaje pea equi yasijje, esohui huohuijji Tinano bajjanija equi yasijje. Jomajo oya cuana sohuihuohui neinei canaje ojjaña pojajjo, Pabohua. ¹⁰ Jamaya Pabo poanaje becanejjijji pea'ai shequajame. Jamajjeya quea huiso cuaa Asia meshijo ba'eya Emeshi Mese nei Jesosaja esohui shajja'ajja canaje. Quea huiso Jodio cuaa, quea huiso Jodio pojjeama cuaa pea'ai shajja'ajja canaje.

Esemaja ebacua ejja cuana eshahua huoojeacuayajejji nisho poanaje

¹¹ Eyacuiñajjiya ohuaye nei ma dejja cuanaja ba jjima Pabo ameesahua canaje quea huiso. ¹² E'e, Pabo emanajaa cuana huaquia meesahua ca'yonaje, jjaajaqui meesahua ca'yonaje. Eshahua dejjajo nequi huoojeacuayajea mee ca'yonaje pea'ai. E'e, pea cuaa Pabojja aja sisi cuana, pañoeno dojo canaje emanajaa cuana huasijje. Maya emanajaa cuana biajje huana canaje cuaa ehuaquia mee'yojji. Quea aja nee po'yonaje ojjaña cuana. Eshahua cuana, o niñepoqui meejji poani pea'ai Jesosaa Pabo huoojeacuayajea mee canaje Pabojja aja sisi niñepoqui biajje iya cajo. ¹³ Jamajjeya Jodio cuaa pea'ai poquinananiya eshahua cuana dejja niñepoqui meejji poani ecuaa mee'yojji nisho acanaje. Oya cuana ca ca Jesosa niije jjapeequi jjiima. Jamajjeya eshahua cuana ohuaya jama huohuime acanaje ba'a: —Eshahua cuana, ecuaanaaya Pabo jayojja jamaa miya huohuifaña. Emeshi Mese neiya Jesosaa miqianaya huoojeacuayajea mee cani. ¡Jjeyahua nei cuayaqui'yocue! — acanaje Jodio cuaa.

¹⁴ E'e, Jodio Eyacuiñajji nijje emimijji etii Esemaja bacua ejja cuaa, me oejje beca cuaa eshahua cuana jamaya ehoojeacuayajea meeji nisho acanaje. ¹⁵ Eshahuaa ca ca Esemaja bacua ejja cuana jama acanaje ba'a: —Jesosa ecuea eba quea ca'a nee nee, Jesosaja epeejji Pabo ecuea eba pea'ai. Ecuea miya eba ca'a'ama, jamatii —acanjje eshahuaa.

¹⁶ Majoya jiquio eshahuaa dejja niñepoqui Esemaja bacua ejja cuana iña mee canaje, cuiajeabichajjea mee ca'yonaje, onajaya daqui isajea ca'yonaje pea'ai. Jamajjeya Esemaja bacua ejja cuana esecue yasijje cuayaquinananaje daquima', quea nee pea'ai.

¹⁷ Ma shajja'ajja majje ojjaña Jodio cuana, Jodio pojjeama cuana pea'ai Epesojo ba'e quea ajjajja nee nee poanaje jama ba'a: —E'e, ee. Jesosaa ohuaye nei eshahua cuana huoojeacuayajea cani. Oya quea ca'a nee nee poani. Ohuaya ojaya epeejji nei Pabo eshahua cuana huoojeacuayajea meesahua cani —jamaya Emeshi Mese nei Jesosa bihuia canaje quea huiso cuaa.

¹⁸ Majoya Jesosaja epeejji cuana quea bicho nee poanaje oja mimishi cuanajo, eshahua cuana nijje jjapeequianijo pea'ai. Jesosaja epeejji cuana jjachichaqui'yo majje mimishi cuana huohui canaje; quea bicho poanaje ojjaña: —¡Ecuana mimishi cuana pajea meesahua'yocue! —acanjje cuaa.

¹⁹ Joya yahuajo edasajji poanjeya, eyamiquecua cuaa pea'aiya ojaya esohui etehue'yo ejjadasiaguujji cuana, eshahua nijje acanijo pea'ai chicha'yo majje dahuaajea ca'yonaje. Ojjaña pea cuaa ba canaje. Ma papeni etehue'yo cuana quea nahue nee nee, quea sose huiso nee nee poanaje. (E'e, quea sose huiso nee, quea huiso nee nee huaca sosejje jayojja poanaje, 100 huaca yahue sosejje jayojja poanaje.) ²⁰ E'e, quea huiso cuaa, quea huiso meshijo ba'eca cuaa Eyacuiñajji esohui Jesosajo shajja'ajja canaje. Quea huiso nee Emeshi Mese nei Jesosaja epeejji poanaje.

Epesojo ba'e cuana Pabo nijje quea quene poanaje

²¹ Majoya Pabohua jjashahuabaqui majje jama poanaje ba'a: —E'e, Masenonia meshi yasijje eya poquije o'oya, Acaya meshi yasijje pea'ai ojjaña Jesosaja epeejji cuana baa. Majoya eya Jenosanena huasijje poqui o'oya sa poani pea'ai. Jenosanena huasijje poqui majje eya poqui sa poani Shoma cuiñajji yasijje pea'ai, e'e jojo nei —Pabo poanaje.

²² Jamajjeya Pabohua ojaya echacosahuajji cuana Timoteo, Enasato pea'ai huoojja canaje Masenonia meshi yasijje. Pabo ca ca nequinaje Epesojo, Asia meshijo. ²³ Pabo oe nei nequijo oja huohui'yo Jesosajo quea huiso cuana Epesojo ba'e quea quene nee nee poanaje onijje. ²⁴ E'e, jama poanaje ba'a: oe dejja Demetio bajjani mei oshe pana nejji Epesojo ba'enaje. Ohuaya o chacosahuajji cuana nijjeya quea huiso epana'yo sisi cuana Diana nisho bajjani ne canaje. Maya Epesojo ba'e cuaa bihuia canaje, eyacuiñajji poso acanjje cuaa. Demetiohua, o chacosahuajji cuaa pea'ai Diana nisho quea huiso nee canaje. Ne majje quea huiso ejjesheji jjeshe canaje Diana nisho sosejje. ²⁵ Jamajjeya Demetiohua o chacosahuajji cuana iyaa canaje o que. Pea cuana o jayojja jama epana'yo nejji epo iyaa canaje pea ai. Jjachichaqui'yo Demetiohua oya cuana huohui canaje jama ba'a: —Epeejji cuana, ¡shajja'ajjacue mo! Ecuanaaya epana'yo sisi ne majje quea huiso bejjo jjesheña epana'yo cuana sosejje. Jamaya miquianajaya eba. ²⁶ Miquea eba Pabojja esohui pea'ai. Ohuaya jama acani ba'a: “Epana'yo cuana dejjaja pana, Eyacuiñajji pojjeama. ¡A'a epana'yo cuana bihuiajji! ¡Eyacuiñajji oe nei bihuiaacue!” Pabohua acani. Pabojja esohui shajja'ajja majje quea huiso cuana Epesojo ba'e, Asia meshijo ba'e pea'ai epana'yo cuana jjeshe maja sa po'yo ajja poanaje. ²⁷ E'e pojja'a ojjaña esheja nejo mimijaji caje. Epana'yo cuana bihuia pajea caje'yo pojja'a. Epana'yo quea quemo nee Diana bajjani bihuia pajea caje'yo, oja equi yasijje poqui pajea. Jjeya ojjaña cuaa Asia meshijo ba'eya, ojjaña meshijo ba'eca cuaa pea'ai epana'yo Diana bihuia cani, eyacuiñajji poso acani Diana —jamaya huohui canaje Demetiohua. Jamatii ojaya esohui sijaje, de.

²⁸ Demetioja esohui shajja'ajja majje ojjaña cuana quea quene nee nee poanaje. Jama taaame poanaje ba'a: —Diana eyacuiñajji jayojja quea pame nee. Epesojo enequi oya —jamaya taaa neinei nequinaje ojjaña.

²⁹ Jamajjeya ojjaña cuana Epesojo ba'e cuajicuajjebenaje taaacui baa. Ojjaña quea shajjaquijjo nee nee, quea mase nee nee poanaje. Pabojja epeejji iña majje dojocuaijjea ca'yonaje equi esohui huohui cani yasijje. Ma epeejji cuana Jayo bajjani, pea Anitaco. Oya cuana Masenonia meshijo ba'e. ³⁰ Shajja'ajja majje Pabo poqui sa poanaje dejja quea quene yasijje mimiya. Jesosaja epeejji cuaa ca ca oya nahue canaje. Jama poanaje ba'a: —Chojja, Pabo, ¡a'a poquijji jocuama! Miya shajja'ajja jjiima acaje cuaa. Cuia ca chana' cuaa mi —acanjje.

³¹ Pea cuana emeshi meseja meshi cuiñasahuajji cuana Asia meshijo ba'e Pabojja epeejji cuana poanaje. Ohuaya esohui tehue majje huoojja canaje Pabo que jama ba'a: —¡A'a

poquijji miya esohui huohui cani yasijje! —jamaya tehue canaje Paboya epeejiya, emeshi meseja echacojji cuaa.

³² Deija cuana ma equijo ejjachichaqui nequi quea shajjaquijjo nee nee taaa canaje. Quea huiso cuana oe esohui taaa canaje. Pea cuana ca ca pea esohui taaa canaje. Quea huiso cuana jamatii jjachichaquinaje. Jama poanaje ba'a: —¿Ajeo acuae ojjaña taani? ¿Ajeo jjachichaquinaje eseya so'o? —acanafe.

³³ Majoya Jodio cuaa Anejano huoojea canaje; ojjaña ejjatanacuaquijji ehui dojojji nequinaje. Onaa Anejano taaa canaje; huohui canaje ojjaña ehuhuijji. Jamajjeya Anejanohua tanacua canaje; eme' jeasohua majje jama acanafe ba'a: —¡Quea bei pocue! ¡Jayo, Anitao pea'ai jja oe pichojea'yocue jja oe, de! ¡A'a jja cuiajji! —acanafe Anejanohua.

³⁴ Jamatii oya Jodio pea'ai ba majje ojjaña cuana taaa o'oyanaje. Taaa tiitii nequinaje jama ba'a: —¡Diana eyacuiñajji jayojja quea pame nee Epesojo nequi. ¡Oya bihuiacue! —Jodio cuana epana'yo bihuia ajja nei nei jjejojjo jamaya taaa canaje Epeso deija cuana.

³⁵ Quijje nei Epeso cuiñajji meseja ojjaña tanacua canaje. Majoya jama acanafe ba'a: —Deija cuana Epesojo ba'e, ¡shajja'ajjacue mo! Ojjaña cuanaja eba eseyaya Epesojo ba'eya epana'yo Dianaja equi quea quemo jaahuanaña. Ojjañaja eba yahuajo nei oe mei eyajo nequi oquea poa jiquio meshi yasijje. Ma mei ecuanajaya eyacuiñajji Diana pojji aca poa, ma mei eyajje oque. ³⁶ Jamajjeya ¡a'a quea quene pojji, quea shajjaquijjo a'a pojji! ¡A'a quea mimishi pojji! ³⁷ E'e, miqianaaya jiquio deija cuana iñanaje; jiquiacua jjequinaje. ¿Apiojji acuae jiquiacua yenaje so'o? ¿A'a cuae jja oe siipojji so'o? Chojja, oya cuanaja aquiana Dianaja equijo sii jjiima. Epana'yo Dianajo jjanifebaqui jjiima pea'ai. ³⁸ Jamajjeya Demetiohua, o chacosahuajji cuaa pea'ai jiquio deija cuana niñeba sa acanajo, emeshi mese yasijje cadojo cahua. Emeshi mese chaco canijo cahuohuiqui cahua. Majo tii cajjanifebaquiahua cuana. ³⁹ Jamajjeya miqianaya jiquio deija cuana nijje mimi o'oya sa poanajo ¡emeshi meseja equi yasijje mimiqui o'oyacue quijje! ¡Emeshi meseja esohui jayojja jama pocue! ¡A'a quea shajjaquijjo pojji! ¡A'a quea quene nee pojji! ⁴⁰ E'e, onaaya Shomano emeshi mese etii huohui ca chana'. Onaa oya huohui cajo, emeshi mese etii ecuaña nijje quea quene po chana': "¿Apiojji quea shajjaquijjo poani so'o? ¿Apiojji ecuae esohui jayojja jama ajjima', e que poe jjiimaa?" ohuaya eseya aca chana'. Jamaya Shomano emeshi meseja acajo, ¿yajja sohui saja'ame aje so'o? —acanafe Epeso cuiñajji meseja.

⁴¹ Jamajjeya jama huohui majje ohuaya ojjaña huoojea canaje equi cuana huasijje. Majoya deija e'iña nequi pichojea ca'yonaje.

20

Pabo poqui o'oyanaje Masenonia meshi yasijje, Acaya meshi pea'ai yasijje

¹ Majoya ojjaña cuana equi yasijje poqui'yo majje, quea shajjaquijjo popajea'yo majje Pabohua Jesosaja epeeji cuana iyaa canaje. Poeyanaje. Pabohua oya cuana quea bei huohui canaje jama ba'a: —E'e, eya poquije o'oya Masenonia meshi yasijje esohui huohui o'oyaa. Jamatii Jesosa miqiana nijje nequi, miqiana jaahuanajji. ¡A'a quea mete pojji! Poquia iña —amajje Pabo poqui o'oyanaje Masenonia meshi yasijje.

² Masenonia meshijo poquijjeya quea huiso esohui Jesosajo huohui canananaje ojjaña Jesosaja epeeji cuana huasijje. Ojjaña quea bihui nee po meesahua canaje. Jomajo esohui huohui'yo majje Pabo Acaya meshi yasijje poqui o'oyanaje. ³ Acaya meshijo oya nequinaje pea beca peejjima ba'ime. Majoya oya jjashahuabaquinaje Sinia meshi yasijje ebepoquijji bishe aijo. Sinia meshi yasijje ebepoquijji nisho poaniya Pabohua shajja'ajja canaje Jodio deija cuaa oya ishoo'ajja cani equecua'yojji. Jamajjeya huacuaya poqui o'oyanaje Masenonia meshi yasijje, ejiojjijje. ⁴ Jesosaja epeeji quea huiso cuana Pabo nijje poquinaje. Oya cuana ma bajjani ba'a: Pinisija bacua ejja Sopatene, ma Beneajo ba'e, Anitao, Seconino pea'ai, ma Tesanonicajo ba'e; pea Jayo ma Debejo ba'e; pea Timoteo; pea Tiquico, Topimo pea'ai ma Asia meshijo ba'e. Mahuiso poquinaje Pabo nijje Masenonia meshi yasijje. ⁵ Majoya beca cuana besapoquinaje Toasa huasijje. Toasajo onaaya Pabo, ecuanaya pea'ai ishoo canaje. ⁶ Ecuana Pabo nijje ejiojjijje poqui o'oyanaje Pinipo cuiñajji yasijje. Pinipojo nequinaje. Majoya Jodio cuana jjachichaqui majje ojee ijija'ijjianaje quea bihui nee epojji. Pahui shejje me jjiima ijjanaje ecuaaya. Ojee pahui ca'a ijija majje ecuaña Pinipojo ani bishe ai yasijje ani'yo majje besapoquinaje. Me oejje cahuime po majje ecuaña ba'eñaquinaje Toasajo. Toasajo nequinaje me oejje becaniejijji pea'ai cahuime, 7 cahuime.

Toasajo nequiya Pabohua esho'i shequi mee ca'yonaje

⁷ Ebionei epojja ejomishocajjijo, nomicojo, sinecua Pabo Jesosaja epeeji cuana nijje jjachichaquinaje Jesosaja bobi ijijajji. Mecajjeahua nei poqui sa poanaje. Pabo quea huiso sohuihuohui poequi tii jjamecashonoquinaje. ⁸ Ecuana jjachichaquinaje equi ejama coo

eya equecuayijji. Quea misi nee poanijo, cuaquijji quea huiso cuana dedonaje ecaaya. ⁹ Jomajo oe esho'i Eotico bajjani equi jiyo huejjajo anioquenaje. Pabohua esohui huohui majamaja caquijo, esho'i quea cojja cahui nee nee poanaje. Jiyo huejjajo cahui'yo majje quea ao oquequi'yonaje meshi yasijje. Oya baqui majje: —E'e, ee, mano'yonaje chahua, chama'yo tii —taanaje.

Onaaya oya dojo canaje equi yiye dojo huasijje emano'yojaa. ¹⁰ Jamajjeya Pabo jaoquequinaje esho'i baa. Esho'i huojje canaje Pabohua. Jama acanaje ba'a: —i'A'a quea yeno pojjii! ¡Oya eshe, emano'yo pojjeama! —Pabohua acanaje.

¹¹ Majoya Pabo jaasohuaqui o'oyanaje equecuayijji yasijje. Ojjaña ecaaya Emeshi Mese nei Jesosaja bobi ojee ijjanaje. Majoya Pabo pea cuana nijje mimi o'oyanaje. Jamatii esohui huohui poequi tii jpaopjaquinaje. Mecajjeahua nei eshequi jaasohua pishanajo Pabo poquinaje.

¹² Majoya esho'ija epeeji cuaa oya dojo canaje equi yasijje. Oya eshe o'oyajo, quea aja nee neejo ojjaña quea bihui nee poanaje.

Pabo besapoquinaje Mineto huasijje

¹³ Majoya Pabohua ecuaana huoojea canaje Asoni cuiñajji yasijje: —E'e, ¡miquianaya bishe oe dojo huioeue Asoni yasijje! ¡Jomajo ishoañaquicue iña! Eya jjeya nei poquije ejiojjijje Asoni yasijje. Majoya mo bishe yasijje aniquije —poanaje.

¹⁴ Jamajjeya Pabo Jesosaja epeeji cuana nijje ejiojjijje poquinaje Asoni yasijje. Nequñaqui majje oya bishe ai yasijje aninaje ecuaana nijje. Majoya ecuaana poquinaje Mitinene cuiñajji yasijje cahuiya. ¹⁵ Mitinenejo cahui majje mecajjeahua nei ecuaana bisheje besapoqui o'oyanaje. Oe cahuime po majje ecuaana ba'eñaquinaje Quo nasi chipi nei yasijje. Jomajo cahuñaquinaje Samosi nasijo. Pea cahujo ba'eñaquinaje Mineto huasijje.

¹⁶ Majoya Pabohua Epeso yejje canaje, Asia meshijo quea cahui huiso nequi sa po ajja poanaje. Oya poquicuaajicuaaji sa poanaje Jenosanena huasijje. Ba'eñaqui sa poanaje Jodioja bobi chichajji shejo, Petecote shejo. Ojjaña Jodio cuana ma pojja cuanajo quea bihui nee ojee ijja'ijjiani ojjaña bobi chicha'yo majje. Ma pojajoya Pabohua Jenosanenajo Eyacuiñajji bihui sa acanaje.

Pabohua pea esohui esohui huohuiji Epesojo ba'e huohui canequinaje.

¹⁷ Jamajjeya Minetojo ba'eñaqui majje Pabohua Jesosaja esohui huohuiji cuana Epesojo ba'e iyaa canaje. ¹⁸ Poeyajo Pabohua oya cuana jama huohuime acanaje ba'a: —Epeeji cuana, eya Asia meshi yasijje poeyajo, miquianaaya eya banaje quea pame nee chacoachonaje; ecuea esohui miquianaaya shajja'ajjanaje pea'ai. ¹⁹ Miquea eba eya Emeshi Mese nei Jesosa Quitoja echacojji poani. Jesosajo eya miminaje quea pame nee. Eya quea miminaa pojjeama. Miquea eba eya pa neineinaje Jesosaja epeeji quea mimishi ba'yanajo. Miquea eba pea'ai Jodio etii cuaa eya quecua sa acanajo ejo quea camaja poanaje. ²⁰ E'e, eyaya ojjaña Jesosaja esohui mete'ama huohui majamajanaje equi cuana huasijje, ojjaña jjachichaquijajo pea'ai. Ojjaña ba meesahuanaje. Maya miquea eba. ²¹ E'e, eyaya ojjaña huasijje esohui huohui neineinaje Jodio cuana, Jodio pojjeama cuana huasijje pea'ai. Ojjaña jama anaje ba'a: “¡Miquea mimishi cuana pajea'yocue! ¡Eyacuiñajji esohui shajja'ajjacue! ¡Jesosa nijje jjaapeequicue e'e jojo nei! Oya Emeshi Mese nei” eyaya anaje. ²² Jjeyahua eya Edojjoshahua Pameya huoojea caje Jenosanena huasijje. ¿Yajja shai Jodio cuaa eya acaje so'o? Ecuea ba jjima. ²³ Jamatii Edojjoshahua Pameya eya ba mee cani jama ba'a: “Pea cuaa miya iña caje o'oya. Ejjaeanobiaquijji yasijje miya jeanobia caje'yo. Mijo quea camaja poaje. Miya quea nee nee poaje” jamaya ojjaña cuiñajji yasijje poqui majanajo Edojjoshahua Pameya eya ba mee cani —Pabohua acanaje—. ²⁴ E'e, onaaya eya sapa jajahuejjajea ca chana'. Jamatii eya mete'ama. Emeshi Mese nei, Jesosa e huoojea'yojji poani. Ojjaña ojaya huohui jayojja jama eya a sa poani. Ohuaya eya huoojea canaje esohui quea pame nee Jesosaja huohuiya jama ba'a: “Eyacuiñajjiya ojjaña cuana quea jea nee acani. Ojjaña Jesosaja epeeji cuanaja mimishi cuana cuijea ca'yani. Oya cuana ba'e tiitii mee caje'yo eyajo. Pabo, ¡jamaya huohuime acue!” eya acanaje Jesosaa. ²⁵ Jamajjeya eyaya ojjaña miquianaya huohuinananaaje Jesosajo: “Jesosa Eyacuiñajji nijje ojjaña huoojeajji oe nei poaje'yo” eyaya anaje. Jjeyahua nei ca ca eya poquije'yo. Ecuea eba miquianajaya eya eba o'oyajji pojjeama. ²⁶ Jamajjeya jjeyahua nei eyaya miquianaya e'e jojo nei huohuiaña jama ba'a: E'e pojja'a beca cuana miquiana nijje nequi shajja'ajja sa po'yo ajjajo cuaqui yasijje poquije'yo; cuaquijo nequi tiitije'yo mano'yo majje. Jamatii eyaya esohui huohuinaje ojjaña cuana huasijje. Onaya mimimimi mee ajja jama ba'a: “Ecuea Jesosaja esohui shajja'ajja jjima poanaje. Paboya eya huohui jjima”. Chojja, huohui poanaje.

²⁷ —E'e, eyaya ojjaña Eyacuiñajji esohui huohui neineinaje miquianajaya eshajja'ajjajji. ²⁸ Jamajjeya ¡miquianaya oe jjajaahuanaquicue! ¡Jesosaja epeeji cuana jaahuanacue quea

pame nee pea'ai! E'e, Edojjoshahua Pameya mi huoojeajji poaniya miqúanaya Jesosaja epeeji jaahuanajji po mee canaje. Jamajjeya joya cuana jaahuana neineicue! Eyacuiñajjiya oja Bacua Eija oe nei huoojea canaje oja epeeji epojjiyo mano'yohua. Eyacuiñajjiya ojaya epeeji cuanaja mimishi cuijea ca'yonaje. Jesosaja epeeji cuanaja mimishi cuana cuijea ca'yajje oja bacua cuana po mee canaje, Eyacuiñajjiya. ²⁹ Jamatii ecuea eba eya poqui'yajo beca cuana, eshahuaja epeeji cuana quea mimishi poaje. Jesosaja epeeji cuana poquiquehua mee sa acaje. Jesosaja esohui pajea mee sa acaje pea'ai. E'e, jiquio ecua ibia quea maseya ñajajja poquiquehuaJeanana mee cani, chama'yo tii po mee cani jayojja jama eshahuaja epeeji cuaa Jesosaja epeeji cuana aca chana'. ³⁰ Jjeya beca cuana miqúanaya nijke nequi minijje jjapee nishoquije. Quijje ohuaya Jesosaja epeeji cuana siajje acaje; Eyacuiñajjiya esohui e'e nei huohui ajja. Jesosaja epeeji cuana oe pojji poquiquehuaje ma siajjepojji cuana nijke. ³¹ Jamajjeya ijshahuabaquicue oe! ¡Ecuea esohui a'a pajea'yojji miqúanaya! E'e, pea beca peejjima shequajame eyaya miqúanaya esohui huohui neineinaje epojjajo, mecajje pea'ai huohui majamajanaje eyaya. Huohupoquia majje eyaya niñeshe'apoquianaje. Miqúanajo eya quea yeno popoquinaje —Pabo poanaje.

³² —Jjeya eya poquije'yo. Eyacuiñajji nijke miqúanajo mimije jama ba'a: “Eyacuiñajji, ¡Jesosaja epeeji cuana jaahuanacue! ¡Miquea esohui a'a pajea mee'yojji! Miquea esohuijo oya cuana miquea epeeji quea ja'a nee poaje'yo. Jamajjeya miquea epeeji quea ca'a nee poaje. ¡Oya cuana quea pame nee acue! Jamaya miyaya ña ojaña Jesosaja epeeji cuanajo. Eyajo minijje ba'e tiiiii meje'yo pea'ai. Jamaya ecuea eba”. E'e, jamaya eya Eyacuiñajji nijke mimiani miqúanajo.

³³ —E'e, miqúanajaya eba pea'ai onajaya daqui cuana, onajaya bejjo pea'ai ecuea jea ba jjima. ³⁴ Chojja, ecuea bobijo, ojjaña ecuea eba'ejjiyo pea'ai eya chacochocho nequinaje. Ecuea epeeji cuana enijje poquiani eyaya bobianaje pea'ai. Maya miqúanajaya eba. ³⁵ ¡Jamaya eyaya miqúanaya ba meenaje ojjaña quea pame nee chacocue! ¡Aema' ba'e meesahuacue pea'ai! Jamajjeya ¡jamaya acue miqúanaya! ¡Emeshi Mese nei Jesosaja esohui pea'ai a'a pajea'yojji! Jama ba'a: “Pea cuana aquiana quia majje miya quea bihui poaje. Joya miya aquiana quiaña quea bihui pishana poaje” jamaya Jesosa poanaje —Pabohua acanaje.

³⁶ Majoya Pabo, ojaya epeeji cuana pea'ai Eyacuiñajji nijke ojee miminaje ecui'oshajjajo nequi majje. ³⁷ Pabojja epoqui'yojjiyo ojjaña ojaya epeeji cuana pa canaje. Pabo cuiapashi ca'yonaje, poquije'yo ba canaje. ³⁸ Quea yeno poanaje Pabojja esohuijo: —E'e de, ecuanaja Pabo eba o'oyajji pojjeama pa jiquio meshijo —oya cuana poanaje.

Jamajjeya ojaya epeeji cuana quea yeno poanaje. Ojjaña cuana onijje bishe yasijje poquinaje. Besapoquije'yo ba canequinaje.

21

Pabo Jenosanena huasijje poqui o'oyanaje

¹ Jamajjeya bishe ai yasijje ani majje ecuanaja epeeji cuana jeana'yonaje. Epi nei besapoquinaje Cosi nasi yasijje cahuiya. Mecajjeahua nei besapoqui'yonaje Shona nasi yasijje. Majoya besapoquinaje Patana cuiñajji yasijje. ² Patanajo ecuaaya pea bishe ai sa'ajjanaje Penisia meshi yasijje ebesapoquijji. Bishe ai jaa ba majje ecuanaja nequisohuaquinaje bishejo aninaje. Majoya besapoqui o'oyanaje. ³ Besapoquijjeya, Chiye nasi chipi nei besapoquijjeya meshi banaje. Chiye nasi ai ebiane miijije yejjenaje Sinia meshi yasijje besapoquijjeya. Tino cuiñajji bañaqui majje ba'eñaquinananaje. Ebishe ai meseya aquiana quea huiso nee bishejo ani jeasohuaqui canaje etaja huasijje. Pabo ecuanaja nijke etaja huasijje nequisohuaquinaje. ⁴ Tino huasijje poquinaje Jesosaja epeeji cuana baa. Ba majje ona nijke nequinaje me oeje becanejijji pea'ai cahuime, ⁷ cahuime. Edojjoshahua Pameya oya cuana Pabo huohui meesahua canaje jama ba'a: —¡Jenosanena huasijje poquiayo Jodio cuaa miya ña ca chana! Jamajjeya ja'a jocuama poquijji, Pabo! —acanaje cuaa.

⁵ Jamatii bishe ai apoa poajo Pabo ecuanaja nijke poquinaje bishe yasijje. Jesosaja epeeji cuana, yahue cuana, ehuanase cuana, esho'iquiana pea'aiya bishe ai yasijje poquinaje ecuanaja nijke Pabo poquije'yo baa. Meshijajjo, bae sahuajo Eyacuiñajji nijke ojee miminaje ecui'oshajjajo nequi majje. ⁶ Majoya ecuanaja: —E'e, besapoquia ña —amajje bishe aijo ani o'oyanaje ebesapoquijji Ojjaña Jesosaja epeeji cuaa Pabo poquije'yo ba canequinaje. Majoya oya cuana equi cuana huasijje poqui o'oyanaje.

⁷ Jamajjeya Tino cuiñajji jeana'yo majje ecuanaja besapoquinaje Tonemaina cuiñajji yasijje. Ba'eñaqui majje Jesosaja epeeji cuana jomajo ba'e baquinaje. Ojjaña nijke miminaje quea bihui nee. Ona nijke nequinaje oe cahuime. ⁸ Majoya mecajjeahua nei ecuanaja poqui o'oyanaje bishe yasijje. Besapoqui o'oyanaje Sesanea huasijje. Ba'eñaqui majje

esohui huohuijji Penipe bajjanija equi yasijje jaasohuaquinaje; onijje ba'enaje. Oya Penipe yahuajo nei Jesosaja epeeji cuaa Jenosanenajo ba'eya babaca canaje me oejje becanejjijji pea'ai, 7 pea cuana nijje Eyacuiñajijja echacojji epojji, e'ahuemano bobi quiajji. ⁹ Penipeja ebeca pee pea'ai ebacuase ahuema'ani, bii ani oja equijo ba'e. Oya cuana Eyacuiñajijja esohui huohuijji pea'ai poanaje. ¹⁰ Pabo, Penipeja equijo oe pojji cahuime nequiyajo, Eyacuiñajijja esohui huohuijji poeyanaje Acabo bajjani, ma Jodea meshijo ba'e. ¹¹ Pabo que poe majje Acabohua Pabojja ejjacomayijji quijji jjeshe majje jjaiojji jeyoqui'yonaje, eme' cuana pea'ai. Majoya Pabo huohui canaje jama ba'a: —Edojjoshahua Pame enijje jama poanaje ba'a: “Jiquio ejjacomayijji quijji mese Jenosanena huasijje poqui'yajo jamaya Jodio cuaa oya jeyo caje'yo. Jeyo majje oya quia caje Jodio pojjeama huasijje; quea nee nee poaje” poanaje —Acabohua acanaje.

¹² Acabojja esohui shajja'ajja majje ecuaaya, pea epeeji cuaa jomajo ba'eya pea'ai Pabo pa'anija tii huohuinaje jama ba'a: —Pabo ¡a'a oe poqui'yoyji Jenosanena huasijje! Jodio cuaa miya iña ca chana! —poanaje.

¹³ Jamatii Pabohua ecuana jama acanaje ba'a: —¿Apiojji acuae quiana pani so'o? ¡A'a eya quea yeno po meeji! Jodio cuaa Jenosanenajo ba'eya jeyo cajje mo mete'ama poaje. Emeshi Mese nei Jesosa nijje jjapeequianijjo onaa quecua ca'yajje, jamatii eya mete'ama —Pabohua acanaje.

¹⁴ E'e, ecuaaya Pabo nahue'ajjanaje: —¡A'a poqui'o'yajji! —amajamaja'ajjanaje.

Jamatii Pabo jama poanaje ba'a: —Chojja, eya jocuama capoquiahua. Jamaya yahuajo Edojjoshahua Pameya eya acanaje.

Jamajjeya ecuana jama poanaje ba'a: —E'e Pabo, ¡Eyacuiñajijja ejjashahuabaquijji jayojja jama acue! —ecuana poanaje.

¹⁵ Jamajjeya quea cahui huiso pishana Penipeja equijo ani majje ecuanaja aquiana cuana bio majje: —Epeeji cuana, poqui'ya iña —po majje ecuana Jenosanena huasijje poqui'yonaje ejiojjijje. ¹⁶ Jesosaja epeeji cuana Sesaneajo ba'e ecuana nijje poquinaje. Jenosanenajo nequinaqui'yajo ohuaya ecuana dojo canaje Masonija equi yasijje ba'eya. Yahuajo Masoni Chipe nasijo ba'enaje. Oya Jesosaja epeeji poanaje yahuajo nei.

Pabo poquinaje Satiaco baa o'oya

¹⁷ Ecuana Jenosanena huasijje poe'yajo, Jesosaja epeeji cuana ecuana ba majje quea bihui nee poanaje. ¹⁸ Mecahuajje Pabo ecuana nijje poquinaje Satiaco baa. Jomajo ojjaña Jesosaja epeeji etii cuana, esohui huohuijji cuana pea'ai jjachichaquinaje. ¹⁹ Pabo ojjaña nijje esohui quea bei nee miminaje. Ohua chaco canajejo huohui canaje jama ba'a: —Eyacuiñajijja eya esohui quea pame nee Jesosajo Jodio pojjeama cuana huasijje huohui meesahua canaje. Eyacuiñajijja ohuaye nei ma dejja ajiima acani eya ameesahua canaje Jesosaja esohui huohuiañajo —Pabohua acanaje.

²⁰ Jesosaja epeeji etii cuaa Pabojja esohui shajja'ajja majje Eyacuiñajji bihuia canaje. Pabo jama acanaje ba'a: —Jamaya quea pame nee, epeeji. ¡Bacue! Jjeyahua nei quea huiso nee nee, quea huiso mil Jodio cuana Jesosa nijje jjapeequiani. Jamatii Jodio cuaa ojjaña Jesosaja epeeji cuana huohui cana jama ba'a: “Moisesija etehue'yo jayojja jama acue!” acani. ²¹ Pea cuaa oya cuana quea huiso sijaje acani mijo. Jama acani ba'a: “Pabohua Jodio cuana Jodio pojjeamaja meshijo ba'e huohui cana jama ba'a: —¡Moisesija etehue'yo jayojja jama a'a aji! ¡Jodio cuanaja etiquianaja ehuhui'yo jayojja jama a'a pojji! ¡Miquianajaya bacua a'a cuiishasha jehuseijajee meeji pea'ai! —acani Pabohua”. Jamaya onaaya mijo sijaje acani, Pabo. Jamajjeya Jodio cuana jiquiojo ba'e minijje quea quene. ²² E'e jojo nei onaaya oya cuana huohui caje jama ba'a: “Pabo pa jjaja poe'yonaje Jenosanena huasijje”. Jamaya acajoya ojjaña cuana jjachichaquije. Majoya ¿yaja shai miya acaje, de? ²³ Jamajjeya ¡ecuanaja esohui jayojja jama acue, Pabo! —poanaje Satiaco—. Jiquiojo yani ebeca pee pea'ai Jodio dejja Eyacuiñajji nijje miminaje. Ma ecua oya yahuajo Eyacuiñajji nijje miminaje jama amajje huojjaña dedejea mee caje. ²⁴ Jamajjeya ¡onijje poquicue Eyacuiñajijja equi quea quemo huasijje! ¡Esejaya etiquiana Moisesija etehue'yo jayojja jama acue quea boeje'yo jayojja epojji, ona nijje! ¡Ojjañaja huojja dedejea jjimahuajo sosequiacue! ¡Miyaya onajaya huo cuana jjeshecue! ¡jjeshe majje dahua meecue Eyacuiñajji bihuiajji! Jamajjeya ojjaña Jodio dejja cuaa ba caje miya pea Jodio cuana jayojja jama poani. Moisesija etehue'yo jayojja jama poani pea'ai. ¡Jamaya ojjaña ba meecue pea cuaa mijo sijaje acanaje! —poanaje—. ²⁵ ¡Jodio pojjeama Jesosaja epeeji poani ca ca Moisesija etehue'yo jayojja jama a'a ameejji! Chojja. Yahuajo eseyaya Jodio pojjeama huasijje esohui tehuenaje jama ba'a: “¡Noe ma onaa dahua canaje eyacuiñajji nisho bihuiajji'ya a'a ijji! ¡Noe na' cuaya meequi jjima a'a ijji! ¡Ijjiacajji na' a'a ishijji pea'ai! ¡A'a pea cojjojji pojji!” jamaya yahuajo eseyaya Jodio pojjeama cuana huasijje tehuenaje, mahuiso —jamaya acanaje Satiacohua.

²⁶ Jamajjeya mecajjehua nei Pabohua ma Jodio deja cuana nijje poquinaje Eyacuiñajjija equi quea quemo huasijje. Ejiojji cuana, eme cuana pea'ai topo neinei canaje. Majoya oya cuana Eyacuiñajjija equi quea quemo huasijje dobiquinaje. Eyacuiñajji nijje emimijji huohui canaje jama ba'a: —Oe pojji cahui po majje, ecuana quea boejea nee nee po majje eyaya huo jjesheje ecuea, ecue epeeji cuanaja pea'ai. Jiquiacua yeje, dahua meeje Eyacuiñajji bihuiajji —Pabo poanaje.

Pabo iña canaje cuaa Eyacuiñajjija equijo nequi

²⁷ Me oeje becanejjijji pea'ai, 7 cahui po majje Pabo oja epeeji cuana nijje poqui o'oyanaje Eyacuiñajjija equi quea quemo huasijje. Moisesija etehue'yo jayojja jama ponequinaje. Pabo Eyacuiñajjija equijo nequi Jodio deja cuaa Asia meshijo ba'eya oya ba canaje. Oya cuana Pabo nijje quea quene nee poanaje. Ojjaña cuana Pabo nijje quea quene nee po mee canaje. Pabo iña mee canaje cuaa. ²⁸ Oya cuana taaanaje. Jama sijaaje pome poanaje Pabobo ba'a: —Isaeni deja cuana, ipocue! ¡jiquio deja mo iñasahua meecue! Ohuaya ojjaña meshi yasijje poquijeya huohui canananaje jama ba'a: “¡A'a Moisesija etehue'yo jama pojji!” Ohuaya Eyacuiñajjija equi niñeba cani. Isaeni cuana niñeba cani pea'ai. Jjeyahua nei ohuaya Jodio deja pojjeama dojodobiaqui canaje Eyacuiñajjija equi yasijje. Jamaya ohuaya jiquio equi quea jehue jayojja po mee cani —Jamaya Pabobo sijaaje poanaje Jodio cuana. Jama mimime po majjeya Pabo iña canaje.

²⁹ E'e, yahuajo onaaya Topimo ba canaje Pabo nijje Jenosanenajo nequi. Topimo aje oe Jodio pojjeama, Epesojo ba'e. Oya Eyacuiñajjija equi quea quemo huasijje dobiqii jjima. Jamatii Jodio cuaa Pabohua Jodio pojjeama Topimo bajjani Eyacuiñajjija equi quea quemo huasijje dojodobiaqui canaje poso acanaje. Jamajjeya quea quene nee nee poanaje. ³⁰ Jamajjeya quea huiso Jodio cuana Jenosanenajo ba'e cuajicuajjebenaje Pabo que. Miminaanaa majje Pabo iña canaje. Dojocuayaqui canaje Eyacuiñajjija equi secue jjani yasijje. Pabo dojocuayaqui cajo, esecue ca'a canaje. ³¹ Oya cuana quea quene nee nee, quea mase nee nee poanaje. Pabo sapa jajahuejjajea sa acanaje meiya. Onaaya ca ca Shomano emeshi meseja sohuinano huooejajji poani que cuajicuajjipoquinaje; huohuiqui canaje jama ba'a: —¡Bacue oe! Ojjaña Jenosanenajo ba'eca quea shajjaquijjo nee nee poani, cuajicuajji canaje jjachichaquiequi baa —poanaje.

³² Jamajjeya sohuinano huooejajjiya pea sohuinano huooejajji cuana, sohuinano cuana pea'ai iyaa majje dojocuajicuajji canaje Jodio cuana quea quene jjachichaquiequi yasijje baa. Sohuinano cuana, sohuinano huooejajji nijje poeje ba majje Jodio cuaa Pabo cuia pajea canaje. ³³ Sohuinano huooejajjiya Pabo que poe majje oya iña mee canaje. Jeyo mee canaje baa jjono becaa. Majoya Jodio cuana huohui'ajja canaje: —¿Ae bajjani oya? ¿Yajja acuae jja so'lo? ¿Yajjajo acuae jjaya cuiñaña?

³⁴ Beca Jodio cuaa oe esohui huohui canaje. Pea cuaa pea esohui huohui canaje. Ojjaña quea shajjaquijjo poanijo, sohuinano huooejajjiya shajja'ajja meeme ajja ae shai Pabohua acanaje. Jamajjeya ohuaya sohuinano cuana huoojea canaje Pabo dojohua sohuinano cuanaja equi quea quemo huasijje. ³⁵ Sohuinanoja equi ejiojji ejaasohuaquijji yasijje poeyajo, Jodio cuaa Pabo iña sa acanaje. Jamajjeya sohuinano cuaa oya jjequisohua majje dojo canaje equi yasijje. ³⁶ Jodio cuana sohuinano huooejajji quiquishijji poeje taaajebenaje jama ba'a: —¡Quecuajecue oe! ¡Quecuajecue oe! ¡Camano'yahua oya! —taame pojebenaje.

Pabohua Jodio equenequene cuana saja'a canaje

³⁷ Sohuinano cuaa oya equi quea quemo huasijje beshahua nei ohua dojodobiaqui caniya Pabohua sohuinano huooejajji jama acanaje ba'a: —Eya minijje mimi sa poani.

Ohuaya Pabo saja'a canaje jama ba'a: —¿A'a miquea Jieno cuanaja esohui eba? ³⁸ Jamajjeya miya Ejito deja quea mimishi pojjeama, ma yahuajo emeshi mese quecuapanajji epo pojjeama. Ohuaya quea huiso nee nee, ebeca pee pea'ai mil deja emeje dojooji cuana quehua dojo canaje meshi quima huasijje. Ojo onaya ojjaña quea mete poanaje. ¿A'a miya oya pojjeama? —acanaje sohuinano huooejajjiya.

³⁹ Pabohua jama acanaje ba'a: —Chojja. Eya Jodio, Sinisia meshijo ba'e. Eya Tanasojo cuaya. Jomajo tiinaje. Ma cuiñajji quea quemo, ojjañaja eba. ¡Che mo jjeya eya mimi meecue Jodio cuana nijje! —Pabohua canaje.

⁴⁰ Jamajjeya sohuinano huooejajjiya Pabo saja'a canaje jama ba'a: —¡E'e, mimicue! —acanaje.

Majoya Pabo nequinaje ejiojji ejaasohuaquijjijo. Eme jeasohua canaje. Ojjaña cuana tanacua canaje. Tanacua'yo majje Pabo miminaje Jodio cuana nijje ojaya esohuijo, Emeoja esohuijo.

22

¹ Pabohua jama acanaje ba'a: —Ecuea epeeji cuana, etii cuana pea'ai, ¡shajja'ajjacue mo! Eyaya miqúanaya huohuije —acanjaje.

² Pabo onajaya esohuijo, Emeoja esohuijo mimiani shajja'ajja majje ojjaña Jodio cuaa jecaje canaje. Jamajjeya Pabo miminaje jama ba'a: ³ —Eya Jodio miqúanaya jayojjaya. Tanasojo eya cuayanaje, Sinisia meshijo. Majoya Jenosana huasijje poeyanaje esohui huohuiji Jamanie bajjanija esohui baa. Ohuaya eya sohuihuohui canaje. Jiquiojo eya tiinaje. Jamanieya Eyacuiñajija esohui esejaya etiíquianaja eya sohuihuohui canaje. Eya Eyacuiñajija epeeji poanaje. Joya ecua miqúanaya jjeya bihuaña jayojja jama eyaya Eyacuiñajiji bihuanaje. ⁴ E'e, yahuajo eyaya Jesosaja epeeji cuana iñanaje Jesosaja esohui ehuhui ca poani jjejojo. Ejjajejanobiaquiiji yasijje jeanobiajeanaje dejja cuana, epona cuana pea'ai. Oya cuana mano mee'yo sa anaje eyaya. ⁵ Jodio etii cuanaja, joya Eyacuiñajiji nijje miminequianija eba ecuea esohui e'e nei. E'e, ohuaya eya esohui etehue'yo quia canaje Jodio dejja Damascico ba'e yasijje equiaiji jama ba'a: “¡Pabo Jesosaja epeeji cuana iña meesahuacue! ¡jeyo meesahuacue cadenaa Jenosana huasijje edojojji, ejeanobiajeajji Jesosaja esohui huohuijijojjo!” jamaya Jodio etiiya tehue canaje —Pabo poanaje.

⁶ —Majoya Damascico chipi nei nequiñaquei majje eshequi biacojjajja nequijo eyajo ejijijji quea ja'a neeya eya jeaja'a canaje. ⁷ Eya quea ajjajja jjejojo oquequinaje meshi yasijje. Majoya eyaya shajja'ajjanaje eyajo enijje mimije jama ba'a: “Sanoni, Sanoni, ¡apiojji acuae miyaya eya napaña so'o?” eyajo aniya eya acanjaje. ⁸ “¿Ae bajjani miya?” eyaya anaje. “Eya Jesosa, ma Nasanenajo ba'enaje. Miyaya aje oe eya napaña” acanjaje Jesosaa eyajo aniya.

⁹ —Dejja cuaa enijje poquianiya ejeajijiji quea ja'a nee ba canaje. Onajaya ca ca Jesosaja esohui enijje shajja'ajja jjima, ojaya quea quehua. ¹⁰ Majoya eyaya huohui'ajjanaje: “Emeshi Mese nei, ¿ae sa poani miya?” Ohuaya eya saja'a canaje jama ba'a: “¡Nequisohuacue! ¡Damasico huasijje poquicue! Jomajo peaa miya huohui caje miquea echacoji ma miyaya ejo quijje aje. ¡Ma esohui jayojji jama acue ejo!” eya acanjaje.

¹¹ —Majoya eya nequisohua'yonaje; cojjama!. Jesosaa jeaja'a cajje cojja quijjo'yonaje. Jamajjeya ecuea epeeji cuaa eya mepejjejea canaje Damascico huasijje.

¹² —Jomajo oe dejja Anania ba'enaje. Ohuaya Moisesija etehue'yo jayojja jama atiitii canaje. Oya ojjaña Jodio cuanaja quea boti nee poanaje, Damascico ba'aja. ¹³ Ohuaya e jaa huasijje poe majje eya huohui canaje jama ba'a: “Ecuea epeeji Sanoni, ¡quea cojja ja'a po o'oyacue!” Ohua huohui cajje jjeyahua nei eya quea cojja ja'a po o'oyanaje. Anania banaje eyaya. ¹⁴ Majoya ohuaya eya jama acanjaje ba'a: “E'e, Eyacuiñajiji esejaya etiíquiana bihua ca poa. Ohuaya miya babaca ca poa oja huoojea'yo ojjaña jaahuanajji quea pame nee nee baa. Jjeyahua nei miyaya oya, Jesosa shajja'ajjanaje; minijje miminaje. Eyacuiñajija miya ba mee caje ojaya ejjashahuabaqui'yoyji pea'ai. ¹⁵ Ma miya jjeja banaje, ma miya shajja'ajjanaje pea'ai miya huohui meesahua caje Eyacuiñajija ojjaña cuana ojjaña meshijo ba'e yasijje. ¹⁶ Jamajjeya ja'a ishoa majajji! ¡jjeja nei Eyacuiñajiji nijje mimicue miquea mimishijo! ¡Jesosa nijje jjapeequi'yocue! Ohuaya miquea mimishi cuana cuijea caje'yo. Majoya eyaya miya besa meje Eyacuiñajijjo” eya acanjaje Anania.

¹⁷ —Majoya eya poe o'oyanaje Jenosana huasijje. Poe majje eya poquinaje Eyacuiñajija equi quea quemo huasijje onijje mimiya. Eyacuiñajiji nijje mimianijo, Jesosaa eya jjacahuibaqui mee canaje. ¹⁸ Ohuaya eya jama huohuime acanjaje ba'a: “Jenosana esecue yasijje poquicue jjeyahua nei! Jiquiojo ba'e cuaa miquea esohui ejo shajja'ajja jjima acaje” eya acanjaje. ¹⁹ “Jesosa” eyaya oya saja'anaje, “miquea eba yahuajo eyaya Jodio cuanaja equi ejjachichaquiiji yasijje dobiqqui majje, miquea epeeji iña majje jeyonaje baa jjonohua. Cuiasejjajejanaje. ²⁰ Yahuajo pea cuaa miquea esohui huohuiji Estema sapa jajahuejjajaje canajejo, eyaya chipi nei nequiya banequinaje. E'e, oya cuana Estema nijje quea mase poanijo eya quea bihui nee poanaje pea'ai. Dejja cuaa oya sapa jajahuejjajaje canijo, eyaya onajaya daqui ao jaahuanaje, Estema sapa jajahuejjajajji epo cuanaja daqui” jama saja'ameya eyaya Jesosa anaje. ²¹ Majoya Jesosaa eya huoojea canaje jama ba'a: “¡Poquicue, Pabo! Eyaya miya huoojeaje quea huesha nee Jodio pojjeama cuana huasijje esohui huohuiya ejo” eya acanjaje Jesosaa —Pabo poanaje.

Sohuinano huoojeajjija Pabo nahue canaje

²² Jodio cuaa Pabaja esohui shajja'ajja canaje. Ojaya esohui Jodio pojjeamajo oya cuana shajja'ajja sa po ajja. Quea quene nee poanaje. Janobajjima nei taaa o'oyanaje jama ba'a: —¡Oya dojo'yocue! ¡Oya quecuajeacue oe! ¡Oya quea taijo quecuajeacue! —taaame poanaje Jodio cuana.

²³ Jodio cuaa quea queneya jjejojo daqui jeasohuacua canaje eyahuasijje. Meshi pohui jeasohuajaje canaje pea'ai. Taaa neineinaje. ²⁴ Jamajjeya sohuinano huoojeajjija

sohuinano cuana huoojea canaje jama ba'a: —¡Pabo eyiye dojjo huasijje dojcue! ¡Oya janobajjima nei cuiacue! ¡Achajja oya ba'e ba'ajja socue! ¡Yajjajo Jodio cuaa oya niñeba cani ba'ajja socue! ¿Ajeo quea quene nee nee taanani? ¡Ba'ajja socue! —acanaje sohuinano huoojeajjiya.

E'e, oya jshahuabaquinaje jama ba'a: —Pabo siajje poani. Eya cuiajje oya siajje popajeaje —poso acanaje sohuinano huoojeajjiya.

²⁵ Jamajjeya sohuinano cuaa Pabo jeyo canaje ecuiasejjajeajji. Jeyo cajo Pabohua sohuinano huoojeajji quea chipi nee nequi jama acanaje ba'a: —Eya miquea ba jjima. Eya Shomano dejja pea'ai. Jamajjeya emeshi meseya miqúanaya eya cuia mee ajja quea mimishi po jjimajojo, achajja eya ba'e ba jjimajojo. Jamaya emeshi meseja esohui —Pabohua acanaje.

²⁶ Ma shajja'ajja majje ma sohuinano huoojeajji quea mete poanaje. Poquicuaínaje sohuinano huoojeajji etii huohuuya. Jama huohuñaquime acanaje ba'a: —¡Bacue! ¿Apoiji acuae miyaya jiquio dejja Pabo napa meeña so'o? Oya ca jja ca oma Shomano dejja, de —acanaje.

²⁷ Jamajjeya sohuinano huoojeajji etiiya ma shajja'ajja majje metenaje, Pabo que poquicuaínaje. Oya huohui'ajja canaje jama ba'a: —¿A'a miya Shomano dejja e'e jojo nei? ¡Huohuicue mo oe!

—E'e —Pabohua oya saja'a canaje—, eya Shomano dejja, de.

²⁸ Majoya sohuinano huoojeajji etiiya jama acanaje ba'a: —E'e pojja'a, de. ¡Bacue! Eyaya quea huiso bejjo quia majje Shomano dejja po'yonaje. Sosequianaje quea huiso nee nee, de —acanaje ohuaya; oja chii Shomano dejja pojjeamajojo oya pea.

Jamajjeya Pabohua jama acanaje ba'a: —Ecuea ca ca ecue chii Shomano dejja poanaje. Jamajjeya eya ca ca Shomano dejja cuayanaje —acanaje Pabohua.

²⁹ E'e de, sohuinano cuaa beshahua nei Pabo cuiasejja canaje. Ma shajja'ajja majje ca ca ohuaya Pabo pichojea ca'yonaje. Oya Pabo Shomano dejja ba majje sohuinano huoojeajji quea mete nee poanaje ecuiajji. Jamajjeya ojaya esohuijo pea cuaa Pabo jeyo canaje baa jjonohua. Jamaya Shomano dejja ameeme ajja achajja oya ba'e ba jjimahuajo.

Pabo Jodio etii cuana nijje mimi o'oyanaje

³⁰ Majoya mecajjeahua sohuinano huoojeajji ba sa poanaje jama ba'a: —¿Ajeo shai Pabo nijje Jodio cuana quea quene nee nee poanaje?

Jamajjeya mecajjeahua ohuaya Pabo pichojea mee canaje ma ejeanobiajaa ejeyo nequi. Majoya ohuaya Jodio cuana Moisesija esohui etehue'yo huohuiji poani, Eyacuiñajji nijje emimijji cuana pea'ai iyaa canaje. Jjachichaqui'yajo, sohuinano huoojeajji etiiya Pabo dojo canaje esecue yasijje Jodio cuana nijje mimiya. Pabo mete'ama nequinaje. Dejja cuana cojja ba canaje mete'amaa jjejojo.

23

¹ Pabohua Jodio etii quea huiso cuana cojja ba majje jama acanaje ba'a: —Epeeji cuana, ¡shajja'ajjacue mo! Eyacuiñajji eba eya mimishi'ama ba'enaje yahuajo, jjeja pea'ai. Jamajjeya eya bicho'ama.

² Ma shajja'ajja majje Eyacuiñajji nijje mimiani etiiya Ananiaa pea Pabo chipi nei nequi jama acanaje ba'a: —¡Joya Pabo naba cuiasejjajeacue miyaya!

³ Jamajjeya Pabo onijje jama poanaje ba'a: —Eyacuiñajjiya miya cuia caje pea'ai. Miya ejjadasiaguíji. ¿Apoiji acuae miya Moisesija etehue'yo jayojja jama po ajja? Miyaya eya pea cuia meeña. Jamaya pojjeama Moisesija etehue'yo —Pabo poanaje.

⁴ Pea Pabo chipi nei nequiya oya jama acanaje ba'a: —¡A'a jja oe Eyacuiñajji nijje mimiani etii nijje mimijajji, de!

⁵ Pabohua majoya ojjaña saja'a canaje jama ba'a: —Epeeji cuana, ecuea ba jjima oya Eyacuiñajji nijje mimiani etii. E'e, Eyacuiñajji esohui etehue'yo jama poani ba'a: “¡Miquea emeshi mese nijje a'a mimijajji!” —Pabohua acanaje.

⁶ Pabojja eba quea huiso Jodio cuana jomajo nequi Sanoseo cuana poanaje. Pea cuana ca ca Paniseo cuana. Jamajjeya Pabohua etii cuana jama acanaje ba'a: —Epeeji cuana, eya Paniseo. Ecue chii Paniseo poa. Paniseoja esohui jayojja jama eyaya huohuíaña jama ba'a: “Quijje Eyacuiñajjiya emano'yo cuana shequi mee caje o'oya. Ojjaña cuana eshe o'oya poaje”. Jama ehuohui poaje jjejojo eya pea cuaa iña canaje —Pabohua acanaje.

⁷ Pabojja esohui shajja'ajja majje Paniseo cuana jjamimicuiajejanobiajaa neineiquinaje Sanoseo cuana nijje. ⁸ Paniseo jayojja jama pojjeama Sanoseo cuana aje oe jama poani ba'a: “Dejja cuana mano'yo majje eshequi o'oyajji pojjeama ti. Chama' Eyacuiñajji esohuidojojji cuana”. Oya cuana poani: “Eshahua cuana chama' pea'ai” jamaya Sanoseo cuaa huohui cani. Paniseo cuaa ca ca jama acani ba'a: “E'e jojo nei ojjaña eseya shequi

mee caje o'oya. Eyacuiñajjija esohuidojojji cuana enequi, de. Eshahua cuana enequi pea'ai" jamaya e'e jojo nei huohui cani Paniseo cuaa. ⁹ Jamajjeya Jodio etii cuaa quea shajjaquijjo nee nee mimicuijajanobiajea canaje. Majoya Moisesija etehue'yo huohuijji cuaa, Paniseo cuaa nequisohua majje jama taaame acanaje ba'a: —Jiquio deja Pabo mimishi'ama. E'e pojja'a Eyacuiñajjija esohuidojojji onijje miminaje e'e jojo nei. ¡A'a oya napajji! —taame poanaje.

¹⁰ Majoya ojjaña Jodio etii cuana janobajjima nei jjamimicuijajea nobiajeaquianijo, esohuinano mese quea mete poanaje. Pabo nahue canaje; sohuinano cuana huoojea canaje Pabo dojhua sohuinano cuanaja equi quea quemo huasijje: —E'e de, Jodio cuaa Pabo jajahuejjajea ca chana', de, meiya —sohuinano cuana poanaje.

¹¹ Mecajje Emeshi Mese nei Jesosa eyajo nequi nequioquenaje Pabo que. Oya miminaje Pabo nijje jama ba'a: —Pabo, ¡a'a quea mete pojji! Jenosanenajo miya ecuea esohui huohuijji poanaje. Quijje miyaya ecuea esohui huohuiquije quea huesha nee, Shoma cuiñajji yasijje —acanaje Jesosaa.

Jodio cuana ojee jhashahuabaquinaje Pabo quecuajji

¹² Majoya mecajjeahua nei Jodio deja cuana jjachichaquinaje. Ojee jhashahuabaquinaje Pabo quecuajji. Quea huiso cuaa jama acanaje ba'a: —E'e jojo nei Pabo cuijajea jjimahuajo ecuaaya ena e'ishijji pojjeama, bobi cuana e'ijji'ajji pojjeama, Pabo cuijajea'yo majje ecuaana ijji'a'ijji'ajje'yo. Siajje poani jjemoya aje ca iña oe Eyacuiñajjija ecuaana mano mee ca'yome —acanaje cuaa jhashahuaba taiqui majje.

¹³ E'e, quea huiso nee nee deja cuaa jamaya acanaje, 40 huisomeya. E'e pojja'a pea cuaa jamaya acanaje pea'ai, ecuea ba jjima. ¹⁴ Majoya Eyacuiñajji nijje mimiani etii que, Jodio etii cuana que pea'ai poqui majje huohui cañaquinaje jama ba'a: —E'e, ecuaaya ena ishi jjimahuajo, ijji'a'ijji'ajji'ajje'yo. Pabo cuijajea neineje'yo. Pabo cuijajea jjima yajji jojjemo aje ca iña oe Eyacuiñajjija mano mee ca'yomeya. ¹⁵ Jamajjeya ¡miquianaaya, etii cuaa pea'ai esohuinano mese dasiacue! Jama nisho acue ba'a: “¡Pabo jjequi o'oyacue! Ecuaaya oya ba o'oya sa aña, oja sohui eshajja'ajjajji” nisho acue. Majoya oya jjequi cajo, ecuaaya Pabo cuijajeaje, sapa jajahuejjajjeaje meiya jiquiacua poe jjimahuua —acanaje deja mimishi cuaa.

¹⁶ Paboya jjo'yaseja ebacua ejjaa, oja boeya ca ca shajja'ajja canaje Jodio cuaa Pabo sapa jajahuejjajjea caje'yo. Jamajjeya Paboya boeya sohuinano cuanaja equi quea quemo huasijje dobiqiu majje Pabo huohuiqui canaje Jodio cuanaja esohui. ¹⁷ Majoya Pabohua sohuinano huoojajji iyaa majje huohui canaje jama ba'a: —¡Jiquio esho'i ecue boe dojocue sohuinano etii que! Oya esho'i onijje mimi sa poani.

¹⁸ Majoya sohuinano huoojajjiya esho'i dojo canaje esohuinano mese que. Poe majje jama acanaje ba'a: —Pabohua eya iyaa canaje. Ohuaya jiquio esho'i huoojea canaje mi que. Oya minijje mimi sa poani.

¹⁹ Esohuinano meseya esho'i mepejjejea canaje deja chama huasijje. Majoya oya jipashineijje huohui'ajja canaje jama ba'a: —E'e, ¿ae shai miyaya eya huohui sa aña? —acanaje.

²⁰ Esho'ia yama acanaje ba'a: —Jodio deja cuana ojee miminequinaje. Mecahuajje pa miya dasia caje pa. Miya pa jama anisho caje ba'a: “¡Pabo jjequi o'oyacue Jodio etii cuana huasijje! Ecuaanaaya oya ba o'oya sa aña” jamaya miya siajje acaje pa. ²¹ Jamajjeya ¡a'a oya cuana shajja'ajjajji! Quea huiso nee nee, 40 huisome eja'aniquehuaguai ani ejiojji sahuajo Pabo cuijajea'yojji. E'e, oya jama poanaje ba'a: “Ena ishi jjima amajje ijji'a'ijji'ajji po majje pea'ai ecuaaya Pabo cuijajeaje'yo. ¡Pabo cuijajea jjima yajji jojjemo Eyacuiñajjija ecuaana napa ca'yome!” jama mimimeya poanaje. Jjeya nei miya isho'ajja cani cuaa. Jama poani ba'a: “E'e, ¡jjeyahua nei esohuinano meseya Pabo jjequi caje ba'ajja” poani oya cuana —jamaya esho'i poanaje.

²² Majoya esohuinano mese jama poanaje ba'a: —E'e, jamajjeya ecuea eba pea cuaa eya edasiajji nisho acaje ma e miya huohuinaje. ¡A'a oe huohuijji cuana!

Jamaya huohui majje ohuaya esho'i quehuajje huoojea canaje equi yasijje.

Pabo huoojea canaje Shomano emeshi meseja huoojea Peni ani yasijje

²³ Majoya esohuinano meseya iyaa canaje beca sohuinano huoojajji. Poeyajo jama huohuime acanaje ba'a: —¡Miquea aquiana cuana, sohuinano cuanaja aquiana pea'ai chichacue epoquijji! ¡Mecajje quea misi nee poajo, poquicue Sesanea cuiñajji yasijje! ¡Quea huiso nee nee, 200 huisome sohuinano cuana ejiojji'ajje dojocue! ¡Pea sohuinano quea huiso nee mejeji dojocue pea'ai! ¡Pea sohuinano cuana mapichi aija edaasa biajje ani dojocue minijje pea'ai, 70 huisome! ²⁴ ¡Pabo dojocue pea'ai pea mapichi aija edaasa biajje ani! ¡Oya Pabo dojocue emeshi meseja huoojea que, Peni que! ¡Pabo jaahuana neineicue! ¡A'a Jodio cuana oya napa meeji! —acanaje esohuinano meseya, Canio Nisia bajjanaya.

²⁵ Majoya esohuinano meseya esohui tehue canaje Penija ebajji jama ba'a:
²⁶ “Emeshi meseja meshi cuiñajji Peni: Ecuea epeeji Peni, mijo eya quea bihui nee. Eyaya, Canio Nisiaa jiquio esohui tehuenaje miquea ebajji jiquio dejjajo, Pabojo. Jama poa ba'a: ²⁷ Jodio cuaa jiquio dejja Pabo bajjani iña canaje. Beshahua nei oya cuiajea ca'yonaje cuaa. Oya Shomano dejja ba majje eyaya oya nahuenaje; sohuinano cuana huoojeanaje o nahuejji. ²⁸ Eya ba sa poanaje apiojji Jodio cuana onijje quea quene nee nee poanaje. Jamajjeya eyaya oya dojonaje Jodio etii cuana que. ²⁹ Jodio etii cuanaja esohui shajja'ajja majje eyaya banaje Pabo mimishi'ama, de. Mimishi po jjimajo Jodio cuana oya sapa jajahuejjajea mee jjima anaje meiya; jeyo mee jjima anaje ejeanobiaejajji. Oya Shomano dejja. Paboja ehuhuijo ca ca oe Jodio cuana onijje quea quene nee nee poanaje. Onijje mimijajinaje Jodio cuanaja etiiquianaja ehuhui'yojo, ma ohua huohui canijo. ³⁰ Majoya Jodio cuaa eya dasia majje Pabo quehuajje sapa jajahuejjajea sa acanaje. Ma ba majje eyaya oya huoojeanaje mi que. Jodio dejja cuana, Pabo huohuijji epo, eyaya huoojeaje mi que pea'ai. ¡Miyaya oe huohui neineicue ache acue oe quea mimishi poani! Mahuiso ecuea esohui, epeeji Peni. Eyaya, Canio Nisiaa ecue sohui tehuenaje miquea ebajji. Apoa”.

Jamaya tehue canaje. ³¹ Tehue majje esohuinano meseya Caniohua oja tehue huoojea canaje emeshi mese Peni que.

Jamajjeya sohuinano cuaa Canioja ehuhui'yo jayojja jama acanaje; Pabo dojo canaje mecajje Atipati cuiñajji yasijje cahuiya. ³² Majoya mecajjeahua nei sohuinano mapichima' huacuaya poe o'oyanaje Jenosanena huasijje, sohuinano cuanaja equi quea quemo huasijje. Joya mapichijjiya ca ca oe Pabo dojo canaje Sesanea huasijje. ³³ Sesanea huasijje poe majje Shomano emeshi meseja huoojeaja equi yasijje, Penija equi yasijje nequiñaquinaje. Majoya sohuinano cuaa Pabo quia canaje Peni que. Esohuinano mese Canioja esohui etehue'yo pea'ai quia canaje. Majoya oya cuana poqui'yonaje. ³⁴ Canioja esohui etehue'yo ba neinei majje Peniya Pabo huohui'ajja canaje jama ba'a: —Pabo, ¿ache meshijo ami ba'e, ache mijijje?

—Eya ca iña Sinisia meshijo ba'e —saja'ame acanaje Pabohua.

³⁵ —E'e. Jamajjeya Jodio cuana ma mi huohuijji epo poeyajo, eyaya miquea esohui shajja'ajjaje —poanaje Peni.

Majoya Peniya pea sohuinano cuana iyaa canaje. Poeyajo jama huohuime acanaje ba'a: —¡Bacue! Jiquio dejja Pabo bajjani. ¡Oya emeshi mese Enodeja equi quea quemo neejo jaahuana neineicue! ¡Nahuecue oe! —acanaje.

24

Jodio cuaa emeshi mese Peni sijje acanaje Pabojo

¹ Majoya me oeije cahuime po majje Jodio Eyacuiñajji nijje mimiani etii Anania poquinaje Sesanea huasijje Pabo niñebaa, Pabo huohuiya. Jodio etii quea huiso pishana Anania nijje poquinaje. Pea dejja, emeshi meseja etehue bajji poani Tetono bajjani onijje poquinaje pea'ai. Sesaneajo nequiñaqui majje oya cuana emeshi meseja huoojea Peni ba cañaquinaje. Majoya oya cuana Pabojo mimimiminaje. ² Majoya Peniya Pabo iyaa canaje. Poeyajo Tetonohua huohui canaje jama ba'a: —Emeshi mese Peni, miya quea ca'a, quea pame nee, ecuea epeeji pea'ai. Miya ecuana huoojeajji quea pame nee. Quea huiso shequiaja miquea esohuijo ojjaña quea bei po meenaje jiquio meshijo. Quea huiso dejja mimishi miyaya jjabahuejjaqui meenaje. Jamajjeya ecuana jiquio meshijo quea pame nee ba'yani. ³ E'e, miyaya quea pame añajo, ecuana quea bihui nee poani, ojjaña cuiñajji ba'eca cuana pea'ai. Miya ecuanaja quea boti nee. ⁴ Miquea pea echacojji quea huiso yanijo eyaya oe pojji esohui huohuije. Jamajjeya ¡ecuea esohui che shajja'ajja socue! —poanaje Tetono—. ⁵ Jiquio dejja Pabo quea mimishi nee po tiitiiani. Jodio cuana ojjaña meshijo ba'e quea quene nee nee po mee cani. Ohuaya Jesusaja ma Nasanenajo ba'ya poaja esohui huohui majamaja cani. E'e, oya Jesusaja epeeji cuana huoojeajji poani. ⁶ Ohuaya ca ca Eyacuiñajji equi quea quemo quea jehue jayojja acanijo, ecuanaya oya iñanaje. Jodio cuanaja etiiquianaja tehue jayojja jama oya amee sa anaje; ohua huohui tai canijo oya sapa jajahuejjajea sa anaje. ⁷ Jamatii esohuinano mese Canio Nisia cuajicuajjebenaje Pabo nahueya; Pabo dojo canananaje. Oya quea quene nee nee poanaje ecuana nijje, de. ⁸ Majoya Canio Nisiaa ecuana mi que huoojea canaje Pabo huohuiya. E'e, Pabo nijje mimi majje miyaya baje ecuanaja esohui e'e nei —acanaje Tetonohua.

⁹ Majoya pea Jodio dejja cuaa Peni sijje aca o'oyanaje Pabojo jama ba'a: —E'e jojo nei Tetonoja esohui Pabojo e'e nei. Pabo quea mimishi nee nee poanaje —Peni acanaje cuaa.

Pabohua emeshi mese Peni huohui ca'yonaje ojaya eba'ejji

¹⁰ Majoya Peniya Pabo jama acanaje ba'a: —E'e pojja'a. ¿Pabo, yajjajje acuae minijje quea queene poani cuana so'o? ¡Huohuicue mo oe!

Jamajjeya Pabohua jama acanaje ba'a: —Emeshi mese Peni, ecuea eba miya jiquio meshijo ona huoojeajji poani quea shequiaja huiso. Jamajjeya ojjaña miqnea eba. Jamajjeya ecuea eba'ejjijo eyaya mete'ama huohuije. ¹¹ Miqnea eba ecuea esohui e'e nei. Jjeya nei eya Jenosanena huasijje nequiñauqui o'oyanaje Eyacuiñajji bihuliaa ome miji pea'ai beca cahuime poanaje. ¹² Jodio dejja cuaa eya ba canaje Eyacuiñajji equijo nequi. Eya ca ca iña dejja nijje jjamimicuijajea nobiajeaquí ajja. Ecuea Jodio cuana quea queene po mee jjima Jodioja equi ejjachichaquijjijo ani, ejtojji cuanajo nequi pea'ai, equi cuanajo ani pea'ai. Jama ajjima Jenosanenajo ecuea cuana. ¹³ Ojjaña eba Jodio cuana ejo sijaje poani. Eya mimishi'ama. ¹⁴ Jodio cuanaja etiñquiaa cuaa Eyacuiñajji bihuliaa ca poa. Eyaya Eyacuiñajji bihuliaña pea'ai. Jamatii eyaya Jesosaja esohui jayojja jama aña pea'ai. Jiquio Jodio cuana ca ca sijaje poani jama ba'a: “Jesosaja esohui etiñquianaja esohui jama pojjeama” jama poso acani. Chojja, ecuanaja etiñquiana Moisesija etehue'yo jayojja jama aña; Eyacuiñajji esohui huohuijji yahuajo nei ba'e cuanaja esohui etehue'yo jayojja jama aña pea'ai eyaya. Ohuaya jayojjaya eyaya jama huohuime aña ba'a: ¹⁵ Ojjaña eseya mano'yajo quijje Eyacuiñajjiya shequi mee caje o'oya; mimishi cuana, dejja quea pame poani cuana pea'ai eshe poaje o'oya. Ecuea eba, jiquio Jodio cuanaja eba pea'ai Eyacuiñajjiya jamaya acaje'yo. ¹⁶ Jamajjeya eya quea pame nee ba'e sa tii poani. Eyacuiñajjiya eba eya mimishi'ama. Jiquio Jodio cuanaja eba pea'ai eya bicho'ama, mimishi'ama —Pabo poanaje.

¹⁷ —Eya pea meshi cuana huasijje poquinaje esohui huohuiya. Quea huiso shequiaja po majje jjeya eya quea huesha nequi Jenosanena huasijje poe o'oyanaje. E'e, Jesosaja epeejji cuana pea meshijo ba'eca cuaa ejjeshejji huoojea canaje Jodio aema' cuana bobiaa. E'e, eyaya maya ejjeshejji ye majje Jodio cuana quianaje. Eyaya huo dahua meenaje pea'ai Eyacuiñajji bihujajji. ¹⁸ Jamajjeya eya Eyacuiñajjiya equi quea quemo huasijje poquinaje. Jomajo nequiya eyaya eme shacua neineinaje quea boejea jayojja epojji. Jamaya poanijo, Jodio cuaa Asia meshijo ba'e cuaa eya ba canaje Eyacuiñajjiya equijo oe nei nequi. Quea huiso dejja cuana enijje nequi jjima poanaje. Quea shajjaquijjo pojjeama eya poanaje. ¹⁹ Ma Jodio cuana Asia meshijo ba'e poe jjima jiquiacua. E huohui sa poanijo oya cuana capoe'yahua minijje mimiya. ²⁰ Esohuinano meseya Canio Nisiaa eya nequi mee canaje Jodio etii cuana cojja nei. Jiquio Jodio cuaa ecuea esohui Jodio etii nijje shajja'ajja canaje pea'ai. Jodio etiiya eya quea mimishi eba jojjemo jjeyahua nei huohui ca'yome ecue mimishi. ²¹ E'e, jomajo eyaya etii cuana huohuinaje jama ba'a: “Quijje Eyacuiñajjiya emano'yo cuana shequi mee caje o'oya. Ojjaña eseya shequi mee caje o'oya. Eya jamaya ehuohui poaje jjejojo pea cuaa eya iña canaje” jamaya eyaya etii anaje. E'e, ma esohuijji jiquio Jodio cuaa eya niñeba cani, huohui cani pea'ai. Mahuiso ecuea esohui, emeshi mese Peni. Apoa —Pabohua acanaje.

²² Emeshi mese Penija eba Jesosaja epeejji cuanaja ehuohui'yo. Jamajjeya ohuaya jama acanaje ba'a: —E'e, quijje esohuinano mese Canio Nisiaa poe'yajo eyaya huohuije ecuea ejjashahuabaquijji Pabojjo. Mahuiso. Apoa —poanaje Peni.

Majoya Jodio cuana esecue yasijje huoojeacuayajjea majje Peniya sohuinano huoojeajji huohui canaje jama ba'a: ²³ —¡Sohuinano cuana huoojeacue Pabo nijje! ¡Oya jaahuana neineicue! ¡Ojaya epeejji cuaa aquiana, bobi pea'ai o que caye cahua! ¡O que ca'anicuahua pea'ai! —acanaje emeshi meseya Peniya.

Pabohua Peni, oya huanase Nosiya pea'ai sohuihuohuime acanaje

²⁴ Majoya quijje pishana Peni oja huanase nijje, Nosiya nijje poe o'oyanaje Pabo baa. Nosiya aje oe Jodio epona poanaje. Jamajjeya ohuaya Pabo iya me majje jama acanaje ba'a: —Pabo, ¡jesosa Quitoja esohui mo huohuicue Jesosa Quito nijje jjapeequianijo! Eyaya shajja'ajja sa aña.

²⁵ Jamajjeya Pabohua Jesosaja esohui huohui canaje jama ba'a: —¡Eyacuiñajjiya esohui jayojja jama ba'ecue quea pame nee! ¡Jjashahuabaquicue! ¡A'a quea mimishi tii pojji! Quijje poe o'oya majje Jesosaa ojjaña cuana sosequia caje'yo, ma eseya eshe nequiahuaa anequinaje sosejje. Mimishi cuana quea nee nee po tiitii mee caje'yo, quea mimishi ba'enaje sosejje. Ojaya epeejji quea pame cuana ca ca ohuaya quea bihui nee ba'e tiitii mee caje'yo onijje eyajo Eyacuiñajjiya —jama huohuimeya Pabohua acanaje cuana.

Pabojjo esohui shajja'ajja majje Peni quea mete nee nee poanaje. Jama acanaje ba'a: —E'e, mahuisoya jjeya. Quijje eyaya miya iyaaje o'oya, ecuea pea echacojji chama' poajo.

²⁶ Peni jjashahuaba taiquinaje jama ba'a: —Eyaya Pabo iyaaje o'oya enijje emimijji. E'e pojja'a ohuaya eya sosequia caje o pichojea mee'yo sosejje.

²⁷ Jamatii Pabo emeshi mese Enodeja ejjajeanobiaquijji equijo nequinaje beca shequiajame. Majoya Shomano emeshi meseya pea dejja Posio Pesito bajjani huoojea canaje meshi

cuiñasahuajji epojji. Oya Pesito emeshi mese Enodeja equijo ba'enaje. Jamajjeya Peni oja huanase Nosiya nijje poquinaje. Jamatii Penija Jodio etii cuana onijje quea bihui nee epojji Pabo pichojea mee'yo jjima poanaje. Jamatii ejjajejanobiaquijijjo nequi tii Pabo jiña ca'yonaje.

25

Pabohua emeshi mese eyacua Pesito sohuihuohui canaje

¹ Jamajjeya Shomano emeshi cuiñasahuajji eyacua Pesito Sesanea cuiñajjijo nequinaje. Pea beca peejjima cahuime po majje oya poquinaje Jenosanena huasijje. ² Jomajo Eyacuiñajji nijje mimiani etii cuaa, Jodio etii cuaa pea'ai Pabo niñeba canaje emeshi cuiñasahuajji Pesitoja eshajja'ajjaji. ³ Pesito nijje mimi huicha'a huicha'anaje jama ba'a: —Emeshi mese Pesito, ¡che oe Pabo huoojeacue Jenosanena huasijje ecuana nijje mimiya! —nisho acanaje Jodio cuaa. Oya cuana aje oe jjashahuaba taiquinaje Pabo cuiajea'yojji ejiojijije poquianajo.

⁴ Pesitohua Jodio cuana saja'a canaje jama ba'a: —Chojja. Pabo jiquiacua epoejji pojjeama. Eyaya oya cuiñaña Sesaneajo mei equi ejjajejanobiaquijijjo. Quijje pishana eya poquije o'oya Sesanea huasijje. ⁵ ¡Pabojjo mimi sa poanajo miquianajaya etii cuana huoojeacue enijje Sesanea huasijje! Jocuama ohuaya Pabojja mimishi cahuohui cahua. E'e pojja'a oya mimishi'ama, caba'ajja —poanaje Pesito.

⁶ Majoya Pesito nequinaje Jodio cuana nijje Jenosanenajo me oejje pea beca peejjima, 8 cahuime. Majoya oya poqui o'oyanaje Sesanea huasijje. Oe cahuime po majje oya anioquenaje pea equijo, etii ojee chachacoani equijo. Majoya ohuaya pea deja huoojea canaje Pabo jjequiya. ⁷ Pabo poe'yajo Jodio etii cuana ma Jenosanenajo ba'e cuana o que jjanequichipiquinaje; oya panajajinaje. Pabojjo quea huiso siajje poanaje, de.

⁸ Majoya Pabohua huohui canaje jama ba'a: —Eya quea mimishi pojjeama poani. Jodio etiiquiana cuanaja esohui etehue'yo pajea'yo jjima ecuea. Eyacuiñajjija equi quea jehue jayojjo po mee jjima. Shomano emeshi mese ecuea niñeba jjima pea'ai —poanaje.

⁹ Majoya Pesitohua Jodio cuana quea bihui nee po mee sa acanijo huohui'ajja canaje jama ba'a: —Pabo, ¿a'a miya Jenosanena huasijje poqui sa poani? Jomajo Jodio etii cuanaja esohui mijo eyaya shajja'ajjaje, miquea esohui shajja'ajjaje pea'ai. Ojjaña shajja'ajja majje eyaya mijo jjashahuabaqui majje huohuije ecuea ejjashahuabaquijijjo —poanaje Pesito.

¹⁰ —Chojja —saja'ame acanaje Pabohua—, eya jiquiojo tii yani, Shomano etijja equijo. ¡Jiquio Shomano etiiya, miyaya pea'ai onaja esohui ejo shajja'ajja majje huohuicue miquea ejjashahuabaquijijjo! Eya Shomano dejja. Jamajjeya Jodio cuanaja eya ecuiajea'yojji pojjeama. Ecuea Jodio cuana quea mimishi ajjima, de. Jamaya miquea eba. ¹¹ Ecuea emeshi meseja etehue'yo jama ajjima jojjemo, mimishi ya pea'ai jojjemo eya mano mee'yomeya. Ecuea mimishi ajjima jjojya ca ca miyaya e equia meejji pojjeama mimishi cuanaja ecuiajea'yojji. Jamaya emeshi mese etijja esohui poani. Eya ca ca iña Shomano emeshi mese etii nijje mimi sa poani, Sesa nijje. Ecue sohui shajja'ajja majje ohuaya cahuohui cahua ojaya ejjashahuabaquijji ejo —Pabohua acanaje.

¹² Majoya Pesito o chacosahuajji nijje ojee mimi majje Pabo huohui canaje jama ba'a: —E'e, eyaya miquea esohui jayojja jama aje: Miya huoojeaje Shomano emeshi mese etii yasijje, Sesa que. Miya shajja'ajja majje ohuaya huohui caje ojaya ejjashahuabaquijji mijo —jamaya po majje Pesitohua ojjaña huoojeacuaya ca'yonaje.

Pabo miminaje Jodio meshi mese Anipa nijje Anipaja jjo'yase Menise nijje pea'ai

¹³ Quijje pishana Jodioja emeshi mese etii Enodeja osecua Anipa bajjani oja jjo'yase Menise nijje poeyanaje Sesanea huasijje Pesito baa, emeshi cuiñasahuajji eyacua baa. Pesito nijje quea bihui nee mimimiminaje jama ba'a: —E'e Pesito, miya emeshi cuiñasahuajji eyacua Sesaneajo. Jamaya quea pame nee. ¡Quea bihui nee pocue! —ohuaya Pesito acanaje.

¹⁴ Majoya Anipa Pesito nijje nequinaje oe pojji cahuime. Pesitohua Anipa huohui canaje Pabojjo jama ba'a: —Emeshi mese Anipa, yahuajo e poe jjimahuajo pea emeshi cuiñasahuajjija Peniya Jodio dejja Pabo bajjani jiña canaje ejjajejanobiaquijijjo jaa, jiquio ejjajejanobiaquijijjo jaa. ¹⁵ Eya Jenosanena huasijje poquiyajo, Jodio Eyacuiñajji nijje mimiani etii cuaa, Jodio etii cuaa pea'ai Pabo niñeba neinei canaje. Jama amajamaja canaje ba'a: “¡Pabo quea mimishi nee nee po tiitiiani! ¡Oya oe cuiajea'yocue!” acanaje cuaa. ¹⁶ Eyaya Jodio cuana jama anaje ba'a: “Ecuana ca ca pea, Shomano dejja cuana. Miquianajaya ehuohui ca ca oe shajja'ajja majje eyaya oya equiajji pojjeama miquea ecui'a'yojji. Chojja. Pabohua miquiana cojja nei nequi majje cahuohui cahua pea'ai. E'e, Shomano emeshi meseja etehue'yo jama ba'a: “Dejjaa peaja ehuohui ojo shajja'ajja majje ohuaya cahuohui pea'ai cahua, ona cojja nei nequiya”. E'e pojja'a miquianaya Pabojjo siajje poani” jamaya

eya poanaje. ¹⁷ Jamajjeya Jodio etii cuana jiquiacua poe majje, oe cahuime po majje eya anioquenaje etii cuana nijje. Majoya eyaya Pabo iyaa meenaje huohui pohua. ¹⁸ Majoya Pabo poeyajo Jodio etii cuana nequinaje huohui epojji. Jamatii oya cuanaja Pabo quea mimishi nei poanaje huohui jjima. Ecuea ejjashahuabaquijji jama huohui jjima, Jodio etii cuanaja. ¹⁹ Jodio etiiquianaja etehue'yojo ca ca janobajjima nei Pabo mimicuiajejanobiajea canaje. Jesosajo, ma yahuajo mano'ya poajo pea'ai mimicuiajejanobiajea canaje. Pabohua pa huohui canaje Jesosa shequi o'oya poa. ²⁰ Ma esohui Jesosajo ecuea ba jjima. Jiquiojo ba meeme e aja. Jamajjeya eyaya Pabo huohui'ajjanaje jama ba'a: "Pabo, ¿a'a miya Jenosanena huasijje poqui sa poani? Jomajo eyaya huohuije ecuea ejjashahuabaquijji mijo, Jodio etii cuana shajja'ajja majje" eyaya a'ajjanaje. ²¹ Jamatii Pabo Jenosanena huasijje poqui sa po aja. Ohuaya eya huohui canaje jama ba'a: "Eya ca iña emeshi mese etii nijje mimi sa poani, Sesa nijje. Ohuaya ecuea esohui shajja'ajja majje cahuohui cahua ojava ejjashahuabaquijji ejo" jamaya eya acanaje. Jamajjeya eya jama poanaje ba'a: "E'e, quijje eyaya miya huoojeaje emeshi mese etii que, Sesa huasijje" eyaya oya anaje —jamaya Pesitohua Jodio emeshi mese Anipa acanaje.

²² Majoya Anipaa jama acanaje ba'a: —E'e Pesito, eya Pabo shajja'ajja sa poani.

—E'e, emeshi mese —poanaje Pesito—, ¡mecahuaje miyaya Pabo shajja'ajjacue!

²³ Jamajjeya mecajjeahua Anipa oja jjo'yase Menise nijje poeyanaje daqui quea nahue nee nee, emeshi meseja daqui huosho majje. Ojjaña cuaa oya cuana bihuia canaje, quea shajjaquijjo sajeame acanaje. Equi quea quemu huasijje, ma etii cuana chacochoconi yasijje dobiquinaje Pabo shajja'ajjaa. Sohuinano huoojeajji, etii cuana, Sesanea cuiñajji mese nijje ma equi yasijje dobiquinaje pea'ai. Ojjaña anioque majje Pesitohua pea deja huoojea canaje Pabo iyaa. ²⁴ Pabo poe'yajo Pesito jama poanaje ba'a: —Emeshi mese Anipa, ojjaña etii jiquiojo nequi pea'ai, ¡shajja'ajjacue mo! Ojjaña Jodio cuaa jiquio cuiñajji ba'eya, Jenosanenajo ba'eya pea'ai jiquio deja Pabo niñeba cani. Oya cuana taa majamajani jama ba'a: "¡Pabo cuiñajji yocue! Oya quea mimishi nee nee po tiitiani". ²⁵ Jamatii Pabo shajja'ajja majje eyaya banaje oya mimishi'ama. Jamajjeya eyaya pea cuana oya cuia mee jjima anaje. ¿Yajjajo jja ecuia'yojji? Oya mimishi'ama. Majoya Pabohua eya jama acanaje ba'a: "Eya Shomano emeshi mese etii nijje, Sesa nijje mimi sa poani. Ecuea esohui shajja'ajja majje ohuaya cahuohui cahua ojava ejjashahuabaquijji ejo" jamaya Pabohua eya acanaje.

—Jamajjeya eyaya oya huoojeaje Shomano emeshi mese etii yasijje huohuiya. ²⁶ Jamatii oya mimishi po jjimajo, ¿yaja tehueme shai eyaya Shomano emeshi meseja ebajji aje? Jamajjeya eyaya oya ye meenaje miquiiana que. ¡Oya shajja'ajja majje eya huohuicue miquea ejjashahuabaquijji ojo! Emeshi mese Anipa, Jodio cuanaja ehuhui'yo miquea eba nei nei. Jamajjeya miquea ehuhui Pabobo eyaya tehueje Shomano emeshi mese etii yasijje, ojava ebajji. ²⁷ Eya ca iña jjashahuabaquiani jama ba'a: Ecuea Pabo ehoojeajji pojjeama ojava mimishi cuana tehue'yo jjimajo. Chojja, jama po aja ca iña —poanaje Pesito.

26

Pabo emeshi mese Anipa nijje miminaje

¹ Majoya Anipa Pabo nijje miminaje jama ba'a: —E'e Pabo, ¡mimicue! ¡Miquea mimishi chamajo ecuanaya huohuicue ecuanaja ebajji! —acanaje Anipaa.

Jamajjeya Pabohua eme jeasohua majje ojava eba'ejjijo huohui canaje jama ba'a: ² —Emeshi mese Anipa, ojjaña miquea eba. Jodio etii cuanaja esohui ejo miyaya shajja'ajjanaje. Jamajjeya ecue sohui shajja'ajjañajo, eya quea bihui nee. ³ E'e, Jodio etiiquianaja etehue'yo, ehuhui'yo cuana pea'ai miquea eba, ojjaña. Miquea eba pea'ai jjeyahua nei Jodio cuana jjamimicuiajea nobiajeaquiani esohui quea pame nee Jeasajo. Jamajjeya ¡ecuea esohui quea bei shajja'ajja socue! ⁴ Ecuea eba'ejji eya esho'yahua ojjaña Jodio cuanaja eba. E'e, ecuea cuiñajji ba'yahua, Jenosanenajo ba'e pea'ai eya ojjaña Jodio cuanaja eba. ⁵ Yahuajo eya Paniseo jayojja ba'enaje e'e jojo nei. Jamaya ojjaña eba. Jamaya cahuohui cahua, ca ohuaya huohui'yo sa amajje —Pabo poanaje.

⁶ —Yahuajo nei nei Eyacuiñajjiya esejaya etiiquiana huohui ca poa jama ba'a: "Ojjaña emano'yojaa cuana eyaya shequi meeje o'oya quijje" poa. Jamaya eseya sa poani. Ma esohui huohuiañajo, Jodio etii cuaa eya iña canaje. Jiquiacua eya jjequi canaje cuaa minijje emimijji.

⁷ —Ecuana, Jodio cuanaja 12 etiiquiaa maya ehuhui'yo shajja'ajja ca poa yahuajo nei nei. "E'e jojo nei ojjaña eseya mano'yo majje shequije o'oya. Jamaya amee caje o'oya Eyacuiñajjiya" Jodio etiiquiaa aca poa. Jamajjeya ecuaaya, Jodio cuaa Eyacuiñajji bihuia tiitiiña ojjaña pojajjo, mecajje pea'ai. Jamatii eyaya maya huohuiñajo Jodio cuaa aje oe eya niñeba cani jjeya, tecuea cani pea'ai. ⁸ Emeshi mese Anipa, miya Jodio deja pea'ai. ¿Apiojji

acuae miquianaaya, Jodio cuaa jjabahuejjaqui ajja Eyacuiñajjiya emano'yo cuana shequi mee caje o'oya? —Pabohua acanaje.

⁹ —E'e Anipa, yahuajo nei eyaya pea'ai Jesosaja epeeji cuana napa majamajanaje quea huiso, ma Nasanenajo ba'ya poaja epeeji cuana. Eya jashahuaba taiquinaje jama ba'a: “Jesosaja epeeji napajji cuana quea pame poani”. ¹⁰ Jamajjeya eyaya Jesosaja epeeji Jenosanenajo ba'e napanaje quea huiso. E'e, Eycuiñajji nijje mimiani etii cuaa eya esohui etehue'yo quia canaje Jesosaja epeeji cuana jeanobiajea meejji. Majoya eyaya Jesosaja epeeji cuana iñanaje, jeanobiajeanaje ejjajeanoabiaquijji yasijje pea'ai. Onaaya Jesosaja epeeji cuiajea canajejo, eyaya jama anaje ba'a: “E'e, ¡cuiajea'yocue!” anaje eyaya. ¹¹ E'e, yahuajo eya poqui majamajanaje ojjaña Jodioja equi ejjachichaquijji cuana huasijje Jesosaja epeeji cuana cuiajea, Jesosa nijje ejjapeequi pajea'yojji nisho. Eya quea quene nee nee ona nijje po majje poquinaje pea cuiñajji cuana huasijje, pea meshi yasijje Jesosaja epeeji cuana napaa.

¹² —Majoya Eyacuiñajji nijje mimiani etii cuaa eya huojea canaje Damasico huasijje Jesosaja epeeji napaa. Eya quia canaje esohui etehue'yo jama ba'a: “Pabo Jesosaja epeeji cuana iña meesahuacue”. Majoya eya poquinaje Damasico huasijje. ¹³ Emeshi mese Anipa, Damasico huasijje ejiojijje poquijeya, eshequi biacojajja nequijo eyaya eyajo banaje ejeajijiji quea jiji nee nee, eshequi jayojja jama pojjeama, quea jiji ja'a nee nee. Deija cuana enijje poquiani jeaja'a neinei canaje pea'ai. ¹⁴ Jamajjeya ecuaa meshi yasijje oquequinaje quea mete nee nee jjejojo. Majoya miyaya pea eyajo enijje mimiani shajja'ajjanaje. Enijje miminaje Emeo esohuijo jama ba'a: “Sanoni, Sanoni, ¿apiojji acuae miyaya eya napaña? Quea bicho nee nee poaje ecuea epeeji cuana napa majje. ¡A'a quea sapa ca'a pojji!” poanaje. ¹⁵ Majoya eyaya jama anaje ba'a: “Emeshi Mese, ¿ae bajjani acuae miya?” Jesosaa eyajo aniya eya jama saja'ame acanaje ba'a: “Eya Jesosa. Miyaya eya napaña, ecuea epeeji cuana pea'ai. ¹⁶ ¡Jamajjeya nequisohuacue jjeyahua nei! Eya mi que jjanequipanaquinaje mi jjabahuejjaqui meejji. Miya enijje chacochochoje, ecue sohui huohuijji poaje. Ecuea esohui jjeyahua nei miyaya shajja'ajjanaje, eya banaje pea'ai. Quijje pishana eyaya miya quea huiso ba meejje ejo. Maya miyaya huohuije ojjaña huasijje. ¹⁷ Jodio cuaa napa cajo eyaya miya jaahuanaje. Eyaya miya huojeaje Jodio pojjeama cuana huasijje. Onaa mi napa cajo, eya mi jaahuanajji poaje. ¹⁸ E'e, eyaya miya Jodio pojjeama cuana huasijje huojeaje. ¡Miyaya oya cuana ecuea ejiojji ba meecue eyahuasijje epoqui'yojji! ¡Miyaya oya cuana enijje japeequi meesahuacue quea ja'a nee nee eba'ejji, Edosisquiana nijje, Satanasa nijje epoqui majajji pojjeama! ¡Maya oya cuana pajea mee'yocue Eyacuiñajji esohui jayojja jama eba'ejji! ¡Enijje japeequi meesahuacue! Jamajjeya eyaya ojaya mimishi cuana cuijeaje'yo. Eya cuana ba'e tiitii meejje'yo eyajo ojjaña ecuea epeeji cuana nijje pea'ai” jamaya Jesosaa eya huohui canaje —Pabo poanaje.

¹⁹ —Emeshi mese Anipa, eyaya Jesosaja esohui shajja'ajjanaje. Ohua huohui canaje jayojjaya eyaya anaje. ²⁰ Ebionei eyaya Jesosaja esohui quea pame nee huohuinaje Damasicojo ba'eca cuanaja eshajja'ajjajji. Majoya Jenosanena huasijje poe o'oya majje eyaya ojjaña cuana sohuihuohuinaje. Majoya eya poquinaje ojjaña cuiñajji yasijje Jodea meshijo. Esohui quea pame nee Jesosajo huohui poquianaje. Jodio pojjeama cuana pea'ai eyaya sohuihuohui poquianaje jama ba'a: “¡Miquea mimishi cuana pajea'yocue! ¡Jesosa nijje japeequicue! ¡Quea pame nee ba'ecue! Jamaya onaaya ba caje miya e'e jojo nei Jesosaja epeeji poani, eshahuaja pojjeama” jamaya eyaya ojjaña cuana huohui poquianaje —Pabo poanaje—. ²¹ Eya jamaya ehuohui poaje jjejojo Jodio etii cuaa eya iña canaje Eyacuiñajji equi quea quemajo nequi. Eya cuiajea'yo sa acanaje cuaa. ²² Jamatii Eyacuiñajjiya eya jaahuana canaje. Jamajjeya ojjaña pojjajo yahuajo, jjeya pea'ai eyaya ojjaña huasijje esohui quea pame nee Jesosajo huohui tiitiaña. E'e, ojjaña emeshi mese cuana huasijje, ojjaña etii cuana huasijje, ojjaña pea cuana huasijje pea'ai eyaya esohui huohuiaña pea'ai. Emeshi mese Anipa, yahuajo nei Moisesiya, Eyacuiñajjiya pea esohui huohuijjiya yahuajo nei ba'e cuaa pea'ai esohui huohui ca poa jayojja jama eyaya esohui huohuiaña jama ba'a: ²³ “Eyacuiñajjiya huojea'yo ojjaña jaahuanajji Quito quea mimishi acaje'yo cuaa. Oya quea nee nee po mee caje'yo, ba'ehuanasohuajea caje'yo emano'yojji. Jamatii oya emano'yojaa Eyacuiñajjiya oya shequi mee caje'yo, oja Chiya. Ojaya ebionei eyami eyacua poaje'yo. Ohuaya Jodio cuana huasijje, Jodio pojjeama cuana huasijje pea'ai esohui huohui caje: Mimishi cuana cuijea mee'yo majje ba'e tiitii mee caje'yo onijje eyajo” jamaya pea'ai eyaya huohuiaña, de —jamaya Pabohua emeshi mese Anipa, ojjaña cuana onijje ani pea'ai huohui canaje.

²⁴ Pabohua jamaya huohui cajo, Pesitohua oya jama acanaje ba'a: —Pabo, quea huiso esohui etehue'yo ba majamaja majje eniñepoqui'yo jayojja jama poani miya —acanaje Pesitohua.

²⁵—Chojja emeshi mese Pesito, eya quea jashahuabaqui quehua poani pojjeama, eniñepoqui jayojja pojjeama poani. Ecuea esohui e'e jojo nei, quea ja'a nee pea'ai. ²⁶Jamaya emeshi meseja Anipaja eba. E'e emeshi mese Anipa, ojjaña Jodio cuanaja esohui etehue'yo miqnea eba. Jamajjeya eya minijje mimiani bicho'ama. Ecuea esohui, Jodio etii cuanaja esohui pea'ai quehuajje huohui jjima. Jamajjeya ojjaña ma esohui cuanajo miya quea ja'a nee jashahuabaquinaje —Pabo poanaje—. ²⁷Ecuea emeshi mese Anipa, za'a miyaya Eyacuiñajija esohui huohuijija esohui cuana shajja'ajjaña? Ecuea eba miya; jiquio esohui miyaya quea ja'a nee shajja'ajjaña —Pabohua Anipa acanaje.

²⁸Majoya emeshi mese Anipaa Pabo jama acanaje ba'a: —Pabo, miqnea emimi oe poiji poanaje. Jamatii miyaya eya Jesosaja epeeji po mee sa aña jjeya nei —poanaje Anipa.

²⁹—E'e emeshi mese Anipa, eya miqúanajo mimiani Eyacuiñajji nijje, miqúanaja Jesosaja epeeji epojji jjeyahua nei, quijje pishana pojja'a. E'e, ojjaña miqúanaya jiquiojo nequi Jesosaja epeeji eyaya po mee sa aña e jayojja epojji, jamatii jiquio ecua eya baa jjonojji jama epojji pojjeama miqúanaya —Pabohua acanaje.

³⁰Majoya emeshi mese Anipa nequisohua majje ojaya emeshi cuiñasahuajji Pesito nijje, Pesitoja jjo'yase Menise nijje, ojjaña etii onijje ani pea'ai poquinaje pea equecuayijji yasijje Pabojjo mimiya. ³¹Pea equecuayijji yasijje anioque majje ojee mimimiminaje; jama poanaje ba'a: —Jiquio dejja Pabo quea mimishi pojjeama. Jamajjeya oya ecuijaje'yoiji pojjeama, ejeanobiajea'yoiji pojjeama tii. ³²Anipaa Pesito huohui canaje jama ba'a: —Pabo emeshi mese Sesa nijje mimi sa po'yo ajja jojjemo ecuaaya oya pichojea'yome. Jamatii ohuaya yahuajo huohui canaje jama ba'a: “Eya Shomano emeshi mese etii nijje, Sesa nijje mimi sa poani. Ecuea esohui shajja'ajja majje ohuaya cahuohui cahua ojaya ejashahuabaquijji ejo”. Jamaya poanajejo ecuanajaya oya epichojea'yoiji pojjeama —poanaje Anipa.

27

Pabo besapoquinaje Shoma huasijje, Itania meshi yasijje

¹Ecuea epeeji Teopino, eyaya Nocaa jiquio banaje ecuea ecojjaa. E'e, eya Pabo nijje poquinaje. Jamajjeya jecue tehue ba neineicue! Jama poanaje ba'a: Emeshi mese Anipa pea cuana nijje mimi majje jama huohui canaje ba'a: —E'e, jjeyahua nei ecuaaya Pabo huoojeaje Itania meshi yasijje Shomano emeshi mese etii baa, Sesa baa —acanaje.

Jamajjeya jama amajje ohuaya Pabo, pea cuana eme jeyo'yo pea'ai quia canaje sohuinano huoojeaji Joño bajjani yasijje, Itania meshi yasijje edojjaji. Joño Shomano dejja cuanaja meshijo ba'e, Itania meshijo. Oya emeshi mese etijja sohuinano cuana huoojeaji poanaje, Sesaja. ²Majoya Joño Pabo, pea cuana pea'ai ani mee canaje bishe ai yasijje ecuaa nijje. Ma bishe ai mese Anamitio cuiñajji ba'e poqui sa poanaje pea cuiñajji cuana huasijje, Asia meshi yasijje. Ojjaña apoa poajo, ebishe mese besapoquinaje. Ecuaa Anitaco nijje besapoquinaje Pabo nijje. Anitaco yahuajo Tesanonica cuiñajji ba'enaje, Masenonia meshijo. Oya Pabo chacosahuajji poanaje. ³Majoya quea huesha nee besapoqui majje ecuaa Sinono cuiñajji yasijje ba'eñaquinaje. Ba'eñaqui majje Joño Pabo quea pame nee acanaje; oya poqui mee canaje ecuaa nijje Jesosaja epeeji cuana baa, bobi ijijaa, aquiana chichaa pea'ai ebesapoquijji. ⁴Majoya bishe aijo ani o'oya majje ecuaa Sinonojo ba'e besapoqui o'oyanaje. Beni quea quemohua bishe hui cuiasehujje cajje enashajohua nane canaje. Jamajjeya ebishe mese besapoquinaje Chipe nasi yasijje. Chipe nasi shanijje, beni chama huasijje besapoquinaje, enashajo ai chama huasijje. ⁵Majoya Chipe nasi yeje majje ecuaa bae oje miji yasijje, ena poeji miji yasijje besapoquinaje, Sinisia meshi chipi nei, Panipinia meshi pea'ai yejjenaje quea chipi nee. Majoya besapoquinaje Nisia meshi yasijje. Miña cuiñajji yasijje ba'eñaquinaje.

⁶Miña cuiñajji ba'eñaqui majje ecuanaja aquiana cuana jeasohuaquinaje etaja huasijje. Majoya Joño Pabo pea bishe ai sa'ajja canaje Itania meshi yasijje ebesapoquijji. Bishe ai Anejanía cuiñajji ba'e Itania meshi yasijje besapoquiani ba majje Joño Pabo ojjaña dejja cuana eme jeyo'yo ma bishe aijo ani mee canaje. Majoya ecuaa besapoquinaje. ⁷Jamatii quea cahui huiso ecuaa jipashineijje besapoquinaje. Beni pajijjija enashajo quea 'aa nee nee aniya bishe ai nane canaje, hui cuiajjoti canaje pea'ai. Ebesapoquijji quea camaja poanajejo, quijje pishana ecuaa poeyanaje Nido cuiñajji yasijje. Beni quea quemojjo bishe beni poeji miji yasijje besapoqui meeme ajja poanaje. Jamajjeya beniya ecuaa dojjea canaje eeno poeji miji yasijje. Nasi quea quemmo Queta nasi bajjani yasijje dojjea canaje. Queta nasi shanijje, benima huasijje besapoquinaje. Nasi huujje jjejejequinaje Sanomo meshi bajjani huujje. Majoya beniya ecuaa dojjea canaje Queta nasi pea miji yasijje. ⁸Nasi sahuajje quea besapoqui camaja poanaje. Jamajjeya ecuaa Enashajoma' cuiñajji yasijje ba'eñaquinaje, Nasea cuiñajji chipi nei.

⁹ Ebesapoqui'yo quea cahui huiso nee nee poanaje. Jamajjeya jjuhuee she poanaje. Jjuhuee shejo quea beni quemajo, enashajo quea quemonee nee poanijo bishe hui'i'yo chana'. Jamajjeya Pabohua ojjaña cuana bishejo nequi jama acanaje ba'a: ¹⁰ —Epeeji cuana, ishajja'ajjacue mo! Ecuea eba ecuana jjeyahua nei besapoqui'yo quea camaja nee nee poaje. Bishe hui'i'je'yo, aquiana cuana bishejo ani hui'i'je'yo pea'ai. Eseyapea'ai hui'i'yo chana' —Pabohua acanaje.

¹¹ Jamatii sohuinano huoojeajji Joñoja Pabo shajja'ajja jjima. Ebishe meseja esohui, bishe huijeajjija esohui pea'ai ca ca shajja'ajja canaje. Onaaya huohui canaje jama ba'a: —Ecuana jjeyahua nei bishe aijo besapoqui'e. Ehui'i'yojji pojjeama, de. ¹² Enashajoma' cuiñajji quea tai poaje eeno shejo. Jiquiojo ba'e mee ajja; quea huoe nee nee poaje —acanaje cuaa.

Jamajjeya beshahua nei ojjaña dejja cuana jomajo nequi sa po'yo ajja poanaje. Besapoqui sa poanaje quea huesha Penise cuiñajji yasijje. Jama poanaje ba'a: —E'e pojja'a eseyadojo caje Penise yasijje, beni chama pishana huasijje. Jomajo nequi'eeno shejo —poanaje cuana.

Enashajoma' cuiñajji beni poeji mijijje nequi; Penise ca ca pea ojje mijijje nequi.

Benipajji quea quemohua bishe nane canaje

¹³ Jamajjeya beni biso nei eeno po'yajo, dejja cuana ma bishejo nequi quea bihui nee jama poanaje ba'a: —E'e, jjeya quea pame nee ebesapoqui'ji beni sisijo. Cua'a, ebesapoqui —poanaje ojjaña.

Jamajjeya bishe picho canaje, besapoquinaje Queta nasi sahuajje quea chipi nee. ¹⁴ Jamatii quijje pishana beni quea quemonee ena poeji mijijje poeyanaje. ¹⁵ Benipajjiya janobajjima nei bishe nane canaje. Beniya bishe huijea canaje. Ebishe meseja beni poejeje bishe poqui meeme ajja poanaje. Quea camaja nee neejojjo ojjaña hueahueanaje. Jamajjeya beniya bishe jamatii dojo canaje. ¹⁶ Caona nasi sisi chipi nei yasijje bishe dojo canaje beniya. Caona nasi shanijje jjejejequianijo beni nequique pishanaquinaje. Jamajjeya bishe sisi quea pame jeyojaca'ajja canaje bishe ai pejejo. Quea camaja poanaje bishe ejeyojacajji beni yeje. ¹⁷ Jamajjeya bishe sisi bishe ai biaje jjequisohua majje jeyo canaje. Bishe ai jeyo ca'a canaje pea'ai jono quea quemohua. Ebishe ai meseja jama acanaje ba'a: —Beniya bishe ai dojo ca chana' meshijaji yasijje, Sinite meshijaji quea chipi nee yasijje. Daqui quea quemoequeaquini eyajo ba'eya beniya bishe dojocuai ca chana' —acanaje.

Jamajjeya ma daqui cuana bebo ca'yonaje cuaa beni quea quemajo. Majoya bishe jamatii dojo canaje beniya. ¹⁸ Beni quea quemonee po tiitianijo mecajjeahua ecuaaya aquiana cuana bishejo ani jeoqueajeanae ena huasijje, bishe quea peja epoiji nisho. ¹⁹ Pea pojajo aquiana cuana quea bique, bishe chacoji cuana jeoqueajeanae ena huasijje pea'ai. Jono cuana quea quemonee quea huiso pea'ai jeoqueajeanae ena huasijje quea peja epoiji nisho. ²⁰ Quea huiso cahuime benipajji po tiiti nequinaje. Quea misi nee poanaje. Eshequi chama' poanaje, majameta cuana pea'ai. Ojjaña cuana quea mete nee jashahuabaquinaje jama ba'a: —E'e de, hui'i'je'yo se, de.

²¹ Quea mete jjejojya ojjaña cuana ijja'ijjia jjima nequinaje quea huiso cahuime. Majoya Pabo ojjaña coja nei nequinaje. Huohui canaje jama ba'a: —Epeeji cuana, yahuajo eseya Queta nasijo nequi eyaya miquianaya huohui'ajjanaje eseya poqui majje hui'i'yo chana'. Jamatii miqunanaya jshajja'ajjaqui sa po ajja poanaje. Yahuajo ecuea esohui miqunaaya eshajja'ajjanaje jojjemo aquiana quea huiso ena huasijje jeoqueaje'yo jjima poquiaye. Jiquio bishe pea'ai hui'i'yo jjima pome. ²² Jamatii ja'a quea mete pojji! Ecuea eba jama ba'a: Jiquio bishe hui'i'je'yo. Jamatii eseya hui'i'yo ajja poaje. ²³ E'e, eya Eyacuiñajjija epeeji, ojaya esohui huohuijji. Eyacuiñajjija eya jaahuana cani. Mecajje ojaya esohuidojojji huoojea canaje enijje mimiya. ²⁴ Jama poanaje ba'a: “Pabo, ja'a quea mete pojji! Eyacuiñajjija miya huoojea caje Shomano emeshi mese yasijje esohui huohuiya. Jamajjeya Eyacuiñajjija miya jaahuana caje, miya quea pame nee acaje. Jamajjeya ojjaña cuana minijje besapoqui'ni pea'ai ohuaya jaahuana caje'yo, ehui'i'yojji pojjeama” eya acanaje esohuidojojjiya. ²⁵ Jamajjeya quea bihui nee pocue! Eyacuiñajjija esohui jayojja jama ohuaya acaje e'e jojo nei. Jamaya ecuea eba. ²⁶ Jamatii beniya bishe dojo caje nasi yasijje; cuiayijejea caje. Jaañajji majje cuiapojjea caje meshijajji enashajo quea quemohua —Pabohua acanaje.

²⁷ Majoya quea cahui huiso nee nee, 14 cahuime bishe jamatii dojo canaje beniya. Bishe dojo canaje bae sahua huasijje, Adia ena huasijje. Mecashono bishe chacoji cuaa jama acanaje ba'a: —E'e pojja'a eseya meshi chipi nei dojo cani beniya.

²⁸ Majoya ohuaya aquiana quea bique jeyo canaje quea jono ajo. Jeoquea canaje ena huasijje. Ipia'ajja canaje ache doe ebajji. Jono quea ajo ba canaje ena quea doe nee nee,

36 metro doeme. Majoya quijie pishana ipia'ajja ca o'oyanaje. Ba canaje ena quea doe pishana, 26 metro doemeya. ²⁹ Jamajjeya quea ajjajja nee nee poanaje jama ba'a: —Beniya bishe dojo caje, cuiayiyeeja capoquijie bajjoo ani yasijje. Bishe jjacuiapojojeaquijieñaqijie nei nei, de, bajjoojo pojjia'a, de —taame poanaje.

Jamajjeya bishe chacojji cuaa ebeca pee pea'ai ejjashehuaquijji iyanobia canaje ena huasijje beniya edojo capoani jjejojo. Jeyo ca'a majje epojja ishoa'ajja po ba'enaje quea mete nee nee. ³⁰ Bishe chacojji poani aje oe jjashahuaba taiquinaje ebesapoquijji etaja huasijje, enequisohuaquijji nisho epoquiquehuajji. Mecashono bishe sisi ecapashineijje jeaoqueajea canaje ena huasijje. Sijaje poanaje jama ba'a: —Ecuana poquijie bishe hui jeyohua. E'e, bishe hui ejjashehuaquijji ena huasijje jeaoqueajea poquijie ecuaña —jama sijaje pomeya poanaje.

³¹ Pabohua ca ca sohuinano cuana, sohuinano huoojeajji Joño pea'ai huohui canaje jama ba'a: —Chojja. Bishe chacojji cuana bishe ajo mi nequijajo Eyacuiñajjiya eseya ejaahuanajji pojjeama —acanaje.

³² Jamajjeya Paboya sohui shajja'ajja canaje sohuinano cuaa. Jjono cuana bishe sisi ejeyojji'ya jajasejjajea canaje. Jajasejjajea cajje bishe sisi jamatii dojojea canaje se'ejjama'.

³³ Beshahua nei jipajjaquianijo, Pabohua ojjaña ecuaña bobi ijji mee canaje. Huohui canaje jama ba'a: —Miquianaya quea huiso nee nee cahuime, 14 cahuime ijji'ijji ijji'ijji nequi, cahui jjiima nei nequi beni yajjajo, enashajo yajjajo, ehui'ije'yo poso jjejojo.

³⁴ Jamajjeya ijji'ijji socue! ¡Bobi ijjiacue! O'o mi oe shocuishocuije so'o e'ijji'ijji jjejojo, mano'ama poaje eshocuishocui besapoquijji. Hui'iyajo aija se poaje bishe hui'iyajo. Ojjaña eseya jamatii quea pame poaje —Pabohua acanaje.

³⁵ Jamaya huohui majje Pabohua pahui iñanequia majje bihuia canaje Eyacuiñajji ojjaña ecuanaja ebajji. Pahui mijisisi majje ijji canequinaje. ³⁶ Pabo ba majje ecuaña quea bihui nee poanaje. Jamajjeya bobi ijji pea'ainaje ecuaña. ³⁷ E'e, eseya jiquio bishejo ani dejja mahuiso ba'a: quea huiso nee nee, 276 huisome se poanaje. ³⁸ Jamajjeya aje oe ojjaña cuana jeje canaje. Jeje majje quea huiso anoso ai, pahui pohui pea'ai jeaoqueajea canaje ena huasijje bishe quea peja epojji, eba'ecuaya'yojji pea'ai.

Bishe ai hui'iyonaje

³⁹ Jipajjaquijajo mecajjeahua nei bishe chacojji cuaa meshi quea chipi nee ani ba canaje. Onaja ma meshi ba jjiima, ache meshi shai. Huesha'ama meshijaji enashajoma' pishana, quea coe pishana ba canaje. Jamajjeya echacojji cuana poqui sa poanaje bae sahua huasijje, ena coe yasijje bishe ba'ehuanañaquiya nisho. Jomajo enashajo quea quemmo pishana yani. ⁴⁰ Majoya ejjashehuaquijji cuana jajasejjajea canaje, dojojea canaje, eje-huibeje bishe quii ca'ajji ejeyo ba'e jjono jajasejja acanaje bishe epii nei edojo cajji. Majoya daqui quea quemmo quecuauini majje nequiasohua canaje, beniya bishe huijje dojobesa canaje meshijaji yasijje. ⁴¹ E'e, beniya bishe ai hui dojobesa canaje. Meshijaji biajje huanasohujaje capoquinaje. Bishe jaañaquinaje. Bishe chacojji cuaa bishe meshijajji hui jaañaquijajo quecuayiyeeja'ajja ca'yo nequinaje. Enashajo quea quemohua, quea cuejipashi neeya bishe quijje nane amajje bishe cuiapojojea canaje. ⁴² Sohuinano cuana jama poanaje ba'a: —Bishe hui'iyajo, dejja cuana ejeyo nequi meshi yasijje shocuishocui majje poquiquehua chana'. Jamajjeya eseyaya ojjaña joya eme ejeyo ani quecuajea jeyojeyo'yo —poanaje sohuinano.

⁴³ Jamatii sohuinano huoojeajjiya Joñohua Pabo nahue sa acanijo huohui canaje jama ba'a: —Dejja cuana eme jeyo ani ja'a quecuay'yojji! ¡Pichojeay'ocue oe! ¡Joya shocuishocuihani tohuua meecue ena huasijje! ¡Meshi yasijje cashocuishocui besapoquiahua! ⁴⁴ ¡Pea cuana joya shocuishocui aija ca ca huepee biajje, bishe ecuiapojojea biajje cuanaya cabesapoquiahua meshi yasijje! —acanaje Joñohua.

Jamajjeya ojjaña cuana meshi yasijje besapoquinaje. Hui'iyajo jjiima nei nei cuana. Nequisohuaquinaje etaja huasijje, ojjaña ecuaña.

28

Pabo Manita nasijo nequinaje

¹ Jamajjeya ojjaña ecuanaya meshi yasijje besapoqui'yonaje. Etaja huasijje nequisohuaqui majje dejja cuana jomajo ba'e ecuaña banaje. Ohuaya ecuaña huohui canaje: —Jiquio meshi Manita nasi bajjani. Quea quemmo nasi —acanaje.

² Ese ejja cuana jomajo ba'e mase'ama, quea pame nee nee. Miminaje ojjaña cuana nijje. Enapajji quea huoejo cuaqui quea huiso chicha majje dahuahuojje canaje. Jama acanaje ba'a: —¡Poecue cuaqui yasijje; ojjaña nequiana jayoquihuacue! ¡Quea pame nee ecuaña nijje ba'ecue! —acanaje.

³ Majoya Pabohua acui sisi cuana chicha canaje cuaqui. Ma acui sisi cuana cuaqui quea jiji nee, quea quiyo nee yasijje jeajea canijo, peyo se najjiya Pabo me ijia neinei ca'yonaje. ⁴ Nasi aijo ba'e deja cuaa peyohua me ijia caje Pabo ba canaje. Jamajjeya oya cuana ojee mimimiminaje jama ba'a: —E'e jojo nei jiquio deja pea quecuajji. Jamajjeya oja mimishijo peyohua oya ijia canaje. Oya hui'lyo jjima bae aijo. Jamatii jyeahua nei oya manoje'yo oja mimishijo —jama posoya acanaje cuaa.

⁵ Jamatii Pabohua peyo jeajea canaje cuaqui yasijje. Nee'ama, mano jjima oya poanaje, shejje jima pea'ai. ⁶ Ojjaña cuaa Pabo ba neinei ca aninaje. Jjashahuabaquinaje jama ba'a: —Jyeahua nei oya shejjeje ba'ajja. Jjeya nei pojja'a oya manoje'yo —poanaje.

Chojja, Pabo mano'ama nei nei poanaje. Quijje pishana Pabo quea ja'a nee nee, quea mano pojjeama ba majje ma deja cuaa oya jama acanaje ba'a: —Oya emano'yojji pojjeama —cuana poanaje.

Jamajjeya onaaya huohui canaje jama ba'a: —Oya deja pojjeama. Oya pea eyacuiñajji deja jayojja poeyanaje, de —poso acanaje cuaa ojjaña.

⁷ Manito nasi emeshi mese Pomino bajjani poanaje. Ojaya que cuana huesha'ama nequi. Ohuaya ecuana iyaa canaje ojaya equi cuana huasijje. Ecuana nijje miminaje quea pame nee nee. Ojaya equi canajo ecuana ba'e mee canaje pea beca peejjima cahuime, Pominohua. ⁸ Emeshi mese Pominoja chii huaquia'yonaje ba majje ojjaña emanojaa cuana nasi aijo ba'e poeyanaje Pabo que. Jesosaa Pabo ojjaña huaquia meesahua ca'yonaje. ¹⁰ Majoya ma deja cuana quea bihui nee nee poanaje. Aquiana quea huiso ecuana quia canaje sosema'. Quijje ecuana pea bishe ai yasijje anisohuaqui'yonaje. Majoya nasi aijo ba'e cuaa quea huiso pea aquiana cuana eba'ejji ecuana quia canaje sosema'.

Pabo Shoma cuiñajji yasijje besapoquinaje

¹¹ Jamajjeya ecuana Manita nasijo ba'enaje pea beca peejjima ba'ime, 3 ba'ime. Majoya ecuaaya pea bishe ai banaje eyacuiñajji beca jaa bajjani, Casito Pono bajjani. Ma bishe ai Anejanía cuiñajjijo jaa poe majje eeno shejo Manita nasijo aniñaquinaje; majoya besapoquinaje Shoma meshi yasijje eba'eñaquijji. Jamajjeya sohuinano huoojeajji Joñohua ecuana ma bishe aijo ani mee canaje. ¹² Majoya besapoqui'yo majje ecuana pea nasi yasijje poeyanaje, Sinacosa cuiñajji yasijje ba'eñaquinaje. Jomajo ecuana nequinaje pea beca peejjima cahuime. ¹³ Majoya Sinacosajo ani ecuana besapoqui o'oyanaje. Itania meshi yasijje poeyanaje. Shejjo cuiñajji yasijje ba'eñaquinaje. Majoya mecajjeahua eeno beni sisi poanaje. Jamajjeya beniya bishe dojo canaje quea pame nee. Beca cahuime po majje ecuana Poteoni cuiñajji yasijje ba'eñaquinaje, Itania meshi yasijje. ¹⁴ Poteoni cuiñajjijo Jesosaja epeejji quea huiso cuana ba'enaje. Ohuaya ecuana iyaa canaje oja equi yasijje e'anijji. Jamajjeya ecuana ma cuiñajjijo nequinaje me oejje beca cahuime, 7 cahuime Jesosaja epeejji cuana nijje. Majoya ecuana poquinaje Shoma cuiñajji quea quemo huasijje ejiojjijje. ¹⁵ Jesosaja epeejji cuaa Shomajo ba'eya shajja'ajja canaje Pabo poeyani. Jamajjeya oya cuana Pabo ishoo sa po ajja Shomajo. Poeyanaje Apio cuiñajji yasijje, pea cuiñajji yasijje yohua bajjani yasijje ba'a: Pea Beca Peejjima Equi cuana huasijje pea'ai Pabo baa. Jamajjeya Jesosaja epeejji cuana jomajo tii ba majje Pabo quea bihui nee nee poanaje. Eyacuiñajji bihuia canaje, Pabohua.

Pabo Shomajo ba'enaje

¹⁶ Majoya ecuana Shoma huasijje poquinaje. Shomajo nequiñajji majje sohuinano huoojeajji Joñohua Pabo huohui canaje jama ba'a: —Pabo, ¡miya mee nei ba'ecue jiquio equiojo! —acanaje.

Jamajjeya oe sohuinano Pabo jaahuanajji nequinaje ma equijo pea'aiya.

¹⁷ Majoya pea beca peejjima cahuime po majje Pabohua Jodio etii cuana iyaa canaje. Ojee jjachichaquajjo Pabohua oya cuana huohui canaje jama ba'a: —Epeejji cuana, ¡shajja'ajjacue mo oe! Ecuea Jodio cuana quea mimishi ajjima poanaje. Eseyaya etiquiana cuanaja esohui pajea'yo jjima ecuea pea'ai. Jamatii eya Jenosanenajo nequi Jodio etii cuaa eya iña canaje. Eya quia canaje Shomano deja cuana huasijje. ¹⁸ Shomano etii cuaa eya huohui'ajja canaje. Jamatii ecuea esohui shajja'ajja majje onaaya eya ba canaje quea mimishi pojjeamajjo ecuijje'yojji pojjeama onajaya, ejeanobiajea'yojji tii pojjeama pea'ai. Onaaya eya pichojea sa acanaje. ¹⁹ Jamatii Shomano cuaa eya pichojea sa acanajo, Jodio etii cuana quea mase nee, quea quene nee nee poanaje. Jamajjeya eyaya jama anaje ba'a: “Shomano emeshi mese etii nijje, Sesá nijje eya mimi sa poani. Ecuea esohui shajja'ajja majje ohuaya cahuohui cahua ojaya ejjashahuabaquijji ejo” eyaya anaje.

Jamatii ecuea Jodio cuana niñeba jjima poanaje, o niñeba sa po ajja eya. Chojja, Jodio cuana ecuea huapa pojjeama cuana. ²⁰ Jamajjeya eya miquiana nijje mimi sa poani. E'e, ojjaña Isaeni cuaa ishoa'ajja canaje Eyacuiñajjiya huoojea'yo ojjaña jaahuanajji Quito. Quitohua ojjaña cuana ba'e mee caje o'oya eyajo onijje. Eyaya ojo huohuiañaajo, Jodio etii cuaa eya jeyo mee canaje baa jjonohua. ¡Bacue jiquio baa jjono ba'a! —Pabohua acanaje.

²¹ Jodio cuaa Pabo saja'a canaje jama ba'a: —Pabo, Jodio cuana Jodea meshijo ba'eya ecuanaja huasijje esohui etehue'yo mijo huoojea jjima. Ecuanaja epeeji Jodea meshijo ba'eya poe jjima mi huohuiji pea'ai. Oya cuana poe jjima mi niñebajji epo pea'ai. ²² E'e, ecuanaja miquea esohui shajja'ajja sa poani. Ecuanajaya eba ojjaña meshijo pea cuaa Jesosaja epeeji cuana niñeba cani. Jamajjeya shajja'ajja neinei sa poani ecuanaja — acanaje Jodio cuaa. ²³ Majoya Pabo huohui canaje jama ba'a: —E'e, ecuanajaya epeeji cuana huohui majje ojjaña poeje miquea esohui shajja'ajja.

Jamajjeya quijje pishana pea pojjaajo quea huiso Jodio cuana mecajjeahua poeyanaje Pabo shajja'ajjaa. Pabohua esohui huohui canaje quea huiso nee nee. Meca cuanajje oya mimi tiitii nequinaje Eyacuiñajji ojjaña huoojeajji poajejojo. Jodio cuana ba mee sa acanaje Jesosa Eyacuiñajjiya huoojea'yo ojjaña jaahuanajji, Quito. Pabohua Moisesija etehue'yo cuanajo, Eyacuiñajjiya esohui huohuiji yahuajo nei ba'eya esohui etehue'yo pea'ajjo Jodio cuana ba mee sa acanaje Jesosa e'e jojo nei Eyacuiñajjiya huoojea'yo ojjaña jaahuanajji, Quito. ²⁴ Quea huiso Jodio cuaa ojaya esohui shajja'ajja majje huohui canaje jama ba'a: —E'e de, ojaya esohui e'e nei —acanaje.

Pea cuana ca ca ojaya esohui shajja'ajja sa po maja ajja. Jesosa Eyacuiñajjiya huoojea'yo ojjaña jaahuanajji pojjeamajo poso quea quene nee poanaje cuana Pabohua jama huohuime acajje. ²⁵ Jamajjeya ojee cuana anica jjamimicuijaje nobiajeaquii poquinaje. Ojjaña cuayaquianijo Pabohua jama acanaje ba'a: —Edojjoshahua Pameya Eyacuiñajjiya esohui huohuiji Isaia yahuajo nei nei esohui huohui meesahua canaje miquianajaya etiiquiana cuana huasijje. E'e, ¡miquianaya quea sapa ca'a poanijo shajja'ajjacue ojaya esohui etehue'yo! Jama aca poa Isaiaa yahuajo nei ba'a:

²⁶ “Jodio cuana huasijje poqui'yo majje huohuicue jama ba'a: —Shajja'ajja majamaja majje jamatii ecuea esohui quea quehua poaje miquianajaya. Ba majamaja majje jamatii jjabahuejjaqui ajja poaje. ²⁷ Jiquio Jodio cuana quea jashahuabaqui quehua poani tii tii. Quea sapa ca'a. Jashajja'ajjaqui sa po'yo ajja. Ba sa po'yo ajja pea'ai. Ba sa pojji jojjemo ohuaya ba ca'yome. Jashajja'ajjaqui sa pojjiya jojjemo jashajja'ajjaqui'yome. Quea jashahuabaqui ja'a po sa pojji jjemmo quea jashahuabaqui ja'a po'yome. Jamajjeya oya cuana ecuea epeeji cuana po'yome. Eyaya ojaya mimishi cuana cuijea'yome pea'ai”.

Jamaya Eyacuiñajjiya Isaia huohui mee ca poa.

²⁸ Majoya Pabohua jama acanaje ba'a: —Jamajjeya ¡bacue! Eyacuiñajjiya ojjaña jaahuana-jji Jesosa huoojea canaje mano'yohua, mimishi cuana cuijea'yojji, mimishi sosequia'yojji pea'ai. Ohuaya ojjaña ojaya epeeji cuana ba'e tiitii mee caje'yo onijje eyajo. Jodio cuana shajjama' poanijo, Eyacuiñajjiya eya huoojea canaje Jodio pojjeama cuana huasijje ojaya esohui huohuiya. Jodio pojjeama cuaa ca ca shajja'ajja caje, de —Pabohua acanaje.

²⁹ Majoya Pabohua esohui huohuijeyo cajo, Jodio cuaa oya jiñajea ca'yonaje. Majoya oya cuana janobajjima nei ojee jjamimicuijaje nobiajeaquinaje.

³⁰ Jamajjeya beca shequajame Pabo oe nei ba'enaje oe equijo, ejjesheji sosejje. Ojjaña cuana o que poeyajo, ojjaña cuana nijje quea bihui nee miminaje, quea bei nee poanaje.

³¹ Ohuaya huohui canaje Jesosa ojjaña huoojeajji poaje. Emeshi Mese nei Jesosa Quitojo huohui majamaja canaje mete'ama. Pea cuanaja oya huohui pajea mee jjima poanaje, jamatii oya sohuinano cuanaja nahue poanaje. Jamaya poanaje.

Oeya ecuea esohui. Eya Noca bajjani esohui tehuejji. Apoa.

PABOJA ETEHUE'YO SHOMAJO BA'E CUANA HUASIJJE ROMANOS

Pabohua esohui tehue canaje Jesosaja epeeji cuana Shoma cuiñajjiyo ba'e yasijje

¹ Eya Pabo bajjani. Jesosaja epeeji cuana, eyaya jiquio esohui tehueña miqüiana huasijje Shoma cuiñajjiyo ba'eca huasijje. Eya ca ca iña Jesosa Quitoja huoojea'yo ojaya esohui huohuiji. Eyacuiñajjiya eya babaca canaje ojaya esohui huohuiji epojji. Ohuaya eya huoojea canaje quea huiso meshi yasijje ojaya esohui quea pame nee Jesosajo huohuiya.

² Yahuajo nei nei Eyacuiñajjiya ma esohui quea pame Jesosajo ojaya etehue'yojo tehue mee ca poa ojñaña ebajji. Ojaya esohui huohuiji yahuajo nei ba'e ma esohui huohui neinei mee ca poa pea'ai. ³ Jamaya Eyacuiñajjiya eseya ba mee cani oja Bacua Ejja oe nei Jesosa ese jayojjaya yamijji poeyanaje. Cuayanaje Maniaja bacua. Jodio cuanaja emeshi mese quea pame nee Dabi bajjani ojaya etiiqüiana, huapa pojjeama yahuajo ba'ya poa. ⁴ Oya Jesosa Quito ese jayojjaya yamijji poanaje. Oya Eyacuiñajji nei pea'ai, oja Chii jayojja nei nei, mimishi'ama nei nei. Oya mano'ya poa. Jamatii Eyacuiñajjiya quea ca'a nee neeya oya emano'yojaa shequi mee ca o'yanaje. Jamaya ohuaya ojñaña ba mee canaje Jesosa e'e jojo nei oja Bacua Ejja, esejaya Emeshi Mese nei. ⁵ Eya Jesosaja epeeji poanijo Eyacuiñajjiya eya ojñaña meshi yasijje huoojea canaje jama ba'a: —¡Poquicue miya ojñaña Jodio pojjeama cuana huasijje! ¡Ecuea esohui ba meequicue Jesosajo! ¡Onijje japeequi meesahuacue! Jamajjeya onaaya Jesosa bihuia tiitii caje'yo —jamaya Eyacuiñajjiya eya huoojea canaje quea pame nee.

⁶ E'e ecuea epeeji cuana Shomajo ba'e, Eyacuiñajjiya miqüianaya babaca canaje pea cuana nijje Jesosa Quitoja epeeji epojji. ⁷ Jamajjeya eyaya miqüiana que jiquio esohui tehueña. Miqüianaya Eyacuiñajjiya quea jea nee nee. Ohuaya miqüianaya babaca canaje ojaya epeeji nei epojji. ¡Eyacuiñajjiya esejaya Chii aya, Jesosa Quitoja esejaya Emeshi Mese neiya miqüianaya cajuahuana cahua; quea bei nee caba'e meesahua cahua pea'ai!

Pabo ojaya epeeji cuana Shomajo ba'ejo Eyacuiñajji nijje mimiani

⁸ Ecuea epeeji cuana Shomajo ba'e, ojñaña meshijo ba'e cuana miqüianajo mimiani quea bei Jesosaja esohui jayojja jama ba'yanijo. Ma shajja'ajja majje eyaya Jesosa esejaya Chii ai pea'ai bihuiaña jama ba'a: —Eyacuiñajji, miya quea pame nee. Ojñaña eba miyaya miqüea epeeji cuana Shomajo ba'e jaahuanaña —eya poani.

⁹ Eyaya e'e jojo nei Eyacuiñajjiya esohui quea pame nee oja Bacua Jesosajo huohui tiitiaña quea bihui nee. Ojaya eba eya onijje mimi majamajani miqüianajo. ¹⁰ Eya jama poani ba'a: —Eyacuiñajji, yahuajo eya poqui sa poanaje Shoma huasijje Jesosaja epeeji cuana ba. Jamatii poqui mee jjima eya miqüea. Eyacuiñajji, ¿a'a jjeya eya Shoma huasijje huoojea sa aña miyaya? —eya jamaya Eyacuiñajji nijje mimi majamajani.

¹¹ E'e, eya miqüiana ba neinei sa poani Jesosaja epeeji quea ca'a nee epo meesahua'yojji. Edojjoshahua Pameya eya ba mee canaje Eyacuiñajjiya esohui eyacua quea pame. Ma esohui eyacua shajja'ajja majje miqüianaya Jesosaja epeeji quea ca'a nee poaje.

¹² Miqüianaaya eya baje Jesosaja epeeji quea ja'a nee poani. Cuanaya miqüianaya Shomajo ba'e Jesosaja epeeji quea ja'a nee baje eyaya. Jamajjeya Eyacuiñajjiya eseya ojaya epeeji cuana quea ja'a nee po meesahua caje'yo.

¹³ Ecuea epeeji cuana, ¡bacue jiquio esohui! Yahuajo eya poqui sa neinei poanaje miqüiana ba. Jamatii eya poqui mee jjima, de. E'e, eyaya Jodio pojjeama cuana pea meshi cuanajo ba'e japeequi meesahanaje Jesosa nijje. Jamaya eyaya miqüianaya Jesosa nijje japeequi meesahua sa aña pea'ai. ¹⁴ Eyacuiñajjiya eya huoojea canaje ojaya esohui huohuiya ojñaña cuana huasijje jama ba'a: Ojñaña joya esejaya esohuijo mimiani yasijje, ojñaña pea esohuijo mimiani yasijje pea'ai, ojñaña joya papeni ba po jjima huasijje, joya papeni ba epo cuana huasijje pea'ai, ojñaña huasijje. ¹⁵ Jamajjeya eyaya miqüiana Shomajo ba'e yasijje Eyacuiñajjiya esohui huohui sa aña.

Jesosaja nijje japee neinei qüianajo mimishi cuijea ca'yani Eyacuiñajjiya

¹⁶ ¡Bacue! E'e jojo nei ojñaña joya Jesosa nijje japee neinei qüianajo Eyacuiñajjiya mimishi cuana cuijea neinei caje'yo, joya ojaya esohui shajja'ajja majje e'e jojo nei acani. Jamaya ecuea eba. Jamajjeya eyaya bicho'ama ma esohui huohui majamajaña ojñaña cuana huasijje. E'e, Jodio cuana ma esohui shajja'ajja majje, Jodio pojjeama cuana shajja'ajja canaje pea'ai. ¹⁷ Eyacuiñajjiya esohui quea pame Jesosajo shajja'ajja majje eseyaya Eyacuiñajjiya ejashahuabaquijji baña jama ba'a: —Ojñaña Jesosaja epeeji nei nei eyaya mimishi cuana cuijeaje'yo e'e jojo nei epojji. Jesosaja epeeji pojjeamaja mimishi ecuijea'yojji pojjeama —Eyacuiñajji poani.

Ojjaña Jodio cuana, Jodio pojjeama pea'ai quea mimishi poani

¹⁸ ¡Bacue ecuea esohui ojjaña mimishi cuana! Eyacuiñajji eyajo ba'e quea quene nee nee poaje ojjaña coya mimishi po majamajani nijje. Quea nee nee acaje'yo. Oya cuana aje oe jama poani ba'a: Quea mimishi poani tii, Eyacuiñajji bihuia ajja, mimishi pajea sa po'yo ajja. Eyacuiñajji esohui shajja'ajja sa po ajja, pea cuana esohui shajja'ajja mee ajja pea'ai shajjama' cuana nijje ejjapeequijji jjejojo. ¹⁹ E'e, Eyacuiñajjiya ojjaña ba mee ca poa oya quea pame nee, quea ca'a nee enequi tii tii. Jamajjeya ¡Eyacuiñajji ojjaña caba cahua, de! ²⁰ E'e, oya ca ca oe Eyacuiñajji nei quea ca'a nee nee enequi tii tii. Ohuaya ca ca oe ojjaña pana ca'ya poa. Jamajjeya ojaya epana'yo ba majje ¡joya e'e jojo nei Eyacuiñajji bacue, ojjaña! Jamatii beca cuana siajje poani jama ba'a: —Esejaya Eyacuiñajji ebajji pojjeama, jjabameequi ajja, de. ¿Yajja bame yajji eyami ebajjiyojo? —poani. ¡A'a jama siajje pomeya pojji!

²¹ E'e de, yahuajo nei ojjaña eba Eyacuiñajji yani. Jamatii onajaya Eyacuiñajji bihuia jjima jama ba'a: —Eyacuiñajji, miya oe nei quea ca'a nee nee enequi tii tii —jamaya ajjima —. Jamaya Eyacuiñajji, miya quea pame nee nee —ajjima. Oya cuana jamaya jjashahuabaqui jjima, de.

Jamajjeya oya cuana quea quehua jjashahuabaqui, quea mimishi. Jiquio ecua mecajje quea misi poquiani jayojja jama oya cuana quea mimishi ba'yani, Eyacuiñajji ba pojji! ²² Ojjaña ba epo poso jjabahuani. Chojja, ba jjima nei nei quianaja. Quea mimishi nee nee jjashahuabaqui, ojjaña de. ²³ Onaaya aje oe Eyacuiñajji nisho bihuia cani; dejja nisho, cuichojji nisho, aquiana nisho, peyo nisho pea'ai ne cani ebuihajji. Eyacuiñajji nei ca ca bihuia jjima, de. Eyacuiñajji ca ca oe enequi tii tii quea pame nee nee.

²⁴ Jamajjeya oya cuana quea mimishi ca'a nee nee; jjashajja'ajjaqui ajja jojoya Eyacuiñajjiya oya cuana cajaa acani jama ba'a: —Oya cuana shajjama' nei nei. Jamajjeya quea mimishi caba'yahua jamatii. Eyaya oya cuana mimishi pajea meesahua maja ajja —Eyacuiñajji poani.

Jamajjeya cajaa a'yo majje ojjaña ojaya ejjashahuabaqui tai jayojja jama ca'atiiti cahua cuaa. Pea cuana nijje aje oe quea mimishi nee capoahua. ²⁵ ¡Bacue! Eyacuiñajji e'e jojo nei oe nei yani. Ohuaya ojjaña pana ca'ya poa. ¡Ojjaña oya cabihuia tiiti cahua! Jamatii joya quea mimishi neeya Eyacuiñajji bihuia pajea cani eyacuiñajji nisho bihuiajji. E'e, oya cuana quea jjashahuabaqui quehua poani, de. ²⁶ Jamajjeya Eyacuiñajjiya oya cuana cajaa acani jama ba'a: —Oya cuana shajjama' nei nei. Jamajjeya jamatii quea mimishi canequiahua bicho'ama. Ecuea oya emimishi pajea meesahua'yojji pojjeama —Eyacuiñajji poani.

E'e, quea mimishi nee nee ba'yani bicho'ama. Eyacuiñajjiya esohui jama ba'e ajja. Epona cuana aje oe pea epona nijje quea mimishi nee poani, ojahue nisho acani, jjaso cojjoquiani. Pea cojjojji pea'ai poani. ²⁷ Dejja cuana pea'ai aje jjaja oe jamaya quea mimishi epona jayojjaya po pea'ai yani. Ehuanae jea majje epona nijje pojjeama jaani, pea dejja nijje quea mimishi ba'yani. Onijje dejja nijje jjaseehuejja cojjoquiani. Jamajjeya jjashajja'ajjaqui ajja jojoya Eyacuiñajjiya oya cuana cajaa acani. Ca'a'ama poani, quea jjashahuabaqui tai poani pea'ai.

²⁸ Eyacuiñajjiya epana'yo ojaya eba. Jamatii oya cuana jama poani ba'a: —E'e pojja'a Eyacuiñajji e'e jojo nei yani. Jamatii ¿apijji acuae oya shajja'ajja cajji so'o? Cajaa —oya cuana poani.

Jamajjeya Eyacuiñajjiya oya cuana jama poani ba'a: —Oya cuana ca ca oe quea jjashahuabaqui tai po tiitiani; quea mimishi ba'yani tii bicho'ama jjejojo. Jamatii quea tai caba'yahua —Eyacuiñajji poani.

²⁹ Jamajjeya ojjaña cuana quea mimishi nee nee poani tii tii. E'e, quea mimishi ba'yani, quea dejja tai, quea nishehui, onaja aquiana jea ba cani, pea cuana boti'ama nei nei poani, ona mimishi po meeji pea'ai poani. ³⁰ Pea quecuajji poani, jjamimicuajjea nobiaequijji poani, jjadasiaquijji poani, ojaya epeejji iñameejji poani equecua mee'yojji, mimijajji poani, pea cuana maimajji, Eyacuiñajji cajaa acani, pea cuana jeabichajejji poani, pea nijje mimi ajja pea'ai. Oya mimiani ojaya ejjashahuabaquijji pea cuana quea bihui po meeji nisho, jjashahuaba tiitiquiani mimishi ya'yojji. Oja chii, oja nae shajja'ajja sa po ajja pea'ai. ³¹ Jjashahuabaqui ajja, mimishi cuana quea pame poso acani, ojaya ehuohui jama a'ajja pea'ai. Huapa pojjeama cuana boti'ama acani, pea cuana quea nee po mee sa acani; pea quea nee, quea yeno po mee majje yeno'ama poani. ³² Dejja quea mimishija eba Eyacuiñajjiya esohui etehue'yo e'e nei jama poani ba'a: “Ojjaña joya quea mimishi poani quea nee nee poaje'yo. Mano'yo majje cuaqui yasijje poquije'yo. Enijje eyajo enequi'yojji pojjeama tii tii” Eyacuiñajji poani.

Maya ojjaña mimishi cuana eba. Jamatii shajjama' poani tii tii. Pea cuana aje oe quea mimishi po mee cani jama ba'a: —E'e, ocuee. ¡Jamaya a'ajja! —bihuia nisho cani.

2

Eyacuiñajjiya ca ca oeyaya huohui caje joya mimishi' amajo, joya quea mimishijo pea'ai

¹ Ecuea epeeji cuana, ¿a'a miquianaya jjashahuabaquiani miya ca ca oe quea pame, ma deija mimishi cuana jama pojjeama? ¡A'a pea cuana jama ajji ba'a: —Oya cuana quea mimishi nee poani. ¡Quea nee nee capo mee cahua Eyacuiñajjiya! —a'a jamaya mimijji!

¡Dee! Miquianaaya beca cuaa ona jayojja jama quea mimishi aña pea'ai. Jamajjeya Eyacuiñajjiya miquianaya quea nee nee po mee caje'yo ona jayojjaya. ² Ecuanaja eba Eyacuiñajjiya ejjashahuabaquiji e'e nei, ojjaña ojaya eba. Jamajjeya ojjaña joya quea mimishi ba'yani ohuaya quea nee nee po mee caje'yo, Jodio cuana, Jodio pojjeama cuana pea'ai, ojjaña nei nei. ³ Miya quea mimishi poanijo ¡a'a jjashahuabaquiji jama ba'a: —Eyacuiñajjiya pea cuana quea nee nee po mee caje'yo shajjama' poani jojjoya. Eya ca iña cho, quea nee epo meeji pojjeama —a'a jamaya pojji!

¡Dee! Miya quea mimishi poani ona jayojja. Jamajjeya Eyacuiñajjiya miya quea nee nee po mee caje'yo ona nijje. Miya ojaya eba, de, ejjanequiquehuauquiji pojjeama miya. ⁴ E'e pojja'a miya quea quehua jjashahuabaquiani jama ba'a: —Eyacuiñajji ojjaña nijje quea pame nee poani. Quenequea cuaji ajja. Joya ojaya esohui jama ba'e ajja jamatii quea nee nee epo meeji pojjeama. Jamajjeya eya quea mimishi po tiitiianijo, jamatii ojaya eya etecueajji pojjeama —poso jjabaquiani miya.

Chojja. Miya aje oe jjashahuabaquiani quea quehua nee. ¿A'a miquea ba jjima? Eyacuiñajji ojjaña nijje quea pame poani, ishoa cani emimishi pajea meesahua'yojji. ⁵ Jamajjeya miya quea mimishi nee nee jjejojo, shajjama' poani tiitiijo, Eyacuiñajjiya miya quea nee nee po mee caje'yo. E'e, quijje ohuaya ojjaña shajjama' poani tecuea neinei caje'yo. ⁶ E'e jojo nei Eyacuiñajjiya ojjaña eseya sosequia caje'yo ma eseya aninaje sosejje. Ojaya epeeji quea pame quea bihui nee po mee caje'yo. Shajjama' cuana ca ca quea nee nee po mee caje'yo ma o quea mimishi ponequinaje sosejje. ⁷ Jamajjeya beca cuana Eyacuiñajjiya esohui jama quea pame nee poani Jesosaja ejjashahuabaquiji jayojja epojji, o jayojja jama epojji, onijje eba'e tiitii'yojji. Eyacuiñajji quea bihui nee po mee sa acani. Jamajjeya Eyacuiñajjiya oya cuana bihuia caje jama ba'a: —E'e, miquianaya ecuea epeeji quea pame nee. Jamajjeya miquianaya enijje ba'e tiitii'e'yo eyajo.

⁸ Pea cuana ca ca Eyacuiñajjiya esohui e'e nei jama ba'e sa po'yo ajja. Cajaa acani. Shajjama' poani. Jamajjeya Eyacuiñajji onijje quea quene tii tii poaje'yo. Quea nee nee po mee caje'yo. ⁹ E'e, Jodio cuana, Jodio pojjeama cuana pea'ai Eyacuiñajjiya ojjaña quea yeno nee, quea nee nee po mee caje'yo shajjamajojo. ¹⁰ Joya ojaya esohui jayojja jama quea pame poani ca ca Eyacuiñajjiya huohui caje jama ba'a: —E'e jamaya, miya quea pame poani. ¡Jamajjeya quea pame, quea bei ba'ecue! ¡Enijje ba'e tiitiicue eyajo! ¡Enijje ojjaña huooejajji pocue! —oya cuana acaje.

E'e, Jodio cuana jamaya acaje Eyacuiñajjiya, Jodio pojjeama cuana pea'ai. ¹¹ Ojjañajo Eyacuiñajji e'e jojo nei jjashahuabaquiani. Eseyaya eba'ejjijo jjashahuabaquiani esosequia'yojji.

Eyacuiñajjiya ehuohui shajjama' cuanaajo e'e nei

¹² Jodio pojjeama cuanaja ba jjima poa Eyacuiñajjiya esohui ma Moisesiya tehue ca poa. Jamatii oya cuana quea nee nee po mee caje'yo Eyacuiñajjiya quea mimishi ba'yanijo.

Jodio cuaa ca ca Moisesiya etehue'yo ba canaje. Jamajjeya shajjama' poanijo, Eyacuiñajjiya oya cuana tecuea caje jama ba'a: —Miquianaya ca mi ca shajjama'. Moisesiya etehue'yo bajji poani. Jamatii jamaya a'ajja. Jamajjeya ma etehue'yojo tehue ca poa jayojja jama miquianaya quea nee nee poaje'yo —Eyacuiñajji poani.

¹³ Moisesiya etehue'yo Eyacuiñajjiya esohui ba majje jamatii Jodio cuana shajjama' poani. Jamajjeya ojaya mimishi cuana ecuijea'yojji pojjeama. Ojaya esohui jama acani ca ca oe Eyacuiñajjiya mimishi cuana cuijea caje'yo Jodio cuanaja. ¹⁴ Jodio pojjeama cuanaja ba jjima Eyacuiñajjiya esohui Moisesiya etehue'yo. Jamatii oya cuana ma esohui jayojja jama ba'yani beca cuana. E'e, quea ja'a nee jjashahuabaquiani. Jamaya ojaya eba quea pame eba'ejji. Ojaya eba eba'ejji quea tai pea'ai. E'e, Moisesiya etehue'yo Jodio pojjeama cuanaja ba jjima nei. ¹⁵ Jamatii, Eyacuiñajjiya oya cuana ba meesahua cani ojaya ejjashahuabaqui'yojji. Jamajjeya oya cuana oja mimishijo jama poani ba'a: —Chojja, jamaya Eyacuiñajjiya boti'ama. Eya shajjama' jayojja poani.

Joya quea pame ba'yani jama poani ba'a: —E'e, jamaya quea pame eba'ejji. Jamaya Eyacuiñajjiya quea boti nee —oya cuana poani.

¹⁶ E'e, Eyacuiñajjiya eba ojjañaja ejjashahuabaquiji cuana. Jamajjeya quijje ohuaya e'e jojo nei huohui caje'yo ojjañaja eba'ejjijo. Ohuaya Jesosa huoojea caje jama ba'a: —Jesosa, joya cuana sosequiacue ma ohua meshijo ba'yahuaa acanaje sosejje! —Eyacuiñajjiya acaje'yo.

Jamaya eyaya, Pabohua huohuaña ojjaña esohui quea pame nee Jesosajo.

Jodio cuana Moisesija etehue'yo ba majje jamatii shajjama' poani

¹⁷ Jodio cuana, miqúanaya mimi huicha'a huicha'ani jama ba'a: —Ecuana ca ca oe Jodio cuana, Eyacuíñajija babaca ojaya nei epojji. Ohuaya ecuaana ojaya esohui ba mee ca poa Moisesija etehue'yo. Jamajjeya ohuaya ecuaana ba cani mimishi'ama —miqúanaya poani—. ¹⁸ E'e, ecuaaya baña Eyacuíñajija esohui Moisesija etehue'yo. Jamajjeya ecuaanajaya eba Eyacuíñajija ejjashahuabaquí'yoyji. Jamajjeya ecuaana ba'yani quea pame nee, mimishi'ama —miqúanaya poani.

¹⁹ Jamajjeya miqúanaya jama poani pea'ai ba'a: —Jodio pojjeama cuana, Eyacuíñajija esohui ecuaanajaya eba nei nei Jodioja jjejojo. ¡Ecuana jayojjaya oe pocue! —miqúanaya aña—. Ecuaaya Eyacuíñajija esohui baña Jodiohua jjejojo. Jamajjeya ecuaanaya cuaquíjiji jayojja jama poani. Jiquio ecua mecajje quea misijo cuaquíjijiya ejiojji ba mee cani jayojja jama ecuaaya joya Eyacuíñajiji ba pojji'ama cuana quea ja'a nee ba'e meesahuaña. ²⁰ E'e, joya Eyacuíñajiji ba pojji'ama cuana, Eyacuíñajiji oe pojji ba epo pea'ai ecuaaya esohui ba meesahuaña. Eyacuíñajijiya ecuaana ojaya esohui etehue'yo ba mee ca poa. Ma esohui e'e jojo nei —jamaya miqúanaya aña.

²¹ Miqúanaya pea cuana esohui huohui huicha'a huicha'aña. Jamatii miquea ehuohui jayojja jama ba'e ajja miqúanaya. E'e, jama huohuime aña ba'a: —¡A'a jja oe sii pojji!

Jamajjeya ¿apiojji acuae jja oe miya sii poani?

²² —¡A'a pea cojjojji! —huohui aña miyaya.

Jamajjeya ¿apiojji acuae jja oe miya pea cojjojji poani so'o?

—¡A'a eyacuíñajiji nisho bihuajji oe! —huohuime aña.

¿Apiojji acuae jja nequíaa oe Eyacuíñajiji bihuia nishoña quea aquiana jeaa jjejojo?

²³ Miqúanaya mimi huicha'a huicha'ani Moisesija etehue'yojo: —Ecuana ca jja ca oe Eyacuíñajijiya ojaya esohui etehue'yo ba mee ca poa —ca jja nequiana ca oe poani.

Jamajjeya apiojji shai miqúanaya onijje jjapee nishoquiani, ojaya esohui jayojja jama ba'e títii ajja. ²⁴ E'e, yahuajo nei Eyacuíñajija etehue'yo jama poa ba'a:

“Jodio cuana, miqúanaya ca jja ca oe shajjama' ba'yani. Mi ba majje Jodio pojjeama cuana Eyacuíñajiji cajaa acani”.

Jamaya Eyacuíñajija esohui yahuajo nei etehue'yo poa.

Cuiishasha biso nei jehuissejjajea majje pojjeama eseya Eyacuíñajija epeejji nei poani

²⁵ Jodio cuana, yahuajo nei esejaya etiíquiana Moisesiya Eyacuíñajija esohui tehue ca poa jama ba'a: —Mique bacuaja cuiishasha biso nei jehuissejjajaeue!

Jamaya eseyaya aña, Eyacuíñajija esohui yahuajo nei jayojjaya aña. Jamajjeya Eyacuíñajija etehue'yo jayojja jama quea pame nee ba'yanijo cuiishasha ejehuissejjajea'yo quea pame. Jamaya ojjaña ba meeña eseya, Jodio cuana Eyacuíñajija babaca'yo o peejji epojji. Jamatii Eyacuíñajija esohui etehue'yo jayojja jama ba'e ajja ca ca ¿apiojji acuae cuiishasha biso nei jehuissejjajeaña so'o? Jamatii Eyacuíñajijiya miqúanaya ba cani Jodio pojjeama jayojjaya quea mimishi'ama. ²⁶ Jodio pojjeamaa ca ca cuiishasha jehuissejjajea ajja. Jamaya po ajja oya cuana. Jamatii beca cuana Eyacuíñajija esohui etehue'yo quea ja'a nee jayojja jama ba'yani. Jamajjeya Eyacuíñajijiya oya cuana ba cani Jodio jayojjaya, ojaya ehabaca'yo, jamatii cuiishasha jehuissejjajea jjima. ²⁷ Jodio cuana, miqúanajaya eba Eyacuíñajija esohui. Cuiishasha jehuissejjajeaña pea'ai. Jamatii aje oe Eyacuíñajija esohui etehue'yo jayojja jama ba'e ajja. Jamajjeya Eyacuíñajijiya miqúanaya ba cani shajjama'. Jodio pojjeamaa ca ca cuiishasha jehuissejjajea ajja. Jamatii Eyacuíñajija esohui jayojja jama ba'yanijo, ohuaya oya cuana ba cani mimishi'ama, quea pame. ²⁸ E'e, eseya Eyacuíñajija esohui jayojja jama ba'yanijo ojaya epeejji nei poani, cuiishasha jehuissejjajea majje pojjeama. ¿A'a miqúanaya cuiishasha jehuissejjajeaña? ¿A'a mimishi'ama pajea'yonaje pea'ai? ²⁹ Eyacuíñajija esohui jayojja jama aña jojo ca ca miqúanaya ojaya epeejji nei poani. Beca cuanaja cuiishasha jehuissejjajea jjima; jamatii Edojjashahua Pameya pea jjashahuabaquime po mee ca'yani Jesosaja epeejji nei epojji. Jamajjeya miqúanaya Jesosaja epeejji e'e jojo nei poani. Pea cuaja pojjaj'a miqúanaya Jesosaja epeejji pojjeama poso acani, miquea cuiishasha jehuissejjajea jjimajojo. Jamatii Eyacuíñajija eba miqúanaya ojaya epeejji nei poani.

Jamajjeya ojjaña joya Eyacuíñajija esohui jayojja jama ba'yani ojaya epeejji nei poani, Jodio cuana, Jodio pojjeama cuana pea'ai, cuiishasha jehuissejjajea'yo cuana, cuiishasha jehuissejjajea'yo pojjeama cuana pea'ai.

3

Eyacuíñajiji e'e jojo nei, quea ja'a nee nei poani

¹ Jodio cuana, ¿a'a miquianaya jshahuabaquiani? Jama ba'a: —Eyacuiñajjiya Jodio pojjeama cuana ojaya epejji nei po mee cani ecuana jayojjaya. Jamajjeya ¿apiojji acuae etiiquianaja ehuhui'yo jayojja jama cuiishasha jehuissejajeaña? ¿A'a Jodio pojjeama epojji quea pame nee nee, Jodio epojji quea pame pishana? —miquianaya pojja'a jamaya poani.

² Quea pame nee Jodio epojji. ¡Bacue! Eyacuiñajjiya eseya Jodio cuana yahuajo nei nei ojaya esohui etehue'yo ba mee ca poa, ba majje pea cuana huasijje ehuhui'yojji pea'ai. ³ E'e, Eyacuiñajjiya esejaya etiiquiana Amajama bajjani huohui ca poa jama ba'a: —Eyaya mique osecua cuana quijje nei nei ba'eje quea pame nee nee aje'yo; ecuea esohui quea pame jayojja jama aje'yo —Eyacuiñajji poa.

—Esejaya etiiquiana Eyacuiñajjiya esohuio shajjama' poajo, ¿a'a Eyacuiñajjiya ojaya esohui pajea caje'yo pojja'a? ¿A'a jamaya yajji pojjeama pojja'a? —miquianaya poani pojja'a.

⁴ ¡Chojja de! Deja cuana sijje poani, ojjaña. Eyacuiñajji ca ca sijje po ajja nei nei. Ma ecua ohua huohui canaje jayojjaya ohuaya acaje'yo. Ojaya esohui yahuajo nei etehue'yo jama poa ba'a:

“Eyacuiñajji, miyaya ca ca oe esohui e'e nei huohuaña tii tii. Miquea ejshahuabaqui'yojji ba majje ojjaña ba caje miya e'e jojo nei poani, sijje po ajja nei nei”.
Jamaya Eyacuiñajjiya esohui yahuajo nei tehue ca poa.

⁵ Jodio cuana, miquianaya jshahuabaquiani quea quehua, de; jamaya poso nequiana jjabaquiani ba'a: —Ecuana quea mimishi poanijo, ojjaña Eyacuiñajji bihuia caje jama ba'a: “Eyacuiñajji oe nei quea ja'a nee poani, oe nei quea pame”. Jamajjeya ¿apiojji shai Eyacuiñajjiya ecuana quea nee nee po mee caje'yo quea mimishi poanijo? —jamaya miquianaya Eyacuiñajji ba po jjima jayojja jama jshahuabaquiani, quea quehua.

⁶ Chojja Jodio cuana, jamaya pojjeama. Jamaya e'e nei poa jojjemo Eyacuiñajjiya mimishi cuana tecuea jjima aca'yome. Eyacuiñajjiya e'e nei nei acani tii tii. E'e jojo nei ojjaña shajjama' cuana ohuaya quea nee nee po mee caje'yo mimishi poani sosejje. ⁷ Jamatii miquianaya quea quehua jshahuabaquiani jama pea'ai ba'a: —E sijje poanijo pea cuaa Eyacuiñajji bihuia cani jama ba'a: “Eyacuiñajji oe nei sijje po ajja nei nei” acaje cuaa. Jamajjeya ¿apiojji shai Eyacuiñajjiya eya quea nee nee po mee caje'yo sijje poanijo? —miquianaya aje jja oe jamaya poani.

⁸ Cho, jamaya pojjeama. Jamaya e'e nei poa jojjemo, ca ca e sijje poanijo pea cuaa Eyacuiñajji bihuia cani ecuana sijjepojji pome. E'e, beca cuaa aje oe eya niñeba cani jama ba'a: —Pabohua aje jja oe jamaya huohui cani ba'a: “¡Quea mimishi oe pocue pea cuana quea pame nee eba'e meesahuajji!” —onaaya jama eya niñebameya acani. Cho, eya jamaya po ajja. ¡Jamaya niñeba canijo, Eyacuiñajjiya oya cuana quea nee nee capo mee cahua, de!

Eyacuiñajjiya ojjaña cuana ba cani shajjama' jayojja

⁹ Jodio pojjeama cuana shajjama' nei nei poani. ¿A'a Jodio cuana shajjama' pishana? Chojja, Jodio cuana Jodio pojjeama cuana jayojjaya jama poani. Ojjaña shajjama' nei nei pea'ai poani. ¹⁰ Eyacuiñajjiya esohui yahuajo nei nei Dabiya tehue ca poa jama ba'a:

“Ecuea esohui jayojja jama a'ajja ojjaña cuaa. Chama' joya quea pame poani. ¹¹ Ecuea esohui e'e nei ba sa po ajjajo ojaya ba jjima ecuea ejshahuabaqui'yojji. Oya cuana e ba sa po'yo ajja pea'ai. ¹² Chojja, oya cuana eshahua nijje poani, enijje jjapeequi ajja quea mimishi jjejojo. Shajjama' jjejojo quea pame po ajja ojjaña cuana. ¹³ Ojjaña esohui quea tai nee nee acani. Quea tai nee nee ojjañaja esohui, aquiana quea ihui jayojja. Ojjaña sijjepojji pea'ai, sijje popaje'yo ajja pea'ai. Ojjaña mimijajjiji poani pea'ai. Quea tai nee nee ojjaña poani. Jiquio ecua peyo se naa quea nee nee po mee cani jayojja jama ojjaña cuaa onaya quea yeno po mee cani. ¹⁴ Ojjaña quea tecue nee nee poani, panajajiani pea'ai. ¹⁵ Oya cuana quenequene cuaji majje jjaquecuauiani. ¹⁶ Oya cuana aje oe ona quea mimishi pomeejji poani; ojjaña quea yeno nee nee po mee cani. ¹⁷ Ojjaña quea bei ba'e ajja tii tii. ¹⁸ Ejo jshahuabaqui ajja tii tii, jshajja'ajjaqui ajja pea'ai”.

Jamaya Eyacuiñajjiya yahuajo nei tehue mee ca poa.

¹⁹ Jamatii esejaya eba Jodio cuana jama sijje poani ba'a: —Eyacuiñajjiya esohui Moisesija etehue'yo jayojja jama ecuaaaya aña.

Jamatii Eyacuiñajjiya Jodio cuana jama acani ba'a: —Miquianaya aje oe ecuea esohui ba majje jama a'ajja. Shajja huejjama' jayojja miquianaya poani.

Jamajjeya Eyacuiñajjiya ojjaña cuana quea nee nee po mee caje'yo; Jodio cuana, Jodio pojjeama cuana pea'ai quea jeca poaje'yo, quea mete poaje'yo shajjama' poani jjejojo.

²⁰ E'e, Eyacuiñajjiya esohui Moisesija etehue'yo ba majje ojjaña cuana jama poaje ba'a: —E'e, eya shajjama' jayojja jama poani —ojjaña poaje.

Jamajjeya Eyacuiñajji ojjaña nijje mimi ajja jama ba'a: —Miquianaaya ecuea esohui etehue'yo jayojja jama e'e jojo nei aña. Jamajjeya miya quea pame nee nee —jamaya mimi ajja Eyacuiñajji. Chojja, ojjaña shajjama' poani, ojjaña tii.

Jesosa nijje e'e jojo nei jjapeequianijo Eyacuiñajjiya esejaya mimishi cuijea caje'yo

²¹ Yahuajo nei nei Eyacuiñajjiya esohui huohuijjiya, Moisesiya pea'ai jama sohuihuo-huime aca poa ba'a: "Ojjaña joya e'e jojo nei onijje jjapeequiani Eyacuiñajjiya quea boejea po mee caje'yo" yahuajo jama huohuimeya aca poa. Jamatii ojjaña jashahuabaquinaje Eyacuiñajjiya ojjaña mimishi cuijea caje'yo Moisesiya esohui etehue'yo jayojja jama añaño poso. ²² E'e, Eyacuiñajjiya esejaya mimishi cuana cuijea cani jama huohuime amajje ba'a: —Ecuea eba Jesosa Quitohua ecuea mimishi cuijea caje'yo. Eya onijje jjapeequije'yo.

E'e, Jodio cuana Jodio pojjeama jayojjaya jama acaje'yo Eyacuiñajjiya. ²³ Ojjaña cuana ojjaña meshijo ba'e quea mimishi nee poani. Jamajjeya Eyacuiñajji ojjaña cuana nijje quea bihui pojjeama, o jayojja jama po ajjajojo. ²⁴ Jamatii Eyacuiñajji quea pame nee nee. Ojjaña quea jea nee acanijo ojjaña shajjama' cuanaja mimishi cuijea'yo majje ojjaña ba cani mimishi'ama. Jamaya Eyacuiñajjiya acani Jesosa Quito ojjaña cuanaja mimishi cuijea'yoiji soseje mano'yonajejo. ²⁵ E'e, Jesosa Quito esejaya mimishijo mano'yonaje; ojaya ena' cuayaquinaje. Jamajjeya ojjaña eseya jama mimianijo ba'a: —Jesosa Quito mano'yonaje ecuea mimishijo —jamaya poanijo, Eyacuiñajjiya esejaya mimishi cuijea'yo majje eseya ba cani mimishi'ama.

E'e, Eyacuiñajjiya Jesosa ba ca poa ñajajja equecua'yo jayojja, ma ona mimishi cuana nijje quea bei nee epojji. Eyacuiñajjiya oya Jesosa Quito mano mee ca'ya poajo, ojjaña ba mee cani oya e'e jojo nei quea pame poani. Eyacuiñajji jama poani ba'a: —Mimishi cuana sosequia'yoiji oe dejjja camanoqui'yahua.

Yahuajo nei nei Jesosa mano'yo jjimahuajo ojjaña cuana shajjama' poa. Jamatii Eyacuiñajjiya ishoo canaje; mimishi cuijea'yo jima acanaje Jesosa mano'yo jjimahuajo. Jamajjeya Jesosa mano'yo jjimahuajo, dejjja mimishi cuana jashahuaba quehuaqui canaje jama ba'a: —Eyacuiñajjiya pajea ca'yonaje ecuanajaya mimishi cuana jamatii pojja'a —poanaje.

Jjeya ca ca Jesosa Quito mano'yonaje mimishi cuijea'yoiji soseje. Jamajjeya Jesosa mano'yajo, Eyacuiñajjiya ojjaña ba mee cani ohuaya jamatii pojjeama etiiquianaja mimishi pajea ca'yonaje. ²⁶ Jjeya pea'ai Eyacuiñajjiya esejaya mimishi cuana cuijea ca'yani Jesosa nijje jjapeequianijo. Jamajjeya ohuaya ojjaña ba mee cani oya quea pame nee nee poanijo Jesosaja epeejji cuanaja mimishi cuana cuijea ca'yani. Eyacuiñajji jama poani ba'a: —Jesosaja miquianaaya mimishijo mano'yonajejo, eyaya miquianaya baña mimishi'ama —Eyacuiñajji poani.

Jesosa nijje jjapeequianijo ca ca oe Eyacuiñajjiya eseya ba cani emimishi cuijea'yo

²⁷ Esey jama po ajja ba'a: —Eyaya ca eya Moisesiya etehueya jayojja jama añajo, Eyacuiñajjiya eya mimishi cuijea ca'yonaje —eseya jamaya po ca ajja nei nei. ²⁸ Jamajjeya esejaya eba jama ba'a: Jesosaja epeejji nei poanijo ca ca oe Eyacuiñajjiya eseya ba cani emimishi cuijea'yo, quea pame. Jamajjeya Moisesiya etehue'yo jayojja jama ba'yanijo pojjeama mimishi cuijea ca'yani Eyacuiñajjiya. Chojja, shajjama' ojjaña poani; chama' joya Moisesiya etehue'yo jayojja jama ba'yani tii.

²⁹ Jodio cuana, eyaya miquianaya huohui'ajjaña jama ba'a: —¿A'a Eyacuiñajjiya Jodio cuanaja mimishi cuijea cani, Jodio pojjeama cuanaja mimishi cuijea sa po ajja pojja'a?

Chojja. Jamaya pojjeama. Eyacuiñajjiya ojjaña mimishi cuijea cani Jesosa nijje jjapeequianijo. ³⁰ Ohuaya ojjaña acani oya jayojjaya Jodio cuana, Jodio pojjeama cuana pea'ai. Jamajjeya Jesosa nijje jjapeequianijo, Eyacuiñajjiya eseya ba cani emimishi cuijea'yo, Jodio pojjeama cuana pea'ai, de. ³¹ Jamajjeya eseya, Jodio cuana Jesosa nijje jjapeequianijo, ¿a'a Eyacuiñajjiya esohui etehue'yo jayojja jama ca'apajja'yahua? Chojja de. Jesosaja epeejji poanijo ca ca eseyaya ojaya esohui jayojja jama eja'aqui o quea bihui nee epo meejji.

4

Onijje jjapeequianijojo Eyacuiñajjiya Amajamaja mimishi cuijea ca'yonaje

¹ jashahuabaquicue Amajamajo, esejaya etiiquianajo, ma ojjaña Jodio cuanaja eti-iquianajo! ¿Yajjajo shai Eyacuiñajjiya oya huohui ca poa so'o? Jama ba'a: —Amajama, eyaya miya baña emimishi cuijea'yo, ecuea epeejji nei.

¿A'a Eyacuiñajjiya jamaya aca poa Amajama ojaya esohui etehue'yo jayojja jama ba'ya poajo? ² Chojja. Eyacuiñajjiya Amajamaja mimishi cuijea ca'ya poa ojaya esohui etehue'yo jayojja jama ba'ya poajo poso miquianaaya aña. Chojja. Eyacuiñajjiya Amajama jama aca poa ojaya esohui etehue'yo jayojja jama ba'ya poa jojjemo Amajama jama mimime poquiyae

ba'a: —Eya ca ca iña quea pame nee, de. Ojjaña Eyacuiñajjiya esohui etehue'yo jayojja añajo, ohuaya ecue mimishi cuijea ca'yonaje —Amajama jama mimimeya poquiaye.

¡Dee! Beca cuana jamaya jshahuaba quehuaquiani. Eyacuiñajji ca ca jamaya jshahuabaqui ajja. ³ Ojaya esohui yahuajo etehue'yo jama poa ba'a: —Amajama Eyacuiñajji nije japeequia poa. Jamajjeya Eyacuiñajjiya oya jama aca poa ba'a: “Amajama, eyaya miya baña emimishi cuijea'yo” aca poa —jamaya esohui yahuajo nei etehue'yo poa, Eyacuiñajjiya.

⁴ ¡Bacue! Dejjá chachacoajo, casosequia cahua echacomeejjiya. Echacomeejjiya sosequia cani jamatii pojjeama, chaco sosejje, de. ⁵ Eyacuiñajjiya ca ca esejaya mimishi cuana cuijea cani etehue'yo jayojja jama ba'yanijo sosejje pojjeama. Chojja. Jesosa nije japeequianijo, ohuaya eseya ba cani emimishi cuijea'yo jamatii. E'e, oya shajjama' nei nei cuana ba cani mimishi'ama pea'ai Jesosa nije mimi jeahuajo, onijje japeequi jeahuajo pea'ai. ⁶ Maya esejaya etiiquiana Dabi bajjanija eba poa. Jamajjeya jama jshahuabaquimeya poa ba'a: “Eyacuiñajjiya eseya ba cani emimishi cuijea'yo. Ojaya esohui etehue'yo jayojja jama ba'yani sosejje pojjeama Eyacuiñajjiya eseya ba cani emimishi cuijea'yo. Quea bihui nee capoahua mimishi cuijea ca'yajje”. ⁷ Jamaya Dabiya yahuajo nei tehue ca poa ba'a:

“Eyacuiñajjiya oja mimishi cuijea cajo, quea bihui nee capoahua ojjaña shajjama' cuana.

Quea boejea'yo po mee canijo, quea bihui nee nee capoahua. ⁸ Shajjama' cuana quea bihui nee capo'yahua Eyacuiñajjiya oya shajjama' pojjeama ba canijo, de”.

Jamaya esejaya etiiquiana Dabiya tehue ca poa yahuajo nei.

⁹ ¿A'a ohuaya maya tehue ca poa Jodio ca ca oe mimishi jamatii cuijea cajo quea bihui poaje? Chojja. Jodio pojjeama pea'ai quea bihui poaje mimishi jamatii cuijea ca'yajje. E'e, Eyacuiñajjiya esohui etehue'yo jama poa pea'ai ba'a: “Onijje japeequianijo, Eyacuiñajjiya Amajama ba ca poa emimishi cuijea'yo” anaje. (Amajama ba'eya poa Moisesi cuaya jjimahuajo.) ¹⁰ ¿Ache shono acuae Eyacuiñajjiya Amajama ba ca poa emimishi cuijea'yo? ¿A'a cuiishasha biso nei jehusejjajea cajo pojja'a? ¿A'a jehusejjajea jjimahuajo pojja'a oya emimishi cuijea'yo ba ca poa, Eyacuiñajjiya? ¹¹ Cuiishasha jehusejjajea jjimahuajo ca jja ca oe Eyacuiñajjiya Amajama ba ca poa emimishi cuijea'yo. Jamajjeya ¿yajjajo shai jehusejjajea mee ca poa? Jama ba'a: Quijje Amajamaa jamaya aca poa onajaya ebajji oya Eyacuiñajji nije japeequianijo ca ca oe ohuaya oya emimishi cuijea'yo ba ca'ya poa, cuiishasha jehusejjajea jjimahuajo. Jamajjeya oya jayojjaya Jodio cuana, Jodio pojjeama cuana pea'ai Jesosa nije japeequianijo Eyacuiñajjiya eseya ba cani quea boejea'yo, cuiishasha ejehusejjajea'yo pojjeamajo, de. Jamajjeya Amajama Jodio pojjeama cuanaja etiiquiana jayojja jama esejaya pea'ai, ca Jesosaja epeejji poanija. ¹² Oya Amajama esejaya, Jodio cuanaja etiiquiana poa. Jamajjeya Amajamaa jayojja jama cuiishasha jehusejjajea'eseyaya, Jodio cuaya. Amajama Eyacuiñajji nije japeequia poa cuiishasha jehusejjajea jjimahuajo. Jamajjeya Jodio cuana jjeya Amajamaja osecua nei poani Jesosa nije japeequiani jojoya, cuiishasha jehusejjajea majje pojjeama.

Eyacuiñajjiya ojaya esohui jayojja jama acaje'yo esejje, onijje japeequiajo

¹³ E'e, yahuajo nei onijje japeequianijo Eyacuiñajjiya Amajama ba ca poa mimishi'ama. Ojaya ehuohui'yo jayojja jama po jjimahuajo ca ca Eyacuiñajjiya Amajamaja mimishi cuijea ca'ya poa. Jamajjeya Eyacuiñajjiya Amajama huohui ca poa jama ba'a: “Amajama, eyaya miya, mique osecua cuana pea'ai emeshi mese po meeaña ojjaña meshi yasijje” Eyacuiñajjiya jamaya aca poa Amajama onijje japeequianijo. ¹⁴ Jamajjeya ojjaña Moisesija etehue'yo ajji poani oe nei eyajo eba'e tiitii mee'yojji jojjemo eseya Jesosaja epeejji cuana eyajo ba'e tiitii'yo jima pome, Eyacuiñajjiya ma Amajama nije ohua huohui ca poa jama e'ajji pojjeama pome pea'ai. ¹⁵ E'e, Moisesija etehue'yo jama a'ajjajo, Eyacuiñajjiya quea nee nee po mee caje'yo shajjama' cuana. Jamatii Eyacuiñajjiya esohui ba mee jima jojjemo shajjama' cuana chama' pome. Chama' joya esohui etehue'yo jayojja jama ba'yaní.

¹⁶ Jamajjeya Eyacuiñajjiya quea pame huohui ca poa ojjaña onijje japeequianijo. Eseyá ojaya quea jea nee nee. Oya siajje po ajja nei nei pea'ai. Jamajjeya ma ohua Amajama nije huohui ca poa jayojja jama ohuaya acaje'yo e'e jojo nei Amajamaja osecua cuana nije. E'e, ohuaya jamaya acaje ojjaña ese nije, Jesosa nije japeequianijo; Jodio cuana nije, Jodio pojjeama cuana nije pea'ai. E'e, Jesosa nije japeequianijo eseya Amajama jayojja, Eyacuiñajjiya epeejji nei nei ma ecua Amajama poa jamaya eseya. Jamaya Eyacuiñajjiya ojjaña eseya ba cani Amajamaja osecua cuana. ¹⁷ Eyacuiñajjiya esohui ma ohua Amajama huohui ca poa ohuaya yahuajo nei tehue mee ca poa jama ba'a: “Amajama, eyaya miya ojjaña dejjá cuanaja, pea jaajjiya esohui mimianija etiiquiana po meeje'yo, ojjañaja etiiquiana”. Jamaya Eyacuiñajjiya yahuajo nei tehue mee ca poa ojjaña ojaya epeejji cuanaja. Jamajjeya onijje japeequianijo, Eyacuiñajjiya eseya Amajamaja osecua cuana po

mee cani. E'e, ohuaya quea ca'a nee nee, ojjaña acani. Emano'yo cuana shequi mee ca'yani; ojjaña aquiana ma yahuajo chama' poa ohuaya pana cani. Eyacuiñajjiya.

¹⁸ Jamajjeya Amajama tii nojinoji'ya poa bacuama' tii. Jamatii Eyacuiñajjiya oya huohui ca poa jama ba'a: "Amajama, miqnea osecua cuana quea huiso nee nee poaje. Emeshi mese cuana poaje'yo ojjaña meshi cuana huasijje" jamaya Eyacuiñajji poa. Jamajjeya Amajama jshahuabaquinaje jama ba'a: —E'e de, eya etii nei nei. Jamatii Eyacuiñajjiya eya e'e nei huohui cani. Jamaya ca'a cahua ohuaya. Eya quea osecua huiso nee nee poaje.

E'e jojo nei jamaya acanaje Eyacuiñajjiya, ma ecua ohuaya huohui canaje jamaya acanaje. Amajama quea osecua huiso nee nee po mee canaje, majameta huisoajja sico meemee ajja, quea huiso nee nee. ¹⁹ Eyacuiñajjiya esohui shajja'ajja majje Amajama jshahuabaquia poa jama ba'a: —Eya etii nei nei, 100 shequiajame etii. Ecuea ehuanase pea'ai etii nei, bacuama' pea'ai. Jamatii esho'yahua jjamejoqui jjima poanaje. Jamatii Eyacuiñajjiya ma ecua eya huohui canaje jamaya ohuaya ca'a cahua. Ecuea ebacua e'e jojo nei cuayaje, dejja —Amajama poanaje. ²⁰ Jama po majamanequinaje tii tii ba'a: —Eyacuiñajjiya eya e'e nei huohui canaje. Ohuaya eya jamaya amee caje. Oya ca ca oe sijaje po ajja nei nei —jamaya mimi majamanequinaje Amajama Eyacuiñajjiya epeeji quea ca'a nee nee poanaje. Bihua ca poa jama ba'a: —E'e Eyacuiñajji, jamaya. Miyaya eya quea pame nee añña tii. ²¹ E'e, miyaya quea ca'a nee nee poanijo, miqnea ehuhui'yo jayojja jama aje'yo e'e jojo nei.

²² Amajama jamaya jshahuabaquianijo, Eyacuiñajjiya oya huohui ca'ya poa: "Amajama, miya enije jjapeequianijo, eyaya miya baña mimishi'ama. Miqnea mimishi ecuijea'yo" Eyacuiñajjiya oya aca poa.

²³ E'e, Eyacuiñajjiya huohui ca poa Amajamaja ebajji jama ba'a: "Enije jjapeequianijo eyaya miya baña mimishi'ama" Eyacuiñajji poanaje. ²⁴ Eyacuiñajjiya jama tehueme aca poa esejaya ebajji ohuaya Amajama mimishi cuijea ca'ya poa onijje jjapeequianijo. Jamajjeya esejaya eba Amajama jayojjaya onijje jjapeequiajo, Eyacuiñajjiya eseya jama acaje pea'ai ba'a: "Eyaya miya baña mimishi'ama pea'ai" Eyacuiñajjiya eseya acaje, de. Oya ca ca oe quea ca'a nee nee, ojjaña ohuaya acani; Jesosa esejaya Emeshi Mese nei emano'yojaa shequi mee ca o'oyanaje. ²⁵ E'e, ojjaña quea mimishi poanijo, Eyacuiñajjiya Jesosa huoojea canaje emano'yojji esejaya mimishi sosequia'yojji. Majoya Eyacuiñajjiya oya shequi mee ca o'oyanaje. Shequi o'oya majje Jesosa jama poanaje ba'a: —Ecue Chii, ¡bacue! Ecuea epeeji cuanaja mimishi cuijea'yojji soseje eya mano'yonaje. Oya cuana jjea mimishi'ama enijje jjapeequianijo —oya Jesosaa acanaje.

5

Eyacuiñajjiya eseya mimishi'ama ba cani

¹ E'e, Jesosa nijje jjapeequianijo, Eyacuiñajjiya eseya ba cani emimishi cuijea'yo. Jamajjeya Jesosa nijje, Emeshi Mese nei nijje jjapeequianijo, ohuaya Eyacuiñajji quea bei po mee cani ese nijje. Yahuajo ca ca quea mimishi poanijo, ese nijje quea quene nee poanaje.

² Jesosa nijje jjapeequi majje eseya Eyacuiñajji nijje mete'ama mimiani. Eseya jama poani ba'a: —Jesosa ecuanajo mano'yonajejo, ecua Eyacuiñajjijo mete'ama; oya ecuaa nijje quea bei nee po mee canaje Jesosaa. Cuanaya ecuaa quea bihui nee jshahuabaquiani quea ja'a nee jama ba'a: "Eyacuiñajjiya e'e jojo nei ecuaa ba'e tiitii mee caje'yo onijje eyajo" —jamaya eseya poani.

³ Jesosa nijje jjapeequianijo, pea cuaa eseya napa cani. Quea camaja poani. Jamatii eseya quea bihui nee poani, yeno'ama. Dejja mimishiya napa cajje eseya Jesosaja epeeji quea ca'a nee poaje'yo. ⁴ Eseya quea bihui nee Jesosa nijje jjapeequi pajea'yo ajja jamatii onaa napa cajo, Eyacuiñajjiya eseya huohui cani jama ba'a: —E'e, jamaya miya quea pame nee poani.

Eyacuiñajjiya eseya quea pame ba canijo, eseya jama poani pea'ai ba'a: —E'e jojo nei Eyacuiñajjiya eseya onijje ba'e tiitii mee caje'yo eyajo.

⁵ E'e, esejaya eba Eyacuiñajjiya ojaya ehuhui jayojjaya acaje'yo. Ohuaya Edojjoshahua Pame huoojea canaje ese ba meejji jama ba'a: —E'e jojo nei Eyacuiñajjiya oja sohui jayojjaya acaje'yo; miquanaya onijje ba'e tiitii mee caje'yo. Miquanaya ojaya quea jea nee —jamaya eseya Edojjoshahua Pameya jshahuabaqui mee cani.

⁶ E'e, Jesosa mano'yo jjimahuajo eseyaya Eyacuiñajji quene'ama epo meejji pojjeama ese nijje, ¿achajja shai quene'ama epo mee'yojji? Yahuajo Eyacuiñajji jshahuabaquianaje jama ba'a: —Eyaya ma eshequiajajo, ma pojajo Jesosa huoojea'yo shajjama' cuanajo mano'yohua. Ecuea eba epojja Jesosa manoj'e'yo —jamaya Eyacuiñajji poanaje.

Jamajjeya ma pojajo tii Jesosa mano'yonaje esejja mimishi cuijea'yojji soseje. ⁷ ¡Bacue! Beshahua nei eseya mano'yo sa po ajja pea mano'yo jjima epojji. E'e pojja'a oya quea pame nee nee ba'yanijo, ojo beca cuana mano'yome. ⁸ Jamatii eseya Eyacuiñajjiya quea jea

nee nee poanijo ohuaya jama acanaje ba'a: Ecuana quea mimishi poanijo tii oya, Jesosa mano'yonaje eseja mimishi cuijea'yojji sosejje. ⁹ E'e, Jesosa esejo mano'yonaje eseja quea mimishi poanijo tii. Ojaya ena' cuayaquinaje eseja mimishi cuijea'yojji. Jamajjeya eseja mimishi cuijea'yo majje Eyacuiñajjiya eseja ba cani mimishi'ama. E'e jojo nei. Jjeya ca ca oya ese nije quene'ama; cuaqui yasijje ehoojeajji pojjeama, de. ¹⁰ E'e, yahuajo ese nije Eyacuiñajji quea quea nee poa. Ese shajjama' poanijo tii Jesosa eseja mimishi cuijea'yojji sosejje mano'yajo, Eyacuiñajji ese nije quea quene popajeana. Jamajjeya Eyacuiñajji ese nije quea bei poanijo, eseyaya baña jama ba'a: Jesosa shequi mee ca o'oyanajejo, e'e jojo nei Eyacuiñajjiya eseja ba'e tiitii mee caje'yo onijje pea'ai. ¹¹ E'e, Jesosaa, Emeshi Mese neiya eseja mimishi cuijea ca'yonajejo, Eyacuiñajji quea bei nee ese nije, epeeji nei po mee cani. Jamajjeya eseja quea bihui nee jama poani ba'a: —Eyacuiñajji, miya quea pame nee; ecuana quea jea nee nee poani.

Yahuajo eseja Adana jayojja ba'ya poa; jjeya ca ca eseja Jesosa jayojja ba'yani

¹² ¡Bacue! Yahuajo nei nei Adana ba'ya poa. Oya ojjañaja ejeajji poa. Oya Adana ebionei shajjama' poa. Jamajjeya eseja ejeajji Adana shajjama' poajo, Eyacuiñajjiya ojjaña ba cani shajjama' nei nei, Adana jayojjaya: “Miya shajjama' poanijo, manojje'yo ojjaña” Eyacuiñajjiya Adana huohui ca poa. Jamajjeya Adana mano'yonaje. O jayojjaya ojjaña mano'yani. Ojjaña shajjama' poani cuana, de. ¹³ E'e, Adana ebionei shajjama' poa. Moisesiya Eyacuiñajjiya esohui tehue jjimahuajo, jamaya ojjaña po poquia poa, quea mimishi. Yahuajo Moisesiya esohui tehue jjimahuajo, Eyacuiñajji etiquiana nije jama mimi jjima ba'a: —Ecue sohui jama ba'e ajajo miqianaya shajjama' —jamaya Eyacuiñajji etiquiana nije mimi jjima yahuajo, maya tehue jjima poa Eyacuiñajjiya esohui.

¹⁴ E'e, Adana shajjama' po majje, Moisesiya esohui tehue jjimahuajo aje oe ojjaña mano poquipoqui'ya poa quea tai ba'yanijo. Onajaya Eyacuiñajjiya esohui shajja'ajja jjimajo Adana jayojja jama pojjeama. Adana ca ca Eyacuiñajjiya esohui shajja'ajja majje shajjamaa jjejojo acuijajja ijia ca poa, de. Eyacuiñajjiya Adana ebionei pana ca poa. Quijje ohuaya oja Bacua Jesosa huoojea canaje. ¹⁵ ¿Ae poanaje Adana? ¿A'a Adanaa jayojja jama acanaje Jesosaa? Chojja, quea pame nee nee eseja acanaje, Jesosaa. Shajjamaa jjejojo Adanaa ca pa jjaja ca oe ojjaña cuana shajjama' po mee ca poa. Jamajjeya ojjaña manojje'yo mee ca'ya poa. Manojje'yo majje cuaqui yasijje poqui ca'ya poa. Jjeya Jesosa Quitojo eseja ba'e tiitii mee caje'yo Eyacuiñajjiya. E'e, eseja Eyacuiñajjiya quea jea nee poanijo Jesosa Quito huoojea canaje ese que. Oya Jesosa ese jayojjaya yamijji poeyanaje eseja mimishijo manojje'yo hua mimishi cuijea'yojji.

¹⁶ E'e, Eyacuiñajjiya eseja quea jea acanajo Jesosa huoojea canaje manojje'yo hua eseja mimishi cuijea'yojji sosejje. Jamajjeya eseja quea mimishi po huicha'a huicha'a majje, jamatii Eyacuiñajjiya eseja huohui cani jama ba'a: —Eyaya miya baña emimishi cuijea'yo.

Adana ca ca shajjama' po cooa poajo, Eyacuiñajjiya oya huohui ca'ya poa jama ba'a: “Adana, miya ca mi ca oe shajjama'. Jamajjeya miya manojje'yo; quea nee nee poaje'yo. Mique osecua cuana pea'ai mi jayojjaya manojje'yo meya poaje; jama manojje'yo popoquije'yo mique osecua cuana” poanaje. ¹⁷ E'e, oe deja quea mimishi po cooa poajo, Eyacuiñajjiya ojjaña mano mee ca'yani; quea nee nee po mee ca poqui'yani. Jesosa Quitohua ca ca eseja quea pame nee acanaje. Eyacuiñajjiya ojjaña quea jea nee nee poanijo oja Bacua Jesosa huoojea canaje ese jayojjaya yamijji. Jesosa ojjaña cuana manojje'yo hua mimishi cuijea'yojji sosejje. Ohuaya eseja ba'e tiitii mee caje'yo onijje. Jesosa nije ona huoojea'yojji po mee caje'yo, Eyacuiñajjiya.

¹⁸ E'e, Adana shajjama' poa. Oya shajjama' poajo, Eyacuiñajjiya ojjaña ba cani shajjama'. Ojjaña quea nee nee po mee caje'yo. Jesosa Quitohua ca ca quea pame acanaje esejo; ese mimishi cuijea'yojji manojje'yo. Jamajjeya Jesosa nije japee neineiquianijo, Eyacuiñajjiya eseja mimishi cuijea majje mimishi'ama ba cani. Mimishi cuijea'yo majje eseja ba'e tiitii mee cani onijje eyajo. ¹⁹ Jama ba'a: Oe dejja, Adana shajjama' poa. Jamajjeya ojjaña o jayojja jama shajjama' poani. Pea dejjaa, Jesosaa ca ca oja Chiija, Eyacuiñajjiya esohui jayojja jama aca poa. Jamajjeya eseyaya, oja epeeji cuaa Jesosaa jayojjaya aña; Eyacuiñajjiya esohui shajja'ajjaña. Jamajjeya Eyacuiñajjiya eseja ba cani mimishi'ama.

²⁰ Adana shajjama' poajo quijje nei nei Eyacuiñajjiya Moisesi tehue mee ca poa oja esohui. Ojaya esohui tehue mee ca'ya poa ojjañaja ebajji oya cuana Eyacuiñajjiya esohui jayojja jama a'ajja tii. Jamatii esohui ba majje ojjaña quea mimishi tii tii poani. Eyacuiñajji ca ca quea pame po tiitiani ojjaña nije. Quea mimishi tii poanijo aje oe jamatii ohuaya eseja quea jea nee nee acani tii. ²¹ Yahuajo esohui etehue'yo ba majje jamatii etiquiana cuana mimishi paje sa po'yo ajja poa. Jamajjeya oya cuana manojje'yo majje cuaqui yasijje poqui'yonaje. Eyacuiñajjiya ca ca eseja shajjama' poani tii quea jea nee acanaje. Eseja

Emeshi Mese nei Jesosa Quito huoojea canaje ese mimishi cuijea'yohua ese ba'e tiitii mee'yojji.

6

¡Mimishi pajea'yocue; Jesosa nije jjapeequicue!

¹ Eyacuiñajjiya eseya quea jea nee acani; jamatii quea mimishi poanijo beca cuana jamaya poani pojja'a ba'a: —¡Dee! Jamajjeya eya quea mimishi capohua tii. Jamaya Eyacuiñajjiya eseya caba mee cahua eseya ohua quea jea nee acani jamatii —jamaya pojja'a beca cuana poani.

² ¡Chojja! ¡A'a oe jamaya pojji! Jiquio ecua ese ejja mano'yo majje shajoshajo'yo ajja jama jayojjaya eseya Jesosa nije jjapeequi majje mimishi sa po maja'yo ajja. Cajaa seya aña. ³ E'e, eseya Jesosajo besa majje, ohuaya eseya ba cani ojaya epeeji mimishi po maja sa po'yo ajja. ¿A'a miquea maya ba jjima?

—E'e, eya Jesosa nije jjapeequiani —eseyaya jamaya huohui majje, onaaya eseya Eyacuiñajjiyo besa mee cani. Jamajjeya jiquio ecua emano'yo cuana shajoshajo'yo ajja jayojja jama eseya mimishi po maja sa po'yo ajja Jesosa nije jjapeequianijo. ¿A'a miquea maya ba jjima? ⁴ Jesosa mano'yonaje. Mano'yo majje mei jjani ai yasijje huananobia ca'yonaje. Eyacuiñajji quea ca'a nee nee. Jesosa shequi mee ca'yonaje jama jayojjaya ohuaya eseya pea jashahuabaquime po mee ca'yani Jesosa nije jjapeequianijo. Jesosa nije jjapeequiajo pea'ai onaaya eseya enajo besa mee cani Eyacuiñajjiyo. Jamajjeya Jesosaa eseya ba cani o jayojja e'e jojo nei, yahuajo jama pojjeama. Pea jashahuabaquime poani, de; mimishi po maja sa po'yo ajja.

⁵ Jamajjeya eseya jama poani ba'a: —Jesosa Quito acui ecueata'apeejo mano'yonaje eseya mimishi cuijea'yojji. Jamajjeya eseya onijje jjapeequi majje mimishi pajea neinei sa poani. Eyacuiñajjiya Jesosa shequi mee ca o'oyanaje; ba'e mee ca o'oyanaje. O jayojja jashahuabaqui meeme po mee ca'yani. ⁶ Jamaya esejaya eba ba'a: Jesosa Quito acui ecueata'apeejo mano'yonaje eseya ojaya epeeji quea ca'a nee epo meeji, mimishi pajea neinei meesahua'yojji. Eseyaya eba'e yahuajo, ejjashahuabaquiji yahuajo jayojja jama pajea mee ca'yonaje, eyacua po mee canaje. Yahuajo jama poanaje ba'a: Jiquio ecua sosema' chacochoacani echacomeejjija yajjiyo chacochocho pajea mee jjima acani jayojja jama yahuajo eseya mimishi pajea'yo jjima poanaje. ⁷ Jama ba'a: Ese ejjaa mano'yo majje mimishi amaja ajja. Oya jayojjaya eshahuaja epeeji emano'yo jayojja jama Jesosaa eseya po mee cani ojaya epeeji nei epojji.

⁸ Jamajjeya onijje jjapeequi majje Jesosa Quito mano'yonaje jayojja jama ecua eshahuaja epeeji poanijo emano'yo jayojja poanaje; Jesosa shequi'yonaje jayojjaya eseya o jayojja ba'yani, yahuajo jama pojjeama. E'e jojo nei eseya onijje ba'e tiitii'yo eyajo; o jayojjaya pea'ai poaje'yo. ⁹ E'e, Jesosa emano'yojaa Eyacuiñajjiya oya shequi mee ca o'oyanaje. Eshe nequi'yo, emano beca'yojji pojjeama. Pea cuaa oya mano mee'yo jjima acaje'yo. ¹⁰ Oya mano'yonaje; oe nei mano'yome poanaje esejaya mimishi cuijea'yojji. Oya Jesosa mano beca'yo ajja. Jjeya oya eshe'yo; Eyacuiñajjiya ejjashahuabaquiji jayojja jama atitii cani. ¹¹ Jamajjeya ojjaña Jesosaja epeeji cuana, ¡jashahuabaquicue jama ba'a: —Eya mimishi pajea neinei'yo sa poani —pocue!

E'e, jiquio ecua emano'yo cuana shajoshajo'yo ajja jayojja jama Jesosaja epeeji cuana mimishi po maja sa po'yo ajja. Pea jashahuabaquime po'yani, de. Jjeya Jesosa nije jjapee neineiquianijo eseyaya o jayojjaa Eyacuiñajjiya ejjashahuabaquiji jayojja jama atitiiña.

¹² Jamajjeya eshahuaa miqúanaya shajjama' po mee sa acanijo, ¡a'a shajjama' pojji! Chojja. ¡Ejjashahuabaquiji yahuajo quea tai, quea mimishi jayojja jama a'a pojji!
¹³ Eshahuaa miqúanaya quea mimishi o jayojja jama po mee sa acani. ¡A'a jashajja'ajjaquiji! Eyacuiñajjiya ca ca miya quea pame, o jayojja jama po mee sa acani. ¡Oya shajja'ajjacue! Ohuaya miya pea jashahuabaquime po mee ca'yani. Jamajjeya ¡ba'ecue ojaya ejjashahuabaquiji quea pame nee jayojja jama! ¹⁴ E'e, Eyacuiñajjiya huohui canaje jama ba'a: —¡Mimishi pajea neinei'yocue!

Jamatii ojaya esohui etehue'yo shajja'ajja majje mimishi pajea meeme'yo ajja. Eyacuiñajjiya ca ca oe eseya quea jea nee acani; mimishi pajea meesahua ca'yani. Jamajjeya jeshahuaa miya shajjama' po mee sa acanijo a'a jashajja'ajjaquiji! Jjeya oya, eshahua ese huoojea'yojji pojjeama, de. Eyacuiñajji ca ca esejaya Emeshi Mese nei, ese huoojea'yojji poani.

Eyacuiñajjiya echacoji quea pame

¹⁵ Jamajjeya jjeya Eyacuiñajjiya eseya napa ajja esohui etehue'yo jayojja jama ajjimajo. Chojja, Eyacuiñajjiya eseya quea jea nee acanijo esejaya mimishi cuijea ca'yani. Huohui

jijima jama ba'a: —Esohui etehue'yo jayoija jama ba'yanijo, eyaya miquianajaya mimishi cuijeaje'yo —jamaya jjeja huohui jijima Eyacuiñajjiya.

Jamajjeya ¿ae jshahuabaquiani eseya? ¿A'a quea mimishi capohua? ¹⁶ Chojja de. ¡Bacue! ¡Iquio ecua echacomeeji nijje poquiajo, ohua mee'ajja cajje miya chachaco majje miya ojaya echacoji poani, oya mi huoojeajji poani jama jayoijaya eshahuaja esohui jayoija jama añojo miya ojaya epeeji poani, oya mi huoojeajji poani. Miya jamaya po majje quea nee nee poaje'yo quijje cuaquijo. ¡Eyacuiñajji mi huoojeajji poanijo ojaya esohui shajja'ajjacue! Ohuaya miya quea boejea ba'e mee caje. Majoya miya ba'e tiitii mee caje'yo eyajo, Eyacuiñajjiya. ¹⁷ Jamajjeya eyaya Eyacuiñajji bihuiaña ohuaya miquianaya eshahuaajo nahue canijo. E'e, yahuajo eshahua mi huoojeajji poanijo shajjama' poanaje. Jjeja ca ca ecuea esohui shajja'ajja majje Eyacuiñajjiya esohui e'e nei jayoija jama año quea bihui nee. ¹⁸ Jamajjeya Eyacuiñajjiya miquea eshahua poqui mee ca'yonaje, mi huoojeajji pojjeama po mee ca'yonaje. Jjeja Eyacuiñajji mi huoojeajji poani. O jayoija ba'e mee ca'yani. Jamajjeya miyaya ojaya esohui jayoijaya jama año quea bihui nee. ¹⁹ Miquea eba neinei eyaya quea ja'a esohui huohuiaña jama ba'a: Yahuajo eshahua mi huoojeajji poanaje, miyaya o jayoijaa ojaña mimishi a sa anaje, quea ja'a jshahuabaqui sa po ajja poanaje. ¡jjeja ca ca Eyacuiñajji mi huoojeajji nei nei a'yocue! ¡Ojaya ejshahuabaqui'yoiji jayoija jama atiitucue quea pame nee eba'e'yoiji!

²⁰ Yahuajo aje oe esahua mi huoojeajji poanijo, miquianaya quea pame po sa po'yo ajja nei nei poanaje. ²¹ Eshahua jayoija jama quea mimishi ba'enajejo ¿a'a quea bei po tiitii mee canaje? Cho. Jjeja ma ecua ese ba'enaje jamajo eseya quea bicho nee nee poani. Jamaya eba'e tiitii jojjemo Eyacuiñajjiya eseya cuaqui yasijje huoojea ca'yoquiaye. ²² E'e, yahuajo eshahua mi huoojeajji poanaje. Eyacuiñajjiya miquea eshahua poqui mee ca'yonaje. Jjeja ca ca Eyacuiñajji mi huoojeajji poani. Oya shajja'ajjaño, ohuaya miya quea boejea'yo po mee canij; ba'e tiitii mee caje'yo eyajo. ²³ Eyacuiñajjiya shajjama' cuana huoojea caje'yo cuaqui yasijje eshahua nijje quea mimishi poanaje sosejje. Pea ca ca jama ba'a: Eseyá jamatí quea pame ba'e meeme ajja. Emeshi Mese nei Jesosa Quito nijje jjapeequianijo, Eyacuiñajjiya eseya o jayoija jshahuaba meequi ca'yani; eseya ba'e tiitii mee caje'yo eyajo onijje. E'e de, eseya jamatí quea pame nee ba'e neinei ajja.

7

Esohui eba meesahuajji epona ahuejjiyo

¹ Ecuea epeeji cuana, Eyacuiñajjiya esohui etehue'yo miquianajaya eba. Jamajjeya jama baña ba'a: Eseyá eshe nequijjo ca ca oe esohui etehue'yo jayoija jama caba'yahua tii, mano'yo majje pojjeama. ² Miquiana ba meesahuajji eyaya jama huohuiaña ba'a: Eyacuiñajjiya jama huohui canaje ba'a: —Ehuanase ojaya yahue nijje caba'yahua tii tii. ¡Yahue mano'yo jimaajo, pea nijje a'a jhahueaqui mee'yoiji! ¡O mano'yajo ca ca peajo cajjahueaqui'yahua! ³ Ojaya yahue mano'yo jijima eshe nequi tiijo, peajo jhahueaqui nisho'yanijo, oya ehuanase pea cojjoji poani. Ojaya yahue mano'yo majje ca ca oya e'ahuemano. Oya ahuema' jayoija peajo cajjahueaqui'yahua. Jhahueaqui o'oya majje pea cojjoji jayoija jama pojjeama —jamaya huohui canaje yahuajo nei Eyacuiñajjiya.

⁴ Jamajje ecuea epeeji cuana, miquianajaya eba neinei eyaya jamaya huohuiaña. Jesosa nijje jjapeequianijo epona e'ahuemano jhahueaquiani jayoija jama poani. E'e, yahuajo Jesosa ba jimahuaajo eseya quea quehua jshahuabaquinaje jama ba'a: —Eyacuiñajjiya esohui etehue'yo jayoijaya jama atiitiaño, ohuaya eseya ba'e tiitii mee caje'yo onijje eyajo —jamaya eseya po'ajjanaje.

Jjeja ca ca Jesosa esejaya mimishi cuijea'yoiji sosejje mano'yonajejo yahuajo jama jshahuabaqui ajja, de. Jjeja ca ca pea jshahuabaquime poani. Iquio ecua oja yahue mano'yo majje ehuanase peajo jhahueaqui'yani jayoija jama jjeja eseya Jesosa nijje jjapeequi'yani. Eyacuiñajjiya Jesosa emano'yojaa shequi mee ca o'oyanaje jayoija jama eseya pea jshahuabaquime po mee ca'yani. Jamajjeya eseya jshahuabaquiani quea pame nee eba'eji, Eyacuiñajji quea bihui nee epo meeji. ⁵ Yahuajo Jesosaja epeeji po jimahuaajo eseya ba'enaje esejaya ejshahuabaquijji quea tai jayoijaya. Eyacuiñajjiya esohui etehue'yo ba majje shajjama' po sa neinei poanaje jama ba'a: “¡A'a pea siijji!” ba majjeya eseya pea sii sa neinei poanaje. Jamaya eseyaya Eyacuiñajji quea quene po meenaje. Jamajjeya Eyacuiñajji nijje eba'e'yoiji tii tii pojjeama. ⁶ Yahuajo aje oe eseya mimishi pajea meeme ajja. Iquio ecua Eyacuiñajjiya esohui shajja'ajja majje jamatí ameeme ajja. Jjeja ca ca Jesosa esejaya mimishi sosejje mano'yonajejo, eseya pea jshahuabaquime poani. Eseyaya baña esohui etehue jayoija jama añojo pojjeama Eyacuiñajjiya eseya quea pame ba'e tiitii mee caje'yo. Jesosa nijje jjapeequianijo ca ca eseya

pea jhashahuabaquime poani. Edojjoshahua Pameya eseya quea pame nee ba'e meesahua canijo, Eyacuiñajji quea bihui nee po mee sa aña.

Eyacuiñajjija esohui ba neinei majje esejaya eba poa eseya shajjama' nei poani

⁷ Eyacuiñajjija esohui etehue'yo ba majje ca ca esejaya eba poa eseya shajjama' poani. Jamatii beca cuana jama poani pojja'a ba'a: —¿A'a esohui etehue'yo jayojja jama e'a'yojji pojjeama?

Chojja, quea pame nee. Etehue'yo ba jjima jojjemo esejaya Eyacuiñajji quea quene poani ba jjima pome. E'e, Eyacuiñajjija esohui etehue'yo jama poani ba'a: “iA'a oe onajaya aquiana jea bajji!” poani. Jamatii Eyacuiñajjija esohui ba jjima jojjemo onajaya aquiana jea bañaño Eyacuiñajji enijje quea quene poani ecuea ba jjima pome. ⁸ Ma ba majje ca ca esahuaa eya onajaya aquiana jea ba neinei mee canaje quea huiso nee. Yahuajo esohui ba jjimajo ca ca ecuea ba jjima poanaje eya shajjama' poani onajaya aquiana jea ba majje. ⁹ Yahuajo esohui etehue'yo ba jjimajo eya shajjama' pojjeama poso jjabacuinaje. Quijje Eyacuiñajjija esohui etehue'yo ba majje ca ca eyaya banaje jama ba'a: —E'e, eya ca iña shajjama' nei nei poani, de. Eyacuiñajjiya eya quea nee nee po mee caje'yo, de —eya poanaje.

¹⁰ Jamajjeya Eyacuiñajjija esohui jama eba'e tiiti jojjemo eseya Eyacuiñajji nijje ba'e tiiti mee'yome. Eyaya ojaya esohui jama ajjima tiitiijo ca ca eya Eyacuiñajjiya quea nee nee po mee caje'yo. ¹¹ Eyaya Eyacuiñajjija esohui etehue'yo jayojja jama a'ajja'yonaje. Chojja, ameemee ajja, de, quea mimishi nee nee. Jamajjeya esohui jayojja jama atitiiti jjimajo aje oe Eyacuiñajji enijje quea quene nee nee poaje, eya quea nee nee po mee caje'yo tii tii. ¹² Jamatii Eyacuiñajjija esohui etehue'yo quea pame nee e'e jojo nei, Eyacuiñajjija ejjashahuabaquijji ese quea bihui ba'e meesahuajji. ¹³ Jamajjeya Eyacuiñajjija esohui quea pame ba neinei'yo majje, ¿a'a Eyacuiñajjiya eya quea nee nee po mee caje'yo? Chojja, jamaya pojjeama. Eyacuiñajjija ojaya esohui tehue mee ca poa ojañaña ebajji shajjama' nei nei quea tai nee nee poani cuana jjabahuejjaquijji Eyacuiñajjiya quea nee nee po mee caje'yo. Jamajjeya esohui ba jjimajo eya shajjama' pojjeama poso jjabacuinaje; ba majje ca ca jamatii eya mimishi po majamaja sa neinei poanaje. Eyacuiñajji quea quene po meenaje enijje. Quea pame po sa poani, jamatii quea pame po ajja. Mimishi boti'ama; jamatii jamaya eyaya aña. ¹⁴ Enejaya eba Eyacuiñajjija esohui quea pame nee nee. Eya ca ca pame'ama, shajjama' pea'ai, de. Jamajjeya eya jamatii quea pame ba'e meemee ajja ojaya esohui jayojja. Jiquio ecua echacojji ojaya echacomeejjija esohui jayojja chaco sa po ajja, jamatii jamaya chaco cae jama jayojjaya eya quea mimishi po sa po'yo ajja, jamatii quea mimishi poani. ¹⁵ Eyacuiñajjija esohui jayojja jama a'ajja majje eya jhashahuabaquiani jama ba'a: —iDee! ¿Apiojji shai eya quea pame nee po ajja? E'e de, eya quea pame po nishoani.

Eya quea mimishi po majje jhashahuabaquiani jama ba'a: —iDee! ¿Apiojji shai eya quea mimishi poanaje? Jamaya eya po sa po'yo ajja —jamaya eya jhashahuabaquiani.

¹⁶ E'e de, ecuea eba Eyacuiñajjija esohui quea ja'a nee. Jamajjeya eya quea yeno poani ma esohui jayojja jama mi amajje. ¹⁷ Jjeya ca ca ecuea pea jhashahuabaquime quea ja'a poanijo ma ecua eya yahuajo ba'yaninaje jama po sa po'yo ajja. Jamatii ecuea ejjashahuabaquiyojji quea mimishi; e poaninaje yahuajo pajeapaje'yo ajja. E'e de, ecuea ejjashahuabaquijji quea mimishi yani, de. Cajaa.

¹⁸ Ecuea eba jama ba'a: Quea mimishi jjejojo eya jamatii quea ja'a nee jhashahuabaqui ajja tii tii. Eya quea ja'a nee po sa po'yo majje jamaya eyaya ameemee ajja, de. Quea mimishi nee nee iña, de. ¹⁹ E'e de, eya quea pame nee po sa poani. Jamatii quea pame, quea ja'a po'ajjani. Mimishi po sa po'yo ajja, de. Jamatii quea mimishi poani. ²⁰ Mimishi amajje eya quea yeno poani. Mimishi a sa po'yo ajja. Jamajjeya mimishi a'yo majje ecuea eba ecuea eba'ejji ma ecua eya yahuajo ba'yaninaje jama eyaya atitiitiaña.

²¹ E'e, eya quea pame nee Jesosa jayojja ba'e sa poani nei nei. Jamatii eya ca'a'amajo quea pame atitiiti ajja. Ecuea ejjashahuabaquijji quea mimishi yani, ma e yahuajo ba'yaninaje quea tai poaninaje. Maya eya pajeapaje'yo ajja. ²² E'e de, Eyacuiñajjija esohui ecuea quea jea nee nee. Maya eyaya a sa aña. ²³ Jamatii ecuea ejjashahuabaquijji jjeya jiquio jama ba'a: —Quea pame nee a sa aña Eyacuiñajjija esohui jayojjaya —eya poani. Jamatii jamaya eyaya ameemee ajja. Ecuea ejjashahuabaquijji yahuajo jayojja jama aña, quea mimishi. E'e de, eya quea mimishi nee nee; mimishi cuana paje'yo ajja. Eya jama poani ba'a: Onajaya esohui quea mimishi jayojja jama eyaya aña tii tii. ²⁴ E'e, eya quea yeno poani mimishi amajje. ¿Aya acuae eya mimishi pajea neinei meesahua caje'yo so'o? ²⁵ Enejaya Emeshi Mese nei Jesosa Quito quea ca'a nee nee poani. Jamajjeya ohuaya eya mimishi pajea meesahua caje'yo, e'e jojo nei. Jamajjeya eyaya Eyacuiñajji bihuaña jama ba'a: —Ecue Chii, miyaya eya jaahuaña quea pame nee nee.

E'e, Eyacuiñajjija esohui jayojja jama a sa año. Jamatii eyaya jamaya pojjeama atititiaña. Jesosa Quito ca ca quea ca'a nee nee poani. Ohuaya eya mimishi pajea meesahua ca'yani. Jamajjeya Eyacuiñajjija esohui jayojja jama eyaya año.

8

Edojjoshahua Pameya eseya ba'e mee cani Jesosa jayojja, yahuajo jama pojjeama

¹ Jjeya Jesosa Quito nijke japeequianijo, Eyacuiñajjija eseya huohui cani jama ba'a: — Eyaya jja miqianaya emimishi cuijea'yo baña. Jesosa Quito mique mimishi cuijea'yojji poanaje. Quea boejea poanijo, miqianaya ecuea etecueajji pojjeama —Eyacuiñajji poani.

² Yahuajo Jesosa Quitoja epeeji pojjeama poanaje. Yahuajo eseya quea mimishi po tiitianijo cuaqui yasije edobiquiji nisho poanaje. Jjeya ca ca Jesosa Quitoja epeeji poanijo, Edojjoshahua Pameya eseya ba'e mee cani o jayojja, mimishi'ama. ³ E'e, eseya quea mimishi poaniya jjejojo Eyacuiñajjija esohui jayojja jama ameeme ajja. Jamajjeya Eyacuiñajjija eseya quea boejea pojjeama ba cani. Chojja. Esey quea mimishi nee nee poanaje. Jamajjeya Eyacuiñajjija Jesosa, oja Bacua Ejja oe nei huoojea canaje jiquio meshi yasije. Oya, Jesosa yamiji deja jayojja poanaje. E'e, Jesosa ese jayojjaya yamiji poa, jamatii oya mimishi'ama tii. E'e, Jesosa mano'yonaje esejaya mimishi cuijea'yojji, esejaya mimishi sosequia'yojji pea'ai. Jesosaa esejaya mimishi pajea meesahua ca'yanijo, Eyacuiñajji ese nijke quea bei poani. ⁴ Jamaya acanaje Eyacuiñajjija eseya ojaya esohui etehue'yo quea ja'a nee jayojja jama ameeya, ojaya ejjashahuabaquiji quea ja'a nee jayojja jama epo meeji pea'ai. Jjeya Edojjoshahua Pameya eseya ba'e mee cani Eyacuiñajjija esohui jayojjaya. Jjeya eseya Jesosa jayojja ba'yani, pea jashahuabaquime poani, yahuajo jayojja jama pojjeama. Yahuajo quea mimishi poanaje, jjeja ca chojja. ⁵ Beca cuana quea mimishi ba'e sa poani, yahuajo ba'enaje jama. Ojaya ejjashahuabaquiji quea mimishi jama atitii cani. Mimishi pajea sa po'yo ajja tii. Pea cuaa ca ca Edojjoshahua Pame shajja'ajja cani. Ojaya ejjashahuabaquiji quea pame jayojja jama jashahuabaquime poani pea'ai. E'e, Edojjoshahua Pameya Jesosaja epeeji cuana jashahuabaqui meesahua cani o jayojjaya. ⁶ Ojjaña quea mimishi ba'yanija ejjashahuabaquiji quea mimishi jama atitii cani. Mimishi cuana pajea sa po'yo ajja nei nei. Jamajjeya cuaqui yasije poquije'yo. Quea nee nee poaje'yo. Edojjoshahua Pameya eseya Eyacuiñajjija ejjashahuabaquiji jayojja jama po meesahua cani. Jamajjeya eseya ba'e tiiti mee caje'yo eyajo Jesosa nijke quea bei nee nee. ⁷ Ojjaña quea mimishi, quea mimijjequijja jashahuabaquiani Eyacuiñajjija epeeji pojjeama. Shajjama' cuana, de. Oya cuana Eyacuiñajjija esohui jayojja jama a'ajja tii. Mimishi pajea'yo ajja tii tii. ⁸ E'e, quea mimishi, quea mimijjequijja poanijo, Eyacuiñajji onijke quea bei pojjeama poani.

⁹ Jesosa Quitoja epeeji Shoma cuiñajjijo ba'e, miqianaya yahuajo quea mimishi poa. Jjeya ca chojja. Edojjoshahua Pameya miqianaya ba'e meesahua cani quea pame nee nee, yahuajo jama pojjeama. E'e, Edojjoshahua Pame Jesosaja epeeji cuana huasijje edobiquinequi. O miqiana quea dobiqii jjima jojjemo miqianaya Jesosaja epeeji pojjeama pome, miqianajaya mimishi cuijea'yo jjima pome. ¹⁰ E'e jojo nei Jesosa Quito miqiana nijke nequi tiitiani. Ohuaya miqianajaya edojjoshahua ba'e tiiti mee caje'yo miquea mimishi ecuijea'yojojo. E'e, miqianaya mano'yo majje eyami ihuije'yo quea mimishi poa jjejojo. ¹¹ Jamatii Eyacuiñajji quea ca'a nee nee poani; ohuaya Jesosa emano'yojaa shequi mee ca o'oyanaje. Jamajjeya Jesosaja epeeji poanijo, ohuaya miqianaya ba'e mee caje o'oya eyami eyacua nei. Emano beca'yojji pojjeama. Jamaya poaje Edojjoshahua Pame miqiana huasijje dobiqii majje.

¹² Jamajjeya ecuea epeeji cuana, imiqianaya Jesosaja epeeji poanijo, pea jashahuabaquime poanijo Eyacuiñajjija esohui jayojja jama acue! ¡Yahuajo jayojja jama a'a po o'oyajji! ¹³ E'e, quea mimishi po tiitianijo, Eyacuiñajjija eseya quea nee nee po mee caje'yo. Edojjoshahua Pameya ca ca ojjaña eseya mimishi pajea meesahua caje'yo. Jamajjeya mimishi pajea'yo epo Eyacuiñajjija eseya ba'e tiiti mee caje'yo onijke eyajo. ¹⁴ Ojjaña joya Edojjoshahua Pame jayojja jama jashahuabaquime poani Eyacuiñajjija bacua cuana poani. ¹⁵ Yahuajo, Jesosaja epeeji po jjimahuajo eseya quea mete ba'enaje. Eshahua jayojja jama jashahuabaquime eseya poanaje. Jjeya ca ca Edojjoshahua Pameya eseya Eyacuiñajjija bacua po mee cani. Ohuaya eseya mimi meesahua cani Eyacuiñajji nijke jama ba'a: —Eyacuiñajji, miya ecue Chii e'e jojo nei.

¹⁶ E'e, jjeja Eyacuiñajjija ba cani eseya oja bacua poani. Edojjoshahua Pameya eseya ba mee cani jama ba'a: —Miqianaya Eyacuiñajjija bacua cuana poani.

¹⁷ Jamajjeya Eyacuiñajjija bacua cuana poanijojo ojjaña ojaya aquiana esejaya poaje; eseya ohuaya quia caje'yo. E'e, ojaya esohui yahuajo jayojja jama acaje'yo ese nijke jama ba'a: Ojjaña aquiana Eyacuiñajjija quia ca'yonaje Jesosa Quito que. Maya aquiana esejaya

poaje'yo pea'ai Jesosa Quito niije jjapeequianijo. Onijje jjapeequianijo, pea cuaa eseya napa caje, quea nee nee po mee caje'yo. Jamatii. Ecuaña quea nee poani Jesosa jayojja. Jamajjeya Eyacuiñajjiya eseya ba'e tiitii mee caje'yo Jesosa niije quea ja'a nee eyajo. Onijje ona huoojeajji po mee caje'yo.

Quijje eseya quea pame nee anije'yo eyajo Jesosa niije

¹⁸ Jjeya eseya jiquiojo tii quea yeno poani, quea nee poani Jesosa niije jjapeequianijo. Jamatii ja'a quea yeno pojji! Quea pame nee nee eseya ba'e tiitii'yo Jesosa niije eyajo.

¹⁹ Adana, esejaya ejeajji quea mimishi poa. Adana quea mimishi poanijo, Eyacuiñajjiya ojjaña ojaya epana'yo cajaa acanaje beshahua nei. Eseya Eyacuiñajjiya bacua cuana quea ja'a nee, quea ca'a nee Jesosa niije poanijo, ojjaña aquiana cajaa ya'yojji pojjeama po mee caje'yo Eyacuiñajjiya. ²⁰ E'e, yahuaajo nei Eyacuiñajjiya ojjaña quea pame nee pana ca'ya poa. Adana quea mimishi poajo ca ca Eyacuiñajjiya ojjaña cajaa aca poa. Quijje ojjaña aquiana cajaa ya'yojji pojjeama poaje'yo. Ma Eyacuiñajjiya ebionei pana ca poa jayojja ishoo ca ani, ojjaña. ²¹ E'e, jjeya ojjaña aquiana mano'yani, ihui'yani pea'ai. Quijje, Jesosa poe o'oyajo ca ca ojjaña aquiana cuana quea pame nee nee poaje o'oya. Adana quea mimishi poe jjimahuaajo jama jayojjaya poaje o'oya. Eyacuiñajjiya bacua cuana, ma Jesosa niije jjapeequiani quea pame nee nee poaje'yo Jesosa poe o'oyajo. Ma shejo ojjaña aquiana ojjaña Eyacuiñajjiya pana'yo quea pame nee nee poaje o'oya. ²² Adana quea mimishi poa jojoya ojjaña aquiana quea nee, quea tai, quea camaja nee poa. Jjeya nei pea'ai jamaya poani, jiquio jama ba'a: Jesosa poe o'oya jjimahuaajo ojjaña Eyacuiñajjiya pana quea yeno, quea nee nee poani, jiquio ecua epona bacua cuayani jama jayojja quea nee nee poani bacua cuaya jjimahuaajo. ²³ Edojjoshahua Pame dobiq'yonaje ese que, Jesosaja epeeji cuana huasijje. Jamatii eseya pea'ai quea nee, quea mano, quea shoe pea'ai poani. Edojjoshahua Pameya eseya ba meesahua cani jama ba'a: Jesosaa poe o'oya majje eseya quea pame nee po mee caje'yo eyacua. Eyacua po'yo majje mano'yo ajja, nee'ama ba'e tiitii'yo eyajo pea'ai. Eyacuiñajjiya esohui ma ecua ohua yahuaajo huohui canaje jayojja jama ohuaya eseya, ojaya bacua cuana acaje'yo Jesosa poe o'oyajo. Jamajjeya eseyaya ishooña Jesosaja epoe o'oyajji. Eba'ejji eyacua quea pame nee nee esejaya poaje, de. ²⁴ Jama poaje ba'a: Eyacuiñajjiya eseya mimishi cuijea'yo majje ba'e tiitii mee cani. Eseyaya eyami eyacua amee caje'yo pea'ai, Jesosa poe o'oyajo. Jamajjeya eseyaya ishooña ojaya epoe o'oyajji. Jjashahuabaquiani quijje eyacua epojji. ²⁵ Jamajjeya ishooña tii tii Jesosa ache shono poeje o'oya ebajji. Eyami eyacua yajji eseyaya ishooña quea bihui nee nee.

²⁶ Cuanaya eseya ca ca ca'a'ama poanijo, Edojjoshahua Pameya quea ja'a nee ba'e meesahua cani. Eba'ejji quea camajajo Eyacuiñajji niije emimijji esejaya ba jjima. ¿Yajja mimime epojji? Jamajjeya Edojjoshahua Pame esejo mimi neinei ani Eyacuiñajji niije; eseya mimi meesahua cani Eyacuiñajji niije pea'ai. ²⁷ E'e, ojjaña esejaya ejjashahuabaqui'yojji mimi meeme ajja quea ja'a nee Eyacuiñajji niije. Jamatii Edojjoshahua Pameya eseya jjashahuabaqui meesahua canijo, ojjaña esejaya ejjashahuabaquijji Eyacuiñajjiya eba nei nei poani. E'e, Edojjoshahua Pame jama poani ba'a: —Eyacuiñajji, Jesosaja epeeji cuana huohui'ajja cani ma oya cuana sa poanijo. Jamajjeya j'amaya acue! ¡Miquea ejjashahuabaquijji quea pame nee jayojja jama acue Jesosaja epeeji cuanajo! —jamaya esejo mimiani Eyacuiñajji niije Edojjoshahua Pame.

Eyacuiñajjiya eseya Jesosa jayojja jama ba'e meesahua cani

²⁸ E'e, jjeya quea camaja Jesosa niije ejjapeequijji. Jamatii Eyacuiñajjiya eseya babaca canaje ojaya epeeji epojji. Jamajjeya ohuaya eseya jaahuana cani tii tii. Jamaya acani esejaya oya quea jea nee poanijo. ²⁹ E'e, yahuaajo nei ese pana jjimahuaajo Eyacuiñajji esejo jjashahuabaquinaje jama ba'a: —Ecuea eba a'ya cuae ecuea epeeji poaje quijje nei nei. Eyaya oya cuana ecuea Ebacua Eja Jesosa jayojja jama ba'e meesahuaje quea pame nee —jamaya poanaje Eyacuiñajji.

Jamajjeya eseya Jesosa jayojja jama poanijo, oya esejaya Edoe Mese poaje, eseya Noo. ³⁰ E'e, yahuaajo nei nei ese cuaya jjimahuaajo Eyacuiñajjiya babaca ca poa ojaya epeeji epojji. Babaca majje eseya mimishi cuijea ca'yonaje. Mimishi cuijea'yo majje eseya ba cani mimishi'ama. Ba'e tiitii mee cani quea ja'a nee, quea ca'a nee Jesosa niije eyajo, Eyacuiñajjiya.

Quea pame nee nee Eyacuiñajjiya eseya acani

³¹ E'e, eseya Jesosa niije ba'e tiitii'yo quea ja'a nee o jayojjaya. Quea pame nee nee poaje'yo esejaya eba'ejji. Eyacuiñajjiya eseya jaahuana tiitii cani. Oya oe nei quea ca'a nee nee poani tii. Jamajjeya eseya onaa napa canijo, jamatii Jesosaja eseya epajea'yojji pojjeama. ³² Eyacuiñajjiya eseya quea jea nee nee acanijo ohuaya huoojea canaje ojaya Ebacua Eja Jesosa esejo mano'yohua ese mimishi cuijea'yojji. Jamajjeya eseyaya jama

baña ba'a: Eyacuiñajjiya eseya quea jea nee atititi caje'yo; eseya jaahuana tiitii caje'yo pea'ai. Ohuaya eseya jjapeequi meesahua caje'yo quea ja'a nee Jesosa nijje. ³³ Eyacuiñajjiya eseya babaca canaje ojaya epeeji epojji. Jamajjeya pea cuana esejo emimijajiji pojjeama Eyacuiñajji nijje jama ba'a: —Miquea epeeji quea tai. ¡Cajaa acue!

Chojja. Jamaya emimijajiji pojjeama esejo. Eyacuiñajjiya eseya emimishi cuijea'yo ba cani. ³⁴ Jesosa Quito mano'yonaje esea mimishi cuijea'yojji. Emano'yojaa Eyacuiñajjiya oya shequi mee ca o'yanaje, nequi mee ca'yonaje o pejjejo eyajo ojjaña huoojeajji. Jomajo oya Jesosa Quito esejo mimiani jama ba'a: —Ecuea epeeji cuana quea boejea poani, emimishi cuijea'yo —Jesosa poani.

Jamajjeya pea ese nijje emimijajiji pojjeama jama ba'a: —Miquianaya shajjama' nei nei poanijo quea nee nee poaje —jama mimijajimeya epojji pojjeama ese nijje, Jesosaja epeeji cuana nijje.

³⁵ Eseyá Jesosa Quitoja quea jea nee nee poani e'e jojo nei. Jamajjeya pea cuaa eseya napa caje Jesosa nijje jjapeequianijo; jiquio jama poaje ba'a: Eba'ejji quea camaja poaje. Quea nee, quea mete poaje. Eshahuaja epeeji cuaa quea mimishiya eseya napa caje Jesosaja esohui huohuijji poanijojo. Quea shoe nee poaje pojja'a. Quima', aema' poaje pojja'a. Pea cuaa esejaya aquiana sii caje ojjaña pojja'a. Jesosa nijje chachacoanijo, pea cuaa eseya quecua caje'yo pojja'a. Jamatii esejaya eba e'e jojo nei Jesosa Quitoja eseya quea jea nee nee, epajea'yojji pojjeama. Ohuaya eseya jaahuana cani. ³⁶ Beca cuana yahuajo nei quea mase poa. Jamajjeya ohuaya Jesosaja epeeji cuana quecua ca'ya poa. Jjeya beca cuaa quea mase poaniya eseya quecua sa acani Jesosaja epeeji poanijojo. Yahuajo nei nei Eyacuiñajjiya epeejiya esohui tehue ca poa. Eyacuiñajjiya esohui etehue'yo jama poani ba'a: “Eyacuiñajji, ecuana minijje jjapeequianijo pea cuana jashahuaba majamajaquiani jama ba'a: —Cacuijajea'yahua —poani. Jiquio ecua ñajjaja iña majje quecua cani jayojja jama onaaya ecuana acani”.

Jamaya yahuajo nei nei Eyacuiñajjiya epeejiya tehue ca poa.

³⁷ Dejjá mimishi cuana quea huiso nequijo quea camaja nee Jesosa nijje ejjapeequijji. Jamatii pea cuaa eseya ejjapeequi pajea mee'yojji pojjeama Jesosa nijje. Chojja. Eseyá Jesosaja quea jea nee poanijo eseya ojaya epeeji poani. Ohuaya eseya jaahuana cani. ³⁸ Cuanaya esejaya eba e'e jojo nei Jesosa Quitoja, Emeshi Mese neija epeeji poanijo, Eyacuiñajjiya quea jea nee nee poani eseya. E'e, jiquiojo ba'e, mano'yo majje pea'ai eseya Eyacuiñajjiya quea jea nee. Epajea'yojji pojjeama tii tii. Esohuidojojji cuaa, eshahua cuaa pea'ai Eyacuiñajji ese pajea mee'yojji pojjeama. Ojjaña jjeja nei aniya, ojjaña quijje nei poajeya pea'ai Eyacuiñajji ese pajea mee'yojji pojjeama tii. Ojjaña quea taiya quea mimishiya pea'ai Eyacuiñajji ese pajea mee'yojji pojjeama tii. Eseyá ojaya quea jea nee nee poaje'yo tii tii. ³⁹ Jesosa Quitoja epeeji poanijo, ojjaña quea ca'a eyajo nequiya, ojjaña quea ca'a meshijo nequiya, ojjaña Eyacuiñajjiya panaa pea'ai Eyacuiñajji eseya epajea mee'yojji pojjeama. Eseyá ojaya quea jea tii tii poaje'yo.

9

Yahuajo nei Eyacuiñajjiya Isaeni cuana babaca ca poa ojaya epeeji nei epojji

¹ Eyaya, Pabohua miquiana que, Jodio cuana huasijje tehueña, ma Shoma cuiñajjiyo ba'e yasijje. Eya Jesosa Quitoja epeeji poanijo ecuea esohui e'e nei poani. E'e, Edojjoshahua Pameya eya jashahuabaqui meesahua cani quea ja'a nee. ² Eya Jodio dejjá pea'ai. Jamajjeya eya quea yeno po toitiiani Jodio cuanajo, Jesosa nijje jjapeequi sa po ajjajo. ³ Jodio cuana Jesosaja epeeji epojji eyaya sa neineiaña. Jjashahuabaquiani Jodio cuanajo, ecue huapa pojjeama cuanajo jama ba'a: —Eyacuiñajjiya eya cajaa ca'a cahua Jodio cuana cuaqui yasijje poqui'yo jjima epojji. Jamaya Eyacuiñajjiya ya'yo jojjemo eya quea bihui nee pome —eya poani.

⁴ Yahuajo Eyacuiñajjiya Jodio cuana babaca ca poa ojaya epeeji cuana epojji. Oja bacua cuana po mee ca'ya poa. Eyacuiñajji Jodio cuana nijje nequinajejo, onajaya eba poa Eyacuiñajji ojjaña huoojea'yojji quea ca'a nee poani tii tii. Jodio cuana nijje mimi majamajanaje jama ba'a: “Enijje jjapeequianijo miquianajaya ebacua cuana quea huiso nee poaje. Jiquio meshi eyaya quiaje miquianajaya enequijji, miquianajaya osecua cuana nequijji” Eyacuiñajji poanaje. Quijje Eyacuiñajjiya Moisesi tehue mee ca poa ojaya esohui Jodio cuana quea ja'a nee ba'e meesahuajji. Etiqiuana nijje miminaje jama ba'a: “Miquianaya e'e jojo nei e bihuiajji poajo, eya miquiana nijje mimije” Eyacuiñajji poanaje. Cuanaya Eyacuiñajjiya huohui canaje jama ba'a: “Mique osecua nei quijje poeje; ohuaya miquianaya ba'e tiitii mee caje'yo onijje” Eyacuiñajjiya jamaya Jodio etiqiuana aca poa.

⁵ E'e, Jodio cuanaja etiqiuana ma bajjani poa ba'a: Amajama, Amajamaja bacua ejja Isaaca, Isaacaja bacua ejja Jacobo, ma quijje Isaeni bajjani aca poa, Isaenija bacua ejja

cuana 12 huismo poa, Jodio cuanaja etiquiana poa. Jesosa Quito cuaya poa deja jayojja, yamijji, Jodio ponaja mejo poa. Etiqianaja osecua poa Jesosa, esejaya etiquianaja osecua. Jjeya oya ojjaña huoojeajji poani. Jamajjeya jaya ejjabihuaqui tii tii!

⁶Jodio cuana oe pojji cuana Jesosaja epeeji poanaje. Jamajjeya oe pojji cuanaja mimishi ecuijea'yo poanaje, Jodio cuanaja. Jamatii esejaya eba Eyacuiñajjiya ojaya ehuohui'yo ma etiquiana cuana nijje ohua huohui ca poa jayojjaya acani Jesosaja epeeji cuana nijje. Jesosaja epeeji cuana ca ca oe Isaeni deja e'e jojo nei poani, Eyacuiñajjiya babaca. ⁷Pea cuana ca ca, mimishi cuana ca ca Eyacuiñajjiya Isaenija osecua nisho ba cani. Amajamaja osecua cuana Eyacuiñajjiya babaca'yo beca cuana poanaje. Yahuajo nei nei Eyacuiñajji Amajama nijje mimia poa jama ba'a: "Amajama, Sanaja mejo miquea ebacua Isaaca bajjani poaje. Ojaya osecua cuana quea huiso nee nee poaje. Oya cuana ca ca mique osecua cuana e'e jojo nei poaje". Jamaya Eyacuiñajjiya aca poa. ⁸Ma esohui ba majje esejaya eba poa ojjaña Amajamaja osecua cuana Eyacuiñajjiya babaca jeyo jjima poa ojaya epeeji epojji. Amajamaja pea ebacua cuana cuaya poa. Jamatii Eyacuiñajji onajaya osecua cuanajo mimi jjima jama ba'a: "Miquianajaya osecua cuana ecuea ebabaca ecuea epeeji epojji" jamaya ajjima onaya. Chojja. Oe ebacuajo huohui ca poa Eyacuiñajjiya. Amajamaja ebacua Isaaca bajjanajo ca ca oe jamaya huohui ca poa. Isaaca cuaya jjimahuajo jamaya huohui ca poa Eyacuiñajjiya. ⁹Jama aca poa ba'a: "Amajama, miquea ehuanese etii, bacuama". Jamatii quijje oya o'eji poaje. Ecuea eba ache shono miquea ebacua cuayaje, deja shoi. Apoa poajo eyaya miquea ebacua cuaya meeje". Jamaya Eyacuiñajjiya aca poa.

¹⁰Eyaya, Pabohua miqianaya pea esohui huohuije Isaacaja bacua cuanajo. Jamajjeya miqianaya ba meeje ojjaña Amajamaja osecua cuana Eyacuiñajjiya babacajeyo jjima ojaya epeeji nei epojji. Oe nei babaca ca poa; etiquiana Isaaca ojaya ebabaca poa. Isaacaja ehuanese Shemeca bajjani poa, oja mejo ebacua becajaa poa, deja pea'ai. ¹¹E'e, Shemecaja ebacua becajaa cuaya poa. Ma ebacua cuana cuaya jjimahuajo, mimishi ajjimahuajo pea'ai, Eyacuiñajjiya huohui ca poa oe ebacua ojaya ebabaca'yo ojaya epeeji nei epojji, pea cho. Jamajjeya ojjaña ba mee ca poa ohuaya babaca cani coya ohua quea jea ba caje. ¹²Ba majje pojjeama Eyacuiñajjiya ojaya epeeji epojji babaca cani. Jyaya ohuaya sa caniya babaca cani. Jamajjeya huohui ca poa enaese Shemeca bajjani ojaya ebacua becajaa jama ba'a: "Mique bacuaa Esao bajjaniya cashajja'ajja cahua oja chahuaja esohui, Jacoboja" Eyacuiñajjiya aca poa Shemeca. ¹³Eyacuiñajjiya esohui huohuijji yahuajo ojaya esohui tehue mee ca'ya poa jama ba'a: "Ecuea Jacobo quea jea nee nee. Esao ca ca cajaa anaje" Eyacuiñajjiya aca poa.

¹⁴—¿Apiojji shai Eyacuiñajjiya ebionei cuaya cajaa aca'yonaje, ebacua quijje cuaya babaca ca poa? ¿Apiojji shai? Jamaya eseyaya ajjima aña. Jamaya quea pame pojjeama —beca cuana poani.

Chojja. Eyacuiñajjiya quea pame nee nee tii acani. ¹⁵Ohuaya Moisesi huohui ca poa jama ba'a: "Eya beca cuana nijje quea bei poani. Beca cuana eyaya jaahuanaña. Cua eya quea jea aña eyaya babacaña" Eyacuiñajjiya aca poa. ¹⁶Esejaya eba'ejjijo pojjeamajo, esejaya ejjashahuabaquijji pojjeamajo pea'ai ese nijje quea bei poani Eyacuiñajji. Chojja, ojaya quea jea nee nee poanajo ohuaya eseya jaahuana cani, ese nijje quea bei poani pea'ai. ¹⁷Cuanaya yahuajo nei Ejito emeshi mese Panao bajjanajo Eyacuiñajjiya esohui etehue'yo jama poa ba'a:

"Panao, eyaya miya nequi meeña Ejito emeshi mese epojji. Eyaya ma deja cuanaja ba jjima aña mi quea mete po meeji ejo. Jamaya ojjaña cuana ojjaña meshijo ba'e ba meeje eya e'e nei quea ca'a nee nee poani tii".

Jamaya Panao Eyacuiñajjiya aca poa. ¹⁸E'e, Eyacuiñajji beca cuana nijje quea bei poani. Ojaya mimishi cuana cuijea cani. Pea cuana nijje ca ca Chojja, quea bei pojjeama po tiitiani shajjamajo. Mimishi pajea mee'yo jjima tii tii acani Eyacuiñajjiya.

¹⁹Jamajjeya beca cuana huohui'ajja cani jama ba'a: —Eyacuiñajjiya ecuana mimishi pajea meesahua ajja. Jamajjeya ¿apiojji ohuaya tecuea cani ecuana quea mimishi poanajo? Ojaya ejjashahuabaquijji jayojja jama acani ohuaya, de —beca cuana poani.

²⁰Eyaya miqianaya saja'aña jama ba'a: ¿A'a Eyacuiñajji niñebajji! Miquianajaya Eyacuiñajji emimicuijjeanobiaejji pojjeama. Jama ba'a: Meshimisi iñacajjiya meshimisi pana majje iñaca cani shajjajji acani. ¿A'a meshimisiya tecuea caje meshimisi iñacajji jama ba'a: —¿Apiojji acuaya miyaya eya jamaya anaje so'o? —a'a jamaya meshimisiya acani?

Cho, jamaya po ajja meshimisi. ²¹Meshimisi iñacajjiya meshi iña majje ojaya ejjashahuabaquijji jayojja jama acani. E'e pojja'a meshimisi quea bame nee nee asa acani, yiye bame nee nee a sa acani pojja'a. Ojaya ejjashahuabaquijji jayojja jama pana'yome acani. ²²Jamaya Eyacuiñajjiya acani pea'ai, ojaya ejjashahuabaquijji jayojja jama acani. Beca cuana quea mimishi po tiitiani, Eyacuiñajjiya oya cuana quea nee nee po mee sa acani. Jamajjeya ojjaña ba mee caje Eyacuiñajji quea ca'a nee nee poani. Jamatii oya jjeya

nei quea tecue nee pocuaji ajja shajjama' nijje. Chojja, quijje nei quea nee nee po mee cajeyo. Ishoa cani. E'e pojja'a shajjama' cuana Jesosaja epeeji poaje ba'ajja'. Jamajjeya Eyacuiñajjiya oya cuana quea nee nee epo meeji pojjeama. ²³ Ese beca cuana nijje ca ca Eyacuiñajji quea bei poani. Jamaya acani eseya ojaya quea jea nee nee poanijo. E'e, Eyacuiñajji quea ca'a nee nee poani; eseya jjapeequi meesahua cani Jesosa nijje. Jamajjeya ohuaya eseya quea ja'a, quea pame nee nee ba'e mee sa acani eyajo Jesosa nijje. ²⁴ E'e, Eyacuiñajjiya eseya beca cuana, Jodio cuana, Jodio pojjeama cuana pea'ai babaca canaje ojaya epeeji epojji. Ojaya ejjashahuabaquijji jayojja jama acani, Eyacuiñajjiya. ²⁵ Jamajjeya yahuajo nei ojaya esohui huohuijji Osea bajjani tehue mee ca poa jama ba'a:

“Yahuajo nei Jodio pojjeama ecuea ebabaca pojjeama ecuea epeeji epojji. Jjeya ca ca oya cuana ecuea ebabaca ecuea epeeji epojji. Yahuajo oya cuana ecuea quea jea nee nee poanijo. Jjeya ca ca oya cuana ecuea quea jea nee nee poani. ²⁶ Jodio pojjeama quea mimishi poanajejo, pea cuaa huohui ca poa jama ba'a: —Miquianaya Eyacuiñajjiya epeeji pojjeama —poanaje. Jjeya ca ca onaaya huohui cajeyo jama ba'a: —Miquianaya Eyacuiñajjiya ebacua cuana poanaje”.

Jamaya yahuajo Eyacuiñajjiya tehue mee ca poa.

²⁷ Cuanaya yahuajo nei Eyacuiñajjiya esohui huohuijji Isaiaa esohui tehue ca poa Jodio cuana jo jama ba'a:

“Etiquiana Isaeni bajjanija osecua cuana quea huiso nee nee poaje. Meshijaji sope huisoajja poaje, sicosico meeme ajja quea huiso nee nee. Jamatii oe pojji cuanaja mimishi ecuijea'yo poaje. Eyacuiñajjiya oe pojji ba'e tiitii mee cajeyo onijje quea ja'a nee.

²⁸ Ohuaya ojaya esohui jayojja jama acaje'yo. Ojjaña shajjama' cuana quea nee nee po mee jeyojeyo cajeyo onijje jjapeequi sa po'yo ajjajojo. E'e jojo nei jamaya Eyacuiñajjiya acuaij cajeyo”.

Jamaya aca poa Isaiaa. ²⁹ Ohuaya pea esohui tehue ca poa jama ba'a:

“Yahuajo Eyacuiñajjiya quiyoye jeyojeyo mee ca'ya poa ojjaña quea mimijjequijjea, ojjaña quea mimishi Sonoma cuiñajjiyo ba'e, ojjaña Comosha cuiñajjiyo ba'e pea'ai. Oya jayojja beshahua nei Isaeni cuana chama'yo tii popoquia poa shajjama' poanijojo. Eyacuiñajjiya oe pojji Isaenija osecua cuana jaahuana ca poa”.

Jamaya aca poa Isaiaa.

Jodio cuana Jesosa nijje jjapeequi jjima; Eyacuiñajjiya oya cuana ba jjima emimishi cuijea'yo

³⁰ ¡Jamajjeya bacue jiquio! Eyacuiñajjiya quea huiso Jodio pojjeama ba cajeyo mimishi'ama. Jodio cuana ca ca oe pojji ba cajeyo mimishi'ama. Yahuajo Jodio pojjeama cuana jashahuabaqui jjima poanaje jama ba'a: —¿Achajja shai ecuana ba'e Eyacuiñajjiya esohui jayojja jama so'o? Jamajjeya ohuaya ecuana ba cajeyo mimishi'ama —jamaya jashahuabaqui jjima Jodio pojjeama poanaje.

Jamatii Jesosa nijje jjapeequianajo, Eyacuiñajjiya oya cuana ba cani mimishi'ama. ³¹ Jodio cuana ca ca Eyacuiñajjiya babaca ca poa onijje ejjapeequijji. Jamatii oya cuana jashahuaba quehuaquinaje jama ba'a: —Ecuana ojjaña Eyacuiñajjiya esohui cuana jayojja jama atitiiaña, ohuaya ecuana ba cajeyo mimishi'ama —Jodio cuana poanaje.

Cho. Eyacuiñajjiya Jodio cuana ba ca poa quea mimishi ojaya esohui cuana jayojja jama mi atitii cajo. ³² ¿Yajjajje? ¡Bacue! Eyacuiñajjiya Jodio cuana ba cani mimishi'ama ca ca Jesosaja epeeji poanijo. Jamatii onaaya aje oe Jesosa cajaa acanaje. Jama poa cuana ba'a: —Ecuana esohui etehue'yo jayojja jama atitiiaña. Jamajjeya Eyacuiñajjiya ecuana mimishi'ama ba cajeyo —oya cuana poa. Chojja de, ajjima ojaya, de.

³³ E'e, yahuajo Isaiaa Eyacuiñajjiya esohui tehue ca'ya poa jama ba'a:

“Eyaya huoojeaje mimishi cuijeajji Isaeni cuana huasijje. Jamatii Isaeni cuana jashahuaba quehuaquije; mimishi cuijeajji cajaa acaje'yo. Beca cuana onijje jjapeequijje ca ca quea bihui nee nee poaje'yo”.

Jamaya aca poa Isaiaa Isaeni cuana jo, Jodio cuana jo.

10

¹ Miqianaya Jodio cuana Shomajo ba'e Jesosaja epeeji poanijo ecuea epeeji poani pea'ai. Eya, Pabo Jodio pea'ai. Eya ojjaña Jodio cuana mimi tiitiani Eyacuiñajji nijje jama ba'a: —Eyacuiñajji, ¡Jodio cuana jjapeequi meesahuacue Jesosa nijje! Jamajjeya oya cuana cuajji yasijje epojji'yo jji pojjeama —jamaya eyaya atitiiaña.

² Ecuea eba ojjaña Jodio cuana Eyacuiñajjiya epeeji po sa poani. Jamatii onajaya ejjashahuabaquijji quea quehua poanijo Eyacuiñajji nijje jjapeequi meeme ajja. ³ Jesosa nijje jjapeequijje, Eyacuiñajjiya Jodio cuana mimishi'ama ba cajeyo, ma yahuajo shajjama'

poa. Jamaya beshahua nei ojjaña Jodio cuanaja eba pojjeama. Jesosa cajaa acanaje. Ojaya ejjashahuabaquijji quea quehua jama ba'a: —Quea pame poanijo, Eyacuiñajjiya ecuana ba caje mimishi'ama —jamaya poso jjabaquinaje.

Cho, Eyacuiñajjiya ojjaña ba cani mimishi'ama Jesosa nijje jjapeequianijo, quea pame ba'yanijo pojjeama. ⁴ E'e, Jesosa Quito mano'yonaje esejo. Jamajjeya ojjaña onijje jjapeequiani Eyacuiñajjiya ba cani mimishi'ama. Jamatii beshahua nei ojjaña Jodio cuana jjashahuaba quehuaquiani jama ba'a: —Moisesija etehue'yo jayojja jama atititiañajo, Eyacuiñajjiya ecuana ba caje mimishi'ama —jama posoya acani Jodio cuaa.

Eyacuiñajjiya ojjañaja mimishi cuijea'yo sa acani

⁵ Yahuaño nei Moisesiya Eyacuiñajjiya esohui tehue ca poa jama ba'a:

“Eyacuiñajjiya eseya ba caje mimishi'ama ojaya esohui atititiañajo. Jamajjeya jayojja esohui jayojjaya oe atititue!”

Jamaya esohui tehue ca'ya poa Jodio cuanaja yajji.

⁶ ¡A'a jjashahuaba quehuaquijji jama ba'a: —Eyacuiñajjiya ecuana ba cani mimishi'ama oja esohui etehue'yo jayojja jama aña tiitijjo —a'a jamaya jjabaquijji! Chojja, Jesosa nijje e'e jojo nei jjapeequianijo, Eyacuiñajjiya eseya ba cani mimishi'ama.

Eyacuiñajjiya Moisesi esohui jama tehue meeme aca poa ba'a:

“A'a jjashahuabaquijji jama ba'a: —E'e pojja'a beca cuana eyahuasijje poqui majje, poe o'oya majje huohui caje achajja shai amajje Eyacuiñajjiya ecuana ba caje mimishi'ama”.

Jama tehuemeya aca poa Moisesiya.

Jamajjeya jamaya a'a jjashahuaba quehuaquijji! Jesosa poeyanaje ese que; mano'yonaje Eyacuiñajjiya ese mimishi'ama ebajji. ⁷ Moisesiya pea esohui tehue ca poa jama ba'a:

“¡A'a jjashahuaba quehuaquijji jama ba'a: —Beca cuana emano'yo huasijje poqui majje, poe o'oya majje huohui caje achajja shai amajje Eyacuiñajjiya ecuana ba caje mimishi'ama —jamaya a'a jjashahuabaquijji!”

Jamaya Moisesiya tehue ca poa.

E'e, jamaya quea jjashahuabaquí quehua. Jesosa shequi o'oyanaje ese mimishi cuijea'yoyji epojji. ⁸ Jamajjeya Eyacuiñajjiya Moisesi esohui jama tehue meeme aca poa ba'a:

“Eyacuiñajjiya miqúanaya ba caje mimishi'ama eba'e tiitii'yoyji. Quea camaja nee nee pojjeama. Eyacuiñajji miqúanaya mimishi'ama ebajji mimi huicha'a huicha'anaje. Miqúanaya shajja'ajja majamajanaje. Majoya jjashahuabaquí majamajanaje miqúanaya”.

Jamaya aca poa Moisesiya. Maya ecuaaya huohuaña miqúanajaya eshajja'ajjajji, Jesosa nijje ejjapeequijji. ⁹ E'e jojo nei ejjahuhuiqui jiquio jama ba'a: —Jesosa ecuea Emeshi Mese nei poani —ejja'aquí. E'e jojo nei ejjashahuabaquí jama ba'a: —Ecuea eba Eyacuiñajjiya Jesosa shequi mee ca o'oyanaje —jamaya poanijo Jesosaa eseya ba'e tiitii mee caje'yo eyajo onijje.

¹⁰ Jesosajo e'e jojo nei jjashahuabaquianijo, Eyacuiñajjiya eseya ba cani mimishi'ama. Eseyaya e'e jojo nei huohuaña: —Eya Jesosaja epeejji.

Jamajjeya Jesosaa eseya onijje ba'e tiitii mee caje'yo. ¹¹ Yahuaño nei nei Isaiaa esohui tehue ca poa jama ba'a:

“Ojjaña joya jjeya nei Eyacuiñajjiya huoojea'yo ojjaña jaahuanajji nijje jjapeequiani Eyacuiñajjiya ba cani mimishi'ama e'e jojo nei”.

Jamaya Isaiaa aca poa.

¹² E'e, Jesosa esejaya Emeshi Mese nei oe nei, ojjañaja; Jodio cuanaja, Jodio pojjeama cuanaja pea'ai. E'e, Jodio cuana Jodio pojjeama jayojja nei pea'ai. Onijje mimianijo, Jesosaa eseya jaahuana caní quea pame nee. ¹³ E'e, eseya beca cuana mimije Jesosa nijje jama ba'a: —Jesosa, ecuea Emeshi Mese nei, ¡ecuea mimishi cuana cuijea'yocue! —jamaya mimianijo, Jesosaa eseya mimishi cuijea'yo majje ba'e tiitii mee caje'yo eyajo.

¹⁴ Pea cuanaja Jesosa ba jjima, onijje mimi jjima; emimishi cuijea'yoyji pojjeama. Shajja'ajja jjima Jesosa mano'yonaje ojjañaja mimishi cuijea'yoyji. Jesosaja esohui huohuiji poqui jjima ona huasijje esohui quea pame Jesosajo huohuiya. ¿Achajja shai oya cuana Jesosaja epeejji poaje so'o? ¹⁵ Eyacuiñajjiya ojaya esohui huohuiji pea cuana huasijje huoojea jjimajo, oya cuana Jesosajo eshajja'ajjajji pojjeama. Yahuaño nei Eyacuiñajjiya esohui huohuiji Isaiaa esohui tehue ca poa jama ba'a:

“Eyacuiñajjiya esohui huohuiji poeyajo esohui quea pame huohuiya, ecuana quea bihui nee nee poaje. E'e jojo nei jamaya poaje”.

Jamaya esohui tehue ca poa.

¹⁶ E'e, Eyacuiñajjiya esohui huohuiji poquinaje Isaeni cuana huasijje. Huohui ca'ya poa ojaya esohui quea pame nee. Jamatii Isaeni cuana aje oe shajja'ajja sa po'yo ajja poa. Isaiaa

yahuajo nei esohui tehue ca poa Isaeni cuanajo jama ba'a: "Emeshi mese, oe pojji Isaeni cuaa ecuanajaya esohui shajja'ajja canaje" jamaya Isaiaa aca poa.

¹⁷ Eyacuiñajjiya ojaya esohui huohuijji huoojea cani esohui quea pame nee Jesosajo huohuiya. Jamajjeya ma esohui quea pame nee shajja'ajja majje Jesosa nijje jjapeequije'yo. ¹⁸ Jamatii beca cuana jjashahuabaquiani jama ba'a: —E'e pojja'a Isaeni cuanaja shajja'ajja jjima esohui quea pame Jesosajo. Jamajjeya Jesosa nijje jjapeequi jjima poanaje.

Chojja. Shajja'ajja canaje. Jamatii shajjama' jayojja poanaje. Yahuajo Eyacuiñajjiya esohui quea pame Jesosajo tehue mee ca poa jama ba'a:

"Ojjaña meshijo ba'e yasijje Eyacuiñajjiya esohui huohuijji cuana esohui quea pame huohui mee canaje".

Jamaya yahuajo nei aca poa Dabiya.

¹⁹ Beca cuana jjashahuaba quehuaquiani jama ba'a: —E'e pojja'a Isaeni cuanaja Eyacuiñajjiya esohui quea pame shajja'ajja jjima. Jamajjeya mi jjapeequinaje Eyacuiñajji nijje —jamaya beca cuana poani.

Cho. Onaaya shajja'ajja canaje. Yahuajo nei Moisesiya Eyacuiñajjiya esohui tehue ca poa jama ba'a:

"Isaeni cuana, miqúanaya ebionei ecuea ebabaca coo, eyaya babaca coonaje ecuea epeeji epojji. Miqúiaaya ca mo ca oe cajaa anaje. Jamatii eyaya pea cuana babacaje'yo ecuea epeeji nei epojji. Jamajjeya miqúanaya quea quene poaje ona nijje, Isaeni pojjeama cuana nijje. Jjashahuabaquije jama ba'a: —Isaeni pojjeama cuana quea pame pojjeama. Ecuana ca ca quea pame nee. Eyacuiñajji e'e jojo nei onajaya ba jjima. Ecuanaajaya ca ca oya eba. ¿Apiojji shai Eyacuiñajjiya babaca cani Isaeni pojjeama cuana? Oya cuana cajaa —jamaya miqúanaya poaje".

Jamaya Moisesiya aca poa Isaeni cuana. ²⁰ Majoya Isaiaa Eyacuiñajjiya esohui quea ja'a nee tehue ca poa jama ba'a:

"Pea cuanaja eya ba jjima. Eyaya oya cuana jjapeequi meesahuaje'yo enijje. Oya cuana mimi jjima enijje ojaya mimishi cuijea'yojji. Jamatii oya cuana ecuea esohui ba meesahuaje'yo".

Jamaya Isaia tehue mee ca poa yahuajo nei nei. ²¹ Eyacuiñajjiya Isaia pea esohui tehue mee ca poa Isaeni cuanaja jama ba'a:

"Eyaya Isaeni cuana iyaa majamajanaje enijje ejjapeequijji. Jamatii ecuea esohui etehue'yo jayojja jama a sa po'yo ajja tii tii. Shajjama' ojjaña cuana, quea mimishi nee".

Jama tecueameya Isaiaa Isaeni cuana aca poa.

11

Eyacuiñajjiya Jodio cuana cajaa ajjima

¹ Beca Jodio cuana jjashahuabaquiani jama ba'a: —Ecuana Isaeni cuana. Eyacuiñajjiya babaca. Jamatii jjeya Eyacuiñajjiya ecuana cajaa acanaje —beca cuana jamaya poani.

Chojja de. ¡Bacue! Eya Isaeni dejja, Jodio dejja. Eya Eyacuiñajjiya cajaa ajjima. Amajama ecuea etiiquiana poa. Bejami Amajamaja osecua. Eya Bejamija osecua. ² E'e, Eyacuiñajjiya Jodio cuana babaca coo ca poa ojaya epeeji epojji. Yahuajo nei Eyacuiñajjiya esohui huohuijji Enia bajjanija esohui etehue'yo miqúanajaya eba. Enia Jodio cuanajo quea quene mimia poa Eyacuiñajji nijje jama ba'a:

³ "Eyacuiñajji, Emeshi Mese nei, ¡bacue pea Isaeni cuana! Ohuaya aje oe cuiajea ca'yonaje miquea esohui huohuijji cuana. Mei e'iya ani ñajaeoqueajea ca'yonaje, ma aquiana dahujji acani cuaa mi quea bei ecuana nijje epojji ñajaeoqueajea ca'yonaje. Eya ee nei yani miquea epeeji. Eya cuiajea sa acani pea'ai Isaeni cuaa".

Jamaya aca poa Eniaa.

⁴ Eyacuiñajjiya Enia saja'a ca poa jama ba'a:

"Chojja. Quea huiso nee nee Isaeni cuana ecuea epeeji yani. E'e, 7.000 huisome Isaeni cuana eyacuiñajji nisho Baani bajjani bihuajji pojjeama. Quea huiso Isaeni cuana ecuea esohui jayojja jama ba'yani".

Jama saja'ameya Eyacuiñajjiya aca poa Enia.

⁵ Jjeya nei cuanaya beca Jodio cuaa Eyacuiñajjiya esohui jayojja jama acani. Eyacuiñajjiya oya cuana babaca canaje ojaya epeeji epojji. Oja mimishijo jjashahuabaqui tiitii ajja. Eyacuiñajjiya oya cuana quea jea nee acani. Jamajjeya oya quea bei nee poani ona nijje, Eyacuiñajji. ⁶ E'e, Eyacuiñajjiya Jodio cuana quea jea nee acanijo oya cuana babaca canaje ojaya epeeji epojji. Quea bei Jodio cuana nijje poanaje. Onaja mimishi cuanajo jjashahuaba tiitiiqui ajja. Jodio cuana ojaya quea jea nee poanajejo babaca ca'ya poa. Babaca'yo jjima ojaya esohui jayojja jama atitii canajejojo.

⁷ E'e, beca Jodio cuana Eyacuiñajjiya epeeji pojjeama poanaje. Quea huiso Eyacuiñajjiya esohui jayojja jama anisho canaje. Jamajjeya Eyacuiñajjiya oya cuana ba canaje quea mimishi. E'e, Eyacuiñajjiya Jodio cuana babaca canaje ojaya epeeji epojji. Beca cuana e'e nei poanaje. Jamatii pea cuana quea mimishi nee nee poanaje. ⁸Yahuajo nei nei Moisesiya Eyacuiñajjiya esohui tehue ca poa jama ba'a:

"Jamajjeya Eyacuiñajjiya shajjama' cuana quea jshahuabaqui ja'a epo meeji pojjeama. Eyacuiñajjiya etehue'yo e'e nei ba majje jamatii ojaya quea quehua poa. Esohui e'e nei shajja'ajja majje jamatii quea quehua poa pea'ai. E'e, jamaya Isaeni cuana jjeja pea'ai shajjama' po tiitiani".

Jamaya Moisesiya tehue ca poa.

⁹Yahuajo nei nei emeshi meseya Dabiya Jodio shajjama' cuana tecuea ca poa jama ba'a: "Esejaya etiquianaja esohui jayojja jama atiitiaña miqiuanaaya. Poquiquehuaje'yo, de, edasia'yo poaje'yo, de, quea mimishi nee nee. Jamajjeya Eyacuiñajjiya miqiuanaaya quea nee nee capo mee cahua. ¹⁰ Cojjamaja ejiojji ba jjima jayojja jama miqiuanaaya ba jjima capohua tii tii Eyacuiñajjiya ejjashahuabaqui'yojji. Cuanaya aquiana quea biquie abo tiitii cani jayojja jama capohua miqiuanaaya mimishi; epa-jea'yojji pojjeama tii tii capohua".

Jamaya Dabiya tehue ca poa yahuajo nei nei Jodio cuanajo.

Eyacuiñajjiya Jodio cuana iyaa cani tii ojaya epeeji epojji

¹¹ E'e pojja'a beca cuana jama jshahuabaquime poani ba'a: —¿A'a Jesosa cajaa acanajejo, Eyacuiñajjiya Jodio cuana cajaa acaje'yo tii?

Chojja, jamaya pojjeama. Ecuana, Jodio cuana quea mimishi nee nee poanijo, Eyacuiñajjiya esohui a'ajjajo, ohuaya Jodio pojjeama cuana jjapeequi meesahua cani Jesosa nijje. Onajaya mimishi cuana cuijea ca'yani. Eyacuiñajjiya jshahuabaquiani jama ba'a: —E'e, Jodio pojjeama cuana Jesosa nijje jjapeequi meesahuaña ba majje e'e pojja'a Jodio cuana Jesosa nijje jjapeequi'yo pea'ai enijje eba'e tiitii'yojji —jamaya Eyacuiñajjiya jshahuabaquiani.

¹² Jodio cuana aje oe jshajja'ajjaqui ajja. Jamajjeya Eyacuiñajjiya Jodio pojjeama cuana Jesosa nijje jjapeequi meesahua ca'yonaje. Eyacuiñajjiya Jodio pojjeama cuana quea pame acanaje Jodio cuana Jesosa nijje jjapeequi jjima jojoya. Jodio cuana Jesosa nijje jjapee neineiquiajo ca ca Eyacuiñajjiya quea pame nee nee acaje'yo ojjaña.

¹³ Jodio pojjeama cuana Shomajo ba'e, Eyacuiñajjiya eya huoojea canaje miqiuana que ojaya esohui huohuiya. Eyaya esohui huohuaña tii tii miqiuanaaya Jesosaja epeeji epo meesahuajji. ¹⁴ Jamajjeya ma ba majjeya Jodio cuana pojja'a Jesosaja epeeji po sa poaje'yo pea'ai. ¹⁵ E'e, Jodio cuana Jesosa cajaa aca poajo, Eyacuiñajjiya Jodio pojjeama onijje jjapeequi meesahua canaje. Jamaya quea pame nee. Jamatii quijje Jodio cuana Jesosa nijje jjapeequi meesahua caje'yo pea'ai. E'e, jjeja Jodio emano'yo jayojjaya poani shajjama' jjejojo. Jesosa nijje jjapeequi'yo majje ca ca eshequi'yo jayojja poaje'yo, de, quea pame nee nee. ¹⁶ E'e, jjeja oe pojji Jodio cuana Jesosaja epeeji nei poani. Jamajjeya quijje Eyacuiñajjiya quea huiso Jodio cuana ojaya epeeji nei po mee caje'yo. Jama ba'a: Acui esajja quea pame nee nee poajo, quijje tii majje ejjajja quea pame nee poaje pea'ai. Oya jayojjaya Amajama Eyacuiñajjiya ehabaca poa. Jamajjeya oja osecua cuana Eyacuiñajjiya ehabaca poaje pea'ai.

¹⁷ Jshahuabaquicue jama ba'a: E'acui meseya acui aa enojinoji cobojea majje ejee cojjajji iyanobia cani etii'yojji. Acui sajja quea pamejo pea acui jee cojjajji e'ianobia pohuaje'yo. Oya jayojjaya beca Jodio cuana Jesosa cajaa acanajejo quea tai poa, acui aa enojinoji jayojja. Pea ejee cojjajji iyanobia majje pohua'yani jama Jodio pojjeama Jesosaja epeeji cuana poaje. Jiquie ecua euciojone sajjajji jayojja eseya quea pame ba'e mee cani. ¹⁸ Jamajjeya Jodio pojjeama cuana, ja'a jshahuabaquijji miqiuanaaya quea pame nee, Jodio cuana quea pame pishana! Chojja. Eyacuiñajjiya miqiuanaaya eba poanaje Jodio ehuohuijo. Miqiuanaaya ehuohuijo pojjeama ca ca Eyacuiñajjiya Jodio cuanaja eba poa.

¹⁹ E'e pojja'a miqiuanaaya jshahuabaquiani jama ba'a: —Jesosa cajaa aca poajo Jodio cuana acui aa ecobojea'yo jayojja jama poanaje. Eseyaya, Jodio pojjeama ca ca Jesosaja epeeji poanijo euciojonejo pea ecojja posho e'ianobia'yo quea pame pohua'yani jayojja jama —miqiuanaaya poani.

²⁰ E'e, jamaya poanaje. Jesosa cajaa amajje Jodio cuana acui aa ecobojea'yo jayojja jama poanaje. Eyacuiñajjiya oya cuana cajaa aca poa. Miqiuanaaya ca ca oe Jesosa nijje jjapeequi'yajo, Eyacuiñajjiya ba cani mimishi'ama. E'e, jjeja Eyacuiñajjiya miqiuanaaya babaca canaje. Jamatii ja'a jshahuabaquijji miqiuanaaya quea pame nee Jodio cuana quea pame pishana! Chojja. ¡Miqiuanaaya quea ja'a nee Jesosa nijje jjapee tiitiqicue! ²¹ ¡Bacue oe! Eyacuiñajjiya Jodio cuana babaca coo ca poa ojaya epeeji epojji. Majoya Jodio cuana

jjashajja'ajjaqui sa po ajjajo, ohuaya miqianaya babaca canaje, Jodio pojjeama cuana. Jiquio ecua acui aa nojinoji jehuissejjajea'yo majje eyacua iyanobia ca'yani jama jayojja Eyacuiñajjiya Jodio shajjama' cuana cajaa ajea'yo majje miqianaya babaca canaje. Jamajjeya ja'a shajjama' pojji! Eyacuiñajjiya miqianaya cajaa aca chana'. ²² E'e, Eyacuiñajjiya ojjaña quea jea nee acani. Shajjama' cuana ca ca tecuea neinei caje'yo, de. E'e, ojjaña joya shajjama' poani ohuaya quea nee nee po mee caje'yo. Miqianaya ca ca ohuaya quea pame nee nee acani ojaya quea jea nee neejojjo. Ohuaya miqianaya quea jea nee acaje'yo tii tii, ca jjashajja'ajja tiitiquiajo. Shajjama' poajo ca ca ohuaya miqianaya quea nee nee po mee caje'yo pea'ai, de. ²³ E'e, Jodio cuana pea'ai Jesosa nijje jjapeequiajo Eyacuiñajjiya ojaya epeeji nei po mee caje o'oya, yahuajo nei nei jayojjaya. E'e nei, jiquio ecua acui aa ejuhuissejjajea'yo iyanobia ca o'oyani jama jayojja Eyacuiñajjiya oya cuana acaje'yo; ojaya epeeji nei po mee caje o'oya. ²⁴ Miqianaya ca ca Jodio pojjeama cuana yahuajo nei Eyacuiñajjiya ehabaca pojjeama poa. Jamajjeya miqianaya pea acui aa jayojja, ebiojo nequi acui aa jayojja. Jamatii jiquio ecua ebiojo nequi acui aa acui bame bame yasiije iyanobia cani jayojja jama Eyacuiñajjiya miqianaya babaca canaje ojaya epeeji nei epojji. Jamajjeya Eyacuiñajjiya miqianaya acanaje jayojja jama ohuaya Jodio cuana acaje'yo. E'e, ecuea etiiquiana Eyacuiñajjiya babaca coo ca poa. Jamajjeya jiquio ecua acui ebana'yo acui aa ejuhuissejjajea'yo oya tii acuijo iyanobia caje o'oya jayojja jama Eyacuiñajjiya Jodio cuana acaje'yo. Jesosa nijje jjapeequiajo Eyacuiñajjiya huohui caje jama ba'a: —E'e Jodio cuana, jjea miqianaya ecuea epeeji nei po o'oyanaje, ojjaña —acaje Eyacuiñajjiya.

Jodio cuana Jesosaja epeeji quijje poaje'yo

²⁵ Ecuea epeeji cuana, eyaya miya huohuije ma Eyacuiñajjiya quijje acaje Jodio cuana, ma yahuajo ojjaña ja ba jjima poa. Jamajjeya ecuea esohui ba majje miqianaya ejjashahuabaquijji pojjeama jama ba'a: —Ecuana nei ca ca oe Eyacuiñajjiya ehabaca ojaya epeeji nei epojji —a'a oe miqianaya pojji.

Chojja. Jjeya Jodio cuaa Emeshi Mese nei Jesosa cajaa acani beshahua nei ojjaña. Jamaya epo'yojji tii pojjeama. ¿Ache Jodio pojjeama cuana Jesosaja epeeji poaje? Eyacuiñajjiya eba. Mahuiso jjapeequiajo, Jodio cuana jjapeequije o'oya Jesosa nijje. ²⁶ Jamajjeya quea huiso nee nee Jodio cuana eyajo ba'e tiitii mee caje'yo Jesosa nijje jjapeequiajo. E'e, yahuajo nei Eyacuiñajjiya Isaia tehue mee ca poa Isaeni cuana, ma Jacoboja osecua cuana jama ba'a:

“Eyacuiñajjiya huojjea'yo ojjaña jaahuanajji poeje. Oya Jodio dejja poaje. Oya Jacoboja osecua cuana mimishi pajea meesahua'yoyji poaje'yo. ²⁷ Ma ecua eyaya Jodio etiiquiana huohuinaje jamaya eyaya aje'yo; ojjaña mimishi cuijea neineije'yo”.

Jamaya yahuajo nei nei Eyacuiñajjiya aca poa.

²⁸ Jamatii jjeya Eyacuiñajjiya Jodio cuana ba cani ojaya epeeji pojjeama Jesosa cajaa ajji poajojo. Jamajjeya Jodio cuaa ma esohui cajaa acajo, Eyacuiñajjiya esohui quea pame nee Jesosajo miqianaya shajja'ajja mee canaje, Jodio pojjeama cuana. Jamatii Eyacuiñajjiya Jodio cuana cajaa tiitii ajjima, de. Yahuajo nei ecua ojaya ehabaca poa. Ohuaya ecuanaja etiiquiana huohui ca poa jama ba'a: “Miya, miquea osecua cuana pea'ai ecuea epeeji nei cuana poaje'yo tii tii” jamaya ohuaya Amajama, Jacobo, Isaaca pea'ai huohui ca poa. ²⁹ E'e jojo nei Eyacuiñajjiya ojaya esohui jayojja jama acaje'yo, epajea'yoyji pojjeama tii. Babaca'yo majje cajaa ya'yoyji pojjeama tii. ³⁰ Jamajjeya jjeya Jodio cuana Jesosa nijje jjapeequi sa po'yo ajja jojoja Eyacuiñajjiya miqianaya, Jodio pojjeama cuana quea bei nee acani. Miqianaja mimishijo jjashahuaba tiitiqui ajja, jamatii yahuajo shajjama' nei poa. ³¹ Eyacuiñajjiya quijje Jodio cuana jama acaje'yo ba'a: Jjeya ohuaya miqianaya quea bei acani; miquea mimishijo jjashahuabaquijji ajja. Oya jayojjaya quijje ohuaya Jodio cuana acaje'yo, jamatii jjeya shajjama' nei poani. ³² Jamajjeya Eyacuiñajjiya ojjaña cuana ba cani shajjama' nei nei. Jesosa nijje jjapeequiajo ca ca ojjaña mimishijo jjashahuaba tiitiqui ajja poaje. Quea bei ojjaña cuana nijje poaje'yo Eyacuiñajji.

Eyacuiñajji bihuia cani Pabohua

³³ Quea pame nee nee Eyacuiñajjiya eseya acani. Ojjaña eseya ojaya eba nei nei; oya esejaya mimishi cuijea'yoyji. E'e jojo nei ojjaña ojaya eba nei nei. Quea ja'a nee nee ojaya ejjashahuabaquijji. Quea pame nee nee ohuaya acani ojjaña. ³⁴ Yahuajo nei Eyacuiñajjiya Isaia tehue mee ca poa jama ba'a:

“¿Ajea eba nei nei Eyacuiñajjiya ejjashahuabaquijji? ¿A'ya shai o ba meesahuajji? Chama' nei nei. Oya oe nei quea jjashahuabaqui ja'a nee nee. ³⁵ ¿Aya acuae jja mi oe che quia cani aquiana Eyacuiñajjiya? Ojjaña aquiana cuana ojaya, de”.

Jamaya Eyacuiñajjiya esohui Isaiaa yahuajo nei tehue ca poa.

³⁶ E'e, Eyacuiñajjiya ojjaña aquiana pana ca'ya poa. Ojjaña ojaya aquiana. Quea sohui poja nee neeya jjejojjo ohuaya ojjaña quea pame amee cani. Jamajjeya ojjaña ba cani oya

quea ja'a nee, quea pame nee nee pea'ai: —Eyacuiñajji, miya quea pame nee. Pea chama' mi jayojjaya —jamaya ¡oya ejjabihua tiitiiqui! ¡Jamaya ejja'acui!

12

¡Jesosaja epeeji poanijo ojaya esohui jayojja acue!

¹ Jamajjeya ecuea epeeji cuana, ¡shajja'ajjacue mo! Eyacuiñajji ese nije quea bei poani, mimishijo ¡jashahuaba tiitiiqui ajja. Jamajjeya ¡ojaya epeeji nei nei ba'ecue! ¡Eyacuiñajji bihuiacue jama ba'a: —Eyacuiñajji, eya miquea nei nei. Miquea ejjashahuabaqui'yojji jayojja jama eyaya aje'yo —jamaya pocue! E'e, ¡Jesosa jayojja jama ba'e tiitiicue quea pame nee! Eyacuiñajji bihuiacue jama ba'a: —Eyacuiñajji, miya quea pame nee nee.

² ¡A'a Eyacuiñajji epeeji pojjeama jayojja pojji! ¡Eyacuiñajji eseya ojaya esohui jayojja jama capo mee cahua! Cajjashahuabaqui mee cahua o jayojja. Majoya ojaya ejjashahuabaqui eseya ba mee caje'yo. Ma ese ohua amee caje'yo ojo ohuaya eseya ba mee caje'yo. Ojaya ejjashahuabaqui quea pame nee nee, quea ja'a nee nee enequi tiitiiji pea'ai.

³ Eyacuiñajji eya huoojea canaje ojaya esohui huohuiya. Jamajjeya eyaya miquianaya ba meesahuaña quea pame nee eba'ejji. E'e, Eyacuiñajji eseya ba'e meesahua cani ojaya epeeji epoji. Jamajjeya ¡a'a ¡jashahuabaqui jama ba'a: —Eya quea pame nee nee —a'a jamaya pojji! Chojja, ¡quea bei nee ¡jashahuabaquicue! ¡jama acue ba'a: —Eyacuiñajji eya chaco meesahua cani jayojja jama eyaya onijje chacoje —jamaya pocue!

⁴ ¡Bacue! Eseyaya eyami oe. Jamatii eseyaya eyamijo yani eme', ejiojji, ecojja, equise pea'ai. Eme' ca ca ecojja jama pojjeama; pea. Jamatii ojee chaco cani oe eyamiya. ⁵ Oya jayojjaya eseya Jesosaja epeeji cuana quea huiño nee. Oe epeeji pea jayojja chachaco ajja. Jamatii eseyaya ojee chacoña Jesosa nijje. ⁶ Jesosa nijje ¡japeequianijo, Eyacuiñajji eseya chaco meesahua cani quea pame ojaya echacojji. E'e, ohuaya beca cuana chaco meesahua cani oe echacojji. Pea epeeji chaco meesahua cani pea echacojji, de. Jamajjeya ¡ohuaya chaco mee cani jayojja jama ejja'acui! Jamajjeya ¡quea ja'a nee ejjashahuahuoiqui, ohua huohui mee cani jayojja jama ejja'acui! ⁷ Beca cuana ca ca ona ba'e meesahuajji po mee cani ohuaya. Jamajjeya ¡quea bihui nee ojjaña caba'e meesahua cahua! Jesosaja epeeji sohui bameeji ohuaya po mee canijo, ¡ojjaña esohui caba meesahua cahua, huea'ama capohua! ⁸ Ona ¡jabahuejjaqui po mee canijo, pea epeeji cajjabahuejjaqui mee cahua quea ja'a nee: —Eyacuiñajji miya quea bihui po mee caje mimishi'ama ba'yanijo —cahuohui cahua cuana.

Eyacuiñajji Jesosaja epeeji beca cuana quea aquiana huiño po meesahua cani pea'ai. Jamajjeya quea bihui nee capohua, nishehui'ama, dejja tai'ama. Beca cuana pea epeeji ¡aahuanajji po mee cani. Jamajjeya e'e jojo nei quea ja'a nee nee cajjashahuabaquiahua. Pea epeeji ca ca aema' cuana, emanooja cuana ¡aahuanajji po mee cani. Jamajjeya quea jea nee cajaanahua cahua Jesosaja epeeji cuana.

¡Jesosaja epeeji pea epeeji cuana quea jea nee acue!

⁹ ¡E'e jojo nei ojjaña cuana quea jea nee nee acue! Jamajjeya ¡a'a pea cuana quea tai ajji! Chojja, ¡ojjaña cuana quea pame nee nee acue! ¹⁰ E'e, ¡ojjaña Jesosaja epeeji quea jea nee acue! ¡Miquea huapa pojjeama jayojja jama quea jea nee neeya acue! ¹¹ Jamajjeya ¡quea ja'a chacocue huea'ama! ¡Jesosajo, Emeshi Mese neijo quea bihui nee acue ojaya yajji! ¹² Eyacuiñajji esohui ese nije jayojja jama ohuaya acaje'yo e'e jojo nei. ¡Jamajjeya quea bei pocue! Quea yeno dejja mimishiya mimia cajje ¡a'a oe Jesosa pajea'yojji quea yeno po majje! ¡Eyacuiñajji nijje mimi tiitiicue jama ba'a: —Eyacuiñajji, ¡eya ¡aahuanacue! ¡Eya ba'e meesahuacue quea ja'a nee! —jamaya pocue Eyacuiñajji nijje!

¹³ ¡Jesosaja epeeji aema' poanijo eba'e meesahuajji quiacue! Pea cuana miquea cuiñajji nequinaqui'yajo, ¡iyaacue bobi ¡jijajji, ecahuijji pea'ai! ¹⁴ Jesosaja epeeji, dejja mimishiya miya mimia cajje ¡a'a panajajji! ¡Eyacuiñajji nijje mimicue jama ba'a: —Ecue Chii, ¡e cuiajji epo mique Bacua Eja Jesosa nijje ¡japeequi meesahuacue! —acue!

¹⁵ ¡Joya quea bihui nee poani onijje quea bihui pocue! Quea yeno poanijo, pa'anijo ca ca ¡onijje mimicue; yeno'ama ti ti po meecue! ¹⁶ ¡mi jayojjaya Jesosaja epeeji cuana quea pame nee ba'e meesahuacue! ¡A'a jama ¡jashahuabaqui jama ba'a: —Onajaya aquiana quea pame nee nee. Eya o jayojjaya poaje —a'a jama ¡jashahuabaquimeya pojji!

¡Aema' cuana a'a cajaa ajji! Chojja. ¡japeequicue onijje! ¡A'a ¡jashahuabaqui miya quea pame nee nee, pea cuana quea pame pishana! ¹⁷ Onaa miya quea mimishi acajje ¡a'a onijje quea mimishi pojji! ¡Quea pame nee po tiitiicue ojjaña eba'ji miya e'e jojo nei Jesosaja epeeji poani! ¹⁸ Quea camaja eba'e'ji pojja'a. Jamatii ¡ojjaña nijje quea bei nee ba'ecue! ¹⁹ Onaa napa cajje ¡a'a ¡jashahuabaqui jama ba'a: —Ohua e acanaje jayojjaya eyaya oya aje, de —a'a jamaya pojji!

Chojja. Eyacuiñajjiya casosequia ca'yahua. Jamaya Eyacuiñajjiya esohui etehue'yo poa ba'a:

“Ecuea epeeji napajji poani eyaya eyaye nei sosequiaje'yo; quea nee nee po meeje'yo. Eyaya, Emeshi Mese neiya jamaya huohuiaña”.

Yahuajo nei jamaya Eyacuiñajjiya tehue mee ca poa. ²⁰ Pea tehue mee ca poa jama ba'a:

“Mi napajji poani cuana quea shoe poajo, ¡bobiacue oe! ¡Quea naba taja poajo, ena quiacue! Miya jamaya ajje oya quea bicho nee nee poaje. Miya napa pajea caje'yo poija'a, miqnea epeeji poaje”.

Jamaya yahuajo tehue ca poa Eyacuiñajjiya esohui.

²¹ ¡A'a jashahuabaquijji jama ba'a: —Ojjaña joya ecuana nijje quea mimishi poani eya o jayojjaya poaje pea'ai, de —a'a jamaya poiji!

Chojja. Miya napa cajje ¡jamatii oya cuana quea pame nee acue!

13

Jesosaja epeeji cuaa emeshi mese cuana cashajja'ajja cahua

¹ Emeshi meseya huoojea canijo, ¡jjashajja'ajjaquicue! Emeshi mese cuana Eyacuiñajjiya huoojea canaje ojjaña cuana quea ja'a ba'e meesahuaa. Jamajjeya emeshi mese cuana Eyacuiñajjiya quea ca'a po mee cani ese huoojeajji. ² Jamajjeya jashajja'ajjaqui ajjajo ca mi ca oe Eyacuiñajjiya miqúanaya ba cani shajjama' ojaya ehoojea'yoja esohui shajja'ajja sa po ajjajo. Shajjama' cuana ajje oe quea nee po mee caje'yo. ³ Eyacuiñajjiya emeshi mese cuana huoojea jjima quea pame ba'yani cuana quea mete po meeya. Quea mimishi ba'yani cuana ca ca quea mete capo mee cahua. ¿A'a miya emeshi mese cuana quea mete'ama ba'e sa poani? ¡Quea pame acue, ojaya esohui jayojja! Jamajjeya oya minijje quea bihui nee poaje poija'a: —E'e, ¡jamaya quea pame nee acue! —oya poaje.

⁴ E'e, Eyacuiñajjiya emeshi mese cuana huoojea canaje ese quea ja'a ba'e meesahuaa. Jamajjeya ¡quea mimishi po majje quea mete pocue ojo! Ohuaya miya ¡jabahuejjaqui mee caje. Jamaya Eyacuiñajjiya oya cuana huoojea cani shajjama' cuana ¡jabahuejjaqui meejji. ⁵ Jamajjeya ¡emeshi mese cuana shajja'ajjacue mete'ama eba'ejji, Jesosaja epeeji quea pame nee epojji pea'ai! ⁶ ¡Jamaya pea'ai oya cuana sosequiacue! Ojjaña quea pame ba'e mee cani sosejje emeshi mese sosequia cani cuaa, Eyacuiñajjiya huoojea. ⁷ Jamajjeya: —¡Sosequiacue mo! —ohua acajje ¡jamaya quiacue emeshi meseja eba'e meejji ohua chaco cani sosejje, mahuiso tiiya! ¡Miya jaahuana canijo, miqnea emeshi cuiña onajja pea'ai, sosequiacue! ¡E'e, emeshi mese cuana shajja'ajjacue! ¡Oya cuana sosequiacue pea'ai! ¡Jama acue pea'ai ba'a: —Emeshi mese, miya quea pame nee ecuana ba'e meesahuaña —acue! Jamaya quea pame nee.

¡Jesosaja epeeji cuana quea jea acue; pea cuana nijje quea bei pocue!

⁸ Jamajjeya ¡aquiana ¡queshe majje sosequiacue! E'e, ¡miyaya yahuajo huohui'yonajje jayojjaya sosequiacue! Eyacuiñajjiya eseya quea jea nee nee acani. Jamajjeya ¡pea cuana quea jea nee acue, ojjaña! Pea cuana quea jea nee añajo Eyacuiñajjiya esohui jayojja aña. ⁹ E'e, Eyacuiñajjiya esohui Moisesiya tehue ca poa jama ba'a:

“¡A'a onajaya ehuanase jea bajji! ¡A'a pea quecuajji! ¡A'a sii poiji! ¡A'a onajaya aquiana jea bajji!”

Quijje Eyacuiñajjiya huohui canaje jama ba'a:

“¡Minijje ba'e quea jea nee acue! ¡Miya quea pame ba'yani jayojja jama ba'e meesahuacue!” Jamajjeya ¡pea cuana quea jea nee añajo ba'e meesahuacue! ¡Ojjaña Eyacuiñajjiya esohui jayojjaya jama acue! ¹⁰ E'e, onaya miqnea quea jea nee poanijo oya cuana quea yeno, quea nee po mee sa po'yo ajja. Jamajjeya onaya quea jea nee poanijo ojjaña Eyacuiñajjiya esohui jayojjaya aña.

¹¹ E'e, ¡jamaya Eyacuiñajjiya esohui jayojja jama acue! ¡Bacue ¡iquio! Jesosa esejaya Emeshi Mese nei jjeya nei poija'a poeje o'oya. Jamajjeya ¡quea ja'a nee ba'ecue Eyacuiñajjiya esohui jayojja! ¡A'a quea huea poiji! ¡Ojaya esohui bacue! Yahuajo pishana eseya Jesosaja epeeji poanaje. Ohuaya esejaya mimishi cuijea ca'yonaje. Poe o'oya majje eseya ba'e tiiiti mee caje'yo eyajo onijje, Jesosaa. ¹² Jjeya eseya ¡iquiojo ba'yani quea camaja poani, mecajje quea misi quea poqui camaja jayojja. Jesosa poe o'oyajo ca ca quea pame nee nee poaje'yo. Epojja jayojja jama poaje'yo. Ojaya epoe o'oyajji beshahua nei apoa. ¡Japojjaqui majje ja'a'aja'a'a poani jayojja poaje. Jamajjeya ¡a'a quea mimishi poiji! ¡Pea jashahuabaquime po'yocue! ¡Jesosaa eseya ba'e meesahua canijo, ojjaña mimishi pajea neinei'yocue! ¹³ E'e, ¡quea ja'a nee nee ba'ecue bicho'ama epojji onaa ba canijo! Jamajjeya ¡a'a huoojji! ¡A'a ona ishi'ishiqui yasijje poquijji! ¡A'a pea epona cuana jea bajji! Epona, ¡a'a onaja yahue, shacuima' nequi cuana pea'ai siijji! ¡A'a quea mimishi ba'ejji! ¡A'a quea quene poiji! ¡A'a ¡jamamicuiajea nobiajeaquijji pea'ai! ¹⁴ Chojja. ¡Jesosaa nijje mimicue ojaya

ejjashahuabaquijji jayojja jama eba'e meesahuajji! Jamajjeya miquea ejjashahuabaquijji yahuaajo nei jayojja jama eshahuaja miya eba'e mee'yojji pojjeama.

14

¡A'a Jesosaja epeeji cuana nijje mimijajiji!

¹ Jesosaja epeeji cuana, miqüianaaya pojja'a Eyacuiñajiji esohui quea ja'a nee baña. Jesosaja epeeji beca cuana ca ca quea jashahuabaqui ja'a pishana. ¡Jamatii onijje japeequicue quea bei! ¡A'a mimicuijajanobiaejaji ojaya esohui quea quehuajo! ² E'e, miqüianaya beca cuana jashahuabaqui jama ba'a: —Ojjaña noe cuana ca'ijjiahua, jamatii onaaya ba'ehuana canaje ecuiquiaja e'ijjiajji nisho. Ecuaya ijja'yaajo Eyacuiñajiji ecuana nijje quea quene pojjeama poaje —jamaya beca cuana poani. Jamajjeya noe ijjaña, ojjaña.

Beca cuana ca ca jama poani ba'a: —Chojja, ¡noe ma onaaya ecuiquiaja e'ijjia'yojji nisho ba'ehuana canaje a'a ijjaajji! Ma eseya ijjaajo Eyacuiñajiji quea quene poaje ese nijje —jama posoya acani. Jamajjeya acuijajja cuana, bobi ebana'yo pea'ai ijja cani; noe ijja'yo jima acani quea meteya jjejojo.

³ Noe ijjaajji cuana, ¡a'a jama pojji pea cuana nijje ba'a: —¿Apiojji acuae miqüianaaya acuijajja, ebana'yo opana ijjaña, noe ijja ajja so'o? Chojja. ¡A'a quea mete pojji! —a'a jamaya ajji!

Oya jayojja noe ijja ajja cuana, ¡a'a pea cuana nijje jama pojji ba'a: —Miqüianaaya aje oe noe ijjaña. ¿Apiojji? Eyacuiñajiji quea quene po chana', de —a'a jamaya ajji!

¡Bacue! Eyacuiñajiji noe ijjaajji cuana pea'ai ojaya bacua cuana po mee canaje. Jamajjeya ¡a'a jamaya pea cuana nijje mimijji! ⁴ E'e, miqüianaya noe ijja ajja jjejojo mimimimiani. Eyaya miqüianaya huohuaña jama ba'a: Eyacuiñajiji ona huooejaji poani, miqüianaya pojjeama. Jamajjeya ¡a'a mimijajiji! Eyacuiñajiji ona huooejaji poanijo ohuaya ohuaye nei jama acaje ba'a: —E'e, miqüianaya quea pame nee ba'anyi —Eyacuiñajiji acaje.

Quea ja'a ba'e ajjajo ca ca: —Chojja, ¡a'a jamaya ajji! Quea tai —Eyacuiñajiji acaje. Eyacuiñajiji ese huooejaji quea ca'a poanijo, ohuaya eseya quea ca'a po mee cani ojaya ejjashahuabaquijji jayojja jama eba'ejji.

⁵ Cuanaya beca cuana jama poani ba'a: —Beca epojja cuana Eyacuiñajiji bihuiajji. ¡Ma epojja cuanaajo a'a chacojji!

Pea cuana ca ca jama poani ba'a: —Ojjaña epojja oya jayojjaya, pea epojja jayojjaya. ¡Eyacuiñajiji bihuiaque ojjaña pojjaajo! —oya cuana poani.

Jamajjeya ¡a'a pea nijje mimijji ache epojjajo chaco cajji! ¡Miquea ejjashahuabaqui'yojji epojja cuanaajo jayojja jama acue! Pea cuana ojaya ejjashahuabaquijji jayojja jama ca'a cahua pea'ai epojja cuanaajo. ⁶ E'e, Emeshi Mese neija esohui jayojja jama ba'e sa poani miqüianaya, ojjaña. Beca cuana quea huiso epojja cuanaajo chacochocho ajja Eyacuiñajiji bihuia poani jjejojo. Pea cuana ca ca oe pea epojjajo jayojjaya jama acani, oya jayojjaya. Noe ijjaajji cuaa esejaya Emeshi Mese nei bihuia cani. Ijja'ijjia jjimahua Eyacuiñajiji nijje mimiani jama ba'a: —Eyacuiñajiji, ecue Chii ai, eyaya miya bihuiaña noejo.

Noe ijja pojjiama' cuaa esejaya Emeshi Mese nei bihuia cani pea'ai jama ba'a: —Eyacuiñajiji, ecue Chii ai, eyaya miya bihuiaña jiquio bobijo, acuijajjajo, eso' cuanaajo, ebano'yojo cuanaya. E'e, miyaya ojjaña tii meesahuayonaje —jamaya acani ohuaya.

⁷ Jamajjeya ¡a'a esejaya eba'ejji, eseya sañaajo jashahuaba tiitiqijji! Esey eshe nequijo ca ca Jesosaja esohui jayojja jama caba'yahua. Mano'yaajo pea'ai eseya Jesosaa jaahuana caje'yo. Esey ojaya tii poaje'yo. ⁸ E'e, eshe nequiya eseyaya Emeshi Mese nei Jesosaja esohui jayojja aña. Mano'yo majje onijje ba'e tiitiije'yo. Jamajjeya eshe nequi, mano'yaajo pea'ai ohuaya eseya jaahuana cani; ese huooejaji poani tii tii oya. ⁹ Jesosa mano'yo majje shequi o'oyanaje ese jaahuanajji epojji. Jamajjeya ese eshe nequi, mano'yaajo pea'ai oya, Jesosa esejaya Emeshi Mese nei poani tii tii. ¹⁰ Jesosaja epeeji poani ojjaña eseya. Jamajjeya ¡apiojji acuaeya Jesosaja epeeji quea ja'a nee nijje jjamimicuijaja nobiajeacuiani so'o? Cuanaya epeeji quea ja'a nee poaniya, ¡apiojji miqüianaaya Jesosaja epeeji cuana niñebaña so'o? Oya Jesosaja epeeji pea'ai. ¡A'a pajea'yojji quijje eseya ojjaña nequije Eyacuiñajiji nequi cojja nei! Ohuaya huohui caje jama ba'a: —E'e jamaya, miyaya quea pame anaje —acaje'yo. Quea pame pojjeama añaajo ca ca pea nijje jama poaje ba'a: —Chojja, miya quea mimishi poanaje —acaje'yo Eyacuiñajiji.

¹¹ Eyacuiñajiji esohui etehue'yo jama poani ba'a:

“Eya Eyacuiñajiji eshe tii tii nequi. Jamajjeya e'e jojo nei ojjaña e cojja nei nequi majje, ecui'oshajjajo nequique majje eya bihuia caje jama ba'a: —Miyaya ca ca oe Eyacuiñajiji quea ca'a nee, quea pame nee enequi tii tii —ojjaña poaje”.

Jamaya esohui etehue'yo poani. ¹² Jamajjeya e'e jojo nei o cojja nei nequiajo, Eyacuiñajjiya eseya ojjaña huohui'ajja caje esejaya eba'e'yojjiyo. Quea ja'a ba'enajeya eseyaya oya saja'aje'yo quea bihui. Quea ja'a pojjeama ba'enajeya ca ca quea mete saja'aje'yo.

¡Ona quea mimishi po meejji a'a pojji!

¹³ E'e, Eyacuiñajjiyo quea pame nee chacoñaño ¡ojaya pea epeeji cuana a'a niñebajji! Chojja, ¡jama acue ba'a: —Jesosaja epeeji quea jashahuabaqui ja'a po jima ecuea eba'e'jji ba majje quea mimishi po chana'. Jamajjeya eyaya maya e'amajaji pojjeama oya quea mimishi, quea mete nee epo meejji pojjeama —jamaya pocue!

¹⁴ Eseyaya Emeshi Mese neiya eya ba meesahua canaje jama ba'a: Noe ma onaja ba'ehuanacui ecuiquaja e'ijjiayji nisho eseya ijjiayo, Eyacuiñajji ese nijje quea quene pojjeama poani. Pea bobi eseya ijjiayo, jamaya pea'ai poani. Jamatii Jesosaja epeeji beca cuana quea jashahuabaqui ja'a pishana jama poani ba'a: —Ma noe, bobi pea'ai eseya ijjiayo, Eyacuiñajji quea quene poaje ese nijje —jama posoya acanijo, ohuaya maya ijjiya jima ca'a cahua. E'e, jamaya jashahuabaquianijo ijjiya majje oya quea mimishi poani.

¹⁵ Miquianaya, noe ijjiayji cuana, jashahuabaquicue Jesosaja pea epeeji cuanajo, ma acuijajja oopana ijjiayjiyo! Jamajjeya miya noe ijjiayji ba majje ohuaya ijjiya pea'ai ca chana', mi jayojjaya poaje. Jamatii oya cuana quea mete jashahuabaqui jama ba'a: —¡Dee! Eyaya eshahuaja bobi ijjanaje. Eyacuiñajji enijje quea quene poaje —jamaya jashahuabaqui majje Jesosaja epeeji quea mimishi po chana'.

Jamajjaya jama acue ba'a: ¡Jesosaja pea epeeji cuana quea jea acue! Oya ca'a'ama; quea mimishi po o'oya mee chana'. Jesosa onajo mano'yonaje pea'ai. Jamajjeya ¡oya cuana jaahuanacue! ¹⁶ Miquianaya jashahuabaquiani pojja'a jama ba'a: —Eyaya jamaya ña, quea ja'a nee ña.

Jesosaja epeeji quea ja'a pojjeama jashahuabaquiani mi ba majje jama poani ba'a: —Chojja, jamaya quea mimishi, quea tai —poso acani.

Jamajjeya ohua jamaya huohui canijo, ja'a oe jamaya amajaji, jamatii miquianaya quea ja'a jashahuabaquiani! ¹⁷ Bobijo, e'ishijji pea'ajjo jashahuabaquianijo pojjeama eseya Eyacuiñajji yasijje, ojjaña huojjea'yojji poani yasijje poquije'yo. Chojja. Quea ja'a nee, quea bihui nee, quea bei nee pea'ai caba'yahua Edojjoshahua Pameya eseya ba'e meesahua canijo. ¹⁸ E'e, jamaya Jesosa Quito nijje ba'yanijo Eyacuiñajjiya eseya huohui caje jama ba'a: —E'e, jamaya quea pame.

Cuanaya ojjaña miyo huohui caje jama ba'a: —Oya Jesosa Quitoja epeeji quea ja'a nee nee poani —acaje.

¹⁹ Jamajjeya jashahuaba tiitiquicue ojjaña Jesosaja epeeji cuana nijje quea bei nee eba'e'jji! ¡Pea Jesosaja epeeji cuana quea ja'a po meesahuacue pea'ai! ²⁰ ¡A'a noe ijjiayji ecuiquaja e'ijjiayji nisho onaja ba'ehuana ba'e! Quea mete oya cuana poaje. Eyacuiñajji onijje quea quene poani posojo ma bobijo onaya quea mete poanijo, ja'a ijjiya majajji! Jamatii Eyacuiñajjiya pana ojjaña bobi quea pame. Jamatii ma bobi miya ijjiayo onaya quea mete po mee chana', quea mimishi po o'oya mee chana'. ²¹ E'e, e'e pojja'a Jesosaja pea epeeji quea mimishi poaje miyaya ma bobi ijjiña, acuijajja na biso nei pojja'a ishiana ba majje. E'e pojja'a mi ba majjeya ohuaya quea mimishi acaje o'oya. Jamajjeya ja'a jamaya amajaji! Oya quea mimishi po o'oya chana'. ²² Jamajjeya ja'a Jesosaja pea epeeji cuana nijje jjamimicuijaje nobiajeaquijji bobi cuanajo, eba'e meejji cuanajo pea'ai! ¡Jashahuaba neineiqui majje quea pame nee nee acue! ¡Jesosaja epeeji cuana quea pame amesahuacue pea'ai! Jamaya poanijo ojjaña Jesosaja epeeji quea bihui nee capoahua. Jesosaja epeeji quea mimishi po mee cani o ba majje ca ca cajjashahuabaquiahua jama ba'a: —Chojja, eya ona mimishi pomeejji poani. Jamaya eya quea tai poani.

²³ E'e pojja'a Jesosaja epeeji jashahuabaquiani jama ba'a: —E'e pojja'a jiquio bobi eya ijjiñaño, Eyacuiñajji enijje quea quene poaje —poani. Jamajjeya jamatii ijjiya cajo, Eyacuiñajji onijje quea quene poaje.

E'e, jashahuaba neineiquicue Eyacuiñajjiya esohui jayojja jama yayji! Eba'e quea mimishi miqnea eba. Jamajjeya ja'a jamaya ajji! ¡E'e jojo nei quea pame nee pocue!

15

¡Jesosaja epeeji cuana quea jashahuabaqui ja'a ejjapo meeqji!

¹ E'e, ecuana quea jashahuabaqui ja'a, Eyacuiñajjiya esohui ba neineiaña. Beca cuana cho, quea jashahuabaqui ja'a pishana. Ona nijje ja'a quea quene pojji! ¡A'a jashahuabaquijji jama ba'a: —Eyaya ca eya ojjaña bobi ijjiaye, jamatii onaaya eya quea mimishi poani poso acani —a'a jamaya pojji!

² Chojja, ¡Jesosaja epeeji ca'a'ama nijje a'a jjamimicuijaje nobiajeaquijji bobijo! ¡Oya cuana quea bei po meesahuacue miqnea ojjaña bobi ijjiya jjimahuajo! E'e, ¡Jesosa nijje jipapee

neinei sahuameequicue! ³ Jamajjeya ¡Jesosa jama ba'ecue, miquea ejjashahuabaquijji jayojja jama pojjeama! Ohuaya oja chii jama acanaje ba'a: —Ecuea ejjashahuabaquijji jayojja jama a sa po ajja. Chojja ecue chii, eyaya miquea ejjashahuabaquijji ejo jama a sa aña.

Yahuajo nei onaaya Jesosaja esohui tehue ca poa jama ba'a:

“Ecue Chii, eya miquea ejjashahuabaquijji jayojja jama poanijo, deja cuaa miya niñeba cani, eya pea'ai niñeba cani quea tai nee”.

Jamaya esohui yahuajo nei etehue'yo poa.

⁴ Eyacuiñajjiya ojjaña ojaya esohui yahuajo tehue mee ca poa eseya ojaya epeeji quea ja'a epo meesahuajji. Ma esohui etehue'yojo eseyaya baña onaa napa cajje ona nijje mimijaji ajja, eseya. Ma esohuijo pea'ai eseyaya baña Jesosa nijje jjapee neineiquianijo quijje ba'e tiitijje'yo onijje eyajo. ⁵ E'e, Eyacuiñajjiya eseya ba'e meesahua cani ojaya epeeji nei. Onaa napa cajje jjapeequi pajea'yo ajja. Jamajjeya eya onijje mimiani miquianajo jama ba'a: —Ecue Chii, ¡miqua epeeji cuana Shomajo ba'e ojee jjapeequi meesahuacue; Jesosaja esohui jama amesahuacue! —eya poani.

⁶ Jesosa nijje ojee jjapeequianijo miquianaaya ojee Eyacuiñajji bihuiaña sohuicuayanijo, esejaya Emeshi Mese nei Jesosa Quitoja Chii miquianaaya bihuiaña jama ba'a: —Eyacuiñajji, miya ca ca oe quea pame nee, quea ca'a nee. Pea chama' mi jayojja —jamaya miquianaya poaje'yo tii tii.

¡Pea cuana nijje quea ja'a jjapeequicue!

⁷ Jamajjeya ¡Jesosa Quitohua miquianaya quea jea acani jayojja jama ojaya epeeji cuana quea jea nee acue! Jamajjeya pea cuaa jama acaje ba'a: —E'e, Eyacuiñajji quea pame nee nee. Ojaya epeeji cuaa onaya quea jea nee acani.

⁸ Yahuajo nei Eyacuiñajjiya ecuanaja etiiquiana huohui ca poa jama ba'a: “Eyaya miquiana huasijje huoojeaje ojjaña jaahuanajji” poa. Jamajjeya Jesosa Quito huoojea nei canaje ojaya yahuajo ehuoojeapano poa jojoya. Jamajjeya eseya ba' mee canaje Eyacuiñajjiya ohua aca poa esohui jayojjaya e'e jojo nei acani. ⁹ Oya Jesosa poeyanaje Jodio pojjeama cuana Eyacuiñajji bihuia meeya pea'ai, jama po meeya pea'ai ba'a:

“Eyacuiñajji, miya quea pame nee nee, quea ca'a nee nee. Ecuanaja mimishi cuanajo ¡jjashahuaba tiitiqui ajja. Cuijea'yo majje quea bei ecuanaja nijje poani”.

Yahuajo nei Eyacuiñajjiya Dabi tehue mee ca poa oja sohui jama ba'a:

“Jamajjeya eyaya Jodio pojjeama cuana nijjeya miya bihuiaje. Sohuicuaya majje miya bihuiaje”.

Jamaya yahuajo nei nei poa. ¹⁰ Yahuajo nei tehue mee ca poa jama pea'ai ba'a:

“Jodio pojjeama cuana, ¡Jodio cuana nijjeya Eyacuiñajji bihuiaque! ¡Quea bihui nee nee pocue!”

¹¹ Jamaya tehue mee ca poa pea'ai ba'a:

“Jodio pojjeama cuana, ¡Eyacuiñajji bihuiaque! E'e, ¡ojjaña cuaa Eyacuiñajji bihuiaque, sohuicuayacue jama ba'a: —Eyacuiñajji, miya quea pame nee —jamaya acue!”

Jamaya aca poa. ¹² Eyacuiñajjiya Isaia tehue mee ca poa jama ba'a:

“Quijje nei nei Isaija osecua cuayaje. Oya ona huoojea'yojji poaje'yo. Ohuaya Jodio pojjeama pea'ai mimishi cuijea'yo majje ba' mee cajje'yo, onijje ba'e tiitii mee cajje'yo”.

E'e, jamaya yahuajo nei Isaia tehue mee ca poa Jesosajo. ¹³ Jamajjeya Eyacuiñajjiya eseya ba' meesahua cani jama ba'a: Quijje ohuaya eseya ba'e tiitii mee cajje'yo eyajo onijje. Eya Eyacuiñajji nijje mimi majamajani miquianajo jama ba'a: —Eyacuiñajji, ¡miqua epeeji cuana Shomajo ba'e quea bihui nee po meecue! ¡Minijje jjapeequianijo quea ja'a nee jjashahuabaqui meesahuacue! —eyaya aña.

Edojjoshahua Pame miquiana nijje nequi. Oya quea ca'a nee nee. Miya ba meesahua cani miquiana quijje Eyacuiñajji nijje ba'e tiitijje'yo eyajo.

Pabohua Shomano cuana Jodio pojjeama cuana baqui sa acani

¹⁴ E'e ecuea epeeji cuana, eya ca ca iña miquianajo jjashahuabaquiani jama ba'a: Miquianaya Jesosaja epeeji quea pame nee. Miquianajaya eba nei nei Eyacuiñajjiya esohui e'e nei Jesosajo. Ma esohui huohui huicha'a huicha'aña. Pea cuana quea ja'a nee jjapeequi meesahuaña Jesosa nijje, miquianaaya. ¹⁵ Jamatii Eyacuiñajjiya eya huohui canaje jayojja jama eyaya miquiana huasijje oja sohui tehenaje. Beca ejjashahuabaquijji quea ja'a nee nee tehenaje mi ¡jabahuejjaqui meejji, miquianajaya epajea'yojji pojjeama.

¹⁶ E'e, Eyacuiñajjiya eya huoojea canaje Jodio pojjeama huasijje ojaya esohui huohuiya, Jesosajo ehuohuijji. Jiquio ecua yahuajo nei Eyacuiñajji nijje emimijji Jodio huasijje Eyacuiñajjiya esohui aca poa jayojja jama eyaya ojaya esohui Jesosajo cahuohuahua miquiana que, Jodio pojjeama huasijje Jesosa nijje ejjapeequi meesahuajji. Jesosa nijje

jjapeequianijo, Eyacuiñajiji miqiuana nijje quea bihui nee poani, Edojjoshahua Pameya pea jashahuabaquime po mee ca'yanijo.

¹⁷ Jamajjeya eya quea bihui nee poani. Jesosa Quitohua eya Jodio pojjeama cuana huasijje Eyacuiñajijija esohui huohui meesahua cajje ojaya epeeji cuana poanaje. ¹⁸ Jiquio ca ca oe eyaya miqiuana quea quea bihui huohuiaña jama ba'a: Jesosa Quitohua Jodio pojjeama quea pame ba'e meesahua cani Eyacuiñajijija esohui jama ojaya epeeji nei epojji. Ohuaya jamaya acanaje eya ojaya esohui huohuijiji poanijojo. E'e, Jesosaa eya ameesahua canaje, huohui meesahua canaje pea'ai jama ba'a: ¹⁹ Eya Edojjoshahua Pameya ma dejjaa ajjima acani ameesahua canaje. Jamaya eya esohui huohui meesahua canaje quea ja'a nee Jenosanena huasijje, quea huesha nee pea'ai, johuaam Ininico huasijje pea'ai eyaya ojjaña Eyacuiñajijija esohui quea pame nee Jesosajo huohui neinei poquia poa. ²⁰ Jamaya eyaya esohui huohui sa ña pea cuana huasijje, onaja sohuihuohuiqui jjima huasijje. E'e, jiquio esohui quea pame Jesosajo shajja'ajja jjima cuana huasijje eyaya ma esohui huohui sa ña.

²¹ E'e, yahuajo nei Eyacuiñajijija esohui etehue'yo jama aca poa ba'a: "Ojjaña yahuajo shajja'ajja jjimaa Eyacuiñajijija huojea'yo ojjaña jaahuanajijijo shajja'ajja cajje. Ojjaña joya o ba pojjimaa oya ba cajje". E'e, jamaya eyaya a sa ña, Eyacuiñajijija esohui etehue'yo yahuajo jama.

Pabo Shoma huasijje poqui sa poani Jesosaja epeeji cuana baa

²² Yahuajo eya quea huiso poqui sa poa Shoma huasijje miqiuana baa. Jjeya pea'ai eya poqui sa poani. Quea huiso pea cuana huasijje esohui huohui poequi jjejojo mi poquinaje. ²³ Jjeya ca ca eya apoa. Ojjaña cuiñajiji yasijje jiquiojo esohui huohuijeyonaje. Jamajjeya ma ecua eya yahuajo jashahuabaquinaje jamaya eyaya jjeyahua nei aje. ²⁴ Eya poqui sa poani España meshi yasijje esohui huohuiya. Jamajjeya España meshi yasijje poquijeya eyaya miqiuana banana. Shomajo anije beca cahuime pojja'a. Quea bihui nee nee eya poaje miqiuana nijje nequinana majje. Miqiuana nijje mimi majje eya poquije España meshi yasijje. E'e pojja'a miqiuanaaya eya aquiana quiaje epoqui meesahuajji pojja'a. ²⁵ Miqiuana huasijje poqui jjimahuaya eya poquije so'o Jenosanena huasijje Jesosaja epeeji aema huasijje ejjesheji quiaa, Jodio cuana huasijje. ²⁶ Ma ejjesheji Jesosaja epeeji cuana Masenonia meshijo ba'eya, Asia meshijo ba'eya pea'aiya chicha canaje Jesosaja epeeji aema' ba'e meesahuajji. Jamaya oya cuana a sa poanaje. Oya Jodio pojjeama poani. ²⁷ Jamatiji quea bihui nee quia canaje. E'e, ohuaya ejjesheji caquia cahua Jesosaja epeeji Jodio cuana ba'e meesahuajji. E'e, Eyacuiñajijija Jodio cuana iyaa coo ca poa ojaya epeeji epojji. Majoya Jodio cuaa Eyacuiñajijija esohui quea pame nee Jesosajo Jodio pojjeama cuana huohui cajje Jesosa nijje jjapeequinaje. Jamajjeya Jodio pojjeama cuaa Jodio cuana huasijje eba'e meeji cahuojea cahua, Jesosaja epeeji cuaa. ²⁸ Jamajjeya Jenosanena huasijje poqui majje, ma ejjesheji quia majje eya poquije España meshi yasijje. Poquijeya eyaya miqiuana banana. ²⁹ Miqiuana banana majje quea bihui nee nee poaje. Ojee jjapeequianijo, Jesosaja esohuijo eseya quea bihui nee poaje'yo.

³⁰ Epeeji cuana, esejaya Emeshi Mese nei Jesosa nijje jjapeequianijo, Edojjoshahua Pameya eya miqiuanaaya quea jea ameesahua canijo, ¡Eyacuiñajiji nijje mimicue ojo! ¡Jama acue ba'a: —Eyacuiñajiji, Pabo miquea esohui huohui canijo quea camaja nee nee. ¡Oya jaahuana neineicue! ³¹ Jamajjeya ¡Jesosaja epeeji pojjeama cuaa Jenosanenajo ba'eya oya enapajji pojjeama! ¡Miquea epeeji jomajo ba'e quea bihui nee ejjesheji jjeshe meesahuacue ma Pabohua ye cani! —jama oe miqiuanaaya acue Eyacuiñajiji nijje mimi majje!

³² E'e pojja'a Eyacuiñajijija eya miqiuana que huoojea cajje. Ohuaya eseya quea bihui nee jjapeequi meesahua cajje quea pame nee.

³³ Eyacuiñajijija eseya quea bei ba'e meesahua cani. ¡Ohuaya miqiuanaaya cajaanahua cahua! ¡Jamaya capoahua!

16

Pabohua Jesosaja epeeji cuana huasijje tehue canaje quea bihui o pojji

¹ Ecuanaaya epeeji epona Peme bajjani Jesosa nijje chacochoacoani Senesea cuiñajijijo. Oya Jesosaja epeeji quea pame nee. Jesosaja pea epeeji cuana jaahuana cani. ² Miqiuana que poquiyajo, ¡oya huohuicue jama ba'a: —Mi poeyajo ecua quea bihui nee —acue!

Ohuaya eya ba'e meesahua cani, pea Jesosaja epeeji cuana pea'ai ba'e meesahua cani quea huiso nee. Jamajjeya miqiuanaaya Jesosaja epeeji poani pea'aijo ¡oya ja'ajjequicue! ¡Oya aquiana quiacue eba'e'ejji! ³ Pisina pea'ai, oja yahue Aquiana pea'ai miqiuana nijje ba'e. Oya huohui'ajjacue jama ba'a: —¿Achajja acuae quiana so'o? —ecuea ebajji.

Oya cuana enijje chacochoaconaje. Jesosaja esohui huohui sahua canaje. ⁴ E'e, eyaya Jesosaja esohui huohuiañajo, pea cuaa cuia'ajja canaje. Pisina, Aquina pea'ai ca ca e

nahuejo beshahua nei cuia canaje cuaa. Jamajjeya eyaya, Pabohua Jesosaja epeeji Jodio pojjeama cuana nijjeya oya huohuiaña jama ba'a: —E'e, jamaya miquianaya quea pame nee nee poanaje —ecuaaya anaje.

⁵ Ojjaña Jesosaja epeeji cuana ma Pisinaja equijo jjachichaquiani eyaya huohui'ajjaña jama ba'a: —¿Achajja acuae quiana ani so'o? —ecuanaja ebajji.

Jamaya acue pea'ai ecuea epeeji Epeneto bajjani. Asia meshijo ba'ya poa oya. Ecuea esohui Jesosajo shajja'ajja majje oya ebionei Jesosaja epeeji poanaje jomajo Asia meshijo ba'yahua. ⁶ Mania pea'ai quea huiso chacochoconaje miquiana nijje. ¡Oya ecuea esohui huohuicue quea bihui nee o pojji! ⁷ ¡Oya jayojjaya mimicue Anidonico nijje, Jonia pea'ai nijje! Oya Jodio cuana, ecuea huapa pojjeama cuana. Oya enijje ejeanobia jaanaje. Jesosaja epeeji quea pame nee oya poa, Jesosaja huoojea'yo esohui huohuijji. E Jesosa nijje jjapeequi jjimahuajo oya cuana jjapeequia poa. ⁸ ¡Oya jayojjaya mimicue Amepia nijje pea'ai! Oya Emeshi Mese nei Jesosaja epeeji nei. Jamajjeya: —¿Achajja ami ani so'o, ecuea epeeji? —acue oya, ecuea ebajji.

⁹ ¡Oya jayojja mimicue Omano nijje, ma ecuaña nijje Jesosa Quito nijje chacochoconaje! ¡Etaqui pea'ai, ¹⁰ Apene pea'ai jama acue! Oya Emeshi Mese nei nijje chacochoconajo quea nee poanaje quea huiso. Ecuanaja eba oya Jesosaja epeeji quea ca'a nee. ¡Ojjaña Anisitojia huapa pojjeama cuana ecuea esohui huohuicue pea'ai quea bihui nee o pojji! ¹¹ ¡Jodio deja Jenonio bajjani jama acue! Oya huapa pojjeama pea'ai poani. ¡Oya Nasiso, Nasisoja huapa pojjeama ecuea esohui huohuicue pea'ai, Jesosa nijje jjapeequianijo! ¹² ¡Tipena, Tiposa oya jayojjaya huohuicue! Ma epona cuana Emeshi Mese neijo, Jesosajo quea huiso chacochoconaje. Epona Pesina bajjani pea'ai Emeshi Mese neijo janobajjima nei chacochoconaje. ¡Oya pea'ai ecuea esohui huohuicue, ecuea epeeji nei oya! ¹³ ¡Jamaya mimicue Shopo nijje, ojaya enaese nijje pea'ai! Ojjaña eba Jesosaa, Emeshi Mese neiya Shopo babaca canaje ojaya esohui huohuijji. Ojaya enaeseya eya jaahuana canaje ecuea enaeseya jayojjaya. ¹⁴ Jamajjeya oya jayojjaya huohuicue ejo Jesosaja pea epeeji cuana nijje pea'ai, ma bajjani cuana nijje ba'a: Asinisito, Peconete, Jemesi, Patomasi, Jemase pea'ai. ¡Ojjaña Jesosaja epeeji onijje nequica pea'ai jamaya acue! ¹⁵ ¡Ecuea esohui quea bihui nee o pojji huohuicue Pionoco, Joña, Neneo, oja jjo'i pea'ai, Onipa pea'ai ojjaña Jesosaja epeeji cuana onijje nequica pea'ai huohuicue!

¹⁶ E'e, miquianaya jjachichaqui majje ¡pea cuana nijje quea bihui nee mimicue jama ba'a: —¿Achajja ami ani so'o, epeeji? —acue!

E'e, ojjaña Jesosaja epeeji cuaa jiquiojo enijje nequiya miquianaya Shomajo ba'e quea bihui nee acani jama ba'a: —¿Achajja acuae quiana ani so'o? —acani ojaya ebajji.

Mahuiso.

Pabohua pea esohui quea ja'a nee eba'e meeji huohui cani

¹⁷ Ecuea epeeji cuana, eyaya miquiana cuana pea esohui tehueña jama ba'a: Beca cuaa miquiana nijje nequiya Jesosaja epeeji cuana pea epeeji cuana nijje jjamimicuiajea nobiajea meequi cani. Pea esohui e'e nei pojjeama Jesosa Quitojo huohui cani pea'ai, ecuanaja esohui jayojja jama pojjeama. Ecuaaya ca ca e'e nei esohui huohuiaña. ¡A'a oya cuana shajja'ajjajji! ¡A'a jja oe onijje jjapeequijji! ¹⁸ Ma sijjepojji cuana esejaya Emeshi Mese neijo Jesosajo chaco ajja. Chojja. Oya cuana esohui huohuijji nisho. Ojaya ejjashahuabaquijji quea quehua jayojja jama acani. Mimiani esohui quea pame jayojja. Jamatii quea tai. Sijaje poani. Jama poani ba'a: —E'e, eya miquianajaya epeeji; miquianaya quea pame nee ecuea epeeji —anisho cani. Jamaya Jesosaja epeeji quea jjashahuabaqui ja'a pishana dasia cani.

¹⁹ Ojjaña Jesosaja epeeji cuaa shajja'ajja canaje miquianaya Shomajo ba'e Eyacuiñajjia esohui jayojjaya ba'lyani. Jamajjeya eya miquianajo quea bihui nee. ¡Quea ja'a nee jjashahuabaquicue quea pame nee eba'ejji! ¡Ma esohui huohuijji nishoja esohui e'e nei pojjeama a'a shajja'ajjajji! ¡A'a jamaya pojji! ²⁰ E'e, Eyacuiñajjia eseya quea bei ba'e meesahua cani, quea ja'a jjashahuabaqui meesahua cani jjea nei. Ohuaya miquianaya Edosisujanaja epeeji mimicuiajejanobiajea meesahua caj'e'yo. Miquianaya ojaya edasia'yojji pojjeama. E'e, ¡Jesosa Quitoja esejaya Emeshi Mese neiya miquianaya cajaanahuana cahua!

²¹ Timoteo enijje chacochoconani Jesosa Quito nijje. Ohuaya pea'ai miquianaya jama huohui'ajjame acani ba'a: —¿Achajja acuae quiana so'o? —acani.

Ecuea huapa pojjeama Jodio deja cuana Nosio, Jasoni, Sosipate pea'aiya jama huohui'ajjame acani ba'a: —¿Achajja acuae quiana ani so'o? —acani pea'ai.

²²⁻²⁴ Cayo pea'ai oya jayojjaya miquiana nijje mimiani. Eya oja equijo ba'e. Ojaya equijo Jesosaja epeeji cuana ojee jjachichaquiani Eyacuiñajjia esohui baa. Enasitohua, pea epeeji Cuanito bajjaniya pea'aiya huohui'ajja mee cani jama ba'a: —Epeeji cuana,

¿achajja acuae quiana ani so'o? —acani. Oya Enasito ejjeshejji cuiñajji poani, ma Conitio dejja etiiya chicha mee cani ejjeshejji.

Eya ca iña Jesusaja epeejji Tesio bajjani. Eyaya Paboya esohui miqiana que tehueaña ojo. Eyaya miqianaya huohuaña jama ba'a: —Miqianaya Jesosa Quitoja epeejji, esejaya Emeshi Mese neija epeejji poanijo, ohuaya miqianaya quea pame nee cajaanahua cahua. E'e, jamaya capohua —jamaya Pabohua eya tehue mee cani.

Eyacuiñajji bihua cani Pabohua

²⁵ Eyacuiñajji ejjabihuaqui jama ba'a: —Eyacuiñajji, miya quea pame nee, quea ca'a nee nee. Miquea esohui jayojja jama ba'e meeaña ecuanaya. Eyacuiñajji, miyaya eya huohui meesahuaña esohui quea pame nee Jesosa Quitojo. Ba meesahuaña Jesosa Quito ca ca oe mimishi cuijea'yojji poani ojjañaja. Maya yahuaajo ecuanaja etiiquianaja ba jjima poa. ²⁶ Jodio esohui huohuijji yahuaajo nei ba'ya poaa Jesusajo huohui ca poa quea ja'a pishana, ojaya ba jjima pishanajo. Jjeya ca ca ma esohui e'e nei miyaya ba meesahuaña quea ja'a nee.

—E'e Eyacuiñajji, miya ba'e tiitiiani. Miya ca ca oeya ojjaña cuana ojjaña meshijo ba'e ba meesahuaña esohui e'e nei Jesusaja. Ma esohui quea pame jayojja jama ameesahuaña pea'ai. Jamaya ojjañaja eba poaje.

²⁷ —E'e Eyacuiñajji, miya oe nei Eyacuiñajji, pea chama'. Ojjaña ca ca oe miquea eba, miquea nei. Ecuaña Jesusaja epeejji poanijo ecuanajaya eba miya quea pame nee nee, quea ca'a nee poani tii tii. Jamaya capohua —jamaya ejjabihuaqui Eyacuiñajji.

Eya Pabo bajjani. Mahuiso ecuea esohui miqiana Shoma cuiñajjijo ba'e yasijje tehue meeaña. Apoa.

PABOJA ETEHUE'YO CONITOJO BA'E CUANA HUASIJJE EBIONEI 1 CORINTIOS

Pabohua tehue canaje Jesosaja epeeji cuana Conitojo ba'e yasijje

¹ Jesosaja epeeji cuana, eya Pabo, Jesosa Quitoja huoojea'yo ojaya esohui huohuijji. Jamaya Eyacuiñajjiya a sa acani. Jesosaja epeeji Sotene enijje nequi. ² Eyaya tehueña miquiana huasijje, Jesosaja epeeji cuana Conito cuiñajjiyo ba'eca huasijje, ojjaña meshijo ba'eca huasijje pea'ai tehueña. E'e, yahuajo Eyacuiñajjiya miquianaya ojjaña babaca canaje Jesosaja epeeji e'e jojo nei epo'yoyji, quea pame nee. Jamajjeya miquianaya ojjaña cuana jama poani ba'a: —Jesosa, ¡e jaahuanajji pocue! —Jamaya poani esejaya Emeshi Mese nei Jesosa Quito nijje, ojjaña esejaya Emeshi Mese nei nijje. ³ ¡Esejaya Emeshi Mese nei Jesosa Quitohua, Eyacuiñajjiya esejaya Chiya pea'ai miquianaya cajaanahua cahua, quea bei caba'e mee cahua pea'ai!

Pabohua Eyacuiñajji bihuia canaje

⁴ Eya Eyacuiñajji nijje mimiani miquianajo quea huiso nee jama ba'a: —Eyacuiñajji, miya quea pame nee nee. Jesosa Quitoja epeeji ojjaña cuana jaahuanaña quea pame nee nee —eya poani.

⁵ E'e epeeji cuana, miquianaya Jesosa Quitoja epeeji poanijo, ohuaya miquianaya quea pame nee ameesahua cani tii, quea huiso nee. Jamajjeya miquianaya ojaya ej-jashahuabaquijji ba meesahua canaje quea ja'a nee. Ojaya esohui ba meesahua canaje, huohui meesahua canaje pea'ai. ⁶ Esohui quea pame nee Jesosa Quitoja eyaya miquianaya huohui huicha'a huicha'anaje yahuajo. Jamajjeya ojaya esohui jayoyja jama miquianaya atitiña. ⁷ Jamajjeya esejaya Emeshi Mese nei Jesosa Quitoja epoe o'oyajjiyo ishooñajo, o jayoyjaya jama Edojjoshahua Pameya miquianaya ameesahua cani quea huiso. ⁸ E'e, Edojjoshahua Pameya miquianaya Jesosa jayoyja jama amee canijo, Jesosa nijje japeequi pajea'yo ajja. Jamajjeya esejaya Emeshi Mese nei poe o'oyajo, Eyacuiñajjiya miquianaya ba caje mimishi'ama. ⁹ E'e, Eyacuiñajjiya miquianaya babaca canaje ojaya Ebacua Ejja nijje, Jesosa Quito nijje ejjapeequijji tii, esejaya Emeshi Mese nei nijje. Eyacuiñajjiya ojaya esohui jayoyja jama acaje'yo nei nei, e'e jojo nei; miquianaya Jesosaja epeeji quea ca'a nee po mee caje'yo tii tii.

Ojaya epeeji cuana ojee cajjapeequi'yahua Jesosa nijje

¹⁰⁻¹¹ Ecuea epeeji cuana, Jesosa Quitoja epeeji Coeja huapa pojjeama poeyanaje e que. Enijje miminaje miquianajo jama ba'a: —Pabo, Jesosa Quitoja epeeji cuana Conitojo ba'e jjamimicuijaje nobiajeaquiani quea huiso nee —poanaje.

Epeeji cuana, ¿apiojji acuae nequiana jjamimicuijaje nobiajeaquiani so'o? Jamaya miquianaya quea tai poani.

Jamajjeya ¡shajja'ajjacue mo! Enejaya Emeshi Mese neiya Jesosa Quitohua eya huoojea canaje ojaya esohui huohuiya. Jamajjeya eyaya miquianaya huohuiña jama ba'a: Ojjaña miquianaya Jesosa Quitoja epeeji poanijo ¡ojjaña ojaya ejjashahuabaquijji jayoyja jama jashahuabaquicue! ¡A'a jjamimicuijaje nobiajeaquijji! ¡A'a peapea ejjashahuabaquijji ajji! E'e, ¡ojee japeequicue quea bei nee Jesosa nijje! ¹² Miquianaya aje oe besa cuana jama poani ba'a: —Eya ca iña Pabo shajja'ajjajji poani.

Pea ca jama poani ba'a: —Eya ca iña Apono shajja'ajjajji.

Pea ca jama poani ba'a: —Eya ca iña Peno shajja'ajjajji.

Pea ca jama poani ba'a: —Eya ca iña Jesosa Quito shajja'ajjajji poani —nequiana poani, de.

¹³ ¿Apiojji acuae nequiana jamaya jjamimicuijaje nobiajeaquime poani so'o? ¿A'a Jesosa ojjaña mimishi cuijea'yoyji pojjeama? ¿A'a ojjaña jaahuanajji pojjeama? E'e, oya ojjaña ojaya epeeji cuanaja mimishi cuijea'yoyji, ese jaahuanajji oe nei poani tii tii. Eya pojjeama miquianaja mimishijo manoje'yo. Jesosa Quito ca ca oe miquianajo mano'yonaje acui ecueata'apejo miquianajaya mimishi cuijea'yoyji. Onaaya miquianaya besa mee canaje Jesosa nijje japeequianijo, enijje japeequianijo pojjeama. ¹⁴ Jamajjeya eya, Pabo quea bihui poani ecuea miquianaya besa mee jjimajo. Jesosaja epeeji cuana oe poji eyaya besa meenaje Quipo, Mayo pea'ai. ¹⁵ E'e, eyaya oe poji besa meenajejo, ejjamimicuijaje nobiajeaquijji pojjeama pea cuana nijje jama ba'a: —Pabohua ecua besa mee canaje o shajja'ajjajji epojji —e'ajji pojjeama.

E'e, eyaya miquianaya besa meenaje ecuea epeeji epojji pojjeama.

¹⁶ E'e pojja'a eyaya Etepana, ojaya huapaa pojjeama cuana pea'ai besa meenaje. Oe pojji pea cuana besa meenaje pea'ai pojja'a. Cua'a de, pajea'yona je eyaya. ¹⁷ Jesosa Quitoja eya huoojea jjima ojaya epeeji cuana besa meeya. Chojja, ohuaya eya huoojea canaje ojaya esohui quea pame nee huohuiya jama ba'a: —Ecuea esohui quea pame nee huohuiañajo, jeya acui ecueata'apeejo mano'yona je o huohucue! ¡A'a dejjaa ejjashahuabaquiji jayojja jama huohuiji, ma ojaya ejjashahuabaquiji quea ja'a poso acanija! Jamaya ehuhui'yo jojjemo, miya quea sohui ja'a jojjemo ojjaña mi bihuiaiji pome. Jamajjeya jamaya ehuhui jojjemo Eyacuiñajji bihuia jjima acame. “Jesosa Quito acui ecueata'apeejo mano'yona je ecuanaja mimishi cuijea'yojji” ajjima acame onaaya —jamaya Jesosaa eya huohui cani.

Eyacuiñajji ejjashahuabaquiji esejaya ejjashahuabaquiji jayojja jama pojjeama

¹⁸ Eyacuiñajji esohui quea pame nee Jesosajo, oya mano'yona je esejaya mimishijo shajja'ajja majje shajjama' cuana jama poanaje ba'a: —Cajaa Jesosaja esohui, ma oya ojjañaja mimishi cuijea'yojji poani; acui ecueata'apeejo mano'yona je cajaa pea'ai —poanaje. Maya Eyacuiñajjiya quijje quea nee nee po mee caje'yo.

Eseya, Jesosaja epeeji cuana ca ca Eyacuiñajjiya ba'e tiitii mee caje'yo. E'e, oja sohui shajja'ajja majje eseya jama poani ba'a: —Eyacuiñajji quea ca'a nee neeya eseya ba'e tiitii mee caje'yo onijje; oja Bacua Eja Jesosa acui ecueata'apeejo mano'yona je esejaya mimishi cuijea'yojji —poani.

¹⁹ E'e, yahua jo nei Eyacuiñajjiya Isaia tehue mee ca poa jama ba'a: “Beca cuana jama poani ba'a: —Ecuea eba ojjaña —poani. O shajja'ajjajji poaniya pea'ai jama acani ba'a: —E'e de, ojjaña ojaya eba! —poso acani. Ojjaña ojaya eba poso acani. Eyaya ca ca ojjaña cuana ba meeje ojaya eba oe pojji nei”.

Jamaya Eyacuiñajjiya yahua jo nei Isaia tehue mee ca poa. ²⁰ E'e, Eyacuiñajji ese jayojja jama jjashahuabaqui ajja. Ojjaña ba epo poso ohuaya ba cani quea sapa ca'a. E'e, dejja quea huiso esohui bajji, esohui huohuiji cuana, joya dejja cuanaja ejjashahuabaquiji mimiciajeanobiajea cani pea'ai quea huiso ba epo poso Eyacuiñajjiya esohui Jesosajo jjabahuejjaqui mee ajja jama ba'a: Eyacuiñajjiya eseya ba cani emimishi cuijea'yo Jesosa nijje jjapeequianijo ma dejja cuanajaya ba jjima. Yajja jjabahuejjaqui meeme yajji, quea huiso ba epo poso oya jjabaquiani.

²¹ Eyacuiñajjiya ejjashahuabaquiji quea ja'a poanijo ohuaya eseya ba'e tiitii mee caje onijje, Jesosa nijje jjapeequianijo, ojaya esohui shajja'ajja poquiañajo pea'ai. Ohuaya eya esohui quea pame nee Jesosajo huohui mee canaje. Jamatii ojjaña quea jjashahuabaqui quehua jama poani ba'a: —¿Yajja yajji joya miqianaaya huohuiaña Jesosa mano'yona je esejo, esejaya mimishi cuijea'yojji? Quea jjashahuabaqui quehua miya poani, de —jamaya Jesosaja epeeji pojjeama poani.

²² E'e de, ecuaña Jodio cuaa jama acani ba'a: —¡Eyacuiñajjiya jayojja acue, ma dejjaa ajjima acani! Majoya ecuaaya miya baje e'e jojo nei Eyacuiñajjiya huoojea'yo ojaya esohui huohuiji —jamaya quea tai poani Jodio cuana.

—¡Esohui huohuiji quea huiso ba epo jayojja jama mimicue! Jamajjeya ecuaaya miya baje Eyacuiñajjiya huoojea'yo esohui huohuiji —jamaya quea tai poani Jodio pojjeama cuana.

²³ Ecuana ya ca ca jama poani ba'a: —Jesosa Quito Eyacuiñajjiya huoojea'yo ojjaña jaahuanajji acui ecueata'apeejo mano'yona je esejaya mimishi cuijea'yojji.

Jesosa Quitoja esohui shajja'ajja sa po ajja jjejojo Jodio cuana quea quene poani, poquiuehuani tii onijje jjapeequi ajja jjejojo. Jodio pojjeama cuaa pea'ai esohui cajaa acani: —Chojja Pabo, miyaya esohui quea ja'a pojjeama huohuiaña —jama siajje pomeya onaya poani.

²⁴ Jamatii Eyacuiñajjiya Jodio cuana, Jodio pojjeama cuana pea'ai babaca canaje Jesosa Quitoja epeeji nei epo'yojji. Eseyaya, Jesosa Quitoja epeeji cuanaja eba Jesosa Quitoja esohui quea pame nee. E'e, Eyacuiñajjiya Jesosa huoojea canaje mimishi cuijea'yojji. Jamajjeya esejaya eba Eyacuiñajji quea ca'a nee nee, ojjaña ojaya eba. ²⁵ E'e, Eyacuiñajji quea jjashahuabaqui ja'a nee nee. Ojjaña nei nei ojaya eba. Oya quea ca'a nee nee; pea chama' o jayojja. Jamajjeya ohuaya eseya ba'e tiitii mee caje'yo Jesosa Quito acui ecueata'apeejo esejaya mimishijo mano'yona je. Jamatii Jesosaja epeeji pojjeama aje oe jama poani ba'a: —¿Yajja poajo acuae Eyacuiñajjiya ecuanaja mimishi cuijea ca'yome Jesosa mano'ya poajo? Chojja —acani quea quehua jjashahuabaquiani jjejojo.

Eyacuiñajjiya eseya babaca canaje ojaya epeeji epojji jamatii onajaya eseya boti'ama

²⁶ Epeeji cuana, jjashahuabaquicue! Eyacuiñajjiya miqianaya Jesosa nijje jjapeequi meesahua jjimajo, ¿chajja miqianaya poanaje? Beshahua nei esohui ba po jjima. Beshahua nei ona huoojea po jjima, emeshi mese cuanaja bacua po jjima pea'ai miqianaya

poanaje. ²⁷ Jamatii Jesosaja epeeji pojjeamaa jama acani ba'a: —Jesosaja epeeji quea pame pojjeama. Oya cuana quea jshahuabaqui ja'a pojjeama —jama posoya acani Jesosaja epeeji pojjeama cuaa.

Eyacuiñajjiya ca ca eseya babaca canaje ojaya epeeji epojji, quea huiso esohui ba epo ona quea bicho po meeji. Eyacuiñajji jama poani ba'a: —Jesosaja epeeji pojjeama quea pame pojjeama jshahuabaquiani —jamaya Eyacuiñajji poani.

²⁸ E'e, Jesosaja epeeji pojjeamaa eseya niñe ba cani jama ba'a: —Jesosaja epeeji cuana ona huoojeajji jayojja pojjeama, esohui ba po jjima jayojja pea'ai, aema' pea'ai. ¿Ajeo oya cuana eshajja'ajajji? —poani.

Jamatii Eyacuiñajjiya eseya iyaa ca poa ojaya ebabaca. Jamajjeya ohuaya onaya ba mee caje jama ba'a: —Miya ojjaña ba epo poso poanijo, miqianajaya ejshahuabaquijji quea tai. Miqianaya quea pame pojjeama. ¡Quea bicho pocue! —Eyacuiñajjiya acani.

²⁹ Jamajjeya ae pishana Eyacuiñajji nijje mimije jama ba'a: —Eyacuiñajji, ¡bacue! Eya ca ca iña jamatii quea pame nee —jamaya emimijji pojjeama miya Eyacuiñajji nijje.

Quijje pea'ai ojjaña Eyacuiñajji cojja nei nequi majje quea bicho, quea mete poaje.

³⁰ Jamatii Eyacuiñajjiya eseya Jesosa Quito nijje japeequi meesahua ca'yonaje. Ojaya epeeji poanijo, ojaya ejshahuabaquijji ba meesahua cani. Ojaya esohui jayojja jama ba'e meesahua cani. Mimishi cuijea'yo majje quea boejea po mee cani. Eseya ba'e tii tii mee caje'yo onijje, Eyacuiñajjiya. ³¹ Yahuajo nei Eyacuiñajjiya esohui etehue'yo jama poa ba'a: “Jamajjeya jesejaya Emeshi Mese nei bihiuacue! Oya oe nei quea pame nee. A'a jama pojji

ba'a: —Eya ca ca iña jamatii quea pame nee”.

Jamaya Eyacuiñajjiya esohui etehue'yo poa.

2

Jesosa Quito acui ecueata'apeejo mano'yonaje

¹ Ecuea epeeji cuana, yahuajo miqiana que poe jeahuaa eyaya esohui quea pame Jesosajo huohuinaje. Eya jama po jjima ba'a: —Eya ohueya deija ojjaña esohui ba epo nei nei. Ecuea emimi quea ja'a. ¡Jamajjeya shajja'ajjacue mo! —jamaya ajjima ecuea.

Chojja, miqiana que poe majje eyaya Eyacuiñajjiya esohui e'e nei Jesosa Quitojo huohuinaje, ma onajaya yahuajo ba jjima poa. ² Miqiana que poe jjimahuaa eya jshahuabaquinaje jama ba'a: —Eyaya Conitojo ba'e cuana huohuije esohui quea pame nee Jesosa Quitojo, ma acui ecueata'a peejo mano'yonaje esejaya mimishi cuijea'yojji. Pea esohui huohui jjima aje.

³ Miqiana que poe majje eya jshahuaba neineiquinaje jama ba'a: —¿A'a eyaya Eyacuiñajjiya esohui huohuije quea ja'a nee pojja'a? —eya quea mete poanaje.

⁴ Jamajjeya Edojshahua Pame quea ca'a neeya eya huohui meesahua canaje esohui e'e nei miqianajaya eshajja'ajajji. Esohui huohuijji ojjaña ba epohua jayojja jama ecuea huohui jjima. ⁵ Jamajjeya Eyacuiñajjiya miqianaya Jesosa Quito nijje japeequi meesahua canajejo, ojaya epeeji nei poanaje. Deija ojjaña esohui ba epohua jama ecuea huohui jjima.

Eyacuiñajjiya ejshahuabaquijji e'e jojo nei quea ja'a nee

⁶ Jamatii Jesosaja epeeji eyacua pojjeama eyaya huohuiaña; etii jayojja eyaya huohuiaña esohui quea ja'a nee, Eyacuiñajjiya ejshahuabaquijji. Jesosaja epeeji pojjeamaja esohui jayojja jama pojjeama, emeshi mese cuanaja esohui jayojja jama pojjeama eyaya esohui huohuiaña, eshahuaja esohui jayojja jama pojjeama pea'ai. Maya quijje ojjaña ca'a'ama poaje. Eyacuiñajjiya oya cuana ona huoojeajji popajea mee caje'yo.

⁷ E'e, ojjaña nei nei Eyacuiñajjiya eba. Eyaya Eyacuiñajjiya ejshahuabaquijji quea ja'a nee Jesosa Quitojo huohuiaña. Yahuajo maya ejshahuabaquijji ba mee jjima ojjaña, Eyacuiñajjiya. Jjeya ca ca ohuaya eseya, ojaya ehoojea'yo cuana ba mee canaje jama ba'a: Meshi pana jjimahuaajo tii Eyacuiñajjiya eseya babaca ca poa Jesosaja epeeji cuana epo'yojji, onijje eba'e tiitii'yojji. Jesosa Quitohua mano'yo majje oja epeeji cuana ba'e tiitii mee caje'yo quea pame nee onijje. Jamaya Eyacuiñajji jshahuabaquia poa. ⁸ Maya Jodio pojjeamaja emeshi meseja ba jjima poa; Jodio etii cuanaja ba jjima pea'ai poa. Maya onajaya eba jojjemo Emeshi Mese nei quea ca'a Jesosa Quito bajjani acui ecueata'a peejo mano mee'yo jjima aca quiaye. ⁹ Jamatii Eyacuiñajjiya yahuajo nei esohui tehue mee ca poa jama ba'a:

“Oya esejaya quea jea neejo, Eyacuiñajjiya eseya quea pame nee acaje'yo, ojjaña ojaya epeeji cuana. Maya esejaya ba jjima ecojjaja, maya esejaya shajja'ajja jjima eshajjaja, huohui jjima pea'ai. Maya eseya jshahuabaqui jjima pea'ai. Eseya ohuaya quea pame nee nee acaje'yo”.

Yahuajo nei jamaya tehue mee ca poa. ¹⁰ Maya Edojjoshahua Pameya eseya ba mee cani: Eyacuiñajjiya quea pame nee acani esejo, ma Jesosa Quitohua ojaya epeeji cuana ba'e tiitii mee caje'yo onijje eyajo.

Ojjaña Edojjoshahua Pameja eba. Jamajjeya ese que dobiqumi majje ohuaya eseya ba mee cani Eyacuiñajjiya ejjashahuabaquijji. ¹¹ ¿Ajea eba oe dejjaja ejjashahuabaquijji? Ojaya eba ojaye nei ojaya ejjashahuabaquijji, onajaya ba jjima. Oya jayojjaya Edojjoshahua Pameja eba Eyacuiñajjiya ejjashahuabaquijji, ojaye neiya. Eyacuiñajjiya eseya ba'e tiitii mee caje'yo Jesosa nije jjapeequianijo ojaya eba nei. ¹² E'e, eseya Jesosaja epeeji poanijo shajjama' jayojja jama jjashahuabaqui ajja. Jamajjeya Eyacuiñajjiya Edojjoshahua Pame ese que dobiqumi mee canaje. Ohuaya eseya jama ba'e canaje jama ba'a: Jesosaja epeeji poanijo ca ca oe Eyacuiñajjiya eseya ba'e tiitii mee caje'yo onijje, eseya ojaya quea jea neejo. Quea pame nee nee eseya acaje'yo pea'ai ohuaya. ¹³ Jamajjeya Jesosaja epeeji pojjeamaja esohui jayojja jama esejaya ehuhuijji pojjeama. Chojja, Edojjoshahua Pameya eseya huohui meesahua cani ojaya ejjashahuabaquijji quea ja'a Jesosaja epeeji nei cuana huasijje.

¹⁴ Jamatii Jesosaja epeeji pojjeamaja ba jjima Edojjoshahua Pame. Ba meeme ajja Edojjoshahua Pameja ejjashahuabaquijji, quea quehua nee ojaya. Jamajjeya jama poani ba'a: —¿Apiojji Jesosa nije ejjapeequijji? Maya ecuanajaya esohui quea quehua —jamaya poani.

E'e, ojaya jamatii ebajji pojjeama Jesosa Quitoja esohui. Maya Edojjoshahua Pameya eseya ba mee cani. ¹⁵ Eseyca ca ca Jesosaja epeeji poani. Edojjoshahua Pameya ese que dobiqumi majje ba mee cani ojjaña eba'ejji quea pame; eba'ejji quea mimishi pea'ai ba mee cani jama ba'a: —E'e, jamaya. ¡Quea pame nee acue! —amee cani—. Pea'ai quea tai jjashahuabaquianijo, ohuaya jama amee cani ba'a: —Chojja, jamaya quea tai, Eyacuiñajjiya boti'ama —ameesahua cani pea'ai ojjaña quea ja'a eba'ejji.

Maya onajaya quea quehua nee nee. Jamajjeya Jesosaja epeeji pojjeamaja ojaya epeeji eniñebajji pojjeama jama ba'a: —¿Apiojji miqúanaya jama ba'yani? ¿Apiojji ma esohui shajja'ajjaña, huohuaña pea'ai? —jamaya e'ajji pojjeama onajaya.

¹⁶ E'e, yahuajo Eyacuiñajjiya esohui etehue'yo jama poa ba'a: “Ojjaña Eyacuiñajjiya ejjashahuabaquijji ¿ajea eba? Chama'. ¿A'a eseyaya Eyacuiñajji ba meesahuaje? Chojja”.

Jamaya yahuajo nei poa. Jamatii Jesosa nije jjapeequianijo, Edojjoshahua Pameya eseya Eyacuiñajjiya ejjashahuabaquijji ba meesahua cani.

3

Pabohua Jesosaja epeeji jjabahuejjaqui mee cani

¹ Ecuea epeeji cuana, miqúanaya ebacua esho'i jayojja jama poani, quea jjashahuabaqui ja'a pojjeama poani tii tii. E'e, yahuajo miqúanaya nije nequiya eyaya Jesosa Quitoja huohuinaje. Jamatii beshahua nei miqúanaya jjashajja'ajjaqui ajja. Jesosa nije jjapee neinei qui jjima jayojja jama poani; ojaya epeeji pojjeama jama poani. ² Jiquio ecua ebacua esho'i tojjo ba'e noe quia jjima acani jayojja jama ecuea miqúanaya huohui jjima esohui quea ja'a nee quea camaja ebajji. Jjeya pea'ai miqúanaya Jesosaja epeeji etii jayojja jama pojjeamajo ma esohui jashajja'ajjaqui ajja. ³ Miqúanaya aje oe Jesosaja epeeji pojjeamaa jayojja tiya aña. E'e, Jesosaja pea epeeji cuanaja esohui shajja'ajja sa po'yo ajja. Jjamimicuijaja nobiajeaquiani. Jamaya poanijo miqúanaya Jesosaja epeeji quea ja'a pojjeama. Ojaya epeeji pojjeama jama poani, de. ⁴ E'e, miqúanaya aje oe jama poani ba'a: —Eya ca iña Pabo shajja'ajjajji poani.

Beca ca jama poani ba'a: —Eya ca ca Apono shajja'ajjajji.

Jamaya poanijo Jesosaja epeeji quea ja'a nee jama jjashahuabaqui ajja miqúanaya, de.

Ecua Apono nije Jesosaa huoojea ca'yonaje ojaya esohui huohuijji epojji

⁵ Eya, Pabo Apono jayojja Jesosaja esohui huohuijji. Ohuaya ecua huoojea ca'yonaje ojaya esohui huohuiya. Jamajjeya miqúanaya Jesosa nije jjapeequi'yonaje ecuanaja esohui shajja'ajja majje. E'e, Eyacuiñajjiya ojjaña ecua chaco mee cani. Ojaya esohui jama poani eya. Ojaya esohui jayojja jama acani Aponohua pea'ai. ⁶ Eyaya Eyacuiñajjiya esohui huohui coonaje miqúanaya huasijje. Aponohua ma esohui huohui ca o'oyanaje. Eyacuiñajjiya ca ca oe miqúanaya ojaya esohui ba meesahua ca'yonaje. E'e, jiquio ecua acui sisi banajjiya bana cani jayojja jama eyaya, Pabohua Eyacuiñajjiya esohui huohui coonaje miqúanaya huasijje. Echacojjiya acui sisi ebana'yo enaa sha cani jayojja jama Aponohua esohui huohui ca o'oyanaje miqúanajaya eshajja'ajjajji. ⁷ Esohui huohui coojjiya, esohui huohui o'oyajjiya pea'aiya ishoa'ajja cani esohui huohui majje. Eyacuiñajjiya ohuaye nei ojaya esohui ba meesahua cani. E'e, jiquio ecua acui sisi banajjiya, acui sisi shajjiya pea'ai

chaco majje ishoo'ajja cani a'a acui tiije'yo ebajji jayoija jama Eyacuiñajjiya ohuaye nei acui sisi jayoija tii mee cani. ⁸ Ebanajji epo acui sisi shajji jayoija jama jashahuabaquiani jama ba'a: —Eya quea pame nee chaco majje, e'acui yiye meseya eya sosequia caje — jashahuabaquiani cuana.

E'e jojo nei e'acui yiye meseya jamaya acaje'yo. ⁹ Miqianaya Eyacuiñajjiya acui yiye jayoija. E'acui yiye mese jamaa Eyacuiñajjiya miqianaya quea pame nee jaahuana cani. Jiquio ecua acui yiye chacoji jamaya ecuanaya Apono nijje Eyacuiñajjiya echacoji poani; miqiana que ojala esohui huohuaña.

Jesosaja epeeji cuana Eyacuiñajjiya equi jayoija

Jiquio ecua e'equi meseya oja equi jaahuana cani jayoija jama Eyacuiñajjiya miqianaya jaahuana cani, ojjaña. ¹⁰ Eyacuiñajjiya Jesosa Quito equi yamajjana quea ca'a nee jayoija jama nequi mee cani. Ecuaa Apono nijje Eyacuiñajjiya equi iyajji jayoija jama poani. Jiquio ecua echacojiya equi iya cani eyamajjana nequia majje equi e'oqueji pojjeama jayoija jama ecuaaaya Jesosaja esohui huohuaña, miqianaya nahueña pea'ai Jesosa nijje ejjapeequi meesahuaji, quea nee nee epojji pojjeama cuaquijo. Eyacuiñajjiya eya huoojea majje quea ca'a po mee canaje ojala esohui pea cuana huasijje ehuohui coojji. Jamajjeya eya equi yamajjana nequiajji jayoija poanaje. Jjeya pea cuaa miqianaya esohui huohui cani e chamajo. Oya equi iyajeyojji jayoija jama poani. ¡Miqiana quea ja'a nee nee casohuihuohui cahua!

¹¹ Yahuaajo Eyacuiñajjiya Jesosa Quito jiquio meshi cuana huasijje huoojea majje eseya huohui canaje jama ba'a: —¡A'a pea nijje japeequijji! ¡Ecuea Ebaa Eja oe neija esohui shajja'ajjacue! —acanaje.

Equi iyajjiya eyamajjana quea ca'a nequia cani jayoija jama equi nequi titii mee'yojji jayoija jama Eyacuiñajjiya oja Bacua oe nei huoojea canaje ese ba'e titii meeya. ¡Oya oe shajja'ajjacue! ¹² E'e, esohui huohuijji cuana equi iyajji jayoija. Beca equi iyajjiya equi quea ca'a nee iya cani. Iya cani mei huo'o, mei oshe quea siyo, mei copo quea siyo nee nee pojja'a. Pea cuaa equi iya cani ca'a'ama; acui equi, bequiobo ña, huenihueni equi pojja'a. Jamaya esohui huohuijji quea hueaa acani. ¹³ Quijje cuaqui poeyajo, equi quiyoyajo, ojjaña ba caje ache equi iyajji quea pameya equi quea ca'a nee iya canaje, ache equi iyajji quea hueaa equi ca'a'ama iya canaje pea'ai. Oya jayojjaya Jesosa Quitohua poe o'oya majje huohui caje jama ba'a: —Ma esohui huohuijji quea pameya esohui e'e nei huohui canaje. Jamajjeya o shajja'ajjaji cuana enijje japeequi pajea jjima acaje. Maya esohui huohuijji quea huea poanaje; quea tai esohui huohui canajejo, o shajja'ajjaji cuana enijje japeequi pajea'yonaje.

¹⁴ Jiquio ecua cuaqui poeyajo, equi iyajji quea ja'aja equi nequije quea ca'a jayoija jama Jesosa poe o'oyajo, esohui huohuijji quea ja'a nee Eyacuiñajjiya sosequia caje quea pame nee, oja chaco quea pame sosejje. ¹⁵ Equi iyajji quea hueaja ca ca oja equi quiyoyajo jeyoyoye'yo cuaqui poe'yajo jayoija jama poaje esohui huohuijji quea huea, Jesosa poe o'oyajo. Eyacuiñajjiya oya cuana esosequajji pojjeama. Jamatii equi jiji'yajo deija cuaya-jeaquinanani equiyoyajo poajejje jayoija jama oya cuana cuaquijo quiyoyajo ajja poaje'yo, beshahua nei.

Miqianaya Eyacuiñajjiya equi ja'a quea mimishi ajji!

¹⁶ Ecuea epeeji cuana Conitojo ba'e, ja'a pajea'yojji eseya Eyacuiñajjiya equi jayojja! Edojoshahua Pame nei ese que dobiquinaje Jesosaja epeeji poanijo. Oya miqiana nijje anijo, miqianaya Eyacuiñajjiya equi jayoija poanaje. ¹⁷ Eyacuiñajjiya ojala equi quea nahue nee: —Ecuea equi quea pame nee, jehue'ama. Miqianaya ecuea equi jayoija poanaje. Jamajjeya ecuea equi, miquea eyami, nahue ajjajo, quea mimishi poanijo eyaya miqianaya tecueaje —ohuaya acanaje.

¡Eyacuiñajjiya ejjashahuabaquijji quea ja'a bacue, dejjaja pojjeama!

¹⁸ Ecuea epeeji cuana, ja'a quea jashahuabaqui quehua pojji! Miqianaya beca cuana jama poani ba'a: —Ecuaa quea jashahuabaqui ja'a poani, deija ojjaña ba epo jayoija jama poani.

Chojja. ¡jashahuabaquicue jama ba'a: —Eyacuiñajji, ecuea eba oe pojji nei. ¡Eya ba meesahuacue miquea ejjashahuabaquijji quea ja'a nee! —jamaya oya acue!

¹⁹ Jesosaja epeeji pojjeama quea huiso jamaya jashahuabaquiani ba'a: —Ojjaña ecua-naja eba quea ja'a nee nee.

Eyacuiñajjiya ca ca onajaya ejjashahuabaquijji jama poani ba'a: —Oya cuana quea quehua jashahuabaquiani, quea ja'a pojjeama, cajaa —oya poani.

E'e, Eyacuiñajjiya esohui etehue'yo yahuaajo nei jama poa ba'a:

“Quea huiso jiquio meshi cuanajo ba'e jashahuaba taiquiani jama ba'a: —Ecuana ja ejjashahuabaquijji quea ja'a nee poani —poso oya poani. Chojja, oya cuana jjadasiaquijji poanijo, eyaya oya jjadasiaqui pajea meeje'yo”.

Jamaya aca poa Eyacuiñajjiya oja sohui etehue'yojo.

²⁰ Eyacuiñajjiya pea esohui yahuajo nei etehue'yo jama poa ba'a:

“Eya oe nei quea jashahuabaqui ja'a; jjadasia meequi ajja pea'ai. Dejja cuana chojja, ojjaña ejjashahuabaquijji quea ja'a pojjeama”.

Jamaya yahuajo nei nei tehue mee ca poa.

²¹ Jamajjeya ja'a jama pojji ba'a: —Ma esohui huohuijjiya ejjashahuabaquijji quea ja'a nee. Oya cajjashahuabaquiahua —a'a pojji!

¡Bacue! Jesosa Quito miquea Emeshe Mese nei. Ohuaya ojjaña esohui huohuijji huoojea canaje miqiana onijje jjapeequi meesahuua. ¡Jamajjeya shajja'ajjacue! ²² E'e, Eyacuiñajjiya ojaya esohui huohuijji huoojea canaje miqiana huasijje. Ohuaya eya, Pabo ebionei huoojea canaje. Apono, Peno pea'ai huoojea canaje. Ohuaya ojjaña aquiana pana ca poa miqianajaya quea pame nee ejaahuanajji. Miya eshe ani ohuaya jaahuana cani; mano'yajo pea'ai jaahuana caje'yo quea pame nee. Ohuaya jjeyahua nei miqianaya jaahuana cani. Quijje nei miqianaya jaahuana caje'yo tii tii pea'ai, Eyacuiñajjiya. E'e, Jesosaja epeeji poanijo miqianaya e'acuiana mese jayojja jama poani. ²³ Eyacuiñajji Jesosa Quitoja Chii. Miqianaya Jesosa Quitoja epeeji cuana. Jamajjeya ojjaña Eyacuiñajjiya aquiana quea pame nee miqianajaya poani.

4

¡A'a Jesosaja huoojea'yo esohui huohuijji niñebajji!

¹ ¡Epeeji cuana, ecua shajja'ajjacue! Eyacuiñajjiya ecua huoojea ca'yonaje esohui e'e nei Jesosa Quitoja huohuiya, ma yahuajo nei onajaya ba mee jjima poa. ² ¡Bacue! jiquio ecua echacojjiya o huoojeajji shajja'ajja cani jayojja jama ecuaaya aña. Jamajjeya ohua huoojea caje ecuaaya Eyacuiñajjiya esohui huohuiaña, onajaya esohui pojjeama. Esohui quea pame nee Jesosa Quitoja ehuohui pajea'yojji pojjeama. ³ Jamajjeya ecua miqianaya eshajja'ajjajji pojjeama ejo jama poani ba'a: —Pabohua quea ja'a nee huohui cani —poani—. Pabohua quea ja'a pojjeama huohui cani —miquiaa ajje, eyaya eshajja'ajjajji pojjeama pea'ai. Onaa jama ejo huohui caje pea'ai eyaya eshajja'ajja'yojji pojjeama.

Eya pea'ai ecue huohuijo jashahuabaqui ajja jama ba'a: —E'e pojja'a ecua ehuohui quea ja'a nee; e'e pojja'a quea ja'a pishana —jamaya eya jashahuabaqui ajja pea'ai.

⁴ E'e, eya jashahuabaquiani jama ba'a: —Eyaya Jesosa Quitoja chacoaña quea pame nee.

E'e pojja'a. Eyacuiñajjiya ojaya ejjashahuabaquijji ejo, eya chacoaña cahuohui cahua quijje. ⁵ Jamajjeya ecuanaja ejjashahuabaquijji, ojjaña ecuaaya anaje pea'ai miqianajaya ba jjimajo, ja'a ecuanaya niñebajji! ¡Ishoa socue oe Jesosa Quitoja epoe o'oyajji! Majoya ohuaya, esejaya Emeshi Mese neiya ojjaña cuanaja ejjashahuabaquijji, ojjaña quehuajje acanaje pea'ai ba mee caje. Ojjaña shajja'ajja caje. Majoya eseya quea pame nee anajejo, Eyacuiñajji quea bihui nee poaje: —E'e, jamaya. Miya Jesosaja epeeji quea ja'a nae; quea pame nee ojo chaconaje —eseya acaje ohuaya.

¡Esohui huohuijji cuana pea jayojjaya quea jea ameya acue!

⁶ E'e epeeji cuana, miqiana jjabahuejjaqui meeji eyaya tehueña Aponojo, ejo pea'ai. Eyacuiñajjiya esohui jama poa ba'a: “¡Oe epeeji quea boti, pea epeeji boti'ama a'a ajji!” Jamaya esohui etehue'yo poa.

Jamajjeya ja'a jama ajji ba'a: —Aponohua quea pame nee acani; Pabohua ca ca quea pame pishana acani —a'a pojji!

¡Ojjaña Jesosaja esohui huohuijji pea jayojjaya oe acue! Jamajjeya miqianaaya ma esohui etehue'yo jayojja jama e'e jojo nei aje. ⁷ E'e, Eyacuiñajjiya ojjaña Jesosaja epeeji pea jayojjaya ba cani. Ohuaya oe epeeji pea epeeji jayojjaya acani. Jamajjeya ja'a jashahuabaquijji jama ba'a: —Eya ca iña quea pame nee. Pea cuana quea pame pishana —a'a jamaya jashahuabaquijji!

Miqianaya ca mi ca oe Eyacuiñajjiya esohui jamatii ba epo poso poani. Chojja, ojaya esohui miqianajaya ebajji pojjeama jamatii. Eyacuiñajjiya esohui huohuijji miqiana huasijje esohui huohui mee majamaja canaje. ⁸ Miqianaya ca mi ca oe jama poso jjabaquiani ba'a: —Ecuana ca ca oe Jesosaja esohui jayojja jama ba'yani quea pame nee —poso jjabaquiani quiana—. Quea huiso ecuanajaya eba —nequiana poani pea'ai—. Ecuana ca ca ona huoojea'yojji poani Eyacuiñajji nijje. Pabo chojja, ona huoojeajji pojjeama —jamaya poso poani miqianaya.

Miquianaya Eyacuiñajji niije ona huoojea'yojji e'e jojo nei jojjemo miqúanajo eya quea bihúi nee pome. Jamaya e'e jojo nei jojjemo ecuaña miqúanaya niije ona huoojea'yojji pome pea'ai.

¡Jjashahuabaquicue ecuaña quea nee poanaje miqúanaya sohui huohuijji!

⁹ Eyacuiñajjiya ecuaña huoojea canaje ojaya esohui huohuiya. Jamatii ojaya eba ecuaña shajja'ajja majje ojjaña soadojo caní jama ba'a: —¿Apiojji shai oya cuaña shajja'ajjae so'o, de? ¡Cu'a, oya cuaña quecuajeacue! Ojjaña oya cuaña quea tai —jamaya onaya siajje poani.

Ecuaña ca ca jjashahuabaquiani jama ba'a: —E'e de, ojjaña meshijo ba'eca cuaa ecuaña soadojo caní, ojjaña eyajo aníya pea'ai.

¹⁰ E'e, Jesosa niije jjapeequianijo, Jesosaja epeeji pojjeama cuaa ecuaña niñepoqui poso acaní. Miqúanaya ca ca ojjaña ba epo poso acaní cuaa. Jesosaja epeeji pojjeama cuaa ecuaña ona huoojea'yojji jayojja jama pojjeama poso acaní. Miqúanaya ca ca ona huoojea'yojji jayojja jama acaní. Onaaya ecuaña shajja'ajja jjima acaní. Jamatii miqúanaya shajja'ajja caní. ¹¹ E'e, ijeyahua nei ecuaña Jesosa Quitojo mimianijo quea nee poani; ojjaña pojjaajo quea shoe poani. Quea naba taja poani. Daqui chiichiiáni ecuanaja. Pea cuaa ecuaña cuía caní Jesosa niije jjapeequianijo. Ecuaña poqui majamajani ojjaña cuiñajji yasijje químa' jayojja ecuaña. ¹² E'e, ecuaaya bobijo janobajjima nei chacoaña. Pea cuaña mimijajiyajo, ecuañaaya mimisaja'a jjima aña. Jama poani ba'a: —Eyacuiñajjiya miqúanaya cajaanahuaña cahua —ecuaaya deija quea tecue aña.

Jesosaja niije jjapeequianijo, pea cuaa ecuaña napa caní. Jamatii quea queña po ajja. Jesosa niije jjapeequi pajea'yo ajja pea'ai. ¹³ Pea cuaa niñeba cajje ecuaaya esohui quea beíya saja'aña. Jjeya pea'ai pea cuaña ecuanajo quea tai mimiani jama ba'a: —Oya cuaña Jesosaja epeeji cuaña, cajaa. Shabo jama, caquishijeahua —poani.

¡E jayojja jama pocue Jesosa niije jjapeequianijo! —Pabohua aca poa

¹⁴ Ecuea epeeji cuaña, eyaya jiquío esohui tehueña miqúanaya quea yeno po meeji pojjeama. Miqúanaya ecuea ebacua jayojja jama poanijo, jjabahuejjaqui mee sa aña.

¹⁵ Esohui quea pame nee Jesosa Quitoja eyaya huohuinaje miqúanaya huasijje. Ecuea esohuijo miqúanaya ojaya epeeji poanaje. Jamajjeya eya oe nei mique chii jayojja jama poanaje. E'e pojja'a Jesosa Quitoja sohuihuohuijji quea huíso nee poeje miqúanaya sohuihuohuiya. Sico meeme ajja pojja'a, quea huíso nee nee. Jamatii eyaya ebíonei miqúanaya huasijje esohui huohuinajejo miqúanajaya chii jayojja poanaje. ¹⁶ ¡Jamajjeya ecuea esohui shajja'ajja socue! ¡E jayojja jama pocue!

¹⁷ Jamajjeya eyaya Jesosaja epeeji Timoteo huoojeaje miqúanaya quea pame ba'e meesahua. Timoteo ecuea quea jea nee, Jesosaja epeeji quea ja'a nee poani. Ecuea eba'ejjijo, ecuea esohui Jesosa Quitojo pea'ai ohuaya huohui caje o'oya miqúanajaya epajea'yojji pojjeama, ma eyaya ojjaña Jesosaja epeeji cuaña ojjaña cuiñajji ba'e yasijje huohuiña. ¹⁸ Miqúanaya beca cuaña shajjama' poani ojjaña miquea eba poso poanijo. Ecuea esohui shajja'ajja sa po'yo ajja. Jjashahuabaquiani jama ba'a: —Pabo poe ajja ecuaña baa —poani.

¹⁹ E'e pojja'a Eyacuiñajjiya eya huoojea caje'yo Conito huasijje, miqúanaya huasijje quíjje pishana. Shajjama' cuanaja esohui shajja'ajja maja sa po ajja eya. ¿A'a oya cuaña Jesosa niije jjapeequiani e'e jojo nei? ¿A'a Eyacuiñajjiya oya cuaña ojaya esohui huohui meesahua caní quea ja'a nee? Maya eyaya ba sa aña. ²⁰ E'e, quea huíso esohui mimi majamaja majje e'e pojja'a jamatii Jesosaja epeeji pojjeama pojja'a nequiana. Jesosa niije quea pame nee jjapeequianijo ca ca Eyacuiñajjiya eseya ba'e tiitii mee caje'yo oníjje eyajo.

²¹ E'e, eya poeje'yo miqúanaya baa. Shajjama' poani tii, tecueajeaje'yo. Ecuea etehue'yo jayojja jama poanijo, eya quea bihúi nee, quea beí nee poaje. Jamajjeya ¡ecuea esohui shajja'ajjacue, eya miqúanaya niije quea beí epojji!

5

¡Jesosaja epeeji quea mimishi poani beibeíya tecueacue!

¹ Jesosaja epeeji Conitojo ba'eya eya huohui cañanaje jama ba'a: —Pabo, oe dejjaa Conitojo ba'eya oja shanase cojjo caní, Jesosaja epeejiya, de —acanaje.

Jamaya quea tai nee nee. Eyacuiñajjiya boti'ama nei nei. Jesosaja epeeji pojjeama jama po ajja, quea mete oya cuaña. ² Jamatii miqúanaya aje oe bicho'ama jjejojo jama poani ba'a: —Ecuánaya quea pame nee ba'e —nisho poani.

¡Oe epeeji quea mimishi nee poanijo, quea yeno pocue! Ma deija oja mimishijo yeno'ama po jjimajo, ja'a oníjje jjapeequíjji! ¡Jesosaja epeeji cuaña niije a'a dobiquí meeji!

—¡A'a ecuaña niije Eyacuiñajjiya equi yasijje dobiquíjji! Eyacuiñajjiya miya eshajja'ajjaji pojjeama —oya acue.

³ Eya quea huesha nee yani; miquiana nijje nequi meemee ajja. Jamatii miquianajo jashahuaba majamajaquiani tii. ¡Eya Jesosaja epeeji etii ojaya ehoojea'yo poanijo, shajja'ajjacue mo! Ecuea ejjashahuabaquijji ma dejja quea mimishijo jama ba'a: —Oya quea mimishi poanijo, ¡quea bicho nee po meecue! —eyaya miquiana nijje nequiya jjemo jamaya huohuime.

⁴ Jamajjeya miquianaya Eyacuiñajjija equi yasijje ojee poe majje, Jesosa Quito esejaya Emeshi Mese nei miquiana nijje anije, miquiana quea jashahuabaqui ja'a po meeji ojaya esohui jayojja jama ameesahua caje. Eya pea'ai miquiana nijje jashahuabaquianajo miquiana nijje nequi jayojja poaje. ⁵ Jamajjeya ojee poe majje ¡ma dejja mimishi tecueacue jama ba'a: —¡Edosiquianaa mi huoojeajji poaniya miya canapa cahua! —jamaya acue oja mimishijo quea yeno epojji!

Quea yeno po majje oja mimishi pajea caje'yo. Manoje'yo pojja'a. Jamatii esejaya Emeshi Mese neiya Jesosaa poe o'oya majje ma dejja huoojea ajja cuaqui yasijje, ca ohua mimishi pajea ca'yajo.

⁶ Dejja quea mimishi miquiana nijje jjapeequianajo, jamatii miquianaya bicho'ama poanaje. Jamaya quea tai. Miquianajaya eba jiquio esohui jama ba'a: “Oe pojji neiya pahui shejjeemeejiya iñahuahuo cajje pahui shejje meee cani” jamaya onaaya huohui cani. ⁷ E'e, mimishi eshejjeemeeji jayojja jama poani. Oe dejja quea mimishi minijje ojee jjapeequianiya ojjaña quea mimishi po mee caje o jayojjaya. ¡Mimishi cajaa acue, ojjaña! Jamajjeya miquianaya quea mimishi po ajja, pahui eshejjeemeejiima' jayojja poaje. E'e, yahuajo nei Jodio cuaa Ejito meshijo nequiya ñajjaja cuia ca'ya poa ebacua cuana emano'yojji pojjeamao jama jayojjaya Eyacuiñajjija Jesosa Quito esejo mano mee ca'yonaje eseya onijje eba'e tiitii'yojji. ⁸ E'e, Jodio cuana pahui eshejjeemeejiima' ojee ijija cani Eyacuiñajjija etiiquianaja ebacua cuana mano mee'yo jjima aca poa shahuaba'yojji. Jamaya jayojja Jesosa esejo mano'yonajejo, eseya caba'yahua mimishi'ama e'e jojo nei. E'e, jamaya ba'yanijo Jesosa eseya mimishijo mano'yonaje esejaya epajea'yojji pojjeama. Jamajjeya jiquio ecua Jodio cuaa ñajjaja cuia'yo majje ojee ijija cani jayojja, etiiquianaja bacua cuana mano mee'yo jjima aca poa shahuaba'yojji jayojja jama eseyaya aña Jesosajo.

⁹ Yahuajo pishana eyaya miquiana huasijje pea esohui etehue'yo huoojeanaje. Ma etehue'yojo eyaya jama huohuinaje ba'a: —¡Jesosaja epeeji quea mimishi nee poani nijje a'a jjapeequijji! ¡Oya pea cojjojji nijje a'a jjapeequijji! ¡Ona napajji nijje, quea mimishi jashahuabaquiani nijje pea'ai a'a jjapeequijji! —eyaya miquiana huasijje tehuenaje.

¹⁰ Eyaya jamaya tehuenaje Jesosaja epeeji quea mimishijo. Jesosaja epeeji pojjeamao jamaya tehue jjima. E'e, mimishi cuana quea huiso nee yani: Quea nahue poani, sii poani, esahua nijje mimiani pea'ai. Jamajjeya dejja mimishi pejejo ba'e sa po'yo ajjajo jiquio meshijo ba'e meemee ajja. ¿Achejo dejja mimishi chama' huasijje eba'eji? ¹¹ Beca cuana ca ca jama po nishoani ba'a: —Epeeji cuana, eya Jesosaja epeeji pea'ai —poani. Jamatii oya cuana aje oe quea mimishi poani: Pea cojjojji poani, quea dejja tai, quea nishehui poani, quea mimijjequijjea poani, meshi epana bihuia cani, ishi'ishiani, sii poani, shajjama' poani pea'ai. ¡Jesosaja epeeji jama poajo, onijje a'a jjapeequijji, a'a anioqueji e'ijjia'ijjiajji!

¹² Eyacuiñajjija eya huoojea jjima Jesosaja epeeji pojjeama tecueaa jama ba'a: — ¡Miquianaya quea ja'a pojjeama ba'yanijo quea nee nee poaje!

¡Eyacuiñajjija ca ca oya cuana catecueajea cahua! Ohuaya ecuana huoojea canaje Jesosaja epeeji quea mimishi cuana jjabahuejjaqui meeya. ¹³ Jamajjeya Jesosaja epeeji miquiana nijje nequi quea mimishi poajo, ¡niñeshe'acue: —Miya quea ja'a pojjeama poani —oya acue!

Jamajjeya ¡Eyacuiñajjija esohui yahuajo tehue'yo jayojja jama acue! Yahuajo nei nei jama poa ba'a:

“Ecuea epeeji quea mimishi poanijo, ja'a miquiana nijje nequi meeji, ecuea epeeji cuana nijje! ¡Huoojeacuayajja'yocue esecue yasijje!”

Jamaya yahuajo nei Eyacuiñajjija esohui etehue'yo poa.

6

¡A'a epeeji cuana dojojji dejja etii yasijje ca Jesosaja epeeji pojjeama huasijje!

¹ Miquianaya Jesosaja epeeji poanijo ecuea huapa pojjeama cuana poani. Jamajjeya Jesosaja epeeji nijje quea quene po majje Jesosaja epeeji pojjeama huasijje dejja etii yasijje ja'a oya dojojji ojaya ejjashahuabaquijji baa! Chojja. ¡Jesosaja epeeji etii yasijje poquicue! Eyacuiñajjija ojaya epeeji etii huohui meesahua caje quea ja'a nee ojjaña quea bei epo meeji. ² E'e, eseya Jesosaja epeeji cuana quijje onijje ona huoojeajji poaje. Jamajjeya ijyehua nei ojjaña ojaya epeeji cuana quea bei po meesahuacue pea epeeji cuana nijje! ¡O huoojea'yojji nei jayojja jama oya cuana quea pame nee ameesahuacue!

³ E'e, Jesosa poe o'oyajo, eseya esohuidojojji eyajo nequi huoojea'yojji poaje'yo onijje pea'ai. Jamajjeya jiquio meshijo nequiya ¡Jesosaja epeeji pea cuana nijje jjamimicuijaje nobiajeaquiani quea bei po meecue! ¡Oya cuana shajja'ajja majje quea ja'a nee huohuicue!

⁴ Jamajjeya Jesosaja epeeji nijje jjamimicuijaje nobiajeaquini majje ¡a'a poquijji dejja etii yasijje, Jesosaja epeeji pojjeama huasijje miquiana quea bei epo meeeji! ⁵ Jamaya poanijo miquianajaya ejjashahuabaquijji quea tai poani. Jamajjeya miquianaya jjamimicuijaje nobiajeaquini majje ¡Jesosaja epeeji etii iyaacue! Ohuaya miquianaya quea bei po mee caje pea epeeji nijje. ⁶ Jamajjeya Jesosaja epeeji nijje mimijaji majje ¡a'a jja oe oya dojojji Jesosaja epeeji pojjeama huasijje ojaya ejjashahuabaquijji huohui meeya! Jamatii miquianaaya ca ca quea tai aña.

⁷ E'e, miquianaya ca mi ca oe Jesosaja epeeji pojjeama jayojja jama poani. Jesosaja epeeji nijje jjamimicuijaje nobiajeaquini majje oya dojoaña Jesosaja epeeji pojjeama huasijje. ¡A'a jja oe jamaya pojji! Chojja, miquianajaya epeeji minijje quea tai poajo, jamatii ¡a'a jjamimicuijaje nobiajeaquijji! ¿Yajjajo acuae jaya jamatii mi sii mee'ajjaña?

⁸ Miquianaaya ca ca oe Jesosaja epeeji cuana minijje nequi quea tai aña, oya cuana dasiaña, onajaya aquiana siyaña pea'ai, de. Jamaya quea tai. ⁹ ¡Jjashahuabaquicue oe! Miquianaaya eba mimishi cuana Eyacuiñajji nijje eba'eji pojjeama eyajo ojaya cuiñajji eyacuajo. Eyacuiñajji esohui a'a pajea'yojji jama ba'a: “E'e jojo nei ojjaña quea mimishi poani pea nijje, ojjaña eshahua nijje mimiani, peaja ehuanase sii cani pea'ai, onaja yahue sii cani pea'ai, dejja cuana pea dejja nijje jjacojjoquiani, epona pea epona nijje yahue nisho poani pea'ai, ¹⁰ siipojji cuana pea'ai, quea dejja tai poani pea'ai, ehoo nei po huicha'a huicha'ani pea'ai, pea siajje ajji poani pea'ai, shajjama' cuana pea'ai Eyacuiñajji nijje eba'eji pojjeama eyajo ojaya cuiñajji eyacuajo”. ¹¹ Jamaya yahuajo miquianaya poanaje Jesosa nijje jjapeequi jjimahua. Jjeya ca ca esejaya Emeshi Mese neiya, Jesosa Quitohua miquianajaya mimishi cuijea ca'yaje quea boejea po mee ca'yonaje. Jamajjeya miquianaya jjeya ba'yani Eyacuiñajji. E'e, Jesosa Quito esejaya Emeshi Mese nei miquianajaya mimishi cuanajo mano'yonaje. Miquianaya quea boejea po mee ca'yonaje. Jamajjeya Eyacuiñajjiya miquianaya ba cani mimishi'ama. Edojjoshahua Pameya miquianaya Eyacuiñajjiya esohui jayojja jama ba'e meesahua cani pea'ai. Jamajjeya ¡ojjaña Jesosaja epeeji cuana nijje quea bei, quea pame nee ba'ecue! ¡Mimishi'ama pocue!

¡Eyacuiñajji chacocue quea pame nee!

¹² Epeeji cuana, miquianaaya eya huohui'ajjanaje esohui etehue'yojo jama ba'a: —Eya ca ca Jesosaja epeeji. Jamajjeya eyaya ojjaña aña mete'amaa jjejojo, ma Jesosaja epeeji pojjeama cuaa acani —jamaya miquianaya poani quea quehua jjashahuabaquianajo.

Eya ca ca jama poani ba'a: —Pea cuana jayojja jama ba'e majje miquianaya quea pame pojjeama poaje —eya poani. E'e pojja'a eya mimije jama ba'a: —Ojjaña pea cuana jayojja jama eyaya aje —poaje.

Jamatii eya jamaya emimijji pojjeama. Chojja, jama po majje quijje eyaya jamaya apajea'yo jjima aje. E'e, jiquio ecua echacojjiya o chacomeejjiya esohui apajea meeme ajja jayojja jama quijje eyaya maya apajea'yo jjima aje.

¹³ Bobi ijji majje see ai yasijje bobiquiani. Bobi chamajo see ai quea nee poaje. Jamatii quijje eyajo ba'e'yo majje eseya bobi ijji pajea'e'yo. Quea shoe pojjeama poaje'yo. Jamaya Eyacuiñajjiya acaje'yo. Jamajjeya ¡a'a jjashahuaba titiuiquijji bobijo quea jeje nee epojji! Jama jjashahuabaquime pocue ba'a: —Eya Eyacuiñajjiya equi jayojja. Oya ecuea eyamijo ba'yani. Eya quea jeje jayojja po mee cani.

E'e, Emeshi Mese neiya, Eyacuiñajjiya ecuea eyami quea pame nee pana ca poa. Jaahuana cani quea pame nee pea'ai oja equi jayojja epoji. Ohuaya ecuaana pana ca poa quea mimishi nee pea nijje epoji pojjeama; onajaya ehuanase, yahue pojja'a esijji pojjeama pea'ai. ¹⁴ Jamajjeya esejaya Emeshi Mese nei Jesosa Quito mano'yojo, Eyacuiñajjiya oya shequi mee ca o'oyanaje. Jamaya ohuaya eseya ba'e mee caje o'oya pea'ai. Quea ca'a nee nee poaniya jjejojo ojjaña acaje'yo ohuaya.

¹⁵ Jesosa Quitoja epeeji poanijo ojjaña eseya ojaya eyami jayojja jama poani. Jamaya miquianajaya eba. Jamajjeya ¡pea cojojji nijje a'a jaajji! Chojja. Jamaya poajo Eyacuiñajji miquiana nijje quea tecue nee nee poaje. ¹⁶ E'e, dejja epona quea mimishi nijje jaa majje oya cuana oe yamime jayojja poani. Jamaya Eyacuiñajjiya oya cuana ba cani. Miquea eba Eyacuiñajjiya esohui etehue'yo jama ba'a: “Dejja epona nijje jaa majje oya cuana oe yamime jayojja poani”. ¹⁷ Emeshi Mese nei Jesosa nijje jjapeequi majje ca ca eseya o jayojjaya jama jjashahuabaquime poani pea'ai.

¹⁸ Jamajjeya eyaya miquianaya huohuiaña jama ba'a: Dejja cuana, ¡epona miquea ehuanase pojjeama nijje a'a jaajji! Epona cuana, ¡a'a pea dejja nijje jaajji! ¡jiñayii acue! Quea mimishi po majje miquea eyami nei quea tai poaje. ¡Ojjaña mimishi cuana a'a ajji

pea'ai! ¹⁹ ¡Bacue! Miquea eyami Edojjoshahua Pameja equi jayojja jama poani. Oya mique yami dojjo huasijje nequidobiqui'yonaje. E'e, Eyacuiñajji mi huoojeajji poani. Ohuaya huoojea ca'yonaje Edojjoshahua Pame miqiana que dobiquiya. ²⁰ Oya mi mesenajji epo. E'e, Jesosa Quito mano'yonaje miqianaya mimishi cuijea'yojji sosejje. Jamajjeya ¡oyaya esohui jayojja jama ba'ecue! Miqianaya jama ba'yajo, pea cuaa mi ba majje Eyacuiñajji bihuia caje jama ba'a: —Eyacuiñajji quea ca'a nee nee. Ojaya epeejji quea pame nee ba'e meesahua cani —poaje.

7

¿A'a shacuima' nequi cuana cajjahuaquiahua?

¹ Yahuajo pishana miqianaaya esohui tehuenaje ecuea ebajji. Ma esohui etehue'yojo eya miqiaaaya huohui'ajjanaje jama ba'a: —¿A'a shacuima' nequi cajjahuaquiahua? ¿A'a jamatii canequiahua pojja'a? —huohui'ajjame miqianaaya eya anaje.

Jamajjeya ¡yeya eyaya miqianaya saja'aña. E'e, shacuima' nequi eshacui sa po'yo ajjajje ca jamatii canequiahua. Jamaya quea pame. ² Jamatii quea huiso shacuima' nequiya epona cuana jea ba cani, onaja huanase sii cani. Epona ahuema'ani jamaya quea mimishi poani pea'ai. Jamajjeya cajjahuaquiahua, cajjahueaquiahua pea'ai, ojjaña. Jamaya quea pame nee.

³ Yahue cuaa, ¡miquea ehuanase quea bihui nee po meecue! ¡Jaahuanacue quea pame nee pea'ai! Ehuanase cuaa, ¡miquea yahue quea bihui nee po meecue! ¡Onijje tii jaacue! ⁴ ¡Mique yahueya huohui cani jayojja jama pocue onijje jaanijo! Yahue, ¡miquea ehuanase nijje jaanijo ohua sa cani jayojja jama acue! ⁵ E'e pojja'a yahue, ehuanase pea'ai mimi sa poani Eyacuiñajji nijje beca cahuime. Eyacuiñajji nijje mimianijo yahue ojaya ehuanase nijje jaa sa po ajja pojja'a. Jamaya quea pame, ca ehuanase yeno'ama poanijo. Beca cahui cuana Eyacuiñajji nijje mimi majje ¡yahue oja ehuanase nijje cajjacojjoqui o'oyahua! Jamajjeya ehuanase yeno'ama, yahue pea'ai yeno'ama poaje. Quea yeno poajo, eshahuaa oya cuana quea mimishi ¡jashahuabaqui mee ca chana' pea cojjoji epojji. E'e, yahue, epona pea'ai ca'a'ama.

⁶⁻⁷ Ecuea epeejji cuana, ¡iquio esohui etehue'yo ecuea ejjashahuabaquijji jama ba'a: Eya ca ca shacuima' nequi. Ojjaña Jesosaja epeejji e jayojja jama shacuima' nequi, ahuema'ani pea'ai quea pame nee chaco majamajaje Jesosa Quitojo. Jamatii eyaya miqianaya jamaya epojji pojjeama huohuiaña. Eyacuiñajjiya beca cuana quea pame nee ba'e meesahua cani jamatii shacuima' nequi, ahuema'ani pea'ai. Pea cuana ca ca jamatii ani quea mimishi po chana'. Jamajjeya oya cuana cajjahuaquiahua, cajjahueaquiahua pea'ai. ¡Eyacuiñajjiya ejjashahuabaquijji miqui ohua acani jayojja jama acue!

⁸ Jamatii eya ¡jashahuabaquiani shacuima' nequijo, eshacuimanojo, ahuema'anijo, e'ahuemanojo pea'ai jama ba'a: Eya ee nei, shacuima' nequi. Miqianaya e jayojja jama mee nei nequi majje jama quea pame nee nee poaje. ⁹ Jamatii e'e pojja'a miqianaya beca cuana ehuanase chamajo mimishi'ama eba'ejji pojjeama. Jamajjeya ¡jjahuaquicue! E'ahuemano cuana, miqiana ahuema'ani jayojja mimishi'ama eba'ejji pojjeama. Jamajjeya ¡jjahueaqui'yocue! Jamaya quea pame. Miqianaya quea yeno mee nei ba'yanijo quea mimishi po chana'. Jamaya quea tai.

¿A'a Jesosaja epeejji cuana huei caji?

¹⁰ ¡Jeyahua nei eyaya Eyacuiñajjiya esohui tehueje yahue cuana huasijje, ehuanase cuana huasijje pea'ai miqianajaya ebajji jama ba'a: Ehuanase cuana, ¡miquea yahue oe nei nijje ba'ecue! ¡A'a oya hueijji! ¹¹ ¡Huei majje ca oe ahuema' ba'e tiitii'yocue! ¡E'e pojja'a miqueahue ¡jeshe o'oyacue! Jamaya quea pame nee. Yahue cuana, ¡oya jayojja a'a miquea ehuanase hueijji! ¡Jaahuana tiitii'cue! ¡Eyacuiñajjiya esohui jayojja jama acue!

¹² ¡Jeya ca ca eyaya pea esohui tehueje, ma Jesosaa tehue mee ¡jima, ecuea ejjashahuabaquijji tehueje pea cuana huasijje, Jesosaja epeejji cuana huasijje. Yahue cuana, e'e pojja'a miya Jesosaja epeejji poani, miquea ehuanase Jesosaja epeejji pojjeama. Jamatii miquea ehuanase minijje ba'e sa poanijo, ¡a'a oya hueijji! ¹³ Ehuanase cuana, e'e pojja'a miya Jesosaja epeejji poani, jamatii mique yahue Jesosa nijje ¡jjepeequi ¡jima. Miqueahue minijje ba'e sa poanijo, ¡a'a oya hueijji! ¹⁴ Miya Jesosaja epeejji poanijo, miqueahue minijje ba'e sa poanijo, Eyacuiñajjiya oya quea pame acaje Jesosaja epeejji nijje ba'e sa poanijo. Yahue cuana, oya jayojja miquea ehuanase miquea huei ¡jima minijje ba'e sa poanijo, Eyacuiñajjiya oya quea pame acaje pea'ai miya Jesosaja epeejji poanijo. Oe yamime jayojja ohuaya micuana ba cani. Jamajjeya ohuaya miqianajaya ebacua cuana jaahuana caje pea'ai. Jesosaja epeejji pojjeamaja bacua cuana jama pojjeama oya cuana.

¹⁵ ¡Iquio esohui bacue pea'ai, epeejji cuana! Eyacuiñajjiya ojaya epeejji cuana quea bei ba'e mee sa acani. Jamajjeya miquea ehuanase Jesosaja epeejji pojjeama ¡jeyojoya

minijje ba'e sa po'yo ajja po majje capoquiahua. E'e, Jesosaja epeeji pojjeama Jesosaja epeeji nijje ba'e sa po'yo ajja capoquiahua, epona, yahue pea'ai. Jamajjeya Jesosaja epeeji e'ahuemano jayojja anije, eshacuimano jayojja jama nequije. ¹⁶ Jamajjeya ehuanase cuana, imiquea yahue nijje anicue, jamatii oya Jesosaja epeeji pojjeama! Oya Jesosa nijje jjapeequije poija'a mi quea pame ba'yani ba majje. Yahue cuana, imiquea ehuanase Jesosaja epeeji pojjeama nijje ba'ecue! Jamajjeya oya Jesosa nijje jjapeequije poija'a.

¡Eyacuiñajjiya ejjashahuabaquijji jayojja jama ba'ecue!

¹⁷ Eyacuiñajjiya ojjaña miquianaya ojaya echacoji po mee cani. Oe epeeji pea epeeji jayojja jama chaco ajja. E'e, Eyacuiñajjiya miquianaya huoojea cani ojo chachohua. Peapea chaco meeme asahua cani. ¡Jamaya atitiicue! Jamaya eyaya huohuiaña ojjaña Jesosaja epeeji cuana ojjaña cuiñajji cuanajo ba'e yasijje. ¹⁸ Jamajjeya oe epeeji Jesosa nijje jjapeequianijo cuiishasha jehusejjajeya ca'ya poa, Jodio cuaa jjejojo. ¡Jamatii nequicue! Pea dejja cuiishasha ejuhusejjajeya'yo pojjeama Jodio dejja pojjeama jjejojo. ¡Jamatii nequicue, cuiishasha jehusejjajeya jjima tii! ¹⁹ Jjeya nei Jesosa nijje jjapeequianijo, Eyacuiñajjiya eseya jama ajjima ba'a: —¡Cuiishasha jehusejjajeya meecue! —po ajja eseya jjeya.

—¡A' cuishasha jehusejjajeya meejji! —po ajja pea'ai jjeya.

Chojja. Jjeya Jesosa nijje jjapeequianijo, Eyacuiñajjiya eseya jama acani ba'a: —¡Ecuea esohui jayojja jama ba'ecue! —ohuaya eseya acani.

²⁰ Jamajjeya ¡miquianaya Jesosa nijje jjapeequi jeahuajo jayojja jama anicue quea pame nee! Jama ba'a: ²¹ Eyacuiñajjiya miquianaya iyaa canajejo, beca cuana echacoji sosema' poanaje. ¡Jamaya anicue yeno'ama! Jamatii miya miquea echaco meseja nahue'amajo, poqui sa po majje ¡poquicue, miquea yajji chacoquicue! ²² Jamajjeya beca cuanaja echaco mese yanijo, ¡ojaya esohui jayojja jama cachaco cahua! Esejaya Emeshi Mese nei Jesosaa oya cuana iyaa cajje ca ca oya echaco mesema' jayojja jama jjashahuabaquime poani. ¡Jesosaja ejjashahuabaquijji jayojja jama ca'a cahua! Oya jayojjaya pea cuaa echaco mesema' nequiya chaco cani ojaya yajji. Jamatii Jesosa Quito oya cuana iyaa cajje ojaya ejjashahuabaquijji jayojja jama ca'a cahua pea'ai. Jama ba'a: Jesosa nijje jjapeequi jjimahuajo eseya eshahuaja echacoji sosema' poa ojjaña. Jesosaa iyaa majje eseya poqui mee canaje eshahuajo echaco majajji pojjeama. Jamajjeya Jesosaja ejjashahuabaquijji jayojja jama eja'a qui, esejaya Emeshi Mese nejja. ²³ E'e, Eyacuiñajjiya eseya jjeshe ca'yonaje quea nahue nee nee, Jesosa Quito esejo mano'yonaje sosejje. Jamajjeya ¡ojaya esohui jayojja jama atitiicue, onajaya pojjeama! ¡Ojo oe chacocue! ²⁴ ¡Ae shai po aninaje miquianaya Eyacuiñajjiya iyaa jjimahuajo? ¡Jamaya atitiicue quea bei! Eyacuiñajjiya miquianaya jaahuana cajje'yo quea pame nee.

Pea etehue'yo shacuima' nequi yasijje, ahuema'ani yasijje pea'ai

²⁵ Miquianajaya etehue'yojo yahuajo eya huohui'ajjanaje nequiaa jama ba'a: —¿Yajja acuae poaje shacuima' nequi, ahuema'ani pea'ai? —tehenaje nequiaa.

Maya esejaya Emeshi Mese nejya Jesosaa eya huohui jjima shacuima' nequijo, ahuema'anijo pea'ai. Eyaya ecuea ejjashahuabaquijji tehueña miquianajaya ebajji. Jamatii Eyacuiñajjiya eya babaca canaje esohui quea pame nee Jesosaja ehuhuijji. Ohuaya eya esohui e'e nei huohui meesahua cani tii pea'ai. Jamajjeya ¡ecuea esohui shajja'ajjacue!

²⁶ Jjeya Jesosaja epeeji pojjeamaa eseya napa cani quea huiso nee. Jamajjeya quea camaja eba'ejji. Jamajjeya epona cuana, jjeya nei miya ahuema'ani, ¡jamaya ba'ecue! Shacuima' nequi cuana pea'ai, ¡jamatii ba'ecue! Jamaya eya jjashahuabaquiani. ²⁷ Jamatii miquea ehuanase yanijo ¡a'a oya huejji! Miya shacuima' nequiya, ¡a'a ehuanase sajji! ²⁸ Eponajo jjahuanaqui sa poanijo miya quea mimishi pojjeama; jamaya quea pame. Epona, miya jjahueaqui sa poanijo quea pame, quea mimishi pojjeama pea'ai. Jamatii jjahuanaqui majje quea camaja poaje miquianajaya eba'ejji, bobijo, aquiana eba'ejji. Ehuanasejo quea huiso jjashahuabaqui majamajje. Ebacua quea huiso po majje quea camaja poaje. Eya ca ca shacuima' nequi. Eba'ejji jjashahuabaqui tiiti ajja. Jamajjeya miquianaya e jayojja nequianijo miquea eba'ejji camaja'ama pishana poaje.

²⁹ Ecuea epeeji cuana, eya jjashahuabaquiani jama ba'a: Epojja Jesosa Quitoja epoe o'oyajji beshahua nei apoa. Jamajjeya ¡a'a jjashahuaba tiitiqijji miquea ehuanase nejjo! ¡Jesosa Quitojo oe jjashahuaba neinei quicue! ³⁰ E'e, Jesosa Quito poe o'oyani. ¡Ojaya epoejjijo jjashahuaba tiiti quicue! Jamajjeya ¡a'a quea yeno po tiiti jji eba'ejji quea camajajo, emano'yojo pea'ai! ¡Quea bihui nee nee poani, a'a jjashahuaba tiiti quijji pea'ai! ¡A'a jjashahuaba tiiti quijji aquiana jjeshejjijo, meshi cuana jjeshejjijo pea'ai! ³¹ Echaco quea huisojo jjashahuabaquianijo ¡a'a Jesosa Quitojo jjashahuabaqui pajeya'yojji! Oya Jesosa poe o'oyajo jiquio meshi cuana, ojjaña aquiana cuana pea'ai chama'yo tii poaje'yo. ³² Jamajjeya ¡a'a miquianajaya aquiana quea huisojo jjashahuabaqui majamajji! Jesosaja epeeji shacuima' nequi jjashahuabaquiani Jesosa Quitojo, ojaya ejjashahuabaquijji

jayoja jama a sa neinei poani tii. ³³ Yahue ca ca jashahuabaquiani ojaya ehuanase quea bihui nee epo meejji. Jamajjeya oya quea huiso aquianajo jashahuabaquiani. ³⁴ E'e, shacuijji Jesosa Quito oe neijo jashahuabaqui tiitii ajja. Oya ojaya ehuanasejo quea huiso jashahuabaquiani pea'ai. Epona Jesosa Quitoja epeeji ahuema'ani Jesosajo jashahuabaquiani. Jesosaja ejjashahuabaquijji jayoja jama a sa poani. Ojo chaco sa neinei poani pea'ai. Oja yahue enequijo, ehuanase jashahuabaquiani quea huiso ojahue quea bihui po meejji. Jesosa Quito oe neijo jashahuabaqui tiitii ajja. Jamajjeya oya quea huiso aquianajo jashahuabaquiani. ³⁵ Jamajjeya epeeji cuana, eyaya jiquio esohui tehueña miqiana quea pame ba'e meesahuajji, mijo quea camaja epo meejji pojjeama. E'e, eyaya miqianaya jama ajjima ba'a: —iA'a jahuaequijji! iMiqianaya quea pona jea nee po majje jamatii a'a jahuanaquijji! —jamaya ecuea miqianaya huohui jjima. Chojja, eyaya miqianaya huohuiaña jama ba'a: —jjesosa nijje quea ja'a nee jjapeequicue! iOjaya esohui jayoja jama ba'ecue! iQuea huiso nee jashahuabaquicue Jesosajo, aquiana cuanajo pojjeama! iOnijje chacocue! —jamaya eyaya ña miqianaya.

³⁶ Shacuima' nequija ebajji eyaya jama tehueña ba'a: E'e pojja'a miqianaya yahuajo jama poa ba'a: —Ecuana ejjahuanaquijji pojjeama Jesosaja epeeji pojjeamaa ecuana quea huiso napa canijo. Quea camaja nee poaje —poa yahuajo.

Jamajjeya shacuima' nequi cuana, miquea eshiye mese ahuema'ani jaajaa epo, miya huana sa neinei poanijo jojo jahuanaquicue! Jamaya quea pame nee, mimishi'ama. ³⁷ Jamatii shacuima' nequi oja shiye nijje ojaya ejjashahuabaqui'yojijio jama poaje pojja'a ba'a: —Eya ca ca ña jahuanaqui sa po'yo ajja pea'ai. Eya quea pona jea nee pojjeama, quehuajje jjacojjoqui ajja nei nei —jamaya e'e jojo nei jashahuabaqui majje jamatii canequiahua oya cuana, jahuanaqui jjima tii. Jamaya quea pame nee nee. E'e, onaaya Jesosaja epeeji napa canijo, quea camaja poaje jahuanaqui majje. ³⁸ Jamajjeya shacuima' nequi cuana, miquea eshiye mesejo jahuanaqui majje miyaya quea pame ña. Eshiyese mese mi huana majje ca ca miyaya quea pame nee nee ña. E'e, miya Jesosajo nei jashahuabaqui sa poani.

Paboya esohui e'ahuemanojo

³⁹ Epeeji cuana, jiquio esohui eyaya tehueña Jesosaja epeeji e'ahuemanoja ebajji jama ba'a: Epona, imiqueahue eshe nequijo, onijje tii anicue! iA'a oya hueijji! iMiqueahue mano'yajo oe pea dejajo jahuaequi'yocue ca jahuaequi'yo sa po majje! jjesosaja epeeji jojo oe jahuaequi'yocue, epona cuana! ⁴⁰ Jamatii ecuea ejjashahuabaquijji e'ahuemanojo jama ba'a: Miqueahue mano'yajo, imee nei anicue, ahuema'ani jama! Jamaya miya quea bihui nee nee poaje'yo. Edojjoshahua Pameya eya jashahuabaqui meesahua canijo, ecuea esohui e'e nei.

8

¿A'a bobi eshahua e'ijji jaji nisho ba'ehuanasohua majje ijji caji?

¹ Yahuajo miqianaaya ecue bajji tehuena. Jama huohui'ajjame nequiaa ña anaje ba'a: —¿A'a noe eyacuiñajji nisho e'ijji jaji nisho, eshahua e'ijji jaji nisho pea'ai ba'e huanasohua majje ijji caji? ¿A'a e'ijji jaji pojjeama pojja'a? —eya huohui'ajjanaje nequiaa.

Jamajjeya jjeya eyaya miqianaya saja'aje jama ba'a: Pea cuaa bobi edahua'yo quia cani eyacuiñajji nisho huasijje, eshahua cuana huasijje pojja'a onijje ejjapeequijji, mase'ama epo meejji. Beca cuana jama poani ba'a: —Ecuana eba epana'yo acui ejehui'yo, meshi epana'yo pea'ai, Eyacuiñajji pojjeama. Jamajjeya maya bobi ijji ca'yojji.

E'e jojo nei. Jamatii jamaya poanijo miquea ejjashahuabaquijji quea pame pishana. Ojjaña miya ojjaña ba epo poso poanijo quea pame pojjeama poaje. Pea ejjashahuabaquijji quea pame nee nee jama ba'a: —iPea epeeji cuana ejja'asahuaqui quea pame nee! iQuea jaji nee ejjapo meequi!

² E'e jamaya quea pame. Pea cuana jama jashahuabaquiani ba'a: —Jamatii ecuea eba nei nei quea huiso.

Jamaya jashahuabaquianijo oya quea ja'a jashahuabaqui jjima. ³ Quea Eyacuiñajji jea nee poanijo ca ca, ojaya eba eseya ojaya epeeji nei poani.

⁴ Jamajjeya jjeya eyaya miqianaya huohuije bobijo, ma eshahua huasijje, eyacuiñajji nisho huasijje quia canijo. Quia majje pea cuaa bobi ijji cani. Eseyaya eba eyacuiñajji nisho acui ejehui'yo, meshi epana'yo pojja'a, Eyacuiñajji e'e nei pojjeama. Eyacuiñajji e'e jojo nei oe nei yani. Jamajjeya bobi eyacuiñajji nisho huasijje quia majje eshahua e'ijji jaji nisho ba'ehuanasohua ijji ca'yojji eseyaya. Jamaya quea mimishi poani pojjeama. ⁵ Pea cuana ca ca jashahuaba quehuabaquiani jama ba'a: —Eyajo, meshijo cuana pea'ai quea huiso eyacuiñajji yani.

Jamaya jshahuaba quehuaquianijo quea huiso cuaa eyacuiñajji nishojo chaco cani, eshahuajo pea'ai. E'e, acui ejehui'yo, meshi epana'yo pojja'a, eshahuajo pojja'a, emeshi mese pea'ai Eyacuiñajji poso acani pea cuaa. ⁶ Eseyaya ca ca eba Eyacuiñajji oe nei yani. Oya esejaya Chii ai. Ohuaya ohuaye nei ojjaña aquiana cuana pana ca'ya poa. Eseyaya onijje jjapeequiani, ojaya esohui shajja'ajjaña pea'ai. Jesosa Quito esejaya Emeshi Mese oe nei poani pea'ai. Yahuajo nei Eyacuiñajjiya Jesosa Quito nijjeya ojjaña pana ca'ya poa. Nequi mee cani pea'ai. Jesosa Quitohua eseyaya ba'e mee cani pea'ai, ojaya epeeji nei cuana.

⁷ E'e jojo nei Eyacuiñajji oe nei yani esejaya Chii ai. Jamatii jamaya Jesosaja epeejiya ba jjima beca cuanaja. Yahuajo Jesosa Quito ba jjimahuaajo onaaya bobi edahua'yo eshahua quea bihui po mee'yojji ijia canaje quea huiso. Jjeya ma bobi ijia majje oya cuana quea mete nee jshahuabaquiani jama ba'a: —¡Dee! Eya eshahuajo epeeji jayojja jama poani o'oya. Quea mimishi poani —jamaya eshahuajo jshahuabaquianijo, e'e, oya cuana quea mimishi poani.

⁸ Miquianaya quea quehua jshahuabaquiani jama ba'a: —Eyacuiñajji ecuanajo quea bihui nee pojjeama poaje, ca ojjaña bobi ijiañajo. Eyacuiñajji ecuanajo quea bihui nee pojjeama poaje, ca ecuaa pea bobi ijia ajjajo —poani beca cuana.

Chojja. Eyacuiñajji ese nijje quea bei poani Jesosa nijje jjapeequianijo, bobi ijiañajo pojjeama.

⁹ Epeeji cuana, jshajja'ajjacue mo! Miquianaya quea jshahuabaquiji ja'a. Jamajjeya bobi eshahuaja e'ijjiajji nisho eba'ehuanasohua ijia majje miquianajaya eba jamaya poani quea mimishi pojjeama. Jesosaja epeeji ca'a'ama cuana ca ca quea jshahuabaquiji ja'a pojjeama quea mimishi po o'oya mee chana'. ¹⁰ Jama po chana' ba'a: Miya eyacuiñajji nishojo equijo bobi ijia ani ba majje ohuaya ijia caje pea'ai pojja'a. Ijia'ijjia ani, oya jshahuabaquije eyacuiñajji nishojo, eyacuiñajji nisho bihuia cani poso oya quea ja'a pojjeama poaje. ¹¹ E'e, mi ba majje mi jayojja jama ma bobi ijia majje oya quea mete poaje: —E'e, eya eshahuaja bobi ijia majje quea mimishi po o'oyanaje —poso jbaabaquije.

Jamajjeya Eyacuiñajji onijje quea quene poaje poso oya quea yeno poaje. Oja mimishijo Jesosa Quito mano'yonaje pea'ai. Oya mique chahua jama. Jamajjeya jaya quea yeno po chanajo a'a maya noe ijiajji! ¹² Miquianaya Jesosaja epeeji cuana quea ja'a poani. Jamatii pea epeeji ja'a'ama quea bicho, quea mete poani mi jayojja jama po majje. Jamajjeya miyaya oya quea mimishi po meenaje. Jamajjeya Jesosa Quitohua miya ba cani ona mimishi po meeji jayojja, quea mimishi pea'ai. ¹³ ¡Bacue, oe! Pea epeeji quea mete, quea mimishi pea'ai poani eya maya noe ijiaña ba majje, eyaya maya noe e'ijjia o'oyajji pojjeama nei nei. Jamajjeya Jesosaja epeeji ja'a'ama quea mimishi epo meeji pojjeama nei nei. ¡E jayojja jama pocue; Jesosaja epeeji ja'a'ama a'a quea mimishi po meeji!

9

¿Achajja ba'e caji Jesosaja huoojea'yo esohui huohuijji?

¹ Ecuaa epeeji cuana Conitojo ba'e, eya ca iña e'e jojo nei Jesosaja huoojea'yo oja esohui huohuijji. Dejjaja huoojea'yo pojjeama iña iquio. Jesosaja epeeji quea ja'a nee ba'e meesahua sa aña nei nei. Yahuajo eyaya Jesosa banaje, esejaya Emeshi Mese nei. Esohui quea pame nee ojo eyaya huohuinaje miquiana huasijje. Shajja'ajja majje miquianaya ojaya epeeji poanaje. Maya miquianajaya eba. ² Jamajjeya e'e pojja'a pea cuana jama poani ba'a: —Pabo Jesosaja huoojea'yo pojjeama —poani.

Jamatii miquianajaya eya eba Jesosaa huoojea cani. E'e, miquianaya ojaya epeeji poanaje eya huohuijje. Jamajjeya quea huiso jama poani ba'a: —Conitojo ba'e cuana Jesosaja epeeji poanaje Paboja esohui shajja'ajja majje. Jamajjeya esejaya eba Eyacuiñajjiya Pabo huoojea canaje; ohuaya Pabo esohui huohui meesahua cani tii —poani cuana.

³ E'e, beca cuaa eya niñeba cani jama ba'a: —Pabo ca jja ca oma Eyacuiñajjiya huoojea'yo pojjeama.

Jamaya poajo, eyaya saja'aña jama ba'a: —Jesosaa ecuaa huoojea ca'yonaje ojaya esohui huohuiya —saja'ame aña.

⁴ E'e, eya Jesosaja huoojea'yo ojaya esohui huohuijji. Jamajjeya eyaya miquea bobi ijiaje sosema', eya sohuihuohuiaña sosejje. Jamatii eya jamaya po ajja nei nei. ⁵ Jesosaja esohui huohuijji cuana, oja chahua mese pea'ai ca ca ehuanase cuana nijje poquiani esohui huohuiya. Jamaya poani Peno pea'ai. Jamaya quea pame nee. Eya jamaya po sa po majje quea pame poaje, ca ehuanase Jesosaja epeeji poanijo. ⁶ Ojjaña Jesosaja huoojea'yo esohui huohuijji cuana esohuijo nei chacochoani tii, bobi yajjijo chacochoa ajja.

¿A'a ecuaaya oeyaya Benabe nijjeya cachacoahua bobi sosejje? ¿A'a ecuaaya oeyaya casohuihuohuiaña sosema'? ¿A'a jamaya quea pame? Eya ca ca jamaya poani ba'a: —Chojja; ecuanaya pea'ai casosequia cahua esohui huohuiaña sosejje —poani eya.

⁷ ¡Bacue! Emeshi meseja huoojea'yo, ona oja esohui shajja'ajja meeeji poani ohuaya sosequia caní ojo chaco canaje sosejje. Oya jayojjaya e'acui yiye meseya acuijajja ijia caní acui yiye chaco canaje sosejje. Ana'ai jaahuanajjiya tojjo na ishi caní jaahuana sosejje. ⁸ Jiquio ecuea esohui etehue'yo jayojja jama ojjaña poani. Jamaya ojjaña eba. Jamajjeya ecuana pea'ai cabobia cahua cuaa Eyacuiñajjiya esohui huohui sosejje. ⁹ Eyacuiñajjiya Moisesi yahuajo nei nei jama tehue meeme aca poa ba'a: "¡Ana'ai chacochoanijo bobiacue! Eso' quishihuojo poequiya tii ca'ijjia cahua; ja'a naba huoshojji!"

Jamaya yahuajo nei Eyacuiñajjiya tehue mee ca poa. Ohuaya Moisesi jamaya tehue meeme aca poa ana'ajjo nei pojjeama jashahuabaquianijo. ¹⁰ Ohuaya esejo jashahuabaquianijo pea'ai jamaya tehue mee ca poa. Oya jayojjaya que chacojji cuana, anoso sejjajji pea'ai chaco majje jama jashahuabaquiani ba'a: —Eyaya anoso sejjaj sosejje quijje yeje'yo ecuea equijo e'ijjajji.

¹¹ Jiquio ecua chacochojjiya jayojjaa ecuaaya miqianaya sohuihuohuinaje. Shajja'ajja majje Jesosaja epeeji poanaje. Jamajjeya jjeja ecuana bobi quijje esohui huohuinaje sosejje miqianaya quea pame nee poaje. ¹² E'e, pea esohui huohuijji sohuihuohui majje jama poani ba'a: —¡Ecuaa miqiana sohuihuohuinaje sosejje bobi, aquiana pea'ai che ecuana quiacue! —poani pea esohui huohuijji.

Jamaya quea pame. Ecuaya ca ca quea huiso nee esohui quea pame nee Jesosaja huohuinaje miqianajaya eshajja'ajjajji. Sosema'. Jamatii ecuanajaya miqianaya jama ajjima ba'a: —¡Aquiana mo che quiacue eya esohui huohuinaje sosejje! —ajjima ecuanajaya.

Chojja. Jamaya e'a jojjemo Jesosaja epeeji pojjeama siajje pome jama ba'a: —Pabohua ca jja ca esohui huohui caní quea huiso aquiana sosejje. Jamajjeya ecuana shajja'ajja sa po ajja —siajje pome.

Jamajjeya eya aema' jayojja jama ba'yani; esohui huohuiaña sosema' ojjaña eshajja'ajjajji.

¹³ Yahuajo nei nei Eyacuiñajjiya jama aca poa ba'a: —Jodio dejja cuaa Eyacuiñajjiya equijo chaco majje bobi Eyacuiñajji yasijje onaja quia ijia ca poa sosema'. Jodio etii cuaa Eyacuiñajjiya equijo huo dahua ca poa Eyacuiñajji quea bei epo meejji. Ma huo dahua tehuejea jjimahua ijia ca poa Eyacuiñajjiya equijo chaco caní sosejje.

Maya miquea eba. ¹⁴ Oya jayojjaya esejaya Emeshi Mese neiya Jesosaja huohui canaje ojaya esohui huohuijji cuanajo jama ba'a: —Sohuihuohui canijo, ¡sose quiacue ecuea esohui huohuijji! —poa.

¹⁵ Jamatii eya jamaya epojji pojjeama nei nei. Esohui huohuinaje sosejje bobi edojjji pojjeama. Jjeja esohui tehueña miqiana huasijje miquea bobi equia meejji pojjeama. Bobijo pojjeama eyaya esohui huohuiaña. Eyaya Jesosa Quitoja esohui huohui tiitiije sosema' miqianaya. ¹⁶ Eyaya huohuijji pojjeama jama ba'a: —Eyaya ca eya Jesosaja esohui quea pame huohuiaña; jamajjeya eya quea pame nee.

Chojja. Eyacuiñajjiya eya huoojea ca'yonaje Jesosa Quitoja esohui huohuiya. Esohui huohui ajja jjemo eya quea yeno nee nee pome, Eyacuiñajjiya eya quea nee nee po mee came pea'ai. ¹⁷ Eyaya jamatii ecuea ejjashahuabaquijji jayojja jama esohui huohuiaña jojjemo jama huohuime ba'a: —¡Sosequiacue mo esohui huohuiaña sosejje! —ame.

Yahuajo eya jashahuabaqui jjima Jesosaja esohui huohuijji. Chojja. Eyacuiñajjiya eya huoojea ca'yonaje ojaya esohui huohuiya. Eyaya ojo sosema' jayojja quea bihui nee chacoaña. ¹⁸ ¿Ae sa poani eya esohui huohuiaña sosejje? Eya bejjo, bobi pea'ai sa po ajja esohui huohuiaña sosejje. E shajja'ajjajji huohui jjima jama pea'ai ba'a: —¡Che mo bejjo quiacue eya esohui huohuiaña sosejje! —jamaya ecuea ajjima.

Chojja, eya quea bihui nee Jesosaja esohui quea pame nee huohuiaña sosema'. ¹⁹ Chama' dejja e huoojea'yojji esohui huohuijji. Chojja. Jesosa nije chaco sa poanijo eya chacochoani. Ojjaña jayojjico chacoaña. E'e, eyaya esohui huohuiaña ojjaña Jesosa nije ejjapeequi meesahuajji. ²⁰ Jamajjeya Jodio cuana nije ba'yani, o jayojja jama ba'yani eya Moisesija etehue'yo jayojja jama aña pea'ai. Jamajjeya ohuaya ecuea esohui Jesosa Quitoja shajja'ajja caje'yo pojja'a. Moisesija etehue'yo jjamimicuijje nobiajeaqui ajja onijje. ²¹ Oya jayojjaya Jodio pojjeama cuanaja Moisesija etehue'yo ba jjimajo, eyaya onijje nequiya ohuaya jayojjaya jama aña. Moisesija etehue'yo huohui ajja. Chojja. Eyaya esohui quea pame nee Jesosaja huohuiaña ona Jesosa nije jjapeequi meesahuajji. Jamajjeya Jesosaja esohui jama po majje Eyacuiñajjiya ejjashahuabaquijji jama aje pea'ai. Eya ca ca Eyacuiñajjiya esohui jayojja jama ba'yani tii, shajja'ajjaña tii tii. Jesosa Quitoja. Jamajjeya Eyacuiñajji quea bihui nee poani enijje. ²² Jesosaja epeeji quea jashahuabaqui ja'a pishana nije ba'yani eya o jayojja jama poani, Jesosa nije ejjapee neineiqui meesahuajji.

E'e, Jesosa nijke ejjapeequi meesahuajji eyaya ojjaña joya e pejejo ba'e nijke jjapeequiani. Eyaya aje oe ojjaña pea cuana Jesosaja epeeji quea ja'a po meesahuaña.

²³ Jamaya eyaya aña ojjaña cuana esohui quea pame nee Jesosa Quitojo eshajja'ajja meeji. Jamajjeya eya quea bihui nee jjapeequiani Jesosaja epeeji eyacua cuana nijke.

²⁴ ¡Jjashahuabaquicue esho'iquiana quebani poanijo! Ojjaña cuajicuaiani aquiana iñajji sosema'. Oe esho'i quea cuejipashi nee nee ebionei poeje. Oya oe nei iña mee caje aquiana sosema'. Jiquio ecua esho'iquiana quea cuejipashi nee cuajicuaiani aquiana iñajji jayojja jama ¡miquianaya Jesosa Quito nijke jjapeequicue quea pame nee nee! ¡Ojaya esohui jama acue! Jamajjeya quijje ohuaya miquianaya quea pame nee ba'e tiiti mee caje'yo.

²⁵ Ojjaña esho'i cuana janobajjima nei cuajicuañi huicha'a huicha'ani, jjashahuabaquiani quea cuejipashi nee epojji, aquiana e'iñajji. Jamatii ma aquiana quijje pishana chama'yo tii poaje'yo. Jesosa nijke jjapee neinei quiajo ca ca quijje ohuaya eseya quea pame nee nee sosequia caje'yo, eba'eji quea pame nee nee epo tii tiijji. ²⁶ Jamajjeya eya Jesosa nijke jjapee neinei quiani. Jjashahuaba tiiti quiani. Eya poqui ajja cojjama' jama; deja ehoo jama poqui ajja, eya. Ecuea eba Jesosaja esohui quea pame nee nee. ²⁷ Jesosaja epeeji quea pame nee, quea ja'a nee epojji eya jjashahuabaquiani quea huiso. E'e, ojaya esohui huohui huicha'a huicha'a majje eya quea bicho nee nee pome Jesosaja epeeji pame'ama po majje. Jama poajo Jesosa Quitohua quijje eya esosequia'yojji pojjeama. Eya ba caje ohuaya epeeji quea mimishi.

10

¡Etiiquiaa jayojja a'a eyacuiñajji nisho ajji!

¹ Ecuea epeeji cuana, jiquio esohui shajja'ajjacue! Yahuajo nei nei ecuanaja etiiquiana Moisesi nijke meshi jabojo poquianijo, Eyacuiñajjiya jaahuana ca'ya poa. Eyajo ona biasije bo ai nequi mee ca'ya poa eshequia edahua ca poani jjejojo. Poquianijo bae huo'o huasijje poe'yanaje; bae yiyesamaje ejiojji quea jabo nee po mee majje, ojjaña tii ojee ojje miji yasijje poqui meesahua ca'ya poa quea pame nee ejiojijje. ² Yahuajo nei bo quimejjeje poquianijo, bae huo'o ojje miji yasijje poquianijo pea'ai ecuanaja etiiquiana Moisesija esohui shajja'ajja ca poa. Jamajjeya onajaya emeshi mese po'ya poa Moisesi. Oya jayojjaya jjeya eseya enajo besa mee caje Jesosaja esohui jayojja jama eba'eji. ³ Yahuajo nei meshi jabojo Eyacuiñajjiya bobi pahui jayojja oque mee ca'ya poa meshi yasijje ojjaña etiiquianaja e'ijjajji. ⁴ Ena chama' poajo, Quitohua ena jamatii cuaya meequi ca'ya poa bajjoojje etiiquianaja e'ishijji.

Jamajjeya Quitohua ojaya epeeji cuana jaahuana cani. Etiiquiana Quitojo jama poa ba'a: —Oya ecuanaja nijke poquiani, de; ohuaya ecuanaja jaahuana cani. Jamajjeya ohuaya bajjoojje ena cuaya meequi canaje —poa.

⁵ Jamatii aje oe beshahua nei ojjaña ecuanaja etiiquiana quea mimishi po tiitia poa. Eyacuiñajji bihuia jjima aca poa. Eyacuiñajji quea quene ona nijke poa. Jamajjeya beshahua nei ojjaña mano ca'ya poa meshi jabojo tii.

⁶ Eyacuiñajjiya etiiquiana quea mimishi nee nee mano mee ca'ya poa ese jjabahuejjaquiji, mimishijo quea mete epojji. Jamajjeya mimishi cuana a sa po ajja poaje'yo eseya. ⁷ E'e, ecuanaja etiiquiana eyacuiñajji nisho nijke, acui ejuhui'yo nijke, esahua nijke pea'ai mimi ca'ya poa. Eyacuiñajjiya esohui yahuajo nei etehue'yo jama poa ba'a:

“Yahuajo oya cuana ijja'ijja majje, ishi'ishi majje pea'ai majamaja ca poa esahua nijke jjapeequiani”.

Jamaya yahuajo poa.

¡A'a ona jayojja jama quea mimishi pojji esahua nijke! Jamaya quea tai. ⁸ Etiiquiana cuana aje oe onaja ehuanasejo jaanaje, onaja yahuejo jaanaje. Quea mimishi nee nee poanijo, Eyacuiñajjiya oya cuana quea huiso nee nee, 23.000 mano mee ca'ya poa oya pojajajo tii. Jamajjeya ¡a'a jja oe ona jayojja jama pojji! ¡A'a onajaya ehuanasejo, yahuejo pea'ai ba'eji! ⁹ Ecuanaja etiiquiana cuana jjashahuabaquia poa jama ba'a: —Ecuanaja quea mimishi poajo, e'e pojja'a Eyacuiñajji quene'ama poaje ecuanaja mimishi cuanajo —jamaya poa, de.

Chojja. Quea mimishi poajo, Eyacuiñajjiya peyo cuana huoojea ca poa ona ijjaia. Jamajjeya ¡etiiquiana jayojja jama a'a pojji! ¹⁰ Ecuanaja etiiquiana cuaja Eyacuiñajji niñeba ca poa. Jama poa ba'a: —Eyacuiñajjiya ecuanaja quea pame nee ejaahuanajji pojjeama —aca poa.

Eyacuiñajji niñeba canijo, ohuaya ojaya esohuidojojji quea ca'ya cuana huoojea ca'ya poa o niñebajji cuana mano mee'yohua. Jamajjeya ¡etiiquiaa aca poa jayojja jama niñebame a'a ajji Eyacuiñajji!

¹¹ ¡A'a pajea'yojji! Ecuanaja etiiquiana quea mimishi poaninajejo mano ca'ya poa yahuaajo nei. Jamaya Eyacuiñajjiya amajje esohui tehue mee ca poa esejaya ebajji. Jamajjeya jjeja ba mee cani e'e jojo nei oya quea quene poaje esejaya mimishijo. Jesosa Quito pojjja'a jjeja poeje o'oya. ¡Jamajjeya etiiquiana quea mimishi nee nee poa jayojja a'a pojji!

¹² E'e pojjja'a beca cuana quea quehua jjashahuabaquiani jama ba'a: —Eya quea pame nee poanijo eshahuaa eya quea mimishi epo meejji pojjeama.

Chojja. ¡Jamaya jjashahuabaquicue ba'a: —Eyacuiñajji, ¡eya quea pame po meesahuacue! ¡Nahue neineicue mo; quea mimishi a'a po mee o'oyajji! —jamaya Eyacuiñajji nijje mimicue!

¹³ Eshahuaa ojjaña quea mimishi po mee sa acani. Ohuaya miquianaya quea mimishi po mee sa acani. Jamatii Eyacuiñajjiya miquianaya epajea'yojji pojjeama. Ohuaya miquianaya ojaya epeeji quea pame nee po mee canijo, eshahuaa miya quea mimishi epo mee'yojji pojjeama. Beshahua nei quea mimishi po mee canijo, ¡Eyacuiñajji nijje mimicue: —Jesosa, ¡eshahua quea huesha nee huoojeacue! ¡Eya quea pame po meecue mimishi'ama epojji! —jamaya pocue!

Jesosaja bobi ijiañaajo ¡a'a eshahuaaja epeeji jama pojji!

¹⁴ Jamajjeya ecuea epeeji cuana, ¡eshahuaaja epeeji cuana nijje a'a jjapeequijji! ¡Onaya eshahuaa nijje mimiani yasijje a'a poquijji! ¡Epana'yo cuanaajo a'a jjashahuabaquijji pea'ai! ¹⁵ Ecuea eba miquianaya quea jjashahuabaqui ja'a nee poani. Jamajjeya ¡ecuea esohuijo jjashahuaba neineiquicue, quea ja'a nee! ¹⁶ Eseyaya Jesosaja bobi ijiaña oya esejaya mimishijo mano'yonaje pajea'yo jjima yajji. Jesosaja bobi ijia jjimahuaajo, oja ena ishi jjimahuaajo pea'ai eseya Eyacuiñajji nijje emimi jama ba'a: —Eyacuiñajji, miya quea pame nee nee.

Ma ena ishi jjimahuaajo Jesosa Quitoja ena' ecua'yojo eseya ejjashahuabaqui jama ba'a: —Jesosa mano'yonaje ecuea mimishi cuijea'yojji sosejje —jamaya jjashahuabaquime epo.

Pahui ijia jjimahuaajo eseya ejjashahuabaqui Jesosa Quitoja yamijo jama ba'a: —Jesosa Quito eseya ojaya epeeji quea pame nee epo meejji sosejje mano'yonaje.

¹⁷ Pahui mijisisi jjimahuaajo oe pahui yani. Eseyaya Jesosaja epeeji cuana quea huiso. Jamatii pahui oe jayojja jama eseya poani. E'e, eseya ojee nequianijo eseye nei jayojja nequiani Jesosa Quito nijje nei jjapeequianijo.

¹⁸ ¡Jashahuabaquicue ecuanajaya etiiquianajo, Jodio cuanaajo! Oya cuana yahuaajo nei jama poa ba'a: Eyacuiñajji nijje emimijji cuaa noe Eyacuiñajji yasijje equia'yo dahua ca poa. Noe dahua tehuejea jjimahuaa ijia caninaje Eyacuiñajji nijje jjapeequianiyani jjejojo. ¹⁹ ¿Ajeo acuae eyaya miquiana jama huohuiaña, ae ba meesahuajji? Jama ba'a: Bobi eyacuiñajji nisho huasijje quia majje dejja cuaa jamatii ijia cani. Eyacuiñajji nisho eshe pojjeama, Eyacuiñajji e'e jojo nei pojjeama, de. ²⁰ Jamatii eshahuaaja epeeji cuaa bobi quia cani eyacuiñajji nisho epana'yo huasijje pojjeama. Maya eshahuaa cuana huasijje quia cani. Jamajjeya oya cuana Eyacuiñajji e'e jojo nei nijje jjapeequi ajja. Miquianaya Jesosaja epeeji cuana, ¡a'a eshahuaaja epeeji jayojjaa jama ajji! ¡A'a eshahuaa cuana nijje pojji! ²¹ Jesosa Quito nijje jjapeequianiyani ¡eshahuaa cuana nijje a'a jjapeequijji! Pea oya, de. Jamajjeya Jesosaja ena ishianajo, oja bobi ijiañaajo pea'ai ¡bobi eshahuaa huasijje equia'yo a'a ijia pea'aijji! ²² Eshahuaa cuana Eyacuiñajji boti'ama nei nei. ¡A'a esejaya Emeshi Mese nei Eyacuiñajji quea quene po meejji eshahuaa nijje jjapeequianijo! ¿A'a miya quea ca'a nee poso jjabaquiani? ¿A'a ya Eyacuiñajji ca'a'ama poso aña? Jamajjeya Jesosa nijje jjapeequiani ¡a'a eshahuaaja epeeji po pea'aijji!

²³ Jesosa Quitoja epeeji beca cuana jama mimiani ba'a: —Eya Jesosaja epeeji poanijo ojjaña bobi, epana'yo huasijje quia'yo pea'ai ijia majje quea mimishi pojjeama poani —jamaya poani.

E'e jojo nei. Jamatii eyaya miquianaya saja'aña jama ba'a: —Chojja. Ma bobi ijia majje quea pame pojjeama poani. Maaya ojjaña Jesosa nijje jjapeequi meesahua ajja. Miquianaya jama jjashahuaba quehuaquiani pea'ai ba'a: —Ecuaya ojjaña aje mimishi'ama poanijo.

Eyaya ca ca miquianaya huohuiaña jama ba'a: —Ojjaña quea pame pojjeama e'ajji. ¡Jesosaja epeeji quea ja'a pojjeama cuana quea mimishi po mee o'oya chana! ²⁴ Jamajjeya a'a quea quehua jjashahuabaquijji jama ba'a: —Eyaya ojjaña bobi jjesheje ecuea e'ijjiajji —jamaya poanijo miquianaya Jesosaja pea epeeji cuanaajo jjashahuabaqui ajja.

Chojja. ¡Jashahuabaquicue pea cuana Jesosa nijje ejjapeequi meesahuajji quea ja'a nee! ²⁵ Jamajjeya noe edahua'yo jjesheañajo ¡a'a huohui'ajjajji jama ba'a: —¿A'a ¡iquio noe edahua'yo eshahua huasijje quia? —a'a jamaya huohui'ajjajji!

Jamajjeya ¡míyaya maya ijjiacue quea bihui nee, mete'ama! ²⁶ E'e, Eyacuiñajji esohui etehue'yo jama poa ba'a:

“Eyacuiñajjiya ojjaña meshi cuana pana ca'ya poa. Ojjaña aquiana pea'ai pana ca'ya poa. Jamajjeya ojaye nei meshi, aquiana pea'ai, ojjaña”.
Jamaya poa yahuajo nei.

²⁷ E'e pojja'a Jesosaja epeeji pojjeamaa miya iyaa caje ojaya equi yasijje bobi ijjiiaa. Jamajjeya ojaya equi yasijje poqui majje ¡bobi ijjiacue mete'ama! Ijji'a'ijjianiyo ¡a'a huohui'ajjajji jama ba'a: —¿A'a ¡iquio noe edahua'yo eshahua huasijje quia? —a'a huohui'ajjajji! ¡Jamatii ijjiacue mete'ama!

²⁸ Jamatii ojee ijji'a'ijjianiya, pea eseja epeejiya miya jama huohui caje pojja'a ba'a: —¡iquio bobi eshahua huasijje quia —jamaya acaje ¡a'a maya bobi ijjiajji! Ma bobi quea pame nee e'ijjiajji. Jamatii miya Jesosaja epeeji neiya ma bobi ijjiña ba majje esejaya epeeji quea yeno poaje pojja'a. ¡A'a oya quea yeno, quea bicho po meejji! ²⁹ E'e, miya Jesosaja epeeji quea pame poaniya ijjiaje mete'ama. Jamatii mi ba majje Jesosaja epeeji quea ja'a pishana quea mete po chana' miyaya ma bobi ijjiajo. Jamajjeya ¡a'a ijjiajji! ¡Oya quea bei po meecue; miya pea'ai quea bei pocue!

E'e pojja'a beca cuaa huohui caje jama ba'a: —Eyaya Jesosaja epeeji poaniya ojjaña bobi ijjiña mete'ama —acaje.

Eya ca ca jama po ajja. Pea cuana quea ¡jashahuabaqui ja'a pojjeamajo quea mete poanijo, eyaya ojjaña bobi ijji ajja.

E'e pojja'a onaaya jama acaje pea'ai ba'a: ³⁰ —E'e, eyaya Eyacuiñajji bihuliaña ojjaña bobi ijji ¡jimahuajo. Jamajjeya eyaya ojjaña bobi ijjiña mete'ama. Bobijo eyaya Eyacuiñajji bihuliaña; jamajjeya ¡a'a enijje mimijajji eya ojjaña bobi ijjiñaajo! —jamaya acaje pojja'a onaaya.

³¹ Jamajjeya ¡iquio esohui bacue! Miyaya bobi ijjiñaajo, e'ishijji ishiañaajo pea'ai ojjaña miqea eba'ejjiyo pea'ai ¡jashahuabaquicue jama ba'a: —Eyaya ojjaña cuana Eyacuiñajji bihulia mee sa aña.

³² Jamajjeya ¡quea ja'a nee ba'e tiiticue! ¡A'a esejaya epeeji cuana quea mimishi po mee o'oyajji! ¡odio cuana, Jodio pojjeama, Jesosaja epeeji cuana pea'ai a'a quea mimishi po mee o'oyajji! ¡E'e, quea ja'a nee ba'ecue ojjaña cuana Jesosa niñe quea ja'a nee ejjapeequi meesahuajji! ³³ ¡E jayojja jama pocue! Eya ¡jashahuabaquiani ona quea bei po meesahuajji. Eya ¡jashahuabaqui ajja jama ba'a: —¿Ae shai ejo quea pame?

Eyaya ca ca ojjaña quea bei po mee sa aña. Jamaya eyaya aña ojjaña Jesosaja epeeji epojji.

11

¹ Eyaya Jesosa Quitoja esohui jayojja jama aña. ¡Jamajjeya e jayojja jama pocue miqianaya!

Esohui Eyacuiñajjiya equi yasijje dobiqianijo

² Ojjaña pojjaajo miqianaya ejo ¡jashahuabaquiani. Ecuea esohui jayojja jama po tiitiani, miqianaya. Jamaya quea pame. ³ Jamatii ¡ecuea esohui etehue'yo ba neineicue yahue cuana, ehuanase cuana pea'ai! Yahue cuana ojaya ehuanase huooejaji poani. Jesosa Quito ojjaña huooejaji poani tii, dejja cuana huooejaji poani, ojaya epeeji cuana huooejaji poani. Ojaya Chii Eyacuiñajji eyajo ani Jesosa Quito huooejaji poani pea'ai.

⁴ Jamajjeya dejja cuana, Eyacuiñajjiya equijo nequi onijje mimianijo, oja sohui huohui canijo pea'ai ¡ejaahuojja cajjajea'yocue! Jaahuojjajjiya Eyacuiñajjiya esohui huohui canijo Jesosa Quito cajaa ajji jayojja jama poani. ⁵ Epona cuana ca ca Eyacuiñajjiya equijo ani onijje mimianijo, ojaya esohui huohui caqui pea'ai ¡jasapataquicue! E'e, epona ¡jasapataqui ajjajo oja yahue cajaa ajji jayojja jama poani. Jamajjeya ¡jasapataqui ajjajo esao cobojea majje jayojja jama poani, quea bicho poani. ⁶ E'e, epona ¡jasapataqui ajjaa ¡jejojo cacobojea cahua. Jamatii epona esao cobojea majje quea bicho nee nee poaje. Jamajjeya bicho'ama epojji epona cajjahuoja taquiahua Eyacuiñajjiya equijo mimianijo.

⁷ Dejja cuaa, Eyacuiñajjiya epeejiya ejaahuojja iya ajja Eyacuiñajjiya equijo esohui huohui canijo. E'e, Eyacuiñajji dejja cuanaajo jama poa ba'a: —Dejja cuana ojjaña e'acquana mese poaje ojjaña aquiana meshijo ani. Jamaya Eyacuiñajjiya ojjaña ba mee caje ohuaya dejja pana ca'ya poa quea pame nee oya jayojja jama epojji. Jamajjeya ¡a'a epona jama pojji! ¡A'a ¡jahuojjataquiji nequiana dejja! Oya jayojjaya epona oja yahueja esohui jayojja jama acani oja yahueja yajjiyo. ⁸ Eyacuiñajjiya dejja ebionei pana coo ca'ya poa. Dejja pana majje quijje epona pana ca'ya poa dejjaja edojjojanijji sa'. ⁹ Eyacuiñajjiya dejja pana ¡jima eponaja yajji. Chojja. Epona pana ca'ya poa dejjaja yajji. Dejja epona huooejaji poa. Jamaya Eyacuiñajjiya a sa ca'ya poa. ¹⁰ Jamajjeya Eyacuiñajjiya esohuidojojji cuaa eseya ba canijo, epona cuana cajjahuojjataquiahua Eyacuiñajji niñe ojee mimianijo. Jamajjeya ojjaña ba cani yahue huooejaji poani.

¹¹ Jamatii jjeya Emeshi Mese nei Jesosa nijje jjapeequi majje ehuanese cuaa yahue cuana ba'e meesahua cani Jesosa Quitojo. Yahue cuaa ehuanase jaahuana cani pea'ai. ¹² E'e, yahuaajo nei nei dejja pana majje quijje Eyacuiñajjiya epona pana ca'ya poa dejjaja edojjojanijji sa', ebionei epona. Jjeya ca ca dejja sho'i cuana eponaja mejo cuayani. Jamatii Eyacuiñajjiya ojjaña pana ca'ya poa, ojjaña nei nei.

¹³ Jamajjeya ijashahuabaquice epona cuanaajo! ¿A'a ojjaña ojee Eyacuiñajji nijje mimianijo epona camimiahua jjahuojjataqui jjiima? ¿A'a jamaya quea pame nee? Chojja, quea pame pojjeama. ¹⁴ Ecuanaaja eba dejja cuana saojji quea pame pojjeama. Epona jayoija poani, saojji. ¹⁵ Epona saojji ca ca quea pame nee nee. Eponaja esao a ojava ejjahuoija taquijji jayoija. Jamaya Eyacuiñajjiya quea boti nee nee. ¹⁶ E'e pojja'a eponaja esao oja, ejjahuojjataquijjiyo pea'ai pea cuana jjamimicuiajea nobiajeaqui sa poani enijje. Jamatii ecuea esohui jiquio jama ba'a: Epona cuana Eyacuiñajjiya equijo cajjahuojjataquiahua. Jesosaja epeeji cuaa ojjaña cuiñajjiyo ba'eya jamaya huohui cani pea'ai.

¡Pea Jesosaja epeeji cuana nijje a'a quea mimishi pojji!

¹⁷ Ecuea epeeji cuana, jjeya pea esohui eyaya tehueje miquianaya ebajji. Miquianaya Eyacuiñajjiya equijo ojee anijo quea pame pojjeama poani. Ojjaña cuana Jesosa nijje quea ja'a nee jjapeequi meesahua jjiima. Pea epeeji cuana ca ca quea yeno po mee aña. Jamajjeya eyaya miquianaya huohuije Eyacuiñajjiya equijo quea ja'a nee epojji. ¹⁸ Pea cuaa eya huohui canaje jama ba'a: —Jesosa Quitoja epeeji cuana Conitojo ba'e Eyacuiñajjiya equijo ojee jjachichaqui majje jjamimicuiajea nobiajeaquiani. Oe pojji epeeji cuaa pea epeeji cuana nijje jjapeequi sa po ajja acani cuaa —jamaya acani cuaa.

E'e pojja'a miquianaya jamaya quea tai poani. ¹⁹ Jesosaja epeeji quea bei pojjeama mimicuiajea nobiajea sa poani, pea nijje jjapeequi ajja. Jamaya quea tai. Jamatii jamaya poanijo, ojjaña ba caje ache dejja cuana Jesosaja epeeji e'e jojo nei pojjeama, ache oja epeeji e'e jojo nei ba caje pea'ai. ²⁰ E'e, miquianaya ca mi ca oe Eyacuiñajjiya equi yasijje dobiquiani esejaya Emeshi Mese nei Jesosaja bobi ojee ijjiiaa poso. Chojja, Jesosajo miquianaya ijashahuabaqui ajja, oya esejo mano'yonajejo jashahuabaqui ajja. ²¹ Ojee ijjiia'ijjiia ajja pea'ai miquianaya. Chojja, pea cuana ishoa ajja. Jamajjeya beca cuaa quea huiso ijjiia cani. Quea huiso ishi cani pea'ai, quea jeje nee nee poani. Pea cuana ca ca quea shoe nee poani. ²² Jamajjeya bobi quea huiso ijjiia sa poanijo imiquianajaya equijo ijjiia'ijjiia socue! ¡A'a Eyacuiñajjiya equijo quea dejja tai pojji! ¡Jesosaja epeeji aema' a'a quea bicho po meeji ojava bobi quea huiso chamajo! Eyacuiñajjiya equijo quea tai añaajo, eyaya ojjaña miquianaya tecueña jama ba'a: —¡Eyacuiñajjiya equijo ani a'a Jesosaja epeeji quea mimishi ajji bobijo!

¡Jesosaja bobi e'e jojo nei ijjiacue o pajea'yo jjiima yajji!
(Mateo 26.26-29; Macoso 14.22-25; Noca 22.14-20)

²³ Eseyaya Emeshi Mese neiya Jesosaa eya ba mee canaje jiquio esohui oja bobi ojee e'ijjiiajjiyo, oya esejaya mimishijo mano'yonaje pajea'yo jjiima yajji. Maya yahuaajo eyaya huohuinaje jama ba'a: —Oe mecajje esejaya Emeshi Mese nei Jesosaja epeeji nishohua oya quia canaje dejja maseja equecua'yojji. Iña majje dojo canaje cuaa. Iña jjimahuajo Jesosaa oe pahui jjeshe canaje. ²⁴ Eyacuiñajji bihuia majje pahui mijisisi canaje. Ojava epeeji cuana jama huohuime acanaje ba'a: —Jiquio pahui emijisisi ecuea eyami. Eya miquianajaya mimishi cuanao manaje'yo. Jamajjeya jiquio pahui ijjiia'ijjiia miquianaaya eya miquianajaya mimishijo mano'yonaje pajea'yo jjiima yajji —Jesosa poanaje.

²⁵ Pahui ijjiia majje Jesosa Quitohua caneco jjeshe canaje. Eyacuiñajji bihuia ca o'oyanaje. Huohui canaje jama ba'a: —Jiquio ena canecojo nequi ecuea ena'. E'e, ecuea ena' cuayaquije'yo. Eya ojjaña mimishijo manaje'yo. Jamajjeya Eyacuiñajjiya miquianaya huohui caje, ma ohua miquianajaya mimishi cuana cuijea caje'yo e mano'yajo, ma oja yahuaajo huohui jjiima. Jamajjeya jiquio ena canecojo nequi ishianajo jashahuaba tuitiquice jama ba'a: “Jesosa mano'yajo oja ena' cuayaquinaje ecuea mimishi cuijea'yojji” jamaya acue —Jesosaa acanaje.

²⁶ Jiquio pahui, ena canecojo nequi pea'ai Jesosa Quitoja bobi poani. Jamajjeya ojee ojava bobi ijjiiaña o shahuaba poquiajji, ma oya esejaya mimishijo mano'yonaje. ¡Jamaya acue esejaya Emeshi Mese nei Jesosa Quito poe o'oya jjimahuajo! ²⁷ Jamajjeya esejaya Emeshi Mese nei Jesosaja bobi, pahui ijjiiaña ojava ena canecojo nequi pea'ai ojee ishianajo ¡a'a quea dejja tai pojji! ¡Quea nishelui a'a pojji! ¡A'a quea mimishi jashahuabaquijji pea'ai! Jamaya poanijo Jesosa quecua'yojji jama poani miya. Eyacuiñajjiya quea nee nee po mee caje'yo. Jamajjeya quea ja'a jashahuabaqui ajjaa ja'a Jesosaja bobi ijjiiajji, ojava ena canecojo nequi pea'ai a'a ishijji! Quea ja'a ba'yanija ¡quea bihui nee Jesosaja bobi ijjiacue, ojava ena ishucue pea'ai!

²⁸ Jamajjeya Jesosaja bobi ijia jjimahuajo, ¡ojaya ena ishi jjimahuajo pea'ai jashahuaba neineiquicue jama ba'a: —¿A'a eya e'e jojo nei Jesosa Quito nije japeequiani quea ja'a nee? —jjashahuabaquicue!

¡Majoya pahui ijiaque, e'ishijji ishique quea bihui nee pea'ai! ²⁹ Jesosa Quitoja esohui ojaya bobijo miquea quea quehuajo ¡a'a ijiajji! Jesosa mijo mano'yonajejo jashahuabaqui jima ¡a'a oja bobi ijiajji! Miya ijiajo Eyacuiñajji quea que nee nee po chana'. Miya quea nee po mee caje. ³⁰ Quea huiso miqiana nije nequiya Jesosajo jashahuabaqui jima oja bobi ijia cani. Jamajjeya quea mano poani, beca cuana ca'a'ama poani. Jamajjeya beca cuana mano'yonaje pea'ai. ³¹ Miquea eba'ejji jashahuabaqui majje ¡mimicue Eyacuiñajji nije jama ba'a: —¡Ecuea mimishi cuana cuijea'yocue! —jamaya acue!

Jamajjeya Eyacuiñajjiya miquea mimishi cuijea'yo majje miya etecueajji pojjeama Jesosaja bobi ijiañajo. ³² Jamatii Eyacuiñajjiya jjees Jesosaja epeejji quea ja'a pishana quea mano, quea nee po mee cani ejbahuejaqui meeji, mimishi cuana epajea mee'yojji. Jamajjeya quijje Jesosaja epeejji pojjeama cuana nije equiyo'yojji pojjeama cuaquijo eshahuaja epeejji cuana nije.

³³ Jamajjeya epeejji cuana, ¡shajja'ajjacue mo! ¡Miquianaaya Jesosaja bobi ijiañajo ojee oe ijiaque o shahuaba'yojji! ¡A'a mee nei ijia'ijiajji; ishoa socue cuana! ³⁴ Ojjaña joya quea naba taja, quea shoe pea'ai poani equijo ca ijia'ijiahua Jesosaja bobi ijia jjimahuajo. Jamajjeya Eyacuiñajji quea tecue po aja miqiana nije, quea pame nee ojee Jesosaja bobi ijiañajo.

Miquea esohui etehue'yojo, quea huiso eya miquiaaya huohui'ajjanaje. Maya eyaya huohuje miqiana huasijje poe o'oya majje.

12

Edojjoshahua Pameya eseya Eyacuiñajji chaco meesahua cani

¹ Ecuea epeejji, miqianajaya esohui etehue'yojo eya huohui'ajjanaje miquiaaya Edojjoshahua Pamejo. Jjees nei eyaya maya huohuje miqianajaya ebajji. Edojjoshahua Pameya eseya Eyacuiñajji chaco meesahua cani. Ojjaña Eyacuiñajji ejjashahuabaquiji jayojja jama ameesahua cani. ² Yahuajo Jesosa Quito nije japeequi jimahu miqianaya japeequinaje eshahua cuana nije. Eyacuiñajji nisho nije miminaje, acui ejehui'yo nije pea'ai. Maya shajjama', nabama' pea'ai. Jamaya miqianajaya eba. ³ Beca cuana jama siajje pome poani ba'a: —Jesosaja siajjepojji. Oya Eyacuiñajji Bacua Eja pojjeama —jama siajje pomeya poani.

Jamajjeya miqianajaya eba oya cuana Edojjoshahua Pame nije japeequi aja. Onije japeequianijo ca ca Edojjoshahua Pameya oeyaya eseya huohui meesahua cani jama ba'a: —Eseyaya Emeshi Mese nei oe nei nequi. Jesosa Quito —e'e, jamaya Edojjoshahua Pameya oeyaya eseya huohui meesahua cani.

⁴ Edojjoshahua Pame oe neiya eseya amee cani Eyacuiñajji quea pame nee. Oe epeejji oe aquiana quea pame nee Eyacuiñajji ameesahua cani. Beca cuana pea aquiana quea pame nee ameesahua cani. Quea huiso aquiana cuana Eyacuiñajji ameesahua cani Edojjoshahua Pameya. ⁵ Eseyaya Emeshi Mese oe nei yani. Ojaya nei yajji eseyaya chacoaña. Ohuaya ojaya epeejji cuana huoojea cani quea huiso ojaya yajji quea pame a'yohua. Ojaya yajji ohuaya chaco meesahua cani ojjaña echaco. ⁶ Eyacuiñajji oe nei yani. Ohuaya Jesosaja epeejji cuana huoojea cani ojaya echacoji cuana a'yohua. Oe epeejji oe echacoji ameesahua cani, Eyacuiñajjiya. Pea epeejji pea echacoji ameesahua cani. ⁷ Edojjoshahua Pameya Jesosaja epeejji cuana quea pame ameesahua cani pea'ai. Jamajjeya ojjaña ba mee caje oya ese nije nequi. E'e, ohuaya Jesosaja epeejji cuana quea ja'a ameesahua cani ojjaña Jesosa nije ejapeequi meesahuajji. ⁸ E'e, Edojjoshahua Pameya Jesosaja epeejji beca cuana quea jashahuabaqui ja'a po mee cani Eyacuiñajji ejjashahuabaquiji e'e jojo nei ehuhuiji. Pea epeejjiya Eyacuiñajji esohui jayojja jama onaya ba meesahua cani quea ja'a nee. ⁹ Pea epeejji cuana Jesosaja epeejji cuana quea ja'a, mete'ama pea'ai po mee cani. Beca epeejji cuana emanooja cuana huaquija meesahua cani Edojjoshahua Pameya. ¹⁰ Ohuaya pea epeejji cuana ma dejja ajjima acani ameesahua cani. Pea epeejji Eyacuiñajji esohui huohui meesahua cani quea ja'a nee, pea ba'e meeji. Beca cuana ba meesahua cani ache cuana e'e jojo nei ojaya, Edojjoshahua Pameja huoojea'yo poani ebajji. Ache dejja eshahua nije quehuaje japeequiani ba meesahua cani pea'ai. Edojjoshahua Pameya beca cuana Eyacuiñajji emimi mimi meesahua cani. Pea cuana ma emimi huohui meesahua cani ojjaña cuanaja ebajji. ¹¹ E'e, Edojjoshahua Pameya ojjaña Jesosaja epeejji jamaya ameesahua cani quea huiso. Ojaya ejjashahuabaquiji ojaya epeejji cuana huoojea cani, Edojjoshahua Pameya.

Eseyaya Emeshi Mese oe nei yani; ojaya epeejji cuana oja yani jayojja jama poani

¹² Ecuea eyami oe nei yani. Yaa cuana yani, equise cuana pea'ai yani. Quea huiso pea aquiana cuana yani ecue eyamijo. Jamatii ecuea eyami oe nei. Oya jayojjaya Jesosaja epeeji cuana poani, quea huiso ojee onijje jjapeequianijo. Jamatii ojjaña oe eyami jayojja jama poani; Jesosa Quitoja eyami jayojja jama eseya poani. ¹³ Jamaya poanaje ojjaña eseya ojaya epeeji cuana poanijo. E'e, Jodio cuana, Jodio pojjeama cuana ojaya epeeji poani. Sosema' chacochoacoani cuana, echaco mesema' pea'ai ojaya epeeji poani. Jamajjeya Edojoshahua Pameya eseya Jesosa Quitoja eyami jayojja jama po mee canaje ojjaña, onijje jjapeequianijo. Edojoshahua Pameya esejo nequiya Jesosaja epeeji quea ja'a po mee cani.

¹⁴ E'e, esejaya eyami oe nei yani. Jamatii yaa yani, equise yani, ecojja yani, quea huiso pea aquiana yani esejaya yamijo pea'ai. ¹⁵ Ejiojji eme' jayojja jama pojjeama. Jamatii ejiojji quea pame nee. A'a ejiojji jama poaje pojja'a ba'a: —Eya eme' jayojja pojjeamajo eyamijo enequijji pojjeama —¿a'a jamaya mimi majje enequijji pojjeama? Chojja, jamaya po majje oya jamatii eyamijo nequi, de.

¹⁶ E'e, eshajja ecojja jayojja jama pojjeama. Jamatii eshajja pea'ai quea pame nee, esapajo nequi pea'ai. Eshajja jama mimijajime epojji pojjeama ba'a: —Eya ecojja jjemo eyamijo nequime —jamaya mimijaji ajja, jamatii jamaya po majje eyamijo nequime, de.

¹⁷ E'e, ecuea eyami ecojja oopana pojjeama. Chojja. Eshajja yani pea'ai ejjashajja'ajjaquijji. Ecuea eyami eshajja oopana pojjeama. Yani ehui pea'ai ejjashiy'e'ajjaquijji.

¹⁸ E'e, Eyacuiñajjiya ecuea eyami pana ca poa. Ohuaya sa cani jayojja jama aca poa. Jamajjeya ecojja cuana, eshajja cuana, ehui cuana, quea huiso pea aquiana pea'ai pana ca poa, ohuaya. ¹⁹ Jamaya epana jojjemo eya ese ejja pojjeama pome. E'e, Eyacuiñajjiya ecuea eyami ecojja oopana ajjima poa. Eya ecojja oopana e'a jojjemo eya ese ejja jayojja jama pojjeama pome. Jamajjeya ohuaya ecue eyamijo quea huiso aquiana pana canaje, jjashajja'ajjaquijji po mee canaje, jjashiy'e'ajjaquijji po mee canaje pea'ai. ²⁰ E'e jojo nei ecuea eyamijo yani quea huiso aquiana. Jamatii ecuea eyami oe nei jayojja jama poani. Oya jayojjaya Jesosaja epeeji quea huiso nee yani. Jamatii ojee onijje jjapeequianijo eseya oe jayojja jama poani, Jesosaja eyami jayojja jama poani.

²¹ Ecuea ecojja eme' cajaa a'ajja poani. Esapaa ejiojji cajaa ajjima acani pea'ai. Chojja ojjaña ojee quea pame nee poani. ²² Eyami dojjojo ca'a'ama. Jamatii eyami dojjojo cuana chama' jojjemo eyami eshe pojjeama pome. ²³ Beca eyami dojjojo e'e pojja'a hua'ama. Jamatii esejaya eyami dojjojo ani nahue neineaña. Pea aquiana eyamijo anijo esejaya daqui huoshoaña bicho'ama epojji. ²⁴ Jamatii pea eyamijo esapajo, emejo bicho'amajo daqui mi huoshoaña. Eyacuiñajji ca ca bicho'ama eseya eyamijo. Ojjaña aquiana eyamijo oja pana. Ojjaña eyami ojee nequia canaje oe eyamijo. Jiquio ecua esejaya esejaya eyami nahueña ojjaña eyami, jamatii beca cuanajo se quea bicho poani jama jayojja ¡Jesosaja epeejiya pea epeeji jjapeequi meesahuacue onijje quea pame nee! ²⁵ Ojjaña aquiana eyamijo ani oe eyami poani, ojee acani quea pame nee. Oe eyami pea eyamiya nahue cani. Jamajjeya eyami quea pame nee poani. ¡Ma jayojja jama esejaya Jesosaja epeeji ojee ejjachacoqui onijje! ²⁶ E'e, oe mijijje eyami quea nee poanijo, pea mijijje quea mano poaje pea'ai. Ojjaña mijijje eyami cuana quea aja poanijo, quea pame nee poaje ojjaña. Oya jayojjaya eseya Jesosaja epeeji oe eyami jayojjaya poani. Jamajjeya oe epeeji quea nee poanijo, ojjaña quea yeno poani ojo. Oe epeejiya quea pame nee acanijo, ojjaña onijje quea bihui nee poani.

²⁷ Jamajjeya ojaya ejjashahuabaquijji jama Eyacuiñajjiya esejaya eyami cuana pana ca poa quea huiso peapea cuana eyami. Oya jayojjaya Jesosaja epeeji cuana ojaya eyami quea huiso cuana jayojja jama poani. ²⁸ Jamajjeya Eyacuiñajjiya eseya Jesosaja epeeji cuana quea huiso peapea jashahuabaqui'yome asahua cani ojaya epeeji cuana quea ja'a epojji. E'e, ohuaya beca epeeji huohui canaje jama ba'a: —Miya ecuea ehoojeacoo Jesosa Quitojo huohuiya.

Ohuaya pea cuana huohui canaje jama ba'a: —¡Ojjaña cuiñajji yasijje esohui quea pame nee Jesosa Quitojo huohuiquicue quea ja'a nee ojjañaja eshajja'ajja! ¡

Pea cuana huohui canaje jama ba'a: —¡Jesososa Quitoja epeeji cuana esohui huohuijji pocue!

Pea cuana ma dejjaa ajjima acani ameesahua canaje. Pea cuana emanojaa cuana huaquia meesahua canaje pea'ai. Pea epeeji cuana ona quea pame ba'e meesahuajji po mee canaje. Pea epeeji emeshi mese jayojja jama ojjaña jaahuanajji po mee cani. Pea cuana Eyacuiñajjiya pea emimi mimi meesahua cani. ²⁹ ¿A'a ojjaña Jesosaja epeeji cuana Eyacuiñajjiya huoojje cani esohui quea pame Jesosajo huohui coohua? ¿A'a ojjaña epeeji cuana Eyacuiñajjiya esohui quea huesha huohui cani? ¿A'a ojjaña ojaya epeeji cuana esohui huohuijji poani? ¿A'a ojjaña epeeji ma dejjaa ajjima acani ameesahua cani? Chojja. ³⁰ ¿A'a ojjaña epeeji cuana emanojaa cuana huaquia mee cani? Chojja. ¿A'a ojjaña ojaya epeeji cuana Eyacuiñajjiya emimi mimi meesahua cani? Chojja. ¿A'a ojjaña epeejiya ma emimi

eseja esohuijo huohui cani ojjañaja ebajji? Chojja. ³¹ E'e, Edojjoshahua Pameya eseya, Jesosaja epeeji cuana Eyacuiñajji chaco meesahua cani. ¡Miquianaaya Eyacuiñajji quea pame nee chaco neinei sa añajo quea pame nee oe acue, pea epeeji cuana quea ja'a nee eba'e meesahuajji! Jamatii eyaya miya huohuije e'e jojo nei joya ojjaña quea jea nee nee acani Eyacuiñajjiya ba cani quea pame nee nee. Jamajjeya ojjaña quea jea acue!

13

Eyacuiñajjiya eseya ojjaña quea jea nee ameesahua cani

¹ E'e, ojjaña e'e jojo nei quea jea acue jama ba'a: E'e pojja'a ojjaña dejjaja emimi, esohuidojojji emimi quea pame nee pea'ai mimi majje jamatii pea epeeji ecuea quea jea nee pojjeama. Jamajjeya ecuea pea cuana Jesosa nijje ejjapeequi meesahuajji pojjeama. Eya mimiani emimijeajji, esho'iquiaa cuiaqueyajea cani jama quea shajjaquijji epoji. ² Eyacuiñajjiya eya ojaya esohui quea huesha nee huohui meesahua cajje ojaya ejjashahuabaquijji ba meesahua cajje pea'ai, ojjaña ojaya esohui etehue'yo ba meesahua cajje pea'ai, ma dejjaa ajjima acani ameesahua cajje pea'ai jamatii pea epeeji ecuea quea jea nee pojjeama. Jamajjeya eyaya pea cuana Jesosa nijje ejjapeequi meesahuajji pojjeama. Eyacuiñajjiya eya ba cani mimishi cuijea'yo jjima pea'ai. ³ Ojjaña ecuea aquiana cuana aema' cuana huasijje quiaje'yo pojja'a; Jesosa nijje jjapee nishoquianijo, e'e pojja'a pea cuaa eya iña caje ejeanobiajeajji. Jamatii pea cuana quea jea nee a'ajjajo eyaya oya cuana eba'e meesahua'yojji pojjeama Jesosa nijje. Eyacuiñajjiya eya ba cani mimishi cuijea'yo jjima pea'ai.

⁴ Pea cuana e'e jojo nei ecuea quea jea nee nee amajje oya cuana ecuea tecuea cuajijji pojjeama. Quea bei poaje. Pea cuanaja aquiana quea jea yajji pojjeama. Ecuea ehuhuiji pojjeama jama ba'a: —Eya ca iña quea pame nee nee poani.

Pea jayojja po sa po ajja nei nei pea'ai ca iña. ⁵ Pea cuana e'e jojo nei ecuea quea jea nee neejo ecuea eniñebajji pojjeama. Pea nijje emimijajijji pojjeama. Quea nahue pojjeama poani, equenequene cuajijji pojjeama pea'ai. Pea cuana e'e jojo nei ecuea quea jea neejo, eya onaa quea tai acajje, aquiana napa cajje pea'ai eya quea yeno po tiitii ajja: —Onaaya eya quea mimishi acajje eyaya oya quea mimishi a pea'ajje'yo —Jamaya a'a jjashahuabaquijji.

⁶ Eyacuiñajji ecuea quea jea nee poanijo ecuea onajaya mimishi cuana boti'ama poaje. Ona quea pame nee poanijo ca ca eya quea bihui nee poaje pea'ai. ⁷ Pea cuana e'e jojo nei ecuea quea jea nee poanijo e napajji cuana nijje quea quene po ajja. Oe epeeji pea epeeji sijaaje poanijo, ecuea eshajja'ajajji pojjeama. Jesosa nijje jjapee tiitiiquije'yo jamatii quea camaja poanijo. Jjashahuaba tiitiiquije'yo jama ba'a: —E'e jojo nei Jesosaja epeeji poanijo, ohuaya eya ba'e tiitii mee caje'yo onijje eyajo.

⁸ Eyaya pea cuana quea jea nee atiitije'yo. Jamaya sa poani Eyacuiñajji. Jjeya ca ca Eyacuiñajjiya ojaya epeeji cuana esohui quea pame huohui meesahua cani. Jamatii eyajo huohui pajaje'yo. Jjeya beca cuana Eyacuiñajji emimi mimi cani. Jamatii eyajo ma emimi mimi pajaje caje'yo. Jjeya Eyacuiñajjiya ejjashahuabaquijji ba meesahua cani oe poji. Quijje eyajo ojjaña ba mee caje'yo quea huiso. ⁹ Jjeya eseya Eyacuiñajjiya ejjashahuabaquijji oe poji nei ba mee cani. Jjeya Edojjoshahua Pameya eseya Eyacuiñajjiya ejjashahuabaquijji oe poji nei huohui meesahua cani. ¹⁰ Jesosa Quito poe o'yajo ca ca eseya ojjaña Eyacuiñajjiya ejjashahuabaquijji cuana quea pame nee nee ba mee caje'yo.

¹¹ Jama poaje ba'a: Eya esho'yahuajo oe poji jjashahuabaquinaje quea pame pishana. Ecuea esohui cuana quea pame pishana poanaje pea'ai. Tii majje ca ca etii jama jjashahuabaquime poanaje, quea ja'a nee. Quea ja'a nee huohuinaje pea'ai. ¹² Oya jayojjaya jjeya eseyaya Quito ba jjima aña ecojjaa. Jamajjeya ojjaña ojaya ejjashahuabaquijji ba mee jjima acani. Quijje poe o'oya majje ese cojja neiyo nequi oya mimije'yo. Jjeya ohuaya ojjaña esejaya ejjashahuabaquijji ba neinei cani. O poe o'yajo eseyaya ojaya ejjashahuabaquijji ba neineije'yo pea'ai quea ja'a nee. Oya eseyaya ba neineije'yo pea'ai.

¹³ E'e, Jesosa Quito poe o'yajo, eseya onijje jjapee tiitiiquije'yo. Ojaya epoe'yojji eseya jja'ishoa'ajjaquiani. Jjeya esejaya ojaya epeeji cuana quea jea nee poani. E'e, Jesosa Quito epoe'yojji jja'ishoa'ajjaquiani, onijje jjapeequiani pea'ai. Ojaya epeeji cuana quea jea nee atiitiiña pea'ai. Jamaya Eyacuiñajji sa poani.

14

Edojjoshahua Pameya eseya chaco meesahua cani Jesosa nijje

¹ Jamajjeya jjashahuaba tiitiiquicue pea cuana quea jea nee e'ajji! Jamaya mimicue ba'a: —Eyacuiñajji, ¡Edojjoshahua Pame huoojeacue e que mu jayojja ameesahuaa, Jesosaja epeeji

cuana quea ja'a nee onijje ejjapeequi meesahuajji! E'e, imiquea ejjashahuabaquijji huohui meesahuacue ojjaña meshi yasijje!

² Ojjaña joya Eyacuiñajjija emimijo mimiani onajaya ba jjima esohuijo Eyacuiñajji nijje mimiani, pea cuana nijje pojjeama. Edojjoshahua Pameya maya mimi meesahua cani. Jamatii pea cuanaja maya emimi quea quehua. Eyacuiñajjija ohuaye nei shajja'ajja cani. ³ Eyacuiñajjija esohui cuana quea ja'a nee huohui canijo ca ca Jesosaja epeeji cuaa quea ja'a shajja'ajja cani. Onijje jjapee neinei qui meesahua cani. Quea bihui nee po meesahua cani pea'ai. ⁴ Ojjaña joya Eyacuiñajjija emimijo mimiani onijje nei mimiani. Oya oe nei quea bihui nee poaje. Joya Eyacuiñajjija esohui quea ja'a nee huohuijji poaniya ca ca quea huiso Jesosaja epeeji cuana quea bihui nee po mee caje.

⁵ Eya miqüianajo jjashahuabaquiani jama ba'a: Ojjaña miqüianaya Eyacuiñajjija emimijo mimianijo jamaya quea pame pishana poaje. Eya quea bihui pishana poaje. Miqüianaaya Eyacuiñajjija esohui joya ojjañaja eba esohuijo huohuiañajo ca ca jamaya quea pame nee nee, eya quea bihui nee nee poaje. E'e, Eyacuiñajjija esohui quea ja'a nee huohui majje pea cuana Jesosa nijje jjapeequi meesahuaña. Eyacuiñajjija pea emimijo mimi majje aje oe pea cuana Jesosa nijje ejjapeequi meesahuajji pojjeama. Pea epeejiya Eyacuiñajjija pea emimi, ma ojjañaja quea quehua shajja'ajja majje cahuhui cahua esejaya esohuijo. Jamaya ohuaya huohui majje ojjaña Jesosaja epeeji cuana quea pame nee jjapeequi meesahua caje Jesosa nijje.

⁶ Jamajjeya epeeji cuana, eya miqüiana que poe majje mimi ajja pea emimijo joya miqüianajaya bajjima esohuijo. Chojja, maya emimi shajja'ajja majje miqüianaya Jesosa nijje ejjapeequijji pojjeama. Quea ja'a nee ca ca eyaya Eyacuiñajjija ejjashahuabaquijji miqüianaya ba meesahuaje. Ojaya esohui eyacua Jesosaja ba meesahuaje pea'ai.

⁷ ¡jiquio esohuijo jjashahuabaquicue pea'ai! Dejja cuanaja ba jjima pishanajo dehue quea ja'a nee miamia aja. E'ñaqueyaji baja jjimajo quea ja'a ññaqueyaqueya aja pea'ai. Jamatii quea shajjaquijjo poaje, quea quehua. Jamajjeya ojjañaja eshajja'ajjajji pojjeama. ⁸ Echacomeejjiya eshe'ana mia jjimajo, echacoji cuana poqui ajja chachua. ⁹ Oya jayojjaya miqüianaya pea emimijo joya onajaya quea quehuajo mimianijo, miquea esohui onajaya eshajja'ajjajji pojjeama. Jamajjeya jesohui joya onaja quea ja'a nee jo huohuicue ojjañaja ebajji! ¹⁰ E'e, dejja cuana quea huiso meshi cuanajo ba'yani. Quea huiso emimijo mimiani pea'ai. Jamatii ojjaña emimi ojjaña meshijo quea ja'a nee poani, ma meshijo ba'aja quea ja'a. Jamajjeya ojjañaja emimi onijje ba'e cuanaja quea ja'a nee. ¹¹ Jamatii oe dejja pea emimijo joya ecuea quea quehuajo mimianijo oya pea dejja, eya ojaya pea poani pea'ai. ¹² Jamajjeya miqüianaya Edojjoshahua Pame nijje quea pame nee a sa poanijo Edojjoshahua Pame nijje mimicue jama ba'a: —¡Eya ameesahuacue quea pame nee, quea ja'a nee! Jamajjeya eya quea huiso Jesosaja epeeji cuana onijje jjapeequi meesahuaje. E'e, ¡quea ja'a nee nee Eyacuiñajjija esohui huohui meesahuacue mo!

¹³ Jamajjaya Jesosaja epeeji Eyacuiñajjija emimijo joya pea cuanaja quea quehuajo mimi majje oya Eyacuiñajji nijje camimiahua jama ba'a: —Ecue Chii, ¡joya o miminaje mo huohui meesahua'yocue pea epeeji cuanaja quea ja'a nee epojji! ¡Maya esohui mo huohui meesahuacue quea ja'a nee onajaya ebajji! —jamaya mimicue Eyacuiñajji nijje.

¹⁴ E'e, Eyacuiñajjija pea emimijo ma ecuea ba jjimajo onijje mimi mee caje jamatii ma e miminaje ecuea quea quehua poani pea'ai. Edojjoshahua Pameya eya mimi meesahua cani ecuea ejjashahuabaquijji pojjeama. ¹⁵ Jamajjeya eya jama poaje ba'a: Ecuea ejjashahuabaquijji quea ja'a nee jayojja eya mimije Eyacuiñajji nijje ecuea esohuijo; pea emimijo joya ecuea ba jjima esohuijo pea'ai eya onijje mimije pea'ai. Edojjoshahua Pameya eya sohuicuaya meesahua cani pea emimijo joya ecuea ba jjima esohuijo, ecuea edojjoshahua Jesosajo sohuicuayani; ecuea ejjashahuabaquijji quea ja'a nee jayojja jama eya sohuicuayani ecuea esohuijo pea'ai. ¹⁶ Miqüiaaya pea emimijo Eyacuiñajji bihuiañajo, pea epeejiya minijje Eyacuiñajji ebihuijji pojjeama. Ojaya ba jjima miquea esohui. ¹⁷ E'e, miyaya Eyacuiñajji bihuiaña quea pame nee. Jamatii miquea emimi onajaya quea quehua. Jamajjeya miyaya Jesosaja epeeji cuana onijje jjapeequi sahua jjima aje.

¹⁸ Miqüianaya oe pojji mimiani Eyacuiñajjija pea emimijo. Eyacuiñajjija eya ojaya pea emimijo mimi meesahua canaja quea huiso. Jamajjeya eya onijje mimiani jama ba'a: —Jamaya Eyacuiñajji, miyaya eya quea pame nee anaje.

¹⁹ Jamatii Jesosaja epeeji cuana ojee nequiani Eyacuiñajjija esohui shajja'ajjajji, eyaya quea ja'a nee huohui sa aña joya onaja ojjañaja eba esohuijo. Esohui quea ja'a nee, quehua'ama mimianijo, ojjaña shajja'ajja caje quea ja'a nee. Jamaya quea pame nee nee. Huohui sa po ajja quea huiso esohui pea emimijo, joya onajaya ba jjima esohuijo. Jamaya quea pame pishana.

²⁰ Ecuea epeeji cuana, ¡quea sho'i tai jayojja jama a'a jashahuabaquijji! ¡Quea ja'a nee jashahuabaquicue! ¡Jesosa Quitoja esohui ba neineicue! ¡A'a quea mimishi ba'eji pea'ai!

²¹ Eyacuiñajjiya esohui yahuajo nei tehue mee ca poa jama ba'a:

“Pea cuana pea meshijo ba'e, ma pea esohuijo mimiani pea'ai eyaya huoojeaje Jodio cuana jjabahuejaqui meeya. Jamatii oya cuana aje oe o shajja'ajja sa po ajja poaje”.

Jamaya Eyacuiñajjiya esohui poa.

²² Jamajjeya Jesosa Quitoja epeeji etiya Eyacuiñajjiya pea emimi shajja'ajja majje ba caje Eyacuiñajji e'e jojo nei ona nijje nequi. ¡Jesosaja epeeji pojjeama cuana ca oe Eyacuiñajjiya esohui huohuicue; joya o mimiani esohuijo o huohuicue! Esohui shajja'ajja majje oya cuana japeequije'yo Jesosa nijje. ²³ Jamajjeya Jesosaja epeeji cuana ojee nequianijo, e'e pojja'a ojjaña miqianaya Eyacuiñajjiya pea emimijo mimije. Jesosaja epeeji pojjeama cuana, ojaya epeeji eyacua pea'aiya ma emimi shajja'ajja majje ¿ae shai oya cuana jashahuabaquije? Miqianaya onajaya ba jjima esohuijo mimiani shajja'ajja majje jama acaje ba'a: —¡Dee! Jesosaja epeeji cuana niñe poqui'onaje. Jamajjeya quea quehua mimiani —acaje.

²⁴ Jesosaja epeeji cuana ojee nequi majje Eyacuiñajjiya esohui quea ja'a nee huohui canijo ca ca, pea cuana shajja'ajja majje ojaya mimishi cuana o quea yeno poaje. E'e, Jesosaja epeeji pojjeama cuana, ojaya epeeji eyacua cuana pojja'a Eyacuiñajjiya esohui shajja'ajja majje quea mete poaje jama ba'a: —Eyacuiñajjiya eya quea nee nee po mee caje'yo, de, ecuea mimishijo.

²⁵ Eyacuiñajjiya esohui huohuijjiya ma deja cuanaja ejashahuabaquijji tai huohui cajo, shajja'ajja majje oya cuana Eyacuiñajji bihuia caje ecui'oshajjajo nequiya. Jama poaje ba'a: —E'e jojo nei Eyacuiñajji miqiana nijje nequi —acaje cuana. Jesosa nijje japeequije'yo pea'ai.

¡Jesosaja epeeji ojee nequianijo Eyacuiñajjiya esohui huohuicue quea ja'a nee!

²⁶ Jamajjeya ecuea epeeji cuana, ¡bacue jiquio esohui! Miqianaya ojee nequi majje Eyacuiñajjiya esohui huohuiya, jama acue ba'a: Oe epeejiya Jesosa cabihua caha esohuicua yajjiyo. Pea epeejiya Eyacuiñajjiya esohui cahuohui caha. Pea Eyacuiñajjiya ejashahuabaquijji pea cuana que cahuohui caha. Majoya pea epeeji Eyacuiñajjiya pea emimijo mimi sa poanijo, pea cahuohui caha esojaya esohuijo. Jamajjeya ¡Jesosaja epeeji ojee nequianijo quea ja'a nee acue! ¡Ojjaña Eyacuiñajji nijje japeequi meesahuacue! ²⁷ E'e pojja'a beca cuana Eyacuiñajjiya pea emimijo mimi sa poani. ¡Beca cuana, pea beca peejjima pojja'a mimi meecue, quea huiso pojjeama! Ma pea emimi mimianijo, ja'a ojee mimi meejji! ¡Oe epeeji mimi pajea'yajo, pea mimi meecue! ¡Oya mimi pajea'yajo, pea mimi meecue! Ma epeeji cuana Eyacuiñajjiya pea emimijo mimi majje, pea cahuohui caha esojaya esohuijo ojjaña ebajji. ²⁸ Pea epeejiya ma emimi ba jjimajo, ja'a mimi meejji Jesosaja epeeji cuana ojee nequi yasijje! Oya oe nei nequi majje Eyacuiñajjiya emimijo camimiahua Eyacuiñajji nijje.

²⁹ Miqiana ojee nequijo beca esohui huohuijjiya, pea beca peejjima pojja'aa Eyacuiñajjiya esohui quea ja'a nee cahuohui caha, quea huiso pojjeama. Pea cuana cashajja'ajja caha. Shajja'ajja majje cajashahuabaquiahua jama ba'a: —¿A'a e'e jojo nei Eyacuiñajjiya esohui huohui canaje? —cajjashahuabaquiahua.

³⁰ Jamatii Edojjoshahua Pameya pea epeeji jashahuabaqui meesahua caje, oya pea'ai camimiahua ojjaña eshajja'ajjajji. E'e, esohui huohuijjiya huohui pajea cajo, ma epeejiya Eyacuiñajjiya ejashahuabaquijji cahuohui caha. ³¹ Jamaya miqianaaya Eyacuiñajjiya ejashahuabaquijji ba majje huohuije ojjaña. ¡Pea acaje jja a'a huohuijji! ¡Oe epeejiya huohui pajea cajo, pea epeejiya cahuohui caha! Jamajjeya Jesosaja epeeji cuana ba mee caje quea huiso Eyacuiñajjiya esohui. Quea bihui nee poaje pea'ai. ³² Jesosaja esohui huohui sa poanijo ¡ca'ishoa caha! ¡Pea mimi pajea'yajo cahuohui caha! ³³ E'e, Eyacuiñajjiya equijo ojaya epeeji cuana ja'a becalle huohuijji! Quea shajjaquijjo poaje. Eyacuiñajjiya ojaya epeeji cuana ojee shajja'ajja mee cani quea be. ¡Bacue! Ojjaña Eyacuiñajjiya equi cuana Jesosaja epeeji ojee nequi majje quea ja'a nee esohui huohui cani; becalle pojjeama huohui cani.

³⁴ Epona cuana, ojjaña Eyacuiñajjiya equijo ojee nequianijo, ja'a mimijji Eyacuiñajjiya esohui huohuijji mimianijo! ¡Jashajja'ajjaquicue oe! Jodio cuanaja esohui etehue'yo yahuajo jama poa pea'ai ba'a:

“¡Eyacuiñajjiya equijo epona cuana cajashajja'ajjaquiahua! Eyacuiñajjiya epeeji cuana huoojeajji pojjeama oya cuana”.

Jamaya poa yahuajo. ³⁵ Esohui shajja'ajja majje e'e pojja'a epona cuana huohui'ajja sa poani ma esohuijo. Jamatii ¡Eyacuiñajjiya equijo a'a huohui'ajjajji! Jamaya quea pame pojjeama. Ojaya equi yasijje poqui majje ojaya yahue cahuohui'ajja caha, eponaa.

³⁶ Ecuea epeeji cuana Conitojo ba'e, miquianajaya eba Eyacuiñajjija esohui miquiana que poe coo jjima. Chojja. Pea cuaa ojaya esohui shajja'ajja canaje miquianaja shajja'ajja jjimahuaajo. Jamajjeya ¡shajja'ajjacue mo! ³⁷ Miquianaya beca cuana jama poani ba'a: —Eya Eyacuiñajjija esohui huohuijji e'e jojo nei poani. Eya Edojjoshahua Pameya quea pame nee ameesahua caje'yo Eyacuiñajjijo. Jamajjeya ¡miquianaya ¡jbahuejjaquicue ecuea esohui Eyacuiñajjija esohui e'e nei poani! ³⁸ Ojjaña jaya miquiana nijje nequi ecuea esohui shajja'ajja sa po ajja, ¡a'a oya cuana shajja'ajjajji!

³⁹ Ecuea epeeji cuana, jamajjeya ¡Eyacuiñajjija esohui huohui neineicue! Pea epeeji Eyacuiñajjija pea emimijo mimi sa poanijo ¡oya camimiahua! ⁴⁰ Jamajjeya ¡Eyacuiñajjija equijo ojee nequi majje ojjaña quea ja'a nee acue! ¡Ojjaña Jesosaja epeeji cuana shajja'ajjacue quea ja'a nee pea'ai!

15

Jesosa Quito mano'yo majje shequi o'oyanaje

¹ Jjeyahua nei eya miquiana huasijje huohui sa o'oya poani esohui quea pame nee Jesosa Quitojo. Yahuajo pishana ma esohui shajja'ajja majje miquianaya onijje ¡japeequi'yonaje quea ja'a nee. ² Ma esohui Jesosa Quitoja eyaya huohuinaje. Shajja'ajja majje miquianaya onijje ¡japeequi'yonaje quea ja'a nee, cuaqui yasijje epoqui'yojji pojjeama. Jamatii Jesosa Quito nijje e'e jojo nei ¡japeequi jjima ca mi ca oe cuaqui yasijje poquije'yo.

³ E'e, ma esohui quea pame nee Jesosa Quitojo shajja'ajja majje eyaya huohuinaje miquianajaya eshajja'ajjajji jama ba'a: Eyacuiñajjija esohui yahuajo etehue'yo jayojja jama e'e jojo nei Jesosa Quito esaja mimishi cuanajo mano'yonaje. ⁴ Jesosa Quito mano'yajo, ojaya epeeji cuaa oya jiani ai yasijje huananobia ca'ya poa. Pea beca peejjima cahui po majje, Eyacuiñajjija oya, Jesosa Quito shequi mee ca o'oya poa. E'e, Eyacuiñajjija esohui yahuajo nei etehue'yo jayojja jama aca poa Jesosaa. ⁵ Eshe o'oya poajo, Penohua oya ba canaje. Majoya ome miji pea'ai pea becaa, 12 huisomeya ojaya pea epeeji cuaa Jesosa Quito ba ca'yonaje, oja huoojea'yo cuaa. ⁶ Majoya quijje pishana quea huiso ojaya epeeji cuaa, 500 huisomeya ojee ¡jachichaqui majje Jesosa Quito ba canaje eshe o'oya. Quea huiso ma epeeji jjeya eshe enequi'yo. Beca cuana mano'yonaje. ⁷ Majoya pea pojajajo Satiacohua Jesosa Quito ba canaje eshe o'oya. Majoya ojjaña oja huoojea'yo cuaa oya ba canaje eshe o'oya. ⁸ Majoya eyaya quijjeyeye neiya Jesosa Quito banaje pea'ai. E'e, yahuajo eya ojaya epeeji pojjeama poa. Jjeya ca ca eya ojaya epeeji po mee ca'yonaje pea'ai. ⁹ Jamajjeya eya quea pame pishana. Pea oja huoojea'yo cuana quea pame nee poani. E'e, o ba jjimahuaajo eyaya ojaya epeeji cuana janobajjima nei napanaje. Jamatii Eyacuiñajjija eya babaca canaje Jesosaja huoojea'yo epojji pea'ai. ¹⁰ Eya Eyacuiñajjija quea jea nee nee poani. Jamajjeya ojaya esohui huohuijji po mee canaje, Jesosaja huoojea'yo po mee canaje pea'ai. Ohua huoojea cajje eyaya ojaya esohui huohui neinei'yonaje. Jesosaja pea ehoojea'yo cuaa quea huiso pishana chaco canaje ojo. Eyaya ca ca ojo janobajjima nei chaco tiitiaña ohuaya eya chaco meesahua canajejo. E'e, ohuaya eya chaco meesahua ajja jojjemo eyaya ojo chaco jjima ame. ¹¹ E'e pojja'a pea ehoojea'yo esohui Jesosa Quitojo miquianaaya shajja'ajjanaje. E'e pojja'a ecuea esohui ojo shajja'ajjanaje. Jamatii, ojjaña ecuaaya ma esohui quea pame Jesosa Quitojo huohuiaña. ¡shajja'ajja majje miquianaaya ojaya esohui jayojja jama e'e jojo nei ba'ecue!

Jesosa Quitoja epeeji cuana quijje eshe o'oya poaje

¹² E'e, miquiana huasijje ecuaaya huohuinaje jama ba'a: —Jesosa Quito mano'yajo, Eyacuiñajjija oya shequi mee ca o'oyanaje.

Jamajjeya ¿apiojji acuae jja oe miquianaya beca cuana jjeya sijaje poani? Jama ba'a: —Eseyo mano'yajo quijje eshequi mee'yojji pojjeama —¿apiojji jamaya sijaje poani?

Chojja. Shequi mee caje o'oya eseya. ¹³ ¡Bacue, oe! Mano'yo majje eshe o'oya po meeme ajja jojjemo Jesosa Quito mano'yo majje shequi mee o'oya jjima acaquiaye pea'ai. Chojja. Oya shequi mee ca'ya poa, Eyacuiñajjija. ¹⁴ Oya eshe o'oya pojjeama poa jojjemo ecuanaja esohui quea pame nee ojo e'e nei pojjeama pome. Oya mi shequi o'oya poa jojjemo miquianaya onijje ¡japeequi jjima pome pea'ai. ¹⁵ Ecuaaya huohuiaña jama ba'a: —Eyacuiñajjija Jesosa Quito shequi mee ca'yonaje —jamaya e'e nei pojjeama jojjemo ecuaana sijaje ponequime. Chojja, de. ¡shajja'ajjacue mo! Ma sijajepojji cuanaja esohui e'e nei poani jojjemo ca emano'yo cuana shequi'yo jjima pome, Jesosa Quito shequi'yo jjima poquiaye pea'ai. Chojja, ecuea eba oya shequi'yonaje. ¹⁶ E'e, emano'yo cuana shequi'yo ajja jojjemo Jesosa Quito pea'ai shequi'yo jjima poquiaye. ¹⁷ Oya shequi o'oya jjima jojjemo miquianaaya sijajepojjija esohui shajja'ajja'yome, Jesosa nijje ¡japeequi jjima pome. E'e, Jesosa Quito shequi o'oya jjima poa jojjemo Eyacuiñajji quea quene nee ti pome, miquianajaya mimishi cuijea'yo jjima pea'ai pome. Chojja, ecuea eba Jesosa Quito shequi

o'oyanaje. ¹⁸ Oya shequi o'oya jjima jojjemo ojaya epeeji yahuajo mano'yo cuana cuaqui yasijje poqui'yoquiaye. Chojja, ecuea eba Jesosa Quito shequi o'oya poa. ¹⁹ E'e, eseya quea bihui nee onijje jjapeequi mee canaje jiquio meshijo ba'yanijo. Jamatii eseya eshe o'oya po mee ajja jojjemo eyajo onijje ba'e tiitii mee'yo jjima acame. Jamaya poani jojjemo ojjaña cuana esejo mimi'yome jama ba'a: —Pabohua ecuana siajje acanaje, de. “¡Jesosa Quito nijje jjapeequi'yocue!” siajje a'yome acanaje.

Chojja, ecuea eba eseya eshe o'oya po mee caje'yo. ²⁰ E'e jojo nei jamaya poanaje ba'a: Eyacuiñajjiya Jesosa Quito shequi mee ca o'oyanaje, eyami eyacua acoo ca'yonaje emano o'oyajji pojjeama. Jamajjeya esejaya eba ohuaya e'e jojo nei Jesosaja epeeji cuana ojjaña tii shequi mee caje o'oya emano o'oyajji pojjeama. ²¹ E'e, Adana quea mimishi poa sosejje mano mee ca'ya poa. Jamajjeya ojjaña manoj'e'yo, ba'e tiitii ajja meshi cuanajo ba'eca. Jesosa Quitohua ca ca quea pame nee nee acanajejo, ojjaña eshe o'oya po mee caje'yo. ²² Ojjaña cuana Adanaja osecua cuana poanijo o jayojja quea mimishi poani. Jamajjeya Eyacuiñajji nijje ba'e meeme ajja eyajo. Jesosa Quito nijje jjapeequi majje ca ca ohuaya eseya ba'e tiitii mee caje'yo onijje eyajo eshe o'oya po mee'yo majje. ²³ ¿Ache ebionei shequi mee ca o'oyanaje? Eyacuiñajjiya Jesosa Quito ebionei shequi mee ca o'oyanaje. Quijje poe o'oya majje ohuaya ojaya epeeji cuana shequi mee caje o'oya.

²⁴ E'e, quijje poe o'oya majje Jesosa Quito ojjaña Emeshi Mese nei poaje'yo, ojjaña huoojea'yojji. Jamajjeya ohuaya ojjaña quea mimishi poani jeabichajea'yo majje iña caje'yo. Iña majje shajja'ajja mee caje'yo. E'e, ohuaya Edosiquiana nei shajja'ajja mee caje'yo pea'ai. Ojjaña eshahua cuana pea'ai, ojjaña emeshi mese quea tai cuana pea'ai shajja'ajja mee caje'yo, Jesosa Quitohua. Jamaya amajje ohuaya ojjaña cuana ojjaña meshi cuanajo ba'e oja Chii bihuia mee caje'yo jama ba'a: —Eyacuiñajji, miya quea ca'a nee nee ojjaña huoojea'yojji. ¡Ojjaña miya cashajja'ajja cahua! —jamaya ojjaña amee caje Jesosaa.

²⁵ E'e, Eyacuiñajjiya Jesosa Quito ojjaña mimishi cuana, eshahua cuana pea'ai jeabichajea meesahua cani. Jeabichajea jeyojeyo majje oya, Quito Emeshi Mese oe nei nei poaje'yo; ojjaña huoojea'yojji nei poaje'yo. ²⁶ Yahuajo mimishi aca poa sosejje mano poquipoqui'yani. Quijjejeje nei ese mano mee'yojji chama'yo tii a'yo majje ojjaña cuana eshe o'oya po mee caje'yo, Jesosa Quitohua. Mano'yo ajja tii ti po mee caje'yo. ²⁷ Yahuajo nei Eyacuiñajjiya esohui etehue'yojo jama poa ba'a: “Eyacuiñajjiya ojjaña jeabichajea'yo majje ojjaña huoojea'yojji po mee caje'yo oya”. Jamaya yahuajo Eyacuiñajjiya Jesosa Quitojo aca poa.

Jamatii Jesosa Quito Eyacuiñajji huoojea'yojji pojjeama. Ojjaña pea cuana huoojea'yojji ca ca Quito po mee caje'yo, Eyacuiñajjiya. ²⁸ E'e, Jesosa Quito ojjaña quea mimishi cuana jeabichajea sahuamee caje Eyacuiñajjiya, oya ojjaña huoojea'yojji po mee caje'yo. Majoya oja Chii nijje Jesosa Quito mimije jama ba'a: —Ecue Chii, miya e huoojea'yojji poani tii tii —jamaya poaje oja Bacua Ejja Jesosa Quito.

E'e, Eyacuiñajji e'e nei ojjaña huoojea'yojji poaje'yo tii tii; eyajo nequi cuana, meshijo ani cuana pea'ai huoojea'yojji poaje'yo tii tii.

²⁹ E'e jojo nei Eyacuiñajjiya eseya shequi mee caje o'oya. Jamatii beca cuana jama poani ba'a: —Emano'yo cuana eshequi mee o'oyajji pojjeama.

Beca epeeji cuana quea quehua jjashahuabaquiani jama ba'a: —Yahuajo Jesosaja epeeji mano'ya poa Eyacuiñajjiyo besa mee jjima. Jamajjeya emano'yoja yajjiyo ojaya epeeji eshe nequi Eyacuiñajjiyo besa mee cani cuaa emano'yoja bajjanajo, emano'yo cuana cuaquijo equiyo'yojji pojjeamajo —jamaya beca cuaa acani. Oya cuana jjashahuabaquiani ojjaña cuana shequi mee caje o'oya. Jamajjeya jamaya acani.

³⁰ Eyacuiñajjiya eseya eshe o'oya epo mee'yojji pojjeama jojjemo ¿ajeo acuae ecuaaya ojjaña pojajo Jesosa Quitoja sohui huohuime? Ojaya esohui huohuiañajo pea cuaa ecuana quecua nei nei sa acani. ³¹ Epeeji cuana, e'e jojo nei Eyacuiñajjiya eseya shequi mee caje o'oya. Miquiana esejaya Emeshi Mese nei Jesosa Quitoja esohui shajja'ajjanajejo, eya quea bihui nee. Jamatii pea cuaa quecuapani caniya tii eya Jesosa Quitojo chacochoacani quea bihui nee. ³² E'e, eshahuaa epeeji cuaa ibia jama quea mase neeya Epesojo ba'eya eya beshahua nei mano mee ca'yonaje eya esohui huohui poajeje. Jesosa Quito eshe o'oya po ajja poa jojjemo ¿apiojji shai eyaya esohui huohui tiitiime so'o? Quea camaja nee poanaje. Dejjja mimishi cuaa huohui cani jama ba'a: —Mecahuajje ecuana manoj'e'yo eshequi'yojji pojjeama. ¡Jamajjeya jjeayahua nei e'ijjia'ijjia, e'ishi'ishi pea'ai! —poani.

Jamatii eshe epo o'oyajji pojjeama jojjemo eseya jamaya po pea'aime. ³³ ¡A'a quea quehua jjashahuabaquijji! ¡A'a onaaya miya jjadasia meequijji! Pea cuana siajje poani jama ba'a: —Ecuana eshequi mee o'oyajji pojjeama.

¡Onijje a'a jjapeequijji! O jayojjaya mi po chana', quea mimishi. ³⁴ Jamajjeya ¡pajea'yocue ejjashahuabaquijji quea quehua! ¡Jesosaja esohui jayojja jama po o'oyacue! ¡Esohui quea

quehuajo a'a jshajja'ajjaquijji! Beca cuanaja Eyacuiñajjiya esohui e'e nei ba jjima. Eyaya miqianaya huohuiaña quea bicho epojji.

¿Achajja shequi o'oyame acuae se poaje?

³⁵ E'e pojja'a miqianaya eya huohui'ajjanaje jama ba'a: —¿Achajja shai Eyacuiñajjiya emano'yo cuana shequi mee caje o'oya? ¿Ache eyami shai esejaya poaje'yo? ¿A'a eyami eyacua?

³⁶ Miqianaya quea quehua jshahuabaquianijo ¡bacue! Anoso quecua jjima tii ajja. Quejo quecua caje meshijo pohua'yani. Siobijje pohua majje ejjii chama'yo poani, meshi pojji po'yani. ³⁷ Quejo quecua cani cuaa anoso, pea eso' pojja'a. Anoso sa' bana ca ajja. Chojja, eso' pohua majje esa' tiije'yo. ³⁸ Eyacuiñajjiya eso' pohua mee'yo majje esa' tii mee cani. Jamajjeya anoso pohua majje anoso sa' tiiani. Pea same anoso, huenehuene sa' jayojja pojjeama. Jamaya Eyacuiñajjiya pana ca'ya poa.

³⁹ Oya jayojja eyami cuana: Oe eyami pea eyami jayojja pojjeama. Quea huiso peapea yamime yani. Ijjiacajji pea yamime, deja jayojja jama pojjeama. Cuichojjiya eyami pea. Jai cuana pea yamime, cuichojjiya jama pojjeama. ⁴⁰ Oya jayojjaya eyajo Eyacuiñajjiya esohuidojojji cuana yani quea huiso nee. Oya cuana yamima', deja cuana jama pojjeama. Esohuidojojji cuaa quea pame acani Eyacuiñajjiya yajjiio. Jamatii dejjaa acani jayojja jama pojjeama acani. Dejjja cuanaja eyami quea bame pea'ai. Eseyaya quea pame aña Eyacuiñajjiya yajjiio pea'ai. ⁴¹ Oya jayojjaya eshequi epojjajo quea pame nee. Ba'i eshequi jayojja jama pojjeama. Jamatii ba'i quea pame nee pea'ai. Majameta ba'i jayojja jama pojjeama. Jamatii majameta quea pame nee pea'ai. Oe majameta pea majameta jayojja jama pojjeama. Oe quea jiji nee, pea quea jiji pishana. Jamatii ojjaña quea pame nee.

⁴² Jiquio ecua anoso quecua caje Eyacuiñajjiya esa' pohua mee cani jayojja jama eseya mano'yajo, Eyacuiñajjiya eshe o'oya po mee caje'yo. E'e, mojea ca'yajje esejaya eyami ihuije'yo. Chama'yo tii poaje'yo. Eshe o'oya po mee ca'yajje ca ca emano'yojji pojjeama. Eyami eyacua poaje'yo, quea pame nee nee esejaya. ⁴³ E'e, esejaya eyami mojea ca'yajje ihuije'yo. Ca'a'ama. Eshe o'oya po mee majje ca ca quea pame nee po mee caje'yo, Eyacuiñajjiya. Pea eyami eyacua quea ca'a nee poaje'yo emano beca'yojji pojjeama tii. ⁴⁴ Jjeya meshijo ba'yanijo esejaya eyami ca'a'ama. Manoje'yo. Ojjaña cuana eseya jamatii ihuije'yo. Eshe o'oya po majje ca ca pea eyami poaje esejaya. Eyajo anicaja jayojja jama poaje'yo. E'e, jjeya esejaya eyami meshijo eba'ejji ca'a'ama. Jamajjeya e'e jojo nei quijje Eyacuiñajjiya esejaya pea eyami pana caje'yo eyacua, quea ca'a nee eyajo eba'e tiitii'yojji.

⁴⁵ Eyacuiñajjiya esohui etehue'yo jama poa ba'a: “Eyacuiñajjiya ebionei deja Adana bajjani pana ca'ya poa. Eshe po mee ca'ya poa”. Jamaya yahuajo nei nei poa.

Adanaja eyami ca'a'ama poa. Quijje Jesosa Quitohua eseya eshe o'oya po mee caje esejaya eyami eyacua poaje'yo, pea eyami. Eyajo anicaja jayojja jama poaje'yo quea ca'a nee, ihui'yo ajja. ⁴⁶ Eyacuiñajjiya esejaya eyami ca'a'ama ebionei pana ca'ya poa meshijo eba'ejji. Quijje Jesosa Quitohua esejaya eyami eyacua pana caje'yo quea ca'a, quea pame nee pea'ai eyajo eba'e tiitii'yojji. ⁴⁷ Eyacuiñajjiya ebionei deja Adana bajjanija eyami pana ca'ya poa meshi, meshijo eba'ejji. Shequi o'oya majje Jesosa Quitoja eyami eyacua poa, meshi pojjeama. Pea eyami ojaya, de, quea ca'a nee eyajo e'ani tiitii'yojji. ⁴⁸ Ojjaña cuana meshijo ba'e Adana jayojja. Eyami ca'a'ama. Meshi oopana. Jesosaja epeeji cuana ca ca o jayojja jama poaje'yo quea pame nee, quea ca'a nee onijje eyajo eba'e tiitii'yojji. Eyami meshi pojjeama poaje. ⁴⁹ Jjeya meshijo ba'yanijo esejaya eyami ebionei dejjaja eyami jayojja poani, meshi oopana. Quijje eyajo ba'e majje eseya Jesosa Quitoja eyami eyacua jayojjaya poaje'yo, meshi pojjeama.

⁵⁰ Epeeji cuana, ¡shajja'ajjacue ecuea esohui! Ojjaña meshijo ba'eja eyami ca'a'ama, e'ihui'yojji, meshi pojji epo'yojji, Jesosa Quitoja eyami eyacua jayojja pojjeama. Ba'e meeme ajja eyajo Eyacuiñajjiya cuiñajjiio. E'e, jjeya esejaya eyami meshi, de, eshe epojji tiitii pojjeama eyajo. Quijje ca ca eseya eyami eyacuaiji ba'e tiitii mee caje'yo eyajo, Eyacuiñajji ojjaña huoojea'yojji poanijo.

⁵¹ Jjeya shajja'ajjacue pea esohui! Yahuajo eseya jiquio esohui ba mee jjima, eyacua, jama ba'a: Beca cuana mano'yo ajja nei nei Jesosa poe o'oya jjimahuajo. Ojjaña joya eshe nequi Jesosa Quito poe o'oyajo, emano'yojji pojjeama; onajaya eyami e'ihui'yojji pojjeama. Jesosa Quitohua ojaya epeeji cuanaja pea eyami panacuaji caje'yo eyacua. ⁵² E'e, quijjejeje nei eshe'ana ai mia cajo, Jesosa Quitohua ojaya epeeji eshe nequi cuanaja pea eyami eyacua pana caje'yo. Jiquio ecua cojja capicapiani jayojja jama panacuaji'yomeya acaje. Eshe'ana mia cajo, ojjaña emano'yo cuana shequi mee caje'yo. Eyami eyacua panacuaji caje'yo eba'e tiitii'yojji. Mano o'oya ajja poaje'yo. E'e, ojjaña esejaya eyami eyacua poaje'yo. ⁵³ Jjeya esejaya eyami eba'e tiitiiiji pojjeama. Ca'a'ama. Manoje'yo. Chama'yo tii poaje'yo. Jamajjeya poe'yo majje Jesosa Quitohua esejaya eyami eyacua pana

caje'yo ese nequi tiitii mee'yojji, emano'yojji pojjeama tii tii. ⁵⁴ Jjeya jiquio meshijo eseya Jesosa Quitoja epeeji cuana enequi tiitijji pojjeama. Quijje ca ca ohuaya eseya nequi tiitii mee caje'yo eyajo. Jjeya meshijo ba'e eseya manoj'e'yo. Quijje ca ca esejaya eyami eyacua man'o'yo ajja poaje'yo. Ba'e tiitijje'yo. E'e, Eyacuiñajji esohui yahuajo nei nei etehue'yo jayojja jama poaje. Yahuajo jama poa ba'a: “Dejja cuana man'o'yo ajja tii tii. Eshe o'oya po tiitii mee caje'yo Eyacuiñajjiya”. ⁵⁵ Jamaya tehue mee ca poa yahuajo nei nei pea'ai ba'a: “Emano'yo cuana emojea'yo jaa tiitii ajja; eshe o'oya po mee caje'yo tii tii. Quijje man'o'yo ajja nei nei poaje'yo”.

Jamaya yahuajo nei nei tehue mee ca poa Eyacuiñajjiya.

⁵⁶ Mimishi cuana po nequi jjejojo ojjaña cuana mano ca'yani. Jamajjeya ojjaña quea mete nee poani emano'yojji. Moisesija esohui etehue'yojo eseyaya baña ojjaña shajjama' poani. Jamajjeya manoj'e'yo. ⁵⁷ Jjeya Eyacuiñajji ejjabihuaiqui jama ba'a: —Eyacuiñajji, miya quea pame nee nee. Miyaya ecuanaja Emeshi Mese nei Jesosa Quito huoojeanaje ecuanaja mimishi cuijea'yohua. Jamajjeya ecuanaja shequi meeje o'oya. Ba'e tiitii meeje'yo eyajo.

⁵⁸ Jamajjeya ecuea epeeji cuana, ¡Jesosa Quitoja esohui etehue'yo jayojja jama atiitucue! ¡Ojaya epeeji quea pame nee po tiitucue! ¡A'a Jesosa nijje japeequi pajea'yojji! ¡Emeshi Mese neiyo Jesosajo chaco tiitucue! Jjeya ojo chacochacoanijo, quijje ohuaya eseya quea huiiso sosequia caje'yo eyajo.

16

¡Ejjesheji chichacue Jesosaja epeeji aema' ba'e meesahuajji!

¹ Yahuajo pishana miqianajaya etehuejo eya huohui'ajjanaje bejjo Jesosaja epeeji huasijje, ma Jodea meshijo ba'e yasijje ehoojeajji. Jjeya eyaya miqianaya saja'aje jama ba'a: Eyaya esohui tehenaje Jesosaja epeeji cuana huasijje, Janata meshijo ba'e yasijje. ¡Ma esohui etehue'yo jayojja jama acue pea'ai miqianaaya! ² E'e, ¡bejjo chichacue! E'e, chacochacoajo miqianaya sosequia cani cuaa ejjeshejji. Jamajjeya ojjaña epojja Eyacuiñajji ojee bihuaijji, nomico pojjaajo, ¡ejjesheji chichacue Jesosaja epeeji aema' huasijje ehoojeajji, Jodea meshijo ba'e yasijje! E'e pojja'a oe epeejiya oe pojji chaco majje oe pojji quia caje. Pea epeejiya quea huiiso quia caje pojja'a. ¡Jamaya quea pame quiacue! Jamajjeya eya miqiana que poe jjimahuajo miquea ejjesheji echicha'yo poaje. ³ ¿Ache dejja cuana pojja'a ejjesheji echicha'yo dojo meeje'yo aema huasijje, Jenosanenajo ba'e yasijje? ¡Jjashahuabaquicue ache dejja cuana quea pame nee ehoojeajji! Jamajjeya miqiana huasijje poe majje eyaya ma dejja cuana huoojeaje ejjesheji dojuhua. Eyaya ecuea esohui etehue'yo huoojeaje onijje ojjaña esejaya epeeji cuana Jenosanenajo ba'eca ba meeji ma dejja cuana ecue huoojea'yo ejjesheji quiaa. ⁴ E'e pojja'a quijje jashahuabaqui majje eya jama poaje ba'a: —E'e, eya pea'ai Jenosanena huasijje capoquiahua. Jamaya quea pame nee —eya poaje. Jamajjeya ojee poquije.

⁵ Quijje eya Masenonia meshi yejenana sa poani. Yejenana majje miqiana que poqui sa poani. ⁶ E'e pojja'a eya miqiana nijje nequije quea huiiso cahui cuanajo; quea huoe poani ba'i pojja cuanajo eya miqiana nijje anije. Majoya eya ojjaña huapa cuana huasijje poquije o'oya. Miquianaaya eya poqui meesahuaje. Aquiana epoqui meeji quiaje pojja'a. ⁷ Jjeya ca ca eya miqiana que poe sa po ajja. E'e, jjeya miqiana nijje nequi meemea ajja quea huiiso cahui. Jamajjeya quijje eya poeje miqiana baa. Poe majje miqiana nijje nequije quea cahui huiiso. Jamaya eya poaje esejaya Emeshi Mese neiya Jesosaa eya miqiana nijje nequi mee sa acanijo. ⁸ Jjeya ca ca eya jashahuabaquiani jiquiojo Epesojo eneqijji. E'e, eya jiquiojo tii nequije. Jodio cuana ojjaña bobi que cuanajo nequi chicha majje, bobi apoa po majje pea'ai ojjaña quea bihui nee ojee ijji'lijiaje. Maya eyaya ishoaña. ⁹ E'e, jiquiojo eyaya quea huiiso cuana Eyacuiñajji esohui huohuaña. Quea huiiso nee neeya shajja'ajja cani. Jamatii quea huiiso eshahuaja epeejiya eya Jesosa Quitojo mimi pajea mee'yo sa acani cuaa.

¹⁰ E'e pojja'a Timoteo miqiana que poeje'yo. ¡Poe'yaajo oya jaahuanacue, quea bihui nee po meecue! Oya e jayojja jama poani; esejaya Emeshi Mese nei Jesosajo chaco cani.

¹¹ Oya etii pishana. ¡Jamatii ojjaña miqianaaya oya shajja'ajjacue! ¡A'a ojo miamiajji! ¡Pea huasijje poqui meesahuacue quea bihui nee! Jamajjeya oya poeje o'oya e que. Eyaya oya ishoa'ajja anije Jesosaja pea epeeji cuana nijje.

¹² Yahuajo eya Jesosaja epeeji Apono bajjani nijje miminaje jama ba'a: —Apono, ¿ache shono acuae miya poquije Conito huasijje esejaya epeeji cuana baa? ¡Jesosaja pea epeeji cuana nijje oe poquicue jocuama! —eya poanaje.

Jjeya oya, Apono poqui sa po ajja quea huiiso chacochacoanijo. Quijje apoa po majje oya poquije miqiana baa.

Pea esohui quepe nei Etepanajo

¹³ Ecuea epeeji cuana, ¡quea ja'a nee jshahuabaqui tiitiicue! Pea miya dasia ca chana'. ¡Jesosa nijje jjapeequianijo Eyacuiñajija esohui jayojja jama po tiitiicue quea pame nee! ¡A'a Jesosaja epeeji quea mete pojji! ¡Ojaya epeeji quea ca'a nee, quea pame nee pocue!

¹⁴ ¡Ojjaña quea jea nee acue! ¡Quea bei nee nee ba'ecue ona nijje!

¹⁵ ¡Epeeji cuana, shajja'ajjacue mo! Miquianajaya eba Jesosaja epeeji quea pame nee Etepana bajjani. Ojaya huapa pojjeama cuana miqianajaya eba pea'ai, Jesosaja ebionei epeeji cuana Acaya meshijo poanaje. Jesosaja pea epeeji cuana jaahuana tiiti cani quea pame nee, Etepanaa. ¹⁶ Jamajjeya ¡onijje jjapeequicue! ¡Quea pame poanijo, oya shajja'ajjacue! ¡Pea cuaa Etepana jayojja jama quea pame nee Jesosajo chaco cani shajja'ajjacue pea'ai!

¹⁷ Ojjaña miqianaya poe ajja e baa, enijje jjapeequi'yohua. Jamatii miqianajaya epeeji cuana Etepana bajjani, Potonato pea'ai, Acaico pea'ai poeyanaje e chaco sahuua. Jamaya quea pame nee. ¹⁸ Miquiana quea bihui nee po mee canaje jayojjaya jama ohuaya eya quea bihui nee po mee cani. Quea pame nee poanijo, ¡oya cuana cashajja'ajja cahua ojjaña!

Esohui quijjeyeje nei tehue'yo

¹⁹ Jesosaja epeeji cuana Asia mishijo ba'e miqianajo jshahuabaquiani. Jamajjeya eya huohui'ajja mee cani jama ba'a: —¿Achajja acuae nequiana ani so'o? —onajaya ebajji.

Jesosaja epeeji Aquinaa ojaya ehuanase Pisina nijjeya, ojjaña Jesosaja epeeji cuana Aquinaja equijo ojee dobiquiani Jesosaja esohui baa pea'aiya miqiana huohui'ajja cani jama ba'a: —¿Achajja acuae nequiana ani so'o?

²⁰ Ojjaña Jesosaja epeeji cuana ¡iquiojo ba'eya miqianaya huohui'ajja cani jamaya pea'ai.

Ojjaña Jesosaja epeeji cuana esejaya quea jea neejo, ¡quea bihui nee mimicue ojjaña cuana nijje!

²¹ Eya bajjani Pabo. Miquiana quea bihui nee epojji eyaya eyaye neiya ¡iquio esohui tehueaña miqiana huasijje jama ba'a: ²² —¡Ojjaña joya Emeshi Mese nei Jesosa Quito nijje e'e jojo nei jjapeequi ajja Eyacuiñajija quea nee nee capo mee cahua! ¡Esejaya Emeshi Mese nei Jesosa Quito capoe o'oyahua jjeya nei!

²³ ¡Esejaya Emeshi Mese nei Jesosa Quitohua miqianaya cajaanahua cahua quea pame nee!

²⁴ Eseyaya Jesosaja epeeji cuana poanijo miqianaya ecuea quea jea nee nee poani, ojjaña. Mahuiso. Eyaya, Pabohua ¡iquio esohui tehuejyonaje. Apoa.

PABOJA ETEHUE CONITO CUIÑAJIJO BA'E YASIJJE BECANEJJII PE'A'I 2 CORINTIOS

Pabohua tecue ca o'oyanaje Jesosaja epeeji cuana Conitojo ba'e yasijje

¹ Eya Pabo, Jesosa Quitoja huoojea'yo oja sohui huohuiji. Jamaya Eyacuiñajjiya a sa acani. Timoteo eseyaja epeeji enijje nequi. Eyaya tehueña miqiana huasijje. E'e, miqiana Jesosaja epeeji cuana Conito cuiñajji ba'e yasijje, ma Acaya meshijo ba'e yasijje cuanaya tehueña eyaya.

² ¡Eseyaja Emeshi Mese neiya Jesosa Quitohua, Eyacuiñajjiya, eseyaja Chii neiya pea'ai miqianaya cajaanaya neinei cahua; quea bei caba'e mee cahua pea'ai!

Pabo Eyacuiñajji nije mimiani quea bihui

³ ¡Eyacuiñajji ejjabihuiqui! E'e, oya eseyaja Emeshi Mese nei Jesosa Quitoja Chii, eseyaja Chii nei pea'ai poani. Oya esejja jashahuabaquiani quea bei. Ohuaya eseyaja quea bihui nee po mee cani pea'ai. ⁴ Eseyaja quea nee, quea yeno poanijo, ohuaya quea bihui nee po mee cani. Quea bihui nee po majje eseyaja pea cuana quea bihui nee po meeje'yo, yeno'ama pea'ai. Jamaya eja'aqui ba'a: —Eyacuiñajjiya ecuana jaahuana cani. Oya miqiana jaahuana poani pea'ai. Jamajeya ja'a quea yeno poji!

⁵ Jesosa Quito quea nee poanaje deija mimishi cuaa napa caje. Eseyaja onijje japeequianijo, pea cuaa eseyaja napa caje pea'ai. Jamatii, eseyaja quea bihui nee po mee caje Jesosaa. Majoya eseyaja pea cuana quea bihui nee po meesahuaje Jesosa nije. ⁶ E'e eyaya, Timoteohua pea'ai esohui huohuiaña Jesosajo. Jamajeya pea cuaa ecuana napa cani. Jamatii, ecuanaja esohui shajja'ajja majje miqianaya Jesosa nije japeequi'yani. Ohuaya miqianaja mimishi cuana cuijea ca'yonaje. Jamajeya miqianaya quea bei nee poani. E'e, Jesosaa ojaya epeeji quea ca'a nee po mee canijo, miqianaya quea ca'a nee poaje pea'ai. Jamajeya pea cuaa miqiana napa caje Jesosaja epeeji quea ca'a nee poaje tii. Onijje japee tiitiquije'yo pea'ai. E'e, Jesosaa miqianaya ojaya epeeji quea ja'a po mee caje'yo ecuana jayojjaya, quea bei. ⁷ Jiquio ecuanajaya eba ba'a: Miqianaya Jesosaja epeeji quea ja'a po tiitijje'yo. E'e, miqianaya ecuana jayojja poaje. Jesosa nije japeequianijo, pea cuaa napa caje. Jamatii Jesosaa miqianaya quea bei nee po mee caje ecuana jayojjaya. Jamaya Jesosaa acaje'yo miqianajo, ecuanajo pea'ai.

⁸ Epeeji cuana, jjeja ecuaaya huohuije quea nee ecuana poanaje Asia meshijo nequi miqianajaya ebajji. Jomajo ecuana ba'enaje quea camaja nee nee, quea mano poanaje. E'e, ecuana jashahuabaquianaje jama ba'a: —E'e, ecuanaja quea camaja nee nee Jesosaa nije ejjapeequiji, jiquio meshijo pojjaja mo manojje'yo. ⁹ E'e, mimishi cuana jashahuabaquiani ecuana quecuajji.

Eyacuiñajjiya ecuana ba mee canaje jama ba'a: Deija cuanaja ecuana ejaahuana pojeama. Oya oe nei ecuana jaahuana poani. Ohuaya ohuaye nei emano'yojaa cuana shequi mee ca o'oyani. Jamaya eseyaja ba mee canaje Eyacuiñajjiya.

¹⁰ E'e, mimishi cuaa napa huicha'a huicha'a caje, ecuana quea nee nee poanaje. Beshahua nei mano'yonaje quea nee nee poanijo. Jamatii, Eyacuiñajjiya ecuana jaahuana ca'yonaje; mano'yo jima Asia meshijo nequi. Ecuana jashahuabaquianaje jama ba'a: —Eyacuiñajjiya ohuaye neiya ecuana jaahuana tiitii canijo, mano'yo jima jjeja.

¹¹ E'e, miqianaya Eyacuiñajji nije miminaje ecuana ojaya ejaahuana tiitijji. Jamajeya ohuaya miqianaya shajja'ajja canaje onijje mimiani. Ecuana jaahuana canaje. Jamajeya quea huiso Jesosaja epeeji cuaa Eyacuiñajji bihuia caje jama ba'a: —Eyacuiñajji, miya quea pame nee nee. Miquea epeeji jaahuanaña quea ja'a nee.

Pabo Conito huasijje poqui jima poaje

¹² Ecuana eba'ejji, echacojji, huohuijijo pea'ai ecuaaya quea bihui nee huohuiaña. E'e, miqiana nije, ojjaña pea cuana nije nequinatejo pea'ai e'e jojo nei ecuanaja echaco quea pame nee poanaje. Eyacuiñajjiya ecuana chaco meesahua canaje ojo quea pame nee. Ecuana ejjashahuabaquiji quea ja'a nee pea'ai. Deija cuanaja ejjashahuabaquijoyji jayojja jama ba'e ajja. Chojja, de. Eyacuiñajjiya ecuana ba'e meesahua cani ojaya esohui jayojja. ¹³ Ecuana esohui etehue'yo miqiana huasijje quea ja'a nee. Esohui quea quehua tehue jima. Eya jashahuabaquiani jama ba'a: ¹⁴ Yahuajo miqianaaya ecuana ba pishana majje ejjaba'e bamequi'yoji banaje. Quije quea ja'a nee baje'yo ecuana ba neinei majje. Jamajeya Jesosa, Emeshi Mese nei poe o'oyajo, ecuaaya

oya huohuije'yo miqiuana ojaya epeeji quea pame poanaje. Cuanaya ojaya esohui jayojja ba'yanijo, miqiuanaaya quea bihui nee ecuanajo huohuije'yo Jesosa poe o'oyajo.

¹⁵ E'e, ecuea eba miqiuanaaya jjabahuejjaquije eya esohui jayojja quea ja'a ba'yani. Jamajjaya jjeyahua nei eya miqiuana quea poqui o'oya sa poanaje miqiuana Jesosajo quea ja'a nee ba'e meesahua o'oyaa. ¹⁶ Yahuajo eya jashahuabaquinaje jama ba'a: —Jesosaja epeeji cuana Masenonia meshio ba'e yasijje poquije eya dobiquinanaje Conito cuiñajji yasijje Jesosaja epeeji cuana sohuihuohuiya. Ma ba majjeya eya poquije Jodea meshi yasijje. Jamajjeya Conitojo ba'eca cuaa eya poqui meesahua caje pojja'a Jodea meshi yasijje —eya jashahuabaquinaje.

¹⁷ Jamatii eya poqui jjima miqiuana baa. Miqiuana baquijji eya jashahuabaquinaje quea ja'a nee. Ecuea epoquijjijo eya jashahuabaqui ajja pea cuana jayojja jama. Jesosaja epeeji pojjeama cuaa huohui cani jama ba'a: —Eya poquije. Chojja, eya poqui ajja —jamaya eya jashahuabaqui ajja. Eyaya ecuea ejjashahuabaquijji jayojja jama aje'yo.

¹⁸ Eyacuiñajji siajje po ajja, ojaya esohui jayojja jama ohuaya acani. Ojaya eba eya o jayojja e'e nei poani, siajje po ajja jama ba'a: —E'e pojja'a, de —jamaya eya siajje po ajja.

¹⁹ Eyaya Sinasi nijjeya, Timoteo nijjeya pea'ai Jesosa Quitojo huohuinaje miqiuana huasijje. Oya Eyacuiñajjija Bacua Ejja. Ojaya esohui jayojja jama acaje'yo e'e jojo nei, ohuaya. ²⁰ Eyacuiñajjija esohui yahuajo quea huiso, quea pame nee nee. Jesosa Quito ese jaahuanaa poeyanaje. Ohuaya ojjaña Eyacuiñajjija esohui yahuajo jayojjaya jama jjeya acaje'yo esejo. Jamajjeya Jesosa Quitohua Eyacuiñajjija esohui jayojja jama acanijo, eseyaya Eyacuiñajji bihuiaña jama ba'a: —Jamaya Eyacuiñajji, miquea esohui quea pame nee nee, quea huiso ecuananije. Ojjaña e'e jojo nei poani. Miya siajje po ajja nei nei —jama bihuameya seya aña.

²¹ Eyacuiñajjiya ecuananaje, miqiuanaaya pea'ai ojaya epeeji po mee canaje. Ohuaya eseya babaca ca'yonaje onijje ejjapeequijji. ²² Jama esejo acanaje ba'a: —Miquianaya ecuea epeeji cuana poani. Ecuea ejjeshe jayojja jama miqiuanaaya —Eyacuiñajji poanaje.

Eyacuiñajjiya ese quea huoojea canaje Edojoshahua Pame ese jaahuanajji. Edojoshahua Pameya eseya ba mee cani jama ba'a: Quijje eseya quea ja'a nee Jesosa jayojja ba'e tiitijje'yo Eyacuiñajji nijje eyajo.

²³ Eyacuiñajjiya ba cani ecuea ejjashahuabaquijji miqiuanaajo quea pame nee poani. Jama poani eya ba'a: —Conito huasijje jjeya epoquiya jjemo eyaya onaya tecueajea'yome pojja'a, quea mimishi ba'yanijo. ²⁴ Eya miqiuanaaya emeshi mese pojjeama, miqiuana huoojea neinei'yojji pojjeama. Eyaya ca ca esohui huohuiaña, Jesosaja esohui, miqiuana quea bihui nee po meeji. E'e, Jesosaja esohui jayojja jama aña, ojaya epeeji quea ja'a nee poaje'yo miqiuanaaya.

2

¹ Jjeya eya jama jashahuabaquiani ba'a: —Jjeya Jesosaja epeeji Conitojo ba'e beca cuana quea mimishi poanijo, eya poqui ajja jocuama o tecuea. Jjabahuejjaqui o'oyajo, quea yeno poaje o'oya oya cuana —eya poani.

² E'e, miqiuanaaya eyaya quea yeno po mee majje, ¿ajeo acuae che eya quea bihui po'yome? ³ Jamajjeya yahuajo eyaya miqiuanaaya tehuenaquea quea tecue mimishi pajea mee'yojji. E'e, miqiuana quea mimishi poanijo, eya quea yeno poanaje. Pea chama' e quea bihui nee po meeji. Eya jashahuabaquinaje miqiuanaajo jama ba'a: —E'e jojo nei ohuaya Eyacuiñajjija esohui jayojja jama acaje'yo. Majjaya eya quea bihui nee poaje. Oya cuana quea bihui nee poaje pea'ai e'e jojo nei ba'e majje.

⁴ E'e, eyaya quea yeno nee esohui quea tecue tehuenaquea miqiuana jjabahuejjaqui mee'yojji. Quea camaja esohui quea tecue etehuejji. Miqiuanaaya quea yeno po mee sa po'yo ajja. Chojja. Eya jashahuabaquinaje jama ba'a: —Ecuea esohui etehue'yo quea tecue mimishi cuanajo ba majje onajaya eba poaje ecuea quea jea nee nee poani —eya poani. E'e, jamaya ecuea ejjashahuabaquijji miqiuanaajo.

Jesosaja epeeji quea mimishi tecuea majje ja'a quea tecue po tiitijji onijje ohua mimishi pajea cajo!

⁵ Jesosaja epeeji miqiuana nijje nequi ca ca oe quea mimishi poanaje. Eya quea yeno nee poanaje ojo. Miqiuanaaya quea yeno poanaje pea'ai ojo. Jamajjeya eyaya o jjabahuejja meequijji tehuenaquea oja mimishi cuana pajea mee'yojji. ⁶ Beshahua nei miqiuanaaya, ojjaña oya jjabahuejjaqui meenaje ojaya mimishi epajea'yojji. Apoa. ⁷ Jamajjeya ja'a oya quea yeno po tiiti meeji! ¡A'a oya tecuea tiitijji! Chojja. Quea yeno nee nee po tiiti majje oya Jesosa nijje japeequi pajea'yo chana'. Jjabahuejjaqui'yajo, jonijje japeequi'yocue quea pame nee! ⁸ E'e, oya jama huohucue ba'a: —Miya ecuanaja quea boti nee, epeeji —jamaya oya acue.

⁹ Yahuajo eyaya ma esohui tehuenaje miqiuana ba'ajjajji so'o. Eya ba sa poanaje jama ba'a: —¿A'a shajjama' poaje? ¿A'a ecuea esohui jayoija jama poaje? —poanaje.

Jamajjeya eyaya esohui tehuenaje miqiuana huasijje ma dejja quea mimishi jjabahuej-jaqui mee'yojji. Miqiuana ecuea esohui etehue'yo jayoija jama po'yonaje. Quea pame. Apoa poanaje. ¹⁰ Jamajjeya miqiuana ma dejja quea mimishi poani nijje quene'ama poajo, eya onijje quene'ama poaje'yo pea'ai. E'e, ecuea aje ojaya mimishi epajea'yo pea'ai. Eya Jesosa Quitoja esohui huohuijji poanijo ma dejja mimishi nijje quea tecue poanaje. Jjeya ma dejja nijje tecue'ama poanaje. Jamajjeya imiqiuana pea'ai quea bei, quea ja'a pocue! ¹¹ Eseyaya quea bei, quea ja'a poanijo, Edosiquiaa eseya edasiajji pojjeama. E'e, esejaya eba Edosiquianaja ejjashahuabaquijji. Oya aje oe edasiajji poani, de, Jesosaja epeeji cuana quea mimishi po mee o'oya sa acani.

Jesosaja ehuohui eyacua

¹² Yahuajo pishana eya poquinaje Toasa cuiñajji yasijje esohui quea pame Jesosa Quitojo huohuiya. Jomajo esejaya Emeshi Mese neiya Jesosaa eya huohui meesahua canaje. Beca cuaa shajja'ajja canaje quea bihui nee. ¹³ Jamatii ecuea epeeji Tito poe jjima Toasa huasijje. Eya quea mete ojo poanaje: —E'e pojja'a oya quea huesha nee quea mano jaa pojja'a, quea nee poani pojja'a —jjashahuabaquinaje. Jamajjeya eya Toasajo ba'e nijje miminaje jama ba'a: —Poquia iña Tito sa'ajjaa.

Majoya eya poquinaje Masenonia meshi yasijje.

¹⁴ Eseyaya Eyacuiñajji bihuiaña. Ohuaya eseya quea ja'a nee nequi mee cani. E'e, ohuaya eseya dejja mimishi cuana mimiciuajeanobiajea meesahua cani; eseya Jesosa Quito nijje jjapeequi mee cani quea ja'a nee. Ohuaya ecua huohui meesahua cani ojjaña meshijo Jesosa Quitoja esohui. Ma esohui quea pame nee nee. Jiquio ecua shiyeshiye esejaya quea boti nee ña jama jayoijaya Jesosaja esohui ecuanajaya quea boti nee. ¹⁵ E'e, Eyacuiñajjiya ecua huoojea ca'yonaje Jesosa Quitojo huohuiya. Ma esohui quea pame nee nee, ecuanaja quea boti nee nee. Jamajjeya ojjaña Jesosaja epeeji cuaa, ma Eyacuiñajjiya onijje ba'e tiitii mee caje'yohua, ojjaña quea mimishi poaniya pea'ai ma quijje quea nee nee po tiitii'e'yohua pea'ai ba caje'yo Eyacuiñajji quea pame nee: —E'e Eyacuiñajji, miya quea pame nee nee. Pea chama' mi jayoija —oya bihuiaje esejaya.

¹⁶ E'e, Jesosa Quitoja esohui shajja'ajja majje ojjaña mimishi cuana jjabaquije oya cuana cajaa'ya'yo, quea nee nee poaje'yo cuaquijo. Ma esohui shajja'ajja majje Jesosaja epeeji cuana ca ca jjabaquije oya cuana ba'e tiitii'e'yo quea ja'a nee eyajo Eyacuiñajji nijje. ¹⁷ ¿Aya acuae mayu esohui eyacua Jesosajo huohui caje pea cuana huasijje, de? Ma esohui quea pame Jesosa Quitojo ecua huoojea majje sohuihuohui meesahua caje quea ja'a nee, ohuaya. Pea cuaa Eyacuiñajjiya esohui huohui cani bejo sosejje. Ecua, chojja. Ecuaaya, Jesosaja epeeji poaniya quea bihui nee huohuiaña e'e jojo nei. Ecuanaja eba jama ba'a: E'e jojo nei Eyacuiñajjiya ecua huoojea ca'yonaje ojaya esohui huohuiya.

3

Jesosa nijje chaco cani esohui eyacuajo

¹ E'e, Eyacuiñajjiya ecua huoojea ca'yonaje miqiuana huasijje ojaya esohui huohuiya. Pea cuaa miqiuana que quia ca'yonaje esohui peaja tehue'yo jama ba'a: “¡Jiquio dejja Jesosaja epeeji e'e jojo nei! ¡Jamajjeya oya cuana shajja'ajjacue!” Ecuanaja ca ca peaja tehue'yo equajji pojjeama miqiuana que jama ba'a: “¡Pabo quea pame nee; oya shajja'ajjacue!” Chojja. Ecua miqiuana eba Eyacuiñajjiya huoojea'yo. ² Ecua jama jjashahuabaquiani ba'a: —Ojjaña ba cani ecuanajaya esohui shajja'ajja majje Jesosaja epeeji quea pame nee poanaje miqiuana, Conitojo ba'e cuana.

Jamajjeya ecua e'e jojo nei Eyacuiñajjiya huoojea'yo ojaya esohui huohuijji ojjaña eba, de. Jamajjeya esohui mi tehue mee cani jama ba'a: “Pabo quea pame nee, Eyacuiñajjiya huoojea'yo”.

³ E'e, ojjaña ba cani miqiuana Jesosaja epeeji cuana poanaje ecuanaja esohui shajja'ajja majje. Edojoshahua Pameya miqiuana Jesosa nijje jjapeequi meesahua ca'yonaje. Yahuajo nei Eyacuiñajjiya esohui mei beje biaje tehue majje ojjaña ba mee ca poa etiiquana Moisesi oja huoojea'yo. Jjeya ca ca Eyacuiñajjiya Edojoshahua Pameya miqiuana Jesosa Quito nijje jjapeequi meesahua ca'yonaje ecuea esohui miqiuana shajja'ajjajo. Jamaya ohuaya ojjaña ba mee canaje eya oja huoojea'yo, ojaya esohui huohuijji.

⁴ Ecuanajaya eba Eyacuiñajjiya ecua Jesosaja epeeji quea ja'a nee po mee majje huoojea canaje miqiuana huasijje esohui huohuiya. ⁵ Jamajjeya jama jjashahuabaquiani ecua ba'a: —¿A'a ecua quea pame nee poanijo, quea sapa ja'a poanijo esohui huohuije

quea ja'a nee? Chojja. Eyacuiñajjiya ecuana esohui huohui meesahua canijo ca ca quea ja'a nee poani ecuanaja esohui —jamaya ecuana jashahuabaquiani.

⁶ E'e, Eyacuiñajjiya ecuana huohui meesahua cani ojaya esohui eyacua Jesosajo. Etiqianaja esohui jayojja jama pojjeama ecuanajaya esohui; eyacua. Ecuanaajaya etiqianana Moisesija esohui yahuajo nei etehue'yojo ojjaña ba ca poa jama ba'a: —E'e jojo nei mimishi poajo, Eyacuiñajjiya ojjaña quea nee nee po mee caj'e'yo tii tii; Eyacuiñajji niije eba'e'yojji pojjeama.

Jjeya ca ca ecuaaya huohuiaña jama ba'a: —Mano'yajo, Edojjoshahua Pameya Jesosaja epeeji cuana ba'e tiitii mee caj'e'yo —ecuana poani.

⁷ E'e, yahuajo nei Moisesiya ojjaña jama tehueme aca poa ba'a: “Eseya quea mimishi poajo, Eyacuiñajjiya quea nee nee po mee caj'e'yo tii tii cuaquijo”. Jamatii Moisesiya Eyacuiñajjiya esohui quea tecue mei biajje tehue majje ojaya ecojja quea jiji nee nee cuaquijiji jayojja poa esohui quea pamejojo. Jamajjeya Isaeni cuaa Moisesija ecojja ba jjima aca poa quea siyo nee neejojo. Jamatii ojaya ecojja quea jiji nee po tiitii jjima poa. Quijje pishana quea jiji pojjeama po'ya poa. ⁸ ¿A'ea esohui quea pame nee nee po tiitijje? ¿A'a Moisesija pojja'a? ¿A'a Edojjoshahua Pameja? Edojjoshahua Pameya eseya ba'e tiitii mee canijo quea pame nee; e'e, Moisesija iye bame bame. ⁹ ¡Bacue! Moisesija esohui etehue'yo quea pame pishana ojjaña cuaa ba canaje jama ba'a: Eseya quea mimishi poajo, Eyacuiñajjiya quea nee nee po mee caj'e'yo tii tii.

Edojjoshahua Pameya ca ca eseya Eyacuiñajjiya epeeji mimishi'ama po mee cani. Quea pame nee nee Edojjoshahua Pameya eseya acani. ¹⁰ Yahuajo nei Moisesija etehue'yojo ojjaña jashahuabaquiana ojaya esohui etehue'yo quea pameya poa. Jjeya pea ejashahuabaquijji yani. Jjeya ca ca esohui quea pame nee eba'e tiitijji ecuanajaya eba. Quea pame nee nee esohui eyacua poani. ¹¹ E'e, yahuajo nei ojaya esohui etehue'yo quea pame neejo Moisesi ma esohui tehue majje quea cojja jiji poa, quea cojja jiji nee epo tiitijji pojjeama. Jjeya ca ca esohui eyacua quea ja'a capo tiitii'yahua. E'e, ecuana ba'e tiitii mee caj'e'yo quea pame nee nee epo tiitijji.

¹² E'e, ecuanajaya eba Edojjoshahua Pameya ecuana ba'e tiitii mee caj'e'yo. Jamajjeya ma esohui eyacua huohui tiitii'ña bicho'ama. ¹³ Moisesi esohui tehue majje quea cojja jiji nee poa. Jamajjeya ojjaña cuana ojo quea mete poanijo, Moisesi jjacojja dodoqui'ya poa Isaeni cuana mete'ama epojji. Ecuanaaya ca ca Moisesi jama pojjeama. Esohui eyacua eba'e tiitijji nahue ajja; huohui majamajaña ojjaña eba'ji. ¹⁴ E'e, yahuajo Isaeni cuaa Moisesija esohui etehue'yo shajja'ajja majje jamatii eba'e tiitii'yojji ba meeme ajja poa. Esohui eyacua onajaya quea quehua poa. Ejacojja dodoqui jayojja oya poa. Jesosa Quitoja epeeji nei poanijo ca ca ohuaya esohui eyacua eba'e tiitii'yojji ba mee cani. ¹⁵ Jjeya nei pea'ai Isaeni cuaa Moisesija esohui etehue'yo shajja'ajja canijo esohui eyacua eba'e tiitii'yojji onajaya quea quehua. ¹⁶ Jamatii ojjaña jaya Jesosa Quito niije jjapeequiani ohuaya esohui eyacua ba mee caj'e'yo quea ja'a nee. ¹⁷ E'e, jamaya poaje Edojjoshahua Pameya, Jesosa Quitohua pea'ai eseya ba mee caj'e quea ja'a nee Eyacuiñajjiya ejjashahuabaquijji. Ma ba majje esohui eyacua esejaya quea ja'a nee poaje. Jamajjeya Jesosa niije jjapeequi'yajo, ohuaya eseya ba'e tiitii mee caj'e'yo onijje, Moisesija esohui amajje pojjeama. ¹⁸ Jesosaja epeeji cuana poanijo eseya jjacojja paaqui jjima jayojja jama. E'e, ojjaña ba meeje Eyacuiñajjiya eseya Jesosa jayojja jama atitii meesahua cani. Jamajjeya Edojjoshahua Pameya eseya eyamijo aniya quea ja'a nee jashahuabaqui mee cani. Jesosa jayojjaya popoqui mee cani eseya.

4

Pabohua esohui huohui cani quea ja'a nee eba'e meesahuajji

¹ Eyacuiñajji ecuana niije quea quene nee nee po tiitii ajja ecuanaja mimishi yahuajo poanaje cuanajo. Ecuana quea jea nee poanijo huoojea ca'yonaje ojaya esohui eyacua Jesosajo huohuiya. Jamajjeya ecuaaya quea ja'a nee huohuiaña yeno'ama, mete'ama. ² E'e, ma esohui Jesosajo huohuiaña quea mimishi ba'e'yo ajja. Quea mimishi jashahuabaqui ajja pea'ai. Edasiajji cuana pojjeama. Ecuanaaja esohui Jesosajo e'e jojo nei poani. Jamaya Eyacuiñajjiya eba. Jamajjeya ecuanaja esohui e'e jojo nei poanijo, ojjaña jashahuabaquije jama ba'a: —E'e, jiquio esohui huohuiji cuanaja esohui e'e jojo nei poanijo, eyaya shajja'ajjaje. Oya cuana edasiajji cuana pojjeama.

³ Ecuaaya Eyacuiñajjiya esohui e'e nei huohui tiitii'ña. Jamatii beca cuanaja, Edosiquiana niije jjapeequianija Jesosaja esohui quea quehua. Oya cuana aje oe quea nee nee poaje'yo tii tii. ⁴ Quea pame nee nee Jesosa Quito. Oya Eyacuiñajji Echii ai jama poani tii. Jamaya esejaya eba. Jamatii deja mimishi cuana onijje jjapeequi sa po ajja. Oya cuana aje oe cojjama' jayojja, de. Jamajjeya Edosiquiana neiya, ma ojjaña dasiajji poaniya oya cuana dasia cani esohui quea pame nee nee Jesosajo ojaya eba'ji pojjeama. ⁵ Jjaya ecuaaya

sohuihuohuaña miquianajaya e bihuijji pojjeama. Chojja. Ecuaya huohuaña jama ba'a: —Ecuana miquiana ba meesahuajji poani. Jesosa Quito ca ca Emeshi Mese nei poani. Jamajjeya Jesosa bihuiaque miquianaaya! —ecuanaya miquiana niñeshe'ajji poani.

⁶ ¡Bacue! Yahuajo nei meshi pana jjimahuajo Eyacuiñajjiya jama huohuime aca poa ba'a: “Quea misi, ¡quea ja'a nee oe po'yocue!” aca poa; jaja'aqui mee ca'ya poa. Jjeya ohuaya tiya eseya Jesosajo jshahuabaqui meesahua cani quea ja'a nee. Jamajjeya oya esejaya eba quea pame nee nee Jesosa, quea ja'a nee nee poani tii. E'e, Jesosa Quito Eyacuiñajji jayojjaya nei nei. Oya esejaya eba poanijo Eyacuiñajji quea pame, quea ja'a nee nee poani tii tii esejaya eba pea'ai.

Ona Jesosa nije jjapee meesahuaquiañajo ba'e tiitije'yo

⁷ Eyacuiñajjiya ecuaana babaca canaje esohui quea pame nee huohuijji. Jamaya quea pame nee, de. Jamatii jiquio ecua meshimisi ca'a'ama jayojja jama eseya ca'a'ama. Jamatii Eyacuiñajjiya eseya ojaya epeeji quea ca'a nee acanijo, ojjaña ba cani jama ba'a: —E'e de, Eyacuiñajjiya quea ca'a neeya Jesosaja epeeji cuana quea ca'a nee o jayojja jama po mee cani. Ojjaña huasijje esohui quea pame nee huohui meesahua cani.

⁸ Mimishi cuaa ecuaana napa cani. Jamatii ecuaana ejaebichajeya'yojji pojjeama. Pea cuana quea mimishi poanijo, quea camaja tii ecuanaja eba'ejji. Jamatii quea yeno nee nee pojjeama ecuaana poani. ⁹ Mimishi cuaa napa cani Jesosaja esohui ehuohui poaje jjejojo. Jamatii Eyacuiñajjiya ecuaana ejeana'yojji pojjeama. Pea cuaa cuajaja cajo, jamatii ecuaana mano'yo ajja. ¹⁰ Jesosa quea nee nee poanaje mimishi cuaa napa majamaja ca'yajje. Oya mano mee ca'yonaje, de. Jamaya ecuaana acaje'yo pea'ai pojja'a Jesosa nije jjapeequianijo. Jamajjeya ojjaña jama acaje ba'a: —E'e jojo nei Jesosaa jiquio dejja cuana ojaya epeeji nei po tiitii mee cani. Mimishi cuaa napa cajje jamatii esohui huohui pajea jjima acani.

¹¹ E'e, pea cuaa ecuaana napa majamaja cani Jesosa nije jjapeequianijo. Ecuana quecua sa acani pea'ai. Jamatii ecuaana quea ja'a nee po tiitianiyo, ojjaña ba caje Jesosa ecuaana jaahuanajji quea ja'a nee. Oya eshe, de. ¹² E'e, mimishi cuaa ecuaana quea nee nee po mee cani esohui Jesosaja huohuañajo. Jamatii ecuanaja esohui shajja'ajja majje miquianaya Jesosaja epeeji poanaje. Jamajjeya ohuaya miquianajaya mimishi cuana cuijea'yo majje ba'e tiitii mee caje'yo.

¹³ Yahuajo Eyacuiñajjiya esohui huohuijjiya Dabiya huohui ca poa jama ba'a: “Ecuana eba e'e jojo nei Eyacuiñajji e jaahuanajji poani. Jamajjeya jamaya eyaya huohuaña” Dabiya aca poa. Jjeya ecuaana Dabi jayojja Eyacuiñajji nije jjapeequiani. Ecuana eba e'e jojo nei Eyacuiñajjiya ecuaana jaahuana cani. Jamajjeya ecuaaya esohui huohui tiitiaña jamatii mimishi cuaa napa cani tiya. Jama poani ba'a: ¹⁴ —Emeshi Mese nei Jesosa mano'yajo, Eyacuiñajjiya oya shequi mee ca'yonaje. Jamaya ecuaana mano'yajo, e'e jojo nei Eyacuiñajjiya ecuaana shequi mee caje'yo. Ohuaya ecuanaya, miquianaya pea'ai nequi tiitii mee caje'yo Jesosa nije eyajo —ecuaaya aña.

¹⁵ E'e, quea camaja poani ecuaana Jesosaja esohui huohuañajo. Jamatii ecuanaja esohui ba majje miquianaya Jesosa nije jjapeequinaje. Jamajjeya Eyacuiñajjiya miquianaya ba'e tiitii mee cani. Pea cuana quea huiso Jesosa nije jjapeequi'yajo, Eyacuiñajjiya oya cuana ba'e tiitii mee caje'yo. Jamajjeya oya bihuia caje jama ba'a: —Eyacuiñajji quea pame nee nee poani. Quea ca'a nee nee poani pea'ai —acaje ojjaña.

¹⁶ Jamajjeya ecuaaya maya esohui Jesosajo huohui pajea'yo ajja. Chojja. Ona napa cajje ecuaana quea nee nee poani. Edeja tii cuana jayojja jama ca'a'ama poaje. Jamatii Eyacuiñajjiya ecuanaja edojoshahua cuana quea ja'a po tiitii mee cani. ¹⁷ Jjeya onaa napa cajje ecuaana quea nee poani Jesosa nije jjapeequianijo. Quea nee po tiitii'yo ajja. E'e, jjeya quea nee poani. Jamatii Jesosa nije jjapeequianijo, quijje ohuaya ecuaana ba'e tiitii mee caje'yo quea pame nee nee eyajo onijje. Quea nee popajeaje'yo. Jamaya quea pame nee nee. ¹⁸ Jjeya nei ecuaaya Jesosa ba jjima aña ecojjaa. Jamatii ecuaana jshahuabaquiani Jesosa nije eyajo eba'e'yojji. Jiquio meshijo eba'ejji ecuaana jshahuabaqui ajja. Jiquiojo ba'e tiitii ajja. Eyajo Jesosa nije ca ca oe ba'e tiitije'yo.

5

Eba'ejji quea pame nee eyajo

¹ Ecuaya jama baña ba'a: Eseyaya mano'yajo Eyacuiñajjiya eyacua pana caje'yo esejaya eyami. Eyami eyacua ani tiitije'yo eyajo. E'e, eseya jiquio meshijo ba'yanijo ca'a'ama. Eyajo ba'e'yo majje quea ca'a nee eseya poaje'yo tii tii. ² Eseyaya jjeya nei ishoaña eyami eyacua. Cuanaya eseya jiquio meshijo ba'yanijo quea nee nee poani. Jamajjeya jshahuabaquiani jama ba'a: —Eya poqui sa poani eyahuasijje. Jomajo ecua eyami eyacua poaje'yo.

³ Jesosa poe o'oyajo, jiquio eyami eyacua poaje. Jiquio ecua jiapipi eyacua poani jama jayojja esejaya eyami eyacua poaje'yo. E'e, eseya jashahuabaquiani eyami eyacuajo. Quea pame nee poaje. ⁴ Jiquio meshijo ba'yanijo eseya quea nee nee poani. Quea camaja nee jiquiojo eba'ejji. Eseyaya eyami ca'a'ama, jiapipi jiacocoqui jjima jama. Jiacocoqui sa poani. E'e, eseya poqui sa poani eyahuasijje. Jomajo eyami eyacua sa poani. Jiquiojo manoj'e'yo. Eyacua po majje ca ca eseya ani tiitiije'yo eyajo.

⁵ Eyacuiñajjiya eseya ba'e tiitii mee cani; esejaya eyami eyacua aca'yani pea'ai. Ohuaya Edojjoshahua Pame huoojea canaje ese que ese jaahuanajji. Edojjoshahua Pameya eseya ba mee cani jama ba'a: E'e jojo nei Jesosaja epeeji poanijo ohuaya ecua eyami eyacua quia caje'yo; ani tiitii mee caje'yo onijje eyajo.

⁶⁻⁷ Jamajjeya jashahuabaquiani jama ba'a: —E'e, Eyacuiñajjiya eseya ba'e tiitii mee caje'yo onijje. Eseyaya jiquio meshijo ba'yanijo Jesosa cojja nei jojo ani ajja. Eseyaya eyami eyacua po majje Jesosa nijje ani tiitiije'yo. Jjeya Jesosa esejaya ecojjaja ba jjima; jjaba meequi ajja. Jamatii eseya jashahuabaqui mee cani onijje enequi tiitii'yojji. Jiquio meshijo aquiana cuana quea huiso baña ecojjaa. Jamatii ma aquiana cuana jashahuaba neinei equi ajja. ⁸ E'e jojo nei baña Eyacuiñajjiya eseya ba'e tiitii mee caje'yo. Jamajjeya mete'ama, quea bei nee poani. Poqui sa poani Jesosa nijje eba'e tiitii'yojji, Emeshi Mese nei nijje. Ishoña esejaya eyami eyacua. ⁹ Jamajjeya jjeya nei eseya Jesosaja esohui jayojja jama atitii sa poani jiquio meshijo ba'yanijo. Quijje pea'ai eyajo onijje ani tiitiije'yo. Jamaya sa poani. ¹⁰ E'e, eseya eba jama ba'a: Jesosa Quitohua eyajo ojjaña huoojeajji poanijo ojjaña meshijo ba'ya poa nequi mee caje o cojja nei jojo. Ojjaña quea mimishi poanaje ohuaya quea nee nee po tiitii mee caje'yo. Ojjaña quea pame poanaje ca ca quea bihui nee nee po tiitii mee caje'yo. Jamaya eseyaya baña.

Jesosaa ecua sohuihuohui mee cani ona onijje ejjapeequijji

¹¹ E'e, Jesosaa, Emeshi Mese neiya ojjaña quea mimishi poani quea nee nee po mee caje'yo tii tii. Quea tecue nee nee poaje ojjaña quea mimishi poani nijje. Jamajjeya ecuaaya ojjaña deja cuana huohuaña jama ba'a: —Jesosaja epeeji pocue! ¡Miquea mimishi cuana pajea'yocue!

Eyacuiñajjiya eba ecua oja epeeji poani. Ecuana esohui e'e jojo nei poani, siajje pojjeama. Jamaya oja eba pea'ai.

Ecuana jashahuabaquiani jama ba'a: —Ojjaña Conitojo ba'eja eba esohui e'e nei ecuaaya huohuaña.

¹² Jamajjeya ecua miqiana nijje jama po ajja ba'a: —¡Ecuana bihuicue quea pame poanijo! —chojja, jamaya ecua po ajja. Jiquio jama ecua a sa poani ba'a: Ecuaya huohui tiitiaña eyacua eba'e'yojji Jesosa nijje eyajo.

Jamajjeya miqiana esohui huohuiji nisho huohuicue quea ja'a nee jama ba'a: —Miquianaaya ca ca oe niñebaña Pabo, esohui huohuiji nei. Miya janobajjima nei mimianijo quea pame esohui huohuiji poso jjabaquiani. Jamatii quea ja'a ba'e ajja. ¡Jesosaa Quitotojo oe quea ja'a nee jashahuabaquicue! ¡Quea pame a'yocue! —jamaya esohui huohuiji nisho acue.

¹³ Ecuana esohui quea pame Jesosajo, eba'e'yojji eyacuajo pea'ai shajja'ajja majje beca cuana siajje poani jama ba'a: —Pabo niñepoqui, de, oja epeeji cuana pea'ai niñepoqui —siajje poani.

Eyacuiñajji nijje chaco tiitiañajo, onaaya ecua niñepoqui poso acani. Jamatii ecuaaya chaco tiitiaña Jesosaja esohui quea ja'a nee miqianajaya ebajji. ¹⁴ Jesosa Quito ecuanajaya quea jea nee poanijo esohui e'e nei huohuaña. E'e jojo nei ojjaña mimishi acanijo mano tiitiije'yo. Jesosa mano'yonaje ojjaña mimishi cuijea'yojji, ojjaña cuaqui yasijje epoquijji pojjeamajo. Jamaya ecuanaja eba nei nei. ¹⁵ E'e, Jesosa mano'yonaje oja epeeji mimishi cuijea'yojji. Mano'yajo, Eyacuiñajjiya oya shequi mee ca o'oyanaje. Jamajjeya ¡ojaya esohui jayojjaya ca'a cahua! ¡Yahuajo ejjashahuabaquijji capajea ca'yahua!

¹⁶ Jesosaja epeeji cuana po jjimahua ecua pea cuana jashahuabaquinaje quea tai deja mimishi jama. Jjeya, cho. Jjeya ecuanaja ejjashahuabaquijji pea cuana Jesosaja ejjashahuabaquijji jayojja jama quea ja'a nee poani. Oja epeeji cuana po jjimahua ecua Jesosa Quitotojo jashahuabaquinaje quea tai deja mimishi jama. Jjeya, cho.

¹⁷ Jamajjeya Jesosa Quito nijje japeequianijo, ohuaya eseya pea jashahuabaquime po mee cani. Eseyaya ejjashahuabaquijji eyacua quea ja'a nee po mee cani. Jesosa Quito ba jjimahua ba'ya poa jayojja po'yo ajja. Jjeya eseya pea jashahuabaquiyome poani Jesosa jayojja.

¹⁸ Eyacuiñajjiya Jesosa Quito huoojea canaje eseyo mano'yohua. Jesosa mano'yajo, Eyacuiñajji ese nijje quea quene po tiitii ajja. Ese nijje quea bei po'yo majje ohuaya eseya huoojea canaje ojjaña huasijje oja esohui huohuiya jama ba'a: —Eyacuiñajjiya Jesosa

huoojea canaje eseja mimishijo mano'yohua. Jamajjeya Eyacuiñajji ese nije quea quene po titii ajja. ¡Jesosa nije jjapeequicue! ¹⁹ E'e, ohuaya Jesosa Quito huoojea canaje ojjaña mimishijo mano'yohua. Jamajjeya Eyacuiñajji ojjaña ese nije quea bei poani. Quea quene jashahuaba titiiqui ajja eseja mimishi cuanao —jamaya Eyacuiñajjiya eseja huohui meesahua cani.

E'e, ijeya Eyacuiñajjiya ecuana huoojea canaje jama huohuime aa ba'a: —Jesosa eseja mimishi cuijea'yoyji mano'yonaje Eyacuiñajji ese nije quene'ama epo'yoyji. ¡Ojaya epeeji cuana pocue!

²⁰ E'e, ecuana Jesosa Quitoja esohui huohuiji poani. Ohuaya ecuana huoojea canaje onijje chachohua. E'e, Eyacuiñajjiya ecuana huoojea canaje ojaya esohui huohuiya miqiana huasijje. Jamajjeya ecuaaya esohui huohuiana miqianaya Jesosaja epeeji epo meejji. Jama aña ba'a: —¡Jesosa eseja mimishi cuijea'yoyji mano'yonaje Eyacuiñajji ese nije quene'ama epo'yoyji. ¡Jesosaja epeeji pocue, Eyacuiñajjiya pea'ai! —ecuana poani.

²¹ Jesosa Quito quea pame po titiinaje mimishi'ama nei. Jamatii Eyacuiñajjiya jama acanaje ba'a: —Ojjaña mimishi cuana Jesosa Quitoja poaje. ¡Quio ecua miqianaaya aquiana aboña jama ohuaya mimishi abo caje. Jamajjeya eyaya oya quea nee nee po mee'yo majje ojjaña mimishi cuana enapa titii'yoyji pojjeama ca onijje jjapeequi'yajo —Eyacuiñajji poanaje. Jamajjeya Eyacuiñajjiya huohui canaje jama pea'ai ba'a: —Ojjaña Jesosa nije jjapeequi'ani eyaya baña ecuea epeeji, shajjama' pojjeama —Eyacuiñajji poanaje.

6

¹ E'e, ecuaaya Eyacuiñajji nijjeya ojjaña huasijje esohui quea pame nee Jesosajo huohuiana. Jamajjeya ecuaaya miqiana huohui neineaña jama ba'a: —¡Eyacuiñajjiya esohui shajja'ajja majje jamaya pocue! ¡A'a shajjama' pojji! Shajjama' cuana eba'e meejji pojjeama eyajo Jesosa nije.

² ¡Eyacuiñajjiya esohui shajja'ajjacue! Yahuaajo nei nei ohuaya tehue mee ca poa jama ba'a: “Jjeya nei miqianaya enijje mimiani miqiana mimishi cuijea'yoyji. Eyaya miqianaya shajja'ajjanaje. Enijje mimianijo, eyaya miqianaya ba'e titii mee'yo pea'ai”.

Jamaya Eyacuiñajjiya esohui yahuajo nei etehue'yo poa.

¡Bacue oe! Jjeyahua nei Eyacuiñajji miqiana shajja'ajja sa poani. Jjeya nei ohuaya miqianaya ba'e titii mee sa acani ojaya epeeji nei nei epoji.

Pabo quea nee nee poanaje

³ Ecuaaya Jesosaja esohui jayojja jama atitiiña quea ja'a nee. Jamajjeya ojjaña ecuana ba majje Jesosaja esohui shajja'ajja caje'yo. Jamaya ameeme ajja ba'a: —E'e de, Jesosaja epeeji cuana quea mimishi nee poani. Jamajjeya ecuana ojaya epeeji po sa po ajja —jama sijje pomeya epoji pojjeama.

⁴ Chojja. Ecuana ba majje ojjaña caba cahua ecuana Eyacuiñajjiyo quea pame nee chachachacoani jamatii onaa napa caniya tii. Quea pame nee po titii. E'e, onaaya ecuana quea nee po mee cani, ecuana niñeba cani, Jesosa nije jjapeequi'ani eba'eji quea camaja poani pea cuana quea mimishi poanijo. ⁵ Maaya ecuana cuia majamaja canaje, jeanobiajea majamaja canaje, ecuana nije quea quene nee po majje quea huiso jjachichaquinaje. Ecuana cojja neiyo nequi majje janobajjima mimipanajajinaje. Ecuana quea camaja chachachaco majje cahui jjima tii aninaje. Quea shoe po majamajanaje pea'ai. Jamatii ecuaaya esohui quea pame Jesosajo huohui majamajaña, hua'ama nei nei ecuana poani. ⁶ Mimishi'ama nei nei ba'yani pea'ai. E'e, ecuana chachachacoani Jesosajo quea pame nee. Quea huiso esohui Jesosaja ecuanaja eba quea ja'a nee. Ecuana quenequene cuaji ajja pea cuana nije. Quea bei poani. Deja tai'ama poani. Edojoshahua Pameya quea pame nee amesahua cani pea'ai. Pea cuana ecuanaja quea jea nee poani e'e jojo nei pea'ai. Jamajjeya ojjaña ba cani ecuana Jesosa Quitoja echacojji quea ja'a nee. ⁷ Ecuana esohui e'e jojo nei poani. Eyacuiñajjiya huohui meesahua canijo ecuanaja esohui quea ja'a nee poani. Eyacuiñajjiya emimishi cuijea'yo jjejojo ecuana ba'yani quea ja'a. Jamajjeya ecuaaya esahua epeeji cuana mimiciajeanobiajeaña esohui e'e nei mimi majje. Eyacuiñajjiya amesahua canijo esohui e'e nei mimiani tii. ⁸ Cuanaja eya quea pame nee poanijo jamaya cuana poani ba'a: —Pabo quea pame nee poani.

Beca cuana jama poani ba'a: —Pabo ecuea boti'ama, Jesosaja esohui huohuijijjo.

Pea cuana ca ca jama poani ba'a: —Pabaja esohui quea ja'a nee.

Beca cuana ca jama poani ba'a: —Chojja, Pabaja esohui shajja'ajja sa po ajja ca iña.

Pea cuana ca jama saja'ame acani ba'a: —Pabo Eyacuiñajjiya esohui huohuiji quea ja'a nee.

—Chojja, Pabo esohui huohuiji nisho. Oya sijje pojji —jama eya niñebameya acani cuaa.

⁹ —Pabo ecuea eba. Ohuaya quea pame nee huohui cani —beca cuana poani.

Pea cuana ca jama poani ba'a: —¿Ae shai poani Pabo? Oya ecuea ba jjima —poani.

Pea cuaa eya cuiajea sa acani. Jamatii eya eshe nequi, mano'yo jjima. Niñeba majje eya cui a canaje cuaa. Jamatii Eyacuiñajjiya jaahuana canaje jjejojo eya mano'yo jjima. ¹⁰ Quea huiso epeeji nisho poanajejo, eya quea yeno poani. Jamatii Eyacuiñajjiya eya quea bihui nee po mee cani. Eya aema' poanaje pea'ai. Jamatii ecuea esohui shajja'ajja majje quea huiso Jesosaja epeeji poani, quea pame ba'yani. E'e, Jesosaja epeeji poanijo eseya quea aquiana huiso nee nee jayojja. Jiquio meshijo ba'yanijo ca ca eya e' aquiana mese pojjeama. Jamatii Jesosaja epeeji poanijo ecuea quea huiso aquiana yani eyajo.

¹¹ Ecuea epeeji cuana Conitojo ba'e, eyaya ojjaña ecuea ejjashahuabaquijji huohuiaña quea ja'a nee miqiana huasijje miqianaya ecuea quea jea nee nee poanijo. ¹² E'e, miqiana nijje jjapee neineiquiani, miqiana quea jea nee nee poanijo. Miqianaya ca ca enijje jjapee neineiqui sa po'yo ajja. ¹³ Jamajjeya epeeji cuana, ecuea esohui miqiana huasijje jama ba'a: —Jiquio ecua miya ecuea quea jea nee nee jamaya oe eya acue miqiaaya! ¡Enijje jjapee neineiquicue! —eya poani.

¡Dejja mimishi nijje a'a jjapee neineiquijji!

¹⁴ Miqianaya Jesosaja epeeji cuana poanijo ja'a nequijji Jesosaja epeeji pojjeama cuana nijje! ¡Ojaya epeeji cuana jayojja a'a pojji! Jesosaja ejjashahuabaquijji Edosiquiana neija ejjashahuabaquijji jama pojjeama. Pea oya, de. Jesosaja esohui quea ja'a nee cuaquijji jayojja. Edosiquiana neiya ca ca quea mimishi nee nee, quea tai nee nee acani. Ojee nequi ajja Jesosaja epeeji Edosiquianaja epeeji nijje. Pea oya, de. ¹⁵ Jesosa Quitoja ejjashahuabaquijji quea pame nee nee. Edosiquianaja ca ca quea tai. Pea ojaya, de. Jesosa Quitoja epeeji cuanaja ejjashahuabaquijji quea pame. Ojaya epeeji pojjeama cuanaja ejjashahuabaquijji ca ca quea tai. Pea ojaya, de. ¹⁶ Eyacuiñajjiya equi yasijje Jesosaja epeeji cuana dobiqianani ojee Eyacuiñajji bihuiaa, eyacuiñajji nisho bihuiaa pojjeama. Maya quea tai. Cuanaya Jesosaja epeeji cuana huasijje Eyacuiñajji dobiquinaje. Jamajjeya eshahuaaja epeeji cuana nijje jjapeequi meeme ajja. Yahuaajo nei Eyacuiñajjiya esohui huohui mee ca poa ojaya epeeji cuana huasijje jama ba'a:

“Miqianaya ecuea huapa pojjeama cuana poanijo, eya miqiana huasijje dobiqianani, miqiana nijje jjapee tiitiqianani pea'ai. E'e, eya oe nei miquea Eyacuiñajji. Miqianaya jaahuana tiitiaña pea'ai. Miqiana ecuea epeeji cuana poani”.

Jamaya pea esohui etehue'yo poa pea'ai ba'a:

¹⁷ “Jamajjeya ¡ecuea epeeji pojjeama cuana nijje a'a jjapee tiitiqijji! ¡Enijje nei oe jjapee tiitiqicue! ¡A'a quea mimishi pojji! Jamajjeya eyaya miqianaya ba'e meeje'yo enijje. ¹⁸ Cuanaya eya miqianajaya Chii nei poaje. Miqianaya ecuea ebacua pionu cuana, ecuea ebacua ejja cuana poaje'yo pea'ai. Eyaya mi jaahuanajji quea ca'a neeya jamaya aña”.

Jamaya Eyacuiñajjiya yahuaajo nei huohui ca poa.

7

¹ Ecuea epeeji cuana, ¡shajja'ajjacue mo! Eyacuiñajjiya jiquio esohui huohui canaje esejaya ebajji, ese jaahuanajji poaniya. Jamajjeya ja'a quea mimishi ba'ejji; a'a quea mimishi jjashahuabaquijji pea'ai! Miqianajaya eba Eyacuiñajjiya ojjaña mimishi cuana quea nee nee po mee caje'yo ti ti. Jamajjeya ¡quea pame nee nee oe acue! ¡Eyacuiñajjiya ejjashahuabaquijji jama oe pocue! ¡Oya oe shajja'ajjacue!

Pabo quea bihui nee poanaje

² ¡Eya quea jea nee acue! Eyaya miqianaya quea pame nee a'yonaje. Ecuea esohui quea pame poanijojoya miqianaya quea pame nee nee po meeje'yo. E'e, miqianaya ecuea edasajji pojjeama. ³ Eyaya jiquio esohui huohuiaña miqiana tecueajji pojjeama. Chojja. Yahuaajo eyaya huohuinaje jama ba'a: —Miqianaya ecuea quea jea nee nee. Jamajjeya eya miqiana nijje ba'e majje quea bihui nee poaje. Cuanaya miqiana nijje nequi majje eya manoj'e'yo pojja'a. Jamatii, jamaya quea pame nee miqianaya ecuea quea jea nee poanijo.

⁴ Ecuea eba miqiaaya ecuea esohui etehue'yo jayojja jama aje'yo. Jamajjeya eyaya miqianajo jama huohuiaña ba'a: —Jesosaja epeeji cuana Conitojo ba'eya ecuea esohui etehue'yo jayojja jama acani —eya poani.

E'e, miqianajo eya quea bihui nee poani. Pea cuaa eya quea nee nee po mee cani Jesosa nijje jjapeequianijo. Jamatii eya quea bihui nee nee poani miqiana quea pame nee nee poanijojo.

⁵ Ecuea epeeji Conitojo ba'e, eyaya miqianaya huohuije ecuea eba'ejjijo pea meshijo. Eya Masenonia meshijo nequi pea cuaa napa majamaja canaje, niñeba majamaja canaje pea'ai. Jamajjeya eya quea ajajja poanaje. ⁶ Jamatii Eyacuiñajjiya ojaya epeeji quea yeno

nee nee poajo jaahuana cani. Jamajjeya ohuaya Tito huoojeya ca'yonaje e quea bihui po mee'yojji. ⁷ E'e, Tito ba majje eya quea bihui nee poanaje. Ohuaya miqúanajaya huohui canaje quea pame jama ba'a: —Pabo, Jesosaja epeeji cuana Conitojo ba'eya eya, Tito, jaahuana ca'yonaje quea pame nee. Miya ojjañaja quea jea nee poani, Pabo. Yahuajo onaaya esohui huohuiji nisho shajja'ajja canaje. Jamajjeya miya quea yeno poanajejo, miqúea epeeji cuana pea'ai quea yeno poanaje. Miya ona nijje quea bei po mee o'oya sa acani cuaa —jamaya Tito poanaje.

Jamajjeya miqúanajaya ejo jashahuabaquianijo, eya quea bihui nee poani.

⁸ Yahuajo eyaya pea tehue'ya poa quea tecue. Ma esohuijaya miqúanajaya quea yeno poanaje. Quea camaja nee ma esohui etehuejji poanaje, miqúanaya tecueajji. Jamatii, ma etehue'yojo miqúanajaya quea yeno po tiiti ajja. ⁹ E'e, ma esohui etehue'yo ba majje miqúanajaya quea yeno poanaje. Quea yeno po majje miqúanajaya mimishi pajea'yonaje. Esohui huohuiji nishoja esohui sijje shajja'ajja pajea'yonaje pea'ai, miqúanajaya. Jamajjeya miqúanajaya eya quea bihui nee poani. E'e, quea yeno poanajejo, Eyacuiñajjiya miqúanajaya ba'e meesahua ca'yonaje quea pame nee. Jamaya quea pame nee miqúanajaya. ¹⁰ Dejjaja cuana quea mimishi poani Eyacuiñajjiya quea yeno po mee cani oja mimishi pajea'yojji. Mimishi pajea'yo ca'yajo, Eyacuiñajjiya ojaya mimishi cuana cuijea ca'yani. Eshahuaja epeeji cuana quea yeno poani mimishi amajje. Jamatii Eyacuiñajjiya oya cuana quea nee nee po tiiti mee caje'yo mimishi pajea sa po'yo ajjajojo. ¹¹ E'e, Eyacuiñajjiya miqúanajaya quea yeno po mee ca'yonaje. Quea yeno po majje miqúanajaya quea pame nee poani. Shajjama' cuana, mimishi cuana miqúanaya nee nequi. Ojaya mimishi cuana cajaa añ miqúanajaya. Oya miqúanajaya epee'yojji pojjeama; miqúanajaya onaya jayojja jama po ajja. Quea quene poanaje pea'ai esohui huohuiji nisho cuana nijje e siajje ajjajojo. Miqúanajaya eba Eyacuiñajjiya quea nee nee po mee caje'yo ojjaña mimishi cuana. Jamajjeya quea mete nee po majje mimishi cuana a sa po'yo ajja. Cuanay eñije japee neineiqui sa poani, quea bei. Miqúanajaya Eyacuiñajji quea boti nee poanije esohui shajja'ajja o'oya sa poani. E'e, miqúanajaya quea ja'a jashahuabaquianijo, ecuea eba miqúanajaya mimishi poani nijje japeequi'yo ajja. Jjabahuejjaqui meesahuaje'yo Jesosa nijje ejjapeequiji. Jamaya quea pame nee.

¹² Jamajjeya eyaya yahuajo esohui tehue majje miqúanaya huasijje huoojanaje. Eyaya maya esohui tehuenaje miqúanaya jashahuabaqui meeji jama ba'a: —E'e de, Pabo Eyacuiñajjiya huoojeya'yo esohui huohuiji. Oya ecuanaja quea jea nee. ¡Oja tehue jayojja jama eija'aquí o quea bihui pojji! —jamaya miqúanajaya jashahuabaquinaje.

Maya esohui eyaya tehuenaje dejjaja quea mimishi cuana tecueajji. Ma dejjaja cuanaja mimishijo pea cuana quea yeno poanaje. Eyaya ma esohui tehuenaje dejjaja quea yeno ani cuana yeno'ama po mee'yojji pea'ai.

¹³ Jamajjeya ecuea etehue'yo ba majje miqúanajaya quea ja'a jashahuabaqui o'oyani. Jamajjeya eya quea bihui nee poani.

Yahuajo miqúanaya nijje mimi jimahuajo Tito quea yeno jashahuabaquinaje jama ba'a: —Jesosaja epeeji cuana Conitojo ba'e quea mimishi jea nee nee.

Jamatii miqúanaya nijje mimi majje Tito quea bihui nee poanaje. Jamajjeya eya quea bihui nee poanaje Tитоja esohui shajja'ajja majje miqúanajaya ohua huohui cajje. ¹⁴ Yahuajo eyaya oya huohuinaje jama ba'a: —Tito, Jesosaja epeeji cuana Conitojo ba'e minijje japeequije'yo. Miquea esohui shajja'ajja caje pea'ai —eyaya anaje.

E'e, ecuea esohui Tito nijje jayojja jama a'yonaje miqúanajaya. Jamajjeya miqúanajaya quea pame anaje; eya bicho'ama miqúanajaya. ¹⁵ Miqúanaya huasijje poqui jimahuaja miqúanajaya Tитоja quea boti nee pishana. Miqúanaya que poqui majje miqúanajaya ojaya quea boti nee nee. Oya quea bihui nee nee pea'ai. E'e, miqúanajaya jama poani ba'a: —E'e, Jesosaja epeeji cuana Conitojo ba'eya ecuea esohui shajja'ajja canaje quea jaji nee. Ohuaya ojjaña ecuea esohui shajja'ajja neinei canaje eya etecuea poajeya jjejojo. Ecuea esohui jayojja jama a sa poanaje —Tito poanaje.

¹⁶ E'e, ecuea eba miqúanajaya ecuea esohui jayojja jama poaje. Jamajjeya eya, Pabo, miqúanajaya quea bihui nee poani, de.

8

¡Jesosaja epeeji cuana ba'e meesahuacue!

¹ Ecuea epeeji cuana Conitojo ba'e, jjeja eyaya miqúanajaya huohuije Jesosaja epeeji cuana Masenonia meshijo ba'ejo. Eyacuiñajjiya oya cuana ejjesheji quia meesahua canaje Jesosaja epeeji cuana Jodea meshijo ba'e yasijje equiajji. ² E'e jojo nei quea camaja nee nee onajaya eba'eji, Masenonia meshijo ba'eja. Aema' cuana poanaje. Jamatii onaaya ejjesheji quia canaje quea bihui nee Jesosaja pea epeeji aema' nei cuana ba'e meesahuajji.

Quea bihui nee nee poanijo quea huiso quia sa poanaje. ³ Ecuea eba oya cuana aema' poanaje. Jamatii ejjeshejji quia canaje. Quia majje quea camaja, aema' nei poanaje. Ecuea oya cuana huohui jjima ejjeshejji quiajji, pea cuana ba'e meesahuajji. Chojja. Jamatii quia canaje. ⁴ Oya cuana enijje mimi majamajanaje jama ba'a: —¡Ecuanaja ejjeshejji dojocue! ¡Quiacue Jesosaja epeeji cuana Jodea meshijo ba'e yasiije ona ba'e meesahuajji! Jamaya ecuana a sa neinei poani —poanaje Jesosaja epeeji cuana Masenonia meshijo ba'e.

⁵ Eya jjashahuabaquinaje jama ba'a: —Onaaya ejjeshejji quia caje oe pojji pojja'a, quea huiso pojja'a.

Chojja de. Oya cuana jama poanaje ba'a: —Ojjaña ecuanaya Eyacuiñajji esohui jayojja jama poaje'yo. Cuanaya ojjaña ecuanajaya aquiana ojava poani —jamaya oya cuana poanaje —. ¡Ecuana huohucue Eyacuiñajji ejjashahuabaquijji! Miquea esohui jayojja jama ecuana poaje'yo —jamaya Jesosaja epeeji cuana Masenonia meshijo ba'eya huohui canaje.

⁶ E'e, quea ja'a nee acanaje. Jamajjeya eya Tito nijje miminaje jama ba'a: —Tito, ¡Jesosaja epeeji cuana Conitojo ba'e yasiije poqui o'oyacue! Yahuajo miya ona nijje miminaje ejjeshejji Jesosaja pea epeeji cuana huasijje equiajji, ona ba'e meesahuajji. Jamatii ejjeshejji huoojea jjima. Jamajjeya ijjea ona nijje mimi o'oyacue ejjeshejji equiajji! ¡Jama acue ba'a: “Jesosaja epeeji ba'e meesahuajji quia pame nee poani Jesosajo” jamaya acue, Tito! —eyaya Tito huoojeaña ma esohui huohuiya.

⁷ E'e epeeji cuana, miqianaya quea pame nee poani jama ba'a: Jesosaja esohui jayojja jama poani. Miqianajaya esohui Jesosajo quea pame pea'ai. Miqianajaya eba quea huiso esohui Jesosaja. E'e jojo nei quea ja'a nee jjashahuabaquiani pea'ai. Eya miqianajaya quea jea nee poani pea'ai. Jamatii ijjea Eyacuiñajji miqianaya ejjeshejji quia meesahua cani Jesosaja epeeji Jenosanenajo ba'e yasiije ona ba'e meesahuajji. Jamaya quea pame pea'ai. Onaa napa caje oya cuana aema' nei. Napa huicha'a huicha'a canaje cuana Jesosaja epeeji poanijojo. ⁸ Ecuea Tito miqiana quea huoojea jjima ejjeshejji quia meeya. Chojja. Jesosaja pea epeeji cuana jamatii ejjeshejji quia canaje quea bihui nee. ¿A'a miqianaya onaya jayojja po sa poani pea'ai? ¿A'a miqianaya quea pame nee aje pea'ai? ⁹ ¡Jashahuabaquicue Jesosaja miqianaya quea pame nee nee acanaje! Jama ba'a: Jesosa ba jjimahuajo miqianaya aema' jayojja poanaje. Jamatii ohuaya, Jesosa Quitohua, esejaya Emeshi Mese neiya miqianaya ba'e tiiti mee caje'yo onijje eyajo quea ja'a nee nee. Dejja cuana huasijje poe jjimahua Jesosa ba'e'yonaje eyajo quea ja'a nee nee. Meshi yasiije poe majje ca ca dejja cuana jayojjaya poanaje, aema' pea'ai. Jamaya oya poanaje miqiana ba'e tiiti mee'yojji eyajo.

¹⁰ Jamajjeya miqianaya ejjeshejji quiajji oya jama poani ba'a: Oe shequajja yahuajo miqianaya ebionei jjashahuabaquinaje ejjeshejji aema huasijje equiajji. Pea cuana jjashahuabaqui jjimahuajo miqianaya quia sa poanaje. ¹¹ E'e, miqianaya ejjeshejji quia sa poanaje. Jamajjeya ijjea miqianajaya ejjashahuabaquijji yahuajo jayojja jama acue! ¡Miqianajaya aquiana quea huiso yanijo quea huiso quiacue pea'ai! ¡A'a quea bejjo nahue pojji! ¹² Aquiana quia sa poanijo, Eyacuiñajji quea bihui nee poani e'aquiana mese nijje. Ojava Eyacuiñajji quea jea nee poanijo e'aquiana meseja aquiana quea huiso poanijo quea huiso quia caje pojja'a. Aquiana oe pojji poanijo ca ca oe pojji aquiana quia caje. Jamatii Eyacuiñajji eba esejaya aquiana quea huiso pojja'a, oe pojji pojja'a. ¿A'a aquiana cuana miqianajaya quea nahue? ¹³ Onaa napa caje aema' nei nei ani quea camaja. Oya cuana miqianaa aquiana quiajje aema' nei epo'yojji pojjeama. Ma aema huasijje quea huiso aquiana quia majje miqianaya aema' nei poaje pojja'a. ¡A'a jamaya pojji! Chojja, jamaya eya huohui jjima. Eya jjashahuabaquiani jama ba'a: —Oe Jesosaja epeeji aquiana cuana quea huiso poajo epeeji aema huasijje iye huiso quia majje chama' aema' poaje.

Jamaya eyaya amee sa aña. ¹⁴ Jjea nei miqianajaya aquiana quea huiso. ¡Jesosaja epeeji aema huasijje quiacue! Quia majje oya cuana aema' pojjeama poaje. Quea ja'a ba'eje'yo. Quijje miqianaya aema' poajo, onajaya aquiana yanijo quia caje'yo miqiana huasijje pojja'a. E'e, ojjaña aquiana cuana pea cuanaja aquiana cuana oya huisoajja poaje. ¹⁵ E'e, esohui etehue'yo yahuajo nei jayojjaya jama poani ba'a:

“Beca equa mese cuana oe pojji bobi chicha canaje. Pea equa mese cuana bobi quea huiso nee nee chicha majje nahue'ama poanaje bobijo. Jamajjeya ojjaña cuana bobijji poanaje, pea cuanaja bobi oya huisoajjaya poanaje”.

Pabohua Tito huoojea caje Conito cuiñajji yasiije

¹⁶ Eyaya Eyacuiñajji bihuiaña jama ba'a: —Eyacuiñajji, miyaya Tito jjashahuabaqui meenaje quea ja'a nee miquea epeeji cuanao, Conitojo ba'ejo. Jamajjeya oya e jayojjaya onajo jjashahuabaquiani. Conitojo ba'e cuana quea ja'a nee ba'e mee sa acani Jesosajo. E'e Eyacuiñajji, jamaya miyaya Tito ameesahuanaje —jamaya eyaya Eyacuiñajji bihuiaña.

¹⁷ E'e epeeji cuana, ecuea esohui etehue'yo miqiuana huasijje ejjeshejji aema huasijje equiajji ba majje Tito quea bihui nee poanaje. Miquiana huasijje poqui sa poani ecuea esohui etehue'yo huohuiya. Eyaya oya huoojea jjiima. Chojja, oya jamatii poqui sa poani miqiuana que. ¹⁸ Tito nijje eyaya pea dejja huoojeaña, Jesosaja epeeji pea'ai. Maya poquinaje ojjaña Jesosaja epeeji cuana huasijje esohui Jesosajo huohuiya. Shajja'ajja majje ojjaña Jesosaja epeeji cuaa huohui canaje jama ba'a: —Maaya Jesosajo quea pame nee esohui huohui cani —acana je cuaa.

¹⁹ Jesosaja epeeji cuaa pea cuiñajji cuanajo ba'eya jiquio epeeji babaca canaje enijje epoquijji Jenosanena huasijje ejjeshejji aema huasijje dojosahuaa. Jamaya eya ejjeshejji dojo sa neinei poani Jesosaja epeeji aema' poani yasijje ona ba'e meesahuajji. Jamajoya pea cuana Jesosajo jashahuabaquije jama ba'a: —E'e de, Jesosaa ojaya epeeji cuana quea ja'a nee ameesahua cani. Jesosa ca ca oe quea pame nee nee poani —poaje cuana.

²⁰ Ma epeeji enijje poquianiya ohuaya ba caje eyaya e'e jojo nei ma ejjeshejji aema huasijje quiaña. Jamajjeya pea cuana ejo siajje epojji pojjeama jama ba'a: —Pabo ejjeshejji siijji pojja'a —pea cuana jamaya epojji pojjeama.

²¹ E'e, eya jashahuabaquiani jama ba'a: —Eyaya quea pame nee ejjeshejji doje. Jamajjeya ojjaña ba caje eya siipojji pojjeama. Jesosaja eba eyaya quea ja'a nee añ.

²² Tito nijje eyaya beca dejja huoojeaña miqiuana bana. Maya ecuea eba. Oya pea'ai quea ja'a nee po tiitiiani. Jesosajo chaco cani. Jjeya maya miqiuana nijje quea ja'a nee nequije. Miquianajo jashahuabaquiani jama ba'a: —Jesosaja epeeji cuana Conitojo ba'e quea pame nee poani. Quea bejjo nahue pojjeama, shajjama' pojjeama pea'ai poani.

²³ E'e pojja'a pea cuaa huohui'ajja caje: —¿A'ya cuae Tito?

Jamajjeya joya cuana huohuicue jama ba'a: —Titohua Pabo nijjeya esohui quea pame nee Jesosaja huohui cani. Ohuaya Pabo miqiuana nijje chaco meesahua cani —huohuicue!

Pea dejjaa ma beca epeeji cuanajo huohui'ajja cajo, jama acajo ba'a: —¿Aya acuae oya cuana huoojea canaje? —acajo, joya cuana huohuicue jama ba'a: —Jesosaja epeeji cuaa beca epeeji huoojea canaje miqiuana huasijje, miqiuana Jesosajo ba meesahuaa. Ohuaya Jesosajo huohui cani quea pame nee nee pea'ai —acue!

²⁴ Jamajjeya jiquio Jesosaja epeeji cuana quea jea nee acue! ¡Oya cuana jaahuanacue quea pame nee! ¡Oya cuana shajja'ajjacue pea'ai! Ma ba majje ojjaña Jesosaja epeeji cuaa ba caje miqiuana Jesosaja epeeji quea ja'a nee poani pea'ai. Jamajjeya ojjaña ba caje ecuanaja esohui quea pame miqiuana e'e nei poani pea'ai.

9

Ejjeshejji Jesosaja epeeji cuana huasijje equiajji

¹ Eyaya miqiuana huasijje esohui etehue majamajjaji pojjeama Jesosaja pea epeeji aema' ba'e meesahuajji. ² Chojja. Ecuea eba miqiuana pea cuana ba'e meesahua sa neinei poani. Jamajjeya eyaya Jesosaja epeeji cuana Masenonia meshijo ba'e huohuinaje jama ba'a: —Jesosaja epeeji cuaa Acaya meshijo ba'eya ejjeshejji chicha sa acani aema huasijje equiajji. Jamaya ohuaya acanaje oe shequiaya yahuajo —jamaya eyaya pea cuana huohuinaje.

Ma esohui miqiuana shajja'ajja majje pea epeeji cuana ejjeshejji chicha sa poanaje pea'ai Jesosaja epeeji aema huasijje equiajji. ³ Jjeya eyaya beca cuana, Jesosaja epeeji cuana huoojeaña miqiuana huasijje. Jamajjeya ¡ecuea esohui ma ecua eyaya yahuajo huohuinaje jayojjaya oe acue! E'e, ma beca epeeji cuaa miqiuana ojee iyaa caje ejjeshejji echichajji, aema' nei Jodea meshijo ba'e yasijje equiajji. Jamajjeya miqiuana ejjeshejji equiajji apoa poaje pea cuana poe jjimahuajo. ⁴ E'e, Jesosaja epeeji cuana Masenonia meshijo ba'e miqiuana huasijje poe'yajo, miqiuana ejjeshejji aema huasijje equiajji apoa ajjimajo quea bicho nee nee poaje miqiuana. Eya pea'ai quea bicho poaje miqiuana ecuea esohui jama ajjimajo. Quea bicho nee eya poaje. ⁵ Jamajjeya eyaya Jesosaja epeeji beca cuana huoojeaña pea epeeji cuana miqiuana que poe jjimahuajo. Ohuaya miqiea ejjeshejji aema huasijje equiajji chicha meesahua caje. ¡Miquianajaya esohui yahuajo jayojjaya jama acue! Jamajjeya miqiuana ejjeshejji equiajji quea huiso poaje, miqiuana ejjeshejji yahuajo jayojjaya. Jamajjeya miqiuana quea bihui nee quiaje'yo.

¡A'a quea dejja tai pojji; a'a quea nishelui pojji!

⁶ ¡jiquio esohui shajja'ajjacue pea'ai! Oe pojji bana majje quijje oe pojji chichaje'yo. Jiquio ecua eso' jayojjaya jama miqiuana ejjeshejji poaje. Jjeya quea dejja tai poanajo, quea nishelui poanajo pea'ai oe pojji aema huasijje quiajo, quijje Eyacuiñajjiya oe pojji quia caje'yo miqiuana huasijje. Jjeya quea huiso quiañajo ca ca, dejja tai'ama poanajo ca ca quijje Eyacuiñajjiya quea huiso quia caje'yo miqiuana huasijje. ⁷ Jamajjeya jashahuaba

neinei quicue ache huiso miqúanaya quia sa poani! ¡Quea bihui nee quiacue! E'e, ¡jamatii miqúanajaya ejjashahuabaquijji jayojja jama quiacue! Eyacuiñajjija quea jea nee ojaya epeeji cuana. Ejjeshejji quea bihui nee quia canijo, deja tai'ama poanijo pea'ai Eyacuiñajji quea bihui nee poani. ⁸ E'e, Eyacuiñajjija aquiana cuana quea huiso nee nee yani. Jamajjeya miqúanajaya quea huiso ejjeshejji aema huasijje quia majje, jamatii ohuaya miqúanajaya aquiana quea huiso po tiitii mee caje'yo. Miquianaya aema' nei epojji pojjeama. Chojja. Eyacuiñajjiya miqúanaya jaahuana cani. ⁹ Yahuaajo nei nei esohui etehue'yo jama poa ba'a:

“Ojjaña joya ejjeshejji quea huiso quia tiitii canaje aema' ba'e meesahuajji quea pame nee poanaje. Jamajjeya jjeyahua nei Eyacuiñajjiya oya quea ja'a ba'e meesahua caje. Quijje pea'ai ba'e tiitii mee caje'yo”.

Jamaya yahuaajo nei nei esohui etehue'yo poa.

¹⁰ Eyacuiñajjiya eso' quia cani ojjaña huasijje quejo equecuajji. Ohuaya bobi quia cani ojjaña bobiajji pea'ai. Jamajjeya ohuaya miqúan huasijje eso', bobi pea'ai quia majje, ¡miqúanaya aquiana cuana quiacue pea cuana huasijje! Jamaya quea pame nee. ¹¹ E'e, Eyacuiñajjiya miqúan huasijje aquiana mi ba'e meeji quia caje'yo. Jamajjeya miqúanaya pea huasijje aquiana o ba'e meeji quia poquia tiitiije. Jamajjeya miqúanajaya aquiana quea huiso equia'yo aema huasijje eya quiajje onaaya huohui caje jama ba'a: —Eyacuiñajji cuana jaahuanaajji quea pame nee poani. Ohuaya Conitojo ba'e cuana ecuaña que quia meeshahua canaje quea huiso, ma ecua Pabohua huohui canaje jama acanaje —poaje quea bihui nee.

¹² Ma aquiana cuana miqúanaya Jesosaja epeeji aema' cuana huasijje quiañaajo, quea ja'a nee ba'e meeña. Cuanaya ma aquiana quea huiso quiañaajo, onaaya Eyacuiñajji bihuia neinei cani: —E'e, Eyacuiñajji, jamaya. Miya quea pame nee poani ecuaña nijje —poaje.

¹³ E'e, miqúanaya deja tai'ama poanijo, aquiana quiañaajo quea huiso ba meeña miqúanaya Jesosaja epeeji quea ja'a nee poani. Jamajjeya oya cuana mimije jama ba'a: —Eyacuiñajji, miyaya miquea epeeji cuana quea ja'a nee po meeña. Miyaya oya cuana quea huiso aquiana quianaje. Jamajjeya miquea pea epeeji cuana huasijje aquiana quea huiso huoojea canaje ona ba'e meesahuajji. E'e, miquea epeeji cuana Conitojo ba'eya huohui cani oya cuana Jesosa Quitaja epeeji cuana poani. Ecuana eba onajaya esohui e'e jojo nei poani miquea esohui jayojja jama oya cuana poanijo —jamaya pea cuana huohui caje miqúanajjo.

¹⁴ Jamajjeya miqúanaya ojaya quea jea poanijo, Eyacuiñajji nijje mimi majje jama poaje miqúanajo ba'a: —Eyacuiñajji, miyaya quea huiso aquiana quianaje ona que. Majoya Jesosaja epeeji cuana Conitojo ba'e quea huiso aquiana quia meesahuanaaje ecuaña que. Ecuana quea jea ameesahuanaaje. ¡Quea pame nee poanijo, oya cuana jaahuanaque! —jamaya onaya mimije Eyacuiñajji nijje.

¹⁵ Eyacuiñajji esejo ¡jashahuabaquiani. Jamajjeya eyaya oya bihuiaña jama ba'a: —Eyacuiñajji, miyaya miquea Bacua Eja huoojeanaaje ecuaña jaahuanaa. Quea pame nee nee poanaje miya —jamaya Eyacuiñajji bihuiaña eyaya.

Mahuiso ecuaña esohui ejjeshejji equiajjijo.

10

Pabo esohui huohuijji nei nei

¹⁻² Jjeya eyaya, Pabohua pea esohui tehueña. Eyacuiñajjiya eya huoojea canaje miqúanaya sohuihuohuiya. Jamajjeya ¡shajja'ajjacue mo! Jesosa Quito ese nijje quea bei poani. Jamajjeya eseya ojaya epeeji poanijo, eya miqúanaya nijje mimi neinei jama ba'a: —Beca siajjejojji cuana miqúanaya nijje mimiani ejo jama ba'a: “Pabo aje oe ecuaña nijje nequiahua oya ca'a'ama, quea mete poanaje. Quea huesha nei nequija jjejojo ca ca quea sohui bishaa, quea tecue pea'ai poani; poe majje, cho” oya siajje poani.

¡A'a maya siajjejojji cuana shajja'ajjacue! ¡A'a o jayojja jama mimijji! E niñebajji, eyaya miqúanaya tecueaje poe majje. Eya quea tecue poaje beca cuana nijje ejo quea tai ¡jashahuabaquiani. Oya cuana aje oe ¡jashahuabaquiani jama ba'a: —Pabo Eyacuiñajji huoojea'yo jayojja jama po ajja. Ohuaya ojaya ejjashahuabaquijji jayojja jama poani, Jesosaja ejjashahuabaquijji jayojja jama pojjeama —ejo siajje poani beca cuana.

³ Chojja de. Eseya Jesosaja epeeji cuana ¡jiquio meshijo ba'yanijo ojjaña quea mimishi mimicuiajejanobiajea sa seya ña. Jamatii eshahuaja epeeji cuana jayojja jama ¡jashahuabaqui ajja eseya. ⁴ Eshahuaja epeeji cuana onajaya ejjashahuabaquijji quea tai jayojja jama acani. Eya, chojja. Ecuaña ejjashahuabaquijji pojjeama eyaya eshahuaja epeeji cuana mimicuiajejanobiajeaña. Eyacuiñajjiya ca ca eya ojaya ejjashahuabaquijji

ameesahua cani. Jamajjeya ohuaya eya ojjaña joya quea mimishi nee poani mimicuija-jeanobiajea meesahua cani. ⁵ Ecuea eba Eyacuiñajjija esohui quea ja'a nee. Jamajjeya beca cuana Eyacuiñajjija esohui niñeba canijo, eyaya oya cuana mete mee majje mimicuijaeanobiajeaje; jjanifebapajeaqui meeeje'yo. Cuanaya beca cuana Eyacuiñajjijo quea tai jashahuabaquiani mimicuijaeanobiajeaje'yo pea'ai. E'e, Eyacuiñajjiya eya ameesahua canijo, beca cuana quea tai jashahuabaquiani eyaya Jesosa Quitoja esohui jayojja jama ameeje'yo. ⁶ ¡Miquianaaya Jesosaja esohui jayojja jama acue! ¡Ojaya epeeji nei pocue! Majoya eyaya shajjama' cuana miquiana nijje nequi, ojjaña quea mimishi poani pea'ai tecueaje.

⁷ Beca cuaa miquiana nijje nequiya e cojja ba majje huohui cani jama ba'a: —Pabo ca'a'ama pojja'a. Sohui sajea'ama. Eyacuiñajjija huoojea'yo pojjeama, sohuihuohui sahua jjima pojja'a —jamaya poani e ba pishana majje.

Jamatii ecuea ejashahuabaquijji Jesosajo onajaya eba pojjeama. Oya nei Jesosa Quitoja epeeji poso jjabaquiani. Cajashahuabaquiahua jama ba'a: —Pabo pea'ai Jesosa Quitoja epeeji poani e'e jojo nei. E'e, Pabo cuana jayojjaya jama poani —cajjashahuabaquiahua.

⁸ E'e, eya bicho'ama miquiana nijje emimijji. Jama mimi majamajame eya poani ba'a: —Eya iña iquio Eyacuiñajjija esohui huohuijji. Ohuaya eya huoojea canaje miquiana huasijje oja sohui huohuiya, miquiana ojaya epeeji quea ja'a nee po meeya. Eya miquiana jjabahuejjaquianijo quea yeno po mee sa po'yo ajja. Cajaa sa po'yo ajja pea'ai —jamaya eya miquiana nijje mimiani.

⁹ Eyaya miquianaya jjabahuejjaquianijo, quea ajjajja po mee sa po'yo ajja. ¹⁰ Beca siajjepojji cuana miquiana nijje nequi ejo siajje poani jama ba'a: —Pabaja esohui etehue'yo quea sohui ja'a poani. Emeshi meseja esohui etehue'yo quea ja'a jayojja jama poani pea'ai. Jamatii oya ecuana nijje nequianijo ca'a'ama poani. Ojaya esohui quea ja'a pojjeama pea'ai —jamaya siajje poani beca cuana.

¹¹ Ma siajjepojji cuana cajjabahuejjaquiahua jiquio jama ba'a: Miquiana huasijje poqui majje jiquio ecuea esohui etehue'yo jayojja jama eyaya aje'yo miquiana huasijje, e'e jojo nei.

¹² E'e, beca siajjepojji, esohui huohuijji nisho cuana miquiana nijje nequi mimiani jama ba'a: —Ecuana ca ca quea pame nee nee poani. ¡Ecuana oe shajja'ajjacue! —jama siajje pomeya poani.

Eya ca ca jashahuabaqui sa po ajja jama ba'a: —Pea cuaa aje oe quea tai acani. E jayojja pojjeama onaya. Eyaya ca ca oe quea pame nee aña —chojja, jamaya eya, Pabo po sa po'yo ajja.

Ma siajjepojji, esohui huohuijji nisho cuana aje oe jama poani tii ba'a: —Ecuana jashahuabaquijji quea ja'a nee nee, onajaya, chojja. Ecuana jayojjaya jama capo'yahua ojjaña —jamaya poani.

Chojja. Quea ja'a pojjeama jashahuabaquiani, de. ¹³ Eyacuiñajjiya ca ca eya huoojea canaje miquiana huasijje ojaya esohui huohuiya. Jamajjeya ojaya esohui eyaya huohuiaña bicho'ama miquiana huasijje. Ojjaña huasijje ca ca huohui jjima. ¹⁴ E'e, miquiana huasijje esohui Jesosa Quitoja eyaya huohuinaje. ¡Bacue! Eyacuiñajjiya eya huoojea canaje miquiana huasijje esohui huohuiya. Ojaya esohui huohuijji e'e jojo nei eya. Eyaya quea ja'a nee huohuiaña. Jiquio ecue tehue'yojo eya bicho'ama. ¹⁵ Cuanaya miquianaya sohuihuohuiañaajo eya siajje po ajja jama ba'a: —Eya ee nei ojjaña huasijje esohui huohuijji nei quea ja'a nee. Onaya miquiana nijje chaco jjima; siajje poani —eya jama siajje pomeya po ajja.

Esohui huohuijji nisho ca ca oe jama siajje pomeya poani, oe nei esohui huohuijji poso jjabaquiani. Eya ca ca quea pame nee jashahuabaquiani jama ba'a: —Miquianaaya Conitojo ba'eya Jesosa Quitoja esohui jayojjaya jama quea ja'a añaajo eya pea cuiñajji cuana huasijje esohui huohui meesahuaje Jesosaja.

¹⁶ Jamajjeya miquianaya jamaya poajo eya poqui meeeje pea meshi cuana huasijje esohui quea pame nee huohuiya Jesosajo, onaja esohui huohui jjima huasijje. Esohui huohuijji pea meshi cuanaajo enequijo eya ona nijje enequi titiijji pojjeama. Iña ca jja ca poquije, de, pea cuana huasijje Jesosaja esohui huohuiya. ¹⁷ E'e, yahuajo nei esohui etehue'yo jama poa ba'a:

“¡A'a jama huohuijji ba'a: —Eyaya jamatii quea pame aña. Chojja, jamaya pojjeama.

Jamaya huohucue ba'a: —Eyacuiñajjiya eya quea pame nee ameesahua cani.

Jamajjeya eyaya quea pame aña —jamaya acue!”

Yahuajo nei esohui etehue'yo jamaya poa. ¹⁸ Eyacuiñajji ojaya epeeji quea pame neejo mimiani jama ba'a: —Jiquio epeejiya quea pame nee acani. Jamaya ecuea quea boti nee.

Beca cuaa ca ca huohui cani jama ba'a: —Eya quea pame nee poani jamatii. Jamajjeya jecuea esohui shajja'ajjacue! —Jamaya esohui huohuijji nisho poani onajaya quea jea e'ajji. Jamaya ca ca Eyacuiñajjija boti'ama.

11

Esohui huohuijji nishojo Pabo quea yeno mimiani

¹ Deja ma ohua acanajejo jjashahuaba tiitiquianijo esho'i jama mimijajiani, de. Jamatii ma eya anajejo mimianijo, ja'a jja oe enijje quea quene pojji! ¡Shajja'ajja socue mo! ² E'e, miqúanaya Eyacuiñajjija quea jea nee nee poanijo, ecuea quea jea nee nee poani pea'ai. E'e, eyaya miqúanaya Jesosa nijje jjapee coo meesahuaquinaje. Jiquio ecua ejeajjiya ojaya ebacuase mimishi'ama nei huana mee sa acani jayojja jama eyaya miqúanaya Jesosa nijje jjapeequi mee sa aña quea boejea nee, eshahua nijje pojjeama. ³ Ecuea eba miqúanaya Jesosaja epeeji e'e jojo nei po sa nei nei poani. Jjeya ca ca eya quea mete jjashahuabaquiani miqúanajo, esohui huohuijji nishohua miqúanaya quea tai jjashahuabaqui mee ca chana'. Jiquio ecua Edosisiquiana neiya ma ecua peyo jayojjaa Erna dasia ca poa jayojja jama esohui huohuijji nishohua miqúanaya dasia ca chana'; Jesosa nijje jjapee pajea meequi ca chana'. ⁴ E'e de, miqúanaya aje oe ojaña esohui huohuijji nisho shajja'ajjaña. Oya cuana Jesosajo siajje poani, Edojoshahua Pamejo siajje poani pea'ai. Esohui quea pame Jesosajo ecuanaja esohui jayojja jama pojjeama huohui cani. ¿Apiojji acuaeya oya cuana shajja'ajjaña so'o? ⁵ Oya cuana ca jja ca oe Eyacuiñajjija huoojea'yo esohui huohuijji e'e jojo nei poso nequiaa aña; eya ca jja nequiaa ca oe cajaa aña. Chojja, eya ca ca iña iquio e'e jojo nei Eyacuiñajjija huoojea'yo. ⁶ E'e pojja'a oya cuana mimiani quea bishaa nee. Jamatii esohui quea pame Jesosaja ecuea eba nei nei. Jamaya miqúanajaya eba. E'e, eyaya ma esohui huohui nei neineinaje ojaña cuiñajji cuana huasijje.

⁷ Eyaya Eyacuiñajjija esohui quea pame Jesosaja huohuinaje miqúanaya huasijje sosema'. Eyaya ecuea eba'ejji jjeshenaje pea'ai ecue chaco sosejje. Miquea echacojji jayojja jama poanaje eya. Jamaya miqúanaya Eyacuiñajjija esohui ba meesahuanaje. ¿A'a jamaya quea tai, quea pame pojjeama? Chojja. Jamatii beca cuana jama poani ba'a: —Pabo pojja'a Eyacuiñajjija huoojea'yo pojjeama. Jamajjeya mi sosequia mee cani esohui huohui cani sosejje —jama siajje pomeya beca cuana poani.

⁸ ¡Bacue! Miqúanaya huasijje esohui huohuiañajo, Jesosaja epeeji cuaa pea cuiñajjijo ba'eya eya sosequia canaje. Eya sohuihuohui meesahua canaje. Miqúanaya ca ca oe Eyacuiñajjija esohui shajja'ajja majje jamatii sosequia jjima. ⁹ E'e, Jesosaja epeeji cuaa Masenoniajo ba'eya poe majje ecuea eba'ejji ye canaje. Yahuajo miqúanaya nijje ba'eya eyaya miqúanajaya bobi ijija jjima: —¡Che mo oe esohui huohui sosejje! —ajjima ecuea miqúanaya. Jamaya eyaya sosema' esohui huohui poquia tiitije quijje pea'ai.

Jamajjeya miqúanajaya jama yajji pojjeama ba'a: —Pabo ecuaaya bobianaje, quea huiso ba'e meesahuanaje —jamaya e'ajji pojjeama miqúanajaya.

¹⁰ Chojja. Jamajjeya ojaña cuaa Acaya meshijo ba'eya ba caje eyaya esohui huohuinaje miqúanaya huasijje sosema'. Jesosa Quitohua ba cani eya e'e jojo nei mimiani. ¹¹ Jamaya eyaya huohuiaña miqúanaya ecuea quea jea nee nee poanijo. Jamaya Eyacuiñajjija eba. ¹² E'e, eyaya Jesosajo huohui tiitije miqúanaya huasijje sosema'. Jamajjeya esohui huohuijji nishohua jama huohuime yajji pojjeama ba'a: —Ecuana Pabo jayojja chachacoani —jamaya e'ajji pojjeama onajaya.

Esohui huohuijji nisho nequiaa sosequianaje esohui huohui cani sosejje. ¹³ Oya cuana ca ca oma Eyacuiñajjija huoojea'yo nisho poani, Eyacuiñajjija huoojea'yo pojjeama. Miqúanaya dasia cani; Jesosaja huoojea'yo esohui huohuijji poso nequiaa aña. ¹⁴ E'e de, Edosisiquiana nei Satanasa jama oya cuana poani. Ohuaya, Satanasa ojaña dasia cani; Jesosaja esohuidojojji quea pame nee poso acani cuaa. ¹⁵ Jamajjeya ojaya echacojji cuaa miqúanaya dasia cani pea'ai jama ba'a: Oya cuana Eyacuiñajjija echacojji quea pame nee poso nequiaa aña, de. ¡Poe o'oya majje Jesosaa oya cuana quea nee nee po mee caje'yo tii tii!

Pabo Jesosaja huoojea'yo poanijo quea nee poa

¹⁶ Jamajjeya eyaya miqúanaya huohui o'oyaje quea bicho pishana. ¡A'a eya esho'i jama mimiani poso ajji ma eya anajejo mimianijo! ¡Miquiaaya ejo jamaya poso aña, jamatii eya che shajja'ajja socue! Ma eya Jesosajo anajejo mimije so'o esho'i jama, onajaya quea jea e'ajji nisho. ¹⁷ Jiquio ca ca ecuea esohui; eya jjeya Jesosa jayojja jama pojjeama mimiani. Eya esho'i jama ma eya anajejo mimiani quea huiso. ¹⁸ Jamatii quea huiso esohui huohuijji nisho esho'i jama ojaya huapa pojjeama, ma ohua acanajejo pea'ai mimimimiani. Jamajjeya ona jayojja jama eya pea'ai mimije. Eya ca ca iña quea bicho

mimije. ¹⁹ Miqúanaya aje oe jashahuabaquiani jama ba'a: —Ojjaña ecuea eba. Eya ca ca iña jdasia meequi ajja esohui huohuijji nisho cuana —jjashahuabaquiani.

Jamajjeya shajja'ajjaña joya esho'i jama joya ohua acanajejo mimiani pea'ai. ²⁰ E'e, ma esohui huohuijji nishohua miya chaco mee cani sosema', minijje ba'yani sosema', miqúea aquiana mesena'yo sa acani, miya tanacua cani, cojja cuiapojojea cani pea'ai quea bicho epo meejji. Jamatii miqúanaya aje oe oya cuana shajja'ajjaña, de. ²¹ ¿Apojji acuae jja oe shajja'ajjaña? Ecuea ca ca jamaya ajjima. Jamajojoya ¿a'ya eya ca'a'ama poso nequíaña, de? ¿A'a ma esohui huohuijji nisho cuana esho'i jayojja jama mimiani onaja quea jea e'ajji? E'e. Jamajjeya eya jamaya mimije pea'ai. ²² Esohui huohuijji nisho jama poani ba'a: —Ecuana jja iquío Emeo dejja cuana, Emeo esohui mimiani.

¡Dee! Eya pea'ai Emeo dejja, Emeo esohui mimiani.

—Ecuana Isaeni dejja cuana —poani pea'ai ma esohui huohuijji nisho.

Eya pea'ai Isaeni dejja, onaya jayojjaya.

—Ecuana etiéquiana Amajama bajjani —ma esohui huohuijji nisho poani.

Amajama ecuea etiéquiana pea'ai, de.

²³ —Ecuana jja oe Jesosa Quitohua huoojea canaje esohui huohuijji —oya cuana siajje poani.

Eya ca ca e'e jojo nei Jesosa Quitoja huoojea'yo, de. Jjeya eya esho'i jama mimiani. Jamatii eyaya janobajjima nei chaconaje Jesosa nijje. Esohui huohuijji nishohua aje oe oe pojji chaco cani. Dejja mimishi cuaa eya jeanobiajea huicha'a huicha'a canaje esohui eya ehuhui poaje jjejojo. Oya cuana, cho. Jodio etii cuaa eya cuia majamaja canaje Jesosaja esohui eya ehuhui poaje jjejojo. Ma esohui huohuijji nisho pea cuana cuia neinei jjima. Eya beshahua nei mano'yonaje; quea huiso mano huicha'a huicha'a'ajja'yonaje. ²⁴ E'e, ojjaña ba canijo, Jodio etii cuaa eya quea huiso cuiasejja neinei'ajja canaje, 39 cuiasejjame acanaje, de, huaca jee ejeapashajjajaa. Cuiasejja majamaja canaje, me oejje huisome cuiasejjame acanaje; pea meshijo cuia, pea meshi cuana cuia ca iña acanaje cuaa, de. Beshahua nei ca iña mano'yonaje mo, de. ²⁵ Jodio cuaa eya cuiasejja canaje acui sisiya, de. beca peejjima cuiasejjame acanaje pea'ai. Jaja canaje pea'ai meiya eya esohui ehuhui poaje jjejojo. Beshahua nei eya hui'i'yonaje, pea beca peejjima hui'ime poanaje. E'e de, bishe ai cuana jaanobiquinaje bae ai yasijje. Jamajjeya oe mecajje, oe pojjajo pea'ai eya bae aijo huepee biajje jjeejje ba'e'yonaje. ²⁶ Cuanaya eya poqui huicha'a huicha'anaje pea cuiñajji cuana huasijje esohui huohuiya. Poquijje beshahua nei eya mano'yonaje yohuajo ba'a: cuei quea cuejipashi neijo, siipojji cuana, Jodio cuana, Jodio pojjeama cuana pea'ai. Cuiñajji quea qemojo, ebiojo pea'ai dejja mimishi cuaa napa cajje eya beshahua nei mano'yonaje. Bae aijo beshahua nei hui'i'yonaje pea'ai. Jesosaja epeejji nishohua cuia cajje beshahua nei eya poquijeyo'yonaje pea'ai. ²⁷ Eyaya chaco neineinaje; cahui jjima poanaje pea'ai. Quea camajajo hueahuea'yonaje. Quea mano poanaje. Quea shoe poanaje. Quea naba taja nee nee poanaje. Bobimajo mano'ajja'yonaje. Eya quea huoe nei nei poanaje, daqui mooma' poanaje pea'ai. ²⁸ E'e, quea camaja ecuea eba'ejji. Cuanaya ojjaña pojjajo eya jashahuaba majamajaquiani ojjaña Jesosaja epeejji cuana jaahuanajji. ²⁹ Jamajjeya Jesosaja epeejji nei cuana quea mete, ca'a'ama poanijo, eya quea yeno nee nee jashahuabaquiani. Oya cuana quea mimishi poajo, mimishi pajea mee sa neineiaña eyaya. Jamaya eya poanaje.

³⁰ Esohui huohuijji nishohua miqúanaya dasia canijo, eya camimi majamajaquiahua ecuea eba'ejjijo. Jjeya ca ca eyaya miqúanaya huohuije pea esohui. Ma ba majje miqúanaya baje eya quea mete, dejja ca'a'ama jayojja jama poani. ³¹ Eyacuiñajji esejaya Emeshi Mese nei Jesosaja Chii. ¡Oya cabihuia tiitii cahua! Ojaya eba eya e'e jojo nei mimiani jama ba'a: Yahuaajo Aneta emeshi mese poa Damasco cuiñajji. Ohuaya ojaya echacosahuajji cuana huoojea canaje e sa'ajja'yohua ojjaña ejiojjijje, ba'yo majje e jeanobiajeajji. ³² Jamatii eya ojaya iña jjima, de. Eya Damascojo nequi quehua poquinaje mecajje. ³³ E'e, Jesosaja epeejji cuaa mei jiyajo nequiya equi huejjajje eya jjepai aijo jjabioquajo, jeaquea ca'yonaje cuaa jjonajo.

12

Jesosaa Pabo jjacahuibaqui mee canaje ojaya eba'ejji eyajo

¹ Eya esho'i jama ma eya añajo mimi majamajani miqúanaya sohui huohuijji nisho esha-
jja'ajja poaje jjejojo. Jjeya ca ca eyaya miqúanaya huohuije pea esohui, ma Jesosaa eya
jjacahuibaqui mee canaje huohuije. ² Yahuaajo nei quea shequiaja huiso, 14 shequijame
yahuajo Jesosaa eya ojaya e'anijji eyajo jjacahuibaqui mee ca poa. Eya jjacahuibaquinaje
pojja'a. E'e pojja'a eya eshe dojosohuaqui ca poa pojja'a. Ecuea ba jjima. Eyacuiñajji ca
ca oe eba. ³ E'e, eya pojja'a eshe ba mee ca poa. Jjacahuibaqui mee ca pojja'a mo poa.

Eyacuiñajjija ca ca oe eba. Ecuea ca ca ba jjima. ⁴ Jamatii ecuea eba maya: Jesosaa eya ba mee ca poa; ohuaya eya dojosohuaqui ca poa ojaya eba'ejji Quea Pame Nee bajjani yasijje, Panaiso bajjani yasijje. Jomajo eyaya shajja'ajjanaje esohui quea bame nee nee. Maya eyaya miqianaya huohui meemee ajja, yajja huohuime yajji jojoya. E'e, Jesosa eyajo ba'e enijje miminaje. ⁵ Jamatii eya ma esohuijo mimi huicha'a huicha'a ajja esho'i jama. Chojja. Eyaya miya ba meeye eya quea ca'a nee nee poijeama. E'e jojo nei Jesosa enijje miminaje eyajo. ⁶ Jamajjeya ma eya anajejo mimi huicha'a huicha'ajo jamatii eya esohui huohuijji nisho jama pojjeama mimiani. Ecuea esohui ca ca e'e jojo nei. Miquiana nijje ba'eya eyaya chaco neineinaje miqianaaya banaje. Shajja'ajjanaje ecuea esohui Jesosaja esohui huohuiañajo. Jamajjeya ejo jjashahuabaquiani e'e jojo nei miqianaya. Jamajjeya ma eya anajejo ehuohui majajji pojjeama esho'i jama, de, miqiana ejo jama ehuohui poaje jjejojo ba'a: —Pabo ca ca quea pame nee nee Jesosaja epeeji quea ca'a tii tii —miqianaaya ehuohui poaje jjejojo.

Chojja, eya jamaya pojjeama.

⁷ Jamajjeya Jesosaa eya ojaya eba'ejji quea pame nee nee eyajo ba mee majje Eyacuiñajjija eya quea nee po mee canaje emanomeejjijo pojja'a. Jamajjeya eya quea ca'a tii tii ejjashahuabaquijji pojjeama. Jiquio ecua Edosiquiana nejia Satanasaja huoojea e cuiajji jayojja jama jiquio emanomeejji pojja'aa eya quea nee nee po tiiti mee cani. ⁸ Eya Jesosa nijje miminaje pea beca peejiima mimime. Jama poanaje ba'a: —Jesosa Quito, eya quea nee nee nequi. ¡Che mo oe nee'ama po meecue! —eya mimime poanaje.

⁹ Jamatii Jesosaa eya saja'a canaje jama ba'a: —Pabo, e'e jojo nei eyaya miya jaahuanaje. Eyaya miya chaco meesahuaje. Miya ca'a'ama poanijo, chaco neinei meesahuaje, jamatii quea nee —acanjaje.

Jamajjeya eya ca'a'ama poanijo quea bihui nee poani. E'e, ecuea eba Jesosaa quea ca'a nee nee poaniya eya quea ja'a nee ojo chaco meesahua cani. ¹⁰ Jamajjeya eya quea nee nee poanijo, ecuea eba'ejji quea camaja poanijo pea'ai jamatii eya quea bihui nee poani. Pea cuaa eya napa canijo, mimijajianijo pea'ai, jamatii quea bihui poani. Jesosaja esohui huohuijji, jamaya dejja mimishiya eya acani. Jamatii eya quea bihui nee poani tii. E'e, eya ca'a'ama poanijo, Jesosaa eya quea ca'a nee po mee cani.

Pabo Jesosaja epeeji cuana Conitojo ba'ejo quea yeno poanaje

¹¹ Eya esho'i jama ma eya anajejo mimi majamajaje miqiana esohui huohuijji nisho eshajja'ajja poaje jjejojo. Oya cuana aje oe Eyacuiñajjija huoojea'yo esohui huohuijji poso jjabaquiani. Eya ca ca iña e'e jojo nei Eyacuiñajjija huoojea'yo. Miquianaaya ca jja ca oe eya banaje Jesosajo chacochocho aninaje. Jamatii ejo huohui jjima jama ba'a: —Pabo e'e jojo nei Jesosaja huoojea'yo esohui huohuijji —miquiaa mo che ehuohuinaje ese.

Miquianaaya mo oe che quea pame nee mi huohuinaje, jamajjeya eya ecuea eba'ejji camimiquiahua esho'i jama, de. ¹² E'e, eya miqiana nijje nequi Jesosaa eya atitii mee canaje quea huiso ma dejjaa ajjima acani amee canaje miqianajaya ebajji. Jamajjeya miqiea eba eya Jesosaja huoojea'yo esohui huohuijji. ¹³ ¿A'a eyaya miqianaya quea pame pishana anaje, Jesosaja epeeji cuana pea cuiñajjijo ba'e quea pame anaje pojja'a? Chojja. Ohuaya e ba'e meejji quia canaje. Maya eyaya jjeshenaje. Miquianajaya quia jjima. Jamatii ecuea bobijo huohui'ajja jjima. E'e pojja'a eyaya miqianaya ehuohui'ajjanaje ese jama ba'a: —¡Jesosaja pea epeeji jama sosequiameya mo che acue esohui huohuiaña sosejje! —e'anaje ese. Jamatii jamaya mimi jjima eya.

¹⁴ Yahuajo eya miqiana baa poquinaje beca poquime. Jjeya eya apoa. Poquije o'oya miqiana baa. Poqui majje eyaya eba'e meejjijo mimimimi ajja poaje. Chojja. Eya miqianajaya ejjesheji sa po ajja. Miquianaya ca ca eya sa poani ecuea epeeji pojji. Jiquio ecua esho'i cuaa oja chii, ojaya enaese pea'ai bobia ajja jayojja jama eyaya miqiea bobi sa ajja. Jamajjeya eya miqie chii jayojja jama poanijo eya mi jaahuanajji poani. Miquianaya ca ca e jaahuanajji pojjeama. ¹⁵ Jamajjeya eyaya miqianaya Jesosajo ba meesahuaje sosema'. Jamajjeya e'e pojja'a eya aema' poaje. Cuanaya eyaya quea huiso chacoje miqiana esohui ba meesahuajji. Eya pojja'a hueahueaje miqianaya jaahuanajo. Jamatii. Ecuea miqianaya quea jea nee nee. ¿Apiojji acuae eya miqianajaya quea jea pishana, miqianaya ecuea quea jea nee nee poanijo?

¹⁶ Miquianajaya eba eya miqiana nijje nequi camaja'ama miqianajo poa. Chojja. Miquianajaya bobi ijija jjima ecuea. Jamatii beca cuana aje ejo siajje poani jama ba'a: —Pabo siajjepojji. Ecuaña dasia ca'yonaje —siajje oya cuana poani.

¹⁷ Chojja de, ecuea miqianaya dasia jjima. Esohui huohuijji ma eya huoojeanaje miqianaya dasia jjima pea'ai. ¹⁸ Eyaya Tito huoojeanaje jama ba'a: —¡Poquicue miya Conito huasijje esohui huohuiya Jesosajo! ¡Jesosaja epeeji oe dojocue minijje! —poanaje eya.

¿A'a Titohua miquianaya dasia canaje? Chojja. Ohuaya eyaya jayojjaya acanaje. Miquianaya ojaya quea jea nee pea'ai ecuea jayojjaya.

¹⁹ ¿A'a cuae miquianaya ecuea etehuejo jama jashahuabaquiani pojja'a ba'a: —Pabohua aje pojja'a jja oe huohui cani oya e'e jojo nei Jesosaja huoojea'yo esohui huohuijji. Ecuana Jesosaja huoojea'yo nisho poani —a'a jamaya miquianaya jashahuaba taiquiani?

¡Bacue oe! Eyacuiñajjija eba eya Jesosaja esohui jayojja jama e'e jojo nei huohuiaña. Epeeji cuana, miquianaya ecuea quea jea nee. Jamajjeya eyaya ojjaña aña miquiana Jesosa nijje quea ja'a nee ejjapeequi meesahuajji. ²⁰ Jjeya eya poquije miquiana baa. Miquianajo quea yeno jashahuabaquiani jama ba'a: —¡Dee! E'e pojja'a quea mimishi poani o'oya: Jjamimicuijajea nobiajeaquiani, onaja aquiana jea ba cani, quea quene nee nee poani, quea aquiana nahue poani, quea nishehui poani, mimijajiani, pea cuanajo maimaiiani, oya jjeshe sa pojji pea'ai jjejojo mimiani, quea shajjaquijjo, shajjama' poani pea'ai pojja'a — jamaya eya jashahuabaquiani miquianajo, Conitojo ba'e cuanajo.

Miquianaya jamaya poajo eya quea yeno nee nee poaje. ¿A'a miquianaya quea yeno poaje miquianajaya mimishijo eya tecueajje? ²¹ E'e, miquiana quea mimishi poani ba majje eya quea tecue nee nee po chana'. Eya quea yeno nee, quea bicho poaje miquianajo. E'e pojja'a eya paje miquiana ba majje, ca beca cuanaja mimishi pajea'yo jjimajo, de, quea mimishi ba'yanijo, quea apo, quea tai, de. Jamaya miquianaya poanijo, eya quea yeno nee nee poaje ba majje.

13

¹ Yahuajo eya miquiana huasijje poquinaje becanejjijji pea'ai poquime poanaje. Jjeya eya poquije o'oya miquiana baa. Jamajjeya ¡bacue! Eyacuiñajjija esohui yahuajo etehue'yo jama poa ba'a:

“Oe dejja peajo maimaiiani ¡a'a shajja'ajjajji! ¡Becaa, pea beca peejjima oya jayojja huohui cajo, shajja'ajjacue!”

Jamaya tehue ca poa yahuajo nei.

² Jamajjeya jjeya eya miquiana huasijje poquije o'oya pea beca peejjima poquime epojji. Yahuajo miquiana nijje nequiya eyaya huohuinaje jama ba'a: —Ojjaña joya quea mimishi po tiitiiani, joya jjeya nei quea mimishi poani pea'ai eyaya tecueajjea neineije poe o'oya majje —jamaya eyaya jjeya miquianaya huohui o'oyaña.

³ E'e, Jesosa Quitohua eya huoojea canaje miquiana huasijje ojaya esohui huohuiya. Ohuaya eya huoojea cani miquiana jjabahuejjaqui meejji pea'ai. Joya miquiana nijje ba'e quea mimishi poani tii tii quea nee nee po mee caje'yo, ohuaya. ⁴ ¡Bacue! Dejja maseya Jesosa yahuajo nei acui ecueata'apeejo me cacajea caje oya mano'yonaje. Jesosaja ca ca oya cuana jeabichajjea jjima. Jamatii Eyacuiñajjija quea ca'a nee nee poaniya Jesosa shequi mee ca o'oyanaje; quea ca'a nee nee ba'e tiitii mee cani. Yahuajo Jesosa ca'a'ama jayojja poa. Jamaya pea'ai eya ca'a'ama. Jamatii Jesosaa eya quea ja'a nee ojaya esohui huohui meesahua cani miquiana jjabahuejjaqui meejji.

⁵ ¡Jashahuabaquicue! ¿A'a Jesosaja esohui jayojja jama aña miquianaaya? Jesosa Quito miquiana nijje yani. ¿A'a miquianajaya ba jjima? Jesosa miquiana nijje pojjeama ca miquianaya ojaya epeeji nishojo, de. ⁶ Eya ca ca iña Jesosaja esohui huohuijji e'e jojo nei. ⁷ Jamajjeya eya Eyacuiñajji nijje mimiani miquiana mimishi pajea meesahuajji jama ba'a: —Eyacuiñajji, ¡miquaea epeeji cuana Conitojo ba'e mimishi'ama nei ba'e meesahuacue! — eya poani.

Eya jama jashahuabaqui ajja ba'a: —Jesosaja epeeji Conitojo ba'eca mimishi'ama ba'e ba majje pea cuaa eya bihuia caje, esohui huohuijji nei —jamaya eya po ajja.

Chojja, miquianaaya eya Eyacuiñajjija huoojea pojjeama poso aña; esohui huohuijji nisho poso aña; jamatii eya Eyacuiñajji nijje mimiani miquianaya ojaya epeeji quea ja'a nee eba'e meesahuajji. ⁸ E'e, dejjaja Eyacuiñajjija esohui e'e nei huoojea pajea mee'yojji pojjeama ojjaña huasijje. Jamajjeya ecuea esohui e'e jojo nei, siajje pojjeama. ⁹ Jamajjeya miquianaya quea pame, mimishi'ama ba'e ba majje eya quea bihui nee poaje. Jamajjeya miquianaya etecueajji pojjeama, jamatii tecuea jjimajo eya Eyacuiñajjija huoojea'yo quea ja'a nee pojjeama poso aña. Jamajjeya eya Eyacuiñajji nijje mimiani miquianajo jama ba'a: —Eyacuiñajji, ¡miquaea epeeji cuana quea ja'a nee nee ba'e meesahuacue oe! —eya poani.

¹⁰ Jamajjeya miquiana huasijje poqui jjimahuaa eyaya esohui tehueaña miquiana-jaya mimishi epajea'yojji. E'e, eya Eyacuiñajjija huoojea'yo esohui huohuijji, miquiana jjabahuejjaqui meejji. Eyacuiñajjija eya huoojea jjima miquiana janobajjima nei tecueajjea quea yeno nee nee epo meejji. Chojja, ohuaya eya huoojea canaje miquiana quea ja'a nee ba'e meesahuua. Jamajjeya mi ba majje eyaya miquianaya etecueajjiji pojjeama mimishi'ama ba majje.

¹¹ Mahuiso ecuea esohui.

Esohui oe yejje nei etehue'yo

Ecuea epeeji cuana, ¡quea bihui nee pocue! ¡Shajja'ajjacue ecuea esohui! ¡Jama acue! ¡Jjashahuaba neineiquicue quea ja'a nee nee eba'eji! ¡Ojee Jesosa nijje jjapeequicue! ¡Quea bei nee pocue! Jamaya poajo, Eyacuiñajjiya minijje ani tiitije'yo. Miquianaya ojaya quea jea nee nee. Oya ca ca oe quea bei nee nee.

¹² ¡Ojjaña Jesusaja epeeji nijje mimicue quea bei!

¹³ Ojjaña enijje nequiya miquianaya huohui'ajja cani jama ba'a: —¿Achajja acuae nequiana so'o? —onajaya ebajji.

¹⁴ ¡Esejaya Emeshi Mese nei Jesosa Quitohua miquianaya cajaahuana cahua! Eyacuiñajjiya miquianaya quea jea nee. ¡Onijje caba'e tiitii mee cahua! ¡Edojjoshahua Pame miquiana nijje cajjapeequiahua tii tii!

Mahuiso. Eyaya, Pabohua jiquio esohui tehue'yonaje. Apoa.

PABOJA ETEHUE'YO JANATA MESHIO BA'E YASIJE GÁLATAS

Pabohua tehue canaje Jesosaja epeeji cuana Janata meshio ba'e yasijje

¹⁻² Eya Pabo bajjani. Ecuea epeeji cuana Janata meshio ba'e, eyaya miqiana que jiquio esohui tehuenaje, Jesosaja epeeji cuana huasijje. Ojjaña Jesosaja epeeji cuana enijje nequiya pea'ai miqianajo jashahuabaquiani. Eya huohui'ajja mee cani jama ba'a: —¿Achajja a nequiana ani so'o? ¿A'a quea pame? —poani ecuanaja ebajji.

Eyacuiñajjiya, esejaya Chii aiya Jesosa Quito emano'yojaa shequi mee ca o'oya poa. Ohuaya Jesosa Quito nijjeya eya huoojea canaje esohui huohuiya. Dejjaja cuana ca ca e huoojea'yojji pojjeama.

³ Ecuea epeeji cuana, eya Eyacuiñajji nijje mimiani miqianajo jama ba'a: —Ecue Chii, ¡miqua epeeji cuana Janata meshio ba'e quea pame nee jaahuanacue! ¡Quea bei po meecue pea'ai! —jamaya eya mimiani esejaya Chii ai nijje, Jesosa esejaya Emeshi Mese nei nijje pea'ai.

⁴ Eyacuiñajjiya Jesosa Quito huoojea ca poa mano'yohua, esejaya mimishi cuijea'yojji epojji. Jamajjeya Eyacuiñajjiya ejjashahuabaquiji jayojja jama Jesosa mano'yonaje esejo, shajjama' cuana jayojja jama pojjeama eba'e mee'yojji. ⁵ Jamajjeya Eyacuiñajji ejjabihuaqui jama ba'a: —Eyacuiñajji, ecuanaja Chii, miya quea ca'a nee nee, quea pame nee nee yani tii tii. Pea chama' mi jayojja —oya ejjabihua tiitiiqui. Jamaya capoahua.

Jesosa Quito oe nei ese mimishi cuijea'yojji poani

⁶ Ecuea epeeji cuana Janata meshio ba'e, eya quea mete miqianajo. Yahuajo miqiana nijje nequiya eyaya miqianaya huohua poa. Jesosa Quito miqianaja mimishio mano'yonajejo, Eyacuiñajjiya miqianaya iyaa canaje onijje ejjapeequiji. Shajja'ajja majje Jesosa nijje jjapeequi'yonaje. Jamatii onijje jjapeequi pajea'yani. ¿Apiojji acuae oe onijje jjapeequi pajea'yani so'o? Jjeya aje oe miqianaaya onajaya esohui e'e nei pojjeama shajja'ajjaña, esohui quea pame poso aña. ⁷ Pea chama' esohui quea pame nee ese ba'e tiiti mee'yojji. Esohui Jesosa Quitoja ecuanajaya yani oe nei e'e jojo nei. Esohui huohuijji nisho cuaa ca ca miqianaya quea quehua jashahuabaqui mee sa acani Jesosa Quitojo. Jama siajje poani ba'a: —Ecuanaja etiiquiana Moisesija esohui jayojja jama ba'ejo ca ca oe Eyacuiñajjiya miqianaya emimishi cuijea'yo ba caje'yo, Jesosa Quito nijje jjapeequiajo pojjeama —siajje poani esohui huohuijji nisho cuana.

⁸ Yahuajo ecuaaya miqianaya esohui huohua poa esohui quea pame nee Jesosaja jama ba'a: —Jesosa nijje jjapeequianijo, Eyacuiñajjiya miqianaya ba cani emimishi cuijea'yo —ecuaaya huohuinaje.

Onaaya miqianaya pea esohui ma ecuanaja esohui jayojja jama pojjeama huohui cajo, Eyacuiñajjiya oya cahuojea cahua cuaqui yasijje quea nee nee epo'yojji tii tii. E'e, ecuanaya pojja'a, esohuidojojji pojja'a Jesosajo siajje pojji jjemo Eyacuiñajjiya huoojea came cuaqui yasijje. ⁹ E'e, yahuajo ecuaaya miqianaya huohuinaje. Jjeya eyaya huohui o'oyaña jama ba'a: —Yahuajo ecuea esohui shajja'ajja majje miqianaya jjapeequi'yonaje Jesosa nijje. Oya oe nei miqua mimishi cuijea'yojji. Jamajjeya ojjaña esohui huohuijji nishohua pea esohui, ma ecuea esohui jayojja jama pojjeama Jesosajo huohui cajo, Eyacuiñajjiya cahuojea cahua cuaqui yasijje quea nee nee epo'yojji tii tii.

¹⁰ Eyaya Eyacuiñajjiya esohui jayojja jama huohuaña. Eyacuiñajji ca ca oe eyaya quea bihui po mee sa aña. Eyaya esohui huohuaña dejjaja cuana quea bihui epojji pojjeama ejo. Jama epo meejji pojjeama ba'a: —Pabo ca ca oe quea pame nee —e'ameejji pojjeama. Chojja, eya onaaya bihua cani jojjemo Jesosa Quitoja esohui huohuijji pojjeama pome.

Jamaya Pabo Jesosa Quitoja esohui huohuijji poa

¹¹ Epeeji cuana, ¡bacue! Eyaya esohui quea pame nee Jesosa Quitoja huohuinaje, dejjaja ejjashahuabaqui'yojji pojjeama. ¹² Jiquio esohui quea pame nee onajaya eya huohui jjima, ba meesahua jjima pea'ai. Jesosa Quitoja ca ca oeyaya eya ba meesahua canaje.

¹³ Yahuajo nei Jodio etiiquianaja esohui jayojja jama ba'yaniya eyaya Jesosaja epeeji cuana napanaje quea huiso onijje ejjapeequi poani jjejojo. Jamaya miqianajaya eba. E'e, eyaya aje oe ojjaña Jesosaja epeeji cuana quecua'yo sa anaje. ¹⁴ E'e, yahuajo eyaya Jodio etiiquianaja esohui jayojjaya ba'e sa neinei poa. Ba neineinaje. Pea Jodiohua e tii nei'ajjaa esohui ba pishana canaje. Jamajjeya: —¡Etiiquianaja esohui jayojja jama caba'yahua ojjaña Jodio cuana! ¡A'a pajea'yojji! —eya jamaya po huicha'a huicha'anaje yahuajo.

¹⁵ Jamatii Eyacuiñajjija eya quea jea nee poa. E'e, ohuaya eya babaca ca poa eteejo ba'yahua ojaya esohui huohuijji epojji: ¹⁶—Pabo ecuea poaje. Eyaya oya babacanaje ecue Bacua Ejja Jesosa peejji epojji —poanaje Eyacuiñajji.

Majoya eya babaca majje Eyacuiñajjija eya huoojea canaje ojaya esohui huohuiya Jodio pojjeama cuana huasijje. Jamajjeya ohua huoojea cajje eya pea cuana nijje mimi jjima jama ba'a: —¡Che mo eya huohucue esohui quea pame Jesosaja! ¿Achajja acuae Jesosajo ehuhuijji? —ecuea ajjima cuana.

¹⁷ Jesosaja huoojea'yo ojaya esohui huohuijji Jenosanenajo ba'e yasijje eya poqui jjima pea'ai onijje mimiya. Yahuajo Jesosaa oya huoojea ca poa ojaya esohui huohuiya e huoojea jjimahuajo. Jamatii eya ona nijje mimi jjima esohui huohui sahuajji. Chojja. Eyacuiñajjija iyaa cajje jjeya nei Anamia meshi yasijje ca ca eya poquicujinaje meshi jabo huasijje, quima huasijje. Jomajo ani quijje nei eya poe o'oyanaje Damasco cuiñajji yasijje. ¹⁸ E'e, pea beca peejjima shequajame po majje eya poquinaje Jenosanena huasijje Peno baa. Onijje aninaje oe poji cahuime, ejiojji oeje cahuime, 15 cahuime. ¹⁹ Jomajo nequi eyaya Satiaco banaje pea'ai, esejaya Ermeshi Mese nejja echahua mese. Mahuiso banaje Jesosaja huoojea'yo esohui huohuijji. Pea cuana nijje ca ca iña mimi jjima. ²⁰ Jamaya eyaya e'e jojo nei huohuiaña; Eyacuiñajjija eba eya siajje poani pojjeama.

²¹ Majoya Peno nijje mimi majje eya poquinaje Sinia meshi yasijje, Sinisia meshi yasijje pea'ai. ²² Jamajjeya Jesosaja epejji cuana Jodea meshijo ba'eja eya ba jjima ecojjaja. Cho, eya pea meshi yasijje poquia poa. ²³ Jamatii onaaya ejo huohui canaje jama ba'a: —Pabohua ca pa jjaja ca oe jjeya Eyacuiñajjija esohui huohui cani, Jesosaja. Yahuajo aje ohuaya ecuana quea huiso napa canaje, Jesosaja epejji cuana. Ecuana quecua jeyojeyo sa acanaje. Jesosa nijje jjapeequi pajea mee sa acanaje. Jjeya ca ca ohuaya esohui e'e nei huohui cani. E'e de, ohuaya esohui jama huohui cani pea'ai ba'a: “¡Jesosa nijje jjapeequicue eba'e tiitii'yojji!” poani oya Pabo, de —jamaya onaya poani.

²⁴ Jamajjeya ma esohui ejo shajja'ajja majje Jesosaja epejji Jodea meshijo ba'e cuana quea bihui nee poanaje. Eyacuiñajji bihuia canaje jama ba'a: —Ecue Chii, miya quea pame nee nee, quea ca'a nee nee. Miyaya miyaye nei Pabo miquea epejji po meenaje, ecuana napa pajea meenaje —acanaje cuaa.

2

Jesosaja huoojea'yo esohui huohuijji Jenosanenajo ba'e cuana Pabo nijje jjapeequinaje

¹ Majoya quijje nei nei, 14 shequajame po majje eya Benabe nijje poe o'oyanaje Jenosanena huasijje. Tito yenaje pea'ai enijje. ² Eyacuiñajjija huoojea cajje eya Jenosanena huasijje poe o'oyanaje. E'e, eya jjacahuiba meequi canaje jama ba'a: —Pabo, ¡Jenosanena huasijje poqui'yocue! —acanaje Eyacuiñajjija eya cahuijo.

Jamajjeya Jenosanena huasijje poe'yo majje eya Jesosaja huoojea'yo ojaya epejji jaahuanajji cuana nijje miminaje, pea cuana nijje pojjeama. Jjachichaquajao, eyaya huohuinaje jama ba'a: —Esohui quea pame nee Jesosaja eyaya huohuinaje Jodio pojjeama cuana huasijje —eyaya anaje.

Jamaya ecuea huohui jjima ona que. Jodio pojjeama cuana huasijje esohui huohui pajea mee ca chana', jama huoojeame eya aca chana' cuaa ba'a: —¡A'a jja oe Jodio pojjeama huasijje esohui huohui majajji Jesosaja esohui! —jamaya quea pame pojjeama poso aca chana' cuaa.

³ Jamajjeya e shajja'ajja majje Jesosaja epejji jaahuanajji cuana quea bihui nee poanaje: —E'e, ¡jamaya acue! —poanaje.

E'e, ohuaya Tito enijje poe' ba canaje Jodio pojjeama; Jieno dejja ca ca oya, Tito. Jamajjeya Jodio etiiquianaja esohui jayojja jama ajjima, cuiishasha jehuissejjajea jjima. Jamatii Tito ecuanaja etiiquianaja esohui jayojja jama amee jjima, cuiishasha jehuissejjajea mee jjima Jesosaja epejji jaahuanajji cuanaja. Jamajjeya jjeya Jesosaja epejji cuanaja cuiishasha jehuissejjajea jjima.

⁴ Beca cuana ca ca jamatii iyaa jjima dobiquinaje ecuanaja esohui shajja'ajjaa, ecuana mimicuijjeanobiajeaa. Oya cuana aje oe siajje poanaje: —Ecuana pea'ai Jesosa Quitoja epejji —oya poanaje. Siajje po majje ecuana tecueajea canaje jama ba'a: —Tito aje oe Jieno, esejaya etiiquianaja esohui jayojja jama ajjima; cuiishasha jehuissejjajea jjima. ¡Oya oe jamaya ameeque! ¿Apiojji acuae etiiquianaja esohui jama apajea meeña? Jesosa nijje jjapeequi majje jamatii Moisesija esohui jayojja jama caba'yahua —jamaya oya cuana mimijajinaje ecuana nijje.

Chojja. Jesosa nijje jjapeequi majje eseya etiiquianaja esohui jayojja jama epo'yojji pojjeama. Jamatii ma dejja cuaa ecuanaya yahuajo jama ba'e mee sa acani.

⁵ Chojja de, ma dejja cuanaja esohui shajja'ajja jjima ecuanajaya. Ojaya esohui jama huohui ajja nei nei. Jamaya huohuime ya jojjemo miqiuana ma Jodio pojjeama cuana dasia'yome. Ecuaya ca ca yahuajo jama huohui tiitiiña esohui quea pame nee Jesosajo miqiuana onijje ejjapeequi meesahua'yojji tii tii.

⁶ Jamajjeya Jesosaja huoojea'yo ojaya esohui huohuijji etii Jenosanenajo ba'e enijje jama mimime poanaje ba'a: —E'e, iyahuajo jama esohui quea pame nee Jesosajo huohuicueicue Jodio pojjeama cuana huasijje! ¡A'a huohui pajea'yojji! —poanaje.

E'e, pea esohui ecuea ba jjima onajaya huohui jjima. Ma esohui ecuea eba poanaje, ecuea eyacua pojjeama. Ojjaña Jesosaja epeeji cuaa shajja'ajja neinei cani. Jamatii eya Eyacuiñajjija huoojea'yo, onajaya pojjeama. Jamajjeya Eyacuiñajjija eba ecuea ej-jashahuabaquijji. Eyaya quea ja'a nee nee esohui huohuinaña ojaya eba. O quea bihui po mee sa iña poani, dejja cuana pojjeama. ⁷ Jamajjeya ma dejja etii cuaa eya pea esohui huohui mee jjima. Chojja, huohui canaje jama ba'a: —E'e, jamajjeya Eyacuiñajjija Pabo huoojea canaje Jodio pojjeama huasijje esohui quea pame Jesosajo huohuiya. Peno ca ca ohuaya huoojea canaje Jodio cuana huasijje esohui huohuiya —acanjaje Jesosaja epeeji etii cuaa.

⁸ E'e, jamaya poanaje. Ma dejja etii cuaa ba canaje Eyacuiñajjija Peno sohuihuohui sahua canaje Jodio cuana huasijje. Oya jayojjaya ohuaya eya sohuihuohui sahua canaje Jodio pojjeama huasijje. E'e, Peno, eya pea'ai Jesosaja huoojea'yo esohui huohuijji. ⁹ Jamajjeya ma dejja etii cuaa, Jesosaja epeeji jaahuanajjiya, Penohua, Satiacohua, Huaniya pea'ai eya jama acanjaje ba'a: —Pabo, ecuanaja eba e'e jojo nei miya Eyacuiñajjija huoojea'yo Jodio pojjeama huasijje ojaya esohui huohuiya —acanjaje.

Jamajjeya ojee quea bihui nee jama poanaje ba'a: —Pabo, ¡miyaya Benabe nijjeya esohui quea pame nee, Jesosaja esohui huohuicueicue Jodio pojjeama cuana huasijje! Ecuaya ca ca Jodio cuana huasijje esohui huohuije —poanaje.

¹⁰ Ecuana huohui canaje jama pea'ai ba'a: —E'e, ¡jamajjeya Jesosaja epeeji aema' a'a pajea'yojji! ¡Bejjo oe poji huoojeacue aema' nei neija o ba'e meesahuaji! —acanjaje.

Ma esohui shajja'ajja majje eya quea bihui nee poanaje. Eya pea'ai aema huasijje bejjo huoojea sa poani nei nei.

Peno Atioquia cuiñajji yasijje poquiyajo Pabohua oya tecuea canaje

¹¹ Majoya Jesosaja epeeji jaahuanajji nijje mimi majje eya: —Poquia iña —poanaje. Majoya ecua poqui'yonaje Atioquia cuiñajji quea quemu huasijje, quea huesha nee. Jomajo quea huiso Jodio pojjeama cuana ba'yani. Quijje Peno ecua que poeyanaje Atioquia huasijje. Jomajo ani pishana majje Peno quea ja'a pojjeama poanaje. Jamajjeya eyaya oya tecueanaje ojjaña ebajji. ¹² Jama poanaje ba'a: Poe coo majje Peno quea pame nee ¡jjia'ijjianaje ojjaña Jesosaja epeeji cuana nijje, Jodio pojjeama cuana nijje, jamatii Jodio etiiquianaja esohui jama ajjima cuanaja; cuihasha jehuissejjajea jjima. Majoya quijje pishana beca Jodio dejja cuana poeyanaje, Satiacoja huoojea'yo. Ma Jodio cuana poeyajo, Peno aje oe quea pame po'yo ajja. Ani sa po'yo ajja Jodio pojjeama cuana nijje. Jodio pojjeama cuana nijje ¡jjia'ijjia'yo ajja poanaje Jodio cuanajo quea mete jjejojo. Jodio cuana quea quene po mee sa po'yo ajja poa, ma jama poani ba'a: —Jodio pojjeama aje oe Jodio etiiquianaja esohui jayojja jama ca'a cahua, cuihasha cajehuissejjajea cahua de, jamatii Jesosaja epeeji cuana pea'ai —beca Jodio cuaa acani.

¹³ Jamajjeya Peno Jodio pojjeama cuana nijje ¡jjia'ijjia'yo ajja ba majje pea Jodio cuana pea'ai aje oe Jodio pojjeama cuana nijje ¡jjia'ijjia'yo ajja poanaje. E'e, yahuajo oya cuana jama poanaje ba'a: —Eyacuiñajjija ecua ba'e tiitii mee caj'e'yo eyajo Jesosa nijje ¡jjapeequianajo, etiiquianaja esohui jama añajo pojjeama —acanjaje cuaa yahuajo.

Jamatii aje oe Jesosaja epeeji Jodio cuana Jesosaja epeeji Jodio pojjeama cuana nijje ¡jjia'ijjia'yo ajja poanaje. Ma ba majje Benabe pea'ai jamaya quea ja'a pojjeama poanaje, jamatii yahuajo Eyacuiñajjija oya huoojea canaje Jodio pojjeama cuana huasijje.

¹⁴ Jamajjeya ma ba majje eya ¡jashahuabaquinaje jama ba'a: —Quea ja'a pojjeama ohuaya acani, esohui quea pame nee Jesosaja jayojja jama ajjima acani.

Jamajjeya eyaya Peno tecueanaje ojjaña eshajja'ajjaji. Jama anaje ba'a: —Peno, miya Jodio dejja. Miquea chii, miquea enaese pea'ai Jodio. Jamatii Jodio cuana jama ba'e pajea'yonaje. E'e, Jodio pojjeama cuana nijje aninaje, ona nijje ¡jjia'ijjia aninaje. Jamajjeya ¡zapojji acuae ¡jeya miyaya Jodio pojjeama ba'e mee sa iña Jodio etiiquianaja esohui jama? Jamaya miyaya quea ja'a pojjeama iña, Peno —eyaya Peno jamaya anaje.

Jesosa nijje ¡jjapeequianajo, Eyacuiñajjija Jodio cuana, Jodio pojjeama cuana pea'ai ba'e tiitii mee caj'e'yo.

¹⁵ Majoya eya Peno nijje, pea Jodio cuana nijje pea'ai jama poanaje ba'a: —Ecue chii aje jja Jodio pea'ai, miqiuana jaya aje jja Jodio pea'aiya. Jamajjeya jama poani Jodio

pojjeama cuanajo ba'a: "Ecuanaya Jodio deja; joya ecua Jodio pojjeama cuana jama po ajja. Oya cuana aje oe quea mimishi nee nee poani tii, ecuanajaya etiQuianaja esohui jayojja jama ba'e ajja" jamaya poani Jodio cuana quea quehua jshahuabaquianijo — eyaya anaje—. ¹⁶ Jjeya ecuanaya Jesosa nije jjapeeQuiani. Jamajjeya ecuanaja eba e'e jojo nei Jesosa Quito nije jjapeeQuianijo ca ca oe Eyacuiñajjiya eseya ba cani mimishi'ama'yo, etiQuiana Moisesija esohui jama ba'e nishoanijo pojjeama. Jamajjeya eseya Jesosa Quito nije jjapeeQuiani mimishi ecuijea mee'yojji. Jamaya eseya jshahuabaquiani ba'a: — E'e jojo nei Eyacuiñajjiya ecua ba cani emimishi cuijea'yo Jesosa nije jjapeeQuianijo, etiQuiana Moisesija esohui jama ba'yanijo pojjeama. Jamajjeya Moisesija esohui jama añajo pojjeama Eyacuiñajjiya eseya ba caje mimishi'ama'yo.

¹⁷ Eya Peno nije, pea Jodio cuana nije jama poanaje pea'ai ba'a: —E'e, esejaya eba e'e jojo nei Jesosa nije jjapeeQuianijo ca ca oe Eyacuiñajjiya eseya ba cani emimishi cuijea'yo, jamatii Moisesija esohui jayojja jama ba'e ajja. Jamajjeya eseya Jodio pojjeama jayojja poani. ¿A'a jamajjeya Jesosa Quitoja quea jea nee mimishi poanijo? Chojja, jamaya pojjeama. Mimishi Jesosa Quitoja boti'ama. Mimishi po mee'yo ajja nei nei oya.

¹⁸ E'e, eyaya huohui huicha'a huicha'anaje Moisesija esohui jama caba'e pajea'yahua. Ojaya esohui jama ba'e nishoanijo ca ca oe Eyacuiñajjiya eseya mimishi'ama'yo ebajji pojjeama. Jamajjeya eyaya jjeya jama huohui'yo jojjemo ba'a: —¡Moisesija esohui jayojja jama acue! Jamajjeya Eyacuiñajjiya miQuianaya ba caje emimishi cuijea'yo —e'a jojjemo eyaya Eyacuiñajji quea quene po mee'yome, miQuiana dasiajji po mee'yome pea'ai.

E'e, jiquio ecua equi cajja'yo majje oya tii iya o'oyaña jayojja jama eyaya a'yome, ca Moisesija esohui huohui o'oya jojjemo. ¹⁹ Moisesija esohui ba neinei majje eya jjabahuejjaquinaje ma esohui jayojja jama quea camaja nee nee eba'ejji. Ameeeme ajja, de. Jamajjeya ecuea eba e'e jojo nei Jesosa nije jjapeeQuianijo ca ca oe Eyacuiñajjiya eya ba caje emimishi cuijea'yo.

Jiquio ecua emano'yo cuana esohui jama eba'e majajji pojjeama jayojja eya Jesosa nije jjapeeQuii majje Moisesija esohui jama eba'e majajji pojjeama. Eyacuiñajjiya ej-jashahuabaquijji quea ja'a nee jayojja jama ca ca iña ba'eje. ²⁰ E'e, eya Jesosa Quitoja quea jea nee neejo oya acui ecueata'apeejo mano'yonaje ejo, ecue mimishi cuijea'yojji, eya onijje eba'e tiiti mee'yojji. Jamajjeya onijje jjapeeQuii majje eya yahuajo jama quea mimishi eba'e majajji pojjeama. Pea jshahuabaqui'yome ecuea poani. Jjeya ca ca Eyacuiñajjiya Bacua Eja Jesosa Quitohua enijje nequiya eya ojaya ejjashahuabaquijji jayojja jama ba'e meesahua cani. E'e, eseya ojaya quea jea nee neejo Eyacuiñajjiya oja Bacua Eja huoojea canaje eseya mimishi cuijea'yohua. ²¹ Jamajjeya eya onijje jjapee tiitiQuije'yo. ¿A'a Moisesija esohui jayojja jama poanijo, Eyacuiñajjiya eseya ba caje mimishi'ama'yo? Chojja. Ohuaya eseya ba caje'yo mimishi'ama'yo Moisesija esohui jayojja jama ba'yani jojjemo Jesosa Quito mano'yonaje emanojea'yojji, manojea'yo quiaje.

3

¿Achajja acuae mi Eyacuiñajjiya emimishi cuijea'yo ba cani?

¹ Ecuea epeeji Janata meshijo ba'e, ¿apiojji acuae miQuianaya quea jshahuabaqui quehua poani? ¿A'a cuae onaaya miQuianaya dasia majje esohui e'e nei pajea mee ca'yonaje? Yahuajo miQuiana nije nequiya ecuaaya Eyacuiñajjiya esohui Jesosaja huohuinaje quea ja'a nee: —Jesosa Quito acui ecueata'apeejo mano'yonaje esejaya mimishi cuijea'yojji soseje —huohuinaje.

Shajja'ajja majje miQuianaya Jesosa Quitoja epeeji nei po'yonaje. ² Jjashahuabaquicue oe! Jesosa nije jjapeeQuiajo ca ca oe Eyacuiñajjiya ojaya Edojoshahua Pame huoojea canaje miQuiana huasijje dobiQuiya. Moisesija esohui jayojja jama ba'e nishoanijo pojjeama miQuiana huasijje dobiQuiya Edojoshahua Pame. ³ Edojoshahua Pame quea ca'a neeya miQuianaya Jesosa Quitoja epeeji po mee cajje Eyacuiñajjiya bacua poanaje. ¿A'a cuae jjeya nequiiana jama poani so'o ba'a: —Eyaya ca ca eya eyaye nei Eyacuiñajjiya esohui jayojja jama ajeyojeoye'yo —a'a jamaya poso nequiiaa ña?

Chojja. ¿A'a quea jshahuabaqui quehua pojji! ⁴ Yahuajo Jesosa nije jjapeeQuianijo, pea cuaa miQuianaya quea nee nee po mee canaje. Jamatii Jesosa nije jjapeeQuii pajea jjima poanaje. ¿A'a jjeya jamatii onijje jjapeeQuii pajea sa poani? Jamajjeya ¿ajeo acuae nequiiana yahuajo quea nee poa Jesosa nije jjapeeQuii majje? Chojja. ¿A'a jamaya pojji! ⁵ Yahuajo Jesosa nije jjapeeQuianijo ca ca oe Eyacuiñajjiya quea ca'a neeya ojaya Edojoshahua Pame miQuiana huasijje huoojea canaje. MiQuianaya o jayojja jama ameesahua canaje ma dejjaa ajjima acani pea'ai. Ohuaya jamaya ameesahua canaje miQuiaaya esohui quea pame nee Jesosajo shajja'ajjañajo, onijje jjapeeQuianijo pea'ai; Moisesija etehue'yo jayojja jama anishoañajo pojjeama.

*Onijje jjapeequianijo Eyacuiñajjiya Amajama ba ca poa emimishi cuijea'yo
(Genesis 12.3)*

⁶ jashahuabaquicue Amajamajo! Yahuajo nei Eyacuiñajjiya Amajamajo tehue mee ca poa jama ba'a:

“Amajama Eyacuiñajji niije jjapeequi'ya poa e'e jojo nei. Jamajjeya Eyacuiñajjiya oya ba ca poa mimishi'ama”.

Yahuajo jamaya tehue me aca poa.

Jamajjeya Amajama Eyacuiñajji niije jjapeequi'ya poa; o jayojjaya eseya Jesosa niije cajjapeequi'yahua. ⁷ E'e, ojjaña joya Amajama jayojja Jesosa niije jjapeequiani Amajamaja osecua nei cuana poani, Jodio cuana, Jodio pojjeama cuana pea'ai. Jamaya miquianajaya eba. ⁸ E'e, yahuajo nei nei Eyacuiñajji jashahuabaquinaje jama ba'a: “Enijje e'e jojo nei jjapeequi'yajo, eyaya Jodio pojjeama pea'ai baje mimishi'ama”. Jamaya yahuajo poa. Jamajjeya yahuajo nei Eyacuiñajjiya Amajama huohui ca poa jama pea'ai ba'a:

“Amajama, miya ecuea epeeji nei poanijo, eyaya miya baña mimishi'ama. Quea huiso nee ojjaña meshijo ba'e, ojjaña esohuijo mimiani cuana pea'ai eyaya mimishi'ama baje'yo enijje jjapeequi'yajo”.

Jamaya Eyacuiñajjiya Amajama huohui ca poa yahuajo nei nei.

⁹ E'e, Amajama Eyacuiñajji niije jjapee neineiqui'ya poa. Jamajjeya ojjaña o jayojja jama Eyacuiñajji niije jjapee neineiquiani Eyacuiñajjiya ba caje mimishi'ama'yo. ¹⁰ Yahuajo nei nei Eyacuiñajjiya tehue mee ca poa jama ba'a:

“Moisesija esohui etehue'yo jayojja jama ba'e tiitii ajjajo, Eyacuiñajjiya miquianaya quea nee nee po mee caje'yo, quea nee tii tii”.

Jamaya yahuajo nei nei tehue ca poa. Jamajjeya Moisesija esohui jayojja jama ba'e nishoanijo quea nee nee poaje'yo. Chama' joya ojjaña Moisesija esohui etehue'yo atitiijji poani. Quea camaja nee nee. Ameemee ajja.

¹¹ E'e jojo nei Eyacuiñajjiya esohui huohuijjiya tehue ca poa jama ba'a:

“Ojjaña joya onijje jjapeequi'yanii Eyacuiñajjiya ba caje mimishi'ama. Onijje ba'e tiitii mee caje'yo eyajo”.

Jama tehue me aca poa. Jamajjeya ecuanaja eba e'e jojo nei onijje jjapeequi'yanijo ca ca oe Eyacuiñajjiya eseya ba caje mimishi'ama, Moisesija esohui jayojja jama ba'e nishoanijo pojjeama. ¹² Jamajjeya a'a quea quehua jashahuabaquijji jama ba'a: —Eyacuiñajjiya eya ba'e tiitii mee caje'yo Moisesija esohui etehue'yo jayojja jama eya atitiiaña.

Jamaya jashahuabaquianijo Jesosa oe nei nijje jjapeequi ajja tii tii. Maya ba'e tiitii sa poanijo Moisesija esohui jayojja jama atitiij nisho cani. Jamatii ba'e tiitii ajja. ¡Bacue! Eyacuiñajjiya esohui yahuajo nei tehue mee ca poa jama ba'a:

“Ojjaña cuaa Moisesija esohui etehue'yo jayojjaya jama ca'a tiitii cahua eyajo eba'e'yojji tii tii”.

Jamaya yahuajo tehue mee ca poa. Jamatii chama' nei nei joya Moisesija esohui etehue'yo jayojjaya jama atitiij cani.

¹³ Eyacuiñajjiya mimishi cuana jama acani ba'a: —Eyaya miquianaya baña quea mimishi nee, e que ejjanequichipiquijji pojjeama poaje —poani Eyacuiñajji.

Jesosa Quito ca ca mimishi'ama mano'yonaje esejaya mimishi cuijea'yojji sosejje. Yahuajo nei Eyacuiñajjiya esohui tehue ca poa jama ba'a:

“Ojjaña joya acuijo ba'ehuanasohua ba'e, e'aa jeyo ba'e aje oe Eyacuiñajjiya ba cani quea mimishi, o que ejjanequichipiquijji pojjeama”.

Jamajjeya Jesosa Quito acui ecueata'apeejo ba'ehuanasohuajea cajo, Eyacuiñajjiya oya huohui ca poa jama ba'a:

“Miquea epeeji cuanaja mimishi miquea po'yonaje. Jamajjeya eyaya oya cuana baña mimishi'ama, mimishi cuijea'yonaje”.

¹⁴ Yahuajo nei Eyacuiñajjiya Amajama jama aca poa ba'a:

“Amajama, miya enijje jjapee neineiquianijo, quijje eyaya quea huiso cuana, ojjaña meshijo ba'e cuana baje mimishi'ama”.

Jamaya yahuajo nei aca poa. Jamajjeya Jodio pojjeama cuana pea'ai Jesosa Quito niije jjapeequi'yanijo, Eyacuiñajjiya oya cuana ba caje mimishi'ama. E'e, Jesosa Quito mano'yonaje acui ecueata'apeejo esejaya mimishi cuijea'yojji. Jamajjeya Eyacuiñajjiya ojaya esohui jayojja jama acaje: Eseyo ba'e tiitii mee caje'yo onijje. Edojjoshahua Pame huoojca canaje ese yasijje pea'ai, Jesosa niije jjapeequi'yanijo.

Eyacuiñajjiya esohui Amajama niije Moisesija esohui jayojja jama pojjeama

¹⁵ Ecuea epeeji cuana Janatajo ba'e, jjeya eyaya pea esohui tehueña miqiana ba meesahuajji, Eyacuiñajjiya esohui ba meesahuajji. ¡Bacue! Jama aña ba'a: Eseyaya papeni tehueña esejaya aquiana quijje equijjoejajji. Tehue majje bajjani tehueña. Epeejjija

bajjani tehue meeaña pea'ai ojjaña e bajji. Bajjani tehue majje esejaya esohui etehue'yo epajea'yojji pojjeama. Jamaya e'e jojo nei acaje'yo cuaa. ¹⁶ Oya jayojja yahuajo nei Eyacuiñajjiya Amajama huohui ca poa jama ba'a: "Amajama, eyaya miya quea pame nee aje'yo, mique osecua pea'ai". Jamaya Eyacuiñajjiya yahuajo nei aca poa.

E'e, Eyacuiñajjiya Amajama jama aca poa ba'a: "Eyaya quea pame nee aje'yo miquea osecua oe" aca poa. "Miquea osecua quea huiso cuana nijje" ca ca ajjima aje'yo Eyacuiñajjiya aca poa. E'e, Eyacuiñajji jashahuabaquinaje ojaya huoojea'yo ojjaña jaahuanajji, Jesosa Quitojo, Amajamaja osecuajo. ¹⁷ Jamaya poanaje ba'a: Yahuajo nei nei Eyacuiñajjiya Amajama huohui ca poa jama ba'a: "Enijje e'e jojo nei japeequianijo, eyaya miya quea pame nee aje'yo, ojjaña meshi yasijje ba'e cuana quea pame nee aje pea'ai. E'e jojo nei eyaya ecuea esohui jayojja jama aje'yo tii tii" huohuime aca poa.

Jamaya Eyacuiñajjiya Amajama huohui ca poa yahuajo nei nei. Majoya quijje nei nei, 430 shequajame po majje ohuaya Moisesi huohui ca poa ojaya esohui cuana ojjaña Jodio cuana huasijje ehuohuijji. Jamajjeya Moisesi ojaya esohui tehue mee majje Eyacuiñajjiya ojaya esohui Amajama nijje epajea'yojji pojjeama pea'ai. Chojja. Jama po ajja ba'a: "Jjeya ecuea esohui Amajama nijje eya anaje e'abecajji pojjeama" po ajja Eyacuiñajji. Ohuaya jamatii ojaya esohui Amajama nijje aca poa jayojja jama acaje'yo tii tii: Esey mimishi'ama ba caje onijje japeequianijo; Moisesija esohui etehue'yo jayojja jama anishoñajo pojjeama. ¹⁸ Jamajjeya e'e jojo nei onijje japeequianijo ca ca oe Eyacuiñajjiya eseya ba caje mimishi'ama, Moisesija esohui etehue'yo jama ba'e nishoanijo pojjeama. E'e, Eyacuiñajjiya eseya ba'e tiitii mee caje'yo Moisesija esohui jama ba'yani jojjemo ojaya esohui Amajama nijje ohua huohui ca poa jayojja jama ajjima aca'yome. Chojja, ohuaya ca ca oe ojaya esohui jayojja jama acaje'yo tii tii.

¹⁹ Jamajjeya miqianaya pojja'a jama poani ba'a: —¡Dee! Jamajjeya çapiojji acuae Moisesija esohui ba mee ca poa, ajeo shai tehue mee ca poa?

Eyaya miqianaya ba meeje. Jama ba'a: Eyacuiñajjiya maya tehue mee ca poa ese ba meeji ojjaña tii shajjama' poanijo. Yahuajo ca ca Eyacuiñajjiya Amajama huohui ca poa oja osecua poeje, ma ojjaña meshijo ba'e cuana quea pame acaje, Jesosa Quito bajjani. Jesosaa poe majje ecuaña ba mee ca poa Eyacuiñajjiya eseya mimishi'ama ba caje onijje japeequianijo, Moisesija esohui jayojja jama ba'e nishoanijo pojjeama. Jamatii Jesosa cuaya jjimahuajo, Moisesija esohui ojjaña ba ca poa jama ba'a: Ojjaña meshijo ba'e cuana shajjama' poani. Jamajjeya Eyacuiñajjiya shajjama' cuana quea nee nee po mee caje'yo.

Yahuajo nei nei Eyacuiñajji Amajama nijje miminaje jama ba'a: "E'e jojo nei eyaya miya quea pame nee aje". Moisesija esohui tehue mee ca poajo ca ca Eyacuiñajji onijje mimi jjima. Ohuaya ojaya esohuidojojji huoojea ca poa Moisesi sohuihuohuiya. Majoya Moisesiya Eyacuiñajjiya esohui huohui ca poa pea cuana huasijje.

²⁰ E'e, oya Eyacuiñajji Amajama nijje miminaje: —E'e jojo nei eyaya miya quea pame nee aje —aca poa ohuaya. E'e, Eyacuiñajji Amajama nijje miminaje, pea Eyacuiñajji huoojea jjima Amajama nijje mimiya. Jamajjeya e'e jojo nei ma esohui jayojja jama acaje'yo tii tii, Eyacuiñajjiya.

²¹ E'e pojja'a miqianaya jashahuaba quehuaquiani jama ba'a: —Jamajjeya Moisesi ojaya esohui tehue mee majje ojaya esohui ma Amajama nijje ohua huohui ca poa pajea ca'yonaje pojja'a Eyacuiñajjiya —jamaya jashahuaba quehuaquiani pojja'a beca cuana.

Chojja, jamaya pojjeama. Yahuajo nei nei Eyacuiñajjiya huohui ca poa ojjaña onijje japeequiani ohuaya ba caje mimishi'ama. Majoya Moisesiya Eyacuiñajjiya sohui tehue ca poa ojaya ejashahuabaquijji ba meesahuajji. Ma esohui cuana tehue mee ca poa jamatii ojaya eba jamaya ba'e tiitii ajja ojjaña. Chama' nei nei joya ojaya esohui jayojja jama ba'yani tii. Ma esohui jayojja jama eba'e mee jojjemo Eyacuiñajjiya eseya ba'e tiitii mee ca'yome jamaya ba'yani jojjemo: —Eyaya miya baña mimishi'ama ecuea esohui jayojja jama ba'yanijo —jama huohui'yomeya jojjemo.

²² Jamajjeya Eyacuiñajjiya etehue'yo jayojja jama ba'e tiitii ajjajo eseya shajjama' cuana poani, quea mimishi. Jamaya ohuaya huohui ca poa. Jamajjeya Jesosa nijje japeequianijo ca ca oe Eyacuiñajjiya eseya ba cani mimishi'ama, eba'e tiitii mee'yojji.

Jesosa nijje japeequianijo eseya ba'e tiitii mee caje'yo, Moisesija esohui jama amajje pojjeama

²³ Yahuajo nei onajaya huohui jjima Jesosa nijje ejapeequi'yojji. Moisesija esohui jayojja jama ba'yanijo, Eyacuiñajjiya ojjaña mimishi'ama ba cani poso aca poa cuaa. Jamajjeya ma esohui jayojja jama ba'e meeme ajjajo, ejeanobiajea jayojjaya ojjaña poa. Jamaya ojjaña poa esohui quea pame nee Jesosaja shajja'ajja jjimahuajo. ²⁴ Cuanaya Jesosa Quito poe jjimahuajo, ojjaña cuana esho'i jama poanaje. Moisesija esohui esho'i jjabahuejjaqui

meejji jayojja jama poa. Jiquio ecua o jaahuanajjiya esho'iquiana niñeshe'a cani jayojja jama Moisesija esohui ba majje ojjaña ba ca poa quea ja'a eba'ejji, quea ja'a eba'ejji pojjeama pea'ai. Jamajjeya ma esohuijo ojjaña ba ca poa Eyacuiñajji ona nijje quea quene poani Moisesija etehuo'yo jayojja jama ajjimajo. Jesosa poeyajo ca ca onijje japeequi'yajo, Eyacuiñajjiya eseya ba cani mimishi'ama. ²⁵ Jjeya eseya Jesosaja epeeji poani. Jamajjeya esejaya eba Eyacuiñajjiya ojjaña ba caje mimishi'ama Moisesija etehue'yo jayojja jama ba'e nishoanijo pojjeama. Jamajjeya jjeya eseya esho'iquiana jayojja jama pojjeama; etii jayojja jama poani.

Jjeya eseya Eyacuiñajjiya bacua cuana po'yonaje

²⁶ E'e, Jesosa Quito nijje japeequi'yo majje eseya Eyacuiñajjiya bacua cuana poani, Jodio cuana, Jodio pojjeama cuana pea'ai, ojjaña. ²⁷ Jesosa nijje japeequi'yajo eseya onaaya besa mee canaje Eyacuiñajjiyo. Jamaya ojjaña ba meenaje eseya Jesosaja epeeji e'e jojo nei poani, Eyacuiñajjiya bacua cuana. Jjeya eseya Jesosa Quito jayojja jama ba'yani, yahuajo jama pojjeama. ²⁸ E'e, Jesosaa ojjaña ojaya epeeji ba cani oya jayojjaya, pea epeeji jayojjaya. Jama poani ba'a: —Jodio cuana Jodio pojjeama cuana jayojjaya; echacoji sosema' cuana ona huooejaji poani jayojja; deija cuana epona cuana jayojjaya pea'ai. Ojjaña pea jayojjaya eyaya ecuea epeeji baña —Jesosa poani.

²⁹ Jesosa Amajamaja osecua nei poa. Jamajjeya ojaya epeeji nei Amajamaja osecua cuana poani. Onijje japeequianijo, Eyacuiñajjiya Amajama ba ca poa mimishi'ama. Jamajjeya Eyacuiñajjiya Jesosaja epeeji cuana mimishi'ama ba cani pea'ai, Amajama jayojjaya.

4

Jiquio ecua ebacua ejjaa aquiana mesena ca'yani jama jayojjaya Eyacuiñajjiya eseya ba'e tiitii mee caje'yo Jesosa esejo mano'yonajejo

¹⁻² Ecuea epeeji cuana, eseya Eyacuiñajjiya bacua po'yonaje. Jamajjeya ojjaña ojaya aquiana esejaya poaje'yo. Eyaya miqianaya maya esohui ba mee sa aña. Jamajjeya jiquio jama acue ba'a: Oe esho'i oja chiija quijjojea. Mano'yo jjimahuaa ejeajjiya o tiimeejji epojji huohui ca poa jama ba'a: —Ojjaña aquiana ecue quijjojea ecue bacuaja poaje'yo. ¡O esho'yahua miyaya jaahuanacue! ¡Ecuea aquiana pea'ai jaahuanacue! ¡Oya tiyajo quia'yocue! —aca poa ejeajjiya.

Jamajjeya jjeya nei ojjaña aquiana oja chiija quijjojea esho'ija. Jamatii esho'i neiya o tiimeejji cashajja'ajja cahua, echacojiya jama cashajja'ajja cahua. Tii majje ca ca onaja huoojea'yo shajja'ajja pajea caje'yo, esho'iya.

³ Esho'i nei oja chiija aquiana quia jjima jayojja jama yahuajo Eyacuiñajjiya eseya quea jjashahuabaqui ja'a po mee jjima poa. Epeeji pojjeamaja esohui jayojja jama eseya poa. Shajjama' jayojja ba'e sa po'yo ajja poa; jamatii jamaya poa. ⁴ Jamajjeya Eyacuiñajji yahuajo nei jama poanaje ba'a: —Ecuea eba ache shejo, ache pojajo eyaya ecue Bacua huoojeaje —poa.

Jamajjeya ma shejo, ma pojajo tii ojaya ejjashahuabaquijji yahuajo jayojja jama ohuaya Jesosa huoojea canaje. Jesosa ese jayojjaya yamijji poa, Jodio eponaja mejo. Jamajjeya ohuaya Moisesija esohui etehue'yo jayojja nei nei aca'ya poa e'e jojo nei. ⁵ Ojjaña ma esohui jayojja jama ba'e nishoanijo, Eyacuiñajjiya eseya ba cani mimishi cuijea'yo jjima. Jamajjeya oya, Jesosa poeyanaje ese mimishi cuijea'yojji sosequia'yohua. E'e, oya mano'yonaje eseya Eyacuiñajjiya bacua cuana epo mee'yojji.

⁶ Jamajjeya oja bacua poanijo, Eyacuiñajjiya Edojjoshahua Pame huoojea canaje ese que dobiquiya. Edojjoshahua Pameya eseya mimi meesahua cani jama ba'a: —Eyacuiñajji, Echii ai, jjeya miya ecue Chii e'e jojo nei —ameesahua cani eseya.

⁷ Jamajjeya Eyacuiñajji eseya Chii poanijo jjeya eseya esho'i nei jayojja pojjeama, echacoji jayojja jama pojjeama pea'ai. Jjeya ca ca eseya oja bacua etii pishana poani. Jamajjeya jiquio ecua ejeajjiya oja bacua etii acani jayojja jama Eyacuiñajjiya eseya acani, ma ecua ohuaya huohui ca poa jamaya acani.

Pabo quea mete Jesosaja epeeji cuana poa

⁸ Ecuea epeeji cuana, yahuajo miqianajaya ba jjima poa Eyacuiñajji. Jamajjeya eshahua nijje miminaje, eyacuiñajji nisho nijje pea'ai. Maya mi huooejaji poanaje; o jayojja jama popajea meeme ajja poa. ⁹ ¡A'a jja oe jamaya po o'oyajji! Maya miqiana ba'e meesahua ajja, jaahuana ajja, mimishi cuijea'yo ajja pea'ai. Jjeya ca ca miqiaaya Eyacuiñajji babacanaje mique Chii epojji, ama e'e jojo nei ohuaya miya babaca ca poa oja bacua cuana epo'yojji. Jamajjeya çapiojji acuaya jja oe jjeya esohui quea quehua shajja'ajja o'oya sa aña so'o? Jamaya quiana quea jjashahuabaqui quehua poani, de. ¹⁰ E'e, jjeya miqianaya Jodio etiiquiana jama ba'e sa poanijo quea quehua jjashahuabaquiani

jama ba'a: —Jodio ettiquiana ojee ijija'ijija aninaje Eyacuiñajji bihuiajji, ojaya esohui epajea'yojji pojjeamajo. Oe epojjajo jamaya acaninaje, oe ba'ljo cuanaya jamaya acaninaje, pea ba'ljo jamaya acaninaje pea'ai, pea shequiaja cuanajo jamaya acaninaje pea'ai. Ecuanaaya Jodio ettiquiana jama atiitiije, Eyacuiñajjiya ecuana ba caje mimishi'ama — jamaya quea quehua jashahuabaquiani miqianaya.

¹¹ Jamajjeya eya quea mete miqianajo. E'e pojja'a eyaya quea huiso cahui miqianaya huasijje esohui huohui majamajanaje ehuohuijajji.

¹² Ecuea epeeji cuana, miqianaya ecuea quea jea nee, Jesosaja epeeji cuana. Yahuaajo eya miqianajaya quea jea nee poa. Miqianaya nijje nequiya eyaya ecuea ettiquianaja esohui apajea'yonaje. Jamajjeya eya Jodio pojjeama jama ba'enaje, miqiana jama. ¡Che, oe e jayojja jama ba'ecue! ¡Yahuajo jama Jesosaja epeeji nei po o'oyacue! ¹³ Miqianajaya eba yahuaajo eya quea mano poanaje miqianaya nijje ani. Miqianaya nijje aniya esohui quea pame nee Jesosaja huohui coonaje, jamatii quea manohua poaniya tii. ¹⁴ Eya jashahuabaquinaje jama pea'ai ba'a: —Eya quea mano poani ba majje Janata dejja cuaa eya cajaa acaje, eya huoojeacuayajea caje pojja'a cuiñajji esecue yasijje —poanaje.

Chojja, miqianaya eya jaahuanajaje, huoojeacuayajea jjima poanaje. Eyacuiñajji esohuidojojji poeyajo miqianaya oya quea pame aje jayojja jama eya quea pame nee anaje; Jesosa Quito poeyajo, oya quea pame nee aje pea'ai jayojja jama eya anaje, de miqiaaya. ¹⁵ Eya miqianajaya quea jea neejo ecuea esohui shajja'ajjanaje quea jaji nee nee. Jjashajja'ajjanaje pea'ai. Ecuea eba miqianaya jama poanaje ba'a: —Pabo ecuanaja quea jea nee neejo oya quea pame nee ca'a'yahua. E'e, ecuea ecojja cajja cajji jjemo eyaya oya quia'yome, de —poanaje.

Jjeya ca ca miqianaya eya shajja'ajja pajea'yonaje. ¿Apiojji acuae ecue esohui shajja'ajja sa po'yo ajja quiana jjeya, de? ¹⁶ Eyaya esohui e'e nei huohuiaña tii. ¿A'a majoya eya miqianajaya boti'ama?

¹⁷ Beca cuaa, esohui huohuijji nishohua miqianaya quea jea nee nisho acani. Ohuaya miqianaya enijje jjapeequi pajea mee sa acani ecuea esohui Jesosajo epajea mee'yojji. Ojaya esohui oe nei shajja'ajja mee sa acani. ¹⁸ Onaaya miqianaya e'e jojo nei quea jea acani ca ca jamaya quea pame nee. E'e, pea cuana quea jea nee eja'aqui tii. Esohui huohuijji nishohua miqianaya esohui e'e nei pajea mee cani quea pame pojjeama. Jamajjeya miqianaya esohui e'e nei aña tii quea pame nee eya miqianaya nijje nequi jjimahuaajo, miqianaya nijje nequianajo pea'ai. ¹⁹ Epeeji cuana, ecuea ca mi ca miqianaya quea jea nee e'e jojo nei. Jiquio ecua epona cuana quea bacua nee nee poani jayojja jama eya quea yeno nee jashahuabaquime poani miqianajo, ecuea esohui pajea'yañajo. Eya quea yeno nee poaje tii tii; miqiana Jesosa Quito jayojja jama ba'e'yajo ca ca iña oe yeno'ama poaje'yo; ojaya ejashahuabaquijji jayojja jama miqianaya po'yajo, eya yeno'ama poaje'yo. ²⁰ Jamajjeya jjeya nei miqianaya que poqui sa poani. Miqianaya nijje mimi sa poani. Miqianaya nijje enequi jojjemo ecuea eba pome mi jjabahuejjaqui meejji.

¡Esohui Jesosajo shajja'ajjacue Sanaja bacua jama epojji!

²¹ Miqianaya beca cuana Eyacuiñajji esohui ma Moisesi tehue mee ca poa jayojja jama ba'e sa poani. Jamatii miqianajaya ma esohui shajja'ajja jjima, ba jjima pea'ai.

²² Jamajjeya eyaya miqianaya huohuije jama ba'a: ¡Jashahuabaquicue Eyacuiñajji esohui Amajamajo! Amajamaja bacua eja cuayanaje becanajjiji pea'ai. Oe ebacua ejjaja enaeseya chaco ca poa Amajamaja equijo, oja huanaseja yajjijo. Oya Janita bajjani poa. Pea ebacua eja Isaca bajjanaja enaeseya Amajamaja ehuanae poa. Oya Sana bajjani poa. ²³ Janita epona sho'yahua jjamejoquinaje. Oja bacua cuaya poa Amajamaja bacua, ojjaña esejaya ebacua cuayani jayojja jama poa. Chama' Eyacuiñajji esohui ma ebacua poa. Sana ca ca epona tii, bacuama' poa, esho'yahua jjamejoqui jjima poa. Eyacuiñajji Sana huohui ca poa jama ba'a: “Sana, ecuea eba miya epona tii, esho'yahua miya jjamejoqui jjima poa. Jamatii miya jjamejoquije; miquea ebacua cuayaje, dejja” aca poa. Jamajjeya Eyacuiñajji huohui canaje jayojja Sanaja bacua Isaca cuaya poa, Amajamaja jama. ²⁴ Jiquio beca eponajo jashahuabaquicue eba meesahuajji beca ejashahuabaquijji jama ba'a: Beca enaeseya yania poa, Sana, pea ca Janita. Eyacuiñajji beca dejja nijje miminaje pea'ai, Amajama nijje, Moisesi nijje pea'ai. Ebionei Eyacuiñajji Amajama nijje miminaje. Huohui ca poa jama ba'a: “Enijje jjapee neineiquianajo, eyaya miya baña mimishi'ama” aca poa. Ma esohui quea pame nee epona Sana bajjani jayojja.

Majoya quijje Eyacuiñajji Moisesi nijje miminaje eyiyo Sinai bajjani biajje. Ojaya esohui huohui mee ca poa: “Moisesi, jiquio ecuea esohui Jodio cuana shajja'ajja meecue!” aca poa. Jiquio esohui quea camaja nee e'ajji, epona Janitaja eba'ejji jayojja jama. Oya onaja huoojea'yo Amajamaja equijo echacojji. Jamajjeya ojjaña joya Moisesija esohui jayojja jama ba'e sa poani Janitaja bacua cuana jama, echacojji sosema' jayojja. Moisesija

etehue'yo shajja'ajjajji cuana Eyacuiñajjiya ba cani mimishi cuijea'yo jjima. ²⁵ E'e, Sinai meshijo yani eyiyo Janita bajjani Anamia meshijo ba'eja esohuijo. Cuanaya Jodio cuanaja cuiñajji quea quemo Jenosanena bajjani Janita jayojja jama. Janita epona echacojji onajaya yajjijio jayojja jama ojjaña Jenosanena ba'e cuana quea jashahuabaqui quehuajo jama poani ba'a: —Eyacuiñajjiya ecuana ba caje mimishi'ama ojjaña Moisesija etehue'yo jayojja jama ba'yajo —poani.

Jamajjeya Jodio cuana Moisesija esohui etehue'yo anisho cani tii tii. ²⁶ Jenosanena eyacua eyajo nequi. Ojjaña Jenosanena eyacuajo eba'ejji cuana echacojji soesema' jayojja yajji pojjeama. Ma ecua Eyacuiñajjiya huohui ca poa jayojja jama eseya acaje'yo; Jesosa nijje jjapeequi'yajo, ohuaya eseya mimishi cuijea ca'yani. Jamajjeya eseya Sanaja bacua jayojja jama poani. ²⁷ E'e, yahuajo Eyacuiñajjiya esohui etehue'yo Sanajo jama poa ba'a:

“Epona, ¡quea bihui nee pocue, jamatii miya bacuama! ¡Jamatii jjaejoqui jjima quea bihui pocue! Eyaya miya quea osecua huiso po meeje. Quijje miqaea ebacua poaje, miqeahueja jea. Quea huiso nee nee poaje miqae osecua cuana. E'e, miya ehuei'yo pojjeama. Quijje miqaea osecua quea huiso poaje”.

Jamaya yahuajo nei Eyacuiñajjiya tehue mee ca poa.

E'e, Eyacuiñajjiya Sana quea pame aca poa jama ohuaya jjeja eseya quea pame acani, Jesosaja epeeji cuana.

²⁸ Ecuea epeeji cuana, jjeja eseya Jesosaja epeeji poani cuana. Ma ecua ohuaya yahuajo huohui ca poa jamaya Eyacuiñajjiya Amajamaja bacua Isaaca cuaya mee ca poa. Oya jayojjaya jjeja ohuaya eseya oja bacua cuana po mee ca'yani, Jesosa nijje jjapeequi jeahuajo. Jamaya ohuaya huohui ca poa yahuajo. ²⁹ Yahuajo Eyacuiñajjiya Edojjoshahua Pameya Sanaja bacua Isaaca cuaya meesahua ca poa, Amajamaja jea. Oya jayojjaya Edojjoshahua Pameya eseya pea jashahuabaquime po mee cani. Jiquio ecua yahuajo nei Janitaja bacua mimijajinaje Sanaja bacua ojja jayojja jama jjeja Jesosaja epeeji pojjeama ese nijje mimijajiani, quea mimishi acani ojaya epeeji epo poani jjejojo. ³⁰ Jamatii miqaea eba Eyacuiñajjiya esohui etehue'yo jama poa ba'a:

“Epona Janita bajjani equijo chacochocho ani ¡huojoecua yajea'yocue! ¡Quea huesha huojjea'yocue oja bacua nijje! E'e, miqaea aguiana equijjojea oja bacuaja pojjeama poaje. Miqaea ehuanase neija, Sanaja bacuaa ojjaña mesena caje”.

Jamaya yahuajo Eyacuiñajjiya Amajamaja huohui ca poa.

³¹ Janitaja osecua cuana Moisesija esohui etehue'yo jayojja jama aca poa. Eyacuiñajjiya maya ba cani mimishi cuijea'yo jjima. Esey ca ca, Jesosaja epeeji cuana ca ca Sanaja bacua Isaaca jama Eyacuiñajjiya ba cani emimishi cuijea'yo, Jesosa nijje jjapeequianijo.

5

Etiiquianaja esohui jayojja jama ¡a'a ba'e o'oyajji!

¹ Ecuea epeeji cuana, Jesosa nijje jjapeequi meesahua majje Eyacuiñajjiya eseya ba canaje emimishi cuijea'yo. Jamajjeya ¡a'a jama pojji ba'a: —Etiiquiana jayojja tiiya oe eba'e'yo Eyacuiñajjiya eseya mimishi'ama ebajji, Moisesija esohui etehue'yo jayojja jama oe eba'e'yo —a'a jamaya pojji!

Chojja. Jjeja Jesosaja epeeji poanijo, ¡a'a miquianaya Moisesija esohui etehue'yo jayojja jama ba'e o'oyajji! ¡A'a echacojji soesema' jayojja jama po'yojji! ² ¡Shajja'ajjacue! Eyaya, Pabohua miquianaya jama huohuiaña ba'a: E'e jojo nei miquianaaya etiiquianaja ehuhui'yo jayojja jama amajje, cuiishasha jehuissejjajea mee majje ojjaña miya ba cani Jesosa nijje jjapeequi pajea'yani. Jamajjeya etiiquianaja ehuhui'yo jayojja jama amajje, cuiishasha jehuissejjajea mee majje ca mi ca oe Jesosa nijje jjapee nishoquiani. ³ Jamajjeya eyaya miquianaya e'e jojo nei huohui o'oyaña ma Eyacuiñajjiya yahuajo nei huohui ca poa jama ba'a: “Isaenija bacua cuana cuiishasha cajehuissejjajea cahua. Jamaya ojjaña ba caje oya cuana Moisesija etehue'yo jayojja jama ba'yani” jamaya yahuajo aca poa e'e jojo nei. Jamajjeya miquianaaya etiiquianaja, Moisesija esohui etehue'yo jayojja jama a sa po'yo majje ¡ojjaña tii aneinei'yocue oe! ⁴ E'e, jama aña ba'a: —Eyacuiñajjiya eya ba caje mimishi'ama Moisesija esohui etehue'yo jama aña.

Jamajjeya aje oe ma miquianayame tii ca jja mi ca oe Jesosa oe nei nijje jjapee neinei qui ajja. Jiquio jama mimi pajea'yome aje mi poani ba'a: —Eyacuiñajji, ¡eya miqaea quea jea nee nee jo jaahuanacue mo! ¡Miqea esohui jayojja jama ecue mimishi cuijea'yocue! —jamaya mimi pajea'yome mi poanaje, de.

⁵ Ecuana ca ca jama poani ba'a: —Ecuana eba Jesosa nijje e'e jojo nei jjapeequianijo, Eyacuiñajjiya ecuana ba caje emimishi cuijea'yo.

Edojjoshahua Pameya ecuana ba meesahua cani e'e jojo nei Eyacuiñajjiya jamaya eseya acaje'yo o que poqui'yajo. ⁶ Jamajjeya Jesosaja epeeji cuana, Jodio cuana, Jodio pojjeama

cuana pea'ai Eyacuiñajjiya ba cani oya jayojjaya, pea jayojjaya. Ohuaya jamaya acani ba'a: —Ojjaña joya e'e jojo nei Jesosa niije jjapeequi'yani, Jesosa quea jea nee acani pea'ai eyaya baña emimishi cuijea'yo —Eyacuiñajjiya acani.

⁷ Ecuea epeeji cuana, yahuajo miqianaya esohui quea pame nee Jesosaja shajja'ajjanaje quea ja'a nee. Beshahua nei jjapee neineiquinaje. Jjeya ca ca onaaya miqianaya esohui e'e nei pajea mee cani pea esohui eshajja'ajjaji. ⁸ Eyacuiñajji pojjeama miqianaya jama huohuime acani. Chojja.

—¡Esohui e'e nei ba neinei poquiace! —jamaya ca ca Eyacuiñajjiya eseya acani.

⁹ ¡Bacue! E'e jojo nei pa ponaja oe pojji pahui shejee meejiya quea huiso pohuipohui shejee mee cani. Jiquio ecua eshejee meejiya pahui shejee mee cani jayojja jama oe esohui huohuiji nishohua quea huiso cuana esohui e'e nei pajea mee ca'yani. ¹⁰ Jamatii ecuea eba esejaya Emeshi Mese nei Jesosaa ojaya esohui jayojja jama acaje. Jamajjeya miqianajaya esohui e'e nei epajea'yojji pojjeama, etiiquiana Moisesija esohui jayojja jama eba'e nisho'yojji pojjeama. Jamajjeya ecuea eba Eyacuiñajjiya e'e jojo nei ma esohui huohuiji nisho quea nee nee po mee caje'yo pea'ai, jamatii edejja tiya jamaya huohuime acani pojja'a.

¹¹ Epeeji cuana, ¡jjashahuabaquicue! Beca cuana ejo siajje poani jama ba'a: —Pabohua pea'ai ca pa jja'a ca oe huohui cani etiiquianaja Moisesija esohui jayojja cuiishasha jehusejjajea mee cani pea'ai —siajje poani ejo.

Chojja. Yahuajo ca ca oe Jesosa niije jjapeequi jjimahuaa eyaya jamaya pea Jodio cuana huohuia poa. Jamajjeya oya cuana enijje quea bei poa, quea quene pojjeama. Jjeya ca ca eyaya esohui eyacua huohuiaña jama ba'a: —Jesosa acui ecueata'apejo mano'yonaje esejjo, esejja mimishi cuijea'yojji sosejje. Onijje jjapeequi'yojo ca ca oe Eyacuiñajjiya miqianaya ba caje emimishi cuijea'yo —huohuime jjeya aña.

Jamajjeya ma shajja'ajja majje Jodio cuana enijje quea quene poani. Eyaya yahuajo jama Moisesija esohui ehuhui jojjemo Jodio enijje quene'ama pome. Oya cuana enijje quea quene poanijo, miqianajaya eba eyaya jamaya huohui maja ajja.

¹² ¡Esohui huohuiji nisho, ma miqiana dasiajji poani ca'a'ama capoahua! Maya jama poani ba'a: —¡Moisesija esohui jama ca'a cahua! ¡Cuiishasha cajehusejjajea cahua! —acani. ¡Oya cuanaya cabiña jjajeajehua pea'ai, de! Jamajjeya jiquio ecua ejajja chamajo jjabacuaajeaqui ajja jayojja jama esohui huohuiji nishoja mi dasiajji epo cuanaja quea huiso edasia maja'yojji pojjeama.

¡Edojjoshahua Pameja esohui jayojja jama ba'ecue!

¹³ Jesosaja epeeji cuana Janata meshijo ba'e, miqianaya ecuea quea jea nee. ¡Jamajjeya mo shajja'ajjacue! Eyacuiñajjiya miqianaya babaca canaje Jesosaja epeeji epo'yojji, Moisesija esohui e'ajji pojjeama. Jamatii miqianaaya, Jesosaja epeejiya ja'a jamaya ajji ba'a: —Eyacuiñajjiya eya ba cani mimishi'ama Jesosa niije jjapeequianajo. Eya Moisesija esohui etehue'yo jayojja jama apajea mee canaje. Jamajjeya eya jamatii ba'eje o'oya yahuajo jama, quea mimishi —a'a jamaya pojji!

Chojja, jamaya pojjeama. ¡Pea cuana asahuacue; quea jea nee nee acue! Jesosa Quito niije jjapeequi'yanajo, Eyacuiñajjiya miqianaya quea ja'a po mee cani ojaya esohui jama eba'ejji. ¹⁴ Jamaya Moisesiya tehue ca poa yahuajo ba'a:

“¡Pea cuana quea jea nee nee acue! Miya quea ja'a ba'e sa poani. Jamajjeya ¡pea cuana quea ja'a ba'e mee sahuacue, mi jayojjaya! ¡Pea cuana mi pejjejo ba'e pea'ai mique huapa pojjeama jayojja quea jeaya oe acue!”

Jamaya yahuajo Moisesiya tehue ca poa.

E'e jojo nei pea cuana quea jea nee nee aña Moisesija esohui jama aña. ¹⁵ Pea cuana niije mimijajjani ca ca oya cuana miquea quea jea pojjeama. ¡Jiquio ecua ¡jjiacajji cuaa jja'ijjiaqui majje jja'ijjia jejojeyoquiani jayojja jama a'a pojji! ¡A'a pea cuana niije quea quene nee nee pojji! ¡A'a quea yeno nee nee po meeji! ¡A'a mimijajjiji! ¡Pea epeeji cuana niije quea bei pojjeamajo ojee jjapepajeaqui mee ca chana!

Edojjoshahua Pameja ejjashahuabaquiji pea ojjaña yahuajo ba'ejja jayojja jama pojjeama

¹⁶ Ecuea epeeji, ¡shajja'ajjacue! ¡Edojjoshahua Pameja ejjashahuabaquiji jayojja jama ba'ecue, yahuajo jama pojjeama! ¡Yahuajo jayojja a'a sa'yojji! Quea mimishi ja'a ba'e sa po o'oyajji! ¹⁷ E'e, yahuajo quea mimishi ba'ya poa. ¡Jamaya a'a po sa po o'oyajji! Edojjoshahua Pameja ca ca eseya ba'e meesahua can; pea ejjashahuabaqui'yojji po mee can, de. ¿Apiojji acuae mi yahuajo ba'ya poa jayojja jama ba'yani, ejjashahuabaquiji eyacua jama pojjeama ba'yani? ¹⁸ Jjeya Edojjoshahua Pameja ejjashahuabaquiji jama ba'yanajo ca ca Eyacuiñajjiya eseya ba cani emimishi cuijea'yo; etiiquiana Moisesija esohui jayojja jama ba'yanajo pojjeama.

¹⁹ Ojjaña joya Edojjoshahua Pameja ejjashahuabaquiji jayojja jama a'ajja ca ca quea mimishi poaje'yo. E'e, jamaya pojjeama ba'yanijo onajaya ehuanase sii caje, onajaya yahue jea ba majje sii caje pea'ai, quea mimishi jjashahuabaquianijo edeja oya deija nijje, epona oya epona nijje pea'ai quea mimishi acaje bicho'ama. Quea tai jjashahuabaqui majje jamaya acaje'yo. ²⁰ Eshahua nijje, eyacuiñajji nisho nijje mimije; eyamiquecua poaje, quea quene nee nee poaje; jjamicuciajea nobiajeaquije; pea jayojja jama nequi sa poaje; quea tecue nee nee poaje; quea deija tai, quea nishehui poaje; mimijajije pea'ai. Ojjaña joya Edojjoshahua Pame jayojja jjashahuabaqui ajjaa quea tai acani. ²¹ Onajaya aquiana jea ba cani, ehoo nei po tiitiiani, ojee ishi'ishi majje quea tai poani pea cuana nijje. E'e, ojjaña mimishi acani; yahujajo jayojja ba'yanijo tii quea mimishi po tiitiiani.

Yahujajo eyaya miquianaya huohuinaje; jjeja eyaya huohui o'oyaña jama ba'a: E'e jojo nei ojjaña joya jamaya ba'yani aje oe Eyacuiñajji nijje eba'e'yojji pojjeama, Eyacuiñajji cuñajji eyacua huasijje edobiquijji pojjeama Jesosa poe o'oyajo.

²² Edojjoshahua Pameja eseya ba'e meesahua canijo ca ca jama poani ba'a: Pea cuana esejaya quea jea poani, quea bihui nee poani, quea bei poani, ojjaña nijje quea pame nee poani, quenequenequaji ajja pea'ai, mase'ama poani pea'ai, ojjaña cuana quea jea nee aña tii tii; esejaya esohui jayojja jama aña pea'ai. ²³ Eseyajjabihuiacuqui mee sa po'yo ajja pea'ai. Quea mimishi po sa po majje quea ja'a jjashahuabaquiani mimishi epojji pojjeamajo. Jamaya poani Edojjoshahua Pameja ejjashahuabaquiji jayojja jama ba'yanijo. E'e, jamaya ba'yanijo Eyacuiñajji quea bihui po mee aña seya. ²⁴ Eseyaj Jesosa Quitoja epeejji poanaje. Jamajjeja mimishi a sa po'yo ajja. E'e, Jesosa Quito mano'yonaje acui ecueata'apeejo ecuanaja mimishi cuijea'yojji. Jiquio ecua emano'yo shajoshajo'yo ajja jayojja jama eseya Jesosaja epeejji poanijo mimishi a sa po'yo ajja. Pea jjashahuabaqui'yome eseya Jesosaja epeejji cuana poani. ²⁵ E'e, Edojjoshahua Pameja ecua Jesosa nijje jjaepequi meesahua canajejo, eseya ojaya ejjashahuabaquiji jayojja jama eja'aqui. ²⁶ Jiquio jama a'a jjashahuabaquiji ba'a: —Eya ee nei Jesosaja epeejji quea pame nee poani. Pea cuana quea pame pojjeama —jamaya a'a pojji!

¡A'a pea cuana quea quene po meejji! ¡Pea cuanaja aquiana a'a jea bajji pea'ai!

6

¡Quea pame nee pocue pea cuana nijje!

¹ Ecuea epeejji cuana, ¡bacue jiquio esohui! Jesosa Quitoja epeejji quea mimishi po o'oyajo, ¡onijje mimiucue! E'e, miquianaya Jesosaja epeejji quea ja'a poanijo ¡oya mimishi pajea meesahua'yocue! ¡Quea bei oya jjabahuejjaqui meecue! ¡Quea jjashahuabaqui ja'a nee pocue! Miya quea mimishi po o'oya chana' pea'ai. ² ¡Jesosa Quitoja epeejji ojaya esohui jayojja jama ba'e meesahuacue! ¡Jamajjeja ojjaña miquianaya ojaya esohui jayojja jama acue! Jiquio ecua e'abojji quea biquiejo ishajja cani jayojja jama eba'ejji quea camaja poanijo, ¡epeejji cuana ba'e meesahuacue! ³ Beca cuana jjashahuaba taiquiani jama ba'a: —Eya ee nei quea pame nee; pea cuana quea pame pojjeama —poso jjabaquiani.

Chojja, ojaya ejjashahuabaquiji quea quehua, quea tai. ⁴ Ojjaña Jesosaja epeejji caj-jashahuaba neineiquahua ojaya eba'ejjijo. ¡Quea pame amajje quea bihui nee capohua! ¡A'a jjashahuabaquiji jama ba'a: —¿A'a pea cuana e jayojja jama quea pame aña? —a'a jamaya pojji!

⁵ Jamajjeja ojjaña eseyaya quea mimishi po majje ¡Eyacuiñajji huohuicue! A'a jama ajji ba'a: —Onaaya eya quea mimishi po mee canaje.

Chojja. Ma miyame tii ca mi ca quea mimishi.

⁶ Epeejji cuana, ¡Jesosaja esohui huohuiji aquiana ojaya eba'e meejji quiacue! E'e, esohui huohui cani sosejje casosequia cahua.

⁷ ¡A'a jjadasiaquiji pojji! ¡A'a quea jjashahuabaqui tai pojji! Eyacuiñajji ca ca jjadasia meequi ajja. Ohuaya quijje ojjaña sosequia caje'yo ma eseyaya meshijo ba'yahuua anaje sosejje. Ojjaña ojaya eba. Jamajjeja jiquio ecua anoso quecua majje quijje anoso chicha caje'yo quea huiso nee jayojja jama quijje Eyacuiñajjiya acaje'yo. ⁸ E'e. Jamajjeja yahujajo jayojja jama jjashahuaba tiitiiquiani quea mimishi epojji, e'e jojo quea mimishi poaje. Jamajjeja quijje Eyacuiñajjiya quea nee nee po mee caje'yo tii tii quea mimishi poanaje sosejje. Edojjoshahua Pameja esohui shajja'ajjañajo ca ca e'e jojo nei quea pame po mee caje'yo; eseya ba'e tiiti mee caje'yo onijje.

⁹ ¡Jamajjeja quea pame nee eja'atiitiqiu! Quea pame nee apajea'yo ajjajo, e'e jojo nei Eyacuiñajjiya eseya quea bihui nee po mee caje'yo Jesosa Quito poe o'oyajo. E'e, jiquio ecua equa meseya oja quejo chaco pajea'yo jjima acani jama, quijje tii'yajo ejjaja quea pame chicha ca'yani jayojjaya eseyaya Edojjoshahua Pameja esohui jayojja jama apajea'yo ajjajo, quijje Eyacuiñajjiya eseya quea pame nee acaje'yo. ¹⁰ ¡Jamajjeja ojjaña cuana quea

pame ejja'atiitiiqui! ¡Jesosaja epeeji cuana ca ca quea pame nee nee ejja'atiitiiqui eseja huapa pojjeama jayojja!

Pabohua pea esohui huohui canaje

¹¹ Epeeji cuana, eyaya eyaye nei jiquio esohui tehueaña. Miquea eba eya tehueaña jayojja; tehue ai'ai yaña. ¹² ¡Bacue! Beca cuana jjashahuaba taiquiani; onaya jjabihuiqui mee sa poani. Oya cuana esohui huohuijji nei poso acani. Miqúanaya huohui cani esohui siajje jama ba'a: —¡Moisesija esohui jayojja jama acue! ¡Onaya cuiishasha jehuissejjajea meecue Eyacuiñajjija miqúanaya ebajji emimishi cuijea'yo! —jama siajje ameya mi acani.

Jamajjeya esohui e'e nei mi huohui cani jama ba'a: —Jesosa acui ecueata'apeejo mano'yonaje esejo. Onijje jjapeequi'yajo Eyacuiñajjija eseya ba caje emimishi cuijea'yo —jamaya miqúanaya huohui jjima acani. Chojja, oya cuana quea mete jjashahuabaquiani jama ba'a: —Ecuua jama ehuhui'yo jojjemo ba'a: “¡Jesosa nijje oe jjapeequi'ycue!” jamaya e'a jojjemo onaya ecuana nijje quea quene nee pome —jamaya esohui huohuijji nisho poani.

¹³ E'e de, maya etiiquiana Moisesija esohui etehue'yo jayojja jama ecuiishasha jehuissejjajea'yo. Jamatii aje oe ojjaña pea esohui etehue'yo jayojja jama ba'e'yo ajja. Miqúanaya cuiishasha jehuissejjajea mee sa acani jama ehuhui mee'yojji ba'a: —Ecuana jaya esohui ca ca oe shajja'ajja cani ojjaña.

¹⁴ Eyaya ca ca oe quea bihui huohui tiiña jama ba'a: —Jesosa Quito acui ecueata'apeejo mano'yonajejo, onijje tii tii jjapeequiani. Jamajjeya Eyacuiñajjija eya ba cani emimishi cuijea'yo.

Jamajjeya eya yahuajo jama ba'e maja sa po'yo ajja. Mimishi cajaa a'yonaje. Jjeya ecuea eba'ejji pea'yo poanaje. Jesosaja epeeji pojjeama cuana ca ca oe e jayojja jama ba'e sa po'yo ajja cuana. Eya ojaya boti'ama nei. ¹⁵ Jesosa Quitohua eseya pea jjashahuabaquime po mee cani. Eyacuiñajjija eseya ba cani emimishi cuijea'yo Jesosa nijje jjapeequianijo, Moisesija esohui jayojja jama añajo pojjeama; cuiishasha jehuissejjajeañajo pojjeama, cuiishasha jehuissejjajea jjimajo pojjeama pea'ai. Chojja, pea jjashahuabaquime eseya po mee cani Eyacuiñajjija.

¹⁶ Jamajjeya ojjaña quea pame nee ba'yanijo, Jesosaja epeeji e'e jojo nei cuana eya Eyacuiñajji nijje mimiani jama ba'a: —Ecue Chii, ¡Jesosaja epeeji cuana quea bei ba'e meesahuacue! ¡Tecu'e'ama ona nijje pocue!

¹⁷ ¡A'a jja oe enijje jjamicuiajjea nobiajjeajjiji esohui huohuijji nishoja esohuijo! Eya e'e jojo nei Jesosaja huoojja'yo esohui huohuijji. Jamajjeya ¡a'a huohui o'oyajji jama ba'a: —Pabohua cahuohui cahua jama ba'a: “¡Etiquianaja Moisesija esohui etehue'yo jama acue Eyacuiñajjija miqúanaya emimishi cuijea'yo ebajji!” —a'a jamaya pojji!

Mimishi cuua eya cuia canaje quea huiso esohui eya ehuhui poaje jjejojo. Ecuea esi' quea huiso yanijo, ojjaña ba caje eya e'e jojo nei Jesosaja huoojja'yo.

¹⁸ Ecuea epeeji cuana, jesejaya Emeshi Mese nei Jesosa Quitohua miqúanaya caba'e meesahua cahua quea pame nee! Jamaya capoahua tii.

Mahuiso ecuea esohui. Eyaya, Pabohua jiquio esohui tehue'yonaje. Apoa.

PABOJA ETEHUE'YO EPESO CUIÑAJJI YASIJJE EFESIOS

Pabohua tehue canaje Jesosaja epeeji cuanaEpeso cuiñajjijo ba'e yasijje

¹ Eya bajjani Pabo. Jesosa Quitohua eya huoojea canaje oja sohui huohuiya. Jamaya Eyacuiñajji sa poanaje. Eyaya miqianaya Epeso cuiñajjijo ba'e yasijje esohui tehueña. E'e, miqianaya Jesosa Quito nijje jjapeequiani. ² Eyacuiñajji esejaya Chii ai poani. Jesosa Quito esejaya Emeshi Mese nei oe nei. ¡Ohuaya miqianaya quea bei nee caba'e meesahua cahua! ¡Quea boejea capo mee cahua pea'ai!

Jesosa eyajo ba'e jayojja jama eseya ba'e mee caje'yo Eyacuiñajjiya

³ Eyacuiñajji ca ca oe Jesosa Quitoja Chii poani. Jesosa esejaya Emeshi Mese nei poani. Eyacuiñajji ejjabihuaiqui jama ba'a: —Eyacuiñajji, miya quea pame nee nee poani.

E'e, ohuaya Jesosa huoojea canaje esejaya mimishi cuijea'yohua. Cuanaya ohuaya eseya ba'e tiitii mee caje'yo onijje eyajo. E'e, eseya o jayojjaya jama ba'e mee caje'yo quea pame nee eyajo. ⁴ ¡Iquio meshi pana jjimahuajo Eyacuiñajji jjashahuabaquinaje jama ba'a: —Ojjaña cuana Jesosa nijje jjapeequiani ecue bacua cuana po meeje'yo. Quea pame nee poaje. Mimishi'ama pea'ai poaje.

⁵ E'e, yahuajo nei nei eseya Eyacuiñajjiya quea jea nee poanijo oya jjashahuabaquinaje jama ba'a: —Oya cuana ecue bacua cuana po meeje'yo, eba'ehuana jayojja ecue Bacua Jesosa Quito nijje jjapeequianijo.

E'e, jamaya Eyacuiñajji sa poanaje yahuajo nei nei. ⁶ Jamajjeya eseyaya oya bihuaña jama ba'a: —Eyacuiñajji, miyaya ecuaa jaahuana neineña.

E'e, Eyacuiñajjiya oja Bacua Jesosa quea jea nee acani. Eseyaya quea jea nee acanijo pea'ai Jesosa huoojea canaje mano'yohua, eseya mimishi cuijea'yojji. Jamatii, sosema' huoojea canaje. ⁷ Jamajjeya eseya cuaqui yasijje epoquijji pojjeama. E'e, jamaya poanaje Jesosa mano'yajo; ena' ojaya cuayaquinaje eseya mimishi cuana cuijea'yojji. E'e, eseya quea jea nee nee poanijo jamaya amee canaje Eyacuiñajjiya. Quea pame nee nee oya. Pea chama' o jayojja. ⁸ Quea pame nee nee ojaya ejjashahuabaqui'yojji. Ojaya eba ojjaña nei nei. Jamajjeya ohuaya eseya ba'e tiitii mee caje'yo onijje eyajo. ⁹ E'e, yahuajo nei nei esejaya ba jjima ojaya ejjashahuabaqui'ji. Jjeya ca ca ohuaya eseya ba meesahua cani ojaya ejjashahuabaqui'ji cuana Jesosa Quitoja. Jamaya ohuaya acaje'yo ba'a: Jesosa Quitohua esejaya mimishi cuana cuijea ca'yonaje, Eyacuiñajjiya eseya ba'e tiitii mee caje'yo onijje eyajo Jesosa Quito poe o'oyajo. ¹⁰ E'e, quiije Eyacuiñajjiya Jesosa Quito Emeshi Mese nei oe nei po mee caje'yo. Ojjaña meshijo, ojjaña eyajo pea'ai huoojeajji poaje'yo tii tii. Oya ojjaña quea bei po meeji poaje. Jama jjashahuabaquimeya poa Eyacuiñajji.

¹¹ E'e, yahuajo nei nei Eyacuiñajjiya eseya Jesosaja epeeji cuana babaca ca'ya poa Jesosaja epeeji epo'yojji. Cuanaya Eyacuiñajji yahuajo nei nei meshi pana jjimahuajo jjashahuabaquinaje esejo jama ba'a: —Jesosaja epeeji cuana quiije nei ecuea ejjashahuabaqui'yojji jayojja jama poaje'yo.

Jamajjeya Eyacuiñajjiya ojaya epeeji cuana quiije ojaya ejjashahuabaqui'ji jayojja jama amee caje'yo. ¹² Jamajjeya ecuaa, Jesosa Quitoja ebionei epeeji cuana Eyacuiñajji bihuaie jama ba'a: —Eyacuiñajji, miya quea pame nee nee poani, ecuaa Jesosaja epeeji po mee'yonaje.

¹³ Yahuajo Eyacuiñajji ecuanajo jjashahuabaquinaje, Jodio cuanajo. Jjeya oya miqianajo, Jodio pojjeama cuanajo jjashahuabaquiani pea'ai. E'e, eyaya miqiana huasijje Jesosa Quitoja esohui e'e nei huohuinaje Jodio pojjeama huasijje. Shajja'ajja majje miqianaya Jesosa Quitoja epeeji poanaje. Jamajjeya Eyacuiñajjiya miqianaya ojaya ebacua cuana po mee ca'yonaje. E'e, miqianaaya shajja'ajjanaje Eyacuiñajjiya ejjashahuabaqui'yojji quea pame nee miqianajo jama ba'a: —Eyaya Jodio pojjeama cuana ba'e tiitii mee sa ña Jesosa nijje eyajo Jesosaja epeeji poanijo.

Cuanaya Eyacuiñajjiya yahuajo nei huohui ca poa jama ba'a: —Eyaya Edojjoshahua Pame huoojeaje'yo Jesosaja epeeji yasijje ona jaahuana. Oya cuana Jesosa nijje jjapee tiitiiqui meesahua caje'yo —oya poa.

Jamajjeya esejaya eba jama ba'a: —E'e, Eyacuiñajjiya eseya jaahuana canijo ohuaya ojaya ejjashahuabaqui'yojji esejo jayojja jama acaje'yo e'e jojo nei —eseyaya baña.

¹⁴ E'e, Eyacuiñajjiya yahuajo huohui ca poa jama ba'a: —Jodio pojjeama cuana ecuea epeeji poaje'yo beca cuana.

Eyacuiñajjiya jamaya huohui ca poa. Jamajjeya Jodio pojjeama cuana oja bacua cuana po mee caje'yo. Onijje ba'e tiitii mee caje'yo. Ojaya ebacua cuana po'yo majje ohuaya bihuaya caje jama ba'a: —E'e Eyacuiñajji, miya quea pame nee poani e'e jojo nei.

Pabo miminaje Eyacuiñajji nijje Epesojo ba'e cuana quea pame nee epo mee'yoyji

¹⁵ E'e, miqúanaya Eyacuiñajji epeeji poanaje. Peaa eya miqúanajo huohui canaje jama ba'a: —Beca cuana Epeso cuiñajji ba'e Jesosaja, esejaya Emeshi Mese neija epeeji poanaje. Onaaya ojjaña Jesosaja epeeji cuana quea jea nee acani —eya acanaje cuaa.

¹⁶ Jamajjeya ohuaya miqúanaya oja bacua cuana po mee ca'yonaje shajja'ajja majje eya mimiani Eyacuiñajji nijje miqúanajo: —Eyacuiñajji, ¡miquaea epeeji cuana Epesojo ba'e minijje jjapeequi meesahuacue quea pame nee!

¹⁷ E'e, eya mimiani Eyacuiñajji nijje miqúanajo jama ba'a: —Eyacuiñajji, miya Emeshi Mese nei Jesosa Quitoja Chii quea pame nee. Jamajjeya ¡miquaea epeeji cuana Epesojo ba'e quea ja'a nee jjashahuabaqui meecue! ¡Oya cuana miquaea ejjashahuabaqui'yoyji, miquaea esohui cuana pea'ai ba meesahuacue! Jamajjeya onajaya eba nei nei miya poaje. ¹⁸ E'e Eyacuiñajji, ¡oya cuana ba meecue quea ja'a nee miquaea ejjashahuabaquijji! E'e Eyacuiñajji, miyaya oya cuana babaca'yonaje; oya cuana ba'e tiitii meeje'yo Jesosa nijje eyajo. ¡Quea pame nee nee Jesosa nijje eba'ejji, de! ¡Maya oya cuana ba meesahuacue quea ja'a nee! E'e, jamaya miquaea ejjashahuabaquijji miquaea epeeji cuanajo. ¹⁹ Eyacuiñajji, miya quea ca'a nee nee poani; pea chama' mi jayojja quea ca'a nee nee. ¡E'e Eyacuiñajji, miya quea ca'a nee nee poanaje Jesosa Quito jaahuanajji! ¡Miquaea epeeji cuana ba meesahuacue miya quea ca'a nee nee poani ecuana jaahuanajji pea'ai! —eya jamaya mimiani Eyacuiñajji nijje miqúanajo.

²⁰ E'e jojo nei Eyacuiñajji quea ca'a nee nee. Jamajjeya Jesosa Quito dejja mase cuaa quecua ca'yajje mano'yajo, Eyacuiñajjiya shequi mee ca o'oya poa. Shequi mee'yo majje eyahuasijje dojosohuacui ca'ya poa. Jomajo Eyacuiñajjiya Jesosa Quito onijje ojjaña huoojea'yoyji po mee cani. ²¹ E'e, Jesosa oe nei quea ca'a nee nee po mee ca'yonaje. Oya ojjaña huoojea'yoyji po mee ca'yonaje. Emeshi Mese oe nei po mee ca'yonaje pea'ai. E'e, Jesosa quea ca'a nee nee, quea pame nee nee yani jjeya; quijje aje oe oya ma ani tiitii'yome poaje. Oya quea bajjani huiso nee, quea pame nee nee poani Jesosa. ²² E'e, Eyacuiñajjiya Jesosa Quito Emeshi Mese quea ca'a nee nequi mee canaje. Ojjaña aquiana cuana Jesosaja poanaje. Ojjañaja oja epeeji cuanaja Emeshi Mese nei poanaje Jesosa. Eyacuiñajjiya huohui canaje jama ba'a: —¡Jesosa Quito shajja'ajjacue, ojjaña!

²³ E'e, Jesosaa ojaya epeeji cuana ojaya esohui jayojja jama ameesahua cani. Ojjaña ojaya epeeji cuana nijje nequi majje oya cuana ameesahua cani quea pame nee. E'e, ojaya epeeji cuana Jesosaja eyami jayojja jama poani.

2

Eyacuiñajjiya eseya eyajo ba'e tiitii mee caje'yo

¹ Yahuaajo miqúanaya quea mimishi nee nee poa jjejojo Eyacuiñajji nijje jjapeequi jjima poa. ² E'e, yahuaajo miqúanaya pea cuana quea mimishi jayojja jama Edosiquiana nijje jjapeequinaje, esahua cuanaja mese nijje. Ohuaya shajjama' cuana quea mimishi po meesahua cani. ³ E'e ecuana, Jodio cuana miqúanaya jayojjaya poa. Eyacuiñajjiya jjashajja'ajjaqui aija pea'ai poa. Shajjama' jayojja jama po sa poanaje esahuaja epeeji jayojjaya. E'e de, ecuanajaya ejjashahuabaquijji quea mimishi jayojja jama po sa poanaje. Jamajjeya yahuaajo pishana ecuana, Jodio cuana, miqúanaya Jodio pojjeama cuana pea'ai esahuaja epeeji quea mimishi poanajo Eyacuiñajjiya huohui canaje jama ba'a: —Miqúanaya aje oe quea nee nee po meeje'yo eyaya, esahuaja epeeji quea mimishi nee neejojo —Eyacuiñajji poa.

⁴ Jamatii Eyacuiñajji eseya mimishijo jjashahuabaqui tiitii sa po aija eseya ojaya quea jea nee nee poanajo.

⁵ E'e, yahuaajo pishana eseya Eyacuiñajji nijje jjapeequi jjima poa quea mimishi po sa neinei poanajo. Jamatii Eyacuiñajjiya eseya oja bacua quea pame cuana po mee canaje Jesosaja epeeji poanajo. E'e de, jamaya Eyacuiñajjiya eseya quea jea nee acanijo esejaya mimishi cuana cuijea ca'yonaje. ⁶ Jamajjeya Jesosa Quitohua eseya mimishi cuana cuijea ca'yonajejo, Eyacuiñajjiya ecuana, miqúanaya pea'ai ojaya bacua cuana po mee ca'yonaje ojee eyajo eba'e tiitii mee'yoyji. Jamajjeya Eyacuiñajjiya ecuanaya, miqúanaya pea'ai ba'e tiitii mee cani Jesosa Quito nijje eyajo. Jamaya ohuaya huohui ca poa ba'a: —Jesosaja epeeji poanajo eyaya miqúanaya o jayojjaya nequi tiitii meeña quea ca'a nee, quea pame nee pea'ai.

⁷ E'e, Eyacuiñajjiya esejaya mimishi cuijea'yo majje ese nijje quea bei poani. Jamajjeya ojjaña cuana esohuicuayajji ba mee cani; quijje pea'ai ba mee caje jama ba'a: —E'e nei

eseyá Jesosa Quitoja epeeji poanijo, Eyacuiñajji ese nijje quea bei poani. E'e, Eyacuiñajji ese nijje quea pame nee nee poani tii.

⁸ E'e de, eseyá Eyacuiñajjiya quea jea nee nee. Jamajjeya miqiuanaaya huohuaña jama ba'a: —Ecuea eba Eyacuiñajjiya ecuea mimishi cuana cuijea ca'yonaje eya onijje jjapeequi jeahuajo —jamaya poanijo Eyacuiñajjiya miqiuanaaya quea pame nee acani. E'e, ohuaya miqiuanaajaya mimishi cuijea ca'yonaje onijje mimiyajo.

¿A'a miqiuanaaya quea pame nee nee poani sosejje mimishi cuijea ca'yonaje? Chojja de, ohuaya mimishi cuana cuijea ca'yonaje sosema'. ⁹ E'e, ohuaya esejaya mimishi cuijea ca'yonaje sosema'. Jamajjeya pea cuana slajje epojji pojjeama jama ba'a: —Eya quea pame nee poani sosejje Eyacuiñajjiya ecuea mimishi cuijea ca'yonaje —chojja, jamaya poani slajjepojji cuana.

¹⁰ E'e, esejaya eba Eyacuiñajjiya eseyá pea jjashahuabaquime po mee ca'yonaje. Jamaya ohuaya aca'yonaje Jesosaja epeeji cuana poanijo. E'e, ohuaya jamaya aca'yonaje. Eseyá ojaya ejjashahuabaquijji jayojja jama atitiití mee ca'yani pea'ai. Ojaya ejjashahuabaquijji esejo jama ba'a: —¡Eya miqiuanaajaya quea jea nee poa cuana quea pame nee atitiicue!

Eyacuiñajjiya Jodio pojjeama sa cani ojaya epeeji epojji

¹¹ Miqiuanaaya Epesojo ba'e Jodio cuana pojjeama. ¡Jamajjeya jjashahuabaquicue! Miqiuanaajaya chii cuana Jodio pojjeama poa. Jamajjeya Jodio cuana miqiuanaajo maimai aninaje jama ba'a: —Oya cuana ca ca oma Jodio pojjeama; Eyacuiñajjiya epeeji pojjeama.

E'e, Jodio cuana quea quehua jjashahuabaquinaje jama ba'a: Cuiishasha biso nei jehuissejjajeañajo ecuana Eyacuiñajjiya epeeji quea pame nee poani poso ecuaa anaje, Jodio cuana. ¹² Jamajjeya yahuaajo Jesosa Eyacuiñajjiya huoojea'yo ojjaña jaahuanajji miqiuanaajaya ba jjima poa Jodio pojjeamaja jjejojo. Miqiuanaaya Eyacuiñajji ba po jjima jjejojo Eyacuiñajji ba epo cuana nijje jjapeequi ajja poa. E'e, miqiuanaajaya Eyacuiñajji bihuia jjima Jodio cuana nijje. Yahuaajo Eyacuiñajjiya huohui ca poa Jodio cuana jama ba'a: —Eyaya huoojeaje ojjaña jaahuanajji miqiuana huasijje —poanaje.

Maya miqiuanaajaya ba jjima poa Jodio pojjeamaja jjejojo. Jamajjeya miqiuanaaya jjashahuabaquinaje jama ba'a: —E'e de, ecuana jaahuanajji quea pame nee chama'. ¿Aya acuaa ecuana jaahuana caje'yo? —poanaje.

E'e de, miqiuanaajaya Eyacuiñajji ba jjima poanaje. Jamajjeya ¿aya miqiuanaaya jaahuana canaje? Quea camaja eba'ejji mee nei jiquio meshijo. ¹³ Jjeya ca ca miqiuanaaya Eyacuiñajjiya epeeji cuana poani Jesosa Quito nijje jjapeequianijo. E'e, yahuaajo miqiuanaaya Eyacuiñajji bihuia po jjima poanaje. Jjeya ca ca Eyacuiñajjiya miqiuana Jodio cuana jayojja jama amee canaje. E'e, jjeya miqiuanaaya Eyacuiñajji bihuiajji. Jesosa Quito miqiuanaajaya mimishi cuijea'yojji mano'yonaje, ojaya ena' cuayaqui'yonaje. Jamajjeya Eyacuiñajjiya miqiuanaaya oja bacua cuana po mee ca'yonaje.

Jodio cuana nijje Jodio pojjeama cuana ojee jjapeequije Eyacuiñajji nijje

¹⁴ E'e, Jesosa Quitohua ecuana ojaya epeeji po mee canajejo, beca Jodio cuana Jodio pojjeamajo huohui cani jama ba'a: —E'e de, Jodio pojjeama cuana Eyacuiñajji bihuia cani ecuaa jayojjaya Jesosaja epeeji poaniya jjejojo —poani.

E'e, Jodio cuana Jodio pojjeama cuana nijje Jesosaja epeeji poani jjejojo huapa pojjeama poani. Jjeya Jesosaja epeeji poani jjejojo Jodio cuana jajjashahuabaquijji jayojja jama Jodio pojjeama cuana jjashahuabaquiani. Epeeji nei nei poanaje. E'e de, jamaya poanaje Jesosa Quito ojjaña mimishi cuijea'yojji acui ecueata'apeejo mano'yonajejo. ¹⁵ Ojjaña mimishi cuijea'yojji poani jjejojo Jesosa ojaya epeeji cuana nijje miminaje jama ba'a: —¡Jodio etiqiuanaaja esohui jayojja jama a'a ajji ca ecuea epeeji epojji! Chojja, enijje jjapeequianijo Jodio cuana, Jodio pojjeama cuana pea'ai ecuea epeeji cuana poanaje. Ojjaña cuana huapa pojjeama cuana poanaje. Jamajjeya Jodio cuana Jodio pojjeama cuana nijje ojee jjapeequi meeje'yo quea bei —acanaje Jesosa Quitohua.

¹⁶ Jesosaa Jodio cuana, Jodio pojjeama cuana pea'ai ojaya epeeji cuana po mee ca'yonaje; oya cuana Eyacuiñajjiya epeeji cuana poanaje. E'e, oya cuana Eyacuiñajjiya bacua cuana poanijo, ojee nequi mee caje huapa pojjeama jayojja jama, quea bei. Jamaya amee canaje Jesosaa acui ecueata'apeejo mano'yo majje. ¹⁷ Cuanaya Jesosa Quito poeyanaje miqiuana que, ma Jodio pojjeama huasijje jama huohuiya ba'a: —E'e de, jjeya miqiuanaaya Eyacuiñajjiya epeeji po meeña. Yahuaajo miqiuanaajaya Eyacuiñajji ba jjima Jodio pojjeamaja jjejojo. Jjeya ca ca ojaya epeeji quea bei poani miqiuanaaya —Jesosa poanaje.

Jesosaa ecuana huasijje, ma Jodio cuana huasijje poeyanajaya Eyacuiñajjiya esohui bajji yasijje. Ma ecua miqiuanaaya huohui canaje jayojjaya jama ecuaaya huohui canaje pea'ai. ¹⁸ Jamajjeya ecuana, Jodio bajjani cuana Eyacuiñajji nijje mimiani; miqiuanaaya Jodio pojjeama cuana pea'ai Eyacuiñajji nijje mimije'yo, esejaya Chii ai nijje. E'e, Edojjoshahua

Pame oe nei yani ojjaña Jesosaja epeeji cuana Eyacuiñajji niije mimi meesahua cani mete'ama.

¹⁹ Jamajoya jjeya Eyacuiñajjiya Jodio pojjeama cuana jama acani ba'a: —Yahuajo miquianaya ecuea epeeji pojjeamajo eyaya miquianaya jaahuana jjima poa. Jjeya ca ca miquianaya ecuea epeeji poani. Ecuea huapa pojjeama poani ecuea pea epeeji cuana nijjeya —acanae Eyacuiñajjiya. ²⁰ E'e, Jesosaja huoojea'yo cuanaja esohui shajja'ajjanaje miqianaaya. Cuanaya yahuajo nei Jodio esohui huohuijji cuaa esohui e'e nei huohui canaje. Maya jjeya miquianaaya shajja'ajjanaje. Jamajjeya miquianaya Jesosaja epeeji poanaje pea'ai. Jamaya po mee canaje Jesosaa ba'a: Ojaya epeeji cuana equi jayojja jama nequi. Jesosa Quito ca ca quea ca'a nee, quea pame nee nee poani, equi yamajjana quea ca'a jayojja oya. E'e, jiquio ecua eyamajjanajo acui ejeasehuijaajji huana majje acui equetuaejajji huusajo bequibobo ba'ehuana cani jayojja jama Jesosaa ojaya esohui huohuijji cuana quea pame nequi mee cani. Majoya esohui huohuijjiya ojjaña Jesosaja epeeji cuana quea pame ba'e meesahua cani. Jesosaja huoojea'yo esohui huohuijji cuana, Jodioja esohui huohuijji cuana pea'ai ma acui eba'ehuanasohuaijji jayojja jama poani. ²¹ Jjeya miquianaya Jesosaja epeeji po majje acui ejeasehuijji jaajji biajje nequi jayojja jama poani. Jamajjeya jiquio ecua equi yamajjana quea ca'a nequijo equi quea ca'a nequia mee cani jayojja jama Jesosaa quea ca'a poaniya ojaya epeeji cuana ojee quea ca'a onijje jjapeequi mee cani. Equi quea ca'a jayojja po mee cani. ²² E'e, jjeya miquianaya, Jodio pojjeama Jesosa Quitoja epeeji poanijo Edojjoshahua Pame ojjañajo nequi. Jamajjeya ojaya epeeji Jodio bajjani cuana niije ojee nequi, equi quea ca'a jayojja poani.

3

Pabohua esohui huohui majamaja canaje Jodio pojjeama cuanaja ebajji

¹ Eya Pabo, Jesosa Quitoja esohui huohuijji. Eyaya ojaya esohui huohuinaje miquiana huasijje, Jodio pojjeama bajjani yasijje ojaya epeeji nei epo meeji. Jesosaja esohui huohuiñajo pea cuaa eya iña majje jeanobiajea ca'yonaje eya esohui ehuohui poaje jjejojo. ² Jamatii. Pea cuaa miqiana huasijje huohuiqui canaje ejo jama ba'a: —Eyacuiñajjiya Pabo huoojea canaje ojaya esohui Jesosajo huohuiya Jodio pojjeama cuana huasijje —acanae.

³ Yahuajo miquianajaya ba jjima Eyacuiñajjiya ejjashahuabaquijji jama ba'a: —Jesosa Quitohua ojjaña ojaya epeeji cuana, Jodio cuana, Jodio pojjeama cuana pea'ai ba'e tiiti mee caje'yo onijje eyajo.

Maya Eyacuiñajjiya eya ojaya epeejiyo ba mee canaje. Jamaya ecuea esohui etehue'yo miqiana huasijje yahuajo huohuia poa. ⁴ E'e, maya miqianaaya banaje. Jamajjeya jama jjashahuabaquime poanaje ba'a: —E'e jojo nei Eyacuiñajjiya Pabo ba mee canaje ojaya ejjashahuabaquijji jama ba'a: Jesosa Quitohua ojjaña ojaya epeeji cuana, Jodio cuana, Jodio pojjeama cuana pea'ai ba'e tiiti mee caje'yo onijje eyajo —jamaya miquianajaya eba poanaje.

⁵ Yahuajo nei ca ca Eyacuiñajjiya pea cuana huasijje huohui jjima ojaya ejjashahuabaquijji Jesosa Quitojo, ma Jodio pojjeama cuana ojaya epeeji po mee majje o jaahuanajji poaje'yo pea'ai. Jjeya ca ca Eyacuiñajjiya Edojjoshahua Pame huoojea canaje ojaya epeeji cuana huasijje. Ojaya epeeji beca cuana huoojea canaje ojaya ejjashahuabaquijji jayojja jama huohuiya. Edojjoshahua Pameya ma esohui huohuijji cuana ba mee canaje Eyacuiñajjiya ejjashahuabaquijji Jodio pojjeamajo pea'ai. ⁶ Eyacuiñajjiya jjashahuabaquinaje Jodio pojjeama cuanajo jama ba'a: —Jodio pojjeama cuana ecuea epeeji po majje ecuea huapa pojjeama cuana poaje. Oya cuana ba'e tiiti meeje'yo eyajo Jesosa niije. E'e nei, eyaya huohuinaje ecuea epeeji cuana Jodio bajjani cuana huasijje jayojja jamaya eyaya aje'yo ecuea epeeji Jodio pojjeama cuana huasijje pea'ai. Jamaya eyaya aje, oya cuana Jesosaja epeeji poanijo. E'e, Jodio pojjeama cuaa shajja'ajja canaje ecuea esohui Jesosa Quitojo —Eyacuiñajji poanaje.

⁷ E'e jojo nei Eyacuiñajjiya eya huoojea canaje ojaya esohui quea pame nee Jesosajo huohuiya. Eya ojaya quea jea poanaje, ohuaya eya ojaya epeeji po mee ca'yonaje, eya ojaya esohui huohuijji po mee canaje pea'ai. ⁸ Jamajjeya Jesosaja pea epeeji cuana quea pame nee nee; eya ca ca quea pame pishana yahuajo Jesosaja epeeji cuana cuia mee'yojji poa jjejojo. Jamatii Jesosa niije jjapeequiyajo, Eyacuiñajjiya eya huoojea canaje ojaya esohui huohuiya. E'e de, eya ojaya esohui huohuijji poanaje, esohui quea pame nee Jesosa Quitojo ehuohuijji Jodio pojjeama cuana huasijje. Jamajjeya oya cuana ba meeje ache pame nee nee Eyacuiñajjiya ejjashahuabaquijji onajo. E'e, jjeya oya cuana ba'e tiiti mee caje'yo eyajo Jesosaja epeeji poani jojoja. ⁹ Eyacuiñajjiya eya huoojea canaje ojjaña ojaya ejjashahuabaquijji ba meesahua, ma yahuajo ojjañaja ba jjima poa. Ecuea esohui shajja'ajja majje ojjaña ba caje jama ba'a: Ojjaña Jesosaja epeeji ojee ba'e tiiti mee caje'yo

eyajo onijje e'e jojo nei jjapeequianijo, Jodio cuana, Jodio pojjeama cuana pea'ai. E'e, Eyacuiñajji quea ca'a nee nee. Oja pana'yo ojjaña, de. Yahuajo nei oya jashahuabaquia poa ojjaña jaahuanajji. Jamatii ecuanajaya etiuiquiana maya ejjashahuabaquiji ba mee jjiima poa Eyacuiñajji. ¹⁰ E'e, Eyacuiñajjiya eya huoojea canaje ojala ejjashahuabaquiji huohuiya. Jamajoya ojjaña esohuidojojji mese cuaa, ojjaña pea cuana eyajo nequiya cahuhui cahua jama ba'a: —¡Bacue oe! Eyacuiñajji jashahuabaquiani quea pame nee, quea ja'a nee nee. E'e, ohuaya ojjaña ojala epeeji cuana onijje nequi tiitii mee cani eyajo —ojjanaa ca'a cahua.

¹¹ Jamaya Eyacuiñajji jashahuabaquia poa yahuajo nei nei, jiquio meshi pana jjiimahujajo. Ojala ejjashahuabaquiji quea ja'a nee jayojja jama poanaje Jesosa Quito, esejaya Emeshi Mese nei. ¹² Jamajjeya jjeaya eseya mimije'yo Eyacuiñajji nijje mete'ama Jesosa Quitoja epeeji po majje. ¹³ Jamajjeya eyaya miqianaya huohuiaña jama ba'a: —Miqiana huasijje Jesosaja esohui huohuiaña, pea cuaa eya jeanobiajea canaje eya miqiana huasijje esohui ehuhui poaje jjejojo. Jamatii ja'a quea yeno pojji! Quea camaja ejeanobia ejaajji, de. Jamatii ecuea esohuijo miqianaya Jesosaja epeeji poanaje.

Jesosa Quitohua eseya quea jea nee nee acani

¹⁴ Jamajjeya miqianaya, Jodio pojjeama Jesosaja huapa pojjeama poanijo, eya Eyacuiñajji nijje mimiani miqianajo. E'e, Eyacuiñajji esejaya Chui ai quea pame nee nijje eya mimiani jama ba'a: —Eyacuiñajji, miya quea pame nee nee —eya poani.

¹⁵ E'e, Eyacuiñajjiya pana ca poa ojjaña. Jesosaja epeeji jjeaya eyajo nequi, ojjaña ojala epeeji jiquiojo nequi pea'ai Eyacuiñajjiya bacua cuana poani. Etiuiquiana ojala epeeji cuana pea'ai Eyacuiñajjiya bacua cuana poa. ¹⁶ Jamajjeya eya onijje jama mimiani miqianajo ba'a: —Eyacuiñajji, miya quea pame nee yani tii tii quea ca'a nee nee. Miyaya Edojoshahua Pame huoojeanaje miquea epeeji cuana Epesojo ba'e yasijje quea ca'a po meeya. ¡Edojoshahua Pameya miquea epeeji cuana caba'e meesahua cahua quea ja'a nee miquea esohui jayojja jama! ¹⁷ E'e Eyacuiñajji, miquea epeeji cuaa huohui cani jama ba'a: “Jesosa nijje ecua jjapee tiitiiquiani”. Jamajjeya jaya cuana Jesosa Quitoja ejjashahuabaquiyojji jayojja jama jashahuabaqui meesahuacue quea ja'a nee! ¡Jamaya acue Eyacuiñajji, miya quea ca'a nee poanijo! E'e, miquea ejjashahuabaquiji jama ba'a: “Ecuea epeeji cuana quea jea nee poani. Eyaya oya cuana quea ja'a nee ba'e meesahuaje ecuea ejjashahuabaquiji quea ja'a nee jayojja jama”. E'e Eyacuiñajji, quea jea nee nee miquea epeeji cuana. ¡Maya miyaya oya cuana ba meesahuacue! Jamajjeya oya cuana mijo jama poani ba'a: “Eyacuiñajjiya ecua quea jea nee nee poani. Ecua jaahuana cani quea pame nee nee” oya cuana poani. ¹⁸ E'e Eyacuiñajji, jamajjeya miquea epeeji cuana Epesojo ba'e, ojjaña miquea pea epeeji cuana pea'ai ba meesahuacue miquea ejjashahuabaquiji quea pame nee nee onajo poani! Jamaya miyaya ojjaña quea jea nee nee aña. ¹⁹ E'e, oya cuana Jesosa Quitoja quea jea nee nee poanaje. Ojala epeeji cuana po meesahua ca'yonaje. ¡Jamaya oya cuana ba meesahuacue, Eyacuiñajji! Quea jea nee nee miquea ojjaña. Ecuanaya ba meeme ajja. Jamatii jashahuabaqui meeme ajja. E'e Eyacuiñajji, ¡miquea epeeji cuana ba meesahuacue miquea ejjashahuabaquiji quea ja'a nee onajo pea'ai! Quea huiso nee, de. Jamajjeya jaya ecua miyaya huohuiaña jamaya acaje'yo cuaa quea pame nee. Onajaya ejjashahuabaquiji miquea jayojja jama poaje'yo.

²⁰ —E'e Eyacuiñajji, ecuaaya miya bihuiaña. Miya quea ca'a nee nee oe nei poani quea pame nee nee. Jamajjeya miquea ejjashahuabaquiji quea ja'a nee nee ecuanajo aña, miyaya. E'e, quea pame nee nee ecua jaahuanaña, miyaya. Quea pame nee nee miyaya aña, Eyacuiñajji. E'e, ecua jjapeequi meesahuaña minijje miya quea ca'a nee nee poanijo. Jamaya apoa —jamaya eya mimiani Eyacuiñajji nijje miqianajo.

²¹ Jamajjeya jeseaya ojjaña Jesosaja epeeji cuaa Eyacuiñajji ejjabihuya tiitiiquiyoy! Oya quea pame nee nee.

4

¡Ojee ejjachacoqui ojjaña quea bihui ba'yaniya!

¹ E'e, eyaya, Pabohua Emeshi Mese nejja esohui huohuiaña, pea cuaa eya jeanobiajea canaje eya esohui ehuhui poaje jjejojo. Jamajjeya jecuea esohui shajja'ajjacue! Jjeaya miqianajaya eba Eyacuiñajjiya ejjashahuabaquiji miqianajo; ohuaya miqianaya babaca canaje onijje quea ja'a nee nee ejjapeequiji. Jamajjeya jamaya ba'ecue ojala epeeji nei! ² ¡Jesosaja epeeji cuana quea bei pocue! ¡A'a quea mase pojji pea cuana nijje! ¡A'a tecueacuajjiji! Minijje quea mimishi poajo, jamatii oya cuana quea jea nee acue! ³ E'e, Edojoshahua Pameya Jesosaja epeeji cuana ojee jjapeequi meesahua cani quea bei. Jamajjeya ¡miqianaaya ojjaña jamaya atitiihue pea'ai! ⁴ ¡Bacue! Ojala eseya Jesosaja epeeji cuana Jesosaja eyami jayojja jama poani, oe eyami jayojja poani. ¡Bacue! Edojoshahua

Pame oe nei esejo yani, ojjaña Jesosaja epeeji cuanajo. Eyacuiñajjiya eseya babaca cajje ojaya oe nei ejjashahuabaquijji ojjañaño jjashahuabaqui mee canaje jama ba'a: —Ecuea epeeji cuana ba'e tiitii meeje'yo Jesosa nijje eyajo —poanaje.

⁵ Eseyaya Emeshi Mese nei oe nei yani. Jesosaja esohui e'e nei nei oe nei yani, pea chama'. Onaaya eseya besa mee canaje enajo ojjañaña ebajji eseya Jesosa Quito oe nei nijje jjapeequiani. ⁶ Oe Eyacuiñajji yani tii; pea chama'. Oya oe nei ojjañaña Chii ai. Oya ca ca oe ojjaña huojeajji. Ojjaña amesahua cani de, ojjaña nijje nequi pea'ai. Jamajjeya ¡Jesosaja epeeji cuana nijjeya oe quea bei nee jjapeequicue miqúanaya!

⁷ E'e. Jamajjeya Eyacuiñajjiya ojjaña Jesosaja epeeji cuana chaco meesahua cani onijje. Oe epeeji chaco meesahua cani iye huiso; pea chaco meesahua cani quea huiso, esohui huohuiji pojja'a, pea echacoñijjo pojja'a. ⁸ Jamajjeya Eyacuiñajjiya yahuajo nei jama tehueme aca poa Jesosajo ba'a:

“Eyahuasijje sohuaqui'yo majje ohuaya quea huiso dejja cuana onijje jjapeequi meesahua caje'yo. Ohuaya ojaya epeeji cuana onijje chaco meesahua caje pea'ai”.

Jamaya tehue mee ca poa yahuajo nei nei Jesosa Quitojo.

⁹ ¿Yajjajje acuae yahuajo nei tehue ca poa? Jama ba'a: “Eyahuasijje sohuaqui'yonaje”. Jama poanijo ba'a: Ebionei Jesosa eyajo ani meshi yasijje poeyanaje. ¹⁰ Meshi yasijje poe majje eyahuasijje poqui o'oyanaje. Jomajo oya quea ca'a nee nee nequi tiitiije'yo, ojjaña huojea'yojji epojji tii tii, Emeshi Mese nei epo'yojji. ¹¹ Jesosaa ojaya epeeji cuana onijje chaco meesahua cani jama ba'a: Beca cuana ohuaya huojea canaje ojaya esohui huohuiya. Beca cuana huohui meesahua cani ma ohua quijje acaje'yo. Pea cuana huohui meesahua cani ojaya esohui quea ja'a nee nee. Pea cuana ca ojaya epeeji jaahuanajji po mee cani. Pea ca esohui huohuiji po meesahua cani ojaya epeeji cuana quea huiso ojaya esohui eba meesahuajji. ¹² Jamaya Jesosaa amesahua cani ojjaña ojaya echacoñijji quea pame nee epojji. Jamajjeya ojjaña ojaya epeeji cuana quea ja'a nee nee eba'e poquijji.

¹³ Jamajjeya eseya Eyacuiñajjiya Bacua Jesosaja epeeji cuana ojee jjapeequije ojaya esohui jayojja jama. Ojjaña eseyaya oya ba neineije'yo pea'ai. Jamaya eseya ojaya epeeji cuana quea ja'a nee poaje. O jayojja jjashahuabaquime poaje, epeeji etii jayojja poaje. ¹⁴ Jjeya nei jjapeequiani jayojja jama pojjeama eseya poaje. E'e, ¡iquio ecua beniya enashajo dojo cani pea mijijje jayojja jama esohui huohuiji nisho cuaa joya jjeya nei Jesosa nijje jjapeequiani dasia majje poquiquehua mee cani. Oya cuana jjashahuaba majamaquiani ese dasiajji. ¹⁵ Eseyaya ca ca pea cuana quea jea poanijo esohui e'e jojo nei huohuaña Jesosa, eseyaya Emeshi Mese nei jayojja jjashahuabaquime epojji. ¹⁶ ¡Bacue! Dejaja eyami: eme', equise, ojjaña ojaya ejjashahuabaquijji jayojja jama ojee quea pame poanijo quea ja'a nee nequi dejja. ¡iquio ecua dejaja eyami jayojja jama Jesosaja epeeji cuaa ojee chaco cani quea pame nee, Jesosaja ejjashahuabaquijji jama. E'e, ohuaya ojjaña ojaya epeeji huojeajji poaniya ojee chaco mee cani onijje. ¡Jamajjeya ojjaña quea jea nee acue cuana! ¡Onaya jjapeequi meesahuacue!

Pea ba'e'yome epojji Jesosa Quito nijje

¹⁷ Eya, Pabo Jesosaa huojea ca'yonaje miqúanaya huasijje esohui huohuiya. Jamajjeya ¡ecuea esohui shajja'ajjacue! ¡Jesosaja epeeji pojjeama cuana quea mimishi jama a'a pojji! Ojaya ejjashahuabaquijji cuana cajaa. ¹⁸ E'e, oya cuana quea mimishi jjashahuabaquiani. Pea eba'ejjijo jjabahuejjaqui ajja. ¡Japeequi ajja Jesosa nijje. Shajjama' de, mimishi quea boti nee ojaya. ¹⁹ Mimishi cuanajo bicho'ama. Quea tai nee nee atitii cani. Quea mimishi tii tii po sa neinei poani, de. ²⁰ Miqúanaya ca ca Jesosaja esohui shajja'ajjanaje. Jamajjeya ¡ba'ecue quea pame nee! ²¹ ¿A'a miqúanaya Jesosaja esohui shajja'ajjanaje? E'e. ¿A'a jjabahuejjaquinaje? E'e. Ojaya esohui ca ca oe e'e jojo nei poani. ²² Jama poanaje ba'a:

—¡Ma mi ba'ya poa quea tai Jesosa Quito ba jjimahuajo pajea neinei'yocue! ¡Cajaa acue! Quea mimishi jjashahuaba tiitiiqui aninajejo beshahua nei miya poquinaje cuaqui yasijje. ²³ ¡Eyacuiñajjiya miqúanaya quea pame nee cajjashahuabaqui mee cahua Jesosaja ejjashahuabaquijji! ²⁴ Eyacuiñajjiya miqúanaya ba'e mee caje o jayojja. Jamaya e'e jojo nei quea pame nee eba'ejji. Jamajjeya ¡ba'ecue Eyacuiñajjiya ejjashahuabaquijji jayojja jama!

²⁵ Eseyaya Jesosa nijje jjapeequi majje huapa pojjeama cuana poani. Jamajjeya ¡a'a onaya siajje ajji! ¡Ojjaña Jesosaja epeeji cuana nijje e'e nei mimicue! ²⁶ ¡Miqúanaya onaja mimishijo a'a quea quene po tiitiijji! ¡jyeyahua nei oe quea bei nee po o'yocue! ²⁷ Quea quene po tiitiianijo, Edosisiquiaa miqúanaya dasia ca chana'. Quea mimishi, quea mimijjequijea po mee ca o'oya chana', de. ²⁸ Jamajjeya miya siipojji ¡sii popajea'yocue! ¡Quea pame oe chaco neineicue! Jamaya eba'ejji quea pame poaje miquea quea huiso, aema' ba'e meesahuajji pea'ai.

²⁹ ¡A'a quea mimishi mimijji pea'ai! ¡Esohui quea pame nee mimi tiitiicue pea cuana jjapeequi meesahuajji! Jamajjeya pea cuana miquea esohui shajja'ajja majje quea pame poaje. ³⁰ Cuanaya Jesosaja epeeji quea mimishi po o'oyajo, Edojjoshahua Pame quea yeno poani. ¡A'a oya quea yeno po meeji! E'e, Eyacuiñajjiya ese quea boejea po mee'yo majje Edojjoshahua Pame huoojea canaje ese nijje nequiya. Jamajjeya Jesosa Quito poe o'oyajo Edojjoshahua Pameya huohui caje esejo jama ba'a: —Oya cuana Jesosaja epeeji nei — poaje.

³¹ Jamajjeya ¡a'a mimijajjiji! ¡A'a quea quene pojji! ¡A'a quea tecue pojji! ¡A'a jjanibeaquijji! ¡A'a jjamimicuijaja nobiajeaquijji pea'ai! Chojja, ¡ojjaña mimishi cuana pajea neinei'yocue! ³² ¡Pea cuana oe ba'e sahuacue quea pame nee! ¡Quea jea nee acue! Pea cuaa miya niñeba canijo, napa canijo pea'ai ¡onijje quea be pocue! E'e, Jesosa Quito miquea mimishijo mano'yajo, Eyacuiñajjiya miquea mimishi cuana cuijea ca'yonaaje, quea quene po titii ajja mimishijo. ¡Jamaya acue miqiuanaaya, ojjaña!

5

Jesosaja epeeji, ¡ojaya esohui jayojja jama acue!

¹ Eyacuiñajjiya miqiuanaaya quea jea nee acani, oja bacua cuana. Jamajjeya ¡o jayojja jama pocue miqiuana ojava epeeji cuana poanijo! ² Jesosa Quito ese cuanaño mano'yonaaje oya quea ese jea nee poanijo. Eyacuiñajji quea bihui nee poanaje oja Bacua Eija esejo mano'yajo. E'e, yahuajo nei Jodio cuaa huichacha quea shiye nee nee ba'esohuaqui mee ca poa Eyacuiñajji bihuiajji. Ma jayojjaya Jesosa mano'yonaaje esejaya mimishijo. Jamajjeya ¡pea cuana quea jea nee acue miqiuanaaya, Jesosa Quitohua jayojja jama acue! ³ Jamajjeya miqiuanaaya ojava epeeji poanijo ¡Jesosa jama pocue! ¡A'a quea mimishi ¡jjashahuabaquijji! ¡Mimishijo oe a'a mimijji pea'ai! ¡Quea mimishi a'a pojji! E'e, ¡a'a shacuima' nequi, ahuema'ani pea'ai, onajaya yahue, ehuanase pea'ai a'a siijji! ¡A'a quea deja tai pojji! ¡A'a quea nishehui pojji pea'ai! ⁴ ¡Esohui quea tai a'a mimijji pea'ai! ¡Shajjama' jayojja a'a mimijji! ¡Quea mimishi, quea mimijjequijjea a'a mimijji! Jamaya quea tai. ¡Quea bihui nee ca ca Eyacuiñajji nijje mimicue! ⁵ ¡Bacue oe! Pea cojojji, deja quea tai pea'ai, quea aquiana nahuejo epana'yo bihuiajji jayojja poani pea'ai eyahuasijje edobiquijji pojjeama. Jesosa Quito nijje, Eyacuiñajji nijje pea'ai eba'ejji pojjeama eyajo, Jesosa ojjaña huoojeajji poanijo. Chama' deja mimishija eba'ejji yajji eyajo. ⁶ Siajjepojji cuaa miya ba'e mee ca chana' quea mimishi. ¡Oya cuana a'a shajja'ajjajji! Mimishi acanijo, shajjama' poanijo pea'ai Eyacuiñajjiya quea nee tii tii po mee caje'yo e'e jojo nei. ⁷ Jamajjeya ¡a'a mimishi cuana nijje jjapeequijji!

⁸ Yahuajo miqiuanaaya quea mimishi ba'ya poa pea'ai. ¡Jjeya ca ca miya Jesosaja epeeji cuana poanijo ejiojji quea ja'ajje onijje poquiani. Jamajjeya ¡Jesosaja esohui jayojja jama quea ja'a nee acue! ⁹ E'e, Jesosa nijje jjapeequianijo ojjaña quea pame nee eseyaya aña. ¡Jjashahuabaquiani quea ja'a nee pea'ai. Esohui e'e nei jayojja jama ba'yani pea'ai. ¹⁰ Quea pame nee eseya añaajo, Eyacuiñajji quea bihui nee poani. Jamajjeya ¡jjashahuabaquicue Eyacuiñajji quea bihui nee epo meeji! ¹¹ Jamajjeya shajjama' cuana quea mimishi poanijo, ¡onijje a'a quea mimishi pojji! ¡Oya cuana tecueacue jama ba'a: —Jamaya quea tai. ¡A'a quea mimishi pojji! —acue!

¹² Ohuaya quehuajje mimishi quea tai nee nee acani. ¡A'a mimishi cuanaño mimimimijji! ¡Cajaa acue! ¹³ Jesosaa shajjama' cuana ¡jabahuejjaqui meesahua cani; jama poani ba'a: —Coma ca quea tai; ja'a jamaya pojji! ¡Quea pame nee acue!

¹⁴ ¡Jiquio ecua cuaquijjiya mecajje ojjaña jeaja'a cani jayojja jama Jesosa Quitohua shajjama' cuana mimishi pajea mee'yo majje quea ja'a ba'e meesahua cani. Jamajjeya yahuajo nei nei jama sohuicuayame poa cuana ba'a:

“Shajjama' cuana, ¡jjashajja'ajjaquicue! ¡Eshahua nijje popajea'yocue! Quitohua miya quea ja'a nee ba'e meesahua caje'yo”.

Jamaya aca poa yahuajo nei nei.

¹⁵ Jamajjeya ¡jjashahuaba neineiquicue quea ja'a nee eba'ejji! ¡Shajjama' cuana jayojja jama a'a ba'ejji! ¡Jesosaja esohui jayojja jama ba'ecue! ¹⁶ E'e, ¡jjeya janobajjima nei chaco chaco tiitiicue quea ja'a nee Jesosa Quitojo! ¡Jjeya aje oe quea camaja, quea huiso cuana quea mimishi poani. ¹⁷ Jamajjeya ¡a'a shajjama' pojji! Eyacuiñajjiya miya sa cani ojava echacojji epojji. Jamajjeya oya huohui'ajjacue jama ba'a: —Eyacuiñajji, ¿a'ya cuae eya miyaya chaco meeje so'o?

¹⁸ ¡A'a jja oe huoojji! Chojja, ishi'ishianijo miqiuanaaya quea tai nee poaje'yo. ¡Edojjoshahua Pameja esohui miqiuana nijje jama acue! ¹⁹ ¡Jamaya esohui quea pame nee Eyacuiñajji mimicue! Jama acue ba'a: —Cua'a. ¡Eyacuiñajji nijje esohuicuaya!

E'e, Edojjoshahua Pameya sohuicuaya mee caniya ¡quea bihui nee Eyacuiñajji bihuiacue sohuicuayanijo! ²⁰ Cuanaya Jesosa Quito esejaya Emeshi Mese nei poanijo, ¡Eyacuiñajji, esejaya Chii ai bihuiacue jama ba'a: —E'e Eyacuiñajji, jamaya. Miyaya quea pame nee atitiiaña —acue!

Ehuohuijji yahue cuana huasijje, ehuanase cuana huasijje pea'ai

²¹ ¡Jiquio pea esohui bacue! Jama ba'a: Jesosa Quitoja esohui shajja'ajajji poanijo ¡ba'ecue quea bei nee miquea huapa pojjeama cuana nijje!

²² Ehuuanase cuana, ¡shajja'ajjacue mo! Miquiana Jesosaja epeeji poanijo ¡miquea yahue shajja'ajjacue oe! ²³ E'e, Jesosa Quito Emeshi Mese nei oe nei poanijo, ojaya esohui shajja'ajja cani ojaya epeeji cuaa. Jamaya miquea yahue mi huoojeajji poani pea'ai. ¡Oya shajja'ajjacue! Cuanaya Jesosaa ojaya epeeji cuana jaahuana cani quea pame nee. Jesosaa jayojjaya yahue cuaa ehuanase cajaanuana cahua pea'ai. ²⁴ Jesosa Quitoja epeeji e'e jojo nei cuaa ojaya esohui jayojja jama atitii cani. Jamaya ehuanase cuaa, ¡miquea yahue shajja'ajja tiitiicue!

²⁵ Yahue cuana, ¡shajja'ajjacue mo pea'ai! Jesosa Quito ojaya epeeji cuana quea jea nee poanijo mano'yonaje onaja mimishi cuijea'yojji. Jamaya yahue cuaa, ¡miquea ehuanase quea jea nee acue! ¡Quea ja'a nee jaahuanacue! ²⁶ E'e, Jesosa Quito ojaya epeeji cuana mimishi cuijea'yo majje Eyacuiñajji nijje miminaje jama ba'a: —Jiquio cuaa ecuea esohui shajja'ajja canaje. Peaa oya cuana besa mee canaje mijo pea'ai —poanaje.

²⁷ Jamaya poanaje Jesosa, ojaya epeeji e'e jojo nei cuana quea pame nee nee epo meejji ba'a: mimishi'ama, quea tai pojjeama, quea ja'a nee nee epo meejji. ²⁸ Jamajoya yahue cuaa, ¡miquea ehuanase ba'e meesahuacue! E'e, miya quea pame ba'e sa poanijo ¡miquea ehuanase ba'e meesahuacue quea pame! Ehuuanase ba'e meesahuañajo miya quea pame ba'eje pea'ai. ²⁹ E'e, dejja cuana quea nee nee nequi sa po ajja. Chojja. Bobi, daqui pea'ai sa'ajja cani quea pame eba'e'ejji. Quiajjaya Jesosaa jaahuana cani ojaya epeeji cuana. ³⁰ Jamaya oya poani eseya ojaya eyami jayojja nei nei poanijo. ³¹ Jamajjeya Eyacuiñajjija esohui yahuajo nei etehue'yo jama poa ba'a:

“Joya. Yahue ojaya ehuanase nijje ba'yanijo oya cuana oe nei poani, beca pojjeama. Jamaya oya cuana ba cani Eyacuiñajjija. Jamajjeya yahueya ojaya ehuanase oe nei cajaanuana cahua quea pame nee. Quea jea nee nee ca'a cahua; oja chii, oja enaese quea jea pishana ca'a cahua”.

Jamaya yahuajo nei Eyacuiñajjija tehue mee ca poa.

³² Eyacuiñajjija esohui quea pame nee nee yani Quitoja, ojaya epeeji cuanajo pea'ai jama ba'a: Jesosa Quito ojaya epeeji cuana nijje oe nei jayojja poani, quea huiso pojjeama, oya jayojja ¡jashahuabaquime poani pea'ai. Jamaya Eyacuiñajjija oya cuana ba cani oe nei jayojja. ³³ Oya jayojjaya yahueya, miya quea pame nee ba'e sa poanijo ¡miquea ehuanase quea jea nee nee acue! ¡Ba'e meesahuacue quea pame nee! Ehuuanaseya, ¡miquea yahue shajja'ajjacue oe!

6

Ehuohuijji esho'i cuana huasijje echii mese cuana huasijje pea'ai

¹ Esho'i cuana, miya Emeshi Mese neija, Jesosaja epeeji poanijo ¡shajja'ajjacue miquea chii, miquea enaese pea'ai! Jamaya quea pame. E'e, Eyacuiñajjija jama aca poa ba'a:

² “¡Miquea chiiya, miquea enaeseya pea'ai huohui cani jayojja jama acue! ³ Jamajjeya eyaya miquianaya ba'e meeje quea bihui nee, quea pame nee. Quea huiso shequajja ba'e meeje”.

Jamaya Eyacuiñajjija huohui ca poa.

⁴ Echii meseya, enaeseya pea'ai, ¡miquea ebacua cuana jaahuanacue quea pame nee! ¡A'a onijje quea tecue nee pojji! ¡A'a quea quene nee po meejji! ¡Oya cuana huohuicue Emeshi Mese neija, Jesosaja esohui! ¡Miquea esohui shajja'ajja meecue!

Ehuohuijji echacojji cuana huasijje echaco meejji cuana huasijje pea'ai

⁵ Echacojji cuana, ¡miquea echacomeejjija esohui jayojja jama pocue! ¡Chacocue quea pame nee ojaya! Jamajjeya Jesosa miquianajo quea bihui nee poaje. ⁶ Miya chachacoani quea pame nee miquea echaco meejjija ba canijo o quea bihui po meejji. ¡Ojaya ba ¡jimajo a'a quea huea pojji! ¡Chacocue quea pame nee Jesosa Quitoja miya ba canijo! Jesosa miquea echacomeejji poani. ⁷ E'e, ¡miquea echacomeejjijo chacocue quea bihui nee! Pea cuanaja yajjijo quea pame chachacoanijo Jesosa quea bihui nee po mee añña miyaya. ⁸ E'e, ¡jiquio esohui shajja'ajjacue! Beca cuaa chaco cani ojaya echacomeejjijo. Pea cuanaja echacomeejji chama! Quea pame nee chachacoanijo Emeshi Mese neija, Jesosaa ojjaña sosequia caje'yo quijje eyajo.

⁹ Echacomeeji cuaa, ¡sosequiacue miquea echacoji cuana ma ona chacoconaje sose-
jje! ¡A'a quea mete po meejji! ¡A'a tecuea neinejji! Echaco meejjiya Emeshi Mese nei
yani eyajo. Echacojiya Emeshi Mese nei yani eyajo pea'ai, Jesosa bajjani. Eyacuiñajji mijo
jjashahuabaquiani jayojja jama ojjaña cuanao jjashahuabaquiani pea'ai. Quea pame nee
chacoñaño, ojjaña sosequia caje'yo quijje eyajo, echacoji, echacomeeji pea'ai.

Eyacuiñajjiya eseya quea ca'a nee po mee cani

¹⁰ ¡Pea esohui shajja'ajjacue! ¡Japee neinequicue Jesosa nijje! Jamajjeya ohuaya
miquianaya ojaya epeeji quea ca'a po mee caje'yo. Oya quea ca'a nee nee poanijo
miquianaya quea ca'a po mee caje'yo pea'ai. ¹¹ Eyacuiñajji nijje mimicue pea'ai jama ba'a:
—Eyacuiñajji, ¡eya miquea ejjashahuabaquiji jayojja jama ameesahuacue quea ja'a nee!

Jamajjeya ohuaya miquianaya Edosiquiana nei, Satanasa bajjani jeabichajea mee
caje'yo, ohua dasia sa acanijo. ¹² Pea cuaa quea mase cuaa ecuaa Jesosa nijje ¡japeequi
pajea mee'yo sa acani. Oya cuana dejja pojjeama, Edosiquiana, eshahua cuana pea'ai.
Jjeya quea camaja eshahuaa epeeji cuanaa quea tai acanijo. E'e, eshahua cuaa huoojja
cani ojaya epeeji cuana, ojjaña quea mimishi poani pea'ai ecuaa dasiaa nisho, ecuaa
jeabichajea nisho pea'ai. ¹³ Jamajjeya ¡Eyacuiñajji nijje mimicue jama ba'a: —Eyacuiñajji,
¡eya miquea ejjashahuabaquiji cuana jayojja jama ameesahuacue! —jamaya acue!

Jamajjeya eshahuaa jeabichajea sa acanijo, miquianaya quea ca'a poaje; eshahua
jeabichajea'yo Eyacuiñajjiya miya asahua canijo. E'e, Eyacuiñajjiya miquianaya ojaya
epeeji quea ca'a po mee caje'yo. ¹⁴ ¡Quea ja'a nee jjashahuabaquicue! ¡Esohui e'e nei ba
neineicue! Jiquio ecua Shomano sohuinanohua ejjacomayijiquijji yii cani ejaquecuaqui-
jji jama jayojja ¡esohui e'e nei ba neineicue quea ja'a nee epoiji! Cuanaya sohuinanohua
baa daqui quea moo ese'ojje huosho cani onaa equecua'yo poani jajejo jama jayojja ¡quea
ja'a nee, mimishi'ama ba'ecue eshahuaa napa cajje miya ejjadasia meequijji pojjeama!
¹⁵ Jiquio ecua ejiojji shejee, sapato, sohuinanohua huosho cani acuishajo mete'ama epoiji
jayojja jama ¡Eyacuiñajjiya esohui ba neineicue mete'ama esohui huohuijji! ¹⁶ ¡Eyacuiñajjiya
esohui jayojja jama atitiicue pea'ai! Jiquio ecua sohuinanohua copocopo baa emejo
huosho cani ejaquecuaquijji, iña cani ejaquecuaquijji, emejje edahua huo'ohuo'oi
nequijji jayojja jama ¡Eyacuiñajjiya esohui jayojja jama atitiicue Edosiquianaya miya
edasiajji pojjeama! ¹⁷ Cuanaya jiquio ecua sohuinanohua ejaahuojja ca'a, baajee sapa iya
cani jama onaja sapa jaja jjima yajji jayojja jama ¡esohui esapajo huanacue miquianaya
quea tai ejjashahuabaquiji meejji pojjeama eshahuaa, Jesosaja epeeji nei poanijo! Jamaya
pea'ai jiquio ecua sohuinanohua baa se beca iña cani pea jajajeabichajejji jama jayoj-
jaya ¡Eyacuiñajjiya esohui mimicue eshahua mimicuijjeanobiajajji, Edojoshahua Pameya
ameesahua canijo! ¹⁸ Jamajjeya ¡Eyacuiñajji nijje mimicue jama ba'a: —Eyacuiñajji, ¡eya
miquea epeeji quea ca'a nee mo po meecue eshahua cuana, eshahuaa epeeji cuana pea'ai
mimicuijjeanobiajajji! ¡Edojoshahua Pame huoojjae minijje emimi tiiti meesahuajji!
—jamaya oe acue!

Jamajjeya ¡jjashahuaba neinequicue quea ja'a nee! ¡A'a Jesosa nijje japeequi pajea'yojji!
¡Ojjaña Jesosaja epeeji cuanao mimi huicha'ahuicha'acue jama ba'a: —Eyacuiñajji, ¡ojjaña
Jesosaja epeeji cuana jaahuanacue! ¡Quea ja'a nee po meecue! —jamaya acue!

¹⁹ Jamajjeya Eyacuiñajji nijje mimicue ejo jama ba'a: —Eyacuiñajji, Pabo miquea esohui
huohui canijo ¡huohui meesahuacue mete'ama! Oya huohui meesahuacue, Eyacuiñajji,
jama ba'a: “Jesosaa Jodio pojjeama cuana ojaya epeeji po mee cani onijje eba'e tiiti'yojji
eyajo. Maya yahuajo onajaya ba jjima” —jamaya mimicue Eyacuiñajji nijje ejo.

²⁰ E'e, Eyacuiñajjiya eya huoojja canaje Jesosaja esohui huohuiya. Ma esohui quea pame
nee huohuañaño, dejja quea mase cuaa eya iña majje jeanobiajajje canaje. Jamajjeya ¡Ey-
acuiñajji nijje mimicue ejo esohui quea pame nee Jesosajo mete'ama ehuohui meesahuajji!

Pabo mimiani Eyacuiñajji nijje ojjaña Epesojo ba'e jaahuanajji

²¹ ¡Pea esohui bacue! Dejja bajjani Tiquico yani ecuaa nijje. Oya ecuanaja quea jea nee
nee, ecuea epeeji nei nei. Ohuaya ecuaa Jesosaja esohui huohui sahua cani. Miquiana
huasijje poqui majje ohuaya huohui caje ejo, ma eya ña jayojjaya huohui caje'yo pea'ai.

²² E'e, eyaya oya huoojja miquiana huasijje ecuanajo huohuiya. Oya shajja'ajja majje
miquianaya yeno'ama poaje ecuanajo.

²³ Eya quea huišo mimiani Eyacuiñajji nijje miquianajo jama ba'a: —Eyacuiñajji, miya
ecuanaja Chii ai. Jesosa Quito, miya ecuanaja Emeshi Mese nei. ¡Ojjaña miquea epeeji
cuana Epesojo ba'e quea bei nee po meecue! ¡Oya cuana ojjaña miquea epeeji cuana quea
jea nee po meesahuacue! ¡Oya cuana miquea esohui jayojja jama ba'e meesahuacue quea
ja'a nee pea'ai! —jamaya eya poani.

²⁴ Jamajjeya esejaya Emeshi Mese nei Jesosa Quito quea jea tii tii poanijo, ¡Eyacuiñajjiya
miquianaya caba'e meesahua cahua!

Mahiso ecuea esohui. Eyaya Pabo bajjaniya esohui tehuejeyonaje. Apoa.

PABOJA ETEHUE'YO PINIPO CUIÑAJJI YASIJJE FILIPENSES

Pabohua Shomajo ejeanobia aniya esohui tehue cani Jesosaja epeeji cuana Pinipo cuiñajji ba'e yasijje

¹ Ecuanaaya bajjani Pabo, Timoteo pea'ai. Ecuanaaya Jesosa Quitoja echacojji cuana ojaya yajji. Ecuanaaya esohui tehueña ojjaña miqiana huasijje, Eyacuiñajji epeeji cuana Pinipo cuiñajji ba'e yasijje, Eyacuiñajji esohui huohuiji cuana huasijje, o pejeje ca'ajji yasijje pea'ai tehueña ecuaaya. ² Eyacuiñajji ecuanaja Chii ai. Jesosa Quito ecuanaja Emeshi Mese nei. Ohuaya miqianaya cajaanuana cahua quea pame nee. Mimishi cuana cuijea'yo majje quea bei capo mee ca'yahua pea'ai.

Pabo Eyacuiñajji nijje mimiani Jesosa Quitoja epeeji

³ Miqianajo jjashahuabaqui'yo majje ecuanaja Eyacuiñajji bihuia tiitiaña. ⁴⁻⁵ Yahua Jesosa Quitoja esohui shajja'ajja jeahuajo miqianaaya eya esohui huohui meesahua'yonaje, jjeja nei pea'ai. Jamajjeja eya Eyacuiñajji nijje miqianajo mimi tiitianajo quea bihui nee poani. ⁶ Ecuea eba e'e jojo nei Eyacuiñajji miqianaya ojaya esohui jama ba'e meesahua coo ca'ya poa yahuajo. Jesosa Quitoja epeeji quea ca'a pishana po mee ca'yonaje. Jjeja quea ca'a nee pishana po mee ca'yani. Quijje ca ca Jesosa Quito poe o'oyajo ohuaya miqianaya quea ca'a nee nee ba'e tiiti mee caje'yo eyajo onijje. ⁷ Eya miqianajo jjashahuaba tiitiqiani miqiana quea jea nee neejojo. Jamaya quea pame. E'e de, eyaya Jesosa Quitoja esohui janobajjima nei huohuañaajo, miqianaaya eya huohui meesahanaje. E'e, deija cuanaja eya iña jjimahuaajo, jeanobiaja cajo pea'ai, miqianaaya aquiana eba'e meesahuajji huoojeanje e que. ⁸ Jesosa Quitohua miqianaya quea jea nee acani, jamaya eyaya miqianaya aña. Jamajjeja miqianaya eyaya baqui sa aña, de. Eyacuiñajji eba eya e'e jojo nei mimiani.

⁹ Eya mimiani Eyacuiñajji nijje miqianajo jama ba'a: —Eyacuiñajji, Jesosa Quitoja epeeji cuaa pea epeeji cuana quea jea pishana acani. ¡Oya cuana pea cuana quea jea nee nee amecue, miyaya! ¡Quea huiso mijo ba meesahuacue pea'ai! ¡Quea jjashahuabaqui ja'a nee po meecue pea'ai quea pame nee eba'eji, mimishi'ama! ¹⁰ Jamajjeja Quitohua poe o'oya majje oya cuana etecueajji pojjeama. ¹¹ E'e Eyacuiñajji, Jesosa Quito onijje ba'yanijo, ohuaya ojaya epeeji cuana quea pame nee ba'e meesahua cani mijo. Jesosaja epeeji cuaa quea pame nee acanijo, deija cuaa miya bihuia caje'yo. Ojjaña ba caje miya, Eyacuiñajji ca ca oe quea ca'a nee nee, quea pame nee nee pea'ai poani —jamaya eya, Pabo mimiani Eyacuiñajji nijje miqianajo, Pinipo meshijo ba'ejo.

Jesosa Quito ecue yami dojjo nequi

¹² Ecuea epeeji cuana, ¡bacue jiquio esohui! Deija cuaa eya iña majje quea huesha dojo canaje jeanobiaa. Quea camaja ejo poanaje. Jamatii, pea meshi cuana huasijje pea deija quea huiso cuana huasijje Jesosa Quitoja esohui huohui'yonaje eyaya. Jamaya quea pame nee. ¹³ E'e, eya jiquiacua ye canaje cuaa emeshi meseja ejaquecuaquijji quea huiso huasijje, pea cuana emeshi meseja equi quea quemojo ba'e yasijje. Onaaya ba canaje eya eme' jeyo'yo nequi Jesosa Quitoja esohui huohuijijojjo onaja jeyo'yo. ¹⁴ Eya jiquiojo nequianajo, beshahua nei ojjaña Jesosa Quitoja epeeji cuana onijje japee neineiiani e'e jojo nei. Jjeja ca ca onaaya janobajjima nei Eyacuiñajji esohui huohui cani mete'ama.

¹⁵ Jesosa Quitoja epeeji cuaa, oe pojji cuaa Jesosaja esohui huohui cani ejo quea quene poaniya jjejojo. Jjamimicuajea nobiajaequi sa poani pea'ai. Beca cuana ca, cho. Jesosa Quitoja mimiani quea bihui nee, quea bei pea'ai. ¹⁶⁻¹⁷ Ohuaya Jesosa Quito, eya pea'ai quea jea nee acanijo huohui cani. Onajaya eba Eyacuiñajji eya huoojea ca'yonaje Jesosa Quitoja esohui huohuiya. Janobajjima nei huohuañaajo, pea cuaa ba caje Jesosa Quitoja esohui e'e nei. Pea cuaa enijje quea bei pojjeamaa. Jesosa Quitoja esohui huohui cani quea tecue, emaimajji jayojja. Ma deija cuaya aje oe pea cuana eya pajea mee'yo sa acani, onijje japeequi mee'yo sa acani. Eya ejejo'yo nequijo quea camaja pishana. Ohuaya eya quea camaja nee nee po mee sa acani. ¹⁸ E'e de, beca deija cuaa quea tecue nee huohui cani. Pea cuaa quea bei huohui cani. ¿Apiojji shai Jesosa Quitoja huohui cani? Jamatii, Jesosa Quitoja huohui canijo, eya quea bihui nee nee.

¹⁹ E'e, miqianaya ejo mimiani Eyacuiñajji nijje; Jesosa Quitohua, Edojjoshahua Pameya pea'ai eya quea ca'a po mee cani quea pame nee. Jamajjeja quijje eya quea pame nee ba'eje'yo. Jamaya ecuea eba. Jamajjeja eya quea bihui nee po tiitiije'yo.

²⁰ Eya jashahuaba tiitiquiani Jesosa Quitojo echacojji. Jesosa Quitojo chaco sa neinei poani quea pame nee nee. Jamajjeya eya bicho'ama ecuea eba'ejjijo. E'e, jjeyahua nei, quijje pea'ai eya eshe nequi ba'e sa poani Quito nijje mete'ama nei. Eshe nequijje pojja'a; quecua caje'yo cuaa pojja'a. Jamatii. Eya quea pame, mete'ama ba'yanijo, pea cuaa Quito bihuia caje'yo. ²¹ Eya jashahuabaquiani jama ba'a: —Eya eshe nequianijo, Jesosa Quito ecue eyamijo nequi. Quijje, mano'yo majje eya onijje ba'eje'yo eyajo quea pame nee nee. Jiquiojo ca ca quea pame pishana eya ba'yani. ²² E'e de, jiquio meshijo ba'yanijo eyaya Jesosa Quitoja esohui huohuije'yo pea cuana huasijje. ¿Achejo shai ba'e sa poani eya jjeja? Jiquiojo pojja'a. Eyajo Jesosa Quito nijje pojja'a. Cua'a de. ²³ Jjeyahua nei jiquio meshijo ba'e sa neinei poani eya. ¿Achejo shai? Eyajo Jesosa Quito nijje eba'ejji ca ca oe e'e jojo nei ecuea quea pame nee nee. ²⁴ Jamatii, eya jiquio meshijo ba'e tiitiani, quea pame nee poaje miquianaya. ²⁵ E'e nei jamaya ecuea ejjashahuabaquiyojji. E'e, eya ba'eje'yo jiquio meshijo. Jamaya ecuea eba. Eya miquiana nijje nequijje Jesosa Quitoja epeeji quea ca'a nee epo meesahuajji, quea bihui nee Jesosa Quito ba meesahuajji pea'ai. Jamaya e'e jojo nei. ²⁶ Jamajjeya miquianaaya Jesosa Quito bihuiaje'yo e'e jojo nei enijje quijje e miquiana que poquiyajo.

²⁷ E'e, eya epoquijji pojjeama pojja'a miquiana baa; baquijje pojja'a mi ba'ajjaa. ¡Jamatii! Esohui quea pame nee Jesosa Quitojo miquianajaya eba. Jamajjeya ¡jamaya ba'ecue quea ja'a nee! Jamajjeya eyaya shajja'ajjaje miquianaya Jesosa Quitoja epeeji cuana ojee quea ca'a nee ba'yani. Ojee janobajjima nei huohuaña Eyacuiñajji esohui Jesosa Quitojo pea'ai. ²⁸ Deija mimishi cuaa miquianaya napa cajo, ¡a'a oe quea mete pojji! Chojja, miya ca ca mete'ama tiitii anianijo, ma deija mimishi cuaa ba caje jama ba'a: Quijje Eyacuiñajjiya eya cuana napa tiitii caje'yo cuaquijo. Oya cuana ba mee caje pea'ai miquianaya ca ca ba'e tiitii mee caje'yo eyajo, ohuaya. ²⁹ E'e, Eyacuiñajjiya miquianaya ¡japeequi meesahua cani Jesosa Quito nijje. Pea cuana, cho. Jamaya pea'ai ba'a: Jesosa Quito nijje ba'yanijo, pea cuaa miquianaya napa caje. Jamaya Eyacuiñajjiya eba. E'e, ohuaya miquianaya nahue caje peaa napa cajo. ¡Jamatii quea bihui pocue! ³⁰ ¡Jjeja miquianaya, e jayojjaya janobajjima nei eshahuaja epeeji cuana jeabichajeacue! E'e, jjeyahua nei eyaya jamaya Jesosa Quitojo huohuaña tii. Jamaya miquea eba.

2

Jesosa Quito quea bei, quea ca'a nee nee pea'ai

¹ ¿A'a Jesosa Quitohua miquianaya quea bihui nee po mee cani? Ohuaya quea jea nee nee acanijo, ¿a'a miquianaaya pea cuana quea jea nee aña pea'ai? ¿A'a Edojoshahua Pame nijje japeequiani miquianaya? ¿A'a pea deija cuana nijje miquianaya quea bei? ¿A'a pea deija ba'e meesahuaña pea'ai? ¡E'e jojo nei jamaya oe pocue! ² Jamajjeya ¡miquianaaya iña oe che quea bihui nee nee po meecue, de! Ojjaña oe ojee jashahuabaquicue Jesosa Quitoja ejjashahuabaquijji jayojjaya jama ba'a: ¡Ojee japeequicue quea bei nee! ¡Pea cuana quea jea nee acue miquianaaya! E'e, ¡ojee Jesosa Quitojo jashahuabaquicue! ³ ¡A'a mimijajji pea quea bicho po meejji! ¡A'a jamaya pojji miquianaya! Chojja, ¡Pea cuana nijje quea bei nee nee pocue! Jashahuabaquicue jama ba'a: —Eya quea pame pishana; pea cuana quea pame nee.

⁴ Miquianaya quea pame nee ba'e sa poani. Jamaya quea pame. ¡Pea cuana a'a pajea'yojji! ¡Ba'e meesahuacue quea pame nee pea'ai! ⁵ ¡Jesosa Quitoja ejjashahuabaquijji jayojja jama jashahuaba tiitiquicue! ⁶ Jama ba'a: Oya, Jesosa Quito Eyacuiñajji jayojjaya tii tii poa. Jamatii Eyacuiñajji jayojja pojjeama po'yo majje meshijo nequi yeno'ama Jesosa Quito poa. ⁷ E'e, Jesosa Quito nequi tiitii ajja poa eyajo, Eyacuiñajji jayojjaya jama pojjeama poa. Oya Eyacuiñajji yajjijo ojaya echacojji meshi yasijje poe sa poa. Jamajjeya eseya esho'i cuaya poa jama Jesosa Quito cuaya pohua, yamijji. ⁸ Oya ba'e'yonaje deija cuana jayojja. Eyacuiñajjiya oya huoojea canaje deija cuana jayojja mano'yome epojji. Jamajjeya oya deija cuana jayojja jama quecua mee'yome acanaje cuaa. E'e nei acui ecueata'apeejo Jesosa Quito mano'yonaje deija mimishi jayojja. ⁹ Jamajjeya Eyacuiñajjiya oya shequi mee ca o'yanaje. Eyahuasijje dojosohuaqui ca'yonaje. Jesosa Quito oe nei ojjaña Emeshi Mese nei po mee ca'yonaje. ¹⁰ Jamajjeya quijje ojjaña eyajo ba'eya, deija eshe cuana pea'aiya, ojjaña yahuajo emano'yo pea'aiya, ojjaña eshahua cuana pea'aiya Jesosa Quito bihuia caje'yo ecui'oshajjajo nequiya. ¹¹ Ojjaña cojja ba majje ojjaña huohui caje'yo Jesosa Quito e'e jojo nei Emeshi Mese oe nei quea ca'a nee nee po tiitiani. Jamajojya Eyacuiñajji, Jesosa Quitoja Chii bihuia caje'yo, ojjaña nei neiya. Jamaya poaje'yo.

Jesosa Quitoja epeeji ejijji jayojja

¹² Jamajjeya ecuea epeeji e'e jojo nei cuana, ¡shajja'ajjacue ecuea esohui! Yahuajo miquiana nijje nequiahua eya miquiaaya ecuea esohui shajja'ajjanaje. Jjeja eya quea

huesha nee nequi. Miqiuana nijje enequijji pojjeama. ¡Jamatii ¡iquio ecua eyaya huohuiaña jama atitiucue! ¡A'a pajea'yojji! Eyacuiñajjiya miqianajaya mimishi cuijea ca'yonaje, jamajjeya ¡shajja'ajja tiitiucue oe ojaya esohui! ¡Miqianaya oe ¡jshajja'ajjaquicue quea bei! ¹³ E'e de, Eyacuiñajjiya miqianaya ba'e meesahua cani ojaya ejjashahuabaquijji jayojja. Jamajjeya miqianaya ojaya esohui jama ba'e sa poani. Ohuaya miqianaya ¡jashahuabaqui meesahua cani quea bihui nee ojaya ejjashahuabaquijji jayojja.

¹⁴ Eyacuiñajjiyo chacochacoani ¡a'a panajajji! ¡A'a jja oe ¡jamimicuijaja nobiajeaquijji! ¹⁵ Jamajjeya miqianaya pea cuanaja etecueajji pojjeama. Eyacuiñajjiya ebacua cuana quea pame nee miqianaya poaje. Eshahuaja epeeji cuana ca ca quea tai nee nee, siajjepojji nee nee quea chipi nee nequi. E'e nei miqiuana quea boejea ba'yanijo, majameta beca ¡ijinequi jama poaje. Jamajjeya ojjaña dejjaa quea mimishi cuaa ba caje miqianaya Jesosa Quitoja epeeji e'e jojo nei. ¹⁶ E'e, miqiuaya ona huasijje Eyacuiñajjiya esohui huohuiaña Jesosa jayojja eba'ejji, yahuajo jama pojjeama eba'ejji huohuiaña. Miqianaya jamaya poanijo, eya quea bihui nee poaje'yo Jesosa Quito poe o'oyajo. Ma pojajo eyaya baje ecuea echaco, ecuea esohui pea'ai miqianajaya pajea'yo ¡jima pojja'a. ¹⁷ Jamaya poaje pea'ai pojja'a ba'a: Yahuajo nei nei Eyacuiñajjiya epeeji cuaa aquiana dahujaja caninaje Eyacuiñajji bihuiajji. Aquiana Eyacuiñajji quea bihui nee epo meejji jayojja jama ¡jeya e'e pojja'a eya manoj'e'yo miqianaya Jesosa Quito nijje ejjapeequi meesahuajji. Jamajjeya Eyacuiñajji quea bihui nee poaje miqianajo. E'e de, eya pea'ai miqianajo quea bihui nee poani. ¹⁸ ¡Jamajjeya quea bihui nee pocue enijje!

Pabohua Timoteojo, Epamonitojo pea'ai huohui cani

¹⁹ Eyaya Timoteo huoojea sa aña miqiuana que. E'e pojja'a Jesosaa, esejaya Emeshi Mese neiya eya Timoteo huoojea mee caje ¡jeyahua nei. Timoteohua miqiuana ba majje eya huohui cahuaje e quea bihui pojji. ²⁰ E'e, ecuea ejjashahuabaquijji quea pame nee jayojja jama Timoteo oe nei ¡jshahuabaquiani miqianajo. Ohuaya miqianaya quea pame nee Jesosa Quito nijje ba'e meesahua sa neinei acani. ²¹ Pea dejja cuana ca ca oja aquianajo ¡jshahuaba tiitiuqiani. Jesosa Quitoja echacojjiyo ¡jshahuabaqui sa po ajja. ²² Timoteohua Eyacuiñajjiya esohui quea pame nee huohui canaje. Jamajjeya miqianajaya eba oya quea pame nee. Esho'yahua oja chii nijje chaco ca poa jayojja jama acanaje Timoteohua enijje; esohui Jesosa Quitoja huohui canaje, Timoteohua. ²³ Jamajjeya ¡jeyahua nei eyaya oya huoojea sa aña miqiuana que. ¿Yajja shai dejja cuaa eya acaje'yo ¡iquiojo ba'ecaa? Maya shajja'ajja majje eyaya Timoteo huoojeacuajije miqiuana que. ²⁴ Eya ¡jshahuabaquiani jama ba'a: Eseyaya Emeshi Mese neiya eya poqui meesahua caje miqiuana que, Pinipojo ba'e yasijje quijje pishana pojja'a.

²⁵ Eya ¡jeya miqianajo ¡jshahuabaquiani. Jamajjeya eyaya Epamonito huoojeaje miqiuana que. Oya ecue chahua jayojja Jesosa Quito nijje ¡japeequianijajo. Ohuaya Jesosa Quitoja esohui eya huohui meesahua canaje. Yahuajo miqianaya oya huoojeanaje e que aquiana quiaa, e ¡aahuanaa pea'ai. ²⁶ Oya miqianaya ba o'oya sa poani, de. Miqiuanaaya shajja'ajjanaje oya quea mano nee nee poanaje. Miqianaya ojo quea yeno poso, oya quea yeno poanaje. ²⁷ E'e, oya quea mano poanaje. Beshahua nei manoj'onaje. Eyacuiñajjiya oya huaquia meesahua ca'yonaje, de. O emano'yo ¡ojjemo eya quea yeno nee nee pome. Eyacuiñajji e quea yeno nee nee nequi mee sa po ajja. ²⁸ Jamajjeya ¡jeya eya o huoojea sa neinei poani miqiuana que. O ba o'oya majje quea bihui nee miqianaya poaje. Miqianaya ojo quea bihui nee poanijo, eya pea'ai quea bihui nee poaje. ²⁹ Jamajjeya Jesosa Quito nijje ¡japeequianijo Epamonito miqiuana que poe o'oyajo, ¡onijje jama mimicue ba'a: —¡Mi poe'yajo eya quea bihui nee! —acue!

Quea pame nee poani Epamonito. Pea oya jayojja poanijo pea'ai ¡shajja'ajjacue! ³⁰ Oya Jesosa Quitojo chacochacoanijo beshahua nei manoj'onaje. E'e, quea camaja nee nee, de. Jamatii ohuaya chaco tiiti canaje mete'ama nei. Miqiuanaaya e que poe ajjaa ¡jejojo Epamonito huoojeanaje e chacosahuaa.

3

Esohui e'e jojo nei quea pame nee

¹ Ecuea epeeji nei cuana, ¡jeya eyaya pea esohui tehueje miqiuana que. ¡Emeshi Mese neijo quea bihui nee pocue, miqianaya! Yahuajo eyaya esohui miqiuana que huohuinaje. ¡jeya eyaya tehue o'oyaña quea bihui nee miqiuana Jesosa Quitoja epeeji quea ca'a nee nee epo meejji. Jamajjeya pea cuaa miqianaya edasajji pojjeama. ² Jodio esohui huohuijji nisho cuana ¡a'a shajja'ajjajji! Oya edasajji cuana, ¡ñaehua quea mase ¡ja'ijjiacuiani jama. Jesosa Quito nijje ¡japeequi ajja. Miquea cuiishasha jee biso nei ¡ehusejjajja mee sa acani huohuime acani ca ohua. ³ Cuiishasha biso nei ¡ehusejjajja mee majje maya dejja cuana ¡japee nishoquiani Eyacuiñajji nijje. Eseyaya ca ca Eyacuiñajjiya epeeji e'e jojo nei.

E'e, Edojjoshahua Pameya eseya Eyacuiñajji bihuia meesahua cani. Jamajjeya eseya quea bihui nee nee jjapeequiani Jesosa Quito nijje. Ohuaya, Jesosa Quitohua ca ca oe eseya mimishi'ama po mee caje'yo. ⁴ Pea dejjaa aje oe Jodio etiiquianaja esohui jama amajje jashahuaba quehuaquiani jama ba'a: —Eya Eyacuiñajjija epeeji quea pame nee.

Chojja de. Yahuajo Jodio etiiquianaja esohui jama quea huiso eyaya a'yonaje. Ma esohui quea huiso nee nee yahuajo jama amajje ¿a'a eya quea pame nee? Chojja. ⁵ Yahuajo aje eyaya jama anaje ba'a: Jodio etiiquianaja esohui etehue'yo jama acanijo, eya me oeije pea beca peejjima cahuime. ⁸ cahuime etiijo, ecuea cuiishasha biso nei jehusejjajea ca'ya poa cuaa. Eya Isaeni dejja. Jamaya ecue chii poa. Ecuea etiiquiana Bejami bajjani. Jamajjeya eya Jodio nei Bejami cuana nijje. Jamajjeya eya Emeo esohui mimiani. Eya Jodio etiiquianaja esohui jayojja jama poanaje pea Jodio esohui huohuijji Paniseo bajjani cuana nijje. ⁶ Jodio etiiquianaja esohui cuana quea jea nee nee poa ecuea. Jamajjeya eyaya Jesosa Quitoja epeeji cuana janobajjima nei napanaje; etiiquianaja esohui a sa po ajjajojo napanaje. E'e, eyaya ma esohui cuana jayojja jama aneinei'yonaje yahuajo. Jamajjeya Jodio dejja cuana enijje mimijaji jjima poa. ⁷ Jodioja esohui quea huiso shajja'ajja majje eya jashahuaba taiquinaje jama ba'a: —Eya quea pame nee nee ba'e —poso jjabaquinaje.

Jjeya ca ca Jesosa Quitoja esohui ya'yojji eyaya Jodioja esohui cajaa a'yonaje. ⁸ E'e, eya jashahuabaquiani jama pea'ai ba'a: Ojjaña aquiana quea pame cuana oe poiji sosejje, sosema', shabo jama cajaa aña. Jesosa Quito ca ca aquiana quea sose huiso nee nee jayojja eyaya baña. Jamajjeya aje iña oe jama jashahuabaquime poani ba'a: Jesosa Quito, ecuea Emeshi Mese nei nijje jjapeequianijo eya quea pame nee nee poani. Quea sose huiso nee nee eyaya Jesosa Quito baña. ⁹ E'e, Jesosa Quitoja epeeji poanijo, eya ohuaya onijje nequi tiitii mee caje'yo; quea boejea'yo nee nequi mee caje'yo. Jodioja esohui cuana jama amajje eya quea boejea'yo pojjeama. Eya Jesosa Quito nijje e'e jojo nei jjapeequianijo, ohuaya eya quea boejea po mee ca'yani. E'e, Eyacuiñajjija huohui cani: —Ojjaña Jesosa Quitoja epeeji cuana eyaya quea boejea'yo po mee yaña.

¹⁰ E'e, yahuajo Jesosa Quito ecuea eba pishana poanaje. Jjeya eya o ba neinei'yo sa poani. Eyacuiñajji quea ca'a nee poanijo ohuaya Jesosa Quito shequi mee ca o'oyanaje. Jamajjeya eya o jayojjaya caba'e mee ca'yahua. Ma ecua oya napa ca poa jama jayojjaya eya acaje'yo pea cuaa, Jesosa nijje jjapeequianijo mo cuia caje'yo cuaa pojja'a o jayojjaya. ¡Jamati mo ca'a ca'yahua! ¹¹ Jamajjeya jjeya eya jashahuabaquiani jama ba'a: —Eyacuiñajjija eya shequi mee caje o'oya. Jesosa Quito nijje ba'e tiitii mee caje'yo Jesosa Quito jayojjaya, quea boejea ba'eje'yo onijje tii.

Pabohua Jesosa Quitojo chaco tiitii cani

¹² Eya Jesosa Quito jayojja jama pojjeama. Oya quea pame nee nee, quea ca'a nee nee pea'ai. Eya quea ca'a pishana. Jjeya eyaya janobajjima nei chacoaña Jesosa Quitojo. Jamajjeya ohuaya eya ojaya epeeji quea ca'a po mee cani. E'e, Jesosa Quitohua eya jjeshe'yo majje onijje jjapee tiitii meequi ca'yani. ¹³ Ecuea epeeji cuana, ¡shajja'ajjacue! Ecuea ejjashahuabaquijji jama ba'a: Eya Jesosa Quitoja epeeji quea ca'a nee, quea pame nee nee pojjeama. Eya ca ca jamaya poani ba'a: Eya jashahuabaquijji tiitii ajja ecuea esohuijo ma eya yahuajo anajejo. Jjeya eya jashahuabaquiani jama ba'a: Jesosa Quitohua eya chaco meesahua caje janobajjima nei ojo. Jamaya eyaya a sa neineaña. ¹⁴ Eyaya janobajjima nei chaco tiitiaña Jesosa Quitojo. Jamajjeya quijje Eyacuiñajjija ecuea echaco sosejje sosequia caje'yo. Jamaya acaje Jesosa Quitohua eya eyahuasijje iyaa'yo majje onijje eba'e tiitii'yojji.

¹⁵ Jamajjeya eseya, Jesosa Quitoja epeeji quea ca'a cuana Jesosa Quitoja ejjashahuabaquijji jayojja jama jashahuabaquiani tii tii. E'e pojja'a miquianaya jamaya po ajja. Eyacuiñajjija miquianaya jashahuabaqui mee caje'yo quea ja'a nee o jayojjaya. ¹⁶ E'e nei, eseyaya Eyacuiñajjija esohui quea huiso ba huicha'a huicha'aña. Jamajjeya ¡ojaya esohui jayojja jama ejja'a tiitiiqui!

¹⁷ Ojjaña ecuea epeeji cuana, ¡e jayojja ba'ecue! ¡Pea dejja cuana babacacue; ma ecua eyaya miquiana nijje nequiya anaje jamaya ca'a cahua cuaa! ¡Onaya oe jamaya atitiicue, miquianaaya! ¹⁸ Yahuajo eyaya miquianaya huohui majamajanaje pea dejja cuana quea mimishi nee nee poanijo. Jjeya quea yeno nee eyaya huohuije o'oya ma dejja cuanajo. Jesosa Quito acui ecueata'apeejo mano'yonaje. Oya cuana ca ca Jesosa Quitoja esohui jayojja jama po ajjajo o quecua'yojji epo jayojja poani. ¹⁹ Jamajjeya ma dejja cuana cuaqui yasijje poquije'yo. Ojaya aquiana huisojo jashahuaba tiitiiquiani. Eyacuiñajjijo jashahuabaqui sa po'yo ajja. Oya cuana oja mimishijo bicho'ama, quea bihui nee poani. E'e, jashahuaba tiitiiquiani quea tai. ²⁰ Eseyaya ca ca jamaya ba'e ajja; Jesosa Quito nijje eyajo ba'e tiitije'yo. Jesosa Quitohua esahua eseya mesena pajea mee ca'yonaje. E'e de, eseyaya Emeshi Mese nei Jesosa Quito poeje o'oya. O poe o'oyajji eseyaya ishoo'ajjaña quea

bihui neeya. ²¹ Eseyaya eyami ca'a'ama. Jesosa Quitohua poe o'oya majje eseyaya eyami quea ca'a nee nee panacuaji caje'yo ojaya eyami jayoyja jama quea ca'a nee nee epo'yoyji tii tii. Jamaya po mee caje'yo ohuaya quea ca'a nee nee poanijo. E'e, quea ca'a nee poanijo ohuaya ojjaña huoojea tiitii cani. Ojjaña aquiana cuiña cani, Jesosa Quitohua.

4

Pea esohui cuana eba'ejji quea pamejo

¹ Jamajeya ecuea epeeji cuana, ijjapee tiitiqicue quea ca'a nee! Miquianaya ecuea quea jea nee. Baqui o'oya sa neinei poani. Miquianajo eya quea bihui nee. Miquianaaya quea pame nee Jesosa Quitojo añajo maya ecuea esosequia'yoyji jayoyja. Jamajeya ecuea etehue'yo jayoyja jama poanijo, miquianaya eseyaya Emeshi Mese neijo quea ca'a ba'aje. Eyaya miquianaya quea jea nee nee añe.

² Epona cuana Emonia bajjani, Sinitique pea'ai, ishajja'ajjacue mo, che! Emeshi Mese nei Jesosa niije jjapeequianijo ja'a jjamimicuiajea nobiajeaqijji! ³ Ecuea pea epeeji nei, jmiyaya ma epona beca quea bei ba'e meesahuacue! Ohuaya yahuajo eya Eyacuiñajji esohui huohui meesahua neinei ca'yonaje. Deja Cuemete bajjaniya esohui huohui meesahua neinei ca'yonaje pea'ai. Quea huiso ecuea pea epeeji cuana esohui huohui meesahua ca'yonaje pea'ai. E'e, Eyacuiñajjiya ojaya esohui etehue'yojo eyajo oja bajjani cuana tehue ca'yonaje ona ba'e mee tiitii'yoyji.

⁴ Miquianaya Jesosa niije jjapeequianijo ¡quea bihui nee po tiitiicue! ¡E'e jojo nei quea bihui nee po tiitiicue! ⁵ ¡Quea bei nee pocue ojjaña cuana niije! Jamajeya ojjaña cuaa ba caje eseyaya Emeshi Mese nei poeje jyeahua nei pojja'a. ⁶ ¡A'a quea mete pojji! Chojja. ¡Mimicue Eyacuiñajji niije! ¡Aquiana sa poanijo oya oe huohuicue! ¡Eyacuiñajji bihuicue pea'ai! ⁷ Jamajoya Eyacuiñajjiya miquianaya quea bei nee nee po mee caje. Quea bei nee nee miquianaya poaje Jesosa Quitojo. Ojjaña deja cuana jamaya jjashahuabaqui ajja. E'e, Jesosa Quito niije jjapeequianijo, ohuaya miquianaya quea quijjiji jaji nee po mee caje. Mete'ama jjashahuabaqui meeme acani pea'ai.

⁸ Epeeji cuana, jjeya pea esohui oe pojji eyaya miquianaya huohuije. ¡Esohui e'e jojo neijo jjashahuaba tiitiqicue ojjaña Eyacuiñajjiya esohui quea pame neejo pea'ai! ¡jjashahuabaquicue pea deja cuanaja eba'ejji quea pame neejo pea'ai! Ejjashahuabaquiji quea bei epo'yoyji, quea bihui nee epo'yoyji pea'aijo ¡jjashahuabaquicue! Echacoji quea pame nee neejo, Eyacuiñajjiya deja cuana quea bihui nee po mee canijo pea'ai ¡jjashahuaba tiitiqicue! E'e, jamaya ojjaña quea jea nee. ⁹ Ecuea esohui shajja'ajanaje miquianaaya. Ecuea esohui etehue'yo banaje pea'ai. ¡Jamaya miquianaya po tiitiicue! Ecuea echaco quea pame banaje. ¡Jamaya miquianaaya atitiicue pea'ai! Jamajeya Eyacuiñajji minijje nequi tiitiije; quea bei po mee caje.

Pabo ojaya epeeji Pinipojo ba'e cuana niije quea bihui poani

¹⁰ Yahuajo nei miquianaaya aquiana eba'e meeji huoojeanaje e que, sosema'. Yahuajo pishana quiojaya miquianaaya pajea'yo jjima añe. Jamatii aquiana huoojea jjima poa. Jjeya eya ba'e sahua o'oyaña. Jamajeya eya quea bihui nee nee eseyaya Emeshi Mese nei niije, Jesosa Quito niije jjapeequiani. ¹¹ ¡A'a jjashahuabaquiji eya mimiani eya aema' poanijo! Eya jjashahuabaqui tiitii ajja aquiana eba'e meeji. Oe pojji aquiana ecuea poanijo, jamatii. ¹² E'e, aema' poanijo, jamatii. Eya quea bei. Ecuea aquiana quea huiso yanijo, jamatii eya quea bihui. E'e pojja'a ecuea eba'ejji quea camaja poaje o'oya. E'e pojja'a camaja'ama poaje. Jamatii. Eya mimije Eyacuiñajji niije jama ba'a: —E'e Eyacuiñajji, ecuea eba'ejji quea pame.

E'e, quea jejejo, quea shoe pea'aijo, aema' poanijo, aquianajji pojja'a poanijo jamatii eya quea bihui. ¹³ Jamajeya quea camaja poanijo jamatii eya quea bihui nee Jesosa Quitohua eya ba'e meesahua canijo. ¹⁴ E'e, ecuea eba'ejji quea camaja poanijo, miquianaaya eya ba'e meesahanaje quea jea nee. Jamaya quea pame.

¹⁵ Yahuajo Eyacuiñajjiya esohui quea pame miquiana huasijje, Pinipojo ba'e yasijje huohui coo majje eya Masenonia meshijo nequi poquinaje. Ma pojjajo, quijje pea'ai miquiaaya nei eya aquiana quianaje. Jesosaja epeeji cuana pea cuiñajji ba'eja aquiana quia'yo jjima. Maya miquianajaya eba. ¹⁶ E'e, eya Tesanonicajo chacochoconijo eba'ejji quea camaja ecuea poanaje. Jamajeya miquiaaya aquiana huoojea huicha'a huicha'anaje e que. ¹⁷ Miquianajaya aquiana ehoojeajji eya jjashahuabaqui ajja poanaje. Ecuea ejjashahuabaqui'yoyji ca ca jiquio jama ba'a: Miquiaaya aquiana e que quia'yonaje sosema'. Jamajeya Eyacuiñajjiya miquianaya quea ja'a nee po mee caje. E'e, quijje pea'ai quea huiso sosequia caje'yo ohuaya ma miquiaaya anaje soseje. ¹⁸ Miquiaaya Epamonito huoojeanaje e que aquiana quiaa. Jamajeya jjeya quea huiso nee ecuea aquiana eba'ejji yani. Ba'eje eya quea pame nee. E'e, ma aquiana equia'yoyji aquiana Eyacuiñajji yasijje

ebihua'yojji jayojja, quea shiye nee nee jayojja, Eyacuiñajji quea bihui nee nee epo meeji.
 19 Eseyaya Eyacuiñajji aquiana quea pame nee, quea huiso yani, de. Jamajjeya e'e jojo nei
 ohuaya miquianaya ba'e meesahua caje. Jamaya poaje ohuaya miquianaya Jesosa Quito
 nijje jjapeequianijo.

²⁰ Ojjaña Jesosaja epeeji cuaa Eyacuiñajji, esejaya Chii ai eyajo cabihua tiitii cahua jjeya
 nei, quijje pea'ai. Jamaya capoahua.

Esohui quea bihui epo meeji

²¹ Ojjaña Jesosaja epeeji cuana quea bihui nee huohui'ajjacue jama ba'a: —¿Achajja
 acuae quiana so'o, de? —ecuanajaya ebajji.

Jesosaja epeeji cuaa enijje nequiya miquianaya huohui'ajja cani jama ba'a: —¿Achajja
 acuae quiana so'o de? —onajaya ebajji.

²² Jesosaja epeeji cuana emeshi mesejo chaco canijo, ojjaña cuana jiquio tiijo pea'aiya
 miquianaya huohui'ajja cani jama ba'a: —¿Achajja acuae quiana so'o, de? —onajaya ebajji.

²³ Eseyaya Emeshi Mese nei Jesosa Quito miquianajaya eyami dojjojo nequi. ¡Ohuaya
 miquianaya quea pame nee cajaanuana cahua! Mahuiso ecuea esohui.

Eyaya Pabohua tehuejyonaje. Apoa.

PABOJA ETEHUE'YO CONOSA CUIÑAJJI YASIJJE COLOSENSES

Pabohua Shomajo ejeanobia aniya esohui tehue canaje Jesosaja epeeji cuana Conosa cuiñajji ba'e yasijje

¹ Eya Pabo, Jesosa Quitoja huoojea'yo ojaya esohui huohuiya. Jamaya Eyacuiñajji sa poanaje. ² Timoteohua esejaya epeeji enijje esohui tehue cani miqiuana huasijje jama ba'a: Ma Eyacuiñajji epeeji cuana huasijjeme Conosa cuiñajji ba'e, ecuanaja epeeji e'e jojo nei Jesosa Quito nijje jjapee neinei'quiani yasijje.

³ Eseyaya Chii aiya, Eyacuiñajjiya miqiuana cajaanaya cahua quea pame nee, quea bei capo mee cahua pea'ai!

Pabohua Eyacuiñajji bihuia cani

³ Eyacuiñajji, esejaya Emeshi Mese nei Jesosa Quitoja Chii eyaya bihuia tiitii'ña onijje miqiuana mimianajo. ⁴ E'e, pea cuaa eya huohui cani jama ba'a: —Jesosaja epeeji cuaa Conosajo ba'ecaa Jesosa Quito shajja'ajja cani tii. Ojjaña Eyacuiñajji epeeji cuana quea jea nee acani pea'ai.

⁵ E'e, miqiuana esohui e'e jojo nei Jesosa Quitoja yahuajo pishana shajja'ajja coo majje onijje jjapee'quinaje. Jjashahuabaquiani eba'e tiitii'yoyji quea pame nee eyajo onijje pea'ai. E'e jojo nei Eyacuiñajjiya jamaya acaje'yo miqiuana. ⁶ Jiquio esohui e'e jojo nei Jesosa Quitoja ojjaña meshi yasijje huohui cani. Jamajjeya quea huiso deija ba'e mee cani quea pame nee, miqiuana jayojjaya. Jamaya miqiuana esohui shajja'ajja coo majje jjabahuejjaqui'yonaje. Jamajjeya jjabahuejja neinei'qui'yonaje ba'a: Eyacuiñajji deija cuana jaahuana cani e'e jojo nei. ⁷ Deija Epapasi bajjani ecuanajaya quea jea nee. Ohuaya Jesosa Quitoja esohui huohui ca'yonaje miqiuana que. Oya ecuana jayojjaya Jesosa Quitoja yajji chochochoani. Ecuana sohuihuohui sahuajji quea pame nee pea'ai. ⁸ Ohuaya ecuana huohui canaje jama ba'a: —Edojoshahua Pameya Jesosaja epeeji cuana Conosajo ba'e pea epeeji cuana quea jea nee po mee cani —Epapasi poanaje.

Pabo miminaje Eyacuiñajji nijje

⁹ Epapasi esohui quea pame nee miqiuana shajja'ajja'yo majje ecuana Eyacuiñajji nijje mimi huicha'a huicha'ani jama ba'a: —Eyacuiñajji, jecuanajaya epeeji cuana ba neinei meesahuacue ache echacoji shai mijo onajaya poaje! Edojoshahua Pameya oya cuana miqiea esohui caba meesahua cahua quea pame nee, cajjashahuabaqui meesahua cahua quea ja'a nee epeoji pea'ai. ¹⁰ Jamajjeya jaya cuana Jesosa Quitoja esohui jayojja jama ba'e tiitii mee'yocue! Jamaya poanajo Jesosa Quito quea bihui nee nee poaje onajo. ¡Quea pame nee nee chaco tiitii meecue Jesosa Quitojo pea'ai! E'e Eyacuiñajji, ¡miqiea epeeji mijo jjabahuejja tiitii meequicue pea'ai! ¹¹ Miya ca ca oe quea ca'a nee nee, Eyacuiñajji. Jamajjeya ¡miqiea epeeji cuana Conosajo ba'e jjapeequi meesahuacue quea ca'a nee nee! Jamajjeya oya cuana miqiea esohui pajea'yo ajja tii tii deija quea mase cuaa napa cajje, yeno'ama poaje. ¹² Eyacuiñajji, ecue Chii ai, oya cuana quea boejea'yo po mee'yonaje miyaya. Jamajjeya quijje oya cuana miqiea pea epeeji cuana nijje ba'e tiitii mee'yo quea ja'a nee minijje eyajo. E'e Eyacuiñajji, jamajjeya apoa.

¹³ Yahuajo eseya Edosiquiaa napa ca'yonaje. Quea mase nee, quea mimishi nee nee. Jjeya ca ca esejaya Chii aiya eseya jjeshe ca'yonaje. Jamajjeya oja Bacua oe nei esejaya Emeshi Mese nei quea ca'a poaje'yo tii. Oja Bacua Jesosa Quito Eyacuiñajji quea jea nee nee poani tii tii. ¹⁴ Jama ba'a: Jesosa Quitoja esejaya mimishi cuana cuijea'yo majje Edosiquiana quea ca'a nee eseya mesena pajea mee ca'yonaje.

Jesosa Quito esejo mano'yonaje

¹⁵ Deija cuanaja Eyacuiñajji ecojja bajji pojjeama, jjacobjaba meequi ajja. Jamatii oja Bacua Jesosa Quito Eyacuiñajji jayojja nei neiya, o jayojjaya jama poani pea'ai. Jamajjeya Jesosa Quito ba majje Eyacuiñajji esejaya eba. Oya, Jesosa Quito ojjaña e'acquiana mese. Ojjaña acquiana cuana oja pana poa. ¹⁶ E'e, Eyacuiñajjiya Jesosa Quito nijjeya ojjaña acquiana cuana pana ca'ya poa, jiquio acquiana ba'a: Ojjaña acquiana ojjaña meshi cuana pana ca'ya poa; ojjaña acquiana eyajo pana ca'ya poa pea'ai. Aquiana cuana ecojjaja ebajji, pea acquiana ecojjaja ebajji pojjeama pea'ai pana ca'ya poa jiquio ba'a: Eyacuiñajji esohuidojojji quea ca'a nee pana ca'ya poa, esahua cuana quea huiso, quea mimishi po jjimahuajo, pana ca'ya poa pea'ai. E'e, Eyacuiñajjiya Jesosa Quito nijjeya ojjaña acquiana, ojjaña tii pana ca'ya poa Jesosa Quitoja ya'yoyji. ¹⁷ E'e, oya Jesosa Quito ba'e tiitiiya poa ojjaña acquiana pana jjimahuajo. Ojjaña acquiana nequi tiitii mee cani quea pame nee,

Jesosa Quitohua. ¹⁸ Ojjaña ojaya epeeji cuanaja mese poani tii tii pea'ai. Ohuaya ma epeeji ojaya huapa pojjeama jayojja jama ojee japeequi meesahua cani, ojjaña. O jayojja ba'e meesahua cani. Mano'yo majje Jesosa Quito ebionei shequi o'oyanaje. Jamajjeya oya oe nei quea ca'a nee nee poani tii tii. ¹⁹ E'e, oja Bacua Jesosa Quito o jayojja poani tii tii, Eyacuiñajji quea bihui nee nee poani. ²⁰ Yahuajo deja cuana quea mimishijo Eyacuiñajjiya ojjaña aquiana cajaa aca'ya poa. Jesosa Quito acui ecueata'apeejo ba'e na cuayaqui'yonaje. Mano'yonaje. Jamajjeya Eyacuiñajjiya mimishi cuana cuijea caje'yo. Jamajjeya quea bei po o'oyanaje ojjaña oja pana cuana nijje eyajo, meshi cuanajo anica cuana nijje pea'ai.

²¹ E'e, miqianaya yahuajo quea mimishi poanijo, quea jshahuabaqui tai poanijo pea'ai Eyacuiñajji nijje japeequi ajja. Quea huesha nee poquiquehuani jayojja poanaje. ²² Jesosa deja jayojja yamijji nequinaje. Jamajjeya Jesosa Quito esejaya mimishi cuanajo mano'yonajejo, Eyacuiñajjiya eseya ojaya epeeji cuana po mee ca'yonaje. Jamajjeya Jesosa Quitohua eseya Eyacuiñajji yasijje poqui mee caje'yo mimishi'ama, quea boejea epo'yo pea'ai. Jamajjeya Eyacuiñajji ese nijje quea bei poaje eyajo, ca ojaya esohui jama ba'e tiitiinajejo, Jesosa Quitoja esohuijo jshahuaba tiitiinajejo pea'ai. ²³ Jiquio esohui shajja'ajja majje ja'a pajea'yoyji pea'ai! Quea huiso dejjaa quea huiso meshijo ba'eya jiquio esohui shajja'ajja cani eseyaya jayojjaya.

Jesosa Quitohua ca oe Pabo huoojea canaje esohui huohuiya

Jesosa Quitoja esohui ojjaña dejjaa shajja'ajja canaje ojjaña meshijo. Eya ca ca iña e'e jojo nei Eyacuiñajjiya esohui huohuiji; Jesosa Quitoja esohui huohuiaña. ²⁴ Jesosa Quitoja esohui eya huohuiyajo, pea cuaa eya jeyo majje jeanobiajea canaje quea huiso cahuijo; quea nee. Jamatii eya quea bihui nee poani. Yahuajo Jesosa Quito quea nee nee poa. Jjeya eya quea nee pishana poani miqiana Jesosaja esohui jayojja ba'e meesahuajji. E'e pojja'a quijje Jesosa jayojja eya quea nee nee poaje. Deja cuaa eya napa cajje eya quea ca'a poajo, Jesosaja epeeji cuana quea ca'a poaje pea'ai. ²⁵ E'e jojo nei Eyacuiñajjiya eya huoojea ca'yonaje ojaya esohui huohuiya ojaya epeeji cuana huasijje. Jamaya miqianaya japeequi meesahuaña Jesosa Quito nijje. Ojjaña Jesosaja esohui huohuiaña pea'ai. Jiquio esohui eseya Eyacuiñajjiya ba meesahua cani. ²⁶ Jiquio esohui deja cuanaja quea quehua yahuajo nei poa. Ba mee jjima poa. Jjeya ca ca Eyacuiñajjiya ojaya epeeji nei cuana Jesosa Quitoja esohui ba meesahua cani quea ja'a nee. ²⁷ Jamajjeya jjeya Eyacuiñajjiya ojjaña ojaya epeeji cuana, Jodio pojjeama cuana pea'ai ba mee sa acani ojaya esohui Jesosa Quitojo. Ma esohui quea pame nee nee jama ba'a: Jesosa Quito esejaya eyami dojjojo nequi tiitiyani. Jamajjeya eseya jshahuabaquiani onijje eyajo enequi tiiti'yoyji. ²⁸ Ojjaña Jesosa Quitoja esohui ecuaaya huohuiaña quea ja'a nee ojjaña huasijje. Ojjaña nei nei jjabahuejjaqui meeñaña ojjaña Jesosa Quitoja epeeji quea ca'a nee epojji. E'e, jamaya poaje Jesosa Quito poe o'yajo. ²⁹ Miqianaya Quitoja epeeji quea ca'a nee epojji eyaya janobajjima nei esohui huohuiaña Jesosa Quitoja. Jesosa Quito ecuea eyami dojjojo quea ca'a nee nequi. Ohuaya eya esohui ba neinei meesahua cani miqiana huasijje ehuohuiji.

2

¹ ¡Bacue jiquio! Eya janobajjima nei jshahuabaqui majje Eyacuiñajji nijje mimi neinei miqianajo Conosajo ba'e yasijje. Mimi neinei Jesosa Quitoja epeeji cuana Naonisea cuiñajji ba'e yasijje pea'ai, Jesosa Quitoja epeeji cuana ecuea ba jjima cuana huasijje pea'ai. Jamatii eya jshahuabaquiani onajo pea'ai. ² Jamajjeya eyaya ojjaña miqianaya Jesosa Quitoja epeeji cuana quea ca'a nee po meesahuaje'yo. Miqianaya pea cuana nijje japeequi meesahuaje'yo e'e jojo nei pea'ai, esohui quea pame nee Jesosa Quitojo jjabahuejjaqui meesahuaje. Quea bei nee jshajja'ajjaquijje. E'e, jjeya ojjaña cuana esohui Jesosa Quitoja Eyacuiñajjiya ba meesahua caje'yo quea ja'a nee. Yahuajo ca maya ba mee jjima poa. ³ Jesosa Quitoja eba ojaye nei Eyacuiñajjiya ejshahuabaquijji, ojjaña tii. Onijje japeequianijo, Eyacuiñajjiya ejshahuabaquijji quea ja'a nee ba meesahua cani Jesosa Quitohua. ⁴ ¡Ecuea esohui etehue'yo ba neinec mequiaaya! Pea deja cuana sijje poani Eyacuiñajjiyo ja'a shajja'ajjajji! Dasia ca chana' mi. ⁵ E'e, eya ejeanobia ani. Jamajjeya miqiana nijje eya enequijji pojjeama. Jamatii eya jshahuaba tiitiqianiani miqianajo, miqiana nijje nequi jayojjaya. Ecuea eba miqianaya Jesosa Quito nijje japee neineiquiani quea pame nee, ojaya esohui jayojja jama poani pea'ai. Jamajjeya eya quea bihui nee nee poani miqianajo.

Jesosaa eseya o jayojja ba'e meesahua caje'yo

⁶ Jamajjeya miqianaya Jesosa Quito nijje ebionei japeequi'yonajejo oya miquea Emeshi Mese nei quea pame nee poanaje. Jamajjeya ¡ba'ecue ojaya epeeji nei! ⁷ Jamajjeya ¡Jesosa Quitoja epeeji quea ca'a nee oe pocue! ¡Ojaya esohui ba tiitiicue! ¡Ojaya esohui e'e jojo neijo jshahuaba tiitiqicue pea'ai! E'e, jamaya pea dejjaa miqianaya huohui canaje.

Eyacuiñajji nijje jamaya mimi tiitiicue: —E'e Eyacuiñajji, jamaya miquea esohui quea pame nee nee.

⁸ Dejjja cuaa esohui e'e nei pojjeama huohui cani miqianaya. Quea quehua nee, etiuiquiana cuanaja esohui. Jesosa Quitoja esohui jayojja jama pojjeama, quea ja'a nee pojjeama. ¡A'a shajja'ajajji! Dasia caje'yo cuaa mi.

⁹ Jamajjeya ¡bacue jiquio! Oya Jesosa Quito eseya jayojja yamijji poa. Jamatii oya Eyacuiñajji nei poa. ¹⁰ Jesosa Quito nijje jjapeequianijo, Eyacuiñajji eseya ba'e tiitii mee caje'yo Jesosa Quito jayojja epo'yojji. E'e, Jesosa Quito Emeshi Mese nei oe nei quea ca'a nee nee. Ojjaña eshahua cuanaja mese, Eyacuiñajji esohuidojojji cuanaja mese pea'ai quea ca'a pishana, de.

¹¹ Ojaya etiuiquianaja esohui jama Jodio dejja cuaa cuiishasha jehuissejjajea cani. Jamaya huohui jjima acani Jesosa Quitohua. Onijje jjapeequianijo, ohuaya miqianajaya mimishi pajea mee ca'yani, miqianajaya ejjashahuabaqui'yojji quea mimishi chama'yo po mee ca'yani. ¹² Jesosa Quito mano'yajo dejja cuaa ohuajea ca poa. Eyacuiñajji oya shequi mee ca o'oyanaje. Jesosa Quito ohuajea ca poa jayojja jamaya peaa miqianaya enajo besa mee canaje Eyacuiñajji. Jamajjeya Eyacuiñajji miqianaya ba'e tiitii mee ca o'oyanaje jayojja jamaya ohuaya miqianaya ba'e meesahua caje'yo Jesosa Quito jama epo'yojji, ojaya esohuijo jjashajja'ajjaquianijo. ¹³ Yahuaajo Jodio pojjeamaja Eyacuiñajji esohui miqianajaya ba jjima. Quea mimishi nee nee poanijo miquea edojjoshahua cuaqu yasiijje dobiqiu'yo quaiye poanaje. Jjeya ca ca Eyacuiñajji miqianaya ba'e tiitii mee caje'yo Jesosa Quito nijje mimishi cuana ojjaña tii cuijja ca'yonaje. ¹⁴ Esey aje oe Moisesija esohui etehuejo jjashajja'ajjaqui ajjajo, Eyacuiñajji tehue mee canaje jama ba'a: “Ojjaña quea mimishi nee nee” poanaje. Jamatii jojaya Jesosa Quito esejaya mimishijo mano'yonaje acui ecueata'apeejo. Jamajjeya Eyacuiñajji e'e jojo nei esejaya mimishi cuana cuijja neinei ca'yonaje. ¹⁵ E'e, Jesosa Quito acui ecueata'apeejo mano'yonaje. Jamajjeya eshahua cuana ca'a'ama po mee ca'ya poa, Eyacuiñajji. Jamaya ojjaña eshahua mese cuana jeabichajja ca'ya poa. Eyacuiñajji ojjaña ba mee canaje eyajo anica.

¡a'a esohui e'e nei pojjeama shajja'ajajji!

¹⁶ Jamajjeya ¡bacue oe! Pea cuaa miqianaya tecuea cani ojjaña bobi miquiaa ijjañaajo, pea e'ishijji ishiañaajo pea'ai. ¡A'a oya cuana shajja'ajajji! Jodio cuanaja esohui jama ba'a: Ojee e'ijjaajji pojjaajo, epojja chacochocho mee ajja pea'ajo huohui cani; ¡a'a oya cuana shajja'ajajji! ¹⁷ Yahuaajo ma esohui cuanajo dejja cuana jjashahuaba meequi ca'yonaje ma Jesosa Quitohua quijje poe majje acañaje. ¡jjeya nei Jesosa Quitojo jjashahuabaquicue! Oya ca ca oe nei quea pame nee. ¹⁸ Pea dejja cuaa jjacahuabaqui majje miqianaya Eyacuiñajji esohuidojojji bihuita mee sa acani bobima' ani tii. Ma dejja cuana ojaya ejjashahuabaquijji quea taijo mimi huicha'a huicha'ani. Jama siajje pome poani ba'a: —Ecuea ejjashahuabaquijji quea ja'a nee; onajaya quea ja'a pojjeama —poani.

Tecuea canijo ca oe ¡a'a jjashajja'ajjaquijji! Eyacuiñajji nijje mi poqui pajea mee ca chana'. ¹⁹ Ma dejja cuana aje oe Jesosa Quito nijje, esejaya Emeshi Mese nei nijje jjapeequi pajea'yonaje. Eseyaya Emeshi Mese neiya Jesosa Quitohua ojjaña ojaya epeeji cuana jjabahuejjaqui mee cani ojee. Jama ba'a: Jesosa Quito ojjaña ojaya epeeji cuana nijje ese ejja jayojja poani. Ojjaña ojaya epeeji cuana Jesosa Quitoja eyami jayojja poani. Esapa jayojja esejaya Emeshi Mese nei Jesosa Quito poani. Jiquio ecua esapaa eyami poqui mee cani jayojja jama Jesosa Quitohua ojjaña ojaya epeeji cuana huoojja cani, jjabahuejja meequi cani ojee ejjapeequijji. Jamaya Eyacuiñajji quea boti nee. Jamaya Eyacuiñajji ojjaña ojaya epeeji quea ca'a nee po mee sa acani. Eseyaya Emeshi Mese neiya Jesosa Quitohua ojjaña ojaya epeeji cuana ojee onijje jjabahuejja meequi cani; jamaya Eyacuiñajji ojjaña ojaya epeeji cuana quea ca'a nee po mee cani. Jamajjeya ojjaña ojee jjapeequi mee cani Jesosa nijje.

²⁰ Miqianaya Jesosa Quito jayojja jama poanijo Jesosa Quitoja epeeji pojjeama cuanaja esohui quea quehua ¡a'a shajja'ajajji! ¿Apiojji acuae jjeya maya esohui quea quehua shajja'ajja sa poani? Jesosa Quito nijje jjapeequianijo eshahuaaja epeeji pojjeama poani. ²¹ Esohui quea quehua jiquio jama ba'a: —Jiquio aquiana ¡a'a napajji! ¡A'a pea bobi cuana ijjaajji! ¡Pea e'ishijji a'a ishijji! —jamaya dejja cuaa huohui nisho cani.

²² Jama pojjeama ca ca Eyacuiñajji esohui. Bobi cuana ijjaajeyo majje chama'yo tii poani. Joya miquiaa napaña aquiana chama'yo tii poaje pea'ai. ²³ E'e, jiquio dejja cuaa pea cuana dasia cani; ojaya esohui quea quehua quea ja'a poso acani cuaa. Jamajjeya pea cuana jjashahuaba quehuaqui majje oe pojji bobi ijja jjima acani. Pea'ai Jesusaja esohui jama ba'e sa po'yo ajja. Cho, quea ja'a pojjeama ba'yani. Jamaya poanijo dejja cuana quea mimishi jjashahuabaqui pajea ajja.

3

Yahuajo quea tai ba'ya poa eba'ejji Jesosa Quito nijje quea pame

¹ Eyacuiñajjiya Jesosa Quito ba'e mee ca o'oyanaje. Jamajjeya ohuaya miqúanaya ba'e mee caje'yo Jesosa Quito jayojja. Jamajjeya ijashahuaba tiitiqúicue Jesosa Quitojo eyajo eba'ejji! Jama ba'a: Eyacuiñajjiya Jesosa Quito ojjaña huoojea'yojji quea ca'a nee nee po mee ca'yonaje. Oya Eyacuiñajjiya ebianeí mijijje ani. ² E'e, ijashahuaba tiitiqúicue oe Jesosa Quitojo! ¡Aquiána taijo oe a'a ijashahuabaquíjji! ³ Jama ba'a: Dejja emano'yojaa mimishi po'yo ajja. Jamaya miqúanaya jjea emano'yo jayojjaya mimishi po sa po'yo ajja. Jesosa Quito Eyacuiñajji nijje nequi tiitiáni. Ohuaya miqúanaya jaahuana caní quea pame nee. ⁴ Jesosa Quito poe o'oyajo, eseya onijje nequi tiitiije'yo quea ja'a nee nee; o jayojjaya poaje'yo onijje jjapee tiitiqúanijo. Jamajjeya oe ijashahuaba tiitiqúicue Jesosa Quitojo!

⁵ E'e, Jesosa Quito nijje jjapeequí majje jamaya ebioneí acue ba'a: ¡Ojjaña mimishi cuana oe pajea neinei'yocue! ¡A'a pea cojjojji pojji! ¡A'a jama ijashahuabaquímeja pojji! ¡A'a quea tai ijashahuabaquíjji! ¡A'a quea mimishi ba'e sa pojji! Onajaya aquíana ja'a quea jea bajji pea'ai! Quea dejja tai poanijo aje oe miqúanaya eyacuiñajji nisho bihuaijji jayojja poani, de. ⁶ Jiquio mimishi cuana jama atitii canijo, Eyacuiñajjiya shajjama' cuana quea nee nee po mee caje'yo. ⁷ Jamaya aje oe miqúiaaya yahuajo mimishi ahuicha'a huicha'a'yonaje pea'ai onaaya acaní jayojjaya. ⁸ ¡Jjea ca ca pajea neinei'yocue ojjaña mimishi cuana! Jamajjeya ja'a quea tecue nee nee pojji! ¡A'a quea queneí nee nee pojji! ¡A'a quea mase nee nee pojji! ¡A'a pea nijje mimijajjiji! ¡A'a quea tai mimijji! ⁹ E'e, miqúanajaya eba'ejji quea mimishi yahuajo jama apajea'yonaje ja'a siajje pojji! ¹⁰ Jjea miqúanajaya eba'ejji quea pame nee po'yonaje. Eyacuiñajjiya miqúanaya ba'e meesahua caní quea boejea, o jayojja epojji, o ba neineiiji epojji. Jamajjeya ja'a quea mimishi po'yojji!

¹¹ Jamajjeya Jesosa Quito nijje jjapeequíanijo ojjaña ojaya epeejji cuana cajjapeequíahua pea nijje; pea jayojja oe capoahua. Jodio cuana ca ca Jodio pojjeama jayojjaya ca'a'ama; dejja ecuiishasha jehuisseja'yo ca ca cuiishasha jehuisseja jima jayojja pea'ai, Jieno dejja pojjeama cuana, Sitinia dejja cuana pea'ai; echacojji sosema' ca ca dejja echacomeejjima' jayojja, ca'a'ama ojjaña. Jesosa Quito ca ca oe neí quea ca'a nee nee nequi tii tii. ¹² E'e, Eyacuiñajjiya miqúanaya babaca ca'ya poa ma ojaya epeejjime epojji. Ohuaya miqúanaya quea jea nee nee acanaje pea'ai, Eyacuiñajjiya. Jamajjeya quea pame ba'ecue jiquio jama ba'a: ¡Aema' cuana ba'e meesahuacue! ¡Pea cuana nijje jjapeequí! ¡Mase'ama oe pocue! ¡Quea bei oe pocue! ¡Tecue'ama pea'ai oe pocue! ¹³ ¡Ona nijje tecue'ama pocue! E'e pojja'a pea cuana miqúanaya quea mimishi acaje. ¡Jamatii ojaya mimishi pajea'yocue; ohuaya miquea mimishi capajea ca'yahua pea'ai! E'e, Jesosa Quitohua miqúanajaya mimishi cuana cuijea ca'yonaje; jamajjeya ¡miqúianaaya oe pea cuanaja mimishi pajea'yocue! ¹⁴ E'e jojo neí ¡pea cuana quea jea nee acue! Jamaya poanijo miqúanaya ojee quea ja'a nee nee ba'eje. ¹⁵ ¡Miqúanaya oe quea bei nee nee ba'ecue Jesosa Quitohua miqúanaya quea bei nee ba'e meesahua canijo! Miqúanaya ca ca oe Jesosa Quitoja epeejji poani. Jamajoya eseya jjapeequí mee caje'yo quea cojja bei epojji. Majoya miqúanaya iyaa ca'yonaje Eyacuiñajjiya. ¡Eyacuiñajji bihuiaacue pea'ai!

¹⁶ ¡Ojjaña Jesosa Quitoja esohuí cuana shajja'ajja tiitiicue! ¡Quea ja'a nee esohuí esejaya epeejji cuana huasijje huohuicue; shajja'ajjacue pea'ai! ¡Ojee ¡jabahuejjaquí meecue quea ja'a nee pea'ai! Eyacuiñajji bihuiañajo jama pocue ba'a: ¡Sohuicuayacue quea bihúí nee Jesosa Quitojo! ¡Miqúianaaya Eyacuiñajji bihuiaacue sohuicuayaniya pea'ai! ¡Quea quijjiji bei nee pea'ai pocue Eyacuiñajji! E'e, ¡o jayojjaya jama ba'ecue! ¹⁷ E'ejaya Emeshi Mese neí Jesosa. Ojaya epeejji poanijo ¡ojjaña miquea esohuí ojaya yajji acue! ¡Ojjaña miquea echaco ojaya epojji chacocue pea'ai! Jesosa Quitohua miqúanaya jamaya ameesahua canijo, ¡Eyacuiñajji, esejaya Chii ai oe bihuiaacue!

Eyacuiñajji esejaya eyamijo quea pame nequi

¹⁸ Jamajjeya ehuanase cuaya, Jesosaja epeejjiya, ¡yahue shajja'ajjacue! Jamaya miqúanaya quea pame nee poaje. ¹⁹ Yahueya, ¡miquea ehuanase quea jea nee acue! ¡A'a oe onijje quea tecue nee pojji!

²⁰ Esho'í cuaa, Jesosaja epeejji poaniya, ¡shajja'ajja tiitiicue mique chii, miquea enaese pea'ai! Jamaya miqúanaya poanijo, Jesosa Quito quea bihúí nee poaje. ²¹ Echii cuaa, enaeseja pea'ai, ja'a jamatii tecuea huicha'ajji mique bacua cuana! Oya cuana quea yeno nee poaje miqúiaa tecuea tiiti'yajje.

¡Echacojji cuana, echacomeejji cuana pea'ai quea pame oe pocue!

²² Miqúianaaya echacomeejjijo chacochacoaní ojaya yajjijo ¡miqúanaja echacomeejjija esohuí jama chacomeya oe acue, ojjaña tii! ¡O ba majje a'a chaco nishojji! Cho. ¡E'e jojo neí quea bihúí nee oe chacocue ojaya! ¡Jamaya oe acue miqúianaaya! ¡Jesosa Quito oe

quea jea nee ejja'aqui! ²³ Miqüianaaya echacomeejijjo chacoañajo Eyacuiñajijjo chacoaña pea'ai. Jamajjeya ¡chaco neineicue Eyacuiñajijjo quea bihui nee epojji! ²⁴ E'e, miqüianajaya eba jama ba'a: Quijje eyajo esejaya Emeshi Mese neiya miquea echaco quea pame nee cuana sosequia caje'yo, ma ecua ohuaya huohui ca poa jayojjaya acaje'yo. E'e, miqüianaya chacochoacoani Jesosa Quitojo, esejaya Emeshi Mese neijo. ²⁵ ¡Bacue oe! Eyacuiñajijya ojjaña shajjama' cuana napa caje'yo quea mimishi poani sosejje. Ohuaya ojjañaja mimishi ba cani. Jamajjeya joya quea mimishi nee nee poani janobajjima nei napa caje'yo; joya quea mimishi pishana poani oe pojji napa caje'yo.

4

¹ Ojjaña echacomeejji cuaa, ¡shajja'ajjacue mo oe! Miquea echacojji cuana miquea yajijjo chacochoacoani ¡sosequiacue oya huïso ti! ¡Oya cuana oe jaahuanacue quea pame nee epojji! ¡A'a pajea'yojji miquea Emeshi Mese neiya eyajo aniya miya ba tiiti cani!

Pea cuana Pabohua niñeshe'a cani

² Epeejji cuana, ¡mimi majamajacue Eyacuiñajji nijje ojjaña pojajo! ¡Huea'ama mimicue! ¡Oya oe bihuicue onijje mimianijo! ³ ¡Eyacuiñajji nijje oe ojee mimicue ecuanajoya pea'ai! Jamajjeya ohuaya ecua huohui meesahua tiiti caje'yo esohui pame nee Jesosa Quitoja, ma onajaya yahuajo ba jjima. Ma esohui eya huohuijaya, dejja mimishi cuaa eya iña majje jeanobiajea ca'yonaje. ⁴ Jamatii miqüianaya ejo Eyacuiñajji nijje mimianijo, ohuaya eya Jesosa Quitoja esohui huohui meesahua caje'yo quea ja'a nee.

⁵ Jesosa Quitoja epeejji pojjeama cuana nijje mimianijo ¡jjashahuaba neineiquicue quea ja'a nee! ¡Quea pame nee oe ona nijje po tiitiicue pea'ai! ⁶ ¡Quea bei, quea ja'a nee pea'ai mimicue Jesosa Quitoja epeejji pojjeama cuana nijje! ¡jjashahuaba neineiquicue onijje mimi jjimahua! Jamajjeya onaya Jesosa Quito ba meesahuaje'yo.

Pabohua quea bihui nee esohui tehue canaje pea cuana huasijje

⁷ Dejja Tiqico bajjani Jesosaja epeejji, e jayojjaya Jesosajo chacochoacoani, ecuanajaya quea jea nee nee. Ohuaya eya chacosahua ca'yonaje Jesosa Quitojo quea pame nee pea'ai. Ohuaya miqüianaya huohui cañaquije ¡iquiojo e ba'yanijo. ⁸ Eyaya oya huoojeaje miqüiana huasijje e huohuiya. Ojaya esohui ecuanajo shajja'ajja majje ¡quea bihui nee pocue! ⁹ Tiqico nijje Onesimo poquije. Oya ecua jayojjaya Jesosaja epeejji quea pame nee pea'ai. Yahuajo oya miqüianajaya cuiñajijjo ba'ya poa. Ojjaña ¡iquiojo onaa acani huohui caje miqüiana huasijje, Onesimohua. ¹⁰ Anitaco enijje ejeyo'yo nequi ejjajejanobiaquijji eqüio. Ohuaya miqüianaya huohui'ajja cani jama ba'a: —¿Achajja acuae quiana so'o? — ojaya ebajji.

Macosohua pea'ai huohui'ajja cani: —¿Achajja acuae quiana so'o, de, ecuanajaya ebajji?

Oya Macoso Benabeja jjo'yaseja bacua ejja. Miqüiana que poquiyajo, ¡oya jaahuanacue quea pame nee! Jamaya eyaya miqüianaya huohuinaje yahuajo. ¹¹ Jesosa Josoto yani pea'ai. Ohuaya huohui'ajja cani pea'aiya: —¿Achajja acuae nequiana so'o, ecuanajaya ebajji?

¡iquiojo pea beca peejjima Jodio cuana Jesosaja epeejji yani. Ohuaya eya chaco meesahua cani quea pame nee Eyacuiñajijya yajijjo, esejaya Emeshi Mese neija yajijjo. Pea Jodio cuanaja enijje chaco jjima, de. ¹² Epapasi cuanaya yani enijje. Ohuaya pea'ai esohui quea bihui nee huohui cani miqüiana que. Yahuajo oya miqüiana nijje ba'ya poa pea'ai. Jesosa Quitoja yajijjo chaco cani ohuaya. Janobajjima nei mimi tiitiiani Eyacuiñajji nijje miqüianajo jama ba'a: —Eyacuiñajji, ¡mimiyaya ojjaña Conosajo ba'e cuana Jesosa Quito nijje ¡japeequi meesahuacue quea ja'a nee! ¡Miquea esohuijo e'e jojo nei oya cuana ¡jabahuejjaqui meesahuacue! ¡Miquea esohui jama ba'e tiiti meesahuacue, Eyacuiñajji! —jamaya Epapasi mimiani Eyacuiñajji nijje miqüianajo.

¹³ E'e, Epapasi mimi tiitiiani Eyacuiñajji nijje miqüiana jaahuanajji. Quea huesha cuiñajji yasijje Jesosaja epeejji cuana Naonisea cuiñajijjo ba'e yasijje, Jienaponi cuiñajijjo ba'e pea'ai yasijje Eyacuiñajji nijje mimi tiitiiani, Epapasi. Jamaya eyaya oya baña. ¹⁴ Ecuanajaya epeejji quea pame nee Noca bajjani yani ¡iquiojo. Oya eshicuijjiqiajji, de. Dejja Demasi bajjani yani pea'ai. Ohuaya esohui quea bihui nee huoojea cani miqüiana huasijje.

¹⁵ ¡Ecuanajaya esohui quea bihui nee huohuiquicue Jesosaja epeejji nei cuana huasijje Naoniseajo ba'e yasijje! ¡Epona Nema bajjani oe huohuicue! ¡Ojaya epeejji cuanaya pea'ai huohuicue, joya oja equi yasijje ¡jachachaquiani Eyacuiñajijya esohui baa! ¹⁶ E'e, ¡iquio ecua esohui etehue'yo ba neinei majje ¡huohuiquicue Jesosaja epeejji cuana huasijje Naoniseajo ba'e yasijje! Majoya ohuaya miqüianaya quia caje o'oya pea esohui etehue'yo, ma eyaya ebionei tehuenaje o que. ¡Ma esohui shajja'ajjacue, ojjaña miqüiaaya! ¹⁷ Pea dejja Aquipo bajjani huohuicue ecua esohui jama ba'a: —Eyacuiñajijya miya huoojea

ca'yonaje ojo chacohua. Jamajjeya ¡chacocue quea pame nee ojo! ¡Ojjaña joya ecua ohuaya huohui cani jamaya oe acue!

¹⁸ Eyaya ca eya jiquio esohui quea bihui nee tehue'yonaje. Dejja cuanaja eya pichojea'yo jjima; eya ejeyo'yo tii nequi. ¡A'a eya pajea'yojji! ¡Eyacuiñajjiya miqúanaya cajaahuana tiitii cahua quea pame nee!

Mahuiso. Eya Pabo bajjani esohui tehuejji. Apoa.

PABOJA ETEHUE'YO TESANONICA CUIÑAJIJO BA'E YASIJJE EBIONEI 1 TESALONICENSES

Pabohua esohui tehue canaje Jesosaja epeeji cuana Tesanonica cuiñajijjo ba'e yasijje

¹ Eya Pabo. Sinasi, Timoteo pea'ai enijje nequi. Jiquio esohui ecuaaya tehueaña miqiana huasijje, ma Jesosaja epeeji nei cuana Tesanonica cuiñajijjo ba'e yasijje. Miqianaya Eyacuiñajji eseja Chii ai nijje jjapeequiani, Jesosa Quito esejaya Emeshi Mese nei nijje jjapeequiani pea'ai. ¡Eyacuiñajjiya, Jesosa Quitohua pea'ai miqianaya quea pame nee cajaanahua cahua! ¡Quea bei capo mee cahua pea'ai!

Jesosaja epeeji cuana quea pame nee ba'yani

² Eyacuiñajji nijje mimianijo ecuaaya oya bihuiaña miqianajo. E'e, ecuaa Eyacuiñajji nijje mimi huicha'a huicha'ani miqianajo jama ba'a: ³ —Eyacuiñajji, ecuanaja Chii ai, Jesosaja epeeji Tesanonica ba'eca minijje jjapeequiani cuana quea pame nee nee. Miya ojaya quea boti nee nee; minijje quea pame nee chaco cani tii. Oya cuana Jesosa Quito nijje, ecuanaja Emeshi Mese nei nijje jjapee tiitiquiani quea pame nee. E'e, jashahuabaquiani jama ba'a: “Jesosaa ecuaa ba'e tiiti mee caje'yo onijje eyajo” —jamaya ecuaa mimiani Eyacuiñajji nijje miqianajo.

⁴ Epeeji cuana, miqianaya Eyacuiñajji quea jea nee nee. Ohuaya miqianaya babaca majje iyaa canaje ojaya epeeji epo tiiti'yojji. Jamaya ecuanajaya eba. ⁵ E'e, ecuaaya Eyacuiñajji esohui quea pame nee Jesosaja huohuinaje miqianajaya eshajja'ajajji. Edojjoshahua Pameya ecuanaya sohuihuohui meesahua canaje quea ja'a nee nee; miqianaya ba mee canaje Eyacuiñajji esohui e'e nei, dejjaja esohui pojjeama. Ecuaa quea pame nee ba'enaje miqiana nijje. Jamajjeya ecuanaya miqiaaya banaje quea pame nee ba'e. Jamajjeya miqianaya ba'enaje quea pame nee ecuaa jayojjaya. ⁶ E'e, miqianaya ecuaa jayojjaya ba'enaje quea pame nee nee; esejaya Emeshi Mese nei jayojja jama pea'ai ba'enaje. Jamajjeya pea cuaa miqianaya cuia canaje Jesosa nijje jjapee neinei quianijjo. Jamatii miqianaaya quea bihui neeya Jesosaja esohui shajja'ajjanaje; Edojjoshahua Pameya miqianaya quea bihui nee po mee canaje. ⁷ E'e, miqianaya quea ja'a nee jjapeequinae Jesosa nijje. Jamajjeya ojjaña Jesosaja epeeji cuana Masenonia meshijo ba'eca cuana, Acaya meshijo ba'eca pea'ai miqiana ba majje quea ja'a nee jjapeequi sa poani Jesosa nijje miqiana jayojjaya. ⁸ Miqianajaya esohui Emeshi Mese neijo, Jesosajo ojjaña Jesosaja epeeji cuaa shajja'ajja canaje. E'e, Masenonia meshijo ba'eca cuaa, Acaya meshijo ba'eca cuaa pea'ai shajja'ajja canaje. Ojjaña ba canaje miqianaya Jesosaja epeeji quea ja'a nee poani. Ojjaña cuaa quea huiso meshijo ba'eya pea'ai ba canaje miqianaya Eyacuiñajji esohui jayojja jama po tiitiani quea pame nee. E'e, ojjaña cuaa ojjaña meshi cuanajo ba'eya miqianajo shajja'ajja canaje. Jamajjeya ecuaaya oya cuana huohui o'oya jima aña. ⁹ Onaaya ca ca ecuaa huohui cani miqianajo jama ba'a: —Jesosaja epeeji cuana Tesanonica ba'e Pabojja esohui Jesosajo ebionei shajja'ajja jeahua jashajja'ajjaquinae quea bihui nee. Jesosaja epeeji cuana poanaje. Eyacuiñajji nisho, meshi epana'yo cuana bihuia pajea ca'yonaje. Jjeya nei ca ca oya cuana Eyacuiñajji e'e nei nijje jjapeequiani. E'e, Eyacuiñajji ca ca oe nei yani tii tii, eshe. ¹⁰ Ohuaya Eyacuiñajji Bacua Ejja oe nei Jesosaja epoe o'oyajji ishoa'ajja cani —jamaya ojjaña miqianajo poani.

E'e, Eyacuiñajji Bacua Ejja Jesosa mano'yajo, Eyacuiñajjiya oya ba'e mee ca o'oyanaje. Jjeya ohuaya, Jesosaa esejaya mimishi cuana cuijea ca poquipoqui'yani. Jamajjeya quijje Eyacuiñajjiya eseya sosequia caje'yo jiquio meshijo ba'ya poa sosejjea; ohuaya eseya quea nee nee epo mee'yojji pojjeama shajjama' cuana nijje.

2

Pabo chachococoa poa Tesanonica meshijo

¹ Yahujajo ecuaaya Jesosaja esohui huohuinaje; miqianaya shajjama' pojjeama poa. Chojja, shajja'ajja neinei nequiaa poa. Miqianajaya jama eba pea'ai ba'a: ² Miqiana baa Tesanonica huasijje poqui jjimahua ecuaa cuia canaje Jodio cuaa Pinipo cuiñajijjo ba'eca cuaa. Ecuaa nijje mimijajinaje pea'ai. Pea cuaa ecuaa cuia canaje Jesosaja esohui huohui mee ajjaa jjejojo; jamatii Eyacuiñajjiya ecuaa ojaya esohui quea pame nee Jesosa Quitojo huohui meesahua canaje miqiana huasijje mete'ama, miqianajaya eshajja'ajajji.

³ E'e, miqiana huasijje sohuihuohuiañajo ecuanajaya ejjashahuabaquijji quea ja'a nee poanaje. Ecuanajaya esohui sijje pojjeama. Miqiana dasia sa po'yo ajja pea'ai. ⁴ Chojja.

poanaje. ¹⁸ E'e jojo nei ecuana poqui o'oya sa poanaje miquiana huasijje. E'e eya, Pabo poqui huicha'a huicha'a'ajjanaje. Jamatii Edosiquiana neiya eya poqui mee jjima acanaje. ¹⁹ E'e jojo nei miquianaya Jesosaja epeeji poanijo, ecuana quea bihui nee nee poani. Jamajjeya esejaya Emeshi Mese nei Jesosa Quito poe o'oyajo, miquiana onijje nequi'yajo, ecuana quea bihui nee poaje'yo. E'e, jiquio ecua se chacochacoajo sosequia cajje eseya quea bihui nee poani jayojja jama ecuana quea bihui nee nee poaje miquiana Jesosa nijje nequi ba majje. ²⁰ E'e, miquianaya quea pame nee Jesosa nijje jjapeequianijo, ecuaaya Eyacuiñajji bihuliaña. Quea jaji nee poani pea'ai miquianajo.

3

Pabohua Timoteo huoojea canaje Tesanonicajo ba'eca cuana ba'ajja'yohua

¹ Jamajjeya miquianajo quea yeno jjashahuaba tiitiiqui majje eya jama poanaje ba'a: —E'e, eya ee nei Atena cuiñajji nequiije. Timoteo, ¡miya poquicue Jesosaja epeeji cuana Tesanonicajo ba'e baa! —eya poanaje.

² Majoya eyaya esejaya epeeji nei Timoteo huoojeanaje miquiana baa. Timoteohua ecuana nijjeya Eyacuiñajji esohui quea pame nee Jesosaja huohui tiitii cani. Eyaya oya huohuinaje jama ba'a: —Timoteo, ¡Jesosaja epeeji cuana quea ja'a nee, quea pame nee jjapeequi meesahuacue Jesosa nijje! ¡Oya cuana Jesosaja esohui jayojja jama atitii meesahuacue quea bihui nee! ³ Jamajjeya onaaya oya cuana cuia canijo, Jesosa nijje jjapeepajeaqui'yo ajja —jamaya eyaya Timoteo huohuinaje miquiana que huoojea jjimahuaa.

Jamatii miquianajaya eba pea cuaa Jesosaja epeeji cuana cuia caje'yo. Eyacuiñajji eba eseya ojaya epeeji cuana quea ja'a poaje onaa cuia cajje. Jamajjeya cuia pajea mee jjima acani. ⁴ E'e, yahuajo miquiana nijje nequiya ecuaaya huohuinaje jama ba'a: —Jesosaja epeeji poanijo pea cuaa eseya cuia caje.

E'e jojo nei. Jjeya pea cuaa miquianaya cuia cani. Jamaya miquianajaya eba. ⁵ Jamajjeya eya quea mete miquianajo poanaje. Timoteo huoojeanaje miquiana baa: —¡A'a Jesosa nijje jjapeequiani tii ba'ajjaqui'yo socue, Timoteo! —eya poanaje.

E'e, eya quea mete miquianajo poanaje. E'e pojj'a Edosiquiana neiya miquianaya Jesosa nijje jjapeequi pajea mee ca'yonaje. Jamaya epo'yo jojjemo, miquianajaya Eyacuiñajji esohui epajea'yo jojjemo ecuana quea yeno pome; esohui huohuijajji pojj'a eyaya sohuihuohuija nequinaje.

⁶ E'e de, miquiana ba majje jjeya nei Timoteo poe o'oyanaje e que. Ohuaya huohui caña'yonaje jama ba'a: —Jesosaja epeeji cuana Tesanonicajo ba'e Jesosa nijje jjapeequiani tii; pajea'yo jjima. Eyacuiñajji esohui jayojja jama po tiitiiiani; pea cuana quea jea nee acani. Eya pea'ai ohuaya quea jea nee acajjequinaje. Oya cuana ecuanajo jjashahuaba tiitiiquiani quea pame nee. Jiquio ecua ecuanaya jjashahuabaquinaje o baquijji jamaya oya cuana jjashahuabaquiniani ecuana bahuajji —jamaya eya Timoteohua huohui caña'yonaje miquianajo.

⁷ Jamajjeya ma shajja'ajja majje ecuana quea bihui nee poanaje. E'e de, ecuana aema' poani Jesosa nijje jjapeequianijo. Pea cuaa ecuana cuia cani pea'ai. Jamatii miquianaya ecuana quea bihui nee po meeña. E'e, miquianaya Jesosa Quitoja esohui jayojja jama poanijo tii miquianaaya ecuana quea bihui nee nee po meeña. ⁸ E'e de, miquianaaya esejaya Emeshi Mese neija esohui jayojja jama atitiiñaño, ecuana quea bihui nee, quea bei nee pea'ai poani. ⁹ E'e jojo nei jjeya miquianajo ecuaaya Eyacuiñajji bihulia neineiaña. Eyacuiñajji ecuana quea bihui nee po mee cani miquianaya quea pame nee onijje jjapeequianijo.

¹⁰ Jamajjeya ecuana onijje mimi tiitiiiani jama ba'a: —Eyacuiñajji, ¡ecuana poqui meesahua o'oyacue ecuanaja epeeji cuana baa! ¡Ojjaña miquea esohui huohui meesahua o'oyacue onajaya eshajja'ajjajji, quea pame nee minijje ejjapeequi'yojji! —jamaya ecuana Eyacuiñajji nijje mimiani ojjaña pojjajo, ojjaña mecajje pea'ai.

¹¹ Ecuana onijje mimi neineiani jama pea'ai ba'a: —Eyacuiñajji, ecuanaja Chii ai, Emeshi Mese nei Jesosa pea'ai, ¡che ecuana poqui meesahuacue Tesanonica huasijje miquea epeeji cuana baa! ¹² E'e Emeshi Mese nei, ¡miquea epeeji cuaa Tesanonicajo ba'e cuaa pea miquea epeeji cuana quea jea nee nee ameesahuacue! ¡Ojjaña cuana pea'ai quea jea nee ameesahuacue! ¡Ecuaa oya cuana quea jea nee nee añña jayojjaya jama oya cuana pea cuana quea jea nee ameesahuacue pea'ai! ¹³ E'e Eyacuiñajji, ecuanaja Chii ai, ¡oya cuana Jesosaja epeeji cuana quea ja'a nee po meesahuacue quea boejea, mimishi'ama eba'e'yojji! Jamajjeya ecuanaja Emeshi Mese nei Jesosaa ojjaña ojaya esohuidojojji cuana nijje poe o'oya majje oya cuana mi cojja nei nequi mee caje'yo quea boejea, bicho'ama. E'e, ¡jamaya acue Eyacuiñajji! —jamajjeya eya Eyacuiñajji nijje mimi tiitiiiani miquiana huasijje.

4

¡Quea pame nee ba'ecue Eyacuiñajji minijje quea bihui epoiji!

¹ Jamajjeya epeeji cuana, eyaya pea esohui tehueje miquianajaya ebajji. Yahuajo euaaya miquianaya huohuinaje quea pame nee eba'eji. Ma ecuanajaya esohui jayojja jama ba'yanijo, Eyacuiñajji quea bihui nee poani miquiana nijje. Jamaya miquianaya ba'enaje. Jjeya esejaya Emeshi Mese neiya, Jesosa Quitohua ecuana ma esohui tehue mee ca o'oyani miquiana huasijje quea pame tii eba'e poquijji. ² Yahuajo esejaya Emeshi Mese neiya, Jesosaa ecuana huoojea canaje miquiana sohuihuohuuya. Ma esohui miquianajaya eba. ³ Eyacuiñajji ejjashahuabaquijji miquianajaya eba'e'yojji jama ba'a: —¡Quea pame nee ba'ecue, mimishi'ama nei nei! ¡A'a onajaya ehuanase siijji! ¡A'a peaja yahue siijji! ¡A'a pea cojjojji pojji! ⁴ Dejja cuana, imiquianaya eponajo jjahuanacui sa poanijo quea ja'a nee jjashahuabaquicue! ¡Eyacuiñajji esohui jayojja jama epona huanacue quea pame nee! ⁵ ¡A'a quea mimishi jjashahuabaquijji Eyacuiñajji epeeji pojjeama cuana jayojja! Oya cuana aje oe pea epona cuana nijje jaani; ojaya ehuanase jaahuana jjima acani. ⁶ Onajaya ehuanase sii canijo, e'e jojo nei Eyacuiñajji dejja cuana quea nee nee po mee caje'yo. Jamajjeya miquianaya ca ca ja'a onajaya ehuanase siijji! ¡A'a jea bajji pea'ai! —jamaya Eyacuiñajji jjashahuabaquiani ojaya epeeji cuanajo. Jamaya yahuajo euaaya miquianaya huohuinaje.

⁷ E'e, Eyacuiñajji eseya iyaa majje huohui canaje jama ba'a: —¡Ecuea epeeji cuana po majje ecuea esohui jayojja jama ba'ecue quea pame nee nee! ¡A'a oe quea mimishi pojji! ¡A'a oe quea mimishi ba'eji!

⁸ ¡Iquio esohui cuana Eyacuiñajji esohui, de; dejjaja esohui pojjeama. Jamajjeya ojjaña joya jiquio esohui cuana jayojja jama ba'e sa po'yo ajja Eyacuiñajji nijje jjapeeji sa po'yo ajja; Eyacuiñajji cajaa a'yojji poani. Eyacuiñajji ca ca oe ese yasijje ojaya Edojjishahua Pame huoojea ca'yonaje quea pame nee eba'e meesahu'a'yojji.

⁹ Miquianaaya Jesosaja pea epeeji cuana quea jea nee añajo, eyaya miquiana que esohui etehue o'oyajji pojjeama ca comajo. E'e, Eyacuiñajji jjabahuejja meequi canaje ojjaña ojaya epeeji cuana quea jea nee e'ajji. ¹⁰ E'e jojo nei miquianaaya jamaya añaj; Jesosaja epeeji cuana ojjaña Masenonia meshijo ba'e cuana quea jea nee añaj. E'e, Eyacuiñajji esohui jayojja jama añaj miquianaaya. Epeeji cuana, ¡Jesosaja epeeji oe quea jea nee nee añaj! Jamaya euaaya miquianaya huohui neineañaj.

¹¹ Yahuajo euaaya miquianaya sohuihuohuinaje jama ba'a: —¡Quea bei ba'e tiitiicue! ¡A'a jjachichaquijji pea cuana miminaanaa ani yasijje! ¡Miquea bobijo, daquijo, eba'ejiijo pea'ai chacocue! ¡Quea ja'a nee jjashahuaba tiitiquicue! ¹² Jamajjeya miquianaya aguianajji poaje; miquianaya bobi yasijje epo'yojji pojjeama bobijji po'yo majje. Pea huasijje bobijo cua ajja poaje. Jamajjeya miquianaya quea pame ba'yan ba majje Jesosaja epeeji pojjeama cuana miquianaya shajja'ajja caje Jesosaja esohui miquianaaya huohuañaj. Jamajjeya miquianaya quea pame ba'eje.

Emeshi Mese nei Jesosa poe o'oyajo ojaya epeeji emano'yo cuana shequije o'oya

¹³ Epeeji cuana, eyaya jiquio pea esohui tehueña miquiana ba meejji e'e jojo nei Jesosaja epeeji cuanajo, ma yahuajo mano ca'ya poajo. Jamajjeya miquianaya yeno'ama poaje emano'yo cuanajo. Pea cuana ca ca, Jesosaja epeeji pojjeama cuana quea yeno nee nee poani emano'yo cuana shequi'yo jjima poanijo poso. ¹⁴ Enejaya eba e'e jojo nei Jesosa mano'yajo Eyacuiñajji oya shequi mee ca o'oya poa. Oya jayojjaya Jesosaja epeeji cuana mano'yajo, Eyacuiñajji oya cuana shequi mee caje o'oya. Jamajjeya Jesosa poe o'oyajo Eyacuiñajji onijje huoojea caje ojaya epeeji ma yahuajo mano'ya poa cuana. Jamaya e'e jojo nei; jamaya jjashahuabaquime eseya poani.

¹⁵ E'e, Emeshi Mese neiya Jesosaa ecuana huohui ca poa jamaya eyaya miquianaya huohuañaj jama ba'a: Poe o'oya majje Emeshi Mese neiya, Jesosaa ojaya epeeji eshe nequi cuana, ojaya epeeji yahuajo emano'yo cuana nijje ojee jjequisohua caje'yo onijje eyahuasijje. ¹⁶ E'e, Emeshi Mese nei Jesosa eyajo ani meshi yasijje poe jeahuajo janobajjima nei taaaje; esohuidojojji jaahuanaajji quea ca'a nee neeya emiajji mia cani jayojja taame poaje, janobajjima nei nei. Eyacuiñajji emiajji mia caje cuaa pea'ai. Majoya Emeshi Mese nei eyajo ani jipashineijje nequioqueje bo biajje nequi. Jamajjeya ojaya epeeji cuanaja, ma yahuajo mano'ya poaja eyami eshe po mee caje o'oya, eyacua. ¹⁷ Majoya poe o'oya majje, emano'yo cuanaja eyami eshe o'oya po mee majje Jesosa Quitohua ojaya epeeji eshe nequi cuana bo biajje jjequisohua caje'yo emano'yo cuana nijje, ojee. Bo biajje nequije Jesosa nijje. Majoya ojjaña ojaya epeeji cuana onijje ba'e tiitiije'yo Emeshi Mese nei nijje, Jesosa nijje. ¹⁸ Jamajjeya jiquio esohui quea bihui nee nee pocue! ¡Jesosaja pea epeeji cuana quea bihui nee po meesahuacue! ¡Iquio esohui cuana huohui huicha'a huicha'acue! Jama ba'a: —Jesosaa ojjaña ojaya epeeji cuanaja eyami eyacua po mee majje jjequisohua

caje'yo eyahuasijje onijje eba'e tiitii'yojji, ojaya epeeji yahuajo mano'ya poa cuana nijje pea'ai.

5

¡Jesosaja epoe o'oyajji jshashuaba tiitiiquicue!

¹ Epeeji cuana, ¡shajja'ajjacue mo oe! Jesosaja epoe o'oyajji miqúanajaya eba. Jamajjeya eyaya miqúanana huasijje etehuejji pojjeama ache pojajajo oya poeje o'oya ebaajo ese. ² Chojja, ¿ache pojajajo shai poeje o'oya Jesosa? Emeshi Mese neija epoe o'oyajji esejaya ba jjima epojja. ¡Iquío ecua siipojji quehuajje poecuajiani jayojja jama Jesosa quehua poecuajije o'oya. ³ O poe jjimahuajo pishana mimishi cuana jama poaje ba'a: "Ojjaña quea bei poani. Ecua quea pame nee ba'e tiitii'yo" onaa jama po'ajjaquijo tiya Jesosa Quito poeje o'oya. Mimishi cuana quea nee nee po mee caje'yo. E'e, Jesosa poe o'oyajo chama' eja'aniquehuajjiji poaje. ¡Iquío ecua epona cuana bacua nee cuajiani jama poecuajime poaje Jesosa.

⁴ Ecua epeeji cuana, miqúanana Jesosa nijje jjapeequiani. Jamajjeya ¡quea ja'a nee jshashuabaquicue! ¡Jesosaja epoe o'oyajji ishóa'ajja anicue! Jamajjeya ¡jiquío ecua siipojji chamajjo poso ecua jaahuana ajja jayojja jama a'a pojji! ¡Jesosaja epoe o'oyajji ishóa anicue! ⁵ Ojjaña miqúanana onijje jjapeequiani; quea ja'a nee nee ba'yani, epojjajo quea ja'a poquiani jayojja jama poani. E'e, eseya eshahua nijje poquiquehua ajja. ¡Joya ecua eshahua quea mimishi poani jama a'a pojji! ⁶ Pea cuana ca ca Jesosaja epoe o'oyajji ishóa ajja. Jamaya pojjeama eseya. Chojja. ¡Jesosaja epoe o'oyajji eja'ishóa'ajjaqui! ¡Quea ja'a nee ejshashuabaqui pea'ai!

⁷ Shajjama' cuana quea jshashuabaqui quehua poani Jesosaja epoe o'oyajji ishóa ajja. Quea jshashuabaqui quehua poanijo shajjama' cuana quea mimishi ba'yani. E'e, jiquío ecua mecajje huoo majje shajjama' cuana jshashuabaqui ajja jayojja jama onaya Jesosaja epoe o'oyajji jshashuabaqui ajja. ⁸ Eseya ca ca, Jesosaja epeeji cuana quea ja'a nee ba'yani Eyacuiñajjija esohui jama. Quea ja'a nee jshashuabaquiani. Jamajjeya Jesosaja epoe'yojji ishóa'ajjaña. E'e, jiquío ecua sohuinanohua baa daqui quea moo ese'ojje huosho cani onaja quecua jjima yajji jayojja jama eseya Jesosa nijje jjapeequiani. ¡Pea cuana quea jea nee nee eja'aqui pea'ai! Jamajjeya Eyacuiñajjija eseya Edosiquiana nei jeabichajea meesahua caje. Jiquío ecua sohuinanohua ejaahuojja ca'a, baajee sapajo iya cani onaja sapa jaja jjima yajji jayojja eseya Jesosa nijje jjapeequiani; esejaya eba Eyacuiñajjija eseya mimishi cuana cuijea'yo majje ba'e tiitii mee caje'yo onijje eyajo. ⁹ ¿A'a Eyacuiñajjija eseya babaca canaje cuaqui yasijje quea nee nee epo'yojji? Chojja. Esejaya Emeshi Mese nei nijje, Jesosa Quito nijje jjapeequianajo, mimishi cuana cuijea majje Eyacuiñajjija eseya ba'e tiitii mee caje'yo onijje. ¹⁰ E'e, Jesosa Quito eseya mimishijo mano'ya poa. Jamajjeya eseya onijje ba'e tiitii mee caje'yo eyajo. E'e pojja'a o poe o'oya jjimahuajo eseya mano'yo. E'e pojja'a oya poeje o'oya ese eshe nequijo. Jamatii ojjaña eseya onijje ojee ba'e tiitii'yo eyajo.

¹¹ Jamajjeya ¡jiquío esohuijjo quea bihui nee nee pocue! ¡Iquío esohui huohui huicha'a huicha'acue Jesosaja epeeji cuana quea bihui nee epojji! ¡Oya cuana Jesosa Quito nijje quea jaji nee jjapeequi meesahuacue pea'ai! Jamaya miqúiaaya aña; ¡jamaya oe atitiiicue!

¡Pabohua eba'ejji quea pamejo tehue canaje

¹² Epeeji cuana, ¡jeya eyaya pea esohui tehueña miqúanana ebajji jama ba'a: ¡Jesosaja epeeji eti cuana miqúanana nijje nequi shajja'ajjacue oe! Ohuaya miqúanana jaahuana cani, Eyacuiñajjija esohui huohui cani pea'ai. ¹³ Oya cuana Eyacuiñajjijo quea pame nee chacochoacoanijo ¡quea boti nee acue! ¡Quea pame nee jshashuabaquicue onajo pea'ai! ¡Ojjaña Jesosaja epeeji cuana nijje quea bei pocue!

¹⁴ E'e epeeji cuana, jama acue pea'ai ba'a: Jesosaja epeeji quea huea poanijo, ¡janobajjima nei onijje mimicue! ¡Epeeji quea mete cuana quea bei po meesahuacue! Epeeji eshahua nijje poquiquehua sa poanijo, ¡quea ja'a ba'e meesahuacue! ¡Tecue'ama po tiitiiicue ojjaña cuana nijje! ¹⁵ Onaa miya napa cajje ¡a'a jjasoseaquijji! ¡A'a onaya napa pea'aijji! ¡Ojjaña pojajajo jshashuaba neineiquicue ojjaña Jesosaja epeeji cuana nijje, pea cuana nijje pea'ai quea pame nee epojji! ¹⁶ Jesosaja epeeji poanijo ¡quea bihui nee po tiitiiicue! ¹⁷ ¡Eyacuiñajji nijje mimi huicha'a huicha'acue ojjaña pojajajo! ¹⁸ Miqúanana quea pame ba'yanajo, quea camaja miqúanajo poanijo pea'ai ¡jamatii Eyacuiñajji bihuiacue oe! Jamaya Eyacuiñajjija ejshashuabaqui'yojji miqúanajo, Jesosa Quito nijje jjapeequianajo.

¹⁹ Edojjoshahua Pame minijje mimianajo, ¡a'a shajjama' pojji! ²⁰ Eyacuiñajjija esohui huohuijija esohui huohui canijo, ¡shajja'ajja neineicue oe! ²¹ ¡Jamatii ojjaña esohui shajja'ajja neinei majje quea ja'a jshashuabaquicue! ¡Esohui e'e nei jama acue! ²² ¡Ojjaña mimishi cuana pajea neinei'yocue! E'e, ¡quea pame nee nee ba'e tiitiiicue!

²³ Jamajjeya eya Eyacuiñajji nijje miqiana huasijje mimiani jama ba'a: —Eyacuiñajji, miyaya ojjaña quea bei po tiitii meeaña. ¡Miquea epeeji cuana minijje jjapee neinei qui meesahuacue quea bojea nee epo'yojji! ¡Oya cuana ba'e meesahuacue quea pame nee nee, mimishi'ama: ojaya ejjashahuabaquijji, ojaya eyami pea'ai, ojaya edojjoshahua pea'ai! Jamajjeya ecuanaja Emeshi Mese nei Jesosa Quito poe o'oyajo oya cuana bicho'ama, mimishi'ama poaje'yo —jamaya eya mimiani Eyacuiñajji nijje miqiana huasijje.

²⁴ Eyacuiñajjiya ojaya esohui miqiana nijje epajea'yojji pojjeama tii tii. Ohuaya miqianaya iyaa canaje onijje ejjapee tiitiqui poquijji. Jamajjeya ohuaya miqianaya jjapeequi tiitii mee caje'yo quea pame nee nee.

²⁵ Ecuea epeeji cuana, ¡Eyacuiñajji nijje mimicie ecuanajo, ejo pea'ai!

²⁶ Ojjaña Jesosaja epeeji cuana nijje quea bihui nee mimicie jama ba'a: —Pabo miqianajo jjashahuaba tiitiquiani; quea jea nee nee pa mi Paboja.

²⁷ Eyaya Emeshi Mese nei Jesosaja esohui huohuijji poaniya miqianaya huohuiaña jama ba'a: ¡Jiquio ecuea esohui etehue'yo ojjaña Jesosaja epeeji cuana huasijje huohucue, ojjaña tii! Jamaya.

²⁸ ¡Esejaya Emeshi Mese neiya Jesosa Quitohua miqianaya quea pame nee cajaanahua cahua!

Mahuiso. Eyaya Pabohua jiquio esohui tehue'yonaje. Apoa.

PABOJA ETEHUE'YO TESANONICA CUIÑAJJI YASIJJE BECANEJJJJI PEA'AI 2 TESALONICENSES

Pabohua esohui tehue ca o'oyanaje Jesosaja epeeji cuana Tesanonicajo ba'e yasijje

¹ Eya Pabo. Sinasi, Timoteo pea'ai enijje nequi. Ecuaya jiquio esohui tehue o'oyaña miquiana huasijje, ma Jesosaja epeeji cuana Tesanonica cuiñajji ba'e yasijje. Miquianaya Eyacuiñajji esejaya Chii ai nijje jjapeequiani; Jesosa Quito esejaya Emeshi Mese nei nijje jjapeequiani pea'ai.

² ¡Eseyaya Chii ai Eyacuiñajjiya, esejaya Emeshi Mese nei Jesosa Quitohua pea'ai miquianaya cajaanahana cahua quea pame nee! ¡Quea bei capo mee cahua pea'ai! Jesosa Quito poe o'oya majje ojña huojea'yojji poaje'yo.

³ Epeeji cuana, ecuaaaya Eyacuiñajji nijje mimianijo oya bihuiaña miquianajo jama ba'a: —Eyacuiñajji, Jesosaja epeeji cuana Tesanonicajo ba'eca minijje jjapeequi poquipoquiani cuana quea pame nee nee. Ohuaya Jesosaja pea epeeji cuana quea jea nee nee acani; yahuaño ca ca pea cuana quea jea pishana aca poa —jamaya ecuaa Eyacuiñajji nijje mimi huicha'a huicha'ani miquianajo. Jamaya quea pame nee miquianaya Eyacuiñajji esohui jayojjaya jama po tiitianijo.

⁴ Jamajjeya Eyacuiñajjiya epeeji cuana pea meshijo ba'e cuana nijje ecuaa mimiani quea bihui nee miquianajo jama ba'a: —Jesosaja epeeji cuana Tesanonicajo ba'eca onijje jjapee tiitiquiani quea pame nee. Eyacuiñajjiya esohui jayojja jama poani. Oya cuana janobajjima nei napa cani cuaa Jesosa nijje jjapeequianijo. Jamati Jesosa nijje jjapeequi pajea'yo ajja.

⁵ E'e, jjea pea cuaa miquianaya napa cani Jesosa nijje jjapeequianijo. Miquianaya onijje jjapeequi pajea ajjajo Eyacuiñajjiya miquianaya Jesosaja epeeji quea ca'a po mee cani. Jesosa que, ma ese huojea'yojji poani yasijje eseya ba'e tiiti mee caje'yo onijje. Jamajjeya ojña cuaa ba caje Eyacuiñajjiya ejjashahuabaquiji miquianajo quea pame nee.

⁶ Eyacuiñajjiya quea pame nee nee atitii cani. Jamajjeya mimishi cuaa miquiana napa canijo, quijje Eyacuiñajjiya oya cuana sosequia caje'yo; quea nee nee po mee caje'yo tii tii.

⁷ Eyacuiñajjiya mimishi cuana eseya, Jesosaja epeeji cuana napa pajea mee caje'yo. Jamaya Eyacuiñajjiya eseya acaje'yo Emeshi Mese nei Jesosa poe o'oyajo. E'e, Jesosa eyajo ani quea jeajahua nee nee cuaqui jama oya jipashineijje nequioqueje. Eyacuiñajjiya esohuidojojji quea ca'a cuana onijje nequioqueje. ⁸ Nequioque majje ohuaya, Jesosaa ojña ojaya epeeji pojjeama cuana quea nee nee po mee caje'yo Eyacuiñajjiya esohui shajja'ajja sa po'yo ajja poajo, esohui quea pame nee nee Emeshi Mese nei Jesosaja jayojja jama a sa po ajja poa jojoya. ⁹ Jamajjeya oya cuana quea yeno poaje'yo tii tii. Eyacuiñajjiya oya cuana huojea caje'yo cuaqui yasijje quea nee nee epo tiiti nequi'yojji. Eseyaya Emeshi Mese nei quea pame nee nee, quea ca'a nee nee nijje eyajo eba'e'yojji pojjeama oya cuana. ¹⁰ Ojña ojaya epeeji cuana ca ca, ma ohua mimishi cuijea ca'yajje quea pame nee po mee ca'yonaje ca ca Jesosaa ba'e mee caje'yo quea pame nee nee poe o'oya majje. Eseyaya Jesosa bihuia neineije'yo ba majje. Epeeji cuana, miquianaaya ecuanaja esohui Jesosajo quea bihui nee shajja'ajanaje. Jamajjeya miquianaaya ojaya pea epeeji cuana nijjeya Jesosa bihuia neineije'yo.

¹¹ Jamajjeya ecuaa Eyacuiñajji nijje mimi huicha'a huicha'ani miquiana huasijje jama ba'a: —Eyacuiñajji, miyaya miquea epeeji cuana iyaanaje quea pame nee minijje ejjapeequi'yojji. Jamajjeya ¡oya cuana quea pame nee ba'e meesahuacue mi jayojjaya! E'e Eyacuiñajji, miquea epeeji cuana quea pame nee po sa poani. Miya quea ca'a nee nee poani tii. Jamajjeya ¡oya cuana quea pame nee po meesahuacue! ¡Miquea esohui jayojja jama amesahua tiiticue quea pame nee, Jesosa nijje jjapeequianijo! —jamaya eya mimiani Eyacuiñajji nijje.

¹² Jamajjeya Eyacuiñajjiya miquianaya ba'e meesahua canijo, miquiaaya Jesosa bihuiaje jama ba'a: —Emeshi Mese nei Jesosa, ¡miya quea pame nee nee poani tii tii!

Jesosaa miquianaya pea'ai bihuia caje jama ba'a: —Miquianaya ecuea epeeji quea pame nee.

E'e, jamaya poaje Eyacuiñajjiya, esejaya Emeshi Mese nei Jesosa Quitohua pea'ai miquianaya jaahuana cani quea pame nee nee.

2

Jesosa poe jimahuaño Edosiquiana nejja epeeji quea mimishi nee nee poeje'yo

¹ Ecuea epeeji cuana, e'e jojo nei esejaya Emeshi Mese nei poeje o'oya. Eseyá, ojjaña ojaya epeeji cuana ojee jjequisohua caje'yo onijje epo'yojji tii tii. ² Jamajjeya iquea jjashahuabaqui ja'a nee pocue! ¡A'a quea mete pojji Jesosa Quito poe o'oyanajejo poso! Onaya siajje poani jama ba'a: —Emeshi Mese nei Jesosa poe o'oyanaje yahuaajo. Jamaya Pabo poanaje —jama siajje pomeya poani cuana.

¡A'a quea mete pojji pea cuanaja esohui e'e nei pojjeama! Chojja, Jesosa poe o'oya jjima. E'e pojja'a pea cuana siajje poanaje jama ba'a: —Eyacuiñajjiya ecuana ma ohua quijje acaje'yo huohui meesahua cani. Ohuaya ecuana ba mee canaje Jesosa Quito poe o'oyanaje —jamaya poani beca cuana.

Onaya siajje poani jama ba'a: —Pabohua, ojaya epeeji cuaa pea'ai tehue canaje Jesosa poe o'oyanaje yahuaajo pishana —jamaya poani cuana.

Chojja, oya poe o'oya jjima. ³ ¡Ma siajjepojji cuana a'a shajja'ajjajji! Onaaya miquianaya jjashahuabaqui quehua mee ca chana'. Jamajjeya eyaya miquianaya huohuije Jesosa Quitoja epoe o'oyajji: Ebionei, Jesosa Quito poe jjimahuaajo, quea huiso cuana onijje jjapeequi pajea caje'yo, Eyacuiñajjiya esohui shajja'ajja sa po'yo ajja poaje pea'ai. Majoya Edosiquiana neija epeeji quea mimishi nee nee poeje. Oya Eyacuiñajjiya quea nee nee po mee caje'yo cuaquijo. ⁴ Ma deja quea mimishiya jama acaje ba'a: Ohuaya Eyacuiñajji e'e nei, ojjaña eyacuiñajji nisho cuana pea'ai jeabichajea mee sa acaje. Ojjaña cuana jjashahuabaqui quehua mee sa acaje jama ba'a: —Oya oe nee quea pame nee nee poani. ¡Ojjaña oya cabihua cahua! —poaje cuana.

Oya Jenosanena huasijje poqui majje Eyacuiñajjiya equi quea quemo huasijje dobiquire. Anioque majje siajje poaje jama ba'a: —Eya ca ñña Eyacuiñajji e'e jojo nei —jama siajje pomeya poaje.

⁵ Epeeji cuana, yahuaajo eyaya miquiana nijje nequiya jamaya huohuinaje. ¿A'a ecuea esohui pajea'yonaje? ⁶ ¿A'iojji ma dejja quea mimishi nee nee poe jjima? Miquianajaya eba. Eyacuiñajjiya poe mee jjima jjejojo mi poeyani. Jamajjeya quijje ojaya epoeji apoa poajo ma dejja, Edosiquiana neija epeeji quea mimishi nee nee poani poeje. ⁷ Jjeya Edosiquia huoojeaji poaniya dejja cuana quea mimishi quehuajje po mee cani. Jamatii jjeya Eyacuiñajjiya Edosiquiana neija epeeji quea mimishi nee nee poe mee jjima acani. Quijje ca ca oya poeje ojjaña Jesosa nijje jjapeequi mee pajea'yohua nisho. ⁸ Majoya ojjaña oya ba caje ecójjaa. Jamatii esejaya Emeshi Mese neiya, Jesosaa oya tecueajea caje'yo, mano mee caje'yo. Ma ohua acaninaje chama'yo tii po mee caje'yo. Jamaya Jesosaa quea ca'a nee nee, quea jeajahua nee nee poe'yo majje acaje'yo, ojjaña huoojea'yojjiya. ⁹ Edosiquiana huoojeaji poaniya, Satanasa bajjaniya ma dejja quea mimishi huoojea caje. Jamajjeya ohuaya oya ma pea dejjaa ajjima acani amesahua caje ojjaña dasiajji nisho. Ba majje ojjaña quea ajjajja nee nee poaje, quea mete nee nee poaje cuana. ¹⁰ Ma dejjaa quea mimishi nee neeya quea huiso cuana dasia caje'yo. Jesosaja epeeji pojjeama cuana dasia neinei caje'yo, ojjaña joya cuaqui yasijje poquije'yo. Onaya aje oe Jesosaja esohui e'e nei shajja'ajja sa po ajjajojo Jesosaa ojaya mimishi euijea'yojji pojjeama. Jamajjeya cuaqui yasijje poquije'yo. ¹¹ Shajjama' poani jojoya Eyacuiñajjiya oya cuana jjashahuabaqui meesahua ajja. Jamajjeya onaaya Edosiquiana neija epeejiya siajje acani e'e jojo nei poso acaje cuaa. ¹² Jamajjeya oya cuana, ojjaña joya Jesosaja esohui shajja'ajja sa po'yo ajja, ojjaña joya mimishi quea boti nee nee aji poani Eyacuiñajjiya huoojea caje'yo cuaqui yasijje.

Eyacuiñajjiya ojaya epeeji cuana ba'e tiitii mee caje'yo

¹³ Jesosaja epeeji cuana, ecuana Eyacuiñajji nijje mimi majamajani miquianajo jama ba'a: —Eyacuiñajji, ecuaya miya bihuiaña. Miyaya miquea epeeji cuana Tesanonicajo ba'e Jesosa nijje jjapeequi meesahua'yonaje quea pame nee —jamaya ecuana mimiani Eyacuiñajji nijje miquianajo.

E'e epeeji cuana, miquianaya esejaya Emeshi Mese neija quea boti nee nee. Yahuaajo nei nei, meshi pana jjimahuaajo Eyacuiñajjiya miquianaya babaca ca'ya poa Jesosaja epeeji epojji, onijje eba'e tiitii'yojji. Ohuaya Edojjoshahua Pame huoojea ca'yonaje miquiana Jesosa nijje jjapeequi meesahua'yojji. Jamaya miquianaya Eyacuiñajjiya acani ojaya esohui jayojja jama añajo. ¹⁴ Eyacuiñajjiya ecuana huoojea canaje miquiana huasijje ojaya esohui huohuiya. Jjashajja'ajjaquajajo Eyacuiñajjiya miquianaya Jesosa nijje jjapeequi meesahua ca'yonaje. Jamajjeya miquianaya esejaya Emeshi Mese nei nijje, Jesosa Quito nijje quea ja'a nee ba'e tiitii mee caje'yo eyajo pea'ai.

¹⁵ Jamajjeya epeeji cuana, ¡esohui e'e nei pojjeama a'a shajja'ajjajji! ¡Ecuanaja ehuohui'yo, esohui etehue'yo cuana pea'ai a'a pajea'yojji! ¹⁶ Jamajjeya ecuana Eyacuiñajji nijje, Jesosa Quito nijje pea'ai mimi neinei ani jama ba'a: —Jesosaa Quito, miya ecuanaja Emeshi Mese nei. Eyacuiñajji, miya ecuanaja Chii ai eyajo ani. Miya quea pame nee nee. Miyaya

ecuana quea jea nee aña. Jamajjeya Edojjoshahua Pame huojeanaje ecuana quea bihui nee po tiitii meeya. Miyaya ecuana ba'e tiitii meeje'yo eyajo pea'ai. ¹⁷ Jamajjeya imiquea epeeji cuana Tesanonicajo ba'e quea bihui nee, mete'ama po meecue! ¡Oya cuana ba'e meesahuacue tii quea pame nee! ¡Miquea esohui quea pame nee jayojja jama atiitii meesahuacue pea'ai! —jamaya ecuana mimiani Eyacuiñajji nijje miqianajo.

3

¡Eyacuiñajji nijje mimicie ecuanajo!

¹ Epeeji cuana, jjeyahua nei ecuaaya pea esohui tehueje miqianajaya ebajji. ¡Eyacuiñajji nijje mimicie ecuanajo! Jama acue ba'a: —Eyacuiñajji, ecuanaja Chii, ¡miyaya Pabo, ojaya epeeji cuana pea'ai jaahuanacue! ¡Jesosaja esohui huohuicuaaji meesahuacue ojjaña cuana huasijje! Esohui shajja'ajja cajo ¡quea huiso minijje jjapeequi meesahua'yocue! Jamajjeya ¡ecuanaja jayojjaya pea cuana jjeyahua nei Jesosaja epeeji po meesahuacue! ¡Ojaya esohuijjo jashajja'ajja meesahua'yocue pea'ai! ² E'e Eyacuiñajji, ¡Pabo, ojaya epeeji cuana pea'ai jaahuanacue dejja mase cuanajo, mimishi cuanajo pea'ai! ¡A'a Pabo napa meeeji cuana esohui huohui canijo! —jamaya mimicie Eyacuiñajji nijje ecuanajo. E'e, quea huiso cuana Jesosa nijje jjapeequi sa po'yo ajja.

³ Eseyá Emeshi Mese nei Jesosaa pajea'yo jjima acaje. Ma ohua yahuajo huohui ca poa jayojja jama ohuaya e'e jojo nei acaje'yo. Jamajjeya miqianaya onijje jjapeequi meesahua caje'yo tii tii quea ja'a nee, ohuaya. Edosiquiaa miya napa cajo, quea mimishi po mee sa acajo, ohuaya miqianaya jaahuana tiitii caje'yo; quea pame nee ba'e meesahua caje'yo. ⁴ Ecuanajaya eba esejaya Emeshi Mese neiya, Jesosaa miqianaya jaahuana cani. Jamajjeya miqianaaya ecuanaja esohui pajea'yo jjima aje; atiitii'ye'yo pea'ai. E'e, jamaya ecuanajaya eba. ⁵ Ecuanaya Eyacuiñajji nijje mimiani miqianajo jama ba'a: —Eyacuiñajji, ecuanaja Chii, miyaya Jesosaja epeeji cuana Tesanonicajo ba'e quea jea nee aña. ¡Maya oya cuana ba meesahuacue! Ecuanaja Emeshi Mese nei Jesosa meshijo ba'yahua quea nee nee poanaje mimishi cuaa napa cajje. Jamatii ohuaya miya pajea'yo ajja tii tii poanaje, quea quene nee nee po jjima pea'ai. ¡Jesosa Quito jayojja jama ojaya epeeji cuana po meecue! Jamajjeya mimishi cuaa napa cajo Jesosa nijje jjapee tiitiiquije'yo. ¡Jamaya oe ameesahuacue cuana, Eyacuiñajji! —jamaya ecuana Eyacuiñajji nijje mimiani.

Ojjaña cachaco cahua

⁶ Epeeji cuana, ¡jjeya ecuanaja pea esohui shajja'ajjacue! Eseyá Emeshi Mese nei Jesosa Quitohua ecuana huohui meesahua cani jama ba'a: —¡Jesosaja epeeji quea huea cuana nijje a'a jjapeequijji! Ma epeeji quea huea cuana chaco chaco ajja, ecuanaja esohui jayojja jama ba'e sa po'yo ajja, jashajja'ajjaqui ajja pea'ai. ⁷ Miqianaaya ecuana banaje miqiana nijje nequiya chaco tiitinaje, huea'ama poanaje. ¡Ecuanaja jayojjaya jama pocue; huea'ama chaco tiitii'cue! ⁸ E'e, ecuaaya miqianajaya aquiana eba'e'jji jjeshe majje sosequianaje; sosema' pojeama jjeshenaje. Mecajje, epojjajo pea'ai chaco tiitinaje ejjeshejji sosejje, bobi jjeshejji. Jamajjeya miqianajaya bobi cuana jjeshe jjima sosema'. ⁹ Jesosaa ecuana huojea canaje ojaya esohui huohuuya. Jamajjeya esohui huohuiaña sosejje ecuaaya miqianaya cahuohuiahua jama ba'a: “¡Ecuaana eba'e'jji quiacue sosema', esohui huohuiaña sosejje!”

Jamatii ecuaaya miqianaya jamaya ajjima nei nei. Chojja, ecuaaya chaconaje aquiana jjeshejji. Jamaya quea pame nee. ¡Ecuaana jayojjaya jama pocue! ¡Miqianaaya chacocue! ¹⁰ Miqiana nijje ba'yahua ecuaaya huohuinaje jama ba'a: —Ojjaña joya quea huea poani, chaco chaco sa po'yo ajja aje oe ja'a bobiajji!

¹¹ Epeeji cuana, onaaya ecuana huohui canaje jama ba'a: —Jesosaja epeeji cuana Tesanonicajo ba'e quea huea poani beca cuana. Pea cuanajo maimaiani, quea miminaa poani, chaco chaco sa po'yo ajja tii pea'ai. Jamaya quea pame pojeama poani.

¹² Jamajjeya esejaya Emeshi Mese neiya, Jesosa Quitohua ecuana huohui meesahua cani ojjaña quea huea poani yasijje jama ba'a: —¡Eyacuiñajji esohui jayojja jama ba'ecue! ¡Quea bei pocue! ¡Chacocue oe! ¡Bobi miquea tii ijjiacue! —jama huohuimeya ecuaaya aña joya quea huea poanijo.

¹³ Ecuaa epeeji cuana, miqianaaya pea cuana quea pame nee aña. ¡Jamaya quea pame nee atiitii'cue! ¡A'a quea huea poji!

¹⁴ Beca cuana ¡iquio esohui etehue'yo jayojja jama a sa po'yo ajja pojja'a. ¡Shajjama' cuana ba neineicue! ¡Ona nijje a'a jjapeequijji! Jamajjeya shajjama' cuana quea bicho poaje ojaya mimishi cuanajo. Quea bicho po majje jashajja'ajjaquije pojja'a. ¹⁵ Jesosaja epeeji cuana quea mimishi poanijo, shajjama' poanijo ¡jamatii a'a quea quene nee nee poji onijje! Chojja. Oya cuana miquea epeeji. ¡Huapa pojeama jayojja jama oya cuana niñeshe'acue!

Pabohua esohui quea bihui nee huohui canaje

¹⁶ Ecuea epeeji cuana, ¡bacue ecuea pea esohui! Eya Eyacuiñajji nijje mimiani miqianajo jama ba'a: —Eyacuiñajji, ecuanaja Emeshi Mese nei, miyaya ecuana quea bei po mee tiitiiaña. Jamajjeya ¡miquea epeeji cuana Tesanonicajo ba'e quea bei nee nee po meecue, quea bei tii tii! ¡Oya cuana jaahuanacue, quea pame nee ba'e meesahuacue! —jamaya eya poani.

¹⁷ Eya Pabo. Eyaya ca eya jiquio esohui quea bihui nee tehue'yonaje miqiana huasijje. Jamaya eyaya ecuea bajjani tehueña ojjaña ecuea esohui etehue'yojo. Jamajjeya ¡miqianaaya bacue jiquio esohui ecue tehue'yo!

¹⁸ ¡Esejaya Emeshi Mese neiya Jesosa Quitohua miqianaya quea pame nee cajaanahua cahua!

Mahuiso ecuea esohui. Apoa.

PABOJA ETEHUE'YO TIMOTEO HUASIJJE EBIONEI 1 TIMOTEO

Pabohua esohui tehue canaje Timoteo que

¹ Timoteo, eyaya esohui tehueña mi que miquea ebajji. Eya Pabo, Jesosa Quitoja esohui huohuijji. Jamaya Eyacuiñajjiya, Jesosa Quitoja pea'ai eya huoojea canaje. Eyacuiñajjiya esejaya mimishi cuana cuijea jeyojeyo ca'yonaje. Jesosa Quitoja eseya ba'e tiitii mee caje'yo onijje, esejaya ejjashahuabaqui'yojji quea pame jayojja. ² Timoteo, miya ecuea ebacua eja jayojja poani Jesosa nijje jjapeequianijo. Jamajjeya eyaya esohui tehueña mi que.

Eyacuiñajji esejaya Chii ai eyajo ani; Jesosa Quito eseya Emeshi Mese nei poani pea'ai. ¡Ohuaya miya cajaanhuana cahua quea pame nee! ¡Mijo cajjashahuabaqui'yahua quea pame nee pea'ai! ¡Miya quea bei nee capo mee cahua pea'ai!

¡Esohui e'e nei pojjeama a'a shajja'ajjajji!

³ Timoteo, ecuea esohui minijje Masenonia meshi yasijje poquianijo jama eyaya huohuije o'oya ba'a: ¡Epeso cuiñajjiyo nequicue! Jamajjeya miyaya pea esohui huohuijji cuana huoojeacue jama ba'a: —Esohui e'e nei pojjeama Jesosajo ja'a huohui o'oyajji! Esohui e'e nei pojjeama cuana, esohui quea huiso etiiquianaja pea'ai ja'a shajja'ajjajji! ⁴ Ma esohui cuanajo jjashahuabaqui majje dejja cuana mimicuijjeanobiajea cani cuaa. Jamajjeya joya cuana e'e jojo nei Jesosaja epeeji cuana ca ca jjabahuejja neinei qui meecue! ¡A'a oe esohui quea quehua shajja'ajjajji! ⁵ E'e, Eyacuiñajjiya esohuijo esohui huohuijji cuana jjashahuabaqui majje mimishi a sa po'yo ajja poani. Quea jjashahuabaqui pame poani pea'ai. Jamajjeya Jesosaja esohui e'e jojo nei jama acanijo pea'ai pea cuana e'e jojo nei quea jea nee acaje'yo. ⁶ Jamaya po ajja esohui huohuijji shaja. Jamajjeya oya cuana esohui quea ja'a pojjeamajo mimimimiani. ⁷ Moisesija esohui etehue'yojo huohui sa poani. Ma esohui ojaya ba jjima; quea quehua ojaya. Jamatii mimi neinei ani esohui huohuijji shaja cuana.

⁸ Jamaya esejaya eba ba'a: Moisesija esohui etehue'yo cuana quea pame nee. ¿Apiojji acuae Moisesiya esohui tehue ca poa? Quea jjashahuabaqui ja'a po majje ca oe ¡Moiseija esohui etehue'yo jayojjaya jama acue! ⁹ ¡Bacue oe! Eyacuiñajjiya Moisesi esohui tehue mee ca poa dejja quea pame tecueajji pojjeama. Cho, tehue mee canaje shajjama' cuana tecueajji. Dejja shajjama' jama poani ba'a: Esohui etehue'yo jayojja jama a'ajja; emeshi meseja esohui jama a sa po ajja pea'ai; Eyacuiñajji shajja'ajja sa po ajja; quea tai ba'yani; quea jjashahuabaqui tai poani; Eyacuiñajjiyo jjashahuabaqui ajja; oja chii quecuajji poani; oja nae quecuajji poani; pea cuana quecuajji poani pea'ai. ¹⁰ E'e, shajjama' cuana pea cojjojji poani; pea dejja see huejja cojjojji poani; pea epona so cojjojji poani; peaja ebacua sii majje quiajji poani; pea jeameejji poani; siajjepojji poani; oya esohui pajea'yojji poani; peaja esohuijo siajje poani pea'ai; Eyacuiñajjiya esohui etehue'yo jama po ajja pea'ai. ¹¹ E'e, ¡iquio Moisesija etehue'yo Eyacuiñajjiya esohui quea pame nee nee. Maya eya Eyacuiñajjiya huohui meesahua cani. Oya quea ca'a nee nee; oe nei quea pame nee nee eya jaahuana cani, Eyacuiñajjiya.

Eyaya Jesosa Quito bihuiaña ohua sohuihuohui meesahua caniya jjejojo

¹² Eseyaya Emeshi Mese nejja, Jesosa Quitoja eba ojaya esohui pajea'yo ajja tii tii, eya. Jamajjeya ohuaya eya huoojea ca'yonaje ojaya esohui huohuiya. Jamajjeya eyaya Jesosa Quito bihuiaña ohua sohuihuohui meesahua caniya jjejojo. ¹³ Yahuaajo aje eya Jesosa nijje mimijaji'yonaje, ojo quea tai miminaje, ojaya epeeji cuana iña mee'yonaje ejeanobiajeajji. Jamatii, eya jjashahuabaqui jjimahua, oya ecuea ba jjimahuajo, Jesosa Quito ejo quea tecue jjashahuabaqui tiitiqui'yo ajja poanaje, de; ¹⁴ ejo quea pame nee jjashahuabaquinaje de, esejaya Emeshi Mese nei, Jesosa Quito. Jamajjeya jjeja eya ojaya epeeji nei poani; ohuaya eya quea jea nee nee acani, de.

¹⁵ ¡Bacue ¡iquio esohui e'e nei nei, quea pame nee poani! Ojjaña cuaa caba neinei cahua jama ba'a: Jesosa Quito ¡iquio meshi yasijje poeyanaje ojjaña cuanaja mimishi cuana cuijea'yohua. Eya jamaya jjashahuabaqui ani ba'a: Ojjaña dejja cuana quea mimishi pishana; eya ca ca quea mimishi nee nee poanaje. ¹⁶ Jamatii Jesosa Quito ejo quea pame nee jjashahuabaquinaje, de. Jamajjeya oya enijje tecue'ama poanijo, pea cuaa ba cani oya tecue'ama enijje, oya tecue'ama dejja mimishi cuana nijje, ca onijje jjapeequi'yajo. Ba'e tiitii mee caje'yo Eyacuiñajji nijje.

¹⁷ ¡Emeshi Mese nei ejjashajja'ajjaqui! ¡Ejjabihua tiitiiquei pea'ai! Eyacuiñajji ese huoojeajji poani nequi tiitiije'yo. E'e, oe nei Eyacuiñajji yani; pea chama'. Jamajjeya oya dejja cuanaja ecojja bajji pojjeama. Jamaya capoahua.

Jamaya pea cuana cahuhui cahua Timoteohua

¹⁸ E'e Timoteo, miya ecue bacua ejja jayojja jama poani. Jamajje eyaya miya huoojeaña ecuea esohui huohuiya pea esohui huohuijji cuana huasijje. Yahuajo pishana pea cuaa miya huohui canaje jama ba'a: —Timoteo, quijje miya esohui huohuijji quea pame nee nee poaje'yo —acanaje cuaa miya.

Jamajjeya ¡esohui e'e jojo nei janobajjima nei huohucue quea bihui nee, dejja quea ca'a jayojjaa! ¹⁹ ¡Eyacuiñajjija esohui e'e nei shahuaba neineicue! ¡Quea ja'a nee ba'ecue e'e jojo nei ojaya esohui jayojja jama! Beca cuana jama a sa po'yo ajja jjejojo poquiquehua'yonaje. Jamajjeya aema' nei nei jayojja jama poanaje. Esohui e'e jojo nei pajea ca'yonaje, Jesosa Quitoja. ²⁰ Jamaya poanaje dejja bajjani Imeneo, Aneano cuanaya. Jamajje eyaya oya cuana cajaa a'yonaje. ¡Edosiquiaa canapa cahua! Jamajjeya ¡oya cuana cajjabahuejjaquiahua Eyacuiñajji nijje emimijaji pajea'yojji!

2

Jesosaja epeeji cuana ojjaña cuanajo camimiquiahua Eyacuiñajji nijje

¹ Ebionei eyaya huohuiña jama ba'a: ¡Eyacuiñajji nijje mimicue! Eseyá cuana Eyacuiñajji nijje camimiquiahua ojjaña cuanajo. Jamajjeya Eyacuiñajjija epeeji cuana jama ameeucue ba'a: —Ecue Chii ai, Eyacuiñajji, ¡eya ba'e meesahuacue! ¡Ojjaña cuana ba'e meesahuacue pea'ai! Ecuayaya miya bihuiña. ² Jamajjeya ¡ojjaña cuana jaahuanacue! ¡Emeshi mese cuana, emeshi meseja echacojji cuana pea'ai huohui meesahuacue quea bei nee! Jamajjeya ecuanaya miquea esohui jayojja jama quea ja'a nee ba'yanijo quea bei nee nequije'yo —jamaya acue cuana.

³ E'e, jamaya onijje mimianijo Eyacuiñajji quea bihui nee po meeña, eseyaya. Ohuaya esejaya mimishi cuana cuijea ca'yonaje, de. ⁴ Ojjañaja mimishi cuana cuijea neinei'yo sa poani pea'ai. Ojaya esohui e'e nei ba meesahua sa poani pea'ai. ⁵ Oya ojjaña nahue sa poani. E'e, Eyacuiñajji e'e jojo nei oe nei yani dejja cuiñajji. Cuanaya oe nei yani Jesosa Quito. E'e, Eyacuiñajji dejja quea mimishijo quea tecue poani. Jamajjeya Jesosa Quito Eyacuiñajji nijje mimiani ojjaña dejja mimishi cuanajo. Eyacuiñajji quea bei ona nijje poaje'yo. Jesosa Quito Eyacuiñajji; oya dejja pea'aya poanaje. ⁶ Oya mano'yonaje ojjañaja mimishi cuijea mee'yojji sosejje. Jamaya oya sa poanaje. Jamajjeya ojjaña cuana ba'e tiiti mee sa poani Eyacuiñajji nijje eyajo. ⁷ Jamajjeya Jesosaa huoojea canaje ojaya esohui huohuiya. E'e jojo nei, siájje pojjeama, ohuaya eya huoojea ca'yonaje Jodio pojjeama cuana huasijje ojaya esohui e'e nei huohuiya. Jamajjeya ojjaña cuana eyaya Jesosajo ¡jabahuejjaqui meeje'yo.

Jamaya ca'a cahua Eyacuiñajjija equijo

⁸ Majoya eyaya miya huohuiña jama ba'a: Eseyá, ojjaña meshi cuanajo ba'e cuana pea'ai camimiquiahua Eyacuiñajji nijje ojaya equijo. Onijje mimianijo ¡a'a quea mimishi pojji! ¡A'a quea quene pojji pea cuana nijje! ¡A'a ¡jamimicuijae nobiajeaquijji pea'ai!

⁹ Majoya eyaya miya huohui meeña epona cuana jama ba'a: —Epona cuana, ¡daqui quea pame nee huoshocue! ¡A'a daqui huoshojji quea bicho epo mee'yoyji! ¡Aquiana quea nahue neeya ehoojja a'a ¡jija ca'a meeji! ¡Mei siyosiyó quea nahue nee nee, eijji quea nahue nee nee pea'ai a'a ¡yijji! ¡Daqui quea nahue nee nee a'a huoshojji pea'ai, eponaa! —jamaya acue, Timoteo, jamajjeya peaja eja bajji pojjeama.

¹⁰ Timoteo, ¡epona cuana jama acue pea'ai ba'a: —Epona cuana, ¡miya Eyacuiñajji bihuijji poanijo quea ja'a nee nee ba'ecue! ¹¹ ¡Jjabahuejjaquicue, Jesosaja epeeji nei pocue! ¡Esohui huohuijjiya esohui huohui canijo ¡jashajja'ajjaquicue! ¡A'a mimi neineijji! —jamaya epona cuana acue!

¹² Eyaya epona cuana huoojea ajja dejja cuana huasijje esohui huohuiya. Cuanaya ¡a'a dejja cuana huoojeajji eponaa! Cho, jamaya quea pame pojjeama. Epona ca oe cajjashajja'ajjaquiahua. ¹³ E'e, Eyacuiñajjija ebionei dejja Adana bajjani pana coo ca'ya poa. Majoya Adana pana'yo majje epona Ema bajjani pana ca'ya poa. ¹⁴ Edosiquianaja Adana dasia'yo ¡jima poa; epona ca ca oe dasia ca'ya poa. Dasia cajje shajjama' poanaje. Quea mimishi aca'yonaje Emaa. ¹⁵ Jamajjeya bacua cuayanijo epona quea nee nee poani. Jamati, Eyacuiñajjija eponaja mimishi cuana cuijea caje'yo pea'ai ca ojaya esohui jayojja jama ¡jashahuabaquianijo, ojaya epeeji poanijo. (Eyacuiñajjija epona cuana cuaqui yasijje huoojea ajja ojaya epeeji cuana poanijo.)

3

Jesosaja epeeji jaahuanajji cuana jamaya capoahua

¹ Timoteo, ¡pea esohui shajja'ajjacue! Jiquio esohui e'e nei, ba'a: Deja cuana Jesosaja epeeji cuana jaahuana sa poanijo, jamaya quea pame nee. ² E'e Timoteo, jamajjeya miyaya Jesosaja epeeji jaahuanajji epojji jama huohuicue ba'a: —¡Quea pame nee ba'ecue! Jamajjeya peaa miya etecueajji pojjeama. ¡Ehuanase oe nei huanacue! ¡Quea ja'a nee jashahuabaquicue, yajajja'ama! Jamajjeya quea mimishi ba'e ajja. ¡Quea pame nee pea'ai ba'ecue pea cuana nijje! ¡Jjapeequicue pea cuana nijje! ¡Quea ja'a nee Eyacuiñajjija esohui huohuicue! ³ ¡Ecahuishi, ejjisese quea sese nee nee a'a ishijji! ¡A'a jjacuaquijji! Cho. ¡Quea bei pocue ojjaña nijje! ¡A'a quea tecue pojji! ¡A'a quea bejjo huiso sa pojji! ⁴ Ojjaña cuana miqnea equijo ba'e jaahuanacue jama ba'a: ¡Miquea ebacua cuana miqnea esohui jayojja jama po meecue! ¡Jjashajja'ajjaqui meecue pea'ai! —jamaya Jesosaja epeeji jaahuanajji epojji acue, Timoteo.

⁵ E'e, Jesosaja epeeji jaahuanajjiya ojjaña cuana ojaya equijo ba'e jaahuanahuana ajjajo Jesosaja epeeji cuana jaahuana ajja pea'ai poaje. ⁶ Timoteo, ¡Jesosaja epeeji jjeya nei jjapeequi a'a huooejaji Jesosaja epeeji jaahuana! Oya shajjama' po chana'; quea ja'a huohui ajja. Jamajjeya Eyacuiñajjiya oya tecuea ca chana'. Jamaya Eyacuiñajjiya Edosiquiana shajjama' poanijo tecueajea ca'yonaje yahuajo nei nei. ⁷ E'e, Jesosaja epeeji jaahuanajji quea huiso shequiajajo jjapeequiani caba'eyahua quea pame nee. Jamajjeya Jesosaja epeeji pojjeama cuaa ojo huohui caje jama ba'a: —E'e, oya deja quea pame nee poani tii.

Oya quea tai poajo ca ca pea cuaa oya tecueajea caje'yo. Edosiquianaa pea cuana onijje mimijaji mee ca chana', dasia ca chana'. Jamajjeya onaa tecuea caje quea yeno po majje quea mimishi po chana'.

Jesosaja epeeji eba'esahuajji cuana jamaya capoahua

⁸ Timoteo, ¡Jesosaja epeeji eba'esahuajji cuana babacaquicue! Jama acue cuana ba'a: —¡Quea ja'a nee ba'ecue! ¡E'e jojo nei nei mimicue! ¡A'a quea huiso ishijji, a'a huoojji! ¡A'a quea deja tai pojji! ¡A'a edasiajji pojji pea'ai! ⁹ ¡Ojjaña Eyacuiñajjija esohui e'e nei jama atiitucue quea ja'a nee! Yahuajo ma esohui Eyacuiñajjija deja cuana ba meesahua jjima; jjeya ba mee cani quea huiso —jamaya oya cuana acue, Timoteo.

¹⁰ Cuanaya ¡Jesosaja epeeji eba'esahuajji cuana babaca jjimahua oya ba neineicue! ¡Oya jjabahuejaqui meecue pea'ai! ¡Quea pame nee poanijo, oya huoojecue Jesosaja epeeji ba'esahua!

¹¹ Jesosaja epeeji eba'esahuajji cuanaja ehuanase cuanaya jama acue ba'a, Timoteo: —¡Quea ja'a nee ba'ecue, epona! ¡A'a quea mimijjequijea pojji! ¡A'a ishi'ishijji! ¡Jesosaja epeeji cuana ba'e meesahuacue; nishehui'ama pocue! —jamaya miyaya oya cuana acue, Timoteo.

¹² E'e Timoteo, Jesosaja epeeji eba'esahuajji babaca majje oya cuana jiquio jama acue ba'a: —¡Oe ehuanase huanacue! ¡Miquea ebacua cuana, ojjaña miqnea equijo ba'e pea'ai jaahuanacue quea ja'a nee! ¹³ E'e, miyaya quea ja'a nee Jesosaja epeeji ba'esahuajja, onaaya miya ojjaña shajja'ajja caje quea bihui nee. Jesosa Quitoja esohui bicho'ama nei huohuime aje, ¡quea ja'a nee acue!

E'e Timoteo, ¡Jesosaja epeeji quea pame nee babacacue Jesosaja epeeji ba'esahuajji! Jamaya apoa.

Eyacuiñajjija equijo ojaya epeeji jamaya capoahua

¹⁴ Timoteo, jiquio pea esohui cuana eyaya tehueña mi que. Eya mi baa poqui sa poani quijje pishana. ¹⁵ E'e pojja'a jjeya eya epoquijji pojjeama mi que. Jamajjeya eyaya mi que esohui tehueña mi huohuijji achajja Jesosaja epeeji cuana poaje so'o quea pame nee epojji. Ecuea esohui etehue'yojo miyaya ba meeje cuana. E'e, Eyacuiñajji ca ca enequi eshe tii tii. Ojaya epeeji cuana ojjaña meshijo ba'yani. Oya cuana Eyacuiñajjija huapa pojjeama jayojja jama poani. Ojaya esohui e'e nei ojjaña cuana ba meesahua cani, Eyacuiñajjiya. ¹⁶ Jamaya e'e jojo nei ba'a: Eyacuiñajjija esohui e'e nei, quea pame nee nee. Ma esohui yahuajo ojaya ba mee jjima poa. Jjeya ojaya esohuijje eseya quea ja'a nee ba'eje'yo. Jamaya ojaya esohui Jesosa Quitoja ba'a:

“Eyacuiñajji jiquio meshi yasijje poeyanaje; deja jayojjaya yamijji ba'ya poa. Edojjoshahua Pameya huohui canaje quea pame nee oya. Eyacuiñajjija esohuidojojji cuaa oya ba canaje. Ojaya epeeji cuaa ojo huohui canaje Jodio pojjeama cuana huasijje. Quea huiso deja cuaa ojjaña meshi cuanajo oja sohui shajja'ajja majje jjabahuejaqui ca'yonaje. Quijje Eyacuiñajjiya oya jjequisohua ca'yonaje eya huasijje”.

Jamaya yahuajo nei Isaiaa tehue ca poa.

4

Beca cuana Eyacuiñajji niije poquiipajeanaje

¹ Timoteo, pea esohui eyaya huohuije esohui huohuijji nishojo. Yahuajo nei Edojshahua Pameya huohui ca poa jama ba'a: —Quijje Jesosa Quito poe o'oya jjimahuajo, Eyacuiñajji esohuijo jjabahuejjaqui majje beca cuaa ojaya esohui jayoija jama apajea caje'yo. Eshahua cuana shajja'ajja caje. Eshahuaja esohui tai cuana jayoija jama acaje. Eshahua cuana aje oe jjadasiaquiiji, de. ² Ojaya esohui e'e nei pojjeama. Eshahua cuaa beca deja cuana siajje po mee cani. Jamajjeya ma deja cuana siajje po majje bicho'ama poani. ³ Jama siajje pome poani ba'a: —¡Eponajo a'a jjahuanacuijji! ¡A'a beca bobi cuana ijjiijji; quea ajja coma! ¡Eshahuaa cuia caje! —poani.

⁴ Chojja. Eyacuiñajjiya ojjaña bobi cuana pana ca'ya poa e'ijjiijji; quea pame nee. Jamajjeya Jesosaja epeeji cuaa esohui e'e nei ba majje, Eyacuiñajji bobijo bihuia majje pea'ai ojjaña bobi quea pame cuana ca'ijjia cahua. ⁵ Jamajjeya Eyacuiñajji niije mimi majje, ojaya esohui mimi majje pea'ai quea jaji nee ca'ijjia cahua bobi cuana.

¡Jesosaja echacojji quea pame nee pocue!

⁶ Timoteo, pea esohui eyaya tehueña mi que Jesosa Quitoja jama ba'a: ¡Esohui cuana ojo Jesosaja epeeji cuana huasijje huohui majamajacue miyaya! Jamajjeya oya cuana ba'e meesahuaje quea pame nee. ¡Eyacuiñajji esohui e'e nei cuana ba huicha'a huicha'acue! Miya ojaya esohui huohuijji quea ja'a nee poaje pea'ai. Ma esohui e'e nei Jesosa Quitojo yahuajo shajja'ajja majje jamaya ahuecha'a'yonaje miyaya, Timoteo. ⁷ ¡Etiiquianaja esohui quea quehua a'a shajja'ajjaji, Eyacuiñajji esohui cuana jayoija jama pojjeama! Onajaya esohuiya quea pame ba'e mee nisho cani. ¡A'a jamaya pojji! Timoteo, ¡miyaya oe Eyacuiñajji esohui jayoija jama amajamajacue! ⁸ Jamaya acue ba'a: Chaco tiitii majje miquea eyami quea ca'a poaje. Jamaya quea pame pishana. Eyacuiñajji esohui jayoija jama atitii majje ojaya epeeji quea ja'a poaje. Jamaya quea pame nee nee. Jamaya poanijo Eyacuiñajjiya miya jjeyahua nei quea pame nee ba'e mee caje; mano'yajo, ba'e tiitii mee caje'yo eyajo pea'ai.

⁹ E'e, jiquio esohui e'e nei nei. Jamajjeya ¡ojjaña cashajja'ajja tiitii cahua! ¹⁰ Jamajoya Eyacuiñajji esohui e'e nei poanijo ecuana janobajjima nei Jesosaja epeeji cuana chacochoacoani. Pea ecuana niije janobajjima mimijajiani. Jamatii Eyacuiñajji eshe yani; o epoe o'oyajjijo ecuaaya ishoa'ajjaña. Ohuaya ojjaña onijje japeequi mee'yo sa acani. Ojjaña joya e'e jojo nei poani ohuaya mimishi cuijea caje'yo. ¹¹ Jamajjeya ¡jiquio esohui cuana huohui neineicue! ¡ojjaña cuana jjabahuejjaqui meecue miyaya, Timoteo!

¡Quea pame nee ba'ecue, Timoteo!

¹² Timoteo, miya edeja sho'i pishana poani. Jamatii pea cuaa miquea esohui cashajja'ajja cahua. Jamajjeya ¡quea ja'a nee Jesosa Quitojo mimicue, miya! ¡Quea jaji nee oe pocue! ¡Pea cuana quea jea nee acue! ¡Eyacuiñajji niije japee tiitiiquicue e'e jojo nei! ¡Ojaya epeeji nei nei pocue! ¡Quea jshahuabaqui ja'a nee oe pocue pea'ai! Jamajjeya ojjaña Jesosaja epeeji cuana mi jayoija poaje. Quea pame nee nee acaje'yo cuaa.

¹³ Eya, Pabo poeje quijje pishana mi baa. E poe jjimahuajo, ¡Eyacuiñajji esohui huohuicue ojjaña joya Jesosaja epeeji ejjachichaqui ani yasijje! ¡Ojjaña cuana jjabahuejjaqui meesahuacue; Jesosaja esohui ba meesahuacue pea'ai! ¹⁴ Yahuajo Jesosaja epeeji etii cuaa miya huoojea sa poanijo mijo huohui canaje jama ba'a: —Timoteo quijje esohui huohuijji quea pame nee poaje'yo.

Jamajjeya onaa huoojea cajje miya Eyacuiñajjiya esohui huohui meesahuacue canaje. ¡Maya a'a pajea'yoyji! ¡Jamaya po tiitiihue Eyacuiñajji! ¹⁵ Jamajjeya ¡Eyacuiñajji esohui ba neineicue! ¡Ojaya esohuijo jshahuaba tiitiiquicue pea'ai! Jamajjeya ojjaña miya ba caje jjeja esohui ba neinei'yonaje; yahuajo miquea bajea jjima poanaje.

¹⁶ E'e, ¡miqua esohui jayoija jama ba'e tiitiihue quea pame nee! ¡Esohui e'e nei huohui huicha'a huicha'acue! Jamajjeya miya poquiquehua ajja eshahuaja ejiojji tai yasijje. Pea cuana miquea esohui shajja'ajja majje cuaquí yasijje epoqui'yoyji pojjeama pea'ai.

5

¡Jamaya ba'ecue Jesosaja epeeji cuana niije!

¹ Pea esohui eyaya, Pabohua tehueña mi que, Timoteo: ¡Edeja tii a'a tecueajji! ¡Quea jea acue! Quea mimishi poajo, ¡onijje mimicue, mique chii niije jama mimimeya pocue! ¡Oya ba meesahuacue pea'ai! ¡Mique chahua jayoija jama jaahuanameya acue esho'i cuana! ² ¡Epona tii niije mimicue quea pame nee! Quea mimishi poajo, ¡miqua enaese niije mimiani jayoijaya jama mimimeya pocue! Epona sho'i cuana quea mimishi poajo, ¡miqua jjo'i niije jayoija jama mimimeya oe pocue! E'e, ¡epona cuana niije oe quea pame nee nee pocue!

E'ahuemano cuanajo huohui canaje Pabohua

³ Timoteo, miyaya Jesosaja epeeji cuana e'ahuemanojo jama huohuicue ba'a: — ¡E'ahuemano cuana ba'e meesahuacue quea pame nee, ca ebacua etii chamajo! ⁴ E'ahuemanoja ebacua cuana yanijo, oja osecua cuana yanijo ohuaya cajaanhuana cahua oja nae; oja yano mese cuanaya cajaanhuana cahua oja equijo. Nishehui'ama capoahua. ¡Oja chii etii, oja nae epona tii po'yajo pea'ai cabobia cahua! Esho'yahua eseya eseya naeya bobia ca poa. Jamaya eseyaya eseya nae aje'yo ohua jaahuana ca poa sosejje. Jamaya Eyacuiñajija quea boti nee nee. ⁵ Beca e'ahuemano quea yeno nee nee poani; oja bacua cuana chama', oja osecua cuana pea'ai chama'. Jamajjeya e'ahuemano aema' Eyacuiñajiji nijje jjapeequiani. Ebacua etii chamajo Eyacuiñajiji nijje mimi huicha'a huicha'ani ojjaña pojajajo, mecajje pea'ai. Onijje mimiani pea cuanajo pea'ai. Jamajjeya Eyacuiñajijiya pea cuana ba'e meesahua cani quea pame nee.

⁶ Beca cuana e'ahuemano quea mimishi poani. Yajjajja'ama. Poquiquehuani cuaqui yasijje, Eyacuiñajiji nijje jjapeequi jijima jayojja jama poani. ⁷ Jamajjeya ¡jiquio esohui cuana huohuicue e'ahuemanoja bacua cuana huasijje, Jesosaja epeeji cuana huasijje! Jamajjeya pea cuanaja oya cuana etecueajiji pojjeama. ⁸ E'e, esejaya huapa pojjeama cuana, ojjaña eseya equijo ba'e mi jaahuana majje eseyaya Eyacuiñajiji cajaaña. Jamaya quea tai nee nee. Pea cuana Eyacuiñajijija esohui ba po jijima cuana ca ca quea tai pishana poani.

⁹ Jamajjeya ¡Jesosaja epeeji e'ahuemano quea pame nee miquianaaya ba'e meesahuacue! Ca joya jama ba'yani ba'a: E'ahuemano epona tii, pea beca peejjima dejaja pea ejiojji cuana huiso shequiajame, 60 shequiajame etii; pea yahuejo jjahueaquí'yo jijima; ¹⁰ ojjaña cuana ojo quea pame mimianijo pea'ai, ohuaya ebacua quea pame nee tii mee ca'yonajejo, pea cuana ojaya eba pojjeama bobia canajejo pea'ai, pea cuanaja equi shabojeajji epo pea'ai; emanojaa cuana jaahuana canajejo pea'ai, quea pame nee ahuicha'a huicha'a ca'yonajejo pea'ai, ¡ma e'ahuemano ba'e meesahuacue quea pame nee! E'e, oja bajjani catehuetiahua pea e'ahuemano etii quea pame cuana nijje Jesosaja epeeji cuanaja eba'e meesahuajji.

¹¹ Ecuea ehuhuijji e'ahuemano etii pishanajo jama ba'a: E'ahuemano cuana etii pishana ca ca e'ahuemano etii nei jayojja jama pojjeama; chacochocho ajja Jesosa Quitojo. ¡A'a ojaya bajjani tehuejji pea e'ahuemano etii quea pame nijje! Quea dejja jea po o'oya majje jjahueaquíe o'oya. Jesosa Quito nijje jjapeequi pajea'yo chana'. ¹² Jamajjeya beca cuana ojaya esohui ma ecua oya Jesosa Quito nijje poanaje jama e'ajji pojjeama. E'e, yahujajo ohuaya huohui canaje jama ba'a: —Ecuana ejjahueaquí o'oyajji pojjeama; Jesosa Quitojo nei chacochocho'yo tii tii —poanaje.

Ma o Jesosa Quito nijje jama miminaje pajea ca'yonaje. Jamajjeya Jesosaja epeeji cuana oya cuana tecuea caje'yo. ¹³ E'ahuemano esho'i pishana chacochocho ajjajo quea huea poaje. Poqui majamajaje ojjaña equi cuana huasijje anicuaa. Pea cuana niñeba caje pojja'a. Ojjaña cuanajo quea miminaa nee nee poanijo mimijaji chana'. ¹⁴ Timoteo, jamajjeya eya e'ahuemanojo jashahuabaquiani jama ba'a: E'ahuemano cuana etii pojjeama cajjahueaquí o'yahua. Ojaya ebacua cuana catii mee cahua; oja equijo cachacochochoquiahua pea'ai. Jamaya poanijo mimishi'ama nei. Jamajjeya Jesosaja epeeji pojjeama cuana ojaya epeeji cuana nijje tecuetecue ajja poaje. ¹⁵ Eya jamaya mimiani oe pojji e'ahuemano cuana nijje, ma Jesosa nijje jjapeequi pajea'yani nijje, Edosiquiana nijje jjapeequi sa poani nijje pea'ai.

¹⁶ Jamajjeya Jesosaja epeeji cuana e'ahuemano oja huapa pojjeama cajaanhuana cahua ojaya equijo; ¡a'a oya Jesosaja pea epeeji cuana jaahuana meejji! Jamajjeya Jesosaja epeejiya e'ahuemano jaahuana caje, ca joya ebacua etii chamajo.

Jesosaja epeeji jaahuanajji etii

¹⁷ Jesosaja epeeji jaahuanajji cuana Jesosaja epeeji quea pame jaahuana canajejo, caba'e meesahua cahua Jesosaja epeeji cuana. E'e, ohuaya Eyacuiñajijija esohui etehue'yo huohui canaje; onaya jjabahuejaquí mee canaje pea'ai. Jamajjeya ¡caba'e meesahua cahua cuana! ¹⁸ E'e, yahujajo nei jamaya Moisesija esohui etehue'yo poa ba'a:

“Ana'aiya anoso ai dojo cani edaasa biajje. ¡Jamajjeya anoso ai oe pojji quiacue e'ijjajji!” Yahujajo nei jama poanaje pea'ai ba'a: “¡Echacojjiya chaco cajo sosequiacue!” Jamajjeya ¡Jesosaja epeeji jaahuanajji sosequiacue ohua chaco canaje sosejje!

¹⁹ Oe dejjaa Jesosaja epeeji jaahuanajji tecuea cajo, ¡a'a shajja'ajjajji! ¡Beca, pea beca peejjima pojja'a pea jayojja pea'ai mimime poajo, shajja'ajjajji! ²⁰ Jesosaja epeeji jaahuanajji quea mimishi po huicha'a huicha'anijo, ¡tecueaquicue ejjabahuejaquijji, ojjaña ba caqui, ojjaña jjabahuejaquijji! Jamajjeya pea cuana mimishijo quea mete poaje.

²¹ Timoteo, Eyacuiñajijiya, Jesosa Quitohua, esohuidojojji quea pame cuana cojja ba canijo pea'ai, eyaya miya huohuaña jama ba'a: ¡Miyaya ecuea esohui jama acue! ¡jshahuabaquicue

quea ja'a nee Jesosaja epeeji jaahuanajji cuana tecuea jjimahuaje! ¡Oya jayojjaya ojjaña apea'aicue!

²² ¡Jesosaja epeeji jjeja nei jjapeequi a'a huoojea cuajijji Jesosaja epeeji jaahuanaa! ¡Oya ba neineicue huoojea jjimahuaa! Oya quea mimishi poajo, pea cuaa miya tecuea ca chana'. ¡Quea ja'a nee jjashahuaba tiitiqicue! Peaa mimishi acanijo, jona nijje a'a quea mimishi pojji!

²³ Timoteo, miquea see ai quea nee po huicha'a huicha'anijo ¡oe pojji acuijjajja na, uva na quea sese pishana ishucue, ena oopana pojjeama!

²⁴ Jamajje jjeyahua nei beca cuaa mimishi quehuajje pojjeama acani; ojjaña ba cani. Eyacuiñajjiya oja mimishi cuanajo quea nee nee po mee caje'yo quijje pishana. Pea cuaa mimishi cuana quehuajje acani. Quijje oja mimishi ba majje ojjaña oya cuana tecuea caje'yo. ²⁵ Jamaya pea'ai beca cuaa quea pame nee acani. Jjeja nei ojjaña oya ba cani. Oe pojji cuaa quea pame nee quehuajje acani. Quijje ojjaña ba caje oya quea pame nee nee poani.

6

Echacoji cuaa sosemajo chacochacoaniya o chacomeeji cashajja'ajja cahua

¹ Timoteo, echacoji cuana Jesosaja epeeji cuana huohucue jama ba'a: —Epeeji cuana, ¡miquianaaya chacoaña sosemajo, mi chacomeejjija esohui shajja'ajjacue! Miquiana mi jjashajja'ajjaquajajo, pea cuaa Eyacuiñajji niñeba ca chana'; esejaya esohuijo pea'ai jjaninñebaqui chana'. ² Miquea echacomeeji Jesosa nijje jjapeequianijo, edoe mese jayojja tecue'ama poanijo, ja'a shajjama' pojji! Chojja, ¡shajja'ajja tiitiicue oya! Mi chacomeeji poani Jesosaja epeeji poanijo Jesosa ojaya quea boti nee pea'ai. Miya miquea echacomeejjija yajjijo chacochacoanijo quea huiso sosejje poaje ojaya —jamaya acue echacoji cuana, Timoteo.

E'e Timoteo, ¡jiquio esohui cuana huohui neineicue! ¡Jamaya ojjaña cuana jjabahuejjaqui meesahuacue!

¡Quea bei ba'ecue esohui e'e nei jayojja!

³ Timoteo, pea deja cuaa ecuanaja esohui jayojja jama huohui ajjajo, esohui e'e nei Jesosajo huohui sa po ajjajo oya cuana shajjama', de. Eba'e quea ja'a neejo huohui sa po ajjajo pea'ai oya cuana shajjama' poani. ⁴ Esohui e'e nei onajaya ba jjima. Esohui quea quehuajo mimicuiajejanobiajea sa poani, de. Mimicuiajejanobiajea canijo deja cuana quea que nee po mee cani pea cuana nijje. Quea bei pojjeama po mee cani; pea cuana mimijaji mee cani; quea tai nee jjashahuabaqui mee cani pea cuanajo pea'ai. ⁵ E'e, esohui e'e jojo neijo jjabahuejjaqui mee jjimajo, quea jjashahuabaqui tai neejo pea'ai quea huiso cuaa mimicuiajejanobiajea huicha'a cani. Jamajjeja oya cuana jjashahuaba quehuacuani jama ba'a: —Ecuaya Eyacuiñajjiya esohui huohuiañajo quea huiso ejjeshejji chichaje.

¡jiquio deja cuana nijje a'a jjapeequijji! Quea tai nee nee.

⁶ E'e jojo nei Eyacuiñajjiya esohui jayojja jama ba'yanijo, quea jaji nee poanijo pea'ai, quea bihui nee nee poaje'yo. ⁷ E'e, eseya cuayanaje aema' nei nei. Quijje mano'yo majje aema' nei nei poquije'yo. ⁸ Bobi, daqui, equi yani. Jamajjeja se quea bihui nee nee poaje'yo. ⁹ Joya quea huiso aquiana nahue sa poani ca ca eshahuaja ejiojji yasijje poqui quehua'yo chana'. Ejjashahuabaqui'yojji cuana quea taijo quea tai ba'eje'yo, quea yeno. Cuaqui yasijje quijje poquije'yo pea'ai, de. ¹⁰ E'e, quea huiso ejjeshejji cuana, quea huiso aquiana cuana sa neinei poanijo ojjaña mimishi cuana acani cuaa. Ejjeshejji cuana, aquiana cuana sa neinei poanijo Eyacuiñajjiya esohui jayojja jama apajea cani. Jamajjeja quea yeno nee nee poani; quea bei nee ba'e ajja.

Pabohua Timoteo huoojea cani quea pame eba'ejji

¹¹ Timoteo, miya ca ca oe Eyacuiñajjiya epeeji nei, ojo chacochacoani pea'ai. ¡Ma acajji tai jama a'a ajji! Jjashahuabaquicue quea pame nee eba'ejji jama ba'a: ¡Pea cuana quea jea nee acue! ¡Eyacuiñajji jayojja ba'ecue, quea ja'a nee! ¡Ojaya esohui jayojja jama atiitiicue! ¡Pea cuaa miya napa cajje quea ca'a nee nee pocue! ¡Quea bei nee nequicue pea'ai! ¹² Jama jjashahuabaquime pocue ba'a: ¡Deja quebanei poanijo janobajjima nei nei cuajicujiani jayojjaya miya Eyacuiñajji nijje quea ja'a nee nee jjapeequicue! Huea'ama poajo ohuaya miya ba'e tiiti mee caje'yo onijje, mano'yajo. Yahuajo ojjaña cojja ba canijo miyaya huohuinaje jama ba'a: —Jesosa Quito ecuea Emeshi Mese nei jjeja poani.

Jamajjeja miya Jesosaja epeeji poanaje e'e jojo nei; Eyacuiñajjiya miya babaca ca'yonaje onijje eba'e tiiti'yojji. ¹³ Jamajjeja Eyacuiñajjiya ojjaña aquiana eshe po mee ca'yani; Jesosa quea pame nee miminaje emeshi mese Ponisio Pinato bajjani nijje jama ba'a: “Eya ca iña Emeshi Mese oe nei; ecuea esohui e'e nei nei” poanaje Jesosa. Jamajjeja Eyacuiñajjiya, Jesosa Quitohua pea'aiya ba canijo, eyaya miya huohuiaña jama ba'a: ¹⁴ ¡Eyacuiñajjiya

esohui jayojja jama atiitiicue! Jamajjeya pea cuanaja miya etecueajji pojjeama. ¡Jamaya acue Jesosa Quito esejaya Emeshi Mese nei poe o'oya jjimahuajo!

¹⁵ ¿Ache shono poeje o'oya Jesosa Quito? Eyacuiñajjija eba. Ohuaya Jesosa Quito poe meesahua caje'yo. Eyacuiñajji quea pame nee nee, quea ca'a nee pea'ai, ojjaña huoojea'yojji oe nei. E'e, Eyacuiñajji ojjaña emeshi mese huoojeajji poani. Ojjaña dejja jaahuanajji poani cuana huoojeajji poani oya. ¹⁶ Oya ca ca oe mano'yo ajja tii tii. Oya quea jeajahua nee nee enequi tii tii. Jamajjeya dejja cuana jamatii o que poqui ajja. Dejja cuanaja oya cojja ba jjima poani. Jjeya jjacojjaba meequi ajja pea'ai. Jamajjeya ojjaña oya cabihuia cahua. ¡Oya oe nei quea ca'a nee nee po tiitii'yani! Jamatii oya, de.

Dejja cuana quea aquiانا huiiso nee neejo

¹⁷ Timoteo, dejja cuana quea aquiانا huiiso nee nee yasijje huohuicue jama ba'a: —¡Pea cuana a'a cajaa ajji! ¡Miquea aquiانا quea huiisojo a'a jjashahuabaqui tiitijji! Quea huiiso aquiانا cuana nequi tiitii ajjajo ¡a'a aquiانا quea huiiso jea bajji! Miyaya ¡Eyacuiñajji eshe tii tii nequi quea jea nee acue! Ohuaya ojjaña aquiانا quia cani ese quea jaji pojji. ¹⁸ ¡Pea quea pame nee acue miyaya! E'e, ¡pea cuana nijje quea pame nee atiitiicue! ¡A'a quea aquiانا nahue pojji aema' cuana nijje; nishehui'ama pocue! —jamaya oya cuana acue, Timoteo.

¹⁹ Jamaya poani tiitii, quijje Eyacuiñajjiya oya cuana sosequia caje'yo quea huiiso eyajo. Jamajjeya Eyacuiñajjiya oya cuana nequi tiitii mee caje'yo eyajo onijje. Eba'ejji quea ja'a nee nee, quea pame nee nee ojaya poaje'yo.

²⁰ Timoteo, ¡miyaya Eyacuiñajjija esohui quea pame nee jama atiitiicue! ¡Esohui e'e nei pojjeama Eyacuiñajjija esohui jayojja jama pojjeama a'a shajja'ajjaji! Quea quehua, de. ²¹ Jamajjeya beca cuana esohui quea quehua nee, e'e nei pojjeama shajja'ajja majje poquiquehua'yonaje. Jamajjeya Eyacuiñajjija esohui e'e nei pajea ca'yonaje, onaaya.

Timoteo, ¡Eyacuiñajjiya miqianaya cajuahuana cahua! Jamaya capoahua. Apoa. Eya, Pabo esohui tehuejji.

PABOJA ETEHUE'YO TIMOTEO QUE BECANEJJIIJI PEA'AI 2 TIMOTEO

Pabohua Eyacuiñajijja esohui tehue ca o'oyanaje Timoteo que

¹ Timoteo, eyaya esohui mi que tehueje o'oya. Eya Pabo, Jesosa Quitoja esohui huohuijji. E'e, Eyacuiñajijja eya huoojea canaje ojaya esohui huohui'yohua jama ba'a: Jesosa Quito nijje e'e jojo nei jjapeequianijo, onijje eyajo eseya ba'e tiitii mee caje'yo Eyacuiñajijja.

² Timoteo, miya ecuea quea jea nee nee, ecuea ebacua ejja jayojja jama Jesosa Quito nijje jjapeequianijo. ¡Eyacuiñajijja esejaya Chii ai eyajo aniya, Jesosa Quitohua esejaya Emeshi Mese neiya pea'aiya miya cajaanahua cahua quea pame nee! ¡Mijo cajshahuabaquiahua quea pame nee! ¡Miya quea bei nee capo mee cahua pea'ai!

³ Eyacuiñajijjo eya quea bihui nee chacochoacoani bicho'ama nei nei. Jamaya ecuea etiiquiana cuana pea'ai poa. Timoteo, miya quea ja'a nee ba'yanijo, eyaya Eyacuiñajijji janobajijima nei bihuiaña mijo. E'e, mijo pea'ai eya onijje mimi huicha'a huicha'ani ojjaña mecajje, ojjaña pojjaajo pea'ai. ⁴ Miya pa neineinaje e poqui'yajo. Maya ecuea pajea'yo jjima. Eya mi ba sa neinei poani quea bihui nee epojji. ⁵ Eya jjashahuabaquiani jama ba'a: Miya Eyacuiñajijja esohui jayojja jama ña quea bihui nee. Ecuea eba yahuajo miquea yano mese Moina bajjaninya, miquea enaese Enise pea'aiya Eyacuiñajijja esohui jayojja jama aca poa quea bihui nee. E'e, jamajjeya o jayojja jama jjeya miya Eyacuiñajijji nijje e'e jojo nei jjapeequiani.

⁶ Jamajjeya eyaya miya huohui o'oyaña jama ba'a: Yahuajo mijo Eyacuiñajijji nijje mimi majje eyaya miya huoojeanaje ojaya echacojji epojji. E'e, sapa napa'ajjanaje emeya Jesosaja echacojji quea pame epojji. Jamajjeya Eyacuiñajijja miya Jesosaja epeeji jaahuana sahua cani. ¡Jamaya ojo chaco tiitii'cue! ⁷ E'e, Edojjoshahua Pameya, Eyacuiñajijja huoojea'yohua eseya mete'ama po mee cani. Quea ja'a nee Eyacuiñajijjo chaco mee ca'yani. Eseyá Eyacuiñajijji, pea cuana pea'ai quea jea nee po meesahua ca'yani pea'ai. Quea ja'a nee jjashahuabaqui mee cani pea'ai, Edojjoshahua Pameya.

⁸ Jamajjeya esejaya Emeshi Mese neijo huohuiañaajo ja'a quea bicho pojji, miya! Eya onijje jjapeequianijo, deja quea mase cuaa eya ña majje jeanobia canaje. Eyacuiñajijja esohui quea pame nee huohuiañaajo eya napa cani cuaa. Jamatii ja'a quea bicho pojji ejo! Chojja. E jayojja jama napa cajo, ja'a oe quea mete pojji! Eyacuiñajijja miya quea ca'a po meesahua canijo, ja'a ojaya esohui huohui pajea'yojji! ⁹ Ohuaya esejaya mimishi cuijea ca'yonaje. Jamajjeya cuaqui yasijje epoqui'yojji pojjeama. Iyaa ca'yonaje ojo quea pame nee eba'e'yojji, ma ojaya epeejime epo'yojji. ¿A'a eseya quea pame poanijo, ohuaya eseya iyaa ca'yonaje onijje ejjapeequijji? Chojja. Yahuajo nei nei meshi pana jjimahuajo Eyacuiñajijji jjashahuabaquia poa Jesosa Quito huoojeajji esejaya mimishi cuana cuijea'yojji. ¹⁰ E'e, yahuajo esejaya ba jjima poa ojjaña cuana Eyacuiñajijja quea jea nee nee acani. Jjeya ca ca esejaya eba. Ese jaahuanajji Jesosa Quito poeyanaje. Manoyonaje. Manoy'yo majje shequi o'oyanaje. Eyahuasijje jjequisohua ca'yonaje. Eseyá ohuaya jama acanaje ba'a: —Manoy'yo majje miquianaya cuana ba'e tiitii'ye'yo Eyacuiñajijji nijje —Jesosaa acanaje.

Jamajjeya ohuaya mete'ama po mee caje'yo eseya mano'yanijo. Ba'e tiitii mee caje'yo ojaya esohui quea pame nee ba mee canijo. ¹¹ Ma esohui quea pame nee Jesosa Quitoja eyaya huohuiaña. Eyacuiñajijja eya huoojea ca'yonaje ojaya esohui huohuiya, ojjaña cuana jjabahuejjaqui meeya pea'ai. ¹² Ma esohui huohuiañaajo, pea cuaa eya napa cani. Quea nee poani eya. Jamatii eya bicho'ama Jesosa Quitojo. Eyacuiñajijji ecuea eba nei nei. E'e jojo nei oya ese jaahuanajji, de. Jamajjeya ecuea eba ojaya esohui jayojja jama eya ameesahua tiitii caje'yo ohuaya, Jesosa poe o'oyajo.

¹³ Ma esohui e'e nei Jesosa Quitoja eyaya miya ba meenaje. ¡Ecuea esohui jayojja tii huohuicue! Jamaya poanijo ¡Jesosa Quito shajja'ajjacue! ¡Eyacuiñajijji quea jea nee acue pea'ai, jamaya Jesosa Quitohua miya po meesahua canijo! ¹⁴ Ohuaya miya jiquio esohui quea pame nee jjabahuejjaqui meesahua canaje. ¡Ma esohui jayojja jama po tiitii'cue! Edojjoshahua Pameya esejo nequi tiitii'ianiya miya jamaya asahua caje'yo.

¹⁵ Quea huiso deja Asia meshijo ba'e enijje jjapeequi pajea'yonaje. Pijeno, Emojene pea'ai jamaya poanaje. Maya miquea eba. ¹⁶ Ecuea Emeshi Mese neiya deja Onesipono bajjani, ojaya huapa pojjeama pea'ai caba'e meesahua cahua quea pame nee. Ohuaya eya quea jaji nee po mee canaje. Pea deja cuaa eya jeanobia canaje. Jamatii oya, Onesipono ejo bicho'ama poanaje. ¹⁷ E'e, Shoma cuiñajijji yasijje poe majje, eya sa'ajja neinei'yo majje eya ba ca'yonaje, Onesiponohua. ¹⁸ Jamajjeya esejaya Emeshi Mese neiya poe o'oya majje

Onesipono sosequia caje'yo. Jamajjeya ohuaya Onesipono jaahuana tiitii caje'yo quea pame nee. Dejja mimishi ca ca quea nee po mee caje'yo tii tii. E'e, miqnea eba eya Epeso cuiñajjijo nequijo, Onesiponohua eya quea pame nee ba'e meesahua ca poa.

2

¡Echacoggi quea pame jayojja jama pocue Jesosajo!

¹ E'e Timoteo, miya ecuea ebacua ejja jayojja. Miya quea ca'a po mee cani Jesosa Quitohua, ese jaahuanajjiya. Jamajjeya ¡quea pame tiitii japeequicue onijje! ² Miyaya ecuea esohui shajja'ajjanaje. Quea huiso dejjaa shajja'ajja canaje pea'ai. ¡Iiquio esohui huohuicue miyaya Jesosaja epeeji e'e jojo nei yasijje! Ona jjabahuejjaqui majje ¡ma esohui quea pame che jja oma oe huohui meesahuacue quea pame nee pea cuana huasijje! ³ Pea cuaa miya napa caje'yo Jesosa Quito nijje japeequianijo; jamatii ¡a'a quea mete pojji! ¡Japee tiitiiquicue e'e jojo nei! ¡Emeshi Mese neija echacoggi quea ca'a pocue! ⁴ Jama ba'a: Dejjaa echacomeejjijo chaco canijo pea nijje chaco chaco sa po ajja. Chajo. Ohuaya ojaya echacomeejjija esohui jama chaco cani. ¡Jamaya oe pocue; Jesosa Quito nijje chaco chaco anijo a'a eshahua nijje pojji! ⁵ Jamajjeya jama poani pea'ai ba'a: Dejja janobajjima nei cuajicuaji neinei ani pea cuana nijje. Joya ebionei cuajicuaji cooani oe aquiana quea pame quia cani sosema'. Jiquio ecua ohua huohui caje jama mi cuajicuajiajo, shajjama' poajo, aquiana equiaiji pojjeama. ¡Jamaya jashahuabaquicue Jesosa Quitojo chacoañajo; janobajjima chacocue! ¡A'a shajjama' jayojja jama pojji! ⁶ Dejja quejo janobajjima nei chaco'yo majje, que bana majje pea'ai ohuaya ebionei bobi cachicha cahua ojaya e'ijjiajji. Jamajjeya ¡a'a quea huea pojji Jesosa Quitojo chaco chaco ani! ⁷ ¡Iiquio ecuea esohui jashahuaba neinei quicue, miya! Eseyaya Emeshi Mese neiya miya jiquio esohui ba meesahua caje'yo.

⁸ Jamajje ijashahuaba tiitiiquicue Jesosa Quitojo! Eyacuiñajjiya Jesosa Quito shequi mee ca o'oya poa. Ojaya Jesosaja etiiquiana yahuajo nei nei ba'ya poa Dabi bajjani etiiquianaja emeshi mese poa. ⁹ Jiquio esohui quea pame nee Jesosa Quitojo eyaya huohuaña. Jamajjeya dejja tai cuaa eya napa canaje, dejja quea mimishi poso eya jeanobia canaje. Jamatii. Dejja tai cuanaja eya Eyacuiñajjiya esohui ehuhui pajea mee'yojji pojjeama. ¹⁰ Jamajjeya dejja cuaa eya napa cajje jamatii eya quea ca'a tii tii Jesosajo poani. Jamajjeya eyaya ojjaña Eyacuiñajjiya ebabaca cuana quea ca'a po meesahuaje'yo. Jamajjeya Jesosa Quitohua onajaya mimishi cuana cuijea neinei caje'yo. Oya cuana nequi tiitii mee caje'yo eyajo quea ja'a nee nee ese jayojja. Eyacuiñajji nijje nequi tiitii'e'yo.

¹¹ Jiquio esohui e'e nei jama ba'a:

“Eseyaya Jesosaja epeeji jijejojo pea cuaa mano mee ca'yajje Jesosa nijje eshe tiitii ba'eje'yo eseya eyajo. ¹² Jjeya onijje japee tiitiiquianijo quijje Jesosa nijje ona huoojja'yojji poaje'yo. Jjeya eseyaya cajaa ajje ohuaya eseya quijje cajaa acaje'yo pea'ai.

¹³ Eseyaya ojaya esohui atiitii ajjajo, jamatii ohuaya eseya pajea'yo ajja. Ojjaña ojaya esohui jayojjaya jama acaje'yo tii, ohuaya. Oya esohui siajje a'ajja nei nei”.

Echacoggi quea pame nee

¹⁴ ¡Jamaya miyaya ecuea ehuhui'yo cuana esohui huohuijji cuana huasijje huohui huicha'a huicha'acue! Janobajjima nei huohuicue jama ba'a: —Emeshi Mese neiya miya ba neinei canijo, ¡a'a mimiciajeanobiajjeajji!

Jjamimicuaiea nobiajeaquijji ca ca quea tai. Jamaya poanijo mi shajja'ajjajji poani cuana poquiquehua chana'. ¹⁵ ¡Quea ja'a nee nee oe jashahuabaquicue quea pame nee Eyacuiñajjijo echacoggi! Jamajjeya oya mijo quea jaji nee poaje. E'e, ¡miyaya ojaya esohui e'e nei huohuicue quea ja'a nee! Jamajjeya miya ojaya echacoggi quea pame nee poaje, bicho'ama. ¹⁶ Beca cuanaja Eyacuiñajji boti'ama, de. Jamajjeya ¡a'a shajja'ajjajji onajaya mimi quea tai Eyacuiñajjijo! Ma esohui tai shajja'ajja canijo pea cuaa Eyacuiñajji ba jjiima acaje. E'e, esohui tai shajja'ajja majje jashahuabaqui ajja poaje. ¹⁷ Tajjaja ijjiya biso nei anicuayani, quijje ijjiya huesha cani. Tajjaja ijjiya jayojja jama poani esohui quea tai. Esohui huohuijji tajja esohui quea tai shajja'ajja majje quijje quea tai nee poaje'yo quea huiso cuana. Japeequi pajea caje'yo pojja'a. Jamaya esohui huohuijji nisho cuana Pineto bajjani, Imeneo pea'ai poani. ¹⁸ Ohuaya esohui e'e nei pajea ca'yonaje. Siajje poani jama ba'a: —Ojaya epeeji mano'yajo, Eyacuiñajjiya eyami eyacua aje oe e'a'yojji pojjeama —acani.

Jamajjeya beca cuana ma esohui taijaya poquiquehua mee cani. Eyacuiñajjiya esohui e'e nei pajea mee cani pea'ai, ma esohui huohuijji nishohua. ¹⁹ ¡A'a oya cuana shajja'ajjajji! Eseyaya ca ca Eyacuiñajji nijje japeequi pajea'yo ajja. Eyacuiñajjiya esohui quea ja'a neejo jashahuabaquiani. Equi yamajjana quea ca'a nee nee nequi jayojja jama Eyacuiñajjiya esohui nequi tiitii'e'yo. E'e, yahuajo nei nei esohui tehue mee ca poa jama ba'a: “Eseyaya Emeshi Mese neija ebacua cuana ojaya eba ache ese eija e'e jojo nei poaje”. Pea thue

mee ca poa jama ba'a: “¡Eyacuiñajjija epeeji neiya mimishi cuana capajea neinei cayahua!” Jama yahuajo nei tehue meemeya aca poa, Eyacuiñajjija.

²⁰ Cuanaya equi tii tiijo quea huiso aqui ana cuana yani: ena ishijji cuana, ena nequijji cuana, ena shojji natajee oshe quea nahue siyosiyoyani. Ena nequijji mei huo'o quea ca'a yani aqui ana quea nahue iyajji. Acui epejja cuana yani, meshimisi pea'ai yani, ca'a'ama, aqui ana nahue'ama iyajji. ²¹ Jiquio ecua ena nequijji ca'a'ama jayoija jama eseya poaje mimishijo. Esey mimishi cuana pajea'yo majje ena nequijji quea nahue jayoija jama poaje'yo. Jamajjeya mimishi pajea'yojji chacoje'yo Eyacuiñajjijo. E'e, quea pame nee poanijo Eyacuiñajjija eseya huoojea caje'yo ojo chachohua. Jamaya eseya Eyacuiñajjija tii poaje'yo.

²² Jamajjeya ishacuima' nequija ejjashahuaba taiquijji jama a'a pojji miya! Jiquio jama quea bihui nee po huicha'acue ba'a: ¡Quea ja'a ba'ecue! ¡Eyacuiñajjija esohuijjo jjabahuejja neineiquicue! ¡Pea cuana quea jea nee acue! ¡Ojjaña nijje quea bei pocue! Beca cuana quea bihui nee Eyacuiñajji nijje mimiani. Quea ja'a nee jashahuabaqui ani pea'ai. ¡O jayoija o pocue! ²³ ¡Esohui quea tai, quea quehua pea'ai a'a shajja'ajjaji! Ma esohui shajja'ajja majje dejja cuana jjamimicuijje nobiajeaquije. Jamaya miquea eba. ²⁴ Miya Eyacuiñajjija echacojji poanijo ca ja'a jjamimicuijje nobiajeaquijji! Chojo. ¡Ojjaña nijje mase'ama pocue! ¡Jesosa Quitoja esohui cuana oe huohuicue quea pame nee! ¡A'a tecuea cuajjiji pea'ai! ²⁵ Pea cuana esohui e'e neijo maimaianijo, ¡quea bei esohui huohui o'oyacue! Jamajjeya e'e pojja'a Eyacuiñajjija ojaya esohui e'e neijo jjabahuejjaqui meesahua caje'yo oya cuana; jashahuaba taiqui pajea mee caje'yo. ²⁶ Jamajjeya oya cuana quea ja'a nee jashahuabaqui o'oya pojja'a, Eyacuiñajji nijje japeequije'yo. Joya esohui mimijajiani aje oe poquiquehua'yonaje de, Edosiquiana nijje. Ohuaya oya cuana dasia ca'yonaje o jayoija epo'yojji. ¡Oya cuana Eyacuiñajji nijje cajapeequiahua! E'e, dejjaa ibia me'ijjia mee cani. Ibia eme'ijjia meeani, eme'ijjequihuijja jaje poquiani. Eme'ijjia mee'ajja jjabahuejjaqui ani. Jiquio ecua ibia eme'ijjia mee'ajja poe beca'yo ajja jayoija jama esahuaja epejjiya dasia caje eshajja'ajja becaqui'yojji pojjeama; jjabahuejjaqui ani oya pojja'a.

3

Epojja apoa epojji

¹ Timoteo, jiquio ba neineicue pea'ai ba'a: Epojja cuana beshahua nei oe poajo, Jesosa Quito poe o'oya jjimahuajo, eba'ejji quea camaja nee nee poaje ojjaña cuanaja dejja quea mimishi nee nee poanijo. ² E'e, dejja cuana ojaya aqui ana cuanajo, ojaya eba'ejji, ejjeshejji poe pea'ai quea nahue poaje'yo. Quea dejja tai poaje'yo, quea nishehui poaje'yo epona cuana pea'ai. Bicho'ama jjejojo quea miminaa ojaya ejjashahuabaquijji poaje'yo tii tii. Eyacuiñajjija esohui huohuijji shajja'ajja sa po ajja poaje'yo. Mimijajiji cuana pea'ai poaje'yo. Oja chiija, enaese pea'ajja esohuijjo shajjama' poaje'yo oya cuana. Ejeajji etii cuana, enaese etii pea'ai boti'ama acaje'yo: —Ecuea miya eboiajji pojjeama —acaje'yo.

Eyacuiñajjija esohui jama a sa po'yo ajja poaje'yo. ³ Ojaya huapa pojjeama cuana boti'ama acaje'yo pea'ai. Quea sapa ca'a jjejojo jashahuabaqui ajja pea'ai. Pea cuanajo siajje poaje'yo. Mimishi cuana epajea mee'yojji pojjeama. Quea mase ibia jama poaje'yo. Mimipanajea panajaje'yo pea nijje. Dejja quea pame nee boti'ama acaje'yo, cajaa acaje'yo pea'ai. ⁴ Pea nijje japee nishoquije'yo. Jjabahuejjaqui jijma tii tii poaje'yo. Jama siajje pome poaje ba'a: —Eya ca ca oe che oeya quea pame nee —nisho poaje.

Quea mimijequija jjejojo Eyacuiñajji boti'ama poaje'yo. ⁵ Eyacuiñajji nijje japee nishoquije'yo. Jamatii ojaya esohui jayoija jama oya po ajja poaje. Timoteo, ja'a onijje japeequijji! ⁶ Jjeya nei esohui huohuijji tai cuana equi cuana huasijje poqui majamaja majje siajje poani. Epona jjabahuejjaqui ja'a jijma cuana dasia cani. Jiquio epona cuana aje oe quea mimijequijjea nee nee; quea ja'a jashahuabaqui'yo ajja, de. Ma dejja tai cuanaja esohui tai shajja'ajja sa poani. ⁷ Oya cuana ojjaña esohui quea quehua shajja'ajjaji jjejojo Jesosa Quitoja esohui e'e neijo jjabahuejjaqui'yo ajja. ⁸ Jamaya yahuajo nei nei ejiojicuijaji cuana Janese, pea Jamese cuanaya nequia poa. Moisesija esohui shajja'ajja sa po ajja poa. Jjeyahua nei esohui huohuijji quea mimishi Janese, Jamese pea'ai jayoija jamaya yani. Oya cuana esohui e'e nei Jesosa Quitoja shajja'ajja sa po ajja pea'ai. Quea jashahuabaqui tai nee nee poani pea'ai. Jamajjeya Eyacuiñajjija oya cuana cajaa acaje'yo, Jesosa Quito nijje japeequi sa po ajjajo. ⁹ Quijje pishana quea huiso dejjaa jama acaje'yo ba'a: —E'e, joya esohui huohuijji tai cuana jjadasiaqui'yojji, ejiojicuijaji Janese, Jamese pea'ai jayoija poani —acaje cuaa. Jamajjeya jjadasia mee majamajaqui ajja poaje.

Paboa esohui apoa epojji nei Timoteo huasijje

¹⁰ Timoteo, miya enijje nequinajejo eya ca ca miquea eba nei nei poanaje. Ojjaña ecuea ehuohui'yo miquea eba pea'ai. Ojjaña ecuea eba'e'yojji miquea eba pea'ai. Ecuea ejjashahuabaqui'yojji quea pame nee. Miquea eba eya Eyacuiñajijja epeeji nei poani. Pea cuaa eya napa cajje ona nijje quenequene ajja poa. Ecuea pea cuana quea jea nee. Eyaya mete'ama Eyacuiñajijjo chaco tiitii'yonaaje. Jamaya miquea eba pea'ai. ¹¹ E'e, miquea eba ecuea ehuohuijo pea cuaa janabajjima nei eya napa ca'yonaje Atioquiajo ba'e cuaa, Iconiojo ba'e cuaa, Nisatajo ba'e cuaa pea'ai. Napa majamaja cajje eya quea nee nee poanaje. Jamatii ecuea Jesosa Quitoja esohui pajea'yo jjiima. Emeshi Mese neiya eya jaahuana tiitii ca'yonaje. Jamaya miquea eba, Timoteo. ¹² E'e de, ojjaña joya Jesosa Quito nijje jjapee neinei'quiani pea cuaa napa caje. ¹³ Edasiajji cuana jjeyahua nei quea tai. Quijje ca ca quea tai nee nee poaje. Eshahua ma dejja tai cuana nijje sijje poanaje. Jamajjeya ma edasia'yojji cuaa pea cuana dasia caje'yo pea'ai. ¹⁴ Timoteo, miquea eba miquea esohui huohuijji cuanaja ehuohui'yo e'e nei. Ma ehuohui'yo cuanajo miya jjabahuejjaqui'yonaaje. Jamajjeya imaya esohui shahuaba tiitii'cue; a'a pajea'yojji! imaya oe acue! ¹⁵ Miyaya esho'yahuua Eyacuiñajijja esohui quea pame nee ba neinei'yonaaje. Ojaya esohui etehue'yo miquea eba. E'e, ma etehue'yojo miyaya baje'yo jama ba'a: Eyacuiñajijja miya jaahuana caje'yo miya Jesosa Quito nijje jjapeequianijo.

¹⁶ Eyacuiñajijja dejja pame cuana ojjaña ojaya esohui tehue mee ca'ya poa. Eseyaya jiqui esohui huohuijje pea cuana Jesosa Quitoja jjabahuejjaqui'e'yo, ojaya mimishujo quea yeno poaje'yo pea'ai, ojjaña ba caje'yo ache esohui e'e nei pojjeama pea'ai. E'e, ma esohui huohui majje ojjaña quea boejea nee ba'e meesahuaje'yo. Eba'ejji quea pame ba meesahuaje'yo pea'ai. ¹⁷ E'e, ma esohui etehue'yo quea ja'a nee ba majje Eyacuiñajijja echacojji quea ja'a nee poaje'yo. Ojjaña quea pame nee poaje'yo pea'ai Eyacuiñajijji nijje, esohui ba neinei majje.

4

Pabo Eyacuiñajijja sosequia caje'yo

¹ Eyacuiñajijja, Jesosa Quitoja pea'ai ecuea esohui eba. Jesosa Quito poe o'oya majje ojjaña huoojea'yojji poaje'yo. Yahuajo mano'yo cuana, jjeya eshe nequi cuana pea'ai sosequia caje'yo. Ojjaña ojaya epeeji cuana quea pame poani ba'e tiitii mee caje'yo onijje eyajo, Eyacuiñajijja. Mimishi cuana ca ca quea nee nee po mee caje'yo cuaquijje. ² Jamajjeya eyaya miya huoojeaña jama ba'a: ¡Eyacuiñajijja esohui oe huohui tiitii'cue jjeja, miyaya! Dejja cuana jjashajja'ajjaqui sa po ajjaajo imatijja huohuicue! Mimishi cuana acanijo ¡tecueajeaña jayojja acue! Jama acue ba'a: "¡A'a quea tai pojji! ¡A'a quea mimijjequijje pojji!" Pea cuana quea pame poanijo jama acue ba'a: "E'e, imaya Eyacuiñajijjo ba'ecue!" ¡Quea pame, quea mimi bei nee huohui tiitii'cue ojjaña Eyacuiñajijja esohui! ³ Quijje ca ca dejja cuana esohui e'e nei shajja'ajja sa po ajja poaje. Quea mimishi ba'e sa poanijo oya cuana quea huiso esohui huohuijji tai iyaa caje ojaya ejjashahuabaqui'yojji huohuiya. ⁴ Eyacuiñajijja esohui e'e nei shajja'ajja sa po'yo ajja poaje. Eti'quianaja ehuohui'yo quea quehua cuana shajja'ajja caje'yo. ⁵ Timoteo, imiya ca oe quea ja'a nee nee jjashahuabaquicue ojjaña pojjaajo! Peaa miya napa cajje imatii quea ca'a, mete'ama pea'ai pocue! ¡Eyacuiñajijja esohui Jesosa Quitoja huohui tiitii'cue! ¡E'e jojo nei ojjaña ma ecua eyaya miya huohuinaje jamaya acue!

⁶ E'e, ecuea echacojji Eyacuiñajijja esohuijo jjeya beshahua nei apoa poanijo, dejja mimishi cuaa eya mano mee caje'yo. Ijjiacajji jayojjaya mano mee'yome acaje'yo cuaa. Quijje pishana, jjeyahua nei poaja'a eya poquije'yo eyahuasijje Jesosa Quito que ba'e'yohua. ⁷ Eya janabajjima nei chacocho'yonaje Eyacuiñajijji nijje. Ecuea echacojji Jesosa Quitoja apoa. Eyacuiñajijja esohui jayojja jama a'yonaaje e'e jojo nei eyaya. Jamajjeya eya onijje quea ja'a nee ba'yanijo, eya sosequia caje'yo eyajo. ⁸ Eseyaya Emeshi mese nei nijje quea pame nee chacocho'conajejo, eya quea huiso sosequia caje'yo poe o'oya majje. Ohuaya eya huohui caje'yo jama ba'a: —Miyaya ecuea echacojji quea ja'a nee poanaje.

E'e, ojjaña ojaya epeeji cuaa ma ojaya epoe o'yajijjo quea bihui neeya ishoo'ajja ca'ani Jesosa Quitohua sosequia caje'yo quea huiso pea'ai.

Pea esohui Timoteo que

⁹ Eya ee nei ani. Jamajjeya ijjeyahua nei poecuajicue ee nei anijo! ¹⁰ Ecuea epeeji Quesete poquinaje Janata meshi yasijje. Tito pea'ai poquinaje Damasia meshi yasijje. Dejja Nema bajjani aje oe ojaya aquiana cuana quea boti neejo Eyacuiñajijjo jjashahuabaqui'yojji ajja. E pajea'yo majje e que nequi'yo ajja. Oya poqui'yonaaje Tesanonica huasijje. ¹¹⁻¹² Tiquico eyaya huoojea'yonaaje Epeso huasijje. Noca ca ca oe enijje nequi. Jamajjeya miya e que poe o'oya majje ¡ecuea epeeji Macoso jjequicue pea'ai! Ohuaya eya chacosahua caje'yo. ¹³ Ecuea daqui moo quea ao eyaya jeana'yonaaje Toasajo, Capoja equijo. ¡Maya jjequiyocue!

¡Esohui etehue'yo cuana pea'ai ye'yocue! ¡Esohui ejeejo tehue'yo cuana pea'aiya oe ye'yocue jjo!

¹⁴ Timoteo, Anejano ma baa huo'o chacojji poani janobajjima nei mimijajinaje enijje quea mimishi, de. Ojaya mimishijo Jesosa Quitohua oya napa caje'yo quijje. ¹⁵ Eseyaya Jesosa Quitoja esohui huohuañajo oya janobajjima nei mimijajinaje pea'ai. ¡Jamajjeya oya ba neineicue! Oya quea tai, de.

¹⁶ Dezza etii cuaa eya jeanobia'yo majje iyaa ca o'oyanaje ehuohui'ajjajji ecuea esohuijo. Eya huohui'ajja coo canajejo, ecuea epeeji cuana enijje nequi ajja. E ejeanobiajojo oya cuana quea mete nee nee poanaje. Poquinaje. Eya jea cana'yonaje: —Paboja esohui Jesosa Quitojo e'e nei nei —jamaya huohuime ajjima ecuea epeejiija quea meteja jjejojo. Eya nahue jjima onajaya. Eya Eyacuiñajji nijje miminaje ona cuanajo. Jamajjeya e'e pojja'a Eyacuiñajjiija oya cuana etecueajeajji pojjeama quea mete poanijo. ¹⁷ Jamatii Jesosa Quito ecuea Emeshi Mese nei ca ca enijje nequi'yonaje. Ohuaya eya quea ca'a po mee ca'yonaje. Ojjaña ojaya esohui janobajjima nei huohuañajo quea huiso cuana Jodio pojjeama shajja'ajja mee'yonaje. Pea cuana ibia jama quea mase e quecua sa poanijo, Eyacuiñajjiija eya jaahuana ca'yonaje pea'ai. ¹⁸ E'e, ojjaña ma dezza mase cuanajo ecuea Emeshi Mese neiya, Jesosa Quitohua eya jaahuana caje'yo. Ohuaya eya eyahuasijje dojosohuaqui caje'yo onijje ba'e'yohua. Jomajo oya ojjaña huoojea'yojji ca ca oe quea ca'a nee nee. ¡Oya ojjaña dezza cuaa cabihuia tiitii cahua! ¡Jamaya capo'yahua!

¡Ojjaña nijje mimicue quea bihui nee ejo!

¹⁹ Aquina, ojaya ehuanase Pisina pea'ai, Onesipono, ojaya huapa pojjeama cuana pea'ai jama huohuicue miyaya ba'a: —¿Achajja acuae nequiana so'o?

²⁰ Dezza Enasito bajjani nequinaje Conitojo. Topimo eyaya jeana'yonaje Mineto cuiñajjiijo emano jaa.

²¹ ¡Poecuajicue e que, eeno po jjimahuajo!

Dezza Eomono bajjani, Ponete pea'ai, Nino pea'ai, Caonia pea'ai, ojjaña Eyacuiñajjiija epeeji cuana pea'aiya miya huohui'ajja cani jama ba'a: —¿Achajja acuae mi ani so'o, de? —ojaya ebajji nequiana.

²² ¡Emeshi Mese neiya Jesosa Quitohua miya quea ja'a capo mee cahua! ¡Ohuaya ojjaña miqianaya cajaanuana cahua quea pame nee! ¡Jamaya capo'yahua!

Mahuiso. Eyaya Pabohua esohui tehue'yonaje. Apoa.

PABOJA ETEHUE'YO TITO QUE TITO

Pabohua esohui tehue canaje Tito que

¹ Tito, eyaya jiquio esohui tehueña mi que miquea ebajji. Eya, Pabo Eyacuiñajji chacochacoani oja yajji. Jesosa Quitohua eya huoojea canaje ojaya epeeji cuana huasijje ojaya esohui huohuiya. Jamajjeya eyaya Eyacuiñajji babaca'yo cuana onijje japeequi meesahuaña e'e jojo nei. Oya cuana Eyacuiñajji esohui e'e jojo nei ba meesahuaña pea'ai. Jamajjeya oya cuana ma esohui jayojja jama ba'e meeje quea ja'a nee. ² E'e, Jesosa nijje e'e jojo nei japeequianijo, Eyacuiñajji ojaña eseya ba'e tiitii mee caje'yo onijje eyajo. Jamaya Eyacuiñajji huohui ca'ya poa meshi pana jjimahuaajo. Oya ca ca oe siajje po ajja nei nei. ³ Jjeya nei ca ca Eyacuiñajji eseya ojaya esohui quea pame nee Jesosajo ba mee ca'yonaje. E'e, ohuaya, esejaya ejaahuanajjiya eya huoojea ca'yonaje jama ba'a: —¡Poquicue miya; ecuea esohui quea pame nee huohuicue ojaña deja cuana huasijje! —jamaya ohuaya eya acanaje.

⁴ Tito, eyaya jiquio esohui tehueña mi que, miya e jayojjaya Jesosa nijje japeequianijo. ¡Eyacuiñajji esejaya Chii ai eyajo aniya, Jesosa Quito ese jaahuanajjiya pea'ai miya cajaanahua cahua quea pame nee! ¡Miya quea bei nee capo mee cahua pea'ai!

Jesosaja epeeji jaahuanajji cuana quea pame nee caba'yahua

⁵ Tito, yahuaajo eseya Queta nasijo Eyacuiñajji esohui huohui nequinaje. Jamatii Eyacuiñajji esohui huohui jeyojeyo jjima poanaje. Jamajjeya eyaya miya nequi mee'yonaje Queta nasijo Jesosaja epeeji jjabahuejja meequijji ojaña ojaya esohuijo. ⁶ Jamajjeya ¡ojjaña cuiñajji yasijje Jesosaja epeeji etii babacacue Jesosaja epeeji jaahuanajji epojji! Ecuea esohui Jesosaja epeeji jaahuanajji huohuicue jama ba'a: —Jesosaja epeeji jaahuanajji caba'yahua jama ba'a: ¡Quea ja'a nee caba'e tiitii'yahua, mimishi'ama! Jamajjeya o ba majje onaaya jama acaje ba'a: “Oya e'e jojo nei Eyacuiñajji esohui jayojja jama ba'yani”. ¡Shacuiji poaniya ehuanase oe nei cahuaa cahua quea ja'a nee! ¡Oja bacua cuana Jesosaja epeeji cuana capo'yahua, shajjama' pojjeama capo'yahua! Jamajjeya oya cuana ba majjeya onaya mimimimi ajja jama ba'a: “Oja bacua cuana quea mimishi nee nee, shajjama' pea'ai poani”. ⁷ Jesosaja epeeji jaahuanajjiya ¡ojjaña ojaya epeeji cajaanahua cahua, caba'e meesahua cahua pea'ai! Jamajjeya ¡quea pame nee caba'yahua, mimishi'ama! Jamajjeya onaaya oya eniñebajji pojjeama. ¡A'a jjashahuaba taiquijji! Jama ba'a: “Eya ca iña quea pame nee; pea cuana quea pame pojjeama”. ¡A'a quenequene cuajiji! ¡A'a ishi'ishijji! ¡A'a pea nijje jjacuiquijji! ¡A'a quea deja tai pojji pea'ai! ⁸ E'e, Jesosaja epeeji jaahuanajjiya ¡pea cuana nijje cajjapeequiahua; ojaya equijo caba'e mee cahua joya oja cuiñajji yasijje poeyajo! ¡Ohuaya pea cuana quea jea nee ca'a cahua! ¡Oya quea ja'a nee cajjashahuabaquiahua quea pame nee eba'ejji! ¡Ohuaya emeshi meseja esohui jayojja jama ca'a cahua! ¡Eyacuiñajji esohui jayojja jama caba'yahua tii! ¡Cajjashahuaba tiitiiquiahua mimishi'ama eba'ejji! ⁹ E'e, ¡Jesosaja epeeji jaahuanajji cuana esejaya esohui jayojja jama caba'yahua tii! Jamajjeya ojaya epeeji cuana Jesosajo e'e jojo nei huohui majje Jesosa nijje japee neinei qui mee caje'yo. Onaya esohui e'e nei Jesosajo siajje poani. Oya cuanaa jjabahuejjaqui'yo majje siajje poani pajea caje'yo pea'ai. Jamaya eyaya, Pabohua huohuaña Jesosaja epeeji jaahuanajji cuanaajo. ¡Jamaya caba'yahua oya cuana!

¡Shajjama' cuana siajje poani pajea mee'yocue!

¹⁰ E'e Tito, ¡Jesosaja epeeji jaahuanajji huoojeacue esohui e'e nei huohuiya! Quea huiso Jodio cuana Jesosa nijje japeequinaje. Jamatii oya cuana esohui huohuiji nisho poani. Oya cuana shajjama' poani, pea cuana dasia cani, siajje poani jama ba'a: —¡Ojaña Jesosaja epeeji cuana Moisesja esohui etehue'yo jayojja jama caba'yahua! ¡Cuiishasha biso nei cajhuesejjajea cahua! Majoya aje oe Eyacuiñajjiya oya cuana ba caje emimishi cuijea'yo —jamaya onaaya pea cuana dasia ca'yani.

¹¹ Tito, miyaya Jesosaja epeeji jaahuanajji huoojea majje ¡oya cuana ma esohui huohuiji nisho cuana huohui pajea mee'yocue! E'e, esohui huohuiji nisho cuana beca Jesosaja epeeji cuana siajje po majje jjashahuabaqui quehua mee cani Jesosajo. Oya cuana siajje poani Jesosaja epeeji cuana nijje bejo jjesheji.

¹² E'e Tito, ojaña Queta nasijo ba'eca cuana quea mimishi nee nee. Jamajjeya oe esohui huohuijiya Queta nasijo ba'eya huohui canaje jama ba'a: —Ojaña deja cuana Queta meshijo ba'e siajjepojji nei nei poani. Quea mase ijjiacajji jayojja jama poani. Quea huea nee poani, jeje ajja nei nei poani pea'ai —jamaya acanaje Queta dejjaa.

¹³ Jamaya e'e jojo nei. Jamajjeya ¡jesosaja epeeji cuana niñeshe'a neineicue! ¡jjabahuejja meequicue esohui e'e neijo Jesosa Quitojo! ¹⁴ Jamajjeya onaaya Jesosaja esohui e'e jojo nei jayojja jama acaje'yo. Jodio etiiquiana cuanaja esohui e'e nei pojjeamajo ¡jshahajja'ajjaqui ajja, esohui huohuijji nishoja esohui pajea caje'yo pea'ai. ¹⁵ Jesosaja epeeji cuana ¡jjabahuejjaqui'yo majje, quea ja'a ¡jshahuabaqui majje quea ja'a nee ba'yani. Beca cuana ca ca quea mimishi ¡jshahuabaqui nishoja esohui jayojja jama a'ajja. Jamajjeya oya cuana quea mimishi ba'yani tii. ¡jshahuaba titiiquiani mimishi epojji. Mimishi po majje quea yeno pojjeama, quea bicho pojjeama poani. ¹⁶ Oya cuana, esohui huohuijji nisho cuana siajje poani jama ba'a: —Ecuana Eyacuiñajjija epeeji poani.

Chojja de. Siajje poani. Oya cuana Eyacuiñajjija esohui jayojja jama a'ajja. Eyacuiñajji ojaya ba ¡jima. Eyacuiñajjija mimishi boti'ama. Jamatii oya cuana quea mimishi ba'yani. Shajjama' poani. Mimishi cuana pajea'yo ajja.

2

¡Esohui e'e nei huohuicue ojjaña quea pame nee ba'e meejji!

¹ Tito, ¡miyaya oe ojjaña quea pame nee eba'e mee'yojji huohuicue Eyacuiñajjija esohui e'e nei ojjaña cuana huasijje, quea pame nee nee ona ba'ejji! ² ¡Edeja tii cuana huohuicue jama ba'a: —¡A'a jja oe huoojji! ¡Quea ja'a nee ¡jshahuabaquicue quea pame nee eba'ejji! ¡Eyacuiñajjija esohui jayojja jama ba'ecue! ¡Pea cuana quea jea nee acue! Jesosa nijje ¡japeequianijo, pea cuaa miya napa caje. Jamatii ¡a'a Jesosa nijje ¡japeequi pajea'yojji! — acue!

³ Epona tii cuana huohuicue jama ba'a: —¡Jesosaja epeeji quea pame nee jayojjaya ba'ecue! ¡A'a pea cuana niñebajji! ¡A'a ishi'ishijji! ¡Eyacuiñajjija esohui quea pame neejo pea cuana ¡jjabahuejja meequicue pea'ai quea pame nee eba'ejji!

⁴ E'e, epona cuana niñeshe'acue jama ba'a: —¡Quea bei pocue! ¡Miqueahue, miquea bacua cuana pea'ai quea jea nee acue! ⁵ ¡Quea ja'a nee ¡jshahuabaquicue! ¡A'a quea mimijjequijje ¡jshahuabaquijji! ¡Miquea equijo chacocue quea pame nee, huea'ama! ¡Pea cuana quea jea nee acue! ¡Miqueahueja esohui shajja'ajjacue pea'ai! Jamajjeya mi ba majje pea cuaa huohui caje jama ba'a: “¡Bacue! Jesosaja epeeji cuana quea pame nee poani. Jamajjeya Jesosaja esohui e'e nei, quea pame nee”.

⁶ Tito, ¡oya jayojjaya shacuima' nequi cuana huohuicue pea'ai! ¡Jama acue ba'a: — Shacuima' nequi cuana, ¡quea ja'a nee ¡jshahuabaquicue Jesosa nijje ejjapee neinei quijji mimishi'ama! —jamaya shacuima' nequi cuana niñeshe'a neineicue!

⁷ Tito, ¡miya pea'ai ba'ecue quea ja'a nee nee! Jamajjeya miya onaaya ba majje jama acaje ba'a: —E'e, Tito ba'yani quea ja'a nee. Jamajjeya ¡o jayojjaya eba'e!

E'e Tito, ¡jjabahuejjaqui majje jama acue ba'a: ¡Esohui e'e nei huohuicue! ¡Quea ja'a nee oe huohuicue! ⁸ Jamajjeya pea cuaa miquea esohui shajja'ajja caje'yo. Miquea esohui e'e jojo nei poanijo, onajaya miya eniñebajji pojjeama. Jamajjeya pea cuana minijje mimijaji majje quea bicho poaje. E'e, miya onaaya ba caje quea pame nee poani; miquea eba'ejji, miquea esohui quea ja'a nee pea'ai.

⁹ Tito, ¡echacojji cuana joya ojaya echaco meejjija yajjijo sosema' chacochoacoani huohuicue jama ba'a: —¡Mi huoojajji poani shajja'ajjacue! ¡Ojaya esohui jayojja jama chacocue! ¡A'a mimijajjiji onijje! Jamajjeya oya minijje quea bei poaje. ¹⁰ ¡Ojaya aqui ana a'a sii poquijaji! Chojja, ¡quea pame oe ba'ecue! Jamajjeya mi huoojajji poani ¡jshahuabaquijje miyaya ojaya aqui ana ¡aahuanaje'yo quea pame nee. E'e echacojji cuana, miqianaya jamaya quea pame nee ba'yanijo pea cuaa Eyacuiñajjija esohui shajja'ajja caje, esejaya Emeshi Mese neija. Jama acaje cuaa ba'a: “¡Jiquio echacojji Jesosaja epeeji poani. Oya quea pame nee, mimishi'ama ba'yani. Jamajjeya Eyacuiñajjija esohui quea pame nee. Jamaya caba'yahua” acaje cuaa —jamaya echacojji cuana acue, Tito!

Eyacuiñajjija eseya ba mee canaje ojaya ejjashahuabaquijji quea bei ojjaña jo poani

¹¹ E'e Tito, ojjaña Eyacuiñajjija quea jea nee neejo ohuaya ojjaña ba mee cani jama ba'a: Ohuaya ojjaña cuana ba'e meesahua cani. Jesosaja epeeji cuana mimishi cuijea'yo majje ba'e titii mee caje'yo eyajo onijje. ¹² Jamajjeya ohuaya eseya jama acani ba'a: —¡Ecuana esohui jayojja jama acue! Jamajjeya eya quea bei poaje miqianana nijje. ¡Ejjashahuabaquijji quea mimishi pajea'yojji! E'e, ¡jiquio meshijo ba'yanijo ¡jshahuabaquicue quea pame nee! ¡E jayojja poaniya pea cuana quea jea nee acue! ¡Ecuana esohui jayojja jama atitiicue quea pame nee pea'ai! —jamaya Eyacuiñajji poani.

¹³ ¡Jamaya eja'aqui Jesosaja epoe o'oyajjijo ishooñajo! Enejaya eba oya e'e jojo nei poeje o'oya. Quea ca'a nee nee, quea jeajahua nee nee poeje'yo. Oya, Jesosa Quito ese ¡aahuanajji, oe nei quea ja'a nee nee. Eyacuiñajji nei oya. ¹⁴ Yahuaajo Jesosa esejjo

mano'yonaje. Onaaya oya iña canaje equecua'yojji. Jamatii Jesosa mimi jjima jama ba'a: —¡A'a eya quecua'yojji! —chojja, jamaya Jesosa mimi jjima.

Ohuaya esejaya mimishijo mano'yonajejo, Eyacuiñajjiya eseya ba cani emimishi cuijea'yo. Jamaya ohuaya eseya ma ojaya epeejjime po mee ca'yonaje. Jamajoya ohuaya eseya ba'e mee cani ojaya ejjashahuabaquijji jayojjaya quea boejea'yo, mimishi'ama. Jamajjeya iquea pame nee nee eba'e tii tii!

¹⁵ E'e Tito, ¡jiquio esohui huohuicue! ¡Jesosaja epeeji cuana ba'e meesahuacue quea ja'a nee! ¡Shajjama' cuana jjabahuejja meequicue! Jama acue ba'a: —Eyacuiñajjiya eya huoojea canaje oja esohui huohuuya. ¡Jamajjeya shajja'ajjacue mo!

3

Jesosaja epeeji cuana quea pame nee caba'yahua jama ba'a:

¹ Tito, Jesosaja epeeji cuana huohui o'oyacue jama ba'a: —¡Miquea emeshi meseja esohui jayojja jama acue! ¡Mi huoojeajji poanija esohui jayojja jama acue pea'ai! E'e, ¡miquianaaya Jesosaja epeeji cuana poaniya quea pame nee atiitucue huea'ama! ² ¡A'a pea cuana niñebajji! ¡A'a jjamimicuijajea nobiajeaquijji pea cuana nijje! ¡Ojjaña nijje quea bihui pocue; ba'e meesahuacue quea bihui nee! ³ ¡Ojjaña nijje quea bei nee pocue! ¡A'a quenequene cuajjiji! E'e, yahuajo Jesosa nijje jjapeequi jjimahuajo eseya quea mimishi poanaje pea'ai ona jayojjaya. Jjeya ca chojja. Yahuajo eseya jjashahuaba taiquinaje. Shajjama' pea'ai poanaje. Esohui huohuijji nisho cuaa eseya dasia ca'yonaje. Yahuajo eseya mimishi pajea'yo sa poanaje. Jamatii pajea'yo jjima poanaje. Jamaya Jesosaja epeeji pojjeama jayojja jama poanaje, quea mimishi boti nee. E'e, yahuajo Jesosa nijje jjapeequi jjimahuajo eseya jjashahuaba tiitiquinaje quea mimishi epojji. Quea deja tai poanaje; onajaya aquiana jea banaje. Pea cuana boti'ama nei nei poanaje. Eseya onajaya boti'ama nei nei poanaje pea'ai. Jjaseaquijji ponequinaje. Jamaya aje oe eseya yahuajo ba'ya poa. ⁴ E'e, yahuajo eseya quea mimishi ponequinaje. Jamatii ese jaahuanajjiya, Eyacuiñajjiya eseya ba mee canaje ojjaña ojaya quea boti nee nee. Jamajjeya ohuaya ojjaña quea jea nee nee acani. ⁵ E'e, Eyacuiñajjiya esejaya mimishi cuijea ca'yajje eseya ba'e tiitiije'yo eyajo. Eseya quea pame poanijo pojjeama ohuaya esejaya mimishi cuijea ca'yonaje. Chojja, chama' joya quea pame nee mimishi'ama ba'yani. Jamatii Jesosa eseya mimishijo mano'yonajejo, Eyacuiñajjiya esejaya mimishi cuijea ca'yonaje. E'e, Eyacuiñajji quea quene tii tii pojjeama ese nijje poanaje; eseya ojaya quea jea nee nee poanaje. Jamajjeya ohuaya esejaya mimishi cuijea'yo majje Edojoshahua Pame ese que dobiqumi mee ca'yonaje eseya quea bihui nee epojji. Ohuaya eseya ba'e meesahua cani Eyacuiñajjiya esohui jayojja, yahuajo jama pojjeama. ⁶ E'e, Jesosa Quito esejaya mimishijo mano'yonaje ese ba'e tiitiije'yo. Majoya Eyacuiñajjiya Edojoshahua Pame huoojea ca'yonaje ese que dobiqumi, ese quea pame nee ba'e meesahua. ⁷ Jamajjeya eseya ojaya bacua cuana poanijojo ohuaya eseya ba'e tiitiije'yo mee caje'yo onijje eyajo. E'e, eseya Eyacuiñajjiya quea jea nee acanaje; ohuaya huohui canaje jama ba'a: —Jesosaja epeeji cuana eyaya baña mimishi'ama, emimishi cuijea'yo.

⁸ Tito, ¡jiquio esohui ecue etehue'yo e'e nei. Jamajjeya ¡jiquio esohui huohui neineicue ojjaña Jesosaja epeeji cuana huasijje! Shajja'ajja majje onaaya quea pame nee atiiti caje'yo. E'e, ¡jiquio esohui quea pame nee. Shajja'ajja neinei majje ojjaña cuana quea pame nee ba'eje'yo. ⁹ Jamatii beca cuana ecue sohui jayojja jama ba'e ajja, quea pame ba'e ajja. Oya cuana aje oe jjamimicuijajea nobiajeaquiani onajaya esohui quea quehuajo, Jodio etiiquiana cuanajo, Moisesija esohui etehue'yojo pea'ai. E'e, jamaya quea tai. ¡A'a ona jayojja jama pojji, Tito! Jamaya po majje miquea pea cuana quea pame nee ejjapeequi meesahuajji pojjeama Jesosa nijje. ¹⁰ Esohui huohuijji nisho Jesosaja epeeji cuana ojaya esohuijo jjashahuabaqui pajea mee sa poani. Peaja esohui shajja'ajja mee sa poani. ¡Esohui huohuijji nisho huohuicue jama ba'a: —¡Miquea esohui quea tai huohui pajea'yocue! — acue!

Oya cuana shajjama' poanijo, joya huohui o'oyacue ojaya esohui quea tai ehuhui pajea'yojji; beca huohui'yome acue! ¡Majoya oya cuana shajjama' po tiitiiajo, oya cuana cajaa a'yocue! ¡A'a onijje jjapeequi o'oyajji! ¹¹ Mi shajja'ajja sa po'yo ajjajo miquea eba ma esohui huohuijji nisho cuana shajjama' nei nei. Oya cuana quea pame po sa po'yo ajja nei nei. Eyacuiñajjiya esohui jayojja jama a sa po'yo ajja. Jamajjeya quea mimishi poanijo, Eyacuiñajjiya oya cuana tecuea caje'yo. Quea nee nee po mee caje'yo pea'ai.

¡Poecue e que Nicoponi yasijje!

¹² Tito, quijje eyaya Jesosaja epeeji mi que, Queta nasi yasijje huoojeaje; Atema, Tiquico pojja'a huoojeaje. Mi que ba'eñaquaja ¡poecue e que Nicoponi yasijje! Jomajo eyaya miya ishoaje. Majoya eseya eeno shejo Nicoponijo ba'je.

¹³ Emeshi meseja esohui bajji Sena bajjani, Jesusaja esohui huohuijji Apono bajjani pea'ai Queta meshijo nequi ajja. Jjeya nei pea meshi yasijje poquiye. Jamajjeya ¡oya cuana poqui meesahuacue! ¡Bobi cuana, eba'ejji cuana pea'ai quiacue!

¹⁴ Tito, jamajjeya ¡Jesusaja epeeji cuana huohuicue jama ba'a: —¡Quea pame nee eba'e, huea'ama! ¡Jesusaja esohui huohuijji cuana, aema' cuana pea'ai ejjaquiaqui aquiana cuana; onaya ejjaba'e meesahuaqui! —jamaya acue Jesusaja epeeji cuana ona jaahuanajji epojji!

¹⁵ Ojjaña Jesusaja epeeji cuana enijje nequiya eya huohui'ajja mee cani jama ba'a: —Tito, ¿achajja ami ani so'o ecuanajaya ebajji?

Ojjaña Jesusaja epeeji cuana Quetajo ba'e huohuicue jama ba'a: —Pabohua, ojjaña onijje nequiya pea'ai jama acani ba'a: “¿Achajja acuae quiana ani so'o?” ecuanajaya ebajji. Ecuanaya ojjañaja quea boti nee.

Miquianaya Eyacuiñajjija quea jea nee nee. ¡Ohuaya miquianaya cajaanhuana cahua! Mahuiso eyaya, Pabohua mi que tehuenaje, Tito. Apoa.

PABOJA ETEHUE'YO PINEMO QUE FILEMÓN

Pabohua esohui tehue canaje Pinemo que

¹ Ecuea epeeji Pinemo, eyaya Pabohua jiquio esohui mi que tehueaña. Eyaya Jesosa Quitoja esohui huohuañaño, dejja mase cuaa eya iña'yo majje jeanobia ca'yonaje. Esejaya epeeji Timoteo enijje nequi. Pinemo, ecuaaya miya quea jea nee año. Miyaya eya chaco meesahuaña. ² Jamajjeya jiquio pea ecuaaya esohui etehue'yo huojeaje Jesosaja epeeji cuana huasijje, ma miqúea equi yasijje ojee dobiqúiani Jesosa Quito bihuiaa. Esejaya epeeji epona Apia bajjani que tehueaña pea'ai, ma ese nijje chacochoconaje Jesosa Quitojo.

³ Eyacuiñajji esejaya Chii ai poani. Jesosa Quito esejaya Emeshi Mese nei poani. ¡Ohuaya miqúianaya cajaanaya cahua! Miqúianaya ojaya epeeji cuana poanijo, ¡quea bei nee capo mee cahua pea'ai!

Pabo Pinemojo quea bihui nee poani

⁴ Pinemo, eya Eyacuiñajji nijje mimianijo oya bihuiaña miya quea pame poanijojo. ⁵ E'e, pea dejja cuaa huohui cani jama ba'a: —Pinemohua ojjaña Jesosaja epeeji cuana quea jea nee acani, Jesosa Quitoja esohui jayojja jama po tiitiiani pea'ai.

⁶ Jamajjeya eya Eyacuiñajji nijje mimiani mijo jama ba'a: —Eyacuiñajji, ¡Pinemo Jesosaja epeeji cuana nijje jjapeequi meesahuacue quea ja'a nee! Jamajjeya Jesosaja epeeji ojaya esohui jayojja jama poaje'yo Pinemo nijje. E'e Eyacuiñajji, ecuanaja echaco quea pame nee Jesosa Quitojo. Jamajjeya ¡miyaya Pinemo ojjaña onijje jjachichaquiani pea'ai jjabahuejja meequisahuacue joya miya o asahuanajejo quea pame nee! —jamaya eya mimiani Eyacuiñajji nijje mijo, Pinemo.

⁷ E'e Pinemo, miyaya ojjaña Jesosaja epeeji cuana quea jea nee año. Miqúea echacoji quea pame neejo pea epeeji cuana quea bihui nee poanaje. Jamajjeya eya quea bihui nee poani mijo.

Pabohua Onesimojo tehue canaje

⁸ Jamajjeya Pinemo, eya Jesosaja epeeji jaahuaniiji etiuya jjejojo beshahua nei miya tehuenaje jama ba'a: “Onesimo miqúea equi yasijje poqui'yajo ¡a'a oe cuiñajjequi'yojji; ja'ajjequi o'oyacue!”

⁹ Chojja, ecuea jama tehue'meyajji pojjeama mi que; eya miqúea quea jea neejo ecuea etehue'yo jayojja jamaya miyaya aje'yo. E'e eya, Pabo eti. Eya Jesosa Quitoja huoojea'yo ojaya esohui huohuiya. Jjeya eya ejeanobia ani; dejja mase cuaa eya iña'yo majje jeanobiajea ca'yonaje Jesosaja esohui huohui mee ajjaa jjejojo.

¹⁰ Pinemo, eyaya mi que tehueaña Onesimojo. Ecuea esohui shajja'ajja majje Onesimo Jesosa Quito nijje jjapeequi'yonaje. Jamajjeya oya ecuea ebacua ejja jayojja jama poanaje. Jamaya oya poanaje eya jiquiojo Shoma cuiñajji e me' jeyo'yo anijo. ¹¹ Yahuaño minijje nequiya Onesimohua quea tai aca poa. Jjeya ca quea tai pojjeama'yo. Quea pame nee ejo chaco ca'yani. Mijo chaco caje o'oya pea'ai; jjeya ca ca quea pame nee chaco caje'yo, Onesimohua.

¹² Ecuea Onesimo quea jea nee nee poani; jamatii eyaya oya huoojeaje o'oya mi que minijje eba'e o'oyajji. ¹³ E'e pojja'a miyaya oya huoojeaje o'oya e que enijje eba'e'yojji. Jamajjeya eya quea bihui nee poaje'yo. Jamajjeya aje mo oe jama jjashahuabaquimeya poani. Eya jiquiojo nequi eme' jeyo'yo, Jesosa Quitoja esohui huohuiji poani joyaya. Miya e ba'e meesahua sa poanijo ¡Onesimo, miqúea echacoji yacua huoojea'locue e ba'e meesahuaa! ¹⁴ Miqúea echacoji ecuea enahuejji pojjeama. Chojja, miqúea ej-jashahuabaqui'yojji jayojja jama a sa ca ca iña poani. Eya ca ca iña mi huoojeajji pojjeama ca Onesimo enije e'ani meejji, e ba'e meesahuaaji. ¡Miquea ejjashahuabaqui'yojji jayojja jama miyaya quea bihui nee a'locue ejo! ¹⁵ Yahuaño oya minijje chacochocho maja sa po ajja jjejojo quehua poquia poa. Jjeya ca ca oya miyaya jaahuana tiitiije'yo. ¹⁶ Oya ca ca minijje chacochocho nequinaje sosomea'. Jjeya ca ca oya Jesosaja epeeji poanijo miqúea miqúe chahua jayojja jama po'yonaje pea'ai. E'e, oya eseja chahua jayojja jama poani Jesosa Quito nijje jjapeequianijo. Esejaya oya quea jea nee nee poani. E'e de, ecuea oya quea jea nee nee. Jjeya oya Jesosa Quitoja epeeji; miqúea echacoji pea'ai. Jamajjeya ¡miyaya oya quea jea nee nee acue!

¹⁷ Jamajjeya ¡ecuea etehue'yojo jjashahuabaquicue! Pinemo, ¡eya miqúea epeeji poanijo, Onesimo ba'e mee o'oyacue minijje! ¡Bacue! Eya mi que poquiajo, miya quea bihui nee

poaje'yo. ¡Jamaya oe pocue Onesimo mi que poqui'yajo! ¹⁸ ¿A'a yahuajo ohuaya miquea aquiana sii ca poa? ¿A'a ma aquiana quea sose huiso nee nee? ¡A'a Onesimo sosequia meejji! ¡Eyaya oe casosequia'yahua! ¹⁹ Jamajjeya eyaya esohui tehueña ecuea emeya jama ba'a: Pinemo, eyaya Pabohua miya sosequiaje'yo ma Onesimohua sii ca poa.

Jamatii ¡jjashahuabaquicue! Miya Jesosa Quitoja epeeji poanaje eya huohuije shajja'ajja majje. ¿Ache sose huiso acuae ecuea esohui miyaya shajja'ajjanaje Jesosa Quitojo? ¿A'a quea huiso nee nee? ²⁰ E'e Pinemo, miya ecue chahua jayojja jama poani. Jamajjeya eseya Jesosa Quito nije jjapeequianijo, ¡che ña quea quijiji jaji nee po mee'yocue! ¡Onesimo mi que poqui'yajo, ja'ajjequi'yo majje jjequidobia'yocue!

²¹ Jiquio eyaya esohui tehueña mi que; ecuea eba miya; ecuea esohui jayojja miyaya aje'yo e'e nei, quea pame nee nee aje'yo tii pea'ai.

²² ¡Pea ecuea esohui jayojja jama a'yocue! ¡Equi equecuayiji cuiashabacue e añajjiya! Poejeya pojja'a mo mi que. Miquianaya Eyacuiñajji nije mimi huicha'ahuicha'a ani jama ba'a: —¡Eyacuiñajji, miyaya dejja mase cuana Pabo pichojea mee'yocue oe, equi ejjajejanobiaquijiji ani! —miquianaya poanaje.

Jamajjeya eya jjashahuabaquiani jiquio jama ba'a: —E'e, Eyacuiñajjiya eya poqui meesahua caje mi que. Joya ecua miya mimiani jamaya Eyacuiñajjiya acaje'yo —jamaya eya jjashahuabaquiani.

Pea esohui quea bihui nee epo meejji

²³ Dejja Epapasi bajjani Jesosa Quitoja esohui huohuiji poani jojaya, dejja maseya oya ña majje jeanobiajea ca'yonaje pea'ai. Ohuaya eya huohui'ajja mee cani jama ba'a: —Pinemo, ¿achajja acuae mi ani so'o, de?

²⁴ Pea ecuea epeeji cuana enijjeya Jesosa Quitojo chacochoani. Ohuaya eya huohui'ajja mee cani jama ba'a: —Pinemo, ¿achajja acuae mi ani so'o? —yohua cuana ba'a: Macoso, Anitaco, Demasi, Noca pea'ai. Mahuisohuaya mi huohui'ajja mee cani.

²⁵ Esejaya Emeshi Mese oe nei, Jesosa Quitohua ¡miquianaya cajaanuana cahua quea pame nee! Mahuisoya Pinemo, apoa. Eyaya Pabohua esohui tehuejeyonaje.

ETE HUE'YO JESOSAJA EPEEJJI CUANA EMEOJA ESOHUIJO MIMIANI YASIJJE HEBREOS

Eyacuiñajjiya oja Bacua Ejja huojea canaje ona oja esohui ba meeya

¹ Ecuea epeeji cuana quea huiso meshijo ba'e, yahuajo nei nei Eyacuiñajjiya ojava epeeji nei cuana huojea ca poa esejaya etiiquiana que, Jodio etiiquiana que. Jama poa ba'a: "iHuohuiquicue Jodio cuana huasijje ecuea ejjashahuabaquijji ojjañaja ebajji! iHuohui majamajacue oe!" Ma huojea nequime aca poa; pea mano'yajo huojea'yo esohui huohuiji aca nequia poa. Oe esohui huohuiji quea huohui huohui meesahua ca poa Eyacuiñajjiya ojava ejjashahuabaquijji. Pea esohui huohuiji pea esohui huohui meesahua ca poa ojava ejjashahuabaquijji pea'ai. Jamatii huohui jjima poa ojjaña Eyacuiñajjiya ejjashahuabaquijji. ² Jjeya ca ca Eyacuiñajjiya oja Bacua Ejja Jesosa Quito bajjani huojea canaje eseya ojjaña ojava ejjashahuabaquijji ba meeya. Ohuaya Jesosa oja Chii nijjeya ojjaña pana ca'ya poa, ojjaña aquiana meshijo e'anijji, eyatahuatahuajo enequijji pea'ai pana ca'ya poa. Jamajjeya ojava nei aquiana. Jesosa ojjaña huojea'yojji poani tii ti eyajo, meshi cuanajo pea'ai. ³ Jesosa oja Chii jayojjaya poa. Quea pame nee nee, quea ca'a nee nee. Jesosa oja Chii jayojjaya poani tii. Oya quea sohui poja nee neeya jjejojo ojjaña nequi mee ca poa. Ma ecua ohuaya yahuajo huohui ca poa jamaya acani ohuaya jjeya ojjaña eyajo nequi, ojjaña meshijo nequi pea'ai nequi ca'a tiitii mee cani Jesosa. Oya ojjañaja mimishi cuijea'yo majje, ma ojjaña ojava epeeji epojjija mimishi cuijea'yo majje anioquenaje oja Chii pejeje ebianeijje. Jomajo oya, Jesosa ojjaña huojea'yojji poani tii. E'e, Eyacuiñajji, Jesosa pea'ai quea ca'a nee nee po tiitiiani. Pea ca'a'ama.

Jesosa Eyacuiñajjiya Bacua Ejja quea ja'a nee nee esohuidojojji cuana quea ja'a pishana

⁴ Eyacuiñajjiya Jesosa nequi mee cani quea ja'a nee nee. Ojava esohuidojojji cuana ca ca nequi mee cani quea ja'a pishana. Esohuidojojji cuana bajjani canaje quea bajjani pame pishana, Eyacuiñajjiya echacojji bajjani. Jesosa ca ca Eyacuiñajjiya Ebacua Ejja quea pame nee nee. ⁵ "Eyaya miya ojjaña ba meeaña cuana, miya ca ca oe ecue Bacua Ejja. Eya ca ca iña mique Chii". Jamaya Eyacuiñajjiya Jesosa acanaje. Eyacuiñajjiya ca ca esohuidojojji cuana jama huohuime ajjimaya. Eyacuiñajjiya Jesosa jama huohuime aca o'oyanaje ba'a: "iEya e'e jojo nee mique Chii caba cahua cuaa! E'e, miya ecue Bacua Ejja oe nei". Jama Jesosa huohuimeya acanaje. Jama huohuimeya esohuidojojji ajjima Eyacuiñajjiya.

⁶ Eyacuiñajjiya oja Bacua Ejja oe nei meshi yasijje huojea jeahua esohuidojojji jama huohuime aca poa ba'a: "iEsohuidojojji cuana, ecue Bacua Ejja oe bihuiacue, ojjaña!" Jamaya Eyacuiñajjiya aca poa Jesosajo.

⁷ Esohuidojojji jama aca poa ba'a:

"Eyaya ecuea esohuidojojji huojeaña quea cuejipashi nee nee pojjeje jama, quea quemonee nee beni jama".

Jamaya Eyacuiñajji poa.

⁸ Oja bacua ca ca Eyacuiñajjiya huohui ca poa jama ba'a:

"Miya ca ca oe ecue Bacua Ejja e'e jojo nei, e jayojjaya tii tiya Eyacuiñajjiya ca mi coma. Miya ojjaña huojeajji poani tii ti ojjaña meshi yasijje. Quea ja'a nee nee ojjaña huojeaña tii tii. ⁹ Ojjaña quea ja'a nee nee poani; ecuea ejjashahuabaquijji jayojja jama poani miquea quea boti nee nee poani. Mimishi cuana ca ca cajaa aña. Jamajjeya eyaya miya babaca'ya poa ojjañaja Emeshi Mese nei epojji. Ojjaña miya shajja'ajja caje ojjaña meshijo ba'eca cuaa. Pea emeshi mese shajja'ajja jjima acaje cuaa. Jamajjeya miya quea jaji nee nee poani tii".

Jamaya yahuajo nei Eyacuiñajjiya tehue mee ca poa Jesosa nijje.

¹⁰ Eyacuiñajjiya pea esohui tehue mee ca poa oja Bacua Ejja nijje, Jesosa nijje jama ba'a:

"Emeshi Mese nei, miyaya ebionei meshi pana cooa poa ojjaña. Eyatahuatahua pana cooa poa quea huessa nee nee, ojjaña eyajo enequijji pea'ai. ¹¹ Ojjaña miquea epana'yo oe poaje, meshi cuana, eyatahuatahua pea'ai. Miya ca ca nequi tiitiije'yo. E'e, miya ca ca oe nequi tiitiije'yo. Meshi etii poaje, eyatahuatahua pea'ai. Jiquio ecua daqui eyacua daqui chii poani, daqui chii chii'yajo iñajjaja'yo majje jeajeaña jayojja jama eyaya meshi aje, eyatahuatahua pea'ai. ¹² E'e, daqui chii jeajeaña eyacua ehuoshojji jayojja jama meshi, eyatahuatahua pea'ai tiil'yajo eyaya cajaa aje eyacua epana'yojji. Miya ca ca jamatii nequi tiitiije'yo quea ja'a nee nee".

Jamaya poanaje Eyacuiñajji oja Bacua Ejja nijje, Jesosa nijje.

¹³ E'e, jamaya Eyacuiñajjiya oja Bacua huohui ca poa esejaya ebajji jama ba'a:

“¡Anioqueuec ecuea ebianeí mijije enijje ojjaña huoojea'yojji! ¡Epejeje ishóa'ajjacue! Mi quecuajji nisho yani. Eyaya oya cuana ca'a'ama po mee majje mi shajja'ajjaji po meeje'yo”.

Jamaya Eyacuiñajjiya oja Bacua Ejja ca ca oe huohui ca poa. Eshuidojojji nijje ca ca jama mimimeya po jjima.

¹⁴ E'e, eshuidojojji cuana Eyacuiñajjiya huoojea'yo ca ca oe. Oya cuana huoojea cani Jesosaja epeeji cuana jaahuanaa, ma onijje eyajo eba'e tiitii'yojji cuana jaahuanajji.

2

¡Jesosa shajja'ajjacue ojaya epeeji nei epojji!

¹ Ecuea epeeji cuana, jamajjeya ¡shajja'ajja neineicue Jesosaja esohui ojaya epeeji nei nei epojji! Yahuajo pishana maya shajja'ajjanaje eseyaya. Esohui pajea'yo majje ca se ca oe bishe jeyo jjima jayojja beniya dojea cani jayojja jama poaje; poquiquehua chana se esohui pajea'yo majje. ² Yahuajo nei nei Eyacuiñajjiya eshuidojojji esejaya etiiquiana huasijje huoojea ca poa. Oja sohui e'e nei huohui huicha'a huicha'a mee ca poa: “¡Shajja'ajjacue ecuea eshuidojojji esohui e'e nei!” jamaya Eyacuiñajjiya etiiquiana aca'ya poa.

Jamajjeya shajjama' cuana Eyacuiñajjiya quea nee po mee ca poa oja esohui ajjimajojo. Jjashajja'ajjaqui ajjajojo quea nee nee po mee ca'ya poa. ³ Jjeya ca ca Eyacuiñajjiya eseya quea pame nee nee acani. Jesosa nijje jjapeequianijo, ohuaya eseya ba'e tiitii mee caje'yo eyajo. Jesosa nijje jjapeequi sa po'yo ajjajo cho, eba'e tiitii mee'yojji pojjeama. E'e, Jesosaa esejaya Emeshi Mese neiya huohui coo ca poa jama ba'a: —Enijje jjapeequiajo, eyaya miquianaya ba'e tiitii meeje'yo enijje —Jesosaa poanaje.

Majoya o shajja'ajjaji cuaa eseya huohui canaje jama ba'a: —E'e jojo nei Jesosaa eseya ba'e tiitii mee caje'yo eyajo onijje jjapeequianijo.

⁴ Eyacuiñajjiya pea'ai ba mee canaje ma esohui e'e jojo nei. E'e, Eyacuiñajjiya Jesosaja epeeji cuana ma dejjaa ajjima acani ameesahua canaje. Ma dejjaja yahuajo ba jjima poa ba meesahua canaje pea'ai. Edojjoshahua Pame huoojea canaje pea'ai ojaya ej-jashahuabaquijji jayojja jama ameesahua, Eyacuiñajjiya. Jamajjeya eseya ba mee canaje e'e jojo nei Jesosaa eseya ba'e tiitii mee caje'yo eyajo onijje jjapeequianijo.

Meshi eyacuajo ojjaña huoojea'yojji poaje Jesosa

⁵ E'e, quijje Eyacuiñajjiya meshi pana caje'yo eyacua. Ma meshi eyacuajo ecuaaya miquianaya huohuiana jama poaje ba'a: Eyacuiñajji Jesosaja epeeji cuana nijje jama poanaje ba'a: —E'e jojo nei meshi eyacuajo miquianaya ona huoojeajji poaje —Eyacuiñajji jamaya poanaje Jesosaja epeeji cuana nijje. Jamaya mimi jjima eshuidojojji nijje, de. ⁶ Chojja. Yahuajo nei nei Dabi tehue meesahua ca poa Eyacuiñajjiya jama ba'a:

“Eyacuiñajji, miya jjashahuaba tiitiquiani meshijo eba'ejji cuanajo. Dejja cuana ca'a'ama. Quea pame pishana. Jamatii oya cuana miyaya jaahuanaña. ⁷ E'e Eyacuiñajji, yahuajo miyaya ojjaña dejja cuana quea pame anaje; eshuidojojji quea pame nee jayojja beshahua nei anaje. Jamaya miyaya oya cuana nequi meenaje iye huiso daqui sheme. Miyaya oya cuana quea ja'a nee nee po meenaje. ⁸ Quea ca'a nee nee po meenaje miyaya ojjaña huoojea'yojji epojji”.

Jamaya Eyacuiñajjiya yahuajo nei Dabi tehue mee ca poa. E'e, ma etehue'yojo jama poa ba'a: “Dejja ojjaña huoojea'yojji po mee canaje Eyacuiñajjiya”. E'e, ojjaña huoojea'yojji po mee ca poa, ojjaña aquiana cuana huoojeajji. Jamatii eseyaya baña jjeya dejja cuana ojjaña huoojeajji po jjima poani.

⁹ Jesosa ca ca esejaya eba. Eyacuiñajjiya oya nequi mee ca poa beshahua nei eshuidojojji quea pame jayojja. Jamaya nequi mee ca poa oe pojji daqui sheme. Eseya Eyacuiñajjiya quea jea nee poanijo, Jesosa ese jayojja yamijji poa; emano'yojjiya poa. Jamajjeya Jesosa ojjaña nahuejji manoyonaje. Eyacuiñajjiya oya shequi mee ca o'oyanaje quea bame nee nee enequi tiitii'yojji. Pea chama' o jayojja, de.

¹⁰ Eyacuiñajjiya oja Bacua Ejja nijjeya, Jesosa nijjeya ojjaña pana majje nequi mee cani, ojjaña eyajo nequi, ojjaña meshijo ba'e pea'ai. Ojjaña yani de, Eyacuiñajji quea bihui po meejji. Oya ojjaña Emeshi Mese tii poani; ojjaña Jesosaja epeeji nequi tiitii mee sa poani onijje: —E'e, ecuea Ebacua Ejja quea nee nee po majje oya ojjaña jaahuanajji poaje —jamaya Eyacuiñajji jjashahuabaquinanaje —. Jamajjeya jamaya poaje. Ecuea Ebacua Ejja quea nee nee po meeje. Jamaya quea pame. Jamajjeya ohuaya, Jesosaa quea huiso ba'e tiitii mee caje'yo onijje eyajo —jamaya Eyacuiñajji poanaje.

¹¹ Jamajjeya Jesosaa ojjaña eseya quea boejea po mee ca'yani mimishi cuijea'yo majje. Jamaya ojjaña eseya Eyacuiñajjiya bacua po mee cani o jayojja pea'aiya. Jamajjeya oya,

Jesosa ese nijje quea bihui nee jama poani ba'a: —Ecue Chii miquianajaya Chii pea'ai poani. Miquianaya ecuea ecue chahua mese cuana, ecue jjo'i cuana —Jesosa poani.

¹² E'e, Eyacuiñajjiya esohui yahuajo nei etehue'yojo Jesosa oja Chii nijje jama poa ba'a: “Eyacuiñajji, eya ecuea huapa pojjeama cuana nijje mimije mijo. Eyaya miya bihuiaje ojjaña ecuea epeeji cuanaja eshajja'ajjaji jama ba'a: —Eyacuiñajji, miya ca ca oe quea ca'a nee nee nequi —jamajjeya eya sohuicuaayaje”.

¹³ Jamaya pea esohui yahuajo nei etehue'yojo Jesosaa aca poa ba'a: “Eyacuiñajji, eya ca ca iña miyaya baña Eyacuiñajji nei nei. Miyaya eya jaahuanaña e'e jojo nei”.

Jama pea'ai poa ba'a:

“Eyacuiñajji, ¡eya bacue ecuea huapa pojjeama cuana nijje, ojjaña joya miyaya enijje jjapeequi meesahuanaje nijje!”

Jamaya yahuajo nei Eyacuiñajjiya Isaia tehue mee ca poa Jesosaja esohui.

¹⁴ Jesosaja epeeji cuana dejja cuana aje oe yamijji. Jamajjeya oya, Jesosa poeyanaje yamijji, ese jayojjaya mano'yome epojji. Mano'yonajeya jjejojo ohuaya Edosiquiana nei Satanasa bajjani jeabichajea ca'yonaje, ma ojjaña manomee'yojji poani jeabichajea ca'yonaje. E'e, eba'e tiitii'yojji jjejojo mete'ama eseya poaje emano'yojji. ¹⁵ Yahuajo ojjaña eseya quea mete jjashahuabaqui aninaje jama ba'a: —E'e de, eya manoj'e'yo. Jamaya quea tai. Quea mete ca iña emano'yojji —eseya poanaje.

Jesosaja epeeji nei ca ca jjashahuabaquiani jama ba'a: —E'e, eya manoj'e'yo. Jamatii Eyacuiñajjiya eya ba'e tiitii mee caje'yo onijje eyajo.

¹⁶ Jamajjeya Jesosa dejja jayojja yamijji poeyanaje. Poeyanaje esohuidojojji jayojja pojjeama, esohuidojojji jaahuanaa pojjeama. Chojja. Jesosa poeyanaje dejja jayojja yamijji ese jaahuanaa, Amajamaja osecua cuana jaahuanaa. ¹⁷ Jamajjeya oya, Jesosa ese jayojjaya poanaje ojjaña ojaya epeeji nei jaahuanajji jama ba'a: Eyacuiñajji nijje emimijji etii yahuajo ba'eya Eyacuiñajjiya esohui jayojja jama aca poa Eyacuiñajji Jodio cuana nijje quea bei epo meeji nisho. Jjeya ca ca Jesosaa Eyacuiñajjiya ejjashahuabaquijji jama e'e jojo nei acani quea ja'a nee. Eseja mimishi cuijea'yojji mano'yonaje. Jamaya Eyacuiñajji ese nijje e'e jojo nei quea bei po mee canaje tii tii. ¹⁸ Jiquio meshijo ba'e Jesosa quea nee nee poa. Cuanaya Edosiquiana neiya, Satanasa Jesosa quea mimishi epo meeji nisho aca poa. Jamajjeya Satanasa eseya quea mimishi po mee sa acanijo, Jesosaa eseya quea pame ba'e mee cani. Jamaya Jesosaa ameesahua cani ba'a: —Chojja, eya Jesosaja epeeji poani. Ohuaya eya jaahuana canijo, quea mimishi po maja sa po ajja ca iña —jamaya Jesosaa eseya po meesahua cani.

3

Jesosa quea pame nee; Moisesi quea pame pishana poa

¹ Jamajjeya ecuea epeeji cuana, ¡Jesosajo oe jjashahuabaquicue! Eyacuiñajjiya eseya babaca canaje Jesosaja epeeji epojji, onijje eyajo eba'e tiitii'yojji. E'e, ¡Jesosajo oe jjashahuaba tiitii'quicue! Eyacuiñajjiya oya huoojea canaje ese jaahuanaa: —Miya enijje ma mimi poquime poaje miquea epeeji cuanajo. Quea pame nee nee jamaya poaje'yo tii —jamaya Eyacuiñajji poanaje Jesosa nijje.

² E'e, Eyacuiñajjiya yahuajo Jesosa babaca ca poa ojaya epeeji cuana jaahuanajji epojji. Ojaya epeeji cuanajo onijje emimijji quea pame nee nee po mee ca poa. Ma eua Eyacuiñajjiya huohui canaje jamaya e'e jojo nei acanaje Jesosaa. Jesosaa jayojjaya etiiquiana Moisesiya Eyacuiñajjiya epeeji cuana jaahuaname aca poa yahuajo nei nei. ³ Moisesi ca ca quea ja'a pishana poa. Jesosa ca ca quea ja'a nee nee poanaje. E'e, jiquio ecua se equi iya jjimajo jjashahuabaquiani, jamaya Jesosa jjashahuabaquinaje eseya Eyacuiñajjiya epeeji quea ja'a nee epo meeji. ¡Quea pame nee nee Jesosa! Moisesi ca ca echacosahuajji jayojja jama poa; Jodio cuana beshahua nei Eyacuiñajji nijje jjapeequi meesahua ca poa.

⁴ E'e, ojjaña equi cuana equi iyajji poaniya iya cani. Jiquio ecua equi iyajji poaniya equi iya cani jama panameya Eyacuiñajjiya aca poa. Ojjaña pana'yo majje quea ja'a nee jjeya nequi mee cani. Jama jayojjaya Jesosaa ojaya epeeji cuana yahuajo nei nei ba'ya poa quea ja'a nee onijje jjapeequi meesahua ca poa; ojaya epeeji jjeya nei ba'yani pea'ai jjapeequi meesahua cani onijje. ⁵ Jamajjeya Moisesi Eyacuiñajjiya echacojji poa. Jiquio ecua echacojjiya equijo chaco neinei cani jama jayojja Moisesiya Eyacuiñajjiya esohui pea cuana ba mee ca poa; ma Eyacuiñajjiya quijje huohui caje Moisesiya huohui ca poa pea'ai.

⁶ Jesosa Quito ca ca Eyacuiñajjiya Ebacua Ejja. Oya e'equi mese jayojjaya, equi chacojji jayojja pojjeama. Eseya ojaya equi jayojja poani. E'e, eseya Eyacuiñajjiya equi jayojja poani ca jama jjashahuabaquianijo tii ba'a: —Eya Eyacuiñajjiya epeeji. Ohuaya eya ba'e tiitii mee caje'yo onijje eyajo.

Jamajjeya ¡Jamaya huohui tiitiicue! ¡Jesosa nijje quea bihui nee jjaapee tiitiicue! Ohuaya eseya jaahuana cani quea ja'a nee nee.

Ojaya epeeji cuana jomishoca mee caje'yo Jesosaa

⁷Yahuajo nei nei Edojjoshahua Pameya esejaya etiiquiana esohui tehue mee ca poa jama ba'a:

“Jjeya nei Eyacuiñajji minijje mimianijo, ¡ojaya esohui shajja'ajja neineicue! ⁸¡A'a shajjama' poiji! ¡Miquianajaya etiiquiana jayojja jja oe a'a poiji! Yahuajo nei Eyacuiñajji esohui shajja'ajja jjima poa meshi jabojo nequija. Meshi quimajo nequi etiiquiana cuana quea mimishi nee nee poa. Jamatii Eyacuiñajji quenequene cuaji ajja poa etiiquiana nijje. ⁹E'e, miqianajaya etiiquiaa yahuajo nei ba'ya poaa Eyacuiñajji ba'ajja ca poa. Jama poa ba'a: —Eya quea mimishi poanijo jamatii Eyacuiñajjiya eya etecueajji pojjeama —jama posoya jjaboquia poa cuana. Jamajjeya Eyacuiñajjiya jama aca poa ba'a: —Miquianaya ca jja ca oe quea mimishi nee nee. Quea huiso shequiajame, 40 shequiajame eya miqianajo ishoa'ajjaña poa miqianajaya mimishi cuana epajea'yoyji nisho. ¹⁰Jamajjeya mimishi pajea'yo ajjajo eya quea tecue miqianaya nijje poa: Miquianajaya ejjashahuabaquiji quea quehua, quea tai. Ecuea esohui jayojja jama a sa po'yo ajja. Jjabahuejjaqui'yo ajja —jamaya Eyacuiñajji poa —. ¹¹Jamajjeya quea quene po majje eyaya miqianaya tecueajeane jama ba'a: Shajjama' poanijo e'e jojo nei miqianaya ca mi ca oe edobiquiji pojjeama ecue meshi quea pame yasijje ejomishocaji, quea bei eba'e'yoyji pea'ai”.

Jamaya Eyacuiñajjiya etiiquiana cuana Moisesi nijje nequi tecueajea ca poa. Jamaya yahuajo nei esohui etehue'yo poa.

¹²Ecuea epeeji cuana, jamajjeya oe ¡quea ja'a nee jashahuabaquicue! ¡Eyacuiñajjiya sohui jama acue! ¡A'a quea quehua jashahuabaquiji! Shajjama' po majje Eyacuiñajji nijje miya jjaapee pajeaqui chana'. Tecuea ca chana' mi. Oya ca ca oe ba'e tiitiiani, de. ¹³Jesosaja pea epeeji cuana nijje ca ca mimi huicha'a huicha'acue jama ba'a: —¡jjeya nei Jesosa nijje ejjapee neineiqui!

Jamaya poanijo miqianaya mimishi cuanaja edasiajji pojjeama; quea mimishi nee nee epojji pojjeama.

¹⁴E'e, Jesosa nijje ejjapeequi jahuajo eseya jashahuaba neineiquinaje onijje eyajo eba'e tiiti'yoyji. ¡Jamaya ejjashahuabaqui poqui! Jamajjeya quijje eseya onijje ona huoojea'yoyji poaje'yo tii tii eyajo.

¹⁵E'e, jamaya yahuajo nei esohui etehue'yo poa ba'a: “Jjeya nei Eyacuiñajji minijje mimianijo ¡ojaya esohui shajja'ajja neineicue! ¡A'a shajjama' poiji! ¡Miquianajaya etiiquiana jayojja jama a'a poiji!” Jamaya yahuajo Dabiya tehue ca poa.

¹⁶¡Bacue! Moisesiya esejaya etiiquiana Ejito meshijo ba'e poqui meesahua ca'ya poa. Eyacuiñajji ona nijje mimi huicha'a huicha'a poa. Jamatii beshahua nei ojjaña shajjama' poa. ¹⁷Ona nijje Eyacuiñajji quea quene nee poa quea shequiaja huiso nee neejo, 40 shequiajame. Oya cuana ca ca quea mimishi nee nee poa. Jamajjeya mano ca'ya poa, oe mano popoqui'ya poa meshi jabojo, quimajo. ¹⁸Shajjama' tiiti poajajo Eyacuiñajjiya oya cuana tecuea ca poa jama ba'a: “E'e jojo nei miqianaya ecue meshi yasijje edobiquiji pojjeama quea bei nee ejomishocaji. ¡Quea mimishi nee nee mi coma!” Jamaya Eyacuiñajjiya etiiquiana yahuajo nei nei ba'ya poa tecuea ca poa.

¹⁹Jamajjeya e'e jojo nei oya cuana meshi quea pame nee yasijje dobiqii jjima poa ejomishocaji Eyacuiñajjiya esohui shajja'ajja sa po ajja jjejojo, ojaya epeeji nei pojjeama jjejojya.

4

Etiiquiana jayojja jama eseya ejomishocaji yasijje dobiqii ajja po chana'

¹Jamajjeya Eyacuiñajjiya yahuajo nei etiiquiana huohui ca poa jayojja jama ohuaya jjeya eseya huohui cani jama ba'a: —¡E que poe'yocue ejomishocaji, quea jashahuabaqui bei nee nee epo'yoyji! —oya poani.

Jamajjeya ¡quea ja'a jashahuabaquicue! ¡Pea cuana quea ja'a jashahuabaqui meesahuacue! ¡Ojee Jesosaja epeeji nei pocue! Jamajjeya Eyacuiñajjiya eseya o jayojjaya jomishoca mee caje'yo, ojjaña. ²E'e, yahuajo nei Eyacuiñajjiya esejaya etiiquiana cuana huohui ca poa esohui quea pame nee nee. Jjeya eseyaya jiquio esohui quea pame nee shajja'ajjaña pea'ai, etiiquiaa jayojjaya. Etiiquiaa cuaa jiquio esohui shajja'ajja nisho ca poa. Shajjama' poaa jjejojo eshajja'ajjaejji shajja'ajjae ca'ya poa. Jamajjeya Eyacuiñajjiya oya cuana jomishoca mee jjima aca poa, etiiquiana cuana. ³Eseyaya jjeya Eyacuiñajjiya esohui quea pame nee e'e jojo nei shajja'ajjaña. Ojaya esohui jayojja jama

añajo, onijje jomishoca mee caje'yo, eseya. E'e, etiquiana aje jja oe shajjama' poajoyo Eyacuiñajjiya tecuea ca poa jama ba'a:

“Jamajjeya quea quene po majje eyaya oya cuana tecueajeana je jama ba'a: —Shajjama' poanijo e'e jojo nei miquianaya edobiquijji pojjeama ecue meshi quea pame yasijje quea jaji nee ejomishocajji”.

Jamaya Eyacuiñajjiya aca poa. Yahuaajo ojjaña cuana panajeyo majje Eyacuiñajji jomishoca poa. Apoa ojjaña amajje Eyacuiñajji jomishoca poa. Jamatii etiquiana shajjama' cuana tecuea ca poa jama ba'a:

“Oya cuana aje oe edobiquijji pojjeama ecuea meshi quea pame yasijje quea jaji nee ejomishocajji”.

Jamaya Eyacuiñajji poa.

⁴ E'e jojo nei pea esohui yahuaajo nei etehue'yo jama poa ba'a:

“Eyacuiñajjiya ojjaña panajeyo ca poa quea cahui huisojo, me oejje oe, 6 cahuime. Majjaya ojjaña apoa amajje oya jomisho ca poa cahui oe”. ⁵ E'e, etiquianajo aje oe jama tehume ya pea'ai poa ba'a: “Oya cuana aje oe dobiqiu jjiima poaje enijje jomishocaa”.

⁶ Jamajjeya etiquiana cuana yahuaajo nei ba'e yasijje ebionei Eyacuiñajjiya oja esohui quea pame nee huohui ca poa. Shajjama' poa jjejojo dobiqiu jjiima poa Eyacuiñajjiya meshi quea pame yasijje onijje jomishocaa. Pea cuana ca ca Eyacuiñajji que dobiqiu je jomishocaa. ⁷ Jamajjeya etiquiana cuana Moisesi nijje nequi jashajja'ajjaquijji ajjaajojo jomishoca mee jjiima aca poa. Jamajjeya Eyacuiñajjiya quijje nei Dabi tehue mee ca poa jama ba'a etiquianaja osecua cuana huasijje: “¡Jjeya nei jashajja'ajjaquicue!” Jamaya Eyacuiñajji poanaje esejaya etiquiana nijje, ma Dabi nijje nequi nijje. Jamajjaya eyaya Dabija etehue'yo huohuije o'oya jama ba'a:

“Jjeya nei Eyacuiñajji minijje mimianijo ¡ojaya esohui shajja'ajja neineicue! ¡A'a shajjama' pojji!”

Jamaya yahuaajo nei Dabiya tehue ca poa etiquianaja onijje ba'eja ebajji.

⁸ E'e, Eyacuiñajjiya Josoe etiquiana cuana ojaya meshi quea pame yasijje poqui meesahua ca poa. Jamatii jomishoca jjiima poa; quea jashahuabaqui ja'a po jjiima. Jamajjeya esejaya eba Eyacuiñajji jashahuabaquiani jama ba'a: —Quijje eyaya ojjaña ecuea epeejji nei cuana jomishoca mee'e'yo —Eyacuiñajji poani.

⁹ E'e, quijje Eyacuiñajjiya ojjaña ojaya epeejji cuana jomishoca tiitii mee caje'yo onijje. Yahuaajo nei ohuaya me oejje oe, 6 cahuime ojjaña panajeyo ca poa. Panajeyo majje jomisho ca poa oe cahuime. O jayojjaya Eyacuiñajjiya ojaya epeejji nei cuana jomishoca mee caje'yo.

¹⁰ Jamajjeya Eyacuiñajjiya me oejje oe cahuime chaco majje chaco pajea ca poa; o jomishoca poa jayojjaya eseya Jesosa nijje jjapeequi majje quea bei jashahuabaquiani. Quijje chaco chaco pajeaje'yo, jomishoca tiitii'e'yo onijje eyajo. ¹¹ Jamajjeya ¡jashajja'ajjaquicue oe! ¡Quea ja'a nei jashahuabaquicue Jesosaja epeejji nei epojji, e'e jojo nei onijje ejomishoca tiitii'yojji! ¡A'a oe esejaya etiquiana jama pojji! Shajjama' poani Eyacuiñajji nijje ejomishocajji pojjeama. Cajaa mi acaje'yo.

¹² E'e, Jesosa nijje jjapeequianijo oya ese nijje mimiani, o jayojja ameesahua cani. Ojaya esohui jayojja jama ohuaya eseya e'e jojo nei ameesahua caje'yo. E'e, ojaya esohui baa se beca jama. Jiquio ecua baaa shejjishejjiya jehuija'ajea majje esa' ba cani jama jayojjaya Eyacuiñajjiya esejaya ejjashahuabaqui'yojji cuana ba cani. E'e, Eyacuiñajjiya esohui ba neinei majje eseya jashahuabaquije esejaya eba'ejjijo quea ja'a pojja'a, quea mimishi pojja'a poani. ¹³ E'e jojo nei ojjaña Eyacuiñajjiya eba oja pana'yo. Chama' Eyacuiñajjiyo ejjanequi quehuacquijji, de. Jamajjeya quijje nei o cojja nei nequi majje eseyaya huohuije'yo quio eseya eshe nequiya anequinaje cuana.

Jesosa esejaya Eyacuiñajji nijje mimianijo ¡quea ja'a nee jjapeequicue!

¹⁴ Jamajjeya ¡Jesosa nijje jjapeequicue! Jesosa ca ca oe nei Eyacuiñajji nijje mimi neineiani; oya Eyacuiñajji nijje emimijji eti quea pame nee nee. Oya Eyacuiñajjiya Ebacua Eja oe nei. Eyahuasijje poqui'yonaje. Oja Chii pejjejo nequi, Eyacuiñajji pejjejo. Onijje mimiani esejaya. Jamajjeya ¡Jesosa nijje e'e nei jjapeequicue! ¹⁵ E'e, Jesosa Eyacuiñajji nijje mimi neineiani esejaya. Oya ese jayojjaya quea nee poanaje. Jamajjeya: —Jesosa, eya quea nee, quea yeno nee ani —eseya poani.

Eseyaya Jesosa nijje jamaya mimiajo, ohuaya eseya saja'a cani jama ba'a: —E'e, ecuea eba. Eya quea nee nee, quea yeno nee nee pea'ai poanaje. Jamajjeya eyaya miya jaahuanaje —jamaya Jesosaa eseya acani.

Satanasaa Jesosa quea mimishi po mee sa aca poa. Jamatii jjadasia meequi ajja poa. Jesosa ca ca oe quea mimishi po ajja nei nei poa. Jamajjeya eseya quea mimishi poajo, ohuaya, Jesosaa eseya jaahuana cani tecue'amaa jjejojo. ¹⁶ Jamajjeya ¡Jesosa nijje

bicho'ama emimi! Ohuaya esejaya mimishi cuana cuijea caje'yo. Eseyá ojava quea jea nee poanijo quea pame nee jaahuana caje'yo tii tii. Ca'a'ama poajo quea ca'a po mee caje'yo pea'ai.

5

¹ ¡Bacue! Eyacuiñajijia esohui jama jayojja esejaya etiiquianaa beca dejja onijje nequi babaca ca poa Eyacuiñajiji nijje emimijji etii epojji. Babaca majje huoojea ca poa jama ba'a: —¡Eyacuiñajiji nijje mimicue esejó! ¡Aquiána cuana, ijjiacajji cuana ehúone! nequi pea'ai dahuacue ecuanaja yajji, Eyacuiñajiji ecuanaja mimishijó quea bei epo meejji! —jamaya aca poa etiiquianaa.

² Ojjaña esejaya etiiquiana ca'a'ama, Eyacuiñajijia esohui ba neinei po jjima cuana, quea mimishi poa. Ma Eyacuiñajiji nijje emimijji etii ca'a'ama pea'aijo oya pea cuana nijje tecue'ama poa. Quea bei mimianinaje Eyacuiñajiji nijje pea cuanajo. ³ Jamatí oya ca'a'ama jjejojo quea mimishi poani pea'ai. Jamajjeya ijjiacajji ehúone! jaja majje onaja mimishijó dahuajea jeahuajo Eyacuiñajiji nijje mimia poa jama ba'a: —Eyacuiñajiji, ¡ecuea mimishi cuijea'yocue! —acaní naje ohuaya. Majoya jama poa ba'a: —Eyacuiñajiji, ¡ijiquio e'aquiána meseja mimishi cuijea'yocue pea'ai! —huohuíme acaní naje Eyacuiñajiji nijje mimianijo.

⁴ Quea pame nee Eyacuiñajiji nijje emimijji etii epojji. Dejja cuana mími ajja Eyacuiñajiji nijje jama ba'a: —Eya ca iña jamatí minijje emimijji etii poaje —jamaya mímime epojji pojjeama. Chojja. Eyacuiñajijia oeyaya iyaa majje onijje emimijji etii po mee ca poa. Jamaya yahuajo nei ohuaya ebíonei onijje emimijji etii Anoní bajjani aca poa.

⁵ Jamajjeya jamaya pea'ai Jesosa Quito Eyacuiñajiji nijje emimijji etii jamatí po jjima poa. Oya Eyacuiñajijia ebabaca poa. Eyacuiñajijia ca ca oe Jesosa onijje emimijji nei po mee ca poa yahuajo nei nei. Jama poa ba'a: “Eyaya miya ojjaña ba mee aña cuana miya ca ca oe ecue Bacua Ejja. Eya ca ca iña mique Chii” jamaya Eyacuiñajijia Jesosa acanaje. ⁶ Majoya huohuí ca poa jama pea'ai ba'a:

“Miya enijje emimijji poaje'yo tii tii Menequisine jama. Oya yahuajo nei nei enijje emimijji nei po tíitíia poa”.

Jamaya yahuajo nei nei Eyacuiñajijia tehue mee ca poa esohui Jesosajo.

⁷ E'e, yahuajo nei Jesosa ese nijje nequiahua oya Eyacuiñajiji nijje mími huicha'a huicha'anaje jama ba'a: —Ecue Chii, ¡nahuecúe mo! Onaaya eya quecuajea ca chana' —jamaya Jesosa mími neineinaje Eyacuiñajiji nijje. Quea yeno nee nee jjejojo panaje. Oya Jesosa quea ca'a pojjeama jbaquinaje. Oja Chii quea bíhui po mee sa acanaje. Jamajjeya onijje mimiajo Eyacuiñajijia shajja'ajja canaje. Eyacuiñajijia Jesosa mano'yo jjima po mee sa ajjima pojjeemo Jesosa mano'yo jjima poquiaye.

⁸ Jesosa Eyacuiñajijia Bacua Ejja oe nei. Jamatí oya quea nee nee poa mimishi cuaa quecua ca'yajje. Eyacuiñajijia ejjashahuabaqui'yojji jayojja jama ba'yanijo, quea nee nee po'ya poa onaa napa neinei cajje. E'e, ojava eba ojjaña joya Eyacuiñajijia esohui jayojja jama ba'e sa poani jjea meshijó ba'e quea nee nee poaje onaa napa cajje. ⁹ Jamajjeya Eyacuiñajijia Jesosa yahuajo nei jama aca poa ba'a: —Miya ca ca oe nei quea pame nee nee mimishi cuijea'yojji epojji. Pea chama' mimishi cuijea'yojji —aca poa Eyacuiñajijia.

Jamajjeya Jesosaa esejaya mimishi cuijea'yo majje ba'e tíitíi mee caje'yo, joya o shajja'ajjajji poani nei.

¹⁰ E'e, yahuajo nei Eyacuiñajijia oya huohuí ca poa jama ba'a: “E'e jojo nei miya ojjaña jaahuanajji poaje. Miya enijje emimijji etii poaje'yo tii tii; Menequisine jama, ma yahuajo nei enijje emimijji nei poa jayojja jama miya poaje'yo”.

¡Quea ja'a nee Jesosa nijje jjapeequicue!

¹¹ Ecúea esohuí ma Eyacuiñajiji nijje emimijji neijo, Menequisine bajjanijo apoa pojjeama. Maya jamatí quea camaja eba meejji. Miquianaya ca ca oe jashahuabaqui ajja jjejojo Eyacuiñajijia esohuí oe pojji baña. Jamajjeya ¡iquio esohuí miquianajaya quea quehua poaje. ¹² E'e, miquianaya yahuajo nei Jesosaja epeejji poa. Jamajjeya miquianaaya aje oe epeejji eyacua esohuí ehuhuinaje ese. Jamatí onaaya miquianaya casohuihuohuí huicha'a huicha'a cahua epeejji eyacua jayojja jama, de. ¡iquio ecua ebacua jjea cuaya tojjojo ba'e, bobi ¡ijja po jjima jayojja jamaya miquianaaya Eyacuiñajijia esohuí camaja'ama nei nei baña de, esohuí ebíonei camaja'ama ebajji jama. ¹³ E'e, ebacua jjea cuaya tojjojo ba'e jayojja jama miquianaya Jesosaja epeejji eyacua jama; ojava epeejji quea ja'a po jjima. Jamajjeya eba'ejji quea tai ma Eyacuiñajijia boti'ama miquianajaya ba jjima, eba'ejji quea pame ma Eyacuiñajijia quea boti nee miquianajaya ba jjima pea'ai. ¹⁴ ¡iquio ecua etiíya bobi ¡ijja caní jayojja jama Jesosaja epeejji quea ja'a neeya ojjaña ojava esohuí ba caní. Eba'ejji quea mimishi amaja ajja, ma Eyacuiñajijia boti'ama. Quea pame nee acaní ohuaya. Jamaya Jesosaja epeejji quea ja'aa esohuí huohuí caní onajaya ebajji.

6

¹ Yahuajo Jesosa nije jjapeequi jeahuaa eseyaya shajja'ajjanaje Eyacuiñajjija esohui quehua'ama. ¡Jjeya ca ca ojjaña ojaya esohui Jesusaja bacue! ¡Quea ja'a nee pocue Jesusaja epeeji etii! E'e, yahuajo jjeya nei jjapeequi jeahuaa Jesusaja esohui quehua'ama shajja'ajjanaje jama ba'a: —¡Miquea mimishi pajea'yocue! ¡Jesusaja epeeji nei pocue!² ¡Onaaya miya cabesa mee cahua Jesosa nije epojji! Onaaya miqúanajaya esapajo eme' huana caje Edojjoshahua Pame miqúianaa que edobiquijji. Eyacuiñajjiya emano'yo cuana shequi mee caje o'oya. Shajjama' cuana Eyacuiñajjiya quea nee nee po mee caje'yo — jamaya yahuajo Jesosa nije jjapeequi jeahuaa eseyaya shajja'ajjanaje esohui quehua'ama.

³ ¡Jjeya ca oe Eyacuiñajjija esohui ojjaña ejjashajja'ajjaqui Jesusaja epeeji quea ja'a nee epojji! E'e, jamaya poaje Eyacuiñajji nije mimianijo jama ba'a: —Eyacuiñajji, ¡ecua na meesahuacue ojjaña miquea esohui!

⁴ E'e, beca cuana aje oe Eyacuiñajjija esohui shajja'ajja majje jama poani ba'a: —Eya ecue mimishijo quea yeno. Mimishi pajea neineije'yo Jesosa nije ejjapeequi —poani.

Jamatii quijje shajjama' nei poaje o'oya pojja'a. Jamaya po majje oya cuana mimishi pajea sa po'yo ajja, de. Jesosa, eseja mimishi cuijea'yojji pajea neinei ca'yani, de. Pea chama' mimishi cuijea'yojji. Jamajjeya chama' o mimishi cuijea'yojji. E'e, oya cuana aje oe yahuajo jama poa ba'a: Yahuajo Eyacuiñajjija esohui quea pame e'e nei shajja'ajja canaje. Eyacuiñajjiya oya cuana quea pame nee acanaje. Ba mee canaje Jesusaa ba'e tiitii mee cani ojaya epeeji nei onijje eyajo. Ba mee canaje Edojjoshahua Pameya oya cuana jaahuaana caje'yo pea'ai. ⁵ Ba canaje pea'ai Eyacuiñajjija esohui quea pame nee nee jayojja jama ba'yanijo quea bei nee poaje'yo. Eyacuiñajjiya acanaje jayojja ma dejjaa ajjima acani ba canaje pea'ai. E'e, jamaya ojaya eba poanaje. ⁶ Jamatii aje oe shajjama' po o'oyani, de. Jesosa cajaa amajje pea chama' mimishi cuijea'yojji. E'e, yahuajo dejja mimishiya Eyacuiñajjija Bacua acui ecueata'apeejo caca ca poa jayojja jama oya cuana Jesosa quecua'yojji jayojja poani. Jesosa cajaa ajji poani. Jesosa niñeba ca o'oyani ojjaña eshajja'ajjaji. Quea tai nee nee ca ca oma.

⁷ Que quea pamejo ena po majamajajo bobi tii cuajiani quea pame nee. Apoa poajo equé meseya bobi chicha cani. Jamaya Eyacuiñajjiya quea pame nee nee po mee cani. ⁸ Que quea tajjo ca ca bobi tii ajja. Jjono, acui sha, acui pojja'a pohuani. Jamajjeya equé meseya que cajaa acani jama ba'a: —¡Jiquio que jehua'yonaje, cajaa —acani.

Jiquio ecua equé meseya que cajaa acani jayojjaya jama acaje'yo Eyacuiñajjiya. Quea nee nee po mee caje'yo cuaquijo jiquio Jesosa cajaa ajji nei nei poani cuana.

Jesosa cajaa a'ajja eseya ohuaya e'e jojo nei ba'e tiitii mee caje'yo onijje

⁹ E'e Jesusaja epeeji cuana, jiquio eyaya esohui quea tecue tehueña miqúiana jjashajja'ajjaqui ajajo. Jamatii miqúanaya ecuea quea jea nee nee. Miqúanajo jjashahuabaquiani jama ba'a: —Ecuea epeeji cuana, miqúanaya Jesosa cajaa yajji pojjeama. Chojja. Ojaya epeeji poanijo, Jesusaa miqúanaya ojaya esohui jama atitii meesahua caje'yo —jamaya eya poani.

¹⁰ E'e, yahuajo, jjeya pea'ai miqúanaya Jesusaja epeeji cuana quea jea nee añajo pea cuana ba'e meesahuaña tii quea ja'a nee. Jamajjeya Jesusaja epeeji cuana quea jea añajo Jesosa quea jea nee añajo pea'ai. Jamaya Eyacuiñajjija eba. Jamajjeya ohuaya quea pame nee nee sosequia caje'yo quea pame nee miqúiaaya añajo. E'e, ohuaya quea ja'a nee acani tii tii. ¹¹ Cuanaya eyaya miqúanaya huohuíaña jama ba'a: ¡Jesusaja epoe o'oyajjijo ishoacue! ¡Jamaya atitii ecue! ¡Quea jaji nee ba'e tiitii poquicue ojjaña Jesusaja epeeji cuana nije! Jamajjeya ecuea eba poaje e'e jojo nei miqúanaya Jesusaja epeeji nei onijje ba'e tiitii je'yo. ¹² E'e, yahuajo Eyacuiñajjija eseya jama acanaje ba'a: —Eyaya miqúanaya ba'e tiitii meeje'yo enijje —oya poanaje.

Jamajjeya ja'a quea huea pojji! Eyacuiñajjija epeeji nei jama jjashahuabaquime pocue ba'a: Eyacuiñajjiya e'e jojo nei ojjaña ma ecua ohuaya huohui canaje jamaya ajeyojeyo caje'yo. ¡A'a jjashahuabaquijji ohuaya jama ajjima e'acaje poso!

Eyacuiñajjiya jiquio ecua ohuaya huohui canaje jamaya acani e'e jojo nei

¹³⁻¹⁴ E'e, yahuajo nei nei Eyacuiñajji mimianaje esejaya etiiqúiana nijje, Amajama nijje jama ba'a:

“Eyaya miya quea pame nee aje. E'e jojo nei miquea ebacua cuayaje dejja sho'i. Miquea osecua quea huiso nee nee poaje'yo. Eya ca ca oe nei quea ca'a nee nee poanijo jamaya ameeje'yo. Chama' pea e huoojea'yojji poani”.

Jamaya Eyacuiñajjiya aca poa.

¹⁵ Amajama shajja'ajja majje jjashahuabaquia poa jama ba'a: —E'e jojo nei ma ohuaya huohui canajeya jamaya acaje Eyacuiñajjiya. Jamajjeya ecuea ebacua cuayaje. Ecuea osecua cuana quea huiso nee nee poaje —jamaya Amajama jjashahuabaqui pajea ajja nei

nei poa. Jamajjeya Eyacuiñajjiya jamaya acanaje. Quijje nei Amajamaja bacua cuaya poa dejja sho'i.

¹⁶ Eseyá ca ca jama poani ba'a: —E'e jojo nei jiquio ecua eyaya huohuiaña jama neiya eyaya aje.

Jamaya po majje pea huasijje poquiani dejja etii yasijje jama huohuiya ba'a: —¡Ecuea esohui etehue'yojo miquea bajjani tehuecúe ojjaña ebañji e'e jojo nei eyaya ecuea esohui aje! E'e, Eyacuiñajjiya ba canijo eyaya ecuea esohui jayojja jama aje'yo —jamaya eseyaya aña.

Jamajjeya dejja etiiya bajjani etehue'yo ba majje onajaya eniñeba'yojji pojjeama jama ba'a: —Chojja, ojaya esohui jayojja jama e'a'yojji pojjeama ohuaya.

¹⁷ Oya jayojja Eyacuiñajjiya ojaya epeeji cuana jama acani ba'a: —E'e jojo nei ma ecua eyaya miqianaya huohuinaje jamaya eyaya miqianaya e'e jojo nei ba'e tiitii meeje'yo enijje.

Jamaya amajje oya jamaya poanaje pea'ai ba'a: —Eya eshe tii tii nequi. Jamajjeya ecuea esohui epajea'yojji pojjeama; jamaya eyaya e'e jojo nei aje'yo —jamaya ohuaya aca poa ojjaña ebañji.

¹⁸ E'e, Eyacuiñajjiya ma ecua ohua huohui ca poa jayojjaya jama acaje'yo. Oya siajje po aja nei nei. Oya eshe tii tii nequi quea ca'a nee nee. Jamajjeya ojaya esohui epajea'yojji pojjeama. Jamaya e'e jojo nei acaje'yo. Jamajjeya ¡Jesosa nijje ejjapeequi quea bihui nee nee! Jiquio ecua bishe jaadobiquiajo, onaa jjono jea cajo seya iñacuajiaña ehui'l'yo poaniya jjejojo jayojja jama eseya Eyacuiñajji nijje mimiani ese jaahuanajji, ese ba'e tiitii mee'yojji onijje eyajo. ¹⁹ E'e, acui ca'aca'ajo bishe ai jeyo cani cuaa edojojea ca poajejje, ehui'l'yo poajejje jayojja jama eseya Jesosa nijje jjapeequiani ese jaahuanajji, ese nahuejji, eshahua nijje epoquiquehua poaje jjejojo. Quea ca'a nee Jesosa, de. E'e, jama poani ba'a: Jodioja Eyacuiñajji nijje emimijji etii cuana Eyacuiñajjiya equi yasijje dobiqúi majje equi dojjojo pea equacuayijji sisi yasijje dobiqúi majmajanaje daquija secue pene yasijje. Ma equacuayijji sisi yasijje Jodio cuana oe nei dobiquinaje Eyacuiñajji nijje mimiya ojjaña mimishi cuijea'yojji. Jesosa ca ca eyahuasijje dobiqúi'yonaje. Jjeya oya Eyacuiñajji pejejo yani. Onijje mimiani esejo. ²⁰ E'e, ese eyahuasijje poqui jjimahuajo, Jesosa eyahuasijje poqui'yonaje. Huohui canaje jama ba'a: —Ecuea epeeji cuana quijje eyahuasijje poeje'yo enijje eba'e tiitii'yojji —jamaya Jesosa poanaje ese jjabahuejja neineiquijji.

Jamajjeya Jesosa Eyacuiñajji nijje emimijji oe nei quea ca'a nee nee poani. Jamaya oya po tiitii'yani. Yahuaño nei nequi Eyacuiñajji nijje emimijji Menequisine bajjani jayojja jama poanaje Jesosa.

7

Menequisine Eyacuiñajji nijje emimijji nei poa (Genesis 14)

¹ E'e, jiquio Menequisine yahuaño nei nei nequia poa. Oya Sanemi cuiñajji meshi mese poa. Eyacuiñajji nijje emimijji nei pea'ai poa. Eyacuiñajjiya quea ca'a nee neeya oya jamaya po mee ca poa. Jamajjeya yahuaño nei etiiquiana Amajama pea emeshi mese quea mimishi cuana quecua jeyojeyo'yo majje poe'ya poa. Ma ba majje Menequisine jama poa ba'a: —Amajama, miya quea pame nee. ¡Eyacuiñajjiya miya quea ca'a nee capo mee cahua! —aca poa.

² Amajamaa aquiana cuana quea huiso nee nee ye ca'ya poa, ma emeshi mese mimishi cuanaja sii ye ca'ya poa. Ma aquiana iye huiso quia ca poa Menequisineja epojji; jama aca poa ba'a: Amajamaja aquiana ome miji pea'ai huisome, 10 huisome yanijo ohuaya oe quia ca poa Menequisineja epojji. Peapea aquiana cuana ojjaña aquiana jamaya aca poa. Menequisineja bajjani Ese Ejjaja esohuijo jama ba'a: Emeshi mese quea ja'a nee ba'yani bajjani. Emeshi mese quea bei ba'yani bajjani pea'ai oya Sanemi cuiñajji meshi mese poanijo. ³ Oya cuamejje pojja'a poa; ecuanaja ba jjima Menequisineja chii bajjani, ojaya enaese bajjani ba jjima pea'ai, ojaya ebacua ecuanajaya bajjani ba jjima pea'ai. Oya ache shono cuaya poa ba jjima, ache shono mano'ya poa ba jjima pea'ai. Chama' etehue'yo poa. Eyacuiñajjiya ca pa ca oe Menequisine huohui ca poa jama ba'a: —Menequisine, ¡miya enijje emimijji nei pocue! ¡Jamaya po tiitiicue! —aca poa. Oya jayojja Eyacuiñajjiya oja Bacua Eja huohui ca poa pea'ai.

⁴ Jamejjea ¡jjashahuabaquicue Menequisinejo! Dejja etii quea pame nee nee oya poa. Amajama ca ca dejja etii quea pame nee pea'ai poa. E'e, esejaya etiiquiana Amajamaa oya aquiana quia ca poa ma aquiana emeshi mese mimishi cuanaja sii jjequi'yo majje iye huiso quia ca'ya poa Menequisineja epojji. ⁵ Amajama mano'yajo, quijje nei Moisesiya Amajamaja osecua Nemi bajjani Eyacuiñajjiya esohui huohui ca poa, Anonija bacua eja.

Jama aca poa ba'a: “Nemi miya, miquea ebacua cuana pea'ai Eyacuiñajji nijje emimijji poaje'yo Jodio cuanajo. Jamajjeya Jodio cuaa miya caquia cahua aquiana eba'ejji, jama caquia cahua ba'a: Ojaya ome miji pea'ai, 10 huisome aquiana yanijo oe caquia cahua. Ojjaña ojaya aquiana cuana jamaya ca'a cahua” jamaya Eyacuiñajjija esohui etehue'yo poani.

Nemi, ojjaña Jodio cuana pea'ai Amajamaja osecua cuana. Jamatii Jodio cuanaja mahuisoya aquiana cuana jjeshe ca poquia poa Nemija bacua cuaa, oja huapa pojjeama cuanaja aquiana. ⁶ Menequisine ca ca yahuajo nei nei ba'ya poa Nemi cuaya jjimahuajo, Nemi Jodio cuanaja Eyacuiñajji nijje emimijji po jjimahuajo. Jamajjeya Nemija bacua pojjeama Menequisine poa. Jamatii Amajamaa oya aquiana quia ca poa. E'e, yahuajo nei Eyacuiñajjija Amajama huohui ca poa jama ba'a: “Amajama, jiquio meshi miquea poaje'yo. Miquea osecua cuanaja poaje'yo tii tii” aca poa Eyacuiñajjija. “Miquea osecua cuana quea huiso nei nei poaje'yo” aca poa pea'ai.

Jamatii Amajamaa aquiana quia cajje Menequisineya huohui ca poa: —Amajama, miya quea pame. ¡Miya quea ca'a capo mee cahua Eyacuiñajjija! —aca poa.

⁷ E'e, Eyacuiñajji nijje emimijji Menequisine bajjani Amajama nijje miminaje Eyacuiñajjija oya quea ca'a epo meeji. Jamaya esejaya eba Amajama beshahua nei quea pame nee, Menequisine ca ca quea pame nee nee. Jamajjeya quea pame nee nee Amajama oya iye huiso aquiana cuana quia ca poa. ⁸ Quijje Jodio cuaa aquiana cuana iye huiso quia ca poquia poa Amajamaja osecua Eyacuiñajji nijje emimijji cuana huasijje, Nemi, oja bacua ejja cuana huasijje. Jamatii ma Eyacuiñajji nijje mimiani cuana mano ca poqui'ya poa. Menequisinejo ca ca Eyacuiñajjija esohui jama poani ba'a: —Menequisine, ¡miya enijje emimijji nei po tiitucue! —poani.

⁹⁻¹⁰ Menequisine yahuajo ba'ya poa Amajamaja osecua jea jjimahuajo. Amajamaa iye huiso aquiana Menequisine quia canaje. Jamajjeya Jodio cuaa huohui cani jama ba'a: —Amajamaa aquiana quia ca poa; Amajama pea'aiya aquiana quia canaje, oya Amajamaja osecuaja cuiisa' dojjojo nequiahuaa —jamaya Jodio poani Nemijo, oja osecua cuanajo pea'ai. Jamatii quijje nei Nemija, oja osecua cuaa pea'ai Eyacuiñajji nijje emimijji poanijo Jodioja aquiana iye huiso jjeshe ca poquia poa ojaya epojji, ojaya osecua cuanaja epojji pea'ai.

¹¹ Eyacuiñajjija Nemi, oja bacua cuana pea'ai huoojea ca poa onijje emimijji epojji, ojaya esohui Jodio cuana ba meesahuajji, quea ja'a eba'e meesahuajji pea'ai. Jamatii oya cuana aje oe dejja cuana poa, Eyacuiñajjija epeeji pishana poa. Jamajjeya Eyacuiñajjija esohui jayojja jama ba'e tiitii jjima poa. Jamajoya Eyacuiñajjija pea onijje emimijji nei huoojea canaje, Nemija osecua pojjeama, pea. E'e, ohuaya Jesosa Quito huoojea canaje. Jesosa Eyacuiñajji nijje emimijji nei poanaje, Anoni jama pojjeama. Oya Jesosa Eyacuiñajji nijje emimijji nei Menequisine jayojja jama poanaje. E'e, Jesosaa ca ca oeyaya eseya Eyacuiñajjija esohui jayojja jama ameesahua cani. ¹² E'e, Moisesija esohui jayojja jama Anonija osecua cuana Eyacuiñajji nijje emimijji cuana poa. Jjeya ca ca Eyacuiñajjija pea onijje emimijji po mee canaje, oja Bacua Ejja Jesosa, Anonija osecua pojjeama. Jamajjeya jjeya eseya yahuajo jama ba'e ajja. Moisesija esohui jayojja jama amaja ajja. Jjeya ca ca eseya ba'yani Emeshi Mese nei Jesosaja esohui jayojja jama, yahuajo jama pojjeama. Jamajjeya Eyacuiñajjija eseya ba ca'yani mimishi'ama'yo. ¹³⁻¹⁴ E'e, yahuajo Eyacuiñajjija Jesosa jama aca poa ba'a: —Jamajjeya miya enijje emimijji nei poaje'yo ecuea epeeji cuanajo —Eyacuiñajjija aca poa.

Jamatii Jesosa Nemija osecua pojjeama poa. Pea oya de, etiiquiana Jodaja jeaja osecua. Joda ca ca Eyacuiñajji nijje emimijji nei pojjeama poa. Jamajjeya Jodaja jeaja osecua cuanaja aquiana cuana dahua jjima poa mei e'ya sohuajo Eyacuiñajji quea bei mimishi cuana nijje epo meeji. Chojja, jamaya pojjeama Moisesija esohui Jodaja osecua cuanajo. Jamatii Eyacuiñajjija Jesosa jama aca poa ba'a: —Miya enijje emimijji nei nei poaje'yo ecuea epeeji cuanajo.

¹⁵ Jamajjeya ecuea esohui Eyacuiñajji nijje emimijji jjeya miqianajaya quea ja'a poani jama ba'a: Eyacuiñajji nijje emimijji Jesosa Quito poanaje. Jamatii oya Eyacuiñajji nijje emimijji nei Menequisine jayojjaya, Nemija osecua pojjeama. ¹⁶ Jamajjeya Jesosa ca ca oe Eyacuiñajji nijje emimijji nei poanaje, Eyacuiñajjija huoojea'yo, dejjaja, Moisesija pea'ai huoojea pojjeama. Oya Jesosa quea ca'a nee nee, enequi tiitii'yo pea'ai. Jamajjeya oya Eyacuiñajji nijje emimijji nei poanaje ojaya epeeji cuanajo. ¹⁷ Yahuajo nei Dabiya Eyacuiñajjija esohui tehue ca poa jama ba'a: “Miya enijje emimijji nei poaje'yo ecuea epeeji cuanajo. Jamaya poaje'yo tii tii, enijje emimijji nei Menequisine jayojja jama” jamaya Eyacuiñajji poanaje Jesosa Quito nijje.

¹⁸⁻¹⁹ Etiiquiana Moisesija esohui ajji poani yahuajo quea pame pojjeama ba'ya poa. Mimishi'ama po mee jjima poa. Jamajjeya etiiquiana Moisesija esohui jayojja jama

jjeya apaje ca'yonaje. Jjeya ca ca eseya Jesosaja epeeji poanijo ojaya esohui jayoija jama ba'yani, yahuaajo jayoija jama pojjeama. E'e, Jesosa Eyacuiñajji nijke mimiani esejo. Eyacuiñajji bacua cuana eseya po mee cani. Jamajjeya ba'e tiitii mee caje'yo onijke eyajo.

²⁰⁻²¹ E'e, Eyacuiñajjiya Jesosa huohui ca poa jama ba'a:

“Eya Eyacuiñajji quea ca'a nee enequi tii tii quea ja'a nee. Ecuea esohui jayoija jama eyaya e'e jojo nei aje'yo. Eyaya jama huohuiaña ba'a: —Miya ecuea cuana epeeji mimi tiitije'yo enije”.

Jamaya Eyacuiñajjiya aca poa. E'e, Eyacuiñajjiya Jesosa huohui neinei ca poa onijke emimijji, ese ba'e tiitii mee'yojji. Yahuaajo nei Nemija osecua cuana onijke emimijji poanijo Eyacuiñajji ojjaña nijke mimi jjima. Jjeya Jesosa Eyacuiñajji nijke mimianijo ca ca Eyacuiñajji ojjaña ese nijke mimiani.

²² Jamajjeya esejaya eba e'e jojo nei Eyacuiñajjiya esohui ma ecua ohuaya Jesosa huohui ca poa jamaya ohuaya e'e jojo nei acaje quea pame nee nee. Jamajjeya ohuaya ojjaña ojaya epeeji cuana onijke ba'e tiitii mee caje'yo. Ma ohua Moisesi huohui ca poa ca quea pame pishana: Ojaya esohui jayoija jama ba'e neineiajo ojaya ehabaca poaje'yo, Eyacuiñajjiya.

²³ Nemi nequi tiitii aja poa Eyacuiñajji nijke pea cuanajo emimijji tii. Deija tii majje mano'ya poa. Jamajjeya jamaya ojaya osecua quea huiso nee nee popoquia poa, Eyacuiñajji nijke emimijji etii cuana. E'e, oe mano'yo majje oja bacua Eyacuiñajji nijke emimijji etii poa. Jamaya popoquia poa quea huiso nee nee. ²⁴ Jesosa ca ca eshe, mano'yo aja tii tii. Jamajjeya oya Eyacuiñajji nijke e'e jojo nei mimi tiitiani esejo, oja epeeji cuanajo. ²⁵ E'e, Jesosa mano'yo aja, eshe tii tii nequi'yo Eyacuiñajji nijke esejo emimijji. Jamajjeya Jesosaja epeeji nei poanijo Eyacuiñajji bacua cuana poani. Ohuaya eseya ba'e tiitii mee caje'yo onijke eyajo.

²⁶ Esey aje oe quea mimishi jjejojo Eyacuiñajjiya esohui jayojjaya jama ba'e jjima poaje. Jesosaa ca ca esejaya mimishi cuijea'yo majje ba'e tiitii mee caje'yo onijke. E'e, Jesosa oe nei quea pame nee nee, mimishi'ama nei nei, quea boejea nee nee, deija mimishi jayoija jama pojjeama tii tii. Oya eyajo oja Chii pejejo nequi, ojjaña huoojea'yojji poani tii tii. ²⁷ Nemija osecua Eyacuiñajji nijke emimijji cuana aje oe Jesosa jayoija jama pojjeama poa. Ohuaya ca ca oe quea mimishiya jjejojo ojjaña pojjaajo aguiana cuana dahuajea caninaje Eyacuiñajji quea bei po meejji. Aquiana dahuajea jjimahuaajo Eyacuiñajji nijke miminaje jama ba'a: —Eyacuiñajji, ¡ecuea mimishi cuijea'yocue! —jamaya Eyacuiñajji nijke emimijji etii Nemija osecua aca poquia poa.

Majoya oya cuana mimishijo aguiana dahuajea majje Eyacuiñajji nijke miminaje pea cuanajo jama ba'a: —Eyacuiñajji, ¡miqua epeeji cuanaja mimishi cuana cuijea'yocue! —aca poquia poa Eyacuiñajji nijke emimijji etiiya.

Jesosaa ca ca jama pojjeama. Oya mano'yonaje ojjañaja mimishi cuijea'yojji soseje. Oya apoa po'yonaje, emano beca'yojji pojjeama tii. ²⁸ Jamajjeya etiQUIIANA Moisesija esohuijo deija cuana Eyacuiñajji nijke emimijji po mee ca cuaa poa, Nemija osecua cuana. Oya cuana aje oe Eyacuiñajjiya esohui jayoija jama ba'e'yo jjima poa. Jamajjeya Moisesi nijke mimi majje quijje nei Eyacuiñajjiya oja Bacua Eja Jesosa jama aca poa ba'a: “Miya oe nei mimishi'ama nei nei. Jamajjeya miya oe nei enije emimijji nei poaje'yo ecuea epeeji cuanajo” jamaya Eyacuiñajji poanaje.

8

Eyajo Jesosa Quito nequi tiitiani esejo Eyacuiñajji nijke mimiani tii tii

¹ Jamajjeya ¡jjashahuabaquicue Jesosa Quitojo! Oya Eyacuiñajji nei nei. Eyajo nequi tiitiani esejo Eyacuiñajji nijke mimiani tii tii. Eyacuiñajji quea ca'a nee nee pejejo nequi, ebiane niijije; onije ojjaña huoojeajji poani tii tii. ² Jama ba'a: Yahuaajo nei Jodio Eyacuiñajji nijke emimijji etii daqui equi dojjo huasijje, equacuayijji biso nei yasijje dobiqui'ya poa Eyacuiñajji nijke mimiya, Jodio cuana nijke Eyacuiñajji quea bei epojji. Ma daqui equi Jodio cuanaja soco poa Eyacuiñajjiya esohui shajja'ajajji. Jesosa ca ca dobiqui'yonaje Eyacuiñajji e'anioque ani yasijje tii, daqui equi dejaja soco huasijje pojjeama. Jomajo oya Eyacuiñajji nijke mimiani esejo. ³ Jiquio Jodio cuana Eyacuiñajji nijke emimijji etii cuana babaca majje jama poa ba'a: —¡Miyaya aguiana dahuacue ¡jjiacajji ehuone! pea'ai; Eyacuiñajji ecuana nijke quea bei po meecue! —aca poa Jodio cuaa.

Jamaya ona jayojjaya esejaya Eyacuiñajji nijke emimijji neiya, Jesosaa Eyacuiñajji quea bei po mee canaje ese nijke. Eseyaya mimishi cuana cuijea mee'yojji soseje oya mano'yonaje. ⁴ Jesosa meshijo enequi jojjemo oya Eyacuiñajji nijke emimijji etii pojjeama pome. E'e, Jodioja Eyacuiñajji nijke emimijji etii cuana meshijo yania poa, Nemija osecua cuana. Moisesija etehue'yo jayoija jama aguiana dahua ca poquianinaje Eyacuiñajji quea bei po meejji. ⁵⁻⁶ Jamaya yahuaajo poa ba'a: Moisesi eyiyo huasijje jaasohuaquajajo,

Eyacuiñajjiya oya huohui ca poa daqui equiyo. Jama aca poa ba'a: “¡Ecuea esohui jayojjaya nei nei daqui equi acue! ¡Quea bame nee nee oe acue!” ca poa Eyacuiñajjiya.

Jamatii daqui equi iya mee ca poa ona ba meeji ma ohua quijje Jesosaa acaje'yo eyajo. Jamajjeya Jodio cuanaja emimiji Eyacuiñajji niije quea pame pishana poa. Jesosa ca ca quea pame nee nee. Jamaya pea'ai Eyacuiñajjiya yahuajo nei ojaya esohui huohui ca poa Moisesija etehue'yojji. Ma esohui etehue'yo quea pame poa. Quijje ca ca Eyacuiñajjiya esohui eyacua Jesosa huohui mee ca poa. Maya esohui quea pame nee nee. E'e, esohui ma ohua jjeja huohui ca poa jayojja jama eseya añajo, Jesosaa eseya ba'e tiiiti mee caje'yo onijje eyajo. Jamaya esejaya eba. Jamajjeya eseya quea jaji nee poani. Yahuajo Jodio cuana quea jaji pishana poa: Onajaya ba jjima poa Jesosaja esohui eba'e tiiiti'yojji onijje eyajo.

⁷ E'e, yahuajo nei Eyacuiñajjiya Jodio cuana Moisesi niije nequi ba mee ca poa ojaya esohui. Jamatii ma esohui jayojja ohuaya acani mimishi pajea'yo jjima poa cuanaja. Ma esohui jayojja jama ba'yanio mimishi cuijea'yojji jojjemo Eyacuiñajjiya Jesosa huoojea jjima poquiaye esohui eyacua huohuiya. ⁸ Jamajjeya Eyacuiñajjiya ojaya epeeji cuana tecuea ca poa. Jama tecueame aca poa ba'a:

“Quijje eyaya esohui eyacua huohuije ojjaña Jodio cuanaja eshajja'ajajji, ma Isaenija osecua cuanaja, Jodaja osecua cuanaja pea'ai eshajja'ajajji. ⁹ Yahuajo nei eyaya miquianajaya etiquiana Ejito meshijo ba'e pea meshi yasijje dojo meesahanaje. Ecuea esohui quea pame nee huohui huicha'a huicha'a meenaje pea'ai. Jamatii etiquiana cuana shajjama' poa. Ecuea esohui jayojja jama a sa po'yo ajja poa. Jamajjeya eyaya oya cuana jaahuana jjima a poa. Jamajjeya eyaya pea esohui quea pame nee aje'yo miquiana niije. Jiquio esohui eyacua poaje, yahuajo jama pojjeama poaje. Eyaya jamaya huohuiña”.

Jamaya Eyacuiñajji poanaje.

¹⁰ “Quijje eyaya Isaenija osecua cuana esohui eyacua huohuije jama ba'a: Jamajjeya miquianaya jashahuabaqui meesahuaje ecuea ejshahuabaquiji jayojja. Ecuea esohui jayojja jama eyaya miquianaya amesahuaje: —Eyacuiñajjiya ecuana jaahuana cani —miquianaaya aje. Eyaya miquianaya saja'aje'yo: —Miquianaya cuana ecuea epeeji nei e'e jojo nei —eyaya aje'yo. ¹¹ Miquianaya enijje japeequije'yo ojjaña, edejja tii cuana, esho'iquiana pea'ai. Jamajjeya pea niije jama epo majajji pojjeama ba'a: —¡Eyacuiñajji niije oe japeequicue! —e'a majajji pojjeama cuana. Chojja, oya jja iña ojjañaja eba poaje'yo añ. ¹² Jamajjeya eyaya ojjaña cuanaja mimishi cuijea neineije'yo. Majoya eya jashahuaba majaqui ajja miquianaja mimishijo. Quea bei poaje. Jamaya eyaya Isaenija osecua cuana huohuije”.

Jamaya Eyacuiñajji yahuajo nei nei poa Isaeni niije.

¹³ E'e, jiquio ecua daqui chii chii'yajo eyacua jjeshe majje daqui echii seya jeajeaña jayojja jama esohui eyacua amajje Eyacuiñajjiya esohui yahuajo nei Moisesi oja tehue meejo jashahuaba neinei meequi'yo jjima aca poa: —¡Ecuea esohui eyacua jayojja jama acue; esohui yahuajo jayojja jama pojjeama! —jamaya Eyacuiñajjiya eseya huohui cani jjeja.

9

Jodio etiquianaja daqui equi Eyacuiñajjiya esohui bajji

¹ Yahuajo nei Eyacuiñajjiya Moisesi huohui ca poa jama ba'a: —¡Jamaya oe enijje mimicue! ¡Jamaya eya bihuiaque pea'ai! —aca poa—. ¡Equi iyacue enijje emimiji! —aca poa pea'ai.

² Jamajjeya Jodio cuaa daqui equi soco majje iya ca poa Eyacuiñajjiya esohui shajja'ajajji, ma Moisesi tehue mee ca poa jayojja jama e'ajji. Jamajjeya yahuajo nei iya ca poa jama ba'a: Ebionei equi equacuayijji ai'ai nequia ca poa. Ma equacuayijji ai'ajjaya cuaquijji nequiji nequia ca poa, baa huo'o. Majoya acui equacuashiy, mesa, quecua ca poa. Mesa quecuajeyo majje cuia'asha ca poa baa huo'ohua. Majoya mesa biajje pahui ojjaña pojajo iya majamaja ca poa piatojo Eyacuiñajjiya ebajji. Ma equacuayijji ai'ai bajjani ca poa Eyacuiñajji Niije Ejjapeequijji bajjani. ³ Majoya biso nei quecuayijjime aca poa daqui equi yiyedojojo. Majoya daqui moohua secue pene ca poa. Daqui moo quea bame nee ba'ehuana ca poa esecue jiani queyajji. Ma equacuayijji biso nei bajjani ca poa Eyacuiñajji Ese Niije Emimiji Quea Bame bajjani. ⁴ Ma equacuayijji biso neijo nequia ca poa cuaqu cojjasha anijji baa huo'o, shiyeshiye dahuajji. Shiyeshiye dahuaje cajje huichacha quea shiye nee nee ba'esohuaquia poa. Majoya cajohui huana ca poa pea'ai; baa huo'ohua cuia'asha ca poa. Maya bajjani ca poa Eyacuiñajjiya Esohui Etehue'yo Huanajji bajjani. Ma cajohuijo baa huo'o tahuoo e'ianobia ania poa. Baa huo'o tahuoojo ebio ania poa pahui sisi, ma yahuajo nei nei Eyacuiñajjiya etiquiana cuana Moisesi niije ijji mee ca poa. Anonija tojje acui ejaquecua ca'aquijji ma cajohui dojjojo ehuananobia jaa poa, ma tojjejo

yahuajo pohua poa acui iña. Beca mei beje pea'ai cajohui dojjojo ania poa, ma mei bejejo yahuajo nei Moisesija tehue'yo Eyacuiñajijia esohui mei beje biajje oja tehue'yo, 10 esohui etehue'yo jaa poa. ⁵ Cajohui biajje ania poa cuichoiji nisho esohuidojojji jayojja. Quea bame nee nee, baa huo'oa pea'ai. Oja ecuichohua queya ca poa cajohui. Ma esohuidojojji nisho cajohui yasijje cojja nequia poa. Ma ba majje Jodio cuana jjashahuabaqui'ya poa Eyacuiñajji onijje yani, oja mimishi cuijea'yojji. Jamatii jjeja miya ecuea ehuohuijji pojjeama ojjaña joya daqui equijo nequi aquiana.

⁶ Ojjaña equi apoa poajo, Jodioja Eyacuiñajji nijje emimijji etii dobiquia poa equecuayijji ai'ai yasijje. Ojjaña pojjaajo dobiqiu nequia poa Eyacuiñajijia yajjijo chachohua. ⁷ Jamatii equecuayijji biso nei yasijje oe nei dobiqiuinanaje Eyacuiñajji nijje emimijji etii. Pea eshecuajaja cuanajo oe dobiacquime poaninaje. Ohuaya ijjiacajji ehuone na' dojodobiaqui caninaje. Majoya Eyacuiñajji nijje mimianinaje jama ba'a: —iEyacuiñajji, ecuea mimishi cuijea'yocue! E'e, jiquio ijjiacajji eyaya ehuone' cuia'yonaje ecue mimishi cuijea'yojji sosejje —poaninaje oya.

Majoya jama poaninaje pea'ai ba'a: —iOjjaña miquea epeejiija mimishi cuijea'yocue pea'ai! E'e, jiquio ijjiacajji ehuone' eyaya cuia'yonaje ojjañaja mimishi cuijea'yojji sosejje —poaninaje. Jamaya oya po majamaja anijo, ojjaña oja mimishi cuana pajea'yo jjiima acaninaje cuaa.

⁸ Jamajjeja jjashahuabaquicue daqui equijo, Jodio cuanaja iyajo! Jamaya ma daqui equi enequijojja jjeja Edojjoshahua Pameya eseya ba meesahua cani jama ba'a: Ma daqui equi e'anijo tii ma equecuayijji biso nei yasijje oe nei Eyacuiñajji nijje emimijji etii dobiqiuinanaje Eyacuiñajji nijje mimiya, ojjaña cuana dobiqiu jjiima poanaje. ⁹ E'e, Eyacuiñajji nijje mimiani etii oe nei nei dobiqiuinanaje Eyacuiñajji nijje mimiya. Ma shahuaba majjeja esejaya eba ojjaña cuana Eyacuiñajji nijje mimi meeme ajja poa. Jjeja ca ca eseya Eyacuiñajji nijje mimije, ojjaña. Yahuajo nei quea huiso ijjiacajji ehuone' dahuaajea caninaje Eyacuiñajji ona nijje quea bei epojji. Dahuaajea majamaja caninaje. Jamatii oya cuana jjashahuabaquianinaje jama ba'a: —E'e pojja'a eya quea boejea pojjeama. E'e pojja'a ecuea mimishi cuijea'yo jjiima —poaninaje cuana.

¹⁰ Yahuajo nei bobijo tehue ca poa pea'ai Moisesija etehue'yojo jama ba'a: —iBeca bobi a'a ijjiajji! iBeca e'ishijji pea'ai a'a jja oe ishijji! —jamaya Moisesiya tehue ca poa Jodio cuanaja e'ajji.

Moisesija etehue'yo jayojja jama Jodio etiquianaa piato, shajajji cuana pea'ai shacua caninaje pea'ai. Ma etehue'yo jayojja jama besa majamajaninaje pea'ai. Jamajjeja etehue'yo jayojja jama besa majje quea yami boejea poa, jamatii quea mimishi tii poa, quea jjashahuabaqui tai. Eyacuiñajijia oya cuana Moisesija etehue'yo jayojja jama amee caninaje Jesosa poe jjimahuajo. Jesosa ca ca oeya ojjaña mimishi cuijea'yojji poani.

Jesosaja ena' cuayaquia poa esejja mimishi cuijea'yojji

¹¹ Jamajjeja jjeja Eyacuiñajijia huoojea'yo ese jaahuanajji Jesosa Quito bajjani poeyanaje ese que. Oya Eyacuiñajji nijje emimijji nei eyacua. Ohuaya eseya quea pame nee nee acanaje. Quijje ohuaya eseya ba'e tiitii mee caje'yo onijje, mimishi cuijea'yo majje.

Daqui equi eyiye equecuayijji biso nei yasijje dejja cuanaja iya huasijje dobiqiu jjiima Jesosa Eyacuiñajji nijje esejo mimiya. Cho. Oya eyahuasijje dobiqiuinaje Eyacuiñajji e'anioque ani yasijje, eyiye biso nei quea pame nee nee jayojja huasijje. Oya Jesosa Eyacuiñajji nijje mimiani esejo. ¹² Jesosaa chivo na', ana'ai na' dojodobiaqui jjiima eyahuasijje, de. Cho. Oya acui ecueata'apeejo mano'yonaje esejaya mimishi cuijea'yojji sosejje. Jamajjeja ohuaya eseya ba'e tiitii mee caje'yo onijje.

¹³ E'e, yahuajo nei Moisesija etehue'yo jayojja jama acaninaje cuaa. Jamajjeja Eyacuiñajji nijje emimijji cuaa ana'ai na', chivo na' pea'ai tepe jayojja huasijje sho majje ojjaña Jodio cuana jeasijjea majamaja caninaje. Majoya ana'aja bacua dahuaajea'yo majje oja yami equioyoyojja pohui ena tejjee nane majje ojjaña Jodio cuana jeasijjea majamaja caninaje. Jeasijjea cajo, pea Jodio cuaa ona ba caninaje quea boejea jayojja. Jamatii eyami nei quea boejea jayojja poaninaje. Mimishi ca ca ecuijea'yo pojjeama. ¹⁴ E'e, ana'ai na', chivo na' pea'ai jeasijjea cajo, eyami ca ca oe quea boejea jayojja poaninaje. Jesosa Quito ca ca quea pame nee nee ese mimishi cuijea'yojji, de. Edojjoshahua Pame enequi tii tii. Ohuaya Jesosa ameesahua canaje Eyacuiñajijia ejjashahuabaqui'yojji jayojjaya. Oya Jesosa mimishi'ama nei nei, mimishi'ama tii tii poanaje. E'e, oya acui ecueata'apeejo mano'yo majje ojaya ena' cuayaquinaje. Jamajjeja ohuaya esejaya mimishi cuijea'yo onijje japeequiyajo: —Ecue Chii, ecue na' cuayaquinajejo eyaya ecuea epeejiija mimishi cuana cuijea'yo onijje —Jesosaa aca poa.

Jamajjeya Jesosaja epeeji nei poajo, Eyacuiñajjiya eseya quea boejea nee nee po mee cani ojaya ejashahuabaquiji jayojja jama eba'e'yojji, etiquianaja esohui jayojja jama pojjeama. E'e, jamaya Eyacuiñajjiya acani ohuaya enequi tiitiya jjejo.

¹⁵ Ojjaña joya etiquianaja Moisesija esohui jayojja jama aji nisho poaninaje quea mimishi nee nee poa. Jamatii Jesosa Quito mano'yonaje onajaya mimishi cuijea'yojji sosejje. Jamajjeya eseya Jesosaa huohui cani jama ba'a: —Eyacuiñajjiya miqianaya ojaya esohui huohui ca o'oyani esohui eyacua jama ba'a: “Eyaya miqianaya quea pame nee nee aje'yo. Ojjaña ecue babaca'yo enijje ba'e tiiti meeje'yo eyajo” jamaya Eyacuiñajji poani —Jesosaa aca poa.

¹⁶⁻¹⁷ Jama poani ba'a: Mano'yo jjimahuajo dejja jiquiojo ba'eya ojaya huapa pojjeama acani jama ba'a: —E mano'yajo ecuea aquiana cuana miquea poaje'yo, cha —acani cuaa.

Jamajjeya ma dejja mano'yo majje ojaya aquiana cuana oja huapa pojjeamaja poaje'yo. Eshe nequija ca mi ca equia'yojji pojjeama. O mano'yajo ca ca oe jjeshe ca'yojji. ¹⁸ Oya jayojja yahuajo nei Eyacuiñajjiya oja sohui tehue mee majje Moisesi aquiana quecua mee ca poa. Moisesi jama aca poa ba'a: —¡Aquiana ehune! quecuajae'yocue! Oja na' cuayaquajajo eyaya baje miqianaya e'e jojo nei ecuea esohui jayojja jama aña ecuea epeeji nei epoji —Eyacuiñajjiya aca poa.

¹⁹ Jamajjeya Moisesiya ojjaña Eyacuiñajjiya esohui etehue'yo huohui caninaje ojjaña eshajja'ajajji. Majoya ijjiacajji ehune!, ana'ai, chivo pea'ai cuia caninaje. Aquiana na' tepejo sho caninaje ena tejje. Majoya ñajjajja ña huo'o acui aa quea shiyejo cuiabebo caninaje. Majoya ena tejje nane majje esohui etehue'yo jeasiji caninaje, ojjaña Jodio cuana jeasijjea caninaje pea'ai aquiana naa. ²⁰ Majoya Moisesiya oya cuana jama aca poa ba'a: —Eyacuiñajjiya eseya ba mee ca poa ojaya esohui e'e jojo nei. Ojaya esohui jayojja jama ohuaya acaje'yo tii. Jamajjeya eyaya miqianaya jeasijjeaña ijjiacajji naa. ¡Eya ena' jeasijjeaje jama pocue ba'a: “E'e, eseyaya ojjaña Eyacuiñajjiya esohui jayojja jama aje'yo tii” acue! —Moisesiya aca poa.

²¹ Jamaya pea'ai Moisesiya daqui equi acaninaje, ojjaña daqui equijo nequi aquiana pea'ai jeasijjea caninaje ijjiacajji naa, ojjaña. ²² Jamaya acaninaje ojjaña Jodio etiquiaa beshahua nei ojjaña aquiana cuana, Eyacuiñajjiya quea boejea'yo jayojja ebajji. Aquiana na' shojea caninaje Eyacuiñajji oya cuana quea boejea'yo jayojja epo meeji pea'ai. Jamaya Moisesija sohui etehue'yo poa. E'e, Eyacuiñajjiya jama aca poa ba'a: —Ijjiacajji ehune! quecua cajo oja na' cuayaquajajo, eyaya miqianajaya mimishi cuijeaje'yo —aca poa.

Jamajjeya ena' cuayaquajajo aje oe mimishi ecuijea'yojji pojjeama.

Jesosa Quito mano'yonaje mimishi cuijea neinei ca'yonaje

²³ Jamajjeya ijjiacajji na' jeasijjea cajje ojjaña daqui equijo nequi aquiana quea boejea'yo jayojja po mee ca poa Jodio etiquiaa. Jamaya acajo Eyacuiñajjiya ma aquiana ba ca poa quea boejea'yo jayojja. Jamaya Eyacuiñajjiya eseya ba mee cani. Jesosa Quito mano'yajo oja na' cuayaquinaje; mimishi cuijea neinei ca'yonaje esejaya. Quea boejea'yo po mee canaje. Jamajjeya eseya Eyacuiñajji cojja neiyo nequi mee caje'yo eyajo. E'e, aquiana naa jeasijjea cajje pojjeama eseya, Jesosaja epeeji cuana quea boejea nee poaje'yo. ²⁴ Oya jayojjaya Jodio Eyacuiñajji nijje emimijji etii equacuayijji sisi yasijje dobiqiaa poa Jodio cuanajo Eyacuiñajji nijje mimiya oya Jodio cuana nijje quea bei epoji. Jamaya Eyacuiñajjiya eseya ba mee cani Jesosa Quito yahuasijje dobiqiu'yonaje Eyacuiñajji nijje esejo mimiya. Jesosa ca ca daqui equi yasijje pojjeama dobiqiu'yonaje. Cho. Eyahuasijje dobiqiu'yonaje. Jjeya nei oya, Jesosa Quito Eyacuiñajji cojja neiyo nequi, onijje eseho mimiani de, Eyacuiñajji ese nijje quea bei epoji. ²⁵ Yahuajo nei jamaya poa pea'ai ba'a: Jodio Eyacuiñajji nijje mimiani etii equacuayijji biso nei yasijje dobiqiu'yonaje. Pea shequajajo dobiqiu'yonaje, pea shequajajo dobiqiu'yonaje. Oe dobiqume poaninaje oe shequajajo. Pea ena' dojobiaqui caninaje, aquiana ehune na'. Aquiana na' jeasijjea majje jama acaninaje ba'a: —Eyacuiñajji, ¡ecuanaja mimishi cuana cuijea'yocue! —poaninaje.

Jesosa Quito ca ca ojjaña shequajajo pojjeama mano'ya poa. Mano'yonaje oe nei mano'yome poa. Ojaya ena' cuayaquinaje esejaya mimishi cuijea'yojji sosejje. ²⁶ Jesosaja ena' aquiana na' jayojja jama poa jimmajo oya mano majamaja quaiye. E'e, dejja pana'yo majje mano majamaja quaiye quea huiso nee nee, de. Jamatii Jesosa mano'yonaje oe mano'yome poanaje, quea huiso pojjeama. Jamajjeya jjeya nei ojjaña Eyacuiñajjiya esohui beshahua nei apoa poanijo, Jesosa mano'yonaje. Ojaya ena' cuayaquinaje mimishi cuijea'yojji. ²⁷ Eseya aje oe mano'yo pea'ai; oe nei mano'yome poaje'yo. Mano'yo majje Eyacuiñajji cojja neiyo nequije'yo. Ohuaya huohui caje quio ese ba'ya poa sosejje. Eseyaya quea pame ba'yaninajejo ba'e tiiti mee caje'yo onijje eyajo. Quea mimishi ba'yaninajejo ca ca quea nee nee po tiiti mee caje'yo. ²⁸ Jamajjeya Jesosa Quito mano'yonaje, oe mano'yome poanaje pea'ai. Oya mano'yonaje mimishi cuijea'yojji ojjaña. E'e, yahuajo Jesosa Quito

mano'ya poa. Quijje oya poeje o'oya mimishi cuijea'yohua pojjeama. Poeje'yo ojaya epeeji ba'e tiitii mee'yohua, ojjaña jaya ojo jja'ishoa'ajjaquiiani jjehua'yohua.

10

Ijjiacajji ehuone naa jeasijjea cajo mimishi ecuijea'yo pojjeama

¹ Jodio Eyacuiñajji nijje mimiani cuaa Moisesija etehue'yo jayoja jama amajamaja caninaje. Onajaya ba jjima pishana ma Eyacuiñajjiya quijje eseya quea pame nee nee acaje'yo. Onajaya quea ja'a pojjeama. Eyacuiñajji nijje mimiani cuaa quea huiso aquiana biajje ena' jeasijjea cajje Eyacuiñajjiya ma aquiana cuana ba ca poa quea boejea jayoja. Ojjaña shequiajajo ijjiacajji ehuone' quecua majamaja majje jama poaninaje ba'a: —Eyacuiñajji, imiquea epeeji cuanaja mimishi cuijea'yocue ojjaña! —acandinaje Jodio cuaa.

Jamatii Eyacuiñajjiya etiiquianaja mimishi cuijea neinei'yo jjima aquiana ehuone' cuia ca'yajo. ² Jamajjea aquiana ehuone' cuia ca'yajo etiiquiana quea boejea nee nee epo mee jojjemo aquiana cuia majamaja jjima aca quiaje. E'e, oya cuana quea boejea nee nee epo mee jojjemo mimishijo yeno'ama poquiaye. ³ Jamatii ijjiacajji ehuone' ojjaña shequiajajo cuia majamaja caninaje. Jama poaninaje ba'a: —Eyacuiñajji, imiquea epeeji cuanaja mimishi cuijea'yocue! —acandinaje.

Cuia majje jama po ajja poaninaje ba'a: —Jjeya ca ca ecuanajaya mimishi chama'yo poaje —ajjima acandinaje. Cho. Jama poaninaje ba'a: —Ecuana quea mimishi, de —Jodio etiiquiana cuana poaninaje.

⁴ Chojja, ana'ai na', chivo na' pea'ai jeasijjea majje mimishi cuana ecuijea'yojji pojjeama. ⁵ Jamajjea Jesosa Quitohua poe jeahuaa oja Chii jama aca poa ba'a:

“Ecue Chii, miquea epeeji cuana aquiana ehuone' nequi cuia mee sa po'yo ajja, miya. Aquiana ehuone' dahuajea mee sa po'yo ajja pea'ai miya. Cho. Miyaya eya dejja cuana huasijje huoojeaña yamijji. ⁶ E'e, miquea epeeji cuaa aquiana ehuone' cuia cani mimishi cuijea'yojji nisho mi quea bihui nee po meeji nisho. Ma ohua dahuajea cajoya miya quea bihui nee pojjeama poani. ⁷ Jamajjea eyaya miya jama anaje ba'a: —Ecue Chii, eya meshi yasijje poeyanaje. Miquea ejjashahuabaqui'yojji jayojjaya jama eyaya aje'yo. Jamaya yaya aje'yo mi quea bihui nee po meeji”.

Jamaya yahuajo oja Chii Eyacuiñajji Jesosa Quitohua acanaje. ⁸ E'e, Jesosaa oja Chii jama acanaje ba'a:

“Ecue Chii, miquea epeeji cuaa ijjiacajji ehuone' nequi cuia mee sa po'yo ajja, dahuajea mee sa po'yo ajja pea'ai miya. Ijjiacajji ehuone' cuia cani cuaa mimishi cuijea'yojji nishojo aje oe miya quea bihui nee pojjeama poani. Maya dahuajea canijo pea'ai miya quea bihui nee pojjeama”.

Jamaya acanaje Jesosaa, jamatii yahuajo Moisesija esohui etehui'yo jayoja jama Jodio cuanaa aca poquianinaje, ehuone' cuia majamaja ca poquianinaje. ⁹ Jamajjea majoya Jesosaa jama acanaje ba'a: “Ecue Chii, eyaya miquea ejjashahuabaqui'yojji jayojja jama aje'yo mi quea bihui nee po meeji”. Jamaya acanaje.

Jamajjea Jesosa Quito poeyanajejo ca ca oe Eyacuiñajjiya eseya jama acani ba'a: —¡Jesosa Quito jayoja jama pocue, oe! ¡Ecue ejjashahuabaqui'yojji jayoja jama oe atiitucue! Jjeya ohuaya eseya huohui maja ajja jama ba'a: —¡Jodio etiiquiana yahuajo nei nei ba'ya poa jayojja jama acue! ¡Ehuone' cuia'yo majje dahuajea'yocue miquea mimishi ecuijea mee'yojji! —Cho. Jamaya Eyacuiñajjiya eseya amaja ajja. ¹⁰ Jamajjea Jesosa Quitohua Eyacuiñajjiya ejjashahuabaqui'yojji jayoja jama acanaje. Mano'yonaje; oe mano'yome poanaje eseya mimishi cuijea'yojji. Jamajjea Eyacuiñajjiya eseya mimishi cuijea'yo majje quea boejea po mee ca'yani Jesosaja epeeji nei cuana.

¹¹ Yahuajo nei Jodio Eyacuiñajji nijje mimiani etii ojjaña pojajo daqui equijo chachochaconaje. Ehuone' cuia majamaja caninaje mimishi cuijea mee'yojji nisho. Ecuiajea'yojji cuijea ca'yaninaje de, mimishi cuijea'yo jjima poa. ¹² Jesosa Quito ca ca Eyacuiñajji nijje emimijji nei. Oya ca ca oe mano'yonaje; oe mano'yome poanaje. Aquiana ehuone' mano'yani jayoja jama pojjeama poanaje oya. Mano'yonaje mimishi cuijea'yojji. Apoa. Mano beca'yo ajja. Eyahuasijje sohuaqui'yonaje. Eyacuiñajji pejeje anioque'yonaje, ebiane'i mijije. Eyacuiñajji nijjea ojjaña huoojea'yojji poani oya, Jesosa. ¹³ Majoya jjeya ohuaya ishoa ca ani Eyacuiñajjiya esahua cuana, ojjaña ojaya epeeji pojjeama, shajjama' cuana pea'ai jeabichajea'yo majje quea nee nee po mee caje'yo tii tii. ¹⁴ E'e, Jesosa acui ecueata'apeejo mano'yonaje; ojaya epeeji mimishi'ama po mee ca poa. Jamajjea eseya Eyacuiñajjiya esohui jayoja jama ameesahua cani.

¹⁵ Edojjoshahua Pameya pea'ai eseya ba meesahua cani Eyacuiñajjiya esohui ma ohua yahuajo tehue mee ca poa ojaya epeeji ebaaji. Ebionei jama poa ba'a:

¹⁶ “Quijje eyaya miquianaya esohui eyacua huohuije. Jamajjeya miquianaya jashahuabaqui meesahuaje ecuea ejshahuabaquijji jayojja. Ecuea esohui jayojja jama eyaya miquianaya ameesahuaje”.

¹⁷ Majoya ohuaya jiquio esohui tehue mee ca poa:

“Jamajjeya eyaya ojjaña cuanaja mimishi cuijea neineije'yo. Majoya eya jashahuaba majamajaqui ajja miquianaja mimishijo. Quea bei poaje”.

Eyacuiñajjiya jama tehue meemeya aca poa. ¹⁸ Jamajjeya Jesosa Quito esejaya mimishijo mano'yo majje mimishi cuijea ca'yonaje. Apoa poanaje. Jamajjeya oya mano beca'yo ajja. E'e, aquiana ehune! quecua maja ajja pea'ai, ¿ajeo equecua'yojji? Jesosa mimishi cuijea'yojji quea pame nee poanaje.

¡Jesosa chipi nei ejjapeequi!

¹⁹ Yahuaajo Jodio Eyacuiñajji niije mimiani cuana quea mete dobiquia poa daqui equacuayijji biso nei yasijje. Dobiquia poa Eyacuiñajji niije mimiya. E'e, Jesosa Quitohua mano'yonaje; ojaya ena' cuayaquinaje ese quea boejea po mee'yojji. Jamajjeya Jesusaja epeeji cuana, jjeja Eyacuiñajji niije emimi mete'ama nei. ²⁰ Yahuaajo nei Eyacuiñajji niije emimijji etii oe nei daqui esecueje equecuayijji biso nei yasijje dobiqianinaje Eyacuiñajji niije mimiya. Jjeja eseya Eyacuiñajji niije mimiani, ojjaña. Jesosa esejo mano'yonaje. Jjeja oya eshe, enequi tii tii. Jamajjeya eseya mimi majamajani Eyacuiñajji niije. ²¹ Oya, Jesosa Eyacuiñajji niije emimijji nei esejo pea'ai. Eseya jaahuana tiitii cani, ojaya epeeji nei. ²² Jamajjeya eseya ojaya epeeji e'e jojo nei poanijo Eyacuiñajji niije emimi. E'e jojo nei emimi tii tii onijje. ¡A'a jama pojji ba'a: —¡Dee! Eya quea mimishi Eyacuiñajji niije emimijji —a'a jamaya pojji! Cho, esejaya mimishi cuana cuijea ca'yonaje eseya quea boejea nee'yo.

²³ Eyacuiñajjiya ojaya esohui jayojja jama acaje'yo. Siajje po ajja oya. E'e jojo nei eseya ba'e tiitii mee caje'yo onijje eyajo. Jamaya esejaya eba. Jamajjeya ¡ejjapeequi onijje nei! ²⁴ ¡Jesusaja epeeji cuana quea jea nee ejja'aqui! E'e, ¡ejjashahuabaqui pea epeeji cuana, o ba'e meesahuaji. Jesusajo echaco sahuajji pea'ai! ²⁵ Beca epeeji cuana aje oe jjachicha pajeaquinaje; ojee Eyacuiñajji bihuia ajja po'yonaje. ¡A'a oya cuana jayojja jama pojji! ¡Ojee ejjachichaqui! Jesosaja epeeji cuana niije emimi jama ba'a: —¡Quea bihuni pocue! ¡Jesosa niije japeequicue ecua niije! —ejja'aqui.

E'e, Jesosa Quito esejaya Emeshi Mese nei poeje'yo. Jamajjeya oe jamaya epo tiitii.

¡Jesosa Quito a'a cajaa ajji!

²⁶ Beca cuana aje oe Eyacuiñajjiya esohui e'e nei ba majje jamatii quea mimishi po tiitii sa poani. Jamajjeya ojaya mimishi ecuijea'yojji pojjeama. E'e, Jesosa ca ca oe mimishi cuijea'yojji. Pea chama'. ²⁷ Jamajjeya Eyacuiñajjiya ojjaña shajjama' cuana jeajea caje'yo cuacu yasijje onijje mi japeequi'yo. Quea nee nee po tiitii mee caje'yo. ²⁸ Yahuaajo nei Jodio etiiquiaa Moisesija etehue'yo jayojja jama mi atitii cajo, cuiajea ca'yaninaje, dejja etii cuaa. Beca deja cuaa oya jayojja huohuime acajoya jama ba'a: “Oya ca ca oma shajjama', Moisesija esohui jayojja jama a sa po ajja. ¡Cacuijea ca'yahua cuaa ca oma!” jama huohuime acajoya cuiajea ca'yaninaje dejja etiiya. Chama'yo tii aca'yaninaje cuana. ²⁹ Oya jayojjaya jjeja beca cuana Eyacuiñajjiya Bacua Ejjajo, Jesusajo mimipanajeapanajeani. Cajaa acani quea mimishi nee neeya jjejojo. Eyacuiñajjiya esohui quea pame nee ojjaña ba mee canaje jama ba'a: —Jesosa mano'yonaje miquianajaya mimishi cuijea'yojji —jamaya ba mee canaje.

Jamatii beca cuana siajje poani jama ba'a: —Jesosa dejja mimishi jayojja jama mano'yonaje, jamatii.

Edojjoshahua Pameya ojjaña quea pame jaahuana sa acani. Jamatii beca cuana Edojjoshahua Pame shajja'ajja sa po'yo ajja. Cajaa acani. Oya cuana quea tai nee nee poani. Jamajjeya oya cuana quea nee nee po mee caje'yo tii tii Eyacuiñajjiya. Yahuaajo nei Moisesija etehue'yojo shajjama' poanijo ca ca quea tai pishana. Jamatii quecua jea ca'yaninaje cuaa. ³⁰ E'e, esejaya eba Eyacuiñajjiya yahuaajo tehue mee ca poa jama ba'a:

“Eyaya eyaye nei dejja mimishi quea nee nee po meeje'yo. Ojjaña joya pea cuana quea nee poani eyaya quea nee nee po meeje'yo”.

Jamaya Eyacuiñajji poa pea'ai ba'a: “Ecuea epeeji quea mimishi poajo, eyaya oya cuana ejjabahuejjaquijji quea nee po meeje”. Jamaya Eyacuiñajji poa pea'ai.

³¹ Jamajjeya ¡quea mete nee nee capoahua ojjaña joya Jesosa Quito cajaa ajji poani, de! Eyacuiñajjiya oya cuana quea nee nee po mee caje'yo. Oya ca ca oe nei eshe nequi tii tii, quea ca'a nee nee.

Jesosa niije japeequi majje ¡quea ja'a nee po tiiticue!

³² Ecuea epeeji cuana, ijshahuabaquicue! Yahuajo Jesosa nije jjapeequi jehuaajo miqianaya ojaya epeeji quea ja'a nee poanaje. E'e, Eyacuiñajija esohui shajja'ajja majje miqianaya onijje jjapeequinaje. Edojjoshahua Pame miqiana que dobiquinaje pea'ai. Jamajjeya Jesosaja epeeji pojjeama cuaa miqianaya napa canaje quea huiso. Miqianaya quea nee poanaje. Jamatii Jesosa nije jjapeequi pajea ajja poanaje, jjapee neineiquinaje. ³³ E'e, Jesosaja epeeji pojjeama miqiana nije mimijajinaje quea huiso ojjaña eshajja'ajjajji. Miqianaya napa canaje pea'ai. Quea nee po mee canaje. Jamatii miqianaya mete'ama poanaje. Onaa Jesosaja epeeji napa canijo, miqianaya onijje jjapeequinaje, Jesosaja epeeji cuana nije. ³⁴ Ejeanobia jaa huasijje pea'ai miqianaya poquinaje mete'ama Jesosaja epeeji cuana baa, ona bobiaa. Miqianaya ejeanobia jaaqo aquiana siijea ca'yona je cuaa. Jamatii miqianaya yeno'ama poanaje. Quea bihui miminaje jama ba'a: —Ecuanaaya Jesosaja epeeji poanijo ohuaya ecuaa quea pame nee nee acaje'yo quijje. Ecuanaaya ba'e tiiti mee caje'yo onijje eyajo —poanaje miqianaya.

³⁵ Jamajjeya ja'a jja o Jesosa nije jjapeepeajequi'yojji! Onijje jjapee neineiquianijo, ohuaya miya quea pame nee acaje'yo. Eyajo miya quea huiso sosequia caje'yo pea'ai. ³⁶ E'e, iquea bihui nee atitiicue Eyacuiñajija esohui jama! ja'a hueahueajji! Jamaya miqiaaya atitiiyajo, ohuaya miqianaya quea pame nee nee acaje'yo. Ojaya esohui yahuajo ohua huohui ca poa jamaya ohuaya acaje'yo. Miqianaya ba'e tiiti mee caje'yo onijje eyajo. ³⁷ E'e, Eyacuiñajija esohui yahuajo nei etehui'yo jama poa ba'a:

“iishoa socue ojaya epoejji! Jjeya nei pojja'a oya poeje'yo, quijje nei pojjeama.

³⁸ Ojjaña joya enijje jjapee tiitiquiani eyaya baña mimishi'ama, quea boejea'yo. Enijje jjapeepeajequiao ca ca ecuea boti'ama; quea nee po meeje'yo”.

Jamaya esohui etehui'yo poa.

³⁹ Ecuanaaya ca ca jamaya pojjeama. Jesosa nije jjapeepeajequi'yo ajja tii. Jamajjeya Eyacuiñajija ecuaa quea nee nee epo mee'yojji pojjeama. Cho. Ecuana Jesosa nije jjapee tiitiquianijo ohuaya ba'e tiiti mee caje'yo onijje eyajo.

11

Beca etiquiana Eyacuiñajija epeeji nei poa

¹ Ecuea epeeji cuana, esejaya eba nei nei jama ba'a: Jesosaja epeeji poanijo e'e jojo nei Eyacuiñajija ojaya esohui jayojja jama eseya acaje'yo. Jamajjeya eseya jama poani ba'a: —E'e jojo nei Jesosa quea huiso esohui huohui canaje; jjeya beca cuana esejaya quea quehua. Jamatii quijje esejaya baje'yo.

²⁻³ Jamajjeya Jesosaja epeeji poanijo eseyaya baña Eyacuiñajija ojjaña tii pana ca poa. E'e, oya jama poa ba'a: —Meshi cuana, ijapanaquicue! —jamaya acanje meshi jpanaquia poa. E'e, yahuajo nei ojjaña chama' nei nei poa. Jamatii Eyacuiñajija ojjaña pana ca'ya poa.

E'e, etiquiana pea'ai Eyacuiñajiji nije jjapeequianijo, ojaya esohui jayojja jama acanijo pea'ai, Eyacuiñajiji ona nije jama poa ba'a: —Miqianaya ecuea epeeji poanijo eyaya miya baña quea pame nee poani —aca poa.

Etiquiana Abeni bajjani Eyacuiñajija epeeji nei poa

⁴ Abeni Eyacuiñajija epeeji poanajejo ojaya esohui jayojja jama aca poa quea pame nee. Jamajjeya ijjiacajji ehuone' dahuajea cajo Eyacuiñajiji bihuiajji, Eyacuiñajiji onijje miminaje jama ba'a: —Abeni, miya quea ja'a nee anaje. Jamaya ecuea quea boti nee. Jamajjeya eyaya miya baña mimishi'ama —Eyacuiñajiji poa.

Abenija o'iya Cainiya Eyacuiñajija esohui jayojja jama pojjeama aca poa. Quea pame pojjeama aquiana quia ca poa Eyacuiñajiji bihuiajji. Jamajjeya Cainija quia'yo Eyacuiñajija boti'ama poa. Jamajjeya Caini jashahuabaquinaje jama ba'a: —Eyacuiñajija Abeni quea jea nee poani. Ojaya eya boti'ama. Jamajjeya eyaya cuijeaje'yo —aca poa Cainiya. Jamatii ecuanaja eba Abeniyaya Eyacuiñajija esohui jayojja jama aca poajo ojaya epeeji nei poa. Abeniyaya quea pame aca poajo eseya jashahuabaqui majje Eyacuiñajiji nije jjapeequi quea pame nee.

Etiquiana Enoca bajjani Eyacuiñajija epeeji nei poa

⁵ Enoca Eyacuiñajija epeeji nei nei poa pea'ai. Jamajjeya oya mano'yo jjima. Eyacuiñajija oya jjequisohua ca'ya poa eyahuasijje eshe tii. Onijje nequi dejja cuaa oya sa'ajja ca'ya poa. Chama' ba ca'ya cuaa poa. Eyacuiñajija esohui yahuajo nei nei tehue ca poa Enocajo jama ba'a: “Eyacuiñajija esohui jayojja jama aca poajo Eyacuiñajiji quea bihui nee poa Enocajo” jamaya tehue ca poa.

⁶ E'e, Eyacuiñajiji nije jjapeequi ajjajo, ojaya esohui jayojja jama a'ajjajo, Eyacuiñajiji ojjaña ese nije quea bihui nee pojjeama poaje. Ojjaña joya Eyacuiñajiji nije jjapeequi sa poani cahuohui cahua jama ba'a: —Ecuea eba Eyacuiñajiji enequi tii tii, eshe. Ojjaña joya oya sa poani ohuaya e'e jojo nei quea pame nee acani —cahuohui cahua.

Etiiquiana Noe bajjani Eyacuiñajjija epeeji nei poa

⁷ Noe Eyacuiñajjija epeeji nei pea'ai poa. Jamajjeya Eyacuiñajjija oya huohui ca poa jama ba'a: —Ojjaña meshijo ba'e cuana hui'jeaje'yo ena jayahuequijajo. Ohuajea caje ojjaña tii —Eyacuiñajjija aca poa.

Noeja ba jjima poa ena quea quemmo nee poaje. Jamatii ohuaya Eyacuiñajjija esohui shajja'ajja ca poa. Bishe, nacha quea quemmo nee nee iya ca poa ojaya, oja bacua cuanaja edobiquijji, hui'i'yo jjima epojji. Jamajjeya Eyacuiñajjija onijje mimia poa jama ba'a: —Noe, miya ecuea epeeji poani. Ecuea esohui jayojja jama aña. Jamajjeya eyaya miya baña mimishi'ama —aca poa.

Noeya Eyacuiñajjija shajja'ajja ca poajo, eseyaya baña pea cuana aje oe shajjama' nei nei poa.

Etiiquiana Amajama bajjani Eyacuiñajjija epeeji nei poa

⁸ Amajama Eyacuiñajjija epeeji nei poa. Jamajjeya Amajamaa shajja'ajja ca poa Eyacuiñajjija onijje mimiajo. Jama poa ba'a: —Amajama, ¡miqua meshijo nequi cuayaqui'yocue! ¡Poquicue pea meshi yasijje, ma miqua ba jjima huasijje! Eyaya ma meshiya miya quiaje. Miqua eba'ejji poaje'yo, miqua osecua cuanaja pea'ai poaje'yo —Eyacuiñajjija aca poa.

Jamajjeya Amajamaa Eyacuiñajjija shajja'ajja ca poa. Poquia poa jamatii oja ba jjima meshi yasijje. ⁹ Jamajjeya Eyacuiñajjija esohui jayojja jama poanijo oya ba'equi'ya poa pea meshi yasijje, ma Eyacuiñajjija o huohui ca poa huasijje. Ma meshijo ba'e deja pea poa. Jamajjeya Amajamaa equi iya jjima poa; daqui equijo ba'ya poa. Jamaya pea'ai poa oja bacua Isaaca, ojaya osecua Jacobo pea'ai.

—Jiquio meshi eyaya miya quiaje miqua eba'ejji —jamaya Eyacuiñajjija huohui ca poa Amajama, oja bacua Isaaca, ojaya osecua Jacobo pea'ai.

¹⁰ E'e, Amajama jjashahuabaquinaje pea cuiñajjijo, cuiñajji eyacuajo, ma Eyacuiñajjija eyajo iya canijo. Amajama jama poa ba'a: —Quijje eya Eyacuiñajjija cuiñajji eyacuajo ba'eje.

Etiiquiana epona Sana bajjani Eyacuiñajjija epeeji poa

¹¹ Sana Eyacuiñajjija epeeji nei poa pea'ai. Jamajjeya Sana pona tii nojinoji majje jjamejoquia poa, jamatii esho'yahua jjamejoqui jjima poa. Eyacuiñajjija oya jjamejoqui meesahua ca poa ojaya epeeji nei poanijo. Sana jjashahuabaquia poa jama ba'a: —Eyacuiñajjija huohui canaje canaje jamaya acuje'yo e'e jojo nei —Sana poanaje.

¹² Amajama Eyacuiñajjija nijje jjapeequinaje pea'ai, oja sohujjo e'e nei jjabahuejjaquinaje. Jamajjeya deja tii nojinoji majje, 100 shequiajame tii majje ebacua jea ca poa. Ehuanase etii nojinoji jjamejoquia poa, jamatii yahuaajo nei bacuama' nei nei poa. Jamajjeya ojaya osecua quea huiso nee nee quijje jpapapaqui'ya poa. Majameta huisoajja poa, sico meeme aija quea huiso nee nee. Meshijajjo ani mei sisi huisoajja poa.

Etiiquiana cuiñajji eyacuajo eyajo jjashahuabaquianinaje

¹³ Jiquio etiiquiana Eyacuiñajjija nijje jjapee tiitiiquianinaje. Deja tii majje mano'ya poa Eyacuiñajjija epeeji tiia. E'e, Eyacuiñajjija oya cuana huohui ca poa jama ba'a: —Eyaya miya jiquio meshi quiaje'yo miqua epojji, miqua osecua cuanaja epojji pea'ai.

Jamatii maya meshi ojaya pojjeama, mesena jjima poa: —Eyacuiñajjija esohui e'e nei, ohuaya meshi quea pame nee quijje quia caje'yo ecuanaja osecua cuanaja epojji —etiiquiana jjashahuabaquianinaje. Jamajjeya oya cuana quea bei nee po'ayequianinaje: —Ecuana jiquio meshijo anije so'o —poaninaje etiiquiana—. Meshijo ca jja ca oe ecuana eba'e tiitiijji pojjeama. Eyajo ca ca oe ecuana ba'e tiitiije'yo Eyacuiñajjija cuiñajji eyacuajo —jamaya poaninaje Amajama, Isaaca, Jacobo cuana.

¹⁴ E'e, oya jamaya poaninaje pea eba'ejjijo jjashahuabaquianinajo. Eba'ejji e'e jojo neijo jjashahuabaquianinaje ojaya epojji tii tiijo. ¹⁵ Oya cuana jjashahuaba majaqui aija poa meshijo, ma yahuaajo oja jiña'yojo. Jjashahuabaquianinaje jama ba'a: —Ma e ba'ya poa meshi yasijje ca iña poqui sa po'yo aija. ¿Ajeo epoqui o'oyajji, de? —poanaje oya cuana.

¹⁶ Chojja. Oya cuana pea eba'ejjijo jjashahuabaquianinaje, eba'ejji eyacua quea pame nee nee eyajo Eyacuiñajjija nijje. Jamajjeya Amajama jama poa ba'a: —Eyacuiñajjija, eya miqua epeeji.

Amajama jama poajo Eyacuiñajjija etiiquiana nijje miminaje jama ba'a: “Miquianaya ecuea epeeji nei; eya quea bei nee miquianajo” aca poa. Jamajjeya Eyacuiñajjija oya cuana ojaya cuiñajji eyacua quea pame nee yasijje ba'e mee caje'yo, ma ohua yahuaajo eyajo pana ca'ya poa huasijje.

¹⁷⁻¹⁸ E'e, Amajama Eyacuiñajjija epeeji nei poa. Yahuajo Eyacuiñajjija oya huohui ca poa: "Amajama, miquea ebacua cuayaje" aca poa. Majoya Amajama ebacua cuayajo Isaaca bajjani aca poa. Majoya Eyacuiñajjija Amajama jama aca poa ba'a: "Isaacaja bacua ca ca oe eyaya baña miquea osecua e'e nei, pea cuana ca chojja" aca poa. Jamatii quijje Eyacuiñajjija Amajama jama aca poa ba'a: "Amajama, miquea ebacua eja oe nei Isaaca bajjani mei biajje huana majje yacua'yocue, dahuaaje'yocue!" Jamaya Eyacuiñajjija Amajama huohuime aca poa a'a e'e jojo nei ohuaya shajja'ajja caje ebajji: "Eya e'e jojo nei Amajamaja quea jea neejo, ohuaya ecuea esohui shajja'ajja caje" poanaje.

¹⁹ Majoya Eyacuiñajjija esohui shajja'ajja majje Amajama oja bacua eja dojo ca poa eyacua'yojji nisho: —E'e, eyaya Eyacuiñajjija esohui jayojja jama aje'yo; ecue bacua oe nei yacua'aje'yo —Amajama poanaje—. E'e, eya Isaaca yacua'yajo, Eyacuiñajjija oya emanoyojaa shequi mee caje o'oya —Amajama poanaje.

Jamajjeya Isaaca yacua jjimahuajo Eyacuiñajjija Amajama huohui canaje jama ba'a: "Amajama, ja'a miquea ebacua Isaaca yacua'yojji!" aca poa.

Jamajjeya Amajama Isaaca equi yasijje dojo ca o'oya poa, eshe. Beshahua nei Isaaca yacua ca'yonaje. Jamajjeya eyacua'yojaa shequi o'oya jayojja Isaaca poa.

Etiiquiana Isaaca, Jacobo, Jose pea'ai Eyacuiñajjija epeeji poa

²⁰ Isaaca Eyacuiñajjija epeeji nei pea'ai poa. Jamajjeya ojaya ebacua eja Jacobo, Esao pea'ai huohui ca poa jama ba'a: —Jacobo, Esao pea'ai, ishajja'ajjacue mo! Ma ecua eya ohua huohui ca poa jayojja jama Eyacuiñajjija acaje'yo miqiana nijje. Ohuaya miqiana nijje quea pame nee acaje'yo. E'e, jiquio meshi miquea osecua cuanaja poaje'yo —aca poa Isaaca.

²¹ Jacobo pea'ai Eyacuiñajjija epeeji nei poa. Jacobohua deja tii majje oja bacua eja Jose bajjanija bacua cuana huohui ca poa jama ba'a: —Ecuea osecua, Eyacuiñajjija miqianaya quea pame nee ca'a cahua e'e jojo nei —Jacobohua aca poa ojaya osecua cuana, Joseja bacua eja cuana.

Majoya Jacobohua Eyacuiñajjija bihuia ca poa. Oya deja tii nojinoji majje ojaya acui ejaquecua ca'aquijjijo nequisohuanaje Eyacuiñajjija bihuiajji. Jama aca poa ba'a: —Eyacuiñajjija, miya oe nei quea pame nee nee. Eyaya miya bihuiaña —aca poa Jacobohua.

²² Jose pea'ai Eyacuiñajjija epeeji nei poa. Jamajjeya tii nojinoji'yo majje mano'yo jjimahuua Joseya oja bacua eja huohui ca poa jama ba'a: —E'e jojo nei Eyacuiñajjija eseya ojjaña Amajamaja pea osecua cuana nijje Ejito meshijo nequi cuayaqui meesahua caje'yo pea meshi yasijje epoqui'yojji, eseya meshi yasijje. Jamajjeya je mano'yajo ecuea esa' cuana dojo'yocue ecue meshi yasijje! Ijani ai yasijje huanadobiañaqui'yocue! —huohuime aca poa Joseya.

Etiiquiana Moisesi bajjani Eyacuiñajjija epeeji nei poa

²³ Moisesija chii, ojaya enaese pea'ai Eyacuiñajjija epeeji nei nei poa. Jamajjeya Ejito meshi meseya Panao bajjanija ojjaña Ejito meshijo ba'e cuana Jodio cuana jama aca poa ba'a: —Jodio cuana, miquea ebacua cuaya jehuaajo cuei yasijje jeaoqueajeacue! —aca poa.

Jamatii Moisesija chiya, oja naeya pea'ai Panao shajja'ajja jjima aca poa. Mete'ama poa. Panaoja esohui jayojja jama ajjima aca poa; Moisesi jeaoqueajea jjima aca poa. Ba majje jama aca poa ba'a: —Jiquio ebacua quea pame nee, quea ja'a nee nee —aca poa ejaejjija.

Jamajjeya equijo huanaquehua ca poa pea beca peejjima ba'ime onaa eja ca'yo poajeje. ²⁴ Panaoja bacua pionaa Moisesi ba majje tii mee ca poa. Jamatii tii majje Moisesi Eyacuiñajjija epeeji nei poa. Jodio cuana nijje ba'e'yo sa poa, oja huapa pojeama nijje. Moisesiya Ejito deja jama aca poa ba'a: —iA'a eya nequiaa jama ajji ba'a: "Miya Panaoja bacuaeja bacua" a'a eya ajji! —Moisesiya aca poa.

²⁵ Ejito dejjaa aje oe Jodio cuana sosema' chaco mee ca poa, cuiasejjajea ca poa quea huiso nee, Eyacuiñajjija epeeji cuana. Quea nee poa. Jamatii Moisesi Jodio cuana nijje ba'e sa poa. Oya Ejito cuana nijje ba'e sa po ajja neinei poa oya cuana quea mimishi poanijojo. Oya ca ca Eyacuiñajjija nijje jjapeequi sa poa jamatii quea nee. ²⁶ Jjashahuabaquia poa jama ba'a: —Eyacuiñajjija huoojea'yo ojjaña jaahuanajji quea tai nee acaje'yo mimishi cuaa. Eya quea nee capohua pea'ai o jayojjaya. Jamatii, jamaya quea pame nee. Ejito dejjaja aquiana quea nahue ecuea yani. Jamatii cajaa eyaya ajeaje —Moisesi poa. Ojaya eba poa Eyacuiñajjija oya quea pame acaje'yo quijje onijje jjapeequianijo.

²⁷ Moisesi Eyacuiñajjija epeeji nei nei poa. Panaohua ca ca Eyacuiñajjija epeeji Jodio cuana nahue sa aca poa ojaya echacojji sosema' epojji; quea tai, quea mase oya poa. Jamatii Moisesi Panao mete'ama poa: —Eyaya ca iña Eyacuiñajjija epeeji Ejito meshijo ani cuayaqui meesahuaje'yo ecuanaja meshi yasijje epoqui'yojji —jamaya Moisesiya Panao aca poa mete'ama nei. E'e, Eyacuiñajjija Moisesija eba poa, jamatii Eyacuiñajjija jbaa meequi ajjajojo ojaya ecojjaja ba jjima poa.

²⁸ Moisesiya Eyacuiñajjija epeeji nei poaniya jjejojo Eyacuiñajjija esohui jayojja huohuime aca poa Jodio cuana jama ba'a: —¡Najajja cuiacue! Majoya cui'a'yo majje ¡jeasijjeacue oja naa miqúea esecue jjanijo esohuidojojjiya miqúea ebacua ejja ecuijaejji pojjeamajo, cojjasobo! Jamajjeya poeje shajjamaja bacua ejja cuiajea —Moisesiya aca poa.

Jamajjeya Moisesiya esohuidojojjiya Jodio cuanaja ebacua ejja cui'a'yo majje amee ca poa. Majoya jamaya Jodio cuaa ojjaña shequiaja ojee ijija ca poa ebacua cui'a'yo jjima aca poa shejo, epajea'yojji pojjeama jojoya.

²⁹ Jodio cuana Isaenija osecua cuana Eyacuiñajjija epeeji poa yahuajo nei Moisesi Jodio cuana jaahuana coojji poa. Jamajjeya Eyacuiñajjija oya cuana bae huo'o ojje mihi yasijje poqui mee ca poa ejiojji jaboje. Ba majje Ejito dejja jama poa ba'a: —¡Cua'a! ¡Poquicue ma ecua Jodio dejja poquia bacue! —poa. Jamatii Ejito dejja epoquijji nisho po'ajja poa. Huil'i jeyojeyo'ya poa ojjaña. Enaa oya cuana jepajea ca poa.

³⁰ Isaenija osecua cuana Eyacuiñajjija epeeji poa Josoe o huoojea'yojji poanijo pea'ai. Jamajjeya Eyacuiñajjija esohui jayojja jama Jenico cuiñajji sahuajje jjaeacohuiqui nequi'ya poa. Quea huiso cahuime dobiqúi jjima, me oejeje pea beca cahuime, 7 cahuime aca poa. Eyacuiñajjija mei peeyi jaabichajea meequi ca poa meshi yasijje. Jamaya aca poa Isaeni dejja cuaa. Ojjaña mimishi cuana jomajo ba'e quecua jeyojeyo meesahua ca poa, Eyacuiñajjija.

³¹ Epona Shajami bajjani, ma pea cojjoji yahuajo poa Eyacuiñajjija epeeji po'yonaje. Jamajjeya Josoeja huoojea beca dejja Jenico cuiñajji quehua baa dobiqúi Shajamiya oja equi yasijje iyaaquehua ca poa onaa quecua ca poajeje. Jamajjeya Josoeja sohuinano cuaa dejja mimishi quecuajea'yo majje Shajami quecua'yo jjima poa. Josoeja huohui ca poa jama ba'a: —¡A'a Shajamija huapa pojjeama quecuajji! —aca poa.

Jodio etiiquiana quea huiso Eyacuiñajjija epeeji poa

³² Pea etiiquiana quea huiso Eyacuiñajjija epeeji nei poa. Beca cuana ma bajjani poa ba'a: Jjeneoni bajjani, Banaca bajjani, pea Sanisohui bajjani, pea Jepete bajjani, pea Dabi bajjani, pea Samoeni bajjani. Quea huiso Eyacuiñajjija esohui huohuijji Jodio etiiquiana poa. Jjeya ca ca eyaya ojaya cuanaja eba'ejjijo ehuohui jeyojeyojji pojjeama quea huosojojo.

³³ Oya cuana Eyacuiñajjija epeeji nei poaninajejo oya cuana ameesahua canaje joya ecua peaa ajjima acani jama. Jamajjeya beca cuaa emeshi mese quea mimishi cuana jeabichajea ca poa. Pea cuana ona huoojeajji quea ja'a nee poa. Pea cuana quea ca'a poa, quea ja'a nee ba'e'ya poa. Ojaya esohui yahuajo jayojja ma ecua ohuaya yahuajo esohui huohui ca poa jamaya aca poa onajo, Eyacuiñajjija. Pea cuana neonija, ibia naa ashaja ijija jjima poa Eyacuiñajjija oya jjanaba camí meequi ca poa ojaya epeeji cuana e'ijija ca'yo poaje jjejojya. ³⁴ Pea cuana Eyacuiñajjija jaahuana canajejo quiyoyoyo jjima poa. Cuaqui jiji neijo nequi quiyoyoyo jjima poa. Pea cuana quehuajje poquicuaqi meesahua ca poa dejja maseya equecua ca poaje jjejojya. Pea epeeji cuana ca'a'ama. Jamatii Eyacuiñajjija quea ca'a po mee ca poa; dejja mase quea huiso cuana jeabichajea ca poa, Eyacuiñajjija epeeji pojjeama mete mee ca poa. ³⁵ Epona cuana quea yeno nee nee ebacua mano'yajo poa. Jamatii Eyacuiñajjija ebacua cuana emano'yojaa shequi mee ca o'oya poa. Quea bihi nee po mee ca poa. Pea cuana ca a dejja mimishiya quea nee nee po mee ca'ya poa. Quea nee neejo mano'ya poa. Oya cuana huohui ca poa dejja mimishiya: —¡Eyacuiñajji nijje jjapeequi pajea'yocue! ¡Cajaa acue! Majoya miya quecua'yo jjima poaje —poanaje cuana.

—Chojja. Eya Eyacuiñajjija epeeji nei. Oya cajaa a'ajja tii ecuea. Eya ca ca iña mete'ama emano'yojji —saja'ame aca poa Eyacuiñajjija epeeji cuaa.

Jamajjeya aje oe quecua ca'ya cuaa poa. Ma epeeji nei jashahuabaquianinaje jama ba'a: —Eyacuiñajjija e'e jojo nei eya quea pame nee ba'e tiitii mee caje'yo onijje eyajo quijje —poa mano jjimahua.

³⁶ Dejja mimishi cuana Eyacuiñajjija epeeji cuanajo soa neineinaje ojjaña ba canijo pea'ai. Napa canaje, cuiasejjajea canaje jjonohua, jeyo canaje cadenea, jeanobiajea canaje.

³⁷ Jajahuajjajea canaje meiya pea'ai. E'e, acui ijijasejjameejjiya oya cuana ijijasejjajea mee caninaje, esapa jajasejjajea ca poa baaa Eyacuiñajji a'a cajaa acaje'yo ebajji. Aema' poa; daquimajo ijijacajji jee daqui huosho ca poa. Bobi yasijje po'ya poa. Quea naba taja nee nee pea'ai poa. E'e, ojjaña ba canaje dejja mimishi cuaa oya cuana quea tai nee nee aca poa, cajaa aca poa. Jama aca poa: —¡Deel! ¡iquio dejja cuana quea tai, cajaa. ¡Ejjacuijaequi'yo! —aca cuaa poa.

³⁸ Jamajjeya oya cuana dejja masejo quea mete jjejojo quehuajje poquinaje. Cuaquicuaqi poquinaje meshi quima huasijje, eyiyo huasijje, jjaní yasijje pea'ai. Equi chamajo jjanijo ba'ya poa.

³⁹ Jiquio Jodio etiquiana Eyacuiñajija epeeji poa, quea pame nee. Eyacuiñajiji jama poa ona nijje ba'a: —Miya ecuea epeeji nei quea pame nee nee, ecuea ehuhui jayoija jama añ.

Jamatii Eyacuiñajija ejjashahuabaquijji quea pame nee ajjima poa ona nijje jiquio meshijo ba'yanijo. ⁴⁰ Jamajjeya Eyacuiñajija oya cuana ishoo mee ca poa. E'e, Eyacuiñajiji jashahuabaquinaje ojjaña cuana quea bojea'yo epo mee'yojji; ojjaña yahuajo nei cuana ba'ya poa, eseya jjeya nei ba'e pea'ai quea bojea'yo epo mee'yojji. Jamajjeya ojjaña eseya ojje ba'e tiitij'e'yo quea bojea Eyacuiñajiji nijje eyajo, ojjaña ti.

12

¡Eyacuiñajija epeeji yahuajo ba'ya poa jayoija ba'ecue Jesosaja epeeji nei!

¹ Jamajjeya ojjaña Eyacuiñajija epeeji yahuajo ba'ya poaa jjeya nei ecuana huohui cani jama ba'a: —¡Bacue! Ecuana Eyacuiñajija epeeji nei poa. ¡Ecuana jayoija pocue! —poani.

Ecuana Jesosaja epeeji dejja cuajicuajiani jama. Mimishi ca ca aquiana quea biquie eba'o ba'e jayoija. Jamatii ecuaaya ca'a'amaa jjejojo mimishi acuajiaña. Jiquio ecua dejja aquiana abo po jjima cuajicuajiani jayoija jama eseyaya mimishi ejjapajea neinei'yo Jesosaja epeeji nei epo'yojji. Oya, Jesosa esejaya ecuaicuajiji meesahuajiji jayoija. Jamajjeya ojaya ejjashahuabaquijji jayoija jama ejja'a tiitiqui'yo. ² Jamajjeya ¡Jesosajo jashahuabaquicue! Ohuaya yahuajo eseya onijje japeequi mee canaje. Jjeya ohuaya eseya onijje japeequi meesahua cani. Jesosa jama jashahuabaqui ajja ba'a: —Chojja de, eya acui ecueata'apeejo emano'yojji pojjeama —jamaya po jjima poa.

Chojja. Jesosa jama poanaje ba'a: —E'e, ojjaña enijje quea mimishi nee nee poaje. Jamatii eya ecue Chiia huohui ca poa jayoija jama mano'yome poaje acui ecueata'apeejo. Jamajjeya quijje eya ecue Chii nijje anioqueje quea bihui nee ojaya esohui jayoija jama amajje —jamaya Jesosa poanaje.

Jamajjeya Jesosa mano'yo majje Eyacuiñajiji pejejo anioquenaje ebianeijje mijijje ojjaña huojjea'yojji.

³ E'e, ijashahuabaquicue Jesosajo! Yahuajo nei mimishi cuaa onijje quea quene nee nee po majje quea nee nee po mee canaje. Jamajjeya Jesosajo jashahuabaquianijje miqúanaya quea yeno epojji pojjeama onaa napa cajje. Onijje japeequi pajea'yo ajja poaje. ⁴ Yahuajo miqúanaya ojje japeequianijje Jesosaja epeeji quea ja'a po'yonaaje. Shajjama' po jjima. ¡Bacue! Jesosaa oja Chiia ehuhui jayoija ohua huohui cajo, mimishi cuaa queca ca'ya poa. Miqúanaya ca ca mimishi cuaa cuia'yo jjima Jesosa nijje japeequianijje. ⁵ ¡A'a pajea'yojji Eyacuiñajija esohui etehue'yo! Ejeajjiya oja bacua cuana tecuea cani ejjashajja'ajjaquijji jayoija jama Eyacuiñajiji ese nijje miminaje:

⁶ “Ecuea ebacua cuana, ¡eyaya miqúanaya jjabahuejjaqui meeañajo shajja'ajjacue mo! Eyaya miqúanaya miqúea mimishijo tecueañajo ja'a quea yeno pojji! E'e, ojjaña joya ecuea quea jea nee nee eyaya jjabahuejjaqui meeaña. Ecuea ebacua cuana eyaya tecueaña mimishi'ama epojji”.

Jamaya Eyacuiñajija, eseja Chii aia eseya aca poa.

⁷ Jamajjeya Eyacuiñajija miqúanaya jjabahuejjaqui mee canijo, ja'a quea yeno pojji! ¡Onijje mimicue jama ba'a: —Eyacuiñajiji, miya ecue Chii ai. Miyaya eya quea nee po meeaña eya miqúea esohuijje ejjabahuejjaqui meejji —jamaya onijje mimicue!

E'e, jiquio ecua seya esejaya ebacua cuana tecueaña jamaya Eyacuiñajija eseya acani. Eseja bacua cuana eseyaya tecueaña ejjabahuejjaquijji. ⁸ Ojjaña ejeajji cuaa oja bacua cuana niñeshe'a cani. Ejeajjiya oja bacua tecuea jjima acani shajjama' poanijje onaya mimije jama ba'a: —¡Dee! Oja bacua pojjeama poja'a, jamajjeya mi jjabahuejjaqui mee cani. Jea jjima jama, de —acaje cuaa.

Oya jayojjaya Eyacuiñajija ojjaña ojaya ebacua cuana jjabahuejjaqui mee cani shajjama' epojji pojjeama. Ohuaya miqúanaya jjabahuejjaqui mee jjima acani ca ca miqúanaya oja bacua pojjeama, peaja bacua poja'a.

⁹ E'e, ejeajji cuaa eseya niñeshe'a cani esho'yahua ejjashajja'ajjaquijji. Jamajjeya oya jayojjaya esejaya Chii ai ejjashajja'ajja neinei'yo; ohuaya eseya ba'e tiitii mee cani.

¹⁰ Eyacuiñajija eseja Chii aia ca ca eseya tecuea cani quea ja'a nee eba'ejji. Jjabahuejjaqui mee cani o jayoija quea pame nee nee, quea bojea'yo nee epo tiitii meejji. Eseyaya ejeajjiya ca ca ojaya ejjashahuabaquijji jayoija jama eseya tecuea ca poa esho'yahua. ¹¹ Jjeya Eyacuiñajija quea nee po mee cani ejjabahuejjaqui meejji eseya quea bihui pojjeama, quea yeno poani. Jamatii quijje jjabahuejja neinei'yo majje eseya quea jashahuabaqui ja'a nee poaje, quea bei nee nee poaje.

¹² Jamajjeya ja'a quea yeno pojji jamatii quea camaja poanijje! ¡Quea ja'a nee oe japeequicue Eyacuiñajiji nijje! ¹³ Jamajjeya ¡ejjojji epí jaji neijje poquiani jayoija jama

pocue! ¡Quea ja'a nee jjapeequecucue Jesosa nijje! ¡Pea cuana jjapee neineiqui meesahuacue pea'ai Jesosa jayoija epojji!

¡Jesosa nijje a'a jjapee pajeaquiyojji!

¹⁴ Ecuea epeeji cuana, ¡quea bei ba'ecue ojjaña nijje! ¡Quea boejea'yo ba'ecue pea'ai! Quea boejea'yo ba'e'yo ajja aje oe Eyacuiñajji nijje eba'e tiitii'yojji pojjeama. ¹⁵ ¡Ba neineicue! ¡Ojjaña Eyacuiñajji nijje jjapee neineiqui meesahuacue onijje eba'e tiitii'yojji! A'a jja oe jama pojji ba'a: Acui iña quea cuaja nee nee pejeje nequi majje mano'yo chana'. Oya jayoija dejja tecueya ojjaña o pejeje o quea tecue po mee cani. Quea tecue po tiitiani, quea huiso quea quene po mee cani. Quea huiso quea mimishi po mee cani pea'ai. Jamajjeya ja'a quea tecue po majajji! Quea tecue po majjeya Eyacuiñajji pajea'yo chana'. ¹⁶ ¡A'a pea cojjojji pojji pea'ai! ¡A'a etiiquiana Esao bajjani jayoija jama pojji pea'ai! Ojaya, Esaoja, yahuajo nei Eyacuiñajji esohui boti'ama poa. Ojaya ejjashahuabaquijji jayoija jama poa jama ba'a: Oya cojjasobo poa. Jamajjeya oja chii mano'yajo, ojjaña ojaya aquiana equijjojea cajo Esaoja poaje'yo, cojjasoboja. Jamatii oja chahua huohui ca poa jama ba'a: —Cha, ¡che mo bobi quiacue! Quea shoe mo coma. Miya bobiaje sosejje aje mi sosequiaje'yo; ma cacaa quijjojea cajo eyaya miya quiaje'yo; ecuea pojjeama poaje'yo, miquea poaje'yo —aca poa oja chahua Esaohua, jashahuabaqui jjima jayoija poa.

¹⁷ Cojjasobojo Jodioja ejeajji cuana jama poaninaje ba'a: —Eyacuiñajji, ¡ecuea ecue bacua cojjasobo jaahuanacue, quea aquiana huiso po meecue! —poaninaje Jodio etiiquiana.

Jamajjeya quijje Esao oja chii nijje miminaje jama ba'a: —Ecue chii, ¡Eyacuiñajji nijje mimicue e jaahuanajji! —poa—. ¡Jama acue ba'a: “Eyacuiñajji, ¡ecuea ebacua cojjasobo Esao bajjani jaahuanacue!” acue! —jamaya Esaohua oja chii aca poa.

—Chojja, Esao. Yahuajo eya jamaya miminaje Eyacuiñajji nijje mique chahuajo, mijo pojjeama. Apoa —oja chiiya jama saja'ameya aca poa.

Jamajjeya Esao cajaa aca poa cojjasobo jayoija jama epojji pojjeama.

Jamajjeya Esao pa neineinaje, quea yeno nee nee poanaje oya chiija aquiana mesena'yo sajo. Jamatii oja chii ma ohua yahuajo esohui huohui ca poajo pajeapajea'yo ajja poa pea esohui ehuhui o'oyajji. Eseyaya eba Esaoja esohui oja chahua nijje, oja chiija aquiana quia ca poa bobi sosejje. Jamajjeya oja chiiya oya cojjasobo jayoija pojjeama aca'ya poa.

¹⁸ Yahuajo nei nei pea'ai Eyacuiñajjiya eyiyo Sinai bajjanijo nequiya esohui huohui ca poa; Jodio etiiquiana Moisesi nijje nequi quea mete nee nee poa. E'e, yahuajo Jodio cuana eyiyo huasijje poe majje Sinai eyiyojo nequiñaquia poa. Eyiyo ba cañaquia poa jiji neineiqui. Quea bo moo eyiyo biajje nequia poa. Quea huichacha moo, quea misi poa. Quea beni quemo pea'ai poa eyiyo biajje. Pojjeje baa siyoo pea'ai po nequia poa. ¹⁹ Taaa po neinei nequia poa, huaca she'ana quea quemo mia cani jayoija jama shajja'ajja ca poa Eyacuiñajjiya emimi. Ma shajja'ajja majje quea mete nee nee poa etiiquiana cuana Eyacuiñajjiyo. Jama taamea aca poa ba'a: —¡Ecuana nijje a'a mimi o'oyajji! —taaa ca poa cuana quea ajjajja nee nee jjejojo.

²⁰ “¡A'a eyiyo huasijje jaasohuajji!” Eyacuiñajjiya aca poa. “¡A'a aquiana ehucue! jaasohua meejji pea'ai! ¡Jaasohuajo ca jahahuejjajaeucue meiya!” Eyacuiñajjiya aca poa.

²¹ Jamajjeya ojjaña tii quea mete nee nee poa. Ba majje etiiquiana Moisesi pea'ai quea ajjajja nee nee poa: —Eya quea mete nee nee jjejojo piopioani —Moisesi poa.

²² ¡Jeya ca ca yahuajo jama pojjeama. Miqianaya ca ca Eyacuiñajjiya oja sohui ba mee canijo ja'a quea mete pojji! Miqianaya Eyacuiñajji ba'e yasijje poeyanaje. Ma eba'ejji eyiyo Sioni bajjani jayoija, ma Jenosanena eyacuajo nequi jayoija. Maya Eyacuiñajjiya cuiñajji eyacua eyajo. Jomajo Eyacuiñajji ba'e tiitiani, eshe. Ma cuiñajjiyo Eyacuiñajjiya esohuidojojji ejjanequichichaqui; quea bhui nee nee, quea huiso nee nee nequi, de. Sicosico meeme eaja, yajja sicome yajji quea huiso nee nee oya aña. ²³ Jomajo Eyacuiñajjiya epeeji cuana quea bhui nee nee Eyacuiñajji pejeje yani pea'ai ma yahuajo nei nei onijje jjapeequia poa. Eyacuiñajjiya oja bajjani cuana oja esohui etehue'yojo tehue ca poa eyajo. E'e, miqianaya Eyacuiñajji nijje jjapeequiani. Ohuaya ojjaña cuana meshijo ba'e sosequia caje ojjaña ma onaa acanaje sosejje. Jomajo, eyajo Eyacuiñajjiya epeeji emano'yo cuanaja edojjoshahua cuana yani, ma yahuajo mimishi cuijea ca'ya poa cuana. ²⁴ E'e, miqianaya Jesosa nijje jjapeequiani. Ohuaya ca ca oe eseya esohui eyacua huohui canaje eba'e tiitii mee'yojji. Esejo mano'yonaje pea'ai. Ojaya ena' cuayaquia poa esejaya mimishi cuijea'yojji sosejje. Oya Jesosa Adanaja bacua eja Abeni bajjani jayoija jama pojjeama. Abenija ena' cuayaquiajo oja o'i Eyacuiñajjiya tecuea neinei ca poa echahua mese cuija ca'yajo.

²⁵ ¡Jamajjeya Eyacuiñajjiya esohui shajja'ajjacue! ¡A'a shajjama' pojji! Yahuajo eyiyo Sinai pejeje Moisesiya Eyacuiñajjiya esohui huohui majamaja ca poa etiiquianaja eshajja'ajjajji nisho. Jamatii aje oe shajjama' poa. Jamajjeya Eyacuiñajjiya oya cuana quea nee po mee ca poa. ¡Jeya Eyacuiñajjiya eyajo nequiya eseya huohui cani oja sohui eyacua, ma esejaya

yahuajo shajja'ajja jjiima. Shajjama' poajo e'e jojo nei ohuaya eseya quea nee nee po mee caje'yo, de. ²⁶ E'e, yahuajo nei Eyacuiñajjiya eyiyo Sinai biajje sohuihuohui ca poajo, meshi huehuahuehua mee ca poa janobajjima nei. Jjeya oya jama poanaje ba'a: "Eyaya e'e jojo nei meshi, eyatahuatahua pea'ai huehuahuehua mee'e'yo janobajjima nei nei" jamaya Eyacuiñajji poanaje.

²⁷ Jamajjeya Eyacuiñajjiya jama acajo ba'a: "Meshi, eyatahuatahua pea'ai huehuahuehua mee'e'yo" acajo, esejaya eba ohuaya ojjaña oja pana huehuahuehua mee'yo majje chama'yo tii poaje'yo ojjaña aquiana yahuajo oja pana'yo. Ojjaña aquiana eyacua ehuehuahuehua'yojji pojjeama anije'yo tii tii.

²⁸ Eyacuiñajji ojjaña huoojea'yojji poani tii tii. Chama' o jeabichajea'yojji epojji. Ese huoojea'yojji poani tii tii oya. Jamajjeya Eyacuiñajji ejjabihuaiqui jama ba'a: —Jamaya Eyacuiñajji, miya quea pame nee nee poani tii. Miya ecuana huoojea'yojji quea ca'a nee nee.

E'e, iEyacuiñajjiya esohui jayojja jama eba'e tii tii! iOya ejjashajja'ajja titiiquui! iQuea mete epo tii tii; shajjama' pojjeama epo! ²⁹ iOjo ejjashahuabaquui! Jiquio ecua cuaquijo quiyoyeajea jeyojeyo yani jayojja jama Eyacuiñajjiya shajjama' cuana quea nee nee po mee caje'yo, de.

13

Jjesosaja epeeji poanijo ba'ecue quea pame Eyacuiñajjiya quea boti nee e'ajji!

¹ Ecua epeeji cuana, ipea cuana Jjesosaja epeeji pea'ai poanijo quea jea nee nee atiitucue huapa pojjeama jama! ² iPea cuana miqianajaya ba jjima quea jea acue! iEqui yasijje poeyajo quea pame nee acue pea'ai! iMiqianajaya equi yasijje iyaacue! Yahuajo beca cuana jama poanijo esohuidojojji jaahuana ca poa, jamatii oya ojaya cuana ba jjima esohuidojojji poa. Jjashahuabaquia poa jama ba'a: —E'e, jiquio deja cuana ecua ba jjima eyaya bobiaje —esohuidojojji pojjeama poso aca poa.

³ iCuanaya baquicue Jjesosaja epeeji jaya ejeanobiajea jaa cuana! iA'a oya cuana pajea'yojji! iJjashahuabaquicue jama ba'a: —Eya ona jayojja jama ejeanobiajea jaa jjemo quea shoe, quea yeno pome. Jamajjeya eyaya oya cuana baquije, bobi quiaje, onijje jjapeequije —pocue!

iA'a pajea'yojji Jjesosaja epeeji quea nee poani onaa napa cajo pea'ai! iJjashahuabaquicue jama ba'a: —Onaa napa caje eya quea nee pome, eya quea yeno pome. Jamajjeya eyaya oya cuana baquije quea bihui epojji. Ona nijje jjapeequije. Eyacuiñajji nijje mimije onajo pea'ai —pocue! iJamajjeya oya cuana baquicue, ona nijje jjapeequicue!

⁴ Jjashahuabaquicue jama ba'a: iA'a jjacjojji! Yahueya, imiquea ehuanase oe nei jaahuanaacue! iOnijje tii jaacue! Ojjañaja eba jamaya quea pame nee. Jamajjeya iA'a quea mimishi pojji! iA'a pea cojojji pojji yahue, ehuanase pea'ai! Jama poajoya Eyacuiñajjiya e'e jojo nei miqianaya tecuea neinei majje quea nee nee po mee caje'yo.

⁵ iA'a quea aquiana jea pojji! Eyacuiñajjiya eseya jama acanaje ba'a: "Eyaya miya epajea'yojji pojjeama nei nei. Eyaya miya ejeana'yojji pojjeama" poanaje.

⁶ Jamajjeya miquea aquiana eba'e meeji yanijo iquea bei pocue! Esohui yahuajo etehue'yo jayojja jama mimicue jama ba'a:

"Eyacuiñajjiya, Emeshi Mese neiya eya jaahuana cani tii tii. Jamajjeya eya mete'ama poani.

Deja mimishi cuaa eya ejeabichajea'yojji pojjeama. Eyacuiñajjiya eya ejaahuana pajea'yojji pojjeama".

iJamaya mimi majamajacue!

Jjapee titiiquicue Jjesosaja nijje!

⁷ iA'a pajea'yojji Eyacuiñajjiya esohui huohuijji, yahuajo miqiana sohui huohuijji poa! iJjashahuabaquicue oya cuana quea ja'a nee ba'enaje Jjesosaja nijje jjapeequianijo! Mano'ya poa Jjesosaja epeeji nei. iO jayojjaya Jjesosaja nijje jjapee neinei quicue! ⁸ E'e, Jjesosaja Quito oja sohui jayojja jama poani, pajea'yo ajja tii tii. Ojaya ejjashahuabaquiji yahuajo nei jayojjaya nei acani tii. Quijje nei jamaya atiiti caje'yo pea'ai. ⁹ Jamajjeya ipeapea ehuhui'yo Jjesosaja esohui e'e nei jayojja jama pojjeama a'a shajja'ajjajji! Pea ehuhui'yo shajja'ajja majje o jayojja mimishi mi po'yo chana'. Eyacuiñajjiya eseya quea jea nee nee acanijo esohui e'e nei ba meesahua cani Jjesosaja epeeji quea ca'a nee epojji. Pea cuaa ca ca shajja'ajjacani esohui quea quehua bobijo jama ba'a: —iBeca bobi a'a ijjajji Jjesosaja epeeji nei epojji! —acani Jodio etii cuaa.

Ma esohui shajja'ajja cani cuaa eshajja'ajjajjajji, de. Bobijo pojjeama Jjesosaja epeeji nei poaje; ojaya esohui ba neinei majje.

¹⁰ Ecua epeeji cuana, yahuajo nei nei Jodio etiiquianaja Eyacuiñajji nijje emimijji cuaa, ma Eyacuiñajjiya daqui equijo chacochoaninajeya aquiana ehune' dahua majje ijija ca

poa. Jamatii Eyacuiñajjija esohui eyacua ba mee jjima poa. Eyacuiñajjija esohui eyacua bobi jayojja. Ojaya epeeji poanijo, ohuaya eseya oja esohui jayojja jama po mee cani, ma esohui bobi e'ijji jayojja ba meesahua cani.

¹¹ Yahuaño nei Eyacuiñajji nijje emimijji etiiya aquiana na' dojodobiaqui caninaje Eyacuiñajjija equi yasijje, equecuayijji biso nei yasijje. Ojjaña shequiajajo oe dojodobiaquime acaninaje ijjiacajji ehune na'. Dojodobiaqui majje jeasijjjea caninaje Eyacuiñajjija ebajji. Jeasijjjea caninaje Eyacuiñajjija etiiquianaja mimishi ecuijea'yojji sosejje. Ma aquiana etiiquianaja ijji jima poa. Chojja. Dojocuayaqui caninaje cuiñajji esecue yasijje edahua-jea'yojji. ¹² Oya jayojja Jesosa mano'yajo ojaya ena' cuayaquia poa esejaya mimishi cui-jea'yojji sosejje, mimishi'ama nei nei epo mee'yojji. Deja mimishi cuaa oya dojocuayaqui ca poa cuiñajji esecue yasijje equecua'yojji. ¹³ E'e, deja mimishi cuaa oya quea tai aca poa. Jamatii Jesosa jjashahuabaqui jjima jama ba'a: —Chojja, eya acui ecueata'apeejo mano sa po'yo ajja —jama po jjimaya Jesosa. Jama poanaje ba'a: —Eya manojeyo acui ecueata'apeejo mimishi sosequia'yojji —Jesosa poanaje.

Jamajjeya Jesosa jayojja jama epo tiitijji. Jesosa nijje jjapeequianijo, mimishi cuaa eseya quea tai acajje jamatii Jesosa nijje ejjapee tiitiqui. ¹⁴ Eseyaya eba jiquio meshijo eba'e tiitijji pojjeama. Meshi esejaya eba'e tiijji yajji pojjeama. Quijje ca ca eseya ba'e tiitijje'yo eba'ejji eyacuajo Jesosa nijje. Ma eba'ejji eyacuajo eseya jjashahuabaquiani. ¹⁵ Jamajjeya Jesosaja epeeji poanijo ¡Eyacuiñajji ejjabihua tiitiqui! Jama ba'a: —Eyacuiñajji, miya quea pame nee nee. Pea chama' mi jayojja —ejja'a tiitiqui.

Jesosa Eyacuiñajji nijje mimiani ese cuanajo. Jamajjeya eseyaya oya bihuiaña jama ba'a: —Jesosa, miya ecuanaja Emeshi Mese nei quea pame nee —oya bihuiaña.

¹⁶ ¡Pea cuana quea pame nee atiitucue pea'ai! ¡Nishehui'ama pocue, deja tai'ama pocue! ¡A'a pajea'yojji! Jamaya poanijo Eyacuiñajji quea bihui nee poaje miquiana nijje.

¹⁷ ¡Jesosaja epeeji jaahuanajji cuanaja esohui jayojja jama acue! ¡Shajja'ajjacue, miquianaaya! Quijje Eyacuiñajji cojja nei nequia emeshi meseya, mi jaahuanajjija huohui caje achajja miquianaya jaahuana canaje. Jamajjeya miquianaya jaahuana cani quea pame nee, Jesosa nijje ejjapee pajeaqui'yojji pojjeama. Miquiaa shajja'ajjaje ohuaya miya quea bihui nee ba'e meesahua caje'yo. Shajjama' poajo ca ca quea yeno nee poaje. Miquianaya quea yeno nee nee poaje pea'ai.

¹⁸ Epeeji cuana, ¡Eyacuiñajji nijje mimicie ecuanajo! Eyacuiñajjija eba ecuaña quea ja'a nee ba'e sa poani tii tii ojo. Ecuanaya jjabaquiani quea ja'a nee ba'yani ojaya esohui jama. ¹⁹ Jamajjeya ¡ecuanajo mimicie Eyacuiñajji nijje jama ba'a: —Eyacuiñajji, ¡Pabo poe meesahua o'oyacue ecuaña baa! ¡ijjeya nei oe poe meesahuacue! —acue!

Esohui quijjeyejje nei tehue'yo

²⁰ Ecuea epeeji cuana, esejaya Emeshi Mese nei Jesosa oja epeeji cuana jaahuanajji poani, ñajajja jaahuanajji nei nei jayojja oya poani. Mano'yajo, Eyacuiñajjija Jesosa shequi mee ca o'oyanaje. Jamajjeya Jesosa shequi mee'yo majje Eyacuiñajji jama poanaje ba'a: —Ecuea Ebacua Ejja miquianajo mano'yonajejo, ojaya ena' cuayaquinajejo, ijjeya ecuea esohui eyacua jayojja jama atiitucue! Jamajjeya miquianaya ba'e tiitii meeje'yo enijje eyajo —Eyacuiñajji poanaje.

²¹ Miquianajo eya Eyacuiñajji nijje mimiani jama ba'a: —Eyacuiñajji, ¡miquia epeeji cuana ejjaba'echajequi ba'eca cuana quea bei ba'e meesahuacue! ¡Chaco meesahuacue mijo quea pame nee nee! ¡Miquia ejjashahuabaquijji jayojja jama ameesahuacue pea'ai! Miquia Ebacua Ejja Jesosa Quito nijje jjapeequianijo, ¡jamaya ameesahuacue Jesosa quea bihui nee epojji! ¡Oya quea ca'a nee nee quea pame nee caba'e tiitii'yahua! Jamaya Eyacuiñajji —eya poani.

²² Ecuea epeeji cuana, eyaya jiquio esohui tehueña miquiana quea bihui pojji. Eyaya oe pojji esohui tehueña. Jamajjeya ¡ecuea esohui shajja'ajja neineicue quea bihui nee!

²³ Eseyaya epeeji Timoteo ejeanobia jaa poa. Cuayaqui mee ca'yonaje. Quijje pishana oya e que poe'yo majje enije poquije miquiana baa.

²⁴ Jamajjeya epeeji cuana, miquianajaya esohui huohuijji cuana ojjaña Eyacuiñajjija epeeji cuana miquiana nijje ba'e pea'ai ¡ecuanaja esohui huohucue jama ba'a: —¿Achajja acuae nequiana ani so'o? —acue ecuanaja ebajji!

Ojjaña Eyacuiñajjija epeeji cuana Itania meshijje poe miquianajo jjashahuabaquiani: —¿Achajja ami ani so'o? —huohui'ajjame acani ojaya ebajji.

²⁵ ¡Eyacuiñajjija, esejaya Chii aya miquianaya cajaanuana cahua quea pame nee!

Mahuiso ecuea esohui. Eyaya Pabo bajjaniya esohui tehuejyonaje. Apoa.

SATIACOJA ESOHUI ETEHUE'YO SANTIAGO

Satiacohua esohui quea bihui nee tehue canaje Jesosaja epeeji cuana huasijje

¹ Epeeji cuana, eyaya jiquio esohui quea bihui nee tehueaña miquianajaya ebajji, ma ojjaña Jesosaja epeeji cuana ojjaña meshijo ba'eja ebajji. Eya Satiaco bajjani. Eyacuiñajjiya, esejaya Emeshi Mese nei Jesosa Quitohua pea'aiya eya huoojea canaje ojaya esohui huohuiya. Jamajjeya eyaya quea bihui nee chacoaña onijje.

Eyacuiñajjiya Jesosaja epeeji cuana jjabahuejja meequi cani

² Ecuea epeeji cuana, ishajja'ajjacue mo! Miqianajaya eba'ejji quea camaja poanijo, jamatii ja'a quea yeno pojji! Chojja, quea bihui nee pocue jama ba'a: —E'e, Eyacuiñajjiya quea pame nee acani. Ohuaya eya jashahuabaqui mee cani.

³ E'e, miqianajaya eba jama ba'a: Eba'ejji quea camaja poanijo Eyacuiñajjiya eseya jashahuabaqui mee cani Jesosa Quito nijje quea pame nee ejjapeequijji. Jamajjeya miqianaya yeno'ama Jesosa nijje jjapee tiitiquije'yo quea ja'a nee nee. ⁴ Jesosaja epeeji quea ja'a nee po tiitucue! ¡E'e jojo nei pocue! Jamajjeya Jesosajo jashahuaba tiitiquianijo Eyacuiñajjiya miqianaya quea ja'a nee ba'e mee caje mimishi'ama, apoa epo jayojja pea'ai.

⁵ E'e pojja'a miqianajaya ba jjima Eyacuiñajjiyo eba'ejji. Jamajjeya ¡Eyacuiñajji nijje mimicue ojaya ejjashahuabaqui'yojji ebajji! Ojaya miya etecueajji pojjeama. Miya quea jashahuabaqui ja'a po mee caje, o jayojjaya. Joya ecua miyaya huohui'ajjaña jama saja'ameya aje mi acaje'yo quea bihui nee nee ojjaña cuana ojaya quea jea nee neejo. ⁶ Jamatii Eyacuiñajji nijje mimianijo jashahuabaquicue quea pame nee! Jama ba'a: —Jiquio ecua eya onijje mimiani jamaya acaje'yo e'e jojo nei Eyacuiñajjiya.

A'a jashahuaba taiquijji jama ba'a: —E'e pojja'a jiquio ecua eya onijje miminaje jamaya Eyacuiñajjiya e'ajji pojjeama.

¡Bacue! Joya quea jashahuabaqui tai poani enashajo poani jama. Jiquio ecua beniya enashajo dojo cani oe miji yasijje, quijje pea miji yasijje dojo ca o'oyani jamaya oya cuana Jesosajo quea ja'a jashahuabaqui jjima. Peapea jashahuabaquime oya cuana poani. ⁷ Jamaya jashahuabaquianijo quea tai; Eyacuiñajjiya oya cuana shajja'ajja jjima jayojja jama acaje. Jamajjeya jamaya jashahuabaquianijo ja'a jama pojji ba'a: —Eyacuiñajjiya ma e onijje miminaje shajja'ajja cani. Eya ba'e meesahua caje pea'ai —a'a jamaya e'a caje poso jhabaqui! Eyacuiñajjiya eshajja'ajjajji pojjeama miya. ⁸ E'e, Jesosajo quea quehua jashahuabaqui majje quea pame eba'ejji pojjeama tii tii.

Aema' cuana joya ecua quea aquiana huiso jama

⁹ Jesosaja epeeji aema' cuana, dejja etii pojjeama pea'ai quea bihui nee capoahua Eyacuiñajjiya oja mimishi cuana cuijea ca'yonajejo. Oya ba cani epeeji quea aquiana huiso jayojja, oya jayojjaya ba cani. ¹⁰ Jesosaja epeeji quea aquiana huiso quea bihui nee capoahua pea'ai, jamatii ojaya aquiana cuana chama' poajo. Joya quea aquiana huiso shasha jama. Nequi tiitii ajja. Chama'yo tii poaje'yo. ¹¹ E'e, jiquio ecua eshequi jaasohuajo quea quiyo nee nee poajo sipone joca'yani, yaa'yo majje ojaya shasha jjahua'amaqui yani, majoya aje huojojjeani jama jayojjaya joya aquiana huihohuio cuana poani. Aquiana cuana chicha majamaja cani tii oya cuana manoje'yo, chama'yo tii poaje'yo. Jamajjeya ojjaña Jesosaja epeeji cuana quea bihui nee capoahua Eyacuiñajjiya oya ba cani pea cuana jayojjaya. E'e, aema' cuana Eyacuiñajjiya ba cani pea cuana jayojjaya, joya quea aquiana huiso nee jayojjaya. Joya quea aquiana huiso ca ca ohuaya ba cani aema' jayojjaya.

Eba'ejji quea camaja

¹² Jesosaja epeeji quea pame nee eshahuaa iyaa cajje jshajja'ajjaqui ajja poaje; quea mimishi po sa po'yo ajja poaje. Ohuaya Eyacuiñajjiya esohui jayojja jama atiiiti cani. Jamajjeya joya cuana quea bihui nee nee capoahua! E'e, Eyacuiñajjiya huohui ca poa jama ba'a: —Eya ojaya quea jea nee nee poanijo, ecuea epeeji cuana ecuea esohui pajea'yo ajajo eyaya oya cuana ba'e tiitii meeje'yo enijje eyajo.

¹³ Mimishi amajje, quea tai jashahuabaqui majje pea'ai beca cuana siajje poani jama ba'a: —Eyacuiñajjiya eya quea mimishi po mee cani —jama ohua acani posoya jjabaquiani.

Chojja, de. Ma miyame tii ca mi ca quea mimishi. Eyacuiñajjiya ca ca mimishi a'ajja nei nei. Jamajjeya ohuaya eseya quea mimishi epo meeji pojjeama nei nei. ¹⁴ Ojjaña aje oe quea mimishi po sa poanijo quea mimishi poani ojaya ejjashahuabaqui'yojjiyo. Joya ecua oya jashahuabaquiani jama quea mimishi po meeya poani. ¹⁵ Jamajjeya quea mimishi

jjashahuabaqui majje mimishi acaje'yo. Mimishi amajje manoje'yo. Majoya Eyacuiñajjiya mimishi cuana quea nee nee po mee caje'yo tii tii quea mimishi poanaje jojoya.

¹⁶ Ecuea epeeji cuana, ¡shajja'ajjacue mo oe! ¡A'a quea quehua jjashahuabaquiji Eyacuiñajjiyo! Ohuaya ca ca oe eseya quea ja'a nee po meesahua cani. ¹⁷ Ohuaya, eseja Chii aiya yahuajo nei nei ojjaña aquiana eyajo nequi pana ca poa: eshequi, ba'i, majameta cuana pea'ai pana ca poa. Oya cuana quijje quea misi poaje'yo. Eyacuiñajji ca ca oe, chojja. ¡Iquio ecua oya ¡jeya nei nequi jama tii tiya nequi tiiti poquije. Ohuaya eseya quea pame nee nee acani. Jamajjeya ohuaya eseya ojjaña aquiana pame quia cani e'e jojo nei. ¹⁸ E'e, Eyacuiñajjiya ojjaña eseya babaca canaje ojaya epeeji nei epojji. Ohuaya esohui e'e nei huoojea canaje esejaya ebajji. Jamajjeya eseya Jesosa nijje ¡japeeji meesahua cani. Eseya ca ca ojaya quea boti nee nee poani; pea aquiana cuana oja pana ojaya iye hotiboti poani.

¡Eyacuiñajjiya esohui shajja'ajjacue e'e jojo nei!

¹⁹ Ecuea epeeji cuana, ¡shajja'ajjacue mo oe! ¡Ojjaña pojajo Eyacuiñajjiya esohuijjashajja'ajjaquicue! ¡Mimi ¡jimahuajo quea ja'a nee jjashahuabaquicue pea'ai! ¡A'a quea quene pojji; pea cuana nijje a'a quenequene cuajijji! ²⁰ Quea quene poanijo Eyacuiñajjiya ejjashahuabaquiji quea ja'a nee jayojja jama yajji pojjeama. ²¹ Jamajjeya ¡a'a quea quene pojji! ¡Ojjaña ejjashahuabaquiji quea tai epojji, quea mimishi pajea'yocue! ¡A'a pea cuana jama ba'ejji! Eyacuiñajjiya eseya ojaya esohui ba neinei cani. ¡Ojaya esohui shajja'ajjacue; jamaya ba'ecue quea bihui nee! Jamajjeya ohuaya eseya ba'e tiiti mee caje'yo onijje eyajo. ²² Eyacuiñajjiya esohui shajja'ajja majje jamaya po ajjajo miqianaya quea tai jjashahuabaquiani, quea quehua poani. ¡Eyacuiñajjiya esohui shajja'ajja majje ca oe shajja'ajja tiitiicueya!

²³ E'e, beca cuana Eyacuiñajjiya esohui shajja'ajja majje jamatii jjashajja'ajjaqui ajja poani. ¡Iquio ecua se ecojjabajjiyo ¡jacojjabaquiani jama poani: ²⁴ Eseya ecojja ba majje poquiani. Quijje pishana seya ecojja pajeacuaji yaña: —¿Achajja shai ecuea ecojja poanaje? —se poani.

E'e, ecojja ba majje pajeacuaji yaña jama jayojjaya beca cuana poani. Eyacuiñajjiya esohui quea pame nee shajja'ajja cani. Jamatii shajja'ajja majje pajeacuaji ca'yani. Esohui jayojja jama ba'e ajja. ²⁵ Pea cuana ca ca esohui shajja'ajja majje jjashahuaba neinei quiani. Pajeapajea'yo ajja poani. Jamajjeya ojjaña pojajo esohui ba neinei cani; pajeapajea'yo ajjajo ma esohui jayojja jama po tiitiani. Eyacuiñajjiya oya cuana mimishi pajea meesahua ca'yani. Quea ja'a nee nee ba'e meesahua cani, quea bihui nee po mee cani pea'ai joya ojaya esohui jayojja jama ba'yanijo. ²⁶ Beca cuana aje oe jjashahuabaquiani jama ba'a: —Eya Jesosa Quitoja epeeji poani —jama posoya ¡jabaquiani. Jamatii quea mimishi, quea mimijjequiea mimi tiitianiyo oya cuana Jesosa Quitoja epeeji pojjeama. Chojja, epeeji nisho poani.

²⁷ Eyacuiñajji esejaya Chii ai jama poanaje ba'a: —¡Ecuea epeeji e'e nei cuaa e'e jojo nei enijje ¡japeequianiya quea pame nee ca'a cahua! Jama ba'a: ¡Esho'i echii mano'yo catii mee cahua quea pame nee! ¡Epona e'ahuemano quea yeno poani caba'e meesahua cahua quea pame nee pea'ai! ¡Eshahuaja epeeji quea mimishi jayojja jama a'a pojji! —acanaje esejaya Chii aiya.

2

¡Ojjaña cuana quea boti nee acue!

¹ Ecuea epeeji cuana, ¡shajja'ajjacue mo oe! Eseyaya Emeshi Mese nei Jesosa Quito quea pame nee nee poani, quea ca'a nee nee poani pea'ai. Miqianaya onijje ¡japeequianijo, jamaya pocue ba'a: ¡Ojjaña Jesosaja epeeji cuana pea jayojjaya acue! Jamajjeya ¡quea pame jjashahuabaquicue ojjañajo, aquianajjiyo, aquianama' cuanajo pea'ai! ² Jama ba'a: E'e pojja'a Jesosaja epeeji aquianajji Eyacuiñajjiya equi yasijje dobiquiani. Ojaya eme' bajji mei hu'o' quea nahue, ojaya daqui quea nahue ehusho ba'e pea'ai miqianaaya baña. Majoya pea epeeji aema', daqui chiiiji Eyacuiñajjiya equi yasijje dobiquiani. ³ Miqianaya quea mimishi jjashahuabaquiani. Jamajjeya joya quea aquiana huiso nee quea boti aña jama ba'a: —Ma'aje, ¡iquio e'anioqueji quea pame nee. ¡¡iquiojo anioquecuel! —aña.

Aema' nijje ca ca miqianaya jama poani ba'a: —¡Comajo tii ca miña nequicue! ¡Quea huesha anioquecuel pojja'a! —jamaya miquiaa ajje aema' cuana quea bicho poani. Jamaya quea tai.

⁴ Miqianaya peaja aquianajo jjashahuabaquiani; ¡janiñebaquiani jama ba'a: —Joya quea aquiana huiso quea pame poani. Aema' ca ca quea tai, cajaa —jamaya miqianaya quea tai jjashahuabaquiani.

⁵ Ecuea epeeji cuana, ¡shajja'ajjacue mo oe! Eyacuiñajjiya Jesosaja epeeji cuana aema' cuana babaca canaje Jesosaja epeeji nei cuana epojji. Ohuaya huohui canaje jama ba'a: —Ojjaña joya ecuea esohui jayojja jama acani enijje nequi meee eya ojjaña huoojeajji poaje —jamaya Eyacuiñajjiya huohui ca poa ojjaña joya Jesosa quea boti nee aji poani.

⁶ Jamatii miqúianaaya aje oe aema' cuana quea bicho po meeaña. ¿Ache dejja cuaa shai sohuinano huoojea cani mi dojohua emeshi meseja etecueajji? ¿A'a aema' cuaa? Chojja. Bejjojjiya ca mi ca miqúianaya napa mee cani. ⁷ Ohuaya Jesosa Quito niñeba cani pea'ai. E'e, oya Jesosa Quito quea pame nee nee Eyacuiñajjiya huoojea canaje ese jaahuanaa. Jamatii mimishi cuaa oya niñeba cani.

⁸ ¡Miquianaaya Eyacuiñajjiya esohui jayojja jama acue! Yahuajo ohuaya huohui ca poa jama ba'a: —Miya quea bihui nee ba'e sa poani. Jamajjeya ¡pea cuana quea bihui nee ba'e meesahuacue quea pame nee pea'ai! Jamajjeya ¡ojjaña cuana quea boti nee acue!

Jamaya e'e jojo nei añajo miqúianaya quea pame nee poani. ⁹ Jamatii miqúianaaya aje oe dejja quea aquiana huiso nee cuana quea jea aña. Aema' cuana ca ca quea bicho po meeaña. Jamaya quea mimishi, Eyacuiñajjiya esohui jayojja jama pojjeama. Jamajjeya ohuaya miqúianaya tecuea caje'yo ojaya esohui jayojja mi añajo, ma etiúquiana Moisesiya tehue ca poa jayojja jama miya mi ajo. ¹⁰ Moisesiya etehue'yo quea huiso nee poa. Ojaya esohui etehue'yo oe nei ajiimajo miya shajjama' poani, ojjaña ojaya esohui etehue'yo ajiima amajje. ¹¹ E'e, Eyacuiñajjiya Moisesi tehue mee ca poa jama ba'a: “¡A'a pea cojjojji pojji!” Ohuaya tehue mee ca poa jama pea'ai ba'a: “¡A'a pea quecua'yojji!” Jamajjeya joya pea quecua'yojji poani quea tai nee nee poani, jamatii pea cojjojji pojjeama poani. Eyacuiñajjiya esohui etehue'yo pajea ca'yani.

¹² Jamatii Jesosaja esohui jayojja jama añajo ca ca eseya mimishi'ama poani. Ma esohui jayojja jama añajo Eyacuiñajjiya eseya etecueajji pojjeama. Jamajjeya ¡Jesosaja esohui jayojja jama atiitúicue quea pame nee! ¹³ Quijje Eyacuiñajjiya ojjaña cuana sosequia caje'yo ma ecua oya ¡iquio meshije ba'enaje jama sosequia'yomeya acaje'yo. Ojjaña joya pea cuana nijje quea bei poanaje Eyacuiñajji onijje quea bei poaje pea'ai. Joya pea cuana nijje quea bei pojjeama poanaje ca ca Eyacuiñajjiya tecuea caje'yo. Jamatii Eyacuiñajji quea mase pojjeama. Ohuaya ojjaña mimishi cuana pajea mee'yo sa acani, quea nee nee ese po mee sa po'yo ajja.

¡Jesosaja epeeji cuana quea pame caba'e ca'yahua!

¹⁴ Ecuea epeeji cuana, ¡shajja'ajjacue mo oe! Beca cuana jama poani ba'a: —Eya quea pame nee nee, eya Jesosaja esohui jayojja jama poani —poso ¡jabaquiani.

Jamatii oya cuana Jesosaja epeeji pojjeama jayojja jama ba'yani, quea pame pojjeama. Jamajjeya ¿a'a Eyacuiñajjiya ojaya mimishi cuijea caje'yo? ¿A'a onijje ba'e tiitii mee caje'yo eyajo? Chojja de, ¡quea pame ca a cahua pea'ai! Quea pame pojjeama ba'yanijo ca se ca oe emimijeajji eseya mimijeani jama ba'a: —Eya Jesosaja epeeji poani.

¹⁵ Jamajjeya jama ¡jashahuabaquime pocue ba'a: Yani pojja'a Jesosaja epeeji cuana beshahua nei daquima', quea shoe pea'ai pojja'a. ¹⁶ Joya aema' cuana pojja'a miqúianaaya huohuiaña jama ba'a: —¡Quea bihui nee pocue! ¡Huoe'ama, quea jeje pocue! —jamaya pojja'a miqúianaaya oya aña. Jamatii quea dejja taiya ¡jejojo miyaya bobi, daqui pea'ai mi quiaña. Jamaya po ajjajo ehuhuijajji miqúianaaya aema' huohuiaña jama ba'a: —¡Quea bihui, quea jeje pocue; huoe'ama pocue pea'ai!

¹⁷ Oya jayojjaya beca cuana poani: —Eya Jesosaja epeeji poani.

Jamatii Jesosaja esohui jayojja jama mi acanijo oya Jesosaja epeeji nei pojjeama.

¹⁸ Onaya ¡jamimicúiajea nobiajeaquiani jama ba'a: —Eya Jesosaja epeeji. Eyacuiñajjiya esohui ecuea eba.

Pea ca ca jama poani ba'a: —Eyaya Eyacuiñajjiya esohui jayojja jama atiitúiaña.

Eyaya ca ca huohuiaña jama ba'a: —Eyacuiñajjiya esohui jayojja jama a'ajjajo eyaya miqúianaya baña Jesosaja epeeji pojjeama. Quea pame nee nee Eyacuiñajjiya esohui jayojja jama añajo ca ca ojjaña eba eseya Jesosaja epeeji nei poani —jamaya eyaya aña.

¹⁹ Miquianajaya eba Eyacuiñajjiya oe nei yani tii tii. Jamaya quea pame nee, e'e jojo nei poani. Jamaya esahua cuanaja eba pea'ai, ma Eyacuiñajji oe nei yani tii tii. Jamajjeya oya cuana quea mete tii tii poani, Eyacuiñajjiya oya cuana quea nee nee po mee caje'yo.

²⁰ Miquianaya ¡jashahuabaquiani quea quehua jama ba'a: —Eya Jesosaja epeeji poani. Jamatii Jesosaja esohui quea pame jayojja jama a'ajja. Jamaya quea tai ba'yanijo miya Jesosaja epeeji pojjeama. Jamajjeya miqúianajaya ejjashahuabaquijji eyaya ¡iquio esohui tehueña esejaya etiúquiana Amajamajo. ²¹ Yahuajo nei nei esejaya etiúquiana Amajamaa Eyacuiñajjiya esohui jayojja jama aca poa. Jamajjeya Eyacuiñajjiya oja mimishi cuana cuijea ca'ya poa. E'e, Amajamaa ojaya esohui a'a shajja'ajja caje ebajji Eyacuiñajjiya oya huohui ca poa jama ba'a: “Amajama, ¡imiquea ebacua mei e'íya biajje jeyo majje yacuaajecue, eya

quiacue!” Amajamaa Eyacuiñajji shajja'ajja ca poa. Oja bacua ejja oe nei mei biajje jeyo majje Eyacuiñajji yasijje quia ca poa. Beshahua nei yacua ca'ya poa. Jamaya ojaya esohui ma ecua Eyacuiñajjiya huohui canaje jayojjaya Amajamaa aca poajo, Eyacuiñajjiya oya jama aca poa ba'a: “Amajama, miyaya ecuea esohui shajja'ajjañajo ecuea eba miya ecuea epeeji nei. Eyaya miquea mimishi cuana cuijeaje'yo”. Jamaya Eyacuiñajjiya aca poa.

²² ¿A'a miqúanaya jashahuabaquinaje Amajama Eyacuiñajjiya epeeji e'e jojo nei? E'e. Ohuaya huohui ca poa jama ba'a: —Eya Eyacuiñajjiya epeeji —aca poa.

Majoya ohuaya Eyacuiñajji shajja'ajja ca poa; Eyacuiñajjiya esohui jayojja jama aca poa. Jamajjeya oya e'e jojo nei Eyacuiñajjiya epeeji quea pame nee nee poa. ²³ Jamajjeya Eyacuiñajjiya esohui yahuajo nei jama poa ba'a: —Amajamaa huohui ca poa jama ba'a: “Eya Eyacuiñajjiya epeeji” aca poa Amajamaa. Majoya ohuaya Eyacuiñajjiya esohui jayojja jama aca poa pea'ai. Jamajjeya Eyacuiñajji Amajama nijje jama poa ba'a: “Miyaya ecuea epeeji e'e jojo nei. Jamajjeya eyaya miquea mimishi cuana cuijeaje'yo” —jamaya Eyacuiñajji poanaje.

²⁴ Jamajjeya eseya Eyacuiñajji nijje mimianijo, ojaya esohui jama añajo pea'ai, Eyacuiñajjiya esejaya mimishi cuana cuijea ca'yani. Jamaya eyaya miqúanaya ba mee yaña.

²⁵ Oya jayojjaya yahuajo nei nei Shajami poa, Amajama jayojjaya poa. E'e, yahuajo nei nei oe epona Shajami yaña poa. Shajami Jodio pojjeama poa. Oya quea mimishi pea cojojji nei nei poa. Jamatii ohuaya Eyacuiñajjiya epeeji quea pame nee aca poa. Nahue ca poa sohuinano cuaa equecuaca'yo poanijje. Jamajjeya Eyacuiñajjiya oja mimishi cuana cuijea ca'ya poa. E'e, Shajamiya Eyacuiñajjiya epeeji becaniejijji pea'ai quehuajje bobia ca poa, Jodio cuanaja esohui huohuiji cuana. Majoya oya cuana quehuajje poqui meesahua ca poa pea ejlojjijje, onaa equecuca ca poaje jjejojya. E'e, Shajamija ejjashahuabaquiji Eyacuiñajjiyo quea pame nee poa.

²⁶ Jamajjeya esejaya eba jama ba'a: Eseyaya edojjoshahua poqui'yo majje esejaya eyami ihuije'yo, cajaa. Oya jayojjaya ojjaña jaya Eyacuiñajjiya esohui shajja'ajja majje jashajja'ajjaquui ajja poani maya Jesosaja epeeji pojjeama, cajaa pea'ai. Ehuohuijeajjiya huohui cani jama ba'a: —Eya Jesosaja epeeji poani.

3

¹ Ecuea epeeji cuana, ¡shajja'ajjaecue mo oe! Eseyaya quea mimishi poajo, Eyacuiñajjiya tecuea caje'yo. Jamaya miquea eba. Eyacuiñajjiya esohui huohuiji cuana quea mimishi poajo ca ca Eyacuiñajjiya oya cuana tecuea neinei cañaje'yo janobajjima nei. Jamajjeya oe ja'a eseya quea huiso Eyacuiñajjiya esohui huohuiji po sa pojji!

Beca cuanaja chama' esohui jjochijji

² Ojjaña pojjaajo eseya quea mimishi pishana poani. Joya esohui quea mimishi mimi ajja tii tii, mimijjequijjequui'yo ajja poani ca ca ojaya ejjashahuabaquiji quea ja'a nee poani tii. Jamajjeya oya quea pame tii ba'yani. ³ Eseyaya baacui sisi mapichija enaba huasijje huananobiaña ehui jjequijjea poquiajji. Majoya eseyaya mapichi poqui meeaña cua ese poqui sa poaje yasijje. Jamatii baacui enabajo che biso nei ba'yani.

⁴ Oya jayojjaya bishe quea quemoo quea cuejipashi nei poquiani. Jamatii ebishe meseya bishe quijjo aniya bishe dojo cani cua o poqui sa poaje yasijje, quii ca'a cani, jamatii equiica'ajji biso neiya.

⁵ Jiquio ecua bishe quica'ajjiya bishe ai huijea cani jama jamatii che biso neiya jayojja jama esejaya enaba quea biso, jamatii beca cuana quea huiso esohui quea tecue mimiani. Quea miminaa poani bicho'ama.

¡jashahuabaquicue cuaquijo pea'ai! Cuaqui cojjasha sisiya quijjo'yo jjimaa ebio quea jabo dahuajea cani, ebio quea quemoo. ⁶ Ma jayojjaya beca cuanaja e'ana quea mimishi mimimianijo yana cuaqui jayojja jama poani. Jamajjeya jiquio ecua cuaquiya ebio dahua tehuejea cani, acui cuana quea tehue po mee cani jama jayojjaya esohui quea mimishi mimianijo ejjashahuabaquiji quea tai po mee cani. E'e, esho'iquiana quea tai mimiani; tii majje quea tai mimiani pea'ai, quea mimishi. E'e, eshahua cuaa eseya quea tai nee nee mimi mee cani. Jamajjeya Eyacuiñajjiya ojjaña joya quea mimishi mimiani quea nee nee po mee caje'yo. ⁷ ¡Bacue! Eseyaya ojjaña ijjiacajji cuanaja ebacua huoniaña. Ijjiacajji mase cuanaja bacua cuana, cuichoijji bacua cuana huoniaña; shaneija bacua cuanaya huoniaña, nahuoo jai besijji cuana pea'ai. Jjabahuonequi meeaña. ⁸ Jamatii esejaya esohui quea tai, quea tecue ca ca quea mimipanajea epojji chama' esohui jjochijji, ca pea nijje emimijaji pajea'yojji. Jiquio ecua peyoja ese na jama quea nee nee poani jama esohui quea tajjaya pea epeeji cuana quea yeno nee nee po mee cani. ⁹ Eseyaya aje oe Eyacuiñajji, esejaya Chii ai bihuiaña esejaya enabaa. Jamatii majoya eseya pea cuana nijje mimijajiani, ma Eyacuiñajjiya pana ca poa o jayojja epojji nijjeya eseya mimijajiani.

Jamaya quea tai. ¹⁰ E'e, esohui quea bei, quea pame mimi majje quijje pishana esohui quea tecue nee nee, quea mimishi nee mimiani pea'ai. Ecuea epeeji cuana, ja'a oe jamaya pojji! ¹¹ Jjashahuabaquicue! Ena teohuejja cajje ena ihui'ama cuayani, sese'ama. Ena sese ena quea pame tejje teohuejja cajje cuaya ajja. Jiquio ecua ena quea pame cuaya majje ena sese cuaya ajja jayojja jama pojjeama esejaya enaba. Esohui quea pame mimi majje esohui quea mimishi mimiani, ena sese jama cuayani esohui. ¹² Epeeji cuana, miqnea eba jememe acuijo chama' esiyee. Jememejo tii ajja esiyee. Jjono cuanao tii ajja acuijjajja, shihuijjajja pea'ai. Oya jayojja meshi eteohuejjajje ena quea pame cuayani; ena sese cuaya ajja. Jamajjeya esohui quea pame mimi majje ꞵapiojji acuae nequiana esohui quea mimishi mimiani, pea cuana niñebaña pea'ai? Jamaya se quea pame pojjeama nee nee.

Eyacuiñajjiya eseya quea ja'a jjashahuabaqui mee cani

¹³ ꞵA'a miquianaya quea ja'a jjashahuabaquiani? ꞵA'a jjabahuejjaquinaje quea pame nee eba'ejji? Jamajjeya iquea pame nee atiitiicue! iTecue'ama pocue! Quea pame nee añajo pea cuaa ba caje miquianajaya ejjashahuabaquijji quea pame nee poani. ¹⁴ Pea cuanao quea quene nee nee jjashahuabaquianijo, quea nishehui, quea dejja tai nee nee poanijo pea'ai iquea yeno pocue miquianaja mimishijo! iA'a siajje pojji Eyacuiñajji nijje jama ba'a: —Eya quea pame nee ba'yani —a'a jama siajje pomeya pojji! Chojja.

¹⁵ Ojjaña joya quea tecue nee nee, quea nishehui pea'ai poani Eyacuiñajjiya Edojjoshahua Pame jayojja jama jjashahuabaqui ajja. Chojja. Oya cuana eshahuaaja ejjashahuabaquijji jayojja jama poani quea mimijjequijee, quea mimishi. Mimishi cuana Eyacuiñajjiya esohui jayojja jama po ajja tii tii, Eyacuiñajjiya epeeji pojjeama. ¹⁶ Quea tecue po tiitiiianijo, quea nahue po tiitiiianijo pea'ai ojjaña peapea mimishi cuana acani tii tii pea'ai. Quea ja'a ba'e ajja. ¹⁷ Eyacuiñajjiya ejjashahuabaquijji quea pame nee nee. Ojaya ejjashahuabaquijji jayojja jama jjashahuabaquianijo eseya mimishi'ama poaje: Quene'ama. Nishehui'ama, dejja tai'ama. Shajjama' pojjeama. Quea bei poaje. Quea pame nee poaje'yo tii tii pea'ai. iA'a oe nei dejja quea jea ajji; ojjaña cuana oe quea jea acue! jJesosaja epeeji e'e jojo nei pocue pea'ai, epeeji nisho pojjeama! ¹⁸ Jamajjeya iquea bei nee ba'ecue! iPea cuana quea bei ba'e meesahuacue pea'ai! E'e, eseyee nei quea bei poanijo, quea pame nee poanijo pea'ai, pea cuana quea pame nee poaje ese jayojjaya.

4

jJesosaja epeeji pojjeama jayojja jama a'a ba'ejji!

¹ ꞵApiojji acuae quiana esohui quea tai nee nee mimiani so'o Jjesosaja pea epeeji cuana nijje? ꞵApiojji acuae quiana jjamimicuijaje nobiajeaquiani pea'ai? Ecuea eba. Miquianaya quea huiso aquiana jea bañajo quea tecue nee nee poani, quea dejja tai poani pea'ai. ² Miquianaya ca ca oe quea aquiana huiso po sa poani. Jamatii ejjeshejji chamaajo ca ya ca oe mi jjesheaña. Jamajjeya ajeo ejjeshejji pojjeamajo ca ya ca oe pea quecua sa aña e'aquiana mejo'yojji. Onajaya aquiana jea ba majje miquianaya jjamimicuijaje nobiajeaquiani; jjacuiaquiani pea'ai. Jamatii miquianaya Eyacuiñajji nijje mimi ajja jama ba'a: —Eyacuiñajji, iche mo ma aquiana jjeshe meesahuacue! —jamaya Eyacuiñajji nijje mimi jjimajajo ca mi ca mi jjeshe meesahua cani aquiana cuana.

³ Beca cuana aje oe Eyacuiñajji nijje mimiani aquiana sa poanijo. Jamatii ma aquianajo quea nahue nee poanijo ojaya miquianaya ma aquiana equia meeji pojjeama. Aquiana miquea miqueya nei epojjijo quea tai jjashahuabaquiani. Eyacuiñajjiya ejjashahuabaquijji jayojja jama a'ajjajo ojaya miya eshajja'ajjaji pojjeama. ⁴ iBacue! Jiquio ecua ehuanese ojaya yahue boti'ama amajje pea dejja nijje poani jama jayojjaya miquianaya Eyacuiñajji nijje jjapeepajaequiyani mimishi cuana nijje ejjapeequiyojji. Jamajjeya miquianaya Jjesosaja epeeji pojjeama cuana nijje jjapee neineiquianijo miquianaaya Eyacuiñajji boti'ama aña. Quea mimishi ba'e sa poanijo Eyacuiñajji quecua'yojji jayojja poani. ⁵ Eyacuiñajjiya esohui yahuajo nei nei tehue ca poa cuaa jama ba'a:

“Eyacuiñajjiya ojaya Edojjoshahua Pame ojaya epeeji cuana huasijje huoojea ca'yonaje ojaya eyami yasijje dobiqhua. Edojjoshahua Pameya ojaya epeeji cuana nahue tiitii cani mimishi'ama epojji”.

Jamaya yahuajo nee tehue ca poa. ꞵA'a Eyacuiñajjiya ma esohui etehuejajji tehue mee ca poa posoya aña miquiaaya?

⁶ Eyacuiñajjiya eseya jaahuana cani quea ja'a nee. Ohuaya eseya ba'e meesahua cani quea pame nee. E'e, ojaya esohui yahuajo nei tehue mee ca poa jama ba'a:

“Eyacuiñajjiya ojjaña joya mimishijo bicho'ama poani, quea quene poani pea'ai jeabichajea cani. Quea yeno nee nee po mee cani pea'ai. Ojjaña quea bei poani, quene'ama poani pea'ai ohuaya ba'e meesahua cani quea pame nee”.

Jamaya yahuajo nei tehue mee ca poa.

⁷ Jamajjeya oe ¡Eyacuiñajjiya esohui jayojja jama pocue! ¡Edosiquiana nei nijke a'a jjapeequiji! ¡A'a oya shajja'ajjajji! ¡Oya huoojeacue! Jamajjeya miqúanaya Jesosaja epeeji poanijo Edosiquiana miqúanaya huoojeajji pojjeama poani. Chojja, jjaneequishinaqui majje oya poquije quea huesha nee. ⁸ ¡Jesosaja nijke jjapee neineiquicue! Jamajjeya ohuaya miqúanaya jaahuana tiiti caje'yo. ¡Miquea mimishi cuana pajea nei'yocue! ¡Jesosaja epeeji nisho a'a poji! ¡Ojaya epeeji nei nei oe pocue Eyacuiñajjiya esohui etehue'yo jayojja jama! ¡Quea boejea ba'e neinei'yocue! ⁹ ¡Miquea mimishijo quea yeno nee pocue! ¡Pa neineicue! ¡Mimishi cuana quea bihui jayojja a'a soajji! ¡Mimishi cuana amajje a'a quea bei jayojja poji! Chojja. ¹⁰ Quea tai po majje quea bicho nee nee mimicue Eyacuiñajji nijke jama ba'a: —Eyacuiñajji, jeya mimishi pajea meesahua'yocue! E'e, eya ca'a'ama. ¡Jaahuana neineicue mo oe, quea bei enijje pocue!

Jamaya onijje mimianijo Eyacuiñajjiya miqúanaya shajja'ajja caje. Miqúanajaya emimi onijje jayojja jama ohuaya acaje.

¡A'a pea cuana jama maimajji!

¹¹ Ecuea epeeji cuana, miqúanaya Jesosaja epeeji cuana poani. Jamajjeya ¡Jesosaja pea epeeji cuana a'a niñebajji! Jesosaja epeeji cuana, beca cuana pea epeeji niñeba cani jama ba'a: —Oya Jesosaja epeeji quea pame pojjeama —jamaya acani Eyacuiñajjiya esohui jayojja jama a sa po'yo ajjaa jjejojo.

Jamajjeya ohuaya Eyacuiñajjiya esohui niñeba cani jama ba'a: —Eyacuiñajjiya esohui quea pame pojjeama poani.

Ohuaya Eyacuiñajjiya esohui jayojja jama a'ajja boti'ama jojoya. Jamajjeya oya cuana Eyacuiñajjiya esohui niñebajji poani. ¹² ¡Bacue! Eyacuiñajji oe nei ojjaña huoojeajji poani quea pame nee. Oya oe nei quea ja'a nee nee jashahuabaquiani ojaya epeeji cuana. Ohuaya ohuaye nei mimishi cuana cuijea ca'yani. Jamajjeya ohuaya ohuaye nei mimishi cuana quea nee nee po mee caje'yo tii tii. Jamajjeya ¡a'a pea epeeji cuana niñebajji! Miya ca ca Eyacuiñajji jayojja jama pojjeama.

¡Eyacuiñajjiya ejashahuabaquiji jayojja jama acue!

¹³ Beca cuana mimianijo jama ba'a: —Mecahuajje poija'a eya poquije pea cuiñajji yasijje. Jocuama eya nequije oe shequijame. Chacochocho majje ejjesheji quea huiso jjesheje —poani.

¹⁴ ¡Eya shajja'ajjacue! ¿Ae shai poaje mecahuajje? Miqúanajaya eba pojjeama. ¿Ache shono manoj'e'yo eseya? Eseyaya ba jjima. ¡Bacue! Esey huojja jama. Jiquio ecua eshequi jaasohua pishanajo huojja jachamaqui'yani, poquiani jama jayojja miqúanaya jiquio meshijo enequi tiitijji pojjeama; ca'a'ama. ¹⁵ Jamajjeya jama pocue ba'a: —Eyacuiñajjiya ecua ba'e meesahua canijo, ecua ba'e'je quea pame nee. Ohuaya ecua chaco sahua canijo, ecuaaya chacoje ma echacoji.

¹⁶ Jamatii miqúanaya bicho'ama mimiani jama ba'a: —Eya jamatii quea pame chacochochoani. Quea pame ba'yani jamatii.

Chojja. Miqúanaya emimieajji mimieani. Jashahuabaquiani quea quehua nee nee.

¹⁷ Eyacuiñajjiya ojjaña quea pame nee ameesahua sa acani. Ma ba majje jamatii beca cuana quea pame po sa po'yo ajja. Jamaya poani jjejojya quea mimishi nee nee poani.

5

Dejja quea aquiana huiso niñeshe'ajji

¹ Quea dejja tai jjejojo ona dasiaji poani, ¡shajja'ajjacue mo oe! ¡Jeya miqúanaya quea aquiana huiso poani. ¡Jamatii quea yeno nee nee pocue, pa neineicue pea'ai! Quijje aje oe quea yeno nee nee poaje, quea camaja nee poaje'yo. Quea nee nee poaje'yo miqúanaya. ² Miqúanajaya aquiana quea nahue cuana shaashaajeaje quea huiso. Mojojea caje. Miquea daqui quea nahue cuana huifñaje'yo, machichi aiya ijiahuifñajea caje'yo quiteteya pea'ai. ³ Miquea aquiana mei huo'o quea nahue cuana, mei oshe quea nahue cuana, bejjo cuana pea'ai seejeaje'yo. Miquea aquiana cuana esee'yo, ehuiñaje'yo ba majje onaaya miya jama acaje ba'a: —Oya quea dejja tai; oya quea nishehu poanaje. Quea aquiana jeaa jjejojo aquiana quea huiso nee nee nahue tiiti canaje.

Miquea ejjesheji chama'yo tii poaje'yo. Jiquio ecua cuaquijo quiy'o'yo majje eseya quea nee nee poani jama jayojja miquea aquiana cuana chama'yo tii poajo miya quea yeno nee nee poaje'yo. Majoya Eyacuiñajjiya miya tecuea caje quea dejja tai poanaje jojoya, aquiana cuana quea huiso nee chicha majje nahueje poanaje jojoya. ⁴ E'e, echacoji cuana mique que cuana chacochocho'yonaje miquea sosequia'yo jjima. Ma echacoji cuana Eyacuiñajji nijke mimiani mijo; huohui cani, sosema' miya chaco mee canaje jjejojo. Onaaya mique que cuana bobi sosema' chicha ca'yonaje pea'ai. Majoya oya cuana taaani Eyacuiñajji yasijje mimi majje miquea sosequia'yo jjima jjejojo. Eyacuiñajji quea ca'a nee

nee, ojjaña huoojeya'yojji nei nei oya poani. Ohuaya echacojji cuana pa ani shajja'ajja canaje. Jamajjeya ohuaya miya tecuea cani quea dejja taijojo. ⁵ E'e, miyaya aje oe aquiana quea huiso jiquio meshijo chichanaje; miquea yajjijo quea huiso aquiana pame, quea nahue nee pea'ai chichanaje, siinaje pea'ai. Quea aquiana jea nee nee poanaje. Quea bobo huiso nee nee miya poanaje. Jamatii jeje ajja tii tii poanaje. Quea dejja tai poanaje; quea nishehui poanaje epona. Jamajjeya Eyacuiñajjiya miquianaya quea nee nee po mee caje'yo. ⁶ Miyaya aje oe aema' cuana, joya mimishi'ama quea pame nee poani pea'ai tecueanaje. Oya cuana quecuajeana jea pea'ai. Jamatii oya cuana minijje jjasoseaqui'yo ajja, jeabichajea sa po'yo ajja pea'ai. Eyacuiñajjiya ca ca oe miya quea nee nee po mee caje'yo tii tii ona miya mi sosequiajo. Jamaya eyaya miquianaya aña, edejja tai cuana. Mahuiso.

¡Eyacuiñajji nijje mimicue eba'e meesahuajji!

⁷ Jamajjeya ecuea epeeji cuana, ¡Jesosaja epoe o'oyajjijo jja'ishoa'ajjaqui nequicue quea bei! Onaaya miquianaya quea mimishi acanijo, ¡Jamatii Jesosa nijje jjaapee tiitiquicue yeno'ama! Eseyaya shijje quecua majje ishoo'ajjaña shijje tii'yajo eso' yajji. Jiquio ecua seya ena ishoo'ajjaña shijje pohua'yojji jama ¡ishoo'ajjameya acue Jesosaja epoe o'oyajjijo! ⁸ E'e, quijje pishana esejaya Emeshi Mese nei Jesosa poeje o'oya. Jamajjeya oe ¡jjeja quea pame nee onijje jjaapee neinei tiitiquicue e'e jojo nei!

⁹ Ecuea epeeji cuana, ¡a'a Jesosaja pea epeeji cuana niñebajji Eyacuiñajjiya miquianaya etecueajji pojjeama! Poe majje Jesosaa huohui cañaje'yo joya quea pame poanaje; joya quea mimishi poanaje huohui cañaje'yo pea'ai. ¡Jjeyahua nei esejaya Emeshi Mese nei Jesosa chipi nei nequi. ¡Jjeyahua nei pojja'a oya poeje o'oya.

¹⁰ Epeeji cuana, ¡shahuabacue Eyacuiñajjiya esohui huohuijji cuana ma yahuajo nei nei ba'ya poa! Ohuaya esejaya Emeshi Mese neijo huohui ca poa. ¡O jayojjaya jama quea bei pocue! E'e, yahuajo onaaya oya cuana cuia ca poa pea'ai. Jamatii Eyacuiñajji nijje jjaapee tiitiqui nequia poa. ¹¹ E'e, oya cuana napa ca poa cuaa quea huiso. Jamatii Eyacuiñajji nijje jjaapee quijje pajea'yo jjiima poa. Jamajjeya eseya jama poani ba'a: —Oya cuana Eyacuiñajjiya epeeji quea bihui neeya poa, ma etiiquiana cuana.

E'e, ¡niñeba'yocue Eyacuiñajjiya epeeji yahuajo nei nei nequia poa etiiquiana! Jobi bojojea'ajja'ya poa; quea nee nee poa. Jamatii Eyacuiñajji nijje jjaapeepajeaqui'yo jjiima poa. Jamajjeya Eyacuiñajjiya oya quea pame nee aca poa. ¡Jjaaja meequi ca'ya poa. Jamaya miquea eba. Eyacuiñajjiya eseya quea jea nee poanijo quea pame nee nee acani, quea bei pea'ai.

¹² ¡Jiquio ecuea pea esohui ba neineicue, epeeji cuana! ¡A'a oe siajje pojji! ¡A'a oe jama pojji ba'a: —Eyacuiñajjiya eya ba canijo, eyaya e'e nei huohuiana. Ecuea esohui e'e nei pojjeama jojjemo eya Eyacuiñajjiya quea nee po mee ca'yome. Ojjaña eyajo ba'e cuaa eya ba cani, ojjaña meshijo ba'e cuaa eya ba cani pea'ai eyaya e'e nei huohuiana. Ecuea esohui e'e nei pojjeama jojjemo Edosiquiaa eya quea mano po mee ca'yome —a'a jamaya pojji!

Chojja, ¡esohui e'e nei huohuicue jama tii tii! Jamajjeya ¡chaco sa poanijo jama acue ba'a: —E'e, eyaya chaco sa aña —acue! Chacochaco sa po ajjajo ¡huohuicue jama ba'a: —Chojja, eya chacochaco sa po'yo ajja —acue! ¡E'e jojo nei oe huohui poquiacue! ¡E'e jojo nei jayojja mimianijo Eyacuiñajjiya miya tecuea ca'yo chana!

¡Eyacuiñajji nijje mimicue emanojaa oja ehuaquia mee'yojji!

¹³ ¡A'a beca cuana quea yeno nee nee yani? Quea yeno po majje ¡Eyacuiñajji nijje camimiahua! ¡A'a pea cuana quea bihui nee poani? Quea bihui nee po majje ¡Eyacuiñajji cabihuia cahua sohuicuayanijo! ¹⁴ ¡A'a emanojaa yani? ¡Eyacuiñajjiya epeeji etii cuana ca'yaa cahua! Oya cuana poe majje Eyacuiñajji nijje mimije emanojaa huaquia mee'yojji. Jamajjeya emanojaa bahua shicui caje acuijjajja seiya Jesosaja epeeji poanijo. Majoya Eyacuiñajji nijje mimije emanojaa huaquia'yojji, ejaajaqui'yojji pea'ai. ¹⁵ Eyacuiñajji nijje mimianijo cajjashahuabaquiahua jama ba'a: —Ecuana Eyacuiñajji nijje mimianijo emanojaa oja ehuaquia mee'yojji. Ohuaya e'e jojo nei ecua shajja'ajja caje; emanojaa huaquia mee caje'yo —jamaya capoahua.

Jamaya ¡jjashahuabaquianijo, Eyacuiñajjiya eseya onijje mimiajo shajja'ajja caje; jamaya acaje'yo e'e jojo nei. Emanojaa quea mano poani oja mimishijo, Eyacuiñajjiya oja mimishi cuana cujea caje'yo pea'ai. ¹⁶ Jamajjeya mimishi amajje ¡quea yeno nee mimicue pea cuana nijje! ¡Miquea mimishi huohuicue! Jamajjeya Jesosaja pea epeeji cuaa miquiana mimishi apajea meesahua caje'yo. Majoya ¡mimicue Eyacuiñajji nijje pea cuanajo! Eyacuiñajjiya miquianaya huaquia mee caje'yo. E'e, Jesosaja epeeji mimishi'ama Eyacuiñajji nijje mimi neineiyo Eyacuiñajjiya oya shajja'ajja caje; jamaya acaje ojo.

¹⁷ Yahuajo nei nei esejaya etiiquiana Enia bajjani ba'ya poa. Oya ese jayojjaya poa. Jamatii oya miminequia poa Eyacuiñajji nijje ena chama' epo mee'yojji. Jamajjeya ena chama' poa beshahua nei ebica pea pea'ai shequajame. ¹⁸ Meshi quea jabo nee nee

poajo, Enia Eyacuiñajji nijje mimi o'oya poa ena epo'yoyji. Eyacuiñajjiya Enia onijje mimiajo shajja'ajja ca poa; ena quea quemo po mee ca'ya poa. Eso' cuana equesua ani pohua mee ca'ya poa.

¹⁹ Ecuea epeeji cuana, ¡bacue! Jesusaja epeejiya Eyacuiñajjiya esohui etehue'yo jayojja jama ba'e pajea'yajo, ¡oya quea pame nee ba'e meesahua o'oyacue miqianaaya! Jamajjeya Eyacuiñajjiya esohui jayojja jama acaje o'oya ohuaya. ²⁰ Jamajjeya Jesosa nijje jjapeequi meesahua o'oyañajo, oya cuana cuaqui yasijje epoqui'yoyji pojjeama. Eyacuiñajjiya ojaya mimishi quea huiso cuana cuijea caje'yo.

Mahuiso ecuea esohui. Eyaya, Satiacohua esohui tehuenaje. Apoa.

PENOJA ETEHUE'YO EBIONEI 1 PEDRO

Penohua tehue canaje Jesosaja epeeji yasijje ejjaba'echejjequi ba'eca huasijje

¹ Eya Peno bajjani. Jesosa Quitohua eya huoojea canaje ojaya esohui huohuiya. Eyaya jiquio esohui tehueña miquiana huasijje, ma Jesosaja epeeji nei cuana huasijje. Miquianaya yahuajo ba'enaje Jodio meshijo. Jesosaja epeeji poanijo onaaya miquianaya napa canaje. Jamajjeya miquianaya poquinaje quea huiso cuiñajji cuana huasijje, pea meshi cuana huasijje. Ma meshi cuana bajjani yasijje ba'a: Ponito meshi yasijje, Janata meshi yasijje, Capanosia meshi yasijje, Asia meshi yasijje, Bitinia meshi yasijje pea'ai poquinaje miquianaya. ² Yahuajo nei Eyacuiñajjiya, esejaya Chii eyajo aniya miquianaya babaca canaje ojaya epeeji nei epojji. E'e, yahuajo nei oya miquianajo jjashahuabaquinaje jama ba'a: —Miquianaya ecuea epeeji cuana poaje quijje. Edojjoshahua Pameya miquianaya quea pame nee ba'e meesahua caje ecuea esohui jayojja. Jamajjeya miquianaya Jesosa Quitoja esohui shajja'ajjajji poaje. Jesosa Quito manoj'e'yo miquiana quea bojea epo mee'yoyji —jamaya Eyacuiñajji jjashahuabaquia poa esejo.

¡Eyacuiñajjiya miquianaya caba'e mee cahua quea pame nee nee! ¡Ohuaya miquianaya quea bei capo mee cahua pea'ai!

Jesosa Quito jjeja eshe anijo ecuana quea bihui nee nee poani

³ ¡Eseyaya Eyacuiñajji ejjabihua tiitiiqui! Oya Jesosa Quitoja Chii. Oya esejaya mimishi cuanajo jjashahuabaqui tiitii ajja. Eseyaya quea jea nee poanijo, Jesosa Quito manoy'ajo, Eyacuiñajjiya oya shequi mee ca o'oyanaje. Jesosa Quito eshe o'oya poanijo, eseya Jesosa jayojjaya ba'e tiitii mee caje'yo Eyacuiñajjiya. Jamajje jjashahuabaquiani quea bihui nee Jesosa nijje eba'e tiitii'yoyji. ⁴ Aquiana jiquiojo quea pame pishana, ani tiitii'yoyji; ihui'yo majje chama'yo tii poaje'yo. Quijje ca ca Eyacuiñajjiya eseya ba'e tiitii mee caje'yo quea pame nee eyajo. Jamaya ohuaya huohui canaje. Ohuaya eseya pajea'yo jjima acaje. ⁵ Miquianaya jjashahuabaquiani jama ba'a: —Eyacuiñajjiya ojaya esohui etehue'yo jayojja jama acaje'yo.

Jamaya jjashahuabaquianijo, Eyacuiñajjiya miquianaya jaahuana caje. Oya quea ca'a nee nee. Jamajjeya Jesosa Quito poe o'oyajo, Eyacuiñajjiya miquianajo huohui caje jama ba'a: —Miquianaya Jesosaja epeeji cuana poanijo ba'e tiitii mee'e'yo enijje eyajo.

⁶ Jamajjeya ¡quea bihui nee po tiitii'cue Eyacuiñajjiya miquianaya ba'e tiitii mee caje'yo jjejojo! E'e pojja'a oe pojji cahui cuanajo quea nee poaje onaaya miquianaya napa cani Jesosa nijje jjapeequianijo. Jamatii. ⁷ Quea nee poani Jesosaja epeeji poanijo, Eyacuiñajjiya ba caje miquianaya ojaya epeeji nei nei. Jama poani ba'a: Mei huo'o topo majje cuaquijo dahua cani cuaa mei shaa chama'yo epojji. Jamatii mei huo'o quea pame pishana; see'yo majje quea pame pojjeama poaje. Miquianaya ca ca Eyacuiñajjiya quea boti nee nee. Jiquio ecua mei huo'o cuaquijo dahua cani cuaa mei shaa chama'yo epojji jayojja jama onaa miquiana napa caje Eyacuiñajjiya miquianajaya ejjashahuabaquijji tai chama'yo po mee caje'yo. Jesosaja epeeji e'e nei quea pame nee po mee caje'yo. Jamajjeya ojjaña Eyacuiñajji bihua caje jama ba'a: —E'e, Jesosa Quitoja epeeji cuana quea pame nee. Jamajjeya ¡Eyacuiñajji ejjabihuaqui, oya ba'e tiitiani quea ca'a nee nee jjejojo!

⁸ Jesosa Quito miquianajaya eba pojjeama ecojjaja. Jamatii oya miquianajaya quea boti nee nee. E'e, ojaya miquianajaya ba jjima eyami. Jamatii ojaya esohui jayojja jama poani. Jamajjeya miquianaya quea bihui nee nee poani. Pea cuanaja ba jjima Jesosaja epeeji quea bihui nee nee poani. ⁹ E'e, Jesosa nijje jjapeequi'yanijo, ohuaya miquianajaya mimishi cuana cuijea ca'yonaje; ba'e tiitii mee caje'yo pea'ai, ohuaya.

¹⁰ E'e, jjeja nei ohuaya miquianaya ba'e meesahua cani. Cuanaya ba'e tiitii mee caje'yo. Jamaya Eyacuiñajjiya esohui huohuiji yahuajo nei ba sa poa; jjashahuaba neinei'quia poa pea'ai. Ohuaya yahuajo nei huohui ca poa jama ba'a: —Eyacuiñajjiya quijje dejja cuana ba'e tiitii mee caje'yo onijje eyajo —jamaya yahuajo nei ca poa.

¹¹ Edojjoshahua Pameya yahuajo nei ma esohui huohuiji cuana jjashahuabaqui mee ca poa jama ba'a: —Quijje Eyacuiñajjiya huoojea'yo ojjaña jaahuanajji poeje. Oya quea ca'a nee nee poaje. Jamatii quea nee nee poaje'yo. Quea nee po majje ojjaña quea pame nee ba'e tiitii mee caje'yo eyajo onijje —jamaya Edojjoshahua Pameya oya cuana jjashahuaba meequi ca poa.

Jamajjeya oya cuana jama poa pea'ai ba'a: —¿Ache shono shai oya Eyacuiñajjiya huoojea'yo ojjaña jaahuanajji poeje so'lo? ¿Achajja shai ohuaya poe majje acaje'yo? —jamaya poa cuana.

¹² Eyacuiñajjiya ma esohui huohuijji cuana jashahuaba meequi ca poa jama pea'ai ba'a: —Miquianajaya esohui cuanaajo ojjaña cuana quijje nei quea bihui nee poaje. Jamatii jjeya miqianajaya maya ba jjima —jamaya yahuajo nei nei poa.

Jjeya Eyacuiñajjiya Edojjoshahua Pame huoojea canaje esohui huohuijji cuana huasijje Jesosa Quitojo huohui meesahuaa miqiana huasijje. Oya cuanaa esohui huohuijji esohui, ma yahuajo ba'ya poaja jayojja jama huohui cani. Ma esohui quea pame nee Jesosa Quitojo Eyacuiñajjiya esohuidojojji cuana eyajo nequi ba sa poani pea'ai.

¡Eyacuiñajjiya esohui jama ba'ecue!

¹³ Jamajjeya ijjeya ejjashahuabaquijji quea ja'a jama acue! ¡A'a quea quehua jashahuabaquijji! Poe o'oya majje Jesosa Quitohua miqianaya ba'e tiitii mee caje'yo eyajo onijje. ¡Jamaya jashahuaba neineiquicue! ¹⁴ ¡Eyacuiñajjiya esohui cuana jayojja jama atitiicue! Jesosa Quito ba jjimahuajo miqianaya quea mimishi poanaje. ¡Jjeya miqianaya ejjashahuabaquijji quea mimishi yahuajo jama a'a pojji! ¹⁵ ¡Jjeya ca oe quea pame nee pocue! Eyacuiñajjiya miqianaya iyaa canaje onijje ejjapeequi'yojji. Oya quea pame nee nee. ¡Joya ecua ohuaya quea pame nee acani jamaya oe acue! ¹⁶ E'e, Eyacuiñajjiya esohui etehue'yo yahuajo nei jama poa ba'a:

“Eya quea pame nee nee poani; ¡e jayojjaya jama quea pame nee nee, quea boejea pea'ai oe pocue!”

Jamaya tehue ca poa yahuajo nei.

¹⁷ Eyacuiñajji nijje mimianijo miqianaya jama poani ba'a: —Eyacuiñajji, miya ecuanaja Chii ai —poani.

¡Bacue oe! Eyacuiñajji oe dejjaja eba'ejjijo jashahuabaquiani, oya jayojjaya jashahuabaquiani pea cuanaja eba'ejjijo. E'e, ojjaña shajjama' cuana ohuaya huohui caje jama ba'a: —Miqianaya ca mi ca oe quea mimishi nee nee poanijo quea nee nee poaje'yo tii —acaje.

Quea pame poanijo ca ca eseya jama huohui caje'yo ba'a: —Jamaya quea pame nee, enijje ba'e tiitii'yo eyajo —Eyacuiñajji poaje.

Jiquio meshijo eseya ba'e tiitii ajja. Jamajjeya jiquio meshijo ba'yanijo ¡ojjaña pojjaajo Eyacuiñajjiya esohui jayojja jama acue! ¡Oya shajja'ajjacue! ¹⁸ Yahuajo miqianaya ba'e'yonaje etiquiana cuanaja ehuhui jayojja jama quea mimishi. Oya cuana Moisesija esohui etehue'yo jayojja jama ba'e nishonaje. ¿A'a bejjo sosejje mimishi cuana cuijea mee ca'yojji? Chojja. Ejjeshejji, esodojjo quea nahue, mei quea nahue pea'ai quijje pishana sosema' poaje. ¹⁹ ¡Bacue oe! Jesosa Quitohua miqianajaya mimishi cuana cuijea'yojji sosejje sosequia ca'yonaje. E'e, jiquio ecua ñajajja esho'i quea pame, tai'ama quecua ca'yaninaje cuaa jayojja jama Jesosa Quito quea pame nee, mimishi'ama quecua ca'yonaje cuaa esejaya mimishi cuijea'yojji. Oja ena' cuayaquinajejo, Eyacuiñajjiya esejaya mimishi cuana cuijea caje'yo. ²⁰ Yahuajo nei nei meshi pana jjimahuajo Eyacuiñajji jashahuabaquinaje quijje nei Jesosa Quito huoojeaje mimishi cuanaajo mano'yohua. E'e, Eyacuiñajjiya Jesosa babaca canaje ese jaahuanajji. Jjeya epojja cuana beshahua nei oe poanajejo Jesosa Quito poeyanaje esejaya mimishi cuijea'yohua, quea boejea ba'e mee'yohua pea'ai. ²¹ Miqianaya quea boejea acanajejo, jaahuana canajejo pea'ai Eyacuiñajji miqianajaya eba poaje. Cuanaya Eyacuiñajjiya Jesosa Quito shequi mee ca o'oyanaje. Ojjaña huoojea'yojji quea ca'a nee nee po mee ca'yonaje pea'ai. Jamajjeya jjeya miqianaya Eyacuiñajjiya esohui jayojja jama poani. Ohuaya miqianaya jashahuabaquii mee cani jama ba'a: —E'e, Eyacuiñajjiya ecuana ba'e tiitii mee caje'yo onijje eyajo.

²² Jjeya miqianaaya Eyacuiñajjiya esohui jayojja jama añajo, mimishi cuana apajea mee ca'yonaje, Eyacuiñajjiya. Edojjoshahua Pameya miqianaya Jesosaja epeejji cuana quea jea nee ameesahua canaje. Jamajjeya ¡ojjaña Jesosaja epeejji cuana quea jea nee atitiicue! ²³ Jesosa Quito miqianajaya mimishi cuanaajo mano'yonajejo, Eyacuiñajjiya miqianaya pea ejjashahuabaquijji'yo ba'e mee ca'yani. E'e, miqianaya quea pame nee ba'e tiitiani pea ejjashahuabaquijji'yo, dejjaja bacua jayojja jama pojjeama. Oya cuana ca'a'ama, oe pojji shequijame ba'yani. Eba'ejji eyajo ca ca eba'e tiitii'yojji, oe po ajja. ²⁴ ¡Bacue oe! Eyacuiñajjiya esohui etehue'yo yahuajo nei nei jama poa ba'a:

“Ojjaña deja cuana sipone jama, ca'a'ama. Oe pojji cahuijo sipone shasha cuana quea pame. Jjeya nei joca'yo majje chama'yo tii poaje'yo.

²⁵ Eseyaya Emeshi Mese neija esohui cuana ca ca quea pame yani tiitii'yo”.

Yahuajo nei jamaya poa.

E'e, ma esohui quea pame nee Jesosaja esohui huohuijji cuaa miqiana huasijje huohui canaje, Jesosaja esohui.

2

¡Jesosa Quito nijje quea pame nee ba'ecue miqúanaya!

¹ ¡Jjeyahua nei ojjaña mimishi cuana pajea neinei'yocue! ¡Onaja aquiana a'a jea bajji! ¡A'a jjadasiaguíjji pojji, siipojji pea'ai a'a pojji! ¡Siajjepojji a'a pojji! ¡A'a pea cuana nijje mimijajijji! ¡A'a epeejji nisho pojji! ² ¡Eyacuíñajijja esohui ba neineicue! ¡Jiquio ecua ebacua esho'ia tojjo quea boti nee, ojjaña pojajajo tojjo ishi neinei cani jayojja jama Eyacuíñajijja esohuijjo pocue miqúanaya! ¡Ojjaña pojajajo esohui ba neineicue! ¡Ba majje Jesosa Quitoja epeejji quea ja'a nee pocue! ³ Eyacuíñajijja esohui yahuajo nei jama poa ba'a: “Quito nijje jjapeequí majje miqúanaya oya banaje quea pame nee nee poani”.

⁴ ¡Jjapeequicue Jesosa Quito nijje! Oya quea pame nee nee, quea ca'a nee nee pea'ai. Beca cuana onijje jjapeequí sa po ajja poa. Oya cuana jama poanaje ba'a: —Jesosa Quito cajaa. Ecuana onijje jjapeequí sa po ajja.

Eyacuíñajji ca ca Jesosa Quito quea jea nee neejo jama mimime poanaje ba'a: —Oya quea pame nee acui ca'a quea ja'a nee jama, equi yamajjana quea ca'a jama. Ecuca oya quea jea nee nee.

⁵ Equijo acui ca'a eyamajjana cuana nequia cani cuaa. Oya jayojjaya ojjaña Jesosaja epeejji cuana Eyacuíñajijja equi jayojja. ¡Equi yamajjana quea pame nee jayojja jama pocue! ¡Quea ca'a nee nequicue Jesosa Quitojo! Jamajjeya ¡Eyacuíñajji nijje emimijji cuana pea'ai pocue, miqúanaya! ¡Jiquio ecua Jodioja Eyacuíñajji nijje emimijji cuaa chaco ca poa Eyacuíñajji bihuiajji jamaya oe acue! ¡Eyacuíñajijjo chacocue quea pame nee! ¡Jamaya oe acue Jesosa Quito miqúanajaya mimishi cuanajo mano'yonajejo! ⁶ Jamaya Eyacuíñajijja esohui Jesosa Quitojo etehue'yo yahuajo poa ba'a:

“¡Bacue oe! Eyaya oya babacaje enequi tiitii mee'yojji ecuea cuiñajji Sioni bajjanajo. Oya acui ca'a equi yamajjana quea pame nee, quea ca'a nee pea'ai jayojja jama. Ojjaña jaya jjeja nei onijje jjapeequíani quijje yeno'ama poaje”.

Jamaya yahuajo nei poa.

⁷ E'e, jjeja ojjaña Jesosaja epeejji poanija oya quea jea nee. E'e, Jesosa quea pame nee nee ma equi yamajjana quea ca'a jayojja. Pea cuanaja Jesosa boti'ama, ma equi yamajjana quea ca'a jayojja boti'ama. Jamaya Eyacuíñajijja esohui etehue'yo yahuajo nei Jesosa Quitojo poa ba'a:

“Ma equi yamajjana jayojja equi iyajji cuaa cajaa aca poa. Jamatii Eyacuíñajijya ma equi yamajjana oe nei quea pame nequi tiitii mee cani, equi jaabicha ajja epojji”.

⁸ Jamaya cuanaya pea esohui Jesosa Quitojo etehue'yo poa ba'a:

“Quea huiso cuaa oya ma equi yamajjana jayojja cajaa acaje'yo. E'e, jiquio ecua acuihuojjajo ejtojijje jjaquecuate'aqui majje jaabichajeaquiani jayojja jama poaje ojjaña jaya o cajaa ajji poaje'yo”.

Jamaya poa yahuajo. Onaaya Eyacuíñajijja esohui Jesosa Quitoja cajaa acani shajja'ajja sa po ajjaa jjejojo. Yahuajo nei Eyacuíñajijja eba poa jama ba'a: “Oya cuana ecuea esohui shajja'ajja sa po ajja poaje. Jamaya capo'yahua” poa.

⁹ Miqúanaya ca ca Eyacuíñajijja ebacua ojaya epeejji cuana epojji, onijje emimijji ojjaña cuanajo. Eyacuíñajijja epeejji cuana quea pame nee poanaje miqúanaya. E'e, Eyacuíñajji ojjaña emeshi mese cuana huoojeajji poani. Miqúanaya babaca ca poa ma ohua huohui ca poa ehuhuijji. Jamajjeya miqúanaya huohuiaña jama ba'a: —Eyacuíñajijya eseya babaca canaje. Mimishi cuana cuijea ca'yajje eseya ba'e mee cani quea ja'a nee nee, de.

E'e, yahuajo miqúanaya ba'ya poa quea mimishi. Jjeja ca chojja. ¹⁰ Yahuajo Eyacuíñajijja epeejji pojjeama poa. Jjeja ca ca miqúanaya ojaya epeejji cuana poanaje. Yahuajo mi jaahuanajji chama' poa Eyacuíñajji miqúanajaya boti'amajojjo. Jjeja ca ca Eyacuíñajijya miqúanaya jaahuana cani quea pame nee. Onijje jjapeequíanijo, miqúanajaya Emeshi Mese nei oya poani.

Eyacuíñajijja echacojji poanijo miqúanaya jama ba'ecue ba'a:

¹¹ Ecuca epeejji cuana, ¡shajja'ajjacue mo! Miqúanaya ca ca pea, ojjaña quea mimishi ojjaña meshi cuanajo ba'e jayojja jama pojjeama. Miqúanajaya meshi eyajo yani. Jiquio meshijo ani tiitii ajja. Jamajjeya ¡a'a quea mimishi ba'ejji! Mimishi cuana amajje miqúanaya quea tai nequi tiitii'yo chana'. ¹² Jesosaja epeejji pojjeamaa miqúanajaya eba'e pame ba neinei cani. Jamajjeya ¡quea pame nee atitiicue! Oya cuana miqúanajo siajje poani jama ba'a: —Jesosaja epeejji cuana quea mimishi.

Jamatii miqúanajaya eba'ejji quea pame nee ba majje ma dejja cuana huohui caje Jesosa Quito poe o'yajo jama ba'a: —Eyacuíñajijya ojaya epeejji cuana quea pame ameesahua ca'yonaje —poaje ojjaña.

¡Miqúanaja emeshi meseja esohui shajja'ajjacue!

¹³ Epeeji cuana, ¡miquianaaya Jesosaja epeeji poanijo emeshi mese cuaa huohui cani jayojja jama acue! Jamajjeya miqiuana ba majje Jesosa Quito niñeba ajja poaje. E'e, pea cuanaja emeshi mese ehoojeajji pojjeama. Jamajjeya jaya shajja'ajjacue! ¹⁴ Emeshi meseya ojaya echacojji cuana huoojea cani ojjaña jaahuanaa. Jamajjeya oya cuana poeyani mimishi cuana napaa. Ojjaña quea pame poani nijje ca ca quea bhui nee poani. ¹⁵ Miqiuianaaya quea pame nee añajoya, shajjama' cuana esohui e'e nei pojjeama huohui pajea caje'yo. Jamaya Eyacuiñajji sa poani.

¹⁶ Yahuaajo miqiuianaaya mimishi cuana a'yonaje, eme jeyo'yo jayojja jama poanaje. Jjeya ca ca Jesosa Quitohua ejeyo'yo jaa pichojea ca'yani jayojja jama amee cani. Jamatii, ja'a jama pojji ba'a: —Jesosaa eya epichojea'yo jayojja jama po mee ca'yani. Jamajjeya jeyaya jamatii mimishi ca'a majamaja'yahua! —a'a jamaya pojji! ¡Eyacuiñajji echacojji quea pame cuana pocue! ¹⁷ ¡Pea cuanajo a'a maimaijji! ¡Ojjaña Jesosaja epeeji cuana quea boti nee acue! ¡Eyacuiñajji esohui jama acue quea bhui nee! ¡Miquea emeshi meseya huohui canijo shajja'ajjacue pea'ai!

Jesosaa Quito quea nee nee poanaje jamatii oja Chiiya esohui jayojja jama poanaje ¡Jesosaa jayojja jama pocue!

¹⁸ ¡Bacue! ¡Mique emeshi meseja esohui shajja'ajjacue quea bhui nee! ¡Miquianajaya emeshi mese quea pameja esohui jayojja jama pocue! ¡Miquianajaya emeshi mese quea tecueja esohui jayojja jama acue pea'ai! ¹⁹ Miqiuianaaya quea pame chacoajo, e'e pojja'a echacomeejji quea tecue miqiuana nijje poani. Jamatii ¡Eyacuiñajji esohui ba majje quea bei pocue! Jamaya quea pame. ²⁰ Quea pame nee chacochoajo, miqiuianajaya emeshi meseya miqiuianaya quea yeno po mee caje'yo pojja'a. Jamatii Eyacuiñajji miqiuianajo huohui caje jama ba'a: —Miquianaya ecuea epeeji cuana quea pame.

Quea tai miquiaa chacome ajo ca ta miqiuianajaya emeshi meseya napa caje. Jamatii ¡catercua cahua quea tai miquiaa chaconajejo!

²¹ Jesosa Quito esejaya mimishijo quea nee nee poanaje. Jamajjeya Eyacuiñajji eseya huohui cani jama ba'a: —¡Jesosaa Quito jayojja jama pocue! Oya quenequene cuaji ajja poa. Quea bei nee. ¡Jamaya pocue miqiuianaya!

²² Yahuaajo nei esohui huohuijji esohui tehue ca poa Jesosajo jama ba'a: “Oya mimishi'ama. Oya sijjepoji pojjeama pea'ai”. ²³ Pea cuana Jesosa Quito nijje mimijajajo, onijje mimijaji ajja Jesosa poa. Onaaya Jesosa Quito napa canaje. Jamatii oya tecueajea jjima. Chojja: —Ecue Chii, oya cuana ca ca enijje quea mase poanijo, ¡cajaa a'yocue! —jamaya ajjima Jesosaja.

Jama ca ca oe poanaje ba'a: —Ecue Chii, miya quea pame nee. Dejja cuana quea mimishi poani ba majje oya cuana quea nee nee po meeje'yo quijje, miyaya —Jesosaa poanaje.

²⁴ ¡Jamaya capo'yahua! Jesosa Quito eseya mimishi cuanajo mano'yonaje acui ecueata'apeejo. Oya quea nee nee poanaje eseya mimishi cuijea'yojji. Jamajjeya eseya mimishi pajea mee ca'yani. Cuanaya ojo eseya Eyacuiñajji esohui jayojja jama po titii mee caje'yo quea pame nee. Jesosa Quito cuiasejjajea canaje cuaa ejee ejeapashajjajaa. Quecua ca'yonaje. Ma ecuiasejjajo, equecua'yojo pea'ai eseya quea boejea po mee canaje Jesosaa. ²⁵ Yahuaajo miqiuianaya ñajjajja oe nei ecuaquisho'yo jayojja jama poanaje. Jjeya Jesosa Quito ñajjajja cuiñajji jayojja jamaa miqiuianaya sa'ajja'yo majje ¡jeshe ca'yonaje ejaahuanaaji.

3

¡Yahue, ehuanase cuana pea'ai, ba'ecue quea pame!

¹ Eyaya epona cuana jama añba ba'a: ¡Quea pame nee ba'ecue! Ehuanase cuana, ¡miquianaaya yahue cuana shajja'ajjacue! E'e pojja'a miquea yahue Jesosaja epeeji pojjeama. ¡Jamatii ohua huohui cani jayojja jama acue! Jamajjeya miya quea pame ba'yani ba majje miquea yahue Jesosaja epeeji poaje'yo jamatii, Jesosajo huohui majamaja jjima. ² E'e, miya quea pame poanijo, miyaya oya shajja'ajjañajo pea'ai, yahue Jesosaja epeeji poaje pojja'a. ³ A'a ¡jashahuabaquijji jama ba'a: —Eya aquiana quea pame huosh'o'yo majje quea pame poaje. Eyijji quea pame yijje. Daqui quea nahue huoshoje. Ecuea sao ao ijjiaca'a meeje quea pame. Jamajjeya eya quea pame nee poaje.

⁴ Chojja. Quea ja'a nee ¡jashahuabaquianajo, mimishi'ama poani pea'aajo miqiuianaya quea pame nee poaje. Jamaya Eyacuiñajji quea boti nee nee. Jamajjeya ¡quea bei, tecue'ama, quea pame nee pea'ai pocue! ⁵ E'e, yahuaajo nei epona cuana Eyacuiñajji epeeji poanijo ojaya esohui jayojja jama poa. Yahueja esohui shajja'ajja ca poa pea'ai. Jamajjeya ma epona cuana yahueja quea boti nee nee poa. ⁶ Yahuaajo nei epona Sanaa bajjani quea pame nee poa. Ojahueya Amajamaa huohui cani jayojjaya jama aca poa, Sanaa. Ojahue nijje jama poa ba'a: —Miya ecueahue, e huoojeajji.

Epona cuana, miqúanaya quea pame nee po sa poanijo Sana jayojja jama pocue quea pame nee! ¡Jesosa nijje jjapeequicue mete'ama nei pea'ai!

⁷ Yahue cuana, ¡shajja'ajjacue mo pea'ai! Epona cuana ca'a'ama pishanajo, ¡ehuanase cuana jaahuanacue quea pame nee! Eyacuiñajjiya yahue cuana, ehuanase cuana pea'ai ba'e tiitii mee caje'yo eyajo. Jamajjeya ¡ehuanase cuana quea boti nee acue! Jamaya poanijo, Eyacuiñajjiya shajja'ajja caje miqúiana onijje mimianijo.

Pea cuaa Jesosaja epeeji napa caje poija'a

⁸ ¡Jjeya pea esohui shajja'ajjacue! ¡Ojjaña miqúanaya Eyacuiñajjiya esohui jayojja jama pea nijje jjapeequicue! ¡Ojjaña Jesosaja epeeji cuana quea jea nee acue! ¡Huapa pojjeama jayojja acue! ¡Quea bei pocue ojjaña cuana nijje; tecue'ama pocue! ⁹ ¡Pea cuana miqúiana nijje quea mase poanijo, a'a onijje quea mase po pea'aijji! ¡Minijje mimijajianijo, a'a ona nijje mimijajijji Chojja. ¡Quea pame nee pocue! Jamaya Eyacuiñajjiya miqúanaya huoojea canaje. Miqúanaya iyaa canaje quea bihui nee epojji. Jamajjeya ¡pea cuana nijje quea pame nee pocue! ¹⁰ Eyacuiñajjiya esohui etehue'yo yahuajo nei jama poa ba'a:

“Quea pame ba'e sa poanijo, quea bihui nee ba'e sa poanijo pea'ai ¡esohui quea mimishi epojji a'a huohuijji! ¡A'a sijaje pojji!

¹¹ ¡Mimishi pajea'yo majje quea pame nee oe atitiicue! ¡Pea cuana nijje quea bei po tii tiicue pea'ai! ¹² Eyacuiñajjiya esohui cuana jayojja jama quea pame añajo, ohuaya miqúanaya jaahuana cani quea pame nee. Cuanaya ohuaya miqúanaya shajja'ajja caje'yo onijje mimianijo. Ojjaña quea mimishi poani ca ca Eyacuiñajjiya tecuea caje'yo”.

Jamaya yahuajo nei tehue mee ca poa Eyacuiñajjiya.

¹³ ¿A'a miqúanaya napa caje cuaa miqúiaaya quea pame nee atitiiañajo? ¹⁴ E'e poija'a. Jamatii Eyacuiñajjiya miqúanaya quea bihui nee po mee caje. Jamajjeya ¡a'a quea mete pojji! ¡A'a quea yeno pojji pea'ai! Quea bei jjashahuabaquicue jama ba'a: ¹⁵ —Jesosa Quito quea pame nee poanaje; eya ojaya ehuhui jayojja jama poaje. Oya oe nei ecuea Emeshi Mese nei yani.

E'e poija'a miqúanaya huohui'ajja caje cuaa jama ba'a: —¿Yajjaje acuae miya quea bihui nee jjashahuabaquiani so'o Eyacuiñajjiya miya ba'e tiitii mee caje'yo?

Jamaya acajje ¡huohuicue miqúanajaya ejjashahuabaquijji quea pame nee Jesosa Quito! ¹⁶ ¡Quea bei nee oe huohuicue, tecue'ama! E'e, ¡Jesosaja epeeji poanijo ba'ecue quea pame nee! Jamajjeya miqúanaya bicho'ama poaje pea cuaa niñeba cajje. E'e, miqúanaya quea pame nee ba'yanijo, oya cuana quea bicho poaje mi niñeba majje. ¹⁷ Miqúiaa quea pame añajo, pea cuaa poija'a nequiana napa caje. ¡Jamatii quea pame pocue! E'e poija'a jamaya Eyacuiñajji miqúanajo jjashahuabaquiani. Quea mimishi poanijo, pea cuaa miya cuia caje. ¡Jamaya ca'a cahua cuaa ca mimishi cuana! Jamajjeya ¡a'a quea mimishi pojji!

Shequi'yo majje Jesosaa ma yahuajo mano'yo cuana nequica huasijje sohuihuohuiqui canaje

¹⁸ ¡Bacue! Jesosa Quito mimishi'ama nei nei. Jamatii oya mano'yonaje mimishi cuana cuijea mee'yojji. Apoa aje mimishi cuijea ca'yonaje. Ohuaya miqúanaya Eyacuiñajjiya epeeji cuana po mee ca'yonaje. Oya Jesosa mano'yajo Edojjoshahua Pameya oya shequi mee ca'yonaje. ¹⁹ E'e, Jesosa Quito jjani yasijje ejeanobia jaajo ojaya edojjoshahua poquinaje ma yahuajo mano'yo cuana nequica huasijje esohui huohuiya jama ba'a: —E'e, ¡ña mano'yonaje mimishi cuijea'yojji, apoa anaje —aca poa.

Ma yahuajo nei mano'yo cuana poqui mee jjima poa eyahuasijje; ejeanobia jaa jayojja poa. ²⁰ Yahuajo nei mano'yo cuana Eyacuiñajji shajja'ajja sa po ajja poa. Noeya bishe ai quecua canijo, Eyacuiñajjiya shajjama' cuana ishoa'ajja ca'ya poa quea huiso shequijame ache shono ohua mimishi pajea caje'yo ebajji nisho. Jamatii oe pojji cuana, me oejeje pea beca peejjima huisome, 8 huisome bishe ai yasijje dobiqúi majje hui't'yo jjima poa johuijo. Johuiya oya cuana bishejo ba'e jeajjee ca'ya poa quea pame nee.

²¹ ¡Bacue! Johui yahuajo nei poa jjeya ca jiquío jama ba'a: Jjeya oe dejjaa pea cuana Eyacuiñajjiyo besa mee cani enajo. E'e, jiquío ecua dejja bishe ai dojjojo ani cuana johuiya jeajjee ca poa jayojjaya jama jjeya oe dejjaa pea cuana Eyacuiñajjiyo besa mee cani Edojjoshahua Pame ona que dobiqúi'yajo. Jamajjeya ba'e tiitii mee cani Jesosa Quito nijje. Ena huasijje ¡ñajejanobia cajje jamatii meshi topo caje. Mimishi cuana ca ca etopoajji pojjeama. Jamajjeya Eyacuiñajji nijje e'e jojo nei mimiajo, ohuaya esejaya mimishi cuana cuijea ca'yajje pea jjashahuabaquime po mee ca'yani. Jamaya Eyacuiñajjiya acaje'yo Jesosa Quito ma emano'yojaa shequi mee ca o'oya poajjojya. ²² Jjeya nei Jesosa Quito eyajo Eyacuiñajjiya ebianeimijije e'anioque ani. Ohuaya ojjaña Eyacuiñajjiya esohuidojojji cuana, esohuidojojji huoojeajji poani pea'ai huoojea cani quea pame nee ameeya. Ojjaña eshahua cuana quea mete poani Jesosa Qitohua tecuea cajje.

4

¡Pea jashahuabaqui'yome pocue!

¹ Jamajjeya Jesosa Quito jiquio meshijo nequi quea nee nee poanaje. Dejjaa oya napa canaje Eyacuiñajjija esohui huohuijijjojo. ¡Miquianaya Jesosa Quito jama pocue! Eyacuiñajjija esohui huohuiañaje quea nee poaje pojja'a. Jamatii quea nee poanijo ¡Jesosaja epeeji quea ca'a pocue, mimishi'ama! ² Jamajjeya ¡Jesosaja epeeji quea ca'a nee poaniya ojjaña ejashahuabaqui'yojji quea tai pajea'yocue! ¡Eyacuiñajjija ejashahuabaquijji jayojja jama ba'e tiitucue quea pame nee! ³ Yahuajo nei quea huiso shequiajajo miquianaya quea mimishi ba'e'yonaje. Eshahuaja epeeji cuana jayojja ojjaña mimishi atiitii'yonaje, miquianaaya. Ejjashahuabaquijji quea mimishi nee nee poanaje. Ehuoo jaa tiitii'yonaje pea'ai. Ojee quea shajjaquijjo ijia'ijianaje quea mimishi jjejojo. Ojee ishi'ishi tiitii'yonaje pea'ai. Eyacuiñajji nisho pea'ai miquianaaya bihuia majamajanaje. Eshahua nijje miminaje pea'ai. Jamaya quea tai nee nee miquianaaya atiitii'yonaje yahuajo nei nei. ⁴ Jjeya ca ca miquea epeeji quea mimishi nijje jjapeequi'yo ajja onijje quea mimishi epojji. Jamajjeya oya cuana miquiana nijje quea tecue poani. Miquianaya niñeba cani pea'ai onijje mi jjapeequiajo. ⁵ Jamatii. Quijje ma dejja mimishi cuana Eyacuiñajjija o cojja neijo nequi mee caje ojaya mimishijo huohui epojji. Majoya quea nee nee po mee caje'yo tii tii. Ojjaña etiiquiana mimishi yahuajo mano'yo cuana quea nee nee po mee caje'yo, ojjaña jjeya quea mimishi poani quea nee nee po mee caje'yo pea'ai, Eyacuiñajjija. ⁶ Jamajjeya Eyacuiñajjija esohui quea pame nee Jesosa Quitojo huohui mee ca'yonaje ojjaña yahuajo nei ba'ya poa huasijje mano'yo jjimahua. Jamajjeya mano'yajo, oya cuana ba'e tiitii mee ca'yonaje quea pame nee eyajo onijje. Jamatii ojjaña ma etiiquiana cuana mano'yonaje dejja quea pame, dejja quea mimishi pea'ai.

Eyacuiñajjija ojjana quea pame nee asahua cani

⁷ E'e, Jesosa Quitoja epoe o'oyajji beshahua nei apoa. Jamajjeya ¡jashahuabaquicue quea ja'a nee! ¡Ojaya esohui jama ba'ecue Eyacuiñajji nijje emimijji bicho'ama! ⁸ ¡Jiquio esohui shajja'ajja neineicue! ¡Ojjaña Jesosaja epeeji cuana quea jea nee nee acue! ¡Pea cuana quea jea nee poanijo onaja mimishi cuana pajea'yocue quene'ama! ⁹ Jesosaja epeeji cuana poe'yajo, ¡jjequinobiacue quea bihui neeya miquea equi yasijje aniya! ¹⁰ Eyacuiñajjija ojjaña ojaya epeeji quea pame chaco meesahua cani ojo. Ojjaña ojaya epeeji pea jayojja jama chaco ajja. Peapea chacome amesahua cani ojo ojjaña quea bihui nee eba'e meejji. ¡Ohuaya miquiana chaco meesahua canijo, ojjaña cuana quea bihui nee ba'e meesahuacue! Jama acue ba'a: ¹¹ Esohui huohui sa po majje ¡Eyacuiñajjija esohui huohuicue! Pea cuana ba'e meesahua sa po majje ¡ba'e meesahuacue Eyacuiñajjija miquiana ba'e meesahua canijo! Jamajjeya ojaya epeeji cuana quea pame nee poanijo ojjaña cuaa Eyacuiñajji bihuia caje: —E'e, Jesosa Quitohua esejaya mimishi cuana cuijea ca'yajo, quea pame nee onijje chacochoani —jamaya oya cabihuia tiitii cahua. ¡Oya ojjañaja Emeshi Mese quea ca'a nee capo tiitii'yahua pea'ai! ¡Jamaya capohua!

Pea cuaa Jesosaja epeeji cuana napa caje

¹² Ecuea epeeji cuana, ¡shajja'ajjacue mo! ¡A'a quea yeno pojji pea cuaa miquianaya janobajjima napa canijo! A'a ¡jashahuabaquijji jama ba'a: —Eya ee nei quea nee nee poani Jesosa Quito nijje jjapeequianijo.

Chojja, pea cuaa napa cani quea huiso Jesosaja epeeji cuana. ¹³ Jamajjeya onaa napa cajje ja'a quea yeno pojji! ¡Quea bihui nee pocue Jesosa Quito yahuajo nei onaa aca poa jayojjaya jamaya miquianaya acani jjeya! Onaa napa cajje Jesosa quea nee poanaje pea'ai. E'e, miquianaya jjeya quea nee o jayojjaya poanijo quijje quea bihui nee poaje Jesosa Quito quea pame nee nee, quea ca'a nee nee poe o'oyajo. ¹⁴ Jesosaja epeeji poanijo, pea cuana minijje mimijajiajo ¡jamatii quea bihui pocue! E'e de, Edojjoshahua Pame quea ca'a nee miquiana nijje nequi quea bihui nee miquiana po meejji. ¹⁵ ¡A'a quea mimishi pojji; a'a pea quecuajji; a'a siijji; a'a pea niñebajji pea'ai! ¡A'a jamaya pojji! Jamatii jamaya quea mimishi poanijo aje mi oe dejja eti cuaa napa caje. Quea nee nee po mee caje. ¹⁶ Jesosa Quitoja epeeji poanijo ca ca oe pea cuaa miquianaya napa cajje ¡jamatii a'a quea bicho pojji! ¡Eyacuiñajji bihuiaque jama ba'a: —Eyacuiñajji, eya quea bihui nee Jesosa Quitoja epeeji poanijo, jamatii onaaya eya napa cani —acue! ¹⁷ ¡A'a oe Jesosaja epeeji pojjeama jayojja jama ba'ejji quea mimishi! ¡Bacue oe! Jjeya apoa. Jesosa Quito poeje'yo ojjaña cuanaja eba'ejjijo huohuiya. Ojjaña joya quea ja'a nee ba'yani quea pame nee acaje poe'yo majje. Ojjaña quea mimishi poani aje oe quea nee nee po mee caje'yo. Ebionei Jesosa Quitohua ojaya epeeji cuanaja eba'ejji cuanajo huohui caje. Majoya ojaya epeeji pojjeama quea mimishi nee tecuea caje. Ojaya epeeji quea mimishi tecuea cajo, ¡ache sohui tecue nei

neiya huohui caje ojaya epeeji pojjeama! Tecuea neinei caje'yo. ¹⁸ E'e, Eyacuiñajijia esohui etehue'yo jama poa ba'a:

“Quea camaja nee Quitoja epeeji nejia mimishi cuijea'yojji, eyahuasijje edobiqui mee'yojji pea'ai. Jamajjeya Quitoja epeeji pojjeama, dejja quea mimishi pea'ai ¿yajja shai poaje? ¡Eyahuasijje edobiqui mee'yojji pojjeama ca coma, de!”

¹⁹ Jamajjeya dejja mimishiya eseya Jesosaja epeeji cuana napa cajo onijje jjapeequianijo ¡jamatii Eyacuiñajijia esohui a'a pajea'yojji! Jamaya Eyacuiñajijia ejjashahuabaqui'yojji. Jamajjeya ¡quea pame nee nee atiitiucue! E'e, Eyacuiñajijia eseya pana ca'ya poa. Ojaya esohui jayojja jama acaje'yo e'e jojo nei, epajea'yojji pojjeama Eyacuiñajijia.

5

Penoja esohui etehue'yo Jesosaja epeeji jaahuanajji cuana huasijje

¹ Jjeya eyaya Jesosaja epeeji jaahuanajji cuana huohuaña. Eya ca iña Jesosaja epeeji cuana jaahuanajji pea'ai. Yahuajo pea cuaa Jesosa Quito cuia caqui eyaya oya ba poa. Jesosa Quito poe o'oyajo, eya o jayojja quea pame nee, quea ca'a nee nee poaje'yo. Jamajjeya eyaya tehueña jama ba'a: ² ¡Miquianaaya Jesosa Quitoja epeeji cuana jaahuanajji poaniya oya cuana jaahuanacue quea pame nee! Eyacuiñajijia miquianaya huoojea canaje ojaya epeeji cuana jaahuanajji. Jamajjeya ¡quea bihui nee oya cuana jaahuanacue, tecue'ama! Jesosa Quito miquianajaya quea jea nee neejo jojo chacocue quea bihui nee, ejjesheji quea huiso sa poanijo pojjeama! Eyacuiñajijia miquianaya huoojea ca'yonaje ojaya epeeji jaahuanajji. ³ Jamajjeya jo huoojea'yojji quea tecue jama jayojja a'a pojji! Jamajjeya Jesosaja epeeji cuaa miquiana ba majje quea pame atiiti caje pea'ai; miquiana jayojjaya poaje. ⁴ E'e, Jesosa Quito ojaya epeeji cuana jaahuanajji huoojeajji poani. Jamajjeya poe o'oya majje ohuaya eseya o jayojja quea pame nee, quea ca'a nee po mee caje'yo.

⁵ Cuanaya Jesosaja epeeji jjeya nei onijje jjapeequiani cuana eyaya huohuaña jama ba'a: ¡Jesosaja epeeji jaahuanajji cuana shajja'ajjacue! ¡Quea bei pocue! Yahuajo nei Eyacuiñajijia esohui etehue'yo jama poa ba'a:

“Beca cuana quea ca'a poso jjaabaquianijo Eyacuiñajijia oya cuana ba cani quea mimishi. Jamajjeya ohuaya oya cuana jeabichajea caje'yo. Pea quea bei poani ca ca jaahuana caje'yo, Eyacuiñajijia”.

Jamaya yahuajo nei poa. ⁶ Jamajjeya ¡Eyacuiñajijia ejjashahuabaquijji jayojja jama acue quea bei nee! Oya quea ca'a nee enequi tii tii. Jamajjeya quijje ohua apoa acajje miquianaya ona jaahuanajji quea ja'a nee po mee caje'yo. ⁷ Jjeya oya jashahuabaquiani miquiana jaahuanajji. Jamajjeya mete'ama jashahuabaquicue ojo jama ba'a: —E'e jojo nei Eyacuiñajijia eya jaahuana caje'yo.

⁸ ¡Quea jashahuabaqui ja'a nee pocue! ¡Ojjaña ba neineicue! Edosiquiana quea mase poqui tiitiiani ojjaña dasiaa. Jiquio ecua ibia quea mase po ayequiani aguiana sa'ajjaa jayojja jama Edosiquiaa eseya sa'ajja cani edasijji. ⁹ E'e, miquianajaya eba Jesosaja epeeji cuana ojjaña meshijo ba'e Edosiquiaa napa mee cajje quea nee poani miquiana jama. Jamajjeya ¡Jesosaja epeeji quea ca'a nee pocue! ¡Ojaya esohui a'a pajea'yojji! ¹⁰ E'e, oe pojji cahuime miquianaya quea nee poaje Jesosa Quito nijje jjapeequianijo. Jamatii miquianaya ojaya epeeji cuana quea ja'a nee po mee caje'yo. Ohuaya miquianaya quea ca'a nee nee po mee caje'yo. Ojaya esohui cuana jayojja jama ba'e tiitii meesahua caje pea'ai. E'e de, Eyacuiñajijia, ese jaahuanajijia miquianaya babaca ca'ya poa. Miquianaya Jesosa Quito nijje jjapeequianijo, o jayojjaya quea ca'a nee, quea pame nee nee po tiitii mee caje'yo.

¹¹ ¡Eyacuiñajji ojjaña huoojea'yojji oe nei quea ca'a nee nee po tiitiiani! ¡Jamaya capohua!

Penohua quea bei tehue cani Jesosaja epeeji cuana huasijje

¹² Ecuea epeeji Simano bajjani enijje nequi. Ecuea eba oya Jesosa nijje jjapeequiani quea pame nee. Ohuaya jiquio esohui etehue'yo biso nei tehue meesahua cani. Ecuaaya miquiana que tehueña quea ja'a nee, quea bihui nee nee pea'ai ejjapeequi meesahuajji. Ecuea eba e'e jojo nei Eyacuiñajijia miquianaya quea pame jaahuana cani. Jamajjeya ¡onijje jjapee tiitiquicue!

¹³ Jesosaja epeeji cuana jiquiojo, Babenonia cuiñajji jayojjajo ba'e Eyacuiñajijia babaca ca'yonaje ojaya epeeji nei epojji, miquiana jayojjaya. Oya cuana, Macoso ma ecuea ebacua eja jayojja pea'ai miquianajo jashahuabaquiani. —¿Achajja ami ani so'o? —ohuaya huohui'ajja mee cani.

¹⁴ ¡Ojjaña Jesosaja epeeji cuana jomajo ba'e nijje quea bei nee mimi tiitiucue! Onijje jjapeequianijo, ¡Jesosa Quitohua miquianaya quea ja'a nee caba'e meesahua cahua!

Eyaya, Peno bajjanaya jiquio esohui tehue'yonaje. Mahuiso. Apoa.

PENOJA ETEHUE'YO BECANEJJIJI PEA'AI 2 PEDRO

Penohua tehue ca o'oyanaje Jesosaja epeeji cuana huasijje

¹ Eyaya Simohui Peno bajjanaya miqiana huasijje tehueña. Eya Jesosa Quitoja esohui huohui ayequijji poani. Ohuaya eya huoojea ca'yonaje ojaya esohui huohui. Oya Jesosa Quito e'e jojo nei Eyacuiñajji, esejaya mimishi cuijea'yoyji poani. Quea pame nee nee ojaya esohui. Ohuaya miqianaya ojaya esohui cuana jayoyja jama ameesahua cani. Mimishi cuana cuijea ca'yajje ohuaya ecuanaya, miqianaya pea'ai quea boejea po mee ca'yonaje. ² E'e, Eyacuiñajji, esejaya Emeshi Mese nei Jesosa Quito pea'ai miqianajaya eba nei nei. Jamajjeya jahuaya miqianaya cajaanahua cahua quea pame nee! ¡Quea bei nee capo mee cahua pea'ai!

Eyacuiñajjiya eseya babaca'yo majje iyaa canaje

³ E'e, Jesosa quea ca'a nee nee ba majje ohuaya eseya ojaya esohui jayoyja jama ba'e meesahua cani quea pame nee. Eseya iyaa ca'yonaje ojaya epeeji nei epo meeji, o jayoyja jama eoyji. Quea ca'a nee, quea pame nee nee po mee cani pea'ai. ⁴ Jamajjeya ohuaya eseya iyaa majje huohui canaje jama ba'a: —Miqianaya e jayoyja quea pame nee poaje e jayoyja quea ca'a nee epo'yoyji —aca poa.

Jamajjeya Eyacuiñajjiya ejjashahuabaqui'yoyji jayoyja jama jjashahuabaqui'yome poaje'yo. Eseyaya ejjashahuabaqui'yoyji quea mimishi, quea tai pea'ai pajea mee caje'yo. E'e, eseya pea quea mimishi jayoyja pojjeama.

⁵ Jamajjeya miqianaya Jesosa Quito nije jjapeequianajo ¡quea pame ba'ecue! ¡Eyacuiñajjiya esohui cuana ba neineicue pea'ai! ⁶ ¡Quea ja'a nee jjashahuabaquicue! ¡Jesosa nije jjapee tiitiicue! ¡A'a onaa napa cani jjabacuijji! ¡Eyacuiñajjiya ejjashahuabaquiji jayoyja jama jjashahuaba tiitiicue! ⁷ ¡Eyacuiñajjiya epeeji cuana jaahuanacue quea pame nee! ¡Ojjaña quea jea nee nee acue pea'ai! E'e, ¡quea boti nee acue! ⁸ Jamajjeya miqiaaya jamaya atitiiñajo Emeshi Mese Jesosa Quitoja echacoyji quea ja'a nee nee poaje, oya miquea eba poanijo. ¡Jesosa Quitoja esohui jama acue pea'ai! ⁹ Ojjaña jiquio esohui jama a'ajja aje oe cojjama' jayoyja de, quea cojja jama jayoyja poani. Quea jjashahuabaqui ja'a pojjeama. Jamajjeya pajea ca'yani ma Jesosa Quitoja yahuajo ojaya mimishi cuana cuijea ca'yonaje.

¹⁰ Jamajjeya epeeji cuana, ¡quea ja'a nee po tiitiicue Jesosa Quitoja epeeji poanijo! Eyacuiñajjiya yahuajo miqianaya iyaa ca'ya poa quea ja'a nee eba'e'yoyji. Cuanaya oya yahuajo jjashahuabaquijaje jama ba'a: —Miqianaya ecuea epeeji nei poaje'yo.

Jamajjeya miqianaya Eyacuiñajjiyo quea pame nee atitiiñajo quea mimishi epo o'oyajji pojjeama. ¹¹ Eyacuiñajjiya miqianaya dobiqúi mee caje'yo ojaya cuiñajji eyacua huasijje quea bihui nee. Ma cuiñajjiyo Emeshi Mese Jesosa Quito ojjaña huoojea'yoyji oe nei poaje'yo ti. Ohuaya miqianaya onijje ba'e tiitii mee caje'yo.

Penohua esohui e'e nei huohui ca o'oyanaje

¹² Jiquio esohui e'e nei miqianajaya eba. Jamaya quea bihui nee atitiiñajo quea pame nee poani. Jamatii eyaya maya huohui majamajaña. Jamajjeya miqianajaya pajea'yo ajja esohui e'e nei. ¹³ Jiquio meshijo eshe nequiya jjeja nei eyaya miqianajaya jjashahuabaqui tiitii mee'yo ma esohui cuanajo. Jamaya quea pame miqianajo. ¹⁴ E'e, esejaya Emeshi Mese neiya, Jesosa Quitoja yahuajo pishana eya huohui canaje jama ba'a: —Peno, quijje pishana miya manaje'yo.

¹⁵ Jamajjeya jjeyahua nei eyaya miqiana huasijje esohui e'e nei huohui majamajaña miqianajaya epajea'yoyji pojjeama e mano'yajo.

Jesosa Quito jiquio meshijo nequi Penohua ba ca poa

¹⁶ Ecuaya miqianajaya huohuinaje Jesosa Quitoja epoe o'oyajjiyo. Oya quea ca'a nee nee poeje'yo, Emeshi Mese nei poani. Ecuaya oya Eyacuiñajjiya Ebacua Eja banaje ecójja. Jamajjeya ecuanajaya esohui e'e nei ojo, etiiqianajaya esohui yahuajo jayoyja jama pojjeama; ojaya yahuajo ba jimajo ca ca esohui e'e nei pojjeama. ¹⁷ E'e, eseja Chii ai Eyacuiñajji eyajo ani Jesosa Quito nije miminaje quea pame nee nee. Jesosa Quito oe nei quea ca'a nee nee poanijo miminaje Eyacuiñajji. E'e, Jesosa Quito nije nequiya eyaya Huani nije, Jacobo nije nequiya pea'ai shajja'ajjanaje Eyacuiñajji eyajo quea ja'a nee Jesosa nije mimiani. Jama poanaje ba'a: —Jesosa ecuea Ebacua Eja oe nei quea pame nee. Oya ecuea quea jea nee nee. Ohuaya ecuea ejjashahuabaquiji jayoyja jama acani —Eyacuiñajji poanaje.

¹⁸ Eyacuiñajjiya ma esohui cuana eyajo huohui canijo, ecuaaya shajja'ajjanaje Jesosa nije eyiyo biajje nequiya. Eyiyojo Eyacuiñajji shajja'ajja majje ecuaana jashahuabaquinaje jama ba'a: —Eyacuiñajji eyiyojo miminaje e'e jojo nei. Jamaya quea pame.

¹⁹ Jamajjeya ecuanaja esohui Jesosa Quitoja epoe o'oyajjiyo baña quea ja'a nee. Eyacuiñajjiya esohui huohuijji cuanaja esohui yahuajo e'e nei poa. Jamajjeya ishajja'ajjacue! Ma esohui yahuajo nei cuaquijji jayojja jama poa. Jiquio ecua cuaquijjiya mecaille quea apo neejo jeaja'a cani jayojja jama jiquio esohui e'e neiya miquianaya Jesosa ba meesahua caje, jamatii esohui e'e nei pojjeama huohui cani cuaa quea huiso. Miquianaya Jesusaja poe o'oyajjiyo quea ja'a nee baje ma esohui e'e nei ba neinei majje. Jamatii Jesusaja epoe o'oyajji ca ca jiquio ecua eshequi huieyji jaasohua majje ja'a'aja'a'a pojebeani jama jashahuabaqui meemeya se acaje Jesusaa.

²⁰ ¡Ba neineicue jiquio esohui! Eyacuiñajjiya esohui huohuijji yahuajo nei ba'eca poa esohui tehue mee ca poa. Ma esohui cuana onajaya ejjashahuabaquijji pojjeama, Eyacuiñajjiya ejjashahuabaquijji. ²¹ E'e, yahuajo nei dejja cuanaja Eyacuiñajjiya esohui jamatii tehue jjima. Onajaya ejjashahuabaquijji huohui jjima pea'ai. Chojja. Edojoshahua Pameya Eyacuiñajjiya epeeji quea pame nee cuana ojaya esohui huohui meesahua ca'ya poa.

2

Esohui huohuijji nisho cuana siajje poani Eyacuiñajjiya esohuijjo

¹ Yahuajo nei Eyacuiñajjiya esohui huohuijji nisho cuana siajje poa pea cuana huasijje. Jjeyahua nei pea esohui huohuijji nisho cuana miquiana que siajje poaje Eyacuiñajjiya esohuijjo. Ohua siajje acaille dejja cuana poquiquehua chana' cuaqui yasijje. Eseyaya Emeshi Mese nei, Jesosa onaja mimishi cuanajo mano'yonaje. Jamatii oja sohui siajje acanijo esohui huohuijji nishohua Jesosa cajaan acani. Jamajjeya Eyacuiñajjiya oya cuana quea nee nee po mee caje'yo, ojaña esohui huohuijji nisho. ² Ona siajje poanijo, quea huiso dejja cuana quea mimishi nee poaje o jayojjaya. Jamajjeya esohui huohuijji nisho cuana siajje poani jojaya pea cuana Jesusaja esohui cuanajo mimijajje'yo. ³ Cuanaya esohui huohuijji nishohua quea huiso ejjesheji sa poanijo miquiana que ojaya ejjashahuabaquiyojji e'e nei pojjeama huohui caje. Quea bejjo jeaa jjejojo miquianaya dasia caje; dasia majje bejjo quea huiso chicha caje.

Yahuajo nei Eyacuiñajji jashahuabaquia poa esohui huohuijji nisho napajji. Jama poa ba'a: —Esohui huohuijji nisho cuana eyaya baña. Eyaya oya cuana epajea'yojji pojjeama; quea nee nee po mee'yo e'e jojo nei.

⁴ ¡Bacue oe! Yahuajo nei nei esohuidojojji cuana eyajo quea mimishi poa. Jamajjeya Eyacuiñajjiya oya cuana quea huesha nee nee jea ca poa, quea misi nee nee yasijje jeajea ca'ya poa quea nee nee epojji. Jomajo oya cuana ecuaa meequiyojji pojjeama. Ejeyo'yo jama ani, de. Quijje Jesosa Quito poe o'oyajo, Eyacuiñajjiya ma esohuidojojji quea mimishi cuana tecuea neinei majje jeajea caje'yo cuaqui yasijje quea nee nee epo'yojji tii tii.

⁵ Yahuajo nei nei ojaña quea mimishi nee poanijo, Eyacuiñajjiya ena quea quemo nee nee huoojca ca poa; ojaña mimishi cuana hui'i mee ca'ya poa. E'e, ojaña meshi cuana ohuajea mee ca poa. Oe dejjaa Noe bajjani Eyacuiñajjiya esohui jayojja jama aca poa. Jamajjeya oya hui'i'yo ajja poa. Ojaya bacua ejja, oja osecuajana quea pame cuana pea'ai hui'i'yo jjima pea'ai poa. Me oeje beca, 7 huisome cuana Noe nijje ani Eyacuiñajjiya jaahuana ca poa.

⁶ Majoya ojaña cuana Sonoma cuiñajjiyo ba'e, Jomoshua cuiñajjiyo ba'e pea'ai quea mimishi nee nee poa. Jamajjeya Eyacuiñajjiya ma cuiñajji cuana quiyo jeyojeyo mee ca'ya poa. Chama'yo tii aca'ya poa dejja, equi, aquiana cuana pea'ai. Jamaya Eyacuiñajjiya ojaña ba mee cani e'e jojo nei ohuaya ojaña quea mimishi poani quea nee nee po mee caje'yo. Jamajjeya ojjaña quea mete mimishi epojji pocue! ⁷ E'e, yahuajo nei Sonoma cuiñajji quiyo'yo jjimahuaajo Eyacuiñajjiya ojaya epeeji Noti bajjani Sonomajo ba'e huoojcauaya ca poa cuiñajji esecue yasijje quiyo'yo jjima epojji. Notiya Eyacuiñajjiya esohui jama atitii ca poa. Jamajjeya oya quea yeno nee nee poa ojaña jomajo quea mimishi ba'yanajo. ⁸ Ma cuiñajjiyo ba'eya Notiya ba majamaja caninaje dejja cuana quea mimishi nee nee; quea shajjaquijjo tii tii poani shajja'ajja caninaje pea'ai. Ohuaya, Notiya ma Eyacuiñajjiya huohui ca poa jayojja jama aca poa. Jamajjeya quea yeno nee nee poa dejja cuana quea mimishi po tiitianiyo.

⁹ Jamajjeya ijjea ecuaana ba mee cani jama ba'a: Eyacuiñajjiya ojaña quea pame nee poani jaahuana cani. Jamajjeya dejja mimishi cuanaja ojaya epeeji cuana quea mimishi epo meeji pojjeama. Ecuanaya ba mee cani ijjea nei pea'ai Eyacuiñajjiya ojaña quea mimishi poani quea nee nee po mee caje'yo. Quijje Jesosa Quito poe o'oyajo, ojaña mimishi cuana quea nee nee po tiitii mee caje'yo, Eyacuiñajjiya. ¹⁰ Pea cuana quea mimishi, quea tai

jjashahuaba tiitiiquiani. Jamaya oya cuana ba'e sa poani. Oya cuana emeshi mese cuanaja esohui shajja'ajja sa po ajja pea'ai. Jamajjeya Eyacuiñajjiya oya cuana quea nee nee po mee caje'yo.

Oya jayojjaya esohui huohuijji nisho cuana quea mase nee nee. Shajjama' pea'ai. Jesosa Quitoja esohuidojojji quea pame cuana niñeba cani mete'amaa jjejojo, bicho'amaa jjejojo pea'ai. ¹¹ Jamatii mimishi cuana ca'a'ama ojjaña. Eyajo Eyacuiñajjiya esohuidojojji cuana ca ca quea ca'a nee nee poani. Ma dejjaya ba jjima acani pea'ai. Jamatii ohuaya esohui huohuijji nisho cuana jama niñebame ajjima acani ba'a: —Jesosa, ijiquio esohui huohuijji nisho cajaa acue, cuiajea'yocue! —jamaya po ajja esohuidojojji cuana.

¹² Esohui huohuijji nisho cuana ca ca quea mase nee nee. Quea ja'a nee jjashahuabaqui ajja pea'ai. Jamatii ijjiacajji jjabahuonequi jjima jama ba'yani. Jiquio ecua ijjiacajji tiyajo ojjaña sa'ajja cani ecuecua'yoyji jayojja jama esohui huohuijji nisho quea nee nee po mee caje'yo Eyacuiñajjiya. E'e, oya cuana jjabahuejjaqui ajja nei nei. Eyacuiñajjiya esohuijjo niñeba cani quea quehuajajo.

¹³ Esohui huohuijji nisho cuana pea cuana quea yeno po mee cani. Jamajjeya Eyacuiñajjiya oya cuana quea yeno, quea nee nee po mee caje'yo. E'e de, quea bihui nee jayojja oya cuana mimishi cuana a sa poani ojjaña pojajajo. Jamatii quea mimishi poani tii miqiuana nijje ojee ijja sa poani Jesosa Quitoja bobi. Miquiana quea mimishi po mee sa poani pea'ai oya cuana. ¹⁴ E'e, esohui huohuijji nisho cuana epona mimishi cuana jea ba cani; onijje jaa sa poani. Jiquio ecua jeje ajja tii tii jayojja jama oya cuana quea mimishi po tiitiani, jjashahuaba tiitiiquiani quea mimishi epojji. Jesosaja epeeji ca'a'ama quea mimishi po mee cani pea'ai. Quea dejja tai poanijo pea cuana dasia majje aquiana sii cani pea'ai. Jamajjeya Eyacuiñajji quea quene poani esohui huohuijji nisho cuana nijje. Yahuajo jjashahuabaquinaje o huoojaja'yoyji cuaqui yasijje quea mimishi poanijo. ¹⁵ Esohui huohuijji nisho cuana Jesosaja ejiojijje poqui pajea'yo majje cuaquisho'yonaje eshahuaja ejiojji yasijje. Eyacuiñajjiya esohui huohuijji yahuajo nei ba'ya poa Beonija bacua ejja Banaami bajjani quea mimishi poa. Ejjeshejji quea huiso sa poanijo Eyacuiñajjiya esohui jama a sa po ajja poa. Banaami jayojja jama esohui huohuijji nisho cuana poani, quea mimishi nee nee, de. ¹⁶ Eyacuiñajjiya Banaami tecuea ca'ya poa yahuajo nei, mimishijo. Mapichi sisi mimi mee ca poa Banaami nijje, Banaami jayojja mimimeya poa. Mapichi sisiya tecuea cajje Banaami ojaya ejjashahuabaquijji quea mimishi pajea ca'yona.

¹⁷ Jjeya ojjaña esohui huohuijji nisho cuana ena eteohuejja nama'yo, ejoca'yo jayojja jama poani, cajaa ya'yo jayojja. Cuanaya bo poanijo beniya dojocuaji canijo, ena chama' poaje. Eso' ecuecua'yo epohua'yoyji pojjeama quea jabojojo. Jiquio ecua bo dojocuaji cani jayojja ena chama' jayojja jama ojjaña esohui huohuijji nishohua Jesosaja esohui quea ja'a huohuihuohui ajja. Jamajjeya Eyacuiñajjiya oya cuana cajaa acaje; quea nee nee po mee caje'yo; quea huesha nee nee, quea misi nee nee yasijje jeajea caje'yo. ¹⁸ Esohui huohuijji nisho cuanaja ejjashahuabaquijji quea quehua nee. Jamatii quea miminaa, bicho'ama poani. Oya cuana jjashahuabaquiani quea mimishi. Pea cuana, ma yahuajo mimishi pajea'yoyji poanaje quea mimishi po mee caje o'oya. ¹⁹ Esohui huohuijji nisho cuana mimishi pajea'yo ajja. Jamatii oya cuana siajje poani tii tii jama ba'a: —Ecuanaajaya esohui cuana shajja'ajja majje imiquianajaya ejjashahuabaquijji jayojja jama atiitucue! — siajje poani.

Chojja, jamaya pojjeama. ¡Bacue! Ojjaña joya mimishi atiitijji poani Edosiquiana o huoojajji poani. Quea pame nee poanijo ca ca Eyacuiñajji o huoojajji poani. ²⁰ Jamajjeya beca cuaa mimishi pajea ca'yona; quea mase popajea ca'yona esejaya Emeshi Mese nei Jesosa Quito nijje ejjapeequijji. Jamatii onijje jjapeequi majje aje oe quea mimishi po o'oyanaje. Ojaya esohui shajja'ajja maja sa po'yo ajja poanaje. Yahuajo jama oya cuana ba'e o'oyanaje, Jesosaja epeeji pojjeama jama quea mimishi. Yahuajo Jesosa nijje jjapeequi jjimahuajo oja mimishijo Eyacuiñajjiya oya cuana tecuea caje. Jesosa nijje jjapeequi pajea'yojo ca ca tecuea neinei caje'yo. ²¹ Jamajjeya ojjaña joya Jesosaja esohui shajja'ajja majje pajea cani, quea mimishi po o'oyani Eyacuiñajjiya janobajjima nei tecueajea caje'yo. Quea nee nee po mee caje'yo. Pea cuanaja Jesosaja esohui shajja'ajja jjimahuajo quea mimishi poani Eyacuiñajjiya tecuea caje; quea nee pishana po mee caje'yo oja mimishi cuanajo. Esohui e'e nei Jesosajo shajja'ajja jjimajo mi tecuea neinei caje'yo. ²² E'e, jamaya acani cuaa ba'a: "Iñaehuaa bohuii majje bohuii ijja ca o'oyani. Cuanaya cuichi topo cajje cuichi quea boejea pepajo besaje o'oya". Jiquio ecua iñaehua, cuichi pea'ai jjopi yasijje poqui o'oyani jayojja jama beca dejja cuana poani; Jesosaja esohui shajja'ajja majje pajea ca'yani, poqui o'oyani mimishi yasijje.

3

Jesosa Quito poeje o'oya; ma ecua ohuaya huohui ca poa jamaya e'e jojo nei poaje

¹ Epeeji cuana, eyaya becanejjijji pea'ai tehue'yome anaje ecuea esohui miqiuana que. ¡Ecuea etehue'yo yahuajo, ecuea etehue'yo jjeja tehuejo pea'ai miqiuana jashahuaba tiitiqicue quea ja'a nee Jesosa Quitojo! ² ¡Eyacuiñajjiya esohui huohuijji quea pame cuanaja esohui yahuajo nei a'a pajea'yojji! Esejaya Emeshi Mese nei Jesosa ese ba'e tiiti mee'yojji. ¡Ojaya esohui pea'ai a'a pajea'yojji! Ohuaya ojaya epeeji cuana huoojea ca'yonaje ojaya esohui huohuiya miqiuana huasijje.

³ ¡Bacue jiquio esohui! Jesosa poe o'oya jjimahuajo pishana quea huiso quea mimishi poeje. Ojaya ejjashahuabaquijji quea mimishi nee nee poaje. Miqiuana soadojo caje Jesosaja epoe o'oyajjijo miqiuana huohuañajo. ⁴ Miniije mimijajije jama ba'a: —¡Dee! Yahuajo Jesosaa huohui canaje ojaya epoe o'oyajjijo. Jamatii poe'yo jima. Jesosa siajje poani, de. Yahuajo nei nei ecuanaja etiQuiana ba'ya poa meshi pana ca jeahuajo. Oya jayojjaya jama poani ojjaña jjeja nei. Jama ti ti. Poe o'oya ajja Jesosa —siajje poaje dejja mimishi cuana.

⁵ Oya cuana aje oe quea mimishi; Eyacuiñajjiya pana'yo cuana yahuajo nei pajea'yo sa poani. Yahuajo nei nei Eyacuiñajjiya ojjaña aquiana cuana eyajo pana ca'ya poa. Majameta cuana, ba'i, eshequi pea'ai pana ca'ya poa. Meshi cuana pana ca'ya poa. Aquiana cuana ojjaña meshijo pana ca'ya poa, dejja cuana pea'ai. Yahuajo nei nei chama' meshi poa. Ena nei ania poa. Jamajjeja Eyacuiñajjiya ena huosa mee ca poa. Meshi ani cooa poa. ⁶ Yahuajo nei Eyacuiñajjiya ena jJayehuejjequi mee ca o'oya poa. Ojjaña mimishi cuana ojjaña meshijo ba'e hui'ya poa. ⁷ Jjeja nei aquiana cuana eyajo nequi, aquiana meshi cuanajo yani pea'ai. Eyacuiñajjiya ojjaña aquiana nequi mee cani. Quijje ojjaña aquiana eyajo nequi, ojjaña cuana meshijo nequi pea'ai quiyojea mee caje'yo. Chama'yo tii po mee caje'yo ojjaña aquiana cuana. E'e, Jesosa poe o'oyajo, ojjaña mimishi cuana quea nee nee po mee caje'yo quea mimishi poanaje sosejje, Eyacuiñajjiya. E'e, ojjaña quea mimishi poani quiyo tiiti nequije'yo cuaquijo.

⁸ Ecuea epeeji cuana, ¡pea esohui ecuea shajja'ajjacue! ¡A'a pajea'yojji! Eyacuiñajji ba'e tiitiáni. Jamajjeja quea huiso nee nee, mil shequiame oe cahuime jayojjaya poani ojo, oya jayojjaya. ⁹ Esejaya Emeshi Mese nei Jesosaja epaje'yojji pojjeama ojaya esohui o poe o'oyajjijo. Jamaya acaje ohuaya e'e jojo nei. Pea cuana siajje poani jama ba'a: —Jesosaa ojaya esohui pajea ca'yonaje, de; poe'yo ajja.

Chojja. Jesosa quea mase pojjeamaa jjejojo ishoa cani tii tii ojjaña cuanaja mimishi epaje'yojji. E'e, ese jeajea sa po ajja oya cuaqui yasijje. Quea boejea po mee sa acani ojjaña. ¹⁰ Quijje Emeshi Mese nei Jesosa poe cuajije quea huiso ojo jashahuabaqui ajja yanijo. Siipojji poe cuajiani jayojja jama poe cuajime Jesosa poaje. Oya poe o'oyajo, ojjaña aquiana eyajo chama'yo tii poaje; quiyoje'yo quea shajjaquijjo. Ojjaña meshi cuana, ojjaña aquiana meshijo nequi pea'ai quiyo'yo majje chama'yo tii poaje'yo. ¹¹ E'e, quijje ojjaña aquiana quiyoje'yo caje'yo. Jamajjeja ¿ae shai poaje miqiuana jjeja nei? ¡A'a quea mimishi pojji! ¡Ba'ecue quea pame nee nee! ¡Eyacuiñajjiya esohui jayojja jama acue quea bihui nee! ¹² ¡Jamaya pocue Jesosa ishoa'ajja poani! E'e, jojo chaco tiitiue! Jamajjeja Jesosa poe cuajije jjeja nei pojja'a. Ojo chaco ajjajo, oya jjeja nei poe'yo ajja pojja'a, quijje pojja'a poeje'yo. Oya poe o'oyajo, ojjaña aquiana eyajo nequi quiyoje'yo caje'yo. Ojjaña aquiana quiyo jeyoje'yo. ¹³ Yahuajo nei Eyacuiñajjiya huohui ca poa jama ba'a: —Quijje eyaya aquiana cuana eyajo panaje'yo eyacua. Meshi eyacua panaje'yo pea'ai eyaya. Jomajo ojjaña cuaa ecuea esohui jayojja jama atiiti caje'yo quea pame, mimishi'ama —jamaya Eyacuiñajji poanaje.

Ecuaaya ishoaña meshi eyacua, eya eyacuajo pea'ai de, quea boejea'yo eba'e'yojji.

¹⁴ Ecuea epeeji cuana, ¡bacue! ¡Miqiuana Jesosaja epoe o'oyajji ishoaña ba'ecue Eyacuiñajjiya esohui jayojja jama! Jamajjeja Eyacuiñajjiya ba caje miqiuana ojaya epeeji quea pame nee. ¡Jesosa nijje jJapeequicue e'e jojo nei! Jamajjeja Eyacuiñajji miqiuana nijje quea bei po tiiti'yo. ¹⁵ Jesosa quea tecue pocuaji ajja mimishi cuana nijje. Ishoa cani, jamajjeja mi poe'yani. Jamajjeja ¡jjeja onijje jJapeequi'yocue! Ohuaya eseya ba'e tiiti mee caje'yo onijje eyajo. Jamaya ecuanaja epeeji Pabohua tehue canaje pea'ai miqiuana huasijje, ecuea etehue'yo jayojja. Jamaya Eyacuiñajjiya Pabo jashahuabaqui meesahua ca'yonaje quea ja'a nee. ¹⁶ E'e, ecuea etehue'yo Jesosajo jayojja jama Pabohua tehue canaje quea huiso nee. Beca esohui ojaya esohui etehue'yo quea camaja ebajji. Jamajjeja beca cuana jashahuaba quehuacuianijo quea ja'a nee huohui ajja Paboja esohui etehue'yo. Oya cuana siajje poani esohuijo. Jamajjeja quijje Eyacuiñajjiya oya cuana quea nee nee po mee caje'yo.

¹⁷ E'e epeeji cuana, jamaya miqianajaya eba. Jamajjeya ¡a'a shajja'ajjaji siajjepojji cuanaja esohui! Oya cuana shajja'ajja majje jjashahuaba quehuaqui chana'. E'e, esohui huohuijji nisho cuana Eyacuiñajjija esohui jayojja jama a sa po ajja. ¡O jayojja jama a'a pojji! ¹⁸ E'e, Jesosa Quitohua, esejaya Emeshi Mese neiya eseya quea boejea po mee'yo majje ba'e tiitii mee caje'yo onijje eyajo. ¡Ojaya epeeji quea ca'a nee nee po tiitiicue! Yahujajo miqianaya ojaya epeeji eyacua quea ca'a pishana poanaje. Jamajjeya oe pojji miqianajaya eba poanaje. ¡Ojjaña esohui cuana Jesosa Quitojo ba neinei poquiacue! Mahuiso ecuea esohui.

¡Ojjaña cuaa Jesosa Quito cabihua tiitii cahua: —Jesosa Quito, miya quea pame nee nee —jamaya ca'a cahua!

Eyaya, Penohua jiquio esohui e'e nei cuana tehuejeyonaje. Apoa.

HUANIFA ETEHUE'YO EBIONEI 1 JUAN

Huanifa tehue canaje eba'e tiiti'yojjijo

¹ Epeeji cuana, eyaya, Huanifa miqiana que esohi tehueña Jesosa Quitojo. Yahuajo nei nei meshi, aquiana cuana, deja pea'ai pana coo jjimahuajo oya yaña tii tiia poa. Jamajjeya Jesosa Quitoja eseya Eyacuiñajji ba mee cani, eseya ba'e tiiti mee cani pea'ai. E'e jojo nei eyaya oya shajja'ajjanaje ecue eshajjaa. Eyaya oya banaje ecue ecojjaa. O ba neinei majje eya quea bihui nee poanaje. Oya ese jayojjaya poanaje, yamijji. Jamajjeya eya onijje jjapeequinaje. ² E'e, Jesosa ese jayojja poeyanaje yamijji, ese ba'e tiiti mee'yojhuo. Eyaya oya banaje e'e jojo nei. Jamajjeya eyaya miqianaya jama huohuime aña ba'a: Yahuajo nei nei Jesosa Quito yaña tiitiia poa Eyacuiñajji nijje, oja Chii nijje. Eseja Chii neiya Eyacuiñajjiya oya meshi yasijje huoojea canaje ese jayojja epojji, yamijji. Esejaya mimishi cuijea'yo majje ohuaya eseya cuana ba'e tiiti mee caje'yo onijje eyajo. ³ E'e, eyaya oya, Jesosa Quito banaje; ojaya esohi shajja'ajjanaje pea'ai. Jamajjeya aje jja mi oe eyaya miqianaya huohuiana enijje ejjapeequi'yojji. Jamajjeya eseya Eyacuiñajji nijje, eseja Chii nei nijje jjapeequiani, oja Bacua Eja Jesosa Quito nijje pea'ai jjapeequi poquiani. ⁴ Jamajjeya jiquio esohi cuana eyaya tehueña miqiana quea bihui nee nee po meeji. Jamajjeya Jesosaja epeeji poanijo quea bihui nee nee poaje'yo.

Eyacuiñajji quea ja'a nee nee enequi tii mimishi'ama

⁵ Epeeji cuana, eyaya Jesosa Quitoja esohi shajja'ajjanaje. Maya eyaya miqianaya huohuiana jama ba'a: Eyacuiñajji quea ja'a nee nee poani tii. Jiquio ecua cuaquijjiya mecajje jijinequianiya ojjaña jeaja'a cani jayojja jama ohuaya eseya cuana, deja mimishi cuana quea ja'a nee jjashahuabaqui mee cani. Eyacuiñajji mimishi'ama tii tii, quea tai pojjeama; Eyacuiñajji quea apo pojjeama epojjajo jama tii tii oya ba'e. ⁶ Jamajjeya jaya mimishi po majje quea apo jayojja tii ba'yani mimiani jama ba'a: —Eya Eyacuiñajji nijje jjapeequiani —Eyacuiñajji nijje jjapeequiani poso oya jjabaquiani, sijje poani.

Chojja. Jjapee neineiquiani pojjeama mi coma, jjadasiaquiani jja mi coma. Jiquio ecua se mecajje quea misijo poquiquehuani jayojja jama oya poani. ⁷ Eyacuiñajji ca ca quea ja'a nee nee poani tii, quea boejea nee nee. Jamajjeya Eyacuiñajji jayojja jama quea ja'a nee ba'yaniyo eseya jjapeequiani quea pame nee Jesosaja epeeji cuana nijje. Jesosa Quitoja ena' cuayaqui'yo majje oya esejo mano'yonaje. Jamajjeya onijje jjapeequianijo, eseja Chii Eyacuiñajjiya esejaya mimishi cuana cuijea ca poqui'yani.

⁸ Ojjaña jaya jama poani ba'a: —Iña ca ca mimishi'ama —jamaya quea quehua jjashahuabaquiani. Jamaya jjabaquianijo Jesosa ojaya ba jjima nei nei.

⁹ Eyacuiñajji nijje mimiajo ca ca ohuaya esejaya mimishi cuana cuijea caje'yo. E'e, jama poajo ba'a: —Eyacuiñajji, eya quea mimishi poani. ¡Ecuea mimishi cuana cuijea'yocue! —jamaya mimiajo ohuaya ojaya esohi jayojja jama acaje'yo e'e jojo nei.

E'e, Jesosa esejaya mimishi cuanajo mano'yonajejo ohuaya eseja mimishi cuana cuijea'yo majje mimishi pajea meesahua caje'yo. Eseyaya quea boejea po mee caje'yo. ¹⁰ E'e, Eyacuiñajjiya jama aca poa ba'a: —Ojjaña cuana quea mimishi nee nee poani —ohuaya aca poa.

Jamajjeya ojjaña jaya jama poani ba'a: —Chojja, iña ca ca mimishi'ama —jama poaniya sijjepojji. Eyacuiñajji sijje poani posoya acani pea'ai. Jamajjeya ojjaña jaya jama poani Eyacuiñajjiya esohi etehue'yo ba po jjima jayojja poani.

2

Jesosa Quito esejo mimiani Eyacuiñajji nijje

¹ E'e ecuea epeeji cuana, miqiana mimishi'ama po meesahuajji eyaya jiquio esohi tehueña. Jamatii eseya quea mimishi poajo, Jesosa Quito esejo mimiani Eyacuiñajji nijje, oja Chii nijje jama ba'a: —Ecue Chii, eya mano'yonaje ecuea epeeji cuanaja mimishi cuana cuijea'yojji sosejje. Jamajjeya ja'a quea quene pojji onijje! —jamaya Jesosa poani.

Jesosa Quito ca ca oe mimishi'ama, quea pame nee nee. Jamajjeya Eyacuiñajjiya Jesosa onijje mimiajo shajja'ajja cani, jamaya acani esejo. ² E'e, Jesosa acui ecueata'apeejo mano'ya poa eseya mimishi cuana cuijea'yojji sosejje. Ojjaña cuana ojjaña meshijo ba'eca cuanaja mimishi cuijea'yojji sosejje Jesosa mano'yonaje.

¡Eyacuiñajjiya esohi jayojja jama ba'ecue!

³ E'e ecuea epeeji cuana, Jesosaja esohui cuana jayojja jama añajo eseya ojaya epeeji poani e'e jojo nei; onijje ba'e tiitiije'yo eyajo. Jamaya esejaya eba. ⁴ Beca cuana aje oe jama poani ba'a: —Eya ca iña Jesosaja epeeji poani —jama posoya jjabaquiani cuana.

Jamatii oya cuana aje oe Jesosaja esohui jayojja jama ba'e ajja. Jamajjeya oya cuana siajje poani. Jesosa ojaya ba jjima. ⁵ Ojjaña joya Eyacuiñajji quea jea nee nee ajji poani ca ca ojaya esohui jayojja jama ba'vani. Jamajjeya iEyacuiñajji esohui jayojja jama ba'e tiitiicue Jesosa Quitoja epeeji quea ja'a nee epojji! ⁶ Jamajjeya ojjaña joya e'e jojo nei jama poani ba'a: —Eya Jesosa Quito nijje jjapeequiani —jamaya poanijo iquea pame nee nee caba'yahua, Jesosa Quitohua aca poa jayojja jama ca'a cahua! Jamaya ba'yanijo eseya e'e jojo nei ojaya epeeji jjabaquije.

iPea cuana quea jea nee nee acue!

⁷ Epeeji cuana, yahuajo nei Eyacuiñajji esohui huohuijiya esohui tehue ca poa miqianaja ebajji. Ma esohui miqianaya shajja'ajjanaje Jesosa nijje jjapeequi jeahuaa. Ma esohui etehue'yo eyaya tehue o'oyaña miqiana jjashahuabaqui meeji. ⁸ Jamatii eyaya ma esohui tehue etii jayojjaya tehue o'oyaña miqiana huasijje jama ba'a: —iPea cuana quea jea nee nee acue!

Jiquio esohui jayojja jama aca poa Jesosaa; pea cuana quea jea nee nee aca poa. Yahuajo ojjaña ejjashahuabaquiji cuana quea tai, quea quehua poa Eyacuiñajji esohui e'e nei shajja'ajja jjimahuajo. Jjeya ca ca miqianaya Eyacuiñajji esohui jama pea cuana quea jea nee nee añe pea'ai. Ma esohui e'e nei cuaquijji jayojja jamaa ojjaña quea ja'a jjashahuabaqui meesahua cani. ⁹ Jamajjeya ojjaña joya jama poani ba'a: —Eya Jesosaja esohui jayojja jama ba'vani quea ja'a nee —jamaya poani aje oe siajje poani.

Jesosaja epeeji nijje quea quene nee poani tii tiijo quea mimishi nee ba'vani, Jesosaja esohui shajja'ajja nisho cani, Jesosaja epeeji e'e jojo nei pojjeama. ¹⁰ Ojjaña joya Jesosaja epeeji cuana quea jea nee nee acani ca ca quea ja'a nee nee ba'vani. Jesosa jayojja jama ba'vani. Jamajjeya ohuaya pea epeeji poquiquehua mee'yo jjima acani, quea mimishi po mee'yo jjima acani. ¹¹ Ojjaña joya Jesosaja epeeji cuana nijje quea quene nee nee poani ca ca quea mimishi tii ba'vani. Jiquio ecua se ecojja bebo poqui taiyani jama, ejiojji ba jjima jayojja jama oya cuana poani quea mimishi ba'vani jjejojo.

iJesosaja epeeji cuana etii, esho'i pea'ai quea ja'a nee ba'ecue!

¹² Ecuea epeeji cuana, miqianaya Jesosaja epeeji poanijo, Eyacuiñajjiya miquea mimishi cuana cuijea ca'yonaje. Jamajjeya eyaya jiquio esohui tehueña miqianajaya ebajji. ¹³ Yahuajo nei nei meshi pana jjimahuajo Jesosa eba'e tiitiia poa. Jesosa nijje jjapeequianijo eyaya miqiana huasijje esohui tehueña edejja tii cuana huasijje. Shacuima' nequi cuana, miqianaya Edosiquiana jeabichajea'yojji epo. Jamajjeya eyaya miqiana huasijje esohui tehueña pea'ai. Esho'i cuana, Eyacuiñajji eseja Chii nei miqianajaya eba. Jamajjeya eyaya miqiana huasijje tehueña pea'ai. ¹⁴ E'e edejja tii cuana, Jesosa yahuajo nei nei eba'e tiitiia poa miqianajaya eba. Jamajjeya eyaya esohui tehueña miqianajaya ebajji. E'e shacuima' nequi cuana, miqianaya quea ca'a poani, dejja tii'yo jjima. Eyacuiñajji esohui jayojja jama aña. Jamajjeya miqianaya Edosiquiana jeabichajea'yojji epo pea'ai. Jamajjeya eyaya miqiana huasijje tehueña pea'ai.

iA'a yahuajo jama ba'e sa pojji Jesosaja epeeji pojjeama jama!

¹⁵ Epeeji cuana, ja'a yahuajo jama ba'e sa pojji quea mimishi, Jesosaja epeeji pojjeama jama! Aquiana cuana jiquio meshijo ani ja'a quea jea nee ajji! iA'a aquianajo jjashahuaba tiitiiquijji! E'e, Jesosaja epeeji pojjeama jama ba'e sa poanijo, aquiana cuanao jjashahuaba tiitiiquianijo pea'ai Eyacuiñajji, eseja Chii nei miquea quea boti pojjeama. ¹⁶ E'e, Jesosaja epeeji pojjeama cuana Eyacuiñajji jjashahuabaqui ajja nei nei. Chojja, oya cuana jjashahuabaquiani jiquio meshijo eba'ejji jama ba'a: Quea mimishi nee nee ba'e sa poani; aquiana cuana ba majje jea ba neinei cani pea'ai; quea dejja tai poani, quea nishelui pea'ai poani. Dejjaja quea dejja tai jayojja jama ba'e sa poani quea aquiana huiso nee nee. Ona huooejaji po sa poani pea'ai. Jamaya ba'e sa poani eshahuaja epeeji cuana. ¹⁷ Jamatii joya aquiana ojjaña cuana sa neinei poani chama'yo tii poaje'yo. Ojjaña quea mimishi nee jjashahuabaquiani, Jesosaja epeeji pojjeama quea nee nee poaje'yo tii ti. Ojjaña joya Eyacuiñajji esohui jayojja jama ba'vani ca ca ba'e tiitiije'yo onijje eyajo. Jamajjeya iYahuajo jama a'a ba'ejji, Jesosaja epeeji pojjeama jama!

Jesosa Quito cuiajji epojji nisho poeje, Emeshi Mese nei nisho poaje. Eseyca ca ca Jesosaja epeeji e'e jojo nei poani. ¹⁸ Ecuea epeeji cuana, iShajja'ajjacue mo! Yahuajo eyaya miqianaya huohuinaje jama ba'a: —Quijje Jesosa poe jjimahuajo oe dejja poeje. Oya pea, Edosiquiana neija epeeji; dejja jayojja nei neiya oya poeje. Jesosa Quito cuiajji nisho poaje; ojjaña Emeshi Mese nei nisho poaje —jamaya eyaya huohuinaje.

Jamatii jjeya nei Jesosa Quito cuiapanajji poani yani, emeshi mese nei nisho quea huiso yani pea'ai. Jamajjeya esejaya eba Jesosajji epoe o'oyajji beshahua nei apoa. ¹⁹Jiquio Jesosa Quito cuiapanajji poani cuana yahuajo pishana ese nijje nequinaje. Jamatii oya cuana Jesosajji epeeji nei pojjeama poa. Jamajjeya ese nijje nequi tiitii ajja poa. E'e, oya cuana Jesosajji epeeji nei epo jjemo ese nijje nequi tiitii'yo quiaje. Oya cuana ca ca poqui'yonaje. Jamajjeya esejaya eba oya cuana Jesosajji epeeji nei pojjeama.

²⁰Miquiana que ca ca Jesosa Quitohua Edojjoshahua Pame huojea canaje. Ohuaya miqúanaya ojjaña Jesosa Quitoja esohui e'e nei ba mee canaje. ²¹Jesosajji esohui e'e nei miqúanajaya ebajojo eyaya jiquio esohui miqúanaya huasijje tehueña. E'e, miqúanajaya eba siajjepojji cuana Jesosajji epeeji pojjeama. ²²Siajjepojji cuaa aje oe jama huohuime acani ba'a: —Jesosa ca ca oma Eyacuiñajjija huojea'yo ojjaña jaahuanajji pojjeama, Quito pojjeama.

Ojjaña joya jamaya Jesosajji poani aje oe Jesosa Quito Eyacuiñajjija Bacua Ejja pojjeama poso acani. Jamajjeya ohuaya Eyacuiñajji, esejajji Chii nei cahaa acani pea'ai. E'e, oya cuana aje oe Jesosa Quito cuiapanajji poani. ²³E'e, ojjaña joya Jesosa Quito Eyacuiñajjija Bacua Ejja pojjeama poso ajji poani Eyacuiñajji nijje jjapeequi ajja pea'ai. Joya Eyacuiñajjija Bacua Ejja nijje jjapeequiani Jesosa nijje ca ca esejajji Chii nei eyajo ani nijje pea'ai jjapeequiani.

²⁴Jamajjeya esohui quea pame nee Jesosajji, ma miqúiaa shajja'ajja coa poa ja'a pajea'yojji! ¡Jamaya atititucue! E'e, ma esohui pajea'yo ajjajo miqúanaya Eyacuiñajjija Bacua Ejja nijje jjapee tiitiquije'yo Jesosa nijje. Eyacuiñajji esejajji Chii nei nijje jjapee tiitiquije'yo pea'ai. ²⁵E'e, yahuajo nei ecuaña nijje nequiahuaa Jesosa Quitohua huohui ca poa jama ba'a: —Eyaya miqúanaya, ecuea epeeji cuana ba'e tiitii meeje'yo enijje eyajo —jamaya ecuaña huohui ca poa Jesosajji.

²⁶Ecuea epeeji cuana, eyaya jiquio esohui e'e nei tehuenaje miqúanaya huasijje siajjepojji cuana, ma Jesosa cuiapanajji epo cuana. Poquiuehua mee ca chana' mi. ²⁷Miquiana que ca ca Jesosa Quitohua Edojjoshahua Pame huojea ca'yonaje. Oya, Edojjoshahua Pame miqúanaya nijje nequi tiitiani. Ohuaya miqúanaya Jesosajji esohui e'e nei ba meesahua cani quea ja'a nee. Jamajjeya pea esohui huohuijji chamajo jamatii Edojjoshahua Pameya miqúanaya ojjaña Eyacuiñajjija esohui e'e nei ba meesahua cani quea ja'a nee. Oya siajjepojji pojjeama. Jamajjeya joya esohui cuana jayojja jama ba'ecue Jesosa Quito nijje ejjapee tiitiqui'yojji!

Jesosajji epeeji cuana

²⁸Jamajjeya ecuea epeeji cuana, ¡Jesosa Quito nijje jjapee tiitiquicue bicho'ama epojji! Jamajjeya Jesosa Quito poe o'oyajo ojo eseya mete'ama poaje. Ohua cojja ba neinei cajje eseya bicho'ama poaje'yo. ²⁹Miqúanajaya eba Jesosa Quito mimishi'ama, quea pame nee nee. Jamajjeya ojjaña joya mimishi'ama, quea pame nee nee ba'yani Jesosajji epeeji cuana poani.

3

¹¡Jjashahuabaquicue! Esegajji Chii nei Eyacuiñajjija eseya quea jea nee nee acani. Jamajjeya ohuaya jama acanaje ba'a: —Eyaya miqúanaya ecue bacua cuana po meenaje —jamaya acanaje ohuaya.

E'e, ohuaya eseya oja bacua cuana po mee ca'yonaje. Jamajjeya pea cuana Jesosa nijje jjapeequi sa po ajjajo ese nijje jjapeequi ajja pea'ai.

²Ecuea epeeji cuana, jjeya eseya Eyacuiñajjija bacua cuana. Jamatii quijje ¿ae jayojja eseya poaje'yo? Maya esejaya ba jjima jjeya. Jamatii esejaya eba Jesosa Quito poe o'oyajo eseyaya oya baje ecójja. Jamajjeya eseya jjashahuabaquiani jama ba'a: —E'e jojo nei Jesosa Quito poe o'oyajo eseya o jayojjaya nei nei poaje'yo.

³Quea pame nee nee Jesosa. Ojjaña joya jama jjashahuabaquime po'ani tii Jesosa Quitojo jja'ishoa'ajjaquiani. Mimishi cuana pajea neinei ca'yani pea'ai. Quea boejea ba'yani Jesosa Quito jayojja epo'yojjiya.

⁴Shajjama' cuaa ca ca mimishi acanijo Eyacuiñajjija ejjashahuabaquijji quea pame nee jayojja jama po ajja. E'e, jamajjeya Eyacuiñajjija esohuijo jjashajja'ajjaqui ajjaje quea mimishi poani. ⁵Esejaya eba Jesosa Quito mimishi'ama nei nei. Oya poeyanaje esejajji mimishi cuana cuijea'yohua. ⁶Jamajjeya Jesosa Quito nijje jjapeequi'yo majje eseya mimishi amaja sa po'yo ajja; pajea'yaña seya. Ojjaña joya mimishi atitii sa poani ca ca Jesosa Quito nijje jjapeequi jjima, ojaya ba jjima, de.

⁷Ecuea epeeji cuana, ¡quea ja'a nee jjashahuabaquicue pea cuanaja miqúanaya edasiajji pojjeama! Jesosa Quito quea pame nee nee, mimishi'ama. Jamajjeya ojjaña joya Jesosa Quito jayojja mimishi'ama ba'yani oya cuana quea pame nee pea'ai poani. ⁸Joya mimishi huich'a'a huich'a'ajji poani ca ca esahuaja epeeji poani. E'e, Edosiquiana nei yahuajo nei

nei yaña poa meshijo. Ohuaya mimishi acoo ca poa. Eyacuiñajijia Bacua Eja Jesosa ca ca meshi yasijje poeyanaje ojjaña cuana mimishi pajea mee'yohua, eshahua cuana quea nee nee po meeya, eshahuaja epeeji cuana pea'ai.

⁹ Esey, Eyacuiñajijia bacua cuana ca ca oe mimishi atiitii sa po'yo ajja, Edojjoshahua Pameya ecuaa huasijje edobiquinequiya eyacua po mee cani. E'e, ohuaya eseya Eyacuiñajijia ejjashahuabaquijji jayojja jama jjashahuabaqui mee cani. Jamajjeya eseya Eyacuiñajijia bacua po majje mimishi epo maja'yojji pojjeama. ¹⁰ Jamajjeya eseyaya Eyacuiñajijia bacua cuana baña jama ba'a: Ojjaña joya mimishi a sa po'yo ajja, Eyacuiñajijia esohui jayojja jama ba'yani Eyacuiñajijia bacua cuana. Ojjaña joya mimishi atiitijji poani, pea cuana quea jea a'ajja pea'ai, Jesosaja epeeji cuana nijje japeequi ajja pea'ai ca eshahuaja epeeji cuana, Edosiquianaja bacua cuana.

¡Pea cuana oe quea jea nee ejja'aqui!

¹¹ E'e ecuea epeeji cuana, ipea cuana oe quea jea nee nee ejja'aqui! Jamaya yahuajo onijje japeequi jehuaajo Jesosaa eseya huohui coo ca poa. ¹² Jamajjeya ja'a Adanaja bacua Caini jayojja jama pojji! Oya eshahuaja epeeji poa. Jamajjeya oja chahua sapa cuiahuej-jajea ca'ya poa. E'e, oja chahua quea pame poanajejo Caini onijje quea quene nee poa; quea mimishiya jjejojya oja chahua cuiahuejjajea ca'ya poa. ¹³ Jamajjeya oya jayojjaya Jesosaja epeeji pojjeamaja miquianaya boti'ama pea'ai acajje a'a jjashahuabaquijji jama ba'a: —¿Apiojji shai eya onajaya boti'ama?

Oya cuana eshahuaja epeeji cuana, Caini jayojja. Esey ca ca Jesosaja epeeji, echahua mese jayojja. Jamajjeya ese nijje quea quene nee poani.

¹⁴ Eseyaya Jesosaja epeeji cuana quea jea nee nee añ. Jamajjeya esejaya eba e'e jojo nei eseya pea jjashahuabaquime poani, yahuajo jama pojjeama. Jamajjeya eseya Eyacuiñajijii nijje ba'e titiije'yo eyajo; cuaqui yasijje epoqui'yoyji pojjeama. Joya pea cuana quea jea a'ajja ca ca quea nee nee poaje'yo, cuaqui yasijje poquije'yo tii tii pea jjashahuabaquime po'yo jjima jjejojo. ¹⁵ Joya pea cuana nijje quea quene nee nee poani aje oe pea quecuajji poani. Eseyaya eba pea quecuajji cuana eshahua nijje japeequiani tii; oya cuana eba'e titiij'yoyji pojjeama eyajo.

¹⁶ Jesosa Quito esejo mano'ya poa esejaja mimishi cuijea'yoyji. Jamaya esejaya eba e'e jojo nei eseya ojaya quea jea nee nee. Jamajjeya ¡Jesosaja epeeji cuana quea jea nee nee ejja'aqui pea'ai; oya cuana ejjaba'e meesahuaku! ¹⁷ Epeeji quea dejja taiya ca ca quea aqui ana huihohua ojaya epeeji aema' nei nei ba majje aqui ana quia jjima acani; quea mano jaa, quea shoe nee ba majje jjashahuabaqui ajja, ba'e meesahua sa po'yo ajja ojaya quea jea pojjeama jojya. Jamajjeya oya Eyacuiñajijii jayojja jama po ajja Eyacuiñajijii ojaya quea jea pojjeama jojya. ¹⁸ Ecuea epeeji cuana, ¡shajja'ajjacue mo! Pea cuana esejaya quea jea nee poanijo ¡oya cuana quea pame nee nee ejjaba'e meesahuaku! Jamaya quea pame nee. Eseyaya pea cuana quea pame ajjimajo ca ca jama siajje pome se poani ba'a: —Pea cuana ca ca ecuea quea jea nee poani —jama siajje pomeya se poani.

¡Pea cuana quea jea ejja'aqui Eyacuiñajijio bicho'ama epojji!

¹⁹ E'e, Jesosaja epeeji cuana quea jea nee eseya añajo Jesosaja esohui e'e nei jayojja jama ba'yani, Jesosa nijje japeequiani quea pame nee nee pea'ai. Jamajjeya Eyacuiñajijii cojja nei nequi majje bicho'ama eseya poaje'yo. ²⁰ E'e pojja'a eseya quea yeno jjashahuabaquiani jama ba'a: —Eseyaya Eyacuiñajijia eba nei nei. Ojaya eya eba quea mimishi poanaje —jamaya pojja'a poani.

¡Bacue! Eyacuiñajijia eseya mimishi cuijea ca poqui yani. Jamajjeya ¡yeno'ama pocue! ²¹ E'e epeeji cuana, eseya ejjashahuabaqui jama ba'a: —Eya Jesosa nijje japeequiani. Jamajjeya Eyacuiñajijia ecuea mimishi cuijea ca'yonaje. Enijje quea bei poani.

Jamaya e'e jojo nei poanijo eseya bicho'ama poani Eyacuiñajijii nijje emimijji. ²² E'e, Eyacuiñajijia esohui jayojja jama eseya añajo, Jesosa nijje japeequianijo pea'ai Eyacuiñajijii quea bihui nee ese nijje poaje. Jamajjeya onijje mimiajo ohuaya eseya shajja'ajja caje. Ma ecua eseya onijje miminaje jamaya ohuaya acaje.

²³ E'e, Eyacuiñajijia eseya huohui ca poa jama ba'a: —¡Ecue Bacua Eja Jesosa Quito nijje japeequicue! ¡Jesosaja epeeji cuana quea jea nee nee acue pea'ai! —jamaya ohuaya eseya huohui ca poa.

²⁴ Ojjaña joya Eyacuiñajijia esohui jayojja jama ajji poani Eyacuiñajijii nijje japeequiani. Eyacuiñajijii ona nijje japeequiani pea'ai. Eyacuiñajijia Edojjoshahua Pame huoojea canaje ese que dobiquiya. Ohuaya eseya ba mee cani Eyacuiñajijii ese nijje nequi.

4

Jesosaja epeeji nishohua mi dasia ca chana'

¹ Ecuea epeeji cuana, ¡ojjaña esohui huohuijji cuanaja esohui a'a shajja'ajjajji! Chojja, beca cuana Edojjoshahua Pameja huoojea'yo pojjeama, esohui huohuijji nisho. Jamajjeya ¡ojjaña cuana ba neineicue! Quea ja'a nee ¡jashahuabaquicue jama ba'a: —¿A'a oya cuana Eyacuiñajjija esohui e'e nei jayojja jama huohui cani?

E'e, quea huiso siajpeojji cuana ojjaña huasijje poquiani. Siajje poani jama ba'a: —Eyacuiñajjija oya huoojea canaje ojaya esohui huohuijji.

² Jamajjeya Eyacuiñajjija esohui huohuijji e'e nei miquea eba poaje jama ba'a: Edojjoshahua Pameya oya cuana huohui meesahua caje jama ba'a: —Jesosa Quito ese jayojjaya yamijji poeyanaje.

Jamajjeya jamaya ohua huohui cajo miquea eba oya cuana Edojjoshahua Pameja huoojea'yo esohui huohuijji poani.

³ Pea cuaa ca ca esohui huohuijji nishohua jamaya huohui ajja. Chojja, oya cuana siajje poani jama ba'a: —Jesosa Eyacuiñajjija huoojea'yo ojjaña ¡aahuanajji pojjeama. Eyacuiñajjija Bacua Ejja meshi yasijje poe ¡jima dejja jayojja yamijji —jamaya huohui canijo aje oe miqüianajaya eba oya cuana esohui huohuijji nisho, Jesosa Quito quecuajji nisho epo. Eyacuiñajjija oya cuana huoojea ¡jima.

Yahuajo eyaya miqüianaya huohuinaje oya cuana poeje. ¡jeyahua nei oya yani quea huiso. Ojjaña huasijje poquínaje ¡jadasiaquiya.

⁴ Ecuea epeeji cuana, miqüianaya ca ca Eyacuiñajjija bacua cuana poanaje. Jamajjeya ohuaya miqüianaya dasia mee ¡jima acani Jesosaja epeeji pojjeama cuana. Miqüianaya ona ¡eabichajeajji jayojja jama poani. E'e, Eyacuiñajjija Edojjoshahua Pame miqüianajo nequi ca ca oe quea ca'a nee nee. Eshahua cuana, Edosiquiana quea ca'a pishana. Eshahua miqüianaya quea mimishi po mee'ajja cani. ⁵ Esohui huohuijji nisho cuana eshahua nijje ¡japeequianiya ¡jjejo Eyacuiñajjija esohui jayojja jama huohui ajja. Eba'ejji quea mimishi onaaya quea boti nee nee acani. Dejja mimishiya jayojjaya huohui cani. Jamajjeya mimishi cuaa oya cuana shajja'ajja cani. ⁶ Eseyca ca ca Eyacuiñajjija bacua cuana poani. Jamajjeya Jesosaja epeeji cuana Eyacuiñajji nijje ¡japeequiani pea'ayia ¡jjejo esejaya esohui shajja'ajja cani. Pea cuana Jesosaja epeeji pojjeama ca ca Eyacuiñajji nijje ¡japeequi sa po'yo ajja; ecuanaajaya esohui shajja'ajja sa po'yo ajja. Jamajjeya Jesosaja epeeji nei esejaya eba; ohuaya esejaya esohui shajja'ajja cani. Pea cuana, eshahuaaja epeeji cuana esejaya eba pea'ai; oya cuana esejaya esohui shajja'ajja sa po'yo ajja.

Ojjaña Eyacuiñajjija quea boti nee poani

⁷ Epeeji cuana, miqüianaya ecuea quea jea nee poani. Ojjaña cuana Eyacuiñajjija quea jea nee nee poani. Jamajjeya pea cuana quea jea nee nee eja'aqui tii tii. E'e, jamajjeya eseya Eyacuiñajjija bacua poanijo o jayojja jama poani. Pea cuana quea jea nee nee eja'aqui Jesosa nijje ¡japeequianijo. ⁸ Ojjaña joya pea cuana boti'ama poani ca ca Eyacuiñajji nijje ¡japeequi ajja, Eyacuiñajji ba po ¡jima pea'ai. E'e, Eyacuiñajjija ojjaña cuana quea jea nee acani tii tii. ⁹ Eseyca cuana ojaya quea jea nee nee. Jamajjeya ohuaya oja Bacua Ejja oe nei Jesosa huoojea ca poa ese que, ¡iquio meshi yasijje. Jama ohua acanajejoya, ojjaña eba eseya Eyacuiñajjija quea jea nee nee acani. E'e, Jesosa ese que poeyanaje esejaja mimishi cuana cuijea'yohua. Jamajjeya eseya onijje ba'e titii mee caje'yo eyajo quea pame nee nee. ¹⁰ ¡Bacue! Yahuajo nei esejaya Eyacuiñajji boti'ama poa. Jamatü ohuaya ca ca oe ebionei eseya quea jea nee aca poa. Jamajjeya ohuaya ojaya Ebacua Ejja Jesosa Quito huoojea ca poa ese que, mano'yohua esejaja mimishi cuijea'yojji soseje. ¹¹ Ecuea epeeji cuana, Eyacuiñajjija eseya quea jea nee nee acanaje; jamajjeya ¡pea cuana quea jea nee nee eja'aqui! ¹² Yahuajo, ¡jeya nei pea'ai esejaya Eyacuiñajji ba ¡jima ecojjaja. Jamatü esejaya ojaya epeeji cuana quea jea poanijo tii Eyacuiñajji ese nijje nequiani. Ohuaya eseya pea cuana quea jea nee nee po meesahua cani. Jamaya Eyacuiñajji sa poani.

¹³ E'e, Eyacuiñajjija Edojjoshahua Pame ese que dobiqüiya huoojea canaje. Jamajjeya Edojjoshahua Pameya eseya ba meesahua cani Eyacuiñajji ese nijje nequiani, eseya onijje ¡japeequiani pea'ai.

¹⁴ Epeeji cuana, eyaya Jesosa banaje ecojjaa. Jamajjeya ojjaña huasijje jama huohuimeya aña. Eseyca Chii nei eyajo aniya oja Bacua Ejja Jesosa huoojea canaje meshi yasijje mano'yohua, ojjaña cuana ojjaña meshijo ba'eca cuanaja mimishi cuana cuijea'yohua onijje eyajo eba'e titii mee'yojji. ¹⁵ Jamajjeya eseyaya jama huohuime aña ba'a: —Jesosa Eyacuiñajjija Bacua Ejja oe nei.

Ojjaña joya jama poaniya e'e jojo nei Eyacuiñajjija bacua cuana poani. Eyacuiñajji onijje nequiani pea'ai. ¹⁶ Eseyca eba e'e jojo nei Eyacuiñajjija eseya quea jea nee nee acani.

Eyacuiñajjija ca ca oe ojjaña quea jea nee nee acani. Jamajjeya ojjaña joya pea cuana quea jea nee nee ajji poani pea'ai ca ca oe Eyacuiñajji nijje ¡japee neineiquiani. Eyacuiñajji ma dejja cuana nijjeya nequiani pea'ai. ¹⁷ Jamajjeya Eyacuiñajji esejaya quea jea nee nee

poanijo pea cuana quea jea nee nee eija'aqui Jesosa Quito jayoija jama epojji. Jamajjeya eseya bicho'ama poaje Eyacuiñajji. Jesosa Quito poe o'oya majje ohuaya ojjaña eseya sosequia caje'yo ma eseya meshijo ba'eya anaje sosejje. Shajjama' cuana ca ca ohuaya quea nee nee po mee caje'yo. Ojaya epeeji quea pame nee cuana ca ca ohuaya ba'e tiitii mee caje'yo onijje eyajo. ¹⁸ Eseyaya eba Eyacuiñajji, pea cuana pea'ai esejaya quea jea nee nee poanijo eseya mete'ama nei nei poaje. E'e, Eyacuiñajji esejaya quea jea neejojo eseya jashahuabaquiani jama ba'a: —Eyacuiñajji enijje quea tecue epojji pojjeama.

Jamajjeya mete'ama poani. Ojjaña joya Eyacuiñajji quea jea a'ajja ca ca quea mete poani. Jashahuabaquiani jama ba'a: —Eyacuiñajji enijje quea tecue nee nee poaje —jamaya jashahuabaquiani Jesosaja epeeji pojjeama poani. ¹⁹ E'e, yahuajo nei nei Eyacuiñajji Jesosaja epeeji pojjeama cuana quea jea nee nee acanaje. Jamajjeya Eyacuiñajji quea jea nee nee eija'aqui, pea cuana eseyaya quea jea nee nee eija'aqui pea'ai. ²⁰ Beca cuana jama poani ba'a: —Ecuea Eyacuiñajji quea jea nee nee.

Jamatii oya cuana Jesosaja epeeji cuana quea jea nee a'ajja. Jamajjeya oya cuana siajje poani. Pea cuana cojja ba majje boti'ama acani. Jamajjeya ojaya Eyacuiñajji quea jea nee e'ajji pojjeama ca ba jjima ecojjaja. ²¹ Eyacuiñajji eseya huohui ca poa jama ba'a: —Eya, Eyacuiñajji miqúanajaya quea jea nee nee poanijo ¡pea cuana quea jea nee acue pea'ai!

5

Jesosa eseya Edosiquiana jeabichajea mee cani

¹ Ojjaña Jesosaja epeeji cuana jashahuabaquiani jama ba'a: —Jesosa Eyacuiñajji huoojea'yo ojjaña jaahuanajji.

Eseyaya jamaya jashahuabaquiani, Eyacuiñajji eseya oja bacua cuana po mee cani. Ojjaña joya Eyacuiñajji, esejaya Chii nei eyajo ani quea jea nee nee aji poani Eyacuiñajji Bacua Eija Jesosa quea jea nee aji poani pea'ai. ² Oya jayojjaya Eyacuiñajji esejaya quea jea nee neejo, ojaya esohui jayoija jama poanijo pea'ai esejaya eba jama ba'a: Ojjaña Jesosaja epeeji cuana, Eyacuiñajji bacua cuana esejaya quea jea nee poani. ³ Eyacuiñajji e'e jojo nei esejaya quea jea nee poanijo jiquio ecua ojaya esohui etehue'yo cuana jayoija jama poani. Ohuaya eseya jamaya ameesahua canijo, ojaya esohui cuana camaja'ama. ⁴ E'e, eseya Jesosa nijje jjapeequiani. Jamajjeya eshahuaja epeeji cuana mimiciuajeanobiajeaña. Eyacuiñajji bacua cuana poanijo eseyaya mimishi cuana mimiciuajeanobiajeaña. Mimishi'ama ba'e mee aña pea'ai. ⁵ E'e jojo nei Jesosa Eyacuiñajji Bacua Eija oe nei. Jamaya jashahuabaquiani, onijje jjapeequiani eseya mimishi'ama ba'eje. Eshahuaja epeeji cuana mimiciuajeanobiajeaña pea'ai.

Ehuohui'yo Jesosa Quitojo

⁶ Jesosa Quito meshi yasijje poeyajo, Huaniya oya enajo besa mee ca poa Eyacuiñajji. Majoya ojaya ena' cuayaquijajo Jesosa mano'ya poa esejaya mimishi cuijea'yojji sosejje. Jamaya Edojoshahua Pameya huohui ca poa Jesosa Quitojo. Ojaya esohui Jesosajo e'e nei poani. E'e, Edojoshahua Pame siajje po a'ajja nei nei. ⁷ E'e, pea beca peejjima eyajo nequiya jamaya huohui caní Jesosa Quitojo. E'e, Echii neiya, Ebacua Ejjaa, Edojoshahua Pameya pea'ai, mahuisohuaya oya jayojjaya huohui caní Jesosa Eyacuiñajji Bacua Eija. ⁸ Jiquio meshijo pea'ai pea beca peejjima Jesosa Quitojo huohui caní pea'ai. E'e, Edojoshahua Pameya jamaya huohui caní Jesosajo. Pea Jesosa besa mee cajo Eyacuiñajji huohui ca poa jama ba'a: “Jesosa ecuea Ebacua Eija quea jea nee nee” aca poa. Jesosa mano'yajo ojaya ena' cuayaqui'yonajejo pea'ai ojjaña jama aca poa ba'a: “Oya Jesosa e'e jojo nei Eyacuiñajji Bacua Eija nei” poa. Mahuisohuaya oya jayojjaya Jesosa Quitojo huohui caní. Jamajjeya esejaya eba e'e jojo nei Jesosa Eyacuiñajji Bacua Eija. ⁹ E'e, dejja cuanaja Jesosa ba neinei jjima. Jamatii onajaya esohui eseyaya shajja'ajjaña. Eyacuiñajji esohui Jesosajo ca ca e'e nei nei. ¡Maya oe ejjashajja'ajja neineiqui! Ohuaya yahuajo huohui ca poa jama ba'a: —Jesosa ecue Bacua Eija.

¹⁰ Jamajjeya ojjaña joya jama poani ba'a: —Jesosa Eyacuiñajji Bacua Eija e'e jojo nei —jamaya poanijo Edojoshahua Pame ese nijje nequi. Jamaya jashahuabaqui sa po'yo ajjajo ca ca siajje poani jama ba'a: —Chojja, Jesosa Eyacuiñajji Bacua Eija pojjeama. Eyacuiñajji ecua siajje aca poa —jama siajje pomeya poani cuana.

¹¹ E'e, Eyacuiñajji eseya huohui canaje jama ba'a: —Eyaya ecue Ebacua Eija Jesosa huoojeanaje miqúan ba'e tiitii mee'yohua. Onijje jjapeequijajo miqúanaya ba'e tiitii mee'yo eyajo onijje —Eyacuiñajji jamaya poanaje.

¹² Jamajjeya oja Bacua Eija Jesosa nijje jjapeequijajo, Eyacuiñajji eseya cuana ba'e tiitii mee caje'yo onijje eyajo. Onijje jjapeequi sa po'yo ajjajo ca se ca Eyacuiñajji Bacua Jesosa nijje eba'e mee'yojji pojjeama eyajo; quea nee nee poaje'yo tiitii.

Eba'ejji quea pame nee eyajo

¹³ Ecuea epeeji cuana, miqúanaya Eyacuíñajjija Bacua Ejja Jesosa nijje e'e jojo nei jjapeequiani. Jamajjeya eyaya jiquio esohui tehueañia miqúanana ba meeji e'e jojo nei onijje eba'e tiitii'yoyji eyajo. ¹⁴ Eseyaya eba e'e jojo nei jama ba'a: Eseyaya ojaya ejjashahuabaquijji jayojja jama añajo, Eyacuíñajji eseja Chii nei nijje mimianijo ohuaya eseya shajja'ajja cani. ¹⁵ E'e, o jayojjaya jjashahuabaquime poanijo e'e jojo nei Eyacuíñajjija shajja'ajja caje eseyaya emimi onijje. Jamajjeya eseyaya emimi onijje jayojja jama ohuaya acaje'yo. Jamajjeya eseya bicho'ama onijje emimijji.

¡Eseyaya epeeji quea mimishi poanijo mimicie Eyacuíñajji nijje!

¹⁶ Epeeji cuana, Jesosaja epeeji quea mimishi poani ba majje ¡ma epeejjijoya oe mimicie Eyacuíñajji nijje oja mimishi ecuijea'yoyji, o ba'e tiitii mee'yoyji! Jamajjeya Eyacuíñajjiya oja mimishi cuijea caje'yo. Pea epeeji cuanaajo, coya quea mimishi nee nee po tiitianijo ecuea miqúanaya ehuohuijji pojjeama ojo emimijji Eyacuíñajji nijje jama ba'a: —Eyacuíñajji, ¡a'a ma epeeji quea nee po meeji jamatii quea mimishi atiitii canijo! —chojja, ¡a'a jamaya mimijji Eyacuíñajji nijje ma dejjajo! Eyacuíñajjiya joya quea mimishi nee nee ajji poani cuana quea nee nee po mee caje'yo. ¹⁷ Eyacuíñajjija esohui jayojja jama a'ajjajo eseya quea mimishi poani. Jamatii mimishi amajje eseya Eyacuíñajji nijje mimi'yajo ohuaya eseyaya mimishi cuijea caje'yo. Joya mimishi quea tai nee nee ajji tii tii poani ca ca Eyacuíñajjiya quea nee nee po mee caje'yo.

Esohui quiijjeyeye nei tehue

¹⁸ Ecuea epeeji cuana, eseyaya eba Eyacuíñajjija bacua cuana, ma ohua quea pame nee po mee ca'yonaje quea mimishi tii tii po'yo ajja, pajea ca'yonaje. Eyacuíñajjija Bacua Ejja, Jesosa Quitohua ojaya epeeji cuana jaahuana cani, nahue cani Edosiquianaja quea mimishi epo mee'yoyji pojjeama. ¹⁹ Eseyaya eba pea'ai eseya Jesosaja epeeji poani, Eyacuíñajjija bacua cuana poani. Pea cuana ca ca eshahuaaja epeeji poani. Edosiquiana aje oe ona huoojeajji poani. ²⁰ Eseyaya eba pea'ai Eyacuíñajjija Bacua Ejja, Jesosa meshi yasijje poeyanaje. Ohuaya eseya quea ja'a nee nee jjashahuabaqui meesahua cani. Jamajjeya ohuaya eseya Eyacuíñajji e'e nei ba meesahua cani. Jamajjeya eseya Eyacuíñajjija Bacua Ejja oe nei nijje, Jesosa Quito nijje jjapeequi majje eseya Eyacuíñajjija bacua cuana poani. Jesosaja Chii ca ca oe Eyacuíñajji e'e nei ese ba'e tiitii mee'yoyji poani. ²¹ Jamajjeya ecuea epeeji cuana, ¡a'a esahua cuana nijje mimijji, eyacuíñajji nisho nijje pea'ai a'a mimijji! Jamaya capohua.

Mahuiso ecuea esohui. Eyaya, Huani bajjaníya jiquio esohui tehuenaje miqúanajaya ebajji. Apoa.

HUANIJA ETEHUE'YO BECANEJJIIJI PEA'AI 2 JUAN

Huaniya tehue canaje epona quea pame nee que oja bacua cuana huasijje pea'ai

¹ Eya Huani, Jesosaja epeeji jaahuanajji etii. Ecuea epeeji Senia, eyaya mi que tehueaña; miquea ebacua cuana huasijje pea'ai tehueaña. Miya epona quea pame nee, Jesosaja epeeji nei. Jamajjeya miya e'e jojo nei ecuea quea jea nee. Ojjaña Jesosaja epeeji cuaa miya quea jea nee acani pea'ai. ² E'e, eseyaya Eyacuiñajjija esohui quea jea nee aña. Ojaya esohui e'e nei. Jamajjeya eseya jashahuabaquiani ma esohuijoya; pajea'yo ajja tii tii. Eyacuiñajjija esohui jayojja se ba'yani pea'ai. Jamajjeya ojaya epeeji cuana quea jea nee nei aña, eseyaya.

³ Eyacuiñajji esejaya Chii nei; ojaya Ebacua Eija oe nei Jesosa Quito esejaya Emeshi Mese nei. ¡Ohuaya eseya caba'e meesahua cahua quea pame nee! ¡Esejo quea bei caj-jashahuabaquiahua pea'ai! Ohuaya eseya quea bei po mee cani mimishi cuijea ca'yajje. Jamajjeya eseyaya ojjaña Jesosaja epeeji cuana quea jea nee aña e'e jojo nei.

Esohui e'e nei

⁴ Senia, eyaya miquea ebacua beca cuana banaje. Oya cuana Eyacuiñajjija esohui e'e jojo nei jama poani. Jamajjeya eya quea bihui nee nee poani. ⁵ Jamajjeya ecuea epeeji, eyaya Eyacuiñajjija esohui huohui o'oyaña mi que, ma eyaya yahuajo huohuinaje. Jiquio esohui eyacua pojjeama. E'e, yahuajo ojaya esohui jama poanaje ba'a: "¡Jesosaja epeeji cuaa ojjaña ojaya epeeji cuana quea jea nee ca'a cahua!" ⁶ Eyacuiñajji esejaya quea jea nee poanijo ojaya esohui jama epo tiitii'yo. Ojaya esohui yahuajo jama poa ba'a: "¡Pea cuana miqiaiyaya quea jea nee nee atiiitucue!"

⁷ Epeeji, quea huiso esohui huohuijii nisho cuana poquiani ojjaña meshi cuana huasijje. Dasia cani, de. Jiquio esohui huohuijii nisho cuana jama siajje pome poani ba'a: —Jesosa Eyacuiñajji e'e jojo nei pojjeama, Eyacuiñajjija huoojea'yo dejja jaahuanajji Quito bajjani pojjeama. Quito dejja jayojjaya yamijji meshi yasijje poe'yo jjima —jama siajje pomeya poani cuana. Ma siajjepojji cuana Jesosaja epeeji pojjeama; o cuiapanajji poani. Quea huiso cuana dasia cani. ⁸ ¡Jashahuaba tiitiiquicue quea ja'a nee! Jamajjeya ojaya miqianaya edasia'yojji pojjeama. E'e, Jesosajo ba'yanijo, ojo chacoaña quea pame neejo pea'ai, quijje eseya quea huiso sosequia caje'yo Eyacuiñajjiya, eyajo. Ma siajjepojji cuaa miqianaya dasia ca chana'; onijje poquiquehuajo ca ca miqianaya aema' jayojja jama poaje'yo Jesosa poe o'oyajo.

⁹ Joya Jesosaja esohui jama a sa po ajja aje oe Eyacuiñajjija epeeji pojjeama. Eseya Jesosaja esohui jama poanijo ca ca Eyacuiñajji nijje jjapeequiani e'e jojo nei; oja Bacua nijje, Jesosa Quito nijje jjapeequiani e'e jojo nei pea'ai. ¹⁰ Pea dejja cuana miqianajaya equi yasijje poeyanijo, oya cuana Jesosaja esohui e'e jojo nei huohui sa po ajjajo, ¡a'a jama ajji ba'a: —Epeeji, ¡ecuea equi yasijje dohicue! —a'a ajji! Chojja, oya Eyacuiñajjija epeeji pojjeama. ¹¹ Onijje jjapeequianijo oya miyaya quea mimishi po meesahuaña. Jamaya quea tai.

Pea esohui oe neiya huohui cani Huaniya

¹² Quea huiso esohui huohui sa eyaya aña miqiana que. Ma esohui cuana ecuea etehuejji pojjeama. Quijje eya miqiana que poqui sa poani. Miqiana nijje nequi majje eyaya quea huiso pea esohui huohuije. E'e, eseya ojee po'yo majje quea bihui nee nee poaje'yo.

¹³ Mique shehueja bacua cuaa jama acanaje ba'a: —A'i, ¿achajja acuae mi ani so'o?

Mahuiso ecuea esohui. Eyaya, Huaniya, Jesosaja epeeji jaahuanajji etiiya jiquio esohui tehuenaje. Apoa.

HUANIJA PEA ETEHUE'YO PEA BECA PEEJJIMA 3 JUAN

Huanija pea etehue'yo, quijjeeyje nei oja tehue

¹ Eya Huani, Jesosaja epeeji jaahuanajji etii. Ecuea epeeji Cayo, eyaya jiquio esohui tehueaña miquea ebajji. Eseyaya quea boti nee nee Jesosaja esohui e'e nei. Jamajjeya miya ecuea epeeji nei, ecuea quea boti nee nee. ² Ecuea epeeji, eya Eyacuiñajji nijje mimiani mijo jama ba'a: —Eyacuiñajji, ¡ecuea epeeji Cayo jaahuanacue! Oya Jesosa nijje quea ja'a nee jjapeequiani. Jamajjeya ¡oya quea ja'a nee ba'e meesahuacue! —eya poani.

³ Jesosaja pea epeeji cuana e que poeyanaje. Ohuaya eya huohui canaje jama ba'a: —Cayo quea pame nee nee ba'yaní. Ohuaya Eyacuiñajjija esohui ¡jayojja jama atitií caní —eya acanaje pea cuaa.

E'e, miya Eyacuiñajji nijje jjapeequiani quea pame nee. Jamajjeya eya quea bhui nee nee poani mijo. ⁴ E'e, ojjaña Jesosaja epeeji cuana ecue bacua cuana jama. Jamajjeya Jesosaja esohui quea pame nee jama ba'yaní, eya quea bhui nee nee poani shajja'ajja majje.

Huani quea bhui nee poani Cayojo

⁵ Ecuea epeeji Cayo, miyaya Jesosaja epeeji yahuaño miquea eba pojjeama cuana jaahuanaña quea pame nee, mi que poeyajo. ⁶ Jamajjeya Jesosaja epeeji cuaa poe majje ecua huohui canaje jama ba'a: —Cayohua Jesosaja epeeji cuana quea jea nee acaní —jamaya onaaya eya acaña'yonaje.

¡Jesosaja epeeji cuana poqui meesahuacue! Jamaya quea pame nee. Eyacuiñajjijo chaco canijo, oya cuana ojaya quea boti nee. Jamajjeya ¡miyaya oya cuana jaahuanacue quea pame nee; a'a jaahuana pajea'yojji! ⁷ Oya cuana poquiani ojjaña meshi cuana huasijje Jesosaja esohui huohuiya. Poquije oya cuana Jesosaja epeeji pojjeama nijje mimi jjima poani jama ba'a: —¡Ba'e meesahuacue mo! —jama po ajjaya oya cuana. ⁸ Jamajjeya eseyaya Jesosaja epeeji poaniya ¡Jesosaja esohui huohuijji cuana poqui meesahuacue! Jamaya eseya o jayojjaya Jesosaja echacojji poani.

Dejja Diotepe bajjani quea mimishi poanaje

⁹ Eyaya esohui tehue'yonaje Jesosaja epeeji cuana jomajo tii ba'e yasijje. Jamatii Diotepeya ecuea etehue'yo jama a sa po'yo ajja. Jomajo tii oya Jesosaja epeeji cuana jaahuanajji oe nei nequi sa poani, Diotepe. Oya mimi sa po ajja jama ba'a: —E'e, Eyacuiñajjiya Huani huoojea ca'yonaje. Jamajjeya ¡Huanija esohui shajja'ajjacue!

¹⁰ Miquiana que poe'yo majje eyaya huohuije'yo Diotepe ba'yaní quea mimishijo. Oya ecuanajo maimaiani, niñeba caní quea tai. Sijje poani. Jesosaja pea esohui huohuijji cuana oque poquajo, Diotepe onijje jjapeequi'yo ajja. Oya o bobia ajja. Pea cuana bobia mee ajja pea'ai. Onaa bobia sa acanijo, oya quea tecue poani: —¡Pea esohui huohuijji bobia sa añajo miquianaya aje oe Jesosaja epeeji pojjeama! Jamajjeya ¡a'a ecua niije jjapeequijji! —jamaya acaní Diotepeya.

¹¹ Ecuea epeeji Cayo, ¡a'a dejja quea mimishi jama pojji! Dejja cuana quea pame poani cuana Jesosaja epeeji poani. Quea mimishi poani ca ca Jesosaja epeeji pojjeama.

Dejja Demetio bajjani quea pame poani

¹² Ojjaña dejja cuana quea bhui nee mimiani Demetiojo jiquio jama ba'a: —Demetiohua quea pame nee acaní —poani cuana. E'e, Edojjoshahua Pameya Demetiojo Jesosaja epeeji cuana mimi meesahua caní quea pame nee. Ecuea esohui ojo e'e nei poani. Jamaya miquea eba.

Esohui quea bhui nee epo meeji

¹³ Cayo, quea huiso esohui huohui sa poani eya mi que. Tehuetehue majamaja sa po ajja ca iña. ¹⁴ Jamajjeya quijje pishana eya poqui sa poani mi ba o'oyaa. Mi ba majje mimije o'oya. ¹⁵ ¡Eyacuiñajjiya miya quea bei nee capo mee cahua! Ojjaña miquea epeeji cuana jiquiojo ba'eya jama acaní ba'a: —¿Achajja acuae mi ani so'o, Cayo?

¡Ojjaña ecuanaja epeeji cuana nijje mimicue ejo jama ba'a: —¿Achajja acuae nequiana so'o? Huani poani —acue!

Mahuiso. Eyaya, Huaniya, Jesosaja epeeji cuana jaahuanajji etiiya jiquio esohui tehuenaje. Apoa.

JODEJA ESOHUI JUDAS

Jodeya esohui tehue canaje Jesosaja epeeji cuana huasijje

¹ Eya Jode, Satiacoja chahua. Eya Jesosa Quitoja huoojea'yo. Ecuea epeeji cuana, eyaya miqiana que tehueña jama ba'a: Eseyaya Chii ai Eyacuiñajjiya miqianaya iyaa ca'yonaje onijje ejjapeequi meesahua'yojji. Miqianaya ojaya quea jea nee nee poani; Jesosa Quitohua miqianaya jaahuana cani pea'ai. ² ¡Eyacuiñajjiya miqianaya quea jea nee ca'a cahua tii! ¡Miqianaya caba'e meesahua cahua quea ja'a nee! ¡Quea bei nee caba'e meesahua cahua pea'ai!

Esohui huohuiji nisho cuana

³ Ecuea epeeji cuana, yahuajo eya jjashahuaba neineiquinaje miqiana que esohui etehueji, Jesosa Quitohua esejaya mimishi cuana cuijea ca'yonajejo eba meeji. Jjeya ca ca quea huiso jjashahuabaqui majje eyaya pea esohui tehueña miqiana que jama ba'a: ¡Huohui neineicue Jesosa Quitoja esohui! Eyacuiñajjiya ma esohui e'e jojo nei huoojea canaje ese que, ma ojaya epeeji nei cuana que. ¡Ma esohui quea pame nee a'a huohui taijji!

⁴ E'e, eyaya jamaya huohuiaña Eyacuiñajjiya esohui huohuiji nisho cuana. Ma dejja quea mimishi cuana Jesosaja epeeji cuana nijje jjapee nishoquiani. Quea mimishi atitii sa poanijo oya cuana jama siajje pome poani ba'a: —Eyacuiñajji quea pame nee poani; dejja cuana quea mimishi jamatii caba'yahua; cuaqui yasijje ehoojea'yojji pojjeama Eyacuiñajjiya —jamaya poani esohui huohuiji nisho.

Ma esohui huohuiji nishohua Jesosa Quito, esejaya Emeshi Mese nei oe nei cajaa aca'yonaje. Yahuajo nei nei Eyacuiñajjiya esohui tehueji cuaa esohui tehue ca poa ma dejja quea mimishijoya. Jama tehueme aca poa ba'a: “Quijje Eyacuiñajjiya esohui huohuiji nisho cuana tecuea neinei caje'yo, de”.

⁵ ¿Yajja acuae Eyacuiñajjiya aca poa yahuajo Isaeni etiiquiana shajjama' poajo? Miqianaya eba; jamatii miqianaya eyaya huohuije o'oya. Yahuajo Eyacuiñajjiya Ejito dejja quea mase cuana Isaeni cuana pichojea mee ca'ya poa; Ejito meshijo ba'e cuaya meesahuaqui ca'ya poa pea'ai. Jamatii quijje pishana Isaeni cuana ojaya esohui shajja'ajja sa po ajja poajo, quea huiso mano mee ca'ya poa. ⁶ Cuanaya yahuajo Eyacuiñajjiya esohuidojojji beca cuana quea mimishi poa eyajo ba'e. Eyacuiñajjiya ehoojea yajoyja jama chaco tiiti sa po ajja poa. Jamajjeya Eyacuiñajjiya oya cuana iña majje jeyo ca'ya poa; quea huesha nee nee jeanobiajea ca'ya poa, cuayaqui mee'yo jjima aca'ya poa. Quijje Jesosa Quitohua poe o'oya majje esohuidojojji tai janobajjima nei tecueajea caje'yo quea nee nee epo mee tiiti'yojji. ⁷ Yahuajo nei Sonoma cuiñajji, Jomona cuiñajji pea'ai, pea cuiñajji sisi quea chipi nee yaña poa. Jomajo dejja quea huiso cuana quea mimishi nee nee poa. Pea dejja cuana see huejja cojojji poa, de. Quea mimishi nee nee jjashahuaba tiitiqqui nequia poa. Eshuidojojji quea tai jayoyja jama quea mimishi poa. Jamajjeya Eyacuiñajjiya oya cuana, ma dejja quea mimishi cuana pea'ai quiyo jeyojeoyea mee ca'ya poa cuaquiya. Jamajjeya ojjaña cuana jjeya ba'e ba mee caje Eyacuiñajji mimishijo quea quene nee nee poani; cuaquijo quea nee nee po mee caje'yo mimishi poani cuana. ⁸ Maya jiquio esohui huohuiji nishoja eba, ma jjeya nei miqiana que poeyanija eba. Jamatii jjeya oya cuana quea mimishi nee nee poani; yahuajo nei nei ba'e cuana jayoyjaya jama poani. Ojaya ejjashahuabaqui'yoyji quea tai poani cuanaya. Eyacuiñajjiya ehoojea'yo cuana shajja'ajja sa po'yo ajja pea'ai. Eyacuiñajjiya esohuidojojji quea ca'a cuana niñeba cani pea'ai jama ba'a: —Ecuanaja ejjacahuabaquiiji Eyacuiñajjiyo e'e nei.

⁹ Jamatii Eyacuiñajjiya esohuidojojji quea ca'a nee nee Miyeni bajjani pea esohuidojojji quea mimishi nijje mimijaji jjima poa. Yahuajo Moisesi mano'yajo, Miyeniya Moisesija eyami ohuajea sa aca poa; Edosiquiana ca ca Moisesija eyami ohuajea mee sa po ajja poa. Miyeniya Edosiquiana mimicuijjeanobiajea canaje, jamatii onijje mimijaji jjima poa. Jamaya miminaje ba'a: —¡Eyacuiñajjiya oe miya catecuea cahua, ca joya mimishishiqui! —aca poa.

¹⁰ Miqiana nijje nequi esohui huohuiji nishohua ca ca aquiana joya ojaya ba jjimajo niñeba cani quea mimishiya jjejojo. Jjashahuaba bamebamequi ajja oya cuana. Ijjiacajji jayoyja jjejojo jjashahuabaqui ajja poani; quea ja'a po ajja. Jamajjeya quea mimishi tii poani jjejojo cuaquijo tii nequi tiitiije'yo. ¹¹ Eyacuiñajjiya oya cuana quea yeno capo mee tiiti cahua jjashajja'ajjaqui ajja jjojya. Esohui huohuiji nisho cuana dejja bajjani Cainija ejjashahuabaqui'yoyji jayoyja jama poani, quea mase nee, quea bejjo nahue jjejojo. E'e, esohui huohuiji quea pame cuana niñeba cani tii tii. Mimijaji neineiani. Quea mimishi

tii tii poani, dejja Banaami bajjani jayoija jama poani, ma yahuajo nei quea bejjo nahue poaninaje. Jamajjeya ohuaya esohui huohui tai caninaje. Onaya cuana shajjama' poani, dejja Cone bajjani jayoija jama, ma yahuajo Eyacuiñajjiya esohui shajja'ajja sa po ajja poa. Jamajjeya Eyacuiñajjiya ma ecua dejja tai cuana yahuajo mano mee ca'ya poa jayoija jama jjeya esohui huohuijji nisho cuana acaje'yo.

¹² Jiquio esohui huohuijji nisho cuana quea mimishi nee nee. Miqúanaya ojee Jesosa Quitoja bobi ijiañajo, quea bihui nee poanijo, oya cuana jama poani ba'a: —Ecuana miquea epeeji poani.

Chojja. Miqúanaya dasia cani. Miqúanaya nijje ijia'ijjianijo jeje ajja, quea bobi nee, bicho'ama poani, de. Oya cuana jama poani ba'a: Bo ba majje eseya jashahuabaquiani jama ba'a: —Ena poaje, de.

Jamatii beniya bo cuana dojo cuajicuaji canijo ena oque ajja que yasijje. Jamaya jiquio esohui huohuijji nisho cuana aje oe; esohui quea pame huohui ajja, de. Oya cuana acui jjaaja ajja jama poani pea'ai. Acuijajja shejo acui ba majje acuijajja sa'ajja cani e'acuijajja meseya. Ejajja chamajo acui jajajea ca'yani. Jamaya esohui huohuijji nishohua esohui quea pame huohui ajjajo, Eyacuiñajjiya oya cuana cajaa acaje'yo. ¹³ Oya cuana enashajo jama poani: Bae ai'ajo enashajo po majje meshi jeapohui cani; ena quea jehue nee poani. Enashajo jayoija jamaya jiquio esohui huohuijji nisho quea tai poani. Miqúanaya quea mimishi ba'e mee ca chana' pea'ai; poquiquehua mee ca chana' eshahuaja ejiojji yasijje. Jamajjeya oya cuana cuaqui quea misi nee yasijje dobi tiiti meequi caje'yo. Majameta oquequi majje jijnanani, chama'yo tii ponanani, quea misi nee nee yasijje oquequiani. Jamaya esohui huohuijji nisho; esohui e'e jojo nei huohui ajjajo cajaa acaje'yo Eyacuiñajjiya; quea huesha nee nee, quea tai nee nee yasijje huoojea caje'yo quea nee nee epo'yojji tii tii.

¹⁴ Ebionei nei dejja Adanaja osecuaja osecua tii majje, ojaya osecua cuana tii majje pea'ai etiiquiana Enoqui bajjani ba'ya poa. Yahuajo nei nei Enoqui miminaje jiquio esohui huohuijji nishojo pea'ai. Jama poa ba'a:

“¡Bacue oe! Eseyaya Emeshi Mese nei poeje'yo ojjaña esohuidojojji pame cuana nijje.

¹⁵ Oya poeje'yo ojjaña mimishi cuana janobajjima nei tecueajea'yohua. Ma dejja cuana quea mimishi poani; Eyacuiñajjiya esohui jayoija jama a sa po ajja. Eyacuiñajji niñebajji poani. Jamajjeya tecueajea neinei caje'yo Eyacuiñajjiya”.

Jamaya Enoqui yahuajo nei nei poa jiquio esohui huohuijji nisho cuanaajo. ¹⁶ E'e, jiquio esohui huohuijji nisho cuana esohui huohuijji quea pame cuana niñeba cani tii tii. Mimijaji neinei. Quea mimishi tii tii po sa poani. Onajaya ejjashahuabaquijji quea miminana poani bicho'ama. Pea dejja cuana nijje mimi nishoani ejjadasiaquijji.

Pea esohui dejja mimishi cuanaajo

¹⁷ Ecua epeeji cuana, ja'a pajea'yojji esejaya Emeshi Mese nei Jesosa Quitoja huoojea'yo cuanaajo esohui! Jamaya onaya huohui canaje ba'a: ¹⁸ —Jesosa Quito poe o'oya jjimahuajo, ojjaña cuana quea mimishi nee nee poaje. Miqúanaya Jesosa nijje jjapee neineiquianajo, oya cuana mimijaji neinei je miqúanaya nijje. Ojaya ejjashahuabaquijji quea mimishi nee jama atitii caje'yo pea'ai —jamaya Jesosaja huoojea'yo cuana acanaje.

¹⁹ E'e, jiquio esohui huohuijji nisho cuana bicho'ama cuanaya, de; quea jashahuabaqui tai nee nee. Oya cuana Edojoshahua Pame nijje jjapeequi sa po ajja. Jamajjeya ojaya esohui quea quehuajo Jesosaja epeeji cuana ojee jjapeequi pajea mee ca'yani esohui e'e nei pojjeamajo.

²⁰ Ecua epeeji cuana, ¡miqúanaya ca ca oe Jesosa Quitoja esohui jayoija jama oe atiiticue quea ja'a nee! ¡Ba neineicue ojaya esohui, ojjaña tii! ¡Pea epeeji cuana ba meesahuacue ma esohui e'e nei pea'ai! Edojoshahua Pameya miqúanaya mimi meesahua canijo, ¡mimi neineicue Eyacuiñajji nijje! ²¹ Miqúanaya ishoaña esejaya Emeshi Mese nei Jesosa Quitoja epoe o'oyajji. Ohuaya miqúanajaya mimishi cuana cuijea ca'yonajejo, cuaqui yasijje epoqui'yojji pojjeama; eyajo ba'e tiiti mee caje'yo onijje. ¡Eyacuiñajjiya esohui jayoija oe ba'ecue! Jamajjeya ohuaya miqúanaya jaahuana caje'yo quea bei; tecuea jima acaje'yo.

²² Pea cuana jashahuaba quehuaquianajo, ja'a onijje quea tecue nee nee pojji! ¡Esohui e'e jojo nei ba meesahua o'oyacue quea ja'a nee! ²³ Jamajjeya oya cuana poqui ajja cuaqui yasijje mimishi ohua pajea ca'yajo. Jjashahuabaquicue jiquio jama ba'a: —¡Onajaya mimishi quea tai nee; mimishi cajaa!

Jamajjeya miqúanaya quea mimishi po ajja, ma ecua onaya yahuajo quea mimishi nee nee poanaje jayoija jama po ajja.

¡Eyacuiñajji oe bihuicue!

²⁴ Eyacuiñajji quea ca'a neeya miqúanaya quea ja'a nee ba'e meesahua caje'yo; mimishi'ama nei nei po mee caje'yo. Jamajjeya miqúanaya quea boejea nee nee, quea bei nee nee pea'ai nequi mee caje'yo eyajo, o ani cojja nei eseya nequije'yo. ²⁵ Yani oe nei Eyacuiñajji e'e jojo nei. Jesosa Quito, esejaya Emeshi Mese nei esejo mano'yonajejo, Eyacuiñajjiya eseya ba'e tiitii mee caje'yo onijje eyajo. E'e jojo nei Eyacuiñajji oe nei eyajo yani tii tii quea ca'a nee nee, quea ja'a nee nee. Oya ojjañaja Emeshi Mese oe nei po tiitijje'yo. Ohuaya ojjaña amee tiitii caje'yo pea'ai. E'e nei jamaya oya poanaje yahuajo, meshi pana jjimahujajo; jjeyahua nei jamaya oya poani; quijje jamaya oya po tiitijje'yo.

Mahuiso. Eyaya, Jodeya, Jesosa Quitoja huoojea'yohua jiquio esohui tehuenaje. Apoa.

HUANIYA TEHUE CANAJE MA JESOSA QUITOHUA QUIIJE OHUA ACAÑAJE'YO

Eyacuiñajjiya jjaja'aqui mee canaje quijje ohua acaje'yo

¹ Eya Huani, Jesosaja epeeji jaahuanajji etii. Jesosa Quitohua eya tehue mee canaje jiquio esohui cuana ojjaña que jama ba'a: Eyacuiñajjiya jama acanaje ba'a: —Eyaya ecuea Ebacua Ejja Jesosa Quito ojaya ebajji jjaja'aqui meeje'yo ma eya quijje aje. Jamajjeya Jesosaa ojjaña ojaya epeeji jaahuanajji cuana ba mee caje ma eya quijje pishana aje —Eyacuiñajji poanaje.

Ba majje Jesosaa esohuidojojji huoojea canaje e que. Esohuidojojjiya ecuea ebajji jjanequipanaqui mee canaje quijje Eyacuiñajjiya acaje. ² Esohuidojojjiya ba mee cajo, eyaya tehue'yonaje ojjaña ma ohua quijje acaje. Jiquio esohui ecue tehue Eyacuiñajjiya huohui cajje. Jesosa Quitohua ecuea ebajji jjanequipanaqui mee canaje e'e jojo nei. ³ Ojjaña joya jiquio esohui etehue'yo e'e jojo nei bajji poani quea bihui nee poaje'yo. E'e, jiquio ejjanequipanaqui meeji ba majje, jiquio esohui jayojja jama amajje pea'ai quea bihui nee poaje'yo. Ojjaña jiquio etehue'yo jayojja quijje pishana apoa poaje'yo. Beshahua nei apoa.

Esohui etehue'yo Jesosaja epeeji cuana huasijje Asia meshijo ba'e yasijje

⁴⁻⁵ Eyaya Huaniya esohui tehueña Jesosaja epeeji cuana huasijje me oeje beca cuiñajji ba'e yasijje Asia meshi yasijje pea'ai. Ecuea esohui etehue'yo jama ba'a: Eyacuiñajji yahuaño nei nei nequi tiitiia poa. Jjeya nei yani tii tii. Quijje oya ani tiitiije'yo pea'ai. E'e, oya poeje o'oya. Edojjoshahua Pame nequiani Eyacuiñajji e'anioque ani cojja nei. Jesosa Quito jomajo yani pea'ai. ¡Ohuaya miquianaya cajaanahua cahua quea pame nee; quea bei capo mee cahua pea'ai! E'e, Jesosa Quitohua e'e jojo nei huohui canaje Eyacuiñajji. Oya mano'yo majje ebionei shequi o'oyanaje eba'e tiiti'yojji. Oya ojjaña emeshi mese cuana huoojeajji poani pea'ai. Jesosa ecuana quea jea nee poanijo mano'yonaje acui ecueata'apeejo. E'e, oya mano'yajo oja ena' cuayaquinaje esejaya mimishi cuana cui-jea'yojji. ⁶ Oya ojjaña huoojeajji poanijo eseya ojjaña huoojeajji po mee cani onijje. Eseya huoojea cani esohui huohuiya oja Chiija, Eyacuiñajjiya. ¡E'e, oya oe nei ojjaña huoojea'yojji quea ca'a capo'yahua tii tii! ¡Ojjaña oya cabihua cahua tii tii! Jamaya capoahua.

⁷ ¡Bacue! Oya poeje o'oya bo biajje. Ojjaña oya ba caje. O quecua'yojji epohua pea'aiya oya ba caje. Ojjaña deja mimishi ojjaña meshijo ba'e o ba majje quea mete nee nee poaje'yo. Pa neineije'yo jama ba'a: —¡Coya aje oe Jesosa poeyani esejaya mimishijo ese napaa! —ojjaña poaje. E'e, jamaya capoahua.

⁸ —Eya yahuaño anitiitiia poa. Jjeya eya yani tii tii; quijje eya poeje o'oya pea'ai. Eyaya ojjaña jamaya aña —Eyacuiñajjiya jamaya acani. Oya ojjaña huoojea'yojji quea ca'a nee nee poani.

Huaniya Jesosa ba ca'ya poa ejjanequipanaqui nequi

⁹ Epeeji cuana, eya miquianajaya edoe mese jayojja jama poani eseya Jesosa nijje jjapeequianijo. Jesosaa eseya huoojea canijo ese nijje anije'yo. Onijje jjapeequianijo, pea cuaa eseya quea nee po mee cani. Eseya quea nee poanijo jamatii Jesosa nijje jjapeequi pajea'yo ajja. E'e, eya iña majje pea cuaa aje iña oe eya nasi Patamoso bajjani yasijje huoojeajea canaje Eyacuiñajjiya esohui huohuijijojjo pea'ai. ¹⁰ Edojjoshahua Pameya eya ba mee canaje Jesosaja epoe o'oyajji. Oya jama poanaje ba'a: E daasajje nequi eyaya shajja'ajjanaje Jesosaja esohui. ¹¹ Eshe'ana janobajjima nei emiajji jayojja jama Jesosaa eya huohui canaje jama ba'a: —Huani, eyaya miya quea huiso ba meeje. ¡Maya oe tehuecuel! ¡Tehue mee majje esohui huoojeacue ecuea epeeji cuana huasijje me oeje beca cuiñajji ba'eca huasijje, Asia meshi yasijje! Ma cuiñajji huiso cuana huasijje ba'a: Epeso cuiñajji, Esemina cuiñajji, Penamo cuiñajji, Tiatina cuiñajji, Sanisi cuiñajji, Pinanepia cuiñajji, Naonisea cuiñajji pea'ai yasijje —Jesosaa poanaje.

¹² Majoya ojaya esohui shajja'ajja majje eyaya bajeanae ae enijje mimiani ebajji. Eyaya banaje cuaquijji me oeje beca huisome cuaquijji nequijijjo nequi. ¹³ Cuaquijji yiyesamaneijo nequi eyaya banaje Jesosa, ojjaña Edoe Mese. Oya ca ca oe quea pame nee nee nequi jama ba'a: Oja daqui quea ao nee nee ojaya ejiojji yasijje yee ba'e. Mei huo'o esipi quea nahuejo ejjayica'aqui dojjojjanijijje. ¹⁴ Ojaya ehuojja ña quea oshe nee nee bo oshe jayojja. Ojaya ecojja quea jeajahua nee nee cuaqui jijiani jayojja. ¹⁵ Ojaya ejiojji ca ca quea siyo nee nee baa cuaquijo quea quiyo nee nee po majje quiyo huo'o huo'oani jayojja jama. Ojaya emimi'yo janobajjima nei ena quea cuejipashi nee mei pasaca biajje oquequiani jama. ¹⁶ Majameta me oeje beca huisome oja me jtojto yani, ebianeije meje.

Oja enabajje cuayanaje esohui quea ja'a nee nee baa quea shejji jayojja; baa se beca jayojja. Ojaya eboshe quea jeajahua nee nee eshequi quea jiji nee nee jayojja.

¹⁷ O ba majje eya quea mete jjejojo jaabichaquinaje oja ejtojji pejjejo, emano'yo jayojja mo jaanaje. Jamajjeya ohuaya eya napa'ajja canaje ebianeimeje. Jama poanaje ba'a: — ¡A'a quea mete pojji! Eya yahuajo nei nei nequi tiitiia poa. Eya nequi tiitiiani pea'ai. ¹⁸ Eya mano'yo majje shequi o'oyanaje. Eya eshe tii tii yani. Eya emano'yo huoojea'yojji. Eyaya oya cuana eshe o'oya po meeje'yo, yamijji po meeje'yo. Ecue esohuijo ojjaña mimishi cuana poquije'yo cuaqui yasijje. Ojjaña quea pame ca ca eyahuasijje poquije'yo. ¹⁹ Huani, eyaya miya ba meeña ojjaña ma ohua jjeja nei acani, quijje nei ohua acaje pea'ai. ¡Ba majje maya tehuecue! ²⁰ Eyaya miya ba meeje majameta me oeje pea beca huisome ecue me jtojojo ani, cuaquijji nequijji me oeje beca pea'ai. Maya miquea quea quehua. Jama poani ba'a: Mei hu'o' cuaquijji nequijji quea nahue jayojja oya cuana, ecuea epeejji nei cuana ba'e ma me oeje beca cuiñajji ba'eca. Majameta cuana esohui huohuijji cuana jayojja, ecuea epeejji jaahuanajji jayojja pea'ai —Jesosa poanaje enijje.

2

Jesosaja esohui Huaniya tehue canaje Jesosaja epeejji cuana Epesojo ba'eca huasijje

¹ Majoya Jesosaa huohui canaje jama ba'a: —Huani, ¡ecuea esohui tehuecue esohui huohuijji Epesojo ba'e yasijje! Oya ecuea epeejji jaahuanajji. Jama tehueme acue ba'a: "Jamaya eyaya miya huohuiaña ba'a: Eya Jesosa Quito. Eyaya esohui huohuijji cuana majameta me oeje beca huisome jayojja jaahuanaña ecuea eme jtojojo. Eyaya ecuea epeejji ma cuaquijji nequijji jayojja jaahuanaña pea'ai. Jamaya eyaya miya huohuiaña ba'a: ² Ecuea eba ojjaña miqúanajaya eba'eji. Miqúanaya enijje ojjaña pojjaejo chaco neineaña. Quea camaja. Jamatii enijje chaco pajea'yo ajja. Miqúanaya jjapeequi ajja esohui huohuijji nisho cuana nijje. Oya cuana sijje poanaje jama ba'a: —Jesosaa ecuana huoojea canaje oja sohui huohuiya.

"Jamatii miqúanaya ona shajja'ajja nei nei majje huohuinaje jama ba'a: —Chojja, miqúanaya sijje poani. Esohui huohuijji nisho jja mi coma —miqúanaya poanaje. ³ E'e, miqúanaya enijje chaco neineaña, chacochocho pajea'yo ajja. Enijje chacochochoanijo, pea cuaa miqúanaya napa canaje quea huiso. Jamatii enijje miqúanaya chacochochoani tii. ⁴ Jamatii eya miqúanajo quea yeno poani. E'e, yahuajo eya miqúanajaya quea jea nee nee poanaje. Jjeja ca ca chojja, quea jea pishana. Jamaya quea mimishi. ⁵ Jamajjeya ¡jjashahuabaquicue! Yahuajo eya miqúanajaya quea jea nee nee poanaje. ¡Eya quea jea nee nee a o'oyacue, ma ecua miqúanaya yahuajo anaje jamaya acue! ¡Bacue oe! Miqúanaya e shajja'ajja sa po ajjajo eya poeuaajje miqúanaya que. ¡Jiquio ecua cuaquijji quijjo'yo majje quea misi po'yani jayojja jama eyaya miqúanaya ecuea esohui huohuijji pajea meeje'yo, ca miqúanaya ma ecua yahuajo miqúanaya eya quea jea nee nee anaje jama mi a o'oyajo. ⁶ Jamatii pea miqúanajaya ejjashahuabaquijji quea ja'a ecuea ejjashahuabaquijji jayojja jama poani ba'a: Dejja Niconasi bajjanija epeejji cuana quea mimishi. Miqúanajaya ojaya esohui boti'ama. Maya ecuea boti'ama pea'ai.

⁷ "Jamajjeya ¡shajja'ajjacue Edojjoshahua Pameja esohui ojjaña ecuea epeejji cuana Asia meshijo ba'eca huasijje! ¿A'a miqúanaya e shajja'ajjajji? ¿A'a shajja'ajja sa poani? Ojjaña joya enijje jjaepe tiitiqúanani esahua jeabichajeajji poani. Jamajjeya eyaya oya cuana nequi tiiti meeje'yo Eyacuiñajji nijje eyajo. Eyaya oya cuana acuiñajja ijja meeje Eba'e tiiti mee'yojji, ma Eyacuiñajjija acui yiyejo nequi".

—Jamaya eyaya, Jesosaa huoojeaña ecuea esohui etehue'yo ecuea epeejji cuana Epesojo ba'eca huasijje. ¡Jamaya tehuecue, Huani! —Jesosaa eya acanaje.

Jesosaja esohui ojaya epeejji cuana Esemína cuiñajji ba'eca huasijje

⁸ Majoya Jesosaa huohui ca o'oyanaje jama ba'a: —Huani, ¡ecuea esohui tehuecue esohui huohuijji Esemínajo ba'e yasijje! Oya ecuea epeejji nei jaahuanajji. Ejo jama tehuecue ba'a: "Eya Jesosa Quito. Jamaya eyaya miya huohuiaña: Eya yahuajo nei nei nequi tiitiia poa. Eya nequi tiitiiani pea'ai. Mano'yo majje eya shequi o'oyanaje. ⁹ Ecuea eba miqúanaya enijje jjaepeequianajo pea cuaa napa canaje. Jamajjeya miqúanaya aema'. Jamatii ecuea epeejji poanajo miqúanaya quea aquiana huiso jayojja. Quea bei nee nee poani. Ecuea eba pea'ai beca cuaa miqúanaya niñeba cani. Oya cuana sijje poani jama ba'a: —Ecuana y Jodio cuana —poani.

"Chojja, Jodio cuana pojjeama oya, Eyacuiñajjija epeejji pojjeama. Edosiquianaja epeejji cuana poani. ¹⁰ ¡Bacue! Quijje pishana miqúanaya napa caje cuaa. Edosiquianaja epeejji cuaa miqúanaya iña majje jeanobia caje enijje ejjapeequi pajea'yojji nisho. Oe pojji cahuime miqúanaya quea nee po mee caje, 10 cahuime. Jamatii ¡a'a quea mete pojji! ¡A'a enijje jjapeequi pajea'yojji jamatii cuia caje! E pajea'yo ajja tii tii eyaya miqúanaya

ba'e tiitii meeje'yo eyajo Eyacuiñajji niije. ¹¹ Jamajjeya ishajja'ajjacue Edojjoshahua Pameja esohui ojjaña ecuea epeeji cuana Asia meshijo ba'eca cuana huasijje! Ojjaña joya eniije jjapee tiitiiquiani cuaqui yasijje epoqui'yojji pojjeama”.

—Jamaya eyaya, Jesosaa huoojeaña ecuea esohui etehue'yo ecuea epeeji cuana Esemi-najo ba'eca huasijje. ¡Jamaya tehuecue, Huani! —Jesosaa eya acanaje.

Jesosaja esohui ojaya epeeji cuana Penamo cuiñajjijo ba'eca huasijje

¹² Majoya Jesosaa eya huohui ca o'oyanaje jama ba'a: —Huani, ¡ecuea esohui tehuecue ecuea esohui huohuiji Penamo cuiñajjijo ba'e yasijje! E'e, esohui tehuecue jama ba'a: “Eya Jesosa Quito. Eyaya esohui huoojeaje mi que. Baa ose mihi pea'ai isho jama quea shejji nee nee, quea ca'a nee nee jayojja ecuea esohui. ¹³ Ecuea epeeji cuana, miquianaya ba'yani cuiñajji quea mimishijo. Beshahua nei ojjaña jomajo ba'e Edosiquiana nei niije jjapeequiani. Jamatii miquianaaya ecuea esohui jayojja jama atitiiña. Ecuea epeeji Anatipa bajjani miquiana niije ba'e'yonaje. Ohuaya ecuea esohui huohui majamaja canaje quea pame nee. Jamajoya oya pea cuaa quecua ca'yonaje. Jamatii miquianaya eniije jjapeequi pajea'yo ajja. ¹⁴ Jamatii eya miquianajo quea yeno. Quea mimishi poani miquianaya; Banaamiya eya jama aje oe poani beca cuana Penamojo ba'eca. Ohuaya, Banaamiya emeshi mese Banaca bajjani yahuajo nei nei ba mee ca poa Isaeni cuana quea mimishi, quea tai epo mee'yojji. Miquianaya beca cuaa Isaeni cuana quea mimishi ba'ya poa jayojja jama poani. E'e, jjeva bobi, noe cuanaya eyacuiñajji nisho bihuijaji dahua majje dejja mimishi cuana niije ojee ijia'ijjiani pea'ai. Pea epona cuana niije quea mimishi poani pea'ai. ¹⁵ Cuanaya miquiana niije jjapeequiani beca cuana quea mimishi. Dejja Niconasi bajjanija esohui quea tai pajea sa po'yo ajja. Quea mimishi nee nee. ¹⁶ Jamajjeya ¡miquianajaya mimishi cuana pajea'yoque! Pajea sa po'yo ajjajo eya poecuajje miquiana que. Poe majje eyaya ecuea epeeji quea mimishi poani tecuea neineije'yo. Baa ose mihi pea'ai isho jama quea shejji nee nee quea ca'a nee nee jayojja ecuea esohui poaje. Quea yeno nee nee po meeje'yo.

¹⁷ “Jamajjeya ishajja'ajjacue Edojjoshahua Pameja esohui ojjaña ecuea epeeji cuana Asia meshijo ba'eca huasijje! Ojjaña joya eniije jjapee tiitiiquiani Edosiquiana jebichajeajji poani. Jamajoya eyaya oya cuana ba'e meesahuaje'yo tii tii. E'e, yahuajo Eyacuiñajjiya ojjaña Moisesi niije nequi pahui sisi eyajje oque ijia mee ca poa. Jamaya eyaya aje o'oya miquianajaya. Maya ecuea epeeji pojjeamaja ba jima. Ecuea epeeji cuana huasijje eyaya quiaje mei oshe sisi pea'ai. Mei oshe biajje bajjani eyacua etehue'yo yani, maya onajaya ba jima. Emei oshe meseja eba ojaye nei”.

—Jamaya eyaya, Jesosaa huoojeaña ecuea esohui etehue'yo ecuea epeeji cuana Penamojo ba'eca huasijje. ¡Jamaya tehuecue, Huani! —eya Jesosaa acanaje.

Esohui Jesosaja epeeji cuana huasijje Tiatina cuiñajjijo ba'eca huasijje

¹⁸ Majoya Jesosaa pea esohui huohui canaje jama ba'a: —Huani, ¡ecuea esohui jiquio eya huohuiana tehuecue esohui huohuiji Tiatina cuiñajjijo ba'e yasijje! Jamaya tehuecue ejo ba'a: “Eyaya, Jesosaa, Eyacuiñajjija Bacua Ejjaa miquiana que tehueña. Ecuea ecojja cuaqui jijjiani jayojja quea ja'a nee nee. Ecuea ejiojji cuana baa huo'o cuaqui quea quioy nee nee nee nequi jayojja quea jiji nee nee poani. ¹⁹ Ecuea epeeji, ojjaña joya miquianaaya añ cuana ecuea eba. Miquianaaya eya quea jea nee nee añ. Eniije jjapeequi pajea'yo ajja nei nei pea'ai. Quea camajajo jamatii eniije chaco pajea'yo ajja. Jamaya miquianaaya quea pame nee nee añ jjeva, yahuajo jama pojjeama; yahuajo quea pame pishana poa. ²⁰ Jamatii eya quea yeno miquianajo, de. E'e, miquianaya quea mimishi poani. Epona quea mimishi Jesameni bajjani shajja'ajja cani beca cuaa. Oya aje oe siajjepojji jama poani ba'a: —Eya ca iña Eyacuiñajjija huoojea'yo oja sohui huohuiya —oya poani.

“Chojja, siajje poani oya. Ohuaya aje oe ecuea epeeji cuana dasia cani. Quea mimishi po mee cani. E'e, ojaya esohui quea mimishijo beca cuana bobi, noe cuanaya eyacuiñajji nisho bihuijaji dahua majje ojee ijia mee cani mimishi cuana niije. Pea epona cuana niije quea mimishi poani ojaya esohui quea mimishijo. ²¹ Ecuea maya epona napa jima; ohuaya pojja'a mimishi pajea caje'yo. Jamatii oya quea mimishi ca'a; pajea sa po'yo ajja. ²² Jamajjeya eyaya oya quea nee nee po meeje'yo, ojjaña cuana joya o jayojjaya quea mimishi poani pea'ai quea nee nee po meeje'yo, ca mimishi cuana pajea sa po'yo ajjajo. ²³ Ojjaña joya o shajja'ajjaji poani eyaya mano meeje'yo. Chama'yo tii poaje'yo. Jamajoya ma ba majjeya ojjaña ecuea epeeji cuana jjabahuejjaquije e'e jojo nei ecuea eba ojjaña cuanaja ejjashahuabaquijji. Quehuaje ejjashahuabaqui meejji pojjeama. E'e, ojjaña eba'eji ba majje eyaya sosequiaje'yo. Quea mimishi poanijo quea nee nee po meeje'yo. Quea pame poanijo ca ca quea bihui nee nee po meeje'yo.

²⁴ “Jamatii miquianaya Tiatinajo ba'e quea huiso nee ma esohui quea mimishi jayojja jama po ajja. Edosiquianaja esohui quea quehua, quea mimishi cuana jayojja jama po ajja

pea'ai. Ba sa po ajja pea'ai. Jamajjeya eyaya miqúanaya jamaya huohuaña: ¡A'a ecuea esohui pajea'yojji! Mahuiso. ²⁵Miqúanaya ecuea epeeji cuana poani. ¡shoacue ecuea epoe o'oyajji! ¡A'a enijje japeequi pajea'yojji! ²⁶⁻²⁷Ecue Chiiya eya ojjaña meshijo ojjaña huojea'yojji po mee tiitii cani. Jamaya eyaya miqúanaya ameeje'yo enijje japee titiiqúanijo. E'e, miqúanaya eshahua jeabichajeaña. Ecuea esohui jayojja jama atitiiñaño, peaa miqúanaya cuijaje caje'yo poja'a. Jamatii eyaya miqúanaya enijje ona huojea'yojji nequi meeje'yo tii tii. Ojjaña huojea'yojji quea ca'a nee nee poaje'yo, ojjaña cuana ojjaña meshijo ba'eca cuana huojea'yojji nei nei quijje poaje'yo. Jiquio ecua meshimisi jajaajajea cani baa jamaya shajjama' cuana ojjaña meshijo ba'eca jeabichajeaje'yo miqúanaya enijje ojjaña huojea'yojji nequi'yo majje. ²⁸Eyaya miqúanaya quiaje'yo pea'ai aquiana quea pame nee nee yohua jayojja ba'a: majameta ai, eshequi huiyejji mecajjeahua nei jaasohuani jayojja jama.

²⁹“Jamajjeya ¡shajja'ajjacue Edojjoshahua Pameja esohui ojjaña ecuea epeeji cuana Asia meshijo ba'eca huasijje; jashahuabaquicue!”

—Jamaya eyaya, Jesosaa huojeaña ecuea esohui etehue'yo ecuea epeeji cuana Tiatiñajo ba'eca huasijje. ¡Jamaya tehuecue, Huani! —eya Jesosaa acanaje.

3

Jesosaja esohui ojaya epeeji cuana huasijje Sanisi cuiñajijo ba'eca huasijje

¹ Majoya Jesosaa eya huohui canaje jama ba'a: —Huani, ¡ecuea esohui tehuecue esohui huohuijji Sanisi cuiñajijo ba'e yasijje, ma ecuea epeeji nei cuana jaahuanajji yasijje! Tehuecue jama ba'a: “Eya Jesosa Quito. Eyaya Edojjoshahua Pame miqúanaya huasijje huojeaña. Eyaya miqúanaya huohuaña: Ecuea epeeji cuana, ojjaña miqúanajaya eba'ejji cuana eyaya baña. Pea cuaa miqúanajo huohui canaje jama ba'a: —Jesosaja epeeji cuana Sanisijo ba'ecaa Jesosaja esohui jayojja jama acani —poanaje.

“Jamatii eyaya miqúanaya baña beshahua nei ecuea esohui jayojja jama ba'e ajja. ²Jamajjeya ¡ecuea esohuijji jashahuabaquicue quea ja'a nee! Quea mimishi poanijo miqúanaya jashahuabaquiani oe pojji. Beshahua nei jashahuabaqui ja'a pajea'yonaje. Jamaya quea mimishi, de. Eyacuiñajija esohui jayojja jama a'ajja miqúanajaya. ³Ecuea esohui huohuijjiya ecuea esohui huohui canaje miqúanaya huasijje. Jamajjeya ¡ecuea esohui jama acue! ¡Mimishi cuana pajea'yocue! Ejo jashahuabaqui ajjajo aje oe eya miqúanaya que quehuajje poeajuajje quea nee nee po meeya, siipojji quehuajje poeyani jayojja. Eya ache pojajjo miqúanaya que poeje o'oya miqúanajaya ebajji pojjeama.

⁴“Jamatii beca cuana Sanisijo ba'e quea bojea'yo ba'e, mimishi'ama nei. Oya cuana enijje ba'e meeje'yo. Quea pame nee ba'e eyaya oya cuana daqui quea oshe nee nee huosho meeje'yo enijje eba'e tiitii'yojji. ⁵E'e, ojjaña oya enijje japeequi pajea'yo ajja daqui quea oshe nee nee huosho meeje'yo. Ojaya ebajjani cuana eyaya tehue'yonaje eba'e tiitii mee'yojji. Maya ojaya ebajjani eyaya ecuijea'yojji pojjeama. Oya cuanajo ca ca eyaya ecue Chii huohuije jama ba'a: —E'e, oya cuana ecuea epeeji nei —jamaya eya poaje ojjaña esohuidojojji cojja neiyo ani.

⁶“Jamajjeya ¡shajja'ajjacue Edojjoshahua Pameja esohui ojjaña ecuea epeeji cuana Asia meshijo ba'eca huasijje; jashahuabaquicue!”

—Jamaya eyaya, Jesosaa huojeaña ecuea esohui etehue'yo ecuea epeeji cuana Sanisijo ba'eca huasijje. ¡Jamaya tehuecue, Huani! —eya Jesosaa acanaje.

Jesosaja esohui ojaya epeeji cuana huasijje, Pinanepia cuiñajijo ba'eca huasijje

⁷ Majoya Jesosaa eya huohui canaje: —Huani, ¡ecuea esohui ecuea esohui huohuijji, ecuea epeeji jaahuanajji Pinanepia cuiñajijo ba'e yasijje tehuecue pea'ai! Jama tehuecue acue ba'a: “Ecuea epeeji cuana, eyaya, Jesosa Quitohua quea ja'a nee nee añ, mimishi'ama, e'e jojo nei Eyacuiñajji. Yahuajo nei etiqúanaya Dabi Jodio cuanaja emeshi mese poanaje. Jjeya eya Eyacuiñajija cuiñajji eyacua mese. Eyaya esecue ca'a majje pea edobiqui meeji pojjeama. Ca'apejo majje pea dobiqúi meeje.

⁸“Ecuea epeeji cuana, miqúanajaya eba'ejji ecuea eba. Miqúanaya oe pojji yani. Jamatii ecuea esohui jayojja jama añ. Enijje japeequi pajea'yo jima. Jamajjeya eyaya miqúanaya esohui huohui meeje pea cuana huasijje. Eshahuaja epeeji cuaa miqúanaya ehuhui pajea mee'yojji pojjeama. ⁹Oya cuana siajje poani jama ba'a: —Ecuana Jodio, e'e jojo nei Eyacuiñajija epeeji —oya cuana poani.

“Jamajjeya eyaya eshahuaja epeeji cuana miqúanaya que poe meeje ecui'oshajjajo nequiya miqúanaya bihuiaa jama ba'a: —E'e, miqúanaya Eyacuiñajija epeeji e'e jojo nei, ojaya quea jea nee nee.

¹⁰“Pea cuaa miqúanaya napa cani. Jamatii miqúanaya ecuea esohui jayojja jama enijje japee titiiquije'yo. Jamajjeya quijje eyaya baje ache cuana ecuea epeeji e'e jojo nei. Quijje

eshahuaja epeeji ojjaña cuana quea nee nee po meeje'yo; eyaya miquianaya jaahuanana neineje'yo. ¹¹ Quiije pishana eya, Jesosa poeje o'oya miquiana que. Jamajeya ¡ecuea esohui jayojja jama po tiitiicue! Jamajeya pea cuanaja miquianaya edasiajji pojjeama. Majoya Eyacuiñajjija ejjashahuabaqui'yojji miquianajo jama acaje ba'a: Miquianaya ba'e tiitii mee caje'yo onijje. ¹² ¡Bacue! Ojjaña miquianaya enijje japeeji pajea'yo ajjajo eyaya eyajo nequi tiitii meeje'yo. Acui ca'a, equi yamajjana quea quemu, quea ca'a nequi'e'yo tii tii jayojja jama ecuea epeeji nei nequi tiitii'e'yo eyajo. Eyaya ojjaña cuana ba meeje miquianaya ecuea epeeji e'e jojo nei, Eyacuiñajjija pea'ai. ¡Iquio ecua e'acui meseya acuijo oja bajjani quecuatuehue cani jayojja jama eyaya aje'yo; ecuea epeeji nei cuana tehueje. Jamajeya miquianaya, ojjaña ecuea epeeji pea'ai ojee enijje eyajo ani meeje'yo. Enijje poeje'yo; Eyacuiñajjija cuiñajji eyacua, Jenosanena eyacua bajjani jayojja jama poeje. Ecuea bajjani eyacua poaje eya quea ca'a nequianijo. Maya eyaya ojjaña miquianaya ba meeje'yo.

¹³ “Jamajeya ¡shajja'ajjacue Edojjoshahua Pameja esohui ojjaña ecuea epeeji cuana Asia meshijo ba'eca huasijje; jashahuabaquicue!”

—Jamaya eyaya, Jesosaa huohuiaña ecuea epeeji cuana Pinanepiajo ba'eca huasijje. ¡Jamaya tehuecua, Huani! —Jesosaa eya acanaje.

Jesosaja esohui ojaya epeeji cuana huasijje Naonisea cuiñajjijo ba'eca huasijje

¹⁴ Majoya Jesosaa eya huohui ca o'oyanaje pea'ai jama ba'a: —Huani, ¡ecuea esohui huohuijji Naonisea cuiñajjijo ba'e yasijje tehuecua ecuea esohui! Oya ecuea epeeji nei jaahuanajji. Jama oya tehuecua ba'a: “Ecuea epeeji cuana, eya Jesosa e'e jojo nei Eyacuiñajjija huoojea'yo. Eyaya huohuiaña Eyacuiñajjija esohui e'e nei. Eyaya Eyacuiñajji nijjeya ojjaña pana cooa poa. Eyaya miquianaya huohuiaña jama ba'a: ¹⁵⁻¹⁶ Ojjaña miquianajaya eba'e'jji cuana ecuea eba. Eyaya baña miquianaya enijje japee neineiqui sa po ajja. Jamatii e cajaa sa po'yo ajja pea'ai. ¡A'a epeeji nisho pojji! ¡E cajaa a sa amaje jja ca iña oe huohuicue! E'ishijji quea quiyo pojjeama jayojja poani miquianaya. E'ishijji quea huoe pishana enabajo peajja, ena quea tai jama. ¡Iquio ecua seya chijjoco ena ish'ajja majje ojja'e'yaña jayojja jama eyaya miquianaya cajaa achana', ca ecuea esohui miquianaaya mi shajja'ajjajo. ¹⁷ Miquianaya aje oe ¡iquio jama jashahuaba quehuaquiani ba'a: —Eya ca iña Eyacuiñajjija epeeji quea pame nee poani —miquianaya jamaya poani. Jamaya pea'ai poani ba'a: —Eya dejja quea aquiana huiso jayojja jama poani.

“Chojja. Miquianajaya eba pojjeama Eyacuiñajjija miquianaya ba cani jama ba'a: Miquianaya aema' jayojja, daquima' jayojja, cojjama' jayojjaya. Miquianaya quea mimishi ba'yanijo Eyacuiñajji quea yeno nee nee poani miquianajo. ¹⁸ Jamajeya eyaya miquianaya huohuiaña: ¡Eya sa neineicue! ¡Ecuea esohui shajja'ajja neineicue! Ecuea esohui mei huo'o quea nahue jayojja jama poanijo, miquianajaya eba'e'jji quea ja'a nee poaje. Eya miquianajo mano'yonaje miquianajaya mimishi cuijea'yojji. ¡Jamaya jashahuabaquicue! Maya ba majje miquianaya daqui oshe ehuosho'yo ba'e jayojja jama poaje, quea boejea nee. Jamajoya miquianaya bicho'ama poaje miquianajaya mimishijo. ¡Edojjoshahua Pame bacue! Oya ecojja shicuijji jayojja; ohuaya miquianaya ecuea esohui ba meesahua caje'yo, quea jashahuabaqui ja'a nee po mee caje'yo. ¹⁹ Ojjaña ecuea epeeji eyaya tanacuaña, tecueaña pea'ai ejjabahuejjaqui meeji ecuea quea jea nee neejo. Jamajeya ca oe ¡ecuea esohui jayojja jama acue e'e jojo nei! ¡Ecuea epeeji nisho a'a po majajji! ²⁰ ¡Bacue! Esecuejo nequiya iyaa cani edobiquijji, miquiana nijje ejjapeequijji. Oya jayojjaya eya poani. Eyaya miquianaya iyaña. E shajja'ajja majje jama pocue ba'a: —¡Jesosa, dobicue! —jamaya poajo eya miquiana que dobicuije miquiana jashahuabaqui meeji. Miquianaya enijje japeeji pea'ai. ¡Iquio ecua epeeji cuana ojee ijji'ljiani jama poaje eseya. ²¹ E'e, ojjaña joya enijje japee tiitiiquiani esahua ¡eabichajeajji poani. Jamajeya quijje eyajo eyaya huohuije jama ba'a: —Enijje nequicue! ¡Enijje ojjaña huoojea'yojji pocue!

“E'e, miquianaya e jayojja jama poaje. Eyaya quea ca'aa ¡jejejo Edosiquiana ¡eabichajeanae. Jamajeya ecue Chii nijje eya anioqueani; ojjaña huoojeajji poani tii tii. ²² Jamajeya ¡shajja'ajjacue Edojjoshahua Pameja esohui; ojjaña ecuea epeeji cuana Asia meshijo ba'eca cuana jashahuabaquicue!”

—Jamaya eyaya, Jesosaa huoojeaña ecuea esohui etehue'yo ecuea epeeji cuana huasijje Naonisea cuiñajjijo ba'e yasijje. ¡Jamaya tehuecua, Huani! —eya Jesosaa acanaje.

4

Ojjaña eyajo ba'ecaa Jesosa bihuia cani

¹ Majoya esohuidojojjiya jjanequipana meequi canaje jama ba'a: Eya ba mee canaje esecue eca'apejo nequi jayojja eyajo. Jjanequipana cooqui mee canajejo Jesosa enijje miminaje. Ojaya esohui eshe'ana emiajji jayojja jama janobajjima nei huohui canaje

yahuajo pishana. Jjeya ohuaya eya huohui ca o'oyanaje jama ba'a: —Huani, ipocue yahuasije e que! Eyaya miya ba meeje jiquio eya quijje aje —Jesosaja poanaje.

² Jjeyahua nei Edojjoshahua Pameya eya ba mee canaje jama ba'a: Emeshi Mese nei e'anioque ani ojjaña huoojea'yojji. ³ ¡Oya ache bame nee nee poanaje! Quea jeajahua nee nee mei ca'a quea siyo jayoija: mei quea nahue jasepe bajjani jayoija, codinania mei bajjani jayoija pea'ai. Ojaya e'anioquejjijo eshijje copocopo jayoija yaninaje quea bame nee nee mei tahuaa esemenana mei bajjaniya jeasiyo cani jayoija jama. ⁴ Quea huiso Jesosaja epeeji etii cuana, 24 huisome onijje e'anioque ani. Eyacuiñajji ca ca eyiyesama neiyo ani. Onajaya daqui quea oshe nee nee. Esapajo iya mei huo'o ejaahuojja quea nahue ani emeshi mese epojji. ⁵ Eyacuiñajjiya ojaya e'anioquejjijo aniya pojjeje po mee cani, beni jjaqueyaqui mee cani, cueji taava po mee cani pea'ai. O cojja neiyo cuaquijiji me oeje beca huisome nequi. Jiquio cuaquijiji cuana jama ba'a: Edojjoshahua Pameya acani Jesosaja epeeji cuana nijje ma ecua me oeje beca cuiñajji ba'e jama. ⁶ Eyacuiñajji cojja nei eyaya banaje bae quea tahua nee nee jayoija, quea coe nee nee, quea siyo nee nee jayoija.

Eyaya banaje pea'ai ebeca pee pea'ai aquiana eshe, quea cojja huiso nee nee Eyacuiñajji e'anioque ani pejeje, cojja beca jayoija, ecojja quipa huejjaje jjabaquiani pea'ai. ⁷ Oe aquiana eshe ibia jayoija. Pea ana'ai jayoija. Pea aquiana deja jayoija cojjame, deja cuichojji jayoija. Pea huipa cuabesaba'e jayoija jama. ⁸ Ojjaña jiquio aquiana eshe cuichojji cuabesajji de, ojjaña 6 cuichome, me oeje oe cuichome. Ojjaña cuana quea cojja huiso nee nee; ojaya ecuicho quimejeje pea'ai ecojja cuana yani. Ojjaña cuana sohuicuayani tii tii Eyacuiñajji bihuiajji; sohuicuaya pajea ajja nei nei mecajje ai quiana. Jamaya poani ba'a: “Eyacuiñajji, miya ca ca oe quea pame, mimishi'ama, quea boejea nee nee. Miya ojjaña Emeshi Mese nei quea ca'a nee nee. Miya yahuajo nei nei ani tiitiia poa, jjeya ani tiitiani, quijje ani tiitije'yo pea'ai”.

Jamaya oya cuana poani.

⁹ E'e, ma aquiana eshe cuana sohuicuayani Eyacuiñajji bihuiajji. Jama poani ba'a: “Eyacuiñajji, miya oe nei quea pame nee nee, oe nei nequi tiitiani, ¡ojjaña miya cabihuia cahua!” oya cuana jama sohuicuayameya poani.

¹⁰ Ma shajja'ajja majjeya Jesosaja epeeji etii cuaa, ma 24 huisomeya ecui'oshajjajo nequiya Eyacuiñajji bihuia cani. E'e, oya oe nei e'anioque ani tii tii bihuia cani. Onajaya mei huo'o ejaahuojja quea nahue nee cajjajea majje Eyacuiñajji ejojji pejeje iyaoquea cani. E'e, Eyacuiñajji oe nei quea ca'a nee nee. Jamajjeya oya bihuia cani cuaa jama ba'a:

¹¹ “Eyacuiñajji, miya oe nei ecuanaja Emeshi Mese nei. Miya oe nei quea pame nee nee. Jamajjeya ecuaaya miya bihuiaña. Miya oe nei ani tiitije'yo, oe nei ojjaña huoojeajji. Miyaya ojjaña aquiana cuana cooa poa. E'e, ojjaña aquiana miyaya saña. Jamajjeya pana majje nequi tiiti menea, miyaya”.

Jamaya Eyacuiñajji bihuia cani ma 24 epeeji etii cuaa eyajo aniya.

5

Ejeejo esohui etehue'yo eyaya banaje

¹ Majoya eyaya, Huaniya Eyacuiñajji e'anioquejjijo ani banaje. Ojaya eme' ebianeijje esohui ejeejo tehue e'ñabebo nequi eyaya banaje. Jiquio ejeejo quea huiso esohui etehue poanaje, omiji pea'ai tehume'ya poanaje. Tehuejeyo majje me oeje beca, 7 ijjabaji meeme'ya poanaje. ² Eyaya esohuidojojji quea ca'a nee nee banaje pea'ai. Ohuaya ojjaña cuana janobajjima nei huohui'ajja canaje jama ba'a: —¿A'ya cuae quea pame nee nee esohui etehue'yo hui isajji esohui etehue'yo ebajji? ¡Joya quea pame nee nee Eyacuiñajji cojja nei nei nequicue esohui etehue'yo ecueabaji hui isajji! —esohuidojojji jama taaameya poanaje.

³ Jamatii eyajo ba'e, meshijo ba'e pea'ai, yahuajo emano'yo pea'ai chama' poanaje oe quea pame nee nee esohui cuiabaji hui isajji, ejee jjequijeapiihuijji. Chojja, chama' nei nei poanaje oe quea pame nee nee ma esohui ba meeji. ⁴ Jamajjeya chama' nei nei ba majje eya quea yeno poanaje. Pa neineinaje. ⁵ Majoya Jesosaja epeeji etii, ma Eyacuiñajji bihuia caniya pea 24 huisome cuana nijjeya eya huohui canaje: —¡A'a oe pajji! ¡Bacue! Oe deja Jesosa bajjani yani, ma Jodaja osecua, emeshi mese Dabija osecua poa. Oya ca ca oeya esohui cueabajji hui isa majje ejee jjequijeapiihui caje'yo esohui ebajji. Oya quea ca'a nee nee, ibia naa asha jayoija jama ojjaña huoojea'yojji poani.

⁶ Majoya eyaya banaje oe deja Eyacuiñajji e'anioque ani pejeje nequi. Oya ebeca pee pea'ai huisome aquiana eshe cuana yiyesama neiyo nequi, Jesosaja epeeji etii quea ca'a quea huiso cuana yiyesama neiyo nequi pea'ai. Oya ca ca jiquio jama ba'a, ñajajja esho'i equecua'yo jayoija ojjaña mimishi cuijea'yojji. Oya Emeshi Mese nei quea ca'ajo ñajajja yahue she'anajji jayoija me oeje beca she'aname jayoija eyaya oya banaje. Ojjaña ojaya

eba neineijo oya quea cojja huiso nee jayojja banaje eyaya, me oeje beca cojjame jayojja eyaya oya banaje, 7 cojjame. Ecojja cuana Edojjoshahua Pameya acani, ma Edojjoshahua Pameya Jesosaja epeeji cuana ojjaña meshijo ba'eja yajijjo acani jayojja. ⁷ Ma dejjaa ñajjaja equecua'yo jayojjaa Eyacuiñajji que jjanequichipiqui majje jjeshe canaje esohui etehue'yo oja ebianeí meje iñanequia nequi. ⁸ Jamajjeya aquiana eshe cuaa ebeca pee pea'ai huisomeya Jesosa bihuia canaje. Jesosaja epeeji etii quea huiso 24 huisome pea'aiya Jesosa, ma ñajjaja equecua'yo jayojja bihuia canaje ecui'oshajjajo nequiya. Oya cuanaja e'iñaqueyajji yaninaje. Mei huo'o caneco madeja pohui jayojja anijji yaninaje pea'ai. Madeja pohui jayojja huichachanaje. Huichacha quea shiye Eyacuiñajjija epeejjija emimi onijje jayojja. ⁹ Jesosaja epeeji etii cuana esohui eyacua sohuicuayanaje Jesosa bihuiajji jama ba'a:

"Jesosa Quito, ¡miya quea pame nee neejo esohui etehue'yo jjeshe majje ecueabaji hui isacue! E'e, miya quecua canaje cuaa. Miquea ena' cuayaquaijo mano'yonaje ojjaña cuanaja mimishi cuijea'yojji. Ojjaña miquea ejjeshe'yo jayojja. Jamajjeya Eyacuiñajji nijje japeequi meeaña ojjaña cuana ojjaña meshijo ba'e, ojjaña cuiñajjijo ba'e, ojjaña pea esohuijo mimiani cuana pea'ai. ¹⁰ Jesosa, miya ojjaña huoojea'yojji poani. Jamajjeya ecuaña huoojeaje minijje ojjaña joya ojjaña meshijo ba'e huoojeaa, esejaya Chii aija esohui huohuiya pea'ai".

Jama sohuicuayameya poanaje Jesosa bihuiajji.

¹¹ Majoya eyajo eyaya banaje esohuidojojji quea huiso nee nee. Eyaya onajaya esohuicuayajji shajja'ajjanaje pea'ai. Oya cuana quea huiso nee neejo sicosico ajja. ¡Ache huiso nei nei, de! Oya cuana ejjanequitoqui'yo nequinaje aquiana eshe cuana, Jesosaja epeeji etii cuana quea huiso pea'ai ejjanequitoqui nequi'yonaje. Ojjaña yiyesama neiyo Eyacuiñajji e'anioque ani. ¹² Onaya janobajjima nei sohuicuayanaje; Jesosa bihuia canaje jama ba'a:

"Jesosa, miya quea pame nee nee. Miya ojjañaja mimishijo mano'yonaje, ñajjaja sho'i equecua'yo jayojja jama poanaje. Miya oe nei ojjaña huoojeajji. Ojjaña aquiana miquea, ojjaña tii. Ojjaña miquea eba. Miyaya quea ca'a poaniya jjejojo ojjaña ña. Ecuanaaya miya shajja'ajjaña; ecuañaaya miya bihuiaña. Ecuanaaya huohuiaña mijo jama ba'a: —Jamaya quea pame nee miyaya ña —poani".

Jamaya esohuidojojji cuana poanaje eyajo.

¹³ Majoya eyaya shajja'ajjanaje ojjaña Eyacuiñajjija pana cuana, ojjaña eyajo ba'eca cuana, ojjaña meshijo ba'eca cuana, ojjaña yahuaño mano'yo cuana, ojjaña enajo ba'eca cuana pea'aiya sohuicuayani. Ojjaña cuanaa Eyacuiñajji e'anioquejji ani bihuia cani. Jesosa ma ñajjaja jayojja jama mano'yonaje pea'ai bihuia cani onaaya jama ba'a:

"Eyacuiñajji, miya ojjaña huoojeajji. Jesosa, miya ecuanajo mano'yonaje. Jamaya quea pame nee nee. Jamajjeya ojjaña ecuañaaya miya bihuiaña. Miya shajja'ajjaña pea'ai ecuañaaya. Quea ca'a nee neeya jjejojo miyaya ojjaña cuana ña. ¡Jamaya capohua tii tii!"

Jamaya sohuicuayani ojjaña cuana.

¹⁴ Majoya aquiana eshe cuana Eyacuiñajji pejejo ani jama poanaje ba'a: —E'e, ¡jamaya ojjaña miya cabihuia cahua tii tii!

Jesosaja epeeji etii cuaa, ma 24 huisomeya pea'ai Eyacuiñajji bihuia canaje ecui'oshajjajo nequiya. Oya ca ca oe enequi tii tii. E'e, Jesosa etehue'yo ecueabajjiji me oeje beca ecueabajime'ya hui isajea mee caje, Eyacuiñajjija.

6

Esohui etehue'yo oe ecueabajjiji'ya isajea canaje Jesosaa

¹ Majoya eyaya, Huaniya banaje jama ba'a: Jesosa, ma ñajjaja sho'i equecua'yo jayojja yani. Ohuaya oe etehue'yo ecueabajjiji'ya isajea canaje, ebionei. Majoya eyaya shajja'ajjanaje oe aquiana eshe eyajo mimiani. Ojjaña esohui cueji taaani jayojja. Joya mapichi aija edaasa biajje ani yasijje taaanaje jama ba'a: —¡Poecue!

² Jjeya nei eyaya banaje mapichi oshe poeyani. Ohuaya mapichija edaasa biajje aniya mai ecuhuiji ña canaje. Oya emeshi meseja ejaahuojja quea nahue nee quia canaje cuaa. Oya poquicuajinaje ojjaña jeabichajea, emeshi mese quea ca'a nee nee jayojjaya.

³ Majoya Jesosaa pea ecueabajjiji'ya isa canaje. Eyaya pea aquiana eshe eyajo shajja'ajjanaje. Ohuaya jama iyaame acanaje ba'a: —¡Poecue!

⁴ Jjeya nei eyaya banaje mapichi ai quea huo'o nei nei. Deja mapichija edaasa biajje ani baa ai quia canaje cuaa. Oya jama huohuime acanaje cuaa ba'a: —¡Poquicue miya! ¡Ojjaña jjaquecuaqui meecue pea cuana nijjeya! —jamaya poanijo ojjaña quea tecue nee nee po mee cani ojjaña pea cuana nijje.

⁵ Majoya Jesosaa pea ecueabajijji'ya isajea ca o'oyanaje. Pea aquiána esheya iyaa canaje jama ba'a: —iPoecue!

Majoya mapichi ai tehue poeyani eyaya banaje. Ohuaya mapichija edaasa biajje aniya e'ipia'ajjajji iña canaje, bobi ipia'ajjajji, oe pojji bobi yani jojoya.

⁶ Majoya eyaya shajja'ajjanaje pea eyayo mimiani aquiána eshe yiyesamajje nequi. Jama poanaje jaya mapichija edaasa biajje ani nijje ba'a: —Echachojji cuana oe pojjaja chachochaco majje oe pojji bobi quiacue chaco sosejje! ¡Anoso oe pojji, oe tepe iye quemó pojjaja' quiacue; shijje iye huiso pea beca peejjima tepe pojjaja' quiacue jjeyahua nei e'ijji'ajjajji! ¡A'a huana meeji quijje e'ijji'ayojji! ¡Acuijjajja sei, acuijjajja na e'ishijji a'a quea nahue ameeji! —oya poanaje.

⁷ Majoya Jesosaa pea ecueabajijji'ya isajea cajo eyaya shajja'ajjanaje pea aquiána eshe eyayo. Ohuaya jama iyaame acanaje ba'a: —iPoecue!

⁸ Jamajjeya ijjea nei eyaya banaje mapichi jahua poeyani. Ohuaya mapichija edaasa biajje aniya quea huiso nee nee mano mee caje'yo. Jamajjeya oya Jjamaño mee'yojji bajjani. Mano mee ca'yajje ojjaña poqui mee caje'yo emano'yo saja huasijje. Oya huohui canaje cuaa jama ba'a: —iQuea huiso nee nee mano mee'yocue ojjaña meshijo ba'eca! ¡Oe dejja mano mee'yocue; beca cuana a'a mano meeji! ¡Jamaya amajamajacue ojjaña meshijo ba'e cuana! ¡Quea huiso mano mee'yocue jjaquecuaquianijo; bobi chamajo pea'ai, emanomeejjijo pea'ai mano mee'yocue! ¡Ijjiacajji quea mase cuaa dejja quea huiso ijji mee'yocue pea'ai!

⁹ Majoya Jesosaa, ma ñajajja sho'i equecua'yo jayojja pea ecueabajijji'ya isajea cajo eyaya banaje quea huiso Jesosaja epeeji yahuajo mano'yo cuana eyayo nequi'yo. Pea cuaa oya cuana quecua ca'yonaje Eyacuiñajjija esohui jama ajji poanijojo, Jesosaja esohui huohuijijjo pea'ai. E'e, oya cuana jiquio jama ba'a: Jodio cuaa ñajajjaja ebacua cuana mei e'iya biajje cuia cajje na' cuayaquianinaje mimishi cuijje'yojji jayojja jama dejja cuaa Jesosaja epeeji cuana quecua ca'yajje onajaya ena' cuayaqui'ya poa. ¹⁰ Jamajjeya oya cuana taaanaje jama ba'a: —Emeshi Mese nei, miya quea pame nee; ojjaña miyaya aña. Huohui majje jamaya poani. ¡Bacue oe, dejja mimishi cuaa ecuana quecua ca'yonaje! Jamajjeya çache shono shai ojjaña quea mimishi ojjaña meshi cuanajo ba'e quea nee nee po mee'yo miyaya? —oya cuana poanaje.

¹¹ Eyacuiñajjija oya cuana quia canaje daqui oshe quea ao nee nee. Ona nijje miminaje jama ba'a: —Pea cuaa miqúanaya quecua ca'yonaje ecuea esohui huohuiji poanijojo. Miquea edoe mese cuana ecuea epeeji cuana enijje chachacoani pea cuaa quecua caje'yo pea'ai. Jamajjeya ¡shoa socue! Quecuajje cajo, eyaya dejja mimishi cuana quea nee nee po mee'yo —Eyacuiñajjija acanaje.

¹² Majoya Jesosaa pea ecueabajijji'ya isajea cajo eyaya banaje jama ba'a: Meshi huehuahuehuanaje janobajjima nei. Eshequi quea apo nee nee poanaje, daqui tehue nei jayojja poanaje. Ba'i quea huo'oe nee, ena' jayojja poanaje. ¹³ Majameta cuana jicajjaqui majje ijjiijjioquenaje meshi yasijje, beni pajijiya acuijjajja etahua jeahuojjea cani jayojja poanaje. ¹⁴ Eyatahuatahua chama'yo tii poanaje. Jjahuejjajjaequi majje yoquise esipi ejequeijjeapihui nequi jajajjaqui'yani jayojja poanaje pea'ai. Eyiyo, nasi cuana pea'ai jjaajajjaequi majje jsheshojjaequinaje meshi huehuahuehuajo. ¹⁵ Jamaya emeshi mese cuana poanaje pea'ai; jeabichajja'yonaje ojjaña. E'e, jiquio jama poanaje ba'a: Emeshi mese cuana, dejja huoojajji cuana, dejja quea aquiána huiso cuana, sohuinano mese cuana, dejja etii cuana, dejja ehoojajjima' cuana, dejja ehoojajjijji cuana pea'ai jja'aniquehuaqui canaje jjaní cuana huasijje, eyiyo cuana huasijje pea'ai. ¹⁶ Ojjaña jiquio dejja mimishi cuana quea mete nee nee poanijo siasianaje jama ba'a: —Eyacuiñajji ojjaña huoojajji oya yani. Jesosa ñajajja sho'i equecua'yo jayojja yani pea'ai. Eseyá quea mimishi poanijo, oya cuana quea quene nee nee poani ese nijje. ¡Jamajjeya eyiyo cuana, mei ai cuana pea'ai ecuana biajje ca'oqueahua, Eyacuiñajjija eseya eba ca cuahuajje, Jesosaa eseya quea nee nee epo mee ca cuahuaje! ¹⁷ E'e, oya cuana poeyani ojjaña quea mimishi napaa. Ojjaña eseya manoj'e'yo, de —jama siasiameya dejja mimishi cuana poaje.

7

Jesosaja epeeji bahua tehue canaje Jodio cuanaja ojjañaja ebajji

¹ Majoya eyaya banaje ebaca pee pea'ai esohuidojojji cuana. Eyacuiñajji onijje miminaje beni cuana ehoojajji pojjeamajo. Beni quea quemó dejja cuana napajji meshi cuana huasijje, bae ai cuana huasijje, acui cuana huasijje epoqui poaje jjejojya iña cani esohuidojojji cuaa. ² Majoya eyaya pea esohuidojojji banaje; eshequi poeje mijijje poeyanaje. Ohuaya aquiána etehuejji ye canaje Eyacuiñajjija epeeji cuana bahua tehuejji ojjañaja ebajji. Ma esohuidojojji ebaca pee pea'ai cuana huasijje taaanaje meshi cuana, bae cuana

pea'ai enapa ca poaje jjejojo. Jama poanaje ba'a: ³—¡Ishoa socue! ¡Meshi, bae ai, acui cuana pea'ai a'a jinapajji so'ol! ¡Eyaya Eyacuiñajjija epeeji Jodio cuana Eyacuiñajjija bajjani ojjañaja ebajji cabahua tehuesahua! —ma esohuidojojji poanaje.

⁴ ¿Ache huiso tehue canaje ebahuajje Eyacuiñajjija bajjani ojjañaja ebajji? Eyaya shajja'ajjanaje jama ba'a: —Jodio cuana Eyacuiñajjija bajjani quea huiso nee nee tehue canaje ebahuajje, 144.000 huisome. Jodio etiquianaja Isaenija bacua eja 12 cuana poa. Ojaya osecua cuana tehue canaje. ⁵ Jama tehume acanaje ba'a:

Jodaja osecua cuana 12.000 huisome;

Shobenija osecua cuana 12.000 huisome;

Janeja oya jayojjaya 12.000 huisome;

⁶ Aseneja oya jayojjaya 12.000 huisome;

Netanija jamaya pea'ai 12.000 huisome;

Manaseja osecua cuana 12.000 huisome;

⁷ Simeonija osecua cuana 12.000 huisome;

Nemija osecua cuana 12.000 huisome;

Isacanija osecua cuana 12.000 huisome;

⁸ Sabononija oya jayojjaya 12.000 huisome;

Joseja oya jayojjaya 12.000 huisome;

Bejamija jamaya pea'ai 12.000 huisome.

Mahuisoya Eyacuiñajjija bajjani tehue mee canaje Jodio cuanaja ebahuajje.

Quea huiso nee nee ojee nequi daqui oshe huosho'yo epo

⁹ Majoya eyaya banaje quea huiso nee nee pea cuana, Jodio pojjeama ojee echicha'yo nequi, daqui oshe nee nee huosho'yo epo. Quea huiso nee nee poanijojo esicojji pojjeama. Oya cuana ojjaña meshijo ba'e, ojjaña cuiñajjijo ba'e pea'ai poeyani. Deja tehue cuana. Ese Eja cuana, deja nei cuana, ojjaña de, poeyani. Ojjaña pea esohuijo mimiani cuana poeyani pea'ai. Ojjaña oya cuana Eyacuiñajji cojja nei nequi. Cuanaya Jesosa ñajajja equecua'yo jayojja cojja nei nequi yasijje poeyani ojjaña. Onajaya daqui ao quea oshe nee nee. Onaaya jjememe ña jeasohua cani Jesosa bihuajji. ¹⁰ Ojjaña cuana taaanaje jama ba'a:

“Eyacuiñajji, miyaya ojjaña huoojeaña. Jesosa, miya mano'yonaje ñajajja equecua'yo jayojja. E'e, miyaya ecuanaya ba'e tiitii meeaña”.

Jamaya acanaje cuaa.

¹¹ Majoya ojjaña esohuidojojji eyajo cuana Jesusaja epeeji etii pejejo nequi, ebeca pee pea'ai aquiana eshe cuana pejejo nequi pea'ai, Eyacuiñajji ma ojjaña yiyesama neijje ani yasijje jjanequichipiquinaje. Eyacuiñajji ojjaña huoojea'yojji poani bihuia canaje esohuidojojji cuanaa ecui'oshajjajo nequiya. Jama poanaje ba'a:

“Jamaya capo'yahua, Eyacuiñajji! Miya quea pame nee nee. Ojjaña miquea eba. Miya shajja'ajjaña tii tii ecuaanaaya. Miya ojjaña huoojeajji enequi tii tii. Ojjaña ecuaanaaya miya bihuia tiitii aña. ¹² Miya quea ca'a nee neejo ojjaña miyaya aña tii tii. ¡E'e, jamaya capo'yahua tii tii!”

Ojjaña esohuidojojji jamaya sohuicuayanaje.

¹³ Majoya Jesusaja epeeji etiiya eya huohui'ajja canaje jama ba'a: —Huani, ojjaña jiquio echicha'yo nequi daqui oshe nei huosho'yo epo ¿a'a miquea eba? ¿Achejje shai oya cuana poeyani so'o?

¹⁴ Jamajjeya eyaya oya jama anaje ba'a: —Chojja, ecuea ba jjima. Miyaya ca ya ca oe baña, de. ¡Che ña oe huohuicue!

Ohuaya eya saja'a canaje jama ba'a: —Onaya ba'e'yonaje meshijo. Jesosa nijje jjapee-quianajo, deja mimishi cuaa oya cuana napa huicha'ahuicha'a canaje. Jiquio ecua dejja daqui oshe taja cajje quea boejea nee nee poani jayojja jama Jesusaa ojjañaja mimishi cuijea ca'yajje quea boejea nee nee poani. E'e, Jesosa ñajajja sho'i equecua'yo jayojja poanaje. Ojaya ena' cuayaqui majje ojjañaja mimishi cuijea'yojji poanaje. ¹⁵ Jamajjeya oya cuana nequi mee ca'yani Eyacuiñajji cojja neijo eyajo. Jomajo onaaya Eyacuiñajji nijje chaco tiitii cani quea bihui nee nee. Eyacuiñajji ojjaña huoojea'yojji poani. Ohuaya ojaya epeeji cuana jaahuana tiitii cani. ¹⁶ Ojaya epeeji cuana quea shoe pojjeama poaje'yo. Quea nabataja po ajja pea'ai. Eshequijo quiyo'yo ajja, quea mano po'yo ajja pea'ai. ¹⁷ E'e, Jesosa ñajajja equecua'yo jayojja Eyacuiñajji pejejo nequi. Jiquio ecua ñajajja cuiñajjija ñajajja cuana jaahuana cani, ena eteo ishi mee cani jama jayojja Jesusaa ojaya epeeji cuana jaahuana cani. Ojaya e'ishijji ishi mee majje ba'e tiitii mee caje'yo onijje pea'ai eyajo. Eyacuiñajjija jaahuana canijo, oya cuana quea yeno po ajja. Pa'yo ajja poaje'yo —jamaya Eyacuiñajjija epeeji etii poanaje.

8

Pea ecueabajiji'ya isa canaje ma me oeje beca oe poanaje

¹ Majoya Jesosaa pea ecueabajiji'ya isa canaje. Jamajjeya ojjaña ecueabajiji'ya me oeje beca huismo'e ya oeyejje nei isajea ca'ya poa. Jamajjeya oeyejje nei ecueabajiji'ya isa ca'ya'ajo, ojjaña cuana eyajo ani jeca neinei po'yonaje. ² Quijje pishana eyaya banaje me oeje beca esohuidojojji Eyacuiñajji cojja nei nequi. Oya cuana huasijje eshe'ana ai jayojja me oeje beca quia mee canaje Eyacuiñajjiya emiajji.

³ Majoya eyaya banaje pea esohuidojojji. Ohuaya shiyeshiye dahuajji mei huo'o quea nahue iñanequia cani mei huo'o e'ya aquiana dahuajji pejeje. Oya quia canaje cuaa madeja pohui jayojja quea shiye nee nee edahuajeajji Eyacuiñajji bihuiajji. Maya dahuajea canaje mei huo'o e'ya biajje, ma Eyacuiñajji anioqueani pejeje. Jiquio ecua madeja pohui dahuajea cajje huichacha quea shiye ba'esohuaquiani jayojja jama Eyacuiñajjiya epejji cuanaja emimi onijje eyahuasijje ba'esohuaquianajo Eyacuiñajjiya shajja'ajja cani. ⁴ Jamajjeya madeja pohui jayojja quea shiye nee nee esohuidojojjiya eme jjo-tojo ani quiyo nequinaje. Huichacha ba'esohuaquinaje Eyacuiñajji yasijje. Ma huichacha ba'esohuaquianajo, Eyacuiñajjiya shajja'ajja canaje Jesosaja epejji cuanaja emimi onijje. ⁵ Majoya ma esohuidojojjiya cuaqui cojja sha mei e'ya biajje ani iya canaje shiyeshiye dahuajjiyo. Majoya eyajo nequiya ohuaya cuaqui cojja sha shiyeshiye dahuajjiyo ani jeaoqueajea canaje meshi yasijje. Majoya cueji cuana taaa poanaje janobajjima nei. Pojjeje baa siyoo cuana poanaje. Meshi huehuahuehuanaje pea'ai. Quea shajjaquijjo pea'ai poanaje.

Emiajji cuana

⁶ Majoya me oeje becaa, ⁷ esohuidojojji cuaa emiajji cuana iña canaje emiajji. ⁷ Ebionei esohuidojojjiya ojaya emiajji ana'ai she'ana jayojja mia canaje aquiana quea huiso meshijo edahuajeajji. Mia cajo, quea huiso meja jjacajjaquinaje oquequinaje meshi yasijje. Pojje-jjeya quea huiso meshi dahua canaje. Ena' oquequinaje meshi yasijje pea'ai. Jamajjeya meshi quea huiso quiyonaje. Oe meshi quiyonaje; beca quiyo jjima poanaje. Pea quiyonaje; beca quiyo jjima poanaje. Jamaya poanaje ojjaña meshijo. Acui cuana jamaya poanaje pea'ai. Oe acui quiyo'yonaje; beca acui quiyo jjima poanaje. Ojjaña huenihueni quiyo'yonaje. Chama'yo tii poanaje.

⁸ Me oeje oe pea esohuidojojji cuanaja mia jjima ojaya emiajji cuana. Jamajjeya majoya pea esohuidojojjiya ojaya emiajji ana'ai she'ana jayojja mia canaje. Taaa'yo majje ohuaya aquiana eyiyo quea quemo nee, quea jiji nee jayojja jeaoqueajea canaje bae ai cuana huasijje. Quea huiso bae ai quea huo'o poanaje ena' jayojja. Ena' jjejojo quea ihui poanaje. ⁹ Jamajjeya quea huiso nahuoo mano'yonaje. Oe nahuoo mano'yonaje; beca mano'yo jjima poanaje. Jamaya poanaje ojjaña nahuoo cuana. Quea huiso bishe ai hui'i'yonaje. Oe bishe hui'i'yonaje; beca hui'i'yo jjima poanaje. Jamaya poanaje ojjaña bishe cuana.

¹⁰ Me oeje huiso esohuidojojji cuanaja emiajji cuana mia jjima so'o. Jamajjeya majoya pea esohuidojojjiya ojaya emiajji mia cajo oe majameta eyajo nequi quea jiji nei, cuaquijji quea quemo jayojjaya oquequinaje quea huiso cuei yasijje. ¹¹ Maya majameta ma bajjani ba'a: Quea Pase Nee Nee bajjani. Jamajjeya quea huiso cuei, eta eteo pea'ai quea tai poanaje. Oe cuei quea pase nee nee; beca cuei pase'ama poanaje. Jamaya poanaje ojjaña ena. Jamajjeya quea huiso dejja cuana mano'yonaje ena quea pasejojo.

Ebeca pee pea'ai huismojea esohuidojojji cuanaja emiajji mia jjima so'o. ¹² Jamajjeya majoya pea esohuidojojjiya ojaya emiajji mia cajo eshequi jaasohua pishana majje jiji ajja, quea misi poanaje. Mecajje ba'i jamaya poanaje pea'ai. Jaasohua pishana majje quea misi poanaje. Majameta cuana quea misi poanaje pea'ai: Oe majameta jiji ajja; beca cuana jiji canaje. Jamaya poanaje ojjaña majameta.

¹³ Majoya eyaya banaje huipa cubesani. Oya taanaje jama ba'a: —Quea yeno nee nee poaje ojjaña meshijo ba'eca cuana. E'e, pea beca pee jjimaa esohuidojojji cuaa emiajji eshe'ana jayojja mia caje. Mia cajo, quea nee nee poaje quea huiso dejja cuana —jama taameya poanaje huipa. Jamaya poani eyaya banaje, Huaniya.

9

¹ Majoya pea esohuidojojjiya ojaya emiajji mia canaje. Mia cajo pea majameta jayojja meshi yasijje oquequiani eyaya banaje. Oya majameta jayojja huasijje quia mee canaje Eyacuiñajjiya esecue cojja quecuaca'apejo meeji, yave quia canaje jiani ai quea doe nee nee ca'apejojji. ² Jjani ai quea doe nee nee ca'apejo cajje eyaya banaje huichacha quea quemo ba'esohuaquinaje que quea quemo nee nee dahuajea cani jayojja, quea jiji nee nee poani jayojja. Eshequi quea misi poanaje huichacha quea quemojo. ³ Huichacha quea quemojo ani satajje jayojja cuayaquinaje, satajje ejja pojja'a. Quea satajje moo nee nee

poanaje. Meshi yasijje poeyanaje. Ma satajjeja ehua'o cuana aji jayojja, quimajji. ⁴ Satajje quimajji huohui canaje Eyacuiñajjiya jama ba'a: —¡A'a huenihueni napajji! ¡Acui sisi, acui quea quemo pea'ai a'a napajji! ¡A'a napajji ecuea epeeji ma ebahuaaje ecuea bajjani ecue etehue'yo! ¡Ecuea epeeji pojjeama ca ca napacue, ma ebahuaaje ecuea bajjani tehue jjima! ⁵ ¡Oya cuana a'a mano mee'yojji! ¡Quea nee nee oe po meecue me oeje ba'ime, 5 ba'ime! —poanaje.

Jamajjeja equimaa quecua majamaja cajje quea nee nee po mee canaje, ajiya quecua cani jayojja. ⁶ Jamajjeja deja mimishi cuana mano'yo sa poaje ma me oeje ba'ime. Jamatii mano'yo jjima poaje.

⁷ Ma satajje ejja cuana jiquio jayojja jama ba'a: Yamijji mapichi ai ejaquecuaquijji dojojji jayojja. Deja jayojja cojjame. Mapichi mei huo'o quea nahueja sapa huahuo iya jayojja. ⁸ Satajje ejja cuana saojji de, epona jayojja. Ojaya ese' quea ao, ibia jayojjaya. ⁹ Ese'ojje baa daqui quea moo eba'e huana. Oya cuana cuichojji pea'ai. Ojaya ecuicho cuana quea shajjaquijjo, mapichi quea huiso nee nee cuajicuaajijebeani jayojja jama poani, mapichiya pea ejaquecuaquijji dojo cani pea cuana quecuaa. ¹⁰ Satajje ejja cuanaja ehua'o aji jayojja, quimajji. Deja cuana quecua caje equimaa. Quea nee nee po mee caje'yo me oeje ba'ime. ¹¹ Satajje ejja cuanaja ehoojeajji yani. Oya jjani ai cuiñajji, ma emano'yojaa nequi quea doe nee nee cuiñajji. Jodio cuanaja esohuijo ojaya bajjani Abodono bajjani; Jieno cuanaja esohuijo oya Aponiono bajjani; Ese Ejjaja esohuijo ojaya bajjani Ojjaña Quea Yeno Po Mee'yojji bajjani.

¹² Jamajjeja ebionei epojja cuana quea nee nee poani apoa acanaje. Quijje pishana quea camaja nee nee poaje. E'e, beca esohuidojojji cuanaja emiajji mia jjima.

¹³ Majoya pea esohuidojojjiya ojaya emiajji mia canaje. Mia cajo eyaya pea shajja'ajjanaje. Oya mimiani ebeca pee pea'ai eshe'ana yiyesama neijo nequi. Ma eshe'ana cuana yani mei huo'o e'iyaa aa biajje, Eyacuiñajji cojja nei nequi. ¹⁴ Eyacuiñajji jama poanaje ba'a esohuidojojji nijje, ma jjeja nei mia canaje nijje ba'a: —Ebeca pee pea'ai esohuidojojji cuana yani cuei quea quemojo, Eopate cuei yobijo. ¡Maya esohuidojojji cuana jomajo ejeyo nequi pichojeaqui'yocue! —Eyacuiñajji poanaje—. ¹⁵ E'e, eyaya ma esohuidojojji cuana nequi meeaña jjeja nei ehoojeajji jayojja. Jiquio shequiajajo, jiquio ba'ijo, jiquio pojajajo, jiquio eshequi nequi pojajajo pea'ai ehoojeajji. Poquije mimishi cuana quea huiso nee nee quecuaa. Jama quecuame acaje ba'a: Oe deja quecua caje, becanejjijji pea'ai quecua jjima acaje. Jamaya acaje'yo ojjaña deja cuana ojjaña meshijo ba'eca cuana —jamaya Eyacuiñajji poanaje.

E'e, ma esohuidojojji cuana pichojea mee'yo majje huoojea caje jjaquecuaquiya. ¹⁶ Deja mase mapichija edaasa biajje ani huoojea caje quea huiso nee nee. Peaa eya huohui canaje ache huiso deja mase cuana mapichija edaasa biajje ani. Quea huiso nee nee, dosciento millone, 200.000.000 huisome poaje, de.

¹⁷ E'e, Jesosaa eya, Huani ecuea ebajji ba mee canaje mapichi cuana, deja cuana mapichija edaasa biajje ani pea'ai. Eyaya oya cuana banaje jama ba'a: Ojaya ese'ojje baa daqui quea moo ba'ehuana canaje ona equecua ca'yo poaje jjejojo. Baa daqui quea moo quea siyo, quea tahua nee, quea jahua nee jayojja pea'ai. Mapichi cuanaja esapa cuana ibia naa asha jayojja. Enabajje cuayani cuaqui jiji jayojja, huichacha, beni quea ihui, quea pase, mei quea ihui jayojja pea'aiya. ¹⁸ Oya cuaquijo, huichachajo, beni quea ihuijo pea'ai quea huiso deja mimishi cuana manaje'yo. Oe deja mano mee caje'yo; becanejjijji pea'ai mano'yo jjima poaje. Jamaya poaje ojjaña deja mimishi cuana ojjaña meshijo ba'eca cuanaya. ¹⁹ Oya mapichi ai cuaa quea huiso nee nee mano mee caje'yo; cuaquijjiya ojaya enabajje cuayaniya mano mee caje'yo. Ojaya ehua'ohua pea'aiya deja cuana quea nee nee po mee caje. Mapichi cuanaja ehua'o cuana peyo jayojja, sapame ehua'o icuijo enequi ese'. Maaya deja mimishi cuana ijja caje quea nee nee poaje'yo.

²⁰ E'e, Eyacuiñajjiya deja mimishi cuana napa majamaja mee ca'yonaje. Jamatii, quea huiso ma pojajajo mano'yo jjima poanaje cuana. Jamatii onaya mimishi cuana pajea sa po'yo ajja. Eshahua cuana bihuia pajea'yo ajja, eyacuiñajji nisho cuana bihuia pajea'yo ajja pea'ai. Eyacuiñajji nisho acanaje cuana, mei huo'o quea nahue, mei oshe quea nahue, mei jahua quea nahue, mei nahue'ama, acui pea'ai eyacuiñajji nisho acanaje. Maya eyacuiñajji nisho cuana shajjama', jiojjima', cojjama' pea'ai. ²¹ E'e, maya deja cuana quea mimishi tii tii poanaje pea quecuaajji cuana, jjadasiaquijji cuana, siipojji cuana, pea cuana cojjojji poani cuana. Mimishi cuana pajea'yo ajja; quea mimishi po titi'yonaje.

¹ Majoya eyaya, Huaniya banaje eyajo pea esohuidojojji ba'eoqueani meshi yasijje. Oya bo oshe biajje nequi. Ojaya daqui bo oshe nei nei jayojja. Ojaya sapa biajje eshijje quea bame nee nee jayojja ejjanequitoku'yo nequiani. Ojaya ecojja quea jiji nee nee eshequi jayojjaya poani. Ojaya equise jijiani, equi yamajjana acui ca'a jijiani jayojja jama poani. ² Ohuaya ejee etehue'yo iña caní emeya. Ecueabajijji'ya oeyejje nei isajea ca'yajo jjaeapichojojjoqui'yonaje. Oya epii nequi. Ojaya ebianeí jiojji bae ai biajje nequi; shani jiojji ca meshi yasijje nequi. ³ Oya taaanaje janobajjima nei íbia quea quemo nee nee mimiani jayojja. Ojaya esohui me oejje beca huiso cueji jayojja poanaje. ⁴ Cueji cuana jayojja shajja'ajja majje eyaya ojaya esohui tehue'ajjanaje. Esohui tehue jjimahuajo pea eyajo nequi enijje miminaje jama ba'a: —Chojja. ¡Me oejje beca cuejija esohui a'a tehuejji! ¡A'a huohuijji ojaya esohui! —poanaje.

⁵ Majoya ma esohuidojojjiya bae ai biajje nequiya, meshijo nequiya pea'aiya oja eme' ebianeí eme' jeasohua canaje eyahuasijje. ⁶ Majoya oya miminaje jama ba'a: —Eyacuiñajjiya ojaya esohui ma ecua ohuaya yahuajo huohui canaje jamaya e'e jojo nei jjeyahua nei acaje'yo. Oya quea ca'a nee nee poani. E'e, oya ba'e tiitiani; eya cuana, ojjaña aquiana eyajo nequi pea'ai pana ca'ya poa; meshi cuana, ojjaña aquiana cuana bajio ani pea'ai pana ca'ya poa, Eyacuiñajjiya —jamaya esohuidojojji ma ebianeí jiojjiije enajo nequi, shani jiojjiije meshijo nequi poanaje; ohuaya huohui canaje jama ba'a: —Jjeya apoa. Ma ecua ohuaya huohui canaje jamaya jjeyahua nei Eyacuiñajjiya acaje'yo. ⁷ Yahuajo Eyacuiñajjiya ojaya esohui huohuijji cuana huohui mee ca poa ma ohua quijje nei acaje. Quijje pishana pea esohuidojojjiya quijjejeje neiya ojaya emiajji mia caje. E'e, ojjaña ba mee caje Eyacuiñajjiya acaje cuana ma yahuajo oja dejja cuana ba mee jjima poa, ma ohua quijje acaje pea'ai, maya yahuajo nei onajaya quea quehua poanaje —jamaya ma esohuidojojji poanaje.

Me oejje oe esohuidojojji cuaa emiajji cuana mia canaje. ⁸ Majoya oya eyajo nequi mimi o'oyanaje enijje jama ba'a: —Huani, ¡ejee etehue'yo jjeshecue! ¡Ma esohuidojojji meshijo, ena ojjojo pea'ai jiojji nequiya emejo nequi ejee etehue'yo jjeshecue!

⁹ Jamajoya eya poquinaje esohuidojojji yasijje. Eyaya oya huohuinaje jama ba'a: —¡Quiacue mo ejee etehue'yo!

Jamajjeya eya ohuaya huohui canaje jama ba'a: —E'e Huani, ma'aje. ¡Ejee etehue'yo ijjiacue! Miya ijjiaje quea biquia nee poaje huini jayojja. Jamatii miya ijjiajeaje quea pase nee nee see aijo poaje —ma esohuidojojji poanaje.

¹⁰ Jamajoya eyaya ejee etehue'yo jjeshe majje ijjanaje. Quea biquia huini jayojja poanaje. Jamatii eya ijjiajeaje quea pase nee poanaje see aijo. Jamajjeya eyaya banaje ma esohui etehue'yojo quea huiso cuana quea nee nee poaje'yo. ¹¹ Majoya pea eyajo nequiya eya huohui ca o'oyanaje jama ba'a: —Huaniya, ¡quea huiso dejja cuana huasijje, ojjaña meshi cuana huasijje ojjaña pea mimime cuana huasijje, quea huiso emeshi mese yasijje pea'ai huohuiquicue ma Eyacuiñajjiya quijje acaje'yo! —jamaya poanaje eyajo nequi.

11

Beca esohui huohuijjiya esohui huohui canaje

¹ Majoya Eyacuiñajjiya pea eyajo nequiya eya quia mee canaje acui e'ipia'ajjajji. Ohuaya eya huohui canaje jama ba'a: —Huani, ¡Eyacuiñajjiya equi ipia'ajjacue! ¡Mei e'iyaa aquiana dahuajji pea'ai ipia'ajjacue! ¡Dejja cuana jomajo nequi Eyacuiñajji bihuiajji pea'ai sicocue! ² ¡Jodio pojjeamaja e'anijji Eyacuiñajjiya equi pejjejo ani a'a ipia'ajjajji! Jodio pojjeama cuaa Eyacuiñajjiya epeeji cuana napa caje beshahua nei ebeca pee pea'ai shequajame, 42 ba'ime. Jodio ojaya epeeji cuana Eyacuiñajjiya quea boti nee, ojaya Jenosanena cuiñajji quea boti nee jayojjaya. ³ Eyaya ecuea becanejjijji pea'ai esohui huohuijji huoejaje dejja cuana huasijje ecuea esohui huohuiya. Eyaya oya cuana ecue sohui huohui meejje quea huiso cahuijo, 1.260 cahuime. Ohuaya pea daqui huosho caje, dejja emano'yojo quea yeno nee nee poani jayojjaya. Jamajjeya ojjaña ba caje ojjaña meshijo ba'eca cuana quea nee nee poaje. ⁴ Ma ecuea becanejjijji pea'ai esohui huohuijji cuana beca nimo acui cuana jayojja. Oya cuana beca cuaquijji nequijji Eyacuiñajji cojja nei nequi jayojja pea'ai. Jamajjeya ojjaña ba caje Eyacuiñajjiya oya cuana jaahuana caní. ⁵ E'e, onaa esohui huohuijji napa cajo cuaqui cuayani ojaya enabajje, o napajji poani quiojeaje dejja mimishi cuana. Jamaya ojjaña manaje'yo, ma beca esohui huohuijji napajji poani. ⁶ Eyacuiñajjiya jiquio esohui huohuijji quea ca'a po mee caní. Jamajjeya ohuaya jama acaje'yo ba'a: Eyacuiñajjiya esohui huohuijji poaniya ohuaya ena chama' po mee caní. Quea jabo po mee caní. Ohuaya sa majje ena' jayojja po mee caní cuei cuana, bae cuana pea'ai. Ohuaya sa majje ojjaña cuana napa caní pea'ai.

⁷ Majoya jiquio beca esohui huohuijji cuaa huohui pajea majje, oe aquiana quea mase nee nee ma jjani ai quea doe neejo ba'e poeje ma esohui huohuijji cuana cuiajea. Jeabichajea majje cuiajea caje'yo. ⁸ Oya cuana mano'yo majje jamatii jaaje ejiojijio, Jenosanena cuiñajijio. Ma cuiñajijio pea cuaa yahuaajo Jesosa, ese jaahuanajji acui ecueata'apeejo ba'ehuanasohuajea canaje. Deja cuana Jenosanena cuiñajijio ba'eca quea mimishi poaje, ojjaña Sonoma meshijo yahuaajo nei ba'ya poa jayojja, Ejito meshijo ba'eca jayojjaya pea'ai quea mimishi poaje. ⁹ Jamajjeya quea mimishi poaniya jjejojo Eyacuiñajijia esohui huohuijji poani mano'yajo emojeajji pojjeama. Ejiojijio tii oya jamatii jaajeaje pea beca peejjima cahuime. Ojjaña cuiñajijio ba'eca cuana, ojjaña pea esohuijio mimiani cuana ojjaña meshijo ba'e pea'ai poeje ma esohui huohuijji emano'yoojaa baa. ¹⁰ Ojjaña deja mase cuana quea bihui nee nee poaje ma esohui huohuijji mano'yonaajejo. Jamajjeya aquiana quia caje onajaya epeejji cuana huasijje sosema'. E'e, ma esohui huohuijjiya ojjaña quea mimishi poani napa canaje quea huiso cahuime. Jamajjeya o mano'yajo quea bihui nee poaje ojjaña mimishi cuana.

¹¹ Jamatii pea beca peejjima cahuime poajo Eyacuiñajijia ma beca esohui huohuijji shequi mee caje o'oya. Nequisohua mee caje o'oya pea'ai. Jamajjeya ojjaña deja mimishi cuana oya cuana eshe o'oya ba majje quea mete nee nee poaje. ¹² Majoya ma esohui huohuijjiya shajja'ajja caje pea eyajo nequi mimi nequi onijje jama ba'a: —¡Yacua oe poe'yocue!

Jamajjeya oya cuana bo oshe biajje nequi sohuaquije'yo eyahuasijje. Sohuaquije'yo o quecua'yojji epo cuaa ba caje. ¹³ Majoya deja mimishi cuaa ba caquijo tii, Eyacuiñajijia meshi huehuahuehua mee caje'yo. Quea huiso equi jaabichajea meequi caje'yo. Deja cuana Jenosanenajo ba'e manaje'yo quea huiso nee nee, 7.000 huismo. Pea cuana mano'yo jjima poaje. Oya cuana quea mete nee nee poaje'yo. Jama poaje ba'a: —E'e de, Eyacuiñajijia eyajo ba'e quea pame nee nee, quea ca'a nee nee —jamaya quea huiso poaje.

¹⁴ E'e, jamaya ma beca esohuidojojijia mia majje deja mimishi napa caje'yo. Quijje pishana pea esohuidojojijia mia cajo deja mimishi cuana ojjaña meshi cuanajo ba'eca cuana napa caje'yo pea'ai.

Pea esohuidojojijia mia canaje

¹⁵ Majoya pea esohuidojojijia ojaya emiajji mia canaje. Mia cajo pea cuana eyajo ba'e janobajjima nei sohuicuayanaje jama ba'a:

“Eyacuiñajijia, miya ojjaña huoojeajji poani, ojjaña meshijo ba'eca cuana huoojeajji poani. Miyaya huoojeanaje Quito, mique huoojea'yo ojjaña cuana jaahuanajji. ¡Jesosa Quito ojjaña huoojeajji po meecue! ¡Ohuaya ojjaña cuana cahuojea cahua tii tii!”

Jamaya oya cuana poanaje.

¹⁶ Majoya quea huiso Jesosaja epeejji etii cuanaa, 24, Eyacuiñajijia cojja nei e'anioque aniya Eyacuiñajijia bihuia canaje ecui'oshajjajo nequiya. Jama poanaje ba'a:

¹⁷ “Eyacuiñajijia, miya oe nei quea ca'a nee nee po tiitiani, ojjaña huoojeajji poani tii tii pea'ai. Ecuaya miya bihuiaña miya quea pame nee nee poanijo. E'e, miya yahuaajo nei nei ani tiitii poa. ¡Jjeya miyaya ani tiitiani pea'ai. Ecuaya miya bihuiaña miya ojjaña huoojeajjiyojo. E'e, miya quea ca'a nee nee po tiitianijo miya oe nei ojjaña huoojeajji poani tii tii. ¹⁸ Ojjaña deja mimishi cuaa miya jeabichajea sa acani. Jamatii miya ona nijje quea quene nee nee poaje jjeya nei; quea nee nee po meeje'yo. E'e, jjeya miyaya deja mimishi cuana quea nee nee po meeje, oya ojjaña meshijo ba'e napajji poanajejojo. E'e, ojjaña yahuaajo nei emano'yo jjeya miyaya huohuije miquea ejashahuabaquijji onajaya eba'ejjijo. Deja quea mimishi poa quea nee nee po meeje'yo. Miquea esohui huohuijji cuaa, Jesosaja epeejji cuaa miquea esohui jayojja jama acanijjo ca ca miyaya quea bihui nee po meeje'yo. Minijje ani tiiti meeje'yo pea'ai ojjaña miquea epeejji, esho'i cuana, etii cuana pea'ai”.

Jamaya Jesosaja epeejji etii cuana poaje.

¹⁹ Majoya eya ba mee canaje Eyacuiñajijia equi eyajo ani. Eyiye dojjo ba mee canaje. Jomajo Eyacuiñajijia yani. Jomajo yani acui equecua quea bame nee, Eyacuiñajijia esohui etehue'yo huanajji. Ma esohui etehue'yo etiquianaa Moisesi nijjeya tehue ca poa. Ma esohui etehue'yo eya bajo, pojjeje quea huiso jeaja'a canaje, baa siyoo taaa poanaje, cueji poanaje pea'ai, meshi huehuahuehuanaje, meja jjacajjajaequinaje, quea huiso nee oquequinaje pea'ai. E'e, jamaya eyaya banaje.

12

Epona eshequi jayojja sa'o hu'o'o jayojjaa napa canaje

¹ Majoya eyaya banaje aquiana ai'ai eyajo, ma Eyacuiñajijia quijje ohua acaje. Jiquio jama poaje ba'a: Eyaya banaje epona eyajo. Ojaya daqui quea jiji nee eshequi jayojja.

Oya nequinaje ba'i biajje. Ojaya esapa huahuo yani majameta cuana, jiojji miji beca, 12 majameta. ² Oya siasianaje ebacua neejo. ³ Majoya eyaya banaje aquiana ai'ai eyajo, sa'o ai jayojja quea huo'o, sa'o ai ejja pojja'a. Oya quea sapa huiso, me oejeje beca, 7 sapame. Oya quea she'ana huiso pea'ai, ome miji pea'ai she'aname, 10 she'aname. Oja sapa cuanajo ejaahuojja jayojja yani pea'ai, me oejeje beca ejaahuojja. ⁴ Ohuaya iña canaje quea huiso majameta cuana ehua'ohua. Iña majje majameta cuana jeaoqueajea canaje meshi yasijje. Oe majameta iña canaje, beca iña jjima poanaje. Jamaya ojjaña majameta cuana acanaje ma aquiana sa'o ai jayojjaa. Oya sa'o ai jayojja epona pejeje nequinaje oja bacua ijiajji nisho, cuayajo. ⁵ Jamajjeya ma eponaja ebacua cuayanaje deja sho'i. Oya ojjaña huoojeajji quea ca'a nee nee poaje'yo. Ohuaya ojjaña shajja'ajja mee caje'yo ojaya esohui. Jamajjeya sa'o ai jayojjaja oya ijia jjimahua peaa ma ebacua dojo canaje eyahuasijje Eyacuiñajji e'anioque ani yasijje. ⁶ Majoya ma epona poquicuaajicuaajinaje quea huesha, meshi quima huasijje. Jomajo Eyacuiñajjiya eponaja eba'e meeji acanaje. Jomajo Eyacuiñajjiya oya jaahuana canaje quea cahui huiso, 1.260 cahuime.

⁷ Majoya eyajo quea huiso nee nee jjaquecuaquinaje. Jama poanaje ba'a: Ma sa'o ai jayojjaa ojaya esohuidojojji quea mimishi, quea huiso nee nee cuana nijjeya jjaquecuaquinaje esohuidojojji pame cuana nijje, Miyeni ojaya esohuidojojji quea pame nee nee quea huiso nee nee nijje. ⁸ Miyeni quea ca'a nee nee, sa'o ai jayojja quea ca'a pishana. Jamajjeya Miyeniya sa'o ai jeabichajea majje jeaoqueajea canaje meshi yasijje. E'e, sa'o ai, ojaya esohuidojojji cuana pea'ai nequi tiitii mee jjima acanaje eyajo. ⁹ Miyeniya oya cuana jeaoqueajea canaje meshi yasijje. Ma sa'o aija pea bajjani cuana jama ba'a: Peyo nei yahuaqo nequia poa bajjani, eshahua nei bajjani pea'ai, Edosiquiana nei bajjani pea'ai, Satanasa. Ohuaya beshahua nei ojjaña cuana ojjaña meshijo ba'eca cuana dasia cani, quea mimishi po mee cani. E'e, ma sa'o ai ojaya esohuidojojji cuana nijje jeaoqueajea canaje meshi yasijje Miyeniya, esohuidojojji quea pameya.

¹⁰ Majoya pea eyajo nequi enijje miminaje janobajjima nei. Jama poanaje ba'a: — Jjeya nei Eyacuiñajjiya ecuana ba'e tiitii mee cani. Ohuaya Edosiquiana nei jeabichajea ca'yonaje. Jamajjeya oya ojjaña Emeshi Mese nei poani. Ohuaya, Quitohua ojjaña huoojea cani pea'ai. Oya Eyacuiñajjiya huoojea'yo ojjaña jaahuanajji. Ma sa'o ai jayojjaa, Edosiquiana neiya ojjaña Jesosaja epeeji cuana niñeba cani tii tii, ohuaya esohui siajje acani Eyacuiñajji yasijje. ¹¹ Cuanaya Jesosa Quitohua, ma ñajjaja sho'i equecua'yo jayojjaa ojaya epeeji cuana quea boejea po mee cani oya na' cuayaquia poaa jjejojo, poquijey-onajeya jjejojo. Ohuaya ojaya epeeji cuana Edosiquiana nei jeabichajea meesahua cani. Ojaya epeeji cuaa Jesosaja esohui huohui canaje. Edosiquiana jeabichajea mee canaje pea'ai. Mimishi cuaa oya cuana quecua canaje Jesosaja esohui huohuijji poanijojo. Jamatii ohuaya mete'ama, yeno'ama pea'ai esohui huohui tiitii canaje. ¹² Jamajjeya ojjaña eyajo nequi, iquea bihui nee poque! Ojjaña meshi cuanajo ba'e, miqiuana quea nee nee poaje'yo Edosiquiana miqiuana que jeaoqueajea ca'yonaje jojoya. Oya quea mase nee nee poani. Ojaya eba jama poaje ba'a: Quijje pishana Eyacuiñajjiya oya jeajea caje'yo cuaqui yasijje. Jamajjeya oya ojjaña meshijo ba'e nijje quea mase nee nee poaje — jamaya peaa eyajo ba'eya eya huohui canaje.

¹³ Ma sa'o ai jayojja meshi yasijje oquequi'yo majje quea quene nee nee poanaje. Jamajjeya ohuaya epona, ma bacuaajji poanaje enaese ocuecuaajji canaje eshajomano meejea'yojji nisho. ¹⁴ Eyacuiñajjiya ma epona quia canaje beca ecuicho, huipa jayojja cuichomeya ecuabesajji. Jamajjeya oya cuabesanaje quea huesha, meshi quima huasijje. Jomajo Eyacuiñajjiya oya jaahuana canaje ma sa'o ai jayojjaa enapa ca poaje jjejojo. Eyacuiñajjiya oya jaahuana canaje quea huiso nee nee cahuime, beshahua nei ebeca pee pea'ai shequajame. ¹⁵ Majoya sa'o ai jayojjaa enabajje ena quea quemo ojajea canaje cuei quea quemo jayojja epona hui'i mee'yojji nisho. ¹⁶ Jamatii Eyacuiñajjiya epona jaahuana canaje. E'e, meshi jjaajjejequi mee majje ma ena quea quemo meshi yasijje shajadobiqui mee canaje. Oya epona jja'aniquehuaquiñajjinaje quea huesha. ¹⁷⁻¹⁸ Jamajjeya aje oe sa'o ai jayojja quea quene nee nee po majje poquinaje ma eponaja pea ebacua cuana nijje jjaquecuaquiya. Ojjaña joya Eyacuiñajjiya esohui jayojja jama ba'yani, Jesosaja esohui e'e jojo nei huohui tiitiijji poani pea'ai quecua sa acanaje ma sa'o ai jayojjaa. Jamaya eyaya, Huaniya banaje.

13

Aquiana mase bae ai'ajjo ani etaja huasijje nequisohuaquinaje

¹ Majoya eya jjacahuibaquinaje bae ai'ai sahuajo nequi. Jomajo eyaya banaje sa'o ai jayojjaa ishoa cani pea aquiana mase shanei ai jayojja, shanei ejja pojja'a. Oya bae ai'ajjo ani cojja cuaya majje nequisohuanaje etaja huasijje. Oya quea sapa huiso, me oejeje beca, 7 sapame. Ojaya eshe'ana quea huiso yani pea'ai, ome miji pea'ai, 10 she'aname.

Ojjaña eshe'anao yani ejaahuojja jayojja. Ojjaña esapajo yani etehue'yo quea tai pea'ai, Eyacuiñajji niñebajji tehue'yo. ² Ma shanei ai ejja jiquio jama ba'a: Oya ibia ecojjopia'yo ai jayojja, ibia chehue ai jayojja jiojjime. Oya ibia naa asha se' quemoajja, quea se' quemo nee nee. E'e, oya quea mase nee. Edosiquiana neiya, Satanasa, sa'o ai jayojjaa pea'aiya ma shanei ai ejja quea mase o jayojjaya po mee canaje, Edosiquiana nei jayojjaya poanaje. Jamajjeya oya quea ca'a nee poani, quea huiso huoojeajji poani. ³ Oya equecua'ajja'yo jayojja sapame poanaje, ma shanei ai ejjaja esapa. Jamatii jjaejaqui mee ca'yonaje. Jamajjeya quea huiso dejja cuaa meshi cuanajo ba'eya ma shanei ai ejjajo quea meteya jjejojo ojaya esohui jayojja jama acanaje. ⁴ E'e, sa'o ai jayojjaa shanei ai ejja ojjaña huoojeajji po mee canaje. Jamajjeya ojjaña sa'o ai jayojja bihuia ca'yonaje ecui'oshajjajo nequiya. Shanei ai ejja quea ca'a nee nee poso bihuia canaje cuaa pea'ai jama ba'a: —Pea o jayojja chama'. Chama' o jeabichajeya'yojji epo, de —acanaje cuaa.

⁵ Shanei ai ejja ojjaña meshijo ba'e huoojeajji poaje quea huiso ba'ijo, 42 ba'ime. Quea mimi tai nee nee poanaje. Jamajjeya Eyacuiñajji onijje quea quene nee nee poanaje. ⁶ Ohuaya Eyacuiñajji eyajo ani ojjaña huoojeajji poani niñeba canaje. Ojjaña Eyacuiñajji nijje nequi niñeba canaje pea'ai, shanei ai ejjaa. ⁷ Jamatii Eyacuiñajjiya oya jeabichajeya jjima. Jamajjeya ohuaya Jesosaja epeeji cuana nijje jjapee nishoqui majje jeabichajeya canaje. Jamajjeya ojjaña oya esohui jayojja jama acanaje. ⁸ E'e, ojjaña meshijo ba'ecaa oya bihuia canaje. Jesosaja epeeji cuanaja ca ca oya shanei ai jayojja bihuia jjima. E'e, meshi pana jjimahuajo tii Jesosaa, ma ñajajaja sho'i equecua'yo jayojjaa ojjaña ojaya epeejiija bajjani tehue canaje eba'e tii mee'yojji. Jamajjeya ohuaya shanei ai jayojja bihuia jjima acani.

⁹ ¡Shajja'ajjacue oe; jjashahuabaquicue oe! ¹⁰ Joya jja'iñaquiani ejeanobiajji quijje onaa oya iña majje jeanobia caje'yo pea'ai. Ojjaña joya jjajajaquiani manojeyo; yacua pea'ai caje'yo cuaa. Jamajjeya ojjaña Jesosaja epeeji cuana quea nee poanijo jamatii mete'ama cajjapee tiitiiquahua onijje.

¹¹ Majoya eyaya, Huanिया banaje pea aquiana quea mase pea'ai shaijjami ai quea mase nee jayojja, shaijjami ejja. Oya meshi quipajo ani cuayanaje. Ojaya eshe'ana becanejjijji pea'ai ñajajaja yahue jayojja. Jamatii ojaya esohui sa'o ai jayojja quea ajjaja epo meejji. ¹² Ebionei shanei ai ejjaa jiquio jjeya meshi quipajo ani cuayanaje shaijjami ai ejja o jayojja ojjaña huoojeajji po mee ca'yonaje. Jamajjeya pea shaijjami ejjaa ma meshi quipajo ani cuayaa ojjaña huoojea canaje ma shanei ai ejja esapa jaja'ajja bihuia. ¹³ Ohuaya, ma meshi quipajo ani cuayaa ma dejjaa ajjima acani acanaje quea huiso nee. E'e, ojjaña dejjaja ebajji ohuaya cuaqui oque mee canaje meshi yasijje. ¹⁴ Ohuaya jamaya acanaje ojjaña ma ebionei shanei ai bihuia meejji. Ma dejjaa ajjima acani amajjeya ohuaya ojjaña cuana dasia canaje. E'e, ohuaya dejja cuana ebionei shanei ai nisho pana mee canaje epana'yo, ma shanei ai esapa jaja'ajja jjaejaqui'yonaje nisho pana mee canaje. ¹⁵ Majoya ma meshi quipajje cuaya poa shaijjami ai ejjaa shanei ai nisho epana'yo eshe jayojja mimi meeme po mee canaje. Jamajjeya ohuaya jama acanaje ba'a: —¡Ojjaña joya e bihuia ajja iñacue, quecua'ajeya'yoque, oe! —poanaje shanei ai nisho epana'yo.

¹⁶ Majoya shanei aiya huohui canaje jama ba'a: —¡Ojjaña cuana, ojjaña tii tehucue ebahuajje, ebiane emejje pojjaja' ecuea bajjani! ¡Ojjaña esho'i, ojjaña etii pea'ai, ojjaña echacojji cuana, ojjaña echacomeejji cuana, ojjaña quea aquiana huiso poani cuana, ojjaña aema' cuana pea'ai jamaya tehucue ecuea bajjani, ecuea ebajji! ¹⁷ Ojjaña joya jjatehue meequi jjima aje oe ja'a aquiana cuana jjeshe meejji! ¡A'a aquiana quia meejji pea'ai! — oya poanaje.

¹⁸ ¡Bacue oe! ¡Ojjaña quea jjashahuabaqui ja'a, shanei aija ebajjani etehue'yo bacue! Ojaya etehue'yo ojaya bajjani jama ba'a: 666.

14

Quea huiso nee ojaya epeeji nei Jesosa nijje jaja'a meequi canaje, 144.000 huisome

¹ Majoya Eyacuiñajjiya eya eyahuasijje ba mee canaje Jesosa Sioni eyiyo biajje nequi. Eya ba mee canaje ojaya epeeji cuana quea huiso nee nee Jesosa nijje nequi, 144.000 huisome. Onaya ebahuajje etehue'yo Jesosaja ebajji, Echii aija ebajji pea'ai ojaya jojoya. ² Majoya eyaya shajja'ajjanaje eyajo ojjaña ma epeeji cuana sohuicuayani, Jesosa bihuia poani. Eyaya oya cuana shajja'ajjanaje ena tii tii poani jayojja, cueji baa siyoo poani jayojja, quea huiso e'iñaqueyajji cuana iñaqueya caní cuaa jayojja. ³ Ojjaña Jesosaja epeeji cuana quea huiso nee nee sohuicuayanaje Eyacuiñajji cojja nei nequi, ebeca pee pea'ai aquiana eshe cojja nei nequi, Jesosaja epeeji etii 24 huisome cojja nei nequi pea'ai. Jomajo ojee nequi Jesosaja epeeji quea huiso nee nee cuana sohuicuayanaje, esohuicuayajji eyacua. Ma esohuicuayajji eyacua pea cuanaja eyajo ba'e cuanaja ebajji pojjeama. Ma esohui

esohuicuayajji Jesosaja epeeji yahuajo meshijo ba'yahua mimishi cuijea'yo cuana ca ca oe sohuicuayani. ⁴⁻⁵ Quea boejea'yo ba'enaje, epana'yo bihuia jjima poanaje onajaya. Sijaje po ajja nei nei pea'ai, mimishi'ama nei nei pea'ai. Oya cuana Jesosa nijje japee neineiquinaje, ma ñajajja sho'i equecua'yo jayojja nijje. Onijje tii poquiani. Jesosa acui ecueata'apeejo mano'yonaje onaja mimishi cuana sosequia'yoyji. Jiquio ecua ebana coojji jhajani quea pame nee jama jayojja oya cuana quea pame nee. E'e, jiquio ecua ebana coojji ebionei jhajani quea pame nee poani Jodio cuaa Eyacuiñajji yasijje quia cani ojaya epojji jama jayojjaya oya cuana Eyacuiñajji nijje ba'e tiitijje'yo Jesosa nijje pea'ai jiquio 144.000 Jodio cuana. Jamaya eya, Huani cahuibanaje.

Pea esohuidojojjiya huohui canaje Jesosa poe o'oyajji

⁶ Majoya eyaya banaje pea esohuidojojji eyajo cuabesani. Eyacuiñajjiya oya huoojea canaje ojjaña cuana huasijje Jesosa ojjaña cuana ba'e tiitii mee canijo huohuiya. E'e, ohuaya Jesosajo huohui cani ojjaña cuana ojjaña esohujio mimiani yasijje. ⁷ Ohuaya jama acanaje ba'a: —¡Eyacuiñajji shajja'ajjacue! Oya jama acue ba'a: “Eyacuiñajji, miya quea pame nee nee”. ¡Oya bihuiaacue! Ohuaya ojjaña eyajo ba'e pana canaje; meshi, bae ai'ai cuana, cuei cuana pea'ai pana canaje. E'e, ¡jamaya acue oya; jjeyahua nei ohuaya ojjaña mimishi cuana quea nee nee po mee caje! —esohuidojojjiya ojjaña acanaje.

⁸ Ma ebionei esohuidojojji huohui cajo, pea esohuidojojji poeyanaje. Huohui canaje jama ba'a: —Ojjaña ma cuiñajji quea quemajo ba'e quea mimishi poanijo quea nee nee po mee caje, Babinonia cuiñajji bajjanajo ba'e cuana. Jiquio ecua oe epona quea mimishiya quea huiso dejja cuana quea mimishi po mee cani jama jayojja dejja cuana jomajo ba'eya pea cuana pea cuiñajji cuanajo ba'e quea mimishi po mee ca'yonaje —jamaya ma esohuidojojji poanaje.

⁹ Majoya pea esohuidojojji poeyanaje. Huohui canaje jama ba'a: —Ojjaña joya shanei ai jayojja bihuijji poani shanei nisho'ya pea'ai bihuiajji poani, shanei ajja bajjani jayojja ebahuaje, emeje pojjaja'ajatehue meequi pea'ai quea nee nee po mee caje'yo Eyacuiñajjiya. ¹⁰ E'e, jamaya acajo Eyacuiñajjiya ona nijje quea quene nee nee poaje'yo. Cuaquijo, huichacha quea ihui nee nee quea nee nee po tiitijje'yo. Ojjaña esohuidojojji quea pame neeya ba caje, Jesosaa ma ñajajja equecua'yo jayojja pea'aiya oya cuana ba caje'yo cuaquijo nequi. ¹¹ E'e, oya cuana quea nee nee poaje'yo tii tii; cuaqui huichacha ba'esohuaquije'yo tii tii. Ojjaña joya shanei ai jayojja bihuiajji poani, shanei nisho bihuiajji poani pea'ai, shanei ajja bajjani jayojja ebahuaje jatehue meequi pea'ai quea nee nee poaje'yo tii tii, quea nee po pajea'yo ajja tii epojjajo, mecalle pea'ai —jamaya poanaje esohuidojojji.

¹² Jamajjeya ojjaña Jesosaja epeeji cuana dejja mimishiya napa cajo jamatii mete'ama cajjapee tiitiquiahua, ma Jesosa nijje japeequi pajea'yo ajja, ojjaña Eyacuiñajjiya esohui jayojja jama acani pea'ai.

¹³ Majoya eyaya, Huaniya shajja'ajanaje pea eyajo mimiani jama ba'a: —Huani, jiquio ecuea esohui tehucue! Eyacuiñajjiya jjeya nei, quijje pea'ai quea bihui nee nee po mee caje'yo ojjaña Jesosaja esohui huohuijji ma esohui huohuijjiyo dejja mimishiya quecua caje —poanaje.

Majoya Edojjoshahua Pameya jama acanaje ba'a: —E'e jojo nei Jesosaja epeeji cuana ojaya esohui huohuijjiyo mano'yajo ba'e tiitii mee caje'yo Eyacuiñajjiya, jomishoca mee caje'yo; oya cuana sosequia caje'yo esohui huohui canaje sosejje.

Jamaya eya, Huani Jesosaa cahui ba mee canaje.

Eyacuiñajjiya dejja mimishi cuana napa neinei mee canaje

¹⁴ Majoya eyaya, Huaniya eyahuasijje banaje pea jama ba'a: Oe Dejjaja Bacua Ejja jayojjaya bo oshe biajje anioqueani. Ejaahuojja mei huo'o quea nahue esapajo ani ye'oquea canaje, baa ai shehuihui baa quea shejji ña canaje ebiane meje. ¹⁵ Majoya eyajo pea esohuidojojji Eyacuiñajjiya equijo ani cuayanaje. Cuaya majje taananaje joya bo oshe biajje ani yasijje. Jama poanaje ba'a: —Dejja mimishi cuana meshijo ani anoso ai yiye ejahua nee nee jayojja. Jamajjeya ¡anoso ai jahuajo jajasejja ca'yani baa ai shehuihuiya echicha'yoyji jayojja jama jjeya nei dejja mimishi cuana acue! ¡Oya cuana chichacue, oe! —jama taamemaya poanaje.

¹⁶ Jamajjeya ohuaya bo oshe biajje aniya ojjaña mimishi cuana meshijo ba'eca jaja ca'yonaje; chicha canaje ojjaña. Apoa acayonaje.

¹⁷ Majoya eyaya, Huaniya banaje pea esohuidojojji eyajo Eyacuiñajjiya equijo ani cuayanaje. Ojaya baa ai shehuihui yani pea'ai. ¹⁸ Majoya pea esohuidojojji mei e'liya pejeje ani, ma cuaqui jijiani pejeje ani poeyanaje. Oya taananaje esohuidojojji baa aijji ani yasijje. Jama poanaje ba'a: —Ojjaña mimishi cuana meshijo ba'e acui jajja ejahua nee nee jayojja jama. ¡Jamajjeya ejajja jahuajo sejja cani jayojja jjeya nei dejja mimishi cuana acue! ¡Quea mimishi poanijo quea nee nee po meecue! —ma esohuidojojji poanaje.

¹⁹ Jamajjeya meshi yasijje poe majje ma esohuidojojjiya ojjaña mimishi cuana meshijo ba'eca cuana jaja majje chicha canaje quea nee nee epo mee'yojji. E'e, Eyacuiñajji quea quene poaje mimishi cuana. Eca ijija pashajji yasijje nequia cani jayojja jama acaje'yo deija mimishi cuana.

²⁰ Jiquio ecua eca jajasejja majje cuiñajji pejeje ijjiapasha mee cajje eca na cuayaquiani jayojja jama ojjaña quea mimishi poani acaje'yo cuaa. Eyacuiñajji ba sa po'yo ajjajo quea huiso nee nee mano'yonaje; jjaquecuaqui'yo majje ena' cuayaquinaje cuei quea quemu jayojja jama, de.

15

Esohuidojojji cuaa ye canaje me oejje beca mimishi cuana napajji

¹ Majoya Eyacuiñajjiya ecuea ebajji jjaja'aqui mee canaje ma quijjejeje nei ohua acaje. Eyaya banaje pea aquiana ai'ai eyajo nequi. Ba majje quea ajajja nee nee poanaje. Ma aquiana ai'ai jama ba'a: Me oejje beca esohuidojojji eyaya banaje, Eyacuiñajjiya huoojja cuana ojjaña meshijo ba'eca cuana quea nee nee po meejji. Ojjaña napajji me oejje beca huismo eyaya banaje. Ona napa majje chama' pea enapajji poaje. E'e, Eyacuiñajjiya ejjashahuabaquijji ojjaña napajji apoa poaje'yo. ² Majoya eyaya banaje bae ai quea siyo tahuoo quea siyo jayojja cuaquijji quea jeajahua tejee. Ma bae ai sahuajo nequi ojjaña Jesosaja epeeji cuana. Maaya shanei ai ejja jeabichajea ca'yonaje, shanei ai nisho jeabichajea ca'yonaje pea'ai. Jesosaja epeeji cuaa shanei aija bajjani tehue mee jjima acanaje onajaya ebahuaje. Onijje jjapeequi'yo aija pea'ai. Jamajjeya Eyacuiñajjiya Jesosaja epeeji cuana huasijje quia canaje e'iñaqueyajji cuana esohuicuayajji. ³ Jamajjeya Jesosaja epeeji cuana sohuicuaayanaje Jesosa bihuajji, Eyacuiñajji bihuajji pea'ai. E'e, Moisesi, Eyacuiñajjiya esohui huohuiji sohuicuaaya poa jayojja jamaya sohuicuaayame poanaje Jesosaja epeeji cuana, Jesosaa quea pame nee acanajejo. Jesosa bihuia canaje jama ba'a:

"Eyacuiñajji, miya oe nei quea ca'a nee nee poani tii tii. Ecuana quea bojea nee po mee'yonaje. Jamaya quea pame nee. E'e, miya quea pame nee nee poani, e'e jojo nei pea'ai. Miya ojjaña huoojajji po tiitiani.

⁴ Ecuanaja Emeshi Mese Jesosa, ojjaña miquea esohui cashajja'ajja tiitii cahua, camimi cahua jama ba'a: —Jesosa, miya quea ca'a nee nee po tiitiani —capoahua. E'e, ojjaña miya bihuia caje'yo. E'e Jesosa, miya oe nei quea pame nee nee poani tiitii Eyacuiñajjiya miya quea boti nee. Eyacuiñajjiya ojjaña miquea eba'ejji quea pame ba mee canajejo, ojjaña meshijo ba'eca cuaa miya cabihuia cahua, mi pejeje nequia!"

Jamaya poanaje ojjaña Jesosaja epeeji cuana.

⁵ Majoya eyaya eyajo banaje Eyacuiñajjiya equi. Eyacuiñajjiya equi equacuayijji biso nei esecue eca'apejo nequi banaje. Jomajo yani Eyacuiñajjiya esohui etehue'yo. ⁶ Eyaya banaje me oejje beca esohuidojojji Eyacuiñajjiya equijo nequi cuayanaje. Ojaya emejo yani deija mimishi napajji, ojjaña meshijo ba'eca cuana napajji. Ojaya daqui quea oshe nee nee quea jeajahua nee. Ese'ojje baa daqui ehusho ba'e mei huo'o quea nahue nee. ⁷ Majoya eyaya banaje eyajo ma ebeca pee pea'ai aquiana eshe cuana Eyacuiñajji pejeje ani. Oe aquiana esheya caneco cuana quia canaje ma esohuidojojji cuana. Me oejje beca caneco cuana quia canaje. Ma caneco cuanao yani aquiana deija mimishi cuana quea nee nee epo meejji. Eyacuiñajji enequi tii tii quea quene nee nee poani ojjaña quea mimishi poani nijje. ⁸ Jamajjeya Eyacuiñajjiya equijo aninaje huichacha quea quemu nee nee; Eyacuiñajji quea ca'a, quea jeajahua, quea jiji nee nee pea'ai jayojja jomajo nequinaje. Jamajjeya ojjaña cuana Eyacuiñajjiya equi yasijje dobiqqui mee jjima poanaje. Quijje me oejje beca esohuidojojjiya me oejje beca aquiana deija mimishi cuana quea nee epo meejji apoa amajje pea cuana Eyacuiñajjiya equi yasijje eyajo dobiqqui mee caje'yo.

16

Me oejje beca aquiana cuana deija mimishi napajji

¹ Majoya eyaya Eyacuiñajji shajja'ajjanaje ojaya equijo mimiani. Ohuaya me oejje beca esohuidojojji cuana huohui canaje jama ba'a: —Aquiana miqianajaya canecojo ani shojeacue ojjaña meshijo ba'e yasijje ojjaña quea nee nee po meejji!

E'e, Eyacuiñajjiya ona nijje quea quene nee quea nee nee po mee caje'yo. ² Jamajjeya majoya ebionei esohuidojojjiya ma aquiana ojaya canecojo ani shojea canaje ojjaña meshijo ba'e yasijje. Jamajjeya ojjaña cuana ma shanei aija bajjani jayojja ebahuaje tehue'yo chiji po mee canaje quea nee nee. Quea nee nee po mee ca'yonaje ohua shanei ai jayojja bihuia canajejo, shanei ai nisho epana'yo bihuia canajejo pea'ai.

Me oejje oe pea esohuidojojjiya pea aquiana caneco cuanao ani shojea jjima so'o. ³ Majoya pea esohuidojojjiya aquiana ojaya canecojo ani shojea canaje bae ai yasijje.

Jamajjeya bae ena quea huo'o nee equecua'yo na' cuayaquiiani jayojja po'yonaje, quea ihui po'yonaje ojjaña aquiana enajo nequica mano'yojji.

Me oejje esohuidojojjiya aquiana caneco cuanajo ani; shojea jjima so'o. ⁴ Majoya pea esohuidojojjiya aquiana ojaya canecojo ani shojea canaje cuei quea quemo cuana huasijje, cuei sisi cuana huasijje pea'ai. Jamajjeya ojjaña ena quea huo'o, quea ihui po'yonaje nahuoo cuana mano'yojji. ⁵ Majoya esohuidojojjiya, ena jaahunajji poaniya huohui canaje jama ba'a: —Jesosa, miquea ejjashahuabaquijji cuana, miquea esohui cuana ojjaña mimishi cuanajo quea pame nee, e'e jojo nei pea'ai. E'e, miya quea pame nee poani jojoya miya Eyacuiñajji quea jea nee nee. Miya yahuajo nei nei yania poa; jjeya nei miya yani tii tii pea'ai. Jamajjeya ojjaña mimishi cuanajo miquea esohui quea ja'a nee. ⁶ E'e Jesosa, ojjaña dejja mimishi cuaa miquea epeeji cuana, miquea esohui huohuiji cuana pea'ai quecua ca'yajje ena' cuayaquinaje, jjashojeajequinaje. Jamajjeya miyaya mimishi cuana ena', equecua'yo cuanaja ena' cuayaquiiani jayojja ishi meeña quea ihui o manojea'yojji. ¡Jamaya capo'yahua! —poanaje.

⁷ Majoya eyaya shajja'ajjanaje pea eyajo mei e'ia pejeje nequi. Oya jama poanaje ba'a: —E'e Eyacuiñajji, miya quea ca'a nee, ojjaña huoojeña. Miquea ejjashahuabaquijji cuana e'e jojo nei quea pame nee. ¡Pea quea mimishi poanijo napacue! ¡Jamaya capoahua!

⁸ Ebeca pee pea'ai esohuidojojjiya aquiana ojaya canecojo ani shojea jjima so'o. Majoya pea esohuidojojjiya aquiana ojaya canecojo ani shojea canaje eshequi yasijje. Jamajjeya eshequi quea quiyo nee nee po'yonaje. Quea quiyo nee nee po majjeya ojjaña meshijo ba'e dahua canaje. ⁹ Eyacuiñajjiya ojaya esohuidojojji cuana huoojea canaje dejja mimishi cuana quea nee nee po meeya. Jamajjeya eshequiya dahua cajje Eyacuiñajji niñeba canaje cuaa. Jamatii dejja mimishi cuaa ojaya mimishi pajea'yo ajja quea mimishi nee nee jjejojo. Eyacuiñajji bihua'yo ajja pea'ai.

Pea beca peejjima esohuidojojjiya aquiana ojaya caneco cuanajo shojea jjima ani so'o. ¹⁰ Jamajjeya majoya pea esohuidojojjiya aquiana ojaya canecojo ani shojea canaje shanei ai jayojja que, ma ojaya epeeji cuana meshijo ba'e huoojeaji poani que. Jamajjeya quea misi nee nee poanaje. Ojjaña quea nee nee poanaje. Quea nee nee jja'ana ijjaajjeaqui canaje. ¹¹ Quea nee poanijo, chiji poanijo pea'ai ojjaña cuaa Eyacuiñajji eyajo ba'e niñeba canaje. Jamatii ma shanei ai ejja, ojaya epeeji cuana pea aiya mimishi cuana pajea'yo ajja poanaje.

Beca esohuidojojjiya aquiana ojaya caneco cuanajo ani shojea jjima so'o. ¹² Jamajjeya majoya pea esohuidojojjiya aquiana ojaya canecojo ani shojea canaje cuei ai yasijje, Eopate cuei yasijje. Esohuidojojjiya ma cuei huosa mee ca'yonaje. Huosa'yajo emeshi mese cuana meshi eshequi poeji mijijje ba'eca poeje sohuinano quea huiso nee nee cuana nijje jjaquecuquiya.

¹³ Majoya eyaya banaje pea beca peejjima eshahua cuana, shona hui jayojja. Oya cuana cuayanaje ma sa'o aija enabajje, shanei ai ejjaa enabajje, esohui huohuiji nisho esiajje pojjiya enabajje pea'ai cuayanaje. ¹⁴ Jiquio eshahua cuaa ma dejjaa ajujma acani quea huiso acanaje. Oya cuana poquije ojjaña meshi yasijje ojjaña emeshi mese chichaa Eyacuiñajji nijje ejjaquecuquijji. Majoya Jesosa poeje'yo sa'o ai jayojja jeabichajee.

¹⁵ Majoya eyaya shajja'ajjanaje Jesosa mimiani jama ba'a: —¡Shajja'ajjacue mo! Beca cuana ejo ishoa ajja. Jamatii eya poecujaje siipojji poecujacuajiani jayojja. Joya ejo ishoa'ishoa'ajja ani tii tii quea bihui nee nee poaje. E'e, eyaya oya cuana quea boejea po meeje'yo. Oya cuana daquijji jayojja jama poaje e poe o'oyajo. Jamajjeya oya cuana bicho'ama poaje e poe o'oyajo.

¹⁶ Majoya ma eshahua cuaa ojjaña emeshi mese cuana jjachichacui mee canaje oe meshi yasijje eyiyo Majeno bajjani yasijje, ma Jodioja esohuijo Amayeno meshi bajjani yasijje.

¹⁷ Oe esohuidojojjiya aquiana ojaya canecojo ani shojea jjima so'o. Majoya ohuaya ma aquiana ojaya canecojo ani shojea canaje beni yasijje. Shojea cajo eyaya shajja'ajjanaje pea eyajo Eyacuiñajjiya equijo nequi janobajjima nei taananaje jama ba'a: —Apoa. Eyacuiñajjiya dejja quea mimishi cuana quea nee nee po mee ca'yonaje.

¹⁸ Majoya pojeje baa siyoo po majamajanaje, taananaje, cueji po majamajanaje pea'ai. Meshi huehuahuehuanaje janobajjima nei nei pea'ai; yahuajo nei meshi huehuahuehuanaje oe pojji. ¹⁹ Jamajjeya Babinonia cuiñajji quea quemojo meshi jjamijisisi jeaquinaje, pea beca peejjima jjamijisisi jeaquime poanaje. Ojjaña pea cuiñajji cuana ojjaña meshijo jaabichajjeaquinaje pea'ai. Eyacuiñajjiya Babinonia cuiñajji quea quemojo jjashahuabaqui majje ojjaña dejja jomajo ba'e quea nee nee po mee ca'yonaje. Ojjaña mimishijo quea quene nee nee poanaje Eyacuiñajji. ²⁰ Huehuahuehua majje ojjaña nasi ai cuana chama'yo tii poanaje. Ojjaña eyiyo cuana chama'yo tii poanaje pea'ai. Jamajjeya dejja cuaa eyiyo ba'yo jjima acaje. ²¹ Meja na ejajjacajjaquí cuana quea quemo nee nee, 50 quinome

biquieme oquenaje deja cuana biajje. Jamajjeya deja mimishi cuaa quea nee nee po majje Eyacuiñajji niñeba neinei canaje.

17

Epona quea mimishi

¹ Majoya oe esohuidojojji e que poeyanaje, ma aquiana canecojo ani shojea canaje. Oya enijje miminaje jama ba'a: —¡Cua'a! Eyaya miya ba meeye ache nee nee poaje ba'a ojjaña ma cuiñajji quea mimishijo ba'e. Ojjaña cuana epona pea cojjojji jayojja nei nei poani. Oya quea huiso bae biajje anioqueani jayojja jama quea huiso nee nee quea mimishi po mee cani. ² Ohuaya quea huiso emeshi mese cuana quea mimishi po mee cani onijje, bejjo sosejje. Ojjaña meshijo ba'e cuana quea mimishi jjashahuabaqui mee cani, ojjaña cuana onijje quea mimishi po tiitii mee cani. E'e, oya cuana ehoo nei jayojja jama poani. Jiquio ecua deja huoo majje quea cachasa sei nee jayojja jama oya cuana quea mimishi tii tii po sa poani.

³ Majoya ma esohuidojojjiya eya dojo canaje meshi quima huasijje. Edojjoshahua Pameya eya jjashahuabaqui mee canaje. Jamajjeya eyaya jomajo pea epona banaje. Oya shadaa ai huo'o jayojjaja edaasa biajje aninaje. Ma shadaa ai jayojjaja edaasajo yani bajjani cuana etehue'yo, Eyacuiñajji bajjani cuana jayojja. Jamaya Eyacuiñajji boti'ama, de. Ma shadaa ai jayojja, shadaa ai ejja pojja'a quea sapa huiso, me oeje beca sapame, 7 sapame. Oya she'anajji pea'ai, quea huiso she'aname ome miji pea'ai, 10 she'aname. ⁴ Ma eponaja daqui quea huo'o nee nee. Ojaya eyiijji quea huiso nee nee, mei huo'o cuana, mei oshe quea nahue cuana, ojjaña mei nahue cuana pea'ai. Oja me cuanajo yani oe caneco quea nahue, mei huo'o caneco. Ma mei huo'o canecojo ani aquiana quea tai. Maya ojjaña ojaya ejjashahuabaquijji quea mimishi cuana jayojja, quea huiso deja cuana nijje quea tai poanaje pea'ai jayojja. ⁵ Ebaahuaje oyaya bajjani etehue'yo poanaje ma ojjaña deja cuanaja quea quehua. Ese ejjaja esohuijo jama bajjani ba'a: “Babinonia cuiñajji quea quemo ojjaña mimishi cuana ba'eiji” bajjani. Jama tehueme'yaya ojaya ebaahuajo jaa. ⁶ Majoya eyaya oya banaje quea mimishi nee nee. Ohuaya quea huiso Jesosaja epeeji cuana quecua ca'yonaje Jesosaja esohui huohuijijjojo. Jamajjeya ma epona ehoo jayojja quea bihui nee poani Jesosaja epeeji quecua ca'yajo. Ma epona quea mimishi ba majje eya quea ajjaja nei poanaje. ⁷ Majoya ma esohuidojojjiya eya huohui canaje jama ba'a: —Huani, ¿apiojji acuae miya quea ajjaja nee epona quea mimishijo? ¿Ae jayojja jama ma epona quea mimishi nee, ma shadaa ai jayojja pea'ai? Eyaya miya huohuije: Jjeya miquea eba pojjeama ma shadaa ai quea sapa huiso, me oeje beca sapame, quea she'ana huiso pea'ai, ome miji pea'ai, 10 she'aname. ⁸ ¡Bacue! Oya shadaa ai jayojja yahuajo nei nei nequia poa meshijo. Jamatii jjeya oya chama' meshijo. Quijje oya quea huesha nee jaa poeje o'oya, jjani aijo ma mimishi cuana man'o'yo majje poqui'yanijje jaa poeje o'oya. Majoya Eyacuiñajjiya oya quea nee nee po mee caje'yo. Jamajjeya Jesosaja epeeji pojjeama quea huiso meshijo ba'e, ma Eyacuiñajjiya yahuajo nei nei meshi pana coo jeahuajo onajaya bajjani cuana tehue jjima ojaya etehue'yo eba'e tiitii'yojjiyo, maya cuana ma shadaa ai jayojja ba majje quea ajjaja nee nee poaje. E'e, ma shadaa ai jayojja yahuajo nei nei nequia poa; jjeya ca chama' meshijo; jamatii quijje quea huesha nee jaa poeje o'oya Jesosa jeabichajee nisho —esohuidojojji poanaje.

⁹ Majoya esohuidojojjiya eya huohui canaje jama ba'a: —¡Quea ja'a nee jjashahuabaquicue shadaa aija sapa quea huiso, epona quea mimishi pea'ai ebajji! ¡Bacue! Shadaa aija me oeje beca sapa eyiyo cuana jayojja poani. Jiquio eyiyo cuana biajje anioqueani epona quea mimishi. Jiquio eyiyo cuana jayojjaya me oeje beca emeshi mese cuana poani. ¹⁰ Me oeje emeshi mese cuana chama'yo tii poanaje. Oe emeshi mese jjeya nei neequi. Pea emeshi mese quijje pishana poeje. Poe majje oya nequije oe pojji cahuime. ¹¹ Ma shadaa ai jayojja, shadaa ai ejja yahuajo nei nequia poa meshijo. Jjeya oya chama'. Quijje oya poeje o'oya; emeshi mese quijjeeyeje nei nequi poaje me oeje beca emeshi mese cuana apoa poajo. Oya poe jjimahuajo me oeje beca emeshi mese cuana eyiyo cuana jayojja nequinaje. Ona nijje shadaa ai ejja jayojjaya emeshi mese nequinaje pea'ai. Majoya Eyacuiñajjiya oya chama'yo tii po mee caje'yo. ¹² Huani —Esohuidojojjiya eya acanaje—, miyaya banaje ome miji pea'ai huiso eshe'ana, shadaa ai ejjaja eshe'ana. Ma eshe'ana cuana ome miji pea'ai emeshi mese cuana jayojja. Oya cuana quijje emeshi mese cuana poaje. Shadaa ai ejja nijjeya ojjaña cuana huoojea caje'yo oe pojji cahuime cuana. ¹³ Ojjaña emeshi mese pea emeshi mese cuana jayojjaya jama jjashahuabaquije Jesosa jeabichajee. E'e, ojjaña emeshi mese quea mimishi cuaa shadaa ai ejja shajja'ajja caje'yo. Deja mase cuana huoojea caje shadaa ai ejja nijjeya Jesosa nijje jjaquecuaquiya. ¹⁴ E'e, ojjaña quea mimishi cuana oje poquiye Jesosa quecua nisho. E'e, Jesosa quecua sa

acaje cuaa. Jamatii Jesosa quea ca'a nee nee. Ojjaña huoojea caje'yo. Ojjaña emeshi mese cuana huoojeaji oe nei Emeshi Mese nei poaje'yo Jesosa. Jamajjeya Jesosaa ojaya epeeji cuana nijjeya ojjaña quea mimishi poani quecuadehuejea caje'yo. E'e, Jesosa nijje ani ojjaña ojaya epeeji cuana. Jesosaa oya cuana babaca'yo majje iyaa canaje ojaya epeeji epojji —esohuidojojjiya eya acanaje.

¹⁵ Majoya ma esohuidojojjiya eya huohui canaje jama ba'a: —Huani, miyaya banaje bae jayojja quea huiso, quea quemu cuana. Ma bae cuana biajje anioquenaje epona pea cojjojji nei nei. Ma bae jayojja cuana dejja quea huiso nee nee jayojja, ojjaña meshijo ba'eca cuana, ojjaña pea esohuio mimiani cuana pea'ai. Quea huiso nee nee, de —esohuidojojji poanaje —. ¹⁶ Huani, miyaya banaje shadaa ai ejja quea she'ana huiso, ome miji pea'ai she'aname, 10 she'aname. Maya ome miji pea'ai, 10 emeshi mese jayojja, de. Maya onajaya ma epona pea cojjojji jayojja boti'ama nei nei poaje. Jamajjeya ma epona jeabichajea caje'yo. Jeabichajea majje jeajea caje'yo epona quea mimishi daquima' jayojja; dahuajea caje'yo. Jiquio ecua ijjiacajjiya aquiana iña majje ijjiya can jayojja jama epona mimishi chama'yo tii acaje'yo ma emeshi mese cuaa. ¹⁷ E'e, Eyacuiñajjiya ma emeshi mese cuana ojaya esohui jayojja jama amee caje'yo. Jjashahuabaqui mee caje'yo jama ba'a: “Ecuaaya ma shadaa ai ejja huasijje huoojeaje'yo ecuanaja dejja mase cuana quea huiso nee nee oya quea ca'a nee epo meejji”. Jamajjeya ojjaña dejja mase cuana huoojea caje'yo cuaa shadaa ai ejja quea ca'a nee nee epojji. Jamaya Eyacuiñajjiya huohui canaje ma ohua quijje nei acaje —esohuidojojjiya eya jamaya acanaje—. ¹⁸ Huani, miyaya banaje ma epona pea cojjojji jayojja. Ma epona cuiñaji quea quemu nee ojjaña quea mimishi ba'eji jayojja. Maaya ojjaña pea emeshi mese cuana huoojea can —jamaya esohuidojojjiya eya acanaje.

18

Eyacuiñajjiya ojjaña Babinonia cuiñajji ba'e quea nee nee po mee caje'yo

¹ Majoya eyaya, Huaniya banaje pea esohuidojojji. Oya eyajo nequi nequioquenaje dejja cuana huasijje. Eyacuiñajjiya oya quea ca'a po mee canaje. Jamajjeya esohuidojojjiya ojjaña huoojea canaje. Quea jeajahua nee nee poaniya jjejojo meshi cuana jeaja'ajea canaje. ² Jama taame poanaje ba'a: —Ojjaña quea mimishi Babinonia ba'e Eyacuiñajjiya quea nee nee po mee caje'yo, chama'yo tii po mee caje'yo. Jamajjeya ma cuiñajji ba'equije'yo edosiquiana cuana, esahua cuana pea'ai, ojjaña cuichoiji quea tai ijjiya ca ajja pea'ai jomajo ba'equije'yo. ³ Ojjaña cuana quea mimishi nee nee ma cuiñajji ba'e. Jamajjeya ojjaña dejja cuana pea cuiñaji cuanajo ba'e quea mimishi po mee ca'yonaje. E'e, dejja cuana quea mimishi ba'e ehoo nei jayojja quea jjashahuabaqui tai poani. Jamaya dejja cuana ma cuiñaji quea quemajo ba'eya pea cuana ehoo nei jayojja jama po mee can. Ojjaña pea emeshi mese cuana quea mimishi poani dejja cuana ma cuiñaji quea quemajo ba'e jayojjaya. Ma cuiñaji quea mimishi, quea quemajo yani quea huiso aquiana. Jamajjeya dejja quea aquiana huiso cuana peapea aquiana quea huiso nee jjeshe can jomajo —jamaya ohuaya eya acanaje.

⁴ Majoya eyaya, Huaniya shajja'ajjanaje pea eyajo aniya Jesosaja epeeji cuana iyaa can jama ba'a: —Ecua epeeji cuana, ja'a anijji ma cuiñaji quea mimishijo! Ona jayojja quea mimishi mi po chana'. ja'a jomajo ba'e majajji; miquianaya quea nee nee po chana', onaya jayojjaya! E'e, Eyacuiñajjiya ojjaña cuana jomajo ba'e quea nee nee po mee caje'yo quea mimishi poanijo. ⁵ Eyacuiñajjiya ba canaje onajaya mimishi cuana quea huiso nee nee. Jamajjeya oya jjashahuabaqui onajaya napa'ajji quea mimishi nee nee poanijo. ⁶ Ojjaña jomajo ba'eya miquianaya napa canaje ecua epeeji poanijo. Jama napa'yomeya Eyacuiñajjiya oya cuana acaje'yo. Onaaya miquianaya quea nee nee po mee canaje enijje jjaepequianijo. Jamajjeya Eyacuiñajjiya oya cuana quea nee nee po titii mee caje'yo. Oya cuana miquianaya quea yeno po mee canaje. Jamajjeya Eyacuiñajjiya oya cuana quea yeno po titii mee caje'yo. ⁷ Ojjaña ma cuiñaji quea mimishijo ba'eya jjeshe canaje aquiana cuana quea huiso nee nee. E'e, onajaya aquiana quea huiso nee nee. Ma aquiana oja jjeshe huisoajjaya Eyacuiñajjiya oya cuana quea nee nee po mee caje'yo, quea yeno po mee caje'yo pea'ai. E'e, ojjaña jomajo ba'eya huohui canaje jama ba'a: “Ecuanajaya cuiñaji quea pame emeshi meseja epona jayojja jama poani, quea huiso aquiana quea nahue yani. E'ahuemano jayojja jama pojjeama. Quea jaji nee nee. Ojjaña jiquiojo ba'eca quea yeno po ajja tii tii” poanaje cuiñaji quea mimishijo ba'eca cuana —jamaya poanaje pea eyajo ani enijje. ⁸ —Jamatii quijje Eyacuiñajjiya ojjaña ma cuiñajji ba'eca quea nee nee po mee caje'yo. Quea yeno po mee caje'yo. Quea shoe po mee caje'yo pea'ai. Ojjaña quiyoyoyoy mee caje'yo pea'ai. E'e, Eyacuiñaji quea ca'a nee nee ma dejja quea mimishi cuanajo jjashahuabaqui quea nee nee epo meejji —poanaje pea eyajo ani.

⁹ Emeshi mese cuana dejja mimishi cuana ma cuiñajjijo ba'e nijje quea mimishi nee nee poanaje. Jamajjeya ma cuiñajji jijianijo huichacha ba majje emeshi mese cuana paje'yo jama ba'a: —Ecuanaja epeeji cuana ma cuiñajjijo ba'e quiyo'yoqui. Onajaya aquiana quea huiso ecuanajaya quea boti nee nee. Quiyo'yo majje aquiana quea nahue, quea pame chama'yo tii poaje, de —jamaya emeshi mese quea mimishi paje quea yeno jjejojo.

¹⁰ Cuiñajji quea quemo quiyo'yanijo emeshi mese cuana quea huesha nee nequije'yo quea mete jjejojo. Quea yeno poaje pea'ai. Quea yeno po majje janobajjima nei paje jama ba'a: —¡Bacue oe! Babinonia cuiñajji etii quea quemo nee nee quiyo'yoqui. Ecuanaja epeeji cuana jomajo ba'e quea nee nee po'yoqui. Jjeya nei ojjaña jomajo ba'e mano cuajji'yonaje. Chama'yo tii poaje'yo —emeshi mese mimishi paje'yo.

¹¹ Ojjaña dejja quea aquiana huiso ojjaña meshijo ba'e quea yeno poaje Babinonia quiyo'yajo. Oya cuana paje jama ba'a: —Ojjaña Babinoniajo ba'e chama'yo poanaje. Yahuajo ecuanajaya ohuaya aquiana quea huiso nee jjeshe canaje. Jjeya ejjeshe maja'yojji pojjeama. ¹² E'e, yahuajo aquiana jjeshe canaje jama ba'a: Mei huo'o quea nahue, mei oshe quea nahue, mei sisi quea nahue cuana, mei oshe sisi quea copo pena bajjani cuana jjeshe canaje, daqui quea huiso quea nahue, daqui huo'o quea bame, daqui beje nei quea nahue, daqui huo'ohuo'o quea nahue cuana jjeshe canaje; ojjaña acui equecuashiyoy quea shiye cuana quea nahue, ojjaña aquiana bame pea'ai jjeshe canaje yahuajo; acui ejehui quea nahue cuana, ijjiacajji cuanaja ese' ai'ai, mei jahua edahua, baa edahua cuana, mei ejaja bame cuana pea'ai yahuajo jjeshe canaje ma cuiñajji etiiyo ba'eca cuaa. ¹³ Bobi quea shiye, quea johua po meeji cuana jjeshe canaje pea'ai ma bajjani ba'a: canela, eña quea shiye cuana, madeja jayoja pohui quea shiye cuana, pea shiyeshiye pohui, jjonojajja na sese, acuijajja sei, anoso pohui jayoja, bobi anoso jayoja pea'ai jjeshe canaje. Ana'ai quea huiso cuana, ñajajja quea huiso cuana, mapichi quea huiso cuana, mapichija aquiana edojjiji quea huiso cuana, echacoji sosema' cuana, ojjaña chaco tiiti mee cani pea'ai jjeshe canaje cuaa ma cuiñajji etiiyo ba'eya —jama pa animeya ojjaña dejja cuana poaje Babinonia quiyo'yoqui ba majje.

¹⁴ Majoya esohuidojojji eyajo nequi ojjaña Babinoniajo ba'e nijje miminaje jama ba'a: —Yahuajo miqianaya ojjaña aquiana cuana jomajo ani jjeshe sa poanaje. Jjeya chama'. Ojjaña miqianajaya aquiana chama'yo tii tii poanaje. Eba'eji quea pame chaco jjima chama' poanaje. Miqianajaya aquiana quea huiso nee nee ejjeshe o'oyajji pojjeama — esohuidojojji poanaje.

¹⁵ Majoya eya ohuaya huohui canaje jama ba'a: —Huani, Babinonia dejja cuaa aquiana quea huiso nee nee yahuajo jjeshe canaje. Jamajjeya dejja aquiana quiajji cuaa quea huiso nee nee aquiana Babinonia dejja huasijje quia huicha'a huicha'a canaje quea huiso nee nee bejjo sosejje. Jjeya Babinonia dejja cuana quiyo'yonaje, quea nee nee po'yonaje. Jamajjeya aquiana quiajji cuana quea huesha nee nequije quea mete jjejojo. Quea yeno poaje pea'ai. ¹⁶ Pa neineije jama ba'a: “¡Oya bacue oe! ¡Babinonia cuiñajji etii quiyo'yonaje! Ecuanaja epeeji cuana jomajo ba'e quiyo jeyo'yonaje. Ojjaña jomajo ba'e daqui quea nahue, daqui huo'o quea nahue, emeshi meseja daqui huo'ohuo'o jayoja quea nahue pea'ai huosho canaje. Eyijji mei huo'o quea nahue, mei sisi quea siyo, quea nahue, mei oshe sisi quea copo pena bajjani pea'ai daquijo ba'ehuana canaje. ¹⁷ Jjeya nei ojjaña jomajo ba'e manocuajji'yonaje. Chama'yo tii po'yonaje” dejja quea aquiana huiso pa ani, achacua ojaya aquiana equia'yojji pojjeamajjo. Cuanaya ojjaña bishe ai mese cuana, ojjaña bishe aijo poquiani pea'ai, ojjaña echacoji bishe aijo chaco cani, ojjaña jai jjequicuayajji poani cuana pea'ai quea huesha nee nequije. ¹⁸ Onaaya huichacha quea quemo ba caje ma cuiñajji etii quiyo'yanijo. Huichacha ba majje huohui caje jama ba'a: “Babinonia quea pame nee, de. Pea cuiñajji quea pame pishana. ¡Chama' pea cuiñajji Babinonia jayoja!” pa neineije.

¹⁹ Babinonia quiyo'yanii ba majje dejja cuana quea yeno nee poaje. Jamajjeya oya cuana quea yeno jjejojo meshi pohuiya jjasapa natajaequije. Janobajjima nei pa neineije'yo pea'ai jama ba'a: —¡Oya bacue oe! ¡Babinonia cuiñajji etii quiyo'yo! Ojjaña dejja cuana bishe ai cuanajo chacoachacoani quea bejjo huiso poanaje; quea huiso nee nee aquiana cuana jjeshe canaje Babinonia dejja cuaa bejjo sosejje —jamaya ojjaña bishe ai cuanajo nequi paje.

²⁰ Majoya esohuidojojji miminaje jama ba'a: —Ojjaña eyajo ani, ¡quea bihui nee nee pocue! E'e, Babinonia cuiñajji quea mimishi nee nee quiyo'yonaje. ¡Ojjaña Jesosaja epeeji cuana, o shajja'ajajji cuana pea'ai, ojjaña Eyacuiñajjija esohui huohuijji cuana, Jesosaja huosaja'yo esohui huohuiya pea'ai quea bihui nee pocue! Eyacuiñajjija Babinonia quiyojea mee ca'ya, ojjaña jomajo ba'e pea'ai quiyojea mee ca'yonaje, miqianaya ohua napa canaje sosejje.

²¹ Majoya esohuidojojjiya quea ca'a nee neeya mei quea quemo nee nee, shijje cuiapo-jomeeji mei quea quemo jayoija jeaoqueajea canaje bae ai yasiije. Mei chama'yo tii poanaje. Mei jeaoqueajea majje huohui canaje jama ba'a: —Eyaya mei janobajjima nei jeaoqueajea'yonaje. Jamaya eyaya Babinonia chama'yo tii po meeje'yo; janobajjima nei napaje'yo. E'ia o'oyajji pojjeama tii tii poaje'yo. ²² Yahuaajo quea huiso jomajo ba'eya e'inaqueyaji cuana inaqueya canaje esohui cuayajji, dehue mia canaje, emiajji eshe'ana jayoija mia canaje pea'ai. Jamaya oya cuana yahuaajo poanaje. Quijje ca chojja, jamaya epo o'oyajji pojjeama. Chama'yo tii poaje'yo. Quea huiso jomajo ba'e yahuaajo chacoconaje. Jjeya chama'yo tii echacojji cuana poaje'yo. Quea huiso anoso ai cuana cuiapasha canaje cuaa yahuaajo, meiya. Jjeya anoso ai cuiapashajji chama'yo tii poaje'yo quiyoy'yo majje. ²³ Jomajo cuaquijji ejji o'oyajji pojjeama tii tii, quea misi po tiitiije'yo. Jomajo jjahueaqui aja tiiti poaje'yo. Chama' poaje'yo yahue esho'i oja huanase esho'i nijje emimijji quea bihui nee. Chama'yo tii tii. Yahuaajo ojjaña jomajo ba'e quea aquiana huiso nee nee poanaje; pea cuiñajji cuanajo quea aquiana huiso pishana poanaje. Yahuaajo Babinonia deja cuaa quea huiso pea cuana dasia ca'yonaje. ²⁴ Quea huiso Jesosaja esohui huohuijji cuana quecua ca'yonaje cuaa pea'ai esohui huohuijji jioyaya. Quea huiso pea cuana jomajo ba'e quecua ca'yonaje pea'ai, Babinonia deja cuaa quea maseya jjejojo, de —ma esohuidojojji quea ca'a nee jamaya poanaje.

19

Eyajo ojjaña Eyacuiñajji bihuia canaje

¹ Majoya eyaya shajja'ajjanaje quea huiso nee nee eyajo ba'e. Oya cuana janobajjima nei sohucuyani jama ba'a:

“Eyacuiñajji quea pame nee nee poani. Ohuaya ojaya epeeji cuana ba'e tiiti mee cani eyajo. Oya oe nei ba'e tiitiiani. Oya oe nei quea ca'a nee nee nequi tiitiiani. ² E'e, ojaya ejjashahuabaquijji deja mimishi cuanajo e'e nei poani. Ma epona pea cojojji nei nei quea nee nee po mee ca'yonaje. Maaya quea huiso meshi cuanajo ba'e cuana quea mimishi nee po mee canaje. Jamajjeya Eyacuiñajjiya oya quea nee nee po mee ca'yonaje. Cuanaya ma epona taiya Jesosaja epeeji cuana quea huiso quecua ca'yonaje Eyacuiñajjiya oya quea nee nee po mee ca'yonaje”.

³ Majoya ojjaña eyajo ba'e janobajjima nei taa o'oyanaje jama ba'a: —Eyacuiñajji quea pame nee nee poani. Ohuaya ojjaña quea mimishi ma cuiñajji aijo ba'eca quiyoy'yo tiiti mee ca'yo.

⁴ Majoya eyajo Jesosaja epeeji etiiya quea huiso cuaa, ma ²⁴ huisomeya, aquiana eshe cuaa ma ebeca pee pea'ai huisomeya ecui'oshajjajo nequiya Eyacuiñajji bihuia ca'yonaje. Jama taaame poanaje ba'a: —Eyacuiñajji, miya quea pame nee nee. ¡Ojjaña miya cabihuia cahua! ¡Jamaya capo'yahua! —Jamaya onaaya Eyacuiñajji e'anioque ani bihuia canaje.

⁵ Majoya pea eyajo Eyacuiñajji pejeje nequi taaanaje jama ba'a:

“Ojjaña Eyacuiñajjiya epeeji cuanaa, ojjaña Eyacuiñajjiya esohui shajja'ajjajji poaniya, ojjaña etiiya, ojjaña esho'i cuaa pea'ai, ¡Eyacuiñajji bihuiaque!”

Jamaya pea eyajo nequi taaanaje.

⁶ Majoya eyaya shajja'ajjanaje pea cuana quea shajjaquijjo. Quea huiso cueji taaani jayoija, cuei quea quemo, quea cuejipashi nee mei pasaca biajje oqueani jayoija. E'e, ojjaña Eyacuiñajji janobajjima nei bihuia canaje jama ba'a:

“Eyacuiñajji quea pame nee nee. Eyacuiñajji quea ca'a nee nee ani tiitiije'yo. Ohuaya ojjaña huoojjea tiiti cani. ⁷ ¡Eseyo ojo quea bihui nee capo'yahua! ¡Eseyo ojo quea bihui nee camimi'yahua pea'ai! Jama ba'a: Eyacuiñajjiyo ecuaa quea bihui nee nee. Oya oe nei quea ca'a nee po tiitiiani. Oya oe nei yani tii tii. Jesosa, ma ñajajja quecua'yo jayoija quea pame nee. Jjeya oya quea pame nee nequi yahue ejjahuaquijji jioyaya. Ojjaña ojaya epeeji cuana epona ejjahueaquijji apoa jayoija jama quea boejea nee. E'e, Jesosa poeje o'oya ojaya epeeji cuana jaahuaana. ⁸ Ojjaña ojaya epeeji cuana daqui oshe quea pame, quea boejea, quea jeajahua huosho majje enequi. Jiquio ecua eponaja daqui oshe quea boejea ejjahueaquijji jayoija jama Jesosaja epeeji cuana quea pame quea boejea'yo pea'ai ba'e”.

Jamaya pea cuaa eyajo nequiya Eyacuiñajji bihuia canaje.

⁹ Majoya esohuidojojji eyajo nequiya eya huohui canaje jama ba'a: —Huani, esohui tehucue jama ba'a: “¡Jesosa ejjahuaquijji jioyaya ojjaña ojaya epeeji cuana ojee ca'ijjia'ijjia mee cahua onijje! ¡Ojjaña onijje ojee ijjia'ijjia ani quea bihui nee capo'yahua!” E'e, jiquio ecua esohui e'e nei nei poani. Jamaya Eyacuiñajji poani —eya jamaya acanaje esohuidojojjiya.

¹⁰ Majoya ojaya esohui shajja'ajja majje eya esohuidojojji pejejo ecui'oshajjajo nequinate o bihuijaji. Jamatii oya eniije miminaje jama ba'a: —Chojja, Huani. ¡A'a eya bihuijaji! Eya Jesosaja echacojji poani mi jayojjaya, miqnea epeeji cuana jayojjaya pea'ai. E'e, miqianaaya Jesosaja esohui jayojja jama aña pea'ai. Edojoshahua Pameya ojjaña Jesosaja epeeji cuana Jesosaja esohui ba mee cani quea ja'a nee, Huani. Jamajjeya ¡Eyacuiñajji oe nei bihuiacue! —ohuaya eya acanaje.

Huaniya Jesosa ba canaje mapichi osheja edaasa biajje ani

¹¹ Majoya eyaya, Huaniya ojjaña eyajo ba neinei'yonaje. E cojja neijo mapichi oshe nequi. Oya mapichija edaasa biajje ani quea pame nee nee. Ojaya esohui e'e nei. Ojaya esohui pea cuanaja eba'ejjijo e'e nei pea'ai. Ohuaya ojjaña quea mimishi poani quecua cani, oya cuana quea nee nee po mee cani quea mimishi poanijo. ¹² E'e, oya mapichija edaasa biajje ani quea cojja jiji nee, cuaquijiji jayojja cojjame; ojaya ejaahuojja yani pea'ai. Ohuaya quea huiso emeshi mese cuana huoojja cani. Quea huiso cuaa oya shajja'ajja cani. Ojaya bajjani etehue'yo yani. Jamatii pea cuanaja maya ebajjani quea quehua. Ojaya eba ojaye nei ojaya bajjani. ¹³ Ojaya daqui ao quea huo'o nee nee, ena' jayojja jama enajo iyanobiajea jayojjaya. Oya ca ca oe Eyacuiñajji esohui bameejji. ¹⁴ Quea huiso eyajo ba'e o quishishijji poquije jjaquecuaquiya. Ojjaña quea huiso nee nee cuana mapichi osheja edaasa biajje poquije. Ojjaña daqui oshe quea pame nee, quea nahue, quea boejea nee, de. ¹⁵ Ojaya enabajje yani esohui quea ja'a nee baa quea ca'a, quea shejji nee jayojjaya. Ma esohui huohui majje ojjaña dejja cuana ojjaña meshi cuanajo jeabichajea caje'yo. Quea ca'a nee nee poanijo ohuaya ojjaña dejja ojaya esohui jayojja jama amee caje'yo. Ojjaña shajja'ajja mee caje'yo pea'ai. E'e, Eyacuiñajji ojjaña dejja mimishi ojjaña meshijo ba'e nijje quea quene nee nee poanijo ohuaya, ma mapichi osheja edaasa biajje aniya quea tecue ojjaña huoojja caje'yo. ¡Iquio ecua acuijajja quecuapasha cani cuaa jayojja jama Jesosa Quitohua ojjaña dejja cuana acaje'yo; mete mee majje shajja'ajja mee caje'yo. ¹⁶ Ojaya daqui aojo, ojaya huachinequi quea quemajo pea'ai yani ebajjani tehue'yo jama ba'a: “Ojjaña emeshi mese cuana huoojajji; ojjaña cuana huoojja'yojji poani”.

¹⁷ Majoya eyaya, Huaniya pea esohuidojojji banaje eshequijo nequi. Ohuaya janobajjima nei iyaa canaje ojjaña be'o cuabesa ba'e; jama acanaje ba'a: —¡Be'o cuana! ¡Miquianaya poecue! ¡Ojee ijia'ijjiahuacue! Eyacuiñajjiya dejja mimishi quea huiso quecua mee caje'yo. ¹⁸ E'e, ¡jeyahua nei emeshi mese cuana ijjiahuacue, dejja mase cuanaja mese cuana, dejja ca'a cuana, mapichi cuana, mapichija edaasa biajje ani cuana, dejja mimishi quea huiso, echacojji sosema' cuana, echacojji bejjo soseje chaco cani cuana, esho'i cuana, etii cuana pea'ai ojjaña ijjiahuacue! —ohuaya acanaje be'o cuana.

¹⁹ Majoya eyaya banaje ma shanei ai ejja quea huiso emeshi mese nijje, quea huiso dejja mase nijje pea'ai ojee poquiani Jesosa quecuua nisho, ma mapichi osheja edaasa biajje ani quecuua nisho, quea huiso cuana Jesosa nijje nequi quecuua nisho pea'ai. Ojjaña poquinaje Jamayeno meshi yasijje jjaquecuaquiya. ²⁰ Majoya Jesosaa shanei ejja, esohui huohuijji nisho pea'ai iña canaje. E'e, ohuaya iña canaje esohui huohuijji nisho, ma shanei ejja nijje tuiya quea huiso ma dejjaa ajjima acanaje ojjaña cuana dasia'yojji, shanei ejja bihuia mee'yojji, ma shanei ejja nisho oja a'yo bihuijaji dasia'yojji, ojjaña jaya shanei ejjaja dasia'yo majje oja bahua tehue pea'ai iña canaje. Jamajjeya ma shanei ejja, ma esohui huohuijji nisho pea'ai iña'yo majje Jesosaa oya cuana jeajea ca'yonaje bae ai jijiñi yasijje, bae quea ihui yasijje. Jomajo tii quea nee nee po tiitijje'yo. ²¹ Majoya Jesosaa mapichi oshejo e'anioque aniya ojjaña ejjaquecuaquijji cuana quea mimishi quecua jeyojeyo ca'yonaje baa jayojjaa, oja esohui'ya. E'e, ojaya enabajo baa jayojja yani, ojaya esohui. Majoya ojjaña dejja mimishi cuana manoyajo, be'o cuana poeyanaje quea huiso nee nee. Emanoy'yo cuana ijjia neinei ca'yonaje. Quea jeje nee nee poanaje be'o cuana ojjaña quecuua'yo cuana ijjia'yo majje. Jamaya eya, Huani cahuiba mee canaje.

20

Edosiquiana nei jeyo canaje quea shequiaja huiso nee nee 1.000 shequiajame

¹ Majoya eyaya banaje pea esohuidojojji. Oya eyajo nequi meshi yasijje poeyani. Ohuaya jiani ai ma emano'yo cuana nequi quea doe nee nee nequi cuana cojja yahuejajji ye cani emejo, aquiana quea ca'a cadena quea quemajo jayojja pea'ai ye cani. ² Ohuaya iña cañaquinaje, jeabichajea canaje Edosiquiana nei, sa'o ai quea mase nee Satanasa bajjani, ma yahuajo nei nei pea'ai esejaya ettiquiana pana coo ca jehua dasiajji poa. Iña majje ma esohuidojojjiya Edosiquiana jeyo canaje cadena quea quemohua quea shequiaja huiso nee nee, 1.000 shequiajame ejeanobiajeajji. ³ Jeyo majje oya jeajea canaje jiani ai yasijje, ma emano cuana nequi yasijje quea doe nee nee yasijje. Capa canaje. Capa majje ca'a canaje. Ca'a majje cojjaahuejea canaje. Enaba capajji'yajo tehue canaje jama ba'a: “Edosiquiana

nei ecuayaqui'yojji pojjeama quea shequiaja huiso nee nee, 1.000 shequiajame nequije'yo ojjaña meshijo ba'eca cuana dasia'yo jjima ya'yojji". Jamaya tehue canaje esohuidojojjiya. Jamatii quijje nei ma shequiaja huiso nee nee apoa po majjeya Edosiquiana nei ma emano cuana huasijje, jjani ai quea doe nee nee yasijje ejeyo nequi cacuyaqui'yahua beca ba'i cuanaajo dejja mimishi cuana dasia o'oyajji.

Ebionei eshequi mee o'oyajji

⁴ Majoya quijje pishana eyaya banaje ona huoojeajji cuana e'anioque ani. Eyacuiñajjiya oya cuana huoojea canaje ojaya epeeji cuana huoojeaa Jesosa nijjeya. Eyaya banaje pea'ai quea huiso nee nee Jesosaja esohui huohuijji cuana ma onaa sapa jajasejajea ca poa. Mano mee ca'ya poa dejja mimishi cuaa Jesosaja esohui huohuijji poanijojo, Eyacuiñajjiya esohui cuana huohuijji poanijojo pea'ai. Jesosaja epeeji cuaa yahuajo pishana shanei ejja quea mase pishana bihulia jjima, shanei ejja quea mase pishana nisho, meshi epana'yo pea'ai bihulia jjima. Ojaya ebahuaaje, emejje pea'ai etehue'yo chama' shanei ejjaja eba'yojji, ma 666 jayojja tehueme'ya chama'. Eyaya oya cuana banaje shequije o'oya. Shequi o'oya mee majje Eyacuiñajjiya oya cuana Jesosa Quito nijje ojjaña huoojeajji po mee caje'yo quea huiso nee nee shequiajame. E'e, 1.000 shequiajame Jesosa Quito nijje anije'yo. ⁵ Pea emano'yo cuana ma quea mimishi mano'yo cuana shequi o'oya jjima; 1.000 shequiajame apoa po jjimahuaajo oya cuana shequi o'oya jjima. Joya shequi o'oyani 1.000 shequiajame po jjimahuaajo bajjani ebionei eshequi mee'yojji. ⁶ Joya ebionei shequi mee caje o'oya quea bihui nee nee, quea pame nee nee poani. Oya cuana nee'ama poaje'yo. Epoqui'yojji pojjeama cuaqui yasijje. Joya ecua pea cuana quea mimishi poani jayojja jama epo'yojji pojjeama Jesosaja epeeji cuana. Chojja, oya cuana Eyacuiñajji nijje emimijji poaje'yo. Oya cuana ojjaña huoojeajji poaje'yo Jesosa Quito nijje pea'ai quea shequiaja huiso nee nee, 1.000 shequiajame.

Edosiquiana nei jeajea caje'yo cuaqui yasijje

⁷ Quijje nei ma 1.000 shequiajame po majje Eyacuiñajjiya Edosiquiana nei pichojea mee caje'yo. Jamajjeya oya poquije'yo. ⁸ E'e, Edosiquiana nei poquije'yo ojjaña meshijo ba'eca dasiaa. Ohuaya ojjaña Co meshijo ba'e, Maco meshijo ba'e pea'ai dasiaqui caje'yo. Ohuaya oya cuana ojee epojji iyaa caje Eyacuiñajji quecuajji nisho. Ojjaña oja dasia'yo cuana Edosiquiana nei nijje nequije'yo. Oya cuana quea huiso nee nee poaje ojjaña meshijaji sope huisoajja. ⁹ Jamajjeya oya cuana quea mase nee nee poaje. Poquije'yo ojjaña meshi cuana huasijje ojjaña jeabichajjeaa. Eyacuiñajjiya epeeji queya caje'yo equecuajji. E'e, Jenosanena queya caje'yo Eyacuiñajjiya epeeji cuana jomajo nequi quecuajji nisho. Jamatii Eyacuiñajjiya eyajo aniya dejja mimishi cuana ba majje cuaqui jeaoqueajea caje ona biajje. Oya cuana Jesosaja epeeji queya'yo epo tii nequi manodehuejeaje'yo, ojjaña. Ojjaña quiyo jeyojeyo caje'yo. Chama'yo tii poaje'yo. ¹⁰ Majoya Eyacuiñajjiya Edosiquiana nei jeajea caje'yo bae quea jiji nee jayojja huasijje, bae quea ihui, quea pase yasijje. Ma oja dasia'yo cuana pea'ai jeajea caje'yo bae jijiani yasijje, Eyacuiñajjiya. Pea shanei ejja nijje, pea Eyacuiñajjiya esohui huohuijji nisho quea mimishi pea'ai nijje oya cuana quea nee nee po titiije'yo bae jijiani yasijje.

Ojjaña quea mimishi cuaqui yasijje jea caje'yo ecuayaqui'yojji pojjeama

¹¹ Majoya eyaya banaje jama ba'a: Epojja oe poajo Eyacuiñajjiya ojjaña huoojea caje'yo enapa'yojji. Oya Eyacuiñajji quea jeajahua nee, quea oshe nee nee po oshe quea jeajahua nee jayojja. Ojjaña Emeshi Mese nei oya. Ojjaña meshijo nequi, ojjaña eyajo nequi pea'ai quea ajajja nee poani ojo. Jamatii oya cuana quehuajje poqui meeme'e ajja, achacua epoquijji. ¹² Majoya eyaya banaje ojjaña dejja cuana ma yahuajo mano'yo cuana, jjeya nei mano'yo pea'ai; ojjaña etiiquiana cuana, ojjaña esho'i cuana pea'ai. Ojjaña nequinaje Eyacuiñajji cojja nei. Eyacuiñajjiya esohui etehue'yo cuana she'a canaje. Pea esohui etehue'yo she'a canaje pea'ai. Maya o ba'e titii mee'yojji oja tehue. Ma esohui etehue'yo ba majje Eyacuiñajjiya huohui canaje ojaya ejjashahuabaqui'yojji ojjaña ba'ya poa cuanaajo. E'e, ma esohui etehue'yo ba majje ojjaña huoojea caje'yo. Ojaya epeeji cuana, ojjaña joya quea boejea poani cuana quea bihui nee nee po mee caje'yo. Ojjaña joya quea mimishi po nequia poa cuana ca ca quea nee nee po mee caje'yo. ¹³ Ojjaña ma yahuajo bae ai'ajjo hui'i'yo cuana shequije o'oya. Ojjaña ma yahuajo mojea ca poa cuana, ojjaña emano'yojaa cuana pea'ai shequije o'oya. Ojjaña joya quea boejea poa cuana quea bihui nee po mee caje'yo Eyacuiñajjiya. Ojjaña joya quea mimishi poa cuana ca ca quea nee nee po mee ca'yoquije tii tii. ¹⁴ Majoya apoa. Ojjaña mimishi cuana bae ai jayojja jijiani yasijje jeajea caje'yo ecuayaqui'yojji tii tii pojjeama. Ma bae jijiani bajjani Emano Beca'yojji, quea nee nee nee epo nequi'yojji. ¹⁵ E'e, ojjaña joya ebajjani tehue'yo pojjeama Eyacuiñajjiya

etehue'yojo o ba'e tiitii mee'yojjijo aje oe jeajea caje'yo cuaqui jijiani yasijje, bae ai jayojsa quea jiji nee nee yasijje, de.

21

Eyacuiñajjiya Huani ba mee canaje meshi cuana, eyatahuatahua pea'ai eyacua

¹ Majoya Eyacuiñajjiya eya, Huani ba mee canaje eyatahuatahua, meshi cuana pea'ai eyacua. Eyatahuatahua, meshi cuana pea'ai yahuajo jama pojjeama. Bae ai'ai cuana chama'yo tii poanaje. ² Eyaya Jesosaja epeeji cuana quea quea pame nee nee, quea boejea nee banaje. E'e, Jenosanena cuiñajji eyacua jayojsa poanaje. Oya cuana eyajo Eyacuiñajji nijje nequi ojee nequioquenaje. ¡Oya cuana ache bame nee nee! Epona ejjahueaquijji jayojsa, daqui eyacua quea pame nee huosho cani jayojsa, ojaya ejjahuojsa quecuaca'auijji jayojsa. ¡Jamaya Eyacuiñajjiya cuiñajji eyacua, ache bame nee nee! ³ Eyaya shajja'ajjanaje pea Eyacuiñajji pejeje nequi enijje janobajjima nei mimiani jama ba'a: —Huani, ¡bacue oe! Meshi eyacuajo Eyacuiñajji deja cuana nijje ba'e tiitiani. Oya cuana Eyacuiñajjiya jama acaje ba'a: "¡Jiquio deja cuana ecuea epeeji cuana poani. Eya ona nijje ani tiitii'ye'yo". ⁴ E'e. Jamajjeya Jesosaja epeeji cuana quea yeno po aja tii tii, mano beca'yo aja, pa aja, shoe'ama, nee'ama poaje'yo tii tii. Yahuajo jama pojjeama poaje'yo —poanaje pea eyajo nequi.

⁵ Majoya Eyacuiñajjiya ojjaña huoojeajjiya eya huohui canaje jama ba'a: —Eyaya ojjaña eyacua ameeaña. Ecuea esohui e'e jojo nei. Jamaya eyaya aje, Huani. Jamajjeya ¡ecuea esohui tehucue! —poanaje.

⁶ Majoya Eyacuiñajjiya eya jama acanaje ba'a: —Eya yahuajo nei nei ani tiitii poa. Quijje nei eya ani tiitii'ye'yo pea'ai. ¡Ojjaña joya quea naba taja jayojsa poani poecue e que! Eyaya e'ishijji ishi meeje sosema'. Enijje jjapeequi sa neinei poanijo quea naba taja jayojsa jama poani. Jamajjeya eyaya oya ba'e tiitii meeje'yo. ⁷ Ojjaña joya enijje jjapee tiitiiquiani Edosiquiana nei jeabichajeajji poani. Jamajjeya eyaya oya cuana ecuea ebacua cuana po meeje'yo. E'e eya, Eyacuiñajji ona nijje ani tiitii'ye'yo. ⁸ Pea cuana, chojja. Ojjaña quea mete jjejojo enijje jjapee pajeaqui'vani, eshahuaja epeeji cuana, ojjaña quea mimishi ba'e cuana, pea quecuajji cuana, pea cojjojsi cuana, eyamiquecua cuana, ojjaña quea tai acani, eyacuiñajji nisho bihuajji cuana, ojjaña siajjepojji cuana, edasajji cuana pea'ai poquije'yo cuaqui yasijje, bae ai jayojsa jijiani yasijje poquije'yo. Maya bajjani Emano Beca'yojsi quea nee nee epo nequi'yojsi —Eyacuiñajjiya eya jamaya acanaje.

Huaniya ba canaje Jenosanena cuiñajji eyacua

⁹ Majoya oe esohuidojojji enijje mimiya poeyanaje. Yahuajo pishana oya me oeje me esohuidojojji cuana nijjeya me oeje beca caneco ñajji poanaje. Maaya deja cuana me oeje beca napame acanaje. E que poe majje ma esohuidojojji jama poanaje ba'a: —Huani, ¡poecue enijje! Ojjaña Jesosaja epeeji cuana epona ejjahueaquijji jayojsa eyaya miya ba meeje —ohuaya eya acanaje Jesosajo, ma ñajjajja sho'i equecua'yo jayojsa.

¹⁰ Majoya Edojjoshahua Pameya eya dojo canaje eyiyo ao'ao daasa huasijje. Ohuaya eya ba mee canaje cuiñajji eyacua ojaya quea jea nee Jenosanena eyacua bajjani. Ma cuiñajji eyajo ani Eyacuiñajji anijo anioqueani Jenosanena eyacua. ¹¹ Eyacuiñajji ma cuiñajji nequi quea jeaja'a nee nee poani. Jasipe mei bajjani jayojsa poani quea jeaja'a nee, tahuoo oshe eshequiya jeaja'a cani jayojsa. ¹² Ma cuiñajji peeyi quea ao nee nee, quea quemoo nee nee. Yani quea huiso esecue cuana, oe ejiojsi beca, 12 secueme. Esohuidojojjiya oe ejiojsi beca huisome esecue cuana cuiña cani. Esecue cuanajo Isaenija bacua ejja cuanaja bajjani etehue'yo yani, oe ejiojsi beca, 12 bajjanime. ¹³ Eshequi poeje mijijje pea beca peejjima esecue jaa; eno poeje mijijje pea beca peejjima esecue cuana jaa; ena poeje mijijje pea beca peejjima esecue cuana jaa; eshequi dobiquije mijijje pea'ai pea beca peejjima esecue cuana jaa. ¹⁴ Ma cuiñajji quibo iya 12 meija quibo iya. Ma mei biajje etehue'yo yani, Jesosaja huoojea'yoja, 12 huisome cuanaja bajjani.

Jenosanena eyacua ipia'ajja canaje esohuidojojjiya

¹⁵ Esohuidojojjiya ma enijje miminajeya ma cuiñajji ipia'ajja canaje mei huo'o baacuiya. Esecue cuana ipia'ajja canaje pea'ai. Jiyo ipia'ajja canaje pea'ai. ¹⁶ Jamaya poanaje ba'a: Ojjaña cuiñajjiya ejjapeequijji'ya oya quemajja pea'ai. Ipia'ajja majje ba canaje ache quemoo nee nee poanaje ba'a: Quea quemoo nee nee 2.200 kilometro quemome. Oya ahuajja pea'ai, 2.200 kilometro aome. ¹⁷ Ejjapeequijji'ya quea moo nee nee, 64 metro moome. Ohuaya ipia'ajja canaje esejaya e'ipia'ajjajji jayojsa. ¹⁸ Ejjapeequijji'ya jasipe mei quea ca'a, quea jeaja'a. Cuiñajji mei huo'o oopana quea nahue nee nee, quea ja'a, tahuoo quea ja'a jayojsa. Quea bame nee nee. ¹⁹ Ejjapeequijji'ya quibojo yani quea huiso mei e'iya quea bame nee nee epojji, peapea mei cuana quea nahue nee nee jama ba'a: Jasipe mei cuana, sapino mei quea tahua jiji, asata mei cuana, esemeana mei cuana quea tahua jiji, ²⁰ onise

cuana quea huo'o sii oshe, caneniani cuana quea huo'o jiji, quesonite cuana quea jahua siyo, benio cuana quea jeajahua, topasio cuana jahuahua jijijiji, quisopasa cuana iye tahuatahua. Jasine mei cuana pea'ai, ameta mei cuana iye huo'ohuo'o pea'ai. Mahuiso mei cuana ejjapeeqijiji'ya quibojo e'lya ani. Quea pame nee nee, sho acui iñajo ani eshequiya jeaja'a cajje jahua, huo'o, tahua poani jayojjaya. ²¹ Oe ejiojji beca, 12 esecue jiani cuana ejaa. Ma esecue jiani cuana mei copo oshe pena ai bajjani cuana jayojja, quea nahue nee nee. Ejiojji cuana cuiñajjijo jaa mei huo'o oopana quea nahue, tahuoo oshe quea ja'a jayojjaya.

Huaniya cuiñajji eyacua quea jeajahua nee ba canaje

²² Ma cuiñajjijo ecuea ba jjima equi Eyacuiñajji bihuiajji jayojja. E'e, Eyacuiñajji quea ca'a nee nee ma cuiñajjijo ba'vani, Jesosa ma ñajjajja equecua'yo jayojja jomajo ba'vani pea'ai. Jamajjeya jamatii oya cuana bihuia cani, ojjaña. ²³ Jomajo Eyacuiñajjiya ojjaña jeaja'a cani. Jesosaa ma ñajjajja equecua'yo jayojjaa ejijijijiya jeajiji cani jayojjaya. Jamajjeya quea ja'a nee nee poanijo eshequi, ba'i pea'ai chama' poani. ²⁴ Jesosaa ojaya epeeji cuana quea bame nee nee po mee canajejo oya cuana ba'e mee caje'yo quea ja'a nee. Emeshi mese cuana ojjaña meshijo ba'eca cuaa Eyacuiñajji bihuia caje'yo jama ba'a: —Ojjaña aquiana quea pame miqnea poani.

²⁵ Cuiñajji esecue cuana eca'apejo tii nequije'yo sine'yo ajja jojoya. ²⁶ Ojjaña cuana cuiñajji eyacua huasijje dobiquire Eyacuiñajji bihuiaa jama ba'a: —Eyacuiñajji, miya quea pame nee nee.

²⁷ Jomajo ca ca ojjaña cuana quea mimishi cuana, quea tai cuana pea'ai, jjadasiaquijji cuana pea'ai edobiquijji pojjeama nei nei. Joya ebajjani tehue'yo cuana ca ca oe dobiquire mee caje'yo, Eyacuiñajjiya. Jesosaa, ma ñajjajja equecua'yo jayojjaa tehue canaje ojjaña ojaya epeeji cuanaja bajjani eba'e tiitii'yojji oja tehue.

22

Ena oshe eba'e tiitii mee'yojji

¹ Majoya pea esohuidojojjiya eya cuei quea tahua, quea pame nee eyajo ba mee canaje. Ma cuei Eyacuiñajji e'anioque ani pejejo yobi nequi. Jesosa nequi pejejo cuei shaja cuayaqui pea'ai. Ojjaña joya ma ena ishi cani ba'e tiitii mee cani Jesosaa, Eyacuiñajjiya pea'ai. ² Eyacuiñajjiya cuiñajji eyacuajo ejaa ejiojji quea quemoo. Ma ejiojji tii ma cuei quea pame jaa. Cui sahuajo, beca mijije yani acui bajjani Eba'e tiitii'yojji. Ojjaña ba'ijo jjajja huicha'a huicha'ani. Ma acui iña cuana ijija majje ojjaña jomajo ba'e quea ja'a nee ba'e tiitii'yo. ³ Yahuajo ojjaña quea mimishi poanijo Eyacuiñajjiya quea camaja po mee canaje ojjaña meshi cuanajo ba'eca. Eyajo eba'ejji camaja'ama poaje mimishi cuana chama'yo poanijo. Eyacuiñajji eyajo ma cuiñajji quea pamejo anioqueani. Jesosa, ma ñajjajja equecua'yo jayojja, jomajo yani pea'ai. Jomajo Jesosaja epeeji cuaa oya bihuia tiitii caje'yo. ⁴ Jesosaja epeeji cuaa oya ba caje'yo ecojjaa. Ojaya etehue'yo ebahujje tehue canaje ojjañaja ebajji ojjaña ojaya epeeji cuana. ⁵ Cuanaya Eyacuiñajji quea cojja ja'a nee, quea jeajahua nee poanijo ma cuiñajji quea ja'a nee po tiitii'yo, misi'ama tii tii. Jamajjeya jomajo chama' cuaquijji. Chama' eshequi pea'ai. Ojjaña ojaya epeeji cuana onijje nequi tiitii'yo emeshi mese jayojja quea pame nee, ojjaña huooejajji jayojja.

⁶ Majoya ma esohuidojojji enijje miminaje jama ba'a: —E'e, ecuea esohui e'e jojo nei. Jamajjeya ishajja'ajjacue! Emeshi Mese neiya Eyacuiñajjiya yahuajo Edojjoshahua Pame huoojca canaje ojaya esohui huohujji huohui meesahua. Eyacuiñajjiya eya, ojaya esohuidojojji huoojca canaje mi que, ma ohua quijje pishana acaje'yo ejjanequipana meequi'yojji —jamaya eya acanaje esohuidojojjiya.

⁷ Majoya Jesosa enijje miminaje jama ba'a: —Huani, eya, Jesosa Quito poeje o'oya quijje pishana. Ojjaña jiquio esohui etehue'yo ma eya quijje aje'yo eyaya miya ba meaña e'e nei. Ojjaña joya jiquio esohui e'e jojo nei jama ajji poani quea bihui nee nee capoahua —Jesosa Quitohua eya acanaje.

⁸ E'e, eya, Huani ma esohuidojojji shajja'ajja majje ecuea ebajji ohua jjanequipana meequi cajo pea'ai, eya o pejejo ecul'oshajjajo nequinaje o bihuiajji. ⁹ Jamatii ohuaya eya jama acanaje ba'a: —¡A'a eya bihuiajji! Chojja. Eya Jesosaja echacojji poani mi jayojjaya, miqnea epeeji cuana ma Eyacuiñajjiya esohui huohujji cuana jayojjaya, ojjaña ojaya epeeji cuana jayojjaya jama poani pea'ai, eya. E'e, oya cuana jiquio esohui etehue'yo jayojja jama acani e'e jojo nei. Jamajjeya ¡Eyacuiñajji oe bihuiaque e'e jojo nei! —ohuaya eya acanaje.

¹⁰ Majoya ma esohuidojojji miminaje enijje jama ba'a: —Huani, quijje pishana ojjaña jiquio esohui jayojja jama acaje'yo Eyacuiñajjiya. Jamajjeya tehue majje ejejeo ¡esohui etehue'yo a'a jjajajji! ¡A'a esohui cuiabajji! ¡Ojjaña ba meecue Eyacuiñajjiya ma ohua

quijje pishana acaje'yo! ¹¹ Ojjaña joya quea mimishi poani Eyacuiñajjiya huohui caje jama ba'a: "Ojjaña quea mimishi poani jamatii quea mimishiya capo tiitiquiahua. Ojjaña quea tai jashahuabaquiani jamatii quea taiya cajjashahuabaqui nequiahua tii tii. Jesosaja epeeji cuana ca ca quea ja'a nee canequi tiitii'yahua. Ojjaña Jesosaja epeeji quea pame nee canequi tiitii'yahua quea pame nee" poani Eyacuiñajji —jamaya ma esohuidojojji poanaje.

Jesosaja esohui ecuanajaya eshajja'ajajji

¹² Majoya Jesosa enijje mimi o'oyanaje jama ba'a: —¡Bacue oe! Quijje pishana eya meshi yasijje poeje o'oya. Poe majje eyaya ojjaña sosequiaje'yo, onajaya eba'ejji sosejje. Ojjaña quea mimishi poani aje oe quea nee nee po meeje'yo. Ojjaña quea pame ba'enaje ca ca quea bihui nee nee po meeje'yo, eyaya. ¹³ Yahuaajo nei ojjaña pana jimahuaajo eya yania tii tiia poa. Quijje ojjaña meshijo chama'yo tii poajo eya ani tiitije'yo. ¹⁴ Ojjaña ecuea epeeji cuana quea boejea, daqui quea boejea jayojja quea bihui nee poaje. Oya cuana acuijjajja eba'e tiitii mee'yojji ijia meeje. Eyacuiñajjiya cuiñajji eyacua huasijje dobiqúi meeje'yo esecueje. ¹⁵ Ojjaña joya quea mimishi poani epoquijji pojjeama eyahuasijje Eyacuiñajji ani yasijje. Oya cuana ñahuehua jayojja jama quea tai, quea mase; jjajiojji cuiaquijji cuana, pea cojjojji cuana, jjaquecuaquijji cuana pea'ai, esahuaja epeeji cuana pea'ai, siajpepojji cuana pea ai, siajje po majje quea bihui nee poani cuana pea'ai —Jesosa poanaje.

¹⁶ —Eyaya, Jesosaa huoojeanaje ecuea esohuidojojji miqúiana que ecuea esohui huohuiya. E'e, ohuaya miqúiana nijjeya huohui caje ecuea esohui ecuea esohui huohuijji cuana huasijje Asia meshijo ba'eca huasijje. Jodio cuanaja etiquiana Dabi yahuaajo nei Jodio cuanaja emeshi mese poa. Eya ca ca ña Dabija osecua poani. E'e, eya, Jesosa oe nei quea ja'a nee nee nequi, eshequi huiyejji majameta jayojja —Jesosa poanaje.

¹⁷ E'e, eya, Huani jama poani ba'a: —Edojjoshahua Pameya ojjaña iyaa cani Jesosa nijje ejjapeequi'yojji. Jesosaja epeeji cuana ojjaña nijje mimiani jama ba'a: "¡Poecue ojjaña, Jesosa nijje jjapeequicue!"

Jamajjeya shajja'ajja majje ojjaña huohucue jama ba'a: "¡Ojjaña poecue, Jesosa nijje jjapeequicue!"

¡Ojjaña quea naba taja nee nee jayojja poecue Jesosa que! E'e, ba'e tii tii sa poanijo ¡poecue Jesosa que! ¡Ena eba'e tiitii'yojji ishihuacue sosema"! Jesosaja esohui cuana ena eba'e tiitiijji jayojjaya.

¹⁸ Eyaya, Huaniya miqúianaya esohui huohuiaña jama ba'a: ¡iquio Jesosaja esohui shajja'ajja majje jama acue ba'a: ¡Pea esohui e'e nei pojjeama a'a huohuijji! Pea esohui e'e nei pojjeama miya huohuiajo Eyacuiñajjiya quea nee nee tii tii po mee caje'yo. E'e, esohuidojojji cuanaja aquiana quea nee nee epo meejiya miqúianaya quea nee nee po mee caje'yo. ¹⁹ ¡iquio Jesosaja esohui jayojja jama huohui sa po ajja shajjama' poanijo Eyacuiñajjiya ma shajjama' cuana cajaa acaje'yo. Jamajoya shajjama' cuana eba'e tiitii mee'yojji pojjeama Jesosa nijje. E'e, ma acuijjajja eba'e tiitii mee'yojji ijia mee jjima acaje'yo. Eyacuiñajjiya cuiñajji quea pame nee yasijje dobi meequi jjima acaje'yo. ¡iquio esohui esohuidojojjiya huohui cajo eyaya tehue'yonaje.

²⁰ E'e, Jesosa Quitohua ojjaña ¡iquio esohui etehue'yo cuana huohui canaje. Ohuaya huohui cani jama ba'a: —¡E'e jojo nei eya quijje pishana poeje o'oya!

²¹ E'e, ¡jamaya capoe'yahua! ¡Jesosaa ojjaña Eyacuiñajjiya epeeji cuana cajaanuana cahua quea pame nee!

Mahuiso Jesosaa jjanequipana meequi canaje ecuea ebajji ojjaña ohua acaje quijje. Eya, Huani ¡iquio esohui tehuenaje. Apoa.